


Tuhun cha sañahá ra
Jesucristo chi yo



New Testament in Mixtec, Jamiltepec (MX:mxt:Mixtec,
Jamiltepec)

Tuhun cha sañahá ra Jesucristo chi yo

New Testament in Mixtec, Jamiltepec (MX:mxt:Mixtec, Jamiltepec)

copyright © 1983 Wycliffe Bible Translators, Inc.

Language: Mixtec, Jamiltepec

Translation by: Wycliffe Bible Translators, Inc.

Mixteco, Jamiltepec [mxt], Mexico

Copyright Information

© 1983, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Jamiltepec

© 1983, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files dated 29 Jan 2022
7411d349-0f34-5963-987e-74457a7bad38

Contents

San Mateo	1
San Marcos	70
San Lucas	113
San Juan	188
Hechos	241
Romanos	305
1 Corintios	333
2 Corintios	359
Gálatas	377
Efesios	387
Filipenses	397
Colosenses	404
1 Tesalonicenses	411
2 Tesalonicenses	417
1 Timoteo	420
2 Timoteo	428
Tito	434
Filemón	438
Hebreos	440
Santiago	460
1 Pedro	467
2 Pedro	475
1 Juan	480
2 Juan	487
3 Juan	488
Judas	489
Apocalipsis	492

Tuhun Nyoo Cha Tyaa San Mateo

Ñáyivi vachi ra Jesucristo tata

(Lc. 3.23-38)

¹ Ican ihya cuví sivi ñáyivi vachi ra Jesucristo tata. Tata ra David ta tata ra Abraham cuví chi ra.

² Sehe ra Abraham cuví chi ra Isaac, sutu ra Jacob. Ta sehe ra Jacob cuví chi ra Judá ta yañi ra.

³ Ta sehe ra Judá chihin cu Tamar cuví chi ra Fares ta ra Zara. Ta sehe ra Fares cuví chi ra Esrom sutu ra Aram.

⁴ Ta sehe ra Aram cuví chi ra Aminadab sutu ra Naasón. Ta sehe ra Naasón cuví chi ra Salmón.

⁵ Ta sehe ra Salmón chihin cu Rahab cuví chi ra Booz. Ta sehe ra Booz chihin cu Rut cuví chi ra Obed, sutu ra Isaí.

⁶ Ta sehe ra Isaí cuví chi rey David. Ta sehe rey David chihin ñaha cha cuví ñasihí ra Urías cuví chi ra Salomón.

⁷ Ta sehe ra Salomón cuví chi ra Roboam sutu ra Abías. Ta sehe ra Abías cuví chi ra Aza.

⁸ Sehe ra Aza cuví chi ra Josafat, sutu ra Joram. Ta sehe ra Joram cuví chi ra Uzías.

⁹ Sehe ra Uzías cuví chi ra Jotam, sutu ra Acáz. Ta sehe ra Acáz cuví chi ra Ezequías.

¹⁰ Sehe ra Ezequías cuví chi ra Manasés, sutu ra Amón. Sehe ra Amón cuví chi ra Josías.

¹¹ Sehe ra Josías cuví chi ra Jeconías ta yañi ra. Cacacu ra quivi catiñ ra ñuu Babilonia chi ñu Israel, cuahan coyo ñu cua sacuvi ñu tyiño nuu ñu.

¹² Cha yaha cuan, ta chicoo sehe ra Jeconías, ta ican cuví ra Salatiel sutu ra Zorobabel.

¹³ Ta sehe ra Zorobabel ican cuví chi ra Abiud sutu ra Eliaquim. Ta sehe ra Eliaquim cuví chi ra Azor.

¹⁴ Ta sehe ra Azor cuví chi ra Sadoc sutu ra Aquim. Ta sehe ra Aquim cuví chi ra Eliud.

¹⁵ Ta sehe ra Eliud cuví chi ra Eleazar sutu ra Matán. Ta sehe ra Matán cuví chi ra Jacob.

¹⁶ Ta ra Jacob cuví sutu ra José yíi cu María. Ican ña cuví sihi ra Jesús ra cuví Cristo, o cuñí chi catyí, ra cha saquichi Nyoo vatyi cuví ra rey cuenda yo.

¹⁷ Ra Abraham chicoo uchi cumi tahan tata ra nyacua nya cacu ra David. Ta ra David chicoo uchi cumi tahan tata ra nyacua nya quivi tiñ ñu Babilonia chi ñu Israel. Ta nyacua nya quivi cuan chicoo uchi cumi ca tahan tata ñu nyacua nya quivi cacu ra Cristo.

Nu cacu ra Jesucristo

(Lc. 2.1-7)

¹⁸ Tyehé caa cacu ra Jesucristo: Cha yaha cundaa tyiño cha cutandaha cu María, sihi ra Jesús, chihin ra José. Ta cha ni cumañi ca coo ñu chihin tahan ñu, chichohon sehe ña, soco cha cuenda maa Tatyí Ii Nyoo.

¹⁹ Ta ra José ra cua cuví yíi ña, cuví ra noo ra vaha. Ta ña cuñí ra cuhva ra tìcahan nuu chi ña, yucuan chaha tyaa ra cuhva cha sandoo xehe ra chi ña.

²⁰ Ta cha ni ri ca cha chicá xiñi ra tyicuan caa, tuví noo ángel Sutu Mañi yo nuu ra nu quixí ra. Ta nyehé ra ñumahna ta catyí ángel cuan chi ra tyehé caa:

—Yoho José, tata ra David cuvún. Ma caca iñun quehun chi cu María cuvi ña ñasihun, vatyí sehe ña cha cua cacu, cuenda Tatyí li Nyoo cuví.

²¹ Ta cha yaha cacu cha lee cuan, cusacunañun chi cue: Jesús. Tyicuan caa cunañi ra vatyí cusacacu ra chi ñáyivi chihin cuatyí ñu.

²² Tandihí ihya cuví tacuhva nachino cava tuhun cha cahān Sutu Mañi yo chihin yuhu ra cacuví profeta ra ta cha naha, ra cachahá cuenda tuhun cahān ra.

²³ Ta catyí ra tyehe caa:

Ñaha tyivaa cha ta coo ca rayí chi, cucohon sehe ña.

Ta coo noo sehe ña. Ta cunañi cue: Emanuel.

Ta sivi cuan cuñí chi catyí: “Nyoo nyaá ra chihin yo.” Catyí ángel cuan chi ra José chichi ñumahna.

²⁴ Cuhva cha nducachi iñi ra José, sacuví ra tari kuhva catyí ángel cuan chi ra. Ta quehen ra chi cu María vatyí cuvi ña ñasihí ra.

²⁵ Soco ña chiyo ra chihin ña cha numi ri. Nyacua nya cha yaha cacu sehe ña. Ta sacunañi ra chi cue: Jesús.

2

Nu cuahan coyo ra chiñi tuñi cua nyehe ra nu cacu ra Jesús

¹ Cacú ra Jesús noo ñuu cha nañi Belén. Ta ñuu cuan nyaá chi nu cuví Judea. Ta rey Judea cuan nañi ra Herodes. Tyicuan ta chaq coyo suhva ra nya ñuu Jerusalén. Quichí coyo ra ityi nu caña ñanyii. Ta ra cachiñi tuñi xaan cacuví ra.

² Ta candaca tuhun ra chi ñáyivi tyehe caa:

—¿Nya nyaá ra cuvi rey cuenda ñu Israel? Vatyí ityi nu caña ñanyii nyehe ndi tiño cha chahā cuenda tyi cacú ra ityi ihya. Ta vachi ndi vachi sacahnu ndi chi ra —cacatyí ra.

³ Ta quivi cha chitō rey Herodes tuhun cuan cutyoño cuñi ra. Ta tyicuan caa tucu tandihí ñáyivi ñuu Jerusalén cuan.

⁴ Tyicuan ta canā ra Herodes chi tandihí ra cacuví nuu chi tata sutu ta ra casacuahá ley vehe ñuhu. Ta ndaca tuhun ra chi ra, nya maa maa tahán chi cacu ra Cristo.

⁵ Ta canacahān ra cuan ta cacatyí ra tyehe caa:

—Ñuu Belén ityi Judea, yucuan tahán chi cacu ra vatyí tyehe caa catyā ra profeta Nyoo nu tutu ta cha naha:

⁶ Ta yoho ñuu Belén ityi Judá, vasi ñuu luhlu ri cuvún cha nuu ñuu nahnu ca iyó ityi Judá nu nyaún.

Soco cahnu ca cucuvun vatyí Belén chiña cucacu minoo ra cunyaca ñaha.

Ta cusaha cumi ra chi ñu Israel ñáyivi cuende.

Tyicuan caa catyí nu tutu Nyoo, —cacatyí ra cuan chi ra Herodes.

⁷ Tyicuan ta canā xehe ra Herodes chi ra chiñi tuñi cuan, ta ndaca tuhun ra chi ra ñáá kuhva ta ñáá quivi canā tiño cuan.

⁸ Tyicuan ta tachí ra chi ra nya ñuu Belén, ta catyí ra chi ra:

—Cuahan ndo, ta ndūcu tuhun vaha ndo tuhun cha lee cuan. Ta tatu nañihi ndo chi cue, ta quichi catyí ndo chii, tacuhva vatyí cuhun tucu yuhu cusacahni chi cue —catyí ra Herodes chi ra.

⁹ Cha yaha cachiñi ra chiñi tuñi cuan cha catyí ra Herodes, caquehen ra ityi ta cuahan coyo ra. Ta tiño cha canyehe ra ityi nu caña ñanyii cuan, cuahan ti ityi nuu ra. Ta chicuñi ti maa maa siqui nu catuví cha lee cuan.

10 Ta cuhva cha canyehę ra chiñi tuñi cuan tyi chicuiñi tiño cuan, si xaan cacuñi ra.

11 Ta caquiñvi ra chichi vehe nu catuvi cha lee cuan. Ta cananyehe ra chi cue chihin cu María sihi cue. Ta chicuiñi chiti ra vatyí sacahnu ra chi cue. Tyicuan ta canuñā ra yuhu caja cha canyisó ra. Ta catava ra regalo cha cuví xuhun cuaan, ta cutu vixi chahán, ta ndutya vixi chahán cha nañi mirra. Ta cachaha ra chi cue.

12 Yaha cuan ta catahan ra ñumahna ta cutuñi iñi ra vatyí ña tahán chi canayaha ra ityi nu nyaá ra Herodes, yucuan chaha siin ca ityi cuanuhu coyo ra.

Nu chino xehe ra José ta cu María chihin cha lee nya Egipto

13 Cha yaha cuahan coyo ra chiñi tuñi cuan, tyicuan ta noo ángel Sutu Mañi yo tuví nuu ra José chichi ñumahna. Ta catyí ra chi ra:

—Ndicuita, quehen chi ra lee ihya, ta chi sihi ra, ta cuhun ndo nya Egipto. Ta yucuan cunyaa ndo nyacua nya sacote chi ndo. Vatyí ra Herodes cunanducu ra chi cha lee ihya vatyí cahñi ra chi cue.

14 Tyicuan ta ndicuita ra José cha cuaa cuan. Ta quehen ra chi cha lee cuan ta chi sihi cue. Ta cuahan ñu nya Egipto.

15 Ta yucuan chinyaa ñu nyacua nya cha chihí ra Herodes. Tyehe caa cuví tacuhva na chino cava tuhun cahán Nyoo cha tyaa ra profeta ta cha naha. Tyehe caa catyí ra: “Nya ñuu Egipto canę chi Sehi”, catyí ra.

Nu tachi ra Herodes na cahñi ra chi ra cuatyaa

16 Cha tuví iñi ra Herodes vatyí ra cachiñi tuñi cuan sandavi ñaha ra chi ra, nduxaan vavaha ra. Ta tachi ra tyiño na cacahñi ra chi ra cuatyaa cha iyó ñuu Belén cuan ta ndaha ñuu ñandihí, ra cuatyaa cha ni cacu nyacua nya cha uvi cuiya. Tyicuan caa sacuvi ra vatyí nandichí xiñi ra vatyí tyicuan tahan cuiya ra Jesús tari cuhva catyí ra chiñi tuñi cuan chi ra.

17 Tyicuan caa chino cava tuhun cahán Nyoo cha tyaa ra Jeremías profeta Nyoo ta cha naha, ta catyí ra tyehe caa:

18 Tyacú noo ndusu ñuu Ramá, cha chacú chaa ñáyivi, ta iyo tahan ñu.

Ta ican cuví ñáyivi tata cu Raquel, ñáyivi Israel, chacú chaa ñu cha cuenda sehe ñu.

Soco ña cuñi ñu cha naquehen ndahvi ñu chi ñu cha cuenda cha cachihí sehe ñu, catyí chi nuu tutu Nyoo.

19 Soco cha yaha cha chihí ra Herodes, tyicuan ta tuví tucu noo ángel cha tachi Sutu Mañi yo nuu ra José nu quixí ra ñuu Egipto. Ta catyí ra chi ra:

20 —Ndicuita ta quehen chi cha lee chiña, ta chi sihi cue. Ta cuanuhu ndo nya ñuu Israel, vatyí cha chihí ra nducu cahñi chi cue.

21 Tyicuan ta ndicuita ra José, ta quehen ra chi cha lee cuan ta chi sihi cue. Ta cuanuhu coyo ñu nya Israel.

22 Soco quivi chito ra José vatyí ra Arquelao cuví ra rey tyiño nuu sutu ra, ra Herodes, nya Judea, nayuhvi ra ta ña cuñi ra cuhun ra yucuan. Ta vatyí sacoto Nyoo chi ra chichi ñumahna, yucuan chaha cuanuhu ñu nya Galilea.

23 Cha chaa ñu yucuan, cuahan ñu nya ñuu Nazaret, cua coo ñu. Ta yucuan chiyó ñu. Tyehe caa cuví tacuhva chino cava tuhun cha cahán Nyoo, cha catyaa ra profeta ta cha naha. Vatyí catyí ra tyi ra Jesús ra ñuu Nazaret cucunañi ra.

3

*Ra Juan ra sacondutyā chi ñáyiví cahán ra tuhun Nyoo chihin ñu
(Mt. 1.1-8; Lc. 3.1-9, 15-17; Jn. 1.19-28)*

¹ Quiví cuan ra Juan ra sacondutyá chi ñáyiví cuahan ra noo chiqui nd# ityi Judea. Ta quichahā cahan ra tuhun Nyoo chihin ñu.

² Ta catyí ra:

—Ndu uvi iñi ndo cuatyí ndo vatyí cha yatyin nyaá Nyoo ra cua cunyaca ñaha añima yo.

³ Ican tuhun ra Juan ihya cuví cha tyaā ra Isaías ra cuví profeta Nyoo ta cha naha. Tyehe caa tyaā ra:

Chiñí yo cha caná chaa noo ra noo nu chiqui nd# ta catyí ra:

“Tari sanduvahá ndo noo ityi, tyicuan caa sanduvaha ndo añima ndo, vatyí cua quichi Sutu Mañi yo.

Nuña ndo noo ityi ndoo chi ra naquihví ra añima ndo.”

⁴ Ta ra Juan ñihno ra sahma chingo chihin ixí camellu. Ta sincho ra, ñ# cuví. Ta maa maa ri pinchi chachí ra ta tyañuñu cuhu chihí ra.

⁵ Ñáyiví ñuu Jerusalén ta tandihí ñu ñuu cha nyicú Judea, ta ñu ca iyó yatyin ri ityi yuvi cahnu Jordán cuan, quichi coyo ñu, quichí tyasoho ñu tuhun cahán ra.

⁶ Ta cha yahā nahma ñu cuatyí ñu, ra Juan sacondutyā ra chí ñu yuvi cahnu Jordán cuan.

⁷ Soco ra Juan nyehe ra vatyí cuaha xaan ra fariseo, ra quichahá xaan ley vehe ñuhu, ta cuaha xaan ra saduceo, caquichí coyo ra vatyí condutya ra. Ta catyí ra chí ra:

—iNyoho, tari noo tata coo xaan cuví ndo! ¿Yóo cha sacoto chí ndo vatyí chihin cha condutya ri ndo ta ma tachi tuñi ca Nyoo chí ndo? Ña ndicha.

⁸ Ço ndo noo cha quetuví vaha tyi ndicha cha ndu uvi iñi ndo cuatyí ndo.

⁹ Ta ma cuyaa ndo catyí ndo vatyí tata ra Abraham vachi ndo. Vatyí nyacua nya chihin yuu ihya ta cuví savaha Nyoo ñáyiví tata ra Abraham.

¹⁰ Tari yutun cha ña chahá chiti, tyicuan caa cuví ndo. Vatyí ña sacuví ndo tari cuhva cuñí Nyoo. Ta yutun cha ña chahá chiti, cahnya ñáyiví chí tun. Ta cahmi ñu chí tun. Tyicuan caa tucu nyoho, cuhun ndo nu cayú ñuhu.

¹¹ Cha ndicha vatyí yuhu sacondutyé chí ñáyiví chihin ndutya, tari noo seña vatyí cha ndu uvi iñi ñu cuatyí ñu. Soco cha yaha sacondutya yuhu chihin ndutya, vachi inga ra cusacondutya chí ñáyiví chihin Tatyí Ii Nyoo ta chihin ñuhú ihñi. Iyó ca tunyee iñi chí maa ra ta ñima ca yuhu. Ta ni cha cuise ndichan ra ta ña nañe, vatyí cahnu xaan ca ra cuví ra.

¹² Tari noo ra cha cua naquehen vaha trigo ta natyihí vaha ra chichi yaca ta mihin cahmi ra, tyicuan caa cuví maa Sutu Mañi yo chihin yo. Tatu chinó iñi yo chí ra cunaquehen vaha ra chí yo. Ta cunyicu yo chihin ra. Soco tatu ña chinó iñi yo chí ra cutyihí ra chí yo anyaya nu cayu ñuhú cha ma ndahva ca maa —catyí ra Juan.

*Nu condutya ra Jesús
(Mr. 1.9-11; Lc. 3.21-22)*

¹³ Tyicuan ta quitā ra Jesús Galilea ta chaā ra yuvi cahnu Jordán nu ñohó ra Juan, vatyí cuñí ra cha sacondutya ra Juan chí ra.

¹⁴ Cha xihna ri ña cuñí ra Juan sacondutya ra chí ra, ta quichahā catyí ra chí ra Jesús tyehe caa:

—Yoho cuñún cha sacondutyé chuun, soco ña tahán chi cha sacondutyá yuhu chuun. Maun tahán chi sacondutyon chii —catyí ra.

¹⁵ Soco ra Jesús catyí ra chi ra:

—Cha vityín, na cuví chi cuhva catyí yuhu chuun. Vatyí cuñí chi cha sacuvi yo tandihí cha cuñí Nyoo —catyí ra chi ra Juan. Tyicuan ta ndoo ra Juan vaha.

¹⁶ Cha yahá ri condutyá ra Jesús ta quitá ra chichi ndutyá. Ta nuña ri andiví, ta ra Jesús nyehe ra yoso caa vachi noó Tatyí lí Nyoo, tari noo paloma, ta chaá chi síqui ra.

¹⁷ Tyicuan ta tyacu noo ndusu ityí andiví, ta catyí chi tyehe caa:

—Ican ra ihya cuví Sehi, ra cuñí xain chi. Ta síi xaan cuñí chihin ra —catyí ndusu cuan.

4

Nu nducú nyehe cuihna chi ra Jesús

(Mr. 1.12-13; Lc. 4.1-13)

¹ Tyicuan ta Tatyí lí Nyoo chinyacá chi ra Jesús noo chiqui ndii, tacuhva nducu nyehe cuihna chi ra.

² Ña chachí ra uvi xico quiví ta uvi xico ñuu. Ta yahá cuan ta chaá soco chi ra.

³ Tyicuan ta tuhva cuihna chi ra, vatyí cuñí ra nducu nyehe ra chi ra. Ta catyí ra chi ra:

—Tatu ndicha cha Sehe Nyoo cuví chuun, sananduvi pan yuu ihya —catyí cuihna chi ra Jesús.

⁴ Soco ra Jesús nacahan ra ta catyí ra:

—Tuhun Nyoo catyí chi tyehe caa: “Ñima chihin cha cachi ri ñáyiví ta conyito ñu. Conyito tucu añima ñu chihin tuhun cahán Nyoo” —catyí ra Jesús chi cuihna cuan.

⁵ Tyicuan ta chinyacá cuihna cuan chi ra Jesús nya ñuu Jerusalén. Ta sandaa cuan chi ra xiñi vehe ñuhu cahnu cuan.

⁶ Ta catyí cuan chi ra:

—Tatu ndicha cha Sehe Nyoo cuvún, sandupehla nyacua nya nu sucun ihya ta nyacua nya nu ñuhú. Vatyí nyaá nu catyí chi nu tutu Nyoo tyehe caa: “Nyoo cusaquichí ra ángel, quichí saha cuenda chuun. Cunaquehen ra chuun chihin ndaha ra ta ma cuhva ra cha taxin chahun chihin yuu” —catyí cuihna cuan chi ra.

⁷ Ta nacahan ra Jesús ta catyí ra:

—Soco catyí tucu chi nu tutu Nyoo tyehe caa: “Ma nducu nyehun chi Sutu Mañi yo Nyoo” —catyí ra Jesús chi cuihna.

⁸ Tyicuan ta chinyacá tucu cuihna cuan chi ra noo yucu sucun. Ta sañaha cuan tandihí cha cahnu cuví nu nyacá ñaha rey ta ra cuví tyiño chi ñáyiví iyó síqui ñuhu ñáyiví.

⁹ Ta catyí cuihna cuan chi ra tyehe caa:

—Yuhu cuhve tandihí maa ihya chuun, tatu yoho ta cuiñi chitun nui ta sacahnun chii —catyí cuan chi ra.

¹⁰ Tyicuan ta nacahan ra Jesús ta catyí ra chi cuihna cuan:

—Canyaha chuun nui, yoho cuihna. Vatyí tuhun cahán Nyoo nyaá chi nu tutu ta catyí chi tyehe caa: “Noo ri chi maa Nyoo sacahnun yo. Ta ñn ri chi maa ra quichaha yo.”

¹¹ Tyicuan ta cuahan cuihna cuan, ta ndoo ra Jesús, ta chaá coyo ángel ta tyinyeé ra chi ra.

Nu quichahā saha tyiño ra Jesús ñuu cha nyicú ityi Galilea

(Mr. 1.14-15; Lc. 4.14-15)

¹² Quivi cha chito ra Jesús vatyi ra Juan ñohó ra vehe caa, cuahan ra nya Galilea.

¹³ Soco ña ndoo ra ñuu Nazaret, nu chahnū ra. Cuahan ra cua coo ra nya ñuu Capernaum, noo ñuu cha nyaá yatyin ri yuhu miñi, cha nyaá yatyin ñuhú cuenda ra Zabulón chihin ñuhú ra Neftalí.

¹⁴ Tyehe caa cuví tacuhva chino cava tuhun cha tyaa ra Isaías nu tutu Nyoo ta cha naha. Catyí chi tyehe caa:

¹⁵ Ñuhú ra Zabulón ta ñuhú ra Neftalí cha nyaá yuhu miñi inga chiyo yuvi cahnu Jordán, cha cuví Galilea nu iyó ñu ñima ñu Israel cuví.

¹⁶ Chinyicu añima ñu nu ñaa iñi vatyi chinyaca ñaha ra ña vaha chi ñu chihin tuhun chihi, soco sandundichín ñuhū Sutu Mañi yo añima ñu nu nyicú ñu, catyí ra Isaías.

¹⁷ Nyacua nya quivi cuan, ta quichaha cahan ra Jesús tuhun Nyoo chihin ñáyivi, ta catyi ra chi ñu:

—Ndu uvi iñi ndo cuatyí ndo vatyi yatyin ri nyaá Nyoo ra cua cunyaca ñaha añima ndo —catyí ra Jesús chi ñáyivi.

Nu canā ra Jesús chi cumi tahan ra catín tiyaca

(Mr. 1.16-20; Lc. 5.1-11)

¹⁸ Ra Jesús chicá noo ra yuhu miñi cha nañi Tyañuhu Galilea cuan. Ta nanyehē ra chi uvi tahan ra chihin yañi ra, ra Simón cha nañi tucu Pedro, ta ra Andrés. Ra catín tiyaca cacuví ra. Ta cacañi ra yuhva ra nu ndutya.

¹⁹ Tyicuan ta quichahā catyi ra Jesús chi ñanduvi ra tyehe caa: —Tuyicon ndo chii. Ta yuhu cusacuvi vatyi tari ñihí ndo tiyaca, tyicuan caa cuñihi ndo anima ñáyivi (ta cutava ndo chi ñu nu quíñi caa na quihvi ñu cuenda Nyoo) —catyí ra Jesús chi ra.

²⁰ Caa cuhva ri cuan casandoḡ ra yuhva ra ta cuahan coyo ra chihin ra Jesús.

²¹ Chiin ri ca chicā ra Jesús ityi nuu ca ta nanyehē ra chi uvi ca ra chihin yañi ra, ra Jacobo ta ra Juan. Sehe ra Zebedeo cacuví chi ra. Canyicú ra chichi noo canoa chihin sutu ra canaquicú ra yuhva ra. Ta canā ra Jesús chi ra.

²² Ta caa cuhva ri cuan casandoḡ ra canoa cuan ta chi sutu ra, ta cuahan coyo ra chihin ra.

Nu sañahá ra Jesús chi cuaha ñáyivi

(Lc. 6.17-19)

²³ Cuahan ra Jesús chicá noo ra tandihí ñuu cha nyicú Galilea sañahá ra chichi vehe ñuhu tahan tahan ñuu. Cahán ra tuhun vaha yoso caa nyacá ñaha Nyoo añima yo. Ta sanduvahā ra chi ñu cuhví chihin tandihí ri nuu cuehe cha iyó chi ñu.

²⁴ Cachitó tandihí ñáyivi ñuu cha nyicú Siria tuhun ra Jesús. Ta quichí nyaca ñu tandihí ñu cuhví chi ra: tandihí ñu siin siin cuehe tahán. Ta suhva ñu yihí tatyí ña vaha chi ñu. Ta yihí ñu, yihí cuehe chihi tañi chi ñu. Ta yihí ñu ña cuví nacanda ñu. Ta ra Jesús sanduvahā ra chi tandihí ñu.

²⁵ Cuaha xaan ñáyivi nyicón chi ra Jesús: ñáyivi iyó ñuu cha nyicú Galilea, ñáyivi iyó ndi uchi ñuu Decápolis, ñáyivi iyó ñuu cha nyicú Judea, ta ñáyivi iyó inga chiyo yuvi cahnu Jordán ñandihí.

5

*Nu cahán ra Jesús nuu ñáyivi nu chiqui
(Lc. 6.20-23)*

1 Cuhva cha nyehe ra Jesús tyi cuaha xaan ñáyivi, ndaa ra noo nuu yucu. Ta chicunyaá ra yucuan. Tyicuan ta ñu nyicón chi ra chicunyiꝑ ñu nicachico nu nyaá ra.

2 Tyicuan ta quichaha sañaha ra Jesús chi ñu tyehe caa:

3 —Tandihí ri ñu cha chitó vatyi chiñuhú Nyoo chi ñu, sñi xaan cucuvi chi ñu, vatyi tahán chi vatyi cunyaca ñaha Nyoo añima ñu.

4 *Ta tandihí ri ñu nducuihya iñi vityin cha catyi cuatyí ñu, sñi xaan cucuvi chi ñu. Vatyi cusanaa Nyoo cha cuihya iñi ñu.

5 *Tandihí ri ñu cha ña cahnu sahá chi, sñi xaan cucuvi chi ñu, vatyi cuquehen cuenda ñu ñuhu ñáyivi cha catyi Nyoo tyi cuhva ra chi ñu.

6 *Ta tandihí ri ñu cuñi xaan sacuvi cuhva catyi Nyoo, sñi xaan cucuvi chi ñu, vatyi Nyoo cutyinyee ra chi ñu tacuhva cuvi sacuvi ñu.

7 *Ta tandihí ri ñu cha iyó tucahnu iñi chi, sñi xaan cucuvi chi ñu, vatyi Nyoo, cucoo ticahnu iñi chi ra chihin ñu.

8 *Ta tandihí maa ñu ndundii añima saha Nyoo, sñi xaan cucuvi chi ñu, vatyi ñu cuan, cunyehe ñu chi Nyoo.

9 *Ta ñu nducú cuhva cha coo taxi ri ñáyivi chihin Nyoo sñi xaan cucuvi chi ñu, vatyi Nyoo, cucatyí ra tyi sehe ra cuví chi ñu.

10 *Ta tandihí ñu cha tasi cuñi nyehe ñáyivi chi ñu cha catyi cha sacuví ñu tari cuhva catyi Nyoo, sñi xaan cuví chi ñu, vatyi nyacá ñaha Nyoo añima ñu.

11 *Na cusñi cuñi ndo tatu cahán ña vaha ñáyivi siqui ndo. Ta sanyehé ñu tindoho chi ndo. Ta tavá ñu cuaha cuendu siqui ndo cha catyi yuhu.

12 Na cusñi cuñi ndo vatyi tatu tyehe caa sacuví ñu chihin ndo, sñi xaan cucuvi chi ndo, vatyi cahnu xaan ta tyaqui xaan cha cutahan chi chi ndo, nachaa ndo andivi. Vatyi suri tyicuan caa chinyacuví tucu ñu cha ña vaha chihin ra cacuví profeta cuenda Nyoo ta cha naha.

*Tatu sandihí yo cha chinó iñi yo chi Nyoo cuví yo tari ññi cha ndihí cha uhva
(Mr. 9.50; Lc. 14.34-35)*

13 Nyoho cha chinó iñi ndo chii, tari ññi vaha cuví ndo. Soco tatu ññi, ta ndihí cha uhva, ma sacu uhva ca chi cha cachi yo. Ña vaha ca ññi cuan. Tyicuan ta sacuita yo. Ta cuañi ñáyivi siqui chi.

Tatu vaha quichaha yo tuhun cahán Nyoo, cuví yo tari ññi cha sandundichín nu cuahan ñáyivi nu ñaa iñi

14 *Nyoho cuví ndo tari ññi cha sandundichín nu cuahan ñáyivi. Noo ñuu cha nyaá xiñi noo yucu, ma cuví quiñi xehe. Tyicuan caa tahán chi cuví ndo.

15 Ta yori yo cha tyaa yo noo ññi tima, ta tixehe yo chichi noo caja. Soco tyiso yo noo nu sucun vatyi sandichín chi chichi vehe tatu cua quiñi ñáyivi, soco ndichin.

16 Ta tyicuan caa tahán chi sandundichin tucu nyoho chihin ññi Nyoo cha iyó añima ndo nu cuahan ñáyivi. Tyicuan ta nanyehe ñu cha vaha cha nyacuví ndo, ta sacahnu ñu chi Sutu yo Nyoo ra nyaá andivi.

Sañahá ra Jesús vatyi ññi xaan sacuvi yo ta sañaha yo tandihí tuhun cha tachí Nyoo chí yo

17 *Ma cuñi ndo vatyi yuhu vachi sanai ley cha tachí Nyoo chi ra Moisés vatyi tyaa ra. Ta ni ri ña vachi sanai tuhun cha tyaa ra cacuví profeta cuenda

Nyoo ta cha naha. Yuhu ña vachi vatyi sanai yucuan. Soco vachi quichahi tandihí cha catyí tuhun cuan, ta sañahí ñáá cha cuñí chi catyí.

¹⁸ Cha ndicha catyí chi ndo vatyi cha ni ri ca cha iyó ca andivi chihin ñuhu ñayivi ma naa ni chiin cha tyaq ra Moisés ta ra cacuvi profeta Nyoo ta cha naha, nyacua nya yaha cuvi tandihí tari cuhva nyaá cha catyaq ra.

¹⁹ Yucuan chaha, tatu ña quichahá ñáyivi tuhun cha tachí Nyoo chi ñu, vasi noo tuhun luhlu ri cuví, ta tatu chasi ñu nu quichaha inga ñáyivi, luhlu xaan cucuvi ñu nu nyacá ñaha Nyoo. Soco ñu cha quichahá tandihí, ta sañahá tucu ñu chi inga ñáyivi. Ican ñu cuan cahnu xaan cucuvi ñu nu nyacá ñaha Nyoo.

²⁰ Vatyi cuñí chi cha quichahá vaha ca ndo chi Nyoo ican saha ra sacuahá cuenda ley vehe ñuhu, ta ra cacuví fariseo. Yucuan ta cuvi quihvi ndo nu nyacá ñaha Nyoo.

Nu sañahá ra Jesús chi yo vatyi ma cuxaan yo chi ñáyivi

²¹ Nyoho cha cuaha chaha chiñi ndo tuhun cha catyí Nyoo chi ñu chiyo ta cha naha. Catyí ra: “Ma cahñi ndo chi ñáyivi, vatyi tatu cahñi ndo ñáyivi, tahán chi cutuñi chi ndo.”

²² Soco yuhu, catyí chi ndo, vatyi vasi cha cuxaan ri ndo chi noo ñáyivi, o vasi cha cahán uhvi ri ndo chi ñáyivi, o vasi cha cahán nya ri ndo chi ñáyivi, tahán chi cutuñi chi ndo. Ta siñ ri saha cuenda ndo chi ndo coto cuhun ndo anyaya chihin cuatyí cuan.

²³ Ta yucuan chaha quivi cuahun vehe ñuhu, ta nyisón cha cucuhvon chi Nyoo, ta tatu cha nanyaun cha cua cuhvon ta nicohon iñun vatyi ña vaha iyó noo yañun cuhun.

²⁴ Sandoo cha cua cuhvon chi Nyoo yucuan. Ta cuhun vatyi na coo vahun chihin yañun. Tyicuan ta ndichun nya vehe ñuhu, ta cuhva cuendon cha cua cuhvon chi Nyoo.

Sañahá ra Jesús vatyi cacan yo ticahnu iñi cuatyí yo coto cuhun yo anyaya (Lc. 12.57-59)

²⁵ Tatu yóo ra chicán cuatyí chahun, ta cuahan ra chuhun nya nuu ra cuvi tyiño, nandacan ticahnu iñi chi ra ityi cuahun, coto cuhva cuenda ra chuun chi ra cuvi tyiño. Ta ra cuvi tyiño cua cuhva cuenda ra chuun chi policia. Ta policia cuan cutyihi ra chuun vehe caa.

²⁶ Soco catyí chuun vatyi ma cuvi quiton vehe caa cuan nyacua nya tyiyahvun tandihí cha tahán chi tyiyahvun.

Sañahá ra Jesús vatyi ni cha ndichi xiñi yo cha coo nonga ñusihí, o nonga rayií chi yo, ta ña vaha

²⁷ Nyoho chiñi ndo tuhun vatyi catyí Nyoo ta cha naha vatyi nyoho cha iyó ñasihí ndo, ma coo inga ñusihí chi ndo.

²⁸ Soco yuhu catyí chi ndo, vatyi nya nyoho cha nyehé ndo chi noo ñusihí ta quihvi iñi ndo chi ñu, catyí chi ndo vatyi chihin yucuan ri ta cha chicoq cuatyí ndo.

²⁹⁻³⁰ Vatyi tatu chiti nuu chiyo vahun sanacavá chuun nu cuatyí, vaha taxin ca tava ta sacuiton cañi. Vatyi vaha ca quihvun nu nyacá ñaha Nyoo chihin noo chiti nuun, ta ñima ca chihin cha ninduvi chiti nuun ta cuhun nu cayu ñuhú chichi anyaya. O tatu ndahun sanacavá chuun nu cuatyí, vaha taxin ca cahnya ta sacuiton cañi. Vatyi vaha ca cha quihvun nu nyacá ñaha Nyoo chihin cha luu ndahun, ta ñima ca cha naniun ta cuhun nu cayu ñuhú chichi anyaya.

*Nu sañahá ra Jesús siquí ra sandoo ñasihi
(Mt. 19.9; Mr. 10.11-12; Lc. 16.18)*

³¹ Ta suri catyí tucu Nyoo chi ñáyivi chiyo ta cha naha vatyi yóo ra sandoo ñasihi, cuñi chi cuhva ra noo tutu cuenda cha sandoo ra chi ña.

³² Soco catyí yuhu chi ndo, ñahri ityi iyó chi noo ra cha sandoo ra chi ñasihi ra tatu ña natuvi ña chihin inga rayi. Vatyi tatu sandoo ra chi ña, ta ñima cha catyí cuatyí cuan, chicoo cuatyí ra nuu Nyoo. Ta siin ri sacoo ra cuatyí ña vatyi tatu quehen ña inga ra, chicoo cuatyí ña nuu Nyoo. Ta chicoo tucu cuatyí ra cha quehen chi ña cuan.

Ma catyi yo “chito vaha maa Nyoo” tacuhva chino iñi ñáyivi vatyi ndicha cha cahán yo

³³ Ta chiñi tucu ndo, vatyi catyí tucu Nyoo chi ñu chiyo ta cha naha tyehe caa: “Tatu tyanaha ndo Nyoo tyi cusacuvi ndo noo cha cusacuvi ndo, tahan chi cha sacuvi ndo.”

³⁴ Soco yuhu catyí chi ndo vatyi ma tyanaha ndo Nyoo tacuhva chino iñi ñáyivi vatyi ndicha cha cahán ndo. Ta ma tyanaha ndo ni tuhun andivi, vatyi yucuan nu nyaá maa Nyoo cuví.

³⁵ Ta ni ri tuhun ñuhu ñayivi ihya ma tyanaha ndo, vatyi yucuan cuví nu chañi Nyoo. Ta ni ri tuhun ñuu Jerusalén, ta ma tyanaha ndo, vatyi yucuan cuví ñuu Nyoo ra cuví Rey cha cahnu ca.

³⁶ Ta ni ri tuhun xiñi ndo, ta ma tyanaha ndo, vatyi ma cuví sanducuichin ndo ni noo ixi xiñi ndo. Ta ni ma cuví sandutoon tucu ndo.

³⁷ “Ican” catyí ndo, tatu ican. Soco tatu ñima, “ñima”, catyí ndo. Ta ma tyanaha ndo Nyoo vatyi ra ña vaha tyiyuhú chi ndo cuví cuan.

*Nu sañahá ra Jesús vatyi tatu sacuvi ñáyivi cha ña vaha chihin yo, na sacuvi yo cha vaha chihin ñu
(Lc. 6.29-30)*

³⁸ Ta chiñi tucu ndo cha catyí tuhun cha tyaá ra Moisés ta cha naha: “Vatyi tatu noo ñáyivi cañi ñu nuu ndo, ta tahvi noo noho ndo, o tiví noo chiti nuu ndo, o nya chi ndo sañicuehe ñu, tahan chi vatyi sañicuehe tucu ñáyivi chi maa ñu, tari cuhva cha sañicuehe ñu chi ndo.”

³⁹ Soco yuhu catyí chi ndo, vatyi ma nasacuvi ndo cha ña vaha cha nyacuvi ñu tasi iñi chi ndo. Vatyi tatu yóo cha cañi in chiyo xitin ndo, ma nduxaan ndo chi ñu. Soco cuhva tucu ndo inga chiyo xitin ndo na cañi ñu.

⁴⁰ O tatu chicán ñu cuatyí chaha ndo, ta cuñi ñu tinyaa ñu noo camisa ndo, ma cuxaan ndo chi ñu. Soco cuhva ndihi ndo chaqueta ndo chi ñu.

⁴¹ O tatu yóo cha catyí chi ndo na cuiso ndo cha chii ñu noo kilómetro, cuiso ndo uvi kilómetro.

⁴² Tatu yóo ñu chicán tumañi iñi chi ndo, cuhva ndo chi ñu. Ma catyí ndo cha ma saha ndo tumañi iñi cuan.

*Na cuñi yo chi ñu xaan iñi chi yo
(Lc. 6.27-28, 32-36)*

⁴³ Ta chiñi tucu ndo tuhun cha catyí ñu chiyo ta cha naha vatyi cuñi ndo chi ra tahan ndo. Ta chi ra xaan iñi chi ndo quiñi tisihi iñi ndo chi ra.

⁴⁴ Soco yuhu catyí chi ndo, cuñi ndo chi ñáyivi xaan iñi chi ndo. Ta sacuvi ndo cha vaha chihin ñáyivi cahan chi ndo, ta chi ñu ña cuñi nyehé chi ndo. Ta cacan tahvi ndo chaha ñu quiñi nyacuvi chihin ndo ta sanyehé tindoho chi ndo.

⁴⁵ Ta tyicuan caa sacuvi ndo tacuhva coto ñáyivi vatyí cuví ndo sehe Sutu yo ra nyaá andívi. Vatyí maa ra sacañá ra ñanyii, ta sacoon ra savi siqui tyiño sahá ñáyivi vaha ta ñáyivi ña vaha ñandíhi.

⁴⁶ Tatu nyoho ta cuñí ndo chí ñáyivi cha vaha iyó chihin ndo ta ña cuñí nyehe ndo chí ñáyivi xaan iñi chí ndo, ñahri cha vaha cuñihi ndo. Vatyí suri tyicuan caa nyacuví tucu ra catavá xuhun cuenda gobiernu ñuu Roma. Ta quiñi ca iyó ra cuan cuñí maa ndo.

⁴⁷ O tatu chahá ndo nocumi chí ra tahan ri ndo, ñahri cha vaha xaan nyacuví ndo. Vatyí suri tyicuan caa sacuví tucu ñáyivi ña ñohó nuu Nyoo.

⁴⁸ Tari Sutu yo cha nyaá andívi maa maa ri cha vaha sacuví ra, tyicuan caa nyoho maa maa ri cha vaha sacuvi ndo.

6

Nu sañahá ra Jesús yoso caa sacuvi yo tumañi iñi

¹ 'Saha ndo cuenda ta ma cuyaa ndo ñáá tumañi iñi sacuvi ndo chí ñáyivi. Vatyí tatu cuyaa ndo nuu ñáyivi, ñahri cuñihi ndo nuu Sutu yo ra nyaá andívi.

² Cuhva cha sahá ndo tumañi iñi, ma sacoto ndo chí inga ñáyivi vatyí sahá ndo tumañi iñi. Ma sacuvi ndo tari sacuví ra sahá tyi vaha ta chicá noo ra nuyahvi ta chíchi vehe ñuhu. Sahá ra tumañi iñi tacuhva na catyi ñáyivi vatyí vaha xaan ñáyivi cuví ra. Soco yucuan ri ñihí ra cuan ta ñahri ca cuñihi ra nuu Nyoo.

³ Soco nya quívi sahá ndo tumañi iñi chí ñu ndahvi, ma sacoto ndo ni chí ra tahan cahnu ndo.

⁴ Xehe ri sacuvi ndo, tacuhva cha ma coto ñáyivi. Tyicuan ta Sutu yo Nyoo nyehe ra cha sacuvi ndo tyicuan caa. Ta cuaha ca cha vaha cucuhva ra chí ndo.

Nu sañahá ra Jesús yoso caa cahan yo chihin Sutu yo Nyoo

(Lc. 11.2-4)

⁵ Ta cuhva cha chicán tahvi ndo chí Nyoo, ma cacán tahvi ndo tari cuhva sacuví ñu savahá chii. Vatyí ñu cuan tahán iñi ñu cacán tahvi ñu chí Nyoo nu tuvi ñáyivi, tacuhva catyi ñáyivi vatyí vaha xaan ñáyivi cuví ñu, vaha xaan chinó iñi ñu chí Nyoo. Soco catyi chí ndo cha ndicha vatyí ñahri ca cuñihi ñu nuu Nyoo. Vatyí ñima cha ndicha sacuví ñu.

⁶ Soco nyoho ñáá quívi cacán tahvi ndo chí Nyoo, ma cacán tahvi ndo tacuhva nyehe ri ñáyivi chí ndo. Soco quíhvi ndo chíchi vehe ndo ta ñacasi ndo yuvehe ta cacán tahvi ndo chihin tandíhi añima ndo. Ta noo tuhun ri maa Nyoo Sutu yo nyehe ra cha sacuvi ndo tyicuan caa vatyí nuu maa ra chicán tahvi ndo, ta ñima nuu ñáyivi. Ta cuaha ca cha vaha cucuhva ra chí ndo.

⁷ Cuhva cha cahán ndo chihin Nyoo ñima susuri tuhun cha ñima ri tuhun cahan ndo. Vatyí tyicuan caa sacuví ñu cha ñahri tuhun Nyoo caá añima. Cuñí maa ñu vatyí tyicuan caa ta cuiñi Nyoo cha cahán ñu. Vatyí cuaha xaan chaha cahán ñu susuri maa tuhun cuan.

⁸ Ma sacuvi ndo tyicuan caa. Vatyí Nyoo cha chitó ra ñáá cha chiñuhú chí ndo, cha ni ri ca cha cumañi ca cacán ndo chí ra.

⁹ Yucuan chaha nyoho, tatu cua cacán tahvi ndo chí Nyoo, tyehe caa catyi ndo:

Sutu Mañi yuhu, yoho cha nyaún andívi. Sacahnú xaan ndi chuun.

¹⁰ Na quichi quívi cha nyaca ñahun ihya siqui ñuhu ñáyivi, tari nyacá ñahun andívi.

Na sacuvi ñáyivi ihya siqui ñuhu ñayivi tandihi cuhva cuñi maun, tari cuhva cuví gloria.

¹¹ Cuhva cha cachi ndi tacuhva cha yaha ndi noo noo quivi.

¹² Saha tucahnu iñi chi ndi ñáá ndihi cha ña vaha nyacuví ndi, tari maa ndi sahá ndi ticahnu iñi chi ñu sataśi iñi chi ndi.

¹³ Ma cuhvon cha nducu nyehe ra ña vaha chi ndi, tacuhva ma sacuvi ndi cuatyi nuun. Soco maun cuví ra sacacú chi ndi ndaha ra ña vaha.

Vatyi maun cuví ra nyacá ñaha tandihi. Ta maun cuaha xaan ca tunyee iñi iyó chuun. Ta tahán chi vatyi sacahnu tandihi ñáyivi chuun tyicuan ri maa. Ta na cuví chi tyicuan caa.

Tyicuan caa cuhva tahán chi cacan tahvi ndo chi Nyoo.

¹⁴ Vatyi tatu nyoho ta sahá ndo ticahnu iñi chi ñu nyacuví cha ña vaha chihin ndo, tyicuan caa ta Sutu yo ra nyaá andivi, cusaha ra ticahnu iñi chi maa ndo.

¹⁵ Vatyi tatu ma saha ndo ticahnu iñi chi ñu nyacuví cha ña vaha chihin ndo, tyicuan caa tucu Sutu yo, ma saha ra ticahnu iñi cuatyi maa ndo —catyi ra Jesús.

Ñáa quivi ña chachí yo ta nanducú yo chi Nyoo, ma sacoto yo chi inga ñáyivi

¹⁶ Ta catyi tucu ra Jesús chi ñu chicá noo chihin ra:

—Quivi cha ña chachí ndo ta nanducú ndo chi Nyoo, ma cuihya nyehe ndo, tari ñu savahá chii. Vatyi cuñi ñu cha coto ñáyivi vatyi ña chachí ñu ta nanducú ñu chi Nyoo. Soco catyi chi ndo vatyi yucuan ri ñihi ñu. Ñahri ca cuñihi ñu nuu Nyoo.

¹⁷ Soco tatu nya quivi ña chachí ndo ta nanducú ndo chi Nyoo, ñacatya ndo nuu ndo. Ta ñacuaca ndo cuca xiñi ndo,

¹⁸ tacuhva vatyi ma tuvi iñi ñáyivi vatyi ña chachí ndo ta nanducú ndo chi Nyoo. Tyicuan ta noo tuhun maa Nyoo nyehe ra cha sacuví ndo cha xehe ri cuan. Ta cuaha ca cha vaha cua cuhva ra chi ndo chihin nuu ñáyivi.

Nu sañahá ra Jesus vatyi ma sacaya yo cha iyó siqui ñuhu ñayivi
(Lc. 12.33-34)

¹⁹ Ma sacaya ndo cha tyayii ihya ñayivi. Vatyi coto tiví cha tyayii cuan. O cuví tucu quihvi ra suhu, ta suhu ra tandihi cha tyayii ndo.

²⁰ Vaha taxin ca sacaya ndo cha vaha chi ndo nu nyaá Nyoo gloria. Vatyi nuu Nyoo ña ndihi cha vaha cuan. Vatyi ni ri ra suhu, ni quití, yori cha sativi iyó yucuan.

²¹ Ta catyi chi ndo vatyi nu nyaá cha tyayii ndo, yucuan cuví nu nyaá xiñi ndo. Ta yucuan cunyaa añima ndo.

Tari sandichín chiti nuu yo chi yo tacuhva nyehe yo nu cuahan yo, tyicuan caa tucu sandundichín tuhun Nyoo añima yo
(Lc. 11.34-36)

²² Chiti nuu ndo noo cha sandundichin ityi cuahan ndo cuví. Ta tyicuan caa tucu añima ndo, tatu iyó cha ndichin Nyoo, vaha ñáyivi cuví ndo.

²³ Soco tatu ña vaha chiti nuu ndo, ña ndichin nyehe ndo nu cuahan ndo. Tandihí ri ta ñaa iñi. Ta tyicuan caa tucu tatu ñahri cha ndichin Nyoo nyaá añima ndo, tari noo ra cuaa cuví ndo. Ña cuví nyehe ndo ityi vaha cha cuahan nu nyaá Nyoo.

Sañahá ra Jesús vatyi ma cuvi quichaha yo chi Nyoo tatu cuñi xaan ca yo cha tyayii

(Lc. 16.13)

²⁴ 'Noo musu ma cuvi coo uvi chitoho ra. Vatyi musu cuan cuñi ca ra chi noo ra ta ñima ca chi inga ra. Ta quichahá ra chi noo ra, ta chi inga ra ma quichaha ra. Ta tyicuan caa tucu nyoho, ma cuvi cuñi ndo chi Nyoo, ta suri cuhva cuan cuñi ndo cha tyayii.

Sañahá ra Jesús vatyi ma caca xaan iñi yo ñáá ndihi cha chiñuhú chi yo
(Lc. 12.22-31)

²⁵ 'Yucuan chaha catyi chi ndo vatyi ma caca xaan iñi ndo yoso caa ñihi ndo cha cachi ndo ta cha coho ndo. Ni ma caca iñi ndo ñáá cha cuihno ndo. Vatyi yahvi ca nyaá añima ndo ta coño ñuhu ndo nuu Nyoo, ican saha cha cachi ndo ta cha cuihno ndo. Vatyi maa ra chahá ra ñayivi coo ndo. Ta ña yii cuhva ra inga cha chiñuhú chi ndo ñandihí.

²⁶ Saha ndo cuenda chi saa. Ña savahá ti itu. Ta ña sahá tyiño ti. Ni ri ña naquehén vaha ti tyiño sahá ti chichi yaca. Soco Sutu yo Nyoo chahá ra cha cachi ti. ¿Atu ña yahvi ca nyaá nyoho nuu Nyoo ta ñima ca saa cuan?

²⁷ Ni ri maa chicá xaan xiñi ndo ma cuvi sandusucun ndo ni chiin ca chi ndo.

²⁸ 'Ta tatu ni chiin cuan ña cuvi chi ndo, ¿ñáá tuhun cha chicá xaan xiñi ndo tuhun sahna ndo? Saha ndo cuenda yoso caa iyó tu ita nu chiqui. Vatyi ña taví tun. Ta ni ña conó tun isa.

²⁹ Soco catyi chi ndo vatyi ni rey Salomón cha tyayii xaan cuví ra, soco ña cuví cuihno ra cha tyaqui, tari cha sacuihnó Nyoo chi tu ita cuan.

³⁰ Ta tu ita cuan tyaqui xaan ñihno tun suhva ri quivi ta yaha cuan ta cuna ityi tun ta cucayu tun chichi horno. Ta nyoho, vaha ca cusacuihno Nyoo chi ndo. Soco chiin xaan chinó iñi ndo chi ra.

³¹ Yucuan chaha ma caca xaan xiñi ndo ta catyi ndo: “¿Ñáá cha cachi ndi, o ñáá cha coho ndi, o ñáá cha cuihno ndi?”

³² Vatyi ñayivi cha ñahri tuhun Nyoo caá añima, chicá xaan xiñi ñu tuhun ihya. Soco nyoho ma caca iñi ndo tuhun cuan vatyi iyó noo Sutu ndo, ra nyaá andivi. Ta chitó ra ñáá ndihi cha chiñuhu chi ndo.

³³ Yucuan chaha, cunyaa xiñi ndo maa maa ri maa tuhun maa Nyoo. Ta nducu ndo cuhva cunyaca ñaha ra añima ndo. Ta sacuvi ndo tari cuhva cuñi maa ra. Ta tyicuan caa ñihi ndo tandihí cuii maa cha chiñuhú chi ndo.

³⁴ Tandihí quivi ta iyó tindoho chi ndo. Ma caca xiñi ndo tuhun tindoho cha vachi. Vatyi Nyoo nyaá ra chihin ndo.

7

Ma cahan yo cha caá inga ñáyivi
(Lc. 6.37-38, 41-42)

¹ 'Ma cahan ndo cha caá inga ñáyivi. Tyicuan caa ta ma tiin Nyoo cuenda cha caá ndo.

² Vatyi tari cuhva cahán ndo cha caá inga ñu, tyicuan caa cuhva cutachi tuñi Nyoo chi ndo.

³ ¿Yoso caa cha cuví nyehun cuatyí luhlu ra yañun ta ña cuví nyehún cuatyí cahnu cha iyó chi maun?

⁴ Tatu chiti nuu maun yihí noo vitu cahnu, ¿yoso caa cuví catyun chi ra yañun: “Nyáca, na tave mihin lee cha yihí chiti nuun?”

⁵Yoho cha savahún chuun, tava xihna vitu cahnu cha yihí chiti nuu maun, tyicuan ta cuvi nyehe vahun mihin lee cha cutavon chiti nuu ra yañun.

⁶Ma sañihi ndo cahan ndo tuhun Nyoo chihin ñu ña cuñi coto, vatyi coto cañi ñu chi ndo. Tari ina cha tiin vavaha chi ndo, tyicuan caa cuvi ñu. Ta tari quini cha chaca chaha ti cha yahvi nyaá, tyicuan caa cahán ña vaha ñu siqui tuhun Nyoo.

*Ma cundihñi yo cacan yo chi Nyoo, tyicuan ta cuhva ra chi yo
(Lc. 11.9-13; 6.31)*

⁷Cacan ndo cha chihñu chi ndo chi Nyoo. Ta cuhva ra chi ndo. Nanducu ndo, ta nañihi ndo. Sacachan ndo yuvehe, ta nuña.

⁸Vatyi tandihñi ndo cha chicán ndo, ñihi ndo. Tatu nanducu ndo, nañihi ndo. Ta tatu sacachán ndo yuvehe, cunuña yuvehe.

⁹Tyicuan caa tucu nyoho cha iyó sehe ndo. Chahá ndo cha vaha chi sehe ndo. Ña tuhvá ndo chaha ndo noo yuu chi sehe ndo, tatu chicán ndotyin pan chi ndo.

¹⁰Ta ña tuhvá ndo chaha ndo noo coo chi sehe ndo tatu chicán ndotyin noo tiyaca chi ndo.

¹¹Nyoho cha quiñi iyó ndo soco chitó ndo yoso caa cuhva ndo cha vaha chi sehe ndo. Ta vihí ca Sutu yo, ra nyaá andivi. Cuaha ca cha vaha cuhva ra chi ndo tatu cacan ndo chi ra.

¹²Tari cuñi maa ndo cha cunyacuvi ñáyivi cha vaha chihin ndo, tyicuan caa cunyacuvi tucu maa ndo cha vaha chihin ñu. Vatyi tyicuan caa catyi tuhun cha tachí Nyoo, cha tyaa ra Moisés ta ra cacuvi profeta Nyoo ta cha naha.

*Tihin yuvehe ta cuiñi ityi cha cuahan nu nyaá Nyoo
(Lc. 13.24)*

¹³Nducu ndo cuhva quihvi ndo yuvehe tihin. Vatyi quehen yuvehe, ta quehen ityi cha cuahan nya nu cunaa ñáyivi anyaya. Ta cuaha xaan ñu cuahan ityi cuan.

¹⁴Soco tihin yuvehe ta cuiñi ityi cha cuahan ñáyivi cha ma naa ca maa nu cucoo ñáyivi vaha. Soco suhva ri ñáyivi nañihí ityi cuan.

*Chihin cha sacuvi ri ñáyivi, ta nichón nuu yo chi ñu tatu ñu vaha o ñu ña
vaha cuvi ñu*

(Lc. 6.43-44)

¹⁵Saha ndo cuenda chi ra cuendu. Vatyi cacatyi ra vatyi cuenda Nyoo cahán ra. Soco ña ndicha. Vatyi vachi coyo ra tari noo mbee nu nyicú ndo. Sahá ra tyi ra vaha cacuvi ra. Soco tari noo ñaña xaan cacuvi ra.

¹⁶Nyoho cuvi nichón nuu ndo chi ra chihin cha nyacuvi ra. Tari noo yutun ña vaha, tyicuan caa cacuvi ra. Vatyi noo tuñiyaca ma cuhva tun mango, ta ni ri noo iñu nduhva ma cuvi cuhva chi tichaha ndivi.

¹⁷Ta tyicuan caa tucu tandihñi yutun vaha. Chahá tun chiti vaha. Ta tandihñi yutun ña vaha, chahá tun chiti ña vaha.

¹⁸Ta yutun vaha, ma cuvi cuhva tun chiti ña vaha. Ta ni ri yutun ña vaha ma cuvi cuhva tun chiti vaha.

¹⁹Ta tandihñi yutun cha ña chahá chiti vaha, cahnya yo chi tun. Ta cahmi yo chi tun.

²⁰Ta tyicuan caa, chihin cha nyacuvi ñáyivi cuvi nichón nuu ndo chi ñu tatu ñu vaha cuvi ñu, o ñu ña vaha cuvi ñu.

*Nu catyí ra Jesús vatyi ña tandihí ñáyivi quihví ñu nu nyacá ñaha Nyoo
(Lc. 13.25-27)*

²¹ Ma tandihí ñu cha catyí chii: “Sutu Mañi yuhu, Sutu Mañi yuhu”, cuquihvi ñu nu nyacá ñaha Nyoo gloria. Ñu sacuví tandihí cha catyí maa Nyoo Suti, ican ñu cuan cuquihvi nu nyacá ñaha ra.

²² Quivi cha cucutuñi chi ñáyivi, cuaaha xaan ñu cucatyi ñu chii tyehe caa: “Sutu Mañi yuhu. Yuhu cahín tuhun maun chihin ñáyivi. Ta chihin sivun tave tatyí ña vaha cha yihí añima ñáyivi. Ta cuaaha xaan milagru savahí chihin sivun”, cucatyi ñu chii.

²³ Tyicuan ta yuhu cucatyi chi ñu: “Ña ñohó nui chi nyoho. Çanyaha ndo nu nyaí. Vatyi nyoho sacuví ndo maa maa ri cha ña vaha.”

*Nu sañahá ra Jesús yoso caa cucuvi chi ñu quichahá ta ñu ña quichahá tuhun
cahán ra*

(Lc. 6.47-49; Mr. 1.22)

²⁴ Thya catyí chi ndo, yóo cha chiñi tuhun cahín ta sacuví tari cuhva catyí; cuví ra tari noo ra chiñi tuñi cha savahá ra vehe ra siqui cava.

²⁵ Ta quichahá coon savi. Ta cama xaan yuvi ndutya yahá. Ta ñihi xaan caa tatyí. Soco ña cuví sanduva chi vehe cuan. Vatyi ñihi nanyaá siqui cava cuan.

²⁶ Soco yóo cha chiñi tuhun cahín, ta ña sacuví ra tari cuhva catyí; cuví ra tari noo ra tondo, cha savahá ra vehe ra nu ñiti.

²⁷ Ta chaá savi. Ta cama xaan yuvi ndutya yahá. Ta ñihi xaan caa tatyí. Ta vehe cuan tañi tyehe ri nduva —catyí ra Jesús chi ñu.

²⁸ Cuhva cha ndihí cahan ra Jesús chihin ñáyivi, iyo xaan cuñi ñu tuhun cha sañahá ra.

²⁹ Vatyi sañahá ra tari noo ra cha nyacá ñaha. Ta ña sañahá ra tari ra sacuahá cuenda ley vehe ñuhu.

8

*Nu sanduvahá ra Jesús chi noo ra cuhví cha tyahyú coño
(Mr. 1.40-45; Lc. 5.12-16)*

¹ Cuhva cha noo ra Jesús yucu cuan, cuaaha ñáyivi nyicón chi ra.

² Ta chaá noo ra cha tyahyú coño, ta chicuiñi chiti ra nuu ra, ta catyí ra chi ra:
—Sutu Mañi yuhu, tatu yoho ta cuñín, cuví sanduvahun chii —catyí ra chi ra.

³ Tyicuan ta sanacaá ra Jesús ndaha ra ta tñn ra chi ra, ta catyí ra:

—Cuñi sanduvahi chuun. Ta na nduvahun vityin ri —catyí ra.

Ta caa cuhva ri cuan ta nduvahá nu tyahyú cuan.

⁴ Tyicuan ta quichaha catyí ra Jesús chi ra:

—Nyehe, yori chihin cahun tuhun. Soco cuñan, ta sañahun chuun chi tata sutu, ta cuhva cuendon ofrenda cha catyí ra Moisés nu ley chahnu vatyi tacuhva coto ñu vatyi cha nduvahun.

*Nu sanduvahá ra Jesús chi musu noo ra capitán
(Lc. 7.1-10)*

⁵ Cuhva cha chaá ra Jesús Capernaum, noo capitán, ra ñuu Roma, chaá ra nu nyaá ra Jesús ta chacu ndahvi ra nuu ra,

⁶ ta catyí ra:

—Sutu Mañi yuhu, musi catuví ra nu cama. Cuhví ra. Ña cuví nducuita ra vatyí ñihi xaan tahán ra.

⁷ Ta catyí ra Jesús chi ra:

—Cuhun mai ta cusanduvahi chi ra —catyí ra chi ra.

⁸ Nacahan capitán cuan ta catyí ra:

—Sutu Mañi yuhu, ña nañé cha cuhun vehi; soco tacuhva catyí run, ta musi nduvaha ra.

⁹ Vatyí suri iyó ra nyacá ñaha chi mai. Ta iyó sindaro nyacá ñaha tucu mai. Ta tatu cha tave tyiño chi noo ra, cuhun ra. Ta tatu cane chi inga ra, quichi ra. Ta tatu cha tave tyiño chi musi, sacuvi ra.

¹⁰ Ta cha chiñi ra Jesús cha cahan ra, iyo xaan cuñi ra. Ta catyí ra chi ñu nycón chi ra:

—Cha ndicha catyí chi ndo, vatyí ñuu cha nyicú nicahnu Israel, ta nañihi que ni noo ñáyivi cha chinó xaan iñi ñu tari chinó iñi ra ihya.

¹¹ Ta catyí chi ndo vatyí cuaha ñu inga ñuu cuquichi coyo ityi nu caña ñanyii, ta ityi nu quee ñanyii, ta cunyicu ñu cachi ñu chihin ra Abraham ta ra Isaac ta ra Jacob nya andívi.

¹² Ta ñu Israel cha tahán chi cuhun andívi, yihí ñu, ma cuhun ñu, vatyí cuhun ñu nu ñaa iñi ityi chata. Ta yucuan cucuacu chaa ñu ta cuahñi noho ñu —catyí ra Jesús chi ñu.

¹³ Tyicuan ta quichaha catyí ra chi capitán cuan tyehe caa:

—Cuahan, ta na cuví chi tari cuhva catyūn vatyí chinó xaan iñun chii —catyí ra.

Ta suri cuhva cuan nduvaha musu ra.

Nu sanduvaha ra Jesús chi maha tyiso ra Pedro

(Mr. 1.29-31; Lc. 4.38-39)

¹⁴ Ta cha yaha cuan, chaa ra Jesús vehe ra Pedro. Ta nanyehē ra chi maha tyiso ra Pedro, catuví ña nu chito chihin cahñi.

¹⁵ Ta tiñ ra ndaha ña, ta quitā cahñi cuan chi ña. Ta ndicuitā ña, ta quichaha tyiñuhu ña chi ra.

Nu sanduvaha ra Jesús cuaha ñu cuhvi

(Mr. 1.32-34; Lc. 4.40-41)

¹⁶ Ta cuhva cha cuaa cuan, quichi nyaca ñu cuaha xaan ñáyivi yihí tatyí ña vaha chi chi ra Jesús. Ta chihin noo ri tuhun cahan ra, tava ñehe ra chi tatyí ña vaha cuan, ta sanduvaha ra chi tandihi ñu cuhvi.

¹⁷ Tyicuan caa cuví tacuhva vatyí na chino cava tari cuhva catyí ra profeta Isaías, quívi catyí ra tyehe caa: “Maa ra quehen ra cuehe cha yihí chi yo, ta tinyaa ra cha uhvi chi yo.”

¿Yoso chiquihí chi yo tatu cuñi yo cunyicon yo chi ra Jesús?

(Lc. 9.57-62)

¹⁸ Tyicuan ta nyehē ra Jesús vatyí nicachico nu nyaá ra nyicú ñáyivi. Ta catyí ra chi ñu vatyí cuyaha ra inga chiyo miñi.

¹⁹ Tyicuan ta chaa noo ra sacuahe ley vehe ñuhu ta catyí ra chi ra:

—Maestro, cuñi cunyiquen chuun tandihi ri ityi nu cuhun —catyí ra.

²⁰ Ta ra Jesús catyí ra chi ra:

—Ñaña, iyó vehe ti, ta saa cha chicó nu tatyí, iyó taca ti. Soco yuhu Rayi cha quichi nya gloria, ñahri vehi ta ni ri nu cava xiñi ta ñahri —catyí ra.

²¹ Inga tucu ra chicá noo chihin ra catyí ra chi ra:

—Tata, *cuhva* na *cuhun xihne cutyihi* chi *suti chichi ñuhú*, *tyicuan ta quichi ta cunyiquen chuun* —*catyí ra*.

²² *Ta catyí ra Jesús chi ra:*

—*Ñaha yoho vatyí cunyiçon chii*. *Saña chi ñu ña ñohó nuu chi Nyoo*, *na tyihi maa ñu chi tahan ñu chichi ñuhú* —*catyí ra*.

Nu sacutaxín ra Jesús tatyí xaan

(Mr. 4.35-41; Lc. 8.22-25)

²³ *Tyicuan ta quihví ra chichi canoa*, *ta ra cachicá noo chihin ra*, *cuahan coyo ra chihin ra*.

²⁴ *Ta chaq noo tatyí ñihi xaan nu miñi cuan*, *ta nyacua chasí ndutya cuan canoa ra soco maa ra Jesús quixí ra*.

²⁵ *Ta ra cachicá noo chihin ra sandoyo ra chi ra*, *ta cacatyí ra:*

—*¡Sutu Mañi yuhu, sacacu chi yo, vatyí cuñi cunaa yo!*

²⁶ *Ta catyí ra Jesús chi ra:*

—*¿Ñáa tuhun cha yuhví xaan ndo? ¡Nyoho chiin xaan chinó iñi ndo chii!*

Tyicuan ta nacandá ra ta sacutaxín ra tatyí nu miñi cuan, *ta tandihí cutaxín*.

²⁷ *Ta iyo xaan cacuñi ra cuan ta cacatyí ra:*

—*¿Yóo ra cuví ra ihya? Vatyí nyacua nya tatyí ta nyacua nya ndutya ta quichahá chi ra* —*catyí ra*.

Nu nduvahá uvi ra ñuu Gadara ra cayihí tatyí ña vaha chi

(Mr. 5.1-20; Lc. 8.26-39)

²⁸ *Tyicuan ta chaq coyo ra inga chiyo miñi cha nyaá ñuhú cha nañi Gadara*. *Ta chaq coyo uvi tahan ra yihí tatyí ña vaha chii*. *Ta nu ñaña caquita coyo ra cuan*. *Xaan vavaha ra*, *ta yori maa cuví yaha ityi cuan*.

²⁹ *Ta canachaá ra*, *ta cacatyí ra:*

—*¿Ñáa cha cuñún chihin ndi, yoho Jesús Sehe Nyoo? ¿Atu vachun vachi sanyehun tındoho chi ndi cha ni cumañi ca chaa quiví? —cacatyí ra cuan*.

³⁰ *Ta yatyin ri cuan nyicú cuaha quini cachachí ti*.

³¹ *Ta tatyí tatyí ña vaha cuan chi ra Jesús:*

—*Tatu cuatava ñehun chi ndi, cuhva cha quihví ndi chichi quini cuan —cacatyí tatyí ña vaha cuan*.

³² —*Vaha. Quihví ndo —catyí ra Jesús*.

Ta caquita coyo tatyí ña vaha cuan, *ta quihví coyo chichi tandihí quini canyicú cuan*. *Ta tandihí quini cuan cachino ti ta canacoyo ti noo xahva yuhu miñi cuan*, *ta chihí ti chihin ndutya cuan*.

³³ *Tyicuan ta ra casahá cumi chi ti cuan*, *cachinó vavaha ra cuahan coyo ra chichi ñuu*, *ta canacatyí ra tandihí cha cuví chi ra cayihí tatyí ña vaha cuan chi*.

³⁴ *Ta tandihí ñáyivi ñuu*, *chahan ñu chinyehe ñu chi ra Jesús*, *ta chacu ndahvi ñu nuu ra na quita ra yucuan*.

9

Nu sanduvahá ra Jesús chi noo ra cuhví cha ña cuví nacanda

(Mr. 2.1-12; Lc. 5.17-26)

¹ *Tyicuan ta quihví ra Jesús chichi canoa ta yahá sava ra inga chiyo miñi*, *ta nachaq ra nya ñuu nu iyó ra*.

² Nu nyaá ra yucuan chinyacá ñáyiví chi noo ra cuhví cha ña cuví nacanda catuví ra nu chito. Ta cha nyehe ra Jesús vatyi chinó xaan iñi ñu chi ra, quichaha catyi ra chi ra cuhví cuan:

—Sanii iñun, suti vatyi cha chicoo ticahnu iñi cuatyun —catyi ra chi ra.

³ Tyicuan ta quichaha chica xiñi suhva ra sacuahá ley vehe ñuhu cha nyicú yucuan tyeha caa: “Ra ihya chicoo cuatyí ra nu Nyoo chihin tuhun cahán ra”, cachicá xiñi ra.

⁴ Soco ra Jesús chitó ri ra ñáá cha cachicá xiñi ra, ta catyi ra chi ra:

—¿Ñáá tuhun cha ña vaha maa chicá xiñi ndo?

⁵ Vatyi ¿nya cha yii ca catyi yo: atu yii ca catyi yo “Cuatyun cha yaha ndachi”, o yii ca catyi yo: “Ndicuita ta cacon”?

⁶ Vaha. Cuasañahi chi ndo vatyi yuhu Rayii cha quichi nya gloria, iyó ityi chii siqui ñuhu ñayiví ihya vatyi sahi ticahnu iñi cuatyí —catyi ra Jesús.

Tyicuan ta catyi ra chi ra cuhví cuan:

—Ndicuita, naquehen chiton ta cuanuhu nya vehun —catyi ra.

⁷ Tyicuan ta ndicuita ra cuhví cuan ta cuanuhu ra nya vehe ra.

⁸ Cuhva cha nyehe ñáyiví tuhun ihya, canayuhví ñu. Ta casacahnú ñu chi Nyoo vatyi chaha ra tunyee iñi cuan chi ñáyiví.

Nu caná ra Jesús chi ra Mateo

(Mr. 2.13-17; Lc. 5.27-32)

⁹ Quita ra Jesús yucuan, ta nanyehe ra chi noo ra cha nañi Mateo, nyaá ra quehen ra xuhun cha tyiyahví ñu Israel chi gobiernu ñuu Roma. Ta catyi ra chi ra:

—Coho chihin.

Tyicuan ta ndicuita ra Mateo ta tyinyicon ra chi ra.

¹⁰ Tyicuan ta cuví chi noo chaha ra Jesús nyaá ra nya vehe ra Mateo, chachí ra. Ta cachaa coyo cuaha ra catavá xuhun cuenda gobiernu ñuu Roma ta inga ca ra ca iyó cuatyí. Ta cachicunyicú tucu ra yucuan nu mesa in ri chihin ra Jesús ta ra cachicá noo chihin ra.

¹¹ Soco cha canyehé ra fariseo cha tyicuan caa, candaca tuhun ra chi ra cachicá noo chihin ra Jesús, ta cacatyí ra:

—¿Ñáá tuhun cha vatyi ra sacuahá chi nyoho chachí ra chihin ra catavá xuhun cuenda ra nyacá ñaha nya Roma ta chihin ra ca iyó cuatyí? —cacatyí ra.

¹² Chiñi ra Jesús cha cahan ra, ta catyi ra chi ra:

—Ña chiñuhú doctor chi ñu iyó vaha, ñu ña cuhví, soco chi ñu cuhví chiñuhú ra.

¹³ Cuahan ndo ta cõtuhva ndo cha cuñí chi catyi nu tutu Nyoo, nu catyi ra tyeha caa: “Yuhu cuñí vatyi cundahvi cuñi ndo chi ñáyiví, ta ñima ca cha cahni ndo quití ta cuhva cuenda ndo chii.” Ña vachi na cane chi ñu vaha, soco chi ñu iyó cuatyí, tacuhva na nasama ñu cuhva iyó ñu.

Nu catyi ra Jesús vatyi cha ni ri ca cha nyaá ca ra chihin ra cachicá noo chihin ra ña tahán chi cha saha ra ayunar

(Mr. 2.18-20; Lc. 5.33-35)

¹⁴ Tyicuan ta ra canyicón chi ra Juan, ra sacondutya chi ñáyiví, catuhva ra chi ra Jesús ta candaca tuhun ra chi ra ta cacatyí ra:

—¿Ñáá tuhun cha nyuhu ta ra cacuví fariseo, cuaha xaan chaha savaha ndi ayuno, ña chachí ndi ta nanducú ndi chi Nyoo? ¿Ta ra cachicá noo chihin yoho ñima tyicuan caa sacuvi ra? —cacatyí ra nyicón chi ra Juan.

15 Ta nacahan ra Jesús ta catyí ra:

—¿Atu cuví cunyaa cuihya ñu nyicú vico cha ni ri ca cha nyaá ra cua tandaha chihin ñu? Soco vachi quivi vatyí cucuachiyo ra nu nyicú ñu, tyicuan ndicha ta cusavaha ñu ayuno.

Nu sañahá ra Jesús vatyí ña chachí tahan tuhun chahnu cha iyó ñu chihin tuhun chaa cha sañahá ra chi ñu

(Mr. 2.21-22; Lc. 5.36-39)

16 Yori naquicú noo vestido chahnu chihin noo sahma chaa vatyí coto cundiýi nu naquicú ñu chihin cha chaa cuan, ta cahnya chi cha chahnu cuan, ta nu tahnya cuan nducahnu ca.

17 Ta ni ña tyihí yo vinu chaa chichi ñi chahnu vatyí tatu sacuvi yo tyicuan caa, tahnya ñi cuan, ta tari cunaa vinu, ta cunaa ñi cuan. Yucuan chaha cuñí chi tyihi yo vinu chaa chichi ñi chaa, ta tyicuan ta nñduví ta cusaha cuenda chi chi tahan chi.

Sehe ra Jairo, ta ñaha cha tñn sahma ra Jesús

(Mr. 5.21-43; Lc. 8.40-56)

18 Cha ni ri ca cha catyí ra Jesús tuhun ihya, chaá noo ra cuví nuu chi ñu Judea ta chicuñi chiti ra nuu ra Jesús, ta catyí ra:

—Ni chihí sehi, soco tatu yoho quichun ta tyison ndahun siqui ña, cunan-doto ña —catyí ra chi ra Jesús.

19 Ndicuitá ra Jesús ta cuahan ra ñin ri chihin ra ta ra cachicá noo chihin ra ñandihí.

20 Tyicuan ta noo ñaha, cuhví ña chihin cha chati niñi ña. Ta cha uchi uvi cuiya cuhví ña. Ta tuhva ña chi ra Jesús ityi chata ra, ta tñn ña yuhu sahma ra,

21 vatyí tyehe caa chicá xiñi ña: “Ma chihin cha tñn ri sahma ra ta nduvahi”, chicá xiñi ña.

22 Soco ra Jesús nanyocavá ra nanyehe ra chi ña, ta catyí ra chi ña:

—Nduní ñun sihi, cha nduvahun vatyí chinó ñun —catyí ra.

Ta caa cuhva ri cuan ta nduvahá ña.

23 Yahá cuan ta chaá ra Jesús vehe ra cuví nuu cuan, ta nyehe ra vatyí ra música canyatú tuhva ra cha cuhun coyo ra nu quihví cue chichi ñuhú. Ta ñáyivi cha nyicú cuan chacú chaa ñu.

24 Ta catyí ra chi ñu:

—Quita ndo ihya. Ñaha tyivaa ihya, ña chihí ña, soco quixi ña —catyí ra.

Ta chacú cuehe ri ñáyivi nyehe ñu chi ra.

25 Soco ra Jesús tavá ra chi ñu ityi chata vehe, tyicuan ta quihví ra ta tñn ra ndaha ñaha tyivaa cuan, ta maa ña ndicuitá ña.

26 Ta tandihí ityi cuan chityá tuhun cha cuví yucuan.

Nu sanduvahá ra Jesús chi uvi ra cuaa

27 Cuhva cha quitá ra Jesús yucuan, uvi tahan ra cuaa canyicón chi ra suri caná chaa ra ta cacatyí ra:

—¿Cundahvi cuñi chi ndí, yoho ra vachi tata ra David! —cacatyí ra.

28 Ta cuhva cha quihví ra Jesús chichi vehe, ra cuaa cuan, catuhvá ra chi ra, ta maa ra Jesús quichaha ndaca tuhun ra chi ra:

—¿Atu chinó ñi nyoho vatyí cuví sanduvahi chi ndo? —catyí ra.

Ta canacahan ra ta catyí ra:

—Ay, chinó ñi ndi chuun, Sutu Mañi yuhu —cacatyí ra.

29 Tyicuan ta tñn ra Jesús chiti nuu ra ta catyí ra chi ra:

—Na cuvi maa yoso cuhva chinó iñi ndo —catyí ra.

³⁰ Ta canduvahá chiti nuu ra. Ta catyí vaha ra Jesús chi ra tyehe caa:

—Nducu ndo cuhva cha yori coto.

³¹ Soco quitá coyo cuiri ra ta quichaha canacatyí ra cha sacuví ra Jesús chihin ra chi ñáyivi tandihi ityi yucuan.

Nu sanduvahá ra Jesús chi noo ra ñihí

³² Cha ni ri ca cha caquita coyo ra cucuaa cuan, suhva ñáyivi quichi nyaca ñu chi noo ra ñihí cha yihí noo tatyí ña vaha chi nu nyaá ra Jesús.

³³ Ta caa cuhva ri cha tava ñehe ra Jesús tatyí ña vaha cuan, quichahá cuvi cahan ra cuan. Ta iyo xaan cuñi ñáyivi, ta catyí ñu:

—Ni noo chaha ta cuvi ca cha tyehe caa Israel Ihya —catyí ñu.

³⁴ Soco ra cacuvi fariseo, cacatyí ra:

—Ra ihya tava ñehe ra tatyí ña vaha chihin tunyee iñi chi cuihna ra cuvi nuu —catyí ra.

Nu catyí ra Jesús vatyi ña cuaha maa ñu sahá tyiño cuenda Nyoo iyó

³⁵ Ra Jesús chahan ra tandihi ñuu sañahá ra chi ñáyivi chichi vehe ñuhu tahan tahan ñuu. Cahán ra tuhun Nyoo yoso caa nyacá ñaha Nyoo añima ñáyivi. Ta sanduvahá ra tandihi nuu cuehe cha yihí ñu.

³⁶ Ta cha nanyehé ra chi ñáyivi, cundahvi cuñi ra nyehé ra chi ñu, vatyi nyehé ñu tindoho ta cuihya cuñi ñu, tari mbee quití cha yori sahá cumi chí.

³⁷ Tyicuan ta catyí ra chí ra cachicá noo chihin ra tyehe caa:

—Cha ndicha, cuaha tyiño iyó, soco ra sahá tyiño, ña cuaha ra.

³⁸ Yucuan chaha, çacan ndo chí chitoho tyiño yucuan, na tachi ra chí ra saha tyiño na sataca ra tyiño cuan.

10

Nu cachí ra Jesús chi ndi uchi uvi ra caca tyiño ra

(Mr. 3.13-19; Lc. 6.12-16)

¹ Tyicuan ta caná ra Jesús chi ndi uchi uvi ra chicá noo chihin ra ta chaha ra ityi chí ra vatyi tava ñehe ra chí tatyí ña vaha cha yihí añima ñáyivi, ta sanduvaha ra ndihi nuu cuehe ta cha uhvi ñandihi.

² Ican ihya cuví sivi ndi uchi uvi ra chicá tyiño ra: xihna ca, ra Simón, cha nañi tucu Pedro, ta yañi ra, ra Andrés, ra Jacobo ta yañi ra, ra Juan, sehe ra Zebedeo cacuví chí ra;

³ ta ra Felipe, ra Bartolomé, ra Tomás, ta ra Mateo ra tava xuhun cuenda gobiernu ñuu Roma, ra Jacobo sehe ra Alfeo, ra Lebeo cha nañi tucu Tadeo,

⁴ ta ra Simón cha yihí cuenda ityi ra cacuñi cahun cuatyí siqui gobiernu ñuu Roma cha nyacá ñaha chí ñu, ta ra Judas Iscariote, ra cha naxico tuhun chí ra Jesús.

Nu tachí ra Jesús chí ra cachicá noo chihin ra, na cucahan ra tuhun Nyoo

(Mr. 6.7-13; Lc. 9.1-6)

⁵ Ta tyehe caa tachí ra Jesús chí uchi uvi tahan ra cuan, ta catyí ra:

—Ma cuhun ndo nu iyó ñu cha ñima ñu Israel cuví, ta ni ma quihvi ndo ñuu cha nyicú Samaria.

⁶ Cuahan ndo, soco nu nyicú mbee cha cuanaa cha cuví ñu ñuu Israel.

⁷ Cuahan ndo cuacahan ndo tuhun vatyi cha chaç cha cunyaca ñaha Nyoo añima ñáyivi.

8 Sanduvaha ndo chi ñu cuhví ñu tyahyú coño, ta ñu yihí inga cuehe chii. Sanandoto ndo ndiyi, tava ñehe ndo chi tatyí ña vaha cha yihí chi ñu. Nyoho, naquehén cuenda ndo tunyee iñi ihya chihin cha ñahri yahvi, ta cotyiño ndo soco ma quehen ndo yahvi.

9 Ma cuiso ndo ni noo xuhun, ni xuhun cuaan ni xuhun cuichin, ni xuhun cuaha.

10 Ma cuiso ndo ni yono cha cuenda cha caca ityi ndo. Noo ri camisa cha ñihno ndo cuhun chihin ndo. Ta ma cuiso ndo inga ityi ndichan, ni yutun ma tuvi ndo, vatyí ra sahá tyiño, iyó ityi chi ra cha coo yahvi ra.

11 Cuhva cha chaa ndo noo ñuu, nducu ndo noo ñáyivi cachi iyó, ta ndo ndo vehe ñu nyacua nya quita ndo ñuu cuan.

12 Cuhva cha cua quihvi ndo noo vehe, cuhva ndo nocumi chi ñáyivi iyó vehe cuan. Ta catyi ndo chi ñu: Na coo cha taxi Nyoo añima ndo, catyi ndo chi ñu.

13 Ta tatu ñu ñuu cuan ta nacotó ñu tyi chiñuhú cha taxi ri cuan chi ñu, cundo cuan chihin ñu. Soco tatu ña nacotó ñu vatyí chiñuhú cuan chi ñu, ma ndoo cuan chihin ñu.

14 Ta tatu ña cuñí ñu quehen cuenda ñu chi ndo, ta ni ña cuñí ñu cuiñi ñu tuhun cahán ndo, tyicuan ta quita ndo vehe yucuan, o ñuu yucuan, ta naquisi ndo ñiyaca chaha ndo.

15 Cha ndicha catyí chi ndo vatyí quivi cutuñi chi ñáyivi, ñihi ca cutachi tuñi Nyoo chi ñu cuan, ta ñima ca ñáyivi ñuu Sodoma ta ñuu Gomorra.

Nu sañahá chi ñáá ndihí tindoho cunyehe ñu chicá tyiño Nyoo

16 ¡Nyehe ndo! Yuhu tachí chi ndo, tari mbee mahñu lobo. Quiyi saha ndo chi ndo, tari coo, soco masu saha ndo chi ndo tari paloma.

17 Saha ndo cuenda chi ndo vatyí ñáyivi cucuhva cuenda ñu chi ndo chi ra cuví tyiño, ta chichi vehe ñuhu cucañi ñu chi ndo.

18 Ta cha cuenda yuhu, nyacua cunyaca ñu chi ndo nuu gobiernu ta nuu rey. Ta tyicuan caa ta cuví cahan ndo tuhun nuu ra ta nuu ñu cha ñima ñu Israel cuví.

19 Soco tatu nacuhva cuenda ñu chi ndo chi ra cuví tyiño, ma caca xiñi ndo yoso caa cucahan ndo, vatyí tatu chaa cuhva cha cahan ndo, Nyoo cucuhva ra tuhun cha cucahan ndo.

20 Vatyí ñima maa ndo cucahan, soco maa Tatyí Ii Sutu yo Nyoo cusacahan chi ndo.

21 Rayi cunaxico tuhun ra suri chi yañi ra tacuhva na cacahñi ra chi ra. Ta yihí ra cunaxico tuhun ra chi sehe ra. Ta yihí ñáyivi cunanuhu ñu siqui sutu ñu ta sihi ñu, ta cusacuví ñu, na cúvi ñu.

22 Tandihí ñáyivi, cucutasi cuñi nyehe ñu chi ndo cha catyi yuhu. Soco tatu ña ndu uvi iñi ndo chino iñi ndo chii, tyicuan ta cucacu añima ndo.

23 Tatu chica nyicon ñu chi ndo noo ñuu, cono ri ndo inga ñuu. Vatyí cha ndicha catyi chi ndo ni cha ta ndihí ca cahan ndo tuhun Nyoo tandihí ñuu nu nyicu ñáyivi Israel ta yuhu Rayi cha quichi nya gloria cuquichi inga chaha.

24 Ni noo ra cutuhvá, ña cahnu ca ra cuví ra ican saha ra sacuaha chi ra. Ta ni noo musu, ña cahnu ca cuví ra ican saha chitoho ra.

25 Ra cutuhva, cuñí chi ndoo ra vaha cha chaa ra cuví ra tari ra sacuaha chi ra, ta musu tari chitoho ra. Tatu yuhu ra cuví chitoho vehe, catyi ñu chí vatyí Beelzebú, cuihna ra cuví nuu, cuví, suri tyicuan caa cucatyi tucu ñu chi ñáyivi cuende.

Yóo chi tahán chi cuyuhvi yo
(Lc. 12.2-7)

²⁶ Yucuan chaha ma yuhvi ndo chi ñáyivi, vatyi ni noo tuhun xehe ta cuñun, tyi ma natuvi. Ta ni ñahri cha ñohó xehe, ta cuñún tyi ma coto tandihi ñáyivi.

²⁷ Tandihí cha catyí chí ndo nu ñaa íñi, catyi nyoho nu ndichin. Ta tandihí cha catyí chí ndo nu xehe, çana chaa ndo nya xiñi vehe, na coto tandihí ñáyivi.

²⁸ Ma yuhvi ndo chí ñu chahñi coño ñuhu yo, vatyi ma cuvi cahñi ñu añima yo. Soco yuhvi ndo chí ra cuví sanaa coño ñuhu yo ta añima yo chichi anyaya ñandihí.

²⁹ ¿Atu ñima chihin noo xuhun luhlu ri, sata yo uvi tahan saa? Ican. Soco ni noo ti ña canacava ti nu ñuhú tatu ña catyí maa Nyoo Sutu yo.

³⁰ Vatyi nyacua nya íxi xiñi nyoho ta chitó Nyoo yoso tahan nyaá.

³¹ Ma yuhvi ndo. Nyoho, yahvi ca nyaá ndo ta ñima ca ticuítí saa.

Ma yuhvi yo cahan yo tuhun ra Jesucristo nuu ñáyivi
(Lc. 12.8-9)

³² Tandihí ñu cha cahán vaha tuhín nuu ñáyivi, yuhu tucu cucahan vahi cuenda ñu nuu Suti ra nyaá andívi.

³³ Soco ñu cahán nuu cahan tuhín, yuhu tucu ma cahín tuhún ñu nuu Suti ra nyaá andívi.

Cha cuenda ra Jesús cusíin ñáyivi
(Lc. 12.51-53; 14.26-27)

³⁴ Ma cuñi ndo vatyi yuhu vachi cuhve cha taxi ri coo ndo síqui ñuhu ñáyivi íhya. Ña vachi cuhve cha taxi ri, soco cha cañi tahan ñáyivi.

³⁵ Vatyi sasiín chí ndo. Vatyi noo ra cuhun ra síqui sutu ra. Ta noo ña cuhun ña síqui síhi ña. Ta ñu cuví chono cucañi tahan ñu chihin tyiso ñu.

³⁶ Ta tyicuan caa suri ñáyivi chí ndo cucuvi ñu ñu xaan íñi chí ndo.

³⁷ Ñu cha cuñí ca chí sutu o chí síhi ícan saha chí yuhu, ña tahán chí cuví ñu ñu cuende. Ta ñu cuñí ca chí xehe, ícan saha chí yuhu, ña tahán chí cuví ñu ñu cuende.

³⁸ Ta ñu cha ña cuñí nyehe tindocho ta cunyicon ñu chí, ña tahán chí cuví ñu ñu cuende.

³⁹ Vatyi ñu ña cuñí nyehe tindocho cha cuenda yuhu, cunyehe ñu tindocho anyaya, soco ñu nyehé tindocho ta chahá ñáyivi cha catyi yuhu, cucacu añima ñu.

Yahvi cha tahán chí chí yo
(Mr. 9.41)

⁴⁰ Ñu quehén cuenda chí ndo, chí yuhu quehén cuenda ñu, ta ñu quehén cuenda chí yuhu, quehén cuenda ñu chí ra cha tachí chí.

⁴¹ Ñu quehén cuenda noo ra profeta Nyoo cha cuenda vatyi cuenda Nyoo cahán ra, cuñihi ñu suri tahan yahvi cha cuñihi profeta cuan. Ta ñu quehén cuenda chí noo ra vaha cha cuenda tyi ra vaha cuví ra, suri tahán yahvi cha cuñihi ra vaha cuan cuñihi ñu.

⁴² Ta savahri ñu cha cuhva vasi noo vasu ndutya vichin coho ñu nyihi íhya cha cuenda cha nyicón ñu chí, cuñihi ñu cha cucuhva Nyoo chí ñu —catyí ra Jesús.

11

Ra cha tachi ra Juan nu nyaá ra Jesús (Lc. 7.18-35)

¹ Ndihi chaha ra Jesús tuhun chi uchi uvi ra chicá noo chihin ra, tyicuan ta quita ra yucuan, vaty cucahan ra tuhun Nyoo chihin ñáyivi cha iyó ñuu cha nyicú ityi cuan.

² Ta ra Juan nu ñohó ra vehe caa, ñihí ra tuhun cha sacuví ra Cristo. Tyicuan ta tachi ra chi uvi ra nyicón chi ra, cundaca tuhun ra noo tuhun chi ra Jesús. Ta cachaá coyo ra nu nyaá ra

³ ta cacatyí ra chi ra:

—¿Atu yoho cuvún ra Cristo cha tahán chi quichi sacacu chi ndi, o cuñí chi cha cuatu ndi chi inga ra? —cacatyí ra chi ra.

⁴ Nacahan ra Jesús ta catyí ra:

—Cuahan ndo ta catyí ndo chi ra Juan cha nyehé ndo, ta cha chiñí ndo.

⁵ Nacatyí ndo chi ra yoso caa nanyehé ñu cuaa, yoso caa nacacá ñu coxo, ta ñu tyahyu coño yoso caa nduvahá ñu, ta yoso caa nacuiñi ñu soho, ta ñu ndiyi nandoto ñu, ta chihin ñu ndahvi cahán ndi tuhun Nyoo yoso caa sacacu ra añima ñu.

⁶ 'Sii xaan cuñí ñu ña chicá uvi iñi nyicón chii.

⁷ Cuhva cha cuahan coyo ra, ra Jesús quichaha cahan ra tuhun ra Juan chihin ñáyivi, ta catyí ra:

—¿Ñáá cha chahan nyoho chinyehe ndo chiqui ndi cuan? ¿Atu chinyehe ndo noo ndoo cha naquisí tatyí? ¿Ñáá cha nyehe ndo?

⁸ ¿Atu nyehe ndo noo ra vaha ñihno? Ñima. Nyoho chitó ndo vatyí ra ñihno vaha, nyaá ra vehe rey.

⁹ Tu tyicuan caa, ¿ñáá cha chahan ndo chi nyehe ndo? ¿Atu noo ra cuví profeta? Ican. Soco noo ra cha cahnu ca cuví ican saha noo profeta cuenda Nyoo.

¹⁰ Vatyí ican ra Juan ihya, cuví cha cahán tuhun nu tutu Nyoo tyehe caa: Yuhu cuví Nyoo ta tachi chi noo ra cahan tuhun ityi nuu nu cuhun. Vatyí cucahan ra tuhun chihin ñáyivi nanasama ñu cuhva iyo ñu ta cuatu tuhva ñu quivi quichun.

¹¹ 'Cha ndicha catyí chi ndo, vatyí chichi cha tandihí ñáyivi, ni noo chaha ta coo ca noo ra cahnu ca cuví ican saha ra Juan ra sacondutyá chi ñáyivi. Soco ra cha nyacá ñaha Nyoo añima, vasi cuví ra noo ra luhlu ca, soco cahnu ca ra ta ñima ca ra Juan.

¹² Nyacua nya quivi cha chaá ra Juan ta nya vityin, cuaha ñu ndachan sahá chii nducú sativi ñu tuhun Nyoo, ña cuñí ñu cha cunyacá ñaha Nyoo añima ñáyivi.

¹³ Ra Moisés cahan ra tuhun yoso caa nyacá ñaha Nyoo añima ñáyivi, ta tyicuan caa tucu tandihí ra profeta nyacua nya quivi quichi ra Juan.

¹⁴ Ta tatu cuñí nyoho chino iñi ndo tuhun cahín, catyí chi ndo vatyí profeta Elías cha tahañ chi quichi, ra Juan cuví ra.

¹⁵ Yóo ñu cha cutuñi iñi, na tyasoho ñu tuhun cahín.

¹⁶ '¿Yóo chihin sandu inuu ri chi ñáyivi cha iyó tyembu ihya? Tari ra cuatyaa cuví ñu, vatyí chicunyaa ndotyin nuyahvi nyasiqui ndotyin, ta canachaa ndotyin chi ra tahañ ndotyin, ta catyí ndotyin tyehe caa:

¹⁷ "Tivi ndi flauta, soco ña chita chaha ndo. Chita ndi yaa cuihya soco ña chacu ndo." Tyicuan caa tucu nyoho, ni noo cuhva ña tahañ iñi ndo.

18 Vatyí quichj ra Juan, cha ña chachj ra ta ña chihj ra, ta nyoho catyí ndo vatyí noo tatyí ña vaha yihí chí ra.

19 Yahā cuan ta quichj tucu yuhu Rayi cha quichi nya gloria. Ta yuhu chachí ta chihí tandihí, ta catyí ndo tyi ra cuahyi ra tuhvá chihí cuví. Ta ña tahán iñi ndo cha cutahín chihin ra iyó cuatyí ta ra tavá xuhun. Soco vasi ni noo ndi ña naquehén cuenda ndo tuhun cahán ndi, soco Nyoo chahá ra cha chihí tuñi ra chí ñu naquehén tuhun cahin ta tuhun cahan ra Juan, ta maa ñu cusañaha chí ndo vatyí vaha cha chíñi tuñi Nyoo —catyí ra Jesús.

*Uvi ñuu nu ña tyasohó ñáyivi tuhun Nyoo
(Lc. 10.13-15)*

20 Tyicuan ta quichaha cahan ra Jesús chí ñu ñuu nu sacuvj ra cuaha milagru, vatyí ñáyivi cuan ña canasamā maa ñu cuhva iyó ñu, ta catyí ra:

21 —¡Ndahvi nyoho, ñu ñuu Corazin! ¡Ndahvi nyoho ñu ñuu Betsaida! Vatyí nyehé ndo nyatu cahnu ta ña nasamā ndo cuhva iyó ndo. Soco ñáyivi ñuu Tiro ta ñuu Sidón cha sanaā Nyoo ta cha naha cha cuenda cuatyí ñu ñahri nyatu cahnu nyehé ñu. Soco tyehe ta nyehé ñu nyatu cahnu quivi cuan tari cha nyehé nyoho vityin, tañi tyehe ri ndihvi noo ñu sahma tucuihya iñi ta cunyaa ñu nu ñiyaa. Tari cuhva costumbre iyó maa ñu, noo seña vatyí ndu uvi iñi ñu cuatyí ñu cuví cuan.

22 Soco catyí chí ndo vatyí quivi cutuñi chí nyoho nuu Nyoo, cahnu ca cha uhvi cunyehe ndo ta ñima ca ñáyivi Tiro ta Sidón.

23 Ta nyoho ñu ñuu Capernaum, cuñi maa ndo tyi cundaa ndo nya andivi, soco cunoo ndo nya nu nyicú ñu ndiyi. Vatyí tyehe ta cuvj milagru ñuu Sodoma cuan, tahán cha cuvj ñuu ndo, ñuu cuan coo ca nyacua nya vityin.

24 Soco catyí chí ndo vatyí quivi cutuñi chí nyoho, yaha ca cunyehe ndo tindoho, ta ñima ca ñu ityi ñuu Sodoma cuan.

*Cuhva ndo chí ndo chii, ta cuhve cha nyitatu ndo, catyí ra Jesucristo
(Lc. 10.21-22)*

25 Tyembu cuan catyí ra Jesús chí Nyoo tyehe caa:

—Sutu Mañi yuhu, Nyoo, ra nyacá ñaha andivi ta ñuhu ñayivi. Sacahní chuun vatyí sañahun tuhun maun chí ñu ñahri maa chitó. Ta tixehun tuhun maun chí ñu cha sahá tuhun tyi chitó xaan ta ñu chíñi tuñi ñandihí.

26 Ndicha Sutu Mañi yuhu, vatyí tyicuan caa cuñi maun.

27 Tyicuan ta catyí tucu ra:

—Suti nacuhvā cuenda ra tandihí chii. Yori maa ñohó nuu noo cha ndicha chii, soco noo tuhun ri maa Suti ñohó nuu ra chii. Ta yori ñohó nuu noo cha ndicha chí Suti, soco noo tuhun ri mai, cha cuví Sehe ra chí, ñohó nui chí ra. Ta ñáyivi cha cuñi mai cha cohon nuu chí ra, ican ñu cuan cua cohon nuu chí ra.

28 Tandihí nyoho cha chitatu ndo cha sahá tyiño ndo, ta chihin carga cha nyisó ndo, quichi ndo nu nyaí, ta yuhu cuhve cha nyitatu ndo.

29 Cuhva ndo cha cunyaca ñahi chí ndo ta cutuhva ndo cuhva iyó yuhu. Vatyí yuhu masu iñi ta cama iñi. Tyicuan caa ta ñihi ndo nu nyitatu añima ndo.

30 Ña yñi cha cuhva ndo chí ndo cha cunyaca ñahi. Ta carga cha chahí chí ndo, ñahma.

12

Nu tohón ra cachicá noo chihin ra Jesús yoco trigu quivi nyitátú ñáyivi
(Mr. 2.23-28; Lc. 6.1-5)

¹ Noo quivi nyitátú ñáyivi, yahá ra Jesús mahñu nu iyó cha tachí ñu. Ta chaá soco chí ra cachicá noo chihin ra. Ta quichaha catohon ra yoco trigu cuan ta quichaha cachachi ra chiti yoco cuan.

² Cuhva cha cananyehé ra fariseo cha tyicuan caa, cacatyí ra chí ra Jesús:
—Nyehé, ra cachicá noo chuhun sacuví ra noo cha ña tahán chí sacuví yo quivi nyitátú yo —catyí ra chí ra.

³ Soco maa ra Jesús catyí ra chí ra:
—¿Atu ta sacuahá ca nyoho cha sacuví ra David chihin ra tahan ra quivi cha chisocó ra?

⁴ Quihví ra chichi vehe Nyoo. Ta quehen ra pan ii cha cha yahá catuví nuu Nyoo. Ta chachí ra ta ña tahán chí cachí ra, ni maa ra ni ra ndihí chihin ra, vatyí maa ri maa tata sutu tahán chí cachí pan cuan.

⁵ ¿O ta sacuahá ca ndo nu ley cha chahá Nyoo chí ra Moisés nu catyí chí vatyí ra cacuví sutu, ña canyitátú ra quivi nyitátú yo, soco sahá tyiño ra chichi vehe ñuhu? Yucuan nyehé yo vatyí ñima cuatyí cuví cuan.

⁶ Ta catyí chí ndo, vatyí ihya nyaá yuhu cha cuví noo ra cahnu ca ican saha vehe ñuhu.

⁷ Nyoho, ta cutuñi ca iñi ndo nu catyí chí tyehe caa nu tuhun Nyoo: “Cha cuñi yuhu, cha cundahvi cuñi ndo nyehe ndo chí tahan ndo, ta ñima ca cha cahñi ndo quiti ta cuhva cuenda ndo chii.” Tyehe ta cutuñi iñi ndo tuhun ihya, ma tyaa ndo cuatyí siqui ñáyivi cha ñahri sacuví.

⁸ Yuhu cuví Rayi cha quichí nya gloria. Ta iyó ityi chii vatyí catyí chí noo noo ndo ñáá cha sacuvi ndo quivi nyitátú yo —catyí ra Jesús.

Nu nduvahá ra cha ityi ndaha
(Mr. 3.1-6; Lc. 6.6-11)

⁹ Tyicuan ta quita ra Jesús yucuan, ta cuahan ra vehe ñuhu.

¹⁰ Ta yucuan ñohó noo ra ityi inchiyo ndaha. Ta nyicú tucu suhva ra nducu cuhva yoso caa ta catyaa ra cuatyí siqui ra Jesús. Yucuan chaha candaca tuhun ra chí ra ta catyí ra:

—¿Atu cuví sanduvaha yo chí noo ñu cuhví quivi nyitátú yo? —cacatyí ra chí ra Jesús.

¹¹ Ta nacahan ra Jesús ta catyí ra:

—¿Nya noo nyoho, tatu canacava noo mbee sana ndo chichi noo yavi quivi nyitatu yo, atu ma cuhun ndo ta tava ndo chí ti?

¹² Ta ¿atu ña yahvi ca nyaá noo ñáyivi ta ñima ca noo mbee? Yucuan chaha vatyí tahán chí sacuvi yo cha vaha quivi nyitátú yo —catyí ra.

¹³ Tyicuan ta catyí ra chí ra cha ityi ndaha cuan:

—Sanacaa ndahun —catyí ra.

Ta cuhva cha sanacaa ra, nduvahá ri ndaha ra tari inga chiyo cuan.

¹⁴ Tyicuan ta caquita coyo ra fariseo cuandatumun tahan ra yoso caa cacahñi ra chí ra Jesús.

Noo profeta, ra chahá cuenda tuhun cahán Nyoo, cahán ra tuhun ra Jesús cha ni cumañi ca cacu ra

¹⁵ Cha chitó ra Jesús tuhun tyi canducú ra chí ra, quita ra yucuan ta cuaha ñáyivi chinyicon chí ra. Ta maa ra sanduvahá ra chí tandihí ñu cuhví.

¹⁶ Ta catyí ra chí ñu tyi ma cahan ñu tuhun vatyí ican ra sanduvahá chí ñu.

17 Tyicuan caa cuvĭ tacuhva nachino cava tuhun cha tyaq̄ ra Isaías ra cuvĭ profeta Nyoo ta cha naha. Tyehe caa tyaq̄ ra:

18 Ican ra ihya cuvĭ ra sacuvĭ tyiño nui, ra cha nacachĭ vahi.

Cuñĭ xain chi ra, ta sĭi cuñĭ chihin ra.

Cusacuti chi ra chihin Tatyĭ Ii cha iyó chii.

Ta cusacoto ra chi ñáyĭvi cha ñima ñu Israel cuvĭ yoso caa sacuvahi chi ñu nui.

19 Ta ma xaan cahan ra ta ni ma cana chaa ra, ta ni yori cuiñĭ ndusu ra ityi cahnu.

20 Ta ni noo ndoo yacua, ta ma cahnu ndihĭ ra.

Ta ni ma ndahva ndihĭ ra mecha cha caña ñuhma.

Nyacua nya cha sanicoo vaha ra chi ñáyĭvi chihin ra ta cunyaca ñaha vaha ra añima ñu.

21 Ta tandihĭ ñáyĭvi, ta chi ra cuquihĭ iñi ñu.

*Nu catyĭ ñáyĭvi vatyĭ ra Jesús, tunyee iñi ra ña vaha iyó chi ra
(Mr. 3.20-30; Lc. 11.14-23; 12.10)*

22 Tyicuan ta nu nyaá ra Jesús chinyaca ñu chi noo ra yihĭ tatyĭ ña vaha chi, cuaa ra ta ñihĭ ra. Ta ra Jesús sanduvahq̄ ra chi ra. Ta cuvĭ nacahan ra, ta cuvĭ nanyehe ra.

23 Iyo xaan cuñĭ tandihĭ ñáyĭvi, ta catyĭ ñu:

—¿Vasĭ ra vachi tata rey David cuvĭ chi ra ihya? —catyĭ ñu.

24 Soco cuhva cha cachiñĭ ra fariseo tuhun cuan, cacatyĭ ra:

—Chihin fuerza ra Beelzebú, ra cuvĭ nuu chi cuihna, tavá ra ihya tatyĭ ña vaha —catyĭ ra.

25 Soco ra Jesús chitó ra cha cachicá xiñĭ ra, yucuan chaha catyĭ ra chi ra:

—Tatu noo gobiernu ta cacusiñ ra, cuaha ri ityi nanduvi ra, cucañĭ tahan ra chihin tahan ra, ta cundihĭ tuhun cha canyacá ñaha ra. O tatu noo ñuu o tandihĭ ñáyĭvi noo vehe cacusiñ ñu chihin tahan ñu, cutivi nu nyicú ñu.

26 Ta tyicuan caa tucu, tatu cuihna ta tava ra suri ra tahan maa ra, cuñĭ chi catyĭ vatyĭ ña ñin ri cacuvĭ ra, ta cundihĭ fuerza cha iyó chi ra.

27 Ta nyoho catyĭ ndo vatyĭ yuhu tavé tatyĭ ña vaha chihin fuerza ra Beelzebú. Tu tyicuan caa, ra nyicú chihin maa ndo, ¿yóó cha chaha fuerza vatyĭ tavá ra tatyĭ ña vaha? Maa ra na sacoto ra chi ndo cha ndicha, vatyĭ nyoho tondo ri chicá xiñĭ ndo.

28 Yucuan chaha catyĭ chi ndo, vatyĭ yuhu tave tatyĭ ña vaha chihin fuerza Tatyĭ Ii Nyoo. Ta cuñĭ chi catyĭ vatyĭ ndicha cuiñĭ Nyoo ra nyacá ñaha añima ñáyĭvi cha chaq̄ ra nu canyicú ndo.

29 Chichĭ vehe noo ra ñihĭ xaan, tari cuihna, ma cuvĭ quihvi noo ra ta quehen ra tandihĭ cha chii ra, soco tatu cuhñĭ xihna ra chi ra tyicuan caa ta cuvĭ tinyaa ra tandihĭ cha chii ra.

30 Ñáyĭvi cha ña nyaá tumañĭ iñi chii, ñáyĭvi xaan iñi chii cuvĭ ñu. Ta tatu ña tyinyeé ndo chii cha cahán ndo tuhun nuu ñáyĭvi, cuñĭ chi catyĭ vatyĭ ña chahá ndo cha coto ñáyĭvi tuhun cahín.

31 Yucuan chaha catyĭ chi ndo vatyĭ Nyoo sahá ra ticahnu iñi cuatyĭ ñáyĭvi, ta ñáá cha ña vaha cahán ñu ñandihĭ, soco cha cahan ña vaha ñu siqui Tatyĭ Ii Nyoo, yucuan ndicha, ma coo ticahnu iñi cha cuenda ñu.

32 Ta yóó ri ñu cha cahán ña vaha siqui yuhu Rayĭi cha quichĭ nya gloria, coo ticahnu iñi chi ñu cha cuenda cuan. Soco ñu cahán ña vaha siqui Tatyĭ Ii Nyoo, ma coo maa ticahnu iñi chi ñu cha cuenda cuatyĭ cuan, niri ihya ñáyĭvi, ta niri inga ñáyĭvi ñandihĭ.

Chihin cha sacuvi ri ñáyivi ta nicohon nuu ri yo chi ñu tatu ñu vaha o ñu ña vaha cuví ñu

(Lc. 6:43-45)

³³ Noo yutun vaha chahá tun chiti vixi, chiti vaha. Ta noo yutun ña vaha chahá tun chiti ña vaha. Nicohón nuu ri yo tatu yutun vaha cuví tun chihin chiti cha chahá tun.

³⁴ ¡Nyoho, ñu quiñi iyó, tari tata coo xaan cuví ndo! ¿Yoso caa cuví quitá tuhun vaha yuhu ndo, ta ñáyivi quiñi caa añima cuví ndo? Vatyí cha quitá chichi añima yo ican cuan cahán yo.

³⁵ Noo ra vaha cahán ra tuhun vaha vatyí ñohó cha vaha añima ra. Ta ra quiñi iyó, maa maa ri tuhun quiñi caa cahán ra, vatyí cha quiñi caa ñohó añima ra.

³⁶ Ta yuhu catyí chi ndo vatyí quiñi cutuñi chi tandihí ñáyivi, cucuhva ñu cuenda tandihí tuhun cha ña sahá ñu cuenda ta cahán ñu.

³⁷ Vatyí yoso cuhva cahún, yucuan cuhva cucutuñi chuun, tatu iyó o ñahri cuatyun.

Ñu quiñi iyó cuñi ñu nyehe ñu seña milagru

(Mr. 8:12; Lc. 11:29-32)

³⁸ Tyicuan ta suhva ra fariseo ta ra sacuahá ley vehe ñuhu cacatyí ra chi ra Jesús tyehe caa:

—Maestro, cuñi ndi vatyí sacuvun noo seña milagru vatyí nyehe ndi.

³⁹ Ta nacahán ra Jesús ta catyí ra:

—Ñu quiñi iyó ta ñu nyicón inga nyoo cuñi ñu nyehe ñu seña milagru. Soco ma nyehe ca ñu inga seña, noo ri seña ra Jonás ra profeta Nyoo, yucuan ri cunyehe ñu.

⁴⁰ Vatyí tari ñoho ra Jonás chichi tiyaca cahnu cuan uñi quiñi ta uñi ñuu, tyicuan caa cucohon yuhu Rayii cha quichí nya gloria chichi ñuhú uñi quiñi ta uñi ñuu.

⁴¹ Ta quiñi cucutuñi chi tandihí ñáyivi, cundicuita ñu chiyo ñuu Ninive ta cha naha ta cucatyí ñu na tachi tuñi Nyoo chi nyoho ñáyivi cha iyó vityin, ta cucatyí ñu vatyí cucunaa ndo, vatyí maa ñu cha cuví ñu ñuu Nínive, canasama ñu cuhva iyó ñu quiñi cahán ra Jonás tuhun Nyoo chihin ñu. Ta ihya nyaá ra cahnu ca cuví ta ñima ca ra Jonás.

⁴² Vatyí tyicuan caa tucu ñaha cha cuví reina ityi Sur, cundicuita ña quiñi cucutuñi chi ñáyivi ta cucatyí ña vatyí cucunaa nyoho ñu iyó vityin, vatyí maa ña, vasi cañi ñuu ña soco quichí ña, quichí tyasoho ña tuhun cha chiñi tuñi ra Salomón. Ta ihya cahnu ca cuví ra cha cahán chihin ndo vityin ta ñima ca ra Salomón.

Yoso caa ndichi tucu tatyí ña vaha inga chaha añima ñáyivi tatu naa iñi ñu chi Nyoo

(Lc. 11:24-26)

⁴³ Tatu noo tatyí ña vaha quita chi añima noo rayii, chicá noo chi noo nu ityi, nanducú chi noo nu nyitatu chi, soco ña nañihi chi nu nyitatu chi. Tyicuan ta ndichi xiñi chi:

⁴⁴ “Cunuhu tiqui nya vehi nu quite.” Yucuan ta nachaa chi añima ra nu quita chi. Ta nanyehé chi vatyí ndii xaan, ta yori nyaá.

⁴⁵ Tyicuan ta cuanaquehen chi ucha ca tahan tatyí ña vaha, cha yaha ca cuhva ican saha maa chi. Tyicuan ta quiñi tandihí tatyí ña vaha cuan añima ra cuan. Yucuan chaha, quiñi ca cunícoo ra ta ñima ca cuhva chiyo maa ra. Ta tyicuan caa cucuvi chi ñáyivi quiñi iyó ihya —catyí ra Jesús.

Tari yañi ra Jesús ta tari sihi ra cuví chi ñáyivi sacuví cuhva catyí Nyoo
(Mr. 3.31-35; Lc. 8.19-21)

⁴⁶ Ni cahán ca ra Jesús chihin ñáyivi, ta chaá sihi ra ta yañi ra, ta ndoo ñu chata vehe, ta cuñí ñu cahan ñu chihin ra.

⁴⁷ Tyicuan ta sacoto noo ñáyivi nyaá cuan chi ra Jesús, ta catyí ñu:

—Sihun ta yañun nyicú ñu chata vehe. Ta cuñí ñu cahan ñu chuhun.

⁴⁸ Tyicuan ta nacahan ra Jesús ta catyí ra chi ñu:

—¿Yóo cha cuví sihi ta yañi? —catyí ra.

⁴⁹ Tyicuan ta sañahá ndaha ra chi ra cachicá noo chihin ra, ta catyí ra:

—Ican ra ihya cuví sihi ta yañi.

⁵⁰ Vatyí tandihi ñáyivi cha sacuvi cuhva cuñí Suti ra nyaá andivi, ican ñu cuan cuví yañi, ta cuhve, ta sihi —catyí ra Jesús.

13

Tari noo ra chicá noo tachí, tyicuan caa cuví ra cahán tuhun Nyoo chihin
ñáyivi

(Mr. 4.1-9; Lc. 8.4-8)

¹ Quiví cuan quitá ra Jesús vehe ra ta chicunyaá ra yuhu miñi.

² Ta chaha cha cuaha ñáyivi natacá nu nyaá ra, quihví ra chichi noo canoa ta chicunyaá ra. Ta tandihi ñáyivi ndoo ñu nyicú ñu nu ñiti cuan.

³ Tyicuan ta cuaha ri cha quichaha sañahá ra chi ñu chihin noo cuhva ta catyí ra:

—Noo chaha quitá noo ra, tachí ra chiti trigu.

⁴ Ta nu cuahan ra quití ra chiti cuan, canacoyo suhva chiti cuan yuhu ityi. Ta quichí coyo saa ta cachachí ti.

⁵ Ta suhva ca canacoyo ticu yuu, nu ña cuaha ñuhú yihí. Ta yucuan caña chiti cuan cha numi ri vatyí ña cuaha ñuhú yihí chaha.

⁶ Soco cuhva cha caña ñanyii in na ityi ri tun, vatyí ña cono yihí yoho tun.

⁷ Suhva ca chiti canacoyo ticu iñu. Ta chahnú iñu cuan. Ta chasi chi nuu tun. Yucuan chaha ña chiyo chiti tun.

⁸ Soco suhva ca canacoyo nu ñuhú vaha. Ta quívi cachahnu tun, vaha xaan cachahá tun chiti, vatyí yihí tun noo cientu chiti chaha tun cha noo ri maa tun. Ta inga tun uñi xico, ta inga tun oco uchi chiti chahá tun.

⁹ ¡Tatu cutuñi iñi ndo, tyasoho ndo!

Nu sacoto ra Jesús ñáá tuhun cha chihin cuhva ri cahan ra ta ña cahán cachi
ra

(Mr. 4.10-12; Lc. 8.9-10)

¹⁰ Tyicuan ta tuhva ra cachicá noo chihin ra Jesús, ta candacá tuhun ra chi ra, ta catyí ra:

—¿Ñáá tuhun cha chihin cuhva ri cahún chihin ñáyivi, ta ña cahán cachun chihin ñu? —cacatyí ra.

¹¹ Ta nacahan ra Jesús ta catyí ra:

—Chi nyoho sacotó Nyoo tuhun xehe, yoso caa nyacá ñaha ra, socio chi maa ñu ña chahá ra cha coto ñu.

¹² Vatyí ñáyivi cutuñi iñi tuhun cahín ta sacuví ñu, cuaha ca cucutuñi iñi ñu. Ta ñáyivi cha chiin ri cutuñi iñi, ta ña cuñí ñu sacuvi ñu, cutinyaa ndihi cha cutuñi iñi ñu.

¹³ Yucuan chaha vatyi chihin cuhva ri cahán chihin ñu, tacuhva nyehe ñu ta cuví chi tari cha ña ndichin nyehe ñu. Ta cuiñi ñu soco ma cutuñi iñi ñu, tari cha ña chiñi ñu cuví cuan.

¹⁴ Ta tyicuan caa ta chinó cava tuhun cha cahán ra Isaías ra profeta Nyoo ta cha naha, ta catyí ra:

Cha ndicha vatyi nyoho cuiñi ndo tuhin, soco ma cutuñi iñi ndo.

Ta cunyehe ndo cha sacuví, ta ma cutuñi iñi ndo.

¹⁵ Vatyi cha ndundavañ añima ñáyivi ihya, ta ña cachi vaha chiñi ñu.

Ta tahán nuu ñu,

Tacuhva cha ma nyehe ñu chihin chiti nuu ñu.

Ta ma cuiñi ñu chihin soho ñu.

Ta ni ma cutuñi iñi ñu chihin añima ñu.

Ta ni ma nanducu ñu chii, tacuhva sanduvahi chi ñu.

¹⁶ 'Soco sñi xaan cuví chi nyoho, vatyi nyehé ndo chihin chiti nuu ndo, ta chiñi ndo chihin soho ndo.

¹⁷ Cha ndicha catyí chi ndo, vatyi cuaha ra cacuví profeta Nyoo ta cuaha ñáyivi vaha, cacuñi ñu nyehe ñu cha nyehé nyoho cha sacuví, soco ña nyehe ñu. Cuñi ñu cuiñi ñu tandihí tuhun cha chiñi nyoho vityin, soco ña chiñi ñu.

Nu catyí ra Jesús ñáa cha cuñi chi catyí cuhva cha cahán ra

(Mr. 4.13-20; Lc. 8.11-15)

¹⁸ Tyasoho ndo ñáa cha cuñi chi catyí noo cuhva cha catyí chi ndo tuhun ra cha tachí chiti trigu cuan:

¹⁹ Ñáyivi cha chiñi tuhun yoso caa cuñi Nyoo cunyaca ñaha ra añima ñu, ta ña cutuñi iñi ñu, tari nu canacoyo chiti yuhu ityi, tyicuan caa cuví ñu. Vatyi quichí cuihna ta tava ra tuhun Nyoo cha caa añima ñu.

²⁰ Ta tari nu canacoyo chiti ticu yuu cuan, tyicuan caa cuví tucu ñáyivi cha chiñi tuhun Nyoo, ta sñi xaan cuví chi ñu naquehen cuenda ñu noo ri cuhva.

²¹ Vatyi nu caña chiti ticu yuu cuan, chiin ri ñuhú yihí chaha. Yucuan chaha caña soco ña cuví tyihi yoho chi. Ta tyicuan caa ñu cuan. Suhva ri quivi chinó iñi ñu. Soco quivi cha quichaha nyehe ñu tindoho, ta satasí iñi ñáyivi chi ñu cha cuenda tuhun Nyoo ta sandihí ri ñu tuhun cha chinó iñi ñu.

²² Ta tari nu canacoyo chiti chichi iñu cuan, tyicuan caa cuví tucu inga ñu cha chiñi tuhun Nyoo. Chiñi ñu, soco ña cuñi ñu sacuví ñu tari cuhva chiñi ñu. Vatyi nyaá xaan ca xiñi ñu tuhun tindoho ñáyivi ican saha tuhun Nyoo. Ta nyiyo ca iñi ñu cha tyayii. Ta tandihí tuhun cuan sayanga chi chi ñu, ta ña chahá nanducu vaha ñu chi Nyoo.

²³ Soco tari nu canacava chiti nu ñuhu vaha, tyicuan caa cuví ñu chiñi tuhun Nyoo, ta cutuñi iñi ñu, ta sacuví ñu tandihí tuhun cahán ra. Yihí ñu cuví ñu tari yutun cha chaha noo cientu chiti, ta inga ñu tari yutun cha chaha uñi xico, o tari yutun cha chahá oco uchi chiti noo noo tun.

Nu catyí ra Jesús yoso caa cuahan tuhun trigu ta cuhu ña vaha

²⁴ Ta chahá tucu ra Jesús inga cuhva ihya chi ñu; ta catyí ra:

—Cha nyacá ñaha Nyoo añima ñáyivi cuví chi tari noo ra cha tachí chiti trigu nu noo ñuhú.

²⁵ Soco cuhva cha caquixí tandihí ra casahá tyiño cuan, quihvi noo ra xaan iñi chi ra, ta tachí ra chiti cuhu ña vaha, ta cuahan ra.

²⁶ Ta quivi caña chiti trigu cuan, ta caña yoco chi, ta yucuan na tuvi tucu cuhu ña vaha cuan.

²⁷ Tyicuan ta ra cacuví musu, cachahan ra chicatyi ra chi chitoho ra: “Tata, tatu maa maa ri maa chiti trigu tachun, ¿nya quitá cuhu ña vaha cuan?” cacatyi ra.

²⁸ Ta nacahan ra cuan ta catyi ra: “Iyó noo ra xaan iñi chi yo tachí.” Tyicuan ta musu cuan, catyi ra chi chitoho ra: “¿Atu cuñún cha cuhun ndi ta tohon ndi cuhu ña vaha cuan?”

²⁹ Soco chitoho ra catyi ra: “Ma tohon ndo, coto cuhva cha tohon ndo cuhu ña vaha cuan, ta coyo ndihi trigu cuan.

³⁰ Saña ndo, na cuahnu maa chi ñn ri chihin trigo cuan, tyicuan ta quivi cunicoñehi tyiño sahi, cutachi chi ra casaha tyiño cutohon xihna ca ra cuhu ña vaha cuan ta cuhñi ra cuenda sucun, vatyi cahmi ra. Ta yaha cuan ta canaquehen vaha ra cha vaha cuan chichi yaque.”

Nu catyi ra Jesús vatyi tari chiti mostaza cuví cha nyacá ñaha Nyoo aña yoyu (Mr. 4.30-32; Lc. 13.18-19)

³¹ Tyicuan ta catyi tucu ra Jesús inga cuhva ihya chi ñu:

—Cha nyacá ñaha Nyoo aña ñáyivi cuví chi tari noo chiti yutun cha nañi mostaza cha tachí noo ra nu ñuhú ra.

³² Vatyi ican chiti cuan cuví cha luhlu ca ican saha tandihi ca chiti. Soco quivi chahnu tun cuví tun noo yutun cahnu vavaha. Ta quichí coyo saa, ta casavahá ti taca ti nuu tun —catyi ra Jesús.

Nu catyi ra Jesús vatyi tari yuchan iya cuví cha nyacá ñaha Nyoo aña ñáyivi (Lc. 13.20-21)

³³ Ta catyi tucu ra Jesús inga cuhva ihya:

—Cha nyacá ñaha Nyoo aña ñáyivi cuví chi tari yuchan iya cha nasaca noo ñaha chihin uñi cuhva yutyi pan. Vatyi tari ndaa tandihi pan cuan chihin yuchan iya cuan, tyicuan caa cuahan nducuaaha ca ñu nyacá ñaha Nyoo aña —catyi ra.

Yoso caa chotyíño ra Jesús noo cuhva cha cahán ra (Mr. 4.33-34)

³⁴ Tandihí tuhun ihya cahan ra Jesús chihin ñáyivi chihin cuhva ri. Ta tandihí tuhun cha catyi ra chi ñu soco maa maa ri chihin noo cuhva ri.

³⁵ Tyehe caa sacuví ra tacuhva chino cava tuhun cha cahán ra profeta ta cha naha ta tyaq ra tyehe caa:

Chihin cuhva ri cucahin chihin ñáyivi.

Cucatyí chi ñu tuhun cha ñohó xehe nyata savaha Nyoo ñuhu ñáyivi.

Nu catyi ra Jesús ñáá cha cuñi chi catyi tuhun cuhu ña vaha cha caña mahñu chiti trigu cuan

³⁶ Tyicuan ta sacunuhu ra Jesús chi ñáyivi, ta ndihvi ra chichi vehe. Ta catuhva ra cachicá noo chihin ra chi ra, ta catyi ra chi ra:

—Ñacatyí chi ndi ñáá cha cuñi chi catyi tuhun cha caña cuhu ña vaha cuan nu ñuhu cuan.

³⁷ Tyicuan ta quichaha catyi ra Jesús chi ra:

—Ra cha tachí chiti trigu cuan ican cuví yuhu Rayi cha quichí nya gloria.

³⁸ Ta ñuhú cuan, ican cuví aña ñáyivi iyó siqui ñuhu ñáyivi. Ta chiti trigu cuan ican cuñi chi catyi ñáyivi cha nyicón chi Nyoo, ta chiti cuhu ña vaha cuan cuñi chi catyi ñáyivi cha nyacuví cuhva cuñi ra ña vaha.

³⁹ Ra cha tachí cuhu ña vaha cuan, ican cuví cuhna ra xaan iñi chi Nyoo. Ta quivi cunacoñehe ra tyiño saha ra, ican cuví quivi cucunaa ñuhu ñáyivi. Ta ra cha cunacoñehe chiti cuan, ican cuví ra cacuví ángel.

40 Tari nasatacā ra cuhu ña vaha cuan vatyi cayu chi, tyicuan caa cucuvi quivi naa ñáyiví.

41 Yuhu Rayii cha quichi nya gloria cutachi chi ángel cunasatata ra chi ñu sacco cuatyí inga ñu, ta ñu cha sacuví cha ña vaha.

42 Ta cutyihí ra chi ñu chichi horno nu cayú ñuhu. Ta cucuacu ñu ta cusacahñi ñu noho ñu.

43 Ta ñu cha sacuví cuhva cuñi Nyoo cutuvi ñu nuu Nyoo Sutu yo. Ta tari cha ndichin ñanyii, tyicuan caa cucuvi ñu. Tatu cutuñi iñi ndo, tyasoho ndo tuhun cahín.

Noo xuhun cuaan cha ñohó xehe

44 'Cha nyacá ñaha Nyoo añima ñáyiví cuví chi tari noo xuhun cuaan ñohó xehe chichi ñuhú. Ta noo ra nañihí xuhun cuaan cuan, soco natyihí xehe tucu ra inga chaha ta sii xaan cuñi ra cuanuhu ra ta xico ra tandihí cha iyó chi ra, ta satā ra ñuhu nu ñohó xehe xuhun cuaan cuan.

Noo cuhva cha cahan ra Jesús cuenda noo perla cha yahvi xaan nyaá

45 'Ta cha nyacá ñaha Nyoo añima ñáyiví, cuví tucu chi tari noo ra satā ta naxicó perla finu.

46 Ta cuhva cha ñihí ra noo cha yahví vavaha nyaá, ta xico ra ndi maa cha cumí ra, ta satā ra perla vaha cuan.

Nu sañahá ra Jesús noo cuhva cuenda tarraya

47 'Ta suri cuví tucu cha nyacá ñaha Nyoo añima ñáyiví tari tarraya cha cañi ra nu tyañuhu, ta ñihí ra ndihí nuu tiyaca chihin.

48 Ta cuhva cha chitu tarraya cuan chihin tiyaca, catavā ra ityi nu ñiti, ta yucuan canacachí ra chi ti, canaquehen vaha ra chi quití vaha chichi noo tica, ta sacuitā ra chi quití ña vaha cuan.

49 Ta tyicuan caa cucuvi quivi naa ñáyiví, cuquichi coyo ángel, quichi tava siin ra chi ñu vaha ta ñu ña vaha.

50 Ta cutyihí ra chi ñu ña vaha cuan chichi anyaya nu cayú ñuhu, nu cucuacu ñu ta cusacahñi ñu noho ñu.

Nu sañahá chi vatyi vaha tuhun chahnu ta tuhun chaa Nyoo

51 Tyicuan ta ra Jesús ndacā tuhun ra chi ra cachicá noo chihin ra, ta catyí ra:

—¿Atu cutuñi iñi ndo tandihí tuhun ihya?

Ta nacahan ra ta cacatyí ra:

—Ay, Sutu Mañi yuhu. Cutuñi iñi ndi.

52 Tyicuan ta catyí ra Jesús chi ra:

—Tatu noo ra sacuahá cuenda ley vehe ñuhu, ta cutuhva ra tuhun yoso caa nyacá naha Nyoo añima ñáyiví, cumí ra cha vaha tuhun chahnu Nyoo, ta cumí tucu ra tuhun chaa cha sañahí. Ta cuví ra tari noo ra cuví nuu, ra chitó ta sañahá ra tuhun chahnu ta tuhun chaa cha sañahí —catyí ra Jesús.

Nu ñohó ra Jesús Nazaret ñuu nu chahnu ra (Mr. 6.1-6; Lc. 4.16-30)

53 Ndihi cahan ra Jesús cuhva ihya ta cuahan ra.

54 Ta nachaā ra ñuu ra. Ta yucuan quichaha sañaha ra chichi vehe ñuhu ñuu cuan. Ta iyo cuñi ñáyiví ta catyí ñu:

—¿Nya maa maa cutuhvā ra ihya cha chiñi tuñi xaan ra? ¿Ta yoso caa cuví sacuví ra milagru?

55 Vatyi sehe ra satyá vitu cuan cuví chi ra. Ta cu María cuví sihi ra. Ta yañi ra cuví chi ra Jacobo, ta ra José, ta ra Simón ta ra Judas.

⁵⁶ Ta cuhva ra ñandihí, iyó ñu ityi nu iyó yo. Tu tyicuan caa, ¿nya maa maa cutuhva ra tandihí tuhun ihya? —catyí ñu.

⁵⁷ Ta yucuan chaha ña cuñí ñu quichaha ñu chi ra. Soco ra Jesús catyí ra chi ñu:

—Tandihí ñáyivi tandihí ri ityi sahá ñu ñáyivi chi ra profeta. Soco ña quichahá ñu chi ra tatu ra ñuu ñu, o ra vehe ñu cuví chi ra —catyí ra.

⁵⁸ Ta ña cuaha milagru sacuví ra yucuan cha cuenda vatyí ña chinó iñi ñu chi ra.

14

Nu catyí chi yoso caa chihí ra Juan ra sacondutyá

(Mr. 6.14-29; Lc. 9.7-9)

¹ Quiví cuan ra Herodes, ra cuví gobiernu nicahnu nu cuví Galilea, ñihí ra tuhun ra Jesús.

² Ta catyí ra chi ra nyicú chihin ra:

—Ican ra cuan cuví ra Juan ra sacondutyá chi ñáyivi, ra cha chihí ta vityin nandotó ra. Yucuan chaha iyó tunyee iñi chí ra cha sacuví ra milagru.

³⁻⁴ Tyicuan caa catyí ra vatyí suri maa ra tyihí tyiño ta catyín ra chi ra Juan. Ta chahñí ra chí ra chihin cadena, ta tyihí ra chí ra vehe caa. Tyicuan caa sacuví ra tyi xaan cuñí ra tyi catyí ra Juan tyi ña vaha cha nyaá ra chihin cu Herodías cha cuví ña ñasihí yañi ra ra Felipe.

⁵ Ta yucuan chaha, ra Herodes, cuñí ra cahñi ra chí ra Juan, soco yuhví ra chí ñáyivi, vatyí tandihí ñu chinó iñi ñu tyi ra Juan cuenda Nyoo cahán ra.

⁶ Soco noo quiví cha vico ra Herodes, ta quichahá chita chaha sehe cu Herodías nu nyicú ñu vico cuan. Ta tahañ xaan iñi ra Herodes.

⁷ Ta tyaá ra cuhva vatyí cuhva ra ñáá ri cha cacán ñaha tyivaa cuan, ta ma nacahnu ra tuhun cahan ra.

⁸ Tyicuan ta tyiyuhú sihi ña chí ña, na catyí ña chí ra Herodes tyehe caa:

—Cuhva xiñi ra Juan ra sacondutyá ñáyivi chí nu noo coho —catyí ña.

⁹ Cha chiñí rey Herodes tuhun cahañ ña, nducuihya cuñi ra. Soco cha cuenda cha tyaá ra cuhva vatyí cuhva ra ñáá ri cha cacán ña nuu ñu canyicú vico cuan ta ma cuví nacahnu ra, yucuan chaha tachí ra nacuhva ra xiñi ra Juan chí ña.

¹⁰ Ta tachí ra tyiño na cutahnya sucun ra Juan nu ñohó ra vehe caa.

¹¹ Tyicuan ta caquichí nyaca ra xiñi ra, yihí noo nu coho. Ta cachahá ra chí ñaha tyivaa cuan. Ta maa ña nacuhva cuenda ña chí sihi ña.

¹² Tyicuan ta chaá coyo ra canyicón chí ra Juan ta canaquehen ra coño ñuhu ra, ta catyihí ra chíchi ñuhu. Ta yahá cuan ta chahañ coyo ra chisacoto ra chí ra Jesús.

Nu chahá ra Jesús cha cachi ohon mil rayii

(Mr. 6.30-44; Lc. 9.10-17; Jn. 6.1-14)

¹³ Cha chitó ra Jesús tuhun ihya, quehen ra noo canoa, ta cuahan noo tuhun ri maa ra noo nu taxi ri iyó. Soco chitó ri ñáyivi, ta quitá coyo ñu ñuu ñu, ta cuahan coyo ñu chata ra ityi nu ñuhú.

¹⁴ Cha quitá ra Jesús chíchi canoa cuan, nanyehé ra cuaha xaan ñáyivi. Ta cundahví xaan cuñí ra nyehé ra chí ñu. Ta sanduhahá ra chí ñu cuhví cha chaá chihin ñu.

¹⁵ Ta vatyí cha cua cuaá, ra cachicá noo chihin ra Jesús chaa coyo ra, ta catyí ra chí ra:

—Cha iñi xaan, ta yori ñáyivi iyó yatyin ri ihya. Yucuan cuenda n̄atachi chi ñáyivi ihya na cunuhu coyo ñu nya ñuu cusata ñu cha cachi ñu —cacatyí ra chi ra Jesús.

¹⁶ Ta ra Jesús catyí ra:

—Ña tahán chi cuhun ñu. Cuhva maa ndo cha cachi ñu.

¹⁷ Ta nacahan ra ta cacatyí ra:

—Noo tuhun ohon tahan siin pan ta uvi tahan siin tiyaca cumí ndi.

¹⁸ Ta catyí ra Jesús:

—Nyaca ndo chii.

¹⁹ Tyicuan ta tachí ra tyiño na cunyicu ñáyivi nu cuhu cuan. Yaha cuan ta quehen ra ohon tahan pan cuan, ta ni nduvi tiyaca cuan. Ta nanyehé ndaa ra andivi, ta nacuhva ra tyahvi nyoo chi Nyoo ta tahvi ra pan cuan. Ta chaha ra chi ra cachicá noo chihin ra, na casacha ra chi ñáyivi cuan.

²⁰ Ta tandihi ñu cachachi ñu ta ndaha iñi ñu. Yaha cuan ta canasataca ra yiquin cha ndoo. Ta quita uchi uvi tahan tica.

²¹ Ta cha tandihi ñu cachachi cuan, quita ta cha ohon mil cha maa ri maa rayi. Ta ña quihvi cuenda ñusihi ni ra cuatya.

Nu chicá ra Jesús nu ndutya

(*Mr. 6.45-52; Jn. 6.16-21*)

²² Ta cha yaha tuhun cuan ta catyí ra Jesús chi ra cachicá noo chihin ra, na quihvi coyo ra chichi canoa, vatyi cayaha sava ra miñi cuan ta cuhun coyo ra inga chiyo. Ta niri ca cha cuahan coyo ra cuan, ra Jesús ndoo ra natachi ra chi ñáyivi na cuhun coyo ñu.

²³ Cha yaha cha natachi ra chi ñu cuan, ta ndaa ra yucu cuan cua cacan tahvi noo tuhun ri maa ra chi Nyoo. Ta yucuan ñohó ra ta cuaa ndihi.

²⁴ Ta cha ni ri ca cha chicán tahvi ra cha cuahan vavaha canoa cuan nya mahñu miñi. Ta ndutya miñi cuan cañi chi chi canoa cuan cha cuenda vatyi ñihi xaan caá tatyí nu cuahan coyo ra.

²⁵ Ta cuhva cha ñaa ca cuan cua tuhva ra Jesús nu cuahan coyo ra chihin canoa cuan suri chicá ra nu ndutya.

²⁶ Ta cuhva cha cananyehé ra chi ra, chicá ra nu ndutya cuan, canayuhvi xaan ra. Ta cacana chaa vavaha ra, ta catyí ra:

—¡Noo cha sayuhvi cuví!

²⁷ Soco nacahan ra Jesús chihin ra, ta catyí ra:

—¡Sanií ndo iñi ndo, yuhu cuví, ma yuhvi ndo! —catyí ra.

²⁸ Tyicuan ta nacahan ra Pedro ta catyí ra:

—Sutu Mañi yuhu, tatu icon cuvún, catyi na quichi yuhu nu ndutya chiña nyacua nya nu vachun.

²⁹ Ta ra Jesús catyí ra chi ra:

—Ñaha.

Tyicuan ta noo ra Pedro nu canoa cuan, ta quichaha chica ra nu ndutya vatyi cuhun ra nu vachi ra Jesús.

³⁰ Soco cuhva cha tuví iñi ra tyi ñihi xaan fuerza tatyí cuan, nayuhvi ra ta quichaha nducu nyee ra, ta quichaha cana chaa ra ta catyí ra:

—¡Sacacu chii, Sutu Mañi yuhu!

³¹ Ta caa cuhva ri cuan, ta tijn ra Jesús ndaha ra, ta catyí ra chi ra:

—¡Chiin xaan chinó iñun chii! ¿Ñáá tuhun cha nacaca uvi iñun? —catyí ra Jesús chi ra.

³² Ta cuhva cha ndaa coyo ra nu canoa cuan, cutaxin ri tatyí cuan.

³³ Tyicuan ta ra cañohó chichi canoa cuan cachicuiñi chiti ra nuu ra Jesús, ta cacatyí ra chi ra:

—Ndicha ndicha cuii vatyí Sehe Nyoo cuví chuun —cacatyí ra.

Nu sanduvahá ra Jesús chi ñu cuhví ñuu cha nyicú nicacahnu Genesaret (Mr. 6.53-56)

³⁴ Cha cayahá sava ra miñi cuan, cachaá coyo ra nu cuví Genesaret.

³⁵ Ta cuhva cha canicohon nuu ñáyivi iyó yucuan chi ra Jesús, sacoto ñu chi tandihí ñáyivi ityi cuan. Ta quichí nyaca ñu tandihí ñu cuhví nu nyaá ra.

³⁶ Ta chacú ndahvi ñu nuu ra, na cuhva ra tñn ñu vasi chiin sahma ra. Ta tandihí ñu tñn sahma ra, nduvahá ñu.

15

Nu sañahá chi ñáa cha sativí chi ñáyivi (Mr. 7.1-23)

¹ Tyicuan ta suhva ra cacuví fariseo ta ra casacuaha ley vehe ñuhu quita coyo ra Jerusalén. Ta chaá coyo ra nu nyaá ra Jesús ta candacá tuhun ra chí ra, ta catyí ra:

² —¿Ñáa tuhun cha ña sacuví ra cachicá noo chuhun costumbre cha sañahá ra cacuví mandoñi ñuu yo? Vatyí ña canacatyá ra ndaha ra tari cuhva cha tahán chi, tatu cuacachi ra xita —cacatyí ra.

³ Soco ndacá tuhun ra Jesús chi ra, ta catyí ra:

—¿Ñáa tuhun cha ña quichahá tucu nyoho tuhun cahán Nyoo ta ñihi xaan ca quichaha ndo costumbre maa ndo?

⁴ Vatyí Nyoo catyí ra: “Saha ndo ñáyivi chi sutu ndo ta chi sihi ndo. Ta tandihí ñu cha cahán ña vaha chi sutu o chi sihi, na cúvi ñu”, catyí Nyoo.

⁵ Soco nyoho catyí ndo tyi noo ñáyivi cuví catyí ñu chi sutu ñu o chi sihi ñu tyehe caa: “Ma cuví tyinyei chuun vatyí tandihí cha iyó chii cha yahá chahá cuende chi Nyoo.”

⁶ Ta tatu cha catyí ndo tyicuan caa, ña cuñi ca chi cha tyinyee ca ndo chi sutu ndo o chi sihi ndo, catyí ndo. Ta tyicuan caa sacuachiyó xiin ndo tuhun cha catyí Nyoo tyi sacuvi ndo, vatyí cuñi ndo sacuvi maa ndo cuhva costumbre maa ndo.

⁷ ¡Nyoho cha sahá ndo tyi vaha ndo! Ndicha vaha tuhun cha tyaá ra Isaías, ra profeta Nyoo ta cha naha nu catyí Nyoo tuhun ndo tyehe caa:

⁸ Ñáyivi ihya, chihin yuhu ri ñu catyí ñu tyi cuñi ñu chii.

Soco ñima chihin tandihí añima ñu, tyi sñn nu nyaá xiñi ñu.

⁹ Ta ñahri maa tuhun cha sacahnú ñu chii.

Vatyí cha sañahá ñu maa maa ri cuhva sañahá ñáyivi ri cuví, tyehe caa tyaá ra Isaías tuhun ndo, catyí ra Jesús.

¹⁰ Tyicuan ta caná ra chi ñáyivi ta catyí ra chi ñu:

—Tyasoho ndo, ta çutuñi iñi ndo tuhun cahín.

¹¹ Vatyí cha quihví yuhu ñáyivi, ñima cuan sativí chi ñu nuu Nyoo. Soco cha quitá yuhu ñu, ican cuan sativí chi ñu.

¹² Tyicuan ta catuhvá ra cachicá noo chihin ra Jesús ta candacá tuhun ra chí ra, ta catyí ra:

—¿Atu chitón vatyí ra fariseo quiñi xaan cuñi ra cha cachiñi ra tuhun cahún?

¹³ Soco maa ra Jesús nacahan ra:

—Tandihí yutun cha ña tachí Suti, ra nyaá andivi, cucoyo tun nya yoho tun.

14 Saña ndo chi ra vatyi ra cuaa cacuví ra, ta casañahá ra ityi chi inga ra cuaa. Ta tatu noo ra cuaa ta sañahá ra ityi chi inga ra cuaa, ni nduvi ra cucanacoyo ra chichi noo yavi.

15 Tyicuan ta quichaha catyí ra Pedro chi ra Jesús:

—Nacatyí chi ndi ñáá cha cuñí chi catyí cuhva cha cahun cuan.

16 Tyicuan ta ra Jesús catyí ra chi ra:

—¿Atu ni nyoho ta ña cutuñi iñi ndo?

17 ¿Atu ña cutuñi iñi ndo vatyi cha quihvi ityi yuhu yo, chichi yo cuahan? Yaha cuan ta quita tucu.

18 Soco tuhun cha quitá yuhu yo, chichi añima yo quitá, ta ican cuan cuví cha sativí chi ñáyivi nuu Nyoo.

19 Vatyi nya chichi añima ñu quitá cha quiñi caá chicá xiñi ñu. Ta cuñun, cha chahñi ñu chi ñáyivi, cha quichi cuvi iñi ñu coo ñu chihin inga ñu cha ñima ñasihí ñu cuví. Ta tandihí ca cha quiñi caa cha sacuvi ñu chihin coño ñuhu ñu. O yihí ñu cha suhu ñu cha chii ñáyivi. O sandaví ñaha ñu. O cahán ndasi ñu.

20 Ican cuan cuví cha sativí chi ñáyivi. Soco cha ma sacuvi ñu costumbre cha nacatyá xaan ñu ndaha ñu cha ni cumañi ca cachi ñu, ña sativí cuan chi ñu —catyí ra Jesús.

Nu nachingo iñi noo ñaha inga ñuu chi ra Jesús

(Mr. 7:24-30)

21 Quitá ra Jesús ñuu cuan ta cuahan ra ityi ñuu Tiro ta ñuu Sidón.

22 Ta noo ñaha ñuu Canaan iyó ña ityi cuan, suri caná chaa ña vachi ña nu vachi ra Jesús, ta catyí ña:

—Sutu Mañi yuhu, ra vachi tata rey David cuvún. Cundahvi cuñi nyehun chii, vatyi sehi yihí noo tatyi ña vaha chi ña, ta nyehé xaan ña tindoho —catyí ña.

23 Soco ra Jesús ña nacahan ra nu cahán ña. Tyicuan ta tuhva ra cachicá noo chihin ra chi ra ta cachacu ndahvi ra nuu ra ta catyí ra chi ra:

—Çatyí chi ña na cunuhu ña vatyi caná chaa xaan ña vachi ña chata yo.

24 Tyicuan ta catyí ra Jesús chi ra:

—Nyoo noo ri nu tachí ra chii, cuenda mbee cha cuanaa. Ta mbee cuan ican cuví ñu ñuu Israel.

25 Soco ñaha cuan tuhva ña ta chicuiñi chiti ña nuu ra ta catyí ña chi ra:

—Sutu Mañi yuhu, ¡tyinyee chii!

26 Ta ra Jesús catyí ra chí ña:

—Ña vaha cha tinyaa yo pan yuhu sehe yo ta cuhva yo cachi ina —catyí ra chi ña.

27 Soco maa ña ña quichaha ña ta catyí ña chi ra:

—Ndicha, Sutu Mañi yuhu. Soco nyacua nya ina ta chachí ti yiquin cha canacoyo nu mesa chitoho ti —catyí ña.

28 Tyicuan ta catyí ra Jesús chi ña:

—Sihi ¡ñana cha chinó xaan iñun chii! Cua sacuvi tari cuhva cuñun.

Ta caa cuhva ri cuan ta nduvaha sehe ña.

Nu sanduvaha ra Jesús cuaha ñu cuhvi

29 Quitá ra Jesús yucuan ta yaha ra yuhu miñi Galilea, ta ndaa ra noo yucu ta chicunyaá ra yucuan.

30 Ta cuaha ñáyivi chaá coyo nu nyaá ra ta quichi nyaca ñu cuaha ñu cuhvi: ñu coxo, ñu cuaa, ñu luu, ñu ñihi. Ta cuaha ca ñu cuhvi quichi nyaca ñu nu nyaá ra. Ta chacun ñu chi ñu nuu ra, ta maa ra sanduvaha ra chi ñu.

³¹ Ta iyo cuñí ñáyivi nyehé ñu yoso caa nacahan ñu ñihi ta yoso caa nduvaha ñu luu, ta yoso caa nacacá ñu coxo, ta yoso caa nanyehé ñu cuaa. Ta quichaha casacahnu ñu chi ra cuví Nyoo cuenda ñu, ñu Israel.

Nu chahá ra Jesús cha cachi cumi mil rayi#
(Mr. 8.1-10)

³² Tyicuan ta cana ra Jesús chi ra cachicá noo chihin ra, ta catyí ra chi ra:
—Ndahvi xaan cuñí nyehi chi ñáyivi ihya, vatyi cha uñi quivi nyicú ñu ihya chihin, ta ñahri maa cha cachi ñu nyisó ñu. Ta ña cuñí natachi chi ñu nya vehe ñu vatyi ta cachi ca ñu, coto coña ñu ityi cunuhu ñu —catyí ra Jesús.

³³ Tyicuan ta ra cachicá noo chihin ra cacatyí ra chi ra:
—Soco ¿nya cuquehen yo cha cachi ñáyivi cuaha ihya, nu yori maa ñáyivi iyó ihya?

³⁴ Tyicuan ta ra Jesús ndaca tuhun ra chi ra:

—¿Yoso tahan pan cumí ndo?

Ta maa ra catyí ra:

—Ucha tahan pan, ta uvi tahan tiyaca nyihi ri.

³⁵ Tyicuan ta tachí ra na cunyicu ñáyivi cuan nu ñuhú.

³⁶ Tyicuan ta quehen ra ndi ucha pan cuan ta tiyaca cuan, ta nacuhva ra tyahvi nyoo chi Nyoo. Tyicuan ta tahvi ra ta chaha ra chi ra cachicá noo chihin ra, ta maa ra cachicá noo chihin ra canasachá ra chi ñáyivi.

³⁷ Tandíhi ñu chachi ñu, ta chitú chichi ñu. Ta yahá cuan casacutu ra ucha tica chihin yiquin cha ndoo cuan.

³⁸ Cumi mil rayi# cachachi, ta ña quihvi cuenda ñusihí ni ri ra cuatya.

³⁹ Yahá cuan ta sacunuhu ra chi ñáyivi, ta quihvi ra nu canoa, ta cuahan ra ityi nu cuví Magdala.

16

Ra fariseo ta ra saduceo cachicán ra chi ra Jesús na sacuvi ra noo milagru
(Mr. 8.11-13; Lc. 12.54-56)

¹ Tyicuan ta ra fariseo ta ra saduceo chahan coyo ra nu nyaá ra Jesús. Vatyi cacuñí ra nducu nyehe ra chi ra yucuan chaha chicán ra na sacuvi ra noo milagru chihin tunyee iñi Nyoo.

² Soco nacahan ra Jesús ta catyí ra chi ra:

—Cha cha iñi cuhva cha cuaa quee ñanyii, tuhvá ndo catyí ndo: “Vaha xaan cucuvi quivi tyaan, vatyi tyaqui xaan cuaha andivi.”

³ Ta cha ñaha ri catyí ndo: “Vityin ña tyaqui maa cucuvi quivi vatyi cuaha ta iñi ñaa xaan andivi”, catyí ndo. Nyoho vaha xaan chitó ndo ¿yoso caa nacotó ndo duhun vico andivi soco ña cuví nacoto ndo yoso caa cuahan tuhun cha sañahá Nyoo chi ndo vityin?

⁴ Ñáyivi iyó vityin, quiñi iyó ñu ta ña chinó iñi ñu chi Nyoo. Cuñí ñu nyehe ñu noo cha iyo. Soco ma cuhve nyehe ñu vatyi cha yahá sañahá Nyoo cha iyó cha sacuvi ra chihin ra Jonás —catyí ra Jesús chi ra, ta sandoo ra chi ra, ta cuahan ra.

Tuhun chahn ra fariseo cuví chi tari yuchan iya
(Mr. 8.14-21)

⁵ Cuhva cha cayaha ra cachicá noo chihin ra Jesús inga chiyo miñi cuan, canaa iñi ra cacuiso ra pan.

⁶ Tyicuan ta catyí ra Jesús chi ra:

—Saha ndo cuenda chi ndo chihin yuchan iya ra fariseo ta ra saduceo —catyí ra Jesús chi ra.

⁷ Tyicuan ta quichaha candatuhun ra chihin ra tahan ra ta catyí ra:

—Cha cuenda vatyí ñahri pan nyisó yo vachi, yucuan chaha catyí ra tyicuan caa chi yo —catyí ra.

⁸ Ta tuví ñi ra Jesús tuhun candatuhún ra, ta catyí ra chi ra:

—Nyoho, chiin xaan chinó ñi ndo chii. ¿Ñáá tuhun cha catyí ndo vatyí ñahri pan nyisó ndo?

⁹ ¿Atu ta cutuñi ca ñi ndo? ¿Atu ña nichón ñi ndo quivi sacachi chi ndi ohon mil rayi chihin ohon tahan ri pan? Ta ¿yoso tahan tica sacutu ndo chihin yiquin cuan?

¹⁰ ¿Atu ña nichón ñi ndo quivi sacachi chi cumi mil ca ra chihin ucha tahan pan? Ta ¿yoso tahan tica sacutu ndo chihin yiquin cuan?

¹¹ ¿Yoso caa cha ña tuví ñi nyoho vatyí ñima tuhun pan cahín, cuhva cha catyí vatyí na saha ndo cuenda chi ndo chihin yuchan iya ra fariseo ta ra saduceo? —catyí ra Jesús chi ra.

¹² Tyicuan ta cacutuñi ñi ra vatyí ñima tuhun yuchan iya pan cuan cahán ra, soco na casaha ra cuenda chi ra chihin tuhun cha casañahá ra fariseo ta ra saduceo.

Nu catyí cachi ra Pedro vatyí ra Jesús cuví Cristo ra cha quitá nu nyaá Nyoo (Mr. 8.27-30; Lc. 9.18-21)

¹³ Cuhva cha chaá ra Jesús ityi ñuu Cesarea Filipo, ndacá tuhun ra chi ra cachicá noo chihin ra ta catyí ra:

—¿Ñáá catyí ñáyivi? ¿Yóo ra cuví Rayi cha quichi nya gloria? —catyí ra.

¹⁴ Ta canacahan ra ta catyí ra:

—Yihí ñu catyí ñu tyi ra Juan ra sacondutya chi ñáyivi cuvún. Ta inga ñu catyí ñu tyi ra Elías, ta yihí tucu ñu catyí ñu tyi ra Jeremías, o inga ra cuví profeta Nyoo ta cha naha.

¹⁵ Tyicuan ta catyí ra chi ra:

—Ta cha cuenda chi nyoho, ¿Yóo ra cuví yuhu?

¹⁶ Tyicuan ta nacahan ra Simón Pedro:

—Yoho cuvún ra Cristo, Sehe Nyoo nyitó —catyí ra.

¹⁷ Ta nacahan ra Jesús ta catyí ra:

—Siñ xaan cuví chi yoho, Simón sehe ra Jonás, vatyí ni noo rayi ña sañaha ra chuun tuhun ihya, soco maa Suti ra nyaá andivi sañaha chuun.

¹⁸ Ta yuhu catyí chuun tyi yoho cuvún ra Pedro. Ta siqui cava ihya, savahí vehe ñuhi. Ta ma cuví chasaha tuhun chihí chí chí.

¹⁹ Yuhu cuhve ndaha tucu andivi nu nyacá ñaha Nyoo chuun. Ta cha cuhñun ihya siqui ñuhu ñayivi, cha nuhñi saha maa Nyoo nya andivi. Ta tandihí cha ndachun ihya siqui ñuhu ñayivi, cha ndachi maa Nyoo nya andivi.

²⁰ Tyicuan ta catyí ra Jesús chi ra cachicá noo chihin ra tyi yori chihin cacahan ra tuhun vatyí ican ra cuví Cristo cha quitá nu nyaá Nyoo.

Nu sacotó ra Jesús tyi cucúvi ra (Mr. 8.31—9.1; Lc. 9.22-27)

²¹ Nya ndaha quivi cuan quichaha catyí ra Jesús chi ra cachicá noo chihin ra, vatyí cuñí chí cha chuun ra ñuu Jerusalén. Ta ra cacuvi mandoñi, ta ra cacuvi nuu chí cha sutu, ta ra sacuaha ley vehe ñuhu, cucasanyehé xaan ra tindoho chí ra. Ta catyí tucu ra vatyí cucahñi ra chí ra soco nu cu uñi quivi ta cunandoto ra.

²² Tyicuan ta quehen ra Pedro chi ra ta quita siin ra chihin ra ta quichaha catyí ra chi ra Jesús vatyí ña vaha cha cahán ra ta catyí ra:

—Ña cuñí Nyoo ta cuvi chuun tyehe caa, Sutu Mañi yuhu.

²³ Soco nanyocava ra Jesús, ta quichaha catyí ra chi ra Pedro:

—¡Canyaha chuun nui, cuihna! Vatyí cha cahún tyiña caa nducú sanacavon chii. Vatyí ña chicá xiñun cuhva chicá xiñi Nyoo. Soco cuhva chicá xiñi ñayivi chicá xiñun —catyí ra.

²⁴ Tyicuan ta ra Jesús catyí ra chi ra cachicá noo chihin ra:

—Tatu nya nyoho cuñí ndo cunyicon ndo chii, cuñí chi sanaa ndo iñi ndo tuhun maa ndo. Ta ma ndu uvi iñi ndo cha nyicón ndo chii, vasi nyehe ndo tindoho cha cuende vatyí yucuan cuví cruzi cha tahán chi cuiiso ndo.

²⁵ Vatyí nya nyoho ña cuñí ndo nyehe ndo tindoho cha cuenda yuhu, cucúvi ndo ta cuhun ndo anyaya. Soco nya ndo cuhva ndo ñayivi ndo cha cuende, cucacu añima ndo.

²⁶ Vatyí ñáá ri tuhun cha saha ganaa ndo tandihi cha tyayii cha iyó siqui ñuhu ñayivi tatu cunaa añima ndo. Vatyí ñahri chihin cutiyahvi ndo ta cacu añima ndo.

²⁷ Vatyí yuhu Rayii cha quichi nya gloria, cuquichi tiqui soco chihin cha cahnu cuví Suti, ta cuquichi coyo ángel chihin. Tyicuan ta cutiyahvi chi noo noo ndo yoso cuhva sacuvi ndo.

²⁸ Cha ndicha catyí chi ndo, vatyí yihí nyoho cha nyicú ndo ihya cha ma cúvi ñaha ndo nyacua nya nyehe ndo chi yuhu Rayii cha quichi nya gloria, cunyehe ndo yoso caa vachi cunyaca ñahi chi ndo —catyí ra Jesús.

17

Nu sañahá Nyoo yoso caa ra Jesús noo cha ndicha nu nyacá ñaha ra (Mr. 9.2-13; Lc. 9.28-36)

¹ Iñu quivi cha yaha, ta quehen ra Jesús chi ra Pedro ta ra Jacobo, ta ra Juan yañi ra Jacobo. Ta cuahan coyo ra noo yucu sucun xaan chihin ra.

² Ta yucuan nasama cuhva caa ra Jesús nuu ra ndihi chihin ra. Ta xiño vavaha nanduví nuu ra tari ñanyii. Ta sahna ra cuichin xaan nanduví tari maa ñuhú cuichin.

³ Tyicuan ta cananyehé ra chi ra Moisés ta ra Elías, candatuhún ra chihin ra.

⁴ Ta quichaha catyí ra Pedro chi ra Jesús:

—Sutu Mañi yuhu, vaha xaan cha nyicú ndi ihya. Tatu cuñún na savaha ndi uñi tahan vehe. Noo chuun, noo chi ra Moisés, ta nonga chi ra Elías —catyí ra Pedro chi ra Jesús.

⁵ Cha ni ri ca cha cahán ra Pedro, quichi ri noo vico cha xiño vavaha siqui ra. Ta sahvi cuan chi ra. Ta chichi vico cuan quita noo ndusu cha catyí chi tyehe caa:

—Ican ra ihya cuví Sehi, ta cuñí xain chi ra. Ta sii xaan cuñí chihin ra. Tyasoho ndo tuhun cahán ra —catyí ndusu cuan.

⁶ Cha cachiñi ra cachicá noo chihin ra Jesús tuhun cuan, cachicava ra nya ñuhu, ta cayuhvi xaan ra.

⁷ Tyicuan ta tuhva ra Jesús nu cayucú ra, ta tiin ra chi ra, ta catyí ra:

—Ndicuita ndo. Ma yuhvi ndo.

⁸ Ta cuhva cha cananyehé ra, noo tuhun ri ca ra Jesús nanyaá, ta uvi ca ra cuan, yori ca ra.

⁹ Ta cuhva cha vachi noo coyo ra yucu cuan, catyí ra Jesús chi ra:

—Yori chihin cahan ndo tuhun cha nyehe ndo ihya. Cahan ndo tuhun soco nya yaha cúvi ta nandoto yuhu Rayi cha quichi nya gloria —catyí ra.

¹⁰ Tyicuan ta candaca tuhun ra cachicá noo chihin ra chi ra,

—¿Ñáá tuhun cha catyí ra casacuahá ley vehe ñuhu vatyí xihna ca ra Elías tahán chi quichi?

¹¹ Ta nacahan ra Jesús ta catyí ra:

—Cha ndicha vatyí xihna ca ra Elías quichi ta cusanduvaha ra tandihi.

¹² Soco yuhu catyí chi ndo vatyí cha yaha quichi ra Elías, soco ña nichon nuu ñáyivi chi ra, ta casacuví ñu chihin ra tandihi cuhva cuñi maa ñu. Ta tyicuan caa tucu yuhu Rayi cha quichi nya gloria, cusanyehe ñu tindoho chii —catyí ra.

¹³ Tyicuan ta cacutuñi ñi ra vatyí tuhun ra Juan ra sacondutya cahán ra Jesús.

Nu sanduvaha ra Jesús chi noo ra tyivaa cha yihí noo tatyí ña vaha chi
(Mr. 9.14-29; Lc. 9.37-43)

¹⁴ Cuhva cha cachaa coyo ra nu nyicú ñáyivi, tuhva noo ra ta chicuiñi chiti ra nuu ra Jesús, ta catyí ra chi ra:

¹⁵ —Tata, cundahvi cuñi nyehun chi sehi, vatyí yihí noo cuehe chihi tañi chi ra, ta cuaha xaan tindoho nyehé ra chihin cuehe cuan. Ta cuaha xaan chaha nduvá ra nu ñuhú ta cayú ra, ta nduvá ra nu ndutya ñandihí.

¹⁶ Ta quichi nyaque chi ra chi ra cachicá noo chuhun, soco ña cuví sanduvaha ra chi ra —catyí ra.

¹⁷ Ta nacahan ra Jesús ta catyí ra:

—¡Nyoho, ñu ña chinó ñi cuví ndo! ¡Ta nicaa ni quiñi iyó ndo! ¿Yoso tahan ca quiyi cunyai chihin ndo ta cunyei tisihi ndo nyacua nya cutuhva ndo ta chinó ñi ndo chii? Nyaca ndo chi ra tyivaa chiña tyehe —catyí ra.

¹⁸ Tyicuan ta tava ñehe ra Jesús chi tatyí ña vaha cuan, ta quitá cuan chi ra tyivaa cuan. Ta caa cuhva rí cuan ta nduvaha ra.

¹⁹ Cha yaha cuan ta ndaca tuhun sin ra chicá noo chihin ra Jesús chi ra ta catyí ra:

—¿Ñáá tuhun cha ña cuví tava nyuhu chi tatyí ña vaha cuan?

²⁰ Ta ra Jesús nacahan ra ta catyí ra:

—Cha cuenda cha chii xaan chinó ñi ndo chii. Cha ndicha catyí chi ndo vatyí tyehe ta chinó ñi ndo chii, tari cuhva cha cahnu noo chiti mostaza, cuví catyí ndo chi yucu ihya na canyaha chi ta cuhun chi inga ityi, ta yucu ihya cuhun chi inga ityi. Ta ñahri cha ma cuví sacuvi ndo tatu ndicha cha chinó ñi ndo chii.

²¹ Soco tahan tatyí ña vaha cuan, quita chi chihin cha ma cachi yo ta cacan tahvi yo —catyí ra Jesús chi ra.

Inga tucu chaha cahán ra Jesús tuhun yoso caa cucahñi ñáyivi chi ra
(Mr. 9.30-32; Lc. 9.43-45)

²² Cha ni ri ca cha ñi ri cachicá noo ra ityi Galilea cuan, ra Jesús catyí ra chi ra cachicá noo chihin ra:

—Yuhu Rayi cha quichi nya gloria, cucuhva cuenda ñu chii chichi ndaha ra xaan ñi chii. Ta cucahñi ra chii.

²³ Soco nu cu uñi quiyi ta cunandote —catyí ra.

Ta canducuihya xaan ñi ra cachicá noo chihin ra cha cachiñi ra tuhun cuan.

Nu catyiyahví ra cuenda vehe ñuhu cahnu

²⁴ Cuhva cha chaꝯ ra Jesús ta ra cachicá noo chihin ra ñuu Capernaum, ra catavá xuhun cuenda vehe ñuhu cuan, chahꝯ coyo ra chinyehe ra nu nyaá ra Pedro ta candacꝯ tuhun ra chi ra:

—¿Atu ña tyiyahví ra sacuaaha chi nyoho xuhun cha tahán chi cuenda vehe ñuhu cahnu? —cacityí ra chi ra Pedro.

²⁵ Ta nacahꝯ ra Pedro ta catyí ra:

—Tyiyahví ra.

Cuhva cha quihví ra Pedro chichi vehe nu ca iyó ra, xihna ca ra Jesús nacahꝯ ra ta catyí ra:

—¿Yoso caa catyí tucu yoho vityin Simón? Ra cuví tyiño siqui ñuhu ñayiví ihya, ¿yóó chi caquehen ra yahví? ¿Atu chi ñu ñuu maa ra o chí ñu inga ñuu?

²⁶ Nacahꝯ ra Pedro ta catyí ra:

—Chi ñu inga ñuu.

Ta catyí ra Jesús chi ra:

—Tu tyicuan caa, ñu ñuu maa ra ña tahán chi tyiyahví ñu.

²⁷ Soco tacuhva vatyí ma kuhva yo tisihi chi ní noo ra, cuahꝯ miñi cuan, ta tyihun anzuelo, ta tyiyaca cha tavon cha xihna ri, chichi yuhu ti cunañihun noo xuhun. Ta ñihi tyiyahvun cha cuende ta cha cuenda maun. Quehun ta cutiyahvun —cacityí ra Jesús chi ra Pedro.

18

Nu sañahá ra Jesús yóo ra cha cahnu ca cucuvi nu nyacá ñaha Nyoo
(Mr. 9.33-37; Lc. 9.46-48)

¹ Quiví cuan catuhvꝯ ra cachicá noo chihin ra Jesús chi ra, ta candacꝯ tuhun ra chi ra:

—¿Nya ndi cahnu ca cuví nu nyacá ñaha Nyoo?

² Tyicuan ta ra Jesús canꝯ ra chi noo ra cuehe luhlu, ta chinanyaaꝯ ra chi cue mahñu ra.

³ Ta catyí ra:

—Cha ndicha catyí chi ndo, vatyí tatu nyoho ta ma nasama ndo kuhva iyó ndo, ta tatu ma cuví ndo tari ra cuatyaa, ma cuví quihví ndo nu nyacá ñaha Nyoo. Vatyí ra cuatyaa chahá ndotyín cunyaca ñaha sutu ndotyín chi ndotyín, ta tyicuan caa cuhva ndo chi ndo cunyaca ñaha Nyoo chi ndo.

⁴ Ta tyicuan caa ra cahnu ca cuví nu Nyoo, ican cuví ñu ña cahnu sahá chi, ta cuví ñu tari ra cuehe luhlu ihya.

⁵ Ta ñáyiví cha natín cuenda chihin sívi chi noo ra ña cahnu sahá chi, tari ra cuehe luhlu ihya, chi yuhu natín cuenda ñu.

Nu sañahá ra Jesús chi yo yoso caa saha cuenda yo chi yo coto sacuvi yo cha ña vaha

(Mt. 5.29-30; Mr. 9.42-48; Lc. 17.1-2)

⁶ Tatu yóo ñu sanacavá nu cuatyí chi noo ra nachinó iñi chii ta cuví ra tari minoo ra luhlu, vaha taxin ca, cuhñi ñu noo yuu vee sucun ñu ta tuchi ñu chí ñu nu cono tyañuhu.

⁷ ¡Ñana cha ña vaha cha cuenda ñáyiví iyó siqui ñuhu ñayiví, vatyí iyó tuhun cha sacoo ñu cuatyí tahan ñu! Ta tyicuan ri coo tuhun cuan, soco ¡ndahvi ñu ndahvi cha sanacava nu cuatyí chí inga ñu!

⁸ Yucuan chaha tatu ndahun o tatu chahun sanacava chuun nu cuatyí, vaha taxin ca çahnya ta sacuiton cañi. Vatyí vaha ca quihvun nu coun chihin

Nyoo chihin cha luu ndahun o luu chahun, ta ñima ca cha naniun ta tuchi Nyoo chuun nu cayú ñuhú cha ma ndahva ca maa.

⁹ Ta tatu noo chiti nuun sanacavá chuun nu cuatyí, vaha taxin ca tava ta sacuiton cañi. Vatyí vaha ca quihvun nu coun chihin Nyoo chihin noo chiti nuun, ta ñima ca chihin cha ninduvi chiti nuun ta tuchi Nyoo chuun nu cayú ñuhú chichi anyaya.

*Nu sañahá ra Jesús tyi tari noo mbee cha cuanaa, tyicuan caa cuví yo
(Lc. 15.3-7)*

¹⁰ Ma tava xiin ndo chi ni noo ra cha cuví tari noo ra luhlu, vatyí catyí chi ndo tyi ángel cha sahá cuenda chi ra, tyicuan ri sacuví ra tyiño nuu Suti, ra nyaá andivi.

¹¹ Vatyí yuhu Rayi cha quichí nya gloria, vachi sacaqui chi ñáyivi cha cuanaa chihin cuatyí ñu.

¹² ¿Yoso caa catyí nyoho? Tatu noo ra cumí ra noo cientu mbee, ta cuanaa noo ti, ¿atu ma sandoo ra ndi cumi xico chahun cumi tahan ca ti cuan yucu cuan, ta cuhun ra cunanducu ra chi quití cha cuanaa cuan? Yuhu catyí tyi sandoo ra ta cuhun ra.

¹³ Ta tatu nañihi ra chi ti, cha ndicha vatyí cusii ca cuñí ra chihin quití cuan, ta ñima ca chihin cumi xico chahun cumi ca quití cha ña chinaa cuan.

¹⁴ Ta tyicuan caa tucu, Sutu ndo ra nyaá andivi ña cuñí ra cha cunaa ni noo ñu cuví tari noo ra luhlu.

*Yoso caa tahán chi saha yo ticahnu iñi chi tahan yo
(Lc. 17.3)*

¹⁵ Tatu ra yañun ta sacuví ra cha ña vaha chuhun, cahan chihin noo tuhun ri maa ra ta catyun chi ra tyi ña vaha cuhva sacuví ra. Ta tatu quichaha ra tuhun cahún, cha saha ganaun chi ra cuví cuan.

¹⁶ Soco tatu ña quichahá ra chuun, tyicuan ta cañon chi uvi o uñi ra, tacuhva tandihi cha cahun cucuvi ra testigu.

¹⁷ Tatu ña quichahá ra ni chi ra cha chahan coyo chuhun cuan, tyicuan ta cahan chihin ra chihin nuu ñáyivi nyicú vehe ñuhu. Ta tatu ña quichaha ra chi ñu vehe ñuhu, tyicuan ta cuví saha ndo tuhun tyi tari noo ra ña chinó iñi chi Nyoo cuví ra, o tari ra catavá xuhun cuenda gobiernu ñuu Roma.

¹⁸ Cha ndicha catyí chi ndo, vatyí tandihi cha cuñi ndo ihya siqui ñuhu ñayivi, ta cha nuñi saha maa Nyoo nya andivi. Ta tandihi cha ndachi ndo ihya siqui ñuhu ñayivi, cha ndachi maa Nyoo nya andivi.

¹⁹ Ta suri catyí tiqui chi ndo, vatyí tatu uvi nyoho ihya siqui ñuhu ñayivi, ndu iin ri ndo ta cacan tahvi ndo cuenda ñáá noo cha cuñí ndo cacan ndo, Suti, ra nyaá andivi cuhva ra chi ndo.

²⁰ Vatyí nu nyicú uvi o uñi ñu sacahnú chii, yucuan cunyai mahñu ñu —catyí ra Jesús.

²¹ Tyicuan ta chahan ra Pedro chindaca tuhun ra chi ra Jesús ta catyí ra: —Sutu Mañi yuhu, tatu ra tahn ta sacuvi ra ñáá noo cha ña vaha chihin, ¿yoso tahan chaha tahán chi sahi ticahnu iñi chi ra? ¿Atu ucha tahan chaha?

²² Ta nacahan ra Jesús ta catyí ra:

—Catyí chuun vatyí ñima ucha tahan ri chaha, soco tandihi ri chaha.

Nu cahán ra Jesús noo cuhva cuenda noo ra cha ña cuñi saha ticahnu iñi

²³ Yucuan chaha cha nyacá ñaha Nyoo añima ñáyivi cuví chi tari noo rey cha nacana chi tandihi musu vatyí cuanyehe ra yoso yosó yica ñu chi ra.

²⁴ Ta cuhva cha quichahā natava ra cuenda, ta quichī nyaca ñu chi noo musu cha cuaha millón pesu yosó yica chi ra.

²⁵ Ta musu cuan ñahri maa chihin tyiyahvi ra chi chitoho ra, ta chitoho ra catyí ra: “Cuaxico ndo chi ra ñin cuenda ri chihin ñasihí ra, ta chihin sehe ra ta tandihí cha iyó chí ra tacuhva vatyi chihin xuhun cuan cunatyiyahvi ra cha yosó yica ra chii.”

²⁶ Tyicuan ta musu cuan chicuiñi chiti ra nuu chitoho ra, ta chacu ndahvi ra nuu ra, ta catyí ra: “Tata, cuātu noo chiin chii, ta tyiyahvi mai tandihí chuun”, catyí ra.

²⁷ Ta cundahvi cuñi chitoho ra chi ra, ta saha ra ticahnu ñni chi ra, ta sanaa ra tandihí cha yosó yica ra, ta saña ra chi ra.

²⁸ Soco cuhva cha quitā musu cuan, nañihí ra chi noo ra tahan ra cha cuví musu tari maa ra. Ta ra cuan yosó yica ra chiin ri chi ra. Ta tñin ra chi ra cuan, ta quichahā quitu ra sucun ra, ta catyí ra chi ra: “Tyiyahvi cha yosó yicon chii.”

²⁹ Tyicuan ta chicuiñi chiti ra cuan nuu ra, ta chacu ndahvi ra nuu ra ta catyí ra: “Cuātu noo chiin chii, ta tyiyahvi mai tandihí chuun”, catyí ra.

³⁰ Soco maa ra ña cuñi ra, ta chahan ra ta tyihí ra chi ra vehe caa nyacua nya cha tyiyahvi ra cha yosó yica ra chi ra.

³¹ Cha canyehe inga ca musu cha sacuví ra, uhvi xaan cacuví chi ra, ta chahan coyo ra chinacatyí ra chi chitoho ra cha sacuví ra cuan.

³² Tyicuan ta chitoho ra cuan tachí ra tyiño na quichi ra ta catyí ra chi ra: “Musu ña vaha cuvún. Yuhu sahí ticahnu ñni tandihí cha yosó yicon chii, vatyi chacu ndahvun nui.

³³ Tyicuan caa tucu cuñi chi cundahvi cuñun chi ra tahun cuan tari cundahvi cuñi nyehi chuun”, catyí ra chi ra.

³⁴ Ta cuxaan xaan chitoho ra, ta tachí ra tyiño na tachi tuñi ñu chi ra, nyacua nya cha tyiyahvi ra tandihí cha yosó yica ra.

³⁵ Ta nu ndihí cahan ra Jesús, ta catyí ra tyehe caa:

—Tyicuan caa tucu cusacuví Suti, ra nyaá andivi, chihin ndo tatu ma saha ndo ticahnu ñni chihin cha tandihí añima ndo chi tahan ndo.

19

*Nu sañahá ra Jesús tyi ña vaha sandoo ñáyivi chi ñasihí ñu o yí ñu
(Mr. 10.1-12; Lc. 16.18)*

¹ Cha yahā cha catyí ra Jesús tuhun ihya, ta quitā ra Galilea cuan, ta cuahan ra ityi Judea cha nyaá inga chiyo yuvi cahnu Jordán, ityi nu caña ñanyii.

² Cuaha ñáyivi chinyicon chi ra, ta yucuan sanduvahā ra chi ñu cuhví.

³ Tyicuan ta suhva ra fariseo catuhvā ra chi ra Jesús, vatyi cacuñi ra nducu ra cuhva tyaa ra cuatyí siqui ra. Ta candaca tuhun ra chi ra ta catyí ra:

—¿Atu vaha cha sandoo rayii chi ñasihí ra cha cuenda ñáá ri tisihi luhlu chahā ña chi ra?

⁴ Ta nacahan ra ta catyí ra:

—¿Atu ta sacuaha ca nyoho nu tutu Nyoo nu catyí chi vatyi ra cha savaha chi ndo nya quivi xihna ri, savahā ra rayii ta ñaha sihi?

⁵ Ta catyí tucu chi tyehe caa: “Tahán chi sandoo rayii chi sutu ra ta chi sihi ra, ta ndu ñin ri ra chihin ñasihí ra. Ta chichi cha nanduvi ñu, cucuvi ñu tari cha noo ri ñáyivi.”

⁶ Yucuan chaha, ñima ca uvi tahan cuví ñu, soco cha nanduví ñu noo ri ñáyivi. Yucuan chaha, cha sandu ñin ri Nyoo ña tahán chi cha sasiin ñáyivi —catyí ra.

⁷ Tyicuan ta candacá tuhun ra chi ra Jesús ta cacatyí ra:

—¿Ñáa tuhun cha tyaa ra Moisés vatyí cuví cahnya noo rayií tutu chihin ñasihi ra ta sandoo ra chí ña?

⁸ Ta ra Jesús catyí ra chi ra:

—Cha cuenda cha ndavá añima ndo, yucuan chaha, chaha ra Moisés cha sandoo ra ñasihi ra. Soco quivi xihna ri ñima tyicuan caa cuví.

⁹ Yuhu catyí chi ndo tyehe caa: Ra cha sandoo ñasihi, ta ñima cha cuenda cha natuvi ña chihin inga ra, ta tandaha ra chihin inga ñu, chicoo cuatyí ra nuu Nyoo. Ta ra cha tandaha chihin noo ñaha sihi cha sandoo yí chi, suri chicoo tucu cuatyí ra cuan —catyí ra.

¹⁰ Tyicuan ta ra cachicá noo chihin ra, cacatyí ra chi ra:

—Tatu tyicuan caa tahán chi coo rayií chihin ñasihi ra, vaha taxin ca ma tandaha yo.

¹¹ Ta ra Jesús catyí ra chi ra:

—Soco ña tandihi ñáyivi cuví cutuñi iñi ñu tuhun ihya. Soco ñu cha chaha Nyoo cha cutuñi iñi, ican ñu cua cutuñi iñi.

¹² Cha ña tandaha ñáyivi, cuaha ri cuenda cuví. Yihí ñu ña quichi cuví iñi ñu tandaha ñu vatyí ñin caa maa ñu cacu ñu. Ta inga ñu ña quichi cuví iñi ñu tandaha ñu vatyí cha yaha tava ñáyivi ñi ñu. Ta yihí ñu ña tandaha ñu cha cuenda cha cuñi ñu sacuvi ñu tyiño nuu Nyoo, na nducuaha añima cha nyacá ñaha Nyoo. Tandihi ñu cuví sacuvi tyehe caa, na sacuvi ñu —catyí ra Jesús.

Nu nasocó ra Jesús chi ra cuatyaa

(Mr. 10.13-16; Lc. 18.15-17)

¹³ Tyicuan ta quichí nyaca ñu suhva ra cuatyaa chi ra Jesús tacuhva na tyiso ra ndaha ra siqui ndotyin, ta cacan tahvi ra chaha ndotyin. Soco ra cachicá noo chihin ra quichaha cacahan ra chi ñu quichí nyaca chi ndotyin.

¹⁴ Soco ra Jesús catyí ra:

—Saña ndo chi ra cuatyaa, na quichi maa ndotyin nu nyaí. Ta ma casi ndo. Vatyí ñu nyacá ñaha Nyoo añima, cuví ñu tari ra cuatyaa ihya —catyí ra.

¹⁵ Tyicuan ta tyiso ra ndaha ra siqui ndotyin. Yaha cuan ta cuahan ra.

Nu cahán noo ra tyivaa tyayí chihin ra Jesús

(Mr. 10.17-31; Lc. 18.18-30)

¹⁶ Noo ra tyivaa chahan ra chindacá tuhun ra chi ra Jesús ta catyí ra:

—Maestro vaha xaun. ¿Ñáa cha vaha tahán chi sacuvi ta ñihi ñáyivi cha ma naa ca maa coi?

¹⁷ Ta ra Jesús catyí ra chi ra:

—¿Ñáa tuhun cha catyun tyi vaha yuhu? Noo ri ra vaha iyó ta ican ra cuan cuví Nyoo. [Ta cha catyun tyi vahi, nacotón tyi Nyoo cuví.] Soco tatu cuñun quihvun ñáyivi cha ma naa ca maa, sacuvun tandihi tuhun cha tachí Nyoo tyi sacuvi yo —catyí ra chi ra.

¹⁸ Ta ra tyivaa cuan catyí ra:

—¿Nya cha cuví cuan?

Ta ra Jesús catyí ra chi ra:

—Ma cahñun chi ñáyivi. Ma coo inga ñusihí chuun. Ma suhun cha chí ñáyivi. Ma cahun cuendu siqui ñu.

19 Saha ñáyivi chi sutun ta chi sihun. Ta cuñun chi ñáyivi, tari cha cuñún chi maun.

20 Ta ra tyivaa cuan, catyí ra chi ra:

—Tandihi tuhun ihya ta quichahí nyata luhli ta nya vityin. ¿Ñáa ca cha cumañi chii?

21 Ta ra Jesús catyí ra chi ra:

—Tatu cuñún cuvun noo ra cuiti nuu Nyoo, cuahan ta xicon cha iyó chuun, ta cuhvon chi ñu ndahvi, ta cunyicon chii. Tyicuan ta coo cha tyayii chuun nya gloria —catyí ra.

22 Soco cuhva cha chiñi ra tyivaa cuan cha cahan ra Jesús tyehe caa, cuihya xaan cuanuhu ra vatyí tyayii xaan ra.

23 Tyicuan ta ra Jesús catyí chi ra cachicá noo chihin ra:

—Cha ndicha catyí chi ndo vatyí yii xaan cuhva ra tyayii cha cunyaca ñaha Nyoo añima ra.

24 Catyí chi ndo inga chaha, vatyí numi ca yaha noo camellu xiyu noo yiqui ticu, ta ñima ca noo ra tyayii ta cuhva ra chi ra cha cunyaca ñaha Nyoo —catyí ra Jesús.

25 Cha cachiñi ra cachicá noo chihin ra tuhun ihya, iyo xaan cacuñi ra, ta quichaha candaca tuhun ra chi ra tahan ra, ta cacatyí ra:

—Tu tyicuan caa, ¿yóo cha cuví cacu vii?

26 Tyicuan ta nanyehé ra Jesús nu nyicú ra ta catyí ra:

—Ñáyivi ma cuvi sacuvi ñu tyehe caa, soco Nyoo cuví sacuvi ra tandihi.

27 Tyicuan ta quichaha catyí ra Pedro chi ra:

—Sutu Mañi yuhu, nyuhu tandihi maa cha iyó chi ndi sandoo ndi ta nyicón ndi chuun. ¿Ñáa cha cuñihi ndi? —catyí ra chi ra.

28 Ta nacahan ra Jesús ta catyí ra:

—Cha ndicha catyí chi ndo, vatyí quivi cha cunduchaa tandihi, yucuan quivi yuhu Rayii cha quichi nya gloria cucunyai ta cunyaca ñahi, ta nyoho cha nyicón ndo chii, cunyaa tucu nyoho nu uchi uvi tahan tyayu tyaqui. Ta cunyaca ñaha ndo chi ndi uchi uvi tahan ityi ñáyivi Israel.

29 Ta tandihi ndo cha sandoo ndo vehe ndo, o yañi ndo, o cuhva ndo, o sutu ndo, o sihi ndo, o ñasihí ndo o sehe ndo, o ñuhú ndo cha catyí yuhu, cunañihi ndo noo cientu ca chaha siqui cuan, ta cunañihi tucu ndo ñayivi cha ma naa ca maa coo ndo.

30 Cuaha xaan ñu cuahan ityi nuu vityin, ican ñu cuan, cuhun nya nu ndihi. Ta cuaha xaan ñu cuahan nu ndihi vityin, ican ñu cuhun ñu ityi nuu.

20

Nu sañahá ra Jesús noo cuhva cuenda ra casahá tyiño

1 Cha nyacá ñaha Nyoo añima ñáyivi, cuví chi tari noo chitoho chacu yoho tichaha ndivi. Ta chitoho chacu cuan ñaha cuiiri quitá ra cuanducu ra cuaha ri musu cusaha tyiño nu tyiño saha ra.

2 Ta sandaaq ra tyiño chihin musu cuan vatyí cutiyiahvi ra yahvi cha tahán chi chi ra cha noo quivi, ta tachí ra chi ra cusaha tyiño ra nu iyó tyiño sahá ra.

3 Yahá cuan ta quitá tucu ra cuhva cha caa iin cha ñaha ri. Ta nanyehé ra chi suhva ca ra canyicú ri maa nuyahvi cuan.

4 Ta catyí ra chi ra: “Cuahan tucu nyoho cua saha tyiño ndo nu iyó tyiño sahí, ta tyiyahvi mai yahvi cha tahán chi chi ndo.” Tyicuan ta cuahan coyo tucu ra cuan.

⁵ Tyicuan ta chitoho chacu cuan quita tucu ra inga chaha cuhva cha ora. Yucuan ta quita tucu ra cuhva cha caa uñi cha cha iñi.

⁶ Ta yahā cuan ta quita tucu ra cuhva cha caa ohon cha cha iñi ta nanyehē ra canyicū ri maa suhva ca ra nuyahvi cuan. Ta catyí ra chi ra: “¿Ñáá tuhun cha canyicū ri maa nyoho ndiyaca ihya, ta ña sahá tyiño ndo?”

⁷ Ta canacahan ra cuan ta catyí ra: “Yori maa cahan chihin ndi cha cusaha tyiño ndi.” Tyicuan ta catyí ra chi ra: “Cuahan tucu nyoho cua saha tyiño ndo nu iyó tyiño sahí. Ta tyiyahvi mai chi ndo yoso cuhva cha tahán chi chi ndo”, catyí ra.

⁸ Ta cuhva cha cuaa cuan, chitoho tyiño cuan catyí ra chi ra cuví nuu chi musu cuan: “Na canon chi musu, ta tyiyahvun chi ra. Quichaha tyiyahvun chi ra cha caquihvi nu ndihi, ta nu ndihi ta tyiyahvun chi ra cha caquihvi cha xihna ri”, catyí ra.

⁹ Tyicuan ta chaā coyo ra cha caquihvi cuhva cha caa ohon cha cha iñi cuan. Ta tahan tahan ra quehen ra yahvi nani noo quivi.

¹⁰ Yahā cuan, ta cuhva cha tahán chi chi ra cha caquihvi coyo cha xihna ri cuan, cacuñi maa ra vatyí cuaha ca cutiyahvi ra chi ra. Soco suri in ri yahvi noo quivi caquehen ra.

¹¹ Ta cuhva cha caquehen ra, quichaha cacahan ra chi chitoho tyiño cuan.

¹² Ta catyí ra: “Ra cha cachaa coyo nu ndihi ihya, noo tuhun hora casaha tyiño ra. Ta in ri cuhva tyiyahvun chi ra chihin nyuhu cha saha tyiño ndi nu cahñi ndiyaca”, cacatyí ra.

¹³ Soco nacahan chitoho tyiño cuan, ta catyí ra chi noo ra cuan: “Amigo, ñahri cha ña vaha sacuví chuhun. ¿Atu ñima yahvi cha noo quivi catyí vatyí tyiyahvi chuun?”

¹⁴ Quehen yahvun, ta cuanuhu. ¿Atu ñahri ityi iyó chii cha tyiyahvi chi ra cha quihvi nu ndihi in ri cuhva cha tyiyahvi chi yoho?

¹⁵ ¿Atu ñahri ityi iyó chii cha sacuví cha cuñi mai chihin xuhin? ¿Atu quiñi cuñun tyi vaha ñáyivi cuví chihin inga ra cuan?” catyí ra.

¹⁶ Ta tyicuan caa ñu quihvi nu ndihi, cuhun ñu ityi nuu. Ta ñu cuahan ityi nuu, nya nu ndihi cuhun ñu. Vatyí cuaha xaan ñu nacaná Nyoo chi. Soco chiin xaan ri ñu nacachí ra.

*Inga chaha sacotó ra Jesús yoso caa cucahñi ñáyivi chi ra
(Mr. 10.32-34; Lc. 18.31-34)*

¹⁷ Cuhva cha cuñi cuhun ra Jesús nya Jerusalén, canā sñn ra chi ndi uchi uvi ra cachicá noo chihin ra ta catyí ra chi ra:

¹⁸ —Ta cha nyehe maa ndo vatyí cuahan yo Jerusalén vityin. Ta yucuan cucuhva cuenda ñu chi yuhu Rayi cha quichi nya gloria chi ra cacuví nuu chi tata sutu, ta chi ra casacuaha ley vehe ñuhu, ta cucatyí ra tyi tahán chi cúvi.

¹⁹ Ta cucuhva cuenda ra chii chi ra ñuu Roma, ta cucuacu nyaa ra chii, ta cucañi ra chii, ta cucahñi ra chii nu cruzi. Soco nu cu uñi quivi cunandote —catyí ra Jesús chi ra.

*Nu chicán sihi ra Jacobo ta ra Juan noo tumañi iñi chi ra Jesús
(Mr. 10.35-45)*

²⁰ Tyicuan ta sihi ra Jacobo ta ra Juan sehe ra Zebedeo tuhva ña nu nyaá ra Jesús chihin ninduvi sehe ña. Ta chicuñi chiti ña nuu ra vatyí cacan ña noo tumañi iñi chi ra.

²¹ Ta quichaha ndaca tuhun ra Jesús chi ña:

—¿Ñáá cha cuñún?

Ta catyí ña:

—Quivi cha cunyaun nu nyacá ñahun nya andivi, cuhva cha cunyaa ninduvi sehi xiun. Na cunyaa noo ra chiyo vahun, ta inga ra cunyaa ra chiyo satyun.

²² Soco nacahañ ra Jesús ta catyí ra:

—Nyoho ña chitó ndo cha chicán ndo. ¿Atu cuví nyehe nyoho tindocho cha cunyehe yuhu? ¿Atu cuví cuhun ndo tuhun chihi tari cuhva cuhun yuhu? —catyí ra.

Ta canacahañ ra ta catyí ra:

—Cuví chi ndi.

²³ Ta catyí ra Jesús chi ra:

—Cha ndicha vatyi cunyehe ndo tindocho, ta cuhun ndo tuhun chihi tari cuhun yuhu tuhun chihi. Soco tuhun cha cunyaa ndo chiyo vahi ta chiyo satyín, ñima yuhu tahán chi cuhve chi ndo, soco maa Suti cucatyí ra yóo cha cuñihi nyatu cuan —catyí ra Jesús chi ra.

²⁴ Ta cha cachiñi uchi ca ra cacticá noo chihin ra Jesús tuhun cuan cacuxaañ ra chihin ninduvi ra cuan.

²⁵ Soco cana ra Jesús chi ra ta catyí ra chi ra:

—Cha chitó maa ndo, vatyi ra nyacá ñaha chi ñáyivi iyó siqui ñuhu ñáyivi ihya, ñihi xaan nyacá ñaha ra chi ñu tari nyaca ñaha ra musu ra.

²⁶ Soco ñima tyicuan caa tahán chi sacuvi nyoho. Vatyi ra cha cuñi cucahnu ca nu Nyoo, cuñi chi cuví ra musu tandihi ca ndo.

²⁷ Ta nya nyoho cha cuñi ndo cuví ndo nuu, cuñi chi cuví ndo musu tandihi ca ñu.

²⁸ Tari yuhu Rayi cha quichi nya gloria, ña vachi vatyi sacuvi ndo tyiño nui, soco vachi sacuvi tyiño nuu ndo, ta cuhve ñáyivi. Vatyi chihin cuan ta cuví sacaqui cuaha ñáyivi.

Nu sanduvahá ra Jesús chi uvi ra cuaa

(Mr. 10.46-52; Lc. 18.35-43)

²⁹ Cuhva cha cua quitá coyo ra ñuu Jericó, cuaha xaan ñáyivi cuahan chihin ra Jesús.

³⁰ Ta yuhu ityi cuan canyicú uvi tahan ra cuaa. Ta cuhva cha cachiñi ra vatyi cua yaha ra Jesús, quichaha canachaa ra. Ta catyí ra:

—Sutu Mañi yuhu, ra vachi tata ra David cuvún. ¡Cundahvi cuñi nyehun chi ndi! —cacatyí ra.

³¹ Ta ñáyivi quichaha cahan ñu chi ra na cacasi ra yuhu ra. Soco maa ra ñihi ca cacana chaa ra:

—Sutu Mañi yuhu, ra vachi tata ra David cuvún. ¡Cundahvi cuñi nyehun chi ndi!

³² Tyicuan ta chicuñi ra Jesús ta cana ra chi ninduvi tahan ra cuaa cuan, ta ndaca tuhun ra chi ra:

—¿Ñáá cha cuñi ndo cha sacuvi chihin ndo?

³³ Ta canacahañ ra ta catyí ra:

—Sutu Mañi yuhu, cuñi ndi nyehe ndi.

³⁴ Tyicuan ta cundahvi cuñi ra Jesús nyehe ra chi ra, ta tijn ra chiti nuu ra. Ta caa cuhva ri cuan cananyeha ra, ta cananyicon ra chi ra Jesús.

21

Nu quihvi ra Jesús Jerusalén

(Mr. 11.1-11; Lc. 19.28-40; Jn. 12.12-19)

¹ Cuhva cha cua chaꝥ coyo ra ñuu Jerusalén, ta cachaaꝥ ra ñuu Betfagé, yatyin ri nu cuví yucu yutun Olivo. Tyicuan ta tachꝥ ra Jesús tyiño chi uvi ra chicá noo chihin ra.

² Ta catyí ra chi ra:

—Cuahan ndo ñuu cha nyaá ityi nuu ihya. Ta yucuan cunañihi ndo noo burru sihi, nuñhi ti. Ta nyacá ti noo burru luhlu. Ndachi ndo chi ti, ta quichi nyaca ndo chi ti chii.

³ Ta tatu yóo cha catyí ñáá cha catyí chi ndo, catyí ndo chi ñu: “Vatyí chiñuhú ti chi maa ra nyacá ñaha, soco numi ri quichi nanyaca ndi chi ti”, catyí ndo chi ñu —catyí ra.

⁴ Tyehe caa cuvꝥ tacuhva na chino cava tuhun cha catyí ra profeta nu tyaaꝥ ra tyehe caa:

⁵ Catyí ndo chi ñu ñuu Sión:

“Nyehe ndo, vachi rey maa ndo nu nyaá ndo.

Ndahvi ri vachi ra yosó ra noo burru luhlu, sehe noo quiti cha tuhvá nyisó carga”, catyí ra profeta.

⁶ Tyicuan ta cuahan coyo ra cachicá noo chihin ra, ta casacuvꝥ ra tari kuhva catyí ra Jesús chi ra.

⁷ Caquichꝥ nyaca ra chi ti chihin sihi ti. Ta catyisꝥ ra sahma ra siqui ti, ta ndaaꝥ ra Jesús chi ti.

⁸ Ta cuaha xaan ñáyivi candicá ñu sahma ñu ityi nu cuahan ra, ta inga ñu catohon ñu numa yutun ta cachacun ñu ityi.

⁹ Ta ñáyivi cha cuahan ityi nuu ta ityi chata, quichahaꝥ cana chaa ñu ta catyí ñu:

—¡Cahnu xaan cuví ra vachi tata rey David! ¡Cahnu xaan cuví ra vachi cuenda Sutu yo Nyoo! ¡Ta sacahnú xaan yo chi Nyoo nu nyaá ra ityi andivi! —catyí ñu.

¹⁰ Cuhva cha chaꝥ ra Jesús ñuu Jerusalén cuan, tandihi maa ñáyivi ñuu naquiquꝥ, ta cuaha xaan ñu candacá tuhun ñu chi tahan ñu, ta catyí ñu:

—¿Yóo ra cuví ra ihya?

¹¹ Ta ñáyivi catyí ñu:

—Ra Jesús, ra chahá cuenda tuhun cahan Nyoo, ra ñuu Nazaret nu cuví Galilea cuví ra —catyí ñu.

Nu tavá ñehe ra Jesús chi ra caxicó chichi vehe ñuhu cahnu

(Mr. 11.15-19; Lc. 19.45-48; Jn. 2.13-22)

¹² Yahꝥ cuan ta quihvi ra Jesús chichi vehe ñuhu cahnu Nyoo. Ta tavá ñehe ra chi tandihi ra casatá ta ra caxicó yucuan. Ta sanduvꝥ ra mesa ra canasamá xuhun chi ñáyivi yucuan. Ta sanduvꝥ ra tyayu ra caxicó paloma.

¹³ Ta catyí ra:

—Nu tutu Nyoo catyí chi tyehe caa: “Vehi, vehe nu chicán tahvi ñáyivi chii cuví, ta tyicuan caa cucunañi chi. Soco nyoho cha nasahaꝥ ndo vehe nu nyicú ra suhu” —catyí ra.

¹⁴ Chichi vehe ñuhu cuan catuhvꝥ suhva ra cuaa ta ra coxo chi ra Jesús. Ta maa ra sanduvahaꝥ ra chi ra.

15 Soco canyehę ra cacuví nuu chi tata sutu ta ra casacuahá ley vehe ñuhu cuan vatyí savahá ra Jesús milagru, ta canachaa ra cuatyaa chichi vehe ñuhu, ta catyí ndotyin:

—¡Cahnu xaan cuví ra vachi tata rey David! —catyí ndotyin.

Tyicuan ta cacuxaan tata sutu ta inga ra cuan cha canyehę ra ta cha cachiñi ra.

16 Ta cacatyí ra chi ra Jesús tyehe caa:

—¿Atu chiñún cha cahán ndotyin?

Ta nacahan ra Jesús ta catyí ra:

—Chiñí. Soco ¿atu ta sacuahá ca ndo nu tutu Nyoo nu catyí chi tyehe caa?

Sutu Mañi yuhu, sacuvun vatyí ra cuatyaa nyihi cata ndotyin.

Ta ra cuatyaa lee cha chaxín sacahnú ndotyin chuun, catyí chi, —catyí ra Jesús.

17 Tyicuan ta sandoq ra chi ra, ta quitá ra ñuu cuan ta cuahan ra ñuu Betania. Ta yucuan ndoq ra cha cuaa cuan.

Nu tyanahá ra Jesús chi tu higo vatyí ñahri higo iñi nuu tun
(Mr. 11.12-14, 20-26)

18 Tuvi inga quivi. Ta cha ñaha ri, cua ndichi ra Jesús nya Jerusalén, ta chaa soco chi ra.

19 Ta nanyehę ra noo tu higo yatyin ri yuhu ityi cuan. Ta tuhva ra nu nanyaá tun, soco ñahri maa nañihi ra nuu tun. Maa maa ri maa numa ri iñi nuu tun. Tyicuan ta catyí ra chi tun tyehe caa:

—¡Ni nonga chaha ma cuhva con chíti!

Ta caa cuhva ri cuan ta na ityi tun.

20 Ta cha nyehę ra cacticá noo chihin ra cha sacuví ra, iyo cacuñí ra, ta ndaca tuhun ra chi ra ta catyí ra:

—¿Ñáá tuhun cha numi xaan na ityi tu higo cuan?

21 Ta nacahan ra Jesús ta catyí ra:

—Cha ndicha catyí chi ndo, vatyí tatu chinó iñi ndo ta ma nacaca uvi iñi ndo, ñima ihya ri cha sacuví chi tu higo ihya cuví sacuví ndo, soco cuví catyí ndo chi yucu ihya tyehe caa: “Canyaha chuun ihya ta cuahan nya chichi tyañuhu.” Ta tyicuan caa cucuvi.

22 Ta tandihi cha cacan ndo nu chicán tahvi ndo, tatu chinó iñi ndo tyi cucuhva Nyoo, cuñihi ndo —catyí ra Jesús.

Nu sañahá chi yóo ra chaha tyiño chi ra Jesús
(Mr. 11.27-33; Lc. 20.1-8)

23 Yahá cuan ta quihvi ra Jesús chichi vehe ñuhu cahnu, ta cha ni ri ca cha sañahá ra yucuan, tuhva ra cacuví nuu chi tata sutu chi ra, ta ra cacuví mandoñi ñu ñuu Israel, ta candaca tuhun ra chi ra:

—¿Yóo cha tyaa tyiño vatyí sacuvun tyehe caa, ta yóo cha chaha tyiño cuan chuun?

24-25 Ta nacahan ra Jesús ta catyí ra:

—Yuhu tucu cua ndaca tuhun noo tuhun chi ndo. ¿Yóo cha tachí chi ra Juan vatyí sacondutya ra chi ñáyivi? ¿Atu Nyoo tachí chi ra, o ñáyivi? Tatu catyí ndo chii, cacatyí tucu yuhu chi ndo yóo cha tyaa tyiño ihya chii —catyí ra Jesús chi ra.

Tyicuan ta quichahá cacuvi yuhu ra chihin ra tahan ra, ta cacatyí ra:

—Tatu catyí yo tyi Nyoo tachí chi ra, cucatyí ra chi yo: “Tu tyicuan caa, ¿ñáá tuhun ña chinó iñi ndo chi ra?”

²⁶ Ta tatu catyí yo tyi ñáyiví, ñáyiví cuví nacanda ñu síqui yo, vatyí tandíhi ñu chinó iñi ñu tyi ra Juan, cuenda Nyoo cahān ra —catyí ra chí ra tahan ra.

²⁷ Tyicuan ta quichahā cacatyí ra chí ra Jesús tyehe caa:

—Ña chitó ndi.

Tyicuan ta ra Jesús catyí ra chí ra:

—Ni yuhu, ta ma catyí chí ndo yóo cha tyaa tyiño ihya chíi.

Nu cahān ra Jesús noo cuhva cuenda uvi tahan sehe noo ra

²⁸ Ra Jesús catyí ra chí ra:

—¿Yoso caa catyí ndo cuenda tuhun cha cua catyí ihya? Noo ra, iyó uvi tahan sehe ra. Ta catyí ra chí noo sehe ra: “Cuāhan cua saha tyiño nu iyó tyiño sahí.”

²⁹ Ta nacahān sehe ra ta catyí ra: “¡Ma cuhin!” Soco yahā cuan ta nasama cuhva chicá xiñi ra ta chahān ra chisaha tyiño ra.

³⁰ Yahā cuan ta sutu ra chahān ra nu nyaá inga sehe ra. Ta catyí tucu ra chí ra na cuhun ra cusaha tyiño ra. Soco ra yucuan numi ri quehen ra tuhun, ta catyí ra: “Vaha, Tata, cuhin.” Soco ña chahān ra.

³¹ Chichi cha ninduvi tahan ra, ¿nya ra sacuví ra cha catyí sutu ra? —catyí ra Jesús.

Ta nacahān ra ta cacatyí ra:

—Ra cha cahān ra chíhin cha xihna ri.

Ta catyí ra Jesús chí ra:

—Cha ndicha catyí chí ndo, vatyí xihna ca ra catavá xuhun cuenda gobiernu, ta ñu cata iñi cuquihvi ñu nu nyacá ñaha Nyoo, ican saha nyoho.

³² Vatyí ra Juan ra sacondutya quichí ra, quichí sañaha ra chí ndo yoso caa tahān chí coo ndo, soco nyoho ña chinó iñi ndo chí ra, soco ra catavá xuhun ta ñu cata iñi cachino iñi ñu chí ra. Ta nyoho vasi nyehe ndo ihya, soco ña nasama ndo cuhva iyó ndo, tacuhva chino iñi ndo chí ra.

Nu catyí ra Jesús vatyí ra cacahñi chí ra cuví ra tari ra sahá tyiño ña vaha (Mr. 12.1-12; Lc. 20.9-19)

³³ Tyasoho ndo inga cuhva ihya: Chiyo noo chitoho noo ñuhú, ta tachi ra yoho tichaha ndivi, ta tyihí ra noo chacu. Ta savahā ra noo nu cuhñi ra tichaha ndivi cuan ta tava ra ndutya chí. Ta savahā tucu ra noo vehe sucun tacuhva vatyí cuví saha ra cuenda tandíhi.

Yahā cuan ta chahā noo ra ñuhú cuan chí suhva ra casahá tyiño, ta cuahan ra inga ñuu.

³⁴ Ta cha chaā quiví cha iyó tichaha ndivi cuan, tachí ra chí suhva musu, na cucacan ra chí ra casahá tyiño cuan, na cuhva ra suhva tichaha ndivi cha tahān chí chí ra.

³⁵ Soco ra casaha tyiño cuan, catiñ ra chí musu cuan, ta cacañi ra chí noo ra. Ta chí inga ra cachahñi ra, ta catuchí ra yuu chí inga ra.

³⁶ Tyicuan ta cha inga chaha, cuaha ca musu tachí chitoho chacu cuan ta ñima ca cha xihna ri. Soco tari casacuví ra chí ra cha xihna ri, sacuví tucu ra chí ra ihya.

³⁷ Nu ndíhi tachí ra chí maa maa sehe ra, vatyí cuñí maa ra vatyí cusaha ra ñáyiví chí sehe ra.

³⁸ Soco cuhva cha cananyehe ra casahá tyiño cuan chí sehe ra, catyí ra chí ra tahan ra tyehe caa: “Ican ra ihya cundoo chíhin tandíhi ihya. Na cahñi yo chí ra tacuhva ndoo maa yo chíhin”, cacatyí ra.

³⁹ Tyicuan ta catiñ ra chi ra, ta catava ra chi ra ityi chata chacu, ta cachahñi ra chi ra —catyi ra Jesús.

⁴⁰ Tyicuan ta ndaca tuhun ra Jesús chi ñu:

—Quivi quichi chitoho ñuhú cuan, ¿ñáá cha cusacuvi ra chihin ra casahá tyiño quiñi iyó cuan?

⁴¹ Ta nacahan ra ta cacatyí ra:

—Ma cuatu ra, soco cahñi ra chi ra caquiñi iyó cuan. Ta cuhva ra ñuhú cuan chi inga ra casahá tyiño. Ta quivi coo tichaha ndivi, cunacuhva cuenda ra chi chitoho chacu cuan cha tahán chi chi ra.

⁴² Tyicuan ta quichaha catyi ra Jesús chi ñu:

—¿Atu ta sacua ca nyoho nu tutu Nyoo nu catyi chi tyehe caa?

Yuu cha ña cuñi ra casavahá vehe cotyiño ra, ican cuan cuví yuu cha niñi ca.

Ican ihya cuví cha sacuvj Sutu yo Nyoo.

Ta tyaqui xaan tuhun cuan cha cuenda chi yo, catyi chi.

⁴³ Yucuan chaha catyi chi ndo vatyí ma cuhva ca Nyoo cuhun ndo nu nyacá ñaha ra, ta cucuhva ra chi ñu cha ndicha nyacá ñaha ra añima. Vatyí maa ñu cunacuhva cuenda ñu cha vaha cha tahán chi chi ra.

⁴⁴ Ta cha cuenda yuu cuan, yóó ñu cha nduva siqui chi, yiquin maa cucuvi ñu. Ta tatu yuu cuan ta canacava siqui yóó ñu, cutaxin nyihí maa ñu —catyi ra Jesús.

⁴⁵ Cuhva cha catuvi ñiñ ra cacuví nuu chi tata sutu cuan ta ra fariseo vatyí cuenda ra cahan ra Jesús cuhva ihya,

⁴⁶ cacuñi ra catiñ ra chi ra, soco cayuhvi ra chi ñáyivi vatyí ñáyivi, chitó ñu vatyí ra Jesús cuenda Nyoo cahan ra.

22

Nu chahá ra Jesús noo cuhva cuenda vico tandaha

(Lc. 14.15-24)

¹ Quichaha cahan tucu ra Jesús chihin ñu inga chaha chihin cuhva, ta catyi ra:

² —Cha nyacá ñaha Nyoo añima ñáyivi cuví chi tari noo rey cha savaha noo vico cha cuenda cha cua tandaha sehe ra.

³ Ta tachi ra chi musu ra na cuhun ra cucana ra chi ñu cha nacatyí tuhun ra, soco ñu cuan, ña cacuñi ñu quichi coyo ñu.

⁴ Tachi ra inga chaha chi inga musu, ta catyi ra chi ra tyehe caa: “Cati ndo chi ñu cha nacatyí tuhun, vatyí cha yaha chahñi sindiqui sane, ta inga quiti cha xahan ñandihi, ta cha nyaá vaha nyayu, ta tandihí cha nyatú tuhva. Na quichi ñu vico tandaha”, catyi ra.

⁵ Soco ñu nacatyí tuhun ra, ña caquichaha ñu chi ra. Noo ñu chahan coyo ñu nu iyó chacu ñu, inga ñu chahan ñu nu tyiño sahá ñu.

⁶ Ta inga ñu tñ ñu chi musu rey cuan ta cañi vavaha ñu chi ra nyacua chahñi ñu chi ra.

⁷ Tyicuan ta rey cuan cuxaan vavaha ra, ta tachi ra chi sindaro ra, cucahñi ra chi ra cachahñi cuan, ta cahmi ra ñuu ra.

⁸ Tyicuan ta quichaha catyi ra chi musu ra: “Tandihí ta cha iyó vaha cha cuenda vico tandaha, soco ñu nacatyí tuhun cuan, ña tahán chi cha quichi coyo ñu.

⁹ Cuahan ndo tandihí calle ta nacatyí tuhun ndo chi tandihí ri ñu cha nañihi ndo na quichi coyo ñu vico tandaha”, catyi rey cuan.

10 Musu cuan cuahan coyo ra tandihí calle, ta casandu ñn ri ra chi tandihí ñu canañihí ra: ñu quiñi iyó, ta ñu vaha. Ta tyicuan caa chitu chichi vehe ra chihin ñáyivi.

11 Tyicuan ta quihví rey cuan cua nyehe ra chi ñáyivi cha canacatyí tuhun musu cuan. Ta nanyehé ra chi noo ra ñohó yucuan, soco ñahri sahma vico tandaha ñihno ra.

12 Ta catyí rey chi ra: “Amigo, ¿yoso caa cha quihvun ihya ta ñahri sahma vico tandaha ñihno?” Soco ra cuan ña na cahan maa ra.

13 Tyicuan ta catyí rey cuan chi ra catyihí mesa cuan: “Cuhñi ndo chaha ra ta ndaha ra, ta tuchi ndo chi ra nu ñaa ñni ityi chata vehe, ta yucuan cucuacu ra, ta cusacahñi ra noho ra”, catyí ra.

14 Vatyí cuaha xaan ñu nacana Nyoo chii, soco chiin xaan ñu nacachi ra —catyí ra Jesús.

Nu candacá tuhun ra cuenda xuhun cha tavá gobiernu
(Mr. 12.13-17; Lc. 20.20-26)

15 Tyicuan ta catyihí tahan ra fariseo tuhun chihin tahan ra vatyí cusacahan ra chi ra Jesús noo cuhva cha ña tahán chi, vatyí tyicuan caa ta coo cuatyí catyaa ra siqui ra.

16 Ta tachí ra chi suhva ra cuenda ra, ñn ri chihin suhva ra cuenda ra Herodes. Ta cacatyí ra chi ra Jesús tyehe caa:

—Maestro, chitó ndi vatyí cha ndicha cahún. Ta chihin cha ndicha sañahún ityi Nyoo. Ta ña quichahún cha cahán ñáyivi, vatyí ña tñn cuendon cuhva caá ri ñu.

17 Catyí chi ndi yoso caa chicá xiñun: ¿Atu vaha cha tyiyahví yo cha chicán gobiernu ñuu Roma chi yo, o ma tyiyahví yo?

18 Soco tuví ñni ra Jesús vatyí ña vaha cuhva cachicá xiñi ra, ta catyí ra chi ra:

—Nyoho sahá ndo tyi vaha ndo, soco ña ndicha ndo. ¿Ñáá tuhun cha nducu nyehe ndo chii?

19 Sañaha ndo xuhun cha tuhva ndo tyiyahvi ndo chi gobiernu —catyí ra. Ta caquichí nyaca ra noo xuhun cha nañí denariu chi ra.

20 Ta cuhva cha nanyehé ra Jesús, ta quichahá ndaca tuhun ra chi ra:

—¿Yóó chi nuu ta yóó chi sívi nyaá ihya?

21 Ta nacahan ra ta cacatyí ra:

—Chi ra nyacá ñaha.

Tyicuan ta catyí ra Jesús chi ra:

—Cuhva ndo chi ra nyaca ñaha cha tahán chi chi ra, ta cuhva tucu ndo chi Nyoo cha tahán chi chi Nyoo —catyí ra.

22 Cuhva cha cachiñi ra cha cahan ra Jesús, iyo xaan cacuñi ra. Ta cuahan coyo ra.

Nu canducu tuhun ra saduceo siqui tuhun cha nandotó ndiyi
(Mr. 12.18-27; Lc. 20.27-40)

23 Suri quívi cuan suhva ra saduceo chahan coyo ra nu nyaá ra Jesús. Ta ra saduceo cuan ña cachino ñni ra cha cunandoto ndiyi quívi cu naa ñáyivi. Yucuan chaha candacá tuhun ra chi ra Jesús, ta catyí ra:

24 —Maestro, ra Moisés catyí ra vatyí tatu noo ra tandaha ta chihí ra ta ña chiyo sehe ra, tahán chi cha tandaha yañi ra chihin ñaha chihí yí cuan. Tyicuan ta coo sehe ra chihin ña cha cuenda yañi ra cha chihí.

25 Vaha. Vityin tyehe caa cuvĭ chi noo ra chiyo ucha tahan ra chihin yañi ra. Ra cha xihna ri tandaha ra. Yaha cuan ta chihĭ ra. Soco vatyi ña chiyo sehe ra, ndoo ñasihi ra chi yañi cu uvi ra.

26 Ta suri tyicuan caa cuvĭ chi yañi ra ra cu uvi. Ta yaha cuan, ta ra cu uñi quehen ra chi ña, ta suri chihĭ tucu ra. Ta tyicuan caa cuvĭ chi ndi ucha ra.

27 Ta cha yaha cuan nu ndihĭ tuhun chihĭ ndihĭ maa ña cuan.

28 Ta cha tyicuan caa, quivĭ cunandoto ñu, chichi cha ucha ra chihin yañi ra, ¿nya ra cucuvi ñasihi chi ñaha cuan? ¿Vatyi tandihĭ ra tandaha ra chihin ña? —cacatyĭ ra.

29 Nacahan ra Jesús ta catyĭ ra:

—Nyoho, cahan tondo ri maa ndo, cha cuenda vatyi ña chitó ndo cha nyaá nu tutu Nyoo, ni tunyee iñi Nyoo, ta ña chitó ndo.

30 Vatyi quivĭ cunandoto ndiyĭ, ni ma tandaha ñu, ta ni ma cuhva ñu sehe ñu tandaha, vatyi tari ángel Nyoo ra nyaá andivĭ cucuvi ñu.

31 Soco tuhun cha nandotó ñu ndiyĭ, ¿atu ta sacuaaha ca ndo tuhun cha catyĭ maa Nyoo chi ndo? Catyĭ ra tyehe caa:

32 “Yuhu cuvĭ Nyoo cuenda ra Abraham, ta ra Isaac ta ra Jacob.”

Ihya nyehé yo vatyi canyito añima ra cuan, vasi cha naha chihĭ ra vatyi Nyoo ñima Nyoo cuenda ñu ndiyĭ cuvĭ ra, soco Nyoo cuenda ñu nyitó cuvĭ ra —catyĭ ra.

33 Iyo cuñi ñáyivĭ cha chiñi ñu tuhun sañahá ra Jesús.

Ley cha ñiñi ca cha chaha Nyoo

(Mr. 12.28-34)

34 Cha cachitó ra fariseo vatyi ra Jesús chasi ra yuhu ra saduceo, candu ĩn ri ra.

35 Ta noo ra cha cuvĭ ra sacuahá ley vehe ñuhu, cuñi ra nducu nyehe ra chi ra Jesús. Ta quichaha ndaca tuhun ra chi ra, ta catyĭ ra:

36 —Maestro, ¿nya mandamiento cha nyaa nu ley cuvĭ cha ñiñi ca?

37 Ta catyĭ ra Jesús chi ra:

—“Cuñun chi Sutu Mañi yo Nyoo chihin cha ñi ĩñun ta chihin cha tandihĭ añimon, ta chihin cha tandihĭ cha chiñi tuñi xiñun.”

38 Ican ihya mandamiento cha ñiñi ca, ta cha xihna ri ñandihĭ.

39 Ta cha cu uvi cha yatyin ri tyicuan caa, ta catyĭ chi: “Cuñun chi ñáyivĭ tahan tari cuñún chi maun.”

40 Ican uvi tahan mandamiento ihya cuvĭ cha nyisó chi ley cha chaha Nyoo chi ra Moisés ta tandihĭ tuhun cha casañaha ra profeta Nyoo ta cha naha.

Ra Cristo quichi ra tata ra David, ta suri cuvĭ ra Sehe Nyoo

(Mr. 12.35-37; Lc. 20.41-44)

41 Cha ni ri ca cha canyicó ĩn ri ca ra fariseo,

42 ra Jesús ndaca tuhun ra chi ra, ta catyĭ ra:

—¿Yoso caa chicá xiñi nyoho cuenda ra cuvĭ Cristo? ¿Yóó chi tata vachi ra cuñi maa ndo?

Ta canacahan ra ta catyĭ ra:

—Tata ra David cuvĭ chi ra.

43 Tyicuan ta ra Jesús catyĭ ra chi ra:

—¿Ta yoso caa cha vatyi ra David cuan, maa Tatyĭ Ii Nyoo chotyñó chi ra? ta catyĭ ra vatyi ra cuvĭ Cristo, ra nyacá ñaha chi ra cuvĭ ra, vatyi catyĭ ra tyehe caa:

44 Cahān Suti Nyoo chihin Suti ra Cristo, ta catyĭ ra chi ra:

“Cunya chiyó vahi nyacua nya quiví cuhve chi ra xaan iñi chuun vatyi cuaca chahun siqui ra” tyaá ra David.

⁴⁵ ¿Yoso caa cha ra vachi tata ra David cuví chi ra Cristo, tatu suri maa ra David catyí ra vatyi ra Cristo Sutu ra cuví chi ra? —catyí ra Jesús.

⁴⁶ Ta yori maa cuví nacahan ni noo tuhun. Ta nya ndaha quiví cuan, yori ca maa caña iñi candaca tuhun ñáa ca cha candaca tuhun chi ra.

23

*Nu cahán ra Jesús chi ra sacuahá ley vehe ñuhu ta ra fariseo
(Mr. 12.38-40; Lc. 11.37-54; 20.45-47)*

¹ Tyicuan ta ra Jesús catyí ra chi ñáyiví, ta chi ra cachicá noo chihin ra tyehe caa:

² —Ra sacuahá ley ta ra fariseo nyicú ra tyiño cha sañahá ra ley cha tyaá ra Moisés.

³ Ta cha tyicuan caa, quichaha ndo cha cahán ra ta sacuvi ndo tandihí cha cacatyí ra chí ndo. Soco ma quehen ndo cuhva iyó ra, vatyi maa ra, siin cha sañaha ra, ta siin cha sacuví ra.

⁴ Vatyi yori ndoyo carga cha tyaá ra siqui ñáyiví. Ta saniñi ra chí ñu na cuiso ñu, ta maa ra ni chiin nundaha ra ña ñañi chata carga cuan.

⁵ Tandihí cha casacuví ra, cha cuñi ra na nyehe ñáyiví. Vatyi tahán iñi ra catyaa ra tuhun Nyoo tyaan ra ta soco ra chihin letra nahnu. Ta tahán iñi ra cacuihno ra sahana chihin adorno ñañi.

⁶ Ta nu vaha ca, cuñi ra cunyicu ra vico, ta cachi ra. Ta nu vaha ca cuñi ra cunyicu ra chichi vehe ñuhu.

⁷ Ta nu chicá noo ra cacuñi ra vatyi cuhva ñáyiví nocumi chí ra chihin cha sahá xaan ñu ñáyiví chí ra. Ta cuñi tucu ra cha catyí ñu chí ra vatyi chito xaan ra.

⁸ Soco nyoho, ma cuhva ndo ityi cha catyí ñáyiví vatyi chitó xaan ndo. Vatyi tandihí nyoho, yañi ndo cuví. Ta noo ri ra chitó iyó, ta ican ra cuví Cristo.

⁹ Ta ma catyí ndo Sutu ndo chí ninoo ra ñuhu ñáyiví ihya, vatyi iyó noo Sutu ndo, ta nyaá ra andiví.

¹⁰ Ta ma catyí ndo vatyi ra cuví nuu cuví ndo, vatyi noo ri maa ra Cristo cuví nuu.

¹¹ Ra cha sacuví tyiño nuu tandihí ca ra, ican ra cuan cuví ra cahnu ca nu nyicú ndo.

¹² Vatyi ra cahnu sahá chii, cunocuee ra. Ta ra ña cahnu sahá chii cucucahnu ra.

¹³ ¡Ndahvi nyoho ra sacuahá ley vehe ñuhu, ta ra fariseo! ¡Ndahvi nyoho cha sahá ndo tyi vaha ndo! Vatyi chasí ndo yuvehe nu nyacá ñaha Nyoo, tacuhva ma cuví quihví ñáyiví. Ta ni ri maa ndo ña quihví ndo ta ni ña chahá ndo cha quihví ñáyiví, ñu cuñi quihví.

¹⁴ ¡Ndahvi nyoho ra sacuahá ley ta ra fariseo, nyoho cha sahá ndo tyi vahá ndo! Vatyi tinyaá ndo vehe ñu chíhí yí, tyi ña cuví tyiyahví ñu ñáa xuhun tavá ndo siqui ñu. Ta yahá cuan, ta naha chicán tahví ndo nu tuví vatyi sahá ndo tyi vaha ndo. Ta cuenda cha sacuví ndo tyehe caa, cahnu ca tindocho cunyehe ndo.

¹⁵ ¡Ndahvi nyoho ra sacuahá ley vehe ñuhu, ta ra fariseo. ¡Sahá ndo tyi vaha ndo, soco ña ndicha ndo! Vatyi nducú xaan ndo cuhva na cunyicon ñáyiví chí ndo. Ta tatu cha nandihví ñu cuenda ndo, quiñi caa nicoo ñu saha ndo, ta

ñima ca maa ndo. Ta cha tyicuan caa nyacuví ndo, ñihi ca sacuhún ndo chi ñu anyaya cha nuu maa ndo.

16 ¡Ndahvi nyoho ra ndahvi! Vatyi cuñí ndo saquehen ityi ndo chi ñáyivi, jsoco cuaa ndo! Vatyi catyí ndo tatu noo ñu catyí ñu cha cusacuvi ñu noo cha cusacuvi ñu, ta tyanaha ñu chihin sivi vehe ñuhu, yucuan ña niñi cha sacuvi ñu. Soco tatu xuhun cuaan cha iyó vehe ñuhu cuan tyanaha ñu, yucuan ndicha, niñi cuñi chi cha sacuvi ñu, catyí ndo.

17 ¡Tondo xaan ndo ta cuaa ndo! ¿Nya cha niñi ca? ¿Atu niñi ca xuhun cuaan cuan, o vehe ñuhu cha sacu ii chi xuhun cuaan cuan?

18 Ta suri catyí tucu ndo: “Tatu yihí ñu catyí ñu cha cusacuvi ñu cha cusacuvi ñu, ta tyanaha ñu cuenda arta cha yoso cha chahá cuenda ñu chi Nyoo, ña niñi cha sacuvi ñu. Soco tatu tyanaha ñu cuenda ofrenda cha yosó síqui arta cuan, yucuan ndicha niñi cuñi chi sacuvi ñu, catyí ndo.”

19 ¡Tondo xaan ndo ta cuaa ndo! ¿Nya cha niñi ca? ¿Atu niñi ca ofrenda o arta cuan cha sacu ii chi ofrenda cuan?

20 Vatyi ñu tyanahá cuenda arta cuan, ñima cuenda ri cuan tyanaha ñu, soco cha cuenda tandihi cha yosó nuu ñandihí.

21 Ta ñu tyanahá cuenda vehe ñuhu cahnu, ñima cuenda vehe ñuhu ri cuan, soco cuenda Nyoo tyanahá ñu ñandihí, vatyi iyó ra yucuan.

22 Ta tyicuan caa tucu ñu tyanahá cuenda andivi, tyanahá tucu ñu cuenda tyayu Nyoo ta suri cha cuenda maa Nyoo ñandihí, tyi maa ra cuví ra nyaá nyacá ñaha yucuan.

23 ¡Ndahvi nyoho ra sacuahá ley vehe ñuhu ta ra fariseo! sahá ndo tyi vaha ndo vatyi chahá ndo diesmo chi Nyoo cha cuví menta, ta añii, ta comino. Soco ña quichahá ndo tuhun cha niñi ca cha nyaá nu ley cha tahán chi sacuvi yo. Ta cuñun, cha sacuví yo cha vaha chihin tandihí ñáyivi, cha cundahvi cuñi yo chi ñu, cha chinó iñi yo chi Nyoo ta ma sandoo yo chi ra. Ican ihya cuñi chi sacuvi ndo, ta ma sandihí ndo cha cuhva ndo diesmo cuan ñandihí.

24 Nyoho cuñi ndo saquehen ityi ndo chi ñáyivi, soco cuaa ndo. Vatyi sacuita ndo noo tiyucun luhlu, soco coco ndo noo camellu. Cuatyi luhlu ri nyehe ndo ta ña sahá ndo cuenda cuatyi cahnu cuví cuan.

25 ¡Ndahvi nyoho ra sacuahá ley vehe ñuhu ta ra fariseo, ra casaha tyi vaha! Vatyi ityi chata ri vasu ta ityi chata ri coho sanduvii ndo, soco ityi chichi ña sanduvii ndo. Vatyi chichi añima ndo tyitu ñohó cha quiñi caa. Chicá xiñi ndo cha ñihi ndo nu cusuhu ndo, ta ña cuví chasaha ndo cha quiñi caa cha quichi cuví xaan iñi ndo.

26 ¡Ra fariseo cuaa cuví ndo! Sanduvii xihna ndo ityi chichi vasu ta coho, tyicuan ta cuvii tucu ityi chata.

27 ¡Ndahvi nyoho ra sacuahá ley vehe ñuhu ta ra fariseo, ra casavaha chii! Vatyi cuví ndo tari noo ñaña ndiyi cha nacahyu, vatyi ityi chata chi tyaqui xaan, soco ityi chichi tyitu ñohó yiqui ndiyi, ta tandihí nuu cha quiñi caa.

28 Tyicuan caa cuví nyoho. Vatyi ityi chata tari maa tyi vaha xaan ndo nuu ñáyivi, soco ityi chichi, tyitú ñohó cha cuendo ndo, ta cha quiñi caa.

29 ¡Ndahvi nyoho ra sacuahá ley vehe ñuhu, ta nyoho ra fariseo! Sahá ndo tyi vaha ndo ta ña ndicha. Nyoho samá ndo ñaña ra profeta Nyoo ra chiyo ta cha naha. Ta nyoho nacahyu ndo ñaña ñáyivi vaha ñu chiyo ta cha naha.

30 Ta yucuan ta catyí ndo! “Tyehe ta chiyo ndi quivi chiyo ñáyivi chahnu ndi, ma tyinyee ndi chi ra chahñi chi ra profeta Nyoo”, catyí ndo.

³¹ ¡Ma chihin yucuan ri! Suri maa ndo nacotó ndo vatyi vachi ndo tata ñu cachahñi chi profeta Nyoo.

³² ¡Vaha vityin, chaha chi cuhva savaha ndihi ndo cha quiñi caa cha quichaha savaha sutu chahnu ndo!

³³ ¡Nyoho ñu quiñi iyó, ñu vachi tata cool! ¿Yoso caa cucacu nyoho tacuhva ma cahun ndo anyaya? Ma cuvi.

³⁴ Yucuan chaha cutachi chi ra profeta Nyoo nu nyicú ndo, cutachi tiqui chi ra chiñi tuñi, ta ra sacuahá nu nyicú ndo. Soco nyoho cucahñi ndo chi ra ta cutyaa ndo chi suhva ra nu cruzi. Ta chi inga ra cucañi ndo chi ra chichi vehe ñuhu. Ta cacanyicon ndo chi ra tahan tahan ñuu.

³⁵ Yucuan chaha, siqui ndo cucunyaa cuatyi cha cuenda cha cachihñi tandihí ra vaha cha cachahñi ñu nyacua nya ra Abel ta nyacua nya ra Zacarías sehe ra Berequías ra cha chahñi ndo chichi vehe ñuhu yatyin nu nyaá arta cha yosó cha chahá cuenda yo chi Nyoo.

³⁶ Cha ndicha catyi chi ndo, vatyi tandihí cuatyi ihya cucoso siqui ñayivi cha iyó vityin —catyi ra Jesús chi ra.

*Nu nducuihyá iñi ra Jesús nyehe ra chi ñuu Jerusalén ta chacu ra
(Lc. 13.34-35)*

³⁷ ¡Jerusalén, Jerusalén! ¡Ndahvi nyoho ñu iyó ñuu chiña! Vatyi chahñi ndo chi ra profeta Nyoo. Ta tuchi ndo yuu chi tandihí ra cha saquichi Nyoo nu nyicú ndo. Cuaha xaan chaha cuñi saha cuende chi ndo, tari noo ndivi cha sahá cuenda ti chi sehe ti, ta naquehén ndahvi ti chi ti chichi ndichin ti, socio ña cuñi ndo.

³⁸ Nyehe ndo vityin, vatyi cha sandoo ndahvi chi ndo.

³⁹ Vatyi catyi chi ndo, vatyi ma nyehe ca ndo chii nyacua nya chaa chi quivi cucatyi ndo tyehe caa: “Cahnu xaan ra cuvi ra vachi chihin tunyee iñi sivi Sutu yo Nyoo”, cucatyi ndo —catyi ra Jesús.

24

*Nu catyi ra Jesús vatyi cutani vehe ñuhu cahnu
(Mr. 13.1-2; Lc. 21.5-6)*

¹ Quita ra Jesús chichi vehe ñuhu cahnu cuan, ta cha cuñi cahun ra, ta catuhva ra cachicá noo chihin ra chi ra, ta quichaha casañaha ra vehe ñuhu cuan chi ra.

² Soco nacañan ra Jesús ta catyi ra:

—¿Atu nyehé ndo tandihí ihya? Cha ndicha catyi chi ndo, vatyi ihya ni noo yuu ta ma ndoo coso nyitahan. Tandihí ta cutani —catyi ra.

*Nu catyi ra Jesús ñáa ndihí seña cucuvi cha ni cumañi ca naa ñayivi
(Mr. 13.3-23; Lc. 21.7-24; 17.22-24)*

³ Tyicuan ta cuahan coyo ra yucu yutun Olivo. Ta cuhva cha nyaá ra Jesús yucuan, ra cachicá noo chihin ra quichi coyo ra ta catyi xehe ra chi ra tyehe caa:

—Cuñi ndi cha catyun chi ndi, ama cucuvi tuhun cuan. ¿Ñáa seña cucuvi cha cuquichun inga chaha ta cha cunaa ñayivi?

⁴ Tyicuan ta nacañan ra Jesús:

—Saha ndo cuenda chi ndo coto yóo cha sandahvi ñaha chi ndo.

⁵ Vatyi cuaha xaan ra cuquichi, ta cotyiño ra sivi, ta cucatyi ra tyehe caa: “Yuhu cuvi Cristo ra cha saquichi Nyoo.” Ta cuaha ñu cusandavi ñaha ra.

6 Nyoho cuñihi ndo tuhun tyi iyó cuatyí ta cañi tahan ñáyiví ityi cuan ityi ihya. Soco ma nayuhvi ndo, vatyí tyicuan caa tahan maa chi cuvi. Soco ta chaa ca quiví cunaa ñayiví.

7 Vatyí ñáyiví noo ñuu cahnu, cucañi tahan ñu chihin ñáyiví inga ñuu cahnu. Ta cucoo cuatyí noo ñuu chihin inga ñuu. Ta cucoo soco, ta cucoo cuehe, ta cha taan nahnu cuaha ri ityi.

8 Tandihí ihya ta nu cua quichaha ñáyiví nyehe ñu tindocho cuví.

9 Tyicuan ta cucuhva cuenda ñu chi nyoho vatyí sanyehe ra tindocho chi ndo. Ta cacahñi ra chi ndo. Ta tandihí ñu iyó síqui ñuhu ñayiví cutasi cuñi nyehe ñu chi ndo cha cuenda yuhu.

10 Quiví cuan cuaha xaan ñu cusandihí ñu cha chino iñi ñu chii, ta cutasi cuñi ñu nyehe ñu chi tahan ñu. Ta cunaxico tuhun ñu chi tahan ñu.

11 Cuaha xaan ra cuendu cunatuvi, ta cucatyí ra vatyí cuenda Nyoo cacahan ra. Ta cuaha xaan ñáyiví cucasandavi ñaha ra.

12 Ta cuaha xaan cha quiñi caa cucoo. Yucuan chaha cuaha xaan ñu cusandihí ñu cha cuñi ñu chi tahan ñu.

13 Soco ñu cha ña ndu uvi iñi chino iñi chii nyacua nya nu ndihí, cucacu añima ñu.

14 Ta cucutya nicahnu ñayiví tuhun vaha cha nyacá ñaha Nyoo añima ndo, tacuhva coto tandihí ñáyiví iyó síqui ñuhu ñayiví, tyicuan ta cunaa ñayiví.

15 Tandihí nyoho cha sacuahá ndo ihya, na cutuñi iñi ndo tuhun ihya: Ra Daniel, ra profeta Nyoo ta cha naha, tyaa ra tuhun noo cha sacuquiñi caa, noo cha sativí. Ta quiví nyehe ndo vatyí chaa ihya Nu Ii,

16 tyicuan ta ñu ñohó Judea, cuñi chi cono ñu ityi yucu.

17 Ta ñu yosó xiñi vehe, noo ñu, soco ma quihvi ñu chichi vehe ñu tava ñu cha iyó chichi vehe cuan.

18 Ta ñu ñohó nu chiqui, ni ma cunuhu ca ñu cunaquehen ñu ni sahna ñu.

19 ¡Ndahvi ñusihí cha cañohó sehe quiví cuan! O tatu iyó sehe ñu cha chaxín, ¡ndahvi ñu cuan!

20 Cacan ndo chi Nyoo tacuhva cha ma tahan chi caca cono ndo quiví vichin, ni quiví nyitatú yo.

21 Vatyí cuaha xaan tindocho cucoo quiví cuan, noo tindocho cha ta coo ca maa nyata chinq ñuhu ñayiví, ta ni ma coo ca cha yaha tuhun cuan.

22 Soco tatu Nyoo, ta ma sanducuiti ra quiví cuan, yori maa cacu. Soco cusanducuiti ra cha cuenda cha cuñi ra chí ñu nacachí maa ra.

23 "Ta tatu yóo cha catyí chi nyoho: "Nyehe ndo, ma ra Cristo ihya" o "Nyehe ndo ma ra nyaá yucuan", ma chino iñi ndo.

24 Vatyí cuquichi coyo ra casandavi ñaha ta cucatyí ra vatyí ra Cristo cacuví ra. Ta cucatyí ra vatyí ra profeta Nyoo cacuví ra. Ta cusavaha ra seña ta milagru nahnu tacuhva casandavi ñaha ra. Nyacua nya ñu cha nacachí maa Nyoo ta cusandavi ñaha ra tatu cuví chi ra.

25 Saha ndo cuenda vatyí cha yaha catyí chi nyoho cha ni cumañi ca cuví.

26 Yucuan chaha tatu catyí ñu chí ndo tyehe caa: "Nyehe ndo, ma ra Cristo nyaá nu chiqui ndi cuan", catyí ñu chí ndo, ma cuhun ndo. O tatu catyí ñu chí ndo: "Nyehe ndo, ma ra nyaá chichi cuarta ihya", ma chino iñi ndo.

27 Vatyí tari noo cha quihvi tacha cha nyehé yo cuxiño nya nu caña ñanyii ta nya nu quee ñanyii, tyicuan caa cucuví quiví quichi yuhu Rayíi cha quichi nya gloria.

28 Nu caá coño chihí, yucuan cuchaa coyo chii.

*Yoso caa cuquichi ra Cristo inga chaha
(Mr. 13.24-37; Lc. 21.25-33; 17.26-30, 34-36)*

²⁹ Ta cha yahá ri cha nyehé ñu tindoho, ta cunduñaa ñanyii, ta yoo ma sacundichin ca chi. Ta tiño cucanacoyo ti andivi, ta nyacua nya cha iyó andivi cunacanda.

³⁰ Tyicuan ta cuquetuvi noo seña ityi andivi nu vachi yuhu Ray# cha quichi nya gloria. Cuquichi nu vico ityi andivi chihin tunyee iñi cahnu ta chihin cha cahnu cuví Nyoo. Ta tandihi ñáyivi iyó siqui ñuhu ñáyivi, cucuacu chaa xaan ñu cha nanyehé ñu chii.

³¹ Ta cutachi ángel cuende tacuhva vatyi chihin cha ñihi tiví ra cutu ra ta cusandu ñin ri ra chi ñu nacachi maa Nyoo chi, cuquita ñu nicacahnu nu ñuhu ñáyivi, nyacua nya nu ndihi ñuhu ñáyivi ta nyacua nya nu ndihi andivi.

³² 'Cutuñi iñi ndo noo cuhva yutun cha nañi higo: Tatu cha yutya soco tun, ta caña ndaha tun, nyoho cha chitó ndo vatyi cha vachi vico savi.

³³ Ta suri tyicuan caa, tatu cha nyehé ndo tandihi maa cha cucuvi ihya, coto ndo vatyi cha cuyatyin quichi. Cha nyañaí yuvehe cuví chi cuan.

³⁴ Cha ndicha catyí chi ndo vatyi tandihi tuhun ihya, cucuvi cha ni ri ca cha iyó ñáyivi.

³⁵ Andivi ta ñuhu ñáyivi cundihí chi, soco tuhun cahán yuhu, ma ndihi chi. Ta cuchino cava tandihi tuhun cahin chihin ndo ihya.

³⁶ 'Soco quivi ta cuhva cha cucuvi cuan, yori chitó, ni ángel andivi ta ña chitó ra. Ni yuhu Ray# cha quichi nya gloria ta ña chité. Noo tuhun ri maa Nyoo Suti chitó ra.

³⁷ 'Tari cuví quivi chiyó ra Noé, tyicuan caa cucuvi quivi quichi tucu yuhu Ray# cha quichi nya gloria.

³⁸ Quivi ta ni cumañi ca coon savi xaan, ñáyivi cuan, chachi ñu, ta chihí ñu, tandahá ñu, ta chahá ñu chi sehe ñu tandaha nyacua nya quivi quihvi ra Noé chichi barcu cuan.

³⁹ Ta sana iñi ñu ta chaa savi ta tyañi tandihi ñu. Ta tyicuan caa cucuvi tucu quivi quichi tucu yuhu Ray# cha quichi nya gloria.

⁴⁰ Quivi cuan, tu uvi ra ñohó ra nu chiqui. Noo ra cunaquehin, ta noo ra ndoo ra.

⁴¹ Tu uvi ñusihí nyicó ñu molinu. Noo ña cunaquehin, ta noo ña ndoo ña.

⁴² Cuatu tuhva vaha ndo vatyi ña chitó ndo ñáa cuhva cuquichi ra nyacá ña chí ndo.

⁴³ Soco coto ndo tuhun ihya vatyi tatu noo chitoho vehe ta chitó ra ñáa cuhva cuquihvi ra suhu chichi vehe ra, cuatu tuhva vaha ra ta ma cuhva ra cha quihvi ra suhu cuan.

⁴⁴ Yucuan chaha nyoho, cuatu tuhva ndo. Vatyi sana ri iñi ndo, ta cuquichi yuhu Ray# cha quichi nya gloria.

*Ñu cha nyatú tuhva na ndichi ra Cristo, ican ñu cuví musu vaha ra
(Lc. 12.41-48)*

⁴⁵ 'Noo musu cha tyasohó tuhun cahán chitoho, ta tyicuan ri sacuví ra tyiño tyaa ra chi ra, yucuan cuví noo musu vaha. Ta sahá cuenda ra vehe chitoho ra. Ta chahá ra cha cachi inga musu cha vahri cuhva.

⁴⁶ Ta sii xaan cuví iñi musu cuan tatu cuhva cha sahá tyiño ra ta nachaa chitoho ra. Vatyi quichahá ra tandihi cha tahán chi sacuvi ra.

⁴⁷ Ta cha ndicha catyí chi ndo, vatyi chitoho ra cunatyaa ra tandihi cha cumí ra ndaha ra, vatyi vaha quichahá ra chihin tyiño sahá ra.

⁴⁸ Soco tatu noo musu quiñi iyó ta chicá xiñi ra vatyi naha cuahan chitoho ra,
⁴⁹ ta quichaha nyacuvi ra cha ña vaha chihin inga musu cuan, ta quichaha chachi ra ta chihi ra ndixi chihin ra chiñi,
⁵⁰ tyicuan ta sana iñi ra ta ndichi chitoho ra quiñi cha ña nyatú ra chi ra.
⁵¹ Tyicuan ta chitoho ra ñihi xaan cutachi tuñi ra chi ra chihin ñáyivi quiñi iyó cha savaha chii soco ña ndicha. Tyicuan ta cucuacu ra ta cusacahñi ra noho ra.

25

Nu chahá ra Jesús noo cuhva cuenda uchi tahan ñu tyivaa

¹ Cha nyacá ñaha Nyoo añima ñáyivi cuví chi tari uchi tahan ñu tyivaa cha quehen ñu lámpara cha yihí acetye ta cuahan coyo ñu noo vico tandaha cua quehen cuenda ñu chi ra cha cua tandaha.

² Ohon tahan ñu, tondo xaan ñohó iñi ñu, ta ohon tahan ñu cachi xaan ñohó iñi ñu.

³ Ñu cha tondo ñohó iñi cuan, canyisó ñu lámpara ñu soco ña quehen ñu suhva ca acetye vatyi natyihí ñu chichi lampara ñu tatu ndihi.

⁴ Soco ñu cachi ñohó iñi cuan, canyisó sññ ñu yutyi acetye chihin lámpara ñu.

⁵ Ta vatyi cucuee ca chaa ra cha cua tandaha cuan, catiñ ñumahna chi tandihi ñu, ta caquixí ñu.

⁶ Tyicuan ta ñáá cuhva ñuu, ta chiñi ñu noo ndusu cha catyí tyehe caa: “¡Cha vachi ra cha cua tandaha! ¡Quita ndo, quehen cuenda ndo chi ra!” catyí ndusu cuan.

⁷ Tandihí ñu tyivaa cuan canducuita coyo ñu ta quichaha casanduvaha ñu lámpara ñu.

⁸ Tyicuan ta quichaha catyí ohon ñu tondo ñohó iñi cuan chi inga ohon ñu cuan: “Cuhva ndo suhva acetye ndo chi ndi, vatyi cuñi ndahva lámpara ndi”, catyí ñu.

⁹ Soco ñu tyivaa cha cachi ñohó iñi cuan nacahan ñu tyehe caa: “Ma cuhva ndi vatyi coto ma ñihi, ni cha cuenda maa ndi ta ni cha cuenda maa ndo. Cuahan taxi ndo nya nu quiyahví chi, ta sata ndo cha cuenda ndo.”

¹⁰ Soco cha ni ri ca cha cuahan coyo ndi ohon ñu cha tondo ñohó iñi cuan, cua sata ñu acetye, ta chaq ra cha cua tandahá cuan. Ta ñu tyivaa cha nyatú tuhva cuan, quihví coyo ñu chihin ra chichi vehe nu cuacoo vico tandaha cuan. Ta nicunyasí ri yuvehe.

¹¹ Yahá cuan ta cachaa coyo tucu ñu chisata acetye cuan, ta catyí ñu: “¡Tata! ¡Tata! ¡Nuña yuvehe naquihví ndi!”

¹² Soco maa ra nacahan ra, ta catyí ra: “Cha ndicha vatyi ña ñohó nui chi nyoho.”

¹³ Tyicuan ta quichaha catyí ra Jesús:

—Cuatu tuhva ri nyoho, vatyi ña chitó ndo nya quiñi ta ñáá cuhva cuquichi yuhu Rayi cha quichi Nya gloria.

Noo cuhva cuenda xuhun

(Lc. 19.11-27)

¹⁴ Cha nyacá ñaha Nyoo añima ñáyivi cuví chi tari noo ra cha cha nyaá cha cua quita cuhun inga ñuu. Ta cana ra chi musu ra, ta chahá cuenda ra xuhun chi ra.

15 'Chi noo ra chaha ra ta cha ohon mil xuhun, ta chi inga ra chaha ra ta cha uvi mil, ta chi inga ra tari noo mil. Chaha ra chi noo noo ra yoso cuhva cha cuví saha tyiño ra chihin. Tyicuan ta cuahan ra.

16 Musu cha quehen cuenda ohon mil xuhun cuan, saha ra lucha chihin xuhun cuan, ta saha ganaa ra nonga ohon ca mil chihin xuhun cuan.

17 Ta suri tyicuan caa tucu ra cha quehen cuenda uvi mil cuan, saha ganaa ra uvi ca mil chihin xuhun cuan.

18 Soco ra cha quehen cuenda noo ri mil cuan, chahan ra ta chatya ra noo yavi chichi ñuhú ta tixehe ra xuhun chitoho ra.

19 'Cuaha quivi yaha ta nachaa chitoho musu cuan. Ta quichaha natava ra cuenda chihin noo noo ra.

20 Xihna ca ra cha quehen cuenda ohon mil xuhun cuan chaa, ta nacuhva cuenda ra ohon ca mil siqui cuan, ta catyí ra: "Tata, ohon mil chahun chii, ma inga ohon mil ihya cha saha ganai."

21 Ta chitoho ra catyí ra chi ra: "Vaha. Noo musu vaha xaan cuvún. Ta sacuvún tandihi cha catyí. Ta vasi chiin ri xuhun chahi chuun soco vaha xaan chotyíñon chi chi. Vityin cuaha ca cucuhva cuende chuun. Quihvi nu vaha ihya, ta cusii cuñun chihin."

22 Yaha cuan ta chaa tucu musu cha quehen cuenda uvi mil xuhun cuan, ta catyí ra: "Tata, uvi mil chahun chii, ma uvi ca mil ihya cha saha ganai siqui."

23 Ta catyí chitoho ra chi ra: "Vaha. Noo musu vaha xaan cuvún, ta sacuvún cha catyí. Vasi chiin ri xuhun chahi chuun soco vaha xaan chotyíñon chi chi. Vityin cuaha ca cucuhva cuende chuun. Quihvi nu vaha ihya, ta cusii cuñun chihin", catyí ra.

24 Soco cuhva cha chaa musu cha quehen cuenda noo mil ri xuhun cuan, catyí ra chi chitoho ra: "Tata, yuhu chité vatyí cuvún noo ra xaan ta cuñun naquehún xuhun noo nu ña sahá tyiñon, ta cuñun naquehun cosecha noo nu ña tachun.

25 Yucuan chaha nayuhvi ta chahin ta tyihí xehi xuhun chichi ñuhú. Soco ma xuhun ihya cha chahun chii", catyí ra.

26 Tyicuan ta nacahan chitoho ra, ta catyí ra chi ra: "Musu quiñi iyó ta musu suchan cuví yoho. Tatu chitón vatyí cuñi naquehún nu ña saha tyiñe, ta quehín cosecha noo nu ña tachí,

27 ¿ñáá tuhun ña chityihun xuhin banco? Ta cha ndichi ta, cunaquehin xuhun cuan chihin xuhun siqui cha saha ganaa chi", catyí ra.

28 Tyicuan ta quichaha catyí ra chi ñu nyicú cuan: "Tinyaa ndo noo mil xuhun cha nyisó ra, ta cuhva ndo chi ra cha nyisó uchi mil.

29 Vatyí ñu iyó chii, cuhva que chi ñu, ta coo cuaha chi ñu, nyacua ndoo ca. Soco ñu ñahri chii, nyacua nya cha chiin cha cumí ñu, cutinyaa ndihi chi ñu.

30 Ta musu cha ña chiñuhú ihya, tuchi ndo chi ra nu ñaa ñiñi ityi chata, ta yucuan cuacu chaa ra, ta cusacahñi ra noho ra chihin cha nyehe ra tindoño."

Nu catyí ra Jesús vatyí cucutuñi chi tandihi ñáyivi

31 'Quivi cuquichi yuhu Rayii cha quichí nya gloria, cuquichi chihin cuaha ángel cuende, ta cucunyai tyayu tyaqui ta cunyaca ñahi.

32 Ñáyivi tandihi ri ñuu cundu ñin ri ñu nui. Ta cusasiin chi noo noo ñu, tari ra sahá cumi mbee tavá siin ra chi mbee ta tava siin ra ndixihyu.

33 Ta cucuatyai chi mbee cuan chiyo vahi, ta chi ndixihyu cuan, chiyo satyin.

³⁴ Tyicuan ta yuhu cha cuví Rey cucatyí chi ñu nyicú chiyo vahi: “Ñaha nyoho vatyí nyoho ñáyiví cha nasocó Suti cuví ndo. Quehen cuenda ndo nu cuacunya ndo nu nyacá ñaha Nyoo, vatyí cha cuenda maa ndo chinqo ihya nyata quiví savaha Nyoo ñuhu ñayiví.

³⁵ Vatyí quiví chisoque, ta nyoho chaha ndo cha cachi. Quiví cu ityí ndutya ta chaha ndo cohi. Ta quiví chica noi tari ra inga ñuu ta nyoho chaha ndo vehe coi.

³⁶ Quiví cumañi sahme, ta nyoho chaha ndo sahme. Quiví cuhví ta nyoho chahan ndo chinyehe ndo chii. Ta quiví ñohí vehe caa, ta quichí nyehe ndo nu ñohí.”

³⁷ Ta ñu cha vaha cuan cundaca tuhun ñu chii, ta catyí ñu: “Sutu Mañi yuhu, ¿ama nyehe ndi chisocón, ta chaha ndi cha cachun? ¿Ama nyehe ndi ityun ndutya ta chaha ndi cohun?”

³⁸ ¿Ama nyehe ndi chuun chicá noun tari ra inga ñuu ta chaha ndi vehe coun? ¿Ama cumañi sahmon, ta chaha ndi chuun?”

³⁹ ¿Ama nyehe ndi cuhvún, o ñohún vehe caa, ta chahan ndi chinyehe ndi chuun?” cucatyí ñu.

⁴⁰ Ta yuhu cha cuví Rey cucatyí chi ñu: “Cha ndicha catyí chi ndo, vatyí tandihi tumañi iñi sacuví ndo chihin ra ndahví, ra yañi ihya, chi yuhu sacuví ndo tumañi iñi cuan.” Tyicuan caa cucatyí yuhu chi ñu.

⁴¹ Tyicuan ta yuhu cha cuví Rey cucatyí tiquí chí ñu nyicú chiyo satyin tyehe caa: “Canyaha ndo nui, nyoho ñu tahán chi cuhún anyaya. Cuahan ndo nu ñuhú cha ma ndahva ca maa. Vatyí yucuan cuví nu chinqo cha cuenda cuihna ta cha cuenda tatyí ña vaha cuenda ra.

⁴² Vatyí chisoque, ta nyoho ña chaha ndo cha cachi. Cu ityí ndutya, ta ña chaha ndo ndutya cohi.

⁴³ Chica noi tari chicá noo ra inga ñuu, ta ña chaha ndo nu coi. Cumañi sahme ta ña chaha ndo sahma cuihne. Cuhví ta ñohí vehe caa, soco ña chahan ndo chinyehe ndo chii nu ñohí”, cucatyí chí ñu.

⁴⁴ Tyicuan ta cucatyí ñu chii tyehe caa: “Sutu Mañi yuhu, ¿ama nyehe ndi chisocón, o ityun ndutya, o chicán noun tari ra inga ñuu, o ñahri sahmon, o cuhvún, o ñohún vehe caa, ta ña tyinyee ndi chuun?” cucatyí ñu.

⁴⁵ Ta yuhu cha cuví Rey cucatyí chí ñu tyehe caa: “Cha ndicha catyí chi ndo vatyí tandihi maa cha ña sacuví ndo chí ñáyiví ndahvi ihya, suri ña sacuví tucu ndo chí yuhu cuví cuan”, cucatyí yuhu chí ñu.

⁴⁶ Tyicuan ta ñu cuan cuhun coyo ñu nu cayú ñuhú cha ma ndahva ca maa. Ta ñáyiví vaha cuan cuhun ñu cucoo ñu noo ñayiví cha ma naa ca maa.

26

Nu canducu ra cuhva yoso caa catin ra chi ra Jesús

(Mr. 14.1-2; Lc. 22.1-2; Jn. 11.45-53)

¹ Cuhva cha ndihí catyí ra Jesús tuhun ihya, ta quichaha catyí ra chi ra cachicá noo chihin ra tyehe caa:

² —Nyoho chitó ndo vatyí uví ca quiví ta sanducahnu yo vico pascua. Ta yuhu Rayí cha quichí nya gloria cucuhva cuenda ñu chii vatyí tyaa ñu chii nu cruzí —catyí ra.

³ Quiví cuan ra cacuví nuu chi tata sutu, ta ra casacuahá ley vehe ñuhu, ta ra cacuví mandoñi ñu Israel, candu in ri ra nuquehe vehe tyiño ra Caifás, ra cuví nuu chi tata sutu.

⁴ Yucuan casandaq ra tyiño yoso caa ta sandavi ñaha ra chi ra Jesús ta catin ra chi ra ta cacahñi ra chi ra.

⁵ Soco cacatyí ra:

—Ma cahñi yo chi ra cha ni ri ca cha chichi vico, tacuhva cha ma naquiqui xaan ñáyivi —catyí ra.

Nu chosó noo ñaha sihi ndutya vixi chahan xiñi ra Jesús

(Mr. 14.3-9; Jn. 12.1-8)

⁶ Ra Jesús ñohó ra ñuu Betania, vehe ra Simón, cha catyí ñu Ra Tyahyu Coño chi, sivi saca ra cuví cuan.

⁷ Ta tuhva noo ñaha nu nyaá ra Jesús, nyisó ña noo yutyi tyitú yihí ndutya vixi chahan. Ta yahvi xaan nyaá ndutya cuan. Ta ra Jesús nyaá ra yuhu mesa ta choso ña ndutya cuan xiñi ra.

⁸ Cuhva cha cananyehę ra chicá noo chihin ra cacuxaan ra ta quichaha catyí ra:

—¿Ñáá tuhun cha sativí ña ndutya vixi chahan cuan?

⁹ Vaha ca tyehe ta xico ña, ta ñihi ña cuaha xuhun chihin ta tyinyee ña chi ñu ndahvi chihin xuhun cuan —catyí ra.

¹⁰ Tyicuan ta chiñi ra Jesús, ta catyí ra chi ra:

—¿Ñáá tuhun cha sayangá ndo chi ñaha ihya? Vatyí cha sacuví ña chihin, noo cha vaha cuví.

¹¹ Vatyí ñu ndahvi tyicuan ri cunyaa ñu chihin ndo, soco yuhu, ñima tyicuan ri cua cunyai chihin ndo.

¹² Choso ña ndutya vixi chahan siqui coño ñuhi, vatyí sanduvaha ña cuenda cha cohin chichi ñuhú.

¹³ Cha ndicha catyí chi ndo, vatyí tandihí ri nu cahan ñu tuhun Nyoo nicañu ñayivi, cunacatyí tucu ñu cha sacuví ñaha ihya, tacuhva nicohon iñi ñáyivi chi ña —catyí ra Jesús.

Nu naxico tuhun ra Judas Iscariote chi ra Jesús

(Mr. 14.10-11; Lc. 22.3-6)

¹⁴ Tyicuan ta noo ra chicá noo chihin ra Jesús, ra cha nañi Judas Iscariote, chahan ra chicahan ra chihin ra cacuví nuu chi tata sutu.

¹⁵ Ta catyí ra chi ra:

—¿Yoso cuhva ndo chii tatu cuhva cuende chi ra Jesús chi ndo?

Tyicuan ta ra cacuví nuu cuan cacatyí ra vatyí oco uchi tahan xuhun cuichin.

¹⁶ Ta nya cuhva cuan ta quichaha nducu ra Judas ñáá noo cuhva cuví nacuhva cuenda ra chi ra Jesús chi ra cacuví nuu chi tata sutu cuan.

Nu cuxiñi ra Jesús chihin ra cachicá noo chihin ra

(Mr. 14.12-25; Lc. 22.7-23; Jn. 13.21-30; 1 Co. 11.23-26)

¹⁷ Quivi xihna ri cha quichaha vico ta chachí ñu pan cha ñahri yuchan iya yihí chihin, ra cachicá noo chihin ra Jesús tuhva ra chi ra ta quichaha candaca tuhun ra chi ra:

—¿Nya cuñun cha sanduvaha ndi cha cuxiñun cuenda vico pascua ihya?

¹⁸ Ta catyí ra Jesús chi ra:

—Cuahan ndo chichi ñuu ta cha ndo vehe noo ra cuan. Ta catyí ndo chi ra: “Ra Sacuaha catyí ra vatyí cha cuyatyn cua cúvi ra, ta vehun cusanducañu ndi vico pascua”, catyí ndo chi ra —catyí ra Jesús.

¹⁹ Tyicuan ta casacuví ra tari cuhva catyí ra Jesús chi ra. Yahá cuan ta casanduvaha ra cha cacuxiñi ra cha vico pascua cuan.

²⁰ Cuhva cha cuaa, chicunyaá ra Jesús nu mesa chihin ndi uchi uvi ra chicá noo chihin ra.

21 Ta cha ni ri ca cha cachachí ra, catyí ra Jesús chi ra:

—Cha ndicha catyí chi ndo vatyí noo nyoho cucuhva cuenda ndo chii chi ra xaan iñi chii.

22 Ta canducuihya xaan iñi ra, ta quichaha candaca tuhun ñn ñn ra chi ra ta cacatyí ra:

—Sutu Mañi yuhu, ¿atu yuhu cuví?

23 Ta nacahan ra Jesús ta catyí ra:

—Ra cha chachí ñn ri coho chihin, ican ra cuan cua na cuhva cuenda chii.

24 Yuhu Rayi cha quichí nya gloria, cuahin ityi cha catyí nu tutu tuhun Nyoo. Soco ndahvi ra ndahvi cha cunacuhva cuenda chii. Quitá vihi ca cuenda chi ra, tyehe ta ña cacu taxin ra —catyí ra Jesús.

25 Tyicuan ta nacahan ra Judas, ra cha cua cuhva cuenda chi ra, ta catyí ra:

—Maestro, ¿atu yuhu cuví?

Ta nacahan ra Jesús, ta catyí ra:

—Ican yoho cuvún.

26 Cha ni ri ca cha cachachí ra, ra Jesús quehen ra pan ta nacuhva ra tyahvi nyoo chi Nyoo, ta cha yaha tahvi sava ra, ta chaha ra chi ra cachicá noo chihin ra, ta catyí ra:

—Cachi ndo. Ican ihya cuví coñe.

27 Yaha cuan ta quehen tucu ra copa, ta nacuhva ra tyahvi nyoo chi Nyoo, ta sayaha ra chi tandihi ra ta catyí ra:

—Coho tandihi ndo ihya.

28 Vatyí ican ihya cuví niñi. Ta chihin niñi natyihí tahan Nyoo tuhun chaa chihin ndo, vatyí cucatí niñi cha catyí cha vaha chi cuaha ñu, vatyí chihin niñi coo ticahnu iñi cuatyí ñu.

29 Soco catyí chi ndo, vatyí ma coho que tahan vinu tichaha ndivi ihya, nyacua nya cha cohi vinu chaa chihin ndo nya nu nyacá ñaha Suti andivi —catyí ra.

*Nu catyí ra Jesús vatyí cucatyí ra Pedro vatyí ña ñohó nuu ra chi ra
(Mr. 14.26-31; Lc. 22.31-34; Jn. 13.36-38)*

30 Cha yaha cha cachita ra yaa chi Nyoo, ta cuahan coyo ra yucu yutun Olivo cuan.

31 Tyicuan ta quichaha catyí ra Jesús chi ra:

—Tandihí nyoho ta cucaca uvi iñi ndo cha nyicón ndo chii vityin cha cuaa. Vatyí nu tutu Nyoo catyí chi tyehe caa: “Cucahñi chi ra sahá cumi mbee, ta mbee cuquití cuatyí ti”, catyí chi.

32 Soco cha yaha nandote, xihna que cuhin Galilea, ican saha nyoho.

33 Tyicuan ta nacahan ra Pedro ta catyí ra:

—Vasi tandihi ra ndu uvi iñi ra cha nyicón ra chuun, soco yuhu ma ndu uvi iñi.

34 Tyicuan ta quichaha catyí ra Jesús chi ra:

—Cha ndicha catyí chuun vatyí suri maa cha cuaa ihya, cha ni cumañi ca cuacu loho, yoho cucatyun uñi chaha vatyí ña ñohó nuun chii —catyí ra.

35 Ta ra Pedro catyí ra:

—Vasi cúvi chuhun, soco ma catyí cha ña ñohó nui chuun —catyí ra.

Ta suri tyicuan caa catyí tandihí ra chicá noo chihin ra.

*Nu chicán tahvi ra Jesús chi Nyoo nu cuví Getsemaní
(Mr. 14.32-42; Lc. 22.39-46)*

36 Tyicuan ta chaꝯ ra Jesús chihin ra cachicá noo chihin ra noo nu nañi Getsemaní, ta catyí ra chi ra:

—Cunyicu ndo ihya, cha niri ca cha cuahin yucuan, cua cacan tahvi.

37 Ta quehen ra chi ra Pedro ta chi ni nduvi sehe ra Zebedeo, cuahan coyo chihin ra. Ta quichahaꝯ nducuihya cuñi ra, ta tyoño xaan cuñi ra.

38 Tyicuan ta catyí ra chi ra:

—Cahnu xaan tucuihya iñi nyaá añime. Nyacua cuñi chi cahñi chi chii. Ndo ndo ihya ri ta conyito ndo chihin —catyí ra.

39 Tyicuan ta cuahan ra Jesús chiin ca ityi nuu ca ta chicuiñi chiti ra ta chacun ra nuu ra nu ñuhú, ta chican tahvi ra chi Nyoo ta catyí ra:

—Sutu Mañi yuhu, tu yoho ta cuñun, cuhva cha ma nyehi tindocho ihya. Soco ma cuvi tari kuhva cha cuñi mai, soco tari kuhva cuñi maun na cuvi —catyí ra.

40 Tyicuan ta nachaaꝯ ra nu nyicú ra cachicá noo chihin ra, ta nyehẽ ra vatyí caquixí ra. Ta catyí ra chi ra Pedro tyehe caa:

—¿Atu ni minoo hora ña cuví conyito ndo chihin?

41 Conyito ndo, ta caꝯan tahvi ndo tacuhva cha ma cuvi chasaha cuihna chi ndo. Cha ndicha vatyí añima ndo, cuñi xaan chi nanducu chi Nyoo, soco coño ñuhu ndo vita cuñi chi —catyí ra Jesús chi ra.

42 Nu cu uvi chaha chahan ra, ta chican tahvi ra tyehe caa:

—Sutu Mañi yuhu, tatu ma cuvi cha ma nyehi tindocho ihya, tu tyicuan caa, na cuvi maa kuhva cuñun —catyí ra.

43 Tyicuan ta nachaaꝯ ra inga chaha ta caquixí tucu ra cachicá noo chihin ra, vatyí nicunyasi maa chiti nuu ra chihin cha cacuñi ra cusu ra.

44 Tyicuan ta sandoꝯ ra chi ra, ta cuahan ra cha cu uñi chaha cua cacan tahvi ra. Ta catyí ra suri maa tuhun cha yahã cahã ra cha chican tahvi ra chi Nyoo.

45 Tyicuan ta nachaaꝯ ra nu canyicu ra cachicá noo chihin ra, ta catyí ra chi ra:

—Vityin ndicha, cusu ndo ta nyitatu ndo. Vatyí cha chaꝯ kuhva cha cua nacuhva cuenda ra chii chi ra quiñi iyó, ta Rayi cha quichí nya gloria cuví.

46 Ndicuita ndo, ta coho ndo. Vatyí cha vachi ra cha cunacuhva cuenda chii —catyí ra Jesús.

Nu catiñ ra xaan iñi chi ra Jesús cuahan ra vehe caa

(Mr. 14.43-50; Lc. 22.47-53; Jn. 18.2-11)

47 Ni cahán ca ra Jesús tuhun ihya, ta chaꝯ ra Judas, ta ra Judas cuví noo ra chicá noo chihin ra Jesús. Ta cuaha ra vachi coyo chihin ra, canyisó ra mityi ta yutun. Ra cuví nuu chi tata sutu, ta ra cacuví mandoñi ñu Israel, ican tachí chi ra.

48 Ra Judas, ra cha chahá cuenda chi ra Jesús, cha yahã chahã ra noo seña chi ra cuan, tacuhva coto ra yóo chi tñin ra. Ta catyí ra:

—Ra cha cutyayuhi chi, ican ra cuan cuví. Tñin ndo chi ra.

49 Tyicuan ta tuhvaꝯ ra chi ra Jesús ta catyí ra:

—Nocumi chuun, Maestro.

Ta tyayuhũ ra chi ra.

50 Tyicuan ta nacahan ra Jesús ta catyí ra chi ra:

—Amigo, sacuvi ñáá tyiño vachun.

Tyicuan ta catuhvaꝯ ra ta catiñ ra chi ra Jesús.

51 Tyicuan ta noo ra ndihi chihin ra Jesús, tavaꝯ ra mityi ra ta chahnyaꝯ ra soho noo musu ra cuví nuu chi tata sutu cuan.

⁵² Ta catyí ra Jesús chi ra:

—Natyihí mityun chichi vena. Vatyí tandihí ñu cacañi tahan chihin mityi, suri chihin mityi cúvi ñu.

⁵³ ¿Atu ña chitón vatyí tatu yuhu ta cuñí, cúvi caquen chi Suti, ta maa ra cutachi ra vityin vityin yaha ca uñi xico uchi mil ángel, ta sacacu ra chii?

⁵⁴ Soco tatu tyicuan caa, ¿yoso caa chino cava cuhva nyaá nu tutu Nyoo? Vatyí catyí chi tyi tahán maa chi cúvi chi yuhu tyehe caa —catyí ra.

⁵⁵ Ta catyí tucu ra Jesús chi ñáyivi:

—¿Atu vachi coyo nyoho vachi tñin ndo chii chihin cha xaan ta chihin yutun? Tari cha noo ra suhu cúvi yuhu sahá ndo. Ndiqúivi chinyaj sañahi nu nyicú ndo chichi vehe ñuhu cahnu, soco ña tñin ndo chii cha cuhin vehe caa.

⁵⁶ Vatyí tandihí cha cúvi chii vityin, ta chicunyaá nu tutu Nyoo, cha catyaa ra profeta Nyoo ta cha naha.

Tyicuan ta ndii ra cachicá noo chihin ra, cachinq ra. Noo tuhun ca maa ra Jesús casandoq ra.

*Nu cutuñi chi ra Jesús nuu ra cacuví tyiño cuenda ñu Israel
(Mr. 14.53-65; Lc. 22.54-55, 63-71; Jn. 18.12-14, 19-24)*

⁵⁷ Ta ra cha catiñ chi ra Jesús cuan, chinyaca ra chi ra nuu ra Caifás, ra cúvi nuu chi tata sutu. Suri yucuan canyicú ñin ri ra sacuaaha ley vehe ñuhu ta ra cacuví mandoñi.

⁵⁸ Soco ra Pedro cuahan ra chata ra, nya sava ri nya nuquehe vehe ra cúvi nuu chi tata sutu cuan. Ta quihvi ra ta ndooq ra nyaá ra chihin policia cuan, vatyí nyehe ra yoso caa quita tuhun cuan.

⁵⁹ Ra cacuví nuu chi tata sutu, ta ra cacuví mandoñi, ta tandihí ra cúvi tyiño, canducu ra noo cuatyí catyaa ra siqui ra Jesús, vasi ña ndicha, tacuhva vatyí chihin cuatyí cuan ta cúvi cañi ra chi ra.

⁶⁰ Soco ña cañihí maa ra cuatyí ra, vasi cuaha ñáyivi chahan ñu chicatyí ñu cuendu siqui ra. Soco nu ndihí tuhun, chaq coyo uvi ca testigu cuendu.

⁶¹ Ta cacatyí ra:

—Ra ihya, catyí ra vatyí cúvi satani ra vehe ñuhu cahnu Nyoo, ta chichi cha uñi quívi cunacananyaa ra inga chaha, na —cacatyí ra.

⁶² Tyicuan ta ra cúvi nuu chi tata sutu cuan, ndicuitá ra, ta catyí ra chi ra Jesús:

—¿Atu ña nacahun nu cahan ra ihya? ¿Ñáá cha cuvi cha cacatyí ra ihya sicun?

⁶³ Soco ra Jesús taxi ri nanyaá ra. Tyicuan ta quichaha catyí ra cúvi nuu chi tata sutu cuan chi ra:

—Chihin sívi Nyoo nyitó, catyí chuun vatyí çtyun cha ndicha vaha. ¿Atu ra Cristo Sehe Nyoo nyitó cúvi chuun? —catyí ra.

⁶⁴ Ta catyí ra Jesús chi ra:

—Ican cúvi, tari cuhva catyí maun. Ta suri catyí chi ndo, vatyí cunyehe ndo chi yuhu Rayi cha quichí nya gloria, cunyai chiyo vaha Nyoo ra iyó tandihí tunyee iñi chii, ta cunyehe ndo nu quichi tiqui nu vico ityi andívi —catyí ra.

⁶⁵ Tyicuan ta ra cúvi nuu chi tata sutu cuan chahnya ra sahma ra tari noo seña tyi cuñi maa ra tyi ña vaha cha cañan ra Jesús, ta catyí ra:

—Ra ihya chicoq cuatyí ra nuu Nyoo chihin tuhun cañan ra. ¡Nyehé ndo vityin! Ña niñi cha tava yo cha ndaa. Nyoho cha chiñi ndo tuhun ña vaha cañan ra.

66 ¿Ñáá catyí ndo vityin?

Ta canacahan ra ta cacatyí ra:

—Iyó cuatyí ra, ta cuñí chi cha cúvi ra.

67 Tyicuan ta catyicusí ra nuu ra ta cacañí ra chi ra. Inga ra cacatu ra nuu ra chihin chiquí ra.

68 Ta cacatyí ra chi ra:

—Yoho, cha sahún Cristo chuun. ¡Nacoto yóo cha cañí chuun!

Nu catyí ra Pedro vatyi ña ñohó nuu ra chi ra Jesús
(Mr. 14.66-72; Lc. 22.56-62; Jn. 18.15-18, 25-27)

69 Cha niri ca cha nyaá ca ra Pedro nuquehe ityi chata cuan, ta noo ñaha cha cuví musu tata sutu cuan, tuhva ña nu nyaá ra ta catyí ña chi ra:

—Yoho tucu chica noun chihin ra Jesús, ra Galilea cuan.

70 Ta ra Pedro catyí ra vatyi ña ñohó nuu ra chi ra nuu tandihi ñu nyicú cuan, ta catyí ra:

—Ña chité ñáá tuhun cahún.

71 Tyicuan ta cuahan ra Pedro ityi yuvehe, ta nyehę inga ña chi ra, ta catyí ña chi ra nyicú cuan:

—Suri chica noo tucu ra ihya chihin ra Jesús, ra ñuu Nazaret cuan —catyí ña.

72 Ta inga chaha tucu tixehę ra Pedro cha ñohó nuu ra chi ra ta catyí ra:

—Cha ndicha vaha tyi ña ñohó nui chi ra cuan.

73 Suhva ri ca cuhva cuan, ta ra canyicú cuan catuhva ra nu nyaá ra Pedro ta cacatyí ra chi ra:

—Ra tahan ra cuan cuví chi yoho, ndicha. Vatyi quetuvi nyacua nya cuhva cahún.

74 Tyicuan ta iyo xaan tyanaha ra ta catyí ra:

—Chitó vaha Nyoo tyi ña ñohó nui chi ra cuan, ta nacahñi Nyoo chii tatu ña ndicha cha cahún —catyí ra.

Ta suri cuhva cuan nacuacu chaa noo loho.

75 Tyicuan ta nicohon iñi ra Pedro tuhun cha catyí ra Jesús chi ra: “Cha ni cumañi ca cuacu loho, yoho cha yaha catyun uñi chaha vatyi ña ñohó nuun chii.” Tyicuan ta quitá ra Pedro yucuan, ta chacu vavaha ra cha cuihya iñi ra cha sacuví ra tyicuan caa.

27

Nu cachahá cuenda ra chi ra Jesús chi ra Pilato
(Mr. 15.1; Lc. 23.1-2; Jn. 18.28-32)

1 Cuhva cha cundichin, tandihi ra cacuví nuu chi tata sutu ta ra cacuví mandoñi ñuu cuan, catyihí tahan ra tuhun vatyi cacahñi ra chi ra Jesús.

2 Ta nuhñi ra. Ta chahan coyo ra chicuhva cuenda ra chi ra chi ra Poncio Pilato, ra cuví gobiernu cuenda ñuu Roma cha nyacá ñaha ñuu Israel cuan.

Nu chihí ra Judas

3 Cha nyehę ra Judas, ra cha naxico tuhun chi ra Jesús, vatyi cuacúvi ra, ta ndu uví iñi ra cha sacuví ra, ta nacuhva ra ndi oco uchi xuhun cuichin cuan chi ra cacuví nuu chi tata sutu cuan, ta chi ra cacuví mandoñi ñuu cuan.

4 Ta catyí ra:

—Chicoo cuatyí yuhu, vatyi chahę cuende chi noo ra ñahri cuatyí na cúvi ra.

Soco maa ra canacahan ra ta cacatyí ra:

—Ta yucuan ¿ñáá cuenda nyuhu? ¡Nyehe maa yoho!

⁵ Tyicuan ta tuchi ra Judas xuhun cuan chichi vehe ñuhu cahnu, ta chahan ra ta chichuhñi ra yoho sucun ra ta suri maa ra chitacaꝓ ra chi ra. Ta chihñi ra.

⁶ Ra cacuví nuu chi tata sutu cuan canaquehen ra xuhun cuan ta cacatyí ra:

—Ma cuvi tyihi yo xuhun ihya chichi caja ofrenda vatyi yahvi cha chahñi ñu noo ñáyivi cuví.

⁷ Tyicuan ta catyihñi tahan ra tuhun, ta chihin xuhun cuan casataꝓ ra noo ñuhú cha nañi Ñuhú Ra Savahá Quisi. Vatyi coo nu cuchi ra chi ñu inga ñuu tu chihñi ñu.

⁸ Yucuan chaha nañi ñuhú cuan nyacua nya vityin Ñuhú Sata Ñu Chihin Xuhun Yahvi Cha Chihñi Ñáyivi.

⁹ Ta tyicuan caa chinꝓ cava cha tyaaꝓ ra Jeremías profeta Nyoo ta cha naha. Catyí chi tyehe caa: “Quehen ra ndi oco uchi xuhun cuichin, yahvi cha tyaaꝓ ñu Israel chi ra.

¹⁰ Ta chihin cuan, casataꝓ ra Ñuhú Ra Savahá Quisi, tari cuhva catyí Sutu Mañi yo chii”, catyí chi.

*Nu nyehe ra Pilato vatyi ñahri maa cuatyí ra Jesús
(Mr. 15.2-5; Lc. 23.3-5; Jn. 18.33-38)*

¹¹ Cachinyacaꝓ ra chi ra Jesús nuu gobiernu, ta ra cuan ndacaꝓ tuhun ra chi ra, ta catyí ra:

—¿Atu ican yoho cuví rey cuenda ñu Israel?

Ta ra Jesús catyí ra chi ra:

—Ican, yuhu cuví. Ndicha cha cahún.

¹² Ta cuhva cha catyaaꝓ ra cacuví nuu chi tata sutu cuan ta mandoñi cuatyí siqui ra, ra Jesús ña nacahan maa ra.

¹³ Tyicuan ta quichahaꝓ catyí ra Pilato chi ra:

—¿Atu ña chiñún tandihñi cha cacahán ra sicun?

¹⁴ Soco ra Jesús ña nacahan ra. Ta nyacua iyo cuñi gobiernu cuan vatyi ña nacahan ra. Ta ña chitó ra ñáá cunyacuvi ra.

*Nu cutuñi chi ra Jesús ta cacatyí ñu vatyi cucuvi ra
(Mr. 15.6-20; Lc. 23.13-25; Jn. 18.38—19.16)*

¹⁵ Soco cha vico pascua cuan, iyó noo tuhun chi ñu vatyi tuhva ra gobiernu saña ra noo ra ñohó vehe caa, nya ra cachi maa ñáyivi.

¹⁶ Ta quivi cuan ñohó noo ra cha nañi Barrabás vehe caa. Ta chitó tandihñi ñáyivi tuhun ra.

¹⁷ Ta cuhva cha canyicú in ri ñu, ra Pilato ndacaꝓ tuhun ra chi ñu, ta catyí ra:

—¿Yóo chi cuñi nyoho cha sañe? ¿Atu chi ra Barrabás o chi ra Jesús, ra nañi Cristo? —catyí ra.

¹⁸ Vatyi chító ra vatyi cha cuenda cha tasi cuñi nyehe ñu chi ra Jesús, yucuan cuenda chahaꝓ cuenda ñu chi ra.

¹⁹ Cha ni ri ca cha nyaá ra Pilato nu tyayu ra, nu cuví ra tyiño, tachi ñasihi ra noo tyiño chi ra ta catyí ña: “Ma tyihun chuun chihin ra vaha chiña. Vatyi cuñi tahin noo ñumahna cha cuenda ra. Ta quiñi xaan tahin chihin”, catyí ña.

²⁰ Soco ra cacuví nuu chi sutu ta mandoñi ñuu cuan, cacuñihi ra catyiyuhu ra chi ñáyivi na cacan ñu cha saña ra Pilato chi ra Barrabás, ta na cúvi ra Jesús.

²¹ Ta gobiernu cuan cahan ra chihin ñu inga chaha, ta catyí ra:

—Chichi cha ninduvi ra, ¿nya ra cuñi ndo cha sañe?

Ta maa ñu nacahañ ñu, ta catyí ñu:

—Chi ra Barrabás.

²² Ta ra Pilato ndacā tuhun ra chi ñu, ta catyí ra:

—¿Ta ñáá cha cusacuvi chihin ra Jesús cha nañi Cristo ihya?

Tandihí ñu nacahañ ñu ta catyí ñu:

—¡Na cúvi ra nu cruzi!

²³ Tyicuan ta quichahā catyí ra Pilato chi ñu:

—Soco ¿ñáá cha ña vaha sacuvi ra?

Soco maa ñu nacanā chaa tucu ñu inga chaha ta catyí ñu:

—¡Cahñi chi ra nu cruzi!

²⁴ Cuhva cha nyehé ra Pilato vatyi ñahri maa cha cuví sacuvi ra, vatyi quiñi xaan cacuví ñu, chican ra ndutya, ta nacatyā ra ndaha ra chihin nuu ñáyivi cuan, ta catyí ra:

—Yuhu ñahri cuatyí cha cua cúvi ra ñahri cuatyí ihya. Na ndoo siqui maa ndo.

²⁵ Ta tandihí ñáyivi canacahañ ñu, ta catyí ñu:

—Na ndoo chí siqui maa ndi ta siqui sehe ndi.

²⁶ Tyicuan ta ra Pilato sañā ra chi ra Barrabás, ta tachí ra na ndoho ra Jesús, ta nacuhvā cuenda ra chi ra na cúvi ra nu cruzi.

²⁷ Tyicuan ta sindaro cuenda gobiernu cuan chinyacā ra chi ra Jesús nya vehe tyiño, ta casandu ñn ri ra chí tandihí sindaro cuan nicachico.

²⁸ Tyicuan ta catavā ra sahma ra ta casacuihnō ra noo sahma cuaha chi ra.

²⁹ Ta catyihí ra noo corona cha chinō chihin iñu xiñi ra. Ta chahā ra noo yutun na quindaha ra chihin chiyo vaha ra. Tyicuan ta cachicuiñī chiti ra nuu ra, ta cachacū nyaa ra chi ra ta catyí ra:

—¡Nocumi chuun, yoho Rey cuenda ñu Israel!

³⁰ Ta catyicū sī ra chi ra ñandihí. Ta quehen ra yutun cuan ta cañi ra xiñi ra.

³¹ Cha yahā cha cachacū nyaa ra chi ra ta catavā ra sahma cuaha cuan chi ra ta sandihvī noo tucu ra sahma maa ra chi ra. Tyicuan ta quehen ra chi ra cua cahñi ra chi ra nu cruzi.

Nu catyaā ra chi ra Jesús nu cruzi

(Mr. 15.21-32; Lc. 23.26-43; Jn. 19.17-27)

³² Cuhva cha caquitā coyo ra yucuan, catahan ra chi noo ra ñuu Cirene, nañi ra Simón. Ta casaniñī ra chi ra na cuiso ra cruzi ra Jesús.

³³ Ta cachā coyo ra noo nu nañi Gólgota, ta cuñi chí catyí Nu Cuví Yiqui Xiñi Ndiyí.

³⁴ Ta yucuan cachā ra vinu nasacā chihin cava uva coho ra Jesús. Soco cha yahā cha chihí ra chiin, ña cuñi ca ra coho.

³⁵ Ta cha yahā cha catyaā ra chi ra nu cruzi, tyicuan ta sindaro cuan caquehen ra sahma ra ta chahan ra noo sihva chihin. Ta nya ra saha ganaa, ñihí ra sahma cuan. Ta tyicuan caa chinō cava tuhun cha tyaā noo profeta Nyoo ta cha naha nu catyí chi tyehe caa: “Casachā ra sahme chihin cha chahan ra sihva”, catyí chí.

³⁶ Tyicuan ta cachicunyicū ra yucuan vatyi saha cuenda ra chi ra.

³⁷ Ta ityi xiñi ra catyaā ra noo letra cha catyí ñáá tuhun cua cahñi ra chi ra. Ta catyí chí tyehe caa: “Ican ra ihya cuví ra Jesús, rey cuenda ñu ñuu Israel.”

³⁸ Tacoyó tucu uvi ra suhu chihin ra nu uvi ca cruzi cuan. Noo ra chiyo vaha ra, ta inga ra chiyo satyin ra.

³⁹ Ta ñu yahā coyo cuan, cacahan̄ ñu chi ra, ta quisi xiñi ñu,

40 ta catyí ñu chi ra:

—¡Yoho cha catyūn tyi cusanduvon vehe ñuhu cahnu, ta chichi cha uñi quiví ta nacananyaa tucun! ¡Sacacu chuun vityin! ¡Tatu Sehe Nyoo cuví chuun, ñoꝝ nu cruzi chiña! —catyí ñu chi ra.

41 Ta suri tyicuan caa cachacú nyaa tucu ra cacuví nuu chi tata sutu chi ra, ta ra sacuahá ley vehe ñuhu, ta mandoñi ñuu ñandihí. Ta cacatýí ra chi tahan ra tyehe caa:

42 —Sacacu ra chi inga ñu, soco ña cuví sacacu ra chi maa ra. Tatu Rey cuenda ñu Israel cuví ra, na noo ra nu cruzi cuan, tacuhva chino iñi yo chí ra.

43 Itá iñi ra chi Nyoo, vityin na sacacu Nyoo chí ra, tatu ndicha cuñi ra chí ra. Vatyí catyí ra chí yo vatyí Sehe Nyoo cuví chí ra.

44 Ta nyacua nya ra suhu cha tacaá nu cruzi xiin ra ta cacahan ra chí ra ñandihí.

Nu chihí ra Jesús

(Mr. 15.33-41; Lc. 23.44-49; Jn. 19.28-30)

45 Tyicuan ta tandihí siqui ñuhu ñayiví nduñaa iñi, nyacua nya ora ta nyacua nya ca uñi cha cha iñi.

46 Ta suri cuhva cuan, cana chaa ra Jesús chihin cha chaa ndusu ra. Ta catyí ra tyehe caa:

—Elí, Elí, ¿lama sabactani? —ta cuñi chí catyí: Nyoo Suti, Nyoo Suti, ¿ñáa tuhun cha sandoó ñihnon noo tuhun mai?

47 Suhva ra canyicú cuan, cachihí ra cha cahan ra, ta cacatýí ra:

—Chi ra Elías, ra profeta Nyoo ta cha naha, ican cana chaa ra.

48 Ta caa cuhva ri cuan, cuahan vavaha noo ra cua quehen ra noo xixan, ta satyí ra chihin vinu iya, ta tyaa ra noo nu yutun, ta satuhva ra yuhu ra Jesús tacuhva na coho ra.

49 Soco inga ra cacatýí ra:

—Saña chí ra. Na nyehe yo tatu quichi sacacu ra Elías chí ra.

50 Inga tucu chaha cana chaa ñihí ra Jesús, tyicuan ta chihí ra.

51 Ta caa cuhva ri cuan ndatá sava sahna cha tacaá chichi vehe ñuhu cahnu cuan, nyacua nya siqui ta nyacua nya yuvi ndatá. Ta taan. Ta ndatá yuu.

52 Ta nuña yuhu ñaña. Ta nyacua canandoto cuaha ñu chinó iñi chí Nyoo, ñu cachihí.

53 Ta cha yaha nandoto ra Jesús caquita coyo ñu nu ñaña ta quihví coyo ñu chichi ñuu Jerusalén, ta cuaha ñayiví nyehe chí ñu.

54 Tyicuan ta capitán ta sindaro cha casahá cumi chí ra Jesús, cayuhvi xaan ra cuhva cha taan. Ta cha canyehé ra inga ca cha cuví, ta cacatýí ra:

—Ndicha ndicha cuii, vatyí Sehe Nyoo cuví chí ra ihya.

55 Cuaha ñusihí cha chinyicon chí ra Jesús nya Galilea ta tyinyeé ñu chí ra, nyicú ñu canyehé ñu nya sava ri yucuan.

56 Ta ican suhva ñu ihya cuví cu María ñaha Magdala, ta cu María sihi ra Jacobo ta ra José, ta sihi sehe ra Zebedeo.

Nu cua cuchí ra chí ra Jesús

(Mr. 15.42-47; Lc. 23.50-56; Jn. 19.38-42)

57 Cuhva cha cua cuaa, quichi noo ra tyayí cha nañí José. Ra ñuu Arimatea. Ta suri chinó iñi ra chí ra Jesús.

58 Ta chahan ra chinyehé ra nu nyaá ra Pilato, ta chicān ra coño ñuhu ra Jesús. Tyicuan ta tyihí ra Pilato tyiño na cuhva ra coño ñuhu ra chí ra.

⁵⁹ Tyicuan ta quehen ra José coño ñuhu ra, tyihj ra chichi noo sinduhu ndii.

⁶⁰ Ta tyihj ra chi ra chichi noo ñaña nicaa chaa cha cuví noo yavi yuu cha tyihj ra tyiño cachatya ra. Ta cha yaha cha nacasi ra yuhu ñaña cuan chihin noo yuu cahnu, ta cuahan ra.

⁶¹ Soco cu María ñaha Magdala, ta inga cu María, ndoo ñu nyicú ñu yuhu ñaña cuan.

Nu casahá cumi sindaro ñaña ra Jesús

⁶² Ta cha inga quivi, quivi nyitatu ñu cuví, ta ra cacuví nuu chi tata sutu, ta ra fariseo chahan coyo ra chinyehē ra nu nyaá ra Pilato.

⁶³ Ta catyí ra chi ra:

—Tata, nicohón iñi ndi vatyí ra cuendu cuan, catyí ra ta nyitó ca ra vatyí cha yaha cha uñi quivi cunandoto ra.

⁶⁴ Yucuan chaha tyihj tyiño na casaha cumi vaha ra ñaña cuan, nya yaha cha uñi quivi, coto quichi coyo ra cachica noo chihin ra cha cha cuaa, ta casuhu ra coño ñuhu ra. Yaha cuan ta cucatyí ra chi ñáyivi vatyí cha nandoto ra. Ta cha tyicuan caa nu ndihi tuhun ihya, yaha ca cuhva cucuví —catyí ra.

⁶⁵ Ta ra Pilato catyí ra chi ra:

—Ma suhva sindaro chiña. Cuahan ndo, ta saha cumi vaha ndo ñaña cuan, yoso cuhva cha vaha cuví saha cumi ndo —catyí ra.

⁶⁶ Tyicuan ta cuahan coyo ra, ta casahá cumi vaha ra ñaña cuan, ta catyaa ra noo sellu chata yuu cha chasí cuan. Ta casando ra chi sindaro sahá cumi yucuan.

28

Nu nandoto ra Jesús

(Mr. 16.1-8; Lc. 24.1-12; Jn. 20.1-10)

¹ Cha yaha quivi cha nyitatu ñu, cuhva cha vachi cundichin, nu quichaha vitya cuví. Ta cu María ñaha Magdala cuan, ta inga cu María chahan coyo ñu nu ñaña.

² Ta quichi minoo cha taan vatyí quichj ángel Sutu Mañi yo noo ra nya ityi andivi, ta chaa ra nu ñaña cuan. Ta sacanyahā ra yuu cha nyasj yuhu cuan, ta chicunyaa ra siqui.

³ Ta xiño vavaha ra, tari cha quihvi tacha. Ta sahma ra cuichin vavaha.

⁴ Cuhva cha cananyehē sindaro cuan chi ra, canayuhvi vavaha ra nyacua nihí ra, ta nyacua coña ra chihin cha yuhví ra.

⁵ Tyicuan ta quichahā catyí ángel cuan chi ñusihí cuan:

—Ma yuhvi ndo. Yuhu chité vatyí chi ra Jesús cha chihj nu cruzi nanducú ndo.

⁶ Yori ca ra ñohó ihya, vatyí cha nandoto ra, tari catyí ra. Ñaha ndo ta nyehē ndo nu catuvi ra.

⁷ Ta cūhun ndo numi ri, ta catyí ndo chi ra cachica noo chihin ra vatyí cha nandoto ra, ta cha cuahan ra Galilea, nyatú ra chi ra yucuan. Ican ihya cuví cha nya catyí chi ndo —catyí ángel cuan chi ñu.

⁸ Tyicuan ta numi ri quitā coyo ñu nu ñaña cuan. Suhva ri yuhví ñu, ta suhva ri sñ vavaha cuñi ñu. Ta chinō vavaha ñu cua catyí ñu chi ra cachica noo chihin ra Jesús.

⁹ Ta cuhva cuan tuvj ra Jesús nuu ñu ta chahā ra nocumi chi ñu. Tyicuan ta catuhva ñu chi ra ta chicuñi chiti ñu nuu ra ta casacahnu ñu chi ra, ta suri numj ñu chaha ra.

¹⁰ Ta catyí ra chi ñu:

—Ma yuhvi ndo. Cuahan ndo cua sacoto ndo chi yañi vatyi na cuhun coyo ra Galilea, ta nyicuan cuñihi tahan ndi —catyi ra chi ñu.

Tuhun cha canacatyj sindaro

¹¹ Cha ni ri ca cha cuahan coyo ñu cuan, suhva sindaro cha casaha cumi yucuan, cuahan coyo ra nya ñuu, cua nacatyj ra cha cuvj cuan chi ra cacuvi nuu chi sutu.

¹² Tyicuan ta ra cacuvi nuu cuan chahan coyo ra chichan ra chihin ra mandoñi ñuu vatyi catyihj tahan ra tuhun yoso caa casacuvi ra. Tyicuan ta cuaha xuhun cachaha ra chi sindaro cuan.

¹³ Ta cacatyj ra chi ra:

—Nyoho, catyi ndo vatyi cha cha cuaa cha ni ri ca cha quixi ndo, chahan coyo ra cachica noo chihin ra Jesús ta chिकासुहु ra coño ñuhu ra.

¹⁴ Ta tatu chito gobiernu tuhun ihya, cua nyehe maa ndi yoso caa catyi ndi chi ra, ta nyoho ma caca iñi ndo. Ñahri cucuvi chi ndo.

¹⁵ Tyicuan ta caquehen sindaro cuan xuhun, ta cuahan coyo ra cua casacuvi ra cha cacatyj ra chi ra. Ta nya vityin ta tyicuan caa catyi ñayivi ñuu Israel.

*Nu tyaa ra Jesús tyiño chi ra cachica tyiño ra
(Mr. 16.14-18; Lc. 24.36-49; Jn. 20.19-23)*

¹⁶ Ta tyicuan caa, ndi uchi in ra cachica noo chihin ra, cuahan coyo ra nya Galilea nya yucu nu catyi maa ra Jesús chi ra vatyi cuhun coyo ra.

¹⁷ Ta cuhva cha cananyehe ra chi ra Jesús, casacahnu ra chi ra soco suhva ra chica uvi iñi ra.

¹⁸ Tyicuan ta tuhva ra Jesús chi ra ta catyi ra chi ra:

—Nyoo chaha ra cha cunyaca ñaha yuhu tandihj andivi ta siqui ñuhu ñayivi.

¹⁹ Yucuan chaha, cuahan ndo tandihj nu nyicu ñayivi, tandihj ri ñuu, ta catyi ndo chi ñu na nanyicon ñu chii. Ta sacondutya ndo chi ñu chihin sivi Sutu yo Nyoo ta chihin sivi yuhu Sehe Nyoo, ta chihin sivi Tatyj li Nyoo.

²⁰ Ta sañaha ndo chi ñu na naquichaha ñu tandihj cha catyi yuhu tyi sacuvi ñu. Ta coto ndo vatyi yuhu cunyai chihin ndo tandihj quivi nyacua nya naa ñayivi —catyi ra Jesucristo chi ra cachica tyiño ra.

Tuhun Nyoo Cha Tyaa San Marcos

*Nu sacondutyá ra Juan chi ñáyivi ta cahán ra tuhun Nyoo chihin ñu
(Mt. 3.1-12; Lc. 3.1-9, 15-17; Jn. 1.19-28)*

¹ Tyehe caa quichaha tuhun vaha ra Jesuscristo Sehe Nyoo.

² Ra Isaías profeta Nyoo tyaa ra tuhun ra Cristo ta tuhun ra Juan. Tyehe caa catyí Nyoo chi ra Cristo:

Cumañi ca cuhun siqui ñuhu ñayivi ta cutachi chi noo ra cusacoto chi ñáyivi vatyí nyaá cuhun nu nyicú ñu, catyí Nyoo chi ra Cristo.

³ Chiñi yo ndusu noo ra cha canachaá nu chiqui ndii, ta catyí ra: “Tari sanduvahá ndo noo ityi, tyicuan caa sanduvaha ndo aña ndo vatyí cua quichi Sutu Mañi yo.

Nuña ndo noo ityi ndoo chi ra na quihvi ra aña ndo.”

Tyicuan caa tyaa ra profeta Isaías nu tutu Nyoo ta cha naha.

⁴ Ta tyicuan caa quichi ra Juan sacondutyá ra chi ñáyivi nu chiqui ndii cuan. Ta catyí ra chi ñu na ndu uvi iñi ñu cuatyí ñu, ta na condutyá ñu tari noo seña tyi nasama ñu cuhva iyó ñu, ta tyicuan caa ta Nyoo cusaha ra ticahnu iñi cuatyí ñu.

⁵ Ta tandiñi ñáyivi ityi Judea quichi coyo ñu tyasoho ñu tuhun cahán ra, ta ñu ñuu Jerusalén ñandihi. Ta cha yaha nahma ñu cuatyí ñu, sacondutyá ra Juan chi ñu yuvi cahnu Jordán.

⁶ Ta sahama cha ñihno ra Juan cuan chihin ixi camellu chingo chi. Ta ñii cuví sinchu ra. Ta pinchi tuhvá ra chachí. Ta tyañuñu cuhu tuhvá ra chihí.

⁷ Ta cahán ra tuhun Nyoo ta catyí ra:

—Cha yaha yuhu ta vachi noo ra iyó xaan ca tunyee iñi chi ican saha yuhu. Ta ña nañé ni cha ndachi ñii xityin ndichan ra.

⁸ Yuhu sacondutyé chi ndo chihin ndutyá. Soco maa ra cusacondutyá ra chi ndo chihin Tatyí Ii Nyoo —catyí ra Juan.

*Nu condutyá ra Jesús
(Mt. 3.13-17; Lc. 3.21-22)*

⁹ Quivi cuan quita ra Jesús ñuu Nazaret, cha nyaá ityi Galilea, ta cuahan ra nya yuvi cahnu Jordán. Ta yucuan sacondutyá ra Juan chi ra.

¹⁰ Ta cha yaha condutyá ra Jesús, ta cuhva cha cua quita ra chichi ndutyá, ta nanyehé ra andivi cuahan nuña. Ta nyehé ra Tatyí Ii Nyoo tari noo paloma, vachi noó siqui ra.

¹¹ Ta tyacú noo ndusu ityi andivi ta catyí ndusu cuan tyehe caa:

—Yoho cuvún Sehi ta cuñi xain chuun. Ta siñ xaan cuñi chuhun —catyí ndusu cuan.

*Nu nducú nyehe ra ña vaha chi ra Jesús
(Mt. 4.1-11; Lc. 4.1-13)*

¹² Yaha cuan ta sacuhun Tatyí Ii Nyoo chi ra Jesús noo nu chiqui ndii.

¹³ Ta yucuan chinyaa ra uvi xico quivi nu chiqui ndii cuan, nu yori ñáyivi iyó, maa ri quiti iyó. Ta nducu nyehe cuihna chi ra. Ta yaha cuan ta chaa coyo ángel ta catyíñuhu ra chi ra.

*Nu quichaha saha tyiño ra Jesús ityi Galilea
(Mt. 4.12-17; Lc. 4.14-15)*

14 Cha yahā catyihī ñu chi ra Juan vehe caa, ta ra Jesús cuanuhu ra Galilea ta cahán ra tuhun vaha Nyoo chihin ñáyivi.

15 Ta catyí ra:

—Cha chaā cuhva cha cua cunyaca ñaha Nyoo añima ndo. Yatyin ri nyaá ra chihin ndo. Ndu uvi iñi ndo cuatyí ndo, ta chíno iñi ndo tuhun Nyoo cha sacacu añima ndo —catyí ra Jesús.

Nu canā ra Jesús chi cumi tahan ra catín tiyaca

(Mt. 4.18-22; Lc. 5.1-11)

16 Chicá noo ra Jesús yuhu miñi cha nañí Tyañuhu Galilea. Ta nanyehē ra chi ra Simón ta chi yañi ra, ra Andrés, cacañí ra yuhva ra nu ndutya, vatyi ra catín tiyaca cacuví ra.

17 Ta catyí ra Jesús chi ra:

—Cunyicon ndo chíi, ta yuhu cusacuví vatyi tari ñihí ndo tiyaca, tyicuan caa cuñihi ndo añima ñáyivi, tava ndo chi ñu nu quiñi caa, na quihvi ñu cuenda Nyoo —catyí ra Jesús chi ra Simón ta chi ra Andrés cuan.

18 Caa cuhva ri cuan casandoḡ ra yuhva ra, ta cuahan coyo ra chihin ra.

19 Yahā cuan ta chíin ri ca chíca ra Jesús, ta nanyehē ra chi ra Jacobo, sehe ra Zebedeo, ta chi yañi ra, ra Juan. Cañohó ra chichi noo canoa canaquicú ra yuhva ra.

20 Canā ra Jesús chi ra. Ta ninduvi tahan ra casandoḡ ra sutu ra, ra Zebedeo, chichi canoa chihin ra catyinyeé chi ra. Ta cuahan coyo ra chihin ra Jesús.

Nu nduvahā noo ra yihí tatyí ña vaha añima

(Lc. 4.31-37)

21 Ta chaā coyo ra ñuu Capernaum. Ta cuví chi noo quiñi nyitatú ñáyivi, ta quihvi ra Jesús chichi vehe ñuhu, ta quichahā sañaha ra tuhun Nyoo chí ñáyivi.

22 Ta iyo cuñí ñu tuhun cahán ra, vatyi sañahá ra tari noo ra iyó vaha ityi chíi cha cahán. Ña cahán ra cuhva cahán ra casacuahá cuenda ley vehe ñuhu.

23 Chichi vehe ñuhu cuan ñohó noo ra yihí tatyí ña vaha añima. Ta canā chaa ra ta catyí ra:

24 —¿Ñáá tuhun cha tyihún chuun chihin ndi, yoho Jesús ra ñuu Nazaret? ¿Atu vachun vatyi sanaun chi ndi? Yuhu ñohó nuí chuun, ta chité vatyi Sehe li Nyoo cuví chuun —catyí ra yihí tatyí ña vaha cuan chi ra Jesús.

25 Nacahan ra Jesús ta catyí ra chí tatyí ña vaha cuan:

—¡Taxi ri! ¡Saña chí ra ndahvi chíña! —catyí ra.

26 Ta tatyí ña vaha cuan, chíhī tañi ra cuhví cuan sahá chí, ta iyo canachaa tatyí cuan quitā chí ra.

27 Tandihí ñáyivi yuhvi xaan ñu cuví, ta candacā tuhun ñu chí tahan ñu, ta catyí ñu:

—¿Ñáá cha cuví ihya? ¿Ñana vaha tuhun chaa sañahá ra ihya? ¡Vatyi iyo vaha tunyee iñi chí ra, nyacua nya tatyí ña vaha, ta quichahá chí ra! —catyí ñu.

28 Ta numi ri cachitḡ ñáyivi tandihí ñuu cha iyó Galilea cuan tuhun ra Jesús.

Nu sanduvahā ra Jesús chi maha tyiso ra Simón Pedro

(Mt. 8.14-15; Lc. 4.38-39)

29 Cuhva cha quitā coyo ra chichi vehe ñuhu, ta cuahan ra Jesús vehe ra Simón ta ra Andrés. Ta cuahan tucu ra Jacobo ta ra Juan chihin ra.

³⁰ Ta maha tyiso ra Simón catuví ña nu chito, cuhví ña chihin cahñi. Ta catyí ñu chi ra Jesús tyi cuhví ña.

³¹ Tyicuan ta tuhva ra Jesús, ta tiñn ra ndaha ña. Ta nacoñehę ra chi ña. Ta caa cuhva ri cuan, tinyaa cahñi chi ña. Ta quichaha tyiñuhu ña chi ra.

Nu sanduvaha ra Jesús chi cuaha ñu cuhví

(Mt. 8.16-17; Lc. 4.40-41)

³² Cuhva cha queę ñanyii ta cha cua cuaa, quichí nyaca ñu tandihí ñu cuhví ta ñu yihí tatyí ña vaha nu nyaá ra Jesús.

³³ Ta tandihí ñáyiví ñuu cuan candu ñn ri ñu yuvehe cuan.

³⁴ Ta cuaha ñu cuhví cha siñ siñ cuehe sanduvaha ra. Ta tava ñehe ra chi cuaha tatyí ña vaha, soco ña chaha ra cha cahan tatyí cuan, vatyí chitó cuan yóo ra cuví ra.

Nu cahán ra Jesús tuhun Nyoo ityi Galilea

(Lc. 4.42-44)

³⁵ Ta cha inga quiví cuhva cha ni ñaa ca, ndicuita ra Jesús, ta cuahan ra ityi chata ñuu. Cuahan ra noo nu yori sayanga chi ra cua cacan tahvi ra chi Nyoo.

³⁶ Ta ra Simón ta ra tahan ra cuahan coyo ra cua nanducu ra chi ra.

³⁷ Ta cuhva cha canañihí ra chi ra cacatyí ra chi ra:

—Tandihí ñáyiví nanducú ñu chuun —cacatyí ra chi ra Jesús.

³⁸ Soco maa ra tatyí ra chi ra:

—Coho ndo inga ñuu cha nyicú yatyin ri ihya, vatyí cahan tiqui tuhun Nyoo yucuan, vatyí yucuan tyiño vachi —catyí ra Jesús chi ra.

³⁹ Yucuan chaha chica noo ra Jesús tandihí ri ñuu cha iyó Galilea, cahán ra tuhun Nyoo chichi vehe ñuhu tahan tahan ñuu. Ta tava ñehe ra tatyí ña vaha cha yihí añima ñáyiví.

Nu sanduvaha ra Jesús chi noo ra cha tyahyu coño

(Mt. 8.1-4; Lc. 5.12-16)

⁴⁰ Noo chaha tuhva noo ra cuhví cha tyahyu coño nu nyaá ra Jesús. Ta chicuñí chiti ra nuu ra, ta catyí ra chi ra:

—Tatu cuñún, cuví sanduvahun chii —catyí ra.

⁴¹ Ta cundahvi cuñí ra Jesús nyehé ra chi ra, ta tyiso ra ndaha ra siqui ra, ta catyí ra:

—Cuñí sanduvahi chuun. Ta na nduvahun vityin ri —catyí ra chi ra.

⁴² Caa cuhva ri cha catyí ra tyehe caa, tinyaa cuehe cuan chi ra, ta nduvaha ra.

⁴³ Tyicuan ta catyí ra Jesús vatyí cha cuví cuhun ra, soco catyí xaan ra chi ra na sacuví ra tyehe caa:

⁴⁴ —Nyehe. Yori chihin cahun tuhun. Soco cuahan nu nyaá tata sutu. Ta sañahun chuun chi ra, ta cuhvon cha tahan chi cuhvon na ndundiun nu Nyoo tari cuhva catyí nu ley cha tyaa ra Moisés, vatyí tacuhva coto tandihí ñáyiví tyi cha nduvahun chihin cuehe cuan —catyí ra Jesús chi ra.

⁴⁵ Soco ra cuan chahan ra, ta quichaha nacatyí ra chi tandihí ñáyiví. Yucuan chaha ña cuví ca quihví ndichin ra Jesús chichi ni noo ñuu. Ta ityi chata ri ñuu chica noo ra nu yori ñáyiví iyó, soco tandihí ri ityi quitá coyo ñu, quichí nyehe ñu chi ra.

2

Nu sanduvaha ra Jesús chi noo ra cuhví cha ña cuví nacanda

(Mt. 9.1-8; Lc. 5.17-26)

¹ Suhva quiví yaha ta quihví ra Jesús inga chaha chichi ñuu Capernaum. Ta cachito ñáyivi tyi nyaá ra vehe.

² Ta numi ri candu ñin ri cuaha ñáyivi. Ta nyacua ña chitahan ñu, ni yuvehe. Ta maa ra Jesús cahan ra tuhun Nyoo chihin ñu.

³ Tyicuan ta cumi tahan ra canyiso chi noo ra cuhví cha ña cuví nacanda, caquichí nyaca ra chi ra nu nyaá ra Jesús.

⁴ Soco ña cuví caquihví ra nya nu nyaá ra Jesús cha cuenda vatyi tuvi xaan ñáyivi. Tyicuan ta candaa ra ityi xiñi vehe. Ta sacuachiyo ra suhva tyiyo. Ta sanoo ra chi ra cuhví cuan chihin chito.

⁵ Nyehe ra Jesús vatyi cachinó xaan ñni ra cuan. Ta catyí ra chi ra cuhví cuan:

—Cha ndachí cuatyun, suti —catyí ra Jesús chi ra.

⁶ Soco suhva ra sacuahá cuenda ley vehe ñuhu nyicú ra cuan, ta cachicá xiñi ra tyeha caa:

⁷ “¿Ñáá tuhun cha cañá ñni ra ihya cahan ra tyeha caa? Chicoo cuatyí ra nuu Nyoo chihin tuhun cahan ra vatyi yori cuví sandachi cuatyí, noo tuhun ri maa Nyoo cuví sandachi ra cuatyí”, cachicá xiñi ra.

⁸ Soco ra Jesús chitó ra cha cachicá xiñi ra. Ta catyí ra chi ra:

—¿Ñáá tuhun cha chicá xiñi nyoho tyicuan caa?

⁹ ¿Ñáá cha yii ca, cha catyí yo chi ra cuhví ihya vatyi cuatyí ra cha yaha ndachi, o cha catyí yo chi ra vatyi nducuita ra ta naquehen ra chito ra ta cacá ra?

¹⁰ Vaha, vityin chihin cha sanduvahi chi ra ihya, cusañahi chi ndo vatyi yuhu ra cuví Rayii cha quichí nya gloria, iyó ityi chii cha sandachi cuatyí ñáyivi —catyí ra Jesús chi ra.

Tyicuan ta quichaha catyí ra chi ra cuhví cuan:

¹¹ —Catyí chi yoho, ndicuita, naquehen chiton, ta cuanuhu nya vehun —catyí ra Jesús chi ra.

¹² Ta ra cuhví cuan ndicuita ra. Naquehen ra chito ra, ta cuanuhu ra. Ta tandihí ñu nyehe ñu, ta iyo cuñi ñu, ta sacahnú ñu chi Nyoo, ta catyí ñu:

—Ni noo chaha ta nyehe ca yo cha tyeha caa —catyí ñu.

Nu cana ra Jesús chi ra Leví

(Mt. 9.9-13; Lc. 5.27-32)

¹³ Yaha cuan ta cuahan tucu ra Jesús inga chaha yuhu miñi cuan. Ta cuhva cha nataca ñáyivi nu nyaá ra, quichaha cahan ra nuu ñu.

¹⁴ Tyicuan ta cuahan ra ta nu yaha ra nanyehé ra chi ra Leví sehe ra Alfeo, nyaá ra nu sahá tyiño ra, tavá ra xuhun cuenda gobiernu ñuu Roma. Ta catyí ra Jesús chi ra:

—Coho chihin.

Tyicuan ta nducuita ra Leví, ta cuahan ra chihin ra.

¹⁵ Yaha cuan ta tahan chi nyaá ra Jesús chihin ra cachicá noo chihin ra cachachí ra nu mesa vehe ra Leví. Ta nyicú tucu cuaha ra catavá xuhun chihin inga ñáyivi iyó cuatyí. Vatyi cuaha xaan ñu nyicón chi ra.

¹⁶ Soco ra casacuahá cuenda ley vehe ñuhu, ta ra cacuví fariseo, ra cha quichahá xaan ley vehe ñuhu, cha canyehé ra vatyi chachí ra Jesús chihin ra catavá xuhun, ta ñu iyó cuatyí, ta cacatyí ra chi ra cachicá noo chihin ra Jesús:

—¿Yoso caa cha ra sacuaha chi nyoho chachí ra ta chihí ra chihin ra catavá xuhun ta ñu iyó cuatyí?

17 Chiñi ra Jesús cha cacahan ra ta catyi ra:

—Ña chiñuhú doctor chi ñu ña cuhví, soco chiñuhú ra chi ñu cuhví. Vachi yuhu soco ñima cha cuenda cha vaha chi ñu vaha, soco cha cuenda cha vaha chi ñu iyó cuatyí —catyi ra Jesús chi ra.

Nu sañahá ra Jesús vatyi nya cha yaha canyaha ra chi ñu nyicón chi ra, tyicuan ta cutahan chi savaha ñu ayuno
(Mt. 9.14-15; Lc. 5.33-35)

18 Noo chaha, ra canyicón chi ra Juan ta ra canyicón chi ra fariseo, ña chachi ra ta nanducú ra chi Nyoo. Ta suhva ñáyivi quichí coyo ñu nu nyaá ra Jesús, ta ndacá tuhun ñu chi ra, ta catyi ñu chi ra:

—¿Ñáá tuhun cha ra canyicón chi ra Juan ta ra canyicón chi ra fariseo tuhvá ra savaha ra ayuno, ta ra cachicá noo chuhun ña tuhvá ra? —catyi ñu.

19 Ta nacahan ra Jesús ta catyi ra:

—Noo vico tandaha, ¿atu cuví cha ma cachi ra ñohó vico cha ni ri ca cha nyaá ra cha cua tandaha cuan chihin ra? Tatu nyaá ca ra cua tandaha cuan chihin ra, ma cuví cha ma cachi ra.

20 Soco vachi chi quivi cha cutinyaa ra chi ra tandaha cuan nu nyicú ra tahan ra. Yucuan ndicha quivi coo cuhva cha ma cachi ra ta nanducu ra chi Nyoo —catyi ra Jesús chi ñu.

Nu sañahá ra Jesús vatyi ña nacachi tahan tuhun chahnu cha iyó ñáyivi chihin tuhun chaa cha sañahá ra
(Mt. 9.16-17; Lc. 5.36-39)

21 Catyi ra Jesús:

—Yori naquicu noo sahma chahnu chihin noo sahma chaa, vatyi cha chaa cuan nandiyi ta cahnya chi sahma chahnu, ta nu tahnya cuan cunducahnu ca.

22 Ta ni ri ña tuhvá yo tyihi yo vinu chaa chichi ñi chahnu, vatyi vinu chaa chahnyá chi ñi, ta chati vinu, ta tivi ñi. Yucuan chaha cuñi chi cha tyihi yo vinu chaa chichi ñi chaa —catyi ra Jesús.

Nu catohon ra cachicá noo chihin ra Jesús yoco trigo quivi nyitatu ñáyivi
(Mt. 12.1-8; Lc. 6.1-5)

23 Noo quivi cha tuhvá ñáyivi nyitatu, cuahan ra Jesús chicá ra mahñu nu iyó cha tachí ñáyivi. Ta ra cachicá noo chihin ra quichaha catohon ra yoco trigo cuan cuhva cha yahá coyo ra.

24 Tyicuan ta quichaha cacatyí ra fariseo chi ra Jesús:

—¡Nyehe xihna! ¿Ñáá tuhun cha sacuví ra cachicá noo chuhun tyiño cha ña tahán chi sacuví yo quivi nyitatu yo? —cacatyí ra.

25 Soco maa ra Jesús catyi ra chi ra:

—¿Atu ni noo chaha ta sacuaha ca nyoho cha sacuví ra David chihin ra tahan ra noo quivi cha cachisoco vavaha ra?

26 Quivi cha cuví ra Abiatar tyiño cha cuví ra nuu chi tata sutu, quihvi ra David chichi vehe Nyoo. Ta chachi ra pan ii, cha tahán chi cachi maa ri maa ra cuví sutu. Ta chaha tucu ra cachi ra ndihi chihin ra —catyi ra Jesús.

27 Ta catyi tucu ra Jesús chi ra:

—Chicoo quivi nyitatu yo, cuenda cha vaha chi ñáyivi, soco ñáyivi ña chicoo ñu cha cuenda cha vaha chi quivi nyitatu yo.

28 Yucuan chaha yuhu Rayi cha quichí nya gloria, iyó ityi chii cha catyi chi noo noo ndo ñáá cha sacuví ndo quivi nyitatu yo —catyi ra Jesús.

3

*Nu nduvahq noo ra na ityi inchiyo ndaha
(Mt. 12.9-14; Lc. 6.6-11)*

¹ Quihvı́ ra Jesús inga chaha chichi noo vehe ñuhu. Ta yucuan nyaá noo ra na ityi inchiyo ndaha.

² Ta cañañi ra fariseo chi ra Jesús nyehé ra tatu sanduvaha ra chi ra quiví nyitatu ñu, vatyí tacuhva coo cuatyí tyaa ra siqui ra.

³ Tyicuan ta ra Jesús catyí ra chi ra na ityi ndaha cuan:

—Ndı́cuıta ta cuınanyaa mahñu ihya.

⁴ Yahq cuan ta ndaca tuhun ra chi inga ñu cha tayucú cuan, ta catyí ra:

—¿Ñáá cha tahán chi sacuvı yo quiví nyitatu yo? ¿Atu sacuvı yo cha vaha o cha ña vaha? ¿Atu tahán chi sanduvaha yo ñáyıví o cha cahñi yo? —catyí ra Jesús.

Tyicuan ta taxi taxi maa candoq ñu cuan.

⁵ Tyicuan ta xaan nanyehe ra Jesús chi ñu, ta cuihya cuñi ra vatyí ña cuñi ñu cutuñi iñi ñu. Ta catyí ra chi ra cuan:

—Sanacaa ndahun.

Ta sanacaa ra, ta nduvahq ndaha ra.

⁶ Tyicuan ta quitq coyo ra fariseo, ta quichahq catyihi tahan ra tuhun chihin ra cuenda ra Herodes, yoso caa cacahñi ra chi ra Jesús.

Nu nyicú cuaha ñáyıví yuhu miñi

⁷ Soco ra Jesús cuahan ra chihin ra cachicá noo chihin ra yuhu miñi, ta cuaha ñáyıví ityi Galilea canyicón chi ra.

⁸ Ta cha chito ñáyıví tuhun nahnu cha sacuvı ra, cuaha xaan ñu quichı coyo ñu ñuu Jerusalén ta inga ñuu cha iyó ityi Judea, ta ñuu cha iyó Idumea, ta inga chiyo yuvi cahnu Jordán, ta ñuu Tiro ta ñuu Sidón ñandıhi, vatyí cuñi ñu nyehe ñu chi ra.

⁹ Yucuan chaha catyí ra Jesús chi ra cachicá noo chihin ra na casanduvaha ra noo canoa, tacuhva vatyí tatu ndutihın xaan chihin ñáyıví, cuvı quihvı ra chichi canoa cuan.

¹⁰ Vatyí cuaha xaan ñu cha yahq sanduvahq ra, ta yucuan chaha tandıhi ñu cuhvı cuahan ñu nu nyaá ra vatyí cuñi ñu tıın ñu chi ra tacuhva nduvaha ñu.

¹¹ Ta ñu yihı tatyı ña vaha añima, chicuñi chiti ri ñu nuu ra, ta canachaa tatyı ña vaha cuan, ta catyí chi tyehe caa:

—ıYoho cuvún Sehe Nyoo!

¹² Soco ra Jesús chası ra yuhu tatyı cuan vatyı ma catyı ca chi yóo ra cuvı ra.

*Nu nacachi ra Jesús chi uchi uvi apóstol vatyı cacaca ra tyiño ra
(Mt. 10.1-4; Lc. 6.12-16)*

¹³ Yahq cuan ta ndaa ra Jesús noo yucu ta canq ra chi ra cuñi maa ra nacachi ra. Ta quichı coyo ra nu nyaá ra.

¹⁴ Ta tyiso ra chi uchi uvi tahan ra vatyı cundıhi ra chihin ra, ta vatyı tyatyıño ra chi ra na cucahan ra tuhun Nyoo.

¹⁵ Ta chahq ra ityi chi ra vatyı sanduvaha ra chi ñu cuhvı, ta tava ñehe ra chi tatyı ña vaha.

¹⁶ Ta ıcan ra ihya cacuvı ndı uchi uvi tahan ra: ra Simón cha sacunañı ra Jesús Pedro chi;

¹⁷ ra Jacobo ta yañi ra ra Juan, sehe ra Zebedeo. Ta Boanerges sacunañı ra chi nıduvi tahan ra ta cuñi chi catyı: ra ñihi cahán tari cahán savi,

¹⁸ ra Andrés, ra Felipe, ra Bartolomé, ra Mateo, ra Tomás, ra Jacobo sehe ra Alfeo, ra Tadeo, ta inga ra Simón cha yihí cuenda ityi ra cuñí cuhun cuatyí siqui gobiernu ñuu Roma cha nyacá ñaha chí ñu,

¹⁹ ta ra Judas Iscariote, ra cha naxico tuhun chí ra Jesús.

Nu tyaá ñáyivi cuatyí siqui ra Jesús, ta catyi ñu vatyi tunyee iñi cuihna iyó chí ra

(Mt. 12.22-32; Lc. 11.14-23; 12.10)

Yaha cuan ta quihvi ra Jesus noo vehe chihin ra cachicá noo chihin ra.

²⁰ Ta inga chaña nataca cuaha ñáyivi, ta nyacua ni ña cuví ca cachi ra.

²¹ Cha cachito ñáyivi chí ra Jesús vatyi nyaá ra yucuan, quichí coyo ñu vatyi cunuhun ra chihin ñu, vatyi catyi ñáyivi chí ñu tyi nduloco ra.

²² Ta suhva ra casacuahá cuenda ley vehe ñuhu Jerusalén cha quichí coyo suri tyicuan caa cacatyí ra:

—Ra ihya, ra Beelzebú ra cuví nuu chí cuihna yihí chí ra. Ta chihin tunyee iñi cuihna tava ñehe ra tatyí ña vaha —cacatyí ra.

²³ Tyicuan ta cana ra Jesús chí ra, ta catyi ra chí ra:

—¿Yoso caa, atu tava ñehe cuihna suri chí ra tahan maa ra? Ma sacuvi cuihna tyicuan caa.

²⁴ Tatu noo gobiernu cacusiin ra, ta cacañí tahan ra chihin tahan ra, gobiernu cuan ña naha cuacunyaca ñaha ra.

²⁵ O tatu ñáyivi noo vehe, ña ñin ri cuví ñu chihin tahan ñu ta cañi tahan ñu, cutivi nu nyicú ñu.

²⁶ Ta tatu cuihna cacusiin ra ta canducuita ra siqui tahan ra, ¿yoso caa cucuvi chí ra? Cundihi tuhun ra.

²⁷ Yori cuví quihvi chichi vehe noo ra ñihi tari cuihna ta tinyaa ra cha chí ra, tatu ma cuhñi xihna ra chí ra. Yucuan ndicha ta cuví tinyaa yo cha chí ra.

²⁸ Cha ndicha catyi chí ndo vatyi cuví coo ticahnu iñi tandihi nuu cuatyí ñáyivi, ta tandihi cha quiñi caa cha cahán ñu.

²⁹ Soco ñu cahán ña vaha siqui Tatyí Ii Nyoo, ma cuví maa coo ticahnu iñi cuenda cuan, soco tyicuan ri maa coo cuatyí ñu —catyi ra Jesús.

³⁰ Tyicuan caa catyi ra Jesús chí ra casacuahá cuenda ley vehe ñuhu, vatyi maa ra cacatyí ra vatyi ñohó noo tatyí ña vaha chí ra.

Yóo ñu cuví sihi ra Jesús ta yañi ra

(Mt. 12.46-50; Lc. 8.19-21)

³¹ Tyicuan ta cha coyo sihi ra Jesús ta yañi ra, soco ndoo ñu ityi chata vehe, ta tachí ñu cucana chí ra.

³² Ta ra nyicú nicachico nu nyaá ra Jesús cacatyí ra chí ra:

—Sihun ta yañun ta cuhvon nyicú ñu ityi chata vehe, ta nanducú ñu chuun —catyi ra chí ra.

³³ Soco maa ra catyi ra:

—¿Yóo ñu cuví sihi ta yañi? —catyi ra.

³⁴ Tyicuan ta nanyehé ra chí ñu nyicú nicachico, ta catyi ra:

—Ican ñu ihya cuví sihi ta yañi.

³⁵ Vatyi savahri ñu sacuvi cuhva cuñí Nyoo, ican ñu cuan cuví yañi, ta cuhve, ta sihi —catyi ra Jesús.

4

Tari noo ra chicá noo tachí, tyicuan caa cuví ra cahán tuhun Nyoo
(Mt. 13.1-9; Lc. 8.4-8)

¹ Inga chaha quichaha sañaha ra Jesús yuhu miñi, ta ndu ñin ri cuaha ñáyivi nu nyaá ra. Yucuan chaha quihvi ra chichi noo canoa cha tacaá nu ndutya yuhu miñi cuan. Ta chicunyaá ra, ta tandihí ñáyivi ndoo ñu nu ñiti.

² Tyicuan ta cuaha cha sañaha ra chi ñu chihin cuhva ri. Ta nu sañahá ra chi ñu, ta catyí ra chi ñu:

³ —Tyasoho ndo tuhun ihya. Minoo ra quitá ra vehe ra, cuahan ra nu iyó tyiño sahá ra. Ta quichaha quití ra chiti trigu nu ñuhú ra.

⁴ Ta ityi cuahan ra quití ra, suhva chiti cuan canacoyo yuhu ityi, ta quichi coyo saa ta cachachí ti.

⁵ Suhva ca chiti canacoyo ticu yuu nu ña cuaha ñuhú yihí. Ta chiti cuan numi ri caña, vatyi ña cono xaan yihí ñuhú cuan.

⁶ Soco cuhva cha caña ñanyii, na ityi chi vatyi ña cono yihí yoho chi.

⁷ Ta suhva ca chiti canacoyo chichi tu iñu. Ta chahnú tu iñu cuan, ta chasi tun nuu trigo cuan. Yucuan chaha ña chiyó chiti tun.

⁸ Soco suhva chiti cha canacoyo nu ñuhú vaha. Ta caña ta chahnú. Ta vaha chaha tun chiti. Suhva tun chaha tun oco uchi chiti cha noo noo tun. Inga tun chaha tun uñi xico chiti. Ta inga tun chaha ciento chiti —catyí ra Jesús chi ñu.

⁹ Ta catyí tucu ra chi ñu:

—Tatu cutuñi iñi ndo, tyasoho ndo tuhun cahín.

Nu sacotó ra Jesús ñáa cuenda sañahá ra chihin cuhva ri chi ñáyivi
(Mt. 13.10-17; Lc. 8.9-10)

¹⁰ Yahá cuan ta ndoo maa ri maa ra Jesús chihin ñu nyicón chi ra ta ndi uchi uvi tahan ra chicá noo chihin ra. Ta candaca tuhun ñu chi ra ñáa cha cuñi chi catyí tuhun cuan.

¹¹ Ta catyí ra chi ñu:

—Chi nyoho sacotó Nyoo tuhun xehe yoso caa nyacá ñaha ra añima ñáyivi. Soco chi ñu cha ña chinó iñi chi ra, maa maa ri chihin cuhva ri sañahí chi ñu.

¹² Vatyi tatu nyehé ñu soco cuví chi tari cha ña nyehé ñu, ta tatu chiñi ñu soco ma cutuñi iñi ñu. Tacuhva cha ma nasama ñu cuhva iyó ñu ta ni ma coo ticahnu iñi cuatyi ñu —catyí ra Jesús chi ñu.

Nu chaha ra Jesús cuenda yoso caa cuahan tuhun ra tachí chiti cuan
(Mt. 13.18-23; Lc. 8.11-15)

¹³ Ta catyí tucu ra chi ñu:

—¿Atu ña cutuñi iñi nyoho tuhun ihya? Tatu tyicuan caa ña cutuñi iñi ndo, ¿yoso caa cuví cutuñi ini ndo tandihí inga tuhun sañahí chi ndo?

¹⁴ Ra cha tachí chiti trigu cuan cuví ra tari noo ra cahán tuhun Nyoo.

¹⁵ Yihí ñáyivi cuví ñu tari nu canacoyo chiti yuhu ityi: chiñi ñu tuhun Nyoo, soco cha yahá chiñi ñu, quichi cuihna ta tinyaa ra tuhun Nyoo cha tachí ra añima ñu.

¹⁶ Inga ñáyivi cuví ñu tari nu canacoyo chiti ticu yuu: chiñi ñu tuhun Nyoo ta sii cuñi ñu natiin cuenda ñu noo ri cuhva.

¹⁷ Vatyi nu caña chiti ticu yuu cuan, chiin ri ñuhú yihí chaha, yucuan chaha caña soco ña cuví tyihí yoho vaha chi. Ta tyicuan caa ñu cuan, suhva ri quivi chino iñi ñu. Soco quivi vachi tindoho siqui ñu, o satasi iñi ñáyivi chi ñu cha cuenda tuhun Nyoo, sandihí ri ñu tuhun cha chinó iñi ñu.

18 Ta inga ñu cuví ñu tari nu canacoyo chiti chichi tu iñu: chiñí ñu tuhun Nyoo,

19 soco cutyoño ca iñi ñu cha cuenda tindoho cha iyó siqui ñuhu ñayivi ihya. Cha tyayii sandaví ñaha chi ñu, ta cuñí ñu tandihí ri nuu cha iyó. Tandihí ihya quihví xiñi ñu ta ña nyaá ca xiñi ñu tuhun Nyoo, ta ña chahá chi sacuvi ñu cha vaha cha cuenda cuan.

20 Soco yihí ñu cha chiñí ñu tuhun Nyoo ta naquehén cuenda ñu, ta vaha sacuvi ñu, tari nu canacoyo chiti nu ñuhú vaha cuví ñu. Yihí ñu cuví ñu tari yutun cha caña ta chaha tun oco uchi tahan chiti tahan tahan tun. Ta inga ñu cuví ñu tari yutun cha chaha uñi xico. Ta inga ñu tari yutun cha chaha ciento.

Ma tyihi xehe yo ñuhú cha sandundichin Nyoo añima yo coto tinyaa ra (Lc. 8.16-18)

21 Ta catyí tucu ra chi ñu:

—¿Atu quichi nyaca yo noo tima vatyí cananyaa yo chichi noo cajón o xiu chito? Ñima. Tima cuan cuñí chi tyiso yo noo nu sucun vatyí na sacundichin chi chichi vehe.

22 Ta tyicuan caa tucu, ñahri cha ñohó xehe, ta cuñun, tyi ma natuvi. Ta ñahri noo tuhun xehe, ta cuñun, tyi ma coto yo.

23 Nyoho cha cutuñí iñi ndo, tyasoho ndo tuhun cahín —catyí ra Jesús chi ñu.

24 Catyí tucu ra tyehe caa:

—Tyasoho vaha ndo tuhun cahín. Yoso cuhva sacuvi ndo chi ñayivi, yucuan cuhva sacuvi Nyoo chihin ndo. Ta cuaha ca cucuhva ra chi ndo tatu tyasohó ndo cha cahán ra.

25 Vatyí ñu tyasohó cha cahín, cuaha ca cuhva Nyoo chi ñu. Soco ñu ña tyasohó, cutinyaa ndihí ra cha chiin cha cha yaha chaha ra chi ñu.

Nu sañahá ra Jesús cuhva chahnu noo chiti yutun

26 Catyí tucu ra Jesús tyehe caa:

—Cha nyacá ñaha Nyoo añima ñayivi cuví chi tari noo ra tachí noo chiti chichi ñuhú.

27 Ta cuahan ra cua cusu ra. Yaha cuan ta ndicuita ra. Ta cuaha quivi yaha. Ta caña chiti cuan, ta chahnu yutun. Soco maa ra ña chitó ra yoso caa chahnu tun.

28 Cha cuenda vatyí maa ñuhú cuan sacuvahá chi tun tyicuan ri caa. Xihna ca quita xityin tun, ta yaha cuan yoco tun, yaha cuan ta quita chiti nu yoco cuan.

29 Ta tatu cha chityí chiti cuan, cutohon ra vatyí cha cha quivi cha coyo —catyí ra Jesús.

Nu sañahá ra Jesús vatyí tari chahnu noo chiti mostaza, tyicuan caa ndu-cuaha nu nyacá ñaha Nyoo

(Mt. 13.31-32; Lc. 13.18-19)

30 Ta catyí tucu ra Jesús:

—¿Ñáá chihin sanandiqui tahin cha nyacá ñaha Nyoo añima yo? ¿Ñáá chihin sandu inuu ri yo?

31 Cuví chi tari noo chiti mostaza cha tachí yo nu ñuhú. Ican chiti cuan, lee ca cha nuu tandihí chiti iyó siqui ñuhu ñayivi.

32 Soco tatu tachí yo, caña ta cuahnu. Ta cahnu vavaha cuví tun. Ta nahnu soco tun, ta nyacua nya saa cha chicó nu tatyí cuví nyitatu ti nu vati tun.

*Yoso caa sañahá ra Jesús chihin cuhva ri chi ñáyivi
(Mt. 13.34-35)*

³³ Tyehé caa sañahá ra Jesús chi ñu, chihin cuaha cuhva, nyacua nya nu cuví cutuñi ñhi ñu.

³⁴ Ñahri maa cha catyí ra chi ñu tatu ñima chihin noo cuhva. Soco chi ra cachicá noo chihin ra, nacatyí vaha ra chi ra.

*Nu sacutaxín ra Jesús tatyí ta miñi
(Mt. 8.23-27; Lc. 8.22-25)*

³⁵ Suri maa quívi cuan, cuhva cha cuaá, catyí ra chi ra cachicá noo chihin ra:

—Coho ndo inga chiyo miñi cuan.

³⁶ Tyicuan ta casandoq ra chi ñáyivi. Ta cuahan ra Jesús chihin ra chichi canoa cha catuvi cuan. Ta cuahan tucu inga canoa chihin ra.

³⁷ Ta quichaha caa noo tatyí ñihi xaan, ta quichaha quihvi ndutya chichi canoa cuan, ta quichaha chitu.

³⁸ Ta ra Jesús quixí ra siqui noo cabecera cha nyaá inchiyo xiin canoa cuan. Ta casandoq ra chi ra, ta cacatyí ra:

—¡Maestro! ¿atu ñahri cuendon cha cuñi nyee yo?

³⁹ Tyicuan ta ndicuitá ra Jesús ta cahan ra chi tatyí cuan na cutaxin. Ta catyí ra chi ndutya miñi cuan tyehé caa:

—¡Taxi ri! ¡Taxi cunyaun! —catyí ra.

Ta tatyí cuan cutaxin, ta taxi taxi cuví.

⁴⁰ Tyicuan ta catyí ra Jesús chi ra cachicá noo chihin ra:

—¿Ñáá tuhun cha yuhví xaan ndo? ¿atu ta chino ca ñhi ndo? —catyí ra chi ra.

⁴¹ Soco maa ra cayuhví xaan ra cha cuví cuan. Ta cacatyí ra chi ra tahan ra:

—¿Yóó ra cuví ra ihya, vatyí nyacua nya tatyí ta miñi quichahá chi ra? —cacatyí ra.

5

*Nu nduvaha ra yihí tatyí ña vaha chíi ñuu Gadara
(Mt. 8.28-34; Lc. 8.26-39)*

¹ Chaá coyo ra yuhu miñi, inga chiyo nu nyaá ñuu Gadara.

² Ta quitá ri ra Jesús chichi canoa, ta quitá noo ra nu ñaña cuan ta chaá ra nu nanyaá ra Jesús. Ta yihí noo tatyí ña vaha añima ra.

³ Ta nu ñaña cuan iyó maa ra cuan. Ta yori maa cuví chasaha chi ra, ni ri chihin cadena.

⁴ Cuaha xaan chaha chahñi ñu chaha ra ta ndaha ra chihin cadena, soco chahnya ra. Yiquin maa sacuvi ra. Ta yori maa cuví chasaha chi ra.

⁵ Ñicahñu ta cha cuaa chicá noo ra canachaá ra nya nu yucu ta nya nu ñaña. Ta sañicuehé ra suri chi maa ra chihin yuu.

⁶ Soco cañi ca nanyehé ra chi ra Jesús, ta chino vavaha ra cha ra. Ta chicuñi chiti ra nuu ra.

⁷ Ta caná chaa ra ta catyí ra:

—¿Ñáá tuhun cha tyihún chuun chihin yuhu, yoho Jesús, Sehe Nyoo ra cuví nuu? Chacú ndahvi nuun chihin sívi Nyoo, ma sanyehun tindocho chíi.

⁸ Catyí tatyí cuan tyehé caa vatyí ra Jesús cha catyí ra chi ra:

—¡Saña chí ra chíña, yoho tatyí ña vaha! —catyí ra.

⁹ Ta ra Jesús ndacá tuhun ra chi ra, ta catyí ra:

—¿Ñáá nañún?

Ta nacahan tatyí ña vaha cuan:

—Legión nañí, vatyí cuaha xaan ndi —catyí chi chi ra Jesús.

¹⁰ Ta chacu ndahví tatyí ña vaha cuan nuu ra Jesús tacuhva cha ma tachi ra chi chi nu cañi.

¹¹ Ta yatyin ri yucu cuan nyicú cuaha xaan quini cachachí ti.

¹² Yucuan chaha catyí tatyí ña vaha cuan chí ra Jesús tyehe caa:

—Tachi chi ndi na quihví ndi quini cuan —catyí tatyí cuan.

¹³ Tyicuan ta chaha ra Jesús, ta tatyí cuan quitá coyo chí ra cuan, ta quihví chi quini cuan. Ta cha uvi mil quini nyicú cuan, cachinó ti, ta canacooyo ti chichi noo xahva yuhu miñi cuan, ta cachihí ti chichi ndutya cuan.

¹⁴ Tyicuan ta ra sahá cumi quini cuan, chinó xaan ra chihin cha yuhví ra, ta chinacatyí ra chi ñáyivi ñuu cuan ta ñu ñohó nu chiqui. Ta quichí coyo ñáyivi, quichí nyehe ñu ñáá cha cuví.

¹⁵ Cuhva cha chaá coyo ñu nu nyaá ra Jesús, nanyehe ñu chi ra cha yihí tatyí ña vaha cuan chí. Ta vityin nyaá ra ñihno ra sahma, ta cachi vaha iyó xiñi ra. Ta yuhví xaan ñu cuví.

¹⁶ Ta ñu cha nyehe cha cuví chi ra cuan ta chi quini cuan, canacatyí ñu chi tandihí ca ñu.

¹⁷ Tyicuan ta quichaha chacu ndahví ñu nuu ra Jesús, na quita ra ñuu ñu.

¹⁸ Ta cuhva cha cua quihví ra Jesús chichi canoa, ra cha yihí tatyí ña vaha cuan chí chacu ndahví ra nuu ra Jesús na cuhva ra cuhun ra chihin ra.

¹⁹ Soco ra Jesús ña chaha ra cuhun ra, ta catyí ra chi ra:

—Cuanuhu nya vehun, nu nyaá ñáyivi chuun, ta nacatyun chi ñu tandihí cha sacuví Sutu yo Nyoo chuhun, ta yoso caa cundahví cuñi ra nyehe ra chuun.

²⁰ Ta ra cuan cuahan ra ta quichaha nacatyí ra chi ñáyivi tandihí ñuu Decápolis tandihí cha sacuví ra Jesús chihin ra. Ta tandihí ñu, iyo cuñí ñu.

*Nu nduvaha sehe ra Jairo ta ñaha sihi cha tñin sahma ra Jesús
(Mt. 9.18-26; Lc. 8.40-56)*

²¹ Ta cuhva cha nachaá ra Jesús chihin canoa nya inga chiyo miñi cuan, chaá coyo cuaha ñáyivi nu nyaá ra. Ta ndoo ra yuhu miñi cuan.

²² Tyicuan ta chaá noo ra cuví nuu vehe ñuhu. Nañí ra Jairo. Ta cuhva cha nanyehe ra chi ra Jesús, chicuiñi chiti ra nuu ra.

²³ Ta chacu ndahví ra nuu ra ta catyí ra:

—Cha cuñí cúvi sehi. Coho chihin ta tyison ndahun siqui ña na nduvaha ña ta ma cúvi ña.

²⁴ Tyicuan ta cuahan ra Jesús chihin ra, soco cuaha ñáyivi nyicón chi ra, ta nyacua nañi tahan ri ca maa ñu.

²⁵ Ta mahñu ñáyivi cuan ñohó noo ñaha cha cuhví. Cha quita uchi uvi cuiya ndoho ña cuehe cha chatí niñi ña.

²⁶ Ta cuaha tindoho nyehe ña cha cuaha xaan doctor nyehe chi ña. Ta cha sanaá ña tandihí maa cha iyó chí ña, soco ñahri maa tyinyee chi chí ña. Soco ñihi ndihí ca nanduví.

²⁷ Cuhva cha chitó ña tuhun milagru cha sacuví ra Jesús, tuhva ña ityi chata ra ta tñin ña sahma ra.

²⁸ Vatyí chicá xiñi ña: “Ma chihin cha tñin ri sahma ra, ta nduvahi”, chicá xiñi ña.

²⁹ Ta caa cuhva ri cha tñin ña sahma ra ta cha chatí niñi ña cutaxin. Ta tuví iñi coño ñuhu ña tyí cha nduvaha ña chihin cuehe cuan.

³⁰ Tyicuan ta tuv̄i iñi ra Jesús vatyí nduvah̄a noo ñáyiv̄i chihin suhva tunyee iñi cha quit̄a chi ra. Tyicuan ta nanyeh̄e ra ityi chata ra ta quichaha ndaca tuhun ra:

—¿Yóo cha t̄iñ sahme? —catyí ra.

³¹ Tyicuan ta ra cachicá noo chihin ra quichah̄a catyí ra chi ra:

—Cha nyehun vatyí ñáyiv̄i tyandahá chuun tyi t̄ih̄n xaan. ¿Yoso caa cha ndaca tuhun: “Yóo cha t̄iñ chii”? —cacatyí ra chi ra.

³² Soco ra Jesús nyeh̄e ra ityi cuan ityi ihya, vatyí cuñí ra nyehe ra yóo cha t̄iñ chi ra.

³³ Tyicuan ta ñaha cuan nihí ña chihin cha yuhv̄i ña vatyí chitó ña ñáa cha cuv̄i chi ña. Ta chah̄an ña chicuiñi chit̄i ña nuu ra. Ta nacatyí ña tandih̄i cha ndícha chi ra.

³⁴ Ta catyí ra Jesús chi ña:

—Cha nduvahun, Sihi, vatyí chinó iñun. Cuñan, ta ma caca xiñun, vatyí cha nduvahun chihin cuehe cha ndohun —catyí ra Jesús chi ña.

³⁵ Ni cahán ca ra Jesús ta chaq̄ coyo ñu vehe ra cuv̄i nuu cuan, ta catyí ñu chi ra cha cuv̄i sutu cha luhlu cuan:

—Sehun, cha chih̄i ña. Náa ri ca tuhun cha sayangon chi Ra Sacuaha chiña —catyí ñu.

³⁶ Soco ra Jesús ña quichah̄a ra cha cah̄an ñu, ta catyí ra chi ra cuv̄i nuu vehe ñuhu cuan:

—Ma yuhvun. Ch̄ino iñun —catyí ra chi ra.

³⁷ Ta ña chah̄a ra yóo ca cha cuhun chihin ra, notuhun ri ra Pedro ta ra Jacobo ta ra Juan, yañi ra Jacobo.

³⁸ Ta cuhva cha cachaq̄ coyo ra vehe ra cuv̄i nuu vehe ñuhu, nyeh̄e ra cha chacú chaa ñáyiv̄i ta caná chaa ñu.

³⁹ Quihv̄i ra ta catyí ra chi ñu:

—¿Náa tuhun cha iyo xaan cuv̄i ndo, ta chacú ndo tyiña caa? Cuehe luhlu ihya, ña chih̄i cue, quixi cue —catyí ra chi ñu.

⁴⁰ Soco chacú cuehe ri ñu nyehe ñu chi ra. Tyicuan ta ra Jesús tav̄a ra chi tandih̄i ñu, ta quehen ra chi sutu cue ta sihi cue ta chi ra cha chaq̄ coyo chihin ra, ta quihv̄i coyo ra nu catuv̄i cue.

⁴¹ Ta t̄iñ ra ndaha cue, ta catyí ra chi cue:

—Talita cumi —ta cuñí chi catyí cuan: Catyí chuun, yoho cuehe luhlu, j̄ndicuita!

⁴² Ta caa cuhva ri cua ndicuit̄a cuehe luhlu cuan. Iyó uchi uvi cuiya cue. Ta cuv̄i nacaca cue. Ta ñáyiv̄i iyó xaan cuñí ñu.

⁴³ Soco ra Jesús ñihi chah̄a ra tuhun chi ñu, tyi ma cahan maa ñu tuhun, ta catyí ra chi ñu na cuhva ñu cha cachi cue.

6

Nu ñoh̄o ra Jesús ñuu Nazaret (Mt. 13.53-58; Lc. 4.16-30)

¹ Tyicuan caa cuv̄i ta quit̄a ra Jesús yucuan, ta cuanuhu ra nya ñuu ra. Ta ra cachicá noo chihin ra cuahan coyo ra chihin ra.

² Ta chaq̄ quiv̄i nyitatu ñáyiv̄i, ta quichah̄a sañaha ra chichi vehe ñuhu. Ta cuaha ñáyiv̄i chih̄i tuhun cahán ra, ta iyo cuñí ñu, ta catyí ñu:

—¿Nya cutuhv̄a ra ihya tandih̄i tuhun ihya? ¿Yóo cha chah̄a cha chiñi tuñi ihya chi ra? ¿Yoso caa cha cuv̄i sacuvi ra milagru nahnu xaan ihya?

³ ¿Atu ñima ra satyá vitu cuan cuví ra? Sehe cu María cuví chi ra. Ta yañi ra Jacobo, ta ra José, ta ra Judas, ta ra Simón, ta cuhva ra iyó tucu ñu chihin yo ihya —catyi ñu.

Ta quiñi cuñí ñu nyehe ñu chi ra.

⁴ Soco catyí ra Jesús chi ñu:

—Tandihí ñu inga ñuu sahá ñu ñáyivi chi noo ra profeta Nyoo, soco ñu ñuu ra ña quichahá ñu chi ra, ni ñu vehe ra, ni ñáyivi chi ra —catyí ra Jesús.

⁵ Ta ña cuví sacuvi ra ni noo milagru yucuan, soco tyiso ra ndaha ra siqui suhva ri ñu cuhví, ta sanduvahá ra chi ñu.

⁶ Ta iyo cuñí ra vatyí ñu ñuu ra ña chinó iñi ñu chi ra. Ta chahān ra tandihí ñuu nyihi cha nyicú yatyin ri cuan, ta sañahā ra.

Nu tyatyíño ra Jesús chi ra cachicá noo chihin ra nu cucahan ra tuhun Nyoo (Mt. 10.5-15; Lc. 9.1-6)

⁷ Yahā cuan ta canā ra chi ndi uchi uvi ra chicá noo chihin ra, ta quichahā tachi ra chi uvi uvi ra. Ta chahā ra ityí chi ra vatyí tava ñehe ra chi tatyí ña vaha yihí añima ñáyivi.

⁸ Ta catyí ra chi ra vatyí ñahri maa cha cacuiso ra ityi. Ni yono, ni cha cachi ra, ni xuhun. Ñahri maa cuquindaha ra, noo ri yutun tuvi ra cuiso ra.

⁹ Ndichan ri quiñi chaha ra. Ta noo ri sahma cuihno ra, ñima uvi tahan.

¹⁰ Ta catyí ra chi ra:

—Cuhva cha chaa ndo noo ñuu ta quihvi ndo noo vehe, ndo ndo yucuan ri nyacua nya cha quita ndo ñuu cuan.

¹¹ Ta tatu ñáyivi iyó noo ñuu, ña cuñí ñu tiin cuenda ñu chi ndo, ta ña cuñí ñu tyasoho ñu tuhun cahan ndo, quita ndo yucuan ta naquisi ndo ñiyaca chaha ndo tari noo seña vatyí ña vaha sacuví ñu. Cha ndicha catyí chi ndo, vatyí quiñi cucutuñi chi ñáyivi iyó siqui ñuhu ñáyivi, ñu cha ma cuñi tiin cuenda tuhun cahan ndo, cuaha ca tindoho cunyehe ñu, ta ñima ca ñu ñuu Sodoma ta ñuu Gomorra —catyí ra Jesús chi ra.

¹² Tyicuan ta quitā coyo ra ta chichahān ra tuhun Nyoo chihin ñáyivi na ndu uvi iñi ñu cuatyí ñu, ta na nanducu ñu chi Nyoo.

¹³ Ta catavā ñehe ra cuaha tatyí ña vaha añima ñáyivi. Ta cahyu ra aceteye chi tuaha ñu cuhví ta casanduvahā ra chi ñu.

Nu catyí chi yoso caa chihí ra Juan ra sacondutyá chi ñáyivi (Mt. 14.1-12; Lc. 9.7-9)

¹⁴ Chito rey Herodes tuhun ra Jesús vatyí tandihí ñáyivi cahán ñu tuhun cha sacuví ra, ta chicá xiñi ra tyehe caa:

—Ra Juan ra sacondutyā chi ñáyivi cuví ra cuan. Nandoto ra cha yahā chihí ra, yucuan chaha iyó tunyee iñi chi ra —chicá iñi ra.

¹⁵ Inga ñu catyí ñu:

—Ra Elías profeta Nyoo ta cha naha cuví ra ihya —catyí ñu.

Ta inga ñu catyí ñu:

—Inga profeta Nyoo cuví ra, tari ra profeta Nyoo ra chiyo ta cha naha.

¹⁶ Cuhva cha chiñi ra Herodes tuhun ihya, catyí ra:

—Ican ra cuan cuví ra Juan cha tyihí tyiño tahnya sucun, ta vityin nandoto ra —catyí ra Herodes.

¹⁷ Tyicuan caa catyí ra Herodes vatyí cha catyí cu Herodías, ta tyihí ra chi ra Juan vehe caa ta chahñi ra chi ra chihin cadena. Cu Herodías cuan, ñasihí ra Felipe, yañi ra Herodes, cuví chi ña. Soco ra Herodes quehen ra chi ña vatyí cuví ña ñasihí ra.

18 Ta ra Juan catyí ra chi ra Herodes vatyí ña vaha cha cunyaa ra chihin ñasihi yañi ra.

19 Yucuan chaha cu Herodías tasi xaan cuñi ña nyehe ña chi ra Juan, ta cuñi ña cahñi ña chi ra, soco ña cuví.

20 Vatyí ra Herodes chitó ra vatyí ra Juan cuví ra noo ra vaha, ra ii, ta yuhví ra chi ra. Yucuan chaha sahá cuenda vaha ra chi ra, ña chahá ra cha sacuví ña cha cuñi maa ña chihin ra. Ta vasi ña cuaha cutuñi iñi ra Herodes cha cahán ra Juan soco vaha cuñi ra chiñi ra cha cahán ra.

21 Soco cu Herodías ñihí ña noo cuhva nu ndihí ra Herodes cuiya, vatyí sacco ra noo vico cha cuenda ra cacuví tyiño, ta comandante cuenda sindaro, ta ra nahnu ca ityi Galilea cuan.

22-23 Ta quihví sehe cu Herodías vico cuan, ta quichaha chitá chaha ña. Ta tahán xaan iñi ra Herodes ta ra cha nyicú cuxiñi chihin ra. Ta tyaa ra cuhva vatyí cuhva ra ñáá cha cacán ña chi ra. Ta catyí ra chi ña:

—Cacán ñáá cha cuñún chii, ta cuhve chuun —catyí ra chi ña.

Ta catyí ra vatyí cuhva ra ñáá ri cha cacán ña, vasi sava ñuhú ñuu nu nyacá ñaha ra.

24 Quitá ña ta catyí ña chi sihi ña:

—¿Ñáá cha caquen chi ra? —catyí ña.

Ta catyí sihi ña:

—Cacán xiñi ra Juan ra sacondutyá —catyí ña chi sehe ña.

25 Ta numi ri ndihví ñaha tyivaa cuan nu nyaá rey Herodes, ta catyí ña chi ra:

—Cuñi vatyí cahnyon xiñi ra Juan ra sacondutyá ta tyihun nuu noo coho ta cuhvon chii vityin vityin —catyí ña chi ra.

26 Tyicuan ta nducuihyá xaan iñi rey cuan. Soco cha tyaa ra cuhva vatyí cuhva ra chi ña, ta siin ri cachiñi ra canyicú chihin ra, ta ña cuñi ra nacahnu ra cha catyí ra chi ña.

27 Numi ri tachí rey cuan tyiño chi noo sindaro na quichi nyaca ra xiñi ra Juan.

28 Chahán sindaro cuan chichi vehe caa cuan, ta chahnyá ra xiñi ra Juan. Ta quichí nyaca ra, yihí nu noo coho. Tyicuan ta chahá ra chi ñaha tyivaa cuan, ta maa ña nacuhvá ña chi sihi ña.

29 Cha chito ra canyicón chi ra Juan, chahán coyo ra chinaquehen ra coño ñuhu ra, ta cachityihí ra chichi ñuhú.

*Nu chahá ra Jesús cha cachi ohon mil rayii
(Mt. 14.13-21; Lc. 9.10-17; Jn. 6.1-14)*

30 Yaha cuan ta ndu ñin ri ra cha tyatyíño ra Jesús chi chihin ra, ta canacatyí ra tandihí cha casacuví ra, ta cha casañahá ra nu chahán ra chicahan ra tuhuñ Nyoo.

31 Ta catyí ra Jesús chi ra:

—Ñaha ndo, na nyitatu yo chiin noo nu taxi ri iyó —catyí ra chi ra.

Tyicuan caa catyí ra vatyí cuaha ñáyivi cuahan ta vachi ñu, ta nyacua ña cacuyatyí ra cha cacachi ra.

32 Tyicuan ta maa ri maa ra Jesús ta ra cachicá noo chihin ra cuahan coyo ra chihin noo canoa noo nu yori maa ñáyivi nyicú, minoo nu taxi ri.

33 Soco cuaha ñu nyehe nu quitá ra. Ta canicohon nuu ñu chi ra. Ta cuahan coyo vavaha ñu chihin chaha ñu, quitá ñu tandihí ñuu ta xihna ca maa ñu chaa coyo.

34 Cuhva cha chaḡ ra Jesús, quitḡ ra chichi canoa ta nanyehḡ ra tyi cuaha xaan ñu nyicú yucuan. Ta cundahvi cuñi ra nyehé ra chi ñu, vatyí nyicú ñu tari mbee cha yori ra sahá cumi chi ti. Ta quichahḡ sañaha ra cuaha tuhun chi ñu.

35 Cha cua iñi xaan, ta ra cachicá noo chihin ra catuhvḡ ra ta catyí ra chi ra:
—Cha iñi xaan, ta yucu taxin cuví ihya.

36 Catyí chi ñu, na cuhun ñu ñuu cha nyicú yatyin ihya, ta sata ñu pan, vatyí ñahri cha cachi ñu iyó ihya —cacatyí ra chi ra.

37 Soco nacahan ra Jesús, ta catyí ra:

—Cuhva maa ndo cha cachi ñu.

Canacahan ra ta catyí ra:

—Vasi saha tyiño ndi iñu yoo, soco ma caña xuhun cha cusata ndi pan cachi tandihí ñu ihya.

38 Ta catyí ra Jesús chi ra:

—¿Yoso tahan pan nyisó ndo? Cuḡhan ndo cua nyehe ndo.

Ta cuhva cha cachitḡ ra yoso tahan, cacatyí ra chi ra:

—Ohon tahan pan ta uvi tiyaca.

39 Tyicuan ta catyí ra na cunyicú noo noo ticuiti ñu nu cuhu cuii cuan.

40 Ta chicunyicu ñu cuenda ciento ta cuenda uvi xico uchi ñu.

41 Tyicuan ta quehen ra Jesús ndi ohon tahan pan cuan ta ninduvi tiyaca cuan. Ta nanyehḡ ndaa ra andivi, ta nacuhvḡ ra tyahvi nyoo chi Nyoo, ta tahvi ra pan cuan, ta chahḡ ra chi ra cachicá noo chihin ra na casacha ra. Tyicuan ta casachḡ ra chi ñáyivi cuan. Yaha cuan ta casachḡ tucu ra ninduvi tiyaca cuan chi ñu.

42 Tandihí ñu cachachḡ ta ndaha iñi ñu.

43 Ta nyacua ndoo ca ta casacutḡ ra uchi uvi tica chihin yiquin pan ta tiyaca.

44 Ta ohon mil rayi cachachḡ pan cuan.

Nu chicá ra Jesús nu miñi (Mt. 14.22-27; Jn. 6.16-21)

45 Tyicuan ta catyí ra Jesús chi ra cachicá noo chihin ra na quihvi coyo ra chichi canoa vatyí cuhun coyo ra ityi nuu nya inga chiyo miñi cuan ñuu Betsaida. Vatyí maa ra Jesús cunasacha xihna ra ñáyivi, tyicuan ta cuhun ra catyí ra.

46 Ta cha yahḡ cuahan coyo ra, ra Jesús cuahan ra nu yucu, cua cacan tahvi ra.

47 Ta cuhva cha cuaa, canoa nu ñohó ra cachicá noo chihin ra cha cuahan nya mahñu miñi cuan, ta ndoo noo tuhun ri maa ra.

48 Ta nyehe ra vatyí ña cacuví vaha casacaca ra canoa cuan vatyí ñihi xaan tatyí. Ta cha ñaa ca cuan tuhvḡ ra Jesús chicá ra nu ndutya cuan. Ta sahá ri ra cha cua yaha ra nu canoa cuan.

49 Soco cananyehḡ ra chi ra, chicá ra nu ndutya. Ta cacuñi maa ra vatyí noo cha sayuhvi cuví, ta cacanaḡ cha ra.

50 Vatyí tandihí ra canyehḡ ra chi ra ta cayuhvi ra. Soco maa ra cahan ra chihin ra ta catyí ra:

—¡Sanyee ndo iñi ndo! ¡Yuhu cuví! ¡Ma yuhvi ndo! —catyí ra.

51 Quihvi ra chichi canoa nu canyicú ra, ta cutaxin tatyí cuan. Ta iyo xaan cacuñi ra

52 cha cuenda vatyí ta cutuñi ca iñi ra milagru cha sacuví ra chihin pan, vatyí ni ndava ca añima ra.

*Nu sanduvaha ra Jesús chi ñu cuhvi ñuu Genesaret
(Mt. 14.34-36)*

⁵³ Cayaha sava ra miñi cuan ta cachaa coyo ra ñuu Genesaret, ta cachahñi ra canoa cuan yuhu ndutya ri cuan.

⁵⁴ Ta cha quita coyo ri ra chichi canoa cuan, nicohon nuu ri ñáyivi chi ra Jesús.

⁵⁵ Ta cachino vavaha ñu nicahnu ityi cuan sacotó ñu vatyí chaq ra. Ta quichí coyo ñu tandihí ri ñuu, quichí nyaca ñu chi ñu cuhvi chihin chito nya nu nyaá ra Jesús.

⁵⁶ Ta tandihí ri ityi nu quihvi ra chichi ñuu luhlu o chichi ñuu nahnu, o chichi cuhu, chacun ñu chi ñu cuhvi yuhu ityi. Ta chacu ndahvi ñu nuu ra na cuhva ra cha tiin ñu vasi chiin yuhu sahna ra. Ta tandihí ri ñu tiin chi ra, nduvaha ñu.

7

*Nu sañahá ra Jesús ñáá cha sativí chi ñáyivi
(Mt. 15.1-20)*

¹ Yahá cuan ta ra fariseo ta suhva ra sacuahá cuenda ley vehe ñuhu quichí coyo ra nya ñuu Jerusalén, ta catuhva ra chi ra Jesús.

² Ta canyehé ra vatyí yihí ra cachicá noo chihin ra Jesús cachachí ra ta ña nacatya ra ndaha ra tari cuhva cha tahán chi cha costumbre. Yucuan chaha cacahan nyaa ra chi ra.

³ Vatyí ra fariseo ta tandihí ñu Israel cuan nyicón ca ñu costumbre sutu chahnu ñu, vatyí ma cachi ra tatu ma ndoo ndaha ra cuaha chaha tari cuhva costumbre iyó chi ñu.

⁴ Ta tatu nachaa coyo ñu cha chahan ñu nuyahvi, ma cachi ñu tatu ma sacuvi ñu cuhva cuan cha canacatya xaan ñu ndaha ñu. Ta iyó cuaha ca costumbre cha canyicón ñu. Iyó noo cuhva cha tahán chi nacatya ñu vasu, jarra, ta tandihí ndaha tyiño caa cha iyó chi ñu ta cama ñu ñandihí.

⁵ Tyicuan ta ra fariseo ta ra sacuahá cuenda ley cuan candaca tuhun ra chi ra Jesús, ta catyí ra:

—¿Ñáá tuhun ña sacuvi ra nyicón chuun cuhva costumbre sutu chahnu yo? Vatyí ña nacatya ra ndaha ra tari cuhva tahán chi tatu cuacachi ra xita —catyí ra chi ra.

⁶ Ta nacahan ra Jesús, ta catyí ra:

—Ndicha cha chahan ra Isaías tuhun ndo vatyí sahá ndo tyi vaha ndo ta ña ndicha ndo. Catyí ra tyehé caa:

Ñáyivi ihya, chihin yuhu ri ñu catyí ñu tyi cuñí ñu chii.

Soco ñima chihin cha tandihí añima ñu, tyi sin nu nyaá xiñi ñu.

⁷ Ñahri maa tuhun cha sacahnú ñu chii,

vatyí cha sañahá ñu chi tahan ñu, maa maa ri maa cuhva sañahá ñáyivi ri cuví, tyaq ra Isaías tuhun ndo.

⁸ Vatyí nyoho sandoó ndo cuhva catyí Nyoo, ta nanyicón ndo cuhva costumbre ñáyivi ri, tuhun cha nacatya xaan ndo ndaha tyiño ndo, ta cuaha cha tyicuan caa sacuvi ndo.

⁹ Nyoho sanducaxijn ndo tuhun cha catyí Nyoo tyi sacuvi ndo, tacuhva vatyí cuví sacuvi ndo costumbre cha iyó ndo.

¹⁰ Soco ra Moisés catyí ra nu ley cha tyaḡ ra: “Sḡha ndo ñáyiví chi sutu ndo ta chi sihi ndo.” Ta catyí tucu ra: “Tandihí ñu cha cahán ña vaha chi sutu o chi sihi ñu, tahán chi cúvi ñu.” catyí ra Moisés nu ley Nyoo.

¹¹ Soco nyoho catyí ndo tyi noo ñáyiví cuví catyí ñu chi sutu ñu o chi sihi ñu tyi ma cuví tyinyee ñu chí ñu vatyí tandihí cha iyó chi ñu Corbán cuví. (Cuñí chi catyí: “Cha चाहिं chi Nyoo cuví.”)

¹² Ta tatu catyí ñu tyicuan caa, ña cuñí ca chi cha tyinyee ñu chi sutu ñu o chi sihi ñu catyí ndo.

¹³ Ta tyicuan caa sacuachiyó ndo tuhun cha catyí Nyoo tyi sacuvi ndo, vatyí cuñí ndo sacuvi ri maa ndo tuhun cha iyó ndo. Ta cuaha ca cha inuu ri caa sacuvi ndo —catyí ra Jesús.

¹⁴ Tyicuan ta canḡ tucu ra Jesús chi ñáyiví ta catyí ra chi ñu:

¹⁵ —Tyḡsoho vaha tandihí ndo tuhun cahín, ta natyihí tuñí iñi ndo. Cha quihví yuhu ñáyiví ta chachí ñu, ña cuví sativí chi chí ñu. Soco cha quitá añima ñu, ican cuan sativí chí ñu.

¹⁶ Nyoho cha cutuñí iñi ndo, tyḡsoho ndo tuhun cahín —catyí ra Jesús chí ñu.

¹⁷ Tyicuan ta sandoḡ ra Jesús chí ñáyiví cuan, ta quihví ra chichi vehe. Ta ra cacticá noo chihin ra candacḡ tuhun ra chí ra ñáá cha cuñí chí catyí tuhun cuan.

¹⁸ Ta catyí ra Jesús chí ra:

—Tu tyicuan caa, ni nyoho, ña cutuñí iñi ndo. ¿Atu ña cutuñí iñi ndo vatyí cha quihví chichi yuhu yo ña sativí chí chí yo?

¹⁹ Vatyí ñima añima yo quihví chí, soco chichi yo. Ta yaha cuan ta quita chí chichi coño ñuhu yo —catyí ra Jesús.

Chihin cuan cuñí ra catyí ra vatyí tandihí nyayu ta vaha cachi yo.

²⁰ Ta catyí tucu ra:

—Cha quitá añima ñáyiví, ican cuan sativí chí ñu.

²¹ Vatyí añima ñu quitá cha ña vaha chicá xiñí ñu, ta sacuvi ñu cha ña vaha. Yihí ñu iyó ñu chihin rayi o chihin ñusihí ta ñima ñasihí ra cuví, ta ñima yiñí ñu cuví. Yihí ñu casuhú ñu. Yihí ñu cachahñí ñu.

²² Yihí ra iyó ñasihí ra ta chicá noo ra chihin inga ñu. Yihí ñu quichi cuví iñi ñu cha chí inga ñáyiví. Yihí ñu sacuvi ñu cha quiñí caa. Yihí ñu sandaví ñaha ñu. Yihí ñu iyó viciu chí ñu. Yihí ñu nyiyo iñi ñu. Yihí ñu ñii ñu cuendu. Yihí ñu cahnu sahá ñu chí ñu. Yihí ñu ña chaa cha chiñí tuñí xiñí ñu.

²³ Tandihí tuhun ña vaha ihya, quitá chí ityí chichi añima ñáyiví, ta sativí chí chí ñu —catyí ra chí ra.

Noo ñaha inga ñuu cha chino iñi chí ra Jesús

(Mt. 15.21-28)

²⁴ Yaha cuan ta quitaḡ ra Jesús yucuan, ta cuahan ra ityí ñuu Tiro ta Sidón. Quihví ra chichi noo vehe ta ña cuñí ra cha coto ni noo ñáyiví, soco ña cuví tixehe nuu ra.

²⁵ Ta sihi noo ñaha tyivaa cha yihí noo tatyí ña vaha añima, numi ri chitoḡ ña tuhun ra Jesús. Ta chaa ña ta chicutiñí chiti ña nuu ra.

²⁶ Ñaha cuan, ñaha inga ñuu cuví ña, ñaha ñuu Sirofenicia cuví ña. Quichí ña ta chacú ndahví ña nuu ra Jesús na tava ra tatyí ña vaha cha yihí añima sehe ña.

²⁷ Soco catyí ra Jesús chí ña:

—Saña, nacachi xihna ca ñu Israel ñu cuví sehe Nyoo, vatyí ña vaha cha tinyaá yo pan chi sehe yo ta cuhva yo cachi ina —catyí ra Jesús chi ña.

²⁸ Ta nacahan ña ta catyí ña:

—Ndicha, Tata, soco ina cuan chachí tucu ti yiquin cha canacoyo xiu mesa cuan —catyí ña chi ra.

²⁹ Tyicuan ta catyí ra Jesús chi ña:

—Vaha nacahun. Ta cha cuenda cuan cuví cuhun, vatyí tatyí ña vaha cha yaha quitã chi añima sehun —catyí ra chi ña.

³⁰ Ta cuhva cha nachaa ña vehe ña, catuví sehe ña nu chito, ta tatyí ña vaha cuan cha yaha quitã chi cue.

Nu sanduvaha ra Jesús chi noo ra soho ta ñihi

³¹ Ta quitã tucu ra Jesús ñuu Tiro, ta yaha ra ñuu Sidón, ta cuahan ra ityi ñuu cha canañi Decápolis, ta nachaa ra miñi Galilea.

³² Nu nyaá ra Jesús yucuan, quichí nyaca ñu chi noo ra soho ta ña cuví vaha cahán ra. Ta chacu ndahvi ñu nuu ra Jesús na tyiso ra ndaha ra siqui ra.

³³ Tava sijn ra Jesús chi ra iin chiyo xiin, nu yori ñáyivi, ta tyihí ra nundaha ra chichí soho ra, ta tyaa sii ra nu yaa ra.

³⁴ Yucuan ta nanyehé ndaa ra andivi. Ta naxitã ra tatyí ra, ta catyí ra:

—¡Efata! —ta cuñí chi catyí: ¡Nuña! —catyí ra.

³⁵ Ta chihin cuan nuña soho ra soho cuan, ta nduvaha yaa ra, ta nacahan vaha ra.

³⁶ Ta catyí ra Jesús chi ñu tyi yori chihin cahan ñu tuhun, soco tatu catyí ra chi ñu tyicuan caa, ñihi ca canacatyí ñu.

³⁷ Ta iyo cuñí ñu ta catyí ñu:

—Tandihí ta vaha sacuví ra. Nyacua cuví nacuiñi ñáyivi soho sahá ra ta cuví tucu nacahan ñáyivi ñihí ñandihí.

8

Nu chaha ra Jesús cha cachi cumi mil ñáyivi

(Mt. 15.32-39)

¹ Quiví cuan nataca tucu cuaha xaan ñáyivi. Ta ñahri maa cha cachi ñu iyó. Tyicuan ta canã ra Jesús chi ra cachicá noo chihin ra, ta catyí ra:

² —Cundahvi cuñí nyehi chi ñáyivi ihya, vatyí cha uñi quivi nyicú ñu ihya chihin, ta ñahri maa cha cachi ñu iyó.

³ Tatu natachi chi ñu nya vehe ñu cucachi ñu, coto coña ñu ityi, vatyí yihí ñu cañi quichí coyo ñu —catyí ra Jesús chi ra.

⁴ Ta nacahan ra cachicá noo chihin ra, ta catyí ra chi ra:

—¿Soco yoso caa cuhva yo cha cachi ñu ihya, ta yori maa ñáyivi iyó ta xico ñu chi yo?

⁵ Ta ndaca tuhun ra Jesús chi ra, ta catyí ra:

—¿Yoso tahan pan nyisó ndo?

Ta cacatyí ra:

—Ucha tahan.

⁶ Ta catyí ra na cunyicu ñáyivi cuan nu ñuhú. Ta quehen ra ucha pan cuan, ta nacuhva ra tyahvi nyoo chi Nyoo. Yaha cuan ta tahvı sava ra pan cuan, ta chaha ra chi ra cachicá noo chihin ra, na casacha ra chi ñáyivi cuan.

⁷ Ta canyisó tucu ra suhva tiyaca nyihi. Ta nacuhva tucu ra Jesús tyahvi nyoo chi Nyoo, ta chaha ra chi ra na casacha ra.

8 Tandihí ñu cachachi ñu, ta cachitu chichi ñu. Ta casacutu ra ucha tahan tica chihin yiquin cha ndoo ca.

9 Ta cha cumi mil tahan ñu cachachi. Yahá cuan ta catyí ra Jesús chi ñu na cunuho coyo ñu.

10 Ta quihví ra chichi noo canoa chihin ra cachicá noo chihin ra. Ta cuahan coyo ra ityi Dalmanuta.

Nu cacatyí ra fariseo chi ra Jesús na sacuvi ra noo milagru
(Mt. 16.1-4; Lc. 12.54-56)

11 Tyicuan ta cachaa coyo ra fariseo, ta quichaha cuvi yuhu ra chihin ra Jesus. Ta cacatyí ra chi ra na sacuvi ra noo milagru tatu ndicha cha Nyoo tachi chi ra. Tyicuan caa catyí ra vatyí cuñi ra nducu nyehe ra chi ra.

12 Ta ra Jesús uhvi uhvi naxitá ra tatyí ra, ta catyí ra:

—¿Ñáá tuhun cha chicán ñáyivi iyó vityin milagru? Cha ndicha catyí chi ndo vatyí ma sacuvi ni noo milagru nyehe ndo —catyí ra chi ra.

13 Tyicuan ta sandoq ra chi ra, ta nandihví ra chichi canoa ta cuahan ra inga chiyo miñi.

Cuhva iyó ra fariseo tari yuchan iya cuvi, catyí ra Jesús
(Mt. 16.5-12)

14 Naa iñi ra cachicá noo chihin ra Jesús cacuiso ra cha cacachi ra. Ta noo pan ri ñohó chihin ra chichi canoa cuan.

15 Tyicuan ta catyí ra Jesús chi ra:

—Saha ndo cuenda chi ndo chihin yuchan iya ra fariseo ta ra Herodes —catyí ra chi ra.

16 Ta ra cachicá noo chihin ra quichaha cacatyí ra chi ra tahan ra:

—Cha cuenda vatyí ñahri pan nyisó yo, yucuan cuenda cahān ra tuhun cuan —catyí ra chi ra tahan ra.

17 Tuví iñi ra Jesús cha ndatuhún ra, ta catyí ra chi ra:

—¿Ñáá tuhun cha catyí ndo tyi ñahri pan nyisó ndo? ¿Atu ta cutuñi ca iñi nyoho? ¿Atu ta coto ca ndo? ¿Atu ni ndava xaan añima ndo?

18 Nyaá chiti nuu ndo, ¿atu ña nyehé ndo? Nyaá soho ndo. ¿Atu ña chiñi ndo? ¿Atu ña nicohon iñi ndo

19 quivi cha sachē ohon tahan pan cuan chi ndi ohon mil rayi? ¿Yoso tahan tica yiquin naquehen ndo? —catyí ra Jesús, ndacá tuhun ra chi ra cachicá noo chihin ra.

Ta maa ra cacatyí ra:

—Uchi uvi.

20 Ta catyí tucu ra Jesús chi ra:

—Ta quivi sachē ucha tahan pan chi cumi mil ñu, ¿yoso tahan tica tyitu nacoñehē ndo?

Ta cacatyí ra:

—Ucha tahan.

21 Tyicuan ta catyí ra Jesús chi ra:

—¿Atu ta cutuñi ca iñi ndo? —catyí ra chi ra cachicá noo chihin ra.

Nu sanduvahq ra Jesús chi noo ra cuaa ñuu Betsaida

22 Yahá cuan ta chaq ra Jesús chihin ra cachicá noo chihin ra nya ñuu Betsaida. Ta quichi nyaca ñu chi noo ra cuaa. Ta cachacu ndahvi ñu nuu ra na tñn ra chi ra.

23 Tyicuan ta tñn ra ndaha ra cuaa cuan, ta cuahan ra chihin ra ityi chata ñuu. Ta tyaa si ra chiti nuu ra, ta tyiso ra ndaha ra siqui ra, ta ndaca tuhun ra chi ra tatu cuví nyehe ra chiin.

24 Ra cuaa cuan nanyehę ra ta catyí ra:

—Nyehí in cahnu ri maa chi ñáyiví. Cuhva caa yutun caa ñu cahvi iñi, soco chicá ñu —catyí ra.

25 Tyicuan ta tiin tucu ra Jesús chiti nuu ra inga chaha, ta maa ra nanyehę vaha ra ta nduvahá ra. Nanyehę cachi vaha ra tandihi.

26 Tyicuan ta natachi ra Jesús chi ra ta catyí ra chi ra:

—Ma quihvun chichi ñuu ta ni yori chihin cahun tuhun.

Nu catyí ra Pedro vatyi ra Jesús cuví Cristo

(Mt. 16.13-20; Lc. 9.18-21)

27 Yahá cuan ta chahan ra Jesús chihin ra cachicá noo chihin ra ñuu cha ca iyó Cesarea Filipino. Ta ityi cuahan ra, ta ndaca tuhun ra chi ra cachicá noo chihin ra, ta catyí ra:

—¿Ñáá catyí ñáyiví? ¿Yóó ra cuví yuhu? —catyí ra chi ra.

28 Ta canacahan ra ta catyí ra:

—Yihí ñu catyí ñu tyi ra Juan ra sacondutyá chi ñáyiví cuvún. Inga ñu catyí ñu tyi ra Elías cuvún. Ta inga ñu catyí ñu tyi inga ra profeta Nyoo cuvún —cacatyí ra chi ra.

29 Tyicuan ta ndaca tuhun ra chi ra, ta catyí ra:

—¿Ta nyoho, yóó ra cuví yuhu, cuñí tucu nyoho?

Ra Pedro catyí ra chi ra:

—Yoho cuví Cristo.

30 Soco catyí ra Jesús chi tandihi ra tyi yori chihin cacahan ra tuhun cuan.

Nu cahan ra Jesus tuhun tyi cucúvi ra

(Mt. 16.21-28; Lc. 9.22-27)

31 Tyicuan ta quichahá sañaha ra vatyi Rayii cha quichi nya gloria cunyehe ra cuaha xaan tindocho. Ta ra mandoñi ta ra cacuví nuu chi tata sutu ta ra casacuahá cuenda ley vehe ñuhu ma cuñi ra natiin cuenda ra chi ra. Catyí ra Jesús chi ra vatyi cucahñi ñu chi ra soco chichi cha cu uñi quiví cunandoto ra.

32 Catyí cachi ra chi ra tuhun ihya. Tyicuan ta tava siin ra Pedro chi ra ta quichaha catyí ra tyi ña vaha cha cahan ra cha tyicuan caa.

33 Soco ra Jesús nanyocava ra, ta nanyehę ra chi inga ra cachicá noo chihin ra. Ta quichaha cahan ra chi ra Pedro ta catyí ra:

—¡Cuachiyó chuun nui, cuihna! Vatyi yoho ña chicá xiñun tari cuhva chicá xiñi Nyoo, soco tari chicá xiñi ñáyiví, chicá xiñun —catyí ra Jesús chi ra Pedro.

34 Tyicuan ta cana ra Jesús chi ñáyiví ta chi ra cachicá noo chihin ra ta catyí ra chi ñu:

—Tatu nya ndo cuñí ndo cunyicon ndo chii, cuñí chi cahnya ndo iñi ndo tuhun maa ndo. Ta ma ndu uvi iñi ndo cha yihí ndo cuende vasi nyehe ndo tindocho cha cuende. Vatyi yucuan cuví cruzi cha tahán chi cuiso ndo.

35 Vatyi nya ndo ña cuñí ndo cuví ndo cha cuende, suri cha cuví maa ndo cuví, ta cahun ndihi ndo anyaya. Soco nya ndo cuhva ndo ñáyiví ndo cha cuende ta cha cuenda tuhun Nyoo, cucacu añima ndo.

36 Tatu sacunaa ndo añima ndo anyaya, ¿ñáá ri tuhun cha saha ganaa ndo tandihi cha tyayii cha iyó siqui ñuhu ñáyiví?

37 Vatyi tatu sacunaa ndo añima ndo, ñahri maa cha iyó cha cuví cuhva ndo ta sacacu ndo añima ndo.

38 Tatu nya noo ndo cucahan nuu ndo nyehe ndo chii, ta cucahan nuu ndo tuhun cahin nuu ñáyiví cha iyó cuatyí ta ña quichahá tuhun Nyoo, yuhu Rayii

cha quichĩ nya gloria cucahan tucu nuu mai nyehi chi ndo quivĩ quichi tiqui chihin ángel cuenda Nyoo. Vatyí cuquichi chihin cha tyaqui maa Suti.

9

¹ Cha ndicha catyí chi ndo, vatyí yihĩ ndo cha nyicú ndo ihya, ma cúvi ñaha ndo nyacua nya nyehe ndo yoso caa nyacá ñaha Nyoo. Vatyí cuquichi chihin tunyee ñi ra —catyí ra Jesús.

Nu sañahá Nyoo yoso caa ra Jesús noo cha ndicha nu nyacá ñaha ra (Mt. 17.1-13; Lc. 9.28-36)

² Ñu quivĩ yaha ta cuahan ra Jesús noo yucu sucun. Ta ra Pedro, ra Jacobo, ta ra Juan ri cuahan coyo chihin ra. Ta yucuan nasamā cuhva caa nuu ra Jesús.

³ Nduxiño xaan sahma ra ta cuichin xaan nanduvĩ. Yori maa siqui ñuhu ñayivĩ ihya cuvĩ nacatya ta nducuichin tyicuan caa.

⁴ Ta cananyehē ra tyi nanyaá ra Elías ta ra Moisés, candatuhún ra chihin ra Jesús.

⁵ Tyicuan ta ra Pedro catyí ra chi ra Jesús:

—Maestro, ¡vaha xaan cha nyicú ndi ihya! Na savaha ndi uñi tahan tiyahva: noo cha cuenda maun, ta noo cha cuenda ra Moisés, ta nonga cha cuenda ra Elías —catyí ra Pedro,

⁶ vatyí ña chitó ra ñáá tuhun cahán ra. Vatyí maa ra ta inga ra cayuhví ra.

⁷ Tyicuan ta noo xica noo vico siqui ra ta sahvi chi ra. Ta chichi vico cuan tyacu noo ndusu cha catyí:

—Ican ihya cuvĩ Sehi, ta cuñi xain chi ra. Tyasoho ndo tuhun cahan ra —catyí ndusu cuan.

⁸ Ta cuhva cha cananyehē ra, yori ca ra tayucú chihin ra, noo ri ca maa ra Jesús.

⁹ Cuhva cha cuanoo coyo ra yucu cuan, catyí ra Jesús chi ra tyi ma cacahan ra tuhun cha canyehē ra yucuan, soco nya yaha cha nandoto Rayii cha quichi nya gloria, tyicuan ta cuvĩ cahan ra tuhun.

¹⁰ Yucuan chaha ña cacahan maa ra tuhun, vasi cacatyí ra chi tahan ra ñana vaha tuhun cuvĩ cha cunandoto ra.

¹¹ Tyicuan ta quichahā candaca tuhun ra chi ra Jesús:

—¿Ñáá tuhun cha catyí ra casacuahá cuenda ley vehe ñuhu vatyí cuquichi xihna ca ra Elías?

¹² Ta nacahan ra, ta catyí ra:

—Cha ndicha vatyí xihna ca ra Elías nyaá quichi ta sanduvaha ra tandihĩ. ¿Ta yoso caa catyí tuhun Nyoo cuenda Rayii cha quichi nya gloria? Catyí chi tyi cunyehe ra tindoho, ta ma cuñi nyehe ñáyivĩ chi ra.

¹³ Soco yuhu catyí chi ndo tyi cha yahā quichĩ ra Elías. Ta sacuvĩ maa ñáyivĩ cha cuñi ñu chihin ra, tari cuhva catyí nu tutu Nyoo cha cucuvi chi ra —catyí ra Jesús chi ra.

Nu sanduvahā ra Jesús chi noo ra tyivaa cha yihĩ noo tatyí ña vaha chi (Mt. 17.14-21; Lc. 9.37-43)

¹⁴ Yahā cuan ta nachahā coyo ra nu nyicú inga ra cachicá noo chihin ra Jesús. Ta canyehē ra tyi cuaha ñáyivĩ tayucú nicachico. Ta nyicú tucu ra sacuahá cuenda ley yucuan, ta cacuvi yuhu ra chihin ra.

¹⁵ Tyicuan ta cha nanyehē ñu chi ra Jesús, tandihĩ ñu iyo cuñi ñu, ta cachino ñu chichuhva ñu nocumí chi ra.

16 Tyicuan ta ndacā tuhun ra Jesús chi ra cacuvi yuhu cuan ta catyí ra:

—¿Ñáá cuenda cuví yuhu xaan ndo? —catyí ra chi ra.

17 Ta noo ra nanyaá chichi cha cuaha ñáyivi yucuan, nacahañ ra ta catyí ra:

—Maestro, ihya vachi nyaque chi sehi. Yihí noo tatyí ña vaha chi cue ta sacaŋihí chi cue.

18 Vatyí tandihí ri nu t̄in tatyí cuan chi cue, sanduva chi cue nu ñuhú, ta yucuan quita tiñi yuhu cue ta cahñi noho cue. Ta ndundava cue. Cha catyí chi ra cachicá noo chuhun na tava ra tatyí ña vaha cuan, soco ña cacuví chi ra —catyí ra cuan chi ra Jesús.

19 Nacahañ ra Jesús ta catyí ra:

—¡Nyoho ñu ña chinó iñi cuví ndo! ¿Yoso tahan ca quivi cunyai chihin ndo ta cunyei tisihi ndo nyacua nya cha cutuhva ndo ta chino iñi ndo chii?

Ta catyí ra chi ra cuan:

—Nyaca chi ra luhlu chiña tyehe —catyí ra.

20 Quichí nyaca ra chi ra luhlu cuan. Ta cuhva cha nanyehe tatyí cuan chi ra Jesús, quehen tatyí cuan chi cue. Ta nduva cue nu ñuhú, sacaŋuhú cue chi cue, ta quita tiñi yuhu cue.

21 Tyicuan ta ndacā tuhun ra Jesús chi sutu cue:

—¿Ama quichaha cuvi chi ra tyehe caa? —catyí ra chi ra.

Ta nacahañ sutu cue, ta catyí ra:

—Nyata luhlu ra.

22 Ta cuaha chaha tyihí tatyí ña vaha ihya chi cue nu cayú ñuhú, o nu ndutya. Cuñí chi cahñi chi chi cue. Soco tatu cuví chuun, cundahvi cuñi nyehun chi ndi, ta tyinyeun chi ndi —catyí sutu cue chi ra Jesús.

23 Ta catyí ra Jesús chi ra:

—Tatu chinó iñun, tandihí ta cuví cha cuenda ñu chino iñi —catyí ra Jesús.

24 Tyicuan ta sutu cue canachaḡ ra ta catyí ra:

—¡Chinó iñi! ¡Tyinyee chii na chino ca iñi! —catyí ra chi ra Jesús.

25 Cuhva cha nyehe ra Jesús tyi cuaha ñáyivi candu iñ ri, ta tava ñehe ra chi tatyí ña vaha cuan, ta catyí ra:

—Yoho tatyí ña vaha cha sañihí ta sasohó chi cue ihya, catyí chuun, na quiton. Saña chi ra luhlu ihya, ta ma ndihvi con chi ra —catyí ra Jesús chi tatyí ña vaha cuan.

26 Ta tatyí cuan quíñi xaan canachaḡ ta na quisi chi chi cue inga chaha ta quita. Ta sandoḡ tatyí cuan chi cue tari noo ndiyi. Ta cuaha ñu catyí vatyí cha chihí cue.

27 Soco t̄in ra Jesús ndaha cue, ta nacoñehé ra chi cue, ta nicuinanyaḡ cue.

28 Tyicuan ta quihvi ra Jesús noo vehe, ta ra cachicá noo chihin ra candacā tuhun ra chi ra ta catyí ra:

—¿Ñáá tuhun ña cuví tava ndi chi tatyí ña vaha cuan?

29 Ta catyí ra Jesús:

—Cha cuenda vatyí tahan tatyí ña vaha ihya, quita, soco chihin cha ma cachi yo ta cacan tahvi yo chi Nyoo —catyí ra chi ra.

*Nu cahán ra Jesús tuhun inga chaha vatyí cucúvi ra
(Mt. 17.22-23; Lc. 9.43-45)*

30 Quivi cha quita coyo ra yucuan, yahá coyo ra ityi Galilea. Ta ña cuñí ra Jesús cha coto ñáyivi.

³¹ Vatyí sañahá ra chí ra cachicá noo chihin ra. Ta catyí ra chí ra vatyí Rayíi cha quichi nya gloria cunacuhva cuenda ñu chí ra ndaha ñáyivi. Ta cucahñi ñu chí ra, soco cha cu uñi quivi cunandoto ra.

³² Soco ña cacutuñi iñi ra tuhun cahán ra chihin ra. Ta cayuhví ra candaca tuhun ra chí ra.

¿Yóo ra cahnu ca?

(Mt. 18.1-5; Lc. 9.46-48)

³³ Tyicuan ta cachaa coyo ra ñuu Capernaum. Ta cuhva cha nyicú ra nya vehe, ra Jesús ndaca tuhun ra chí ra ta catyí ra:

—¿Ñáá tuhun cuví xaan yuhu nyoho ityi vachi yo? —catyí ra ndaca tuhun ra.

³⁴ Taxi taxi cacuví ra, vatyí ityi vachi coyo ra, ta cacuví yuhu ra nya ra cuví ra ra cahnu ca.

³⁵ Tyicuan ta chicunyaá ra Jesús ta caná ra chí ndi uchi uvi ra chicá noo chihin ra, ta catyí ra chí ra:

—¿Nya ndo cuñi ndo cuví ndo nuu, cuñi chí cha cuví ndo ra nu ndihi cha nuu tandihi ra, ta sacuví ndo tyiño nuu tandihi ra? —catyí ra Jesús chí ra.

³⁶ Tyicuan ta quehen ra chí noo ra cuehe luhlu ta chinanyaá ra chí cue mahñu ra. Ta tyihí sucun ndaha ra chí cue, ta catyí ra:

³⁷ —Ñáyivi cha natín cuenda chí noo ra cuehe luhlu chihin sivi, chí yuhu natín cuenda ñu. Ta ñu natín cuenda chii, ñima chí yuhu ri natín cuenda ñu, soco chí ra cha tachí chii ñandihí.

Tatu ña cuahan ñáyivi siqui yo, tumañi iñi chí yo cuahan ñu

(Mt. 10.42; Lc. 9.49-50)

³⁸ Tyicuan ta catyí ra Juan chí ra Jesús:

—Maestro, nyehe ndi chí noo ra cuan ta chihin sivun tavá ñehe ra chí tatyí ña vaha. Soco vatyí ñima chihin yo chicá noo ra, catyí ndi chí ra tyi ma sacuví ca ra —catyí ra Juan chí ra Jesús.

³⁹ Soco catyí ra Jesús chí ra:

—Ma casi ndo. Vatyí ni noo ra cha casacuví milagru chihin sivi ta yaha cuan ta caña iñi ra cahan ña vaha ra siqui.

⁴⁰ Vatyí ñu cha ña cuahan siqui yo, tumañi iñi chí yo cuahan ñu.

⁴¹ Tatu cuhva noo ñu, vasi noo vasu ndutya coho ndo chihin sivi, cha cuenda vatyí ñu cuenda yuhu ra Cristo cuví ndo, cha ndicha vatyí cuñihi ñu cha cuacuhva Nyoo chí ñu.

Yica xaan cha sanacava yo chí noo yañi yo nu cuatyí

(Mt. 18.6-9; Lc. 17.1-2)

⁴² Tatu yóo ñu sanacava nu cuatyí chí noo ñu chinó iñi chii, vaha taxin ca cuhñi ñáyivi noo yuu sucun ñu ta tuchi ñu chí ñu cuan nu tyañuhu.

⁴³ Tatu ndahun sanacavá chuun nu cuatyí, vaha taxin ca cahnya. Vatyí vaha ca cha quihvun nu coun chihin Nyoo chihin cha luu ndahun ta ñima ca chihin cha ninduvi ndahun ta cuhun anyaya nu cayú ñuhú cha ma ndahva ca maa.

⁴⁴ Ta yucuan ña chihí tindacu chachí chí ñu, ta ñuhú ña ndahva maa ni noo chaha.

⁴⁵ Ta tatu chahun ta sanacavá chuun nu cuatyí, vaha taxin ca cahnya. Vatyí vaha ca cuhun nu coun chihin Nyoo chihin cha luu chahun ta ñima ca chihin cha ninduvi chahun ta tuchi Nyoo chuun anyaya. Vatyí yucuan ma ndahva ca maa ñuhú.

⁴⁶ Ta ña chihí tindacu chachí chí ñu, ta ñuhú ni noo chaha ña ndahva.

⁴⁷ Ta tatu noo chiti nuu sanacavá chuun nu cuatyí, vaha taxin ca tava. Vatyí vaha ca cha quihvun nu nyacá ñaha Nyoo chihin noo chiti nuu ta ñima ca chihin ninduvi chiti nuun ta tuchi Nyoo chuun anyaya.

⁴⁸ Vatyí yucuan ña chihí tindacu chachí chí ñu, ta ni noo chaha ña ndahva ñuhu.

⁴⁹ Soco tandíhi ñu nyicon chii, tari cha cayú ñu chihin ñuhu tatu nyehe ñu tindoho cha cuende, vatyí chihin cuan cua sanduvaha Nyoo chí ñu, tari nduvaha nyayu chihin ñi.

⁵⁰ Ñi vaha xaan. Soco tatu ndíhi cha uhva, ¿yoso caa cuví cotyiño yo inga chaha? Tyicuan caa tucu nyoho, ma sandíhi ndo cha coo tuhun Nyoo aña ndo cha cuví tari ñi vaha. Tyicuan caa ta coo taxi ri ndo chihin tahan ndo.

10

Nu sañahá ra Jesús tyi ña vaha sandoo rayi chí ñasihi ra
(Mt. 19.1-12; Lc. 16.18)

¹ Quita ra Jesús Capernaum ta cuahan ra ityí Judea nya inga chiyo yutya Jordán. Yucuan candu ñin ri ñáyivi inga chaha nu nyaá ra, ta quichahá sañaha tucu ra chí ñu tari tuhvá maa ra.

² Tyicuan ta suhva ra fariseo catuhva ra nu nyaá ra Jesús, vatyí nducu ra cuhva tyaa ra cuatyí siqui ra. Ta candaca tuhun ra chí ra tatu vaha cha sandoo noo rayi chí ñasihi ra.

³ Tyicuan ta nacahan ra Jesús ta catyí ra:

—¿Ñáa cha catyí ra Moisés tyi sacuví ndo?

⁴ Ta canacahan ra ta cacatyí ra:

—Ra Moisés chahá ra cha cuví cahnya noo ra tutu cha tandaha ra tyicuan ta cuvi sandoo ra chí ñasihi ra —catyí ra chí ra.

⁵ Tyicuan ta catyí ra Jesús chí ra:

—Catyí ra Moisés cha sacuvi ndo tyicuan caa soco cha cuenda cha ndava aña ndo.

⁶ Soco quivi xihna ri, quivi savahá Nyoo tandíhi maa, savahá ra rayi ta ñaha sihi.

⁷ “Yucuan cuenda sandoo rayi chí sutu ra ta chí sihi ra vatyí ndu ñin ri ra chihin ñasihi ra.

⁸ Ta chichi cha ninduvi tahan ñu cucuvi ñu tari cha noo ri ñáyivi.” Yucuan chaha ñima ca uvi tahan cuví ñu, soco cha nanduví ñu noo ri ñáyivi.

⁹ Yucuan chaha, ña tahán chí cha sasín ñáyivi cha sandu ñin ri Nyoo —catyí ra Jesús chí ra.

¹⁰ Yahá cuan ta nachaá coyo ra nya vehe, ta quichahá ndaca tuhun ra chacica noo chihin ra inga chaha siqui tuhun cuan.

¹¹ Ta catyí ra Jesús chí ra:

—Ra cha sandoo ñasihi ta tandaha ra chihin inga ñu, chicoó cuatyí ra vatyí ña vaha sacuvi ra chihin ñasihi ra, ñaha cha xihna ri cuan.

¹² Ta tyicuan caa tucu ñusihi. Tatu sandoó ñu chí yí ñu ta tandaha ñu chihin inga ra suri chicoó tucu cuatyí ñu —catyí ra Jesús.

Nu nasoco ra Jesús chí ra cuatyaa
(Mt. 19.13-15; Lc. 18.15-17)

¹³ Tyicuan ta quichi nyaca ñu suhva ra cuatyaa chí ra Jesús tacuhva natyiso ra ndaha ra siqui ndotyín. Soco ra chacica noo chihin ra ña chahá ca ra cha quichi nyaca ñu chí ndotyín.

¹⁴ Soco cuhva cha nanyehé ra Jesús, cuxaan ra. Ta catyí ra chí ra:

—Saña ndo. Na quichi nyaca ñu chi ra cuatyaa nu nyaí. Ta ma casi ndo. Vatyí ñu nyacá ñaha Nyoo añima, cuví ñu chinó iñi chi Nyoo tari chinó iñi ra cuatyaa ihya.

¹⁵ Cha ndicha catyí chi ndo vatyí tatu ma nacuhva cuenda ndo chi ndo chi Nyoo tari noo ra cuatyaa chihin sutu ndotyín, ma cuví quihvi ndo nu nyacá ñaha Nyoo —catyí ra Jesús chi ra.

¹⁶ Ta quehen ra chi noo noo ndotyín ta tyihí sucun ndaha ra. Ta tyiso ra ndaha ra siqui ndotyín, ta chican tahvi ra chaha ndotyín.

*Nu ndatuhún minoo ra tyivaa tyayí chihin ra Jesús
(Mt. 19.16-30; Lc. 18.18-30)*

¹⁷ Yaha cuan ta cuahan ra Jesús. Ta chingo vavaha noo ra cuan chata ra ta chicutiñi chiti ra nuu ra, ta ndaca tuhun ra chi ra, ta catyí ra:

—Maestro, ra vaha cuvún. ¿Yoso caa sacuví ta ñihi ñayivi cha ma naa ca maa coi? —catyí ra chi ra Jesús.

¹⁸ Ta catyí ra Jesús chi ra:

—¿Yoso caa chitón tyi vahi? Noo ri ra vaha iyó, ta ican ra cuan cuví Nyoo. (Ta cha catyún tyi vahi, nacotón tyi Nyoo cuví.)

¹⁹ Yoho cha chitón cha catyí Nyoo cha sacuví yo: “Ma coun chihin inga ñusihi tatu ñima ñasihun cuví. Ma cahñun. Ma suhun. Ma cahun cuendu siqui ni noo ñu. Ma sandavi ñahun. Sahun ñayivi chi sutun ta chi sihun” —catyí ra Jesús chi ra.

²⁰ Ta nacahan ra cuan ta catyí ra:

—Maestro, tandihi ihya cha sacuví nyata luhli —catyí ra.

²¹ Tyicuan ta cusí cuñi ra Jesús nanyehé ra chi ra. Ta catyí ra chi ra:

—Cumañi noo ri ca cha cumañi chuun. Cuñan ta xicon tandihi cha iyó chuun ta cuhvon chi ñu ndahvi. Tyicuan ta coo cha tyayíun nya andivi. Yaha cuan ta quichun cunyicon chi vasi nyehún tindoho —catyí ra Jesús chi ra.

²² Soco cha chiñi ra tuhun cahan ra Jesús tyehe caa, nducuihya iñi ra, ta cuihya xaan cuanuhu ra vatyí tyayí xaan ra.

²³ Tyicuan ta nanyehé ra Jesús nicachico chata ra, ta catyí ra chi ra cachicá noo chihin ra:

—¡Ñana cha yí ta cuví nacuhva cuenda ñu tyayí chi ñu na cunyaca ñaha Nyoo chi ñu! —catyí ra chi ra.

²⁴ Iyo cacuñi ra cachicá noo chihin ra tuhun cahan ra. Soco catyí ra Jesús chi ra inga chaha:

—Sehi, ñu cha tyaa xaan xiñi cha tyayí, iyí xaan quihvi ñu nu nyacá ñaha Nyoo!

²⁵ Tañi tyehe yaha noo camellu xiu noo yiqui ticu, ta ñima ca cha cuhva noo ñu tyayí cunyacá ñaha Nyoo chi ñu —catyí ra Jesús.

²⁶ Cha cachiñi ra tuhun ihya, iyo xaan cacuñi ra, ta candaca tuhun ra chi ra tahan ra, ta catyí ra:

—Tu tyicuan caa, ¿yóo cha cuví cacu añima? —catyí ra.

²⁷ Nanyehé ra Jesús chi ra ta catyí ra chi ra:

—Ñayivi ña cuví sacuví ñu ihya. Soco Nyoo cuví chi ra. Vatyí cha cuenda Nyoo ñahri cha yí sacuví ra.

²⁸ Tyicuan ta catyí ra Pedro chi ra:

—Sutu Mañi yuhu, nyuhu sandoq ndi tandihi cha iyó chi ndi, ta vityin nyicón ndi chuun.

²⁹ Nacahan ra Jesús ta catyí ra:

—Cha ndicha catyí chi ndo vatyi tandihi ñu sandoḡ vehe, o yañi, o cuhva, o sutu, o sihi, o ñasihi, o sehe, o ñuhú, cha cuenda yuhu ta cha cuenda cha sacoto ñu chi ñáyivi tyi cuñí Nyoo sacacu ra chi ñu,

³⁰ cuañihi ñu ciento chaha siqui cha sandoḡ ñu ihya ñuhu ñayivi. Cuañihi ñu vehe ta yañi ñu, ta cuhva ñu, ta sihi ñu, ta sehe ñu, ta ñuhú, vasi sanyehe ñáyivi tindoho chi ñu. Soco inga ñayivi cha vachi, cuñihi ñu ñayivi cha ma naa ca maa.

³¹ Soco cuaha xaan ñu cha cuvi nuu vityin, ñu nu ndihi cucuvi ñu. Ta cuaha xaan ñu cuvi ñu nu ndihi vityin, ican ñu cucuvi nuu —catyí ra Jesús.

Nu cahán ra Jesús inga chaha tyi cucúvi ra
(Mt. 20.17-19; Lc. 18.31-34)

³² Cuahan coyo ra ndaa ra ityi cuahan ñuu Jerusalén, ta ra Jesús cuahan ra ityi nuu ñu nyicón chi ra. Ta maa ñu iyo cuñí ñu ta chihin cha yuhví ñu cuahan coyo ñu chata ra. Tyicuan ta cana siin ra chi ndi uchi uvi ra cachicá noo chihin ra. Ta quichahá catyí ra cha cucuvi chi ra.

³³ Ta catyí ra:

—Tari cuhva nyehé ndo vityin, cua ndaa yo ityi cuahan ñuu Jerusalén nu cucuhva cuenda ñu chi yuhu Rayi cha quichi nya gloria chi ra cuví nuu chi tata sutu, ta chi ra sacuahá cuenda ley vehe ñuhu. Ta cucatyí ra tyi cucúvi ta cucuhva cuenda ra chii chi ra inga ñuu.

³⁴ Ta cucuacu nyaa ra chii, cucañi ra chii, cutyicu si ra chii. Ta cucahñi ra chii. Soco cha cu uñi quivi cunandote cha yaha cúvi —catyí ra Jesús.

Nu cachican ra Jacobo ta ra Juan noo tumañi iñi chi ra Jesús
(Mt. 20.20-28)

³⁵ Tyicuan ta ra Jacobo ta ra Juan, ra cacuvi sehe ra Zebedeo, catuhvá ra nu nyaá ra Jesús, ta catyí ra chi ra:

—Maestro, cuñi ndi cha sahun noo tumañi iñi chi ndi —catyí ra.

³⁶ Ta ndacá tuhun ra Jesús chi ra:

—¿Ñáá cha cuñi ndo cha sacuvi cha cuenda ndo?

³⁷ Ta canacahan ra ta catyí ra:

—Cuhva cha cunyaa ndi chuhun nu nyacá ñahun, noo ndi chiyo vahun, ta inga ndi chiyo satyun —catyí ra chi ra Jesús.

³⁸ Tyicuan ta catyí ra Jesús chi ra:

—Nyoho ña chitó ndo cha chicán ndo. ¿Atu cuví nyehe nyoho tindoho cha cuanyehe yuhu? ¿Atu cuví cuhun ndo tuhun chihi tari cuhun yuhu? —catyí ra chi ra.

³⁹ Ta canacahan ra:

—Cuví chi ndi.

Ta ra Jesús catyí ra:

—Cha ndicha vatyi cunyehe ndo tindoho ta cuhun ndo tuhun chihi tari cuhun yuhu.

⁴⁰ Soco tuhun cha cunyaa ndo chiyo vahi ta chiyo satyin, ñima yuhu tahán chi cuhve chi ndo, soco maa Nyoo cucatyí yóo cha cuñihi nyatu cuan —catyí ra Jesús chi ra.

⁴¹ Cha cachiñi uchi ca tahan ra chicá noo chihin ra Jesús tuhun cuan, cacuxaan ra chihin ra Jacobo ta ra Juan.

⁴² Soco cana ra Jesús chi ra ta catyí ra chi ra:

—Chitó nyoho vatyi ra canyacá ñaha chi ñáyivi siqui ñuhu ñayivi, ñihi xaan yosó ra siqui ñu.

⁴³ Soco ñima tyicuan caa tahán chi sacuvi nyoho. Vatyí ra cuñí cucahnu ca, cuñí chi cuví ra musu tandihí ca ndo.

⁴⁴ Ta nya nyoho cha cuñí ndo cuví ndo nuu, cuñí chi cuví ndo musu tandihí ca ñu.

⁴⁵ Vatyí ní ri yuhu Rayíí cha quichíj nya gloria ta ña vachi vatyí sacuvi ñáyivi tyiño nui. Soco vachi vatyí sacuvi tyiño nuu ndo. Ta vachi vatyí cuhve ñáyivi tari noo cha cutiyiahvi ta cusacaqui cuaha ñáyivi —catyí ra Jesús.

Nu sanduvahá ra Jesús chi ra Bartimeo ra cha cuaa
(Mt. 20.29-34; Lc. 18.35-43)

⁴⁶ Tyicuan ta cachaá coyo ra ñuu Jericó. Ta cua yaha ri ra ñuu cuan. Ta cuhva cha quita ra Jesús ñuu cuan cuaha xaan ñáyivi cuahan chata ra, ñin ri chihin ra cachicá noo chihin ra. Ta yucuan nyaá noo ra cuaa cha nañí Bartimeo. Sehe ra Timeo cuví chi ra. Nyaá ra cuan yatyin ri yuhu ityi cuan, chicán ra caridaa.

⁴⁷ Ta cha chiñí ra cuaa cuan tyi cua yaha ra Jesús ra ñuu Nazaret, quichahá cana chaa ra, ta catyí ra:

—jYoho Jesús, ra vachi tata ra David, cundahvi cuñi chii! —catyí ra canachaá ra.

⁴⁸ Cuaha ñu chasi yuhu ra na cutaxin ra, soco maa ra ñihi ca cana chaa ra ta catyí ra:

—jYoho ra vachi tata ra David, cundahvi cuñi chii! —catyí ra.

⁴⁹ Tyicuan ta chicuiñí ra Jesús ta catyí ra:

—Cana ndo chi ra.

Ta cacana ra chi ra cuaa cuan ta catyí ra chi ra:

—Saní iñun. Ndūcuita, vatyí caná ra chuun —cacatyí ra chi ra.

⁵⁰ Tyicuan ta tuchí ñihno ra sahma ndichi ra. Ta ndava ra noo ta tuhva ra nuu nyaá ra Jesús.

⁵¹ Tyicuan ta quichahá ndaca tuhun ra Jesús chi ra:

—¿Ñáá cha cuñún cha sacuvi chuhun?

Ta nacahan ra cuaa cuan ta catyí ra:

—Maestro, cuñí cha sanduvahun chiti nui —catyí ra.

⁵² Ta catyí ra Jesús chi ra:

—Cuahan. Cha nduvahun vatyí chinó iñun chii.

Ta caa cuhva ri cuan cuví nanyehe ra cuaa cuan. Ta cuahan ra chata ra Jesús ityi cuahan ra.

11

Nu quihvi ra Jesús ñuu Jerusalén
(Mt. 21.1-11; Lc. 19.28-40; Jn. 12.12-19)

¹ Cachaá coyo ra yatyin ri ñuu Jerusalén, nu nyaá ñuu Betfagé ta ñuu Betania. Ta yucu yutun Olivo nyaá ityi nuu chiin ca. Tyicuan ta catyí ra Jesús chi uvi ra cachá noo chihin ra:

² —Cuahan ndo chichi ñuu cha nyaá ityi nuu chiña. Ta nu cua chaa ndo cunañihi ndo noo burru chaa nuhñí ti, quiti ta quihí ca tyayu cuví ti. Ndachi ndo chi ti, ta quichi nyaca ndo chi ti.

³ Ta tatu yóó cha ndaca tuhun ñáá tuhun sacuvi ndo tyicuan caa, catyí ndo chi ñu vatyí chiñuhú ti chi ra nyacá ñaha, ta numi ri cunanyaca ndo chi ti, catyí ndo chi ñu —catyí ra Jesús chi ra.

⁴ Tyicuan ta cuahan coyo ra, ta canañihí ra burru cuan nuhñí ti ityi cahnu yatyin ri noo yuvehe, ta candachí ra chi ti.

⁵ Ta suhva ra canyicú cuan catyí ra chi ra:

—¿Ñáá cha nyacuvi ndo? ¿Ñáá tuhun cha ndachí ndo burru chiña? —catyí ra chi ra.

⁶ Tyicuan ta canacahan ra tari cuhva cha catyí ra Jesús chi ra. Ta cachaha ra cuhun coyo ra.

⁷ Tyicuan ta caquehen ra burru cuan ta chinyaca ra chi ra Jesús. Ta catyiso ra sahma ra siqui ti, ta ndaa ra Jesús chi ti.

⁸ Ta cuaha ñu ndica ñu sahma ñu ityi cuahan ra, ta inga ñu chahnu ñu soco numa ta cachacun ñu.

⁹ Tyicuan ta ñu cha cuahan ityi nuu ra ta ñu cha cuahan ityi chata, quichaha cana chaa ñu ta catyí ñu:

—¡Cahnu xaan cuví Nyoo! ¡Na sacahnu yo chi ra vachi cuenda Sutu yo Nyoo!

¹⁰ ¡Sacahnu yo chi ra vachi nyacá ñaha tari chinyaca ñaha sutu chahnu yo ra David! ¡Cahnu xaan ca cuví ra nyaá andivi! —catyí ñu.

¹¹ Tyicuan ta quihvi ra Jesús chichi ñuu Jerusalén, ta cuahan ra vehe ñuhu cahnu. Ta cha yaha nanyehé ra ityi cuan ityi ihya, ndaca chata ra ñuu Betania chihin ndi uchi uvi ra chicá noo chihin ra vatyí cha ñi.

Nu soco ra Jesús chi yutun higo cha ñahri chiti ñi nuu tun

(Mt. 21.18-19)

¹² Cha inga quivi quita coyo ra ñuu Betania cuan, ta cha ni ri ca cha cuahan ra chicá ityi ra cha noo soco chi ra Jesús.

¹³ Ta nyasava ri nanyehé ra noo tu higo cha nyaá numa. Ta chahan ra chinyehé ra tatu ñi chiti nuu tun, soco maa maa ri numa ri ñi, vatyí ta chaa ca quivi quita chiti tun.

¹⁴ Tyicuan ta cahan ra Jesús chihin tun, ta catyí ra chi tun tyehe caa:

—Ma coo ca chiti cachi ñáyivi nuun —catyí ra chi tun.

Ta ra cachicá noo chihin ra cachiñi ra cha cahan ra.

Nu tava ñehé ra Jesús chi ra caxicó chichi vehe ñuhu cahnu

(Mt. 21.12-17; Lc. 19.45-48; Jn. 2.13-22)

¹⁵ Yaha cuan ta nachaa coyo ra Jerusalén. Ta quihvi tucu ra Jesús chichi vehe ñuhu cahnu. Ta quichaha tava ñehé ra chi ra caxicó ta ra casatá yucuan. Sanduva ra mesa ñu canasamá xuhun chi ñáyivi. Ta suri tyicuan caa sacuvi ra chihin tyayu ra caxicó paloma.

¹⁶ Ta ña chaha ca ra ca cuiso ñu ñáá cha cuiso ñu ityi chichi vehe ñuhu cuan.

¹⁷ Ta quichaha sañaha ra chi ñu, ta catyí ra:

—Nu tutu Nyoo catyí chi: “Vehi, vehe nu chicán tahvi tandihí ñáyivi iyó siqui ñuhu ñáyivi cuví”, catyí Nyoo. ¡Soco nyoho nasahá ndo vehe nu nyicú ra suhu! —catyí ra Jesús.

¹⁸ Ta ra cacuvi nuu chi tata sutu ta ra casacuahá cuenda ley vehe ñuhu cachiñi ra cha cahan ra, ta quichaha canducu ra cuhva cha cacahni ra chi ra vatyí cayuhvi ra chi ra tyi cha tandihí ñáyivi iyo cuñi ñu cha sañahá ra.

¹⁹ Soco cuhva cha cua cuaa ra Jesús quita ri ra ñuu cuan chihin ra cachicá noo chihin ra.

Nu na ityi tu higo cha soco ra Jesús

(Mt. 21.20-22)

²⁰ Cha ñaha ri cha inga quivi cuan, nayaha coyo ra nu nanyaá tu higo cuan. Ta cananyehé ra vatyí na ityi nyacua nya yoho tun.

²¹ Tyicuan ta nichon ñi ra Pedro vatyí soco ra Jesús chi tun ta catyí ra chi ra Jesús:

—Maestro, nyêhe tu higo cha socon, cha na ityi tun —catyí ra.

²² Nacahan ra Jesús, ta catyí ra:

—Chino iñi ndo chi Nyoo.

²³ Vatyí cha ndicha catyí chi ndo vatyí nya nyoho catyí ndo chi yucu ihya, “Na canyaha ta cahun nu tyañuhu”, ta tatu ña chicá uvi iñi ndo, ta chinó iñi ndo, tuhun cahan ndo cua cuví.

²⁴ Yucuan chaha catyí chi ndo vatyí tandihi cha chicán tahvi ndo, ta tatu chinó iñi ndo tyi cha naquehen ndo, tyicuan caa cucuvi.

²⁵ Ta tatu chicán tahvi ndo chi Nyoo ta cuxaán ndo chi inga ñu, saha ndo ticahnu iñi chi ñu, tacuhva vatyí Sutu ndo, ra nyaá andivi, saha tucu maa ra ticahnu iñi cuatyí ndo.

²⁶ Soco tatu ña sahá ndo ticahnu iñi chi ñu, ni ri Sutu ndo, ra nyaá andivi, ma saha ra ticahnu iñi cuatyí maa ndo.

Yóo cha chaha ityi chi ra Jesús vatyí sacuvi ra cha sacuví ra
(Mt. 21.23-27; Lc. 20.1-8)

²⁷ Tyicuan ta nachaa coyo ra Jerusalén. Ta cha niri ca cha chicá noo ra Jesús chichi vehe ñuhu cahnu cuan, catuhva ra cacuví nuu chi tata sutu, ta ra sacuahá cuenda ley, ta ra cacuví mandoñi nu nyaá ra.

²⁸ Ta candaca tuhun ra chi ra.

—¿Yóo cha tyaá tyiño chuun vatyí sacuvun tyehe caa? ¿Yóo cha chaha ityi chuun vatyí sacuvun? —catyí ra.

²⁹⁻³⁰ Ta nacahan ra Jesús, ta catyí ra:

—Cua ndaca tuhun tucu yuhu noo tuhun chi ndo. ¿Yóo cha tachí chi ra Juan vatyí sacondutya ra chi ñáyivi? ¿Atu Nyoo tachí chi ra, o ñáyivi? Tatu catyí ndo chii, tyicuan ta cua catyí tucu yuhu chi ndo yóo cha tyatyíño ihya chii —catyí ra Jesús chi ra.

³¹ Tyicuan ta quichaha cacuvi yuhu maa ra chihin tahan ra ta cacatyí ra:

—Tatu catyí yo tyi Nyoo tachí chi ra Juan, cucatyí ra chi yo: “Tu tyicuan caa, ¿ñáá tuhun ña chino iñi ndo chi ra?”

³² ¿Ta yoso caa catyí yo tyi ñáyivi tachí chi ra? Ma cuví —cacatyí ra, vatyí cayuhví ra chi ñáyivi, vatyí tandihi ñu cachinó iñi ñu vatyí cha ndicha cuenda Nyoo cahan ra Juan.

³³ Tyicuan ta quichaha cacatyí ra chi ra Jesús:

—Ña chitó ndi.

Tyicuan ta ra Jesús catyí ra chi ra:

—Ni yuhu ma catyí chi ndo yóo cha tyaá tyiño chii tyi sacuvi cha sacuví —catyí ra Jesús chi ra.

12

Nu chaha ra Jesús noo cuhva yoso caa cucahñi ñu chi ra
(Mt. 21.33-46; Lc. 20.9-19)

¹ Tyicuan ta chihin cuhva ihya quichaha cahan ra Jesús chihin ra, ta catyí ra chi ra:

—Chiyo noo ra cha tachí ra yoho tichaha ndivi. Ta chasí ra chaha. Ta savahá ra noo nu cuhñi ra tichaha ndivi. Ta savahá ra noo vehe sucun tacuhva vatyí cuví saha ra cuenda tandihi.

‘Yahá cuan ta chahá noo ra ñuhú cuan chi suhva ra casahá tyiño. Ta cuahan ra inga ñuu.

² Ta cha chaꝥ quiví iyó chiti yoho cuan, chitoho ñuhú cuan tachí ra noo musu nu nyicú ra casahá tyiño cuan vatyí cacan ra suhva chiti cha tahán chi chí ra.

³ Soco catiꝥn ra chi ra. Ta cacañí ra chi ra. Ta canatachí ra chi ra chihin nu ndaha nu ndíi ra.

⁴ Tyicuan ta chitoho ñuhú cuan tachí ra chi inga musu, soco chi ra ihya catuchí ra yuu chí ra, catahví ra xiñi ra, ta cacahan uhvi ra chí ra.

⁵ Ta inga tucu musu tachí chitoho ñuhú cuan. Ta chí ra cuan cachahñi ra. Yahꝥ cuan ta tachí ra cuaha ca ra. Soco cacañí ra chí suhva ra. Ta chí suhva ca ra cachahñi ra.

⁶ Ta ndoo noo ri ca ra cha cuví tachi chitoho ñuhú cuan. Ican cuví sehe ra cha cuñí xaan ra. Ta nu ndíhi tachí ra chí sehe ra vatyí cuñí maa ra chicá xiñi ra: “Cucasaha ra ñáyiví chí sehi”, cuñí ra chicá xiñi ra.

⁷ Soco nu chaꝥ sehe ra, ra casahá tyiño cuan catyí ra chí tahan ra: “Ican ra ihya cundoo chíhin tandíhi ihya. Na cahñi yo chí ra, ta ndoo maa yo chihin”, catyí ra.

⁸ Ta tyicuan caa catiꝥn ra chí ra ta cachahñi ra chí ra. Tyicuan ta cachituchi ra coño ñuhu ra ityi chata chacu cuan —tyicuan caa cuhva cahan ra Jesús chíhin ra cuan.

⁹ Tyicuan ta ndaca tuhun ra Jesús chí ra ta catyí ra:

—¿Ñáá cha cusacuvi ra cuví chitoho ñuhú cuan? Cuquichi ra ta cucahñi ra chí ra casahá tyiño cuan. Ta cuhva ra ñuhú cuan chí inga ra.

¹⁰ ¿Atu ta sacuaha ca nyoho nu tutu Nyoo nu catyí chí tyehe caa?

Yuu cha ña cacuñí ra casavaha vehe cotyiño ra, ican cuan cuví yuu cha ñiñi ca.

¹¹ Ican ihya cuví cha sacuví Sutu yo Nyoo.

Ta tyaquí xaan tuhun cha cuenda chí yo, catyí chí nu tutu Nyoo —catyí ra Jesús chí ra cacuví nuu chí tata sutu cuan.

¹² Tyicuan ta canducu ra cuhva cha tyihi ra chí ra Jesús vehe caa vatyí cachitó ra vatyí cahan ra cuhva ihya soco cha cuenda maa ra. Soco vatyí cayuhví ra chí ñáyiví, casandoꝥ ra chí ra, ta cuahan coyo ra.

Nu ndaca tuhun ra chí ra Jesús cha cuenda xuhun cha tavá gobiernu ñuu Roma

(Mt. 22.15-22; Lc. 20.20-26)

¹³ Tyicuan ta catachí ra suhva ra cuenda ra Herodes ta suhva ra fariseo nu nyaá ra Jesús vatyí casacahan ra chí ra ta coo cuatyí catyaa ra siqui ra.

¹⁴ Chaꝥ coyo ra ihya ta quichaha catyí ra chí ra Jesús:

—Maestro, chitó ndi vatyí cahún cha ndicha, ta ña quichahún cha cahán ñáyiví, ta ña natíin cuendon cuhva caa ri ñu. Ta ndicha sañahún ityi Nyoo. Yucuan chaha cuñí ndi coto ndi, ¿atu vaha cha tyiyahvi yo cha chicán gobiernu ñuu Roma chí yo, o ña vaha? ¿Atu tahán chí cha tyiyahvi yo, o ña tahán chí? —cacatyí ra chí ra Jesús.

¹⁵ Soco ra Jesús chitó ra vatyí ñima cha vaha chicá xiñi ra, ta catyí ra chí ra:

—¿Ñáá tuhun cha cuñí ndo sandavi ñaha ndo chii? Nyꝥca ndo noo xuhun chii, na nyehi —catyí ra.

¹⁶ Caquichí nyaca ra chí ra. Ta cuhva cha nanyehꝥ ra ta ndaca tuhun ra chí ra, ta catyí ra:

—¿Yóó chí nuu ihya, ta yóó chí sivi nyaá ihya? —catyí ra chí ra.

Ta canacahan ra ta cacatyí ra:

—Chí gobiernu.

17 Tyicuan ta catyí ra Jesús chi ra:

—Cuhva ndo chi gobiernu cha tahán chi chi ra. Ta cuhva tucu ndo chi Nyoo cha tahán chi Nyoo —catyí ra Jesús chi ra.

Ta iyo cacuñí ra tuhun cha nacahān ra.

Nu canducu tuhun ra saduceo siqui tuhun cha nandotó ndiyi

(Mt. 22.23-33; Lc. 20.27-40)

18 Tyicuan ta cuahan coyo suhva ra saduceo nu nyaá ra Jesús. Ican ra saduceo ihya catyí ra vatyí ña nandotó ndiyi. Yucuan chaha cacahān ra tyehe caa ta catyí ra chi ra Jesús:

19 —Maestro, tyaā ra Moisés tuhun yoso caa tahán chi sacuvi yo tatu noo rayi ta chihí ra ta ndoō ñasihi ra soco ña chicoō sehe ra chihin ña. Catyí ra vatyí tahán chi tandaha yañi ra chihin ñaha cha chihí yí cuan, tacuhva vatyí coo sehe ña cha cuenda ndi yañi ra.

20 Noo chaha chiyo ucha tahan ra chihin yañi ra. Ra cha xihna ri tandaha ra chihin noo ña, ta yori sehe ra chicoō.

21 Ta ra cu uvi tandaha ra chihin ñaha cha ndoō cuan. Ta suri chihí ra. Ta suri yori sehe ra chicoō. Ta tyicuan caa tucu cuví chihin ra cu uñi cuan.

22 Ta tyicuan caa ndi ucha tahan ra tandaha chihin ña. Ta ni noo ra ña cachiyó sehe ra chihin ña. Ta nu ndihi tuhun, chihí ndihi maa ña.

23 Ta vityin, quivi cunandoto ñáyivi, ¿nya ra cucuvi yí ña? Vatyí ndi ucha tahan ra cuan chiyo chihin ña —cacatyí ra chi ra Jesús.

24 Tyicuan ta nacahān ra Jesús ta catyí ra chi ra:

—Nyoho cahán tondo ri maa ndo, vatyí ña chitó ndo cha nyaá nu tutu tuhun Nyoo. Ta ni ña chitó ndo yoso caa tunyee iñi Nyoo.

25 Vatyí quivi cunandoto ndiyi, ni ma tandaha ñu ta ni ma kuhva ñu sehe ñu tandaha, vatyí tari ángel cha nyaá andivi tyicuan caa cucuvi ñu.

26 Ta tuhun cha nandotó ndiyi cuan, ¿atu ta sacuahā ca ndo nu libru ra Moisés yoso caa cahān Nyoo chihin ra nu cayú taca iñu cuan? Ta tyehe caa catyí ra chi ra: “Yuhu cuví Nyoo cuenda ra Abraham, ta cuenda ra Isaac, ta cuenda ra Jacob”, catyí Nyoo chi ra Moisés.

27 Ta cha catyí Nyoo tyicuan caa cuñí chi catyí vatyí vasi cha naha cachihí ra, soco canyitó añima ra vatyí Nyoo ñima Nyoo cuenda ñu ndiyi cuví ra, soco Nyoo cuenda ñu nyitó cuvi ra. Yucuan chaha catyí vatyí nyoho cahán tondo ri ndo —catyí ra Jesús chi ra.

Ley cha niñi ca cha chahā Nyoo

(Mt. 22.34-40)

28 Chaā tucu noo ra sacuahá cuenda ley vehe ñuhu cuan, ta chihí ra cacuvi yuhu ra. Ta vatyí chitó ra vatyí ra Jesús vaha nacahān ra nu cacahan ra yucuan, ta ndaca tuhun ra chi ra ta catyí ra:

—Chichi cha tandihí ley, ¿nya cha niñi ca sacuvi yo? —catyí ra.

29 Ta nacahān ra Jesús ta catyí ra:

—Cha xihna ca sacuvi yo cha nuu tandihí, ican cuví ihya: “Cuiñi ndo ñu Israel. Sutu yo Nyoo, noo ri maa ra iyó.

30 Cuñun chi Sutu yo Nyoo chihin cha ni iñun ta chihin cha tandihí añimon, ta chihin cha tandihí cha chihí tuñi xiñun, ta chihin cha tandihí tunyee iñun.” Ican ihya cuví cha xihna ca cha tahán chi sacuvi yo.

31 Ta cha cu uvi catyí chi: “Cuñun chi tahan tari cuñun chi maun.” Ñahri ca tuhun cha niñi ca ican saha nduvi tahan ihya —catyí ra Jesús.

32 Tyicuan ta ra sacuahá cuenda ley cuan catyí ra chi ra:

—Vaha xaan nacahun, Maestro. Ndicha cha catyún vatyí noo ri Nyoo iyó, ta yori ca Nyoo iyó, noo tuhun ri maa ra.

³³ Ta cha cuñí yo chí Nyoo chihin cha nñi iñi yo ta chihin cha tandihí cha chiñi tuñi xiñi yo, ta chihin cha tandihí añima yo, ta chihin cha tandihí fuerza yo, ta cuñi yo chí tahan yo tari cha cuñi yo chí maa yo, vale ca cuan ta ñima ca tandihí quiti cha chahá yo chí Nyoo cha chahñi yo ta chahmí yo —catyí ra sacuaaha cuenda ley cuan chí ra Jesús.

³⁴ Nyehe ra Jesús vatyí vaha nacahan ra chihin cha cachi xiñi ra. Ta catyí ra chí ra:

—Chiin ri ca cuñi chí ta ñihún cuhva yoso caa nacuhvon añimon chí Nyoo na cunyaca ñaha ra —catyí ra Jesús chí ra.

Ta ni noo ca ñu ña cañá ca iñi ñu candaca tuhun ñu ñáá cha ndaca tuhun ñu chí ra Jesús.

¿Yóo chí tata vachi ra Cristo?

(Mt. 22.41-46; Lc. 20.41-44)

³⁵ Sañahá ra Jesús chichi vehe ñuhu cahnu, ta catyí ra:

—¿Yoso caa cha cacatyí ra sacuahá cuenda ley vehe ñuhu vatyí ra Cristo vachi ra tata ra David?

³⁶ Vatyí suri maa ra David chotyíño Tatyí Ii chí ra ta catyí ra:

Cahan Suti Nyoo chihin Suti ra Cristo, ta catyí ra:

“Cunya chiyó vahi nyacua nya cuhve chí ra xaan iñi chuun vatyí cuaca chahun siqui ra”, catyí Nyoo chihin yuhu ra David ta cha naha.

³⁷ ¿Yoso caa cha ra vachi tata ra David cuví chí ra Cristo, ta suri maa ra David catyí ra vatyí ra Cristo cuví Sutu ra? —catyí ra Jesús.

Ta cuaha xaan ñáyivi nyicú yucuan sií xaan cacuñi ñu chiñi ñu tuhun cahán ra.

Nu catyí ra Jesús vatyí iyó cuatyí ra casacuahá cuenda ley vehe ñuhu

(Mt. 23.1-36; Lc. 11.37-54; 20.45-47)

³⁸ Nu sañahá ra Jesús ta catyí ra tyehe caa:

—Saha ndo cuenda chí ndo chihin ra casacuahá cuenda ley vehe ñuhu, vatyí tahán iñi ra cacuihno ra sahna nañi ta chicá noo ra nuyahvi tacuhva saha ndo ñáyivi chí ra, ta cuhva ndo nocumi chí ra.

³⁹ Maa ra cananducú ra nu vaha ca cunyicu ra chichi vehe ñuhu. Ta nu vaha ca cacuñi ra cachi ra nyayu nu iyó vico.

⁴⁰ Ta ican ra catinyaá vehe ñu chihí yí, vatyí ña cuví tyiyahvi ñu ñáá xuhun tava ra siqui ñu. Ta cuñi ra sacuvaha ra chí ra nuu ñáyivi. Yucuan chaha naha chicán tahvi ra nu tuvi. Maa ra cuví cha cutachi tuñi ca Nyoo chii —catyí ra Jesús.

Noo cha chahá noo ñaha chihí yí

(Lc. 21.1-4)

⁴¹ Noo chaha nyaá ra Jesús chichi vehe ñuhu cahnu yatyin ri nu nyaá chatun nu cumí ñu xuhun cha chahá ñáyivi chí Nyoo. Ta nyehe ra yoso caa tyihí ñáyivi xuhun yucuan. Ta cuaha ñu tyayí chahá ñu cuaha xaan xuhun.

⁴² Tyicuan ta chaá tucu noo ñaha ndahvi chihí yí, ta tyihí ña uvi tahan xuhun cuatyí cha caha xaan nyaá.

⁴³ Tyicuan ta caná ra Jesús chí ra cachicá noo chihin ra, ta catyí ra chí ra:

—Cha ndicha catyí chí ndo vatyí ñaha ndahvi chihí yí ihya, cuaha ca chahá ña ta ñima ca inga ñu catyihí xuhun chiña.

⁴⁴ Vatyí tandíhi ñu cachaha ñu cha ndoo ri ca chí ñu. Soco maa ña chihin cha ndahvi ña chaha ña tandíhi cha cumí ña —catyí ra Jesús.

13

Nu catyí ra Jesús vatyí cutani vehe ñuhu cahnu

(Mt. 24.1-2; Lc. 21.5-6)

¹ Cuhva cha cua quita ra Jesús chichi vehe ñuhu cahnu cuan, noo ra chicá noo chihin ra catyí ra chí ra:

—¡Maestro, nyehé ñana cha tyaqui yuu yihí vehe ihya! ¡Ñana cha nahnu vehe ihya! —catyí ra chí ra Jesús.

² Soco nacahan ra Jesús, ta catyí ra chí ra:

—¿Atu nyehún vehe nahnu ihya? Soco catyí chuun vatyí ma ndoo ni noo yuu coso siqui tahan, vatyí tandíhi cutani —catyí ra Jesús.

Seña cha cucuvi cha ni cumañi ca naa ñáyivi

(Mt. 24.3-28; Lc. 21.7-24; 17.22-24)

³ Tyicuan ta cuahan coyo ra nya yucu yutun Olivo cha nyaá inga chiyo xahva ityi nuu vehe ñuhu cahnu. Ta cuhva cha nyaá ra Jesús yucuan, ra Pedro, ra Jacobo, ra Juan, ta ra Andrés candaca tuhun xehe ra chí ra:

⁴ —Cuñí ndi cha çatyun chí ndi ama cucuvi tandíhi tuhun cha cahun tuhun. ¿Ñáá seña cucuvi tatu cha cua cuvi? —cacatyí ra.

⁵ Nacahan ra Jesús ta catyí ra:

—Saha ndo cuenda chí ndo tacuhva yori sandavi ñaha chí ndo.

⁶ Vatyí cuaha xaan ra cuquichi coyo ra, ta cucotyíño ra sivi ta cucatyí ra: “Yuhu cuví ra Cristo.” Ta cusandavi ñaha ra chí cuaha xaan ñáyivi.

⁷ Soco tatu chiñí ndo tuhun tyi iyó cuatyí ta cañi tahan ñáyivi, ma nayuhvi ndo. Vatyí tyicuan caa tahán chí cucuvi, soco ta chaa ca quívi cunaa ñáyivi.

⁸ Vatyí noo ñuu cucañi tahan chí chihin inga ñuu, ta ñáyivi cuenda noo gobiernu cucañi tahan ñu chihin ñáyivi cuenda inga gobiernu. Ta cucoo cha taan nahnu cuaha ri ityi. Ta cucoo tama. Ta cunaquiqui ñáyivi. Ta tyehe caa cua quichaha cha nyehe ñáyivi tindoho.

⁹ Soco saha ndo cuenda chí ndo. Vatyí cucuhva cuenda ñu chí ndo chí ra cacuví tyiño. Ta cucañi ñu chí ndo chichi vehe ñuhu. Cucuhva cuenda ñu chí ndo nuu gobernador ta nuu rey cha cuenda yuhu. Ta tyicuan caa cuví cahan ndo tuhín nuu ra.

¹⁰ Vatyí cha ni cumañi ca naa ñáyivi, cuñí chí cucutya tuhun Nyoo yoso caa sacacú ra añima ñáyivi tandíhi ñuu.

¹¹ Ta cuhva cha cunyaca ñu chí ndo nuu ra cacuví tyiño, ma caca xiñi ndo ñáá tuhun cucahan ndo, ni ma ndichi xiñi ndo. Cahan ndo cha catyí Nyoo chí ndo cha cahan ndo cuhva cuan. Vatyí ñima nyoho cucahan, soco maa Tatyí Ii Nyoo.

¹² Yihí ra cunacuhva cuenda ra nyacua nya chí yañi maa maa ra. Ta sacuvi ra na cacahñi ñu chí ra. Ta yihí ñáyivi cunacuhva cuenda ñu chí sehe ñu. Ta yihí ñu cunaquiqui ñu siqui sutu ñu ta sihi ñu. Ta cunacuhva cuenda ñu chí ñu na cahñi ra chí ñu.

¹³ Tandíhi ñáyivi cutasi cuñi nyehe ñu chí ndo cha cuenda yuhu. Soco tatu cunyeé iñi ndo nyacua nya nu ndíhi, cucacu ndo.

¹⁴ Ra Daniel, ra profeta Nyoo ta cha naha, tyaá ra yoso caa cuahan tuhun noo cha cusacaquíni nu ii xaan. Ta cusatívi chí tandíhi. Tatu nyehé ndo

nanyaá yucuan nu ña tahán chi cuinanyaa, (nyoho cha sacuahá ndo ihya na cutuñi ñni ndo) cuñi chi cha cono tandihí ñu iyó Judea nya ityi yucu.

¹⁵ Ta ñu ñohó xiñi vehe quiví cuan, noo ñu, soco ma quihvi ñu chichi vehe ñu tava ñu ñáá cha tava ñu.

¹⁶ Ta ñu ñohó nu chiquí, ma cunuhu ñu nya vehe ñu cha cunaquehen ñu sahma ñu.

¹⁷ ¡Ndahvi ñusihí cha cañohó sehe quiví cuan! ¡Ndahvi tucu cuví ñusihí cha chaxín sehe quiví cuan!

¹⁸ Çacan ndo chi Nyoo tacuhva cha ma tahan chi caca cono ndo quiví vichin.

¹⁹ Vatyí quiví tindoho cucuvi. Ta ni noo chaha ta cuví ca tyicuan caa nyata quiví chinq ñuhu ñayiví nyacua nya vityin. Ta ni ma coo ca tindoho tahán ihya nu cuahan ca chí.

²⁰ Tyehe ta ma sanducuiti Sutu Mañi yo tyembu cuan, yori maa cucacu. Soco cusanducuiti ra cha cuenda cha cuñi ra chí ñu cuenda ra, ñu cha nacachí maa ra.

²¹ Tatu yóo cha catyí chi ndo: “Nyehé ndo, ma ra Cristo ihya” o “Nyehé, ma ra nyaá yucuan”, ma chino ñni ndo.

²² Vatyí cuquichi ra casandaví ñaha, cucatyí ra tyi ra Cristo cuví ra. Ta yihí ra cucatyí ra vatyí profeta Nyoo cacuví ra. Ta cucasavaha ra seña, milagru, vatyí canducú ra cuhva sandaví ñaha ra nyacua nya chí ñu cha nacachí maa Nyoo tatu cuví chí ra.

²³ Soco saha vaha ndo cuenda vatyí yuhu cha sacote chí ndo cha ni cumañi ca cuví tyicuan caa —catyí ra Jesús.

*Nu sacote ra Jesús yoso caa cuquichi tucu ra inga chaha
(Mt. 24.29-35, 42-44; Lc. 21.25-36)*

²⁴ Ta catyí tucu ra Jesús tyehe caa:

—Soco quiví cha yaha tindoho, cunduñaa ñanyii. Ma cundichin ca yoo.

²⁵ Tiñoo cunacoyo andiví. Ta nyacua nya tandihí cha iyó andiví ta cunacanda.

²⁶ Tyicuan ta cunyehe ndo chí yuhu Rayi cha quichí nya gloria inga chaha, vachí nu vico chihin cha ndicha ñuhu Nyoo, ta chihin cha cahnu cuví ra.

²⁷ Tyicuan ta cutachi chí ángel ta cusandu ñn ri chí ñu nacachí ñicahnu siqui ñuhu ñayiví, nyacua nya nu ndihí ñuhu ñayiví ta nyacua nya nu ndihí andiví.

²⁸ Cutuñi ñni ndo cuhva tu higo ihya: Tatu nduyutya soco tun ta caña numa tun cha chitó ndo vatyí cha cuñi chaa quiví coo chiti, cha vachi vico savi.

²⁹ Ta suri tyicuan caa tatu cha nyehe ndo tuhun ihya, çoto ndo tyi cha nyaña yatyin quiví quichi tiquí. Cha nyañai yuvehe cuví cuan.

³⁰ Cha ndicha catyí chí ndo vatyí tandihí ihya cucuvi cha ni ri ca cha iyó ñáyiví.

³¹ Tyicuan ta cunaa andiví ta ñuhu ñayiví cha iyó cha vityin. Soco tuhun cahín tyicuan ri cucuvi tari cuhva catyí.

³² Soco yori chitó ñáá quiví ta ñáá cuhva cucuvi tandihí ihya, ni ángel Nyoo, ni yuhu Sehe Nyoo. Noo tuhun ri maa Nyoo Suti cuví ra chitó.

³³ Yucuan chaha çonyito vaha ndo, ta saha ndo cuenda ta çacan tahvi ndo, vatyí ña chitó ndo ñáá quiví cuchaa cuhva.

³⁴ Tari noo ra cha cua cuhun nu cañi. Ta cha ni cumañi ca cuhun ra, chaha cuenda ra vehe ra chí musu ra. Ta chaha ra tyiño chí noo noo ra. Ta tachí ra chí ra sahá cumi yuvehe cuan na saha ra cuenda.

³⁵ Yucuan chaha nyoho conyito ndo vatyi ña chitó ndo ñáá cuhva cuquichi ra cha cuví tari chitoho vehe cuan, an cha ni cua cuaa, an ñuu, an cuhva cha cacú chaa loho, an cha ñaha ri.

³⁶ Conyito ndo coto sana iñi ndo ta quichi ra, ta nañihi ra chi ndo quixí ndo.

³⁷ Cha catyí chi nyoho, catyí tiqui chi tandihi ñáyivi ñandihí. Na conyito ñu.

14

Nu canducu ra cuhva cati:n ra chi ra Jesús
(Mt. 26.1-5; Lc. 22.1-2; Jn. 11.45-53)

¹ Uvi ca quiví cumañi ta cua tahan chi vico cha nañi pascua ta vico cha tuhva ñu chachí ñu pan cha ñahri yuchan iya yihí. Ta ra cacuví nuu chi tata sutu ta ra casacuahá cuenda ley vehe ñuhu canducú ra cuhva cati:n xehe ra chi ra Jesús ta cacahñi ra chi ra.

² Soco cacatyí ra chi ra tahan ra:

—Ma tñin yo chi ra cha chichi vico vityin coto naquiqui ñáyivi —cacatyí ra.

Nu choso noo ñaha sihi ndutya vixi chahán chi ra Jesús
(Mt. 26.6-13; Jn. 12.1-8)

³ Ñohó ra Jesús ñuu Betania vehe ra Simón, cha catyí ñu: “Simón ra cha tyahyu coño.” Ta cha ni ri ca cha nyaá ra mesa, chaḡ noo ñaha sihi ndaha ña noo yutyi cha chingḡ chihin noo yuu cha nañi alabastro. Tyitu yihí chihin ndutya vixi chahán cha nañi nardo. Ta yahvi vavaha nyaá. Ta tahvḡ ña yutyi cuan ta choso ña ndutya vixi chahán cuan xiñi ra Jesús.

⁴ Soco suhva ra canyicú yucuan cacuxaan ra ta cacatyí ra chi tahan ra:

—¿Ñáá tuhun sativí ña ndutya vixi chahán cuan?

⁵ Tyehe ta quiyahvḡ cuan, cuenda mil cuñihi yo chihin chi, ta tyinyee chi chi ñu ndahví —catyí ra.

Ta cahán ra chi ña.

⁶ Soco ra Jesús catyí ra:

—¡Saña ndo chi ña! ¿Ñáá tuhun cha sayangá ndo chi ña? Cha choso ña chii tyehe caa, cha vaha cuví.

⁷ Vatyi ñu ndahvi tyicuan ri cua cunyaa ñu chihin ndo, ta cuví sacuvi maa ndo cha vaha chihin ñu ñáá ri quiví cuñi ndo. Soco yuhu ñima tyicuan ri cua cunyai chihin ndo.

⁸ Ñaha sihi ihya sacuvḡ ña yoso cuhva cha cuvḡ chi ña. Choso ña ndutya vixi chahán coño ñuhi, cha ni cumañi ca cucúvi ta quihvi chichi ñuhu.

⁹ Cha ndicha catyí chi ndo, vatyi tandihi ri nicahnu ñuhu ñayivḡ nu cahan ñu tuhun Nyoo, cunacatyí tucu ñu tuhun cha sacuvḡ ñaha ihya, tacuhva nichon iñi ñáyivi tuhun ña —catyí ra Jesús.

Nu nacuhva cuenda ra Judas chi ra Jesús chi ra xaan iñi chi ra
(Mt. 26.14-16; Lc. 22.3-6)

¹⁰ Yahḡ cuan ta ra Judas Iscariote, noo ra chichi cha uchi uvi tahan ra cachicá noo chihin ra Jesús, chahán ra chindatuhun ra chihin ra cacuví nuu chi tata sutu, vatyi casandaa ra noo tyiño ta nacuhva cuenda ra chi ra Jesús chichi ndaha ra.

¹¹ Cuhva cha chachiñi ra ihya, cusii xaan cacuñi ra, ta catyí ra vatyi cuhva ra xuhun chi ra. Tyicuan ta quichahḡ nducu ra Judas cuhva nacuhva cuenda ra chi ra Jesús.

*Nu cuxiñi ra Jesús chihin ra cachicá noo chihin ra
(Mt. 26.17-29; Lc. 22.7-23; Jn. 13.21-30; 1 Co. 11.23-26)*

¹² Cuví chi quivi quichaha vico cha chachí ñu pan cha ñahri yuchan iya yihí. Yucuan quivi cha vico pascua tuhvá ñu chahñi ñu mbee luhlu cha chahá ñu chi Nyoo. Ta ra cachicá noo chihin ra Jesús candacá tuhun ra chi ra, ta cacatyí ra:

—¿Nya maa maa cuñún cha sanduvaha ndi cha cuxiñun cha vico ihya?

¹³ Tyicuan ta tachí ra chi uvi tahan ra ta catyí ra chi ra:

—Cuahan ndo chichi ñuu, ta yucuan cunañihi ndo chi noo ra cha nyisó noo quivi ndutya. Cuahan ndo chafa ra.

¹⁴ Ta nu quihvi ra, catyí ndo chi ra cuví chitoho vehe yucuan tyehe caa: “Ra Sacuaha cuñi ra coto ra nya nyaá cuarto nu cusanducahnu ra vico chihin ra cachicá noo chihin ra”, catyí ndo chi ra.

¹⁵ Ta maa ra cusañaha ra noo cuarto cahnu nu piso sucun chi ndo. Cha yaha nduvii, ta yucuan cusanduvaha ndo cha cuxiñi yo —catyí ra Jesús chi ra.

¹⁶ Cuahan coyo ra. Ta chaá coyo ra chichi ñuu. Canañihí ra tari cuhva catyí ra Jesús chi ra, ta casanduvahá ra cha cuxiñi ra cha vico pascua cuan.

¹⁷ Ta cha cuaa cuan chaá ra Jesús chihin ndi uchi uvi ra chicá noo chihin ra.

¹⁸ Ta cuhva cha canyicú ra nu mesa cachachí ra, ra Jesús catyí ra:

—Cha ndicha catyí chi ndo vatyi noo nyoho cha chachí ndo chihin cunaxico tuhun ndo chii.

¹⁹ Tyicuan ta canducuihya ñi ra ta quichaha candacá tuhun tahan tahan ri ra chi ra, ta cacatyí ra:

—¿Atu yuhu?

²⁰ Ta nacahan ra Jesús ta catyí ra:

—Noo ra chichi cha uchi uvi ndo. Ra cha satyii pan ñn ri nu coho chihin, ican ra cuan cuví.

²¹ Vatyi yuhu Rayi cha quichí nya gloria cucuvi chii tari cuhva catyí nu tutu tuhun Nyoo. Soco jndahvi ra ndahvi ra naxicó tuhun chii! Vaha taxin ca cha cuenda ra, tyehe ta ña cacú ra —catyí ra Jesús.

²² Cha ni ri ca cha cachachí ra, ra Jesús quehen ra pan ta nacuhva ra tyahvi nyoo chi Nyoo. Ta tahví ra ta chahá ra chí tandihí ca ra, ta catyí ra:

—Quehen ndo. Ican ihya cuví coñe —catyí ra chi ra.

²³ Yaha cuan ta quehen ra vaso vinu. Ta cha yaha cha nacuhva ra tyahvi nyoo chi Nyoo, chahá ra chi ra. Ta tandihí ra cachiñi ra cha ñohó chichi vaso cuan.

²⁴ Ta catyí ra chi ra:

—Vinu cha yihí chichi vasu ihya tari ñiñi cuví. Ta chihin ñiñi tyihí tahan Nyoo tuhun chaa chihin ndo vatyi cucatí cha cuenda cha vaha chí cuaha ñáyivi.

²⁵ Cha ndicha catyí chi ndo vatyi ma coho que vinu nyacua nya quivi nachai nu nyacá ñaha Nyoo ta cohi vinu chaa —catyí ra Jesús chi ra.

*Nu catyí ra Jesús tyi cucatyí ra Pedro tyi ña ñohó nuu ra chi ra
(Mt. 26.30-35; Lc. 22.31-34; Jn. 13.36-38)*

²⁶ Cha yaha cha cachitá ra yaa, ta caquitá ra cuahan coyo ra nya yucu yutun Olivo.

²⁷ Tyicuan ta catyí ra chí tandihí ra:

—Tandihí nyoho cusandoo notuhun maa ndo chii vityin cha cuaa. Vatyí catyí chi nu tutu tuhun Nyoo tyehe caa: “Cucahñi chi ra sahá cumi mbee, ta mbee cacacono ti ityi cuan ityi ihya”, catyí chi.

²⁸ Soco cha yaha cha nandote, xihna que cuhun ityi Galilea ican saha nyoho —catyí ra Jesús chi ra.

²⁹ Tyicuan ta quichaha catyí ra Pedro chi ra:

—Vasi tandihí ra sandoo ra chuun, soco yuhu ma sandoi chuun —catyí ra chi ra Jesús.

³⁰ Soco ra Jesús catyí ra chi ra:

—Cha ndicha catyí chuun, vatyí suri maa cha cuaa ihya, cha ni cumañi ca cuacu loho uvi chaha, yoho cucatyun tyi ña ñohó nuun chii uñi chaha —catyí ra Jesús chi ra Pedro.

³¹ Soco saniñi ra Pedro ta catyí ra:

—Vasi cúvi chuhun, soco ma tixehi cha ñohó nui chuun —catyí ra Pedro.

Ta tandihí ra cacatyí ra tyicuan caa.

Nu chican tahvi ra Jesús nu cuví Getsemaní

(Mt. 26.36-46; Lc. 22.39-46)

³² Tyicuan ta cachaa coyo ra noo nu nañi Getsemaní. Ta ra Jesús catyí ra chi ra cachicá noo chihin ra:

—Cunyicu ndo ihya ni ri cuhin cucacan tahvi —catyí ra Jesús.

³³ Ta quehen ra chi ra Pedro, ta ra Jacobo ta ra Juan cuahan chihin ra. Ta quichaha chica xaan iñi ra ta cutyoño cuñi ra.

³⁴ Ta catyí ra chi ra:

—Tuví iñi añime noo tucuihya iñi, ta cuñi cahñi chi chii. Ndoo nyoho ihya, ta conyito ndo —catyí ra.

³⁵ Tyicuan ta cuahan ra chiin ca ityi nuu ca. Ta chicuiñi chiti ra nu ñuhú. Ta chican ra chi Nyoo tatu cuví cha ma nyehe ra tindoho cha cua cuví chi ra cuhva cuan, catyí ra chicán tahvi ra.

³⁶ Ta nu chicán tahvi ra, ta catyí ra:

—Sutu Mañi yuhu, cha cuenda yoho ñahri cha ma cuví chuun. Tu yoho ta cuñún na canyaha tindoho ihya chii. Soco ma cuví tari cuhva cha cuñi mai, soco cuhva cha cuñi maun na cuví —catyí ra Jesús chicán tahvi ra.

³⁷ Yahá cuan ta nachaa ra nu nyicú ra. Ta nyehe ra tyi caquixí ra. Ta catyí ra chi ra Pedro:

—Yoho Simón, ¿atu quixún? ¿Atu ña cuví conyiton ni noo hora?

³⁸ Conyito ndo ta caçan tahvi ndo tacuhva cha ma sanacava ra ña vaha chi ndo nu cuatyí. Cha ndicha, cuñi añima ndo sacuvi ndo cha vaha, soco coño ñuhu ndo vita xaan cuñi chi —catyí ra Jesús chi ra.

³⁹ Tyicuan ta cuahan ra inga chaha. Ta chican tahvi ra suri maa cha chican ra cha xihna ri.

⁴⁰ Tyicuan ta nachaa tucu ra inga chaha, nyehe ra tyi caquixí ra. Vatyí nicunyasi maa chiti nuu ra chihin cha cacuñi xaan ra cusu ra. Ta ña cachitó ra ñáá cha nacahan ra chihin ra Jesús.

⁴¹ Ta chahan ra cha cu uñi chaha, ta nachaa ra, ta catyí ra:

—Vityin ndicha cusu ndo, nyitatu ndo. Cha iyó vaha ri vityin, cha chaq cuhva cha cucuhva cuenda ra chi yuhu Rayi cha quichi nya gloria ndaha ra ca iyó cuatyí.

⁴² Ndícuíta ndo, cōho ndo. Cha vachi ra naxicó tuhun chii —catyí ra Jesús chi ra.

*Nu catiñ ra chi ra Jesús
(Mt. 26.47-56; Lc. 22.47-53; Jn. 18.2-11)*

⁴³ Ni cahán ca ra Jesús ta chaḡ ri ra Judas, noo ra chichi cha uchi uvi tahan ra chicá noo chihin ra. Ta cuaha sindaro ta policíá vachi coyo chihin ra canyisó ra mityi ta yutun. Vachi coyo ra cuenda ra cacuví nuu chi tata sutu, ta ra casacuaaha cuenda ley vehe ñuhu, ta cuenda ra mandoñi.

⁴⁴ Cha ni cumañi ca cachaa coyo ra, ra Judas, ra cha naxicó tuhun chi ra, chahaḡ ra noo seña chi ra ta catyi ra:

—Ra cha tyayuhi, ican ra cuan cuví. Tñin vaha ndo chi ra na cuhun ra chihin ndo.

⁴⁵ Ta cuhva cha chaḡ ra tuhvaḡ ra nu nyaá ra Jesús ta catyi ra chi ra:

—Maestro.

Ta tyayuhuḡ ra xitiñ ra.

⁴⁶ Tyicuan ta catiñ ra chi ra Jesús ta cuahan ra vehe caa.

⁴⁷ Soco noo ra cha nyaá yucuan tavḡ ra mityi ra ta chahnyaḡ ra soho musu ra cuví nuu chi tata sutu.

⁴⁸ Tyicuan ta ra Jesús catyi ra chi ra cachaa coyo cuan:

—¿Atu vachi tiñ ndo chii chihin mityi ta chihin yutun, tari cha vatyi cuví yuhu noo ra suhu?

⁴⁹ Ndi quivi chinyaj chihin ndo sañahí chichi vehe ñuhu cahnu cuan. Ta ni noo chaha ña tiñ ndo chii. Soco cuví chi tyehe caa vityin, tacuhva chino cava tari cuhva catyi nu tutu tuhun Nyoo —catyi ra Jesús chi ra.

⁵⁰ Tyicuan ta tandihí ra cachicá noo chihin ra, cachinḡ ra ta casandoḡ noo tuhun maa ra chi ra Jesús.

⁵¹ Soco noo ri ca ra tyivaa nyicón ra chi ra, ndichí ra noo sinduhu ta catiñ tucu ra chi ra.

⁵² Soco sandoḡ ra sinduhu cuan ta cuahan vavaha ra vityiaa vityi cañi ra.

*Nu cutuñi chi ra Jesús nuu ra cuví tyiño
(Mt. 26.57-68; Lc. 22.54-55, 63-71; Jn. 18.12-14, 19-24)*

⁵³ Tyicuan ta cachinyacaḡ ra chi ra Jesús nuu ra cuví nuu chi tata sutu, ta candu iñ ri tandihí ra chihin ra cacuví mandoñi, ta ra casacuahá cuenda ley vehe ñuhu.

⁵⁴ Ta ra Pedro cuahan ra chata ra nya sava ri, nyacua nya nuquehe vehe ra cuví nuu chi tata sutu cuan. Ta ndoḡ ra nyaá ra chihin policíá sanasaá ra chi ra yatyin yunuhu.

⁵⁵ Ra cacuví nuu chi tata sutu, ta tandihí ra cuví tyiño canducu ra ñáá noo cuatyí tyaa ra siqui ra Jesús, tacuhva cuví cacahñi ra chi ra soco ña cañihí maa ra.

⁵⁶ Vasi cuaha ñáyivi cahḡn ñu cuendu siqui ra, soco ña nacachí tahan tuhun cahán ñu.

⁵⁷ Yihí ñu candicuitḡ ñu ta catyaaḡ ri maa ñu cuendu siqui ra, ta cacatyí ñu:

⁵⁸ —Nyuhu chihí ndi cha cahḡn ra vatyi cusatani ra vehe ñuhu cahnu cha savahaḡ ñáyivi. Ta chichi cha uñi quivi cunacananyyaa ra inga vehe ñuhu cha ñima ñáyivi savaha, na —catyi ñu.

⁵⁹ Soco ni tyicuan caa ña nacachí tahan cha catyi ñu.

⁶⁰ Tyicuan ta ra cuví nuu chi tata sutu ndicuitḡ ra mahñu nu nyicú tandihí ra yucuan, ta quichahaḡ ndaca tuhun ra chi ra Jesús, ta catyi ra:

—¿Atu ña nacahan maun? ¿Ñáá cha cuví ihya cha cacahán ra sicun? —catyi ra chi ra.

61 Soco ra Jesús taxi ri nanyaá ra, ta ña nacahan maa ra. Ta ra cuví nuu chi tata sutu cuan ndacā tuhun ra chi ra inga chaha, ta catyí ra:

—¿Atu yoho cuvún Cristo, Sehe Nyoo ra cha iyó cha vaha chí?

62 Ra Jesús catyí ra chi ra:

—Ican, yuhu cuví. Ta nyoho cunyehe ndo chi yuhu Ray# cha quichí nya gloria, cucunyai chiyo vaha Nyoo ra cha iyó tandihí tunyee iñi chí. Ta cunyehe ndo chíi qui# qui# qui# nu vico andivi —catyí ra chi ra.

63 Tyicuan ta ra cuví nuu chi tata sutu cuan, chahnyá ra sahma ra tari noo seña vatyí ña tahán iñi ra, ta catyí ra:

—¿Ñáá ca cha ndaa cuñí yo?

64 Nyoho cha chiñi ndo vatyí chicoō cuatyí ra nuu Nyoo chihin tuhun cahán ra. ¿Yoso caa cuñí nyoho? —catyí ra.

Ta tandihí ra cacatyí ra vatyí tahán chi cúvi ra.

65 Tyicuan ta suhva ra quichaha tyicu si# ra chi ra. Ta chasi# ra nuu ra, ta cañi ra chi ra chihin chíqui ra ta cacatyí ra chi ra:

—¡Nacoto yóo cha cañi chuun! —cacatyí ra chi ra.

Ta policía cacatu ra nuu ra.

*Nu catyí ra Pedro vatyí ña ñohó nuu ra chi ra Jesús
(Mt. 26.69-75; Lc. 22.56-62; Jn. 18.15-18, 25-27)*

66 Ra Pedro nyaá ra ityi yuvi nuquehe. Tyicuan ta chaq̄ noo ñaha sahá tyiño chihin ra cuví nuu chi tata sutu cuan.

67 Ta cuhva cha nanyehe ña chí ra Pedro vatyí sanasaá ra chí ra yunuhu cuan, ndoo ña nyehé vavaha ña chí ra, ta catyí ña chí ra:

—Yoho ñandihí, chicá noun chihin ra Jesús ra ñuu Nazaret cuan —catyí ña chí ra.

68 Soco ra Pedro tixehe ra, ta catyí ra:

—Ña ñohó nui chí ra, ña chité ñáá tuhun cahún —catyí ra chí ña.

Tyicuan ta quitá ra ityi yuvehe. Tyicuan ta chacu noo loho.

69 Tyicuan ta ñaha cha nyaá tyiño yoo cuan, nanyehe tucu ña chí ra inga chaha ta quichaha catyí ña chí ra canyicú yucuan:

—Noo ra tahan ra cuan cuví ra ihya —catyí ña.

70 Soco tixehe ra inga chaha. Ta yaha suhva ri ca cuhva ta ra canyicú yucuan cacatyí tucu ra inga chaha chí ra Pedro:

—Cha ndicha vatyí noo ra yucuan cuví yoho, vatyí ra Galilea cuvún, vatyí tari cahán ñu, cahún —catyí ra chí ra.

71 Tyicuan ta iyo xaan tyanaha ra Pedro, ta catyí ra:

—¡Chitó vaha Nyoo tyi ña ñohó nui chí ra cha cahán nyoho tuhun! ¡Na cahñi Nyoo chíi tatu ña ndicha cha cahán! —catyí ra.

72 Ta caa cuhva ri cuan chacu ri loho cha cu uvi chaha. Tyicuan ta nichohon iñi ra Pedro tuhun cha cahán ra Jesús chihin ra: “Cha ni cumañi ca cuacu loho uvi chaha, yoho cucatyun vatyí ña ñohó nuun chí yuhu uñi tahan chaha.” Nichohon iñi ra Pedro ta quichaha chacu chaa ra.

15

*Nu nanyaá ra Jesús nuu ra Pilato
(Mt. 27.1-2, 11-14; Lc. 23.1-5; Jn. 18.28-38)*

1 Cuhva cha cundichin candu #n ri ra cacuví nuu chi tata sutu chihin ra cacuví mandoñi ta chihin ra casacuahá cuenda ley vehe ñuhu ta tandihí ra

cuví tyiño ñu Israel. Ta ra Jesús nuhñí ra, chinacuhva cuenda ra chi ra chi ra Pilato.

²Ta ndaca tuhun ra Pilato chi ra, ta catyí ra:

—¿Atu rey cuenda ñu Israel cuví yoho?

Ta nacahan ra Jesús ta catyí ra:

—Ican, yuhu cuvi. Ndicha cha cahún.

³Ta ra cacuví nuu chi tata sutu cuaha xaan cha catyaa ra siqui ra.

⁴Tyicuan ta quichaha ndaca tuhun tucu ra Pilato inga chaha chi ra, ta catyí ra:

—¿Atu ña nacahan maun? Nyehe yoso cha cuaha cha tyaá ra sicun.

⁵Soco ra Jesús ña nacahan maa ra. Yucuan chaha ña chitó ra Pilato ñáa cha caca xiñi ra.

*Nu cutuñí chi ra Jesús vatyí cucúvi ra
(Mt. 27.15-31; Lc. 23.13-25; Jn. 18.38—19.16)*

⁶Ta vico cuan tuhvá ra Pilato saña ra chi noo ra ñohó vehe caa, noo ra cha cacan maa ñáyivi.

⁷Ta ñohó noo ra nañí Barrabás vehe caa cuan, ñin ri chihin inga ra cha cachahñí chi ñáyivi noo nu naquiquí ñáyivi siqui gobiernu.

⁸Ta quichí coyo ñáyivi quichaha chican ñu chi ra Pilato na saña ra chi noo ra tari tuhvá maa ra.

⁹Ta nacahan ra Pilato, ta catyí ra:

—¿Atu cuñí nyoho cha sañe chi Rey cuenda ñu Israel?

¹⁰Tyicuan caa catyí ra vatyí tuví ñi ra vatyí ra cacuví nuu chi tata sutu cuan tasi cuñí ra chi ra Jesús tyí cuaha ñáyivi nyicón chi ra, yucuan chaha nacuhva cuenda ra chi ra.

¹¹Soco ra cacuví nuu chi tata sutu cuan catyiyuhú ra chi ñáyivi na catyí ñu na saña ra chi ra Barrabás.

¹²Tyicuan ta ndaca tuhun ra Pilato chi ñu, ta catyí ra:

—¿Ta ñáa cha cuñí ndo sacuvi chihin ra cha catyí nyoho Rey cuenda ñu Israel chí? —catyí ra chi ñu.

¹³Tyicuan ta nacanachaá ñu, ta catyí ñu:

—¡Na cúvi ra nu cruzi! —catyí ñu, canachaá ñu.

¹⁴Ta catyí ra Pilato chi ñu:

—Soco ¿ñáa cha ña vaha sacuví ra? —catyí ra.

Soco canachaá ca ñu ta catyí ñu:

—¡Na cúvi ra nu cruzi! —catyí ñu.

¹⁵Tyicuan ta vatyí cuñí ra Pilato cuvaha ra nuu ñu, saña ra chi ra Barrabás. Tyicuan ta tyihí ra tyiño na ndoho ra Jesús, ta cha yaha cuan chaha cuenda ra chí ra vatyí cúvi ra nu cruzi.

¹⁶Tyicuan ta chinyaca sindaro chi ra nuquehe vehe tyiño cuan. Ta casandu ñin ri ra tandihí sindaro.

¹⁷Ta casacuihño ra noo sahna tyacu nyaa chí ra. Ta caquicu ra noo corona chihin iñu. Ta catyihí ra xiñi ra.

¹⁸Yaha cuan ta quichaha cacana chaa ra siqui ra chacú nyaa ra chí ra, ta catyí ra:

—¡Nocumi chuun, yoho Rey cuenda ñu Israel! —catyí ra.

¹⁹Ta cacañi ra xiñi ra chihin noo yutun, ta tyicú si ra chí ra. Ta cachicuiñí chíti ra casaha ra tyí sacahnu ra chí ra.

20 Cha yaha cha chacu nyaa ra chi ra tyicuan caa, tinyaa ra sahma nyaa cuan chi ra, ta sandihvi noo ra sahma maa ra chi ra. Yaha cuan ta cuahan ra chihin ra vatyi cuatyaa ra chi ra nu cruzi.

Nu cuacúvi ra Jesús nu cruzi

(Mt. 27.32-44; Lc. 23.26-43; Jn. 19.17-27)

21 Yahá noo ra ñuu Cirene, nañi ra Simón. Sutu ra Alejandro ta ra Rufo cuví chi ra. Ni cua nachaa ra cha chahan ra nu chiqui. Ta cuhva cha cua yaha ra ityi cuan, casaniñi sindaro chi ra na cuiso ra cruzi ra Jesús.

22 Ta cachinyaca ra chi ra Jesús noo nu nañi Gólgota. Ta cuñi chi catyi: Nu Cuví Yiqui Xiñi Ndiyi.

23 Ta cachaha ra vinu nasaca chihin noo tatan cha nañi mirra coho ra. Soco ra Jesús ña chihí ra.

24 Cha yaha catyaa sindaro chi ra nu cruzi, cachahan ra sihva chihin sahma ra ta nya ra saha ganaa caquehen ra sahma ra.

25 Caa iin cha ñaha ri catyaa ra chi ra nu cruzi.

26 Ta letra cha catyaa ra xiñi cruzi cuan, catyí chi ñáa cuatyí ra. Ta catyí chi tyehe caa: “Ican ra ihya cuví Rey cuenda ñu ñuu Israel.”

27 Ta chinanyaa ra uvi ca cruzi nu chitaca ra uvi tahan ra suhu, noo ra chiyo vaha ra, ta inga ra chiyo satyin ra.

28 Ta tyicuan caa quita chi tari cuhva catyí nu tutu tuhun Nyoo tyehe caa: “Sahá ñu tuhun tyi cuví ra noo ra quiñi iyó.”

29 Ta ñu yahá coyo chacú nyaa ñu chi ra. Ta quisí xiñi ñu, ta catyí ñu chi ra: —Jaan! ¡Yoho cha catyun tyi cusatanun vehe ñuhu cahnu, ta chichi cha uñi quivi cunacoñehun inga chaha!

30 ¡Sacacu maun chuun ta noo nu cruzi chiña! —catyí ñu.

31 Ta tyicuan caa tucu ra cacuví nuu chi tata sutu ta ra casacuaha cuenda ley vehe ñuhu, cachacú nyaa ra chi ra, ta catyí ra chi tahan ra:

—¡Chi inga ñu sacacu ra, soco ña cuví sacacu ra chi maa ra!

32 Na noo ra nu cruzi vityin, na nyehe yo ta chino iñi yo tyi Cristo Rey cuenda ñu Israel cuví ra —catyí ra.

Ta nyacua nya ra tacaá inga cruzi inchiyo inchiyo xiin ra ta cacahan ra chi ra.

Nu chihí ra Jesús

(Mt. 27.45-56; Lc. 23.44-49; Jn. 19.28-30)

33 Cuhva cha cua cu hora, tandihí ñuhu ñayivi nduñaa, nyacua nya caa uñi cha cha iñi.

34 Ta suri cuhva cuan canachaa ra Jesús chihin tandihí fuerza ra, ta catyí ra:

—Eloi, Eloi, ¿lama sabactani? —ta cuñi chi catyí: Nyoo Suti, Nyoo Suti, ¿ñáa tuhun sandoo noo tuhun maun chii? —catyí ra.

35 Suhva ra tayucu yucuan cachiñi ra ta catyí ra:

—¡Xihna! Caná chaa ra chi ra profeta Elías —catyí ra.

36 Tyicuan ta chingo noo ra yucuan chiquehen ra noo tari caa xixan ta satyij ra chihin vinu iya. Ta tyaá ra noo nu yutun ta satuhva ra yuhu ra na coho ra, ta catyí ra:

—Cuatu ndo. Na nyehe yo tatu quichi ra Elías sanoo ra chi ra —catyí ra cuan.

37 Tyicuan ta ñihi xaan canachaa ra Jesús, ta chihí ra.

38 Ta sahma cha tacaá chichi vehe ñuhu cahnu ndata sava maa chi, nya siqui ta nyacua nya ityi yuvi.

³⁹ Ta noo capitán cuenda sindaro Roma nanyaá ra yatyin nuu ra Jesús cuan. Cha nyehē ra yoso caa canā chaa ra, ta yoso caa chihī ra, ta catyí ra:

—Cha ndicha ndicha cuii vatyí Sehe Nyoo cuví chi ra ihya —catyí ra.

⁴⁰ Ta nya sava ri tayucú tucu suhva ñusihī canyehē ñu. Ta mahñu ñu cuan nanyaá cu María ñaha Magdala, ta cu María sihi ra José ta ra Jacobo ra tyivaa ca. Ta nanyaá tucu cu Salomé.

⁴¹ Ican ñusihī ihya cachinyicōn chi ra Jesús, ta tyinyeé ñu chi ra quiví chica noo ra ityi Galilea. Ta siin ri nyicú cuaha ca ñu cha chaā coyo chihin ra Jerusalén cuan.

Nu chicuchi ñu chi ra Jesús

(Mt. 27.57-61; Lc. 23.50-56; Jn. 19.38-42)

⁴² Cuví chi quiví cha sanduvaha ñu cha cachi ñu vatyí inga quiví tuhvá ñu nyitatu.

⁴³ Ta cha cuaa cuan chaā ra José ra ñuu Arimatea. Noo ra cuví tyiño. Nyatú tucu maa ra nu cunyaca ñaha Nyoo. Ta ndachan cuñí ra ta quihvī ra nu nyaá ra Pilato, ta chican ra coño ñuhu ra Jesús chi ra.

⁴⁴ Iyo cuñí ra Pilato cha nacotoḡ ra vatyí cha chihī ra Jesús. Ta canā ra chi capitán vatyí ndaca tuhun ra tatu cha yaha chihī ra.

⁴⁵ Ta cha catyí capitán vatyí cha yaha chihī ra, ra Pilato chaha ra coño ñuhu ra chi ra José.

⁴⁶ Tyicuan ta satā ra José noo sinduhu cha chino chihin sahma finu cha nañi lino, ta sanoḡ ra coño ñuhu ra. Ta siquí noo ra chihin sinduhu cuan. Yaha cuan ta chityihī ra chi ra noo chichi ñaña cha cachatyā ra chichi noo yuu. Ta chasi ra yuhu ñaña cuan chihin noo yuu cahnu.

⁴⁷ Ta cu María ñaha Magdala cuan ta cu María sihi ra José, chaā coyo ñu nyehē ñu nu tyihī ra chi ra.

16

Nu nandotoḡ ra Jesús

(Mt. 28.1-10; Lc. 24.1-12; Jn. 20.1-10)

¹ Yaha quiví nyitatu ñu. Tyicuan ta cu María ñaha Magdala ta cu María sihi ra Jacobo, ta cu Salomé satā ñu ndutya vixi chahán ta cuahan coyo ñu cua tyihī ñu coño ñuhu ra Jesús.

² Ta timingu cuví, quiví quichaha vitya, ñaha cuii ri cuhva cha vachi cundichin cuhva cha ni cua cañā ñanyii, chaā coyo ñu nu ñaña.

³ Ta catyí ñu chi tahan ñu:

—¿Yóo cha cusacanyaha yuu yuhu ñaña cuan? —catyí ñu chi tahan ñu.

⁴ Soco cuhva cha nanyehē ñu, yuu cahnu cha nyasi yuhu ñaña cuan cha cuachiyō chi nya sava.

⁵ Quihvī coyo ñu chichi ñaña yucuan. Ta nanyehē ñu chi noo ángel tari caa noo ra tyivaa, nyaá ra chiyo vaha. Ta ñihno ra sahma cañi ta cuichin. Ta canayuhví ñu.

⁶ Soco catyí ra chi ñu:

—Ma yuhvi ndo. Nyoho nanducú ndo chi ra Jesús ra ñuu Nazaret, ra cha chihī nu cruzi. Soco cha nandotoḡ ra. Ña ñohó ca ra ihya. Nyehē ndo nu chacun ra chi ra.

⁷ Cuahan ndo cua sacotoḡ ndo chi ra Pedro ta chi inga ra cachica noo chihin ra. Catyí ndo chi ra vatyí na cuhun coyo ra ityi Galilea vatyí yucuan nyatú ra

Jesús chi ra, tari cuhva catyĭ ra chi ra. Vatyĭ ra Jesús cha cuahan ra ityi nuu —tyicuan caa catyĭ ángel cuan chi ñu.

⁸ Tyicuan ta cuahan coyo vavaha ñu, vatyĭ suri canihĭ ñu cha cuenda cha yuhví ñu. Ta yori maa chihĭn cahán ñu tuhun cha cuenda cha yuhví ñu.

*Nu tuvĭ ra Jesús nuu cu María ñaha Magdala
(Jn. 20.11-18)*

⁹ Cuvĭ chi timingu quivĭ quichaha vitya cha nandotĭ ra Jesús. Yahá cuan ta xihna ca nuu cu María ñaha Magdala tuvĭ ra. Maa ña cuvĭ ñaha cha tavá ñehe ra ucha tahan tatyĭ ña vaha.

¹⁰ Ta चाहण ña chisacoto ña chi ra cachicá noo chihĭn ra, vatyĭ canycú cuihya ra ta cachacú chaa ra.

¹¹ Soco cuhva cha cachiñĭ ra vatyĭ iyó ra Jesús ta vatyĭ nyehe ña chi ra, ña cachinŭ iñi ra.

*Nu tuvĭ ra Jesús nuu uvi tahan ra chicá noo chihĭn ra
(Lc. 24.13-35)*

¹² Cha yahá cuan, ra Jesús tuvĭ ra nuu uvi tahan ra cha cuahan coyo chica ityi ityi nu chiqui. Soco sĭin caa cuhva caá ra cananyehe ra chi ra.

¹³ Ta cuanuhu coyo ra ta sacotĭ ra chi tandihĭ ca ra. Soco suri ña cachinŭ iñi ra cha cacahan ra cuan.

*Tuhun cha चाहा ra Jesús chi ra cha tyatyĩñŭ ra chi
(Mt. 28.16-20; Lc. 24.36-49; Jn. 20.19-23)*

¹⁴ Ta cuee ca ta tuvĭ ra Jesús nuu ndĭ uchi ĩn ra cha cachicá noo chihĭn ra, cha ni ri ca cha canycú ra nu mesa. Ta चाहण ra chi ra cha cuenda cha ña cachinŭ iñi ra, ta cha cuenda cha candava añima ra vatyĭ ña cachinŭ iñi ra tuhun चाहण ñu nyehe tyĭ nandotĭ ra.

¹⁵ Ta catyĭ ra chi ra:

—Cuahan ndo nicacahnu ñuhu ñayivĭ, ta चाहण ndo chihĭn tandihĭ ñáyivĭ, ta catyĭ ndo chi ñu yoso caa sacacú Nyoo añima ñu.

¹⁶ Ta ñu cha chinŭ iñi ta condutya ñu, cucacu añima ñu. Soco ñu cha ña chinŭ iñi cundoo cuatyĭ ñu siqui ñu ta cunaa ñu.

¹⁷ Ta tandihĭ seña ihya cusacuvi ñu cha chinŭ iñi chii: Chihĭn sivĭ cutava ñehe ñu tatyĭ ña vaha. Cucahan ñu inga sahan cha ña chitŭ ñu.

¹⁸ Cutĭin ñu coo, ta tatu coho ñu cha yihĭ venenu, ma saha cuehe chi ñu. Ta sĭin ri cutyiso ñu ndaha ñu siqui ñu cuhvĭ, ta cunduvaha ñu.

*Nu nandaq xica ra Jesús andivĭ
(Lc. 24.50-53)*

¹⁹ Nu ndihĭ चाहण Sutu Mañi yo Jesús chihĭn ra, ta nandaq xica ra andivĭ, ta chicunyaq ra chiyo vaha Nyoo.

²⁰ Tyicuan ta ra cachicá noo chihĭn ra quitá ra ta चाहण coyo ra chicahan ra tuhun Nyoo yoso caa sacacú ra añima yo tandihĭ ri ityi. Suri maa Sutu Mañi yo tyinyeĭ chi ra vatyĭ चाहण ra cha sacuvi ra cuaha milagru. Ta tyicuan caa nyehe ñáyivĭ tyĭ ndicha tuhun cacahan ra.

Tuhun Nyoo Cha Tyaá San Lucas

Nu sacuhun ra Lucas noo tuhun chi ra Teófilo

¹⁻³ Cha chitón yoho Tata Teófilo, vatyí cha cuaha ñáyiví nducu ñu cuhva ta tyaá ñu nuu tutu tuhun cha cuví nu nyicú ndi. Tyaá ñu tari maa cuhva nacatyí ñáyiví chi yo, ñáyiví cha nyehe ta cahán tuhun ra Jesús nya quiví xihna ri. Ta vityin tahán tucu chí chi yuhu tyi sacote tuhun ra chuun. Vatyí cha yaha sacuahí ta nyehe vahi tandíhi nya nu quichaha. Ta vityin ñañi ñañi ri cuatyai tuhun ra.

⁴ Vatyí coto vahun tyi ndicha cha sacoto ñáyiví chuun.

Nu sacoto noo ángel chí ra Zacarías ama cucacu ra Juan ra sacondutyá chí ñáyiví

⁵ Quiví cha cuví ra Herodes rey nicahnu Judea, chiyo noo tata sutu, chinañi ra Zacarías. Ta yihí ra cuenda ityi tata sutu cha chinañi Abías. Ta ñasihí ra chinañi ña Elisabet. Ta vachí ñu tata ra Aarón, ra chiyo ta cha naha.

⁶ Ta ñahri maa cuatyí ñu iyó nuu Nyoo. Vatyí vaha xaan quichahá ñu tuhun cahán Nyoo. Ta yori maa cuví tyaá cuatyí siqui ñu.

⁷ Soco yori maa sehe ñu chicoo. Vatyí cu Elisabet, ña cuví coo sehe ña. Ta siin ri ninduví tahan ñu chahnu xaan ñu.

⁸ Ta noo quiví tahan chí ityi cuenda ra Zacarías cha sacuvi ra tyiño nuu Nyoo.

⁹ Tari cuhva costumbre maa tata sutu, nyehe ra nya ra tahan chí nyatu chí. Ta tahan chí nyatu chí ra Zacarías cha quihví ra chichi vehe ñuhu, vatyí cahmi ra cutu.

¹⁰ Cha ní ri ca cha ñohó ra chahmí ra cutu cuan, cuaha xaan ñáyiví chicán tahvi ñu ityi chata vehe.

¹¹ Yucuan ta tuví noo ángel cuenda Nyoo nuu ra Zacarías. Ta chicuinanyaa ra chiyo vaha arta nu chahmí ra cutu.

¹² Ta cha nanyehe ra Zacarías chí ángel cuan, iyo xaan cuñí ra. Ta yuhví xaan ra.

¹³ Soco ángel cuan catyí ra chí ra:

—Zacarías, ma yuhvun. Vatyí Nyoo chiñí ra tuhun cahún. Ta ñasihun cu Elisabet cucoo noo sehe ña. Ta Juan cusacunañun chí cue.

¹⁴ Si xaan cucuvi chuun. Ta cuaha xaan ñu, cusí cuñi quiví cacu cue.

¹⁵ Vatyí sehun, cahnu xaan ra cucuví ra nuu Nyoo. Ma coho ra vinu ta ní ndixí. Ta ñihí xaan cuquihí Tatyí Ii Nyoo chí ra nyata cumañi cacu ra ta tandíhi tyembu cha coo ra.

¹⁶ Ta cuaha xaan ñáyiví Israel cunyicon chí Sutu yo Nyoo cha cuenda ra.

¹⁷ Ta cucoo tunyee íñi Nyoo chí ra. Ta cuquihí xaan Tatyí Ii Nyoo chí ra. Vatyí cucuvi ra tari ra Elías, ra cuví profeta Nyoo ta cha naha. Ta cusanicoo vaha ra chí ñáyiví chihin sehe ñu. Ta cusañaha ra chí ñáyiví quiñi iyó na quichaha ñu tuhun cahán Nyoo. Tyicuan caa cusanduvaha ra chí ñáyiví ta cuatu tuhva ñu chí Nyoo —catyí ángel chí ra Zacarías.

¹⁸ Ta ndaca tuhun ra Zacarías chí ángel, ta catyí ra:

—¿Yoso caa ta cote noo cha ndicha vaha? Vatyí yuhu cha chahnu xain. Ta ñasihí cha chahnu xaan ña ñandíhi —catyí ra.

¹⁹ Ta ángel cuan quichaha catyí ra:

—Yuhu Gabriel nañí. Ta chiqué tyiño Nyoo. Maa ra tachí chii vatyi cahin nuun ta sacote tuhun vaha ihya chuun.

²⁰ Ta vityin nduñihun. Vatyi ña chinó iñun tuhun cahín. Ta ma cuvi cahun nyacua nya chino cava tuhun cahin chuhun —catyí ángel cuan chi ra.

²¹ Ta ñáyivi cha nyatú chi ra Zacarías ityi chata vehe, iyo xaan cuñi ñu ñáá tuhun cha cucuee xaan ra chichi vehe ñuhu.

²² Soco cuhva cha quitá ra Zacarías, ña cuví maa cahan ra chihin ñu. Tyicuan ta tuví iñi ñu vatyi iyó cha nyehe ra chichi vehe ñuhu cuan. Ta quichaha cahan ra chihin ñu chihin seña ri. Vatyi ña cuví cahan ra.

²³ Ta quívi cha ndihí tyiño saha ra Zacarías vehe ñuhu cuan, ta cuanuhu ra nya vehe ra.

²⁴ Ta cha yaha tuhun cuan chicohon sehe ñasihí ra, cu Elisabet. Ta ña quitá maa ña chata vehe cha ni ri ca cha ohon yoo. Ta chicá xiñi ña:

²⁵ “Tyehe caa sacuví Sutu Mañi yuhu chihin, tacuhva ma cahan cuehe ca ñáyivi chii”, chicá xiñi ña.

Nu sacoto noo ángel chi cu María vatyi cucacu ra Jesús

²⁶ Nu cu iñu yoo cha ñohó sehe cu Elisabet, tachí Nyoo chí ángel Gabriel ñuu Nazaret ityi Galilea.

²⁷ Vatyi cucahan ra chihin noo ñaha tyivaa cha nañí María. Ta cha nyaña cha tandaha ña chihin noo ra nañí José. Ta ra José cuan vachi ra tata rey David.

²⁸ Ta tuví ángel cuan nu nyaá ña. Ta quichaha catyi ra chi ña:

—Nocumi chuun, María. Ñihun tumañi iñi nuu Nyoo. Vatyi maa ra nyaá chuhun. Ta chi yoho nasocó xaan ca Nyoo nuu tandihí ca ñusihí —catyí ángel cuan chi ña.

²⁹ Ta cuhva cha chiñi ña cha cahan ra, iyo xaan cuñi ña tuhun cahan ra. Ta ndichí xiñi ña: “¿Ñáá tuhun cha chaha ra ihya nocumi chí yo tyicuan caa?” ndichí xiñi ña.

³⁰ Ta catyí ángel cuan:

—Ma yuhvun, María, vatyi ñihún tumañi iñi nuu Nyoo.

³¹ Vatyi cuacohon noo sehun. Ta sacunañun Jesús chí ra.

³² Cahnú xaan ra cuacuvi ra. Ta cunañi ra Sehe Nyoo ra cuvi nuu. Ta Nyoo Sutu Mañi yo cusacuvi ra rey chí ra. Tari cuví ra David, ra vachi ra tata.

³³ Vatyi cunyaca ñaha ra chí ñáyivi Israel tandihí maa tyembu. Ta ma ndihí maa cha cunyaca ñaha ra —catyí ángel cuan chí ña.

³⁴ Yucuan ta ndaca tuhun cu María chí ángel, ta catyí ña:

—¿Yoso caa cuahan tuhun ihya? Vatyi yuhu, ta coo ca yii.

³⁵ Ta nacahan ángel ta catyí ra:

—Maa Tatyí Ii Nyoo cuquichi sicun. Ta tunyee iñi Nyoo cahnú cuquichi tari noo vico ta casi chí sicun. Yucuan chaha ra ii cha cucacu cunañi ra Sehe Nyoo.

³⁶ Tyicuan caa tucu cu Elisabet ñáyivi chuun. Cucacu noo sehe ña vasi cha chahnú ña. Ñaha cha catyí ñáyivi vatyi ña cuví maa coo sehe. Soco vityin cha ñohó sehe ña. Cha iñu yoo ñohó.

³⁷ Vatyi Nyoo ñahri cha ma cuvi sacuvi ra —catyí ángel chí ña.

³⁸ Ta quichaha catyí cu María:

—Yuhu cuví musu Sutu yo Nyoo. Na sacuvi maa ra yoso cuhva catyún —catyí ña.

Yucuan ta cuahan ángel cuan.

Cuahan cu María cuanyehé ña chi cu Elisabet

39 Cuví noo quiví cuan, numi xaan cuahan cu María noo ñuu ityi Judea nu maa ri maa yucu cuví.

40 Ta quihví ña chichi vehe ra Zacarías. Ta chahá ña nocumi chi cu Elisabet.

41 Cuhva cha chiñí cu Elisabet tuhun cahān cu María, natyoñō cha lee cha ñohó chichi ña. Ta chitu ña chihin Tatyí Ii Nyoo.

42 Ta chaa nacahān ña, ta catyí ña:

—Nyoo sahá ra tumañi iñi chuun cha nuu tandihí ñusihí. Ta nasocó ra chi sehun.

43 ¿Ta yóó ñaha cuví yuhu? Vatyí quichi sihi Sutu Mañi yo quichí nyehe ña nu nyai.

44 Cuhva cha chiñí tuhun cahān, ta natyoñō sehi cha ñohó chichi. Vatyí sii xaan cuví chi ra.

45 Ta sii xaan cuñí añimon vatyí chinó iñun cha cuacuvi tuhun cahān Nyoo chuhun —catyí cu Elisabet.

46 Ta quichahā catyí cu María:

—Sacahní chi Nyoo chihin tandihí añime.

47 Ta sii xaan cuví chii vatyí sacacú Nyoo añime.

48 Vatyí cuví yuhu noo ñaha ndahvi ta Nyoo tñin cuenda ra chii. Ta vityin tandihí quiví cucatyí ñáyiví chii vatyí cahnu xaan tumañi iñi ñihí.

49 Vatyí Nyoo, cahnu xaan cuví ra. Ta cahnu cha sacuví ra chihin. Ta ii xaan siví ra.

50 Ta tyicuan ri ndahvi cuñí ra chi tandihí ñáyiví cha sahá ñáyiví chi ra.

51 Cahnu xaan cha sacuví ra chihin tunyee iñi iyó chi ra.

Sanaá ra cuhva chicá xiñi ñu cahnu sahá chi.

52 Sanocueé ra chi ñu sacahnú chii. Ta ra cha ña cahnu sahá chii, sacucahnú ra chi ra.

53 Chahá Nyoo cha vaha chi ñu cuñí coto cha vaha,

ñu chitó vatyí chihñuhú Nyoo chi. Soco ñu tyayii cha cuñí maa tyi ñahri chihñuhu chi, chihin nundaha nu ndii ñu, sacuhún ra chi ñu.

54 Tyinyee ra chi ñáyiví Israel cha cuví musu ra.

Ta ña naá iñi ra chi ñu. Nyehé ndahvi ra chi ñu.

55 Tari cuhva catyí Nyoo chí ra Abraham, sutu yo, ta chi sehe ra, tyicuan caa sacuví Nyoo tyicuan ri maa —catyí cu María.

56 Ta cu María ndoq ña chihin cu Elisabet uñi yoo. Ta cha yahā uñi yoo cuan ta cuanuhū ña nya vehe ña.

Quiví cacū ra Juan, ra cha sacondutyá

57 Ta chaa quiví cha cuacacu cha lee sehe cu Elisabet. Cacū cue ta rayii cuví cue.

58 Ta cha chiñí ñáyiví cha nyicú yatyin yuvehe ña ta ñáyiví chi ña cha tyicuan caa, sii xaan cuví chi ñu. Ta sii xaan cuñí tucu maa ña. Vatyí vaha xaan cha sacuví Nyoo chihin ña.

59 Ta nu cu uña quiví cha cacū cue, chahān ñu chihin cue vehe ñuhu. Vatyí cuhva cuenda ñu chí cue chí Nyoo. Ta sahā ñu circuncidar chí cue tari cuhva iyó maa ñu. Chahnyā ñu chiin ñii cue nu cuví cue rayii. Ta cuñí ñu sacunañi ñu Zacarías chí cue tari sutu cue.

60 Soco sihi cue catyí ña:

—Ma cuví. Juan, cunañi cue.

61 Ta quichaha catyí ñu:

—¿Ñáá tuhun sacunañún Juan chi cue? Yori ñáyivi chi ndo cha nañi tyicuan caa —catyí ñu.

⁶² Ta quichaha ndaca tuhun ñu chihin seña ri chi sutu cue. Vatyí coto ñu ñáá sivi cuñi ra cha cunañi cue.

⁶³ Ta chican sutu cue noo vitu, ta nuu vitu tyaa ra tyehe caa: “Juan cuví sivi cue”, tyaa ra.

Ta tandihí maa ñu cuan iyo xaan cuñi ñu tuhun cuan.

⁶⁴ Ta nacahan ra Zacarías caa cuhva ri cuan. Ta quichaha sacahnu ra chi Nyoo.

⁶⁵ Tandihí maa ñu iyó yatyin ri yuvehe ñu, yuhví xaan ñu tuhun ihya. Ta tandihí maa ñáyivi cha iyó yucu ityi Judea cuan nacatyí ñu chi tahan ñu tuhun ihya.

⁶⁶ Ta tandihí maa ñáyivi cha chitó tuhun cuan, ndichí xiñi ñu, ta ndaca tuhun ñu chi tahan ñu:

—¿Yóó ra cuví cha lee cuan? —catyí ñu.

Vatyí ndicha, Nyoo nasoco xaan ra chi cue.

Nu sacahnú ra Zacarías chi Nyoo

⁶⁷ Sutú cue, ra Zacarías, tyitú ra chihin Tatyí Ii Nyoo. Tyicuan ta quichaha cahan ra tuhun cha chahá Nyoo chi ra, ta catyí ra:

⁶⁸ —Cahnu xaan ra cuví Sutú Mañi yo Nyoo cuenda yo ñu Israel.

Vatyí quichí ra nu nyicú yo, cha cuví yo ñáyivi chi ra.

Ta sacacu ra chi yo.

⁶⁹ Ta chaha ra noo ra cahnu chi yo, cha cusacacu chi yo.

Tata ra David ra cha sacuví tyiño nuu Nyoo vachi ra.

⁷⁰ Tyicuan caa cahan Nyoo chihin yuhu ra cacuví profeta cuenda ra ta cha naha.

⁷¹ Vatyí tyicuan caa cusacacu ra chi yo ndaha ra xaan iñi chi yo, ra cha tasi cuñi nyehé chi yo.

⁷² Tyicuan caa cundahvi cuñi nyehé ra chi ñáyivi chi yo ta cha naha.

Ta ma sanaa ra iñi ra tuhun cahan ra.

⁷³ Ican ihya tuhun cahan Nyoo chihin ra Abraham sutu yo.

⁷⁴ Catyí ra vatyí cusacacu ra chi yo ndaha ra xaan iñi chi yo.

Vatyí ma yuhví ca yo sacahnu yo chi ra.

⁷⁵ Ta maa ra sanducachi ra iyó yo nuu ra.

Ta vaha coo yo nuu ra tandihí quivi cha cuacoo yo ñáyivi —catyí ra Zacarías.

⁷⁶ Ta catyí ra Zacarías chi cha lee cuan tyehe caa:

—Ta yoho sehi, profeta Nyoo cahnu cucatyí ñáyivi chuun.

Vatyí cahun ityi nuu Sutú Mañi yo. ta cucahun tuhun ra chihin ñáyivi vatyí cha cuñi quichi ra.

⁷⁷ Ta cusacoton chi ñáyivi vatyí cunasaha Nyoo tucahnu iñi cuatyí ñu.

Ta tyicuan caa ta cacu añima ñu.

⁷⁸ Vatyí Sutú yo Nyoo cuñi ra chi yo. Ta cundahvi cuñi ra chi yo.

Ta saquichí ra noo ra tyinyeé chi yo. Tari noo ñuhú ñanyii cucuvi ra.

⁷⁹ Vatyí chihin cha sañahá ra chi yo sacundichín ra nu nyicú yo nu ñaa iñi cha catyí cuatyí yo.

Ta cusañaha ra chi yo yoso caa quihvi yo ityi vaha —catyí ra Zacarías.

⁸⁰ Ta cha luhlu cuan cuahan chahnu ra. Nyeé cuñi ra chihin Tatyí Ii Nyoo. Ta chicoo ra noo chiqui ndi nyacua nya quivi cha chicohon nuu ñáyivi Israel chi ra.

2

Quiví cacu ra Jesús
(Mt. 1.18-25)

¹ Ta quívi cuan iyó noo ra nyacá ñaha, nañí ra Augusto. Tachí ra tyiño natyaa ra sívi tandíhi ñáyívi nicahnu ñuhu ñayívi.

² Ta quívi cuan ra Cirenio cuví ra ra nyacá ñaha tandíhi ñuu ityi Siria.

³ Ta tahán chi cuhun tandíhi ñáyívi nya ñuu ñu. Vatyí cuhva ñu sívi ñu yucuan.

⁴ Yucuan chaha quita ra José ñuu Nazaret ityi Galilea. Ta chahan ra ityi Judea ñuu Belén nu cacu ra David. Yucuan chahan ra vatyí tata ra David vachi ra.

⁵ Ta chahan ra chi cuhva ra sívi ra chihin cu María. Ta cha cuñí tandaha ña chihin ra. Ta ñohó sehe ña.

⁶ Ta chiquitahan chaa quívi cha cacu sehe ña cha ni ri ca cha ñohó ñu Belén cuan.

⁷ Ta yucuan cacu sehe nuu ña. Ta natyihí ña chi cue chichi sahma. Ta nandacun ña chi cue chichi noo nu chachí quiti. Vatyí cuaha xaan ñáyívi chaq coyo ñuu cuan. Ta ña nuña ca ni minoo vehe nu cunyaa ñu.

Nu cahán ángel chihin ra sahá cumi mbee

⁸ Yatyin ñuu Belén cuan nyicú suhva ra casahá cumi mbee sana ra cha cha cuaa cuan.

⁹ Ta sana iñi ra ta tuví noo ángel Nyoo. Ta cha ndichin Nyoo Sutu Mañi yo ndundichin nicachico ri nu canyicú ra. Ta nayuhví xaan ra.

¹⁰ Ta quichaha cahán ángel cuan, ta catyí ra tyehé caa:

—Ma yuhví ndo. Vatyí cuacatyí mai noo tuhun chi ndo. Noo tuhun cha si xaan cuacuví chi tandíhi ñáyívi.

¹¹ Vatyí vityin cacu ra sacacú añima ndo ñuu ra David. Noo ra cuví Cristo, ra cuví Sutu Mañi yo.

¹² Ta ihya cuví seña chahi chi ndo, cunyehe ndo chi cha lee cuan, siqui noo cue sahma. Catuví cue chichi noo nu chachí quiti —catyí ángel chi ra casahá cumi mbee cuan.

¹³ Ta caa cuhva ri cuan chaq coyo cuaha xaan ca ángel casacahnú ra chi Nyoo, ta cacatyí ra:

¹⁴ Sacahnu yo chi Nyoo nu nyaá ra gloria.

Ta ñáyívi iyó siqui ñuhu ñayívi cha ñihi tumañi iñi ra, na coo taxi añima ñu, catyí angel cuan.

¹⁵ Yucuan ta cuanuhú coyo ángel cuan gloria. Tyicuan ta ra casahá cumi mbee quichaha catyí ra chi ra tahan ra:

—Cõho ndo Belén. Cunyehe yo ñáá cha cuví. Vatyí maa Sutu yo Nyoo sacotõ chi yo.

¹⁶ Tyicuan ta numi xaan cuahan coyo ra Belén. Ta nañihí ra chi cue chihin cu María ta ra José. Ta catuví cue noo nu chachí quiti.

¹⁷ Ta yahá cha canyehe ra chi cue, ta canacatyí ra chi ñu ñáá ndíhi tuhun cahán ángel chihin ra cuenda cha lee cuan.

¹⁸ Ta tandíhi ñu chiñí tuhun cahán ra, iyo xaan cuñí ñu.

¹⁹ Soco cu María ta cuhva chicá ri xiñi ña tuhun cuan.

²⁰ Ta ra sahá cumi chi mbee cuan cuanuhú coyo ra. Ta casacahnú ra chi Nyoo cha cuenda cha cachiñí ra ta canyehe ra. Vatyí chinõ cava tandíhi cha catyí ángel chi ra.

Nu cuacuhva cuenda ñu chi ra Jesús chi Nyoo vehe ñuhu cahnu

21 Ta nu cu uña quivi, saha ñu circuncidar chi cue, tari cuhva tuhva maa ñu. Ta sacunañi ñu chi cue, Jesús. Suri maa sivi cha catyi ángel chi cu María quivi cha cumañi ca cohon sehe ña.

22 Ta cha yaha quivi cha tahān chi vatyi ndundii ñu nuu Nyoo, tari cuhva catyi maa ley Nyoo cha tyaā ra Moisés, tyicuan ta cuahan ñu Jerusalén. Vatyi cuacuhva cuenda ñu chi cue chi Nyoo.

23 Sacuvi ñu tyicuan caa vatyi in caa maa catyi ley tyehe caa: “Tandihī rayi cha cuvi sehe nuu ñu, cucuhva cuenda ñu chi Nyoo”, catyi ley cuan.

24 Ta chahān ñu chīcuhva cuenda ñu uvi tahan quitī tari cuhva catyi maa ley Sutu yo Nyoo nu catyi chi tyehe caa: “Cuhva ndo uvi tahan cucu o uvi tahan ndicuiya”, catyi ley cuan.

25 Ta quivi cuan iyó noo ra ñuu Jerusalén cha nañi Simeón. Ta cuvi ra noo ra vaha, ra sacahnú chi Nyoo. Ta nyatú tuhva ra nya quivi cusacacu Nyoo chi ñáyivi Israel. Ta yihī ra Tatyī Ii Nyoo.

26 Ta sacotō Tatyī Ii Nyoo chi ra vatyi ma cúvi ra cha ni ri ca cha ta nyehe ca ra chi ra sacacú chi ñu Israel, ra cuvi Cristo, ra cha cusaquichi Sutu yo Nyoo.

27 Ta ra cuan chahān ra vehe ñuhu cuhva catyi maa Tatyī Ii Nyoo chi ra. Cuhva cuan chahān tucu sutu ta sihi cha lee cuan chinyaca ñu chi cue vehe ñuhu cahnu, vatyi sacuvi ñu tari cuhva catyi maa ley.

28 Ta quehēn ra Simeón chi ra Jesús. Ta tyihī sucun ndaha ra chi ra. Ta quichaha sacahnu ra chi Nyoo. Ta catyi ra:

29 —Sutu Mañi yuhu. Na cúvi mai vityin chihin cha vaha.

Vatyi cha sacuvun cha catyūn chi yuhu cha cuvi sehun.

30 Vatyi cha nyehi chihin nui chi ra cusacacu chi ndi.

31 Vatyi sañahun chi ra nuu tandihī ñáyivi.

32 Cha catyi ra ta cuahnu ñáyivi Israel nuu inga ñáyivi.

Ta ican ra cuvi ra cha sacundichin añima tandihī inga ñáyivi cha ñima ñu Israel cuvi. Vatyi cusacuvi ra na cutuñi iñi ñu tuhun Nyoo —catyi ra Simeón.

33 Ta ra José chihin sihi ra Jesús, iyo xaan cuñi ñu cha cahān ra Simeón tuhun cha lee cuan.

34 Yucuan ta chican tahvi ra Simeón chi Nyoo chaha ñu. Ta catyi ra chi cu María sihi ra Jesús:

—Nyehe chi cha lee ihya. Vatyi cuaha xaan ñáyivi cuchino iñi ñu chi ra quivi coto ñu tuhun ra, ta cucacu añima ñu. Soco cuaha ñu ma chino iñi ñu chi ra, ta cunaa ñu. Ta cucahan ñu chi ra.

35 Ta cha tyicuan caa cusanatuvī ra cha caa añima noo noo ñáyivi. Soco cha cuenda yoho, María. tari cha uhvi cha yaha sava noo tyicaa añima ñáyivi, tyicuan caa cha uhvi cunyhun cha catyi cha lee ihya —catyi ra Simeón.

36 Ta yucuan ñohó tucu noo ñaha cha cuvi profeta Nyoo. Ta cha chahnu xaan ña. Nañi ña Ana. Ta sehe ra Fanuel noo ra vachi tata ra Aser cuvi chi ña. Luhlu xaan ña ta tandaha ña, ta ucha ri cuiya chiyo ña chihin yi ña ta chihī ri ra.

37 Ta cha cumi xico cumi cuiya chihī yi ña. Ta vehe ñuhu cahnu ña quitá ña, vatyi ndiyaca ta ñiyaca chicán tahvi ña chi Nyoo. Ta iyó cuhva cha ña chachi ña cha ni ri ca cha chicán tahvi ña.

38 Ta cuhva cha ñohó ra José ta cu María chihin cha lee, cha ña nu canyicú ñu. Ta nacuhva ña tyahvi nyoo chi Nyoo. Ta quichaha cahan ña tuhun ra Jesús chihin tandihī ñáyivi cha nyatú tuhva cha quita ñuu Jerusalén chichi ndaha ra ñuu Roma.

Nu cuanuhu ñu nya Nazaret

³⁹ Cha yahā cha sacuvi ñu tandihī maa yoso caa catyí ley Sutu yo Nyoo, ta cuanuhu ñu nya Galilea nya ñuu ñu nu nañi Nazaret.

⁴⁰ Ta ra Jesús cuahan chahnu ca ra. Ta cuahan ndunyeē ca ra ta cuahan chicoo ca cha chiñi tuñi Nyoo. Vatyí nasoco Nyoo chi ra.

Nu ñohó ra Jesús chichi vehe ñuhu

⁴¹ Ra José chihin sihi ra Jesús ndihī cuiya ri tuhva ñu chahán nya Jerusalén cha vico pascua.

⁴² Ta quivi ndihī ra Jesús uchi uvi cuiya, chahan tandihī ñu Jerusalén tari tuhvá maa ñu chahán cha vico.

⁴³ Ta quivi ndihī vico ta cuandichi ñu, ta ra Jesús ndoo ra Jerusalén. Ta ña saha ñu cuenda.

⁴⁴ Cuñi maa ñu vatyí cuandichi ra mahñu nu tuvi ñáyivi cuan. Yucuan chaha ñahri chicá iñi ñu chicá ityi ñu noo quivi. Tyicuan ta nanducu ñu chi ra chichi nu tuvi ñáyivi cuan,

⁴⁵ ta ña nañihī ñu chi ra. Tyicuan ta cuanuhu chata ñu cuananducu ñu chi ra nya Jerusalén.

⁴⁶ Cha yahā cha uñi quivi ta nañihī ñu chi ra chichi vehe ñuhu cahnu cuan. Nyaá ra chihin ra sacuahá cuenda ley vehe ñuhu. Ta tyasohó ra cuan tuhun cahán ra. Ta ndacá tuhun ra tuhun chi ra.

⁴⁷ Ta tandihī ñu chiñi tuhun cahán ra, iyo xaan cuñi ñu chihin cha chiñi tuñi ra, ta chihin tuhun cha nacahán ra.

⁴⁸ Cuhva cha nanyehē sutu ra ta sihi ra chi ra, iyo xaan cuñi ñu. Ta sihi ra catyí ña chi ra:

—Sehe luhli. ¿Ñáá tuhun cha sacuvun chi ndi tyehe caa? Sutun ta yuhu chica xaan iñi ndi ta nanducu xaan ndi chuun —catyí ña.

⁴⁹ Tyicuan ta catyí ra Jesús:

—¿Ñáá tuhun cha nanducu ndo chii? ¿Atu ña chito ndo vatyí niñi cuñi chi cha cahin tuhun Suti chihin ñáyivi? —catyí ra.

⁵⁰ Soco ña cutuñi iñi ñu tuhun cahan ra.

⁵¹ Tyicuan ta cuanuhu ra chihin ñu nya Nazaret. Ta quichahá ra tuhun cahán ñu. Ta sihi ra naquehen vaha ña tandihī tuhun ihya chichi aña ña.

⁵² Yucuan cuví nu cuacuahnu ca ra Jesús. Ta cuahan chaa ca cha chiñi tuñi xiñi ra. Ta sii xaan cuví chi Nyoo chihin ra ta ñáyivi ñandihī.

3

*Ra Juan, ra sacondutya, cahán ra tuhun Nyoo nuu ñáyivi
(Mt. 3.1-12; Mr. 1.1-8; Jn. 1.19-28)*

¹ Nu ndihī chahun cuiya cha cuví ra Tiberio rey cahnu ñuu Roma, ta ityi Judea nyacá ñaha ra Poncio Pilato. Ta ra Herodes nyacá ñaha ra Galilea. Ta yañi ra, ra Felipe nyacá ñaha ra Iturea chihin Traconite. Ta ra Lisantias nyacá ñaha ra Abilinia quivi cuan.

² Ta ra Anás chihin ra Caifás, ican ra cuví ra ra cacuví nuu chi tandihī tata sutu. Ta quivi cuan cahán Nyoo chihin ra Juan sehe ra Zacarías noo nu chiqui ndi.

³ Ta ra Juan chicá noo ra tandihī ñuu cha nyaá yatyin ri nu nyaá noo yuvi cahnu cha nañi Jordán cahán ra tuhun Nyoo chihin ñáyivi. Ta catyí ra chi ñu na ndu uvi iñi ñu cuatyí ñu ta na condutya ñu. Tyicuan caa ta Nyoo saha ra tucahnu iñi chi ñu, catyí ra.

4 Tyehe caa cuvi tari cuhva catyí nu libru cha tyaꝯ ra Isaías profeta Nyoo ta cha naha. Ta catyí ra:

Chiiñi yo cha caná chaa noo ra noo nu chiqui ndii, ta catyí ra:

“Tari sanduvahá ndo noo ityi, tyicuan caa sanduvaha ndo añima ndo vatyí cuaquichi Sutu Mañi yo.

Nuña ndo noo ityi ndoo chi ra na quihvi ra añima ndo.

5 Tari cha sanandutú ndo noo ticoho, ta tari sandundaá ndo noo yucu cahnu, ta tari sandundoó ndo cha yacua,

ta tari sanduvi ndo nu quiñi caa, tyicuan caa ñasama ndo cuhva iyó ndo.

6 Tyicuan caa ta tandihi ñáyivi ta nyehe ñu vatyí Nyoo chaha ra cha cacú añima ñu.”

7 Ta tyicuan caa cahán ra Juan chihin ñáyivi. Yucuan ta cuhva cha chiiñi ñu tuhun cahán ra, ta catyí ñu chi ra vatyí na sacondutya ra chi ñu. Yucuan ta quichaha catyí ra chi ñu:

—¿Nyoho tari noo tata coo xaan cuvi ndo! ¿Yóo cha sañaha chi ndo vatyí chihin cha condutya ri ndo ta ma tachi tuñi ca Nyoo chi ndo?

8 Ñasama ndo cuhva iyó ndo, na nyehe ñáyivi vatyí cha ndu uvi iñi ndo cuatyí ndo. Ta ma catyí ndo vatyí tata ra Abraham vachi ndo. Vatyí nyacua nya noo yuu ihya, Nyoo cuví sananduvi ra noo ñáyivi chi ra Abraham.

9 Tari yutun cha ña chahá chiti, tyicuan caa cuvi ndo. Vatyí ña sacuvi ndo tari cuhva cuñi Nyoo. Ta yutun cha ña chaha chiti, cahnya ñáyivi chi tun. Ta cahmi ñu chi tun. Tyicuan caa tucu nyoho cha cuñi cuiri cahun ndo nu cayu ñuhu —catyí ra Juan.

10 Yucuan ta quichaha ndaca tuhun ñáyivi chi ra:

—¿Yoso caa sacuvi ndi, cuñi yoho? —catyí ñu.

11 Ta nacahan ra Juan, ta catyí ra:

—Yóo ra cha iyó uvi tahan camisa, tahán chi cuhva ra noo chi ra cha ñahri chi. Ta yóo ñu cha iyó cha cachi, tahán chi cuhva ñu cha cachi ñu ñahri chi —catyí ra.

12 Ta chaꝯ coyo tucu suhva ra catavá xuhun cuenda gobiernu Roma, ta cuñi ra condutya ra. Ta candaca tuhun ra chi ra Juan:

—Maestro, ¿yoso caa sacuvi tucu nyuhu? —catyí ra.

13 Ta catyí ra Juan chi ra:

—Tari cuhva catyí ley tava ndo xuhun. Ta ma tava ndo cuaha ca.

14 Yucuan ta quichaha candaca tuhun tucu suhva sindaro chi ra, ta catyí ra:

—Ta nyuhu tucu, ¿yoso caa sacuvi ndi? —catyí ra.

Ta nacahan ra Juan ta catyí ra:

—Ma tinya ca ndo cha chii ñáyivi. Ta ma tyanaha ndo chi ñu. Ma tya ndo cuatyí siqui ñu tatu ñahri cuatyí ñu. Ta ndoo ndo vaha yoso cuhva yahvi ndo —catyí ra Juan.

15 Iyo cuñi ñáyivi tuhun cahán ra Juan. Ta cuñi ñu tyi ican ra cuví Cristo, ra cha sacacú chi yo.

16 Soco ra Juan catyí ra chi tandihi ñu:

—Cha ndicha vatyí sacondutyé chi ndo chihin ndutya. Soco cha yaha yuhu cuhin cuquichi inga ra cusacundutya chi ndo chihin Tatyí Ii Nyoo ta chihin ñuhu. Iyó ca tunyee iñi chi maa ra, ta ñima ca yuhu. Vatyí ña nañé cha cuví musu ra ta ñiri cha ndachi ñii xityin ndichan ra.

¹⁷ Tari noo ra cha cuanaquehen vaha niñi, ta natyihí vaha ra chichi yaca. Ta cahmi ra mihin. Tyicuan caa cuví maa Sutu Mañi yo chihin yo. Tatu chinó iñi yo chí ra, cunaquehen vaha ra chí yo, ta cunyicu yo chihin ra. Soco tatu ña chinó iñi yo chí ra cutyihí ra chí yo anyaya nu cayu ñuhú cha ma ndahva ca maa —catyí ra Juan.

¹⁸ Ta tyehe caa cahan ra Juan chihin ñu. Ta cuaha xaan ca tuhun cahan ra nuu ñu tyí cuaquichi Sehe Nyoo ta cua sacacu ra chí yo.

¹⁹ Ta cahán ra Juan chí ra Herodes cha cuenda tandihí cuii cha ña vaha nyacuví ra. Vatyí naquehen ra chí cu Herodías, ñasihí ra Felipe yañi ra. Ta cuaha ca cha ña vaha nyacuví ra.

²⁰ Soco ra Herodes tahán chí cha tyasohó ra tuhun ihya soco ña cuñí ra. Nu ndihí tuhun tyihí ndihí ra chí ra Juan vehe caa.

Quivi cua condutya ra Jesucristo

(Mt. 3.13-17; Mr. 1.9-11)

²¹ Cumañi ca cha cohon ra Juan vehe caa sacondutya ra chí tandihí ñáyivi. Ta sacondutya tucu ra chí ra Jesús. Ta cha ni ri ca cha chicán tahvi ra Jesús chí Nyoo ta nuña andivi.

²² Ta nyehé ra Tatyí Ii Nyoo quichí siqui ra tari noo paloma. Ta tyacu noo ndusu andivi cha catyí tyehe caa:

—Yoho cuvún Sehi cha cuñí. Ta sii xaan cuñí chuhun —catyí ndusu cuan.

Ñáyivi vachi ra Jesucristo tata

(Mt. 1.1-17)

²³ Oco uchi cuiya ra Jesús ta quichaha saha tyiño ra tyiño Nyoo. Ta tandihí ñáyivi cuñí maa ñu vatyí sehe ra José cuví chí ra. Ta ra José, sehe ra Elí cuví chí ra.

²⁴ Ta ra Elí, sehe ra Matat cuví chí ra. Ta ra Matat, sehe ra Leví cuví chí ra. Ta ra Leví, sehe ra Melqui cuví chí ra. Ta ra Melqui, sehe ra Jana cuví chí ra. Ta ra Jana, sehe ra José cuví chí ra.

²⁵ Ta ra José, sehe ra Matatías cuví chí ra. Ta ra Matatías, sehe ra Amós cuví chí ra. Ta ra Amós sehe ra Nahum cuví chí ra. Ta ra Nahum, sehe ra Esli cuví chí ra. Ta ra Esli, sehe ra Nagai cuví chí ra.

²⁶ Ta ra Nagai, sehe ra Maat cuví chí ra. Ta ra Maat, sehe ra Matatías cuví chí ra. Ta ra Matatías sehe ra Semei cuví chí ra. Ta ra Semei, sehe ra José cuví chí ra. Ta ra José, sehe ra Judá cuví chí ra.

²⁷ Ta ra Judá, sehe ra Joana cuví chí ra. Ta ra Joana sehe ra Resa cuví chí ra. Ta ra Resa, sehe ra Zorobabel cuví chí ra. Ta ra Zorobabel, sehe ra Salatiel cuví chí ra. Ta ra Salatiel, sehe ra Neri cuví chí ra.

²⁸ Ta ra Neri, sehe ra Melqui cuví chí ra. Ta ra Melqui, sehe ra Adi cuví chí ra. Ta ra Adi, sehe ra Cosam cuví chí ra. Ta ra Cosam, sehe ra Elmodam cuví chí ra. Ta ra Elmodam, sehe ra Er cuví chí ra.

²⁹ Ta ra Er, sehe ra Josué, cuví chí ra. Ta ra Josué, sehe ra Eliezer cuví chí ra. Ta ra Eliezer, sehe ra Jorim cuví chí ra. Ta ra Jorim, sehe ra Matat cuví chí ra.

³⁰ Ta ra Matat, sehe ra Leví cuví chí ra. Ta ra Leví, sehe ra Simeón cuví chí ra. Ta ra Simeón, sehe ra Judá cuví chí ra. Ta ra Judá, sehe ra José cuví chí ra. Ta ra José sehe ra Jonán cuví chí ra. Ta ra Jonán, sehe ra Eliaquim cuví chí ra.

³¹ Ta ra Eliaquim, sehe ra Melea, cuví chí ra. Ta ra Melea, sehe ra Mainán cuví chí ra. Ta ra Mainán, sehe ra Matata cuví chí ra. Ta ra Matata, sehe ra Natán cuví chí ra.

³² Ta ra Natán, sehe ra David, cuví chi ra. Ta ra David, sehe ra Isaí cuví chi ra. Ta ra Isaí, sehe ra Obed cuví chi ra. Ta ra Obed, sehe ra Booz cuví chi ra. Ta ra Booz, sehe ra Salmón cuví chi ra. Ta ra Salmón, sehe ra Naasón cuví chi ra.

³³ Ta ra Naasón, sehe ra Aminadab cuví chi ra. Ta ra Aminadab, sehe ra Aram cuví chi ra. Ta ra Aram, sehe ra Esrom cuví chi ra. Ta ra Esrom, sehe ra Fares cuví chi ra. Ta ra Fares, sehe ra Judá cuví chi ra.

³⁴ Ta ra Judá, sehe ra Jacob cuví chi ra. Ta ra Jacob, sehe ra Isaac cuví chi ra. Ta ra Isaac, sehe ra Abraham cuví chi ra. Ta ra Abraham sehe ra Taré cuví chi ra. Ta ra Taré, sehe ra Nacor cuví chi ra.

³⁵ Ta ra Nacor, sehe ra Serug cuví chi ra. Ta ra Serug, sehe ra Ragau cuví chi ra. Ta ra Ragau, sehe ra Peleg cuví chi ra. Ta ra Peleg, sehe ra Heber cuví chi ra. Ta ra Heber, sehe ra Sala cuví chi ra.

³⁶ Ta ra Sala, sehe ra Cainán cuví chi ra. Ta ra Cainán, sehe ra Arfaxad cuví chi ra. Ta ra Arfaxad, sehe ra Sem cuví chi ra. Ta ra Sem, sehe ra Noé cuví chi ra. Ta ra Noé, sehe ra Lamec cuví chi ra.

³⁷ Ta ra Lamec, sehe ra Matusalén cuví chi ra. Ta ra Matusalén sehe ra Enoc cuví chi ra. Ta ra Enoc, sehe ra Jared cuví chi ra. Ta ra Jared, sehe ra Mahalaleel cuví chi ra. Ta ra Mahalaleel, sehe ra Cainán cuví chi ra.

³⁸ Ta ra Cainán, sehe ra Enós cuví chi ra. Ta ra Enós, sehe ra Set cuví chi ra. Ta ra Set, sehe ra Adán cuví chi ra. Ta ra Adán, sehe Nyoo cuví chi ra.

4

Nu nducú nyehe cuihna chi ra Jesús (Mt. 4.1-11; Mr. 1.12-13)

¹ Ta chitú ra Jesús chihin Tatyí Ii Nyoo cha yahá condutya ra. Yucuan ta quitá ra nu cuví yuvi cahnu Jordán ta cuanuhu ra. Ta Tatyí Ii Nyoo chinyacá chi ra noo nu chiqui ndi.

² Yucuan chinyaá ra uvi xico quívi. Ta nducú nyehe cuihna chi ra. Ña chachi maa ra quívi cuan. Yahá cuan ta quichaha chisoco ra.

³ Yucuan ta quichaha catyí cuihna chi ra:

—Tatu ndicha cha Sehe Nyoo cuví chuun, catyí chi yuu cha catuví ihya, na nanduví pan.

⁴ Ta ra Jesús nacahan ra, ta catyí ra:

—Catyí tuhun Nyoo tyi ñima chihin cha cachi ri ñáyivi ta conyito ñu. Soco conyito tucu añima ñu chihin tandihí tuhun cahán Nyoo —catyí ra Jesús chi cuihna.

⁵ Yucuan ta quehen cuihna chi ra Jesús. Ta cuahan ra chihin ra noo nu sucun ca. Ta numi ri sañahá ra tandihí nu nyacá ñaha ñáyivi siqui ñuhu ñáyivi.

⁶ Ta cuihna catyí ra chi ra Jesús:

—Ndaha yuhu nyaá tandihí ñáyivi ihya. Vatyí chahá Nyoo cha cunyaca ñahi tandihí ihya siqui ñuhu ñáyivi. Ta cuví cuhve yóo chi cuñí mai cuhve.

⁷ Cuhve tandihí ñáyivi cuan chuun tatu yoho ta cuiñi chitun nui, ta sacahnun chii —catyí cuihna cuan chi ra Jesús.

⁸ Soco ra Jesús catyí ra chi cuihna:

—Canyaha chuun nui, cuihna. Vatyí nyaá tuhun cahán Nyoo ta catyí chi tyehe caa: “Noo ri chi maa Nyoo sacahnu yo. Ta ñn ri chi maa ra quichaha yo.”

⁹ Yahá cuan ta quehen tucu cuihna cuan chi ra Jesús. Ta chinyacá ra chi ra nya ñuu Jerusalén. Ta sandaá ra chi ra xiñi vehe ñuhu cahnu. Ta quichaha catyí ra chi ra Jesús:

—Tatu ndicha cha Sehe Nyoo cuví chuun, sandupehla nyacua nya nu ñuhú.

¹⁰ Vatyí nyaá nu catyí chi nu tutu Nyoo tyehe caa:

Nyoo cusaquichi ra ángel, quichi saha cuenda chuun.

¹¹ Cunaquehen ra chuun chihin ndaha ra. Ta ma cuhva ra cha taxin chahun chihin yuu —catyí ra chi ra.

¹² Tyicuan ta nacahan ra Jesús, ta catyí ra:

—Soco catyí tucu nu tutu Nyoo tyehe caa: “Ma nducu nyehun chi Sutu Mañi yo Nyoo”, —catyí ra.

¹³ Ta cuihna ña cuví sandahvi ñaha ra chi ra Jesús. Ta cuahan ra suhva quivi.

*Nu quichaha ra Jesús cahan ra tuhun Nyoo chihin ñáyivi
(Mt. 4.12-17; Mr. 1.14-15)*

¹⁴ Cha yaha tuhun cuan, ta nachaa ra ityi Galilea. Ta tyitú ra yihí chihin tunyee iñi Tatyí li Nyoo. Ta cahan ñáyivi tuhun ra tandihí ri ityi.

¹⁵ Ta sañahá ra chi ñáyivi nu cuví vehe ñuhu tandihí ri ñuu. Ta tandihí ñu sacahnú ñu chi ra.

*Nu nyaá ra Jesús Nazaret ñuu nu chahnú ra
(Mt. 13.53-58; Mr. 6.1-6)*

¹⁶ Tyicuan ta nachaa ra Jesús nya Nazaret, ñuu nu chahnú ra. Ta noo quivi nyitatu ñáyivi, ta quihvi ra chichi vehe ñuhu, tari tuhva maa ra. Ta chicunanyaá ra vatyí cua sacuahá ra tuhun Nyoo.

¹⁷ Ta chaha ñu noo libru Nyoo chi ra cha tyaá ra Isaías ra profeta Nyoo ta cha naha. Ta cuhva cha nuñá ra, nañihí ra noo nu catyí tyehe caa. Ta quichaha sacuahá ra:

¹⁸ Nyaá Tatyí li Nyoo chihin vatyí maa ra tachí chii.

Vatyí nacachí ra chii vatyí sañahi tuhun vaha ra chi tandihí ñáyivi ndahvi.

Tachí ra chii vatyí sanduvahi chi ñu uhvi añima.

Tachí ra chii vatyí sacote tuhun ra chi ñu nyaá ndaha ra ña vaha, vatyí cusacacu Nyoo chi ñu.

Tachí ra chii vatyí sanyehi chi ñáyivi cuaa.

Ta sacote chi ñu nyehe tindoho vatyí cucacu ñu.

¹⁹ Ta sacote chi ñu vatyí cha chaá quivi cha chahá Nyoo tumañi iñi chi ñu.

²⁰ Ndihi sacuahá ra ta nacasá ra nu libru cuan. Ta nacuhva ra chi noo ra cha nyaá vehe ñuhu cuan. Ta chicunyaá ra. Yucuan ta tandihí ñáyivi cha nyicú cuan ndo ñu nyehe ñu chi ra.

²¹ Yucuan ta quichaha catyí ra chi ñu:

—Vityin quivi ihya chinó cava tuhun cha nyaá nu libru cha sacuahí nuu ndo —catyí ra Jesús chi ñu.

²² Tandihí ñu, vaha cahan ñu tuhun ra Jesús. Ta iyo cuñí ñu tuhun cha cahan ra vatyí vaha xaan cha cahan ra. Ta quichaha ndaca tuhun ñu chi tahan ñu:

—¿Atu ñima ra ihya cuví sehe ra José?

²³ Ta quichaha catyí ra Jesús chi ñu:

—Chité cha nacacá iñi ndo. Vatyí tyehe caa cua catyí ndo chii: “Tatu ra sanduvahá cuvún, sanduvaha xihna ca chi maun. Tandihí cha chiñí ndi cha sacuvún ñuu Capernaum. Sacuvi tucu ñuu maun vityin.”

²⁴ Ta catyí tucu ra Jesús:

—Cha ndicha vatyí ni noo ra profeta Nyoo, ta ña quichaha ñáyivi ñuu ra chi ra.

25 Ta cha ndicha catyí chi ndo vatyí cuaha xaan ñu chihí y# chiyó Israel ihya cuiya cha chica noo ra Elías. Ta cuiya cuan ña coon savi uñi cuiya sisava. Ta cuaha xaan tama chiyó.

26 Soco ña tachí Nyoo chí ra Elías vatyí tyinyee ra chí ni noo ñu chihí y# Israel cuan. Soco tachí Nyoo chí ra nu nyaá noo ñaha chihí y# ñuu Sarepta cha nyaá yatyin ñuu Sidón.

27 Ta tyicuan caa tucu cuaha ra yihí cuehe cha tyahyu coño chí chiyó Israel quiví chica noo ra Eliseo, profeta Nyoo. Soco ña nduvaha ni noo ra Israel cuiya cuan. Minoo ri ra Naamán ra ñuu Siria nduvaha —catyí ra Jesús.

28 Ta cha chihí ñáyiví nyicú vehe ñuhu cuan tuhun cuan, cuxaan xaan tandihí cuií ñu.

29 Ta nducuita ñu. Ta tññ ñu chí ra Jesús. Tava ñu chí ra xiñi noo yucu nya yuhu ñuu, vatyí tuchi ñu chí ra yucuan.

30 Soco ra Jesús yaha ri ra mahñu ñu ta cuahan ra.

Noo ra cha yihí tatyí ña vaha chí
(Mr. 1.21-28)

31 Ta cuahan ra Jesús Capernaum cha nya Galilea quiví nyitatu ñáyiví. Ta quichaha sañaha ra chí ñáyiví.

32 Ta iyo cuñi ñu tuhun cahán ra. Vatyí ñihi cahán ra tari noo ra iyó vaha ityí chí cha cahán.

33 Ta chichi vehe ñuhu cuan nyaá noo ra cha yihí tatyí ña vaha chí. Ta quichaha canachaa ra, ta catyí ra:

34 —Saña chí ndi, yoho Jesús ra ñuu Nazaret. ¿Ñáá tuhun cha tyihun chuun chihin ndi? ¿Atu vachi sanaun chí ndi? Yuhu, ñohó nui chuun. Ta chité vatyí Sehe Nyoo cuví chuun —catyí tatyí ña vaha cuan sacahan chí chí ra cuan.

35 Ta cahan ra Jesús chihin tatyí ña vaha cuan, ta catyí ra:

—Taxi ri. Saña chí ra ndahví chíña —catyí ra.

Tyicuan ta tatyí ña vaha cuan sanduva chí ra cuan nu ñuhú. Ta quita tatyí cuan chí ra ta cuahan. Ta ñahri ca sacuví chí chí ra ndahví cuan.

36 Tandihí ñáyiví nayuhvñ ñu. Ta quichaha catyí ñu chí tahan ñu:

—¿Ñáá túhun cuví ihya? Ra Jesús ihya chihin cha iyó ityí chí ra ta chihin tunyee iñi ta tachi ra chí tatyí ña vaha cuan na quita. Ta quichaha chí nu cahán ra —catyí ñu.

37 Ta tandihí ri ityí cahán ñáyiví tuhun ra Jesús.

Nu sanduvaha ra Jesús chí maha tyiso ra Simón Pedro
(Mt. 8.14-15; Mr. 1.29-31)

38 Ta quita ra Jesús chichi vehe ñuhu cuan. Ta chaa ra vehe ra Simón. Ta tyiso ra Simón cuhví ña chihin cahñi. Ta quichaha cahán ñu chihin ra Jesús cha cuenda ña.

39 Ta nanyehé noo ra nu catuví ña. Ta quichaha catyí ra chí cahñi cuan vatyí na quita. Ta caa cuhva ri cuan ta quita cahñi cuan chí ña. Ta nducuita ri ña. Ta quichaha tyiñuhu ña chí ra.

Cuaha xaan ñu cuhví sanduvaha ra Jesús
(Mt. 8.16-17; Mr. 1.32-34)

40 Ta cuhva cha quee ñanyii, tandihí maa ñu cha cumí chí ñu cuhví tandihí nuu cuehe, chinyaca ñu chí ra Jesús. Ta tyiso ra ndaha ra siqui noo noo ñu. Ta tyicuan caa ta sanduvaha ra chí ñu.

41 Ta chichi cha tandihí ñu yihí ñu cha yihí tatyí ña vaha chí, ta quita chí. Ta suri cana chaa chí cuahan coyo chí, ta catyí chí:

—Yoho Sehe Nyoo cuví chuun —catyí chí.

Soco ña chaha ca ra Jesús cha cahan chí. Vatyí chitó chí vatyí ra Cristo, ra cha saquichí Nyoo cuví ra.

*Nu cahán ra Jesús tuhun Nyoo nuu tandihí cuií ñáyivi ñuu cha iyó Galilea
(Mr. 1.35-39)*

⁴² Cundichin cuan ta quitá ra Jesús ñuu cuan. Ta cuahan ra noo nu taxi ri iyó. Soco ñáyivi nanducú ñu chí ra. Ta chaá ñu nya nu ñohó ra. Ta ña cuñí ñu cha cuhun ra.

⁴³ Soco catyí ra Jesús chí ñu:

—Cumañi sacote chí ñáyivi inga ñuu tuhun vaha yoso caa nyacá ñaha Nyoo aña ñu. Vatyí yucuan chaha vachi siqui ñuhu ñáyivi.

⁴⁴ Ta tyicuan caa chicá noo ra Jesús cahán ra tuhun Nyoo vehe ñuhu ityí Galilea.

5

*Nu chaha ra Jesús noo nyatu cha ñihi ra cuaha xaan tiyaca
(Mt. 4.18-22; Mr. 1.16-20)*

¹ Noo quivi nyaá ra Jesús yuhu miñi nu cuví Genesaret. Ta chaá coyo cuaha xaan ñáyivi, vatyí cuñí ñu cuiñi ñu tuhun Nyoo. Ta tihin xaan ñohó ra Jesús mahñu ñu.

² Ta nanyehé ra uvi tahan canoa yatyin ri yuhu miñi cuan. Yori ñohó chichi. Vatyí cha quitá coyo ra catiín tiyaca cuan. Ta cha quichaha canacatyá ra yuhva ra.

³ Yucuan ta quihvi ra Jesús chichi noo canoa cuan. Ta canoa cuan chí ra Simón cuví. Ta catyí ra chí ra vatyí na tyandaha ra suhva ca cuhun nya mahñu ca cuan. Tyicuan ta chicunyaá ra Jesús chichi canoa cuan. Ta quichaha sañaha ra chí ñáyivi.

⁴ Cuhva cha ndihí cahan ra, catyí ra chí ra Simón:

—Sacuhun canoa nya nu cama ca ndutyá cuan. Ta tuchi ndo yuhva vatyí tñin ndo tiyaca —catyí ra Jesús chí ra.

⁵ Ta nacahan ra Simón ta catyí ra:

—Maestro, cha sahá tyiño xaan ndi ñiyaca maa ta ni noo tiyaca ña ñihi ndi. Soco tatu maun catyí, cuatuchi tucu ndi yuhva —catyí ra Simón.

⁶ Cuhva cha cacañi ra yuhva cuan, cuaha xaan tiyaca ñihi ra. Ta nyacua tahnya yuhva ra chihin cha vee ti.

⁷ Tyicuan ta cachaça ra seña chí ra tahan ra, ra cha canyicú chichi inga canoa cuan, na quichí coyo ra ta tyinyee ra chí ra. Yucuan ta chaá coyo ra cuan. Ta casacutu ra ninduvi canoa cuan chihin tiyaca. Ta nyacua cuñí nyee canoa cuan cha tyitu yihí tiyaca.

⁸ Cha nanyehé ra Simón Pedro cha tyicuan caa, ta chicuñi chiti ra nuu ra Jesús. Ta catyí ra chí ra:

—Cuachiyo chuun nui, Sutu Mañi yuhu, vatyí yuhu ra iyó cuatyí cuví —catyí ra.

⁹ Vatyí ra Simón iyo xaan cuñi ra chihin tandihí ra canyicu chihin ra. Vatyí cuaha xaan tiyaca catiín ra.

¹⁰ Tyicuan caa tucu ra tahan ra Simón: ra Jacobo chihin ra Juan, sehe ra Zebedeo, iyo xaan cacuñi ra. Ta catyí ra Jesús chí ra Simón:

—Ma iyo xaan cuñun. Vatyí vityin ta nu cuahan ca chi quívi, ma tñin con tiyaca. Soco cunducun ñáyívi, tavon chi ñu nu quiñi caa na quihvi ñu cuenda Nyoo —catyí ra Jesús chi ra Simón.

¹¹ Yucuan ta casacunuha ra canoa nya ñuhu ityi. Ta casandoq ra tandihi cha iyó chi ra nyacua nya tiyaca cha tñin ra. Ta cuahan ra chihin ra Jesús.

Nu sanduvahaq ra Jesús chi noo ra tyahyu coño

(Mt. 8.1-4; Mr. 1.40-45)

¹² Noo quívi ñohó ra Jesús noo ñuu nu iyo noo ra cuhví. Ta tyahyu xaan coño ra. Ta cha nanyehe ra chi ra Jesús, ta chicuñi chiti ra nuu ra. Ta nacañinoo ra xiñi ra nya nu ñuhu. Ta chacu ndahvi ra nuu ra, ta catyí ra:

—Sutu Mañi yuhu, tu yoho ta cuñún, cuví sanduvahun chii —catyí ra.

¹³ Tyicuan ta tyisoq ra Jesús ndaha ra siqui ra. Ta catyí ra:

—Cuñi sanduvahi chuun. Ta na nduvahun vityin ri —catyí ra Jesús chi ra. Ta caa cuhva ri cuan ta nduvahaq ra cuan.

¹⁴ Tyicuan ta catyí ra Jesús chi ra:

—Ma nacatyun chi ñáyívi. Noo ri catyí chuun, cuahan nu nyaá tata sutu. Ta sañahun chuun chi ra. Ta cuhva cuendon cha tahán chi cuhvon tari cuhva catyí nu ley ra Moisés tacuhva coto ñáyívi vatyí nduvahun —catyí ra Jesús chi ra.

¹⁵ Vasi ña cuñi ra cha coto ñáyívi, soco cuaha ca ñáyívi ñihi ñu tuhun ra. Ta cuaha xaan ñáyívi ndu ñin ri ñu, vatyí cuñi ñu cuiñi ñu tuhun cahán ra. Ta cuñi xaan ñu nduvaha ñu.

¹⁶ Soco ra Jesús, canyaha canyaha ri ra nu iyó ñáyívi. Ta cuahan ra noo nu yori ñáyívi iyó. Ta yucuan chicān tahvi ra chi Nyoo.

Nu sanduvahaq ra Jesús chi noo ra cuhvi cha ña cuví nacanda

(Mt. 9.1-8; Mr. 2.1-12)

¹⁷ Noo quívi sañahá ra Jesús chi ñáyívi. Ta chicunycú suhva ra fariseo, ra quichahá xaan ley vehe ñuhu cha tyaaq ra Moisés ta cha naha. Ta nyicú tucu suhva ra sacuahá cuenda ley vehe ñuhu cuan. Quichi coyo ra ñuu cha iyó Galilea, ta ñuu Jerusalén, ta tandihi ca ñuu cha iyó Judea. Ta iyó xaan tunyee iñi Nyoo chi ra Jesús, tacuhva vatyí sanduvaha ra chi ñu cuhví.

¹⁸ Yucuan ta chaq coyo ra canyisó chihin noo chito chi noo ra ña cuví nacanda. Ta cuñi ra quihvi ra chichi vehe ta cacun ra chi ra nuu ra Jesús.

¹⁹ Soco ña cuví quihvi ra vatyí tuvi xaan ñáyívi. Tyicuan ta candaq ra ityi xiñi vehe. Ta sacuachiyó ra suhva tyiyo. Tyicuan ta sanoq ra chi ra cuhví cuan maa nuu ra Jesús mahñu nu tuvi ñáyívi cuan.

²⁰ Yucuan cuví nu nyehe ra Jesús vatyí cachinó xaan iñi ra chi ra. Ta quichaha catyí ra chi ra cuan:

—Xaa, cha chicoq ticahnu iñi tandihi cuatyun —catyí ra Jesús.

²¹ Tyicuan ta ra casacuahá cuenda ley vehe ñuhu chihin ra fariseo quichaha nacuaan iñi ra: “¿Yóo ra cuví ra ihya? Vatyí cuñi maa ra vatyí cuví saha ra ticahnu iñi cuatyí yo. Noo ri maa Nyoo cuví saha ra ticahnu iñi cuatyí yo”, ndichi xiñi ra.

²² Soco ra Jesús chitó ra tuhun chicá xiñi ra. Ta quichaha catyí ra chi ra:

—¿Ñáá tuhun chicá xiñi ndo tyehe caa?

²³⁻²⁴ ¿Ñáá cha yñi ca catyí yo? ¿Atu yñi ca catyí yo: “Cuatyun cha yahā ndachi”, o yñi ca catyí yo chi noo ñáyívi: “Ndñcuita ta cacon”? Soco vityin cua sañahi chi ndo vatyí iyó ityi chii cha sahi ticahnu iñi cuatyí. Vatyí yuhu Rayñi

cha quichi nya gloria cuví. Ta vityin cua sanduvahi chi ra ña cuví caca ihya —catyí ra Jesús.

Tyicuan ta quichaha catyí ra chi ra cha catuví cuan:

—Catyí chuun, ndicuita. Naquehen chiton ta cuñuhu nya vehun.

²⁵ Ta caa cuhva ri cuan nducuita ra cha cuhvi cuan, ta naquehen ra chito ra. Ta cuanuhu ra vehe ra, suri sacahnú ra chi Nyoo.

²⁶ Tandihí ñáyivi iyo xaan cuñí ñu. Ta yuhví xaan ñu. Ta sacahnú ñu chi Nyoo, ta catyí ñu:

—Vityin ndicha nyehé yo minoo tuhun cha iyo caa —catyí ñu.

Nu cana ra Jesús chi ra Leví

(Mt. 9.9-13; Mr. 2.13-17)

²⁷ Yaha cuan ta quitá ra Jesús vehe cuan. Ta nanyehé ra chi noo ra cha tavá xuhun cuenda gobiernu ñuu Roma. Ta nañí ra Leví. Ta nyaá ra nu tyiyahví ñáyivi. Ta catyí ra Jesús chi ra:

—Coho chihin —catyí ra.

²⁸ Tyicuan ta nducuita ra Leví. Ta sandoo ra tandihí cha iyó chi ra. Ta cuahan ra chata ra Jesús.

²⁹ Tyicuan ta savaha ra Leví noo vico cahnu vehe ra cuenda ra Jesús. Ta cuaha vavaha ra catavá xuhun cuenda gobiernu ñuu Roma canyicú ra mesa. Ta canyicú tucu inga ñáyivi.

³⁰ Soco ra fariseo chihin ra sacuahá ley vehe ñuhu quichaha cahan nyaá ra chi ra cachicá noo chihin ra Jesús ta catyí ra:

—¿Ñáá tuhun chachí ndo ta chihí ndo chihin ra catavá xuhun ta chihin ra cahnu cuatyí? —catyí ra.

³¹ Ta ra Jesús nacahan ra, ta catyí ra:

—Ña chiñuhú doctor chi ra iyó vaha. Chi ra cuhví, yucuan ra chiñuhú doctor chi.

³² Yuhu ña vachi tyinyei chi ñu vaha sahá chi, soco vachi tyinyei chi ñu chitó vatyi iyó cuatyí, vatyi tacuhva nasama ñu cuhva iyó ñu —catyí ra Jesús chi ra.

Nu sañahá ra Jesús vatyi cha yaha canyaha ra chi ñu nyicón chi ra, cusavaha ñu ayuno

(Mt. 9.14-15; Mr. 2.18-20)

³³ Tyicuan ta quichaha candaca tuhun ra chi ra Jesús, ta catyí ra:

—Ra canyicón chi ra Juan savahá ra ayuno, ña cachachí ra ta nanducú ra chi Nyoo, ta tyicuan caa tucu ra fariseo. Soco ra cachicá noo chihin yoho, ndi quívi maa chachi ra ta chihi ra. ¿Ñáá tuhun? —catyí ra.

³⁴ Ta nacahan ra Jesús, ta catyí ra:

—¿Atu cuví cha ma cuhva ndo cachi ñu canyicu vico tandaha tatu nyaá ra cha cua tandaha chihin ñu? Ma cuví. Vatyi sá cuñí ñu, ta cuñí ñu cachi ñu.

³⁵ Soco cuchaa quívi cuachiyo ra tandaha cuan nu nyicú ñu. Yucuan ndicha quívi, ta cusaha ñu ayunar.

Nu sañahá ra Jesús vatyi ña nacachi tahan tuhun chahnu cha iyó ñáyivi chihin tuhun chaa cha sañahá ra

(Mt. 9.16-17; Mr. 2.21-22)

³⁶ Tyicuan ta cahan ra Jesús noo cuhva chihin ñu, ta catyí ra:

—Yori cahnya noo sahma chaa, ta chihin cuan naquicu ñu noo sahma chahnu. Vatyi tatu sacuvi ñu tyicuan caa, cundiysi sahma chaa cuan. Ta sá ri ma cuhva chi chihin sahma chahnu cuan.

³⁷ Ta tyicuan caa tucu ma cuvi tyihi ñáyiví vinu chaa chichi ñi chahnu. Vatyí cutahnya ñi cuan chihin vinu chaa cuan. Ta tiví vinu cuan ta tiví ñi chahnu cuan ñandihí.

³⁸ Yucuan chaha tahán chí tyihi yo vinu chaa chichi ñi chaa. Vatyí tyicuan ta ninduví ta saha cuenda chí tahan.

³⁹ Ta yori ñu chihi vinu chahnu, ta cuñí ñu coho ñu cha chaa. Vatyí catyí ñu, vaha ca vinu chahnu. Cuñí ca ñu vinu chahnu cuan vatyí ican cuan cuví costumbre cha iyó maa ñu.

6

*Tohon ra cachicá noo chihin ra Jesús yoco trigu quiví nyitatu ñáyiví
(Mt. 12.1-8; Mr. 2.23-28)*

¹ Noo quiví cha nyitatu ñáyiví, yahá ra Jesús mahñu cha tachí ñu. Ta ra cachicá noo chihin ra catohón ra yoco trigu. Ta casacoyó ra chihin ndaha ra. Ta cachachí ra chiti cuan.

² Tyicuan ta catyí suhva ra fariseo chí ra:

—¿Ñáá tuhun cha sacuví ndo noo tyiño cha ña tahán chí sacuví yo quiví nyitatu yo?

³ Ta nacahan ra Jesús, ta catyí ra:

—¿Atu ta sacuahá ca ndo cha sacuví ra David chihin ra tahan ra quiví cha chisoco ra?

⁴ Quihví ra chichi vehe Nyoo. Ta quehen ra pan cha chacun ñáyiví nuu Nyoo. Ta chachí ra. Ta chahá ra chí ra candihí chihin ra. Ta maa ri maa tata sutu tahán chí cachi pan cuan —catyí ra Jesús.

⁵ Yucuan ta catyí tucu ra Jesús:

—Yuhu cuví Rayíi cha quichí nya gloria. Ta iyó ityí chii vatyí catyí chí noo noo ndo ñáá cha sacuví ndo quiví nyitatu yo —catyí ra.

*Nu sanduvahá ra Jesús chí noo ra cha ityí ndaha
(Mt. 12.9-14; Mr. 3.1-6)*

⁶ Inga quiví cha nyitatu ñáyiví, quihví ra Jesús chichi vehe ñuhu. Ta quichaha sañaha ra chí ñáyiví. Ta yucuan nanyehé ra chí noo ra cha na ityí chiyo ndaha vaha.

⁷ Ta ra casacuaha cuenda ley chihin ra fariseo, canducú nyehe ra chí ra Jesús, tatu sanduvaha ra chí ra cuhví cuan quiví nyitatu ñu. Tyicuan caa ta cuvi tyaa ra cuatyí siqui ra.

⁸ Soco ra Jesús chitó ra tuhun chicá xiñi ra. Ta catyí ra chí ra cha ityí ndaha cuan:

—Ndūcuita. Ta cuinanyaun mahñu ihya.

Tyicuan ta ra cha ityí ndaha cuan nducuitá ra. Ta chicunanyaá ra mahñu.

⁹ Tyicuan ta catyí ra Jesús chí ra canyicú cuan:

—Cua nducu tuhun noo tuhun chí ndo. ¿Yoso caa cuhva tahán chí cha sacuví yo quiví nyitatu yo? ¿Atu tahán chí vatyí sacuví yo cha vaha, o cha ña vaha? ¿Atu tahán chí vatyí sacacu yo chí ñáyiví, o cha cahñi ndihí yo chí ñu?

¹⁰ Tyicuan ta ra Jesús nanyehé ra chí noo noo ra canyicú cuan. Ta quichaha catyí ra chí ra cuhví cuan:

—Sanacaa ndahun.

Tyicuan ta ra cuhví cuan sanacaá ra ndaha ra. Ta nduvahá ndaha ra.

¹¹ Soco suhva ra canyicú cuan, cuxaan xaan ra. Ta quichahá candaca tuhun ra chí ra tahan ra:

—¿Yoso caa sacuví yo tacuhva cha ma cuvi ca cahan ra Jesús nuu ñáyivi?
—cacatyí ra.

Nacachi ra Jesús ndi uchi uvi tahan ra tyi caca ra tyiño ra
(Mt. 10.1-4; Mr. 3.13-19)

¹² Quívi cuan ndaa ra Jesús noo yucu. Ta ñiyaca maa chicán tahvi ra chi Nyoo.

¹³ Cuhva cha cundichin, cana ra chi tandihi ri ñu nyicón chi ra. Ta nacachi ra uchi uvi tahan ri ra. Ta sacunañi ra chi ra, apóstol ra, ta cuñi chi catyí, ra caca tyiño nuu ra.

¹⁴ Ta ihya nyaá sivi ndi uchi uvi tahan ra: Ra Simón ra cha sacunañi ra Cristo Pedro chi, ta yañi ra, ra Andrés, ta ra Jacobo, ra Juan, ra Felipe, ra Bartolomé,

¹⁵ ra Mateo, ra Tomás, ra Jacobo sehe ra Alfeo, ta ra Simón ra yihí cuenda ityi ra cacuñi cahun cuatyí siqui gobiernu ñuu Roma cha nyacá ñaha chi ñu.

¹⁶ Ta ra Judas, yañi ra Jacobo, ta ra Judas Iscariote, ra cha naxico tuhun chi ra Jesús.

Nu sañahá ra Jesús chi cuaha xaan ñáyivi
(Mt. 4.23-25)

¹⁷ Noo ra Jesús yucu cuan chihin ndi uchi uvi tahan ra. Ta chicutayucu ra nu ndaa cuan chihin ñu nyicón chi ra. Ta cuaha ri ityi quitá coyo ñáyivi. Quitá coyo ñu ñuu Jerusalén ta tandihi ca ñuu cha iyó Judea, ta ñuu Tiro chihin ñuu Sidón cha nyicú yuhu tyañuhu. Ta chaa ñáyivi cuan vatyí cuiñi ñu tuhun cahan ra Jesús. Ta tandihi ñu cuhví cuñi ñu vatyí sanduvaha ra chi ñu.

¹⁸ Ta tandihi ñu cha yihí tatyí ña vaha chi, nduvaha ñu saha ra.

¹⁹ Ta tandihi ñu cuñi ñu tin ñu chi ra. Vatyí nduvaha ñu chihin tunyee iñi Nyoo, vasi tacuhva tin ri ñu chi ra.

Ñu ñihí tumañi iñi, ta ñu ña ñihí tumañi iñi
(Mt. 5.1-12)

²⁰ Tyicuan ta nanyehē ra Jesús chi ra cachicá noo chihin ra. Ta quichaha catyí ra chi ra:

—Tandihí nyoho cha ndahvi ndo, sñi xaan cuví chi ndo, vatyí tahan chi cha cunyaca ñaha Nyoo añima ndo.

²¹ Tandihí nyoho cha chisocó ndo vityin, sñi xaan cuví chi ndo. Vatyí coo quívi cha ma nyehe ca ndo soco. Tandihí nyoho cha chacú chaa ndo cha cuihya iñi ndo, sñi xaan cuví chi ndo vatyí coo quívi ta ñahri ca tucuihya iñi coo chi ndo. Ta cuacu ndo chihin cha sñi cuñi ndo.

²² Sñi xaan cucuvi chi ndo, quívi cha tasi cuñi ñáyivi nyehé ñu chi ndo, quívi tavá ñehe ñu chi ndo nu nyaá ñu, quívi cahan ñu chi ndo, quívi catyí ñu vatyí ñáyivi ña vaha cuví ndo vatyí chinó iñi ndo chi yuhu Rayi cha quichí nya gloria.

²³ Sñi xaan cucuvi chi ndo quívi nyehe ndo tindoho cuan vatyí tyicuan caa tucu sacuví ñáyivi ta cha naha. Cahān vavaha ñu chi ra cacuvi profeta Nyoo. Caña ndava ndo chihin cha sñi cuñi ndo. Vatyí cahnu xaan cha cucuhva Nyoo chi ndo gloria.

²⁴ Soco ndahvi nyoho, ñu tyayii. Vatyí vityin sñi xaan cuñi ndo chihin tandihí cha tyayii ndo. Soco coo quívi maa maa ri tundoho cunyehe ndo. Vatyí ñahri cuñihi ndo nuu Nyoo.

²⁵ Ta ndahvi nyoho cha cuñi maa ndo vatyi ñahri cumañi chi ndo cha vityin, vatyi coo quivi cunyehe ndo soco. Nyoho cha si cuñi ndo cha vityin, ndahvi nyoho vatyi coo quivi cunyehe ndo tucuihya iñi. Ta cuacu chaa ndo.

²⁶ Ta ndahvi nyoho vatyi vaha cahán ñáyivi siqui ndo. Vatyi tyicuan caa tucu ñáyivi ta cha naha, vaha xaan cahán ñu siqui ra cha cahán cha ña ndicha.

Cuñi ndo chi ñu xaan iñi chi ndo
(Mt. 5.38-48; 7.12)

²⁷ Tandihí nyoho cha chiñi ndo tuhun cahán, catyí chi ndo tyehe caa: Cuñi ndo chi ñu xaan iñi chi ndo. Sacuvi ndo cha vaha chihin ñu cha tasi cuñi nyehe chi ndo.

²⁸ Cahán ndo cha vaha chihin ñu cha cahán ña vaha siqui ndo. Cacan tahvi ndo chaha ñu cahán chi ndo.

²⁹ Tatu yóo cha cañi inchiyo nuu ndo, cuhva tucu ndo inga chiyo nacañi maa ñu. Tatu yóo cha tinyaa chaqueta ñihno ndo, cuhva ndihí ndo camiseta ndo.

³⁰ Cuhva ndo ñáa ndihí cha chicán ñu chi ndo. Tatu tinyaa ñu ñáa cha iyó chi ndo, ma ndacan ndo chi ñu.

³¹ Tari cuhva cuñi ndo cha sacuvi ñáyivi cha vaha chihin ndo, tyicuan caa sacuvi ndo cha vaha chihin ñu.

³² Tatu cuñi ndo chi maa ri maa ñu cha cuñi chi ndo, ñahri cha vaha xaan sacuvi ndo. Vatyi tyicuan caa nyacuví tucu ñu quiñi iyó, cuñi ñu chi ñáyivi ñohó nuu ri ñu.

³³ O tatu sacuvi ndo cha vaha chihin ñu cha sacuvi cha vaha chihin ndo, ñahri cha vaha xaan nyacuví ndo. Vatyi tyicuan caa nyacuví tucu ñu quiñi iyó.

³⁴ O tatu sacuvi ndo tumañi iñi chi noo ñáyivi, ta yihí iñi ndo vatyi cusacuvi tucu ñu cuan tumañi iñi chi ndo, ñahri cha vaha nyacuví ndo. Vatyi tyicuan caa nyacuví tucu ñu quiñi iyó. Tatu ñáa noo tumañi iñi sacuvi ñu chi tahan ñu, nyatú ñu cha nacuhva tucu ñu cuan tumañi iñi chi ñu.

³⁵ Soco nyoho, cuñi ndo chi ñu xaan iñi chi ndo. Ta sacuvi ndo cha vaha chi ñu. Ta cuhva noo ndo chi ñu. Soco ma cuatu ndo ñáa tumañi iñi cunacuhva ñu chi ndo. Tyicuan ta cahnu xaan cha cuñihi ndo nuu Nyoo ta cucuvi ndo sehe vaha Nyoo cahnu. Vatyi Nyoo vaha ñáyivi cuví ra chihin ñu cha ña nacuhva tyahvi nyoo chi ra ta chihin ñu quiñi iyó.

³⁶ Vaha ñáyivi cuví ndo chihin ñáyivi, tari maa Nyoo Sutu yo, vaha ñáyivi cuví ra chihin ndo.

Ma cahán yo cha caa inga tahan yo
(Mt. 7.1-5)

³⁷ Ma cahán ndo cha caá tahan ndo, tyicuan ta Nyoo ma tñin cuenda ra cha caá maa ndo. Ma soco ndo chi ñáyivi cha cuhun ñu anyaya, tyicuan ta ma sacuhun Nyoo chi ndo anyaya. Saha ndo tucahnu iñi chi ñáyivi. Ta Nyoo cusaha ra tucahnu iñi chi maa ndo.

³⁸ Cuhva ndo cha chiñuhú chi ñáyivi. Ta tyicuan caa cuhva tucu maa Nyoo cha chiñuhú chi maa ndo. Noo ñáyivi vaha, tatu xicó ñu ñáa cha xicó ñu chi ndo, tyitu maa chahá ñu chi ndo, tyicuan caa tucu cuhva Nyoo chi ndo. Vatyi tari cuhva cuhva ndo chi ñáyivi, tyicuan caa cuhva cuhva Nyoo chi ndo —catyí ra Jesús.

³⁹ Ta chahá ra Jesús cuhva ihya chi ñu, ta catyí ra:

—Noo ra cuaa ña cuví sañaha ra ityi chi nonga ra cuaa. Vatyi ninduvi ra ña nyehé ra ityi cuahan ra. Ta cuví canacoyo ra chichi noo xahva. Tyicuan caa

tucu noo ra ña chitó ityi Nyoo, vasi cuñí ra, soco ma cuvi sañaha ra ityi Nyoo chí nonga ra.

⁴⁰ Ni noo ra cuatyaa sícuela ma cuvi coto ra cha chitó ra cha sañaha chí ra. Vatyí nicaa ni quichaha sacuaaha ra. Coto ra soco nya ndihí sacuaaha ra.

⁴¹ ¿Yoso caa tyi nyehún cuatyí luhlu cha cuví tari mihin lee ri cha yihí chíti nuu tahun, ta ña sahan cuenda cuatyí cahnu cha iyó chuun cha cuví tari vitu cahnu cha yihí nuu maun?

⁴² Tatu chíti nuu maun yihí noo vitu cahnu, yoso caa cuví catyun chí ra yañun: “Nyaca, natave mihin lee cha yihí chíti nuun.” ¡Yoho cha savahún chuun! Tava xihna vitu cahnu cha yihí chíti nuun. Tyicuan ta cuví nyehe vahun mihin lee cha cutavon chíti nuu yañun.

Chihin cha sacuví ñáyivi ta nicohon nuu ri yo chí ñu tatu ñu vaha, o ñu ña vaha cuví ñu

(Mt. 7.17-20; 12.34-35)

⁴³ Noo yutun vaha chahá tun chíti vixi, chíti vaha. Ta noo yutun ña vaha chahá tun chíti ña vaha.

⁴⁴ Tandihí yutun nicohon nuu yo chí tun chihin chíti ri tun. Vatyí tuñiyaca, ma cuhva tun mangu. Ta ni ri noo iñu nduhva ma cuhva tun tichaha ndivi.

⁴⁵ Ta tyicuan caa tandihí ñáyivi vaha, tuhun vaha cahán ñu. Vatyí yihí cha vaha añima ñu. Soco ñáyivi ña vaha, maa maa ri maa tuhun ña vaha cahán ñu. Vatyí yihí cha caquiñi añima ñu. Chihin yuhu ñu cahán ñu tandihí cha quiñi caa cha quitá añima ñu.

Cacu añima ñu quichahá tuhun cahán ra Jesús, ta ñu ña quichahá tuhun cahán ra, ma cacu ñu

(Mt. 7.24-27)

⁴⁶ ¿Ñáá tuhun cha catyí ndo chii, “Sutu Mañi yuhu, Sutu Mañi yuhu”, tatu ña sacuví ndo tari cuhva cha catyí chí ndo?

⁴⁷ Ihya cua catyí chí ndo yóo chí ndacu nyoho cha vachi ndo nu nyaí, ta tyasohó ndo cha cahín, ta sacuví ndo cha catyí.

⁴⁸ Tari noo ra chitó vaha savaha vehe cuví ndo. Vatyí xihna ca chatyá ra cono vavaha ta tahan ra yuu. Ta siqui yuu cuan savahá ra vehe ra. Ta quivi coon xaan savi, ta cama xaan ndutya yahá, ta ña nduva vehe cuan vatyí siqui yuu nanyaá chí.

⁴⁹ Soco ñu cha chiñí tuhun cahín ta ña sacuví ñu tari cuhva catyí, cuví ñu tari minoo ra ña chitó savaha vehe. Vatyí ña chatyá ra nu quiñi chaha vehe ra. Ta ñima nu yuu savaha ra vehe ra. Ta chaa quivi cha coon savi. Cama xaan ndutya yaha. Ta chatya chí chaha vehe ra vatyí ñuhu ri cuví. Ta nduva vehe ra vatyí ña cunye. (Ta tyicuan caa cuví ñáyivi, tatu sacuví ñu tari cuhva catyí, tyicuan ta cacu ñu. Soco tatu ma sacuví ñu, ma cacu ñu) —catyí ra Jesús.

7

Nu sanduvaha ra Jesús noo musu capitán sindaro

(Mt. 8.5-13)

¹ Cuhva cha ndihí cahan ra Jesús chihin ñáyivi, ta cuanuhu tucu ra inga chaha nya Capernaum.

² Ta yucuan iyó noo capitán cha nyacá ñaha noo cientu sindaro cuatyí. Ta iyó noo musu ra cha cuñí vavaha ra. Ta cuhví ra. Ta cha cuñí cúvi ra.

³ Quiví cha chitó capitán cuan tuhun ra Jesús, tachí ra chi suhva ra cacuvi mandoñi ñuu Israel na cucahan ra chihin ra Jesús, vatyí na quichi ra vatyí sanduvaha ra chi musu ra.

⁴⁻⁵ Tyicuan ta chaꝯ coyo ra mandoñi cuan nu nyaá ra Jesús. Ta quichaha catyí ra chi ra:

—Iyó noo capitán cuenda ñuu Roma. Ta vaha xaan ñáyiví cuví ra chihin yo cha cuví yo ñáyiví Israel. Nyacua savahꝯ ra noo vehe ñuhu yo. Ta tahán chi vatyí tyinyeun chi ra. Vatyí cuhví xaan noo musu ra. Ta cuñí ra vatyí sanduvahun chi ra.

⁶ Tyicuan ta cuahan ra Jesús chihin ra. Soco cuhva cha cumañi ca cha ra nya vehe capitán cuan, capitán cuan tachí ra chi suhva ra tahan ra. Ta quichaha catyí ra chi ra Jesús:

—Tata, catyí capitán vatyí ma sayangon chuun cha cuhun nya vehe ra na. Vatyí ña naña ra cha cuhun, na.

⁷ Yucuan chaha ña caña iñi ra quichi ra nu nyaún. ¿Atu ma sahun noo tumañi iñi chi ra vatyí noo tuhun cahan run ihya ri, ta nduvaha ri musu ra, na?

⁸ Vatyí maa ra capitán cuví ra. Ta nyacá ñaha rey chi ra. Ta maa ra nyacá ñaha ra chi ra cuatyí ca cha nuu ra. Tatu tava ra tyiño chi noo ra cuatyí cuan, na cuhun ra. Cuhun ra. O tatu catyí ra chi nonga ra na quichi ra, quichi ra. O tatu tachí ra chi inga ra na sacuví ra tyiño, sacuví ra. Ta tyicuan caa tucu yoho, tatu catyun na nduvaha musu ra, tyicuan ta nduvaha ra na —catyí ra tahan capitán cuan chi ra Jesús.

⁹ Cha chiñí ra Jesús cha catyí ra cuan ta iyo xaan cuñí ra. Ta nanyehꝯ ra chi ñáyiví cha nyicú chihin ra, ta catyí ra:

—Ndicha ndicha cuii vatyí chinó xaan iñi capitán cuan. Ta nañihi que chi ni noo ra Israel cha chinó xaan iñi tari ra cuan —catyí ra.

¹⁰ Yucuan ta cuanuhu ra tahan capitán cuan. Ta cha nachaꝯ coyo ra nya vehe, ta nanyehꝯ ra vatyí cha nduvahꝯ musu cuan.

Nu sanandotoꝯ ra Jesús chi sehe noo ñaha ndahvi chihí yíi

¹¹ Cha yaha tuhun cuan ta cuahan ra Jesús noo ñuu cha nañí Naín. Ta cuahan tucu ra cachicá noo chihin ra, ta cuaha xaan ñáyiví ñandíhi.

¹² Tyicuan ta cuhva cha cua cha ra yatyin ñuu cuan, nanyehꝯ ra cuaha ñáyiví quitá coyo ñuu cuan. Ta canyisó ñu noo ndiyí, cuacuchi ñu sehe noo ñaha ndahvi cha chihí yíi. Ta noo tuhun ri maa ra iyó chi ña, ta chihí ra.

¹³ Ta cha nanyehꝯ ra Jesús chi ña, ta cundahví cuñí nyehe ra chi ña. Ta quichahaꝯ catyí ra chi ña:

—Ma cuacun.

¹⁴ Tyicuan ta tuhvaꝯ ra ta tñn ra chatun cha yíhí ndiyí cuan. Tyicuan ta ra canyisó chi ndiyí cuan chicuitayucu ra. Ta catyí ra Jesús chi ndiyí cuan:

—Ndícuíta, ra cuehe —catyí ra.

¹⁵ Tyicuan ta ndícuíta ndiyí cuan. Ta nicunyaa ra. Tyicuan ta quichaha cahan ra. Ta ra Jesús nacuhva cuenda ra chi ra chi síhi ra.

¹⁶ Cha nanyehꝯ ñu cha tyicuan caa ta yuhvi xaan ñu cuví. Ta quichaha sacahnu ñu chi Nyoo. Ta catyí ñu:

—Cahnu xaan ra profeta Nyoo tuví nu nyicú yo ihya.

Ta catyí tucu ñu:

—Maa Nyoo, ican vachi nu nyicú yo, vachi tyinyee ra chi yo —catyí ñu.

¹⁷ Ta tandíhi maa ñáyiví nicahnu itiyí Judea, chitó ñu cha sacuví ra Jesús.

*Nu tachĭ ra Juan uvi tahan ra chicá noo chihin ra nu nyaá ra Jesús
(Mt. 11.2-19)*

¹⁸ Ta ra cachicá noo chihin ra Juan nacatyĭ ra tuhun cha sacuvĭ ra Jesús. Tyicuan ta cana ra Juan chi uvi tahan ra.

¹⁹ Ta tachĭ ra chi ra nu nyaá ra Jesús, vatyĭ cundaca tuhun ra chi ra tatu ican ra cuvĭ Cristo ra cha cusaquichi Nyoo. Vatyĭ tatu ñima ra, tyĭ cuatu ra inga ra.

²⁰ Tyicuan ta ra cha tachĭ ra Juan, cuahan coyo ra. Ta chaa ra nu nyaá ra Jesús. Ta quichaha catyĭ ra:

—Ra Juan, ra sacondutyá, tachĭ ra chi ndi vatyĭ ndaca tuhun ndi chuun tatu icon cuvĭ Cristo ra cha cusaquichi Nyoo. Vatyĭ tatu ñimon, cuatu ndi chi inga ra —catyĭ ra.

²¹ Ta cuhva cha canycú ra tachĭ ra Juan cuan, ra Jesús sanduvaha ra cuaha xaan ñu cuhvĭ, ta cuaha xaan ñu yihĭ tatyĭ ña vaha chi. Ta sananyehĕ ra chi ñu cuaa.

²² Tyicuan ta catyĭ ra Jesús chi ra tachĭ ra Juan:

—Cuahan ndo. Ta nacatyĭ ndo chi ra Juan tandihĭ cha nyehĕ ndo, ta tandihĭ cha chihĭ ndo. Ta catyĭ ndo chi ra yoso caa nanyehé ra cuaa, yoso caa nacacá ra coxo, yoso caa nduvahá ra tyahyu coño, yoso caa nacuiñi ra soho, yoso caa nandotó ndiyĭ, yoso caa cahín tuhun Nyoo chihin ñu ndahvi yoso caa sacacú ra aña ñu. Ta catyĭ tucu ndo chi ra vatyĭ

²³ sĭ xaan cuvĭ chi ñu ña chicá uvi iñi nyicón chii —catyĭ ra Jesús chi ra.

²⁴ Cuhva cha cuahan coyo ra cha tachĭ ra Juan, ta quichaha cahan ra Jesús tuhun ra Juan chihin ñáyivĭ. Ta catyĭ ra:

—¿Ñáá cha chahan ndo chinyehĕ ndo quivĭ chahan ndo chiqui ndĭ cuan? ¿Atu chahan ndo chinyehĕ ndo noo ndoo cha naquisĭ tatyĭ?

²⁵ ¿O noo ra cha ñihnó sahma vaha chinyehĕ ndo vaha? Ñima. Vatyĭ chitó ndo vatyĭ ra ñihnó sahma vaha iyó vaha ra ñáyivĭ ta iyó ra vehe rey.

²⁶ ¿Atu ña chinyehĕ ndo chi noo profeta Nyoo? Ican. Ta cahnu ca ra cuvĭ ra ican saha noo profeta.

²⁷ Ican tuhun ra Juan nyaá nuu tutu cha tyaa ra Isaías ta cha naha. Ta catyĭ Nyoo tuhun ra tyehe caa:

Yuhu tachĭ chi noo ra cahan tuhun ityĭ nuu nu cuahun.

Vatyĭ cucahan ra tuhun chihin ñáyivĭ na nasama ñu cuhva iyó ñu, ta cuatu tuhva ñu quivĭ quichun.

²⁸ Ta catyĭ chi ndo vatyĭ chichi cha tandihĭ ra cha cacu, yori profeta cha cahnu ca ican saha ra Juan. Soco ra cha nyacá ñaha Nyoo aña, vasi cuvĭ ra noo ra luhlu ca soco cahnu ca ra ican saha ra Juan ra sacondutyá —catyĭ ra Jesús.

²⁹ Cha chihĭ ñu tuhun ihya, tandihĭ ñáyivĭ ta ra catavá xuhun cuenda gobiernu ñuu Roma cha sacondutyá ra Juan nacotó ñu vatyĭ cuhva sacuvĭ Nyoo vaha xaan.

³⁰ Soco tandihĭ ra fariseo chihin ra sacuahá cuenda ley vehe ñuhu, maa ra cuvĭ ra ña cuñĭ cha sacondutyá ra Juan chi ra, vatyĭ ña cuñĭ ra quehen ra cha chahá Nyoo.

³¹ Ta catyĭ ra Jesús:

—¿Ñáá chihin sandu inuu ri chi nyoho, ñu iyó quivĭ ihya? ¿Yóó cha tari caa caá ndo?

32 Tari ra cuatyaa cuví nyoho. Vatyí ra cuatyaa nyasiquí ndotyín nuyahví. Ta caná chaa ndotyín chí tahan ndotyín, ta catyí ndotyín: “Tiví ndi tiyoo ta ña chita chaha ndo. Ta chita ndi yaa cuihya, soco ña chacu ndo.” Ta tyicuan caa ni noo cuhva ña tahan íñi ndo.

33 Vatyí ra Juan ra sacondutá, quichí ra ta ña chachí vaha ra. Ta ña chihí ra vinu. Ta nyoho catyí ndo vatyí tatyí ña vaha yihí chí ra.

34 Ta quichí tucu yuhu Rayí cha quichi nya gloria. Ta chachí ta chihí. Ta nyoho catyí ndo vatyí ra cuahyí cuví ta cuví noo ra tuhvá chihí. Ta ña tahan íñi ndo cha cutahín chihin ra iyó cuatyí, ta chihin ra tavá xuhun. Soco vasi ni noo ndi ña quehen cuenda ndo,

35 soco catyí chí ndo vatyí cha chiñi tuñi Nyoo, chaha ra chí ñu naquehen tuhun cahín ta tuhun cahán ra Juan. Ta maa ñu cusañaha ñu chí ndo vatyí vaha cha chiñi tuñi Nyoo —catyí ra Jesús.

Nu nyaá ra Jesús vehe ra Simón ra cuví fariseo

36 Noo ra fariseo cha nañi Simón nacatyí tuhun ra chí ra Jesús noo vico vehe ra. Ta chaa ra Jesús vehe ra, ta chicunya ra mesa.

37 Tyicuan ta noo ñaha cata íñi ñuu cuan chitó ña vatyí nyaá ra Jesús yucuan. Ta chaa ña chihin noo yutyí alabastro tyitu yihí ndutya vixi chahán.

38 Ta chicunya ña yatyín ri chaha ra. Ta quichaha chacu chaa ña vatyí ndu uvi íñi ña cuatyí ña. Ta quitá ndutya nuu ña. Ta chihin ndutya nuu ña nacatya ña chaha ra. Yahá cuan ta sana ityí ña chaha ra chihin ixi xiñi ña. Ta tyayuhú ña chaha ra. Tyicuan ta choso ña ndutya vixi chahán cuan siqui chaha ra.

39 Cuhva cha nyehe ra fariseo cuan cha tyicuan caa, ndichi xiñi ra: “Tatu ndicha ndicha cha Nyoo saquichi chí ra ihya, coto ra yóo ñaha tñn chaha ra, vatyí ñaha cuan, ñaha iyó cuatyí cuví ña.”

40 Tyicuan ta ra Jesús catyí ra chí ra fariseo cuan:

—Yoho Simón, iyó noo tuhun cua catyí chuun —catyí ra chí ra.

Tyicuan ta nacahan ra Simón:

—Vaha, catyí chí, Maestro —catyí ra.

41 Ta quichaha catyí ra Jesús tyehe caa:

—Uvi tahan ra yosoyicá ra xuhun chí noo ra cha tuhva chahá noo. Ta noo ra cuan yosiyicá ra ohon cientu denario. Ta nonga ra yosiyicá ra uvi xico uchi ri denario (tari ohon cientu ri pesu).

42 Ta ninduvi tahan ra ña cuví tyiyahví ra. Ta ra tuhvá chahá noo cuan, sahá ra tucahnu íñi chí ninduvi tahan ra. Ta vityín catyí chí, yoho Simón ¿nya ra cua cuñi ca chí ra cha chahá noo cuan? —catyí ra Jesús.

43 Tyicuan ta nacahan ra Simón, ta catyí ra:

—Ra cha cuaha ca sahá ra tucahnu íñi chí —catyí ra.

Tyicuan ta catyí ra Jesús:

—Ndicha cha cahún.

44 Tyicuan ta nanyehe ra Jesús chí ñaha sihi cuan, ta catyí ra chí ra Simón:

—¿Nyhún chí ñaha ihya? Yuhu quihví chichi vehun. Ta ña chahun ndutya cha ndoo chahi tari cuhva costumbre cha iyó chí yo. Ta ñaha ihya nacatya ña chahi chihin ndutya nuu ña. Ta yahá cuan, ta sana ityí ña chihin ixi xiñi ña.

45 Yoho ña tyayuhún ndahi, tari costumbre cha iyó chí yo, soco maa ña nyacua nya cuhva cha quihví ihya ta ña sandihi ña cha tyayuhú ña chahi.

46 Ta yoho ña tyihun aceitye xiñi, soco ñaha ihya tyihí ña ndutya vixi chahán chahi.

⁴⁷ Ta catyí chuun, yoho Simón, vasi cahnu xaan cuatyí ña, soco sahí ticahnu iñi chi ña. Yucuan chaha cuñi xaan ña chii. Ta ñu sahí tucahnu iñi chiin ri cuatyí, chiin ri cuñi ñu chii —catyí ra Jesús.

⁴⁸ Tyicuan ta quichaha catyí ra Jesús chi ña:

—Cuatyun cha yaha sandachi. Vatyí cha saha Nyoo ticahnu iñi chuun —catyí ra chi ña.

⁴⁹ Tyicuan ta ra nyicú chihin ra quichaha ndichí xiñi ra: “¿Yóo ra cuví ra ihya? Vatyí sahá ra tucahnu iñi cuatyí ñáyivi.”

⁵⁰ Tyicuan ta quichaha catyí ra Jesús chi ñaha sihi cuan:

—Cuahan vityin, cha cacun vatyí chinó iñun chii. Cuahan chihin cha vaha —catyí ra chi ña.

8

Ñusihí cha tyinyeé chi ra Jesús

¹ Cha yaha tuhun cuan, ta cuahan ra Jesús chicá noo ra noo noo ñuu cahnu ta noo noo ñuu luhlu. Ta cahan noo ra nuu ñáyivi. Ta sacoto ra chi ñu tuhun vaha yoso cuhva cuñi Nyoo cunyaca ñaha ra chi ñu. Ta ndi uchi uvi tahan apóstol, ra cha tyatyíño ra chi, cuahan coyo ra chihin ra.

² Ta cuahan coyo tucu suhva ñusihí cha sanduvaha ra, ñu cuhvi ta ñu yihí tatyí ña vaha chi. Ta chihin ñu cuahan cu María noo ñaha ñuu Magdala, cha yihí ucha tahan tatyí ña vaha chi ta nduvaha ña.

³ Ta cuahan tucu cu Juana ñasihí ra Chuzá ra cuví tyiño cuenda ra Herodes, ta cu Susana chihin cuaha xaan ca ñu cha tyinyeé chi ra chihin ñáá cha iyó chi ñu.

Nu sañahá ra Jesús vatyí tari noo ra chicá noo tachí, tyicuan caa cuví ra cahán tuhun Nyoo

(Mt. 13.1-9; Mr. 4.1-9)

⁴ Ta cuaha xaan ñáyivi quitá noo noo ñuu, vatyí cua nyehe ñu nu cahan ra Jesús tuhun Nyoo. Ta tui xaan ñu nyicú ñu, ta quichaha catyí ra chi ñu chihin noo cuhva:

⁵ —Quitá noo ra vehe ra. Ta cuahan ra nu iyó tyiño sahá ra, vatyí cua quitá ra chiti trigu nu ñuhú ra. Ta cuhva cha quitá ra canacoyo suhva chiti cuan yuhu ityi. Ta chañi ñáyivi siqui. Ta quichí saa ta chachí ti.

⁶ Ta suhva ca chiti cuan canacoyo ticu yuu. Caña chiti cuan. Soco na ityi ri vatyí chiin xaan ñuhu yihí chaha. Ta sin ri ña cachin.

⁷ Ta suhva ca chiti canacoyo chichi chiti iñu, soco quivi caña tun in ri, tu iñu cuan chahñi chi tun.

⁸ Soco suhva ca chiti canacoyo nu ñuhú vaha ta quivi chahnu tun, vaha xaan chaha tun chiti. Vatyí noo ri chiti cuan, cientu chiti quitá chihin —catyí ra Jesús.

Ta cha yaha catyí ra tuhun cuan. Ta quichaha cana chaa ra vatyí na cuiñi ñáyivi, ta catyí ra:

—Tatu cutuñi iñi ndo, tyasoho ndo tuhun cahín —catyí ra.

Nu sacotó ra Jesús ñáá cuenda sañahá ra chihin cuhva ri

(Mt. 13.10-17; Mr. 4.10-12)

⁹ Yaha cuan ta ra cachicá noo chihin ra, ndaca tuhun ra chi ra ñáá cha cuñi chi catyí tuhun cha nacatyí ra chi ñáyivi.

¹⁰ Tyicuan ta quichaha catyí ra:

—Chi nyoho sacotó Nyoo tuhun xehe, yoso caa nyacá ñaha ra. Soco chi tandihí ca ñu cuan, cuhva ri chahí chi ñu. Tacuhva nyehe ñu ta cuví chi tari cha ña ndichin nyehé ñu, ta cuiñi ñu soco ma cutuñi iñi ñu ñáá tuhun cuví.

Nu sacotó ra Jesús ñáá cha cuiñi chi catyí tuhun ra tachí cuan
(Mt. 13.18-23; Mr. 4.13-20)

¹¹ Cuhva cha catyí chi ndo, cuiñi chi catyí tyehe caa: chiti cuan tari tuhun Nyoo cuví.

¹² Ta tari nu canacoyo chiti trigu cuan yuhu ityi, tyicuan caa cuví noo ñu chiñi tuhun Nyoo. Soco quichí cuihna ta tinyaa ra tuhun Nyoo chi ñu tacuhva cha ma chino iñi ñu. Ta ma cacu ñu.

¹³ Ta tari nu canacoyo chiti cuan ticu yuu, tyicuan caa tucu inga ñáyivi cha chiñi tuhun Nyoo. Ta sii xaan cuví chi ñu suhva ri quivi. Soco vatyí ña yihí vaha yoho ñu, suhva ri quivi chingo iñi ñu, soco quivi cha quichaha nyehe ñu tindoho, ta sandihí ri ñu tuhun cha chinó iñi ñu.

¹⁴ Tari nu canacoyo chiti chichi iñu, tyicuan caa cuví tucu inga ñu chiñi tuhun Nyoo. Chiñi ñu tuhun Nyoo soco ña cuiñi ñu sacuvi ñu tari cuhva chiñi ñu. Vatyí yihí ñu, nyaá ca xiñi ñu tuhun tindoho ican saha tuhun Nyoo. Ta nonga ñu nyiyo ca iñi ñu cha tyayii. Ta nonga tucu ñu sii ca cuiñi ñu chica noo yanga ri ñu. Ta tari cha ña chicoo chiti nuu ñu cuví cuan.

¹⁵ Soco tari nu canacava chiti nu ñuhú vaha, tyicuan caa cuví noo ñu cha chiñi tuhun Nyoo. Ta vaha añima ñu vatyí chinó iñi ñu chihin tandihí añima ñu. Ta vaha tyasohó ñu tuhun Nyoo, ta ña naa maa iñi ñu tuhun ra. Ta sacuvi ñu tandihí tuhun cahán ra.

Ma tyihi xehe yo ñuhú cha sandundichin Nyoo añima yo coto tinyaa ra
(Mr. 4.21-25)

¹⁶ Yori yo cha natyaa yo ñuhú tima ta tixehe yo xiu chito o nonga nu xehe. Natyaa yo ñuhú tima soco cha cananyaa yo noo nu sucun. Ta cuhva quihvi ñáyivi chichi vehe soco ndichin.

¹⁷ Vatyí ñahri noo cha ñohó xehe, ta cuiñun, tyi ma natuvi. Ta ni noo tuhun xehe, ta cuiñun, tyi ma quita nu ndichin ta coto yo.

¹⁸ Yucuan chaha tyasoho ndo tuhun cahín. Vatyí tatu quichaha ndo tuhun cahín, cuaha ca cusañahi chi ndo. Soco tatu ma tyasoho ndo, tyicuan ta cutinyaa Nyoo tandihí maa chi ndo nyacua nya cha chiin ri cha cuiñi maa ndo tyi cumí ndo.

Tari yañi ra, ta tari sihi ra, tyicuan caa cuví chi ñu quichaha tuhun Nyoo, catyí ra Jesús

(Mt. 12.46-50; Mr. 3. 31-35)

¹⁹ Tyicuan ta chaá sihi ra Jesús chihin yañi ra nu nyaá ra. Soco ña cuví chaa ñu vatyí tuví xaan ñáyivi.

²⁰ Tyicuan ta sacoto ñáyivi canyicú cuan chi ra Jesús, ta catyí ñu:

—Sihun chihin yañun nyicú ñu chata vehe. Ta cuiñi ñu cahan ñu chuhun.

²¹ Tyicuan ta nacahan ra Jesús, ta catyí ra:

—Tandihí maa ñáyivi cha chiñi ta sacuvi tuhun Nyoo cha cahín, ican ñu cuví sihi, ta ican ñu cuví yañi —catyí ra Jesús.

Nu sacutaxin ra Jesús tatyí ñihi vavaha nu miñi

(Mt. 8.23-27; Mr. 4.35-41)

²² Cuví chi noo quivi cuan quihvi ra Jesús chichi noo canoa chihin ra cachicá noo chihin ra. Ta quichaha catyí ra chi ra:

—Coho ndo inga chiyo miñi ihya.

Yucuan ta cuahan coyo ra chihin canoa cuan.

²³ Ta cha ni ri ca cha cuahan ra mahñu miñi cuan, tijn ñumahna chi ra Jesús. Tyicuan ta sana iñi ra ta chaq noo tatyí ñihi vavaha. Ta quichaha tyihí chi ndutya chichi canoa cuan. Ta quichaha cuñí nyee canoa cuan vatyí cama xaan ndutya quihvi.

²⁴ Tyicuan ta casandoyō ra chi ra Jesús. Ta quichaha catyí ra:

—¡Maestro! ¡Maestro! Cha cuñí nyee yo chichi ndutya —catyí ra.

Tyicuan ta nducuita ra Jesús. Ta quichaha catyí ra chi tatyí cuan ta chi ndutya cuan, na cutaxin chi. Ta cutaxin ri.

²⁵ Tyicuan ta quichaha catyí ra chi ra cachicá noo chihin ra:

—¿Ñáá tuhun yuhví ndo? ¿Atu ña chinó iñi ndo vatyí yuhu sahá cuende chi ndo? —catyí ra.

Soco ra cuan, yuhvi xaan ra. Ta iyo xaan cuñí ra. Ta quichaha ndaca tuhun ra chi ra tahan ra:

—¿Yóó ra cuví ra ihya? Vatyí nyacua nya tatyí ta ndutya ta quichahá tuhun cahán ra.

Nu nduvaha noo ra yihí tatyí ña vaha ñuu Gadara

(Mt. 8.28-34; Mr. 5.1-20)

²⁶ Tyicuan ta chaq coyo ra ityi Gadara cha nyaá inga chiyo miñi ityi nuu Galilea.

²⁷ Ta quitá ra chichi canoa cuan. Ta yucuan chaq noo ra cha quichi noo ñuu ityi cuan chisatahan ra chi ra. Ta yihí tatyí ña vaha chi ra. Ta cha naha xaan ña ñihno maa ra sahma. Ni ri ña iyó ra vehe ra. Chicá noo ri maa ra nu ñaña calavari cuan.

²⁸⁻²⁹ Ta tuhvá tatyí ña vaha cuan naquiqui chi ra. Ta yucuan chaha chahñí ñu ndaha ra ta chaha ra chihin cadena. Soco tatyí ña vaha cuan chahá fuerza chi ra cha cahnya ra. Ta sacono chi chi ra. Ta chinyaca chi chi ra noo nu yori maa ñáyivi iyó. Ta cuhva cha nyehē ra chi ra Jesús, chicuiñi chiti ra nuu ra. Ta quichaha canachaa ra, ta catyí ra:

—¿Ñáá tuhun tyihún chuun chihin yuhu, yoho Jesús, Sehe Nyoo cahnu? Chiquén chuun vatyí ma sanyehun tundocho chii —catyí ra yihí tatyí ña vaha cuan chi ra Jesús.

Ta tatyí ra tyehē caa vatyí ra Jesús tachí ra chi tatyí ña vaha cuan, na quita chi ra ndahvi cuan.

³⁰ Ta quichaha ndaca tuhun ra Jesús chi tatyí ña vaha cuan, ta catyí ra:

—¿Ñáá nañún?

Ta tatyí ña vaha cuan sacahan chi ra cuan, ta catyí ra:

—Nyuhu nañí ndi, Legión.

Tyicuan caa catyí ra vatyí cuaha xaan tatyí ña vaha yihí chi ra. Cuenda mil tatyí ña vaha cuan yihí chi ra.

³¹ Tyicuan ta tatyí ña vaha cuan catyí chi ra Jesús vatyí ma tuchi ra chi chi nu tindocho nu ma cuví maa quita chi.

³² Ta chicán tatyí ña vaha cuan chi ra Jesús nacuhva ra caquihvi chi chichi quini cha canyicú yuhu miñi cuan. Tyicuan ta chaha ra Jesús permiso cha caquihvi chi chichi quini cuan.

³³ Ta quitá tatyí ña vaha cuan chi ra ndahvi cuan. Ta caquihvi chi chichi quini cuan. Tyicuan ta cachino quini cuan. Ta yatyin cuan nyaá noo xahva yuhu miñi cuan. Yucuan canacoyo ti chichi miñi cuan. Ta cachihí ti chihin ndutya cuan.

³⁴ Tyicuan ta ra casahá cumi chi quini cuan, yuhví xaan ra. Ta cuahan coyo vavaha ra cua nacatyí ra chi ñáyivi nya ñuu. Ta tandihí ri ñáyivi cha nyehe ra, ta nacatyí ra tuhun cuan.

³⁵ Tyicuan ta chaq coyo ñáyivi cua nyehe ñu ñáá cha cuví cuan. Tyicuan ta chaq ñu nu nyaá ra Jesús. Ta nañihí ñu chi ra cha yihí tatyí ña vaha cuan chí. Nyaá ra nuu ra Jesús. Ta ñihnó ra sahma ra. Ta vaha cuñí ra. Ta yuhví xaan ñu cuví.

³⁶ Tyicuan ta tandihí ñu cha nyehe cha cuví cuan, nacatyí ñu chi tandihí ca ñáyivi yoso caa quitá tatyí ña vaha chí ra ndahví cuan, ta nduvahá ra.

³⁷⁻³⁹ Yucuan ta tandihí ñáyivi ityi Gadara cuan quichaha catyí ñu chi ra Jesús na cunuhu ra ityi nu quichi ra. Vatyí yuhví xaan ñu chihin cha sacuví ra chihin tatyí ña vaha cuan. Tyicuan ta ra cha quitá tatyí ña vaha cuan chí, catyí ra chí ra Jesús, na cuhva ra cha cuhun ra chihin ra. Soco catyí ra Jesús chí ra:

—Cuanuhu nya vehun. Ta ñacuhva cuendon chi ñáyivi chuun ñáá cha sacuví Nyoo chuhun —catyí ra.

Yucuan ta ra Jesús nandihví ra chichi canoa cuan. Ta cuanuhu ra chihin ra cachicá noo chihin ra. Tyicuan ta ra ndahví cha nduvaha cuan, cuanuhu ra nya ñuu ra. Ta ityi cuahan ra nacatyí ra chí tandihí ñáyivi ñuu cuan yoso caa sanduvahá ra Jesús chí ra.

Nu nduvahá sehe ra Jairo ta ñaha sihi cha tñin sahma ra Jesús

(Mt. 9.18-26; Mr. 5.21-43)

⁴⁰ Quivi cha nachaq ra Jesús cha chahan ra inga chiyo miñi cuan, cuaha xaan ñáyivi nyatú ñu chí ra. Ta sii xaan cuñí ñu vatyí nachaq ra.

⁴¹ Tyicuan ta chaq noo ra cha nañí Jairo, ra cuví nuu vehe ñuhu, ta chicuñí chiti ra nuu ra. Ta quichaha chacu ndahví ra nuu ra, na cuhun ra vehe ra.

⁴² Vatyí iyó noo tuhun ri sehe ra, ta iyó uchi uvi cuiya ña. Ta cha cuñí cúvi ña chihin cuehe. Ta cuahan ra Jesús vehe ra. Ta cuaha xaan ñáyivi cuahan chihin ra Jesús, ta tihín xaan cuahan ra mahñu ñu.

⁴³ Ta chihin ñáyivi cuan cuahan noo ñaha cuhví. Cha iyó uchi uvi cuiya ndoho ña noo cuehe niñi. Ta cha ndihí maa xuhun ña sanaq ña, ta ña nduvahá ña.

⁴⁴ Soco chaq ña nu nyaá ra Jesús ityi chata ra. Ta tñin ña sahma ra. Ta caa cuhva ri cuan, ta chicunyasi cha chati niñi ña.

⁴⁵ Tyicuan ta quichaha catyí ra Jesús:

—¿Yóó cha tñin sahme?

Ta tandihí ñu cuahan chihin ñu catyí ra:

—Yori.

Ta catyí ra Pedro ta ra tahan ra chí ra Jesús:

—Maestro, cuaha xaan ñáyivi cuahan chuhun, ta tihín xaan cuahun. Ta suri maa ñu tyandahá ñu chuun. Ta ndacá tuhun con “¿Yóó cha tñin sahme?” —catyí ra.

⁴⁶ Soco ra Jesús catyí ra:

—Chitó mai vatyí iyó noo cha tñin sahme. Vatyí tuví iñi cuahan suhva tunyee iñi cha iyó chí —catyí ra.

⁴⁷ Tyicuan ta ñaha sihi cuan nyehe ña vatyí cha chitó ra. Ta quichaha nihi ña chihin cha yuhví ña. Ta chicuñí chiti ña nuu ra. Ta quichaha nacatyí ña chí ra ñáá tuhun cha tñin ña sahma ra, ta yoso caa nduvahá ña caa cuhva ri cuan. Ta chiñí tandihí ñáyivi cuan cha nacatyí ña.

⁴⁸ Yucuan ta catyí ra Jesús chí ña:

—Yoho sihi, cha nduvahun vatyi chinó iñun chii. Cuḡhan chihin cha vaha —catyí ra.

⁴⁹ Ni cahán ca ra Jesús tuhun ihya, ta chaḡ noo ra quitḡ vehe ra cuví nuu vehe ñuhu cuan. Ta quichaha catyí ra chi ra Jairo cuan:

—Sehun cha yahḡ chihi ña. Ma sayanga con chi Ra Sacuaha chiña —catyí ra.

⁵⁰ Soco cha chiñi ra Jesús tuhun cuan. Ta quichaha catyí ra:

—Ma yuhvun. Chino iñun. Ta sehun cua nduvaha ña —catyí ra.

⁵¹ Ta cuhva cha chaḡ ra Jesús vehe ra Jairo, ña chahḡ ra quihvi ñáyivi chichi vehe. Maa ri maa ra Pedro ta ra Jacobo ta ra Juan ta maa ra Jairo chihin ñasihi ra, quihvi ñu chichi vehe cuan nu catuví cuehe luhlu cha chihí cuan.

⁵² Ta tandihí ñu chacú chaḡ ñu cha cuenda vatyi chihí cue. Soco ra Jesús catyí ra chi ñu:

—Ma cuacu ca ndo. Vatyi ña chihí cue. Quixí cue —catyí ra.

⁵³ Soco chacú nyaa ñu tuhun caḡan ra. Ta ña chinó iñi ñu. Vatyi chitó ñu tyi cha chihí cue.

⁵⁴ Tyicuan ta tiñ ra Jesús ndaha cue. Ta ñihi cahan ra ta catyí ra chi cue:

—Ndücüita, cuehe luhlu —catyí ra.

⁵⁵ Tyicuan ta nandotḡ cue. Ta caa cuhva ri cuan ndücüita cue. Ta quichaha catyí ra Jesús:

—Cuhva ndo cha cachi cue.

⁵⁶ Ta sutu cue ta sihi cue, iyo xaan cuñí ñu. Soco catyí ra Jesús chi ñu vatyi yori maa chihin cahán ñu tuhun cha cuví cuan.

9

Nu tachí ra Jesús ndi uchi uvi tahan ra cachicá noo chihin ra vatyi cucahan ra tuhun Nyoo

(Mt. 10.5-15; Mr. 6.7-13)

¹ Sandu ñn ri ra Jesús ndi uchi uvi tahan ra cachicá noo chihin ra. Ta chahḡ ra tunyee iñi chi ra vatyi cuví tava ra tatyi ña vaha, ta cuví sanduvaha ra chi ñu cuhví.

² Ta tachí ra tyiño chi ra vatyi na sanduvaha ra chi ñu cuhví, ta cahan ra tuhun Nyoo yoso caa nyacá ñaha ra añima ñáyivi.

³ Ta catyí ra chi tandihí ra cuan:

—Ñahri cha cuisón ndo ityi cuhun ndo, ni yutun ma tuvi ndo. Ni yitin, ta ni ri cha cachi ndo ta ma cuisón ndo. Ta ni ri xuhun ta ma cuisón ndo. Tacuhva ñihnó ri ndo cuhun ndo.

⁴ Ta savaha ri vehe cha chaḡ ndo, cunyaa ndo yucuan nyacua nya cha chaḡ quivi cha cuhun ndo inga ñuu.

⁵ Ta nu ña cuñí ñu cuiñi ñu tuhun cahan ndo, quita ndo ñuu cuan. Ta naquisi ndo ñiyaca chaha ndo. Tyehe caa sacuvi ndo na cuví chi tari minoo seña chi ñu, vatyi ña cuñí ñu tyasoho ñu tuhun Nyoo —catyí ra Jesús chi tandihí ra cuan.

⁶ Tyicuan ta cuahan coyo ra tandihí cuii maa ñuu. Ta cahán ra tuhun vaha Nyoo ta yoso caa cuñí chi ta cacu ñu. Ta sanduvahḡ ra chi ñu cuhví.

Nu cuñí ra Herodes coto ra yóo ra chicá noo cahán tuhun Nyoo ta sanduvahá chi ñáyivi

(Mt. 14.1-12; Mr. 6.14-29)

⁷ Ra Herodes ra cuví ra nyacá ñaha ñicahnu ityi Galilea, ñihí ra tuhun cha sacuví ra Jesús. Ta ña ñihí vaha ra cuhva yóo ra cuví ra. Vatyí yihí ñu catyí ñu vatyí ra Juan, ican ra nandoto.

⁸ Ta yihí ñu catyí ñu vatyí ra Elías, ican ra nandoto. Ta yihí ñu catyí ñu vatyí inga ra profeta Nyoo ta cha naha, ican nandoto.

⁹ Soco catyí ra Herodes:

—Maa mai tyihí tyiño chicahnya sucun ra Juan. ¿Tu tyicuan caa, yóo ra chiñí xain tuhun ihya? —catyí ra.

Ta ra Herodes cuan nducú xaan ra cuhva yoso caa nyehe ra chi ra cha chicá noo cuan.

*Nu chaha ra Jesús cha cachi ohon mil ray#
(Mt. 14.13-21; Mr. 6.30-44; Jn. 6.1-14)*

¹⁰ Ta cuhva cha nachaꝓ coyo ra chicá tyiño nuu ra Jesús, canacatyí ra chi ra Jesús tandihí cuí maa cha cuví nu chahan coyo ra. Tyicuan ta tavaꝓ siin ra Jesús chi ra ta cuahan coyo ra yatyin ri noo ñuu cha nañí Betsaida.

¹¹ Soco cuhva cha ñihí ñáyivi tuhun vatyí cuahan ra Jesús nyicuan, ta cuahan coyo vavaha ñu nya nu nyaá ra. Tyicuan ta quichaha cahan ra chihin ñu tuhun yoso caa nyacá ñaha Nyoo añima ñáyivi. Ta sanduvahaꝓ ra chi ñu cuhvi.

¹² Ta cuhva cha cua iñi xaan, ndi uchi uvi tahan ra chicá noo chihin ra quichaha catyí ra chi ra:

—Catyí chi ñáyivi ihya na cunuhu ñu cunyitatu ñu, ta na cunducu ñu noo cha cachi ñu noo ñuu cha nyaá yatyin ri cuan. Vatyí ihya ñahri maa cha cachi yo iyó —catyí ra.

¹³ Tyicuan ta quichaha catyí ra Jesús chi ndi uchi uvi tahan ra cuan:

—Cuhva ndo cha cachi ñu —catyí ra.

Tyicuan ta quichaha catyí ra chicá noo chihin ra chi ra tahan ra:

—Ñahri maa cha iyó ihya. Ohon tahan ri pan, ta uvi tahan ri tiyaca iyó. Soco ma ñihi cha cachi tandihí ñáyivi ihya. Ni ri cusata ndi soco ma ñihi —catyí ra.

¹⁴ Vatyí ohon mil ray# nyicú yucuan. (Ta siin ri nyicú ñusihi chihin sehe ñu.) Yucuan ta ra Jesús catyí ra chi ra cachicá noo chihin ra:

—Na cunyicu ñáyivi cha uvi xico uchi tahan ñu noo noo nu cunyicu ñu.

¹⁵ Tyicuan ta chicunyicu tandihí ñu.

¹⁶ Tyicuan ta quehen ra Jesús ohon tahan pan cuan chihin uvi tahan tiyaca cuan. Ta nanyehe ndaa ra andivi, ta nacuhvaꝓ ra tyahvi nyoo chi Nyoo. Tyicuan ta tahvi sava ra pan ta tiyaca cuan. Ta chahaꝓ ra chi ra cachicá noo chihin ra na casacha ra chi ñáyivi.

¹⁷ Tyicuan ta tandihí ñu chachi ñu. Ta chitu chichi ñu. Yahaꝓ cuan ta ndoꝓ ca yiquin ta sacutuꝓ ra uchi uvi tahan tica chihin yiquin cuan.

*Nu catyí ra Pedro tyi ra Jesús cuví ra Cristo, ra sacacú chi yo
(Mt. 16.13-19; Mr. 8.27-29)*

¹⁸ Noo quivi quitaꝓ siin ra Jesús chihin ra cachicá noo chihin ra. Ta quichaha chicán tahvi ra chi Nyoo. Ta nu ndihí chicán tahvi ra, ta quichaha ndaca tuhun ra chi ra chicá noo chihin ra ta catyí ra:

—¿Ñáá catyí ñáyivi, yóo ra cuví yuhu?

¹⁹ Tyicuan ta nacahaꝓ ra cachicá noo chihin ra, ta catyí ra:

—Yihí ñu catyí ñu vatyí ra Juan ra sacondutyá chi ñáyivi cuvún. Ta yihí ñu catyí ñu vatyí ra Elías cuvún. Ta yihí ñu catyí ñu vatyí inga ra profeta Nyoo ta cha naha cuvún —catyí ra.

²⁰ Tyicuan ta ndacá tuhun ra Jesús chi tandihí ra, ta catyí ra:

—Ta nyoho, ¿yóó ra cuví yuhu, cuhva cha cuñi nyoho?

Tyicuan ta nacahan ra Pedro, ta catyí ra:

—Yoho cuví ra Cristo ra cha quitá nu nyaá Nyoo.

Nu sacoto ra Jesús yoso caa cucahñi ñáyivi chi ra

(Mt. 16.20-28; Mr. 8.30—9.1)

²¹ Ta catyí ra Jesús chi ra cachicá noo chihin ra vatyí yori maa chihin cahan ra tuhun cuan.

²² Tyicuan ta catyí tucu ra chi ra:

—Yuhu Rayi cha quichí nya gloria cuví. Ta tahán chi vatyí cuaha xaan tundoho cunyehe. Ta ra cacuví mandoñi ta ra cacuví nuu chi tata sutu chihin ra casacuaha cuenda ley, ma chino iñi ra chii. Ta cucahñi ra chii. Soco nu cu uñi quivi cunandote —catyí ra.

²³ Tyicuan ta quichaha catyí tucu ra chi tandihí ra:

—Tatu nya nyoho cuñi ndo cunyicon ndo chii, cahnya iñi ndo cha cuñi maa ndo sacuví ndo, tacuhva cuví sacuví ndo cha cuñi Nyoo. Ma ndu uvi iñi ndo cha yihí ndo cuende vasi ndiquivi nyehe ndo tundoho. Vatyí yucuan cuví cruzi cha tahán chi cuiso ndo.

²⁴ Ta nya ndo ña cuñi ndo nyehe ndo tundoho cha catyí yuhu, cunyehe ndo tundoho anyaya. Soco nya ndo cuhva ndo ñáyivi ndo cha catyí yuhu, cucacu añima ndo.

²⁵ ¿Náá cuenda quita chi ndo cha saha ganaa ndo tandihí cha iyó ñáyivi, tatu cuhun añima ndo anyaya?

²⁶ Vatyí tatu cahan nuu ndo cha cahán ñáyivi chi ndo cha catyí yuhu, ta cha catyí tuhun cahín, cucahan tucu nuu mai nyehe chi ndo nachaa quivi quichi inga chaha. Vatyí cuquichi chihin cha cahnu cuví, ta cha cahnu cuví Sutu yo Nyoo ta ángel cuenda ra. Vatyí yuhu cuví Rayi cha quichí nya gloria.

²⁷ Ta catyí chi ndo vatyí yihí ndo cha nyicú ndo ihya vityin, ma cúvi ndo nyacua nya nyehe ndo yoso caa cuví nu nyacá ñaha Nyoo.

Uñi tahan ra cachicá noo chihin ra Jesús nyehé ra yoso caa cuví nu nyacá ñaha Nyoo

(Mt. 17.1-8; Mr. 9.2-8)

²⁸ Uña quivi yaha cha catyí ra Jesús tuhun cuan. Ta ndaa ra noo yucu vatyí cua cacan tahvi ra chi Nyoo. Ta cuahan ra Pedro, ra Jacobo ta ra Juan chihin ra.

²⁹ Ta cha ni ri ca cha chicán tahvi ra Jesús, nasama cuhva caá sahna ra ta nuu ra. Tyaqui xaan cuichín nanduvi sahna ra. Ta xiño xaan.

³⁰ Tyicuan ta tuvi uvi tahan ra candatuhún chihin ra, ra Moisés ta ra Elías.

³¹ Ta ndichin xaan nu tayucú ra. Ta cacahán ra tuhun yoso caa cunyehe ra Jesús tundoho Jerusalén ta cúvi ra.

³² Ta vasi cuñi xaan ra Pedro chihin ra tahan ra cacusu ra, soco ña quixí ra. Ta nyehé ra cha ndichin xaan cuan nu nanyaá ra Jesús chihin ra cha tayucú chihin ra.

³³ Cuhva cha cuahan coyo ra tayucú chihin ra Jesús cuan, catyí ra Pedro:

—Maestro, vaha xaan cha nyicú ndi ihya. Na savaha ndi uñi tahan vehe, noo chuun, noo chi ra Moisés, ta noo chi ra Elías —catyí ra.

Soco ña chitó ra Pedro tuhun cahán ra.

³⁴ Ta cha ni ri ca cha cahán ra ta quichí noo vico síqui ra. Ta yuhví xaan ra cacuví cha caquihví ra chichi vico cuan.

³⁵ Tyicuan ta chichi vico cuan chiñi ra noo ndusu cha catyí:

—Ican ra ihya cuví Sehi, ta cuñi xain chi ra. Tyasoho ndo tuhun cahán ra —catyí ndusu cuan.

³⁶ Ta cha yaha cahan ndusu cuan, nanyehe ra Pedro ta ra ndihi chihin ra vatyi noo ri ca maa ra Jesús nanyaá yucuan. Ta yori maa chihin cacahan ra tuhun cha nyehe ra.

Nu sanduvaha ra Jesús chi noo ra cuehe luhlu cha yihí tatyí ña vaha chii

(Mt. 17.14-21; Mr. 9.14-29)

³⁷ Ta cha inga quivi cha noo ra Jesús yucu cuan, cuaha xaan ñáyivi chisatahan chi ra.

³⁸ Tyicuan ta chichi cha cuaha ñáyivi cuan, noo ra cana chaa xaan ra, ta catyí ra:

—Maestro, saha tumañi iñi chii. Nyehe ndahvi chi sehi. Vatyi noo tuhun maa ra iyó chii.

³⁹ Ta yihí ndihi tatyí ña vaha chi ra. Ta sacanachaa chi chi ra. Ta tuchí chi chi ra nyasava. Ta quitá tiñi yuhu ra. Ta quiñi xaan nyacuví chi chihin ra. Ta ña cuñi maa tatyí ña vaha cuan saña chi ra.

⁴⁰ Cha cahin chihin ra cachicá noo chuhun na tava ra tatyí ña vaha cuan, soco ña cuví chi ra —catyí ra.

⁴¹ Tyicuan ta nacahan ra Jesús ta catyí ra:

—Nyoho, ñu ña chinó iñi cuví ndo. Ta ni caa ni quiñi iyó ndo. ¿Yoso ca tahan quivi cunyai chihin ndo ta cunyehe iñi tisihi ndo nyacua nya cha cutuhva ndo ta chino iñi ndo chii?

Ta catyí ra chi ra cuan:

—Nyaca chi sehun.

⁴² Ta cuhva cha cua tuhva ra cuehe cuan nu nyaá ra Jesús, ta tuchí tatyí ña vaha cuan chi cue nya sava. Soco ra Jesús tava ra chi tatyí ña vaha cuan. Ta sanduvaha ra chi cue. Tyicuan ta nacuhva cuenda ra chi cue chi sutu cue.

⁴³ Ta tandihi ñáyivi, iyo xaan cuñi ñu cha cahnua cha sacuví Nyoo chihin ñu.

Inga chaha tucu cahan ra Jesús tuhun yoso caa cucahni ñáyivi chi ra

(Mt. 17.22-23; Mr. 9.30-32)

Cha ni ri ca cha iyo cuñi ñáyivi cha sacuvi ra Jesús, ta quichaha catyí ra chi ra cachicá noo chihin ra:

⁴⁴ —Tyasoho vaha ndo tuhun cahín. Ta ma naa iñi ndo. Vatyi yuhu Rayii cha quichí nya gloria, cucuhva cuenda ñu chii ndaha ra xaan iñi chii —catyí ra Jesús.

⁴⁵ Soco ra cachicá noo chihin ra ña cutuñi iñi ra ñáá tuhun cahán ra. Vatyi Nyoo ña chaha ra cha cacutuñi iñi ra. Ta cayuhví ra ndaca tuhun ra chi ra Jesús ñáá cha cuví cuan.

Nu sañaha ra Jesús yóó ra cha cahnu ca cucuvi nu nyacá ñaha Nyoo

(Mt. 18.1-5; Mr. 9.33-37)

⁴⁶ Yucuan ta ra cachicá noo chihin ra quichaha cacuvi yuhu ra tuhun nya ra cahnu ca cuví chichi cha uchi uvi tahan ra.

⁴⁷ Tyicuan ta chitó ra Jesús cha chicá xiñi ra, ta quehen ra chi noo ra cuehe luhlu.

⁴⁸ Ta quichaha catyí ra chi tandihi ra cuan:

—Tatu chihin sivi natíin cuenda ndo chi noo ñáyivi ña cahnu sahá chi tari ra cuehe luhlu ihya, chi yuhu natíin cuenda ndo. Ta tatu natíin cuenda ndo chii, chi maa Nyoo cha saquichí chii, natíin cuenda ndo. Vatyí ra cha ñima ri tuhun sahá maa ndo tuhun, ican ra cuví ra cahnu nuu Nyoo —catyí ra Jesús.

Ñu cha ña cahán chi yo, ican ñu cuan tyinyee chi yo
(Mr. 9.38-40)

⁴⁹ Yucuan ta ra Juan catyí ra chi ra Jesús:

—Maestro, nyehe ndi chi noo ra cuan. Cahán ra sivun ta tavá ra tatyí ña vaha. Soco ña chaha ca ndi. Vatyí ñima chihin yo chicá noo ra —catyí ra.

⁵⁰ Tyicuan ta catyí ra Jesús chi ra:

—Ma casi ndo nu cahan ra. Vatyí yóó ra ña cahán chi yo, tumañi iñi chi yo cuahan ra —catyí ra.

Nu catyí ra Jesús chi ra Juan ta chi ra Jacobo vatyí ña vaha cha chicá xiñi ra

⁵¹ Tuví iñi ra Jesús vatyí cha nyaña yatyin cha tahán chi cunuhu ra gloria, ta sanduní ra iñi ra. Ta quehen ra ityí ta cuahan ra Jerusalén nu cucuví ra.

⁵² Ta tachí ra tyiño na cuhun coyo ra cachicá noo chihin ra ityí nuu ca noo ñuu ityí Samaria. Vatyí canducu ra nu nyitatu ra.

⁵³ Soco ñu Samaria cuan, ña cuñi ñu cha ndoo ra yucuan, vatyí tuví iñi ñu vatyí Jerusalén cuahan coyo ra, ta ñu Samaria ña cuví nyehe ñu chi ñu Jerusalén.

⁵⁴ Cuhva cha chitó ra Jacobo ta ra Juan cha ña chahá ñu Samaria cuan cha ndoo ra yucuan, cuxaan ra. Ta quichaha catyí ra chi ra Jesús:

—Sutu Mañi yuhu, ¿atu cuñun cha sacuvi yo tari sacuvi ra Elías? cacán yo chi Nyoo na saquichi ra ñuhu andivi síqui ñáyivi Samaria cuan, vatyí cayu ñu vatyí ña cuñi ñu cha ndoo yo ñuu ñu —cacatyí ra.

⁵⁵ Tyicuan ta nanyehe ra Jesús chi ra. Ta cahan ra chi ra ta catyí ra:

—Taxi ri ndo. Vatyí ña cutuñi iñi ndo ñáá tyiño vachi yuhu.

⁵⁶ Vatyí yuhu Rayíi cha quichí nya gloria, ña vachi vatyí sanai aña ñáyivi, Soco vachi vatyí sacaqui chi ñu —catyí ra.

Tyicuan ta cuahan coyo ra inga ñuu.

Ñu cha cuñi quihvi cuenda ra Jesús
(Mt. 8.19-22)

⁵⁷ Ta cuhva cha cachica ityí ra, quita noo ra, ta catyí ra chi ra Jesús:

—Sutu Mañi yuhu, cuñi cunyiquen chuun. Ta cuhin chuhun tandihí ri ityí cuahun —catyí ra.

⁵⁸ Yucuan ta catyí ra Jesús chi ra:

—¿Atu ndichon? Vatyí yuhu ñahri maa cha iyó chii. Ñaña iyó vehe ti. Ta saa iyó taca ti. Soco yuhu Rayíi cha quichí nya gloria ñahri maa nu cava xiñi iyó —catyí ra chi ra cuan.

⁵⁹ Tyicuan ta catyí ra Jesús chi inga ra:

—Coho chihin.

Tyicuan ta nacahan ra cuan ta catyí ra:

—Tata, cuatu noo chii, na cuhun xihne cucuchi chi suti —catyí ra.

⁶⁰ Tyicuan ta ra Jesús nacahan ra ta catyí ra chi ra:

—Sandoo chi ñu ña ñohó nuu chi Nyoo natyihí maa ñu chi tahan ndiyí ñu chichi ñuhu. Soco yoho cuahan cua cahan tuhun Nyoo chihin ñáyivi nacuhva cuenda ñu chi ñu chi Nyoo na cunyaca ñaha ra chi ñu —catyí ra.

⁶¹ Tyicuan ta quichaha catyí inga ra chi ra Jesús:

—Tata, cuñí cunyiquen chuun. Soco cuhva xihna na cuhin cucahin chihin ñu vehi —catyí ra.

⁶² Tyicuan ta ra Jesús catyí ra:

—Tari noo ra tahví ñuhú chihin arado, tatu nanyehe chata ra ña quita vaha yucun nu sahá tyiño ra. Ta tyicuan caa cuví noo ra nyicón chii, tatu yihí iñi ra cha sandoq ra, ña yihí vaha iñi ra cha cuví cunyaca ñaha Nyoo chi ra —catyí ra Jesús chi ra.

10

Nu tachí ra Jesús chi uñi xico uchi tahan ra cucahan tuhun Nyoo chihin ñáyivi

¹ Cha yaha tuhun cuan ta nacachí Sutu Mañi yo Jesús chi inga uñi xico uchi tahan ca ra. Ta tachí ra chi uvi uví ra noo noo ityi cuahan ra tandihi ñuu ta tandihi ityi nu tahán chi cuhun ra Jesús.

² Ta catyí ra chi ra:

—Tari noo itu cahnú vavaha, tyicuan caa nu tyiño sahí. Soco ña cuaha musu. Yucuan chaha çacan ndo chi Nyoo na saquichí ca ra musu. Vatyí tyinyee ra chi ndo cahan ndo tuhun ra chihin ñáyivi.

³ Ta cuahan ndo ta nyehe ndo vatyí cua sacuhin chi ndo tari mbee mahñu lobo. Vatyí lobo tuhvá ti chachí ti chi mbee. Ta tyicuan caa cucuñi ñáyivi satai iñi ñu chi ndo.

⁴ Ta ma cuiso ndo ni yono ta ni cha quihí xuhun ndo, ni inga ityi ndichan ndo. Sanumi ndo. Ta ma cohon vaha ndo ityi ndatuhun ndo tuhun cha ñima ri tuhun.

⁵ Cuhva cha quihvi ndo chichi vehe noo ñáyivi, çahan vaha ndo chihin ñu. Ta çatyí ndo, na coo cha vaha añima ñu.

⁶ Ta tyicuan caa tatu iyó ñáyivi vaha vehe cuan, ndoo cha vaha cuan chihin ñu. Soco tatu yori ñu vaha añima, ma ndoo cha vaha chihin ñu.

⁷ Ta ndoq ndo suri maa vehe cuan. Tatu chaha ñu cha cachi ndo, çachi ndo. Tatu chaha ñu cha coho ndo, çoho ndo yucuan. Vatyí ra sahá tyiño, iyó ityi chi ra cha cachi ra cha sahá ganaa ra. ñin ri maa vehe cuan cunyaa ndo nyacua nya cha chaa chi quivi cha cuhun ndo inga ñuu.

⁸ Ta nu chaa ndo noo ñuu ta vaha cahan ñu chihin ndo, çachi ndo ta çoho ndo tandihi cha cuhva ñu chi ndo.

⁹ Ta sanduvaha ndo chi ñu cuhví ñuu cuan. Ta çatyí ndo chi ñu: “Cha nyaña yatyin Nyoo ra cunyaca ñaha añima ndo.”

¹⁰ Soco tatu chaa ndo noo ñuu ta ña cuñí ñu tyasoho ñu tuhun cahan ndo, quita ndo ityi cahnú. Ta çatyí ndo chi ñu:

¹¹ “Nyacua nya ñiyaca ñuu ndo cha iñi chaha ndi, ta cunaquisi ndi. Vatyí tari noo seña vatyí ndoo cuatyí ndo siqui ndo. Vatyí Nyoo nyaña yatyin ra chi ndo ta ña tyasoho ndo tuhun cahán ra yoso caa cuñí ra cunyaca ñaha ra añima ndo.” Tyicuan caa çatyí ndo chi ñu —catyí ra Jesús chi ra nyicón chi ra.

¹² Ta quichaha catyí tucu ra chi ra:

—Quivi tachi tuñi Nyoo chi ñáyivi, yaha ca cuhva cunyehe ñáyivi ñuu cuan tundoho, ta ñima ca ñáyivi chiyó ta cha naha ñuu Sodoma, ñu chihí cha catyí cuatyí ñu —catyí ra Jesús.

Ñáyivi ña tyasohó tuhun cahán ra Jesús cunyehe ñu tundoho (Mt. 11.20-24)

¹³ Ta catyí ra:

—jNdahvi nyoho, ñáyivi ñuu Corazín! Ta jndahvi nyoho, ñáyivi ñuu Betsaida! Vaty nyehé ndo nyatu cahnu, ta ña nasamá ndo cuhva iyó ndo. Soco ñáyivi ñuu Tiro ta ñuu Sidón cha sanaq Nyoo ta cha naha cha cuenda cuatyí ñu, ñahri nyatu cahnu nyehe ñu. Soco tyehe ta nyehe ñu quivi cuan cha nyehé nyoho vityin, tañi tyehe ri ndihvi noo ñu sahma tucuihya iñi ta cunyaa ñu nu ñiyaa. Tari cuhva costumbre iyó maa ñu, noo seña vatyí ndu uvi iñi ñu cuatyí ñu cuví cuan.

14 Yucuan chaha, nyoho ñuu Corazín chihin ñuu Betsaida, ñihi ca cutachi tuñi Nyoo chi ndo ícan saha ñáyivi Tiro ta ñáyivi Sidón cuan.

15 Ta nyoho ñu ñuu Capernaum, cuñi maa ndo vatyí cundaa ndo nyacua nya andivi. Soco cunoo ndo nyacua nya anyaya, vatyí ña quichahá ndo tuhun Nyoo —catyí ra Jesús.

16 Ta catyí ra chi ndi uñi xico uchi tahan ra cuan:

—Ñáyivi cha tyasohó tuhun cahán nyoho, tuhun cahán yuhu tyasohó ñu cuví cuan. Ta ñu ña quichahá tuhun cahán nyoho, tuhun cahán yuhu ña quichahá ñu cuví cuan. Ta ñu ña quichaha tuhun cahán yuhu, tuhun cahán ra cha saquichí chii, ña quichahá ñu cuví cuan —catyí ra Jesús chi tandihi ra.

Nu nachaḡ coyo ndi uñi xico uchi tahan ra cha chichahḡn tuhun Nyoo

17 Yucuan cuví nu nachaḡ coyo ndi uñi xico uchi ra cha chichahḡn tuhun Nyoo chihin ñáyivi. Ta sñi xaan cacuví chi ra. Ta cacatyí ra chi ra Jesús:

—Sutu Mañi yuhu, nyacua nya tatyí ña vaha ta quichahá tuhun cahán ndi tatu cahán ndi sivun —catyí ra.

18 Tyicuan ta catyí ra Jesús chi ra:

—Ay, yuhu nyehi andivi nu canḡ cava cuihna, ra nañi Satanás. Tari noo tacha, tyicuan caa canḡ cava ra.

19 Ta yuhu, चाहि fuerza chi ndo vatyí cuví chasaha ndo chi ra ña vaha cuan. Ta cuví cuaca chaha ndo siqui coo ta tisuhma, ta ñahri cha cuví chi ndo.

20 Soco ma sñi xaan cuví chi ndo vatyí cuví tava ñehe ndo tatyí ña vaha cuan. Sñi ca cūvi chi ndo vatyí nyaá sivi ndo nu libru Nyoo —catyí ra Jesús.

Nu sacahnú ra Jesús chi Nyoo vatyí sñi cuñi ra vatyí sañahá Nyoo tuhun vaha chi ñu ndahvi

(Mt. 11.25-27; 13.16-17)

21 Cuhva cuan sñi xaan cuñi ra Jesús sahá Tatyí Ii Nyoo, ta catyí ra:

—Sacahní chuun, Sutu Mañi yuhu, vatyí nyacá ñahun andivi ta ñuhu ñáyivi. Vatyí maun sañahún tuhun maun chi ñu ndahvi ihya. Ta ña sañahún chi ra chitó ta ra cha chiñi tuñi. Tyicuan caa Sutu Mañi yuhu vatyí tyicuan caa cuhva cuñún —catyí ra Jesús.

22 Ta catyí ra Jesús chi tandihi ra sacuví tyiño nuu ra:

—Tandihí maa tuhun cuan chahḡ Suti chii. Yori ñohó nuu chii, noo tuhun ri maa Suti ñohó nuu chii. Ta yori ñohó nuu chi Suti, noo tuhun ri mai ñohó nui chi ra. Ta chi ñáyivi cuñi mai sacote tuhun ra, chi ñu cuan cusacote —catyí ra.

23 Tyicuan ta nanyehe ra chi ra cachicá noo chihin ra. Ta catyí ra chi ra:

—Sñi xaan cuñi nyoho ta ñáyivi cha iyó vityin vatyí nyehé ndo cha sacuví.

24 Vatyí cuaha xaan rey ta ra profeta Nyoo ta cha naha cuñi ra nyehe ra cha nyehé nyoho vityin. Soco ña nyehe ra. Ta cuñi ra cuiñi ra tuhun cha chiñi nyoho vityin. Soco ña chiñi ra —catyí ra Jesús.

Nu sañahḡ ra Jesús chi yo vatyí tahán chi tyinyee yo chi ñáyivi savaha ri

²⁵ Tyicuan ta chaꝯ noo ra sacuahá cuenda ley vehe ñuhu. Ta quichaha ndaca tuhun ra chi ra Jesús, Vatyí nducu nyehe ra chi ra. Ta catyí ra:

—Maestro, ¿yoso caa cunyacuvi ta cuhin nu coi noo ñáyivi cha ma naa ca maa?

²⁶ Tyicuan ta nacahan ra Jesús, ta catyí ra:

—¿Ñáá catyí nu ley? ¿Yoso caa tuhun cha sacuahún?

²⁷ Tyicuan ta nacahan ra sacuahá cuenda ley cuan ta catyí ra:

—Catyí ley, cuñi yo chi Nyoo chihin tandihi añima yo ta chihin cha nñi iñi yo, ta chihin tandihi fuerza yo, ta chihin cha tandihi cha chiñi tuñi xiñi yo. Ta cuñi yo chi ñáyivi tahan yo tari cha cuñi yo chi maa yo. Tyicuan caa catyí chi —catyí ra cuan.

²⁸ Tyicuan ta catyí ra Jesús chi ra:

—Ndicha cha cahún. Tyicuan caa sacuvun ta cacu añimon ta coun ñáyivi cha ma naa ca maa —catyí ra Jesús.

²⁹ Soco ra sacuahá cuenda ley cuan cuñi ra savaha ra chi ra, ta quichaha catyí tucu ra chi ra Jesús:

—¿Yóo cha cuví ñáyivi tahn? —catyí ra.

³⁰ Tyicuan ta nacahan ra Jesús, ta catyí ra:

—Noo ra quita ra Jerusalén ta cuahan ra nya ñuu Jericó. Ta tahan ra chi ra suhu. Ta suhu ra tandihi cuii maa cha nyiso ra, nyacua nya sahma ra. Ta cañi ra chi ra nyacua chacun taxin ra chi ra. Ta sandoꝯ maa ra chi ra yucuan.

³¹ Tyicuan ta yahꝯ noo tata sutu ityi cuan. Soco cuhva cha nanyehꝯ ra chi ra catuvi cuan nya sava ri yahꝯ ra.

³² Tyicuan ta yahꝯ tucu nonga ra cha yihí cuenda vehe ñuhu, cha nañi levita. Soco cha nanyehꝯ ra chi ra catuvi cuan suri nya sava ri yahꝯ ra.

³³ Tyicuan ta quichi tucu noo ra Samaria. Ta cua yaha tucu ra suri ityi cuan. Ta nanyehꝯ ra chi ra catuvi yucuan, ta quichi nundahvi cuñi ra nyehe ra chi ra.

³⁴ Ta tuhva ra nu catuvi ra, ta quichaha saha ra tatan chi ra. Ta tyihꝯ ra aceitye ta vinu nu cahvi chi ra. Ta sahvi ra noo sahma chata ra. Yahꝯ cuan ta sandaa ra chi ra burru sana ra, ta naquehen ra chi ra, ta cuahan ra chihin ra nu nyaá noo vehe. Ta yucuan saha cuenda ra chi ra.

³⁵ Ta cha inga quivi cha cuñi cuhun ra Samaria cuan. Ta tava ra uvi tahan xuhun. Ta chahꝯ ra chi chitoho vehe cuan. Ta catyí ra chi ra: “Saha cuenda vahun chi ra ihya. Ta cuhvon cha cachi ra. Ta saton tatan chi ra na nduvaha ri ra. Tatu cuñi ca chi xuhun, tyiyahvi mai chuun nandichi”, catyí ra. Yucuan ta cuahan ra —catyí ra Jesús.

³⁶ Nu ndihꝯ nacatyí ra Jesús tuhun ihya, quichaha ndaca tuhun ra chi ra sacuahá cuan, ta catyí ra:

—Vaha. ¿Chichi cha uñi tahan ra cuan, nya ra cuví ra tahan ra ndahvi cuan? —catyí ra Jesús.

³⁷ Tyicuan ta quichaha catyí ra sacuahá cuan:

—Ra cha cundahvi cuñi chi ra —catyí ra.

Tyicuan ta quichaha catyí ra Jesús:

—Cuahan ta sacuvi tucu yoho tyicuan caa chihin ñáyivi cha iyó tundoho chii —catyí ra.

Nu chinyaq ra Jesús vehe cu Marta chihin cu María

³⁸ Ta quehen ra Jesús ityi cuahan ra. Ta chaꝯ ra noo ñuu. Ta yucuan iyó noo ñaha cha nañi Marta. Ta chaꝯ ra vehe ña.

³⁹ Ta cu Marta iyó noo cuhu ña cha nañi María. Ta cu María chicunyaá ña yatyin ri chaha ra Jesús, vatyí cuiñi ña tuhun cahán ra.

⁴⁰ Soco cu Marta cuaha xaan tyiño nyaá sacuvi ña. Ta chaá ña nu nyaá ra Jesús, ta quichaha catyí ña chi ra:

—Tata. ¿Atu ña chicá xiñi yoho vatyí cuhi sandoó maa ña chii chihin tyiño? Catyí chi ña na tyinyee ña chii —catyí ña chi ra.

⁴¹ Soco ra Jesús catyí ra chi ña:

—Marta, Marta, chicá xaan xiñun ta cutyiño xaan cuñún chihin tyiño chiña.

⁴² Soco iyó noo tuhun cha tahán chi caca xiñi yo. Ta cu María ihya nacachi ña tyiño vaha ca sacuvi ña cha tyasohó ña tuhun cahín. Ta yuhu ma cuvi tinyai chi ña —catyí ra Jesús chi cu Marta.

11

Nu sañaha ra Jesús chi ra cachicá noo chihin ra yoso caa cacan tahvi ra chi Nyoo

(Mt. 6.9-15; 7.7-11)

¹ Cuvi noo chaha cha chicán tahvi ra Jesús. Ta cuhva cha ndihí chican tahvi ra, ta quichaha catyí noo ra chicá noo chihin ra chi ra:

—Sañaha chi ndi yoso caa cacan tahvi ndi chi Nyoo. Tari sañaha ra Juan chi ra chicá noo chihin ra —catyí ra.

² Tyicuan ta catyí ra Jesús chi ra:

—Cua cuhve cuhva chi ndo yoso caa. Tyehe caa cacan tahvi ndo:

Sutu Mañi yuhu, yoho cha nyaun andivi. Sacahnu xaan ndi chuun.

Na quichi quivi cha nyaca ñahun ihya siqui ñuhu ñayivi.

Na sacuvi ñayivi ihya siqui ñuhu ñayivi tandihí cuhva cuñi maun, tari cuhva cuvi gloria.

³ Cuhva cha cachi ndi tacuhva yoso cuhva yaha ndi noo noo quivi.

⁴ Saha tucahnu iñi chi ndi. Tari maa ndi sahá ndi tucahnu iñi chi ñu tasi iñi chi ndi.

Ma cuhvon cha nducu nyehe ra ña vaha chi ndi, soco sacacu chi ndi tacuhva ma sacuvi ndi cuatyí nuun.

Tyicuan caa cacan tahvi ndo —catyí ra Jesús.

⁵ Ta catyí tucu ra ñandihí:

—Saha yo tuhun tyi nyoho iyó noo amigon, ta chaa ra vehun cha ñuu ta catyí ra chuun: “Xaa, saha tumañi iñi chii, cuhva noo uñi tahan pan chii.

⁶ Vatyí noo ra tahin nichaa ra vehi. Ta cañi xaan quichi ra. Ta ñahri maa cha iyó chii cuhve chi ra.”

⁷ Ta yoho cunacahun ta catyun chi ra: “Ma sayangon chii, ndee. Vatyí nyasi yuvehi. Ta ñiquixi chihin sehi. Ta ña cuvi nducuite ta cuhve cha cuhve chuun cha vityin.” Tyicuan caa cucatyun chi ra.

⁸ Ta catyí yuhu chuun. Vasí ra tahun cuvi chi ra, ma nducuiton ta cuhvon chi ra cha numi ri. Soco tatu ndoo ra yucuan, ta ma cundihñi ra cacan ra chuun, sacachan ra yuvehun ta cana chaa ra chuun tacuhva cha ma cuvi cusun, ta cundihñun cha sacachan ra yuvehun, tyicuan ta nducuiton ta cuhvon chi ra, tacuhva cha ma sayanga ca ra chuun.

⁹ Ta tyicuan caa tucu nyoho, cacan ndo chi Nyoo. Ta cuhva ra chi ndo. Nanducu ndo ta ñihi ndo. Sacachan ndo yuvehe ta nuña.

¹⁰ Vatyí tatu chican ndo, ñihi ndo. Tatu nducu ndo, ñihi ndo. Ta tatu sacachan ndo yuvehe, nuña yuvehe.

11 "Tyicuan caa tucu nyoho cha iyó sehe ndo. Chahá ndo cha vaha chi sehe ndo. Ña tuhvá ndo chahá noo yuu chi sehe ndo tatu chican ndotyin pan. Ta ña tuhvá ndo chaha ndo noo coo chi sehe ndo, tatu chicán ndotyin tiyaca.

12 Ta ña tuhvá ndo chaha ndo noo tisuhma chi sehe ndo tatu chicán ndotyin ndívi cachi ndotyin.

13 Nyoho cha quiñi iyó ndo, soco chitó ndo yoso caa cuhva ndo cha vaha chi sehe ndo. Ta vihi ca Sutu Mañi yo cha nyaá andívi, cuaha ca cha vaha cuhva ra chi ndo tatu cacán ndo chi ra. Ta cuhva ra Tatyí li ra cunyaa añima ndo.

Ra xaan iñi chi ra Jesús catyí ra vatyí chihin fuerza cuihna sacuví ra milagru (Mt. 12.22-30; Mr. 3.20-27)

14 Ra Jesús tavá ra tatyí ña vaha cha yihí chi noo ra cha ñihi sahá cuihna. Ta cuhva cha quita tatyí ña vaha cuan chi ra ñihi cuan, nacahan ra. Tyicuan ta ñáyivi, iyo xaan cuñí ñu.

15 Ta yihí ñu catyí ñu:

—Ra ihya, tavá ra tatyí ña vaha soco chihin fuerza ra Beelzebú ra cuví nuu chi cuihna —catyí ñu.

16 Ta yihí ñu cuñí ñu nducu nyehe ñu chi ra, ta chicán ñu chi ra Jesús na savaha ra noo seña chi ñu chihin tunyee iñi Nyoo.

17 Soco ra Jesús chitó ra tuhun chicá xiñi ñu. Ta quichaha catyí ra chi ñu:

—Tatu gobiernu ta cacusiñ ra, cuaha ri ityi nanduvi ra, cucañi tahan ra chihin tahan ra, ta cundihi tuhun cha cunyaca ñaha ra. Tatu noo vehe ta cacusiñ ñu chihin tahan ñu, cutívi nu nyicú ñu.

18 Ta tyicuan caa tucu cuihna. Tatu tandíhi ra cacusiñ ra chihin tahan ra cundihi fuerza cha iyó chi ra. Ta ihya catyí chi ndo tyehe caa vatyí nyoho catyí ndo vatyí chihin fuerza ra Beelzebú tavé tatyí ña vaha.

19 Soco tyehe ta tavé tatyí ña vaha tari cuhva catyí ndo, ndaca tuhun ndo chi ra nyicú chihin ndo yóo chi fuerza tavá maa ra tatyí ña vaha. Maa ra sacoto ra chi ndo cha ndicha vatyí nyoho tondo ri chicá xiñi ndo.

20 Soco catyí chi ndo vatyí yuhu tave tatyí ña vaha chihin fuerza Nyoo. Ta cuñí chi catyí cuan vatyí ndicha cuí Nyoo ra nyacá ñaha añima ñáyivi cha chaá ra nu nyicú ndo.

Nu sañahá ra Jesús vatyí ñihi ca fuerza Nyoo ta ñima ca fuerza cuihna

21 "Tatu noo ra iyó vavaha fuerza chi ra ta nyisó ra mityí ra, ta sahá cumi ra vehe ra. Ñohó xehe vaha ndaha tyiño ra chichi vehe ra tacuhva cha ma cuví tinyaa ra suhu.

22 Soco tatu quichi inga ra cha cuaha ca fuerza iyó chi, ta cañi tahan ra chihin ra, ta cuví chasaha ra chi ra, tyicuan ta tinyaa ra ndaha tyiño ra, ta sachá ra chi ra tahan ra.

23 Ñáyivi ña sahá tyiño chihin, satíví ñu tyiño sahí. Ta ñu ña tyinyeé chii cha cahán ñu tuhun Nyoo chihin ñáyivi, cuñí chi catyí vatyí ña chahá ñu cha coto ñáyivi tuhun cahín.

Nu sañahá ra Jesús chi yo yoso caa ndichi tucu tatyí ña vaha inga chaha tatu naa iñi yo chi Nyoo (Mt. 12.43-45)

24 "Tatu noo tatyí ña vaha quita chi noo ñáyivi, chicá noo chi noo ñuhu ityi, nanducú chi noo nu nyitatu chi. Soco ña nañihi maa chi nu nyitatu chi, tyicuan ta ndichi xiñi chi: "Cunuhu tiquí nya vehi nu quite."

²⁵ Yucuan ta nachaa chi añima nu quitá chi. Ta nanyehe chi vatyí ndi xaan ta vii xaan.

²⁶ Tyicuan ta cua naquehen chi ucha ca tahan tatyí ña vaha cha yaha ca cuhva ta ican saha maa chi. Tyicuan ta in ri quihvi tandihí chi añima ñu cuan. Yucuan chaha yaha ca cuhva nanduvi ñu ican saha cha cuví maa ñu —catyí ra Jesús.

Ñu cha ndicha iyó vaha ñayivi

²⁷ Cha ni ri ca cha cahán ra Jesús tuhun cuan, ta cana chaa noo ñaha cha ñohó mahñu ñáyivi cuan. Ta quichaha catyí ña:

—Ñana cha sii cuví chi ñaha cha sacacu chuun ñaha cha chaha caxun —catyí ña.

²⁸ Soco ra Jesús catyí ra:

—Sii ca cuñí ñu cha chiñí tuhun cahán Nyoo ta quichahá ñu —catyí ra.

Ñáyivi ña vaha, maa ri maa nyatu cahnu cuñí ñu nyehe ñu
(Mt. 12.38-42; Mr. 8.12)

²⁹ Tyicuan ta chaq coyo ñáyivi nu nyaá ra Jesús. Ta quichaha catyí ra chi ñu:

—Ñáyivi cha iyó vityin quiñi xaan iyó ñu. Ta nyiyo iñi ñu. Cuñí ñu nyehe ñu seña ta cha iyo. Soco noo ri cunyehe ñu, tahan cha sacuvi Nyoo chihin ra Jonas.

³⁰ Tari ra Jonás cuví ra seña chi ñáyivi ñuu Nínive ta cha naha, tyicuan caa tucu yuhu Rayi cha quichi nya gloria, cuví tari noo seña chi ñáyivi cha iyó vityin.

³¹ Quivi tachi tuñi Nyoo chi ñáyivi cunandoto ñaha cuví reina ityi sur ta cha naha, ta cucatyí ña vatyí cuhun ndo anyaya, vatyí maa ña vasi cañi ñuu ña, soco quichí ña, quichí tyasoho ña tuhun cha chiñi tuñi cahán ra Salomón. Ta ihya cahnu ca cuví ra cha cahán chihin ndo vityin ta ñima ca ra Salomón.

³² Ta quivi cutuñi chi tandihí ñáyivi, cunducuita ñu chiyo ñuu Nínive ta cha naha, ta cucatyí ñu vatyí nyoho ñu cha iyó vityin cuhun ndo anyaya, vatyí maa ñu ñu Nínive, canasama ñu cuhva iyó ñu quivi cahán ra Jonás tuhun Nyoo chihin ñu. Ta vityin yuhu ra cahnu ca cahán chihin ndo ta ñima ca ra Jonás.

Nu sañahq ra Jesús vatyí na saha yo cuenda añima yo coto vaha ñahri cha ndichin Nyoo nyaá
(Mt. 5.15; 6.22-23)

³³ Yori ndo tyaa ndo lámpara ta tyihi xehe ndo, o tyihi ndo chichi noo caja. Vatyí ñuhú cuan tahan chi coso minoo nu sucun. Tacuhva quihvi ñáyivi vehe ndo, soco ndichin.

³⁴ Chiti nuu ndo noo cha sandichin chi ndo cuví. Ta tyicuan caa tucu añima ndo, tatu iyó cha ndichin Nyoo añima ndo, vaha ñáyivi cuví ndo. Tatu ñahri cha ndichin Nyoo nyaá tari noo ra cuaa cuví ndo, ña cuví nyehe ndo ityi vaha cha cuahan nu nyaá Nyoo.

³⁵ Yucuan chaha saha ndo cuenda añima ndo. Tatu nyaá cha ndichin Nyoo chihin ndo, o nyaá cha ñaa iñi.

³⁶ Tatu tyitu añima ndo chihin cha ndichin Nyoo ñahri ca maa noo nu ñaa iñi iyó chi ndo, vatyí sandichin chi tandihí ndo. Tari cha nyaá noo lámpara sacatá chi ñuhú chi ndo cuví cuan —catyí ra Jesús.

Cahán ra Jesús chi ra casacuaha cuenda ley vehe ñuhu ta chi ra fariseo, ra caquichaha xaan ley cuan

(Mt. 23.1-36; Mr. 12.38-40; Lc. 20.45-47)

³⁷ Cuhva cha ndihí cahan ra Jesús nuu ñáyiví, noo ra fariseo, ra quichaha xaan ley vehe ñuhu, catyí ra chi ra Jesús, vatyí na cuhun ra cucachi ra nya vehe ra. Ta chaá ra Jesús vehe ra. Ta quihví ra chicunyaa ra mesa.

³⁸ Tyicuan ta ra fariseo cuan iyo cuñí ra vatyí ña nacatyá ra Jesús ndaha ra, tari cuhva costumbre maa ñu cha cumañi cachi ñu.

³⁹ Soco ra Jesús catyí ra chi ra:

—Nyoho, ra cacuví fariseo, tari cha chata ri vaso ta coho sanduvii nyoho. Soco ityi chichi, quiñi caa. Vatyí ña nacatyá ndo. Tyicuan caa nyoho. Vatyí cuñí ñáyiví vatyí vaha ñáyiví cuví ndo. Soco xehe ri suhu ndo ta ña sacuví ndo cha vaha.

⁴⁰ Ndava xaan iñi ndo. ¿Atu ña chitó ndo vatyí ra cha savahá ityi chata vaso, suri maa ra savahá ityi chichi? Vatyí tari vaso cuví ndo.

⁴¹ Tahán chi sahá ndo tumañi iñi chi ñáyiví, ta tyinyee ndo chi ñu. Sacuvi ndo cha vaha chihin ñu, tyicuan ta nduvii tucu ityi chichi ndo.

⁴² ¡Ndahvi nyoho ra fariseo! Vatyí nyoho vasi vaha chaha ndo diesmo chi Nyoo cuenda yucu cha nañi menta ta ruda ta ñáa ndihí ca yucu cha tachí ndo, soco ña quichahá ndo cuhva cha vaha cha cuñí Nyoo sacuví yo, ta cha cuñí yo chi ra. Ta ican ihya cuví cha tahán chi sacuvi ndo, soco ma sandihí ndo cha cuhva ndo diesmo ñandihí.

⁴³ ¡Ndahvi nyoho cha cuví ndo fariseo! vatyí cuñí ndo cunyaa ndo nu tyayu vaha ca chichi vehe ñuhu. Ta cuñí ndo cha saha ñáyiví ñáyiví chi ndo nuyahví.

⁴⁴ ¡Ndahvi nyoho ra sacuahá cuenda ley, ta nyoho ra fariseo! Vaha sahá ndo chi ndo, soco cuví ndo tari noo ñaña ndiyí cha ña quetuví. Vatyí yahá ñáyiví siqui soco ña chitó ñu ñáa cha ñohó chichi ñaña cuan. Vatyí ñahri seña catuví nu yihí ndiyí cuan. Cuñí maa ñu vatyí vaha ndo, soco ña chitó ñu vatyí ña vaha añima ndo —catyí ra Jesús.

⁴⁵ Tyicuan ta nacahan noo ra sacuahá cuenda ley vehe ñuhu, ta catyí ra:

—Maestro, cha catyún tyehe caa, nañi tucu chiin chi nyuhu —catyí ra.

⁴⁶ Tyicuan ta quichaha catyí ra Jesús chi ra:

—¡Ndahvi tucu nyoho ra casacuaha cuenda ley vehe ñuhu! Vatyí sanducua ca ndo ley cha tachí Nyoo ta cha naha. Ta ña tahán chi. Ta yori ndoyó carga cuan, ta saniñi ndo na sacuví ñu ta ni maa ndo ni chiin ña tyinyee ndo chi ñáyiví.

⁴⁷ ¡Ndahvi nyoho! Vatyí sanduvahá vaha ndo ñaña nu ñohó yiqui ra profeta Nyoo cha cachahñi sutu chahnu ndo ta cha naha.

⁴⁸ Chihin cuan cuñí chi catyí vatyí ndoó ndo vaha cha sacuvi sutu chahnu ndo ta cha naha. Vatyí sutu ndo cachahñi ra chi ra profeta Nyoo. Ta nyoho sanduvahá ndo ñaña ra.

⁴⁹ Yucuan chaha catyí Nyoo ta cha naha vatyí cutachi ra suhva ra profeta ta ra caca tyiño ra nu nyicú ndo. Ta cucahñi ndo suhva ra ta inga ra cusacono ndo chi ra.

⁵⁰ Ta ndicha tyicuan caa sacuví ndo. Nyoo cutachi tuñi ra chi ndo cha cuenda tandihí ra profeta ra cachahñi sutu chahnu ndo nyata chinó ñuhu ñayiví ta nyacua nya vityin.

⁵¹ Nyacua nya niñi ra Abel cha chati cha chahñi ra Caín yañi ra, ta nyacua nya niñi ra Zacarías cha cachahñi ñu chichi vehe ñuhu yatyin nu nyaa arta.

Yucuan chaha catyí Nyoo vatyi cutachi tuñi ra chi ñáyivi cha iyó vityin cha catyi cuatyí ñu chiyo ta cha naha.

⁵² ¡Ndahvi nyoho ra casacuaha cuenda ley vehe ñuhu! Vatyi tari cha tyihí xehe ndo ndaha ticu cuenda yuvehe nu quihvi ñáyivi ityi Nyoo. Ta ni maa ndo ña quihvi ndo nu nyaá Nyoo. Ta ni ri ña chahá ndo cha quihvi inga ñáyivi cha cuñi quihvi —catyí ra Jesús.

⁵³⁻⁵⁴ Ndihi cahan ra Jesús tuhun cuan, ta quita ra. Soco ra casacuaha ley vehe ñuhu chihin ra fariseo, nduxaan xaan ra ta quichaha cuquiñi cuñi ra nyehe ra chi ra Jesús. Ta canducu ra cuhva yoso caa cahan ra Jesús noo tuhun ña vaha, ta tyaa ra cuatyí siqui ra.

12

Nu sañahá ra Jesús vatyi ma cuvi tixehe yo cuatyí yo

¹ Cuenda mil ñáyivi ndu ¡in ri nyacua nañi tahan ñu, vatyi cuaha xaan ñu. Tyicuan ta ra Jesús catyí xihna ca ra chi ra cachicá noo chihin ra:

—Saha ndo cuenda chi ndo chihin ra fariseo coto sandahvi ñaha ra chi ndo. Vatyi tari ndaa pan chihin yuchan iya, tyicuan caa cuví cuatyí ra tyi sahá ra tyi vaha ra. Soco ma cuvi tixehe ra cuatyí ra.

² Vatyi ñahri noo cha ñohó xehe ta cuñún, tyi ma natuvi, ta ñahri cha xehe ta cuñun, vatyi ma coto ñáyivi.

³ Yucuan chaha ñáá ndihi tuhun cha cahán ndo nu xehe, cuquita chi nu ndichin. Ta ñáá ndihi tuhun cha cahan ndo chichi vehe ndo, cucuñi tandihi ñáyivi noo quivi.

¿Yóo chi tahán chi cuyuhvi yo, chi ñáyivi o chi Nyoo?

(Mt. 10.28-31)

⁴ Ta catyí chi ndo cha cuví ndo ra tahin, vatyi ma yuhvi ndo chi ra chahñi coño ñuhu ri. Vatyi yahá tuhun cuan ta ñahri ca cha cuví sacuvi ra.

⁵ Soco cua catyi chi ndo yóo chi tahán chi cuyuhvi ndo. Yuhvi ndo ta quichaha ndo, soco chi maa Nyoo ra cuví tinyaa ñáyivi ndo. Ta yaha cuan ta cuví tyihí ra añima ndo anyaya.

⁶ Saa, ña yahvi nyaá ti. Cuví sata yo ohon tahan ti chihin uvi ri xuhun. Soco vasi nyihi ri ti, Nyoo ña naa iñi ra chi ni noo ti.

⁷ Ta nyoho, yahvi ca nyaá ndo nu Nyoo ta ñima ca cuaha saa ta nyacua nya ixi xiñi ndo ta chitó Nyoo yoso tahan nyaá. Yucuan chaha ma yuhvi ndo.

Ma yuhvi yo cahán yo tuhun ra Jesucristo nuu ñáyivi

(Mt. 10.32-33; 12.32; 10.19-20)

⁸ Catyí chi ndo vatyi nya ndo cahán ndo tuhun chihin ñáyivi, tyicuan caa tucu cucahin tuhun ndo nuu ángel Nyoo gloria. Vatyi yuhu Rayi cha quichi nya gloria cuví.

⁹ Soco nya nyoho cha cahán nuu ndo cahán ndo tuhun chihin ñáyivi, tyicuan caa tucu yuhu, ma cahin tuhun ndo nuu ángel cuenda Nyoo.

¹⁰ Ta vasi cahán ñáyivi chi yuhu Rayi cha quichi nya gloria, Nyoo cusaha ra tucahnu iñi chi ñu. Soco yóo cha cahán ña vaha siqui Tatyí Ii Nyoo ma ñihi ñu tucahnu iñi cuenda cuan.

¹¹ Cuhva cha cunyaca ñáyivi chi ndo chichi vehe ñuhu, o nu juez, o nuu ra cuví tyiño, ma caca xiñi ndo ñáá tuhun cunacahan ndo.

¹² Vatyi cuhva cha cua nacahan ndo, yucuan cuhva cuhva maa Tatyí Ii Nyoo ñáá tuhun tahán chi nacahan ndo —catyí ra Jesús.

Nu चाहá ra Jesús cuhva vatyí ña tahán chi cunyicon yo cha tyayii

¹³ Noo ra cha ndihi chihin ñáyiví cuaha cuan, catyí ra chi ra Jesús:

—Maestro, catyí chi yañi vatyí natahvi sava ra cha tyayii cha sandoo sutu ndi chi ndi —catyí ra.

¹⁴ Tycuan ta catyí ra Jesús chi ra:

—¿Yóó cha tyiso chi yuhu cha cuví juez ta catyí ndo vatyí tahvi sava yuhu cha chíi ndo? —catyí ra.

¹⁵ Tycuan ta quichaha catyí tucu ra:

—Saha ndo cuenda ta ma nyiyo iñi ndo cha tyayii. Vatyí ña chiñuhú ri cha coo cuaha ndaha tyiño yo tacuhva coo vaha yo ñáyiví —catyí ra.

¹⁶ Tycuan ta चाहá ra Jesús noo cuhva ihya chi ñu:

—Chiyó noo ra tyayii. Ta cuaha xaan tyiño sahá ra iyó.

¹⁷ Tycuan ta ndichi xiñi ra: “¿Yoso caa cusacuvi? Ñahri nu naquehen vahi tandihi tyiño sahi.

¹⁸ Soco cha chité yoso caa cunyacuvi. Cusatani yaca nyihi nu yihí niñi, vatyí nyihi xaan. Ta cusavahi cha nahnu ca. Ta yucuan cunaquehen vahi tandihi maa niñi cha cuquita nu iyó tyiño sahi.

¹⁹ Tycuan ta cuaha cuiya ma saha tyiño que. Cunyatiti ta cusii cuñi. Ta cachi vahi. Ta cucoho vahi”, ndichi xiñi ra.

²⁰ Soco catyí Nyoo chi ra: “Tondo xaan iyón. Vatyí vityin cha cuaa cucúvun. Ta cha cumí vahun ¿yóó chi cua ndoo?”

²¹ Tycuan caa cuví chi ñáyiví cha sacayá tandihi cha tyayii soco ñahri maa iyó chi ñu nuu Nyoo —catyí ra Jesús.

Ma caca xaan iñi yo ñáá ndihi cha chiñuhú chi yo
(Mt. 6.25-34)

²² Tycuan ta quichaha catyí ra Jesús chi ra cachicá noo chihin ra:

—Catyí chi ndo, vatyí ma caca xaan xiñi ndo yoso caa ñihi ndo cha cachi ndo, ta tuhun sahma cuihno ndo.

²³ Vatyí yahvi ca nyaá ñáyiví yo ican saha cha cachi yo. Ta yahvi ca nyaá coño ñuhu yo ican saha cha cuihno yo.

²⁴ Saha ndo cuenda saa vatyí ña sahá tyiño ti. Ta ni ri ña naquehén vaha ti cha cachi ti. Soco chachí ti, vatyí Nyoo चाहá ra cha cachi ti. Ta nuu Nyoo yahvi ca nyaá nyoho ta ñima ca saa.

²⁵ Ta vasi chicá xaan xiñi ndo soco ma cuví sandusucun ca ndo ni chiin ca chi ndo.

²⁶ Tatu ni chiin cuan ña cuví chi ndo, ¿ñáá tuhun cha chicá xaan xiñi ndo tuhun tandihi ca cha chiñuhu chi ndo?

²⁷ Saha ndo cuenda yoso caa iyó tu ita vatyí ña sahá tyiño tun. Soco catyí chi ndo vatyí ni rey Salomón chihin tandihi cha tyayii ra ta ña tyaqui cha ñihnó ra tari cha sacuihno Nyoo chi tu ita cuan.

²⁸ Tatu tycuan caa sacuihnó Nyoo chi tun ita cha iyó nu chiqui vityin, ta tyaan cucayu tun chichi horno, ta nyaca cuví chi nyoho ta ma sacuihno ra. Soco maa ndo ña chinó vaha iñi ndo chi ra.

²⁹ Ma caca xaan xiñi noo tuhun cha cachi ndo ta cha coho ndo.

³⁰ Vatyí ñáyiví cha ña chinó iñi chi Nyoo chicá xiñi ñu tuhun ihya. Soco nyoho chinó iñi ndo chi Sutu yo Nyoo ta maa ra chító ra ñáá cha chiñuhú chi ndo.

³¹ Vaha ca cha nanducu ndo yoso caa nacuhva cuenda ndo chi ndo chi Nyoo vatyí cunyaca ñaha ra añima ndo. Ta tycuan caa ta ñihi ndo tandihi cha chiñuhú chi ndo.

*Cha vaha cha iyó gloria**(Mt. 6.19-21)*

³² Ma yuhvi nyoho, mbee sane. Vasi ña cuaha ndo soco Sutu yo Nyoo cuñí ra chi ndo. Yucuan chaha cucuhva ra quihvi ndo nu nyacá ñaha ra.

³³ Xico ndo cha iyó chi ndo. Ta cuhva ndo chi ñu ndahvi. Tatu sacuví ndo tyehe caa, sacayá ndo cha vaha nuu Nyoo cuví cuan. Vatyí nuu Nyoo ña ndihí cha vaha cuan. Vatyí ni ri ra suhu, ni quití, yori cha sativí iyó yucuan.

³⁴ Vatyí nuu cunyaa cha tyayíi ndo, yucuan cuví nu nyaá xiñi ndo. Ta yucuan cucunyaa añima ndo —catyí ra.

Nu sañahá ra Jesús chi yo yoso caa cuatu tuhva yo chi ra quiví quichi ra inga chaha

³⁵ Cuatu tuhva vaha ndo quiví quichi inga chaha.

³⁶ Ta cuví ndo tari musu cha canyatú tuhva chi chitoho ñáá cuhva ndichi ra cha cuahan ra noo vico tandaha. Ta nyatú tuhva ra, vatyí tacuhva tañi tyehe ri nuña ra yuvehe cuhva cha sacachan chitoho ra cha nachaa ra.

³⁷⁻³⁸ Ta caa cuhva ri cuan sii xaan cuñí ra nyehe ra chi ra. Vatyí nyatú tuhva ra chi ra nyacua nya nachaa ra, vasi cha cuaa, vasi ñaa ca. Ta cuatyaa ra chi musu cuan yuhu mesa ta cacachi ra. Tyicuan ta sii xaan cucuñi musu cuan. Vatyí tyicuan caa nyacuví chitoho ra chihin ra.

³⁹ Ta coto ndo tuhun ihya vatyí tatu noo chitoho noo vehe, ta coto ra ñáá cuhva cuquihvi ra suhu vehe ra, saha ra cuenda vehe ra. Ta ma cuhva ra quihvi ra suhu cuan chichi vehe ra. Vatyí coto quehen ra tandihí cha iyó chí ra.

⁴⁰ Ta tyicuan caa cuví tucu nyoho, cuatu tuhva ri ndo. Vatyí yuhu Rayíi cha quichi nya gloria, sana ri iñi ndo ta cuquichi —catyí ra Jesús.

*Musu vaha ta musu ña vaha**(Mt. 24.45-51)*

⁴¹ Tyicuan ta quichaha ndaca tuhun ra Pedro chi ra Jesús:

—¿Yóó chi cuenda cahun tuhun ihya? ¿Atu cha cuenda maa ri maa ndi, o cha cuenda tandihí ñáyiví?

⁴² Tyicuan ta nacahan ra Jesús, ta catyí ra chi ra:

—Musu cha tyasohó tuhun cahán chitoho, yucuan cuví musu vaha. Vatyí sahá cuenda ra vehe chitoho ra. Ta vaha ri cuhva chahá ra cha cachi tandihí ca musu cuan.

⁴³ Ta sii xaan cuví chi musu cuan tatu cuhva cha sahá tyiño ra, ta nachaa chitoho ra. Vatyí quichaha ra tandihí cha tahán chi sacuvi ra.

⁴⁴ Ta catyí chi ndo vatyí cha ndicha cuví. Vatyí chitoho ra cunatyaa ra tandihí cuii cha cumí ra ndaha ra. Vatyí vaha quichahá ra chihin tyiño sahá ra.

⁴⁵ Soco tatu chicá xiñi musu cuan vatyí naha xaan cuahan chitoho ra, ta quichaha nyacuví ra cha ña vaha chihin ñu nyaá tyiño yoo, ta chihin ra canyicú tucu sahá tyiño cuan. Ta ña cuñí ra sahá tyiño ra. Tyiño chachí ta tyiño chihí ndixi iyó ra.

⁴⁶ Tyicuan ta sana iñi ra ta ndichi chitoho ra quiví cha ña nyatú ra chi ra noo cuhva cha ña chito ra. Tyicuan ta cutachi tuñi chitoho ra chi ra, tari tuhva maa ra chihin musu cha ña quichahá tuhun cahán ra.

⁴⁷ Ta noo musu cha chitó yoso caa iyó chitoho ta ña sacuvi tari cuhva cuñi chitoho ra, cuaha xaan tundoho cunyehe ra.

⁴⁸ Soco tatu noo musu cha ña chitó ta sacuvi ra cha ña vaha, tachi tuñi chitoho ra chi ra. Soco chiin ri, vatyí ña chitó ra, ta chinyacuví ra. Tatu noo

musu ta cuaha cha chaha chitoho ra chi ra, cuaha tahán chi nacuhva cuenda ra chi chitoho ra. Ta ra cha cuaha xaan nyaá ndaha, cuaha xaan tahán chi nacuhva cuenda ra chi chitoho ra.

Nu catyí ra Jesús vatyi cha catyi ra cucañi tahan ñáyivi chihin tahan ñu
(Mt. 10.34-36)

⁴⁹ Tari cha sanatahín ñuhu siquí ñuhu ñayivi, tyicuan caa cuví tyiño vachi. Ñana cha cuñi cha nacayu catyin ri ñuhu ihya!

⁵⁰ Vatyi nyaá yahi noo tundoho cahnu, ta ñana cha nyehí tundoho nyacua nya ndihi tyiño sahí.

⁵¹ Cuñi maa ndo vatyi cha vachi cuhve cha taxi ri coo ndo siquí ñuhu ñayivi ihya. Soco yuhu vachi vatyi sasiin chi ndo.

⁵² Vatyi cha vityin ta ityi nuu ca, ohon ñáyivi noo vehe cucusiin ñu. Uñi ñu cañi tahan chihin uvi ñu. Ta uvi ñu cucañi tahan chihin uñi ñu.

⁵³ Ta ra cuví sutu, cucañi tahan ra chihin sehe ra. Ta ra cuví sehe cucañi tahan ra chihin sutu ra. Ta ñu cuví sihi cucañi tahan ñu chihin sehe ñu. Ta ñu cuví sehe cucañi tahan ñu chihin sihi ñu. Ta ñu cuví tyiso cucañi tahan ñu chihin chono ñu. Ta ñu cuví chono cucañi tahan ñu chihin tyiso ñu —catyí ra Jesús.

Nu catyí ra Jesús chi ñáyivi vatyi ña nacotó ñu vatyi cha chaq quivi cha quichi Sehe Nyoo

(Mt. 16.1-4; Mr. 8.11-13)

⁵⁴ Catyí tucu ra Jesús chi ñáyivi cuaha cha nyicú yucuan:

—Tatu cha nyehe ndo vatyi cha ndihvi vico, catyí ndo vatyi cua coon savi. Ta tyicuan caa cuví.

⁵⁵ Tatu cha nyehe ndo vatyi cha caá tatyí ityi tyañuhu, catyi ndo vatyi cha chaa quivi ihñi. Ta tyicuan caa cuví.

⁵⁶ Nyoho sahá ndo tyi chitó ndo, ta nacotó ndo tandihi tuhun andivi, ta tandihi tuhun ñuhu ñayivi. Soco ¿ñáá tuhun cha ña nacotó ndo ñáá tyembu nyaá ndo vityin?

Nducu yo cuhva yoso caa coo vaha yo chihin ra chicán cuatyi chaha yo coto chun yo vehe caa

(Mt. 5.25-26)

⁵⁷ ¿Ñáá tuhun ña sahá ndo cuenda nya cha vaha ta nya cha ña vaha?

⁵⁸ Tatu noo ra chicán cuatyi chahun ta cuahun chihin ra nu nyaá ra cuví tyiño, ityi cuahun nducun cuhva ni coo vahun chihin ra cha cumañi ca chaa ndo nu nyaá ra cuví tyiño. Coto nacuhva cuenda ra chuun chi juez. Ta juez cuan cunacuhva cuenda ra chuun chi policía. Ta policía cuan cutyihí ra chuun chichi vehe caa.

⁵⁹ Tatu tyicuan caa cuvi, catyí chuun vatyi ma quiton nyacua nya tyiyahvun tandihi cha tahán chi tyiyahvun —catyí ra Jesús.

13

Cuñi chi cha nasama yo cuhva iyó yo o cunyehe yo tundoho

¹ Tyicuan ta suri quivi cuan canyicu suhva ra. Ta quichaha canacatyí ra chi ra Jesús yoso caa cha nyacuví ra Pilato chihin suhva ra Galilea. Vatyi tyihí ra tyiño na cucañi sindaro chi ra Galilea cha cachahá ofrenda chi Nyoo vehe ñuhu. Ta nasacá ra niñi ra cuan chihin niñi quiti cha cua cuvi ofrenda cuan.

² Ta nacahán ra Jesús ta catyí ra chi ra:

—¿Atu chικά xiñi nyoho vatyi cahnu xaan ca cuatyí ra Galilea cuan cha nuu tandihí ra ityi ñuu ra. Ta yucuan chaha cachihí ra?

³Ñima. Vatyi tatu nyoho ta ma nasama ndo cuhva iyó ndo, tyicuan caa tucu cunaa nyoho.

⁴Ta ndi chahun uñi ra cachihí cha canacava torre Siloé cuan siqui ra. ¿Atu cuaha ca cuatyí ra ta ican saha inga ra cha iyó ñuu Jerusalén cuñi maa ndo?

⁵Ñima. Vatyi tatu nyoho ta ma nasama ndo cuhva iyó ndo, cunaa tucu nyoho.

Nu catyí ra Jesús noo cuhva yoso caa nyatú Nyoo cha nasama yo cuhva iyó yo

⁶Tyicuan ta chaha ra Jesús noo cuhva. Ta catyí ra:

—Noo ra iyó yutun cha nañi higo chí ra. Ta nanyaá tun nu ñuhú ra. Ta chahan ra chinyehe ra tatu iñi chíti tun. Ta nanyehe ra vatyi ñahri.

⁷Ta quichaha catyí ra chí ra sahá cuenda chí tun: “Cha uñi cuiya tyito ri quichi nyehi tatu iyó chíti tun. Ta ñahri maa chíti tun iñi. Na cahnya yo chí tun. Vatyi ¿ñáá ri tuhun sayangá tun nu ñuhú ihya? Vatyi ñahri chíti chahá tun”, catyí ra.

⁸Soco ra cha sahá cuenda ñuhú cuan quichaha catyí ra: “Tata, ma cahnya yo chí tun vityin. Na cuinanyaa maa tun nonga cuiya ihya. Cusanduvite ñuhú chaha tun ta cutyihí ñuhú tyahyu.

⁹Vasi tyicuan caa ta cuhva tun chíti. Soco tatu ña chaha tun chíti, tyicuan ta cahnya yo chí tun”, catyí ra.

Quivi nyitatu ñáyivi sanduvaha ra Jesús chi noo ñaha tihí chata

¹⁰Noo quivi cha nyitatu ñáyivi sañahá ra Jesús chí ñu chichi vehe ñuhu.

¹¹Ta yucuan nyaá noo ñaha cha yihí tatyí ña vaha chí. Ta cha chahun uñi cuiya cuhvi ña cha ndutihí chata ña. Ta ña cuví ndundoo ña.

¹²Tyicuan ta nanyehe ra Jesús chí ña. Ta cana ra chí ña. Ta quichaha catyí ra chí ña:

—Cha nduvahun. Ñahri ca cuehe ndohún —catyí ra chí ña.

¹³Tyicuan ta tyiso ra ndaha ra siqui ña. Ta caa cuhva ri cuan ta ndundoo ña. Tyicuan ta quichaha sacahnu ña chí Nyoo.

¹⁴Soco ra cuví nuu vehe ñuhu, cuxaan xaan ra. Vatyi quivi nyitatu ñáyivi sanduvaha ra Jesús chí ña. Ta quichaha catyí ra chí ñáyivi canyicú cuan:

—Iyó iñu tahan quivi tahán chí saha tyiño yo. Yucuan quivi quichi ndo quichi cuví tatan chí ndo. Ta ma quichi ndo quivi nyitatu yo —catyí ra.

¹⁵Tyicuan ta ra Jesús quichaha catyí ra chí ra ndo:

—Nyoho cha sahá ndo tyi vaha ndo. ¿Atu ña ndachi tucu nyoho quití sana ndo vatyi sacoho ndo ndutya chí ti quivi nyitatu yo?

¹⁶Ta tyicuan caa tucu ñaha ihya, vachi ña tata ra Abraham. Ta cha chahun uñi cuiya nuhñi ña chihin cuehe ihya sahá ra ña vaha. Ta yori ndachi chí ña. ¿Atu ña tahán chí ndachi yo chí ña vasi quivi nyitatu yo? —catyí ra Jesús.

¹⁷Tyicuan ta cuhva cha catyí ra Jesús tuhun cuan, tandihí maa ra xaan iñi chí ra cahán cuví nuu ra. Soco tandihí maa ñáyivi cusii cuñi ñu chihin cha cahnu cha sacuví ra Jesús.

Nu catyí ra Jesús vatyi tari noo chíti mostaza cuví cha nyacá ñaha Nyoo añima yo

(Mt. 13.31-32; Mr. 4.30-32)

¹⁸Tyicuan ta quichaha catyí ra Jesús:

—¿Ñáá chihin sandiqui tahn cha nyacá ñaha Nyoo añima yo? ¿Ñáá chihin sandu inuu ri yo?

¹⁹ Tari noo chiti mostaza, tyicuan caa cuví. Vatyí noo ra tachí ra noo chiti nu ñuhú, ta chahnú tun. Ta cuví tun noo yutun cahnu vavaha. Tyicuan ta chaá coyo saa nuu yutun cuan. Ta yucuan savahá ti taca ti.

Nu catyí ra Jesús vatyí tari yuchan iya tyicuan caa cuví cha nyacá ñaha Nyoo añima yo

(Mt. 13.33)

²⁰ Tyicuan ta quichaha catyí ra Jesús inga chaha:

—¿Ñáá ca chihin sandu inuu ri yo yoso caa nyacá ñaha Nyoo añima yo?

²¹ Cuví chi tari noo yuchan iya cha nasacá noo ñaha sihi chihin uñi cuhva yutyí pan. Vatyí tari ndaa pan cuan chihin yuchan iya cuan, tyicuan caa cuahan nducuaaha ca ñu nyacá ñaha Nyoo añima —catyí ra.

Yuvehe tihin ta ityi cuiñi cha cuahan nu nyaá Nyoo

(Mt. 7.13-14, 21-23)

²² Ityi cuahan ra Jesús Jerusalén cahán ra tuhun Nyoo chihin ñáyivi tandihi ñuu nu yahá ra.

²³ Ta quichaha ndaca tuhun noo ra chi ra:

—¿Atu ña cuaha maa ñáyivi cucacu añima? —catyí ra.

Tyicuan ta nacahan ra Jesús, ta catyí ra:

²⁴ —Nanducu ndo cuhva quihvi ndo yuvehe tihin. Vatyí yii xaan quihvi ndo nu nyacá ñaha Nyoo. Vatyí cuaha xaan ndo cha cucuñi ndo quihvi ndo yucuan. Ta ma cuví.

²⁵ Vatyí tari chitoho noo vehe tyicuan caa cuví Nyoo. Ta chitoho vehe cuan cunacasi ra yuvehe. Tyicuan ta nyoho cha nyicú ndo ityi chata cusacachan ndo yuvehe, ta cucatyí ndo: “Nuña yuvehe.” Ta ra cuan cucatyí ra chi ndo: “Ña chité nya ityi quichi nyoho.”

²⁶ Tyicuan ta nyoho cucatyí ndo: “Nyuhu chachí ndi ta chihí ndi chuhun. Maun sañahun tuhun Nyoo chi ndi ityi nu nyaá vehe ndi”, cucatyí ndo chi ra cuan.

²⁷ Soco ra cuan cunacahan ra chihin ndo ta cucatyí ra: “Cha catyí chi ndo vatyí ña chité nya ityi quichi nyoho. Canyaha ndo nu nyai, tandihi nyoho ñu nyacuví cha ña vaha”, cucatyí ra chi ndo.

²⁸ Yucuan ta cuacu ndo ta sacahñi noho ndo cha nyehe ndo chi ra Abraham ta chí ra Isaac ta chí ra Jacob, ta chí tandihi ra profeta Nyoo cha chiyo ta cha naha. Vatyí canyicú ra nu nyacá ñaha Nyoo. Ta nyoho ndoo ndo ityi chata.

²⁹ Ta cuquichi ñáyivi ityi tyañuhu, ta ityi norte, ta ityi nu caña ñanyii, ta ityi nu quee ñanyii. Ta cunyicu ñu cachi ñu chihin Nyoo nu nyacá ñaha ra.

³⁰ Ta yóo ñu cha cuñi cuhun ityi nuu, ican ñu cuhun nu ndihi. Ta ñu cuahan nu ndihi, ican ñu cuhun ityi nuu —catyí ra.

Nu nducuihya iñi ra Jesús nyehé ra chí ñáyivi ñuu Jerusalén

(Mt. 23.37-39)

³¹ Suri maa quivi cuan chaá coyo suhva ra fariseo. Ta catyí ra chí ra Jesús:

—Quita ihya vatyí ra Herodes cuñi ra cahñi ra chuun —catyí ra.

³² Soco ra Jesús quichaha catyí ra chí ra:

—Cuahan ndo ta catyí ndo chí ra ñucuii quiñi iyó cuan, vatyí nyacua nya nu chaa maa chi quivi cha ndihi tyiño sahí cha tave tatyí ña vaha ta cha sanduvahi chí ñu cuhvi, tyicuan ta cundihí tyiño sahí.

³³ Soco nya tahán chi cha ndíhi maa tyiño sahi, tyicuan ta cuhun mai cucúvi nya Jerusalén. Vatyí ma cuví cha cúvi noo ra profeta Nyoo ityi chata Jerusalén.

³⁴ ¡Ndahvi nyoho ñáyivi Jerusalén! vatyí chahñí ndo chi ra profeta ra cachahá cuenda tuhun cahán Nyoo chi ndo. Ta tuchi ndo yuu chi tandíhi ra cha saquichí Nyoo nu nyicú ndo. Ta yuhu cuaha xaan chaha cuñi saha cuende chí ndo tari noo ndívi cha sahá cuenda tí chi sehe tí, ta naquehen vaha tí chí tí chichi ndichin tí. Soco maa ndo ña cuñí ndo.

³⁵ Nyehe ndo vityin vatyí cha sandoj chí ndo. Ta catyí chí ndo vatyí ma nyehe ca ndo chíi nyacua nya chaa chí quívi cuacatyí ndo vatyí cahnu xaan ra vachi chihin sívi Nyoo —catyí ra Jesús.

14

Nu sanduvahá ra Jesús chí noo ra cuhví cha yihí cuiño chí

¹ Cuví chí noo quívi nyitatú ñáyivi. Ta ra Jesús cuahan ra cua cachi ra vehe noo ra cuví nuu chí ra fariseo. Ta suhva ca fariseo cuan cañañi ra chí ra Jesús tatu ñáá cha ña vaha cunyacuví ra.

² Yucuan ta nuu ra Jesús nyaá noo ra cuhví cha yihí cuiño chíi.

³ Tyicuan ta quichaha catyí ra Jesús chí ra casacuaha ley vehe ñuhu ta chí ra fariseo:

—¿Atu vaha sanduvaha yo chí ñáyivi cuhví quívi nyitatú yo? —catyí ra.

⁴ Tyicuan ta tandíhi ra cuan, taxi taxi cacuví ra. Yucuan cuví nu tyiso ra Jesús ndaha ra síqui ra cuhví cuan. Ta sanduvahá ra chí ra. Ta natachí ra chí ra na cunuhu ra.

⁵ Tyicuan ta quichaha catyí ra Jesús chí ra fariseo:

—Tatu canacava noo burru sana ndo, o nonga quiti sana ndo chichi noo xahva, ¿atu ma cutava ndo chí tí tañi tyehe ri, vasí quívi nyitatú yo cuví? —catyí ra.

⁶ Tyicuan ta inga chaha tucu taxi cuí ri nicunyicu ra fariseo. Vatyí ña ñihi ca ra tuhun nacahan ra.

Nu sañahá ra Jesús chí yo vatyí ma cahnu saha yo chí yo

⁷ Cha nyehe ra Jesús vatyí tandíhi ra canyicú vico cuan nacachí ra tyayu vaha ca cunyaa ra. Tyicuan ta quichaha chaha ra tuhun ihya chí ra:

⁸ —Nya quívi cuhun ndo vico tandaha, ma nanducu ndo tyayu vaha ca cunyaa ndo. Vatyí coto quichi inga ra cha cahnu ca cuví ican saha ndo,

⁹ ta coto quichi ra cha nacatyí tuhun ta catyí ra chuun: “Cuhva tyayu chíña. Vatyí cunyaa ra ihya.” Tyicuan ta yoho chihin cha cahán nuun, ta cuhvon. Yucuan ta cunyaun nu ndíhi.

¹⁰ Soco catyí chí ndo, vatyí nya quívi nacatyí tuhun ra chí ndo, cunyaa ndo noo nu ñima ri tuhun. Vatyí quichi maa ra cha nacatyí tuhun chí ndo ta catyí ra chí ndo: “Ra tahin, ñaha, cunyaun nu tyayu vaha tyehe.” Ta tyicuan caa sacucahnu ra chuun nu ñáyivi nyicú yuhu mesa chuhun.

¹¹ Vatyí yóo ra cha cahnu sahá chíi, cuquehen ra ticahan nuu. Ta yóo ra cha ndahvi sahá chíi, cahnu cucuví ra —catyí ra Jesús.

¹² Tyicuan ta quichaha catyí tucu ra chí ra nacatyí tuhun chí ra:

—Nya quívi coo vico vehun, ma nacatyí tuhun chí ra tahun, ni chí yañun, ni chí ñáyivi chuun, niri chí ñu nyicú yuvehun ñu tyayí. Vatyí ñu cuan cuví nacatyí tuhun ñu chuun, na coo tucu vico vehe maa ñu. Tyicuan ta nacahnya ñu cuenda cha chahán ñu vico vehun.

¹³ Soco cua catyi chuun vatyí nya quívi coo vico vehun, nacatyí tuhun chí ñu ndahvi, chí ñu cuhví, chí ñu coxo, ta chí ñu cuaa.

¹⁴ Tyicuan ta sii cuví chuun, vatyí ñu cuan ma cuví natyiyahvi ñu chuun. Soco cuñihun yahvun quívi cunandoton chihin ñáyivi vaha.

Nu chaha ra Jesús noo cuhva yoso caa nacatyí tuhun ra chí yo vatyí quíhvi yo nu nyacá ñaha Nyoo
(Mt. 22.1-10)

¹⁵ Ta chíñi noo ra cha nyaá yuhu mesa cuan tuhun cahán ra Jesús. Ta quichaha catyí ra chí ra:

—Sii xaan cuví chí ñu cachi nu nyacá ñaha Nyoo —catyí ra.

¹⁶ Tyicuan ta catyí ra Jesús:

—Noo ra cuan savaha ra noo vico cahnu vavaha vehe ra. Ta nacatyí tuhun ra chí cuaha xaan ñáyivi.

¹⁷ Tyicuan ta chaá cuhva cha cuxiñi ñu, ta tachí ra chí musu ra nacana ra chí ñu. Vatyí cha chaá cuhva cha cuxiñi ñu.

¹⁸ Soco tandihí ñu cuan quichaha catyí ñu vatyí ma cuhun ñu. Ta noo ra cuan catyí ra: “Ni sate noo ñuhú. Ta cuñí chí cuhin cunyehe. Ican tuhun chiquén na saha ra tucahnu iñi chí vatyí ma cuhin.”

¹⁹ Tyicuan ta inga tucu ra cuan catyí ra: “Ni sata cuiri ohon tahan yunta quiti. Ta cuhin cunyehe tatu vaha ti. Ican tuhun chiquén tumañi iñi chí ra na saha ra tucahnu iñi chí, vatyí ma cuví cuhin.”

²⁰ Tyicuan ta inga tucu ra cuan catyí ra: “Ni ndihí tandahi, ta ma cuví cuhin”, catyí ra.

²¹ Tyicuan ta musu ra cuan cuanuhu ra. Ta nacatyí ra tandihí tuhun cuan chí ra cha tachí chí ra. Cha chíñi ra savaha vico cuan cha tyicuan caa, ta cuxaan xaan ra. Ta catyí ra chí musu ra: “Cuahan tandihí maa ityi. Ta quichi nyacon chí ñu ndahvi, chí ñu cuhví, ta chí ñu coxó, ta chí ñu cuaa”, catyí ra.

²² Ta cha yahá nachaa musu cuan ta catyí ra chí ra cha tachí chí ra: “Cha sacuví tandihí maa cha catyún. Ta nuñá ca chichi vehe”, catyí ra.

²³ Tyicuan ta chitoho ra catyí ra chí ra: “Cuahan cua nducu ca chí ñu tandihí maa ityi. Ta sanñun chí ñu na quichi coyo ñu, vatyí na cutu chichi vehi.

²⁴ Vatyí catyí chuun vatyí ni minoo ñu cha nacatyí tuhun cha xihna ri, ma cachi ñu chihin” —catyí ra Jesús.

Cuaha xaan tundoho nyehe yo tatu cuenda ra Jesús yihí yo
(Mt. 10.37-38)

²⁵ Cuaha xaan ñáyivi nyicón chí ra Jesús. Tyicuan ta nanyehe ra chí ñu, ta quichaha catyí ra:

²⁶ —Tandihí nyoho cha nyicón ndo chí, tatu cuñí ca ndo chí ñáyivi chí ndo ican saha chí yuhu, ñima cuende yihí ndo. Ta tatu cuñí ca ndo chí maa ndo ican saha chí yuhu, ñima cuende yihí ndo.

²⁷ Vatyí nya nyoho cha ña cuñí ndo nyehe ndo tundoho cha cunyicon ndo chí, ña tahán chí cuví ndo ñu cuende, vatyí cha nyehe ndo tundoho yucuan cuví cruzi cha tahán chí cuiso ndo.

²⁸ Vatyí tatu nya nyoho cuñí ndo savaha ndo noo vehe cahnu, xihna ca cunyata ndo ta ndichí xiñi ndo tatu caña xuhun ndo cha cananyaa ndo vehe cuan.

²⁹ Vatyí tatu quichaha sacacu ndo vehe cuan, ta quichaha ña cuví sandihí ndo vatyí ñahri ca xuhun ndo, cuacu nya ñáyivi chí ndo.

³⁰ Ta cuacatyí ñu: “Ra cuan quichaha savaha ra vehe ra, ta ñi ña cuví sandihi ra”, cucatyí ñu.

³¹ O tatu noo rey cha cuñí cañi tahan chihin inga rey ¿atu ña chicunyaa xihna ra ta ndichi xiñi ra tatu ñihi uchi mil sindaro cha cuahan chihin ra cua cañi tahan chihin inga rey cha vachi chihin oco mil sindaro cuan?

³² Tatu chitó ra vatyí ma cuví chasaha ra chi inga rey cuan, tyicuan ta cañi ca vachi rey cuan, ta tachi ra chi noo musu ra vatyí cucatyí ra chi rey cuan na ndihi tuhun yucuan ri.

³³ Ta tyicuan caa cuví chi nyoho. Tatu ma cahnya iñi ndo tandihi maa cha cuñi ndo ta cha cumi ndo, ma cuví cunyicon ndo chii.

Nu sañahá ra Jesús vatyí tari ñi cha ndihi cha uhva, tyicuan caa cuví yo tatu ndu uvi iñi yo cha chino iñi yo chi ra

(Mt. 5.13; Mr. 9.50)

³⁴ Vaha ñi vatyí sacu uhva chi cha cachi yo. Soco tatu ndihi cha uhva chi, ña vaha ca chi.

³⁵ Nahri ca tyiño cuví saha chi. Ta sacuita yo vatyí ña vaha ca. Nya nyoho cha cutuñi iñi ndo, tyasoho ndo tuhun cahín —catyí ra Jesús.

15

Nu sañahá ra Jesús vatyí tari mbee cha cuanaa tyicuan caa cuví yo

(Mt. 18.10-14)

¹ Tandihi ra tava xuhun cuenda gobiernu ñuu Roma, ta ra iyó cuatyí, tuhva ra nu nyaá ra Jesús, tacuhva cuiñi ra tuhun cahán ra.

² Tyicuan ta ra fariseo ta ra casacuaha ley vehe ñuhu quichaha cacahan nyaa ra, ta cacatyí ra:

—Ra ihya, cahán ra chihin ra iyó cuatyí. Ta chachí ra chihin ra —cacatyí ra.

³ Tyicuan ta ra Jesús cahán ra noo cuhva ihya, ta catyí ra:

⁴—Ta nya nyoho cha iyó noo cientu mbee sana ndo, tatu cuanaa noo ti, ¿atu ma sandoo ndo chi tandihi ca ti cuan nu chiqui. Ta cunanducu ndo chi quiñi cha cuanaa cuan, nyacua nya cha nañihi ndo chi ti?

⁵ Ta cuhva cha nañihi ndo chi ti, ta natyiso soco ndo chi ti. Ta si vavaha cuví chi ndo.

⁶ Ta cuhva cha nachaa ndo vehe ndo, ta ndu ñin ri ndo chihin ra tahan ndo ta chihin ñu nyicú yatyin yuvehe ndo, yucuan ta catyí ndo chi ñu vatyí na cusii cuñi ñu chihin ndo vatyí nañihi ndo chi mbee sana ndo cha chinaa.

⁷ Ta ihya catyí chi ndo, vatyí si xaan ca cuví chi ángel Nyoo andivi cha catyí noo ra cha iyó cuatyí ta nasama cuhva iyó ra, ta ñima ca cha catyí ndi cumi xico chahun cumi tahan ñáyivi cha ñahri cuatyí.

Ñaha sihi cha cuanaa xuhun ta nañihi ña

⁸ Ta catyí chi ndo, tatu iyó noo ñaha cha iyó uchi tahan xuhun ña, ta tatu cuanaa noo xuhun ña, tyaa ña noo candil. Ta tihvi ña tandihi cuii maa chichi vehe ña. Ta nanducu ña tandihi cuii nyacua nya cha nañihi ña xuhun cuan.

⁹ Ta cuhva cha yahá nañihi ña, cuahan ña cua nanducu ña chi ñaha tahan ña, ta ñáyivi cha nyicú yuvehe ña, ta catyí ña chi ñu: “Cusi cuñi ndo chihin vatyí cha nañihi xuhun cha chinaa”, catyí ña.

¹⁰ Ta catyí chi ndo vatyí tyicuan caa si cuví chi ángel Nyoo cha catyí noo ra iyó cuatyí ta ndu uvi iñi ra cuatyí ra —catyí ra Jesús.

Nu sañahá ra Jesús yoso caa cuñi Nyoo chi noo ra ndu uvi iñi cuatyí

¹¹ Tyicuan ta quichaha catyí tucu ra Jesús cuhva ihya:

—Noo ra, chiyō uvi tahan sehe ra.

¹² Ta noo chaha, ra luhlu ca cuan catyí ra chi sutu ra vatyí nacuhva ra cha tahán chi chi ra. Tyicuan ta sutu ra chahā ra chi nanduvi sehe ra.

¹³ Ta ña cuaha ri quivi cuan ta ra luhlu ca cuan xico ra tandihí cuii maa cha chahā sutu ra chi ra. Ta sandu ñn ri ra xuhun ra, ta quehen ra ityi ta cuahan ra noo ñuu cañi. Ta yucuan chiyō ra, sanaa ra tandihí maa xuhun ra chihin tusi ñi. Ta quiñi xaan chicá noo ra.

¹⁴ Tyicuan ta chaā noo tama ityi nu iyó ra. Ta quichaha chisoco ra vatyí ndihí xuhun ra sanaa ra.

¹⁵ Tyicuan ta chahan ra chicacan ra tyiño chi noo ra ñuu cuan. Ta ra cuan tachí ra chi ra noo nu iyó quini sana ra, vatyí cusaha cuenda ra chi ti.

¹⁶ Ta cuví noo chaha cuan chisoco xaan ra. Ta ñahri maa cha cachi ra iyó, nyacua quichi cuví ñi ra cachi ra cha cachachí quini cuan soco yori maa chaha cha cachi ra.

¹⁷ Tyicuan ta nichon ñi ra tuhun sutu ra. Ta ndichi xiñi ra: “¿Atu chiin cuaha ra casahá tyiño chihin suti? Soco ñahri maa cha cumañi chi ra. Ta yuhu cuñi cúvi soco ñhya.

¹⁸ Vityin cunuhin nu nyaá suti. Ta catyi chi ra tyi chicoo cuatyí nuu Nyoo ta nuu maa ra.

¹⁹ Ta ña naña que cha cuví sehe ra chii, ta na saha ra tuhun vatyí noo musu ri ra cuví chii.” Tyicuan caa ndichi xiñi ra.

²⁰ Tyicuan ta quehen ra ityi cuanuhu ra nya vehe sutu ra. Cañi ca vachi ra ta nanyehē sutu ra chi ra, ta cundahvi cuñi ra nyehe ra chi ra. Ta chinq ra chisatahan ra chi sehe ra. Ta nanumí ra chi ra.

²¹ Tyicuan ta quichaha catyí ra chí sutu ra: “Tata, chicoo cuatyí nuu Nyoo ta chicoo cuatyí nu maun. Ta yucuan chaha ña naña que cha cuví sehun chii”, catyí ra chi sutu ra.

²² Soco sutu ra tyihí ra tyiño, ta catyí ra chi musu ra: “Tava ndo sahma vaha ca ta sacuihno ndo chi ra. Ta tyihí ndo noo xehe nundaha ra. Ta nyaca ndo zapato quiñi chaha ra ñandihí.

²³ Ta sñn ri cahñi ndo noo becerru cha xahan ca, vatyí cachi yo chi ti. Vatyí vityin cucoo yo noo vico.

²⁴ Vatyí ra sehi ñhya cha chihj ra sahā mai tuhun. Cuñj mai vatyí ma nyehe que chi ra, soco natuvj ra”, catyí sutu ra. Tyicuan ta quichaha chicoo ñu vico. Ta sñi xaan cacuñi ñu vatyí natuvj ra cuan.

²⁵ Tyicuan ta inga sehe ra, ra cha chahnu ca, ñohó ra nu chiqui. Ta cuhva cha cuanachaa ra nya vehe ra, ta quichaha chiñj ra yaa. Ta chiñi ra vatyí sñi xaan cachitá chaha ñu.

²⁶ Tyicuan ta cuhva cha cuyatyin ra nya vehe ra ta cana ra chi noo musu ra. Ta ndaca tuhun ra ñáá cha cuví cuan.

²⁷ Tyicuan ta musu ra quichaha catyí ra: “Yañun, ican nachaa. Ta yucuan chaha tachj sutun vatyí na cahñi ra chí noo becerru xahan ca. Vatyí vaha ri nachaa yañun, ta ñahri cha cuví chi ra”, catyí ra.

²⁸ Tyicuan ta cuxaan xaan cuñi ra. Ta ña cuñi ra ndihvi ra chichi vehe. Soco sutu ra chahan ra chicahan ndahvi ra chihin ra, vatyí na ndihvi ra chichi vehe.

²⁹ Tyicuan ta nacahan ra ta catyí ra chí sutu ra: “¿Atu chiin cuiya sahá tyiñe chuhun? Ta tyasohí tuhun cahún. Ta ni noo chaha ta ta nacahnu que nu cahún. Soco ni noo ndixihyu lee ta cuhva con chii vatyí coi vico chihin ra tahin.

³⁰ Soco vityin cha nachaā sehun ihya, ra cha sanaā xuhun chihin ñu cata iñi. Ta vityin chahun noo becerro quiti xahan ca chi ra”, catyí ra chi sutu ra.

³¹ Tyicuan ta nacahan sutu ra ta catyí ra chi ra: “Sehi, yoho tyicuan ri nyaún chihin. Ta tandihi cha cumi, chuun cuví.

³² Soco vityin tahañ chi sacuvi yo vico ihya. Ta cusii cuñi yo. Vatyí nachaā yañun, ra cha sahā mai tuhun vatyí chihí. Tari quivi nandotō ra cuví ihya. Ta chinaā ra, ta nañihí tucu yo chi ra inga chaha”, catyí ra chi sehe ra —catyí ra Jesús.

16

Nu sañahá ra Jesús chi yo yoso caa saha yo tumañi iñi chihin cha iyó chi yo

¹ Tyicuan ta quichaha catyí ra Jesús chi ra cachicá noo chihin ra:

—Iyó noo ra tyayii vavaha ra. Ta iyó noo ra yindaha tandihi tyiño sahá ra. Ta chahan coyo musu ra canacatyí ra chi ra tyayii cuan, vatyí ra yihí ndaha tyiño cuan, sanaa ra tandihi cha iyó chi ra.

² Tyicuan ta cana ra tyayii cuan chi ra yindaha tyiño cuan, ta catyí ra chi ra: “Cha cuaha xaan cuatyí chahun quichi nu nyaí. Nacuhva cuendon tandihi tyiño cha sacuvun chii. Vatyí ma saha tyiño con chihin”, catyí ra chi ra.

³ Tyicuan ta ra yindaha tyiño cuan ndichi xiñi ra: “¿Yoso caa cunyacuvi vityin? Chitohi ña cuñi ca ra cha sahá tyiñe chihin ra. Ta ñahri fuerza iyó chii cha saha tyiñe nu ñuhú. Ta cahañ nui caye chichi ñuu.

⁴ Soco cha chité yoso caa cunyacuvi vityin, ta vaha coo ñáyivi chihin quivi cha ma coo ca tyiño sahi, ta vaha chai vehe ñu”, ndichi xiñi ra.

⁵ Tyicuan ta cana ra chi noo noo ra yosoyicá chi chitoho ra. Ta quichaha catyí ra chi noo ra cuan: “¿Yoso yosoyicón chi chitohi?” catyí ra.

⁶ Tyicuan ta nacahan ra cuan ta catyí ra: “Yuhu yosoyiqué noo cumi mil litru aceitye.” Tyicuan ta ra yindaha tyiño cuan catyí ra chi ra: “Quehen nonga tutu ihya. Ta natyaa uvi mil ri. Ta sacuiton tutu chahnu cuan”, catyí ra. Tyicuan caa sacuví ra. Ta cuahan ra.

⁷ Tyicuan ta cha inga ra. Ta quichaha ndaca tuhun tucu ra chi ra cuan ta catyí ra: “¿Yoso yosoyicá yoho chi chitohi?” Ta nacahan ra cuan ta catyí ra: “Yosoyiqué noo mil arroba trigo”, catyí ra. Tyicuan ta quichaha catyí ra yindaha tyiño cuan: “Quehen inga tutu, ta natyaun uña cientu ri arroba. Ta sacuita tutu chahnu chiña”, catyí ra.

⁸ Tyicuan ta chitó chitoho ra cha ña vaha cha chinyacuví ra. Ta iyo xaan cuñi ra vatyí yatyí xaan saha ra cuan chi ra —catyí ra Jesús.

Ta quichaha catyí tucu ra chi ra cachicá noo chihin ra:

—Ñáyivi ña vaha aña ma yatyí xaan ca sahá ñu chi ñu ican saha ñáyivi vaha aña ma.

⁹ Ta catyí chi ndo, vatyí cotyíño ndo cha tyayii cha iyó siqui ñuhu ñayivi ihya, ta saha ganaa ndo amigo. Ta quivi cha ndihi cha tyayii cuan, cuñihi ndo nu cunyicu ndo nya nu nyaá Nyoo tyicuan ri maa.

¹⁰ Tatu chitó ndo cotyíño ndo chiin cha iyó chi ndo cha cuenda cha vaha, tyicuan caa coto tucu ndo cotyíño ndo tatu cuaha iyó chi ndo. Soco tatu ña chitó ndo cotyíño ndo chiin cha iyó chi ndo, tyicuan caa ma coto tucu ndo cotyíño ndo tatu cuaha coo chi ndo.

¹¹ Ta catyí chi ndo, tatu ña sahá ndo tumañi iñi chihin cha iyó chi ndo siqui ñuhu ñayivi ihya, Nyoo ma cuhva ra noo cha tyayii cha ndicha chi ndo.

¹² Tandihí cha iyó chi ndo maa Nyoo chahá noo chi ndo. Soco tatu ña sahá ndo tumañi iñi chihin cuan, ma cuhva ra cha tahán chi chi ndo.

¹³ Noo musu ma cuví coo uvi tahan chitoho ra. Vatyí musu cuan cuñí ca ra chi noo ra, ta ñima ca chi inga ra. O chi noo ra, vaha quichahá ra tuhun cahán ra, ta chi inga ra, ma quichaha ra cha cahán ra. Ma cuví cuñí ndo chi Nyoo ta suri cuhva cuan cuñi tucu ndo cha tyayíi —catyí ra Jesús.

¹⁴ Tyicuan ta cha chiñí ra fariseo tandihí tuhun cahán ra Jesús. Tyicuan ta quichaha chacu cuehe ra nyehe ra chi ra. Vatyí maa ra fariseo cuan cuñí xaan ra chi xuhun.

¹⁵ Tyicuan ta quichaha catyí ra Jesús chi ra:

—Vaha xaan sahá ndo chi ndo nuu ñáyivi. Soco chitó Nyoo vatyí añima ndo ña vaha. Ta tandihí cha catyí ñáyivi vatyí cahnu xaan ihya siqui ñuhu ñáyivi, Nyoo ña cuñí nyehe ra.

Nu sañahá ra Jesús tuhun ley ra Moisés, ta tuhun yoso caa cunyaca ñaha Nyoo añima yo chi yo

¹⁶ Ley cha tachí Nyoo chi ra Moisés vatyí tyaa ra, ta tuhun cha tyaa ra profeta Nyoo ta cha naha, ican chi cuví cha saquehen ityi chi ñáyivi nyacua nya quívi chaá ra Juan. Ta maa ra Juan quichaha cahan ra tuhun vaha vatyí cha cuñí quichi Nyoo vatyí cunyaca ñaha ra. Ta tandihí ñáyivi cha nducú cuhva yoso caa cunyaca ñaha Nyoo añima ñu, ican ñu quihvi ndaha ra.

¹⁷ Soco catyí chi ndo, vasi cunaa andívi ta ñuhu ñáyivi, soco cha cuví ley Nyoo cha tyaa ra Moisés, ma naa nyacua nya cha yahá cuví tandihí.

Sañahá ra Jesús vatyí ña vaha cha sandoo rayíi chi ñasíhi ra
(Mt. 19.1-12; Mr. 10.1-12)

¹⁸ Tatu noo rayíi iyó ñasíhi ra, ta sanandoo ra chi ña, ta tandaha ra chihin inga ña, iyó cuatyí ra nuu Nyoo. Ta tatu tandaha noo rayíi chihin noo ñaha cha sandoo yíi chíi, coo tucu cuatyí ra nuu Nyoo.

Nu sañahá ra Jesús tuhun noo ra tyayíi chihin ra Lázaro

¹⁹ Chiyó noo ra tyayíi. Ta vaha ñihno ra. Ta tandihí quívi iyó ra vico ta chachí vaha ra.

²⁰ Ta chiyó tucu noo ra ndahvi cha nañí Lázaro. Ta cuaha xaan ndihyi iñi ra. Ta nyaá ra yuvehe ra tyayíi cuan.

²¹ Ta ra ndahvi cuan, cuñí ra cachi ra, vasi cha canacoyo nu mesa ra tyayíi cuan. Ta nyacua nya ina ta chaá ti nu nyaá ra, ta yuyaá ti nu cahvi chi ra.

²² Ta noo quívi cuan chihí ra ndahvi cuan. Ta ángel Nyoo quehen ra chi ra ta cua nyaca ra chi ra nya nu nyaá ra Abraham gloria. Tyicuan ta chihí tucu ra tyayíi cuan. Ta chicuchí ñu chi ra.

²³ Tyicuan ta ra tyayíi cuan nyehé xaan ra tundoho nu ñohó ra anyaya. Ta nanyehé ra nu cañi. Ta nanyehé ra chi ra Abraham chihin ra Lázaro, nyaá ra chihin ra yucuan.

²⁴ Tyicuan ta canachaa ra ta catyí ra: “Tata Abraham, cundahvi cuñi chíi. Tachí chi ra Lázaro na satyíi ra chiin nundaha ra. Ta na satoo ra ñin títi ndutya nu yai. Vatyí nyehé xain tundoho nu cayú ñuhú ihya”, catyí ra.

²⁵ Soco ra Abraham catyí ra chi ra: “Ñicohon iñun vatyí vaha chiyon ñuhu ñáyivi. Ta ra Lázaro, ña vaha chiyó ra. Vityin vaha iyó ra ihya, ta yoho nyehún tundoho.

²⁶ Ta siin ri, mahñu ihya cono xaan. Ta ma cuví yaha ra iyó tyehe cuhun ra chiña. Ta ma cuví yaha ra iyó chiña, quichi ra tyehe”, catyí ra Abraham chi ra.

²⁷ Tyicuan ta quichaha catyí ra tyayii cuan: “Tata Abraham, sahun tumañi iñi chii. Ta tachun chi ra Lázaro nya vehe suti.

²⁸ Vatyí iyó ohon tahan yañi. Ta cuñi vatyí nacatyí ra chi ra yoso caa iyé ihya nu nyehí tundoho, coto quichi coyo tucu ra cuan ihya”, catyí ra.

²⁹ Tyicuan ta quichaha catyí ra Abraham: “Iyó ley cha tyaá ra Moisés. Ta iyó tuhun cha tyaá ra profeta Nyoo ta cha naha. Na quichaha ra tu cuñi ra”, catyí ra Abraham.

³⁰ Tyicuan ta quichaha catyí ra tyayii cuan: “Tata Abraham. Ma quichaha ra. Soco tatu yóo cha nandoto, ta cuhun cucahan chihin ra, yucuan ta tyasoho ra ta nasama ra cuhva iyó ra”, catyí ra cuan.

³¹ Soco ra Abraham catyí ra: “Tatu ña cuñi ra quichaha ra tuhun tyaá ra Moisés ta tuhun cha tyaá ra profeta Nyoo ta cha naha, ma chino iñi ra tuhun cahan noo ndiyi tatu nandoto ra ta cahan ra chihin ra.”

17

Nu sañahá ra Jesús chi yo yoso caa saha cuenda yo chi yo coto sacuvi yo cha ña vaha

(Mt. 18.6-7, 21-22; Mr. 9.42)

¹ Tyehe caa catyí ra Jesús chi ra cachicá noo chihin ra:

—Tyicuan ri iyó cha quiñi caa cha sativí chi ñáyivi. Soco ndahvi ra ndahvi ra sativí chi ñáyivi.

² Vaha taxin ca cuhñi ra noo yuu sucun ra. Ta cutuchi ra chi ra nu tyañuhu. Coto sativí ra chi ñu ni nasama cuhva iyó ihya.

³ Saha ndo cuenda chi ndo. Tatu noo ra tahan ndo ta sacuvi ra noo cha ña vaha chihin ndo. Catyí ndo chi ra vatyí ña vaha cha sacuvi ra. Tatu nasama ra cuhva iyó ra, saha ndo tucahnu iñi chi ra.

⁴ Ta ni ri maa sacuvi ra cha ña vaha chihin ndo ucha tahan chaha cha noo quivi. Tatu ndi ucha tahan chaha ta catyí ra chi ndo vatyí ndu uvi iñi ra cha sacuvi ra chi ndo, ndi ucha tahan chaha saha ndo tucahnu iñi chi ra.

Nu sañahá ra Jesús chi yo vatyí tatu chinó iñi yo chi ra, cuví sacuvi yo cuaha cha vaha

⁵ Tyicuan ta quichaha catyí ra cachicá tyiño nuu ra Jesús chi ra:

—Cuhva cha chinó ca iñi ndi chuun —catyí ra.

⁶ Tyicuan ta catyí ra Jesús chi ra:

—Tatu chinó iñi ndo chi yuhu vasi chiin ri tari cuhva noo chiti mostaza luhlu, cuví catyí ndo chi yutun sicómoro cha nanyaá ihya nacoyo tun, ta cucuinanyaa tun nu tyañuhu. Ta cucuvi nu cahan ndo —catyí ra Jesús.

Yoso caa tahán chi quichaha yo chi Nyoo

⁷ Ta catyí ra Jesús:

—Tatu noo nyoho ta iyó noo musu ndo. Ta nachaa ra cha chahan ra nu chiqui chi sahatyíño ra, o chi saha cumi ra quití sana ndo, ¿atu catyí ndo chi ra: “Cunyaa ta cachun”? Ña catyí ndo chi ra tyicuan caa.

⁸ Soco tyehe caa catyí ndo chi ra: “Sanduvaha cha cuxiñi. Ta tyihun cha cachi. Cha yaha cha cachi tyicuan ta cachi tucu maun”, catyí ndo chi ra.

⁹ Ni ña tuhvá ndo nacuhva ndo tyahvi nyoo chi ra vatyí sacuvi ra ñáá noo tyiño tavá ndo chi ra.

¹⁰ Tyicuan caa tucu nyoho chihin Nyoo. Quiví ndihí sacuvi ndo cha catyí Nyoo chí ndo, tahán chi catyí ndo: “Nyuhu chiin ri cha tachun chi ndí, yucuan ri sacuví ndí. Ta ña yaha ca.”

Nu sanduvahá ra Jesús chí uchi tahan ra tyahyu coño

¹¹ Ityí cuahan ra Jesús ityí ñuu Jerusalén yahá ra nu cuví xahñi Samaria chihin Galilea.

¹² Nu chaá ra noo ñuu, quita coyo uchi tahan ra cuhví chihin cha tyahyu coño ra. Ta chicuitayucu ra nyasava ri.

¹³ Ta quichaha cacanachaa ra chí ra Jesús, ta catyí ra:

—Yoho, Maestro Jesús, cundahví cuñi chí ndí —catyí ra.

¹⁴ Tyicuan ta nanyehé ra Jesús chí ra ta catyí ra chí ra:

—Cuahan ndo. Ta cua sañaha ndo chí ndo chí tata sutu vatyi cha nduvahá ndo.

Tyicuan ta cuahan coyo ra cuan. Ta ityí cuahan coyo ra ta cananyehé ra vatyi nduvahá ra.

¹⁵ Tyicuan ta cuhva cha nanyehé noo ra cuan vatyi nduvahá ra, cuanuhu chata ra nu nyaá ra Jesús. Ta caná chaa ra, ta sachanu ra chí Nyoo.

¹⁶ Ta chicuñi chí ra. Ta nacañi noo ra xiñi ra nya nu ñuhu nuu ra Jesús. Ta nacuhvá ra tyahví nyoo chí ra. Ta ra cuan, ra Samaria cuví ra.

¹⁷ Tyicuan ta catyí ra Jesús chí ra:

—¿Atu ñima uchi tahan ndo nduvahá? ¿Nya nyaá inga ñin tahan ca ra?

¹⁸ ¿Ñáá tuhun cha noo tuhun ri maa ra inga ñuu nandichi chata ra ta sachanu ra chí Nyoo? —catyí ra Jesús.

¹⁹ Tyicuan ta quichaha catyí ra chí ra cuan:

—Ndūcuita ta cuahan. Nduvahun vatyi chinó ñun —catyí ra Jesús chí ra.

*Yoso caa cuquichi Nyoo cunyaca ñaha ra nu iyó yo ihya
(Mt. 24.23-28, 36-41)*

²⁰ Candaca tuhun ra fariseo chí ra Jesús, ta catyí ra:

—¿Ama quichi Nyoo cunyaca ñaha ra?

Tyicuan ta ra Jesús quichaha catyí ra:

—Cha cunyaca ñaha Nyoo ihya siqui ñuhu ñayiví, ñima cha nyehé yo cuví.

²¹ Ma cuví catyí ñáyiví: “Ma ra nyaá ihya, o ma ra nyaá ityí cuan.” Vatyi Nyoo cha chaá ra mahñu ndo, ta nyacá ñaha ra añima ñáyiví cuenda ra —catyí ra chí ra.

²² Yahá cuan ta catyí ra chí ra cachicá noo chihin ra:

—Cuchaa chí quiví vatyi cucuñi ndo nyehé ndo chí yuhu Rayi cha quichi nya gloria. Soco ma nyehé ndo chíi.

²³ Cuchaa tucu chí quiví ta cucatyí ñáyiví chí ndo: “Ihya nyaá ra”, o “Yucuan nyaá ra.” Soco ma cuhun ndo cunyehe ndo. Ta ma cunyicon ndo chí ra cuan vatyi ñime cuví.

²⁴ Vatyi tandihí ñáyiví cunyehe chí yuhu Rayi cha quichi nya gloria quiví quichi inga chaha. Tari nyehé tandihí ñáyiví nu quihví tacha nicahnu andiví, tyicuan caa cucuvi.

²⁵ Soco cunyehe xihne tundoho. Vatyi ñáyiví cha iyó cha vityin cua cutasi cuñi nyehé ñu chíi.

²⁶ Tari cuví quiví ra Noé, tyicuan caa cucuvi quiví quichi yuhu Rayi cha quichi nya gloria inga chaha.

²⁷ Quiví ra Noé, chachi ñu. Chihí ñu. Tandahá ñu. Ta chahá ñu sehe ñu tandaha. Nya quiví quihví ra Noé chichi barcu ra, ta coon savi xaan. Ta tandihí ñu cachihí ñu.

²⁸ Tyicuan caa tucu cuv_i quiv_i ra Lot. Chachí ñu. Chihí ñu. Satá ñu. Xicó ñu. Tachí ñu. Ta savahá ñu vehe ñu.

²⁹ Soco quiv_i cha quitá ra Lot ñuu Sodoma cuan, coon ñuh_u chihin azufre andiv_i. Ta chih_i tandih_i ñáyiv_i Sodoma.

³⁰ Ta tyicuan caa cucuv_i quiv_i cha quichi tucu yuhu Ray_i cha quichi nya gloria inga chaha.

³¹ Ta quiv_i cuan tatu nyicú ndo nuquehe ndo, ma ndih_vi ndo chichi vehe ndo vaty_i tava ndo ndaha tyiño ndo. O tatu chicá noo ndo nu chiqui, ma cunuho ndo nya vehe ndo.

³² N_icohon iñi ndo ñasih_i ra Lot, ñáá cha cuv_i chi ña.

³³ Tandih_i ndo cha cuñi ca ndo cha iyó siqui ñuhu ñayiv_i ihya, cucunaa ndo. Ta tandih_i ndo cha ña quichaha ndo cha iyó ñáyiv_i ihya, cucacu ndo.

³⁴ Ta caty_i chi ndo vaty_i cha cuaa cuan uvi tahan ra cucava noo nu chito. Noo ri ra cunaquehin. Ta nonga ra cundoo ra.

³⁵ Ta uvi tahan ñusih_i in ri cu nyicó ñu quiv_i cuan. Noo ri ña, cunaquehin. Ta nonga ña cundoo ña.

³⁶ Ta caty_i chi ndo vaty_i uvi tahan ra cohon nu chiqui. Noo ra cunaquehin, ta nonga ra cundoo ra —caty_i ra Jesús.

³⁷ Cuhva cha chih_i ñu tuhun ihya, quichaha ndaca tuhun ñu chi ra Jesús.

—¿Nya maa maa cucuvi ihya Tata? —caty_i ñu.

Tyicuan ta nacahan ra Jesús ta caty_i ra:

—Nu catuv_i coño ñuhu chih_i, yucuan cundu in ri chii.

18

Nu sañahá ra Jesús vaty_i tari chicán noo ñaha chih_i y_i chi juez, tyicuan caa tahán chi cacan yo chi Nyoo

¹ Tyicuan ta chaha ra Jesús noo cuhva ihya. Vaty_i na cacan tahvi ñu tyicuan ri maa, ta ma cundihñi ñu.

² Ta caty_i ra:

—Iyó noo ñuu cha nyaá noo juez. Ta juez cuan ña sahá maa ra ñáyiv_i chi Nyoo. Ta ni ri ña quichaha maa ra chi ñáyiv_i.

³ Ta suri ñuu cuan iyó tucu noo ñaha ndahvi cha chih_i y_i. Ta chahan ña chicahan ña chihin ra, vaty_i chicá ña cuaty_i chaha noo ra xaan iñi chi ña.

⁴ Ta juez cuan ña quichaha maa ra chi ña. Ña sandaa maa ra tyiño chicá ña. Ta cha naha xaan chicán ña. Tyicuan ta quichaha ndichi xiñi juez cuan: “Vasi ña yuhv_i chi Nyoo, ta ñahri cuende chi ñáyiv_i,

⁵ soco ñaha ihya sayangá xaan ña chii. Ta yucuan chaha cua sacaqui chi ña. Vaty_i coto quichi ca ña, ta sanaquiqui ña tisih_i”, ndichi xiñi ra.

⁶ Tyicuan ta caty_i ra Jesús:

—Tyicuan caa caty_i juez ña vaha cuan. Tu juez cuan cha quih_i iyó ra ta tyinyee ra chi ñaha ndahvi cuan,

⁷ ta nyaca cuv_i Nyoo, ¿atu ma tyinyee ra chi ñáyiv_i cha chicán ndiyaca ta ndiquiv_i chi ra? ¿Atu cuatu xaan ra cha tyinyee ra chi ñu?

⁸ Caty_i chi ndo, vaty_i numi ri cutyinyee ra chi ñu. Soco quiv_i quichi yuhu, Ray_i cha quich_i nya gloria, inga chaha, chitó Nyoo tatu nañihi que chi ñu cha ndicha chinó iñi chii —caty_i ra Jesús.

Noo cuhva cuenda ra tavá xuhun cuenda gobiernu ñuu Roma ta cuenda ra fariseo

⁹ Tyicuan ta chaha ra Jesús nonga cuhva cuenda ra savahá chii, ta ña cuñi nyehe ra chi inga ra. Ta quichaha catyí ra:

¹⁰ —Iyó uvi tahan ra chahan chichi vehe ñuhu chicacān tahvi ra chi Nyoo. Noo ra cuan ra fariseo cuví ra. Ta inga ra cuan ra tavá xuhun cuenda gobiernu ñuu Roma cuví ra.

¹¹ Ta ra fariseo cuan chicuinaryaa ra, ta quichaha cahan ra chihin Nyoo. Ta cahnú saha ra chi ra. Ta catyí ra: “Sutu Mañi yuhu, nacuhve tyahvi nyoo chuun vatyi yuhu ñima tari inga ñáyivi cuví. Vatyi suhu ñu. Quiñi iyó ñu. Iyó ñasihí ra ta iyó inga ñusihí chi ra. Ta ni ri ñima tari ra tavá xuhun cuan cuví.

¹² Vaha ca quichahí tuhun maun ta ñima ca inga ñáyivi. Vatyi uvi chaha cha noo vitya ña chachí. Ta chahí uchi siqui noo noo cientu cha sahá ganai chuun”, catyí ra.

¹³ Soco ra tavá xuhun cuenda gobiernu Roma cuan cha cañi ri chiin nanyaá ra. Ta ña caña iñi ra nanyehe ndaa ra. Ta cañi ra ndaha ra añima ra vatyi ndu uvi iñi ra cuatyí ra. Ta catyí ra: “Sutu Mañi yuhu. Nyehé ndahvi chíi vatyi iyó xaan cuatyí”, catyí ra —catyí ra Jesús.

¹⁴ Ta catyí tucu ra Jesús tyehe caa:

—Catyí chi ndo vatyi Nyoo sahá ra tucahnu iñi chi ra tavá xuhun cuan. Sanaá Nyoo cuatyí ra ta cuanuhu ra nya vehe ra. Soco ra fariseo cuan, ñahri tucahnu iñi ñihi ra, vatyi yóo ñáyivi cha savahá xaan chi nuu Nyoo, cusanocuee Nyoo chi ñu, ta ñu sanocuee chí, Nyoo cusanducahnu ra chí ñu —catyí ra Jesús.

Nu nasocó ra Jesús chi ra cuatyaa
(Mt. 19.13-15; Mr. 10.13-16)

¹⁵ Tyicuan ta quichi nyaca ñáyivi chi ra cuatyaa chi ra Jesús vatyi na tyiso ra ndaha ra xiñi ndotyín. Soco cuhva cha nanyehe ra cachicá noo chihin ra vatyi tyicuan caa, ña chaha ca ra.

¹⁶ Tyicuan ta cana ra Jesús chí ra cachicá noo chihin ra, ta catyí ra chi ra:

—Saña ndo chí ra cuatyaa na quichi maa ndotyín nu nyai. Ta ma casi ndo, vatyi ñu nyacá ñaha Nyoo añima, cuví ñu tari ra cuatyaa ihya.

¹⁷ Ta catyí chí ndo vatyi tatu ña ita iñi ndo chí Nyoo, tari noo ra cuatyaa ita iñi ndotyín chí sutu ndotyín, ma cuví quihvi ndo nu nyacá ñaha Nyoo.

Nu chahá ra Jesús tuhun vatyi y# xaan nacuhva cuenda noo ra tyay# chi ra
chi Nyoo

(Mt. 19.16-30; Mr. 10.17-31)

¹⁸ Tyicuan ta noo ra cha cuví nuu cuenda vehe ñuhu ndacá tuhun ra chí ra Jesús, ta catyí ra:

—Maestro, ra vaha cuvún. ¿Yoso caa cunyacuvi ta ñihi ñáyivi cha ma naa ca maa coi? —catyí ra.

¹⁹ Tyicuan ta catyí ra Jesús chí ra:

—¿Ñáá tuhun catyún vatyi ra vaha cuví? Noo ri maa Nyoo cuví ra ra vaha. (Ta cha catyún tyi vahi, nacotón tyi Nyoo cuví.)

²⁰ Yoho chitón tandihí tuhun cha tachí Nyoo tyi sacuvi yo: “Cha ma coo inga ñusihí chuun. Ma cahñun chí ñáyivi. Ma suhun. Ma cahun cuendu siqui ñáyivi. Ta sahun ñáyivi chí sutun ta chí sihun” —catyí ra Jesús.

²¹ Tyicuan ta ra cuan catyí ra:

—Tandihí ihya ta quichahí nyata luhli ta nyacua nya vityín —catyí ra.

²² Nu chiñi ra Jesús cha catyí ra cuan, tyicuan ta catyí ra chí ra:

—Soco cumañi sacuvun nonga cha sacuvun. Xico tandihí cha iyó chuun. Ta cūhva chí ñu ndahvi. Ta quichun chate. Tyicuan ta coo cha tyayí chuun nya gloria —catyí ra.

²³ Soco ra cuan nu chiñi ra tuhun cuan, nducuihya xaan iñi ra, vatyí tyayí xaan ra.

²⁴ Cha nanyehé ra Jesús vatyí nducuihya iñi ra, ta quichaha catyí ra:

—Yí xaan ta cuvi nacuhva cuenda ñu tyayí chí ñu na cunyaca ñaha Nyoo añima ñu.

²⁵ Tañi tyehe yaha noo camello xiu noo yiqui ticu, ta ñima ca cha quihvi noo ñu tyayí nu nyacá ñaha Nyoo —catyí ra.

²⁶ Ta ñu cha cachiñi tuhun ihya catyí ñu:

—Tatu tyicuan caa, ¿yóo cha cuví cacu vii? —catyí ñu.

²⁷ Tyicuan ta ra Jesús catyí ra:

—Tandihí cha ña cuví sacuvi rayí, Nyoo cuví sacuvi ra —catyí ra.

²⁸ Tyicuan ta ra Pedro catyí ra:

—Sutu Mañi yuhu, nyuhu tandihí maa cha iyó chí ndi sandoo ndi, ta nyicón ndi chuun —catyí ra.

²⁹ Tyicuan ta catyí ra Jesús chí ra:

—Cha ndicha catyí chí ndo. Vatyí tandihí ndo cha sandoo ndo vehe ndo, o ñasihí ndo, o yañi ndo, o sutu ndo, o sehe ndo cha catyí cha chahá ndo cha cunyaca ñaha Nyoo añima ndo,

³⁰ cuaha xaan cha vaha cunañihí ndo ihya ñayiví ta cunañihí ndo inga ñayiví cha ma naa ca maa —catyí ra Jesús.

Inga chaha sacotó ra Jesús yoso caa cucahñi ñáyiví chí ra

(Mt. 20.17-19; Mr. 10.32-34)

³¹ Ta caná siin ra Jesús chí ndi uchi uvi ra cachicá noo chihin ra, ta catyí ra chí ra:

—Vityin cahun yo nya Jerusalén. Vatyí yucuan cuchino cava tandihí tuhun cha tyaa ra profeta Nyoo ta cha naha. Vatyí yuhu Rayí cha quichí nya gloria cuví.

³² Vatyí cucuhva cuenda ra chii chí ra inga ñuu, ra cha ñima ra ñuu Israel cuví. Ta cucuacu nyaa ra chii. Ta cucahan ra chii. Ta cutyicusí ra nui.

³³ Ta cucañi ra chí, ta cucahñi ra chí, soco nu cu uñi quiví ta cunandote —catyí ra Jesús.

³⁴ Ta ra cachicá noo chihin ra ña cutuñi iñi ra tuhun cuan ni ña cachitó ra ñáa tuhun cahán ra Jesús chihin ra. Vatyí ña chahá Nyoo vatyí cacutuñi iñi ra.

Nu sananyehé ra Jesús chí noo ra cuaa ñuu Jericó

(Mt. 20.29-34; Mr. 10.46-52)

³⁵ Cuhva cha cua chaa ra Jesús ñuu Jericó. Ta yuhu ityi cuan nyaá noo ra cuaa. Ta chicán ra limuxtán.

³⁶ Tyicuan ta chiñi ra vatyí cuaha xaan ñáyiví cua yaha. Ta ndacá tuhun ra ñáa cha cuví cuan.

³⁷ Ta ñáyiví nacatyí ñu chí ra vatyí ra Jesús, ra ñuu Nazaret, ican cua yaha cuan.

³⁸ Tyicuan ta quichaha cana chaa ra:

—¡Yoho Jesús, ra vachi tata rey David! ¡Cūndahvi cuñi nyehun chí! —catyí ra.

³⁹ Ta ra cha cuahan coyo ityi nuu cuan, quichaha cacatyí ra chí ra, nacasi ra yuhu ra. Soco chaa ca caná chaa ra, ta catyí ra:

—¡Yoho, ra vachi tata ra David! ¡Cundahvi cuñi nyehun chii! —catyí ra.

⁴⁰ Tyicuan ta chicuiñi ra Jesús yucuan. Ta tachí ra tyiño na cuquehen chi ra cuaa cuan. Ta cuhva cha chaá ra cuaa cuan nu nanyaá ra Jesús, ta ra Jesús quichaha ndaca tuhun ra chi ra, ta catyí ra:

⁴¹ —¿Ñáá cha cuñun vatyi sacuvi chuun?

Tyicuan ta ra cuaa cuan nacahan ra, ta catyí ra:

—Sutu Mañi yuhu, cuñi nanyehi —catyí ra.

⁴² Tyicuan ta catyí ra Jesús chi ra:

—Nanyehi. Cha nduvahá chiti nuun, vatyi chinó iñun chii —catyí ra.

⁴³ Ta caa cuhva ri cuan, ra cuaa cuan nanyehé ra. Ta cuahan ra chata ra Jesús. Ta sacahnú ra chi Nyoo. Ta tandihí ñáyivi cha nyehe ñu tyicuan caa, sacahnú ñu chi Nyoo.

19

Nu cuahan ra Jesús vehe ra Zaqueo

¹ Yucuan ta quihvi ra Jesús ñuu Jericó cuan. Ta cua yaha ra chichi ñuu cuan.

² Ta yucuan iyó noo ra tyayii vavaha. Nañi ra Zaqueo. Ta ra cuví nuu cuenda ra catava xuhun cuenda gobiernu ñuu Roma cuví ra.

³ Ta cuñi xaan ra cohon nuu ra chi ra Jesús. Ta ña cuví nyehe ra chi ra vatyi cuaha xaan ñáyivi. Ta maa ra tyaha xaan ra.

⁴ Yucuan ta chino vavaha ra cuahan ra ityi nuu, ta ndaa ra nu noo yutun cha nañi sicómoro cha nanyaá yuhu ityi nu cua yaha ra Jesús, tacuhva cuví nyehe ra chi ra.

⁵ Ta cuhva cha yahá ra Jesús nanyehé ndaa ra ityi siqui ta nanyehi ra chi ra Zaqueo. Ta quichaha catyí ra chi ra:

—Zaqueo, sanumi ta nqun nu yutun chiña. Vatyi vityin cuhin vehun —catyí ra chi ra.

⁶ Tyicuan ta numi ri noo ra Zaqueo nuu yutun cuan. Ta sii vavaha cuví chi ra. Ta quehen cuenda ra chi ra Jesús. Ta cuahan ra chihin ra nya vehe ra.

⁷ Ta cha nyehe ñáyivi cha tyicuan caa, ta tandihí ñu quichaha cahán nyaa ñu chi ra Jesús. Ta catyí ñu vatyi ndoq ra vehe noo ra iyó cuatyí.

⁸ Nu canyicú ra chichi vehe cuan, ra Zaqueo nicuinanyaá ra. Ta quichaha catyí ra chi ra Jesús:

—Sutu Mañi yuhu, yuhu cua cuhve sava cha iyó chii chi ñu ndahvi. O tatu suhi chi ñáyivi chihin cha sandavi ñahi chi ñu, vityin cunacuhva cuende nya cumi ca tahan chaha chi ñu —catyí ra chi ra.

⁹ Tyicuan ta catyí ra Jesús:

—Vityin cacu añimon, ta ñáyivi chi ra Abraham cuvún. Vatyi nacuhva cuendon chuun chi Nyoo tari nacuhva cuenda ra Abraham chi ra chi Nyoo.

¹⁰ Vatyi yuhu Rayii cha quichí nya gloria vachi nanduqui ta vachi sacaqui chi ñáyivi cha cua naa —catyí ra Jesús.

Nu sañahá ra Jesús na saha tyiño yo chihin cha chahá Nyoo chi yo (Mt. 25.14-30)

¹¹ Ta cha ni ri ca cha chiñi ñáyivi tuhun cahán ra Jesús, quichaha cahan tucu ra inga cuhva ihya. Vatyi cha cuyatyin chaa ra Jerusalén. Ta ñáyivi cuñi maa ñu vatyi cha cua quichaha ra cunyaca ñaha ra yucuan.

¹² Tyicuan ta catyí ra:

—Chiyo noo ra vaha ta cuñí cahun ra noo ñuu cañi. Vatyí yucuan cunanduvi ra rey tacuhva vatyí ndichi ra ñuu ra, soco cha cuví ra rey.

13 Ta cuhva cha cumañi cahun ra, cana ra chi uchi tahan musu ra. Ta chaha cuenda ra noo xuhun chi noo noo ra. Ta catyí ra chi ra: “Saha tyiño ndo chihin xuhun chiña nyacua nya ndichi mai”, catyí ra.

14 Soco suhva ñáyivi ñuu ra, tasi cuñí ñu nyehe ñu chi ra ta ña cuñí ñu cha cuví ra rey chi ñu. Ta tachí ñu chi suhva ra cahun chata ra, vatyí catyí ra vatyí ña cuñí ñu cha cuví ra rey chi ñu.

15 Soco ra cuan nduvi ra rey. Tyicuan ta nachaa ra nya ñuu ra. Ta quivi cha nachaa ra, cana ra chi musu ra, ra cha sandoo ra xuhun chii. Vatyí coto ra yoso saha ganaa xuhun ra cha ni ri ca cha chahan ra.

16 Ta chaa noo ra cuan. Ta catyí ra: “Tata, saha ganai uchi ca tahan chaha siqui xuhun cha sandoun chii”, catyí ra.

17 Tyicuan ta quichaha catyí rey cuan chi ra: “Vaha xaan. Yoho vaha musu cuvún. Vatyí vaha saha tyiñon chihin chiin xuhun cha chahí chuun. Ta vityin cunyaca ñahun uchi tahan ñuu”, catyí rey cuan chi ra.

18 Tyicuan ta chaa tucu inga ra cha chaha ra xuhun chii. Ta quichaha catyí ra: “Ma xuhun ihya. Saha ganai ohon tahan ca chaha siqui xuhun cha sandoun chii”, catyí ra.

19 Tyicuan ta catyí rey chi ra: “Yoho cunyaca ñahun ohon tahan ñuu”, catyí ra.

20 Tyicuan ta chaa tucu inga ra cuan. Ta quichaha catyí ra: “Ma xuhun ihya cha chahun chii. Yuhu chicumi vahi chichi noo pañitu.

21 Vatyí yuhví xain chuun, vatyí yoho cahun noo ra xaan. Vatyí naquehun cha ñima chuun cuví. Ta naquehun tyiño saha inga ñáyivi”, catyí ra cuan.

22 Tyicuan ta rey cuan catyí ra chi ra: “Yoho musu ña vaha cuvún. Vityin suri chihin tuhun cha catyun chii, cucatyí tucu yuhu chuun. Tatu chitón vatyí yuhu, xain, ta chitón vatyí naquehin cha ñima chii cuví, ta naquehin cha ña saha tyiñe,

23 ¿ñáá tuhun ña chahun ta chityihun xuhin banco vatyí nachai soco cha nducuaaha ca xuhin?” catyí rey cuan.

24 Ta quichaha catyí ra chi ra canyicú cuan: “Tinya ndo xuhun cha chahí chi ra, ta cuhva ndo chi ra cha saha ganaa uchi ca tahan cuan”, catyí ra.

25 Tyicuan ta quichaha catyí ra chi rey cuan: “Tata, soco ra cuan, cha iyó uchi tahan chi ra”, catyí ra.

26 Tyicuan ta rey cuan catyí ra: “Soco catyí yuhu chi ndo. Vatyí ra cha vaha ca sahá tyiño chihin cha chahí chi, cucuhva que chi ra. Ta ra cha chahí chiin ri, ta ña cuñí ra sahá tyiño ra chihin cuan, cutinyaa ndihi chi ra.

27 Ta tandihi ñu xaan iñi chii, ñu ña cuñí vatyí cunyaca ñahi chi ñu, nyaca ndo chi ñu tyehe vatyí cahñi ndo chi ñu nui”, catyí rey cuan —catyí ra Jesús.

Nu cua chaa ra Jesús Jerusalén

(Mt. 21.1-11; Mr. 11.1-11; Jn. 12.12-19)

28 Cha yaha cahan ra Jesús cuhva cuan, ta sañihi ra cuahan ra ityí Jerusalén.

29 Yucuan ta cua chaa ra ñuu Betfagé chihin ñuu Betania, vatyin ri noo yucu cha nañi Olivo, vatyí maa maa ri maa tun Olivo iyó yucuan. Ta tava ra tyiño chi uvi tahan ra cachicá noo chihin ra.

30 Ta catyí ra chi ra:

—Cuahan ndo ñuu cha nyaá yatyin ri cuan. Ta yucuan cunañihi ndo noo burru luhlu, quiiti ta coto ca tyayu, nuhñi ti. Ndachi ndo chi ti. Ta nyaca ndo chi ti tyehe.

³¹ Tatu yóo cha catyí chi ndo: “¿Ñáá tuhun cha ndachi ndo chi ti?” catyí ndo chi ñu: “Vatyí chiñuhú ti chi maa ra nyaca ñaha chi yo.”

³² Tyicuan ta ra cachicá noo chihin ra, cuahan coyo ra. Ta nañihí ra chi ti tari cuhva catyí maa ra Jesús.

³³ Ta cuhva cha candachi ra chi ti, chaá coyo chitoho ti. Ta candaca tuhun ra chi ra:

—¿Ñáá tuhun cha ndachi ndo chi burru chiña? —catyí ra.

³⁴ Tyicuan ta canacahan ra cuan ta cacatyí ra:

—Ndachí ndi chi ti vatyí chiñuhú ti chi maa ra nyacá ñaha —catyí ra.

³⁵ Tyicuan ta quehen ra chi ti. Ta chinyaca ra chi ti nu nyaá ra Jesús. Ta tyiso ra sahma ra siqui ti. Tyicuan ta casandaá ra chi ra Jesús siqui ti.

³⁶ Tyicuan ta cuahan ra Jesús. Ta cuaha vava ñáyivi cachacun ñu sahma ñu ityí nu cua yaha ra, yosó ra burru cuan.

³⁷ Tyicuan ta cha cua cuyatyin tandihí ñu chihin ra Jesús nu iñi noo yucu Olivo cuan. Ta quichaha cana cha tandihí ñu chinó iñi chi ra chihin cha sií cuví chi ñu. Ta sacahnú ñu chí Nyoo vatyí cuaha xaan cha vaha nyehe ñu cha sacuví ra.

³⁸ Yucuan chaha catyí ñu:

—¡Na sacahnu yo chí Rey ihya vatyí vachi ra chihin sivi Nyoo! ¡Na coo cha taxi ri andívi! ¡Ta na sacahnu yo chí Nyoo! —catyí ñu.

³⁹ Tyicuan ta suhva ra fariseo cha cuahan coyo chihin ñáyivi cuan quichaha cacatyí ra:

—Maestro, sacutaxin chi ñu nyicón chuun —cacatyí ra.

⁴⁰ Nacahan ra Jesús ta catyí ra:

—Tatu ñáyivi ihya ta cu taxin ñu, nyacua nya yuu ta nacana chaa chí, ta sacahnu chí chíi —catyí ra Jesús.

⁴¹ Yucuan ta cha cua chaa ra yatyin ri Jerusalén cuan. Ta nanyehe ra Jesús chí ñuu cuan ta quichaha chacu chaa ra vatyí cuihya iñi ra.

⁴² Ta catyí ra:

—Tyehe ta chitó nyoho, ta cutuñi iñi ndo yoso caa cha vaha cha vachi nyaque chí ndo quiívi ihya. Soco xehe xaan ñohó cha chiñi tuñi cuan, ta ña nañihí maa ndo.

⁴³ Soco cuchaa quiívi ña vaha vatyí ra xaan iñi chí ndo cutyihí chacu ra chí ndo. Vatyí tandihí ri ityí cuquichi coyo ra siqui ndo. Ta cucañi tahan ra chihin ndo.

⁴⁴ Ta cucacun ñuhú ra chí ndo ta cucañi ra chí ndo. Ta ni noo yuu yoso nyitahan ta ma sandoo ra. Tyicuan caa cucuvi vatyí ña cuñi ndo nacoto ndo cha quichí Nyoo quichi sacacu ra chí ndo.

Nu tavá ñehe ra Jesús chí ra caxico chichi vehe ñuhu cahnu (Mt. 21.12-17; Mr. 11.15-19; Jn. 2.13-22)

⁴⁵ Tyicuan ta ra Jesús quihví ra chichi nuquehe vehe ñuhu cahnu. Ta quichaha tava ñehe ra tandihí ra caxicó ta casatá yucuan.

⁴⁶ Ta catyí ra chí ra:

—Nu tutu Nyoo catyí chí vatyí vehe Nyoo, nu chicán tahvi yo chí ra cuví. Soco nyoho sananduví ndo vehe nu nyicó ra suhu —catyí ra.

⁴⁷ Ta tandihí quiví chahán ra Jesús chisañaha ra chi ñáyiví chichi vehe ñuhu cuan. Soco ra cacuví nuu chi tata sutu, ta ra casacuahá cuenda ley vehe ñuhu, ta ra cacuví nuu chi ñuu cuan, canducú ra cuhva yoso caa ta cahñi ra chi ra.

⁴⁸ Soco ña ñihí maa ra cuhva yoso caa sacuvi ra. Vatyí tandihí ñáyiví ta vaha tyasohó ñu tuhun cahán ra Jesús.

20

Nu ndaca tuhun ra fariseo chi ra Jesús yóo cha tachí chi ra vatyí cahán ra nuu ñáyiví

(Mt. 21.23-27; Mr. 11.27-33)

¹ Noo quiví cuan cha ni ri ca cha sañahá ra Jesús chi ñáyiví chichi vehe ñuhu cahnu, ta cahán ra tuhun yoso caa sacacú Nyoo chi ñu. Ta chaꝯ coyo ra cuví nuu chi tata sutu chihin ra casacuahá cuenda ley vehe ñuhu, in ri chihin ra cacuví mandoñi.

² Ta cacatyí ra chi ra:

—Catyí chi ndi ¿yóo cha tyaa tyiño chuun vatyí sacuvun tyehe caa? —catyí ra.

³ Tyicuan ta ra Jesús quichaha catyí ra chi ra:

—Yuhu tucu cua ndaca tuhun noo tuhun chi ndo.

⁴ ¿Yóo cha tachí chi ra Juan vatyí sacondutya ra chi ñáyiví? ¿Atu Nyoo tachí chi ra, o ñáyiví?

⁵ Tyicuan ta cacatyí ra cuan chi ra tahan ra:

—Tatu catyí yo vatyí Nyoo tachí chi ra Juan cuan, cucatyí ra chi yo “Ñáa tuhun ña chinó iñi ndo tuhun cahan ra.”

⁶ Ta tatu catyí yo vatyí ñáyiví tachí chi ra, ñáyiví cahñi ñu chi yo chihin yuu. Vatyí tandihí ñu, ta cuñí ñu vatyí Nyoo tachí chi ra —cacatyí ra.

⁷ Tyicuan ta cacatyí ra chi ra Jesús vatyí ña cachitó ra yóo cha tachí chi ra Juan vatyí na sacondutya ra chi ñáyiví.

⁸ Tyicuan ta ra Jesús catyí ra chi ra:

—Ni ri yuhu, ta ma catyí chi ndo yóo cha tachí chii, cha sacuvi tyehe caa.

Nu sañahá ra Jesús vatyí tari ra sahá tyiño ña vaha tyicuan caa cuví ra cha cucahñi chi ra

(Mt. 21.33-44; Mr. 12.1-11)

⁹ Tyicuan ta quichaha catyí ra Jesús noo cuhva ihya chi ñáyiví:

—Noo ra tachí ra cuaha yoho tichaha ndiví nu ñuhú ra. Yahꝯ cuan ta chaha noo ra ñuhú cuan chi suhva ra casaha tyiño. Tyicuan ta naha cuahan ra inga ñuu.

¹⁰ Ta chaꝯ quiví cha iñi chiti cuan. Tyicuan ta tachí ra chi noo musu vatyí cuquehen ra suhva chiti cha tahán chi chi ra. Soco cacañi xaan ra casahá tyiño cuan chi musu cuan. Ta sacunuhu ra chi ra chihin nu ndaha nu ndi ra.

¹¹ Tyicuan ta chitoho yoho tichaha ndiví cuan tachí tucu ra chi inga musu. Suri cacañi xaan ra chi ra. Ta cacahan uhví ra chi ra. Ta natachí ra chi ra. Soco suri ñahri cachaha ra cuiso ra cunuhu.

¹² Tyicuan ta chitoho cuan tachí tucu ra chi inga ra. Soco suri tyicuan caa chinyacuvi tucu ra chihin ra. Ta sañicuehe ra chi ra. Ta tavꝯ ñehe ra chi ra yucuan.

¹³ Yahꝯ cuan ta quichaha catyí chitoho ñuhu cuan: “¿Yoso caa cunyacuvi vityin? Cua tachi chi sehi, ra cha cuñí vavahi. Ta cha nanyehe ra chi ra, vasi casaha ra ñáyiví chi ra, vatyí sehi cuví chi ra.”

14 Soco cuhva cha cananyehę ra casahá tyiño cuan chi ra, catyí ra chi ra tahan ra: “Ican ra ihya cundoo chihin ñuhú ihya tatu chihi sutu ra. Soco nacahñi yo chi ra. Vatyí ndoo maa yo chihin ñuhú ihya”, catyí ra.

15 Tyicuan ta tavañe ra chi sehe chitoho ñuhú cuan ityi chata chacu. Ta cachahñi ra chi ra —catyí ra Jesús.

Tyicuan ta catyí ra Jesús chi ñáyivi nyicú cuan:

—¿Ñáá cha cusacuvi chitoho ñuhú cuan chi ra cachahñi chi sehe ra cha cuhva cha cuñi nyoho?

16 Catyí chi ndo vatyí quichi ra ta cahñi ra chi ra casahá tyiño cuan. Ta cuhva ra ñuhú cuan chi inga ra —catyí ra Jesús.

Ta cuhva cha chiñi ñáyivi tuhun cuan, yuhví xaan ñu cuví. Ta quichaha catyí ñu:

—¡Ña cuñi Nyoo ta cuví tyicuan caa! —catyí ñu.

17 Soco ra Jesús nanyehę ra chi ñu ta catyí ra:

—Tyicuan caa cucuvi. Vatyí nyaá nu tutu Nyoo ta catyí chi tuhun tyehe caa: Yuu cha ña cuñi ra casavahá vehe cotyiño ra, Ican cuan cuví yuu cha ñiñi ca.

18 Tari tahnú noo ra cha canacava siqui yuu, tyicuan caa tiví ñu ña cuñi quichaha tuhun cahín. Ta siin ri, tari taxin nyihi noo ra cha canacava yuu siqui, tyicuan caa cunaa ñu ña cuñi quichaha tuhun cahín —catyí ra Jesús.

19 Ta ra cacuvi nuu chi tata sutu ta ra casacuahá cuenda ley vehe ñuhu catuvi ñiñi ra vatyí tuhun cha catyí ra Jesús, chi maa ra nañi cuan. Ta cuñi ra catiñ ra chi ra Jesús vatyí cacahñi ra chi ra. Soco ña cachitó maa ra yoso caa. Vatyí yuhví ra chi ñáyivi.

*Tuhun cha tyiyahví ñu xuhun chi gobiernu ñuu Roma
(Mt. 22.15-22; Mr. 12.13-17)*

20 Tyicuan ta catachi ra chi suhva ra vatyí cunducu nyehe ra chi ra Jesús. Ta casahá ra tyi ra vaha cacuvi ra. Vatyí coto ra ñáá noo tuhun ña vaha cahán ra Jesús tacuhva cuví catiñ ra chi ra. Ta cuhva cuenda ra chi ra chi gobernador.

21 Yucuan chaha candaca tuhun ra casavaha chii cuan chi ra Jesús:

—Maestro, chitó ndi vatyí vaha tuhun cahún. Ta sañahún cha vaha chi ñáyivi. Ta ñima cuhva iyó ri ñu nyehun soco aña ñu ñandihí. Ta maa ri maa ityi Nyoo sañahún.

22 Catyí chi ndi ¿atu vaha cha tyiyahvi yo cha chicán gobiernu ñuu Roma chi yo, o ña vaha? —catyí ra.

23 Soco ra Jesús tuví ñiñi ra vatyí cuñi ra nducu nyehe ra chi ra. Ta catyí ra chi ra:

—¿Ñáá tuhun cuñi ndo nducu nyehe ndo chii?

24 Sañaha ndo noo xuhun chiña chii, na nyehi. ¿Yóó chi nuu ta yóó chi sivi nyaá nu xuhun ihya? —catyí ra.

Tyicuan ta nacahán ra cuan, ta catyí ra:

—Nuu gobiernu, ta sivi ra ñandihí —cacatyí ra.

25 Tyicuan ta catyí ra Jesús:

—Tu tyicuan caa, cuhva ndo xuhun chiña chi ra cuví gobiernu cuan vatyí chi maa ra tahán chi. Ta cuhva tucu ndo chi Nyoo cha tahán chi chi ra —catyí ra Jesús chi ra.

26 Ta ña cuví maa sandahvi ñaha ra chi ra Jesús chihin tuhun cahán ra nuu ñáyivi. Ta iyo xaan cacuñi ra tuhun cha nacahán ra. Ta taxi ri cuví ra.

Nu cacuñi ra saduceo sandavi ñaha ra chi ra Jesús

(Mt. 22.23-33; Mr. 12.18-27)

²⁷ Cha yahā cuan ta chaā coyo suhva ra saduceo nu nyaá ra Jesús. Maa ra cuví ra casañahá vatyí ña nandotó ndiyi.

²⁸ Tyicuan ta catyí ra chi ra Jesús:

—Maestro, sandog ra Moisés tuhun ihya vatyí tatu noo ra chihí ra ta ndoo ñasihi ra, tatu yori sehe ra chiyo chihin ña, tahán chi cha tandaha yañi ra chihin ña tacuhva cha ma cunaa tata yañi ra.

²⁹ Soco cuñi ndi coto ndi vatyí chiyo ucha tahan ra chihin yañi ra. Ta ra cha ñihi ca chicoo ñasihi ra, soco yori sehe ñu chiyo, ta chihí ra.

³⁰ Tyicuan ta naquehen ra cha cu uvi suri maa ña cuan. Ta yori tucu sehe ñu chiyo. Ta chihí tucu ra cuan.

³¹ Ta suri tyicuan caa cuví chihin ra cu uñi cuan. Ta suri tyicuan caa cuví chi ndi ucha ra. Ni noo ra ta yori sehe ra chiyo chihin ña.

³² Ta nu ndihi tuhun chihí ndihi maa ña.

³³ Ta cuñi ndi coto ndi yóo ra cuví ñasihi chi ña chichi cha ndi ucha tahan ra cuan nu cunandoto ñu nuu Nyoo —cacatyí ra saduceo cuan.

³⁴ Tyicuan ta nacahan ra Jesús, ta catyí ra:

—Ihya ñayivi, rayi ta ñusihi tandaha ñu.

³⁵ Soco ñu cha tahán chi nandoto inga ñayivi nu nyacá ñaha Nyoo, ña tandaha ca ñu ta ni ma cuhva ca ñu sehe ñu tandaha.

³⁶ Ta ñahri tuhun chihí iyó nyicuan. Soco cucuvi ñu tari ángel. Ta cuví ñu sehe Nyoo cha ndicha vaha vatyí nandotó ñu.

³⁷ Cha ndicha cuví vatyí ra Moisés nu sacotó ra tuhun cha cayu taca iñu cuan, yucuan sacotó ra chi yo vatyí ñu chihí nandotó ñu. Vatyí yucuan catyí ra vatyí Sutu Mañi yo Nyoo cuenda ra Abraham, ta Nyoo cuenda ra Isaac, ta Nyoo cuenda ra Jacob, cuví chi ra.

³⁸ Vatyí Nyoo ñima Nyoo cuenda ñayivi chihí cuví ra. Nyoo cuenda ñu nyitó cuví ra. Vatyí cha cuenda Nyoo tandihí yo ta nyitó añima yo vasi chihí coño ñuhu yo —catyí ra Jesús.

³⁹ Tyicuan ta suhva ra casacuahá cuenda ley vehe ñuhu catyí ra:

—Vaha xaan nacahun Maestro —catyí ra.

⁴⁰ Yucuan ta ña caña ca maa iñi ra candaca tuhun ra ñáá ca tuhun chi ra Jesús.

Cristo vachi ra tata ra David, ta suri cuví tucu ra Sehe Nyoo

(Mt. 22.41-46; Mr. 12.35-37)

⁴¹ Tyicuan ta ndaca tuhun ra Jesús chi ñu:

—¿Ñáá tuhun cha catyí ndo vatyí ra Cristo tata ra David vachi ra?

⁴²⁻⁴³ Vatyí suri maa ra David catyí ra nu libru Salmo tyehe caa:

Cahán Suti Nyoo chihin Suti ra Cristo, ta catyí ra chi ra:

“Cunya chiyó vahi nyacua nya cuhve chí ra xaan iñi chuun vatyí cuaca chahun siqui ra”, catyí Nyoo chihin yuhu ra David ta cha naha.

⁴⁴ ¿Yoso caa cha ra vachi tata ra David cuví chi ra Cristo, ta suri maa ra David catyí vatyí Sutu ra cuví chi ra Cristo? —catyí ra Jesús.

Nu catyí ra Jesús vatyí cuaha xaan cuatyí ra casacuahá cuenda ley vehe ñuhu iyó

(Mt. 23.1-36; Mr. 12.38-40; Lc. 11.37-54)

⁴⁵ Tandihí ñayivi cachiñi ñu tuhun cahán ra Jesús chihin ra cachicá noo chihin ra nu catyí ra tyehe caa:

46 —Saha ndo cuenda chi ndo chihin ra casacuahá ley vehe ñuhu. Tahán xaan iñi ra cuihno ra sahma cañi. Ta cuñi ra vatyi saha ndo ñáyivi chi ra nuyahvi ta cuhva ndo nocumi chi ra. Ta nanducú ra tyayu vaha cunyaa ra chichi vehe ñuhu ta nu cuahan ra vico.

47 Ta naha chicán tahvi ra chi Nyoo nu tuvi, cha cuñi ra cha catyi ñáyivi tyi vaha ñáyivi cuví ra. Soco suri maa ra tinyaá ra vehe ñu ndahvi cha chihj yii vatyi ña cuví tyiyahvi ñu xuhun cha tavá ra siqui ñu. Yucuan chaha ñihi ca cutachi tuñi Nyoo chi ra —catyi ra Jesús.

21

Noo ofrenda cha chahq noo ñaha sihi cha chihj yii
(Mr. 12.41-44)

1 Ta nyehē ra Jesús vatyi cuaha xaan ñu tyayii catyihí ra xuhun chichi caja cha nanyaá chichi vehe ñuhu cahnu.

2 Ta nyehē tucu ra noo ñaha ndahvi cha chihj yii. Ta tyihj ña uvi tahan ri xuhun cuatyí.

3 Ta catyí ra Jesús:

—Cha ndicha catyí chi ndo vatyi nuu Nyoo cuaha ca tyihj ñaha ndahvi ihya ta ñima ca tandihí ñu tyayii cuan.

4 Vatyi cha ndoó ri siqui chi ñu catyihj ñu. Soco ñaha ihya tyihj ña tandihí cha iyó chi ña —catyí ra.

Nu catyí ra Jesús vatyi cucani ñáyivi vehe ñuhu cahnu
(Mt. 24.1-2; Mr. 13.1-2)

5 Tyicuan ta suhva ñu ndatuhún ñu tuhun vehe ñuhu cahnu cuan. Ta catyí ñu vatyi tyaqui xaan yuu. Tyaqui xaan tacaá cha chahq ñáyivi. Tyicuan ta quichaha catyí ra Jesús:

6 —Coo quivi ta tandihí cha nyehé ndo ihya cutani. Ni noo yuu ta ma coso ca siqui tahan. Vatyi cusanacoyo ra xaan iñi chi ndo.

Ñáa ndihí seña cha cucuvi cha ni cumañi ca naa ñáyivi
(Mt. 24.3-28; Mr. 13.3-23)

7 Tyicuan ta quichaha candaca tuhun ra chi ra Jesús, ta catyí ra:

—Maestro, ¿ama cucuvi tandihí tuhun cahun ihya? ¿Yoso caa ta coto ndi tatu cha cuyatyin cha naa ñáyivi? —cacatyí ra.

8 Tyicuan ta catyí ra Jesús:

—Saha vaha ndo cuenda, coto sandavi ñaha ra chi ndo. Vatyi cuaha xaan ra cuquichi, ta cucotyíño ra sivi, ta cucatyí ra: “Yuhu cuví Cristo ra cha saquichí Nyoo chi. Cha cuñi cunaa ñáyivi”, cucatyí ra. Soco ma cunyicon ndo chi ra. Ta ma chino iñi ndo chi ra.

9 Ta quivi ñihi ndo tuhun tyi iyó cuatyí ta cañi tahan ñáyivi, ma nayuhvi ndo. Vatyi tandihí cuan cutahan chi cuví xihna ca. Soco cumañi ca chaa quivi cha naa ñáyivi.

10 Ta catyí tucu ra:

—Ñáyivi iyó noo ñuu cucañi tahan ñu chihin ñáyivi inga ñuu. Ta cucoo cuatyí.

11 Ta cutaan nahnu. Ta cucoo tama. Ta cucoo cuehe tandihí ri ityi. Ta cunyehe ñáyivi cuaha xaan cha yuhví andivi. Cuaha xaan seña nahnu cha ña tuhvá ñu nyehē cunyehe ñu.

12 Soco cha cumañi ca cuví ihya, cutasi iñi ñáyivi chi ndo. Ta cucacan ñu cuatyí chaha ndo. Vatyi cucutuñi chi ndo ta cucuhva cuenda ñu chi ndo chi

tata sutu. Ta cutyihí ñu chi ndo chichi vehe caa. Ta cunyaca ñu chi ndo nuu rey ta nuu ra cacuví tyiño cha catyi yuhu.

¹³ Tyicuan ta cuvi cahan ndo tuhín chihin ñu.

¹⁴ Soco saha ndo cuenda ta ma caca xiñi ndo ñáá tuhún cunacahan ndo chihin ra cuví tyiño cuan.

¹⁵ Vatyí yuhu cucuhve tuhún cunacahan ndo. Ta cucuhve cha chiñi tuñi xiñi ndo. Vatyí ni noo ra xaan iñi chi ndo ta ma cuvi chasaha ra chi ndo chihin tuhún cahán ra.

¹⁶ Soco ñáyivi cunacuhva cuenda ñu chi ndo nuu ñu xaan iñi chi ndo. Nyacua nya sutu ndo ta sihi ndo, yañi ndo, tahan ndo, ta ra tahan ndo cunacuhva cuenda ra chi ndo chi ñu xaan iñi chi ndo. Ta yihí nyoho cucahñi ñu chi ndo.

¹⁷ Tandihí ñáyivi ta cutasi cuñi ñu nyehe ñu chi ndo cha catyi yuhu.

¹⁸ Soco ni noo ixi xiñi ndo ta ma cunaa.

¹⁹ Tatu ma ndu uvi iñi ndo chií, cucacu añima ndo.

²⁰ Quívi nyehe ndo vatyí nicachico yuhu ñuu Jerusalén ihya nyicú sindaro, coto ndo vatyí cha cuñi chaa quívi cha sanaa ra ñuu ihya.

²¹ Ta ñáyivi cha nyicú ityi Judea, na cono ñu ta na tixehe nuu ñu ityi yucu. Ta ñu nyicú ñuu Jerusalén ihya, na quita ñu. Ta ñu nyicú nu chiquí, ma ndichí ñu ñuu ihya.

²² Vatyí yucuan quívi cutachi tuñi Nyoo chí ñáyivi ñuu ihya. Vatyí cuchino cava tandihí cuhva catyí maa nu tutu Nyoo.

²³ Ta ndahvi ñusihí cha ñohó sehe quívi cuan. Ta ndahvi ñu cha iyó cha lee sehe cha ni chaxín ca. Vatyí cuaha xaan tindoho cunyehe ñu ta tandihí ñáyivi. Vatyí cuxaan xaan Nyoo chihin ñáyivi ñuu Jerusalén ihya.

²⁴ Sindaro cucahñi ra chí suhva ñáyivi chihin mityi ra. Ta suhva ñu cutiin ra ta cunyaca ra chí ñu vehe caa inga ñuu. Ta ñáyivi cha ñima ñu Israel cuví, cucuaca chaha ñu Jerusalén nyacua nya quívi cha catyí maa Nyoo.

*Yoso caa cuquichi Rayi cha quichi nya gloria inga chaha
(Mt. 24.29-35, 42-44; Mr. 13.24-37)*

²⁵ Tyicuan ta cuaha cha iyo cunyehe ñáyivi nu ñanyii, ta nu yoo, ta nu tiño. Ta ihya siqui ñuhu ñáyivi cunayuhvi ñáyivi chihin cha iyo cunacatyín tyañuhu.

²⁶ Ta cucoña ñu chihin cha yuhví ñu cha chicá xiñi ñu ñáá ndihí cha cua cuvi ihya siqui ñuhu ñáyivi. Vatyí nyacua nya cha iyó andívi cunacanda.

²⁷ Tyicuan ta cunyehe ñu chí yuhu Rayi cha quichí nya gloria vachi chichi noo vico tyaquí chihin tunyee iñi Nyoo, ta chihin cha cahnu cuví ra.

²⁸ Ta cuhva cha quichaha tuhún ihya, sanduníi ndo iñi ndo ta cusíi cuñi ndo vatyí numi xaan ta cucacu ndo —catyí ra.

²⁹ Tyicuan ta chahá ra Jesús noo cuhva ihya, ta catyí ra:

—Saha ndo cuenda noo yutun cha nañi higuera, o ñáá nonga yutun.

³⁰ Tatu cha cua cuyatyín cha coon savi cha nduyutya numa tun.

³¹ Ta tyicuan caa tucu nyoho, tatu cha nyehe ndo vatyí cha quichaha tandihí tuhún cha catyí chí ndo, coto ndo vatyí cha cuyatyín quívi cha cunyaca ñaha Nyoo siqui ñuhu ñáyivi ihya.

³² Soco catyí chí ndo vatyí tuhún ihya cucuvi cha ní ri ca cha iyó ñáyivi.

³³ Ta coo quívi cucunaa andívi ta ñuhu ñáyivi, soco tuhún cahán yuhu, tyicuan ri cucuvi tari cuhva catyí.

³⁴ Ta saha ndo cuenda chi ndo coto ndundava añima ndo chihin vicio, ta coho xaan ndo ndixi, o caca xaan iñi ndo tuhun tundoho ñayivi ihya. Ta coto sana iñi ndo ta chaa quivi quichi yuhu ta quichi tundoho siqui ndo.

³⁵ Vaty tyicuan caa cucuvi chi tandihi ñáyivi iyó siqui ñuhu ñayivi. Sana iñi ñu ta tari noo cha cua nacasi Nyoo nu ñohó ñu ta ma cuvi quita ñu.

³⁶ Soco nyoho cuatu tuhva ri ndo. Caçan tahvi ndo chi Nyoo tandihi quivi, tacuhva tyinyee ra chi ndo. Ta ma cunaa ndo quivi cuan, tacuhva cuvi chaa vaha ndo nuu yuhu Rayi cha quichi nya gloria —catyi ra Jesús.

³⁷ Ta cha ñucahñu sañahá ra Jesús chi tandihi ñáyivi chichi vehe ñuhu cahnu. Ta cha cha cuaa chahán ra yucu Olivo.

³⁸ Ta tandihi ñáyivi chaç coyo ñu chichi vehe ñuhu cahnu ndihi ñaha ri. Vaty cuñi ñu tuhun chahán ra.

22

Nu cua xico ra Judas Iscariote chi ra Jesús (Mt. 26.1-5, 14-16; Mr. 14.1-2, 10-11; Jn. 11.45-53)

¹ Ta cha nyaña yatyin quivi cha coo vico pascua vico nu tuhva ñu chachi pan cha ñahri yuchan iya yihí chihin.

² Ta ra cacuvi nuu chi tata sutu chihin ra casacuahá cuenda ley vehe ñuhu, nducú xaan ra cuhva yoso caa ta cacahñi ra chi ra Jesús. Soco cayuhví ra chi ñáyivi.

³ Tyicuan ta quihvi cuihna chi ra Judas cha catyi ñáyivi Iscariote chi. Ta maa ra cuvi noo ra cha uchi uvi tahan ra cha nacachi ra Jesús.

⁴ Ta ra cuan, chahan ra chi cahan ra chihin ra cuvi nuu chi tata sutu, ta chihin ra cuvi nuu chi ra sahá cuenda vehe ñuhu cahnu. Ta candatuhun tahan ra yoso caa cunacuhva cuenda ra chi ra Jesús.

⁵ Ta ra cuan sii xaan cacuvi chi ra. Ta tyaç ra cuhva vaty cuhva ra xuhun chi ra Judas.

⁶ Ta ra Judas ndoo ra vaha. Ta quichaha nducu ra cuhva yoso caa cuhva cuenda ra chi ra Jesús chi tata sutu cuan, cuhva cha yori ñáyivi nyicú chihin ra.

Nu cuxiñi ra Jesús chihin ra cachicá noo chihin ra (Mt. 26.17-29; Mr. 14.12-25; Jn. 13.21-30; 1 Co. 11.23-26)

⁷ Ta chaç quivi cha cuvi vico nu chachi ñu pan cha ñahri yuchan iya yihí. Ta suri quivi cuan tuhva ñu chahñi ñu noo mbee luhlu cha vico pascua cuan. Vaty cachi ñu chi ti.

⁸ Ta ra Jesús tachi ra chi ra Pedro chihin ra Juan, ta catyi ra chi ra:
—Cuahan ndo cua sanduvaha ndo mbee cha cuxiñi yo —catyi ra.

⁹ Tyicuan ta quichaha ndaca tuhun ra chi ra:

—¿Nya cuñún cha sanduvaha ndi cha cuxiñi yo? —cacatyí ra.

¹⁰ Tyicuan ta catyi ra Jesús chi ra:

—Cuahan ndo chichi ñuu. Ta yucuan cunañihi ndo chi noo ra nyisó noo quivi ndutya. Ta cuahan ndo chata ra nyacua nya nu quihvi ra chichi vehe.

¹¹ Ta çatyí ndo chi chitoho vehe cuan: “Ra Sacuaha, cuñi ra coto ra nya nyaá casartu nu sanduvaha ra cha cuxiñi ra chihin ra cachicá noo chihin ra, vaty casanducahnu ra vico pascua.” Tyicuan caa çatyí ndo chi ra.

¹² Tyicuan ta maa ra cuan cusañaha ra cuarto cahnu ityi siqui nu cu uvi piso chi ndo. Ta cha yahá nduvii. Ta yucuan sanduvaha ndo cha cuxiñi yo —catyi ra chi ra.

¹³ Tyicuan ta cuahan coyo ra. Ta nañihí ra tandihí tari cuhva catyí ra Jesús. Tyicuan ta casanduvahá ra cha cuxiñi ra cha vico pascua cuan.

¹⁴ Yucuan ta cha chaá cuhva cha cuxiñi ra Jesús ta tandihí apóstol ra, cachicunyicu ra yuhu mesa.

¹⁵ Tyicuan ta ra Jesús quichaha catyí ra:

—Cuñi xain cuxiñi in caa ri chihin ndo cuenda vico pascua ihya cha ni ri ca cha cumañi ca cunyehe tundoho ta cúvi.

¹⁶ Vatyí nya ri ca ihya cua cachi ta cucúvi. Yucuan ta cachi tiqui soco nya nu nyacá ñaha Nyoo —catyí ra.

¹⁷ Tyicuan ta quehen ra noo vasu vinu. Ta nacuhva ra tyiahvi nyoo chi Nyoo, ta sayaha ra chi tandihí ra nyicú chihin ra. Ta quichaha catyí ra:

—Quehen ndo ihya. Ta coho ndo suhva suhva.

¹⁸ Vatyí catyí chí ndo vatyí ma coho que vinu tichaha ndivi nyacua nya quichi cha nyacá ñaha Nyoo ñayivi ihya —catyí ra.

¹⁹ Ta yaha cuan ta quehen ra pan. Ta nacuhva ra tyahvi nyoo chi Nyoo. Ta tahvi sava ra. Ta chaha ra chí ra cachicá noo chihin ra. Ta quichaha catyí ra:

—Ican ihya cuví coñe. Vatyí cha catyí ndo ta cua cuhva cuende chii ta cúvi. Tyicuan ri ñicohon iñi ndo chii ta cuxiñi ndo tyehé caa —catyí ra.

²⁰ Ta cha yaha cuxiñi ra, tyicuan ta quehen tucu ra vaso vinu tichaha ndivi, ta quichaha catyí ra:

—Chihin ihya natyihí tahan Nyoo tuhun chaa chihin ndo vityin. Vatyí vinu cha yihí chichi vaso ihya, tari ñiñi cuví. Ta cha catyí nyoho ta cucatí ñiñi. Vatyí cucúvi cha catyí ndo.

²¹ Soco vityin, ra cha cua nacuhva cuenda chii chí ra xaan iñi chii, in ri yoso ndaha ra chihin ndahi nu mesa ihya.

²² Vatyí yuhu Rayi cha quichi nya gloria cua cuví chii tari cuhva cha nyaá maa tyí cuví chii. Soco jndahvi ra ndahvi, ra cha cunacuhva cuenda chii! —catyí ra Jesús.

²³ Tyicuan ta ra cachicá noo chihin ra Jesús quichaha candaca tuhun ra chí tahan ra, nya ra cuví ra cua nacuhva cuenda chí ra chí ra xaan iñi chí ra.

Nu candatuhún ra cachicá noo chihin ra Jesús yóo ra cahnu ca cuví

²⁴ Yaha cuan ta quichaha candatuhun ra cachicá noo chihin ra Jesús nya ra cahnu ca cuví.

²⁵ Soco ra Jesús catyí ra:

—Chitó nyoho vatyí ra nyacá ñaha chí ñayivi iyó siqui ñuhu ñayivi, ñihi xaan yosó ra siqui ñu. Ta cacuñi ra vatyí catyí ñayivi tyi tyinyee ra chí ñu.

²⁶ Soco nyoho ña tahán chí sacuvi ndo tari sacuvi ra cuan. Vatyí tatu cuñi ndo cuví ndo ra cuví nuu, tahán chí sacuvi ndo tyiño nuu ñayivi. Vatyí tatu sacuvi ndo tyiño nuu ñayivi, ican ndo cuví ra cuví nuu.

²⁷ Vatyí ihya siqui ñuhu ñayivi ra cuví nuu cuví ra cha ña sahá tyiño. Ta nyaá ra yuhu mesa ta musu ra sacuvi ra tyiño nuu ra. Soco yuhu ra cuví nuu cuví, ta sacuvi tyiño nuu ndo.

²⁸ Soco nyoho tyicuan ri ndihí ndo chihin, tandihí chaha cha nyehí tundoho.

²⁹ Yucuan chaha, yuhu chahí noo nu cunyaca ñaha ndo tari cha chaha Suti chii cha cunyaca ñahi.

³⁰ Vatyí cucachi ndo cucoho ndo yuhu mesa chihin nya nu nyacá ñahi. Ta yucuan cunyaa ndo nu tyayu tyaqui. Ta cunyaca ñaha ndo chí ndi uchi uvi tahan ityí ñayivi vachi tata ra Israel.

Catyí ra Jesús vatyi cua catyí ra Pedro vatyi ña ñohó nuu ra chi ra
(Mt. 26.31-35; Mr. 14.27-31; Jn. 13.36-38)

³¹ Tyicuan ta catyí ra Jesús chi ra Pedro:

—Nyehe vahun, yoho Simón. Vatyi cuihna, ra nañí Satanás, cha chican ra chi Nyoo na cuhva ra ityi chi ra vatyi quisi ñihno ra chi ndo tari naquisi ñihno yo trigu, tacuhva ndu uvi iñi ndo chi Nyoo.

³² Soco chicán xain chi Nyoo cha catyun, vatyi ma ndihí cha chinó iñun chi ra. Ta quivi ndu uvi iñun cuatyun ta na chino vaha iñun chii cutyinyeun chi ra tahn cha ma sandihí ra cha cachino iñi ra chii —catyí ra Jesús chi ra Simón.

³³ Ta ra Simón catyí ra chi ra:

—Sutu Mañi yuhu, cha iyó vahi vatyi cuhin chuhun vasi vehe caa, vasi tuhun chihi —catyí ra.

³⁴ Tyicuan ta catyí ra Jesús chi ra:

—Pedro, catyí chuun vatyi vityin cha ni ri ca cha cumañi ca cuacu chaa loho, yoho cha uñi tahan chaha cucatyun vatyi ña ñohó nuun chii —catyí ra Jesús chi ra.

Nu cha cuñí chaa cuhva cha cunacuhva cuenda ra Judas chi ra Jesús

³⁵ Tyicuan ta ndaca tuhun ra Jesús chi ra cachicá noo chihin ra, ta catyí ra:

—Ñicohon iñi ndo quivi cha tachi chi ndo vatyi cucahan noo ndo nuu ñáyivi ta ñahri nyiso ndo, ni ri cha cachi ndo, ni ri xuhun, ni ri sahma ndo. ¿Atu chiyo cha cumañi chi ndo quivi cuan? —catyí ra Jesús.

Tyicuan ta canacahan ra, ta catyí ra:

—Ñahri cha cumañi chi ndi.

³⁶ Tyicuan ta quichaha catyí ra Jesús chi ra:

—Soco vityin, tatu iyó cha cachi ndo ta iyó xuhun ndo, cuiso ndo. Ta tatu ñahri mityi ndo, xico ndo noo sahma ndo ta sata ndo.

³⁷ Vatyi catyí chi ndo, vatyi tandihí tuhin cha nyaá nu tutu Nyoo cuchino cava vatyi tyehe caa catyí chi: “Sahá ñu tuhun tyi cuví ra noo ra quiñi iyó.” Tyicuan caa catyí tuhin nu tutu Nyoo. Ta tandihí cuan cuchino cava —catyí ra.

³⁸ Tyicuan ta quichaha catyí ra cachicá noo chihin ra:

—Ihya nyaá uvi tahan mityi —catyí ra.

Tyicuan ta catyí ra Jesús:

—Cha iyó vaha ri —catyí ra.

Nu chican tahvi ra Jesús chi Nyoo Getsemani
(Mt. 26.36-46; Mr. 14.32-42)

³⁹ Tyicuan ta quitá ra Jesús vehe cuan. Ta cuahan ra nya yucu Olivo. Tari cuhva tuhvá maa ra chahan. Ta ra cachicá noo chihin ra cuahan coyo ra chata ra.

⁴⁰ Ta cuhva cha chaa ra yucuan, quichaha catyí ra chi ra cachicá noo chihin ra:

—Cacan tahvi ndo chi Nyoo tacuhva ma cuvi chasaha cuihna chi ndo.

⁴¹ Tyicuan ta cuahan ra Jesús cha cañi ca, tari cuhva cha chaa noo yuu tatu tuchi yo. Yucuan ta chicuñi chiti ra. Ta quichaha cahan ra chihin Nyoo,

⁴² ta catyí ra:

—Sutu Mañi yuhu, tu yoho ta cuñún, cuhva cha ma nyehi tundoho ihya. Soco ma cuvi tari cuhva cha cuñí mai. Soco na cuvi tari cuhva cha cuñí maun —catyí ra.

⁴³ Tyicuan ta tuví noo ángel, vatyi cuhva ca ra tunyee iñi chi ra.

44 Ta cha ni ri ca cha nyehé xaan ra Jesús tundoho vatyí cuihya vavaha iñi ra, ta ñihi ca chicán tahvi ra chi Nyoo. Ta cuaha xaan tyeen ra quitá ta canacoyó nu ñuhú, ta tari caa ñiñi caa.

45 Yucuan ta nducuita ra cha ndihí cahan ra chihin Nyoo. Ta cuanuhu ra nu canyicu tandihí ra cachicá noo chihin ra. Ta nyehe ra vatyí caquixí ra, cha cuenda vatyí cacuihya xaan iñi ra, ña cacunyeē ra ñumahna ta caquixi ra.

46 Tyicuan ta quichaha catyí ra Jesús chi ra:

—¿Ñáá tuhun cha caquixí ndo? Ndūcuita ndo. Ta cācan tahvi ndo chi Nyoo, tacuhva cha ma cuví chasaha cuihna chi ndo.

*Nu chaha cuenda ra Judas chi ra Jesús chi ra xaan iñi chi ra
(Mt. 26.47-56; Mr. 14.43-50; Jn. 18.2-11)*

47 Ni cahan ca ra Jesús tuhun ihya, ta cuaha xaan ra cachaa coyo. Ta itiyi nuu vachi ra Judas, noo ra chicá noo chihin ra Jesús cuví ra. Ta tuhva ra chi ra Jesús vatyí cua tyayuhu ra xitin ra.

48 Tyicuan ta catyí ra Jesús chi ra:

—Judas, ¿atu chihin cha cua tyayuhun chii, nacuhvá cuendon chi yuhu, Rayi cha quichi nya gloria, chi ra xaan iñi chii? —catyí ra Jesús.

49 Ta ra canyicú chihin ra Jesús quichaha ndaca tuhun ra chi ra:

—Sutu Mañi yuhu, ¿atu sañicuehe ndi chi ra chihin mityi? —catyí ra.

50 Yucuan ta noo ra, chahnya ra soho chiyo vaha noo ra cha cuví musu ra cuví nuu chi tata sutu.

51 Soco ra Jesús catyí ra chi ra:

—Saña ndo. Vaha ri —catyí ra.

Tyicuan ta naquehen ra Jesús soho ra cuan. Ta natyaa ra, ta nduvaha.

52 Ta ra cacuví nuu chi tata sutu chihin ra cacuví nuu chi ra sahá cuenda vehe ñuhu, chihin ra cacuví mandoñi, ican ra cuví ra quichi coyo vatyí catiin ra chi ra Jesús. Ta quichaha catyí ra Jesús chi ra:

—¿Atu vachi coyo nyoho siqui chihin cha xaan ta chihin yutun tari cha vatyí minoo ra suhu cuví yuhu sahá ndo?

53 Ndiquivi chinyaí chichi vehe ñuhu cahnú, ¿ñáá tuhun ña cuví tñin ndo chii? Soco vityin chaā cuhva cha ñaa iñi vatyí ra ña vaha nyacá ñaha. Yucuan chaha vachi tñin ndo chii.

*Nu catyí ra Pedro vatyí ña ñohó nuu ra chi ra Jesús
(Mt. 26.57-58, 69-75; Mr. 14.53-54, 66-72; Jn. 18.12-18, 25-27)*

54 Tyicuan ta catiin ra chi ra Jesús. Ta cua nyaca ra chi ra nya vehe ra cuví nuu chi tata sutu. Ta ra Pedro nyasava ri cuahan ra chata ra.

55 Ta cha chaā coyo ra vehe ra cuví nuu chi tata sutu cuan, casanatahan ra ñuhu nuquehe. Ta chicunyicú cutya ra nicachico ri nu cayú ñuhu cuan. Ta chicunyaā tucu ra Pedro mahñu ñáyivi cuan.

56 Ta cuhva cha ndundichin cha cayu ñuhu cuan, tyicuan ta noo ñaha cha cuví musu tata sutu cuan nanyehē ña chi ra. Ta quichaha catyí ña:

—Ra ihya chicá noo ra chihin ra cuan —catyí ña.

57 Soco ra Pedro catyí ra:

—Yuhu ña ñohó nui chi ra cuan.

58 Tañi ri cuan ta nyehe tucu inga ra chi ra, ta catyí ra:

—Yoho, ra cuenda ra cuan cuvún —catyí ra.

Ta ra Pedro catyí ra:

—Ñima —catyí ra.

⁵⁹ Ta cha yahá noo ora, ta nanyehé tucu inga ra chi ra ta catyí ra chi ra tahan ra:

—Cha ndicha cuii vatyi ican ra ihya cuví noo ra cha chicá noo chihin ra cuan. Vatyí suri ra Galilea cuví ra —catyí ra.

⁶⁰ Tyicuan ta catyí ra Pedro:

—Ña chité ñáá tuhun cahún —catyí ra.

Ta caa cuhva ri cuan, ni cahán ca ra Pedro tuhun cuan, ta chacu chaa ri noo loho.

⁶¹ Tyicuan ta ra Jesús nanyehé ra nuu ra Pedro. Ta ra Pedro nicohon iñi ra tuhun cha catyí ra Jesús chi ra: “Cuhva cha ni cumañi ca cuacu chaa loho, yoho cha catyun tyi ña ñohó nuun chii uñi tahan chaha.”

⁶² Tyicuan ta quitá ra Pedro ityi chata vehe. Ta chacu vavaha ra cha cuihya iñi ra.

Nu cachacú nyaa ra chi ra Jesús ta cacañi ra chi ra
(Mt. 26.67-68; Mr. 14.65)

⁶³ Tyicuan ta ra casahá cuenda chi ra Jesús, quichaha chacu nyaa ra chi ra. Ta cacañi ra chi ra.

⁶⁴ Cachahñi ra sahma nuu ra, ta quichaha cacatu ra nuu ra. Ta cacatyí ra chi ra:

—Nacoto yóó cha cañi chuun —cacatyí ra chi ra.

⁶⁵ Ta cuaha vavaha ca cha cacahan ra chi ra.

Nu ndacá tuhun ra chi ra Jesús tatu Sehe Nyoo cuví chi ra
(Mt. 26.59-66; Mr. 14.55-64; Jn. 18.19-24)

⁶⁶ Ta cha cundichin inga quivi cuan. Ta candu jin ri ra chahnu ñuu cuan chihin ra cuví nuu chi tata sutu, ta ra casacuahá cuenda ley vehe ñuhu. Ta caquehen ra chi ra Jesús. Ta cuahan coyo ra chihin ra nya nu cuví junta cahnu. Ta quichaha candaca tuhun ra chi ra:

⁶⁷ —Catyí chi ndi zatu ra Cristo ra cha saquichí Nyoo cuvún? —catyí ra chi ra.

Ta ra Jesús nacahan ra, ta catyí ra:

—Tatu catyí chi ndo vatyi ican, ma chino iñi ndo.

⁶⁸ O tatu ndaca tuhin ñáá cha ndaca tuhin chi ndo, ma nacahan ndo ni ma saña ndo chii.

⁶⁹ Soco vityin ta ityi nuu ca yuhu Rayñi cha quichi nya gloria cucunyai chiyo vaha Nyoo ra cha iyó tandihí tunyee iñi chi —catyí ra.

⁷⁰ Tyicuan ta tandihí ra quichaha ndaca tuhun ra chi ra:

—Tu tyicuan caa, Sehe Nyoo cuví chuun —catyí ra.

Tyicuan ta nacahan ra Jesús ta catyí ra:

—Suri maa ndo catyí tyi ican cuví.

⁷¹ Tyicuan ta quichaha cacatyí ra cuan chi ra tahan ra:

—Nyehe nuu. Yuhu maa ra quitá. Ña niñi ca cha tava yo cha ndaa. Vatyí suri maa yo chiñi —cacatyí ra.

23

Nu nyehe ra Pilato vatyi ñahri cuatyí ra Jesús
(Mt. 27.1-2, 11-14; Mr. 15.1-5; Jn. 18.28-38)

¹ Tyicuan ta tandihí ra nducuitá ra. Ta cua nyaca ra chi ra nya nu nyaá ra Pilato, ra cuví gobernador.

² Tyicuan ta quichaha cacatyí ra chi ra Pilato:

—Ra ihya, sativí ra chi ñáyivi chihin cha cahán ra nuu ñu, ta catyí ra vatyi ña vaha tyiyahvi ndi xuhun chi gobiernu ñuu Roma. Ta siin ri catyí ra vatyi ra Cristo ra cha saquichi Nyoo vatyi cuví ra rey cuví ra —cacatyí ra.

³ Tyicuan ta ra Pilato quichaha ndaca tuhun ra chi ra Jesús, ta catyí ra:

—¿Atu ican yoho cuví Rey cuenda ñu Israel? —catyí ra.

Ta nacahan ra Jesús, ta catyí ra:

—Ican, suri maun catyí.

⁴ Tyicuan ta quichaha catyí ra Pilato chi ra cuví nuu chi tata sutu ta chi ñáyivi:

—Ñahri cuatyí ra ihya —catyí ra chi ñu.

⁵ Soco xaan ca nanduví ñu. Ta quichaha cacatyí ñu:

—Cahnu xaan cuatyí ra. Cuaha xaan tisihi chaha ra, vatyi cahán ra nuu ñáyivi. Cha xihna ri quichaha cahan noo ra nuu ñáyivi ityi Galilea. Ta nicañi maa ityi vachi ra cahán ra chihin ñáyivi nyacua nya cha ra Judea ihya —catyí ñu.

Nu tachi ra Pilato chi ra Jesús nuu ra Herodes

⁶ Cuhva cha chiñi ra Pilato tuhun ihya, quichaha ndaca tuhun ra tatu ra Galilea cuví ra Jesús.

⁷ Ta catyí ñáyivi chi ra vatyi ican. Tyicuan ta sacuhun ra Pilato chi ra nya nu nyaá ra Herodes. Vatyi ra Herodes cuví ra gobernador nicañu Galilea. Soco quivi cuan ñohó ra ñuu Jerusalén.

⁸ Ta cuhva cha nanyehe ra Herodes chi ra Jesús, si xaan cuví chi ra. Vatyi cha naha xaan cuñi ra nyehe ra chi ra. Vatyi ñihí ra tuhun vatyi cuaha xaan milagru sacuví ra. Ta cuñi xaan ra nyehe ra noo milagru cha sacuví ra Jesús.

⁹ Ta cuaha xaan tuhun ndaca tuhun ra chi ra. Soco ra Jesús ña nacahan maa ra.

¹⁰ Ta yucuan canyicú tucu ra cuví nuu chi tata sutu ta ra casacuahá ley vehe ñuhu. Ta catyaa xaan ra cuatyí siqui ra.

¹¹ Tyicuan ta ra Herodes chihin sindaro cuenda ra chacu nyaa ra chi ra. Ta sandihvi noo ra noo sahma yahvi ta tyaqui chi ra, tari cha tuhva rey ñihnó. Tyicuan ta natachi ra Herodes chi ra inga chaha nuu ra Pilato.

¹² Ta quivi cuan ra Pilato chihin ra Herodes nduvaha iyó ra chihin tahan ra. Vatyi nu quichi chi, ña cuví canyehe ra chi tahan ra.

Nu cutuñi chi ra Jesús vatyi cucuvi ra

(Mt. 27.15-26; Mr. 15.6:15; Jn. 18.39—19.16)

¹³ Tyicuan ta ra Pilato sandu iin ri ra chi ra cuví nuu chi tata sutu, ta chi ra cuví tyiño, ta chi ñáyivi ñandihí.

¹⁴ Ta catyí ra chi ñu:

—Nyoho quichi nyaca ndo chi ra ihya chii. Ta catyí ndo vatyi sativí ra chi ñáyivi. Soco yuhu cha sacutuñi chi ra nuu ndo. Ta ñahri cuatyí ra nañihí tari cuhva catyí ndo.

¹⁵ Ta ni ri ra Herodes ña nañihí ra ni noo cuatyí ra. Yucuan chaha sandichi ra chi ra inga chaha nu nyai. Nyehé ndo vatyi ñahri cha sacuví ra, ñahri cuatyí ra. Ta ña tahan chi cha cúvi ra.

¹⁶ Yucuan chaha cua tachi tuñi ri chi ra. Yahá cuan ta sañe chi ra —catyí ra Pilato.

¹⁷ Tyicuan caa catyí ra Pilato vatyi cha ni ri ca cha iyó vico cuan, tahan chi cha saña ra noo ra ñohó vehe caa, tari cuhva cha tuhva maa ra.

¹⁸ Soco tandihí ñu iin ri nacanachaa ñu, ta catyí ñu:

—Cahñi chi ra Jesús. Ta saña chi ra Barrabás —catyí ñu.

19 Ta ra Barrabás cuan ñohó ra vehe caa cha cuenda cha cuñí ra nacanda ra siqui ra cuví tyiño. Ta siin ri chahñi ra chi ñáyivi.

20 Ta ra Pilato cuñí ra saña ra chi ra Jesús. Ta quichaha catyí ra chi ñáyivi cuan inga chaha vatyi cusaña ra chi ra.

21 Soco ñáyivi chaa ca caná chaa ñu, ta catyí ñu:

—Na cúvi ra nu cruzi.

22 Tyicuan ta cha cu uñi chaha catyí ra Pilato chi ñu:

—Soco ¿ñáá cha ña vaha sacuví ra ihya? Nyehi tyi ña tahán chi cúvi ra. Tacuhva cutachi tuñi ri chi ra, ta sañe chi ra —catyí ra Pilato.

23 Soco ñáyivi caná chaa ca ñu, ta catyí ñu vatyi tyaa ra chi ra nu cruzi. Ta cuví chasaha ñu. Vatyi maa ñu ta ra cacuví nuu chi tata sutu caná chaa ñu.

24 Tyicuan ta sacuví ra Pilato tari cuhva catyí ñu.

25 Ta tari cuhva catyí ñáyivi, saña ra chi ra Barrabás cha ñohó vehe caa cha cuenda cha cuñí ra nacanda ra siqui ra cuví tyiño ta cha cuenda cha chahñi ra. Ta sacuví ra chi ra Jesús tari cuhva catyí ñu.

Nu cua cunyaa ra Jesús nu cruzi

(Mt. 27.32-44; Mr. 15.21-32; Jn. 19.17-27)

26 Yucuan ta quehen sindaro chi ra Jesús. Ta cuahan ra chihin ra. Ta catiñ tucu ra chi noo ra Cirene cha nañi Simón. Ra cuan ni cua ndichi ra cha chahan ra nu chiqui. Ta saniñi sindaro chi ra, na cuiso ra cruzi ra Jesús ta cuahan ra chata ra.

27 Ta cuaha xaan ñáyivi cuahan chata ra. Ta cuaha xaan ñusihi chacú chaa ñu cha cuihya iñi ñu cha catyí ra.

28 Soco ra Jesús nanyehe ra chi ñu. Ta quichaha catyí ra chi ñu:

—Tandihi nyoho ñusihi ñuu Jerusalén, ma cuacu ndo cha catyí yuhu. Cuacu ndo, soco cha catyí maa ndo ta cha catyí sehe ndo.

29 Vatyi cuquichi quivi nu cunyehe xaan ndo tundoho. Ta cucahan ñáyivi chihin tandihi ndo cha cuví ndo ñusihi cha yori sehe ndo iyó. Ta cucatyí ñu chi ndo: “Vaha xaan vatyi yori sehe ndo iyó vatyi cuaha xaan tundoho nyehé yo vityin”, cucatyí ñu chi ndo.

30 Vatyi quivi cuan cucuñi ñu vatyi na canacoyo yucu siqui ñu tacuhva sahvi chi chi ñu.

31 Vatyi tatu tyehé caa sacuvi ñu chihin yuhu cha ñahri cuatyí. Yaha ca cuhva cunyacuvi tucu ñu chihin maa ndo cha iyó cuatyí ndo —catyí ra Jesús.

32 Ta quehen tucu sindaro cuan chi uvi tahan ra quiñi iyó, vatyi cahñi ra chi ra in ri chihin ra Jesús.

33 Tyicuan ta cachaa ra noo nu nañi Nu Cuví Yiqui Xiñi Ndiyí. Ta yucuan chicatacaá ra chi ra Jesús nu cruzi. Ta tyicuan caa tucu chinyacuví ra chihin nanduvi tahan ra iyó cuatyí cuan. Noo ra chitacaá ra nuu cruzi chiyo vaha ra Jesús. Ta nonga ra cuan chitacaá ra nuu cruzi chiyo satyin ra.

34 Ta cuhva cha tacaá ra Jesús nu cruzi cuan, quichaha catyí ra:

—Sutu Mañi yuhu, saha tucahnu iñi chi ra. Vatyi ña chitó ra ñáá cha nyacuví ra chihin —catyí ra.

Tyicuan ta sindaro cuan chahan ra noo sihva chihin sahma ra Jesús. Nya ra saha ganaa caquehen ra sahma cuan.

35 Ta ñáyivi tayucú ñu nyehé ñu. Ta nyacua nya ra cacuví nuu cuenda vehe ñuhu, ta chacú cuehe ra nyehé ra chi ra Jesús. Ta catyí ra:

—Sacacu ra chi inga ñáyiví. Soco vityin na sacacu tucu ra chi maa ra, tatu ndicha cha Cristo, ra cha saquichi Nyoo, cuví ra —cacatyí ra.

³⁶ Ta suri cahán cuehe tucu sindaro chi ra. Ta catuhva ra chi ra. Ta chaha ra vinu iya coho ra.

³⁷ Ta quichaha cacatyí ra chi ra:

—Tatu rey cuenda ñáyiví Israel cuvún. Sacacu chuun —cacatyí ra.

³⁸ Ta siqui cruzi ityi xiñi ra nyaá noo nu tyaa ra chihin griego, chihin latín, ta chihin hebreo. Tyehe caa quita cahán letra cuan: “Ican ra ihya cuví Rey cuenda ñu ñuu Israel” —catyí nu vitu cuan.

³⁹ Ta noo ra quiñi iyó cha tacaá xiin ra Jesús, quichaha cahan ra chihin ra, ta catyí ra:

—Tatu ndicha cha Cristo cuvún, sacacu chuun. Ta sacacu chi ndi ñandihí —catyí ra.

⁴⁰ Soco inga ra cuan catyí ra chi ra:

—¿Atu ña yuhvún chi Nyoo? Vatyí nyehún suri tundoho cha nyehé maa ra vityin.

⁴¹ Maa yo nyehé yo tundoho ihya vatyí iyó cuatyí yo. Soco ra ihya ñahri cuatyí ra iyó —catyí ra.

⁴² Tyicuan ta quichaha catyí ra chi ra Jesús:

—Yoho Jesús, ñicohon iñun tuhín quiñi cunyaca ñahun —catyí ra.

⁴³ Tyicuan ta ra Jesús catyí ra chi ra:

—Cha ndicha catyí chuun vatyí tañi ri vityin ta cunyaun chihin nya paraíso nu nyaá añima ñu chinó iñi chi Nyoo —catyí ra Jesús chi ra.

Nu chihí ra Jesús

(Mt. 27.45-56; Mr. 15.33-41; Jn. 19.28-30)

⁴⁴ Tyicuan ta ñáá cuhva ora quichaha nduñaa ñayiví, nyacua nya caa uñi cha cha iñi.

⁴⁵ Vatyí nduñaa ñanyii. Ta sahma cha tacaá chichi vehe ñuhu cahnu cuan, tahnya sava.

⁴⁶ Tyicuan ta quichaha cana chaa ra Jesús:

—Sutu Mañi yuhu, natyaí añime chichi ndahun —catyí ra.

Ta cuhva cha catyí ra tuhun ihya, ta chihí ra.

⁴⁷ Ta ra cuví nuu chi sindaro cuan, nyehé ra tandihí cha cuví cuan. Ta sacahnú ra chi Nyoo, ta catyí ra:

—Ñahri ndicha cuii cuatyí ra iyó —catyí ra.

⁴⁸ Ta tandihí ñáyiví cha canyicú yucuan canyehé ñu cha cuví cuan. Ta cuahan coyo ñu ta suri cacañi ñu ndaha ñu yiqui nyica ñu. Vatyí chitó ñu vatyí ña vaha cha chinyacuví ñu chihin ra Jesús.

⁴⁹ Ta tandihí ñu cha ñohó nuu chi ra Jesús, ta ñusihí cha chinyicon chi ra nya Galilea, canyicú ñu nya sava ri. Ta nyehé ñu tandihí cha cuví yucuan.

Nu cua cuchi ra chi ra Jesús

(Mt. 27.57-61; Mr. 15.42-47; Jn. 19.38-42)

⁵⁰ Ta iyó noo ra vaha, nañi ra José. Ta Arimatea ityi Judea cuví ñuu ra. Ta cuví ra noo ra cuví nuu cuenda Junta Cahnu ñu Israel.

⁵¹ Ta ra José cuan nyatú ra quiñi cha cunyaca ñaha Nyoo. Ta ña ndoo ra vaha chihin cha sacuví ra tahan ra, ra cacuví nuu cuenda tata sutu cuan.

⁵² Tyicuan ta chahan ra chicacan ra coño ñuhu ra Jesús chi ra Pilato.

⁵³ Ta yaha cha sanoꝝ ra José cuan coño ñuhu ra Jesús nu cruzi, ta natyih̄i ra chichi noo sahma cha cuv̄i lino. Ta cuahan ra cua cuch̄i ra chi ra chichi noo ñaña chaa cha cuv̄i yavi yuu cha savah̄a ñu.

⁵⁴ Ta viarni cuv̄i, quiv̄i cha sanduvah̄á ñáyiv̄i cha cachi ñu cha sabar̄u inga quiv̄i, quiv̄i nyitatu ñu. Ta cha cuñí cuv̄i sabar̄u.

⁵⁵ Ta tandih̄i ñusih̄i cha quichi chihin ra Jesús nya Galilea, cuahan ñu chata ra. Ta nyehe ñu chichi yavi yuu cuan. Ta nyehe ñu yoso caa chicava coño ñuhu ra.

⁵⁶ Ta cuanuhu coyo ñu nya vehe ñu. Ta sanduvah̄a ñu ndutya vixi chahán vatyi cutyih̄i ñu coño ñuhu ra Jesús coto coo xico. Vatyi tyicuan caa cuv̄i costumbre cuiya cuan. Tyicuan ta nyitatú ñu inga quiv̄i cuan tari cuhva catyi maa tuhun cha tach̄i Nyoo chi yo.

24

Nu nandoto ra Jesús

(Mt. 28.1-10; Mr. 16.1-8; Jn. 20.1-10)

¹ Cundichin timingu quiv̄i nu quichaha vitya. Ta ñaha cuiri cuahan coyo ñusih̄i cuan nya nu ñaña ra Jesús. Ta nyisó ñu ndutya vixi chahán cha sanduvah̄a ñu.

² Ta cuhva cha chaꝝ coyo ñu, nanyehe ñu vatyi ña nyasí ca yavi yuu cuan tari cuhva chinyas̄i maa.

³ Ta quihv̄i ñu chichi, soco ña nañih̄i ñu coño ñuhu Sutu Mañi yo Jesús.

⁴ Ta yucuan tayucú ñu chihin cha yuhv̄i ñu. Ta ña chitó ñu ñáá cunyacuvi ñu. Ta tuv̄i uvi tahan raȳi nuu ñu. Ta xiño vavaha sahma cañih̄nó ra.

⁵ Ta chihin cha yuhv̄i ñu, ta chicuñ̄i ch̄iti ñu chihin nuu ñu nya nu ñuhú. Tyicuan ta quichaha cacatyi ra cuan ch̄i ñu:

—¿Ñáá tuhun nanducú ndo chi ra Jesús ihya nu ñohó ndiyi?

⁶ Yori ra ñohó ihya, vatyi cha nandoto ra. N̄icohon iñi ndo tuhun cha cah̄an ra chihin ndo quiv̄i chicá noo ra Galilea.

⁷ Catȳi ra vatyi tahán chi cucuhva cuenda ñu chi ra ndaha ra iyó cuatȳi. Vatyi cuv̄i ra Raȳi cha quich̄i nya gloria. Ta tahán chi cucah̄ni ra chi ra nu cruzi. Soco nu cu uñi quiv̄i cunandoto ra. Tyicuan caa catȳi ra ch̄i ndo —catȳi ángel cuan ch̄i ñu.

⁸ Tyicuan ta nichohon iñi ñu tuhun cah̄an ra Jesús quiv̄i cuan.

⁹ Ta cuanuhu coyo ñu. Ta nacatȳi ñu ch̄i ndi uchi ñin tahan ra apóstol ra Jesús chihin tandih̄i ca ñáyiv̄i.

¹⁰ Ta ñu sacoto tuhun cuan chi ra cuan cuv̄i ñu cu María, ñaha Magdala, ta cu Juana, ta cu María sihi ra Jacobo, ta suhva ca ñusih̄i.

¹¹ Soco ra cachic̄a noo chihin ra Jesús cuñí maa ra vatyi cahán ri maa ñu. Ta ña chinó iñi ra tuhun cahán ñu.

¹² Soco ra Pedro nducuit̄a ra ta chin̄o vavaha ra cuahan ra cuanyehe ra nya chichi ñaña ra Jesús tatu ndicha. Ta nanyehe ra chichi yavi yuu cuan tyi sahma ri cayucú ñinchiyo xiin. Tyicuan ta cuanuhu ra nya vehe. Ta iyo cuñí ra vatyi ñahri ca coño ñuhu ra Jesús catuv̄i chichi ñaña cuan.

Noo cha cuv̄i ityi Emaús

(Mr. 16.12-13)

¹³ Suri maa quiv̄i cuan, uvi tahan ra chicá noo chihin ra Jesús cuahan coyo ra nya ñuu cha nañí Emaús, tari noo cha uchi ñin kilómetro cha quita yo Jerusalén.

14 Ta cuahan coyo ra ta ndatuhún ra tuhun ñáá ndihí cha cuví.

15 Ta cha ní ri ca cha candatuhún ra, ta ra Jesús natahan ra chí ra nu cuahan coyo ra.

16 Soco ní ri maa nyehé ra chí ra Jesús, ña canicohon nuu ra chí ra. Vatyí tari cha iyó noo cha chasi nuu ra tacuhva cha ma canicohon nuu ra chí ra Jesús.

17 Tyicuan ta quichaha ndacá tuhun ra Jesús chí ra:

—¿Ñáá tuhun ndatuhún xaan ndo? ¿Ñáá tuhun cha cuihya xaan iñi ndo? —catyí ra chí ra.

18 Ta ra cha nañí Cleofas, nacahan ra. Ta catyí ra:

—¿Atu ñima nya Jerusalén quichi yoho? ¿Atu ra inga ñuu cuvún? ¿Atu ña chitón cha cuví ñuu cuan? —catyí ra.

19 Tyicuan ta catyí ra Jesús chí ra:

—¿Ñáá cha cuví?

Ta quichaha canacatyí ra chí ra:

—Tuhun ra Jesús ra ñuu Nazaret. Vatyí cuví ra noo ra profeta Nyoo. Ta chihin tunyee iñi cahnu Nyoo sacuví ra cha vaha nuu Nyoo ta nuu ñáyivi.

20 Soco ra cacuví nuu chí tata sutu ta ra cacuví nuu cuenda vehe ñuhu, nacuhva cuenda ra chí ra chí sindaro ñuu Roma. Ta cachahñi ra chí ra. Ta chihí ra nu cruzi.

21 Ta cha vityin cha iyó uñi quívi cuví tuhun cuan. Ta nyuhu cuñí maa ndi vatyí ican ra cuví ra cusacacu chí ñáyivi Israel.

22 Soco vityin iyo xaan cuñí ndi cha nacatyí suhva ñusihí chí ndi. Vatyí maa ñu, ñaha cui ri chahan coyo ñu nu ñaña ra.

23 Ta nacatyí ñu chí ndi vatyí ñahri ca coño ñuhu ra catuví. Ta nacatyí ñu vatyí nyehé ñu uvi tahan ángel. Ta catyí ángel cuan chí ñu vatyí ra Jesús nyitó ra.

24 Yaha cuan ta chahan coyo tucu suhva ra tahan ndi nu ñaña. Ta nyehé ra vatyí cha ndicha cuví tari cuhva catyí ñusihí cuan. Vatyí ñahri ca coño ñuhu ra Jesús catuví —catyí ra chí ra.

25 Tyicuan ta ra Jesús catyí ra chí ra:

—Chiin xaan cutuñí iñi ndo. Ta cuee xaan chinó iñi ndo tuhun tyaá ra profeta Nyoo ta cha naha.

26 ¿Atu ña chitó ndo vatyí tahn chí cha cunyehe xihna ra Cristo tundoho? Yaha cuan ta tahn chí cuñihí ra tyiño cha cunyaca ñaha ra —catyí ra Jesús chí ra.

27 Tyicuan ta quichaha nacuhva ra cuenda yoso caa cuahan tuhun ra nu tutu Nyoo. Ta quichaha cahan ra tuhun cha tyaá ra Moisés ta cha naha. Ta yaha cuan ta cahan ra tuhun tandihí libru cha tyaá ra profeta Nyoo.

28 Ta cuhva cha chaá ra nya ñuu Emaús cuan nu cuahan coyo ra, ta sahá ra Jesús vatyí cañi ca cuahan ra.

29 Tyicuan ta cacatyí ra chí ra na ndoo ra chihin ra. Ta catyí ra:

—Ndqo chihin ndi vatyí cha cua quee ñanyii —cacatyí ra.

Tyicuan ta cuahan ra Jesús nya vehe ninduvi ra cuan.

30 Ta cuhva cha chicunyaá ra yuhu mesa chihin ra, quehen ra pan. Ta chahá ra tyahví nyoo chí Nyoo. Ta chahñu sava ra, ta chahá ra chí ra.

31 Ta caa cuhva ri cuan nuña nuu ra canicohon nuu ra chí ra Jesús. Soco ra Jesús cuanaa ri ra.

32 Tyicuan ta quichaha catyí ra chí ra tahan ra:

—Yucuan chaha vaha xaan cuñí añaima yo cuhva cha vachi ra chihin yo, ta nacatyí vaha ra yoso caa cuahan tuhun Nyoo cha nyaa nu tutu chi yo, ta nicohon nuu yo chi ra —cacatyí ra.

³³ Ñahri ca cha canyatú ra, ta cuanuhu coyo ra nya Jerusalén. Ta yucuan nañihí ra chi ndí uchi ñin ra chicá noo chihin ra Jesús, canyicú ra.

³⁴ Tyicuan ta quichaha canacatyí ndí uchi ñin tahan ra chi ra cha nichaa coyo cuan:

—Ndicha vatyi Sutu Mañi yo, nandoto ra. Vatyi ra Simón nyehe ra chi ra —cacatyí ra.

³⁵ Tyicuan ta ra cha ni nachaa coyo cuan canacatyí tucu ra yoso caa ndatuhun ra Jesús chihin ra ityi cuahan ra ñuu Emaús, ta yoso caa canicohon nuu ra chi ra nu chahnu ra pan.

*Nu tuvi ra Jesús nu canyicu ra cachicá noo chihin ra
(Mt. 28.16-20; Mr. 16.14-18; Jn. 20.19-23)*

³⁶ Ni cahán ca ra tuhun cuan ta tuví ra Jesús nu canyicú ra. Ta chahá ra nocumi, ta catyí ra:

—Na coo cha taxi ri añaima ndo.

³⁷ Tyicuan ta canayuhví xaan ra. Ta cacuñí maa ra vatyi noo tatyí ri cuví.

³⁸ Tyicuan ta catyí ra Jesús chi ra:

—¿Ñáá tuhun cha nayuhvi ndo? ¿Ñáá tuhun cha chicá uvi ñi ndo?

³⁹ Nyehe ndo ndahi. Ta nyehe ndo chahi. Vatyi suri mai cuví. Tñin ndo chii ta coto ndo. Vatyi tatyí, ñahri coño ñuhu. Ta ñahri yiqui tari cha nyehé ndo tyi yihí chi yuhu —catyí ra Jesús.

⁴⁰ Ta cuhva cha catyí ra tuhun ihya, sañahá ra ndaha ra ta chaha ra.

⁴¹ Soco maa ra chaha cha iyo cacuñí ra ta sñi cacuñí ra nyacua ña chinó vaha ñi ra. Tyicuan ta catyí ra Jesús chi ra:

—¿Atu iyo cha cachi? —catyí ra.

⁴² Tyicuan ta chahá ra chiin yuhu tiyaca tyihyo chihin tyañuñu chi ra.

⁴³ Ta quehen ra. Ta quichaha chachi ra.

⁴⁴ Ta catyí ra chi ra:

—Tandihí cha cuví chii, ican ihya cuví cha catyí chi ndo quivi cuan. Ta catyí chi ndo vatyi tyicuan caa cucuvi, tari cuhva nyaá tuhun cha tyaá ra Moisés ta ra profeta Nyoo ta cha nyaá nu libru salmo —catyí ra chi ra.

⁴⁵ Tyicuan ta chahá ra Jesús vatyi na cutuñi ñi tandihí ra cuan yoso caa catyí nu tutu Nyoo.

⁴⁶ Tyicuan ta catyí ra Jesús chi ra vatyi tyicuan caa nyaá nu tutu Nyoo vatyi tahán chi cha cúvi ra Cristo. Ta nu cu uñi quivi nandoto ra.

⁴⁷ Ta tahán chi coto ñáyivi tuhun sivi ra Cristo ñuu Jerusalén, ta yaha cuan ta tandihí ñuu nichahnu ñuhu ñayivi. Tacuhva cuvi ndu uvi ñi ñu ta ndachi cuatyí ñu.

⁴⁸ —Ta nyoho cuví ndo cha ndaa tandihí tuhun ihya.

⁴⁹ Ta cusaquichi mai Tatyí Ii Nyoo siqui ndo tari catyí Suti tyi cuhva ra chi ndo. Soco cunyicu ndo Jerusalén ihya. Ta ma quita maa ndo nyacua nya quichi tunyee ñi Tatyí Ii Nyoo cuquihi chi ndo —catyí ra Jesús.

*Nu nandaq xica ra Jesús andivi
(Mr. 16.19-20)*

⁵⁰ Tyicuan ta ra Jesús cuahan ra chihin tandihí ra cachicá noo chihin ra ityi chata ñuu, nya ñuu Betania. Ta sandaa ra ndaha ra. Ta nasoco ra chi ra.

⁵¹ Ta cha ni ri ca cha nasocó ra chi ra, nandaḡ xica ra andivi.

⁵² Tyicuan ta tandihi ra sacahnú xaan ra chí ra. Ta sii xaan cacuví chi ra, cuanuhu coyo ra Jerusalén.

⁵³ Ta tyicuan ri chinyicú ra chichi vehe ñuhu cahnu cuan, ta sacahnú xaan ra chí Nyoo.

Tuhun Nyoo Cha Tyaa San Juan

Tuhun Cahán Nyoo nanduví noo rayíi, ta ican cuví ra Cristo

¹ Nyata quívi xihna ri, nyata ni cumañi ca coo tandihí cha iyó, ta cha iyó ra cuví Tuhun Cahán Nyoo. Nyaá ra chihin Nyoo. Ta Nyoo cuví ra.

² Ta chicoo ra chihin Nyoo nyata quívi xihna ri.

³ Ta chihin ra, savaha Nyoo tandihí cuii maa cha iyó. Ta ñahri savaha Nyoo cha maa ri maa ra.

⁴ Ta chihin ra cuví Tuhun Cahán Nyoo nyaá ñayiví cha ma naa ca maa. Ta ñayiví cuan, ican cuví cha sacundichín añima ñáyiví.

⁵ Ta cha ndichin ihya, sacundichín chi nu ñaa iñi. Ta cha ñaa iñi ña cuñihí chi ndahva chi cha ndichin cuan.

⁶ Chiyo noo ra cha tachí Nyoo chi. Ta nañi ra Juan.

⁷ Quichí ra cuví ra noo cha ndaa. Vatyí cañan ra tumañi iñi cuenda ra cuví cha ndichin cuan, tacuhva vatyí chino iñi tandihí ñáyiví chi ra.

⁸ Ra Juan, ñima cha ndichin cuan cuví ra. Noo cha ndaa ri cuví ra cha cuenda cha ndichin cuan.

⁹ Vatyí cha ndichin cha ndicha vaha cuan, ni cuachaa chi siqui ñuhu ñayiví, tacuhva vatyí sacundichín chi añima tandihí ñáyiví cha iyó siqui ñuhu ñayiví ihya.

¹⁰ Ra cuví Tuhun Cahán Nyoo quichí ra siqui ñuhu ñayiví. Ta ican ra cuví ra Cristo. Ta suri maa ra savaha ra ñuhu ñayiví. Soco ñáyiví iyó siqui ñuhu ñayiví, ña nichon nuu ñu chi ra.

¹¹ Quichí ra nu nyicú ñáyiví cha savaha ra, soco ñáyiví cha savaha ra ña natin cuenda ñu chi ra.

¹² Soco tandihí ñu natin cuenda chi ra, ta chinó iñi ñu chi ra, ican chi ñu cuan, chaha ra ityi vatyí nanduví ñu sehe Nyoo.

¹³ Vatyí nacacu chaa ñu. Soco ñima tari cacu ñu ta lee ñu cuenda coño ñuhu ñu. Ta ni ñima cha cuenda cha quichí cuví iñi noo rayíi coo ra chihin noo ñaha sihi. Ñima cha cuenda cha cuñi ñáyiví coo sehe ñu. Soco maa Nyoo sanacacu chaa chi ñu.

¹⁴ Ta ra cuví Tuhun Cahán Nyoo nanduví ra noo rayíi. Ta chicoo ra chihin yo. Ta nyehé ndi cha cahnu cuví ra. Ta cahnu cuví ra vatyí Sehe mañi Sutu yo Nyoo cuví chi ra. Tyitu yihí ra chihin cha ndicha ta tumañi iñi cha cua cuhva ra chi yo.

¹⁵ Ta ra Juan cuan cañan ra tumañi iñi cuenda ra, ta catyí ra:

—Ican ra ihya cha cañan tuhun quívi cuan, vatyí ra cha vachi ityi chate, cahnu ca ra cuví ra ican saha yuhu. Vatyí nyata tyembu chahnu ta cha iyó maa ra —catyí ra Juan.

¹⁶ Tandihí yo naquehén cuenda yo tumañi iñi cahnu cha chaha ra chi yo, vatyí nasocó xaan ra chi yo.

¹⁷ Ra Moisés chaha cuenda ra ley Nyoo chi yo. Soco ra Jesucristo cundahvi iñi ra chi yo ta saha ra ticahnu iñi cuatyí yo. Ta chaha ra cha ndicha coo chí yo.

¹⁸ Ta yori ca maa nyehé chi Nyoo. Notuhun ri maa Sehe mañi ra cha iyó in ri chihin ra. Ican ra cuví ra chaha cha cohon nuu yo chí Sutu ra.

Nu cahán ra Juan, ra sacondutyá, tumañi iñi cuenda ra Jesucristo (Mt. 3.11-12; Mr. 1.7-8; Lc. 3.15-17)

¹⁹ Ra cacuví nuu chi ñu Israel cha iyó ñuu Jerusalén, catachí ra chi tata sutu ta chi ra cacuví levita nu nyaá ra Juan na ndaca tuhun ra chi ra yóo ra cuví ra.

²⁰ Ta maa ra Juan catyí cachi ra:

—Yuhu ñima ra Cristo cuví.

²¹ Tyicuan ta candacá tuhun ra inga chaha chi ra:

—¿Yóo ra cuví yoho? ¿Atu ra Elías, ra cuví profeta Nyoo ta cha naha cuvún? —catyí ra chi ra.

Ta ra Juan nacahan ra:

—Ñima ra cuan cuví.

Ta sañihí ca ra candacá tuhun ra chi ra, ta catyí ra:

—Tu tyicuan caa, ¿atu icon cuví ra profeta Nyoo cha nyaá cha quichi?

Ta nacahan tucu ra Juan ta catyí ra:

—Ñima.

²² Ta inga tucu chaha candacá tuhun ra chi ra:

—¿Yóo ra cuví yoho? Vatyí cuñí chi cuiso ndi tyiño chi ra cha tachí chi ndi. ¿Yóo ra cuví yoho? —catyí ra chi ra.

²³ Ta ra Juan nacahan ra:

—Yuhu cuví ra cahán ta canachaá noo nu chiqui ndí, ta catyí: “Nuña ndo noo ityi ndoo chichi añima ndo vatyí cha vachi Sutu Mañi yo.” Tari cuhva cahán ra Isaías profeta Nyoo tuhin ta cha naha —catyí ra Juan chi ra.

²⁴ Ra cha cacahán chihin ra Juan, ra cacuví fariseo tachí chi ra.

²⁵ Ta candacá tuhun tucu ra chi ra:

—Tatu ñima ra Cristo, ni ra Elías, ni ra profeta cuan cuvún, ¿ñáá tuhun cha sacondutyón chi ñáyivi? —cacatyí ra chi ra Juan.

²⁶ Ta ra Juan catyí ra chi ra:

—Yuhu sacondutyé chihin ndutyá. Soco mahñu ndo nanyaá noo ra cha ña ñohó nuu ndo.

²⁷ Ican ra cuví ra vachi chate. Soco cha iyó maa ra ta caqui. Ta ña naña mai ni cha cuví musu ra ta ndachi ñí xityin ndichan ra —catyí ra Juan.

²⁸ Tandihí tuhun ihya cuví noo nu nañí Betábara cha nyaá inga chiyo yuvi cahnu Jordán nu ñohó ra Juan sacondutyá ra.

Ra Jesucristo, Mbee Luhlu sana Nyoo cuví ra

²⁹ Cha inga quívi nanyehé ra Juan chi ra Jesús cuachaa ra nu nyaá ra, ta catyí ra Juan:

—Nyehe ndo, ican ra ihya cuví Mbee Luhlu sana Nyoo vatyí cucuhva ra ñáyivi ra tacuhva cahnya ra cuatyí ñáyivi iyó siqui ñuhu ñáyivi.

³⁰ Tuhun maa ra cahín quívi cha catyí chi ndo vatyí cha yaha yuhu ta vachi nonga ra cha cahnu ca cuví ta ñima ca yuhu, vatyí nyata tyembu chahnu ta cha iyó ra.

³¹ Ni yuhu ta ña ñohó nui chi ra quívi cuan. Soco vachi sacondutyé chihin ndutyá tacuhva vatyí ñu ñuu Israel cohon nuu ñu chi ra —catyí ra Juan.

³² Ta catyí tucu ra Juan ñandihí:

—Yuhu nyehí chi Tatyí Ii Nyoo quichí ityi andivi vachi chi tari noo paloma, ta ndoo chi siqui ra.

³³ Yuhu ta coto que yóo ra cuví ra quívi cuan. Soco Nyoo, ra cha tachí chii na sacondutyé chihin ndutyá, catyí ra chii: “Quívi nyehun Tatyí Ii yuhu, vachi noó siqui noo rayí, ican ra cuan cuví ra sacondutyá chihin Tatyí Ii yuhu”, catyí Nyoo chii.

34 Yuhu cha yahā nyehi chi ra. Ta cuví cha ndaa vatyi ican ra cuví Sehe Nyoo —catyí ra Juan.

Ra cha xihna ca nanyicon chi ra Jesús

35 Cha inga quivi, ra Juan nyaá tucu ra yucuan inga chaha, ta nyicú tucu uvi ra nyicón chi ra.

36 Ta cuhva cha nyehē ra, yahá ra Jesús, ta catyí ra:

—Nyehe ndo, ican ra cuan cuví Mbee Luhlu sana Nyoo —catyí ra Juan.

37 Cha chiñi ninduvi ra nyicon chi ra Juan tuhun cahān ra, ta cananyicon ra chi ra Jesús.

38 Tyicuan ta nanyehē ra Jesús ityi chata ra, ta nyehē ra tyi canyicón ra chi ra, ta catyí ra:

—¿Ñáa cha nducú ndo?

Tyicuan ta canacahān ra ta catyí ra:

—Maestro, ¿nya iyón?

39 Ta ra Jesús catyí ra chi ra:

—Coho ndo chihin. ta nyehe ndo —catyí ra chi ra.

Tyicuan ta cuahan coyo ra chihin ra. Ta canyehē ra nu iyó ra. Ta yucuan cuaa ndihi ra vatyi tari cha caa cumi cha cha ñi cuhva cha chaā ra yucuan.

40 Chichi cha ninduvi ra cha chiñi tuhun cahān ra Juan ta nanyicon ra chi ra Jesús, noo ra cuví ra ra Andrés yañi ra Simón Pedro.

41 Ta ra Andrés numi ri chinanducū ra chi yañi ra, ra Simón, ta catyí ra chi ra:

—Nañihí ndi chi ra cha cuví Mesías —catyí ra.

Ta tuhun Mesías cuan cuñi chi catyí, ra Cristo, o ra cha nacachi vaha Nyoo, vatyi cuví ra rey chi yo.

42 Tyicuan ta ra Andrés chinyaca ra chi ra Simón yañi ra nu nyaá ra Jesús. Ta cuhva cha nyehē ra Jesús chi ra Simón, ta catyí ra chi ra:

—Yoho Simón, sehe ra Jonás cuví chuun. Soco cunañun Cefas. —catyí ra chi ra.

Ta Cefas cuñi chi catyí Pedro chihin sahan griego, ta ninduvi tahan sivi cuan, cuñi chi catyí “yuu”.

Nu canā ra Jesús chi ra Felipe ta chi ra Natanael

43 Cha inga quivi tyaa ra Jesús cuhva cuhun ra ityi Galilea. Tyicuan ta nañihí ra chi ra Felipe. Ta catyí ra chi ra:

—Cunyicon chii —catyí ra.

44 Ra Felipe ihya, ra ñuu Betsaida cuví ra. Ta yucuan iyó tucu ra Andrés ta ra Pedro.

45 Tyicuan ta chahān ra Felipe chinanducū ra chi ra Natanael. Ta catyí ra chi ra:

—Nyehe ndi chi ra cha tyaa ra Moisés tuhun nu libru ley, ta suri tuhun ra catyaa tucu ra profeta Nyoo ta cha naha. Jesús nañi ra. Sehe ra José ra ñuu Nazaret cuví chi ra.

46 Ta catyí ra Natanael:

—¿Atu cuví quita cha vaha ñuu Nazaret cuan? —catyí ra chi ra Felipe.

Ta nacahān ra Felipe ta catyí ra:

—Ñaha ta nyehun —catyí ra.

47 Yahā cuan ta cuachaa ra Natanael nu nyaá ra Jesús. Ta cuhva cha nanyehē ra Jesús tyi vachi ra, ta quichaha catyí ra:

—Ihya vachi noo ra cha ndicha ndicha ra ñuu Israel cuví. Ta ña tuhvá ra sandaví ñaha —catyí ra Jesús tuhun ra Natanael.

⁴⁸ Tyicuan ta ra Natanael ndacá tuhun ra chi ra:

—¿Yoso caa cha ñohó nuun chii?

Ta ra Jesús nacahan ra ta catyí ra:

—Yuhu nyehi chuun nyata ni cumañi ca cana ra Felipe chuun, cuhva cha nyaún chaha tun higo cuan —catyí ra Jesús chi ra.

⁴⁹ Tyicuan ta quichahá catyí ra Natanael:

—Sutu Mañi yuhu, yoho cuvún Sehe Nyoo. Yoho cuvún rey cuenda ndi ñu Israel.

⁵⁰ Ta ra Jesús catyí ra chi ra Natanael:

—¿Atu chinó iñun chii cha cuenda vatyi catyí tyi nyehi chuun chaha tun higo? Soco nahnu ca cha cunyeahun ican saha cuan —catyí ra chi ra.

⁵¹ Ta catyí tucu ra Jesús:

—Cha ndicha catyí chi ndo vatyi nyoho cunyehe ndo andivi cuitanuña ta cuaha ángel Nyoo cundaa ra, ta cunoo ra siqui yuhu ra cuví Rayi cha quichi nya gloria —catyí ra Jesús chi ra.

2

Noo vico tandaha iyó ñuu Caná ityi Galilea

¹ Yahá uñi quivi ta chicoo noo vico tandaha ñuu Caná ityi Galilea. Ta sihi ra Jesús ñohó ña yucuan.

² Ta suri canacatyí tuhun ñu chi ra Jesús ta chi ra cachicá noo chihin ra cha cuhun coyo ra vico tandaha cuan.

³ Tyicuan ta cuahan coyo ra. Ta nyicú ñu vico, ta ndihí vinu. Tyicuan ta catyí sihi ra Jesús chi ra:

—Ñahri ca vinu ñu —catyí ña.

⁴ Ta catyí ra Jesús chi ña:

—¿Ñáá cha cuñún cha sacuvi yuhu, Maha? Ta chaa ca cuhva cha sañahi chi ndo yóo ra cuví yuhu —catyí ra chi ña.

⁵ Soco sihi ra catyí ña chi ra cha catyinyeé vico cuan:

—Sacuvi ndo tandihí cha catyí ra chi ndo —catyí ña chi ra.

⁶ Ta tayucú iñu tahan quisi yuu nahnu cha quihí ndutya cha catuhvá ra Israel chotyíño nu tuhvá ra canacatyá xaan ra ndaha ra tari cuhva costumbre cha ca iyó maa ra. Ta tahan tahan quisi cuan chitahan tari uvi xico uchi o uñi xico uchi litru ndutya.

⁷ Tyicuan ta catyí ra Jesús chi ra cha catyinyeé vico cuan:

—Sacutu ndo quisi ihya chihin ndutya —catyí ra chi ra.

Tyicuan ta sacuvi ra tari cuhva catyí ra.

⁸ Tyicuan ta catyí ra Jesús chi ra:

—Vityin tava ndo suhva ta cunyaca ndo chi ra cuví nuu cuenda vico ihya —catyí ra Jesús chi ra.

Ta tyicuan caa casacuvi ra.

⁹ Ra cuví nuu cuenda vico cuan chihí ra ndutya cha nanduví vinu cuan. Soco ña chitó ra nya quichi. Maa ri maa ra catyinyee vico cuan cachitó ra, vatyi maa ra catavá ndutya cuan. Tyicuan ta ra cuví nuu cuenda vico cuan caná ra chi ra cha tandaha cuan.

¹⁰ Ta catyí ra chi ra:

—Tandihí ñáyiví, xihna ca vinu vaha tuhvá ñu tava. Yaha cuan ta tatu cha cachihí xaan ñu, tyicuan ta tava ñu vinu pehe ca. Soco yoho chicumí vahun vinu vaha. Ta nya vityin tavon —catyí ra chí ra.

¹¹ Cha sacuví ra Jesús ñuu Caná ityi Galilea, ican cuan cuví milagru cha xihna ri savahá ra vatyí sañahá ra cha cahnu cuví ra. Ta ra cachicá noo chihin ra cachinq íñi ra chí ra vatyí ican ra cuví ra cha tachí Nyoo.

¹² Cha yaha cuan ta cuahan ra ñuu Capernaum. Ta cuahan sihi ra, yañi ra ta ra cachicá noo chihin ra. Ta yucuan chinyicú ñu suhva quiví.

Nu tava ra Jesús chí ñu caxicó chichi vehe ñuhu cahnu
(Mt. 21.12-13; Mr. 11.15-18; Lc. 19.45-46)

¹³ Cha cuñí chaa quiví vico cha ñañí pascua cha sanducahnú ñu Israel. Yucuan chaha cuahan ra Jesús ñuu Jerusalén.

¹⁴ Ta chaá ra ñuu cuan, ta quihví ra nuquehe vehe ñuhu cahnu cuan, ta nanyehé ra chí ra caxicó sindiquí, mbee, ta paloma. Ta na nyehé tucu ra chí ñu nyicú nasama xuhun chí ñáyiví.

¹⁵ Ta cha nyehé ra Jesús cha tyicuan caa, savahá ra noo yoho. Ta chihin yoho cuan tava ñehe ra chí tandihí ñu nuquehe vehe ñuhu ñn ri chihin mbee ta chihin sindiquí sana ñu. Ta ñu nasamá xuhun cuan, sacuitá ra xuhun ñu nu ñuhu ta sanduva ra mesa ñu.

¹⁶ Ta catyí ra chí ñu xicó paloma cuan:

—¡Tava ndo paloma chiña ihya! ¡Ma nasaha ndo vehe Suti tari noo nuyahvi! —catyí ra chí ñu.

¹⁷ Tyicuan ta ra cachicá noo chihin ra, canicohon íñi ra cha catyí nu tutu Nyoo tyehé caa: “Cuiño xain chihin vehun”, catyí chí, nicohon íñi ra.

¹⁸ Tyicuan ta quichaha candacá tuhun ra cacuví nuu chí ñu Israel chí ra:

—¿Ñáa seña cuhvon chí ndi ta sañahun vatyí chahá Nyoo ityi chuun cha sacuvun tyehé caa? —catyí ra chí ra.

¹⁹ Ta nacahan ra Jesús ta catyí ra:

—Sataní ndo vehe ñuhu ihya, ta chichi cha uñi quiví, yuhu cusanandai inga chaha —catyí ra chí ra.

²⁰ Tyicuan ta quichaha cacatyí ra cuan chí ra:

—Uvi xico íñu cuiya cañohó ra casavahá ra vehe ñuhu ihya. Ta yoho catyún tyi chichi cha uñi quiví cusanandaun inga chaha —catyí ra chí ra.

²¹ Soco vehe ñuhu cha cahán ra Jesús tuhun, ican cuví coño ñuhu ra.

²² Yucuan chaha ra cachicá noo chihin ra canicohon íñi ra tuhun ihya quiví nandoto ra Jesús. Ta cutuñj íñi ra vatyí tuhun cha nyaá nuu tutu Nyoo cahán chí cuenda ra Jesús. Ta canachinq íñi ra tuhun cahán ra Jesús ta tuhun cha nyaá nu tutu Nyoo.

Ra Jesús chitó ra cha caá añima ñáyiví

²³ Quiví cha ñohó ra Jesús Jerusalén, quiví vico pascua cuan, cuaha xaan ñu nachino íñi ñu chí ra cha cuenda cha cuaha xaan milagru sacuví ra.

²⁴ Soco ra Jesús ña cuní íñi ra nyehé ra chí ñu vatyí chitó ra cha caá añima tandihí ñu.

²⁵ Na chiñuhú ri cha nacatyí yo chí ra yoso caa ñáyiví, vatyí maa ra chitó ra ñáa cha caá chichi añima ñu.

3

Nu ndatuhún ra Nicodemo chihin ra Jesús

¹ Chiyo noo ra fariseo cha ñañí Nicodemo. Ta cuví ra noo ra cuví nuu chi ra ñuu Israel.

² Ra Nicodemo ihya, chahan ra nu nyaá ra Jesús noo cha cuaa. Ta catyí ra chi ra:

—Maestro, chitó ndi vatyí Nyoo tachí chuun quichi sañahun chi ndi. Vatyí yori ñáyiví cuví sacuví milagru tahan cha sacuvún, tatu yori Nyoo nyaá chihin ñu —catyí ra chi ra Jesús.

³ Tyicuan ta catyí ra Jesús chi ra:

—Cha ndicha catyí chuun vatyí tatu ma nacacu chaa ñáyiví inga chaha, ma cuví nyehe ñu nu nyacá ñaha Nyoo —catyí ra.

⁴ Tyicuan ta ndaca tuhun ra Nicodemo ta catyí ra:

—¿Yoso caa cuví cacu noo rayí inga chaha tatu cha chahnu ra? ¿Atu cuví ndihví ra chichi sihi ra ta nacacu chaa ra inga chaha? —catyí ra.

⁵ Nacahan ra Jesús ta catyí ra:

—Cha ndicha catyí chuun vatyí ñima chihin cha cacu ri ñáyiví chihin coño ñuhu ñu ta cuví quihví ñu nu nyacá ñaha Nyoo. Soco ñañí tucu cuñí chi cha nacacu ñu chihin Tatyí Ii Nyoo.

⁶ Vatyí ñáyiví cha cacu chihin coño ñuhu, coño ñuhu ri nyisó ñu. Ta ñu cha nacacu chaa chihin Tatyí Ii Nyoo, iyó Tatyí Ii Nyoo añima ñu.

⁷ Ma iyo cuñun cha catyí chuun tuhun ihya vatyí tandihí ñu, cuñí chi nacacu chaa ñu.

⁸ Tari caá tatyí tandihí ri ityí nu cuñí chi ta chiñún cayú chi, soco ña chitón nya ityí quichi chi, ni nya ityí cuahan chi; ta tyicuan caa tandihí ñu nacacu chihin Tatyí Ii Nyoo —catyí ra Jesús chi ra.

⁹ Tyicuan ta ndaca tuhun tucu ra Nicodemo inga chaha chi ra:

—¿Yoso caa cuahan tuhun ihya? —catyí ra chi ra.

¹⁰ Nacahan ra Jesús ta catyí ra:

—Yoho cha cuvún noo ra sacuaha cuenda ñu Israel, tahán chi coton tuhun ihya.

¹¹ Cha ndicha catyí chuun vatyí cahín cha chité ta cuví cha ndaa cha nyehí. Soco nyoho ña chinó ññi ndo cha catyí chi ndo.

¹² Tatu ña chinó ññi ndo chii nu cahín tuhun ñáyiví ihya chihin ndo, ¿yoso caa chino ññi ndo tu cahín tuhun andiví chihin ndo?

¹³ Yori chahan andiví chinyehé yoso caa iyó. Noo ri yuhu Rayí cha quichi nya gloria nyehí, vatyí yucuan iyé.

¹⁴ Tari nacatacaá ra Moisés noo coo cha chino chihin caa nu noo chiquí ndí, tyicuan caa cunacataca tucu ñu chi yuhu Rayí cha quichi nya gloria,

¹⁵ tacuhva vatyí tandihí ñu cha chinó ññi chii, ma cunaa ñu. Soco coo ñu ñáyiví cha ma naa ca maa.

Nyoo cuñí xaan ra chi ñáyiví

¹⁶ Vatyí Nyoo cuñí xaan ra chi tandihí ñáyiví iyó síqui ñuhu ñáyiví. Yucuan cuenda chahá ra vatyí cúvi Sehe mañi ra nu cruzi cha cuenda ñu. Tacuhva vatyí tandihí ñu cha chinó ññi chi Sehe ra, ma cunaa ñu, soco coo ñu noo ñáyiví cha ma naa ca maa.

¹⁷ Nyoo ña tachí ra chi Sehe ra síqui ñuhu ñáyiví vatyí sacunaa ra chi ñáyiví, soco tachí ra chi ra na sacacu ra añima ñu tacuhva ma cuhun ñu anyaya cha catyí cuatyí ñu.

¹⁸ Vatyí ñu chinó ññi chi Sehe Nyoo ma cunaa ñu, soco ñu ña chinó ññi chi ra, cha cunaa ñu cha cuenda cha ña chinó ññi ñu chi noo ri Sehe mañi Nyoo.

19 Ñu ña chinó iñi, cha cuanaa ñu. Vaty quivi quichj ra cuví ñuhu ndichin cha sacundichín siqui ñuhu ñayivi, ña natiñ cuenda ñu chi ra tyi tahan ca iñi ñu nu ñaa iñi vaty nyacuví ñu cha ña vaha.

20 Tandihí ñu cha nyacuví cha ña vaha, ña tahan iñi ñu ñuhu ndichin, vaty coto quetuví cha ña vaha cha nyacuví ñu.

21 Soco ñu nyacuví cha ndicha, nanyitá ñu nu ndichin tacuhva na cundichin nyehé ñayivi vaty sacuví ñu cuhva cuñi Nyoo vaty nyaá ra chihin ñu —catyí ra Jesús.

Nu cahán ra Juan, ra sacondutyá, tuhun ra Jesús inga chaha

22 Cha yahá tuhun ihya, ra Jesús chihin ra cachicá noo chihin ra cuahan coyo ra nu cuví Judea. Ta candoo ra suhva quivi yucuan, vaty casacondutya ra chi ñayivi.

23 Tyicuan caa tucu ra Juan cuan ñohó ra sacondutyá ra chi ñayivi nu cuví Enón yatyin ri nu cuví Salim, vaty yucuan ñohó cama ndutya. Ta ñayivi chaá coyo ñu ta condutya ñu.

24 Tuhun ihya cuví ta ni cumañi ca catyihí ra chi ra Juan vehe caa.

25 Tyicuan ta suhva ra nyicón chi ra Juan quichahá cuví yuhu ra chihin noo ra ñuu Israel siqui yoso caa sandundí ñayivi chi ñu nuu Nyoo.

26 Tyicuan ta cuahan coyo ra nu nyaá ra Juan. Ta catyí ra chi ra:

—Maestro, ra cha ñohó chuhun inga chiyo yuvi cahnu Jordán, ra cha cahun tuhun chihin ndi, vityin sacondutyá ra ta tandihí ñu nanyicón ñu chí ra —catyí ra chi ra.

27 Tyicuan ta ra Juan catyí ra chi ra:

—Ni noo yo ta ñahri cha cuví sacuví yo, tyehe ta ña chahá Nyoo tunyee iñi ra chi yo.

28 Suri maa ndo chiñi vaha ndo cha cahin vaty yuhu ñima ra Cristo cuví. Noo ra cha tachí ri Nyoo ityí nuu ra cuví yuhu.

29 Vaty noo vico tandaha, ra nyaá xiin ñaha tyivaa cuan, ican ra cuan cutandaha chihin ña. Ta ra tahan ra nyaá ra yatyin ri cuan. Ta cusí cuñi ra chiñi ra tuhun cahán ra cha cuatandaha. Ta tyicuan caa tucu yuhu, sí cuñi vaty naquehen ñayivi tuhun cahán ra Jesús ta nyicón ñu chí ra.

30 Maa ra cahnu ca ra cuacuví ra. Ta yuhu cunocuee que vaty tyicuan caa tahan maa chi.

Ra quitq nya gloria ta quichi siqui ñuhu ñayivi

31 'Ra cha quichí nya gloria, cahnu ca ra cuví ra cha nuu tandihí ñayivi. Vaty ra iyó siqui ñuhu ñayivi, cuenda ñuhu ñayivi cuví ra. Ta cahán ra tuhun ñuhu ñayivi. Soco ra quichí nya gloria, cahnu ca ra cuví ra.

32 Ta cahán ra cha nyehé ra ta cha chiñi ra, soco yori chinó iñi tuhun cahán ra.

33 Soco tatu nya noo yo chinó iñi yo chí ra, cuví yo noo cha ndaa vaty Nyoo ndicha cha cahán ra.

34 Vaty ra cha tachí Nyoo chii, tuhun Nyoo cahán ra vaty Nyoo ña tyicuhvá ra Tatyí lí ra chahá ra chí ra. Chahá ra naní Tatyí lí ra chí ra.

35 Nyoo Sutu yo cuñi ra chí Sehe ra. Ta natyaa ra tandihí ndaha ra.

36 Ñu cha chinó iñi chí Sehe Nyoo, iyó ñu noo ñayivi chaa cha ma naa ca maa. Soco ñu ña cuñi chino iñi chí ra, ma coo ñu ñayivi cuan. Ta cutachi tuñi Nyoo chí ñu.

4

Nu ndatuhun ra Jesús chihin noo ñaha Samaria

1 Cachitó ra cuví fariseo vatyí cuaha ca ñáyiví nyicón chi ra Jesús ican saha ra Juan. Ta cuaha ca ñu sacondutyá ra ñandihí.

2 Vasí ñima maa ra Jesús sacondutyá, soco ra cachicá noo chihin ra, ican casacondutyá.

3 Ta quívi chitō ra Jesús vatyí cachitō ra tuhun ihya, ta quitā ra Judea cuan ta cuanuhu ra nya Galilea.

4 Ta ityí cuanuhu ra, tahan chi yaha ra nu cuví Samaria.

5 Yucuan ta chaq̄ ra noo ñuu cha nyaá ityí Samaria cha nañí Sicar yatyin nu nyaá ñuhú ra Jacob nu chahaq̄ ra chí ra José sehe ra.

6 Ta yucuan nyaá noo yavi ndutyá cha catyí ñu tyi chí ra Jacob cuví. Ta vatyí chitatú xaan ra Jesús cha chica ityí ra, ta chicunyaq̄ ra yuhu yavi cuan, ñáá cuhva hora cuví.

7-8 Ta ra cachicá noo chihin ra, yori ra canyicú vatyí cuahan coyo ra chichi ñuu, cuasata ra cha cacachi ra. Tyicuan ta chaq̄ noo ñaha Samaria cuatava ña ndutyá chichi yavi cuan. Ta quichaha catyí ra Jesús chí ña:

—Cuhva chiin ndutyá cohi —catyí ra chí ña.

9 Tyicuan ta ñaha Samaria cuan catyí ña chí ra Jesús:

—Yoho cha cuvún noo ra ñuu Israel, ¿yoso caa cha chicón ndutyá cohun chi yuhu cha cuví ñaha Samaria? —catyí ña vatyí ñu Israel ña vaha iyó ñu chihin ñu Samaria.

10 Tyicuan ta ra Jesús nacahan ra ta catyí ra:

—Tyehe ta chitón cha chahá Nyoo, ta chitón yóo cha chicán ndutyá chuun, maun cuacon ndutyá chii. Ta yuhu cuhve ndutyá nyitó chuun —catyí ra chí ña.

11 Tyicuan ta catyí ña chí ra:

—Tata, ni ñahri vihi chihin tavon ndutyá ihya. Vatyí yavi ihya cono xaan. ¿Nya cuquehun ndutyá nyitó cuhvon cohi?

12 Vatyí sutu chahnu yo, ra Jacob sandoq̄ ra yavi ihya chí yo. Ta suri ihya chihí tucu maa ra ndutyá. Ta suri ihya chihí tucu sehe ra ta quiti sana ra. ¿Atu cahnu ca ra cuví yoho ican saha ra cuan? —catyí ña chí ra.

13 Tyicuan ta nacahan ra Jesús ta catyí ra chí ña:

—Tandihí ñu chihí ndutyá ihya, cu ityí ca ñu ndutyá.

14 Soco ñu chihí ndutyá cha chahá yuhu, ma cu ityí ca ñu. Vatyí ndutyá cha chahí chí ñu cucaña chí tari noo ndohyo chichi añima ñu tacuhva coo ñu ñayiví cha ma naa ca maa —catyí ra chí ña.

15 Tyicuan ta quichaha catyí ña chí ra:

—Tata, cuhva ndutyá cuan cohi, tacuhva cha ma cu ityí que ndutyá, ta ni ma quichi que quichi tave ndutyá chichi yavi ihya —catyí ña chí ra.

16 Tyicuan ta ra Jesús catyí ra chí ña:

—Cuahan cuacana chí yün ta quichun —catyí ra chí ña.

17 Ta nacahan ña ta catyí ña:

—Yori yí iyó —catyí ña.

Tyicuan ta catyí ra Jesús chí ña:

—Ndicha cha cahun, vatyí yori yün iyó.

18 Vatyí cha ohon tahan yün chiyō, ta ra nyaá chuhun vityin ñima yün cuví chí ra. Ndicha tuhun cha cahún —catyí ra chí ña.

19 Cha chiñí ña tuhun cahan ra, quichaha catyí ña chí ra:

—Tata, tuví iñi vatyi noo profeta cuenda Nyoo cuvún.

²⁰ Sutu chahnu ndi, ra Samaria, sacahnū ra chi Nyoo yucu ihya. Soco nyoho ñu Israel catyí ndo vatyi Jerusalén yucuan tahán chi sacahnu yo chi Nyoo —catyí ña chi ra.

²¹ Tyicuan ta ra Jesús nacahan ra ta catyí ra chi ña:

—Chjino iñun tuhun cahín chuhun. Vatyi vachi cuhva vatyi cusacahnu ndo chi Sutu yo Nyoo. Soco ña chiñuhú ri cha quichi ndo yucu ihya o cuhun ndo nya Jerusalén.

²² Nyoho ñu Samaria, ña chitó ndo yóo chi sacahnú ndo. Soco nyuhu chitó ndi yóo chi sacahnú ndi. Vatyi chitó ndi vatyi cuenda noo ra Israel cuasacacu Nyoo chi ñáyivi.

²³ Soco chaa chi cuhva ta cuhva cuan nyaa yo vityin vatyi ñáyivi cha ndicha sacahnú chi Sutu yo Nyoo, cusacahnu ñu chi ra chihin añima ñu ta cha ndicha. Tari cuhva saquehen ityi Tatyí li Nyoo chi ñu. Vatyi Sutu yo Nyoo tyicuan caa cuñí ra cha sacuvi ñu cha sacahnú chi ra.

²⁴ Vatyi Nyoo Tatyí li cuví ra. Ta ñu sacahnú chi ra cuñí chi sacahnú ñu chi ra chihin cha ndicha tari cuhva saquehen ityi Tatyí li chi ñu —catyí ra chi ña.

²⁵ Ta nacahan ña ta catyí ña chi ra:

—Yuhu chité vatyi cuquichi ra cuví Mesías, ra Cristo, ra cuví rey chi yo. Ta quívi quichi ra, maa ra cunacatyí tandihí chi yo —catyí ña chi ra.

²⁶ Tyicuan ta nacahan ra Jesús ta catyí ra chi ña:

—Ra cha cahún tuhun cuan, ican ra cahán chuhun —catyí ra chi ña.

²⁷ Tyicuan ta canachaa coyo ra cachicá noo chihin ra ta iyo cacuñí ra cha ndatuhún ra Jesús chihin noo ñaha síhi. Soco ni noo ra ña cañá iñi ra ndaca tuhun ra ñáá cha cuñí ra o ñáá cuenda ndatuhún ra chihin ñaha cuan.

²⁸ Tyicuan ta sandoq ña quíyi ña ta cuanuhu ña chichi ñuu. Ta catyí ña chi ñáyivi ñuu ña:

²⁹ —Ñaha ndo cunyehe ndo chi noo ra cha catyí tandihí cha cai. ¿Atu ñima ra Cristo cuví ra? —catyí ña chi ñu.

³⁰ Tyicuan ta quitá coyo ñu ñuu cuan ta cuahan coyo ñu nu nyaá ra Jesús.

³¹ Ta cha ñiri ca cha cumañi chaa ñu nu nyaá ra, ra cachicá noo chihin ra, saniñí ra chi ra na cachi ra chiin. Ta cacatyí ra chi ra:

—Maestro, cachi chiin —catyí ra.

³² Soco catyí ra Jesús chi ra:

—Yuhu iyó noo nyayu cuacachi, ta nyoho ña chitó ndo —catyí ra chi ra.

³³ Tyicuan ta ra cachicá noo chihin ra quichaha candaca tuhun ra chi ra tahan ra, ta catyí ra:

—¿O iyó yóo cha quichí nyaca cha cachi ra, vaha? —cacatyí ra.

³⁴ Soco ra Jesús catyí ra chi ra:

—Cha chachí yuhu ican cuví cha sacuví cuhva cuñí ra cha tachí chii ta sacuví tyiño chahá ra chii.

³⁵ Nyoho catyí ndo: “Soco cumañi ca cumi yoo ta naquehen yo cha tachí yo.” Soco yuhu catyí chi ndo vatyi nyehé ndo ta sáha ndo cuenda cha cuaha ñáyivi cuñí ñu quichi ñu chihin, cuví ñu tari noo itu cha cuan ta cuñí chi cha chahu yo niñi.

³⁶ Ra cha naquehén niñi cuan ñihi ra yahvi ra. Ta niñi cha naquehen vaha ra cuví ñu cha ñihi noo ñáyivi cha ma naa ca maa. Ta tyicuan caa cuví tacuhva vatyi ra cha tachí, ta ra cha naquehén niñi cuan in ri cacusiñi cuñí ra.

³⁷ Ta iyó noo tuhun ñáyiví cha catyí vatyi s̄in ñu tachí ta s̄in ñu naquehén niñi. Ta ndicha tuhun cuan.

³⁸ Yuhu sacuh̄in chí ndo vatyi cucahnu ndo niñi cha iyó nu ña sahá tyiño ndo. Vatyi inga ra sahá tyiño. Ta nyoho nyari cucahnu ndo ta naquehen vaha ndo niñi cuan —catyí ra Jesús chí ra.

³⁹ Ta cuaha xaan ñu ñuu Samaria cuan canachino iñi ñu chí ra Jesús cha cuenda cha catyí ñaha cuan, vatyi catyí ña: “Catyí ra tandihí cha cai chii”, catyí ña.

⁴⁰ Ta cuhva cha cachaa coyo ñu Samaria nu nyaá ra Jesús, cha cundahví ñu nuu ra nandoo ra chihin ñu. Ta ra Jesús ndoo ra yucuan uvi quiví chihin ñu.

⁴¹ Ta cuaha ca ñu cachino iñi ñu cha chiñi ñu tuhun cahán maa ra.

⁴² Tyicuan ta quichaha catyí ñu chí ñaha sihi cuan:

—Vityin chinó iñi ndi, ñima cha cuenda vatyi catyun chí ndi, soco vatyi chiñi maa ndi chihin soho ndi tuhun cahán ra, ta chitó vaha ndi vatyi ican ra cuví Cristo ra sacacú chí ñáyiví iyó siqui ñuhu ñáyiví ihya —catyí ñu.

Nu sanduvahá ra Jesús chí sehe noo ra cuví tyiño

⁴³ Cha yahá uvi quiví ta quitá ra Jesús ñuu Samaria cuan ta cuahan ra ityi nu cuví Galilea.

⁴⁴ Vatyi suri maa ra Jesús catyí ra vatyi ñáyiví ñuu noo ra cuví profeta, ra chahá cuenda tuhun cahán Nyoo, ña sahá ñu ñáyiví chí ra.

⁴⁵ Tyicuan ta cuhva cha chaá ra Galilea, ñu iyó yucuan vaha tyiñuhú ñu chí ra, vatyi chahán coyo tucu maa ñu Jerusalén vico cuan, ta nyehe ñu cha vaha cha sacuví ra.

⁴⁶ Tyicuan ta cuanuhu tucu ra Jesús nya ñuu Caná nu cuví Galilea nu sananduví ra vinu chihin ndutya. Ta iyó noo ra cuví tyiño cuenda rey, ta iyó noo sehe ra cha cuhví ñuu Capernaum.

⁴⁷ Quiví cha chito ra cuan vatyi nachaa ra Jesús Galilea cha chahán ra Judea, chahán ra chinyehé ra chí ra, ta chicán ra tumañi iñi chí ra na cuhun ra vehe ra ta sanduvaha ra chí sehe ra, vatyi cha cuñi cuii ri cuví sehe ra.

⁴⁸ Tyicuan ta ra Jesús catyí ra chí ra:

—Nyoho ma chino iñi ndo tatu ma nyehe xihna ndo noo milagru —catyí ra chí ra.

⁴⁹ Soco ra cha vaha cuan catyí ra chí ra Jesús:

—Tata, coho chihin cha numi ri vityin cha ta cuví ca sehi —catyí ra chí ra.

⁵⁰ Tyicuan ta ra Jesús catyí ra chí ra:

—Cuñuhu nya vehun. Sehun cha nduvahá ra —catyí ra chí ra.

Tyicuan ta ra cha vaha cuan chinó iñi ra tuhun cahán ra Jesús ta cuanuhu ra.

⁵¹ Ta cuhva cha cuanachaa ra nya vehe ra, quitá coyo musu ra ta cacatyí ra chí ra:

—¡Cha nduvahá sehun!

⁵² Tyicuan ta quichaha ndaca tuhun ra chí ra ñáá cuhva nduvaha ra. Ta cacatyí ra chí ra:

—Icu cuhva ca ñn cha yahá hora tinyaá cahñi chí ra —cacatyí ra.

⁵³ Tyicuan ta tuví iñi ra cha vaha cuan, vatyi cuhva cuan catyí ra Jesús chí ra, “Cuñuhu vatyi sehun cha nduvahá ra.” Ta maa ra ta tandihí ñáyiví chí ra nachino iñi ñu chí ra Jesús.

⁵⁴ Ican ihya cuví cha cu uvi milagru cha sacuví ra Jesús cha nachaa ra Galilea cha chahán ra Judea.

5

Nu sanduvahā ra Jesús chi noo ra ña cuví caca

¹ Cha yaha tuhun cuan ta ra Jesús cuahan ra Jerusalén inga chaha vatyí ñu ñuu Israel sanducahnu ñu noo vico.

² Ta ñuu cuan iyó noo yuvehe cha nañi Yuvehe Cuenda Mbee. Ta yatyin ri nyaa noo vehe cahnu. Ta chichi vehe cuan ñohó ndutya. Ta cha chihin sahan hebreo nañi chi Betesda. Ta iyó ohon tahan corredor.

³ Ta yucuan cayucu cuaha ñu cuhvi: ñu cuaa, ñu coxo, ta ñu ña cuví nacanda. Canyatú ñu ñáá cuhva nacanda ndutya cuan.

⁴ Vatyí ña naha ña naha ri ta noó noo ángel sanacanda ra ndutya cuan. Ta yóo cha quihvi xihna ca cha yaha nacanda ndutya cuan, nduvaha ñu ñiri maa ñáá ca cuehe ndoho ñu.

⁵ Ta yucuan catuví noo ra cuhvi cha iyó oco chahun uñi cuiya cuhvi ra.

⁶ Cuhva cha nanyehē ra Jesús chi ra catuví ra yucuan, tuví ñiri ra vatyí cha cañi xaan cuiya caá ra tyicuan caa. Ta ndacā tuhun ra chi ra, ta catyí ra:

—¿Atu cuñún nduvahun?

⁷ Ta ra cuhvi cuan nacahan ra ta catyí ra:

—Tata, yori maa tyihi chii chichi tanque tatu cha nacandá ndutya. Vatyí tahan ri cha cuñi quihvi, inga ñu quihvi xihna ca —catyí ra cuhvi cuan chi ra Jesús.

⁸ Tyicuan ta catyí ra Jesús chi ra:

—Ndicuita ta naquehen yuvun ta cacon —catyí ra chi ra.

⁹ Ta caa cuhva ri cuan nduvahā ra, naquehen ra yuvi ra, ta nacaca ra. Soco vatyí quivi nyitatu ñu cuví,

¹⁰ ra cacuví nuu chi ñu Israel catyí ra chi ra cha nduvahā cuan:

—Quivi nyitatu yo cuví vityin, ña tahan chi cuison yuvun —catyí ra chi ra.

¹¹ Ta ra cha nduvahā cuan nacahan ra ta catyí ra:

—Ra cha sanduvahā chii, ican ra catyí chii: “Naquehen yuvun ta cacon”, catyí ra chii.

¹² Tyicuan ta quichaha candaca tuhun ra chi ra, ta catyí ra:

—¿Yóo ra cha catyí chuun vatyí naquehun yuvun ta cacon?

¹³ Soco ra cha nduvahā cuan ña chitó ra yóo cha sanduvahā chi ra. Vatyí cuaha xaan ñáyivi yucuan, ta ra Jesús yori ca ra vatyí cha cuahan ra.

¹⁴ Yaha cuan ta nañihí ra Jesús chi ra chichi vehe ñuhu cahnu, ta catyí ra chi ra:

—Nyehe, vityin cha nduvahun, ma sacuvi con cuatyí, coto ñáá ca cha cahnu ca cuví chuun —catyí ra chi ra.

¹⁵ Tyicuan ta chahan ra chicatyí ra chi ra Israel cuan vatyí ra Jesús cuví ra cha sanduvahā chi ra.

¹⁶ Ta cha cuenda cha sacuvi ra Jesús tyehe caa quivi nyitatu ñu, yucuan chaha cuxaan xaan ra cacuví nuu chi ñu Israel chi ra Jesús. Ta cuñi ra cahni ra chi ra.

¹⁷ Soco ra Jesús catyí ra chi ra:

—Maa Suti, nya vityin ta sahá tyiño ra. Ta yuhu tucu sahá tyiño —catyí ra.

¹⁸ Ta cha cuenda cha chahan ra tuhun ihya, xaan ca cuñi ra Israel cuan. Ta ñihi ca cuñi ra cahni ra chi ra vatyí cuñi maa ra vatyí ña sahá ra ñáyivi quivi nyitatu ñu, ta sin rí tyi sahá ra tuhun tyi ñin ri cuví ra chihin Nyoo vatyí catyí ra tyi sutu ra cuví chi Nyoo.

Sehe Nyoo iyó xaan ityi chi ra cha cunyaca ñaha ra

19 Tyicuan ta ra Jesús catyí ra chi ra:

—Cha ndicha catyí chi ndo vatyí yuhu, cha cuví Sehe Nyoo, ñahri cha savahí cha maa ri mai. Soco sacuví cha nyehí sacuví Suti. Tandihí cha sacuví Suti ta sacuví tucu mai.

20 Vatyí cuñí xaan Suti chii, vatyí Sehe ra cuví chii, yucuan chaha sañahá ra tandihí cha sacuví ra chii. Ta nahnu ca cha cusañaha ra, tacuhva cu iyo cuñí ndo.

21 Tari sanandotó Nyoo Suti chi ndiyí, ta chahá ra ñayiví coo ñu, tyicuan caa tucu yuhu cha cuví Sehe ra, chahí ñayiví chi ñu cuñí mai cuhve.

22 Ta Suti Nyoo ña sandaa ra cuatyí ni noo ñu, soco chi yuhu cha cuví Sehe ra chahá ra ityi na sandai cuatyí ñayiví.

23 Tyicuan caa sacuví Suti Nyoo vatyí cuñí ra tyi sacahnu ñayiví chi Sehe ra tari sacahnú ñu chi maa ra. Ñu ña sacahnú chi yuhu Sehe Nyoo, niri chi Suti ta ña sacahnú ñu. Tyi maa ra tachí ra chi yuhu cha cuví Sehe ra.

24 Ta cha ndicha catyí vatyí ñu tyasohó tuhun cahín ta chinó iñi ñu chi ra cha tachí chii, iyó ñu noo ñayiví chaa cha ma naa ca maa. Ta ma cuhun ca ñu anyaya cha catyí cuatyí ñu vatyí cha sacacú Nyoo añima ñu ndaha tuhun chihí, ta nacuhva ra ñayiví chaa coo ñu.

25 Ñayiví tari cha ndiyí cuví ñu soco cha ndicha catyí chi ndo vatyí vachi chí quiví vatyí cuiñi ñu ndusu Sehe Nyoo. Ta ñu cha quichahá cha cahán ra, cucoo ñu ñayiví cha ma naa ca maa. Ta vityin cuví quiví cha cahín tuhun.

26 Vatyí Nyoo Suti iyó ra ñayiví cha ma naa ca maa. Ta chahá tucu ra ityi chí yuhu cha cuví Sehe ra vatyí cuhve ñayiví coo ñayiví.

27 Ta Nyoo chahá ra vatyí sandai cuatyí ñayiví, vatyí Rayíi cha quichi nya gloria cuví yuhu.

28 Ma iyo cuñí ndo tuhun ihya, vatyí cuchaa chí quiví vatyí ñu ndiyí chichi ñaña cucuiñi ñu ndusu Sehe Nyoo.

29 Ta cuquita coyo ñu chichi ñaña. Ta ñu cha sacuví cha vaha cunandoto ñu vatyí coo ñu noo ñayiví chaa. Soco ñu ña sacuví cha vaha cunandoto ñu vatyí cuhun ñu anyaya nu cutachi tuñi Nyoo chí ñu.

Nu sañahá chi vatyí ra Jesús iyó ityi chí ra cha cuhva ra ñayiví chaa coo ñayiví

30 Yuhu ñima noo tuhun ri mai sacuví ñáá noo cha sacuví. Nyehí cha caá añima ñayiví yoso cuhva catyí Suti. Ta vaha cuhva nyehí vatyí ña sacuví cuhva cuñí mai, soco cuhva cuñí Suti, ra cha tachí chii.

31 Ta tatu suri mai cuví cha ndaa chí mai, ñahri yahví nyaá cha ndaa cuan.

32 Soco iyó inga ra cuví cha ndaa cuenda yuhu. Ta yuhu chité vatyí cha cahán ra cuende yucuan cuví noo cha ndaa ta cha ndicha.

33 Nyoho chindacá tuhun ndo chí ra Juan. Ta tuhun cha cahán ra, ndicha vaha.

34 Soco yuhu ña chiñuhú cha cuví rayíi cha ndaa cuende. Soco catyí tuhun ihya chí ndo cha cuenda cha vaha chí ndo, tacuhva vatyí chino iñi ndo chí ta cacu añima ndo.

35 Ra Juan cuví ra tari noo lámpara cha cayú ta sacundichín. Ta nyoho tahan iñi ndo cusíi iñi ndo nu ndichin ñuhú ra suhva ri quiví.

36 Soco yuhu iyó noo cha ndaa vaha ca cha nuu cha catyí ra Juan. Vatyí tandihí cha sacuví yuhu, maa Suti catyí chí na sacuví. Ta ican cuví cha ndaa cha nyehé ndo vatyí ndicha vatyí maa Suti tachí chí.

37 Ta tyicuan caa tucu Suti, ra cha tachí chí, cuví ra cha ndaa cuende. Nyoho ta cuiñi ca ndo ndusu ra. Ta ni ta nyehe ca ndo chí ra.

38 Ta tuhun ra cha cahín nuu ndo, ña ndoó chi añima ndo vatyí ña chinó iñi ndo vatyí Nyoo tachí ra chíi.

39 Nyoho chihin cuenda xaan sacuaaha ndo nu tutu Nyoo, vatyí cuñí maa ndo vatyí nuu cuan cuanañihi ndo ñayiví chaq cha ma naa ca maa. Soco nu tutu Nyoo cuan, tuhun yuhu cahán chi.

40 Ta nyoho ña cuñí ndo quichi ndo nu nyaí tacuhva vatyí cuhve ñayiví chaq cuan coo ndo.

41 Yuhu ña nduqui nu cuvahi nuu ñáyivi.

42 Vatyí yuhu ñohó nui chi nyoho ta chité vatyí ña cuñí ndo chi Nyoo.

43 Yuhu vachi cuenda Suti ta nyoho ña naquehén ndo tuhun cahín. Soco tatu inga ra vachi ra cuenda maa ra, chí ra cuan nachino iñi ndo.

44 Nyoho ña cuví chino iñi ndo chíi vatyí cuñí ndo cuvaha ndo nu tahan ndo. Ta ña nducú ndo nu cuvaha ndo nuu Nyoo cha noo tuhun ri maa iyó.

45 Ma cuñi ndo vatyí cutyaa yuhu cuatyí chaha ndo nuu Suti. Ra Moisés cuví ra tyaá cuatyí chaha ndo vatyí ña sacuví ndo ley cha tyaq ra. Ta ley ra cuñi maa ndo vatyí cunyaca chi chí ndo andívi.

46 Vatyí tyehe ta chinó iñi ndo tuhun cahán ra Moisés, chinó tucu iñi ndo tuhun cahán yuhu. Vatyí tuhun yuhu ican tyaq ra.

47 Soco tatu ña chinó iñi ndo tuhun cha tyaq ra, ¿yoso caa cuchino iñi ndo tuhun cahán yuhu? —catyí ra Jesús chi ra cacuví nuu chí ñu Israel.

6

Nu chaha ra Jesús cha cachi ohon mil rayii (Mt. 14.13-21; Mr. 6.30-44; Lc. 9.10-17)

1 Cha yaha cuan, ra Jesús cuahan ra inga chiyo miñi cahnu cha nañi Tyañuhu Galilea. Ta suri miñi cuan nañi chí Miñi Tiberias.

2 Cuaha xaan ñáyivi cuahan nyicon chí ra cha cuenda vatyí nyehé ñu milagru cha sacuví ra vatyí sanduvahá ra chí ñu cuhví.

3 Tyicuan ta ra Jesús ndaq ra noo yucu ta chicunyaq ra yucuan chihin ra cachicá noo chihin ra.

4 Ta cha nyaña quívi vico cha nañi pascua cha sanducahnú ñu Israel.

5 Cha nanyehé ra Jesús vatyí cuaha ñáyivi nyicón chí ra, ta quichahaq catyí ra chí ra Felipe:

—¿Yoso caa cusata yo cha cachi tandíhi ñáyivi cuaha ihya? —catyí ra chí ra.

6 Soco catyí ri maa ra chí ra Felipe cha nducú nyehé ra chí ra ñáá catyí ra, vatyí ra Jesús chitó vaha ra ñáá cha cuasacuví ra.

7 Tyicuan ta nacahan ra Felipe ta catyí ra:

—Yahví cha quehen yo cha saha tyiño yo ucha tahan yoo ta ma ñihi sata yo cha cachi ñu chíin chíin —catyí ra Felipe.

8 Ta ra Andrés nonga ra nyicón chí ra Jesús, ta yañi ra Simón Pedro cuví chí ra, catyí ra chí ra Jesús:

9 —Ihya nyaá noo ra cuehe luhlu nyisó cue ohon tahan pan cebada ta uvi tahan tiyaca. Soco ¿nyata cuví ihya ta cuaha ñáyivi ihya? —catyí ra Andrés.

10 Tyicuan ta ra Jesús catyí ra chí ra:

—Catyí ndo chí tandíhi ñu na cunyicu ñu —catyí ra.

Iyó vavaha cuhu yucuan ta chicunyicu ñu ta cha ohon mil rayii, ta siin ri ñusihi chihin ra cuatyaa.

11 Tyicuan ta quehen ra Jesús pan cuan ta cha yaha nacuhva ra tyahví nyoo chí Nyoo, chahaq ra chí ra cachicá noo chihin ra. Ta ra cachicá noo chihin

ra casachá ra chi tandihí ñu canyicú cuan. Suri tyicuan caa sacuví tucu ra chihin tiyaca cuan, chahá ra cachi ñu nyacua nya cha chitu chi ñu.

12 Ta cuhva cha ndaha iñi ñu, ra Jesús catyí ra chi ra cachicá noo chihin ra:

—Ñacoñehe ndo yiquin cha ndoo tacuhva vatyí ñahri cha tiví —catyí ra chi ra.

13 Canacoñehe ra, ta casacutú ra uchi uvi tahan tica chihin yiquin cha ndoo cuan cha cuenda ohon tahan pan cuan.

14 Tyicuan ta cha yahá nyehe ñáyivi cuan milagru cha savahá ra Jesús, ta catyí ñu:

—Ican ndicha cuii ra ihya cuví profeta, ra chahá cuenda tuhun cahan Nyoo cha nyaá cha quichi siqui ñuhu ñayiví ihya —catyí ñu.

15 Soco tuví iñi ra Jesús vatyí cuñí ñu quehen ñu chi ra chihin fuerza vatyí sacuví ñu rey chi ra. Ta cuahan ri ra nu sucun yucu cuan inga chaha vatyí cunyaa notuhun maa ra.

Nu chicá ra Jesús nu ndutya
(Mt. 14.22-27; Mr. 6.45-52)

16 Ta cha cuaa, ta noo coyo ra cachicá noo chihin ra Jesús yuhu miñi cuan.

17 Ta quihví coyo ra chichi canoa ta cuayaha sava ra mahñu miñi cuan vatyí cuchaa ra Capernaum. Cha cuñaa ta ra Jesús suri cha ta ndichi ca ra.

18 Tyicuan ta chaá noo vatyí ñihi. Ta iyo ndicuitá ndutya miñi cuan.

19 Tyicuan ta cha cayahá ra chihin canoa cuan tari noo cha ohon o iñu kilómetro, ta cananyehé ra chi ra Jesús suri chicá ra nu ndutya cuan cuachaa ra nu nyaá canoa cuan, ta canayuhví ra.

20 Soco ra Jesús catyí ra chi ra:

—¡Yuhu cuví, ma yuhví ndo!

21 Tyicuan ta chihin cha casí cuñi ra caquehen cuenda ra chi ra Jesús chichi canoa. Tyicuan ta tañi ri ta cachaá ra yuhu miñi nu cuahan coyo ra.

Nu nanducú ñáyivi chi ra Jesús

22 Tuví inga quiví cuan cha ñaha cuii chitó ñáyivi cha ndoq inga chiyo miñi cuan vatyí ra cachicá noo chihin ra Jesús cuahan coyo ra chihin noo canoa cha iyó cuan. Vatyí noo ri maa iyó. Ta chitó ñu tyi ña cuahan ra Jesús chihin ra.

23 Soco chaá coyo ca canoa cha quitá coyo ñuu Tiberias. Chaá chi yatyin ri ityi nu cachachí ñu pan, yahá cha nacuhvá Sutu Mañi yo tyahví nyoo chi Nyoo.

24 Tyicuan ta cha nanyehé ñu tyi yori ra Jesús yucuan ta ni ra cachicá noo chihin ra, quihví coyo ñu chichi inga canoa cuan ta cuahan ñu nya Capernaum cuananducu ñu chi ra.

Ra Jesús cuví pan cha chahá ñayiví chaa coo yo

25 Cha chaá coyo ñu inga chiyo miñi cuan, nañihí ñu chi ra Jesús. Ta ndaca tuhun ñu chí ra:

—Maestro, ¿ama chaun ihya? —catyí ñu chi ra.

26 Soco ra Jesús catyí ra chi ñu:

—Cha ndicha catyí chi ndo vatyí nyoho nanducú ndo chii soco cha cuenda vatyí chachí ndo nyacua nya cha chitú chi ndo. Soco ñuma vatyí nyehe ndo milagru cha sacuví.

27 Ma saha tyiño ndo cuenda nyayu cha ndihí, soco saha tyiño ndo cuenda nyayu cha ña ndihí ta chahá chi noo ñayiví chaa cha ma naa ca maa coo ndo.

Ican ihya cuví nyayu cha cucuhve chi ndo vatyi Nyoo Suti tyaā tyiño cuan chii vatyi yuhu cuví Rayi cha quichi nya gloria —catyí ra Jesús.

²⁸ Tyicuan ta quichahā ndaca tuhun ñu chi ra ta catyí ñu:

—¿Ñáá cha cuví sacuvi ndi tacuhva sacuvi ndi cuhva cuñí Nyoo? —catyí ñu.

²⁹ Tyicuan ta ra Jesús catyí ra chi ñu:

—Cha cuñí Nyoo cha sacuvi ndo ican cuví ihya: Cha chíno iñi ndo chi yuhu, ra cha tachí ra chí —catyí ra Jesús chi ñu.

³⁰ Ta candacā tuhun tucu ñu chi ra, ta catyí ñu:

—¿Ñáá seña cuhvon chi ndi tacuhva vatyi nyehe ndi ta chino iñi ndi chuun? ¿Ñáá cha cuasacuvun?

³¹ Sutu chahnu ndi chachí ñu maná chiqui ndi nu yori ñáyivi iyó quivi cuan, tari catyí tuhun Nyoo: “Nyoo chahā ra pan cha quichí ityi andivi cachi ñu” —catyí ñu chi ra Jesús.

³² Ta ra Jesús nacahan ra ta catyí ra:

—Cha ndicha catyí chi ndo. Ñima ra Moisés chahā pan cha quichí ityi andivi cachi ñu, soco Nyoo Suti cuví ra chahā pan cha ndicha vaha cha quichí ityi andivi.

³³ Vatyi pan cha chahá Nyoo, ican cuví ra cha noo ityi andivi. Ta ican cuví ra cha chahá noo ñayivi chaa coo ñu iyó siqui ñuhu ñayivi —catyí ra Jesús.

³⁴ Tyicuan ta quichahā cacatyí ñu chi ra:

—Tata, cuhva pan chiña cachi ndi tyicuan ri maa —catyí ñu.

³⁵ Ta nacahan ra Jesús ta catyí ra chi ñu:

—Yuhu cuví pan cha chahá cha conyito añima ndo. Ñu vachi nu nyaí ma cusoco ca añima ñu, ta ñu chino iñi chii ma cu ityi ca maa añima ñu.

³⁶ Soco cha yahā catyí chi ndo vatyi nyoho ña chinó iñi ndo vasi cha nyehé ndo chii.

³⁷ Tandihí ñáyivi cha chahā Nyoo Suti chii, vachi ñu nu nyaí, ta ñu vachi nu nyaí, naquehén cuende chi ñu.

³⁸ Vatyi yuhu quichí ityi andivi soco ñima cha cuenda cha sacuvi cuhva cuñí mai, soco sacuví cuhva cuñí ra cha tachí chii.

³⁹ Ta cuhva cuñí ra cha tachí chii, ican cuví ihya: cha ma sacunai ni noo ñu cha chahá ra chii, tacuhva vatyi sanandote chi ñu nu cuandihí quivi.

⁴⁰ Suti, ra cha tachí chii, cuñí ra vatyi tandihí ñáyivi cha nyehe chi yuhu ra cha cuví Sehe Nyoo, ta chino iñi ñu chii, coo ñu noo ñayivi cha ma naa ca maa. Ta suri yuhu cusanandote chi ñu nu cuandihí quivi —catyí ra Jesús chi ñu.

⁴¹ Cha cuenda cha cahan ra Jesús tyehe caa, ñu Israel quichaha cacahan nyaa ñu chi ra vatyi catyí ra: “Yuhu cuví pan cha quichí ityi andivi”, catyí ra.

⁴² Tyicuan ta quichaha catyí ñu:

—¿Atu ñima ra cuví ra Jesús, sehe ra José vii? Yoó ñohó nuu yo chi sutu ra ta chí sihi ra. ¿Yoso caa cha catyí ra vatyi ityi andivi quichí ra? —catyí ñu.

⁴³ Tyicuan ta ra Jesús catyí ra chi ñu:

—Sandihí ndo tuhun cha cahan nyaa ndo.

⁴⁴ Yori maa ñu quichi nu nyaí tatu ñima Suti, ra cha tachí chii, cana chi ñu. Ta cusanandote chi ñu nu cuandihí quivi.

⁴⁵ Nu libru cha catyaā ra profeta Nyoo ta cha naha catyí chi tyehe caa: “Nyoo cusañaha ra chí tandihí ñáyivi.” Yucuan chaha vatyi ñu cha tyasohó tuhun cahan Nyoo Suti ta cutuhvá ñu tuhun cahan ra, ican ñu vachi nu nyaí.

46 Ñima cha cuenda vatyi nyehé ñu chi Nyoo Suti, vatyi yori nyehé chi ra. Soco noo ri mai nyehé chi ra. Ta iquen cuví ra cha quita nu nyaá ra.

47 Cha ndicha catyí chi ndo vatyi ñu chinó iñi chii coo ñu noo ñayiví chaa cha ma naa ca maa.

48 Yuhu cuví pan cha chahá cha conyito añima ndo.

49 Sutu chahnu ndo chachí ñu maná chiqui ndií cuan, soco suri cachihí ñu.

50 Soco yuhu, tuhun pan cha quichí ityi andiví cahín chihin ndo, vatyi nya ñu cachi pan cuan, ma cúvi añima ñu.

51 Suri mai cuví pan nyitó cha quichí ityi andiví. Yóo cha cachi pan ihya coo ñu tyicuan ri maa. Pan cha cuhva yuhu, ican cuví coño ñuhi. Ta cuhve ñayiví cha cuenda tandihí ñáyiví iyó siqui ñuhu ñayiví —catyí ra Jesús chi ñu.

52 Tyicuan ta ra Israel cuan quichaha candatuhun ra chihin tahan ra ta cacatyí ra:

—¿Yoso caa cuhva ra cha cachi yo coño ñuhu ra?

53 Ta ra Jesús catyí ra:

—Cha ndicha catyí chi ndo, yuhu cuví Rayíi cha quichí nya gloria, ta tatu nyoho ta ma cachi ndo coño ñuhi, ta tatu ma coho ndo niñi, ma cuví coo ndo ñayiví chaa.

54 Ñu chachí coño ñuhi ta chihí ñu niñi, iyó ñu noo ñayiví chaa cha ma naa ca maa. Ta yuhu cusandote chi ñu nu cuandihí quivi.

55 Vatyi coño ñuhi ican cuví pan cha ndicha vaha cha tahán chi cachi ndo, ta niñi cuví vinu cha ndicha vaha cha tahán chi coho ndo.

56 Ñu chachí coño ñuhi ta chihí niñi, ñin ri cuví ñu chihin. Ta mai ñin ri cuví chihin ñu.

57 Suti ra tachí chii, Nyoo nyitó cuví ra. Ta yuhu iyé chihin tunyee iñi ra. Ta suri tyicuan caa tucu ñu chachí coño ñuhi, coo ñu chihin tunyee iñi iyó chii.

58 Tuhun pan cha quichí ityi andiví cahín. Pan ihya ñima tari maná cha chachí sutu chahnu ndo, vatyi suri chihí ñu. Ñu chachí pan cha cuví coño ñuhi, coo ñu tyicuan ri maa —catyí ra Jesús.

59 Ican tuhun ihya sañaha ra Jesús nu ndu ñin ri ñu chichi vehe ñuhu Capernaum.

60 Cuaha xaan ñáyiví nyicón chi ra Jesús. Ta cuhva cha chiñi ñu tuhun ihya catyí ñu:

—Tuhun cha cahan ra ihya, yíi xaan cha natíin cuenda yo. Yori cuví quichaha tuhun cahan ra —catyí ñu.

61 Tyicuan ta tuví iñi ra Jesús vatyi ña cuñí ñu naquehen ñu tuhun cuan. Ta ndaca tuhun ra chí ñu:

—¿Atu quiñi cuñí ndo cha cahín tuhun ihya?

62 Ta ¿yoso caa sacuvi ndo tatu nyehe ndo chi yuhu Rayíi cha quichi nya gloria nandaa xica tiqui inga chaha ityi nu quite quivi xihna ri?

63 Tatyí Ii Nyoo ican cuví cha chahá ñayiví chaa. Coño ñuhu, ña tyinyee chi coo yo ñayiví cuan. Ta tuhun cha cahín chihin ndo, Tatyí Ii Nyoo cuví ta chahá chí cha conyito añima ndo.

64 Soco yihí suhva ndo cha ña chinó iñi ndo chii —tyicuan caa catyí ra Jesús.

Vatyi nya quivi xihna ri ta chitó ra yóo cha ña chinó iñi chi ra ta yóo cha cunaxico tuhun chí ra.

65 Ta catyí ra:

—Yucuan chaha catyí chi ndo vatyi yori ñu cuví quichi nu nyaí tatu ñima Nyoo Suti cana chí ñu —catyí ra Jesús.

66 Nya ndaha quivi cuan cuaha xaan ñu nyicon chi ra Jesús sandoq ñu chi ra. Ta ña chicá noo ca ñu chihin ra.

67 Tyicuan ta ra Jesús ndacaq tuhun ra chi ndihi uchi uvi tahan ra chicá noo chihin ra, ta catyí ra:

—¿Atu cuñi tucu nyoho cuhun ndo? —catyí ra chi ra.

68 Soco nacahan ra Simón Pedro ta catyí ra:

—Sutu Mañi yuhu, ¿yóó chi cunyicon ndi? Ta noo tuhun yoho cahún tuhun ñayivi cha ma naa ca maa coo ndi.

69 Nyuhu chinó iñi ndi, ta ñoho nuu ndi chuun vatyi yoho cuvún ra cuví Cristo Sehe Nyoo nyitó.

70 Ta nacahan ra Jesús ta catyí ra:

—¿Atu ñima yuhu nacachi chi ndi uchi uvi nyoho? Ta noo nyoho cuví cuihna —catyí ra.

71 Tuhun cha cahán ra Jesús ihya, tuhun ra Judas Iscariote sehe ra Simón cuví. Vatyi ra Judas cuví ra cucuhva cuenda chi ra Jesús chi ra xaan iñi chi ra, vasi noo ra cha uchi uvi cuan cuví ra.

7

Nu ña cachinó iñi yañi ra Jesús chi ra

1 Cha yahá tuhun ihya, ta ra Jesús chicá noo ra ityi Galilea. Ña cuñi ra cuhun ra Judea vatyi ra cacuví nuu chi ñu Israel cuan cacuñi ra cacahñi ra chi ra.

2 Ta cha nyaña quivi vico cha sanducahnu ñu Israel ndi cuiya ri. Ta nañi chi vico Tabernáculo.

3 Yucuan chaha yañi ra Jesús cacatyí ra chi ra:

—Ma ndoun ihya. Cuahan Judea tacuhva vatyi ñu naquehén tuhun cahún cha nyicú yucuan nyehé ñu tyiño cha sacuvún.

4 Vatyi tatu cuñi yo cha cohon nuu ñáyivi chi yo, ma xehe ri sacuví yo cha sacuví yo. Ta yoho tatu ndicha cha sacuvún tuhun ihya, sacuvi nuu tandihi ñáyivi —cacatyí yañi ra chi ra.

5 Tyicuan caa cacatyí ra vatyi ni yañi ra ta ña chinó iñi ra chi ra.

6 Tyicuan ta ra Jesús catyí ra chi ra:

—Ta chaa ca cuhva cha cuhun yuhu. Soco nyoho savahri quivi cuví cuhun ndo.

7 Vatyi ñáyivi ña cutasi cuñi ñu nyehé ñu chi ndo, soco chi yuhu tasi cuñi ñu nyehé ñu cha cuenda vatyi cachi ri catyí chi ñu vatyi ña vaha cha nyacuví ñu.

8 Cuahan nyoho vico cuan. Yuhu ma cuhin vatyi ta chaa ca cuhva cha tahán chi cuhin —catyí ra.

9 Yahá cuan ta ndoq ra nya Galilea.

Nu ñohó ra Jesús vico Tabernáculo

10 Cha yahá cuahan coyo yañi ra Jesús, cuahan tucu maa ra vico cuan, soco xehe ri.

11 Ta ra cacuví nuu chi ñu Israel cananducú ra chi ra vico cuan, ta cacatyí ra chi ra tahan ra:

—¿Nya nyaá ra cuan? —catyí ra.

12 Ta ñáyivi ñohó vico cuan cacahán ñu tuhun ra. Ta yihí ñu catyí ñu: “Noo ra vaha cuví ra.” Ta inga ñu catyí ñu: “Ña vaha ra, sandavi ñaha ra chi ñáyivi”, catyí ñu.

13 Soco yori cahán ndichin tuhun ra cha cuenda cha yuhví ñu chi ra cacuví nuu cuan.

14 Cha cusava iyó vico ta quihv̄i ra Jesús chichi vehe ñuhu cahnu quichah̄a cahan ra nuu ñáyivi.

15 Ta ra cacuvi nuu cuan iyó cacuñi ra ta cacatyí ra chi ra tahan ra:

—¿Yoso caa chitó ra ihya ta ña sacuah̄a ra? —catyí ra.

16 Ta nacahan ra Jesús ta catyí ra:

—Tuhun cha sañahí, ñima cha cuenda mai cuví, soco cuenda ra cha tach̄i chii cuví.

17 Tatu yihí nyoho cha cuñi ndo sacuvi ndo cuhva cuñi Nyoo, cua coto ndo vatyí cuenda Nyoo sacote ta ñima cha cuenda mai.

18 Ra cha cahán cuenda maa, cahán ra na sacahnu ñáyivi chi ra. Soco ra nanducú cha sacahnu ñu chi Nyoo, ra cha tach̄i chi ra, ícan ra cuan cahán cha ndicha. Ta ñahri cha sandaví ñaha ra.

19 ¿Atu ña ndicha vatyí ra Moisés chah̄a ley chi ndo? Soco ni noo nyoho ña quichah̄a ndo ley cuan. ¿Ñáa tuhun cuñi ndo cahñi ndo chii? —catyí ra.

20 Ta nacahan ñáyivi ta catyí ñu chi ra:

—Noo tatyí ña vaha yihí chi yoho. Yori cuñi cahñi chuun —catyí ñu chi ra.

21 Ta catyí ra Jesús:

—Cha catyí noo milagru cha sacuvi quivi nyitatu yo, iyo xaan cuñi nyoho.

22 Soco ra Moisés catyí ra chi ndo vatyí sacuvi ndo costumbre circuncisión. Vasi ñima ra quichah̄a chihin tuhun cuan, soco ñáyivi chi ra ityi chata, casacuvi tyicuan caa. Yucuan chaha nyoho sacuvi ndo costumbre cuan vasi tahán chi quivi nyitatu yo.

23 Ta vityin, vaha tatu cha cuenda cha ña cuñi ndo nacahnu ndo ley ra Moisés sacuvi ndo tyicuan caa vasi quivi nyitatu yo tahán chi. Soco tatu tyicuan caa sacuvi ndo, ¿ñáa tuhun cha cuxaan ndo chii cha cuenda vatyí sanduvah̄i nanii coño ñuhu noo ra cuan quivi nyitatu yo?

24 Ma tyaa ndo cuatyí siqui ñáyivi tatu ña chitó vaha ndo ñáa cha sacuvi ñu. Cuatu ndo nya nyehe vaha ndo, tyicuan ta cucoto ndo yoso caa sacutuñi ndo chihin cha ndaa ta chihin cha ndicha vaha.

Nu cahán ra Jesús tuhun maa ra

25 Tyicuan ta suhva ñu iyó Jerusalén, quichah̄a ndaca tuhun ñu:

—¿Atu ñima chi ra ihya canducu ra cha cahñi ra?

26 Ta maa ra nanyaá cuan cahán ra nuu ñáyivi. Ta yori maa catyí ñáa cha catyí chi ra. ¿O vasi ca chinó tucu iñi ra cacuvi nuu vatyí ra ihya ra Cristo ra cuví rey cha saquichi Nyoo cuví ra?

27 Soco yoó chitó yo nya quit̄a ra ihya. Soco quivi quichi ra Cristo yori coto nya ityi quichi ra cuan —catyí ñu.

28 Chitó ra Jesús tuhun cha ndatuhún ñu ihya cuhva cha sañahá ra chichi vehe ñuhu. Ta ñihi cahán ra ta catyí ra:

—¡An ñohó nuu ndo chii ta chitó ndo nya ityi quichi, cuñi maa ndo! Soco yuhu vachí soco ñima cuenda mai. Vachí cuenda ra cha tach̄i chii, ra cha cuví cha ndicha. Ta nyoho ña ñohó nuu ndo chi ra.

29 Yuhu ñohó nui chi ra vatyí cuenda ra vachi, ta maa ra tach̄i chii —catyí ra Jesús.

30 Tyicuan ta cuñi ñu tyihi ñu chi ra chichi vehe caa. Soco ni noo ñu ña t̄in ñu chi ra cha cuenda vatyí ta chaa ca quivi cha tahán chi t̄in ra chi ra.

31 Soco cuaha xaan ñu chinó iñi chi ra. Ta catyí ñu:

—Ícan ra ihya cuví Cristo. ¿Atu cuaha ca milagru sacuvi inga ra tatu quichi ra? —catyí ñu.

Nu tachi ra cuví fariseo policia cuquehen chi ra Jesús cohon ra vehe caa

32 Cha chiñi ra fariseo cha cahán ñáyivi tuhun ra Jesús, maa ra ta ra cacuví nuu chi tata sutu catachi ra chi policia cuenda vehe ñuhu cuan cuquehen ra chi ra tyi cohon ra vehe caa.

33 Tyicuan ta ra Jesús catyí ra:

—Cunyai chihin ndo suhva ri ca quivi. Yahá cuan ta cunuhi nu nyaá ra cha tachi chií.

34 Nyoho cunanducu ndo chii. Soco ma nañihi ndo chii. Vatyí ma cuví cuhun ndo nu cuacunyai —catyí ra Jesús.

35 Tyicuan ta quichaha candaca tuhun ra cacuví nuu chi ñu Israel chi ra tahan ra:

—¿Nya cuhun ra ihya cha ma nañihi yo chi ra? ¿O cuhun ra nu nyaá ra Israel cha ca iyó ñuu Grecia vatyí sañaha ra chi ñu iyó yucuan, vaha?

36 ¿Ñáá cha cuñi chi catyí tuhun cahan ra chihin yo? Vatyí catyí ra: “Cuananducu ndo chii soco ma nañihi ndo chii. Vatyí ma cuví cuhun ndo nu cucunyai” —tyicuan caa cacuví yuhu ra tuhun ra.

Ñu chinó iñi chi Nyoo cucohon Tatyí Ii ra añima ñu

37 Quivi nu ndihi chiyo vico, yucuan quivi cha niñi ca. Ta quivi cuan ndicuita ra Jesús ta ñihi cahán ra ta catyí ra:

—Tatu nya noo ndo ityi añima ndo tuhun Nyoo, ñaha ndo ta nachino iñi ndo chii.

38 Ñu cha chinó iñi chii, chichi añima ñu cucono tari noo yuvi ndutya cha nyitó, tari cuhva catyí nu tutu Nyoo —catyí ra Jesús.

39 Soco chihin cuan cuñi ra catyí ra vatyí ñu chinó iñi chi ra cunaquehen ñu Tatyí Ii Nyoo, vatyí quivi cuan ta quichi ca Tatyí Ii Nyoo vatyí ra Jesús, ta cunuha ca ra nya gloria nu cusacahnu Sutu ra chi ra.

Nu cusijn ñáyivi cha ña tahan iñi tuhun cahan ra

40 Suhva ñáyivi cha chiñi ñu tuhun ihya, catyí ñu:

—Ndicha vatyí ra ihya profeta Nyoo cha nyaá quichi cuví ra —catyí ñu.

41 Ta inga ñu catyí ñu:

—Ican ra cuví Cristo —catyí ñu.

Soco inga ñu catyí ñu:

—¿Yoso caa cha ra Galilea cuví ra Cristo?

42 Vatyí nu tutu Nyoo catyí chi vatyí ra Cristo cucuvi ra ñáyivi vachi tata rey David ta ra ñuu Belén cucuvi ra tari ra David —catyí ñu.

43 Tyicuan ta ñáyivi cuan canatahvj sava ñu cha cuenda ra Jesús.

44 Yihí ñu cuñi ñu quehen ñu chi ra cutyihí ñu chi ra chichi vehe caa. Soco yori tin chi ra.

Ra cacuví nuu vehe ñuhu ña cachinó iñi ra chi ra Jesús

45 Tyicuan ta policia vehe ñuhu cahnu cuan, cuanuhu coyo ra nu nyicú ra fariseo ta ra cuví nuu chi tata sutu. Ta candaca tuhun ra chi policia cuan ta cacatyí ra:

—¿Ñáá tuhun ña quehen ndo chi ra?

46 Ta policia cuan cacatyí ra:

—Ni noo chaha ta ni yori tuhva cahan tari cahán ra cuan! —cacatyí ra.

47 Tyicuan ta ra fariseo catyí ra chi policia cuan:

—¿Atu sandaví ñaha ndihi ra chi nyoho ñandihí?

⁴⁸ ¿Nyehé ndo vatyi ni noo ra cuví nuu chi ndi cha cuví ndi fariseo ta ña chinó iñi chi ra cuan?

⁴⁹ Soco maa ri ñáyivi cha ña chitó nyicón chi ra. Soco ña vaha ñu nuu Nyoo —catyí ra.

⁵⁰ Tyicuan ta ra Nicodemo, ra cha chahan nu nyaá ra Jesús cha cha cuaa, cuví ra noo ra fariseo, ta catyí ra chi ra:

⁵¹ —Catyí ley vatyi ma cuví tachi tuñi yo chi noo ra tatu ma cuiñi xihna yo tuhun cahan ra, tacuhva coto yo ñáá cha sacuvi ra —catyí ra chi ra.

⁵² Tyicuan ta canacahan ra ta cacatyí ra chi ra:

—¿Atu suri ra Galilea cuví tucu yoho? Sacuaha nu tutu Nyoo ta nyehun, vatyi ni noo ra chahá cuenda tuhun cahan Nyoo ta ña nyaá chi cha quichi ra ityi Galilea —cacatyí ra.

Ñaha sihi cha natuvi chihin rayi ta iyó yí ña

⁵³ Tyicuan ta tahan tahan ra cuanuhu coyo ra vehe ra.

8

¹ Soco ra Jesús cuahan ra yucu cha nañi Olivo.

² Ta cha inga quivi cuhva cha vachi cundichin, cuahan tucu ra inga chaha vehe ñuhu cahnu. Ta tandihi ñáyivi tuhva ñu nu nyaá ra. Ta maa ra chicunyaá ra ta quichaha cahan ra nuu ñu.

³ Tyicuan ta ra sacuahá cuenda ley ta ra cuví fariseo chaá coyo ra chihin noo ñaha iyó yí vatyi natin ra chi ña nu cuatyí ña chihin inga rayi. Ta cuatyaa ra chi ña mahñu ñáyivi nyicú cuan.

⁴ Ta quichaha cacatyí ra chi ra Jesús:

—Maestro, ñaha sihi ihya natin ndi chi ña nu cuatyí ña chihin inga rayi.

⁵ Ta ley cha tyaa ra Moisés catyí chi vatyi nacahñi yo chihin yuu chi ñusihi cha sacuvi tyehe caa. ¿Ta yoho, yoso caa cuyun vityin? —catyí ra chi ra.

⁶ Cacatyí ra tuhun ihya chi ra Jesús cha cuenda cha nducú nyehe ra chi ra tacuhva tyaa ra noo cuatyí siqui ra. Tyicuan ta ra Jesús chicunyaá tyayí ra nu ñuhú ta quichaha tyaa ra letra nu ñuhú chihin nundaha ra.

⁷ Soco vatyi candacá tuhun ca ra chi ra, tyicuan ta nicuinanyaá ra ta catyí ra chi ra:

—Xihna ca nyoho cha ñahri cuatyí ndo quehen ndo yuu ta cañi ndo chi ña —catyí ra chi ra.

⁸ Ta nicunyaá tucu ra ta quichaha sañihi ra tyaa ra letra nu ñuhú.

⁹ Soco maa ra cha cachñi ra tuhun ihya, tuvi iñi ra tyi iyó tucu cuatyí maa ra. Ta quichaha quita coyo tahan tahan ri ra, quichaha xihna ca ra chahnu. Ta cuhva cha ndihi ra quita coyo ta ndoo noo tuhun ca maa ra Jesús chihin ñaha sihi cuan mahñu nu nyicu ñáyivi.

¹⁰ Tyicuan ta nicuinanyaá ra Jesús ta nyehe ra tyi cha cuahan coyo ra cuan ta ndoo noo tuhun ri ca ñaha. Tyicuan ta catyí ra chi ña:

—¿Nya nyaá ra tyaa cuatyí sicun vityin? ¿Yori ni minoo ca ra cuñi cahñi chuun? —catyí ra chi ña.

¹¹ Ta nacahan ña ta catyí ña:

—Ni nonga ra, Tata.

Tyicuan ta ra Jesús catyí ra chi ña:

—Ni yuhu ta ma cahñi chuun. Cuahan vityin. Ta ma sacuvi con cuatyí —catyí ra chi ña.

Ra Jesús cuví cha ndichin cha sandichin añima ñáyivi

12 Tycuan ta caḥan tucu ra Jesús nuu ñáyivi inga chaha, ta catyí ra chi ñu:
—Yuhu cuví ra cha sandichin añima ñáyivi iyó siqui ñuhu ñayivi. Yóo cha nyicón chii, coo ñu noo ñayivi chaa nu ndichin. Ta ma caca noo maa ñu nu ñaa iñi —catyí ra Jesús chi ñu.

13 Tycuan ta ra cacuví fariseo cacatyí ra chi ra:

—Yoho, cahún tumañi iñi cuenda maun. Ta yucuan ña ndicha —catyí ra chi ra.

14 Nacahan ra Jesús ta catyí ra:

—Vasi suri mai cahín tumañi iñi cuende, soco ndicha cha cahin vatyi yuhu chité nya ityi quichí ta nya ityi cuahín. Soco nyoho ña chitó ndo nya ityi quichí ni nya ityi cuahín.

15 Nyoho yatyiñ xaan cahan ndo cha caa ñáyivi. Soco yuhu, yori chi cahin cha caa.

16 Soco tatu catyi cha caa ñáyivi, catyí cha ndicha. Vatyi ñima noo ri mai nyehí, soco Suti ra cha tachi chii, ican ra nyehé chihin.

17 Nu ley nyoho nyaá vatyi tatu uvi ra chaha cha ndaa, cuñi chi chinó iñi yo cha ndaa cuan.

18 Ta vityin vaha, suri mai cuví cha ndaa cuenda mai. Ta Suti, ra cha tachi chii, cuví inga cha ndaa —catyí ra Jesús chi ra.

19 Tycuan ta candacā tuhun ra chi ra:

—¿Nya nyaá sutun?

Ta ra Jesús catyí ra:

—Nyoho ña ñohó nuu ndo chi yuhu. Ta ni chi Suti ña ñohó nuu ndo. Tyehe ta ñohó nuu ndo chii, cohon nuu ndo chi Suti —catyí ra.

20 Tuhun ihya caḥan ra Jesús cha ni ri ca cha sañahá ra chichi vehe ñuhu cahnu, nu nyaá caja nu tyihí ñáyivi xuhun. Soco yori tyihí chi ra vehe caa, vatyi ta chaa ca quivi cha tahán chi cohon ra.

“Nu cahun yuhu ma cuvi cahun ndo”, catyí ra Cristo

21 Ra Jesús catyí ra chi ra cacuví fariseo inga chaha:

—Yuhu cuhin, ta nyoho cunanducu ndo chii, soco cucúvi ndo ta cundoo cuatyí ndo siqui ndo. Nu cuahan yuhu, nyoho ma cuvi cahun ndo —catyí ra Jesús chi ñu.

22 Tycuan ta ra cacuví nuu chi ñu Israel cacatyí ra:

—¿Atu cucahñi maa ra chi ra? vatyi catyí ra vatyi ma cuvi cahun yo nu cuahan ra —cacatyí ra.

23 Tycuan ta ra Jesús catyí ra:

—Nyoho ra cuenda ityi yuvi ihya cuví ndo. Soco yuhu ra cuenda ityi siqui cuví. Nyoho ñu ñuhu ñayivi ihya cuví ndo. Soco yuhu ñima ra ñuhu ñayivi ihya cuví.

24 Yucuan chaha catyí chi ndo vatyi cucúvi ndo ta cundoo cuatyí ndo siqui ndo. Vatyi tatu ña chinó iñi ndo cha yuhu cuví ra tinyaá cuatyí ndo, cundoo cuatyí ndo siqui ndo quivi cúvi ndo —catyí ra Jesús chi ra.

25 Tycuan ta quichaha candacā tuhun ra chi ra, ta catyí ra:

—¿Yóo ra cuví yoho?

Ta ra Jesús nacahan ra ta catyí ra:

—Cha yaha catyi chi ndo nyata quivi xihna ri.

26 Cuaha xaan ca cha nyaá cha catyi chi ndo, ta cuaha xaan ca nyaá catyi cha caá ndo. Soco tuhun cha catyí yuhu chi ñáyivi iyó siqui ñuhu ñayivi, tuhun

cha chiñi cha cahán ra cha tachj chii cuví. Ta maa ra cahán ra cha ndicha —catyí ra.

²⁷ Soco maa ra cacuví nuu chi ñu Israel ña cutuñi iñi ra vatyi tuhun Nyoo Sutu yo cahán ra chihin ra.

²⁸ Yucuan chaha catyí ra chi ra:

—Cutyaa ndo chi ra cuví Rayi chaha quichi nya gloria nu cruzi. Tyicuan ta cunacoto ndo vatyi yuhu cuví, ta cucoto ndo vatyi tyiño sahí ñima cha cuenda mai sacuví, soco cahán cha sañahá Suti chii.

²⁹ Vatyi Suti, ra cha tachj chii, nyaá ra chihin. Ta ña sandoó ra chii cha maa ri mai. Vatyi yuhu tyicuan ri sacuví cuhva cuñi ra —catyí ra Jesús.

³⁰ Cha cahán ra Jesús tuhun ihya, cuaha ra quichaha chino iñi ra chi ra.

Ñu cha cuví Sehe Nyoo ta ñu cha sacuví cha quiñi caa

³¹ Tyicuan ta catyí ra Jesús chi ra cacuví nuu chi ñu Israel cha chinó iñi chi ra:

—Tatu nyoho ta sañihi ca ndo sacuví ndo cuhva sañahí chi ndo, cuchaa ndo cuví ndo noo ñu yihí cuende.

³² Ta cucoto ndo cha ndicha. Ta chihin cha ndicha cuan cundoo ndo libre —catyí ra.

³³ Ta canacahán ra ta catyí ra:

—Nyuhu ñáyivi vachi tata ra Abraham cuví ndi. Ta ni noo chaha ta cuví ca ndi musu chi ni noo ñáyivi. ¿Yoso caa cha catyí yoho tyi ndoo ndi libre? —catyí ra chi ra.

³⁴ Ta ra Jesús catyí ra:

—Cha ndicha catyí chi ndo vatyi tandihí ñu sacuví cha quiñi caa, musu cuenda cha quiñi caa cuví ñu.

³⁵ Noo musu ña nyaá ra veye chitoho ra tyicuan ri. Soco noo sehe ra cuví chitoho cuan, nyaá ra tyicuan ri chihin sutu ra.

³⁶ Yucuan chaha tatu yuhu cha cuví Sehe Nyoo ta tave chi ndo ndaha ra ña vaha, ndicha cuñi cucoo ndo libre.

³⁷ Cha chité vatyi ñáyivi chi ra Abraham cuví chi ndo. Soco yihí ndo cuñí ndo cahñi ndo chii, vatyi ña tñn cuenda ndo tuhun cahin.

³⁸ Yuhu cahín cha sañahá Suti chii. Ta nyoho sacuví ndo cha catyí sutu ndo chi ndo —catyí ra chi ra.

³⁹ Ta canacahan ra ta catyí ra:

—Sutu ndi cuví chi ra Abraham —catyí ra.

Soco ra Jesús catyí ra chi ra:

—Tyehe ta ndicha cha sehe ra Abraham cuví chi ndo, sacuví ndo cha sacuví ra.

⁴⁰ Soco nyoho, vasi catyí chi ndo cha ndicha cha sañahá Nyoo chii, nyoho cuñí ndo cahñi ndo chii. ¡Ra Abraham ña sacuví ra cha tyicuan caa!

⁴¹ Nyoho tari sacuví sutu ndo, sacuví ndo —catyí ra chi ra.

Tyicuan ta nacahan ra ta catyí ra:

—Nyuhu ñima sehe ndahvi ñu cuví chi ndi. Iyó noo ri sutu ndi ta ican ra cuví Nyoo —catyí ñu.

⁴² Tyicuan ta ra Jesús catyí ra:

—Tyehe ta ndicha cha Nyoo cuví sutu ndo, nyoho cuñí ndo chii. Vatyi yuhu quite nu nyaá ra ta chaj nyehe. Ña vachí cuenda mai, soco Nyoo tachj chii.

⁴³ ¿Ñáá tuhun cha ña cutuñi iñi ndo tuhun cha catyí chi ndo? Cha cuenda tyi ña cuñí ndo tyasohó ndo tuhun cahín.

44 Cuihna ican ra cuví sutu ndo. Ta sehe ra cuví chi ndo. Ta cuñí ndo sacuvi ndo cuhva cuñí ra. Ra chahñí ñáyiví cuví cuihna nyata quiví xihna ri. Ni noo chaha ña sacuví ra cha ndicha. Ta ni noo chaha ña cahán ra cha ndicha. Cuhva cha cahán ra cuendu, cahán ra cuhva caá ra, vatyi cuendu ra. Ta sutu ñu cuendu cuví chi ra.

45 Ta yuhu vatyi cahín cha ndicha, ña chinó iñi ndo chii.

46 ¿Nya noo nyoho cuví catyi ndo vatyi yuhu iyó noo cuatyí? Ni noo ndo. Ta cha tyicuan caa cahín cha ndicha, ¿ñáá tuhun cha ña chinó iñi ndo chii?

47 Ñu cuenda Nyoo tyasohó ñu tuhun cahán Nyoo. Soco vatyi nyoho ñima ñu cuenda Nyoo cuví ndo, yucuan chaha ña cuñí ndo tyasoho ndo tuhun cahín —catyi ra Jesús.

Ra Cristo, nyata nicumañi coo ra Abraham, ta cha iyó ra

48 Tyicuan ta ra cacuvi nuu chi ñu Israel cacatyí ra chi ra:

—¿Atu ña ndicha vatyi yoho ra ñuu Samaria cuvún, ta ñohó noo tatyí ña vaha chuun? —cacatyí ra chi ra.

49 Ta nacahañ ra Jesús ta catyi ra:

—Ñahri tatyí ña vaha ñohó chi yuhu. Chi Suti sacahní. Ta nyoho cahán ña vaha ndo siqui.

50 Yuhu ña nanduquí nu sacahnu ñáyiví chii, soco iyó noo ra nanducú cha sacahnu ñu chii. Ta maa ra cunyehe ra tatu sacahnú ndo chii.

51 Cha ndicha catyi vatyi ñu quichahá tuhun cahín ma chaa tuhun chihi añima ñu —catyi ra Jesús chi ra.

52 Tyicuan ta ra Israel cuan canacahañ ra ta catyi ra:

—Vityin chitó vaha ndi vatyi yihí noo tatyí ña vaha chuun. Vatyi ra Abraham ta tandihí ra cuví profeta Nyoo cachihí ra. Ta yoho catyún vatyi ñu quichahá tuhun cahún ma cúvi maa ñu.

53 ¿Atu cahnu ca ra cuví yoho ican saha sutu ndi ra Abraham? Maa ra chihí ra ta ra cuví profeta Nyoo ñandihí. ¿Yóó ra cuví yoho cuñí maun? —catyi ra chi ra.

54 Ta nacahañ ra Jesús ta catyi ra:

—Tatu suri mai sacahní chii, ñahri maa vale cuan. Soco ra sacahnú chii, ican cuví Suti. Ta suri maa ra cuví cha catyi nyoho tyi Nyoo cuenda ndo cuví chi ra.

55 Soco nyoho ña ñohó nuu ndo chi ra. Yuhu, ñohó nui chi ra. Ta tatu catyi tyi ña ñohó nui chi ra, cuví noo ra cuendu tari nyoho. Soco yuhu ndicha cha ñohó nui chi ra, ta quichahí tuhun cahán ra.

56 Ra Abraham sutu chahnu ndo cusíi xaan cuñí ra vatyi cunyehe ra quiví quichí yuhu siqui ñuhu ñáyiví. Ta nyehe ra ta cusíi xaan cuñí ra —catyi ra Jesús chi ñu.

57 Tyicuan ta ra Israel cuan cacatyí ra chi ra Jesús:

—Ni uvi xico uchi cuiya ta quita con, ta catyún tyi nyehun chi ra Abraham.

58 Ta ra Jesús nacahañ ra ta catyi ra:

—Cha ndicha catyi chi ndo vatyi nyata ni cumañi coo ra Abraham ta cha iyó yuhu —catyi ra Jesús chi ra.

59 Tyicuan ta quehen ra yuu vatyi cañi ra chi ra Jesús. Soco maa ra quihví xehe ra, ta quitá ra chichi vehe ñuhu cuan. Ta yahá ra mahñu ra ta cuahan ra.

9

Nu sanduvahā ra Jesús chi noo ra cha cuaa nyata cacu

¹ Cuhva cha yahā ra Jesús noo nu yahā ra, nyehe ra chi noo ra cha cuaa nyata cacu.

² Ta quichahá ndaca tuhun ra cachicá noo chihin ra Jesús chi ra:

—Maestro, ¿ñáá tuhun cha cacu cuaa ra ihya? ¿Atu cha cuenda cuatyí sihi ra ta sutu ra, o cha cuenda cuatyí maa ra? —cacatyí ra chi ra.

³ Ta ra Jesús nacahan ra ta catyí ra:

—Ñima cuatyí maa ra, ta ni ñima cuatyí sihi ra ta sutu ra. Soco cha cuenda vatyí cuví sañaha Nyoo tunyee iñi ra chihin ra.

⁴ Cha ni ri ca cha ñicahñu, cuñí chi cha sacuvi tyiño ra cha tachí chii. Vatyí vachi cha cuaa cha ma cuví ca saha tyiño yo.

⁵ Cha ni ri ca cha nyaí siqui ñuhu ñayivi ihya, ñuhu ndichin cuenda ñáyivi iyó siqui ñuhu ñayivi cuví.

⁶ Cha yahā cha catyí ra Jesús tuhun ihya, ta tyicu sii ra nu ñuhú. Ta savahā ra chiin nyahyu chihin sii ra ta tyaa ra chiti nuu ra cuaa cuan.

⁷ Tyicuan ta catyí ra chi ra:

—Cuahan cuanacatyá nuun nya tanque Siloé cuan. —Sivi cuan cuñí chi catyí: “Tachí Chuun.”

Tyicuan caa ta ra cuaa cuan chahan ra chinacatyá ra nuu ra. Ta cuhva cha nachaa ra, cha nyehe ra.

⁸ Tyicuan ta ñu nyicú yatyin yuvehe ra, ta ñu cha nyehe chi ra cha cucuaa ra ta caya ra, catyí ñu:

—¿Atu ñima ra ihya cuví cha tuhva chinyaa chican caridaa? —catyí ñu.

⁹ Yihí ñu catyí ñu:

—Ican ra.

Inga ñu catyí ñu:

—Ñima ra cuví ra, soco ndacú xaan ra chi ra.

Soco maa ra catyí ra:

—Ican yuhu cuví —catyí ra.

¹⁰ Tyicuan ta quichaha candaca tuhun ñu chi ra:

—¿Ta yoso caa cha cuví nyehun vityin? —catyí ñu.

¹¹ Ta catyí ra:

—Ra cha nañi Jesús cuan, ican savahā nyahyu ta tyaa ra chiti nui ta catyí ra chii: “Cuahan nya tanque Siloé ta nacatyon nuun.” Tyicuan ta chahin. Ta cha yahā nacatye nui ta nanyehi —catyí ra chi ñu.

¹² Tyicuan ta quichahá ndaca tuhun ñu chi ra:

—¿Nya nyaá ra cuan vityin?

Ta maa ra catyí ra:

—Ña chité —catyí ra chi ñu.

Nu casanahmā ra cuví fariseo chi ra cha cucuaa ta nanyehé

¹³ Tyicuan ta chinyaca ñu chi ra cha cucuaa cuan nuu ra cuví fariseo.

¹⁴ Vatyí quivi cha savahā ra Jesús nyahyu ta sanduvahā ra chi ra cha cucuaa cuan, quivi nyitatu yo cuví.

¹⁵ Yucuan chaha ra fariseo candaca tuhun tucu ra chi ra yoso caa cha vatyí nanyehé ra. Ta maa ra catyí ra:

—Tyaa ra nyahyu chiti nui, ta nacatye ta vityin ndichin nyehi —catyí ra chi ra.

¹⁶ Tyicuan ta suhva ra fariseo cacatyí ra:

—Ra cha sacuví tyehe caa ñima ra cuenda Nyoo cuví ra, vatyí ña sahá ra ñáyivi quívi nyitatu yo —cacatyí ra.

Soco inga ra cacatyí ra:

—¿Yoso caa cha cuví sacuví ra milagru ihya tatu ra iyó cuatyí cuví ra? —catyí ra.

Ta s̄in s̄in cha cacahan ra. Ta cacus̄in ra.

¹⁷ Ta candacā tuhun tucu ra inga chaha chi ra cha cucuaā cuan, ta catyí ra chi ra:

—¿Ta yoho, ñáá catyún cuenda ra cha sanduvahā chiti nuun? —catyí ra.

Ta nacahan ra ta catyí ra:

—Yuhu catyí vatyí noo profeta cuenda Nyoo cuví ra —catyí ra.

¹⁸ Soco ra cacuví nuu chi ñu Israel ña cuñí ra chino iñi ra cha cucuaā ra cuan ta vityin nyehé ra. Ta nyacua nya cha cacanā ra chi sihi ra ta chi sutu ra cha nduvahā cuan.

¹⁹ Ta candacā tuhun ra chi ñu, ta catyí ra:

—¿Atu ican ra ihya cha cuví sehe ndo cha catyí ndo tyi cuaá ra ta cacú ra? ¿Yoso caa cha cuví nyehe ra vityin? —catyí ra.

²⁰ Ta nacahan sutu ra ta sihi ra ta catyí ñu:

—Chitó ndi vatyí ican ra ihya cuví sehe ndi. Ta cuaá ra nyata cacú ra.

²¹ Soco ña chitó ndi ñáá tuhun cha cuví nyehe ra vityin. Ta ni ña chitó ndi yóo cha sanduvahā chiti nuu ra. Ndacā tuhun ndo chi maa ra. Cha iyó cuiya ra. Ta cuví nacatyí maa ra chi ndo —catyí ñu chi ra.

²² Sutú ra sihi ra catyí ñu tyehe caa cha cuenda cha yuhví ñu chi ra cacuví nuu chi ñu Israel, vatyí cha catyihí tahan ra tuhun vatyí cutava ñehe ra chi ñu vehe ñuhu, yóo ri ñu cha catyí vatyí ra Jesús cuví Cristo.

²³ Yucuan chaha catyí ñu: “Cha ñihi ra. Ndacā tuhun ndo chi maa ra.”

²⁴ Tyicuan ta canacanā tucu ra chi ra cha cucuaā cuan inga chaha. Ta cacatyí ra chi ra:

—Chihin nuu Nyoo catyí cha ndicha chi ndi. Vatyí nyuhu chitó ndi tyi raȳi cuan, ra iyó cuatyí cuví ra —cacatyí ra.

²⁵ Tyicuan ta nacahan ra cha cucuaā cuan ta catyí ra:

—Yuhu ña chité tatu ra iyó cuatyí cuví ra, o ñima. Soco noo ri cha chité vatyí yuhu cucuāi, ta vityin ndichin nyehí —catyí ra.

²⁶ Ta candacā tuhun tucu ra chi ra inga chaha ta catyí ra:

—¿Ñáá cha sacuví ra chuun? ¿Yoso caa sacuví ra ta nanyehún? —cacatyí ra chi ra.

²⁷ Ta catyí ra:

—Cha catyí chi ndo, ta ña quichahá ndo chii. ¿Ñáá tuhun cha cuñí ndo cha catyí inga chaha? ¿Atu cuñí tucu nyoho cunyicon ndo chi ra?

²⁸ Tyicuan ta cacahan ra chi ra, ta catyí ra:

—Yoho yihún cuenda ra, soco nyuhu cuenda ra Moisés yihí ndi.

²⁹ Nyuhu chitó ndi tyi Nyoo cahan chihin ra Moisés. Soco ra cuan, ña chitó ndi nya quitā ra —cacatyí ra.

³⁰ Tyicuan ta nacahan ra cucuaā cuan ta catyí ra:

—¿Ñana vaha cha cuví ihya! Nyoho ña chitó ndo nya quitā ra, ta chi yuhu sananyehe ra.

³¹ Chitó vaha yo vatyí Nyoo ña tyasohó ra nu chicán ra iyó cuatyí. Soco ra cha sacahnú chi ra ta sacuví cuhva cuñí ra, tyasohó Nyoo nu chicán ra cuan.

³² Ni noo chaha ta cuiñi ca yo vatyi iyó noo ra sananyehę chi noo ra cuaa nyata cacu.

³³ Tyehe ta ra ihya ta ñima cuenda Nyoo vachí ra, ñahri cha cuví sacuvi ra —catyí ra chi ra.

³⁴ Tyicuan ta cacatyí ra chi ra:

—Yoho ra iyó cuatyí cuvún nyata cacun. ¿Ta cuñún sañahun chi nyuhu? —cacatyí ra.

Ta catava ñehe ra chi ra vehe ñuhu.

Ñu cha ñahri tuhun Nyoo caa ańima tari cha cuaa ñu

³⁵ Ra Jesús chitó ra vatyi catava ñehe ra chi ra cucuaa cuan vehe ñuhu. Ta cuhva cha nañihí ra chi ra ta catyí ra chi ra:

—¿Atu chinó ińi yoho chi Rayi cha quichi nya gloria? —catyí ra chi ra.

³⁶ Ta nacahan ra ta catyí ra:

—Tata, catyí chii, yóo ra cuví ra vatyi chino ińi chi ra —catyí ra chi ra.

³⁷ Ta ra Jesús catyí ra:

—Cha nyehun chi ra. Ta ican ra ndatuhún chuhun —catyí ra chi ra.

³⁸ Tyicuan ta chicuińi chiti ra chaha ra Jesús ta catyí ra chi ra:

—Chinó ińi chuun, Sutu Mańi yuhu —catyí ra chi ra Jesús.

³⁹ Ta ra Jesús catyí ra:

—Yuhu vachí vatyi catyí cha caa ańima ñáyivi iyó siqui ñuhu ñayivi ihya. Vatyi ñu cuaa, ñu ña chitó tuhun Nyoo cunanyehę ñu vatyi cucava tuhun Nyoo ańima ñu. Ta ñu cuńi maa tyi ndichin nyehe tyi catyí ñu tyi chitó ñu tuhun Nyoo, coto ñu tyi cuaa ñu tyi ña chinó ińi ñu chii —catyí ra Jesús.

⁴⁰ Tyicuan ta suhva ra cuví fariseo cha nyicú yucuan chińi ra cha cahan ra Jesús, ta catyí ra chi ra:

—¿Atu cuaa tucu nyuhu ñandihí? —catyí ra.

⁴¹ Tyicuan ta catyí ra Jesús chi ra:

—Tyehe ta cuaa nyoho, nicohón nuu ndo tyi chiñuhú tuhun Nyoo chi ndo, ta ma coo cuatyí ndo. Soco vatyi catyí ndo tyi nyehé ndo ta chitó ndo, yucuan chaha ndoó cuatyí siqui ndo —catyí ra chi ra.

10

Mbee sana Nyoo cuví ñáyivi yihí cuenda ra, ta ñohó nuu ñu chi ra cha tachi Nyoo vatyi sahá cumi ra chi ñu

¹ Cahán ca ra Jesús ta catyí ra:

—Cha ndicha catyí chi ndo, tatu noo ra cuaquihvi chichi noo chacu mbee, ta cha nuu cha quihvi ra yuhu chacu, quihvi ra inga ityi, ra suhu cuví ra.

² Soco ra quihvi ityi yuhu chacu, ra sahá cumi mbee cuan cuví ra.

³ Ra nyaá yuhu chacu cuan nuña ra na quihvi ra sahá cumi mbee cuan. Ta mbee cuan nicohón soho ti ndusu ra. Noo noo ti ta iyó sivi ti sahá ra, ta cana ra chi ti ta tava ra chi ti ityi chata chacu.

⁴ Ta cha yahá tava ra chi ti, ta cuahan ra ityi nuu ti ta nyicón ti chi ra, vatyi nicohón soho ti ndusu ra.

⁵ Soco tatu ña ñohó soho ti ndusu ra, chinó ti chi ra ta ma cunyicon ti chi ra.

⁶ Tyehe caa tuhun cahan ra Jesús chihin ñu. Soco maa ñu ña cutuńi ińi ñu ñáa tuhun cuńi ra cahán ra cha tyicuan caa.

Ra Jesús cuví ra sahá cumi vaha mbee

⁷ Tyicuan ta catyí ra Jesús inga chaha chi ñu:

—Cha ndicha catyí chi ndo vatyí yuhu cuví tari noo yuhu chacu nu quihví coyo ñáyivi cuende cha cuví ñu tari mbee sane.

⁸ Tandihí ra cha yahá caquichí coyo, ra suhu cacuví ra. Soco mbee ña quichahá ti cha cacahan ra.

⁹ Yuhu cuví yuvehe gloria. Ñu quihví cuende, cacu ñu cha ma cuhun ñu anyaya. Ta cuví ñu tari noo mbee cha quihví ta quitá chichi chacu cuan. Ta ñihí ti cuhu cachi ti.

¹⁰ 'Noo ra suhu vachí ra, soco vachí suhu ra, vachí cahñi ra, vachí sativi ra. Soco yuhu vachí vatyí coo ndo noo ñáyivi chaa cha ma naa ca maa.

¹¹ Yuhu cuví noo ra vaha sahá cumi mbee. Vatyí ra sahá cumi mbee chahá ra ñáyivi ra cuenda sana ra.

¹² Soco ra cuví musu, tatu nyehé ra vachí lobo cha cuví noo quití xaan, sandoo maa ra chi mbee sana chitoho ra. Ta chinó ra. Vatyí ñima sana maa ra cuví ti. Tyicuan ta tñn quití xaan chi mbee cuan. Ta saquicono ti chi ti ityi cuan ityi ihya.

¹³ Musu cuan chino ra cha cuenda vatyí cha cuenda xuhun ri sahá tyiño ra. Ta ñahri cuenda ra chi mbee, tyi ñima sana ra cuví.

¹⁴ 'Yuhu cuví ra sahá cumi vaha mbee sane. Ta ñohó nui chi ti. Ta maa ti ñohó nuu ti chii,

¹⁵ tari ñohó nuu Suti chii, ta yuhu ñohó nui chi ra. Yuhu chahí ñáyivi cuenda mbee sane.

¹⁶ Iyó tucu inga mbee sane cha ñima chichi chacu ihya iyó ti. Cuñí chi cha cuhin cunaquehin chi ti. Ta cuquichaha ti chii. Ta coo noo ri nu quihí tandihí ti. Ta noo ri ra sahá cumi chi ti cucoo.

¹⁷ 'Suti cuñí ra chii vatyí chahí ñáyivi cha catyí ñáyivi cuende. Soco yaha cuan, nacuhva tucu ra ñáyivi inga chaha.

¹⁸ Yori tinyaá ñáyivi, soco cha iyó vaha iñi mai ta chahí. Iyó ityi chii cha cuhve ñáyivi ta cúvi, ta iyó tucu ityi chii cha naquehen tiqui inga chaha vatyí cunandote. Ican ihya cuví tyiño cha tyaa Suti chii —catyí ra Jesús.

¹⁹ Cha cachiñi tucu ra cacuví nuu chi ñu Israel tuhun cha cahán ra Jesús ihya, cacusiñ tucu ra chihin tahan ra inga chaha.

²⁰ Ta cuaha xaan ra catyí ra:

—¿Ñáa tuhun cha quichaha ndo chi ra chiña? Ta yihí noo tatyí ña vaha chi ra, ta loco ra —cacatyí ra.

²¹ Ta inga ra catyí ra:

—Yori ñu ñohó tatyí ña vaha chi cahán tyehe caa. ¿Atu cuví sananyehe noo tatyí ña vaha chi noo ra cuaa? —catyí ra.

Nu ña cuñí ra cacuví nuu chi ñu Israel chi ra Jesús

²² Nya ñuu Jerusalén yoo vichin cuví. Ta sanducahnú ñu noo vico quivi nanduchin cuiya cha suhñi ñu vehe ñuhu cahnu cuan.

²³ Ta ra Jesús chicá noo ra vehe ñuhu cuan ityi corredor ra Salomón.

²⁴ Ta ra cacuví nuu chi ñu Israel cachicuitayucu cutya ra nuu ra. Ta quichahá ndaca tuhun ra chi ra:

—¿Ama catyí cachun chi ndi tatu icon cuví Cristo? ingaña ri catyí cachi chi ndi.

²⁵ Ta ra Jesús catyí ra:

—Cha yahá catyí chi ndo, ta ña chinó iñi ndo chii. Tyiño sacuví nuu Suti ican cuví cha ndaa cuende.

²⁶ Soco nyoho ña chinó iñi ndo chii vatyí ñima mbee sane cuví chi ndo. Tari cuhva catyí chi ndo ndaa ri.

²⁷ Mbee sane nichohón soho ti ndusi, ta yuhu ñohó nui chi ti. Ta maa ti nyicón ti chii.

²⁸ Yuhu चाहिं ñayiví cha ma naa ca maa coo ti. Ta ma cunaa ti. Ta ni yori maa cuví tinyaa chi ti chichi ndahi.

²⁹ Maa Suti चाहिं chi ti chii. Ta cahnu ca cuví maa ra ican saha tandihí ca. Ta yori cuví tinyaa chi ti chichi ndaha ra.

³⁰ Yuhu ta Suti Nyoo, noo ri cuví ndi —catyí ra Jesús.

³¹ Tyicuan ta ra cacuví nuu chi ñu Israel cuan caquehen tucu ra yuu vatyi tuchi ra chi ra.

³² Ta ra Jesús catyi ra chi ra:

—Cuaha xaan cha vaha sacuví yuhu nuu ndo chihin tunyee iñi Suti. ¿Ta nya cuenda cuan cua tuchi ndo yuu chii? —catyí ra Jesús chi ra.

³³ Ta ra cacuví nuu chi ñu Israel cuan cacatyí ra:

—Ñima cha cuenda noo cha vaha sacuvun cutuchi ndi yuu chuun, soco cha cuenda vatyi yahun nuu Nyoo chihin tuhun cahún. Noo ray#i ri cuvún, soco sahún tari Nyoo chuun —cacatyí ra chi ra.

³⁴ Tyicuan ta catyí ra Jesús chi ra:

—Nu tutu tuhun Nyoo nyaá vatyi Nyoo catyí ra: “Nyoho cuví ndo nyoo”, catyí Nyoo.

³⁵ Chitó yo vatyi cha cahán tuhun Nyoo, ma cuví catyi yo tyi ña ndicha. Ta Nyoo sacunañi ra nyoo chi ñu naquehén tuhun cahán ra.

³⁶ Ta tatu maa Nyoo nacachi chi yuhu ta tachi ra chii siqui ñuhu ñayiví ihya ¿yoso caa catyí nyoho vatyi yahá yuhu nuu Nyoo nu catyí tyi Sehe Nyoo cuví chii?

³⁷ Tatu ña sacuví cha sacuví Suti, ma chino iñi ndo chii.

³⁸ Soco tatu sacuví, vasi ma chino iñi ndo chii, soco chino iñi ndo tyiño sacuví. Tyicuan ta cucoto cachi ndo vatyi Nyoo Suti #n ri cuví ra chihin. Ta yuhu #n ri cuví chihin Nyoo Suti —catyí ra Jesús.

³⁹ Inga tucu chaha cacuñi ra catyihí ra chí ra vehe caa, soco ra Jesús cuahan ri ra.

⁴⁰ Tyicuan ta cuanuhá ra ityi nu caña ñanyii inga chiyo yuvi cahnu Jordán cuan nu sacondutya ra Juan ta xihna ri.

⁴¹ Cuaha ñáyiví chahan chinyehe chi ra, ta catyí ñu:

—Ndicha, vasi ni noo milagru ña sacuví ra Juan, soco tandihí tuhun cha chahan ra cuenda ra ihya ta ndicha —catyí ñu.

⁴² Ta cuaha xaan ñu cachino iñi ñu chi ra Jesús ityi cuan.

11

Nu chihí ra Lázaro

¹ Iyó noo ra cuhví cha nañi Lázaro ñuu Betania nu cuví ñuu cu María ta cu Marta cuhu ña.

² Ta cu María, cuhva ra Lázaro cuan ican ña cuví ñaha cha choso ndutya vixi chahán chaha Sutu Mañi yo, ta chihin ixi xiñi ña nacuhva ña.

³ Ta tyicuan caa ninduví tahan ñu, cu María chihin cuhu ña, tachi ñu tyiño na cucatyí ra chi ra Jesús tyehe caa;

—Sutu Mañi ndi, amigon cuhví ra —catyí ñu, tachi ñu tyiño.

⁴ Ta cha chihí ra Jesús tuhun ihya ta catyí ra:

—Cuehe cuan ma cahñi chi chí ra. Cuhví ra tyehe caa tacuhva vatyi quiví nduvaha ra cunyehe ñáyiví tyi cahnu xaan ca ra cuví Nyoo ta tyicuan caa tucu Sehe ra —catyí ra Jesús tuhun maa ra.

⁵ Cuñí vavaha ra Jesús chi cu Marta ta chi cuhu ña, ta chi cuhva ña, ra Lázaro.

⁶ Soco cuhva cha catyí ñu chi ra tyi cuhví ra Lázaro, ndoo ra nu ñohó ra uvi ca quivi.

⁷ Tyicuan ta catyí ra chi ra cachicá noo chihin ra:

—Coho ndo inga chaha nya Judea —catyí ra.

⁸ Tyicuan ta ra cachicá noo chihin ra cacatví ra chi ra:

—Maestro, ta cunaha ca cha cuñí ra cacuví nuu chi ñu Israel cahñi ra chuun chihin yuu. Ta vityin, ¿inga chaha cuñún cuhun yucuan? ¿Ñáá tuhun?

⁹ Ta catyí ra Jesús:

—¿Atu ñima uchi uvi hora iyó noo quivi? Vatyí tatu cha ñicahñu chicá noo noo ra, ma nduva ra vatyí ndichin nyehé ra ta sacuví ra tyiño nuu Nyoo.

¹⁰ Soco tatu cha cha cuaa chicá noo ra, nduva ra vatyí ñahri ñuhú.

¹¹ Tyicuan ta quichaha catyí tucu ra Jesús:

—Amigo yo, ra Lázaro quixí ra. Soco cuhin cusandoye chi ra —catyí ra chi ra.

¹² Tyicuan ta catyí tucu ra cachicá noo chihin ra:

—Tata, tatu quixí ra, cuñí chi catyí vatyí cuanduvaha ra —cacatví ra.

¹³ Soco ra Jesús cuñí ra catyí ra vatyí cha chihí ra Lázaro. Ta ra cachicá noo chihin ra, cuñí maa ra vatyí cha ndicha quixí ra cuan.

¹⁴ Tyicuan ta catyí cachi ra Jesús chi ra:

—Ra Lázaro cha chihí ra.

¹⁵ Ta cusí cuñí vatyí yori chinyaá yucuan. Vatyí tyicuan caa vaha ca cha cuenda nyoho, tacuhva chino iñi ndo chii. Coho ndo cunyehe ndo chi ra —catyí ra chi ra.

¹⁶ Tyicuan ta ra Tomás, cha catyí ñu: “ra tñihí cuan”, catyí ra chi inga ra cachicá noo chihin ra Jesús:

—Coho tucu yo vatyí cúvi yo ñin ri chihin ra —catyí ra.

Ra Jesús cuví ra sanandotó chi yo ta chahá ra ñayiví coo yo

¹⁷ Cha chaá ra Jesús Betania, ñihí ra tuhun vatyí ra Lázaro cha cumi quivi ñohó ra chichi ñuhú.

¹⁸ Ñuu Betania cuan nyaá chi yatyin ri nu nyaá ñuu Jerusalén, tari noo uvi kilómetro sisava.

¹⁹ Ta cuaha ra cacuví nuu chi ñu Israel cuahan ra cuanyehe ra nu nyaá cu Marta ta cu María vatyí chihí cuhva ñu.

²⁰ Ta ñihí cu Marta tuhun vatyí cha cuachaa ra Jesús. Ta cuahan ña cuasatahan ña chi ra. Soco cu María ndoo ña vehe.

²¹ Ta cu Marta catyí ña chi ra Jesús:

—Sutu mañí yuhu, tyehe ta nyaun ihya, ma cúvi cuhve.

²² Soco yuhu chité vatyí Nyoo cusacuvi ra tandihí cha cacon chi ra —catyí ña chi ra.

²³ Ta ra Jesús catyí ra chi ña:

—Cuhvon cunandoto ra.

²⁴ Ta cu Marta catyí ña:

—Ndicha, chité vatyí cunandoto ra quivi nandoto ndiyi nu cuandihí quivi —catyí ña.

²⁵ Tyicuan ta catyí ra Jesús chi ña:

—Yuhu cuví ra sanandotó chi ndiyi. Ta chahí cha conyito ñáyiví. Ñu chinó iñi chii, vasi cha chihí ñu soco coo tucu ñu.

²⁶ Ta tandihí ñu nyitó ca ta chinó iñi ñu chii, ma cúvi maa ñu. ¿Atu chiñó ñun tuhun ihya? —catyí ra chi ña.

27 Ta maa ña catyí ña:

—Chinó iñi, Sutu Mañi yuhu, vatyí yoho cuvún Cristo Sehe Nyoo, ra cha nyaá cha quichi siqui ñuhu ñayivi ihya —catyí ña.

Nu chacu ra Jesús nu ñaña ra Lázaro

28 Cha yahá cha catyí cu Marta tuhun ihya, ta chahan ña chiquehen ña chi cuhu ña, cu María, ta catyí xehe ña chi ña:

—Cha chaá Ra Sacuaha. Ta tachí ra tyiño nacuhun nu nyaá ra —catyí ña.

29 Ta cha chiñi cu María tuhun ihya, nducuitá ri ña, ta cuahan ña nu nyaá ra Jesús,

30 Ta ra Jesús ta quihvi ca ra chichi ñuu cuhva cuan, nyaá ra nu nañihí cu Marta chi ra.

31 Ta nya vehe cu María, nyicú ra cacuví nuu chi ñu Israel tyinyeé ra chi ñu. Ta nyehe ra vatyí numi ri quita ña. Ta cuñi maa ra tyi cuahan ña nu ñaña cuacuacu ña. Ta cuahan coyo ra chata ña.

32 Ta cuhva cha chaá cu María nu nyaá ra Jesús chicuñi chiti ña chaha ra, ta catyí ña:

—Sutu Mañi yuhu, tyehe ta chinyaun ihya, cuhve ma cúvi ra —catyí ña.

33 Nyehe ra Jesús cha chacú cu María chihin ra Israel cha vachi coyo chihin ña, ta nducuihya xaan cuñi aña ma ra.

34 Ta ndacá tuhun ra chi ñu:

—¿Nya maa maa tyihí ndo chi ra? —catyí ra.

Ta catyí ñu:

—Tata, coho ta nyehun —catyí ñu chi ra.

35 Ta ra Jesús chacu ra.

36 Tyicuan ta catyí ra Israel cuan:

—Nyehe ndo yoso cha cuñi ra chi ra —catyí ra.

37 Soco suhva ñu catyí ñu:

—Ican ra ihya cha sananyehé chi ra cuaa cuan. ¿Atu ña cuví sanduvaha tucu ra chi ra Lázaro ihya? —catyí ñu.

Nu sanandoto ra Jesús chi ra Lázaro

38 Nducuihya cuñi ra Jesús inga chaha ta tuhva ra nu ñaña cuan. Noo chichi yuu cuví. Ta nyasí noo yuu yuhu chi.

39 Ta catyí ra Jesús:

—Sacanyaha ndo yuu chiña —catyí ra.

Ta cu Marta, cuhva ndiyi cuan, catyí ña:

—Soco cha caña xico, Sutu Mañi yuhu, vatyí cha cumi quivi cha chihí ra —catyí ña.

40 Soco ra Jesús catyí ra chi ña:

—¿Atu ña cha catyí chuun vatyí tatu chinó iñun, cunyahun yoso cha cahnu cuví Nyoo? —catyí ra chi ña.

41 Tyicuan ta sacanyahá ñu yuu cuan. Ta ra Jesús nanyehé ndaa ra ityi andivi, ta catyí ra:

—Sutu Mañi yuhu, tyahvi nyoo chuun tyi chiñun cha cahín.

42 Yuhu chité vatyí tyicuan ri chiñun tuhun cahín. Soco tyehe caa cahín cha cuenda cha vaha chi ñayivi nyicú ihya, tacuhva nachino iñi ñu tyi yoho tachí chii —catyí ra Jesús chi Nyoo.

43 Cha yahá cha catyí ra tuhun ihya, canachaá ra, ta catyí ra:

—¡Lázaro, quita chiña!

44 Ta quitã ra cha chihî cuan, nuhñî ndaha ra ta nuhñî chaha ra chihin sahma. Ta nuhñî nuu ra chihin noo sahma. Ta ra Jesús catyí ra chi ñáyivi nyicú yucuan:

—Ndächî ndo chi ra. Ta saña ndo chi ra nacuhun ra —catyí ra Jesús chi ñu.

Nu nducú cahñî ñu chi ra Jesús

(Mt. 26.1-5; Mr. 14.1-2; Lc. 22.1-2)

45 Ta cuaha xaan ra cacuví nuu chi ñu Israel cha चाहण coyo chihin cu María nachino iñî ñu cha nyehe ñu cha sacuví ra Jesús.

46 Soco suhva ra चाहण ra chisacoto ra chi ra fariseo cha sacuví ra Jesús.

47 Tyicuan ta ra fariseo ta ra cacuví nuu chi tata sutu sacoo ra noo junta ta cacatyí ra:

—¿Ñáá cha sacuví yo? Vatyí cuaha xaan milagru sacuví ra cuan.

48 Tatu cuhva yo cha sacuví ca ra tyicuan caa, tandihî ñáyivi cuchino iñî ñu chi ra. Ta ra cacuví tyiño nya ñuu Roma cuquichî ra ta cusatani ra vehe ñuhu yo ta ñuu yo —cacatyí ra chi ra tahan ra.

49 Soco ra cuví nuu cahnu ca chi tata sutu cuiya cuan, ra nañî Caifás चाहण ra ta catyí ra chi ra:

—Nyoho ñahri maa cha chitó ndo.

50 Ni ña cutuñî iñî ndo vatyí vaha ca cha cúvi noo ri rayîi cha cuenda tandihî ñáyivi ñuu, ta ñima ca cha cúvi tandihî yo —catyí ra Caifás.

51 Soco ra Caifás cuan ñima cha cuñî maa ra ta cahán ra, soco vatyí ra cuví nuu cahnu ca chi tata sutu cuiya cuan cuví ra, yucuan chaha maa Nyoo sacahan chi ra. Vatyí catyí ra vatyí ra Jesús cucúvi ra cha cuenda tandihî ñáyivi ñuu Israel.

52 Ta ñima cha cuenda ri ñu cuan, soco vatyí cusandu ñin ri ra chi tandihî ñu cuví sehe Nyoo cha iyó inga ñuu ñandihî.

53 Yucuan ta nyacua nya quiví cuan ta ra cacuví nuu chi ñu Israel cuan, nducu ra cuhva yoso caa cahñî ra chi ra Jesús.

54 Yucuan chaha tyi ra Jesús ña chicá noo ndichin ca ra nu nyicú ñu Israel. Ta quitã ra ityî Judea cuan. Ta cuahan ra noo ñuu cha nañî Efraín cha nyaá yatin ri ñuhu ityî. Ta yucuan ndoó ra chihin ra cachicá noo chihin ra.

55 Ña cuaha ri ca quiví ta chaq vico cuenda ñu Israel, vico cha nañî pascua. Ta cuaha xaan ñáyivi quitã ñu ñuu ñu ta cuahan ñu Jerusalén cuasacuví ñu cha tuhvá maa ñu sacuví cha sandundî ñu chi ñu nuu Nyoo cha ni cumañî ca cha quiví vico cuan.

56 Nanducú ñu chi ra Jesús. Ta cuhva cha nyicú ñu chichi vehe ñuhu cahnu cuan ta ndacá tuhun ñu chi tahan ñu, ta catyí ñu:

—¿Yoso caa cuñî nyoho? ¿Atu cuquichî ra vico ihya, o ma quichî ra? —catyí ñu chi tahan ñu.

57 Ta ra cacuví fariseo ta ra cacuví nuu chi tata sutu, catyí ra vatyí tatu nya noo ñu chitó ñu nya nyaá ra Jesús, nacatyí ñu. Vatyí cutîin ra chi ra vatyí cohon ra vehe caa.

12

Nu chosó cu María ndutya vixî चाहण chaha ra Jesús

(Mt. 26.6-13; Mr. 14.3-9)

1 Cumañî iñu ca quiví cha cuatahan chi vico pascua, ta chaq ra Jesús ñuu Betania nu iyó ra Lázaro, ra cha sanandotó ra Jesús chi.

² Yucuan savaha ñu cha cuxiñi ra Jesús. Cu Marta tyihí ña coho nu mesa. Ta chicunyaá ra Jesús nu mesa. Ta nyaá tucu ra Lázaro chihin ra.

³ Tyicuan ta cu María quehen ña ta cha sava litro ndutya vixi chahán cha chinq chihin maa ri nardo, noo cha yahvi xaan nyaá. Ta cuhví ña chaha ra Jesús chihin ndutya vixi chahán cuan. Yahá cuan ta sana ityi ña chihin ixi xiñi ña. Tandihí chichi vehe cuan chitú chihin xico ndutya vixi chahán cuan.

⁴ Ta yucuan nyaá tucu ra Judas Iscariote, sehe ra Simón. Cuví ra noo ra chicá noo chihin ra Jesús. Ta suri maa ra cuví ra cha naxico tuhun chi ra Jesús nuu ra xaan iñi chi ra. Ta quichaha catyí ra Judas cuan chi ñu cuan:

⁵ —¿Ñáá tuhun ña xico ndo ndutya vixi chahán ihya chí ñáyivi, cuhva ñu cuenda mil chí ndo chihin, ta tyinyee ndo chí ñu ndahvi? —catyí ra.

⁶ Soco ra Judas ña catyí ra tuhun ihya cha cuenda cha ndahvi cuñí ra nyehe ra chí ñu ndahvi, soco vatyi ra suhu cuví ra. Ta vatyi ndaha maa ra nyaá yitin xuhun ta tuhvá ra suhu ra cha tyihí ñu chichi yitin cuan.

⁷ Tyicuan ta catyí ra Jesús chí ra:

—Saña chí ña, vatyi ñaha ihya sacuví ña tyehe caa cha cuenda cha cuquihví coño ñuhu chichi ñuhu.

⁸ Ñu ndahvi tyicuan ri cu cunyicú ñu chihin ndo, soco yuhu ña tyicuan ri —catyí ra Jesús chí ra Judas cuan.

Nu nducu cahñi ra chí ra Lázaro

⁹ Cuaha xaan ñu Israel ñihí ñu tuhun tyi ra Jesús ñohó ra Betania, ta chahan coyo ñu nyicuan. Ñima cha cuñí ñu nyehe ñu chí ra Jesús ri, soco cuñí tucu ñu nyehe ñu chí ra Lázaro, ra cha sanandoto ra Jesús chí.

¹⁰ Tyicuan ta ra cacuví nuu chí tata sutu catyihí tahan ra tuhun vatyi cucahñi tucu ra chí ra Lázaro ñandihí.

¹¹ Vatyi cha cuenda ra ta cuaha xaan ñu Israel cacusin ñu chihin ra ta nachino iñi ñu chí ra Jesús.

Nu quihví ra Jesús ñuu Jerusalén

(Mt. 21.1-11; Mr. 11.1-11; Lc. 19.28-40)

¹² Cuaha xaan ñáyivi cuahan ñu Jerusalén cha vico pascua. Ta cha inga quivi cachitó ñu tyi ra Jesús cuachaa ra.

¹³ Tyicuan ta chahnya ñu ndaha tunducaha ta cuahan coyo ñu cuasatahan ñu chí ra Jesús. Ta canachaa ñu, ta catyí ñu:

—¡Cahnu xaan ca cuví maa Nyoo! ¡Nasoco xaan Nyoo chí ra vachi ihya chihin tunyee iñi Nyoo! ¡Nasoco xaan Nyoo chí Rey cuenda yo ñu Israell! —cacatyí ñu, canachaa ñu.

¹⁴ Ta ra Jesús ñihí ra noo burru ta chicoso ra chí ti tari cuhva catyí maa nu tutu Nyoo tyehe caa:

¹⁵ Ma yuhví ndo ñáyivi ñuu Sión

Nyehe ndo, vachi Rey ndo.

Yosó ra noo burru —catyí chí nu tutu Nyoo.

¹⁶ Quivi cuan ra cachicá noo chihin ra Jesús, ña cacutuñi iñi ra tuhun cuan cha nyaá nu tutu Nyoo. Soco cha yahá cuanuhu ra Jesús gloria, canicohon iñi ra vatyi tandihí tuhun cuan ta nyaá nu tutu Nyoo tyi tyicuan caa cucuví chí ra. Ta tyicuan caa cuví chí ra.

¹⁷ Ta ñáyivi cha nyehe quivi cha caná ra Jesús chí ra Lázaro chichi ñaña, quivi sanandoto ra chí ra, nacatyí ñu cha nyehe ñu.

¹⁸ Ta yucuan chaha cuaha xaan ñáyivi chisatahan ñu chí ra Jesús, vatyi chito ñu milagru cha sacuví ra.

19 Tyicuan ta ra cuví fariseo cacatyí ra chi ra tahan ra:

—Cha nyehé maa ndo tyi ñahri maa cuví sacuví yo, vatyi tandihi ñáyivi nyicón chi ra —cacatyí ra.

Nu nducú suhva ra ñuu Grecia chi ra Jesús

20 Ñohó tucu suhva ra ñuu Grecia mahñu ñáyivi cha chahan coyo chisacahnu vico ñuu Jerusalén cuan.

21 Tyicuan ta catuhva ra ñuu Grecia cuan nu nyaá ra Felipe, ra ñuu Betsaida nu cuví Galilea, ta cachacu ndahvi ra nuu ra ta cacatyí ra:

—Tata, cuñí ndi cahan ndi chihin ra Jesús —cacatyí ra.

22 Ta ra Felipe chahan ra chicatyí ra chi ra Andrés. Ta ñinduvi ra chinacatyí ra chi ra Jesús vatyi ra Grecia cuan cuñí ra cahan ra chihin ra.

23 Ta nacahan ra Jesús, ta catyí ra:

—Chaa cuhva vityin vatyi yuhu cha cuví Rayii cha quichi nya gloria, cuananuhu tiqui nya gloria, ta cusacahnu Suti chíi.

24 Cha ndicha catyí chíi ndo vatyi tatu noo chíi ta ma quihi chichi ñuhu ta ma tyahyu chíi, noo ri chíi cucuvi chíi tyicuan ri maa. Soco tatu tyahyu chíi, nduchaa chíi inga chaha ta coo cuaha ca chíi chíi.

25 Ñu cuñí xaan ñáyivi iyó ñu, cucunaa ñu. Soco ñu ña cuñí ñáyivi ñuhu ñáyivi ihya, cunañihi ñu noo ñáyivi cha ma naa ca maa cucoo ñu.

26 Tatu yihí ndo cuñí ndo sacuvi ndo tyiño nui, cunyicon ndo chíi. Ta nu cuacunyaí, yucuan cucunya maa tucu ñu sacuví tyiño nui. Tatu nya nyoho sacuví ndo tyiño nui, Suti cusacahnu ra chíi ndo.

Nu cahán ra Jesús tuhun yoso caa cucúvi ra

27 Vityin chicá xaan xiñi. Ta ¿ñáá cha cucatyí? ¿Atu catyi chíi Suti na sacanyaha ra tindoho cha nyaá cunyehe vityin? Ma catyi cha tyicuan caa vatyi cha cuenda cuan vachi siqui ñuhu ñáyivi ihya.

28 Vaha ca catyi chíi Suti: “Sutu Mañi yuhu, sacahnu sivun” —catyí ra Jesús. Tyicuan ta cahán noo ndusu ityi andívi ta catyí chíi tyehe caa:

—Cha yaha sacahni sivi, ta cusacahni inga chaha —catyí ndusu cuan.

29 Ta ñu nyicú yucuan, chiñi ñu ndusu cuan, ta catyí ñu vatyi savi cahán. Ta inga ñu catyí ñu:

—Noo ángel cahan chihin ra.

30 Tyicuan ta ra Jesús catyí ra chíi ñu:

—Ñima cha cuenda cha vaha chíi yuhu cahan ndusu cuan soco cha cuenda cha vaha chíi maa ndo cuví.

31 Vityin cuví cuhva cutachi tuñi Nyoo chíi ñáyivi iyó siqui ñuhu ñáyivi. Ta vityin cuhva cutava ñehe Nyoo chíi ra nyacá ñaha siqui ñuhu ñáyivi ihya.

32 Ta cuhva cha cuitacai nu cruzi, yucuan cuhva cunaxite chíi tandihi ñáyivi —catyí ra Jesús.

33 Cahán ra tyehe caa cha cuñí ra na cutuñi iñi ñu tyi tyicuan caa cuhva cucúvi ra.

34 Ta ñáyivi nacahan ñu ta catyí ñu chíi ra:

—Tuhvá ndi chiñi ndi sacuaha ra nu libru ley yo vatyi ra cuví Cristo tyicuan ri maa cucoo ra. ¿Yoso caa cha catyí yoho tyi cusandaa ñu chíi Rayii quichi nya gloria nu cruzi? ¿Yóo ra cuví Rayii cha quichi nya gloria cha cahún tuhun? —catyí ñu, ndacá tuhun ñu chíi ra.

35 Tyicuan ta ra Jesús catyí ra chíi ñu:

—Íyó cha ndichin nu nyicu ndo, soco suhva ri ca quívi. Caca ndo ityi nu ndichin cha ni ri ca cha ndichin. Coto sana ri ñi ndo ta nduñaa ñi, vatyí ñu chicá noo nu ñaa ñi ña chitó ñu nya ityi cuahan ñu.

³⁶ Chino ñi ndo chi yuhu ra cuví ñuhu ndichin cuan, cha ni ri ca cha nyaá que chíhin ndo. Tyicuan ta cuví ndo ñáyivi iyó nu ndichin.

Cha yahá catyi ra Jesús tuhun ihya tixehe nuu ra chí ñu.

Nu catyi chi ñáa tuhun cha ña cachinó ñi ra cacuvi nuu chi ñu Israel chi ra Jesús

³⁷ Vasi cuaha xaan milagru sacuvi ra Jesús nuu ñu soco ña chinó ñi ñu chi ra.

³⁸ Vatyí tahán chi cha cuví tari catyi ra Isaías profeta Nyoo, nu cahán ra tyehe caa:

Sutu Mañi yuhu, yori cuñí chino ñi tuhun cahán ndi.

Yori cutuñi ñi tunyee ñi iyó chuun, Sutu Mañi yuhu, catyi ra Isaías ta cha naha.

³⁹ Ta cha cuenda tuhun ihya cha nyaá nu tutu, yucuan chaha vatyí ña cuví chino ñi ñu vatyí suri tyaá tucu ra Isaías tyehe caa:

⁴⁰ Nyoo sanducuaa ra chí ñu. Ta sandundava ra añima ñu,

tacuhva cha ma nyehe ñu chíhin chíti nuu ñu,

ta ma cutuñi ñi añima ñu,

ta ni ma nacuhva cuenda ñu chí ñu chí ra tacuhva sanduvaha ra chí ñu.

⁴¹ Ra Isaías catyi ra tyehe caa vatyí nyehe ra nu nyacá ñaha Sutu Mañi yo Jesús ta cahán ra tuhun ra.

⁴² Soco cuaha ñu Israel chinó ñi chí ra Jesús, ta nyacua nya suhva ra cacuvi nuu, soco ña saquetuvi ra nuu ñáyivi vatyí yuhví ra chí ra cacuvi fariseo coto tava ñehe ra chí ra vehe ñuhu.

⁴³ Vatyí cuñí ca ra cuvaha ra nuu ñáyivi ta ñima ca cha cuvaha ra nuu Nyoo.

Tuhun cahán ra Jesús cusacutuñi chí ñáyivi

⁴⁴ Ñihi cahán ra Jesús, ta catyi ra:

—Ñu chinó ñi chí, ñima chí maa ri mai chinó ñi ñu, soco chinó tucu ñi ñu chí ra cha tachí chí.

⁴⁵ Ta ñu nyehé chí, nyehé tucu ñu chí ra cha tachí chí.

⁴⁶ Yuhu cha cuví tari noo cha ndichin vachí ñuhu ñáyivi ihya, vatyí tacuhva vatyí ñu chinó ñi chí ma ndoo ñu nu ñaa ñi.

⁴⁷ Soco tatu yihí ndo chíni ndo tuhun cahín, ta ña sacuvi ndo cha cahín, ñima yuhu tachí tuñi chí ndo. Vatyí ña vachí yuhu ñuhu ñáyivi ihya vatyí tachí tuñi chí ñáyivi. Soco vachí sacaqui añima ñu.

⁴⁸ Ñu ña cuñí naquehen tuhun cahín ta ña cuñí ñu sacuvi ñu tari cuhva cuñí, iyó cha cutachi tuñi chí ñu. Tuhun cha cahín, ican cuan cutachi tuñi chí ñu nu cundihi quívi.

⁴⁹ Vatyí ñima cuenda mai cahín. Suti ra cha tachí chí, chahá ra tuhun chí ñáa cha cucahin ta ñáa cha cusañahi.

⁵⁰ Ta chité vatyí tuhun cha chahá ra, chahá chí noo ñáyivi cha ma naa ca maa coo ñáyivi. Yucuan chaha, tuhun cha cahín, cahín soco cuhva catyi maa Suti cha cahín cuví.

13

Nu nacatyá ra Jesús chaha ra cachicá noo chíhin ra

¹ Nonga quivi cumañi ta chaa vico pascua chitó ra Jesús vatyí cha chaa cuhva cha cuaquita ra ñuhu ñayiví ihya ta cunuhu ra nu nyaá Sutu ra. Tyicuan ri cuñi xaan ra chí ñu cuenda ra cha iyó siqui ñuhu ñayiví ihya. Ta vityin cua sañahá ra chí ñu tyi cuñi xaan ra chí ñu vatyí cuacúvi ra cha cuenda ñu.

² Ta cuxiñi ra Jesús chihin ra cachicá noo chihin ra. Ta cha quihvi cuihna añima ra Judas Iscariote sehe ra Simón tyiyuhu ra chí ra, naxico tuhun ra chí ra Jesús ta nacuhva cuenda ra chí ra chí ra xaan iñi chí ra.

³ Soco ra Jesús chitó ra vatyí chahá cuenda Sutu ra tandihi chí ra vatyí cunyaa ndaha ra. Ta chitó ra vatyí nu nyaá Nyoo quitá ra ta suri yucuan cunanuhu ra. Ta nyaá ra Jesús cuxiñi ra.

⁴ Tyicuan ta nicuinanyaá ra ta tavá ra sahma chata ra, ta chahñi ra noo toalla chichi ra.

⁵ Tyicuan ta tyihí ra ndutya chichi noo caa ta quichaha nacatya ra chaha ra cachicá noo chihin ra. Ta quichaha nacuhva ra chihin toalla cuan.

⁶ Ta cha cuanacatya ra chaha ra Simón Pedro ta catyí ra Simón chí ra:

—Sutu Mañi yuhu, ¿atu yoho cuanacatyon chahi?

⁷ Tyicuan ta catyí ra Jesús:

—Vityin ña cutuñi iñun cha sacuví. Soco cucutuñi maa iñun nu cuahan ca chí.

⁸ Soco ra Pedro catyí ra chí ra:

—Ni noo chaha ta ma nacatyon chaha yuhu.

Ta catyí ra Jesús chí ra:

—Tatu ma nacatye chahun, ñima ra cuende cuvún.

⁹ Tyicuan ta catyí ra Pedro chí ra Jesús:

—Tu tyicuan caa, Sutu Mañi yuhu, ñima chaha ri nacatyon, soco nacatya tucun ndahi ta xiñi ñandihí —catyí ra.

¹⁰ Soco ra Jesús catyí ra chí ra:

—Ñu cha ni chityí, ña cuñi chí cha ndoo tandihí coño ñuhu ñu. Chaha ri ca ñu cuñi chí, vatyí cha ndií maa nanií ñu. Nyoho cha ndií ndo, vasi ña tandihí ndo —catyí ra Jesús.

¹¹ Ta catyí ra vatyí ña tandihí ra ndií ra vatyí chitó ra yóo cha cunaxico tuhun chí ra chí ra xaan iñi chí ra.

¹² Ta cha yahá cha nacatya ra Jesús chaha ra cachicá noo chihin ra, ndihvi noo ra sahma ra, ta nicunyaá tucu ra inga chaha nu mesa ta catyí ra chí ra:

—¿Atu cutuñi iñi nyoho cha sacuví chí ndo?

¹³ Nyoho catyí ndo chii, Maestro ta Sutu mañi yuhu, ta ndicha vatyí ican cuví.

¹⁴ Yuhu cha cuví Ra Sacuaha ta Sutu Mañi ndo, nacatye chaha ndo, tyicuan caa cuñi tucu chí cha nacatya ndo chaha tahan ndo.

¹⁵ Yuhu chahí noo cuhva chí ndo vatyí sacuvi ndo tari cuhva sacuví mai.

¹⁶ Cha ndicha catyí chí ndo vatyí ni noo musu ta ña cahnu ca ra ican saha chitoho ra. Ta ni noo ra cha cuahan tyiño, ña cahnu ca ra ican saha ra cha tachí chí ra.

¹⁷ Tatu cutuñi iñi ndo tuhun ihya, ta sacuví ndo, sñi xaan cucuví chí ndo.

¹⁸ Ñima cha cuenda tandihí ndo cahín. Yuhu chité yóo chí nacachí mai. Soco cuñi chí cha cucuvi tari catyí tuhun Nyoo tyehe caa: “Ra cha chachí pan chihin, ican ra cuan cunaxico tuhun chí chí ra xaan iñi chí”, catyí chí nu tutu Nyoo.

¹⁹ Catyí chi ndo tuhun ihya cha ni cumañi ca chino cava tacuhva vatyí quiví nacuvi tyehe caa, chino iñi ndo tyi iquen cuví ra cha tinyaa cuatyí ndo.

²⁰ Cha ndicha catyí chi ndo vatyí ñu tñn cuenda chi ñu tachí yuhu chi, chi yuhu tñn cuenda ñu cuví cuan. Ta ñu cha tñn cuenda chi yuhu, tñn cuenda tucu ñu chi ra cha tachí chii —catyí ra Jesús.

Nu sacotó ra Jesús vatyí cunaxico tuhun ra Judas chi ra chi ra xaan iñi chi ra

(Mt. 26.20-25; Mr. 14.17-21; Lc. 22.21-23)

²¹ Cha yahá cha catyí ra Jesús tyehe caa, quichahá nducuihya xaan cuñi añima ra, ta catyí cachi ra:

—Cha ndicha catyí chi ndo, vatyí noo nyoho cunaxico tuhun ndo chii nuu ra xaan iñi chii —catyí ra Jesús.

²² Tyicuan ta ra cachicá noo chihin ra, quichahá canyehe ra nuu tahan ra, ta ña cachitó ra yóo chi tuhun cahán ra Jesús.

²³ Noo ra chicá noo chihin ra nyañaá ra chi ra Jesús nu cuxiñí ra. Ta ican ra cuví ra cha cuñí xaan ra Jesús chi.

²⁴ Ta ra Simón Pedro savahá ra seña chi ra, na ndaca tuhun ra yóo chi tuhun cahán ra.

²⁵ Tyicuan ta nyañaá ra chi ra Jesús, ta ndacá tuhun ra chi ra:

—Sutu Mañi yuhu, ¿yóo ra cuví ra cha cahún tuhun?

²⁶ Ta nacahan ra Jesús ta catyí ra:

—Cuasatyí chiiin pan, ta ra cha cuhve chi, ican ra cuan cuví ra —catyí ra.

Tyicuan ta quehen ra chiiin pan ta satyí ra, ta chahá ra chi ra Judas Iscariote, sehe ra Simón.

²⁷ Ta cha quehen ra Judas pan cuan ta quihví ra ña vaha añima ra. Tyicuan ta ra Jesús catyí ra chi ra:

—Tuhun cha yihí iñun sacuvun, sacuvi cha numi ri —catyí ra Jesús chi ra Judas.

²⁸ Soco ni noo ra canyicú nu mesa cuan, ña cacutuñí iñi ra ñáá tuhun cha catyí ra chi ra tyicuan caa.

²⁹ Soco cha cuenda vatyí ndaha ra Judas nyaá yitin xuhun, yucuan chaha yihí ra cuñí maa ra vatyí cuñí ra Jesús cha cusata ra cha chiñuhú chi ra cha cuenda cha vico cuan, o nacuhva ra suhva xuhun cuan chi ñu ndahvi, cacuñí maa ra.

³⁰ Cha yahá chachi ra Judas pan, tyicuan ta quitá ra. Ta cha cuaa cuví cuan.

Ley cha chahá ra Jesús cha cuñi yo chi tahan yo

³¹ Cha yahá cha cuahan ra Judas, ra Jesús catyí ra:

—Vityin cunyehe ñáyiví yoso cha cahnu yuhu cha cuví Rayí cha quichí nya gloria. Ta cuanyehe ñu yoso cha cahnu Nyoo cha cuende.

³² Ta tatu Rayí cha quichí nya gloria sacahnú ra chi Nyoo, tyicuan ta Nyoo cusacahnú ra chi ra. Ta cha chaá quiví cuasacahnú ra chi ra.

³³ Sehe luhli, ña naha ca cuacunyai chihin ndo. Nyoho cunanducu ndo chii, soco tari catyí chi ra cacuví nuu chi ñu Israel cuan, catyí chi ndo vityin, vatyí ma cuví cuhun ndo nu cuahin.

³⁴ Chahí noo tuhun cha chi ndo. Cuñi ndo chi tahan ndo. Tari cuñí yuhu chi ndo, tyicuan caa cuñí chi cha cuñí ndo chi tahan ndo.

³⁵ Tatu cuñí ndo chi tahan ndo, tandihí ñáyiví ta coto ñu vatyí ñu nyicón chii cuví ndo.

Nu catyí ra Jesús vatyi ra Pedro cucatyí ra vatyi ña ñohó nuu ra chi ra (Mt. 26.31-35; Mr. 14.27-31; Lc. 22.31-34)

³⁶ Ra Simón Pedro ndaca tuhun ra chi ra Jesús ta catyí ra:

—Sutu Mañi yuhu, ¿nya cuhun? —catyí ra.

Ta ra Jesús nacahan ra ta catyí ra:

—Nu cuahan yahu, vityin ma cuvi cunyicon chii. Soco nu cuahan ca chi, ta cunyicon chii —catyí ra Jesús.

³⁷ Tyicuan ta catyí ra Pedro chi ra:

—Sutu Mañi yuhu, ¿ñáá tuhun ma cuvi cunyiquen chuun vityin? Nyaí cha cuhve ñayiví cha cuendon —catyí ra.

³⁸ Ta nacahan ra Jesús ta catyí ra:

—¿Atu ndicha cha cuhvon ñayivun cha cuende? Cha ndicha catyí chuun, vatyi cha ni cumañi ca cuacu chaa loho, yoho cucatyun uñi chaha tyi ña ñohó nuun chii —catyí ra Jesús chi ra Pedro.

14

Ra Jesús cuví ityi cuhun yo ta chaa yo nu nya Sutu yo Nyoo

¹ Ta catyí ra Jesús:

—Ma caca xaan xiñi ndo. Chino iñi ndo chi Nyoo, ta chino iñi ndo chii.

² Vehe Suti cuaha xaan nuu coo ndo iyó. Tyehe ta ñima tyicuan caa, cha naha catyí yuhu chi ndo. Ta cuhin cusanduvahi noo nu coo ndo.

³ Ta cha yaha cha cuhin ta sanduvahi nu coo ndo, ta cuquichi inga chaha, quichi naquehin chi ndo. Tacuhva cunyaa ndo nu cuacunyaí.

⁴ Nyoho chitó ndo nya cuhin, ta chitó ndo ityi.

⁵ Ta catyí ra Tomás chi ra:

—Tata, ña chitó ndi nya cuhun. Ta ¿yoso caa coto ndi ityi? —catyí ra.

⁶ Ta ra Jesús catyí ra:

—Yuhu cuví ityi cha cuahan gloria. Ta yuhu cuví cha ndicha. Ta suri yuhu cuví ra chahá ñayiví coo ndo. Noo tuhun ri cha cuenda yuhu, cuví chaa ndo nu nyaá Suti.

⁷ Ñohó nuu ndo chii, ta cha cuenda cuan ñohó nuu tucu ndo chi Suti. Ta nya vityin ta nu cuahan ca chi, ñohó nuu ndo chi ra, vatyi cha nyehé ndo chi ra —catyí ra Jesús.

⁸ Tyicuan ta catyí ra Felipe chi ra:

—Tata, cuhva cha nyehé ndi chi Sutu yo Nyoo, ta chihin yucuan ri ta ndoo ndi vaha.

⁹ Ta nacahan ra Jesús, ta catyí ra:

—Yoho Felipe, cha naha nyaí chihin ndo, ta ¿yoso caa cha catyún cha ta cohon nuu con chii? Ñu cha nyehé chii, nyehé tucu ñu chi Nyoo Suti. Ta ¿ñáá tuhun catyún chii: “Cuhva cha nyehé ndi chi Sutu yo Nyoo”?

¹⁰ ¿Atu ña chinó iñun tyi ñn ri cuví yuhu chihin Suti Nyoo? Ta maa ra ñn ri cuví ra chihin. Tuhun cha catyí chi ndo, ñima yuhu ri catyí, soco Suti cha nyaá chihin, ican ra sacuví tyiño ra chihin.

¹¹ Chino iñi ndo chii vatyi ñn ri ra cuví chihin Nyoo Suti. Ta Nyoo Suti ñn ri ra cuví ra chihin. O cuví tucu chino iñi ndo chii cha cuenda tyiño Nyoo Suti cha sacuví.

¹² Cha ndicha catyí chi ndo vatyi ñu chinó iñi chii, cusacuvi tucu ñu cha sacuví yuhu. Ta cahnu ca cusacuví ñu, vatyi yuhu cuhin nu nyaá Nyoo Suti.

13 Ta tandihí cha cacan ndo chihin sivi, yuhu cusacuvi tacuhva vatyi sacahnu ñáyiví chi Suti Nyoo cha cuenda cha cuví Sehe ra.

14 Yuhu cusacuvi ñáá cha cacan ndo chihin sivi.

Nu catyí ra Jesús vatyi cuhva ra Tatyí li ra chi yo

15 Tatu cuñí ndo chii, quichaha ndo tuhun cahín.

16-17 Ta cacan tahví mai chí Nyoo Suti na saquichi ra noo ra naquehen ndahví chí ndo. Ta ican ra cuan cuví Tatyí li Nyoo, ra cha cahán maa ri cha ndicha. Ta cucunyaa ra chihin ndo tyicuan ri maa. Soco ñáyiví cha tahán ca ñíi cha iyó síqui ñuhu ñáyiví ihya ma cuví naquehen ñu Tatyí li Nyoo vatyi ña cuví nyehe ñu chí ra. Ta ní ña caá ra añima ñu. Ta ní ña ñohó nuu ñu chí ra. Soco nyoho ñohó nuu ndo chí ra vatyi nyaá ra chihin ndo ta cuandoo ra chihin ndo.

18 Ma sandoo maa ri mai chí ndo. Quichi tiqui nu nyaá ndo.

19 Chiin ri ca, ta ñáyiví cuenda ñuhu ñáyiví ma nyehe ca ñu chii. Soco nyoho nyehé ndo chii. Vatyi yuhu iyé, yucuan chaha nyoho coo ndo ñandihí.

20 Quiví cuan cucoto ndo tyi yuhu ñin ri cuví chihin Suti. Ta nyoho ñin ri cuví ndo chihin. Ta yuhu ñin ri cuví chihin ndo.

21 Ñu cha cumí vaha tuhun cahín, ta sacuví ñu cuhva catyí, ican ñu cuan cuví ñu cha cuñí chii. Ta ñu cha cuñí chii, Suti cucuñí ra chí ñu. Ta cuñí tucu yuhu chí ñu ta cusañahi chí ñu yóo ra cuví yuhu —catyí ra Jesús.

22 Ta catyí ra Judas, ñima ra Judas Iscariote, inga ra.

—Sutu Mañi yuhu, ¿yoso caa cha chí nyuhu cusañahun chuun, ta ñima chí ñu cuenda ñuhu ñáyiví?

23 Nacahan ra Jesús ta catyí ra:

—Ñu cuñí chii, sacuví ñu tuhun cahín. Ta Suti cuñí ra chí ñu. Ta quichi ndi nu nyaá ñu ta coo ndi chihin ñu.

24 Ñu ña cuñí chii, ña sacuví ñu cha catyí. Ta tuhun cahín cha chiñi ndo, ñima tuhun mai cuví, tuhun cahán Suti, ra cha tachí chii cuví.

25 Catyí tandihí tuhun ihya chí ndo cha ní ri ca cha nyaí chihin ndo.

26 Soco nu cuahan ca chí cutachi Suti Tatyí li ra tyiño nui. Maa ra cuví ra cutyinyee chí ndo ta cunaquehen ndahví ra chí ndo ta cusañaha ra tandihí chí ndo. Ta cusanicohon ra ñíi ndo tuhun cha yaha cahín chihin ndo.

27 Sandoi noo cha taxi coo añima ndo, tari cha taxi cuñí añime. Ican चाहí chí ndo. Ñima tari cha taxi cha ñihí ndo síqui ñuhu ñáyiví ihya. Ma caca xaan ñíi ndo ta ma yuhví ndo.

28 Chiñi ndo tuhun cha cahín nu catyí vatyi cuahin ta quichi tiqui nu nyicú ndo. Tatu cuñí ndo chii, cucusi cuñí ndo tyi catyí vatyi cuahin nu nyaá Suti. Vatyi cahnu ca cuví Suti ican saha yuhu.

29 Ta vityin catyí tiqui chí ndo cha ní cumañi ca cuhin, tacuhva quiví cuhin, cunachino ñíi ndo chí.

30 Ma cahan cuaha que chihin ndo. Vatyi vachi ra nyacá ñaha síqui ñuhu ñáyiví ihya. Vasi ña nyacá ñaha ra chí.

31 Soco cuñí chí nacoto ñáyiví iyó síqui ñuhu ñáyiví vatyi yuhu cuñí chí Nyoo Suti, ta sacuví tyiño tyaa ra chí.

Ñdicuita ndo. Coho ndo, naquita yo ihya.

1 Yuhu cuví yoho tichaha ndivi cha ndicha vaha. Ta Suti cuví ra sahá cumi chi yoho cuan.

2 Chahnyá ra soco cha ña chahá chiti. Ta soco cha chahá chiti nacahnyá ra nuu chi, ta sanduvii ra, tacuhva nacuhva ca chi cuaha ca chiti.

3 Suti cha sanduvii ra chi ndo chihin tuhun cha cahín chihin ndo.

4 Sañihi ca ndo cu ñin ri ndo chihin, tari yuhu ñin ri cuví chihin ndo. Tari noo soco yoho cuan ma cuví cuhva chi chiti cha maa ri maa chi tatu ña nyañaá chi chata yoho cahnu, tyicuan caa nyoho, ma cuví sacuvi ndo cha vaha tatu ña ñin ri cuví ndo chihin.

5 Yuhu cuví yoho cahnu cuan. Ta nyoho cuví ndo soco yoho cuan. Ñu cha nyañaá chii, ta yuhu nyañaá chi ñu, cuaha cha vaha sacuvi ñu, vatyí ñahri cha cuví sacuvi ndo tatu yori yuhu nyaá chihin ndo.

6 Ñu cha ña nyañaá chii, cusacuita Suti chi ñu, tari sacuitá yo soco yoho cha chahnyá yo vatyí ña chahá chiti. Ta na ityi ta nasataca yo, ta cucayu nu ñuhu.

7 Tatu nyoho ta tyicuan ri nyañaá ndo chii, ta ña naa iñi ndo tuhun, çacan ndo ñáá cha cuñi ndo, ta yuhu cuhve.

8 Tatu cuaha cha vaha sacuvi ndo, sacahnú xaan ndo chi Suti. Ta tyicuan caa sañahá ndo tyi cuví ndo noo ñu ndicha cha nyicón chii.

9 Yuhu cuñi chi ndo, tari cuñi Suti chii. Ma naa iñi ndo cuhva cuñi chi ndo.

10 Tatu quichahá ndo tuhun cahín, cuacuñi que chi ndo. Tari yuhu quichahí nu cahán Suti, ta cuñi xaan ra chii.

11 Cahín tyehe caa chihin ndo tacuhva na cusii cuñi ndo chihin. Ta cucusii vavaha cuñi ndo.

12 Tuhun cha catyí chi ndo, ican cuví ihya: na cuñi ndo chi tahan ndo, tari cuñi yuhu chi ndo.

13 Tatu yaha xaan cuñi yo chi tahan yo, caña iñi yo cuhva yo nyacua nya ñayiví yo cha cuenda ñu.

14 Nyoho cuví ndo amigue, tatu sacuvi ndo cha catyí chi ndo.

15 Ña catyí que vatyí musi cuví chi ndo, vatyí noo musu ña chitó ra ñáá cha sacuvi chitoho ra. Amigue, catyí chi ndo vatyí sacoté chi ndo tandihi maa cha catyí Suti chii.

16 Nyoho ña cachí ndo chii. Mai nacachí chi ndo. Ta catyí chi ndo na cuhun ndo ta sacuvi ndo tyiño nui. Ta tyiño sahá ndo cucuvaha xaan tari cuvaha noo itu. Ta cuaha vavaha niñi cucoo, ta ma tiví maa chí. Ta tyicuan caa ta Suti cuhva ra tandihi cha cacan ndo chihin sivi.

17 Ican ihya cuví cha catyí chi ndo: Cuñi ndo chi tahan ndo.

Ñáyivi cuenda ñuhu ñayiví tasi cuñi nyehe ñu chi ra Jesús ta chi ñu nyicón chi ra

18 Tatu ñu cuenda ñuhu ñayiví ña cuñi nyehe ñu chi ndo, çoto ndo vatyí xihna ca chi yuhu ña cuñi nyehe ñu.

19 Tyehe ta cuví ndo ñu cuenda ñuhu ñayiví, cucuñi ñu chi ndo tari cuñi ñu chi tahan ñu. Soco yuhu nacachí chi ndo mahñu ñu. Ta yucuan chaha tasi cuñi nyehe ñu chi ndo, vatyí ñima ca ñu cuenda ñuhu ñayiví cuví ndo.

20 Nicohon iñi ndo tuhun cha catyí chi ndo, tyi ni noo musu ta ña cahnu ca ra ican saha chitoho ra. Ta tatu quichahá ñu tuhun cahín chihin ñu, tyicuan caa cuquichaha tucu ñu tuhun sañaha ndo chi ñu. Ta tatu sataśi iñi ñu chii, cusataśi iñi tucu ñu chi nyoho.

21 Tandihi ihya cusacuvi ñu chi ndo cha catyí yuhu, vatyí ña ñohó nuu ñu chi ra cha tachí chii.

²² Tyehe ta ña quichi cahin chihin ñu, yucuan ndicha ñahri cuatyí ñu. Soco vityin ñahri siqui tyaa ñu cuenda cuatyí ñu, vatyí cha yahá catyí chí ñu.

²³ Ñu cha tasi cuñi nyehé chii, tasi cuñi nyehé ñu chí Suti ñandíhi.

²⁴ Ñahri cuatyí ñu, tyehe ta ña sacuvi milagru cha ni nonga ñáyivi ta sacuvi ca. Soco cha nyehé ñu tandíhi ihya. Ta vasi cha nyehé ñu soco tasi cuñi nyehé ñu chí, ta chí Suti ñandíhi.

²⁵ Soco tandíhi tuhun ihya cuví chí tyehe caa, vatyí cuñi chí cha chino cava tari cuhva catyí nu tutu ley cha sacuaaha ñu nu catyí chí tyehe caa: “Ñahri vihi tuhun, ta cutasi cuñi ñu nyehe ñu chí”, catyí chí.

²⁶ Soco cuquichi Tatyí Ii, ra cha cahán maa ri cha ndicha. Maa ra cuví ra cha naquehen ndahvi chí ndo. Nachai nu nyaá Suti ta cusaquichi ndi chí ra nu nyicú ndo. Ta quívi quichi ra, cucahan ra tumañi iñi cuende.

²⁷ Ta nyoho tucu cucahan ndo tumañi iñi cuende, vatyí nyaá ndo chihin nyata quívi quichahá sahatyiñe.

16

¹ Catyí tuhun ihya chí ndo tacuhva cha ma sandíhi ndo cha chinó iñi ndo chí.

² Cutava ñehe ñáyivi chí ndo vehe ñuhu. Ta cuchaa chí quívi vatyí ñu cahñi chí ndo, cucuñi ñu vatyí tyiño nuu Nyoo sacuvi ñu.

³ Tyehe caa cusacuvi ñu cha cuenda vatyí ni chíin maa ta cohon nuu ca ñu ni chí Suti ta ni chí mai.

⁴ Catyí tuhun ihya chí ndo tacuhva vatyí quívi chaa chí tari cuhva catyí chí ndo, nicohon iñi ndo vatyí cha yahá catyí chí ndo.

Tyiño sahá Tatyí Ii Nyoo

Ña catyí tuhun ihya chí ndo quívi xihna ri cha cuenda tyi nyaá que chihin ndo.

⁵ Soco vityin cuhin vatyí cunyai chihin ra cha tachí chí. Ta ni noo nyoho ña ndacá tuhun ndo chí nya cuhin.

⁶ Soco nducuihya ndíhi iñi ndo cha catyí tuhun ihya chí ndo.

⁷ Soco catyí cha ndicha chí ndo: vaha ca cha cuhin cha cuenda cha vaha chí ndo. Vatyí tatu ma cuhin, ma quichi Tatyí Ii cha naquehen ndahvi chí ndo. Soco tatu cuhin, cutachi mai chí ra.

⁸ Ta quívi quichi ra cusacoto ra chí ñáyivi iyó siqui ñuhu ñáyivi vatyí iyó cuatyí ñu. Ta cusañaha ra chí ñu vatyí iyó noo cuhva vaha tahán chí coo ñu. Ta cusacoto ra chí ñu vatyí cutuñi chí ñu nuu Nyoo.

⁹ Cusacoto ra chí ñu tyi iyó cuatyí ñu cha cuenda cha ña chinó iñi ñu chí.

¹⁰ Cusacoto ra chí ñu tyi iyó noo cuhva vaha cha tahán chí coo ñu, vatyí yuhu cuhin nu nyaá Suti ta ma nyehe ca ndo chí.

¹¹ Ta cu coto ñu tyi cusandaa Nyoo cuatyí ñu vatyí cha yahá cundaa cuatyí ra cuví cuhna, ra nyacá ñaha siqui ñuhu ñáyivi ihya.

¹² Ta cuaha ca tuhun nyaá catyí chí ndo, soco ma cutuñi iñi ndo vityin.

¹³ Soco quívi quichi Tatyí Ii cha cahán maa ri cha ndicha, maa ra cusañaha tandíhi cha ndícha chí ndo. Vatyí ñima cuenda maa ra cucahan ra, soco cucahan ra tandíhi cha chíñi ra. Ta cusacoto ra tuhun ñáá cha cucuvi nu cuahan ca chí.

¹⁴ Cusacahnu ra chí, vatyí cunaquehen ra tuhun ta cusañaha ra chí ndo.

¹⁵ Tandíhi cha iyó chí Suti, chí mai cuví ñandíhi. Yucuan chaha vatyí Tatyí Ii cuquehen cuenda ra cha iyó chí, ta cusañaha ra chí nyoho.

Ra cha cachicá noo chihin ra Jesús cuihyá iñi ra, soco nu cuahan ca chi cucusii cuñi ra, catyí ra Jesús

16 'Ña naha ca ta ma nyehe ca ndo chii, soco yaha cuan ta cunyehe tucu ndo chii, vatyí yuhu cuhin nu nyaá Suti —catyí ra Jesús.

17 Tyicuan ta suhva ra cachicá noo chihin ra, candaca tuhun ra chi tahan ra ta catyí ra:

—¿Ñana vaha tuhun cahán ra ihya? Catyí ra chi yo vatyí ña naha ca ta ma nyehe ca yo chi ra, ta yaha cuan ta cunyehe tucu yo chi ra inga chaha vatyí cuhan ra nu nyaá Sutu ra.

18 ¿Ñáa cha cuñi chi catyí cha ña naha ca cuan? Ña cutuñi iñi yo ñáa túhun cahan ra —cacatyí ra.

19 Ra Jesús tuví iñi ra vatyí cacuñi ra candaca tuhun ra chi ra, ta catyí ra:

—Yuhu catyí chi ndo vatyí ña naha ca ta ma nyehe ca ndo chii, soco yaha cuan ta nanyehe tucu ndo chii. ¿Atu ican ihya cuví cha ndacá tuhun ndo chi tahan ndo?

20 Cha ndicha catyí chi ndo vatyí nyoho cucuacu ndo ta cunducuihya iñi ndo, soco ñu cuenda ñuhu ñayiví cusii cuñi ñu. Soco vasí cuihya iñi ndo vityin, tucuihya iñi cha iyó chi ndo cunanduvi chi tusii iñi.

21 Cuhva cha cuacacu sehe noo ñaha sivi nyehé ña cha uhvi. Soco cha yaha cha cacu cha lee cuan, ni tuhun cha uhvi cuan ña nicohon ca iñi ña cha cuenda cha sii cuñi ña vatyí cacu noo cha lee sehe ña.

22 Tyicuan caa tucu nyoho vityin, nducuihyá iñi ndo. Soco cunanyehe tiqui chi ndo inga chaha. Tyicuan ta cundusii tucu iñi añima ndo. Ta yori cuví tinyaa tusii iñi cuan chi ndo.

23 'Quiví cuan ñahri ca cha cundaca tuhun ndo chii. Cha ndicha catyí chi ndo vatyí Nyoo Suti cucuhva tandihí cha cacan ndo chi ra chihin sivi.

24 Nya vityin ta ta ñaha ca cha cacan ndo chihin sivi yuhu. Çacan ndo ta cuñihí ndo tacuhva na cusii xaan cuñi ndo.

Ra Jesucristo cuví chasaha ra chi cha ña vaha iyó ñayiví

25 'Maa maa ri chihin cuhva ri sañahí chi ndo. Soco nu cuahan ca chi, ñima ca chihin cuhva cuasañahí chi ndo, soco cacatyí cachí chi ndo tuhun Suti.

26 Quiví cuan chihin sivi cucacan ndo cha cacan ndo chi ra. Ta ña chiñuhú ca cha cucuacu ndahvi nuu Suti cha cuenda ndo.

27 Vatyí maa Nyoo Suti suri cuñi ra chi ndo. Cuñi ra chi ndo vatyí nyoho cuñi ndo chii. Ta nacinó iñi ndo vatyí nu nyaá Nyoo quite.

28 Nu nyaá Suti quite vatyí quichi siqui ñuhu ñayiví ihya. Soco vityin cusandoi ñuhu ñayiví ihya vatyí cunuhi nu nyaá ra —catyí ra Jesús.

29 Tyicuan ta ra cachicá noo chihin ra cacatyí ra:

—Vityin ndicha catyí cachun chi ndi.

30 Vityin nyehe ndi vatyí chitón tandihí maa tuhun, ta ña nyatun cha ndaca tuhun ndi chuun, vatyí cha chitón nyacua nya tandihí cha chicá xiñi ndi. Yucuan chaha chinó iñi ndi vatyí nu nyaá Nyoo quiton —cacatyí ra chi ra Jesús.

31 Ta catyí ra Jesús:

—Ta vityin ¿atu chinó iñi ndo chii?

32 Soco catyí chi ndo vatyí cha vachi chi cuhva ta vityin cuví cuhva vatyí nyoho cuquiti cuatyí ndo sijn sijn ityi, ta cusandoo ndo notuhun mai. Soco ñima notuhun ri mai nyaá, vatyí nyaá Suti chihin.

³³ Catyí tuhun ihya chi ndo tacuhva na coo cha taxi ri añima ndo cha cuenda cha ñn ri cuví ndo chihin. Ñuhu ñayiví ihya cunyehe ndo tindoho, soco sanyee ndo ñni ndo vatyi yuhu cha cuví chasahí chi cha ña vaha cha iyó ñuhu ñayiví ihya.

17

Nu chicán tahvi ra Jesús cuenda ra cachicá noo chihin ra

¹ Cha yahā cha catyí ra Jesús tuhun ihya, nanyehē ndaa ra ityi andiví ta catyí ra:

—Sutu Mañi yuhu, cha chaā cuhva vityin. Saçahnu chi yuhu cha cuví sehun, tacuhva sacahnu tucu yuhu chuun.

² Vatyi tyaun tyiño chii siqui tandihí ñáyiví, vatyi cuhve ñayiví cha ma naa ca maa chi tandihí ñu chahun chii.

³ Ta ihya cuví cuhva coo ñu ñayiví cha ma naa ca maa: Cha cohon nuu ñu chuun vatyi noo tuhun ri maun cuví Nyoo cha ndicha vaha, ta cohon nuu ñu chí yuhu ra Jesucristo ra cha tachun chí.

⁴ 'Cha sacahní chuun ihya siqui ñuhu ñayiví ta cha sandihí tyiño cha chahun chii.

⁵ Ta vityin, Sutu Mañi yuhu, cua ndichi nu nyaun, načuhva cha cahnun cuví maun chii, tari cuhva cha chiyo chii nyata ni cumañi ca chino ñuhu ñayiví.

⁶ Tandihí ra cha chahun chii ra cha natavā vahun mahñu ñu iyó siqui ñuhu ñayiví ihya sacote chí ra yóo ra cuví yoho. Chi maun cuví chí ra ta chahun chí ra chii. Ta quichahá ra tuhun cahún.

⁷ Vityin cachitó ra vatyi tandihí cha chahun chii, nu nyaún quita.

⁸ Vatyi catyí chí ra tuhun cha catyun chii, ta maa ra canatñn cuenda ra. Ta tuví ñni ra vatyi ndicha cha quite nu nyaún, ta chinó ñni ra tyí maun tachí chii.

⁹ 'Yuhu chiquén cha cuenda ra chuun. Ña chiquén cha cuenda ñáyiví ña ñohó nuu chuun, soco chiquén cha cuenda ra cha chahun chii, vatyi chí maun cuví chí ra.

¹⁰ Tandihí cha iyó chii, chí maun cuví. Ta tandihí cha chuun, chí mai cuví. Ta tandihí cuan sacahnú chii.

¹¹ Yuhu ma ndoo que ñuhu ñayiví ihya, soco maa ra cundoo ra ñuhu ñayiví ihya. Ta yuhu cuhin tyi cunyai chuhun. Sutu Mañi yuhu, saha cumi chihin cha ndicha ñuhu chí ra cha chahun chii, tacuhva na cu ñn ri ra chihin ra tahan ra, tari yoho chihin yuhu, ñn ri cuví yo.

¹² Quiví chinyai ñuhu ñayiví ihya chihin ra, saha cumi chí ra cha chahun chii chihin cha ndicha ñuhun. Ta sahí cuenda chí ra. Ta ni noo ra ña cuanaa soco noo tuhun ri ra cha cha nyaá maa cunaa, ican ra cuan cunaa, tacuhva chino cava tari cuhva catyí nu tutu maun.

¹³ Vityin cha vachi nu nyaún, soco cha ni ri ca cha nyaí siqui ñuhu ñayiví ihya, catyí tuhun ihya tacuhva na cusii cuñi ra tari mai.

¹⁴ Yuhu catyí chí ra tuhun cahún, soco ñáyiví cuenda ñuhu ñayiví tasi cuñí nyehe ñu chí ra nyicón chí yo, cha cuenda vatyi ñima ra cuenda ñuhu ñayiví cuví ra, tari yuhu, ñima ra cuenda ñuhu ñayiví cuví.

¹⁵ Ña chiquén chuun cha tavon chí ra nyicón chí yo nu ñuhu ñayiví ihya, soco saha cumen chí ra coto ñáá cha saha ra ña vaha chí ra.

¹⁶ Tari yuhu ñima ra cuenda ñuhu ñayiví cuví, tyicuan caa tucu ra ihya, ñima ra cuenda ñuhu ñayiví cuví ra.

¹⁷ Cuhva cha ndicha chi ra nasacuvi ra maa maa ri cuhva cuñi maun. Tuhun cahún, ican cuví cha ndicha.

¹⁸ Tari tachun chi yuhu nu nyicú ñu iyó siqui ñuhu ñayivi, tyicuan caa tachj tucu yuhu chi maa ra nyicón chi yo nu nyicú ñu iyó siqui ñuhu ñayivi.

¹⁹ Ta cha cuenda cha vaha chi ra, sacuvi yuhu maa maa ri cuhva cuñi maun, tacuhva vatyí chihin cha ndicha, cuví sacuvi tucu maa ra maa maa ri cuhva cuñi maun.

²⁰ 'Soco ñima cha cuenda ri ra ihya chiquén chuun, soco chicán tiqui cha cuenda ñáyivi cha cuchino ifni chii chihin tuhun cahán ra ihya nu cuahan ca chi.

²¹ Chiquén chuun na tandihi ñu ta ñin ri na cuvi ñu chihin tahan ñu. Ta noo ri na cuvi ñu chihin yo, Sutu Mañi yuhu. Tari yoho nyaún chihin ta yuhu nyaí chuhun, na cu ñin ri cuvi ñu chihin yo, tacuhva vatyí tandihi ñáyivi iyó siqui ñuhu ñayivi chino ifni ñu tyi maun tachj chii.

²² Yuhu चाहि cha ndicha ñuhu chi ñu nyicón chi yo, suri cha ndicha ñuhu cha चाहun chii. Vatyí chihin cuan na ñin ri cuvi ñu tari yoho chihin yuhu noo ri cuvi yo.

²³ Yuhu nyaí chihin ñu ta yoho nyaún chihin, tacuhva na cuvi yo noo ri chihin ñu. Tyicuan caa ta coto tandihi ñáyivi iyó siqui ñuhu ñayivi tyi maun tachj chii, ta cuñi xaun chi ñu nyicón chi yo tari cuñún chi yuhu.

²⁴ 'Sutu Mañi yuhu, maun चाहun chi ñu chii. Ta cuñi cha cunyaa ñu chihin nu cuacunyaí, tacuhva nanyehe ñu cha ndicha ñuhu cha चाहun chii vatyí cuñún chii nyata ni cumañi ca chino ñuhu ñayivi.

²⁵ Sutu Mañi yuhu, ra vaha cuvún, ta ñu cuenda ñuhu ñayivi ña ñohó nuu ñu chuun, soco yuhu ñohó nuí chuun. Ta ra nyicón chi yo ihya chitó ra tyi maun tachj chii.

²⁶ Cha catyi chi ra yóo ra cuvún, ta cucatyí tiqui inga chaha, tacuhva vatyí tari cuhva cuñún chii, tyicuan caa cuhva cuacuñi tucu maa ra chi ra tahan ra. Ta yuhu cunyai añima ra.

18

Nu cuahan ra Jesús vehe caa (Mt. 26.47-56; Mr. 14.43-50; Lc. 22.47-53)

¹ Cha yahā cha catyi ra Jesús tuhun ihya, quitā ra ta cuahan ra chihin ra cachicá noo chihin ra inga chiyo yuhu yuvi Cedrón. Ta yucuan nyaá noo chacu yutun yucu. Ta yucuan quihvi ra Jesús chihin ra cachicá noo chihin ra.

² Ta ra Judas, ra cha naxicó tuhun chi ra, chitó ra nu cuahan ra Jesús. Vatyí tuhvá ra Jesús चाहán ra yucuan chihin ra cha cachicá noo chihin ra.

³ Ta yucuan chaā ra Judas chihin cuaha sindaro ta cuaha policia cuenda vehe ñuhu cha tachj ra cuví nuu chi tata sutu ta ra cuví fariseo. Chaā coyo ra yucuan, canyisó ra mityi, ta canyiso ra lámpara ta ñuhu yiti.

⁴ Ta vatyí ra Jesús cha chitó ra tandihi cha cucuvi chi ra, quitā ra ta ndacā tuhun ra chi ra:

—¿Yóo chi nanducú ndo? —catyi ra.

⁵ Ta cacatyí ra chi ra:

—Chi ra Jesús ra ñuu Nazaret.

Ta catyi ra Jesús:

—Yuhu cuví —catyi ra.

Ta ra Judas, ra cha naxicó tuhun chi ra Jesús nuu ra xaan iñi chi ra, nanyaá ra chihin ra yucuan.

⁶ Ta cuhva cha catyí ra Jesús: “Yuhu cuví”, tandihi ra canandacá chata ra ta canduvá ra nu ñuhu.

⁷ Tyicuan ta inga tucu chaha ndacá tuhun ra Jesús chi ra, ta catyí ra:

—¿Yóó chi nanducú ndo?

Ta cacatyí ra:

—Chi ra Jesús ra ñuu Nazaret.

⁸ Ta catyí ra Jesús:

—Cha catyí chi ndo tyi yuhu cuví. Tatu chii nanducú ndo, saña ndo chi ra chica noo chihin na cunuhun coyo ra —catyí ra Jesús chi ra.

⁹ Ican tyehe caa catyí ra Jesús tacuhva na chino cava cha catyí maa ra ta ityi chata ca nu catyí ra: “Ra cha chahá Suti chii, ni noo ra ña cuanaá.”

¹⁰ Tyicuan ta ra Simón Pedro nyisó ra noo mityi. Ta tavá ra ta chahnya ra soho chiyo vaha noo ra cha nañí Malco. Cuví ra cuan musu ra cuví nuu chi tandihi tata sutu.

¹¹ Soco ra Jesús catyí ra chi ra Pedro:

—Natyihí mityun chichi veno. Tatu Nyoo Suti ta cuñí ra cha nyehi tindocho, tahán chi cha nyehi —catyí ra Jesús chi ra.

Nu nanyaá ra Jesús nuu ra cuví nuu chi tata sutu

(Mt. 26.57-58; Mr. 14.53-54; Lc. 22.54)

¹² Tyicuan ta sindaro cuan chihin capitán ra, ta policía cuenda vehe ñuhu, catiñ ra chi ra Jesús, ta chahñi ra chi ra vatyí cuhun ra vehe caa.

¹³ Tyicuan ta chinyacá ra chi ra vehe ra Anás, vatyí ra Anás cuan tyiso ra Caifás cuví chi ra. Ta cuiya cuan cuví ra Caifás ra cuví nuu chi tata sutu.

¹⁴ Ican ra Caifás ihya cuví ra cha catyí chi ra cacuví nuu chi ñu Israel vatyí vaha ca cha cúvi noo ri rayi cha cuenda tandihi ñáyivi ñuu.

Nu catyí ra Pedro tyi ña ñohó nuu ra chi ra Jesús

(Mt. 26.69-70; Mr. 14.66-68; Lc. 22.55-57)

¹⁵ Ra Simón Pedro ta nonga ra cha chicá noo chihin ra Jesús, canyicón ra chi ra Jesús nu cuahan ra nuquehe vehe ra Anás cuan. Ta ra cuví nuu chi tata sutu cuan ñohó nuu ra chi inga ra cuan. Yucuan chaha quihvi ra cuan chihin ra Jesús nuquehe ra cuví nuu cuan.

¹⁶ Soco ra Pedro ndoo ra yuvehe chata vehe. Yucuan chaha quitá ra cha ñohó nuu chi ra cuví nuu chi tata sutu cuan, ta cahan ra chihin ñaha cha nyaá yuvehe cuan. Ta tyihí ra chi ra Pedro chichi nuquehe cuan.

¹⁷ Tyicuan ta ñaha cha nyaá yuvehe cuan ndacá tuhun ña chi ra Pedro, ta catyí ña:

—¿Atu ñima noo ra chicá noo chihin rayi cuan cuvín?

Ta ra Pedro catyí ra:

—Ñime cuví —catyí ra chi ña.

¹⁸ Tyicuan ta musu ta policía cha tayucú yucuan, casanatahan ra ñuhu vatyí vichin xaan. Ta tayucú ra casanasaá ra chi ra. Ta ñohó tucu ra Pedro cuan yunuhu cuan, sanasaá ra chi ra.

Nu sanahmá ra cuví nuu chi tata sutu chi ra Jesús

(Mt. 26.59-66; Mr. 14.55-64; Lc. 22.66-71)

¹⁹ Tyicuan ta ra cuví nuu chi tata sutu quichahá ndaca tuhun ra chi ra Jesús, yóó ra cuví ra cachicá noo chihin ra, ta ñáá cha sañahá ra chi ñáyivi.

²⁰ Ta ra Jesús catyí ra chi ra:

—Yuhu chihin nuu tandihi ñáyiví cahín. Ta sañahí chichi vehe ñuhu tahan tahan ñuu ta chichi vehe ñuhu cahnu ñuu ihya nu ndu ín ri tandihi ñu Israel. Ta ñahri tuhun xehe cahín.

²¹¿Ñáá tuhun cha ndacá tuhun chii? Vaha taxin ca ndaca tuhun chi ñu cha chiñí tuhun cahín, ta maa ñu nacatyí ñu ñáá tuhun cahín chihin ñu. Maa ñu chitó ñu ñáá tuhun cahín —catyí ra Jesús chi ra.

²²Cuhva cha catyí ra Jesús tuhun ihya, noo policia vehe ñuhu cha nanyaá cuan, cañi ra noo nuu ra Jesús ta catyí ra:

—¿Atu tyiña caa nacahún nu cahán ra cuví nuu chi tata sutu? —catyí ra chi ra Jesús.

²³Ta ra Jesús catyí ra:

—Tatu cahín noo tuhun ña vaha, catyí chii nya maa maa ña vaha cahín. Soco tatu cahín tuhun vaha, ¿ñáá tuhun cha cañun chii? —catyí ra Jesús chi ra cuan.

²⁴Yahá cuan ta nuhñí ra Jesús, ta tachí ra Anás chi ra nu nyaá ra Caifás, ra cuví nuu chi tata sutu.

Nu catyí ra Pedro inga chaha vatyí ña ñohó nuu ra chi ra Jesús

(Mt. 26.71-75; Mr. 14.66-72; Lc. 22.58-62)

²⁵Ta ra Pedro nanyaá ca ra yunuhu cuan sanasaá ra chi ra. Ta catyí ñu chi ra:

—¿Atu ñima noo ra chicá noo chihin ra cuan cuví yoho? —catyí ñu chi ra.

Ta ra Pedro tixehe ra, ta catyí ra:

—Ñime.

²⁶Tyicuan ta noo musu ra cuví nuu chi tata sutu, noo ra cha cuví ñáyiví chi ra cha chahnyá ra Pedro soho, quichahá ndaca tuhun ra ta catyí ra:

—Ta caa cuiri tyi nyehí chuun chihin ra chichi chacu cuan —catyí ra chi ra Pedro.

²⁷Ta ra Pedro tixehe ra inga chaha, ta caa cuhva ri cuan ta chacu noo loho.

Nu nanyaá ra Jesús nuu ra Pilato

(Mt. 27.1-2, 11-14; Mr. 15.1-5; Lc. 23.1-5)

²⁸Yahá cuan ta quitá coyo ra chihin ra Jesús vehe ra Caifás ta chinyaca ra chi ra vehe tyiño gobernador. Cha vachi cundichin ta ra Israel ña caquihví ra chichi vehe tyiño cuan vatyí ñima vehe ñu Israel cuví. Ta vatyí catyí ñu tyi yica cha quihví ñu vehe savahri vatyí coto ma cuví cuxiñi ñu quiví vico pascua cuan.

²⁹Yucuan chaha quitá ra Pilato vatyí cahan ra chihin ra, ta catyí ra:

—¿Ñáá cuatyí tyaá ndo siqui ra ihya? —catyí ra Pilato chi ra ñuu Israel.

³⁰Ta canacahan ra Israel ta catyí ra:

—Tyehe ta ñima noo ra iyó cuatyí cuví ra, ma nacuhva cuenda ndi chi ra chuun —cacatyí ra chi ra Pilato.

³¹Tyicuan ta ra Pilato catyí ra chi ra:

—Quehen maa ndo chi ra, na cutuñi chi ra nuu maa ndo tari cuhva catyí ley maa ndo.

Ta nacahan ra ñuu Israel cuan ta cacatyí ra:

—Soco nyuhu ñu Israel ñahri ityi iyó chí ndi cha cahñi ndi chi ni noo ñáyiví —catyí ra.

³²Tyicuan caa chinó cava cha catyí ra Jesús yoso caa cucúvi ra.

³³Tyicuan ta nandihví tucu ra Pilato chichi vehe tyiño cuan inga chaha. Ta caná ra chi ra Jesús ta ndacá tuhun ra chi ra:

—¿Atu yoho cuvún rey cuenda ñu Israel? —catyí ra chi ra.

³⁴ Ta ra Jesús catyí ra:

—¿Atu cha cuenda maun ndaca tuhun, o inga ñu nacatyí ñu tuhun chuun?
—catyí ra Jesús chi ra Pilato.

³⁵ Ta catyí ra Pilato:

—Ñima ra ñuu Israel cuví yuhu. Suri ra ñuu maun ta ra cuví nuu chi tata sutu ñuu maun cuví ra canacuhva cuenda chuun chii. ¿Ñáá cha sacuvun?
—catyí ra chi ra Jesús.

³⁶ Tyicuan ta nacahan ra Jesús ta catyí ra:

—Nu nyacá ñahi ñima cuenda ñuhu ñayiví ihya cuví. Tyehe ta ican, ra nyicón chii cañi tahan ra tacuhva ma cunyai ndaha ra Israel. Soco nu nyacá ñahi, ñima cuenda ihya cuví —catyí ra Jesús chi ra Pilato.

³⁷ Tyicuan ta ra Pilato catyí ra chi ra:

—¿Tu tyicuan caa, rey cuvún vii? —catyí ra Pilato chi ra Jesús.

Ta nacahan ra Jesús ta catyí ra:

—Rey cuví tari catyun chiña. Yucuan cuenda caquj ta vachi ñuhu ñayiví ihya, vatyí catyí ñáá cha cuví cha ndicha. Tandihí ñu quichaha cha ndicha, tyasohó ñu tuhun cahín —catyí ra Jesús.

³⁸ Ta ra Pilato catyí ra chi ra:

—¿Ta ñáá cha cuví cha ndicha? —catyí ra.

Nu cuacacahñi ra chi ra Jesús

(Mt. 27.15-31; Mr. 15.6-20; Lc. 23.13-25)

Cha yahá cha ndaca tuhun ra tuhun ihya, quitá ra Pilato chicahan ra chihin ra Israel inga chaha ta catyí ra:

—Yuhu ña nañihi mai ní noo cuatyí ra ihya.

³⁹ Soco nyoho iyó noo costumbre chi ndo cha chican ndo na sañe chi noo ra ñohó vehe caa cha vico pascua ihya. ¿Atu cuñi ndo cha sañe chi ra cha cuví rey cuenda ndo ñu Israel? —catyí ra Pilato chi ra.

⁴⁰ Tyicuan ta tandihí ra quichaha canachaa ra ta catyí ra:

—¡Ma sañon chi ra chiña! ¡Chi ra Barrabás sañon! —catyí ra.

Ta ra Barrabás cuví ra noo ra suhu.

19

¹ Tyicuan ta quehen ra Pilato chi ra Jesús ta tachí ra na cucañi sindaro chi ra.

² Ta sindaro savaha ra noo corona chihin iñu ta catyihí ra xiñi ra Jesús. Ta sacuihño ra chi ra chihin noo sahma tyacu nyaa tari cha tuhvá rey cañihno.

³ Tyicuan ta catuhva ra nu nanyaá ra ta chacú nyaa ra chi ra, ta cacatyí ra: —¡Nocumi chuun yoho Rey cuenda ñu Israel! —cacatyí ra, ta cacatú ra chi ra.

⁴ Tyicuan ta quitá tucu ra Pilato inga chaha ta catyí ra chi ra:

—Nyehé ndo cuatave chi ra ityi nuu ndo tacuhva nanyehé ndo vatyí ni noo cuatyí ra ña nañihí —catyí ra Pilato chi ra.

⁵ Ta quitá ra Jesús yihí corona iñu cuan xiñi ra, ta ñihno ra sahma tyacu nyaa cuan. Tyicuan ta ra Pilato catyí ra chi ra:

—¡Ma ra ihya! —catyí ra chi ra.

⁶ Cuhva cha cananyehé ra cacuví nuu chi tata sutu ta policía chi ra, quichaha cacana chaa ra ta catyí ra:

—¡Cahñi chi ra nu cruzi! ¡Cahñi chi ra nu cruzi! —cacatyí ra.

Soco ra Pilato catyí ra chi ra:

—Quehen maa ndo chi ra ta cahñi maa ndo chi ra nu cruzi. Vaty yuhu ni noo cuatyí ra ña nañihí.

⁷ Soco nacahan ra Israel cuan ta cacatyí ra:

—Iyó noo ley chi ndi, ta cuhva catyí ley ndi, cuñí chi cha cúvi ra vatyí nasahá ra Sehe Nyoo chi ra —cacatyí ra.

⁸ Cha chiñi ra Pilato tuhun ihya, nayuhví ca ra.

⁹ Ta ndihvi tucu ra inga chaha chichi vehe tyiño, ta ndaca tuhun ra chi ra Jesús:

—¿Nya quita yoho? —catyí ra chi ra.

Soco ra Jesús ñahri cha nacahan ra.

¹⁰ Tyicuan ta ra Pilato catyí ra chi ra:

—¿Ñáa tuhun ña nacahún nu cahán yuhu? ¿Atu ña chitón vatyí ra cuví tyiño cuví ta iyó ityí chii cha tyai chuun nu cruzi, ta iyó tucu ityí chii cha sañe chuun? —catyí ra Pilato chi ra Jesús.

¹¹ Ta nacahan ra Jesús ta catyí ra:

—Tyehe ta ña chaha Nyoo tyiño cuan chuun, ñahri ityí iyó chuun cha tachi tuñun chii. Yucuan chaha, ra cha cachaha cuenda chii chuun, cahnu ca cuatyí ra ican saha yoho —catyí ra Jesús chi ra Pilato.

¹² Nya cuhva cuan ta nducu ra Pilato cuhva saña ra chi ra Jesús, soco ra Israel cacana chaa ra siqui ra, ta catyí ra:

—¡Tatu sañon chi ra, ñima amigo rey cahnu cuví chuun! Vatyí tandihí ri ra cha catyí tyi rey cuví ra, ra xaan iñi chi rey cahnu cuví ra —cacatyí ra.

¹³ Tyicuan ta cha chiñi ra Pilato tuhun ihya, tachí ra na quita ra Jesús ityí chata vehe. Ta chicunyaá ra Pilato nu tyayu ra nu tuhvá ra sandaa cuatyí ñáyivi nu nañi chi Gabata chihin sahan hebreo, ta cuñí chi catyí: “Nu yihí yuu”.

¹⁴ Ta cuví chi noo quivi cha ni cumañi ca vico pascua, ñáa cuhva ora. Tyicuan ta ra Pilato catyí ra chi ra Israel cuan:

—¡Ma rey ndo chiña!

¹⁵ Soco maa ra Israel canachaá ra ta cacatyí ra:

—¡Na cúvi ra! ¡Na cúvi ra! ¡Cahñi chi ra nu cruzi! —cacatyí ra.

Ta ra Pilato catyí ra chi ra:

—¿Atu cahñi nu cruzi chi rey ndo?

Soco ra cacuví nuu chi tata sutu cacatyí ra:

—Yori ca rey iyó. Noo tuhun ri ra César, cha cuví rey cahnu —catyí ra.

¹⁶ Tyicuan ta ra Pilato chaha cuenda ra chi ra Jesús chi ra na cunyaa ra nu cruzi. Ta quehen sindaro chi ra, ta cuahan ra chihin ra.

Nu chihí ra Jesucristo nu cruzi

(Mt. 27.32-44; Mr. 15.21-32; Lc. 23.26-43)

¹⁷ Ta nyisó ra Jesús cruzi ra, cuahan ra noo nu nañi: “Yiqui Xiñi Ndiyí”. Ta chihin sahan hebreo nañi chí Gólgota.

¹⁸ Ta yucuan catyaa ra chi ra nu cruzi chihin clavu. Ta ñn ri chihin ra catyaa ra uvi ca ra. Noo ra tacaá ra noo nu cruzi inchiyo xiin ra ta inga ra inga chiyo xiin ra. Ta ra Jesús tacaá ra mahñu.

¹⁹ Ta ra Pilato tachí ra tyiño na cunyaa letra xiñi cruzi cuan. Ta catyí chi tyehe caa: “Ra Jesús ra ñuu Nazaret, Rey cuenda ñu ñuu Israel.”

²⁰ Ta cuaha ñu Israel sacuahá ñu tuhun cuan, vatyí yatyn ri ñuu ñu cuví nu chinanyaá ra cruzi ra Jesús. Ta letra cuan nyaá chihin sahan hebreo, ta sahan griego, ta sahan latín.

²¹ Yucuan chaha ra cacuví nuu chi tata sutu cacatyí ra chi ra Pilato:

—Ma tyaun: “Rey cuenda ñu ñuu Israel”, vaha ca tyaun: “Ican ra ihya cha catyí vatyí rey cuenda ñu ñuu Israel cuví ra” —cacatyí ra.

²² Soco ra Pilato catyí ra:

—Noo cha yahā tyaj, nandoo maa tyicuan caa —catyí ra chi ra.

²³ Cha yahā cha catyāa sindaro cuan chi ra Jesús nu cruzi, canaquehen ra sahma ra ta cha cumi tahan ra quehen ra noo noo sahma ra. Ta ndoo nonga sahma ra cha ña quicu ñu. Noo ri savahā ñu nyacua nya siqui ta nya yuvi.

²⁴ Ta sindaro cuan cacatyí ra chi ra tahan ra:

—Ma cahnya yo. Cuhun yo noo sihva, nyehe yo yóo chi tahan chi sahma cuan —cacatyí ra.

Tyicuan caa cuví tari cuhva catyí nu tutu Nyoo nu catyí chi tyehe caa: “Casacha ra sahme ta chahan ra noo sihva chihin chi, nyehe ra yóo ra saha canaa.” Ta ican ihya cacuví sindaro cuan.

²⁵ Ta chaha cruzi ra Jesús nanyaá sihi ra. Ta nanyaá tucu cuhu ña, ta cu María ñasihi ra Cleofas, ta cu María ñaha Magdala.

²⁶ Ta nanyehe ra Jesús chi sihi ra, nanyaá ña yatyin ri. Ta nanyehe tucu ra chi ra cha chica noo chihin ra, ra cha cuñí xaan ra chi. Ta catyí ra chi sihi ra:

—Ma sehun nanyaá chiña —catyí ra.

²⁷ Tyicuan ta catyí ra chi ra cha cuñí xaan ra chi:

—Ma sihun nanyaá chiña —catyí ra chi ra.

Ta nya quivi cuan ta naquehen cuenda ra chi ña cuanuhu ña vehe ra.

Nu chihí ra Jesús

(Mt. 27.45-56; Mr. 15.33-41; Lc. 23.44-49)

²⁸ Cha yahā tuhun ihya, cha nyehe ra Jesús vatyí cha ndihí tyiño saha ra. Tyicuan ta catyí ra:

—Ityi ndutya —catyí ra.

Ta chihin tuhun cuan nachino cava tuhun cha nyaá nu tutu Nyoo.

²⁹ Ta yucuan nanyaá noo quivi tyitú chihin vinagre. Tyicuan ta casatyí ra chihin noo xixan ndutya iya cuan. Ta tyaā ra noo nu socio yutun cha nañí hisopo, ta catyāñaā ra nya yuhu ra.

³⁰ Chihí ra Jesús ndutya cuan ta catyí ra:

—Cha iyó vaha tandihí vityin —catyí ra.

Tyicuan ta nacañi noo ra xiñi ra ta chihí ra.

Nu quiñi lanza yiqui naha ra Jesús

³¹ Noo ri ca quivi cumañi ta cuví quivi cahnu ca vico pascua cuan, ta ra cacuví nuu chi ñu Israel ña cuñí ra cha ndoo coño ñuhu cuan nu cruzi quivi nyitatu ñu, vatyí quivi nyitatu ñu quivi ii cuví. Yucuan chaha chican ra tumañi iñi chi ra Pilato na tachi ra na cuahnu sindaro sihin ra cha catacoyo nu cruzi cuan tacuhva na cacuví ra cha numi ri, ta cañehe ra coño ñuhu ra.

³² Tyicuan ta cuahan coyo sindaro nu tayucú cruzi cuan. Ta chahnū ra sihin noo ra cha tacaá yucuan. Tyicuan ta chahnū tucu ra sihin inga ra cha tacaá xiin ra Jesús.

³³ Soco cuhva cha cuatuhva ra nu tacaá ra Jesús, cananyehe ra vatyí cha chihí ra. Ta yucuan chaha ña cachahnū ca ra sihin ra.

³⁴ Soco suvita ri noo sindaro cuan quiñi ra lanza yiqui naha ra Jesús. Ta quitā niñi ta ndutya.

³⁵ Ra cha nacatyí tuhun ihya, noo ra cha nyehe cuví ra. Ta cha ndicha cahán ra, vatyí maa ra chitó ra vatyí cha ndicha cahán ra, tacuhva nachino tucu iñi nyoho.

³⁶ Vatyí tuhun ihya cuví chi tyehe caa tari cuhva catyí tuhun Nyoo nu catyí chi: “Ni noo yiquí ra ta ma tahnu.”

³⁷ Ta iyó nonga tucu nu catyí chi nu tutu Nyoo tyehe caa: “Cunyehe ñu chi ra cha quiñi ra lanza chi.”

Nu quihví ra Jesús chichi ñuhú
(Mt. 27.57-61; Mr. 15.42-47; Lc. 23.50-56)

³⁸ Cha yahá tuhun ihya, ra José ra ñuu Arimatea chican ra chi ra Pilato nacuhva ra cha naquehen ra coño ñuhu ra Jesús. Ta ra José cuan cuví ra noo ra yihí cuenda ra Jesús vasi xehe ri cha cuenda cha yuhví ra chi ra cacuví nuu chi ñu Israel. Tyicuan ta chahá ra Pilato permisu chi ra, ta ra José chahan ra chinaquehen ra coño ñuhu cuan.

³⁹ Chahan tucu ra Nicodemo, ra cha chahan chicahan chihin ra Jesús cha cha cuaa. Chaa ra chihin ndutya vixi chahán. Ta noo ndutya vixi chahán cha nañi mirra nasaca ñu chihin inga cha nañi áloe. Ta quita chi tari noo oco uchi kilu cha tandihí.

⁴⁰ Yucuan ta ra José ta ra Nicodemo caquehen ra coño ñuhu ra Jesús ta canasiqui noo ra chi ra chihin sahma cuiñi cahyu ra ndutya vixi chahán cuan, tari cuhva noo tuhun cha iyó chi ñu Israel tu cuatyihí ñu noo ndiyí chichi ñuhú.

⁴¹ Yatin nu cachahñi ra chi ra Jesús nu cruzi nyaá noo chacu yutun yucu vixi. Ta chichi chacu cuan nyaá noo ñaña chaa nu ta cohon ca ni noo ndiyí.

⁴² Yucuan tyihí ra coño ñuhu ra Jesús vatyí yatin ri cuan nyaá ñaña cuan ta vatyí cha cua quichaha quiví nyitatu ñu Israel.

20

Nu nandoto ra Jesús
(Mt. 28.1-10; Mr. 16.1-8; Lc. 24.1-12)

¹ Cha timingu cha ñaa ca, cu María ñaha Magdala cuan chahan ña nu ñaña. Ta nyehe ña tyi ñahri ca yuu nyasí yuhu ñaña cuan.

² Tyicuan ta chinó vavaha ña cuahan ña nu nyaá ra Simón Pedro ta inga ra chica noo chihin ra Jesús, ra cha cuñi xaan ra Jesús chi. Ta catyí ña chi ra:

—Quehen ñáyivi coño ñuhu Sutu Mañi yo chichi ñaña, ta ña chitó yo nya chinyaca ñu —catyí cu María chi ra Pedro ta chi inga ra cuan.

³ Tyicuan ta ra Pedro ta inga ra cuan cuahan coyo ra nu ñaña.

⁴ Nínduvi ra ñin ri cuahan coyo ra cachino ra. Soco chino ca inga ra cuan ican saha ra Pedro, ta xihna ca ra chaa nu ñaña.

⁵ Quichaha nyehe ñihñi ra chichi ñaña, ta nyehe ra sahma cuiñi cha yihí coño ñuhu ra Jesús, catuví cuan. Soco ña quihví ra chichi ñaña.

⁶ Yahá cuan ta chaa ra Simón Pedro chata ra, ta quihví ra chichi ñaña cuan. Suri nyehe tucu ra cuan sahma cuan catuví.

⁷ Ta suri nyehe tucu ra vatyí sahma cha siqui noo xiñi ra Jesús, ña ñin ri cayucú chihin inga sahma cuan, soco catuví siñ.

⁸ Tyicuan ta quihví tucu inga ra chica noo chihin ra Jesús cuan, ra cha chaa cha xihna ri nu ñaña cuan. Ta nyehe ra cha cuví cuan, ta chinó iñi ra.

⁹ Vatyí cha cuví maa ta cutuñi ca iñi ra cha catyí nu tutu Nyoo, vatyí ra Jesús cuñi chi cha nandoto ra cha yahá chihí ra.

10 Tyicuan ta ra cachicā noo chihin ra Jesús cuanuhu coyo ra nya vehe.

*Nu tui ra Jesús nuu cu María ñaha ñuu Magdala
(Mr. 16.9-11)*

11 Soco cu María ndoo ña chata yatyin ri yuhu ñaña, chacú chaa ña. Cha ñiri ca cha chacú ña, nyehé ñihñi ña chichi ñaña.

12 Ta nyehé ña uvi tahan ángel ñihñó ra sahma cuichin, nyicú ra nu catuvi coño ñuhu ra Jesús. Noo ra nyaá ityi nu catuvi xiñi ra, ta nonga ra ityi nu catuvi chaha ra.

13 Ta ángel cuan ndacā tuhun ra chi ña ta catyí ra:

—Maha, ¿ñáá tuhun chacú chaun?

Ta catyí ña:

—Vatyí quehen ñu chi Sutu Mañi yuhu, ta ña chité nya tyihí ñu chi ra —catyí ña chi ángel cuan.

14 Ni cahán ña tuhun ihya ta nanyocavā ña ta nanyehé ña chi ra Jesús yucuan. Soco ña chitó ña cha ra Jesús cuví ra.

15 Tyicuan ta ra Jesús ndacā tuhun ra chi ña:

—¿Ñáá tuhun chacún? ¿Yóó chi nanducún? —catyí ra chi ña.

Cuñi maa ña vatyí ra sahá cumi chacu cuan cuví ra. Ta catyí ña:

—Tata, tatu yoho quehun chi ra Jesús, catyí chii nya sandoun chi ra, vatyí naquehin chi ra —catyí ña chi ra.

16 Tyicuan ta catyí ra Jesús chi ña:

—¡María! —catyí ra chi ña.

Maa ña nanyehé ña ta cahan ña chihin ra chihin sahan hebreo, ta catyí ña:

—¡Raboni! —Ta cuñi chi catyí: “Maestro”.

17 Ta catyí ra Jesús chi ña:

—Ma tiun chii, vatyí ta nandaa que nu nyaá Suti. Soco cuahan ta catyun chi tandihí yañi vatyí cuahin nu nyaá Suti, ta suri Sutu ndo cuví chi ra. Cuahin nu nyaá Nyoi, ta suri Nyoo ndo cuví chi ra —catyí ra Jesús chi ña.

18 Tyicuan ta chahan cu María ñaha Magdala cuan chisacoto ña chi ra cachicā noo chihin ra Jesús vatyí nyehé ña chi ra Jesús ta catyí ra tuhun cuan chi ña.

*Nu tui ra Jesús nuu ra cachicā noo chihin ra
(Mt. 28.16-20; Mr. 16.14-18; Lc. 24.36-49)*

19 Suri maa quiví cuan cha quichaha vitya, cha cuacuaa ta candu iin ri ra cachicā noo chihin ra Jesús. Ta nyasí vaha yuvehe nu nyicú ra cha cuenda cha yuhví ra chi ra cacuví nuu chi ñu Israel. Ta ra Jesús tui ra ta chicuinanyaā ra mahñu. Ta chahā ra nocumi chi ra, ta catyí ra:

—Na coo cha taxi ri añima ndo —catyí ra.

20 Cha yahā cha catyí ra tuhun ihya ta sañahā ra ndaha ra ta yiqui naha ra. Ta maa ra cacusii cuñi ra cha nanyehé ra chi Sutu Mañi yo.

21 Ta catyí tucu ra Jesús inga chaha chi ra:

—Na coo cha taxi ri añima ndo. Tari tachí Suti tyiño chii, tyicuan caa tachí tyiño chi nyoho —catyí ra chi ra.

22 Tyicuan ta tiví ra siqui ra ta catyí ra chi ra:

—Ñaquehen ndo Tatyí Ii Nyoo.

23 Ñu cha sahá ndo tucahnu iñi chi, iyó tucahnu iñi chi ñu. Ta ñu cha ña sahá ndo tucahnu iñi chi, ñahri tucahnu iñi iyó chi ñu —catyí ra Jesús chi ra.

Nu nyehé ra Tomás chi Sutu Mañi yo cha yahā nandoto ra

²⁴ Soco ra Tomás, noo ra chica noo chihin ra Jesús, ra cha catyí ñu: “ra tinihi”, yori ra nyaá chihin ra cuhva cha quichi ra Jesús.

²⁵ Yahá cuan ta canacatyí ra cachica noo chihin ra Jesús chi ra:

—Nyehe ndi chi Sutu Mañi yo —cacatyí ra chi ra.

Soco ra Tomás catyí ra:

—Tatu ma nyehi ndaha ra nu cahví nu yihí clavu, ta tatu ma tyihi ndahi nu yihí clavu cuan, ta tatu ma tyihi ndahi yiqui naha ra, ma chino iñi —catyí ra Tomás.

²⁶ Uña quivi yahá ta canycú tucu ra cachica noo chihin ra Jesús noo vehe.

Ta nyaá ra Tomás chihin ra. Tyicuan ta vasi nyasí vaha yuvehe soco quihví ra Jesús ta chicuinyaa ra mahñu ra. Ta chahá ra nocumi ta catyí ra:

—Na coo cha taxi ri ñhima ndo.

²⁷ Tyicuan ta quichaha catyí ra chi ra Tomás:

—Tyihi nu ndahun nu cahví ndahi. Ta tyihi ndahun yiqui nahi. Ta ma caca uvi iñun, soco chino iñun —catyí ra Jesús chi ra Tomás.

²⁸ Tyicuan ta nacahan ra Tomás ta catyí ra:

—¡Sutu Mañi yuhu! ¡Nyoo Suti cuví chuun! —catyí ra Tomás.

²⁹ Ta catyí ra Jesús chi ra:

—Yoho Tomás, vityin chinó iñun tyi nyehún chi. Si ca cuñí ñu cha ña nyehe ta chinó iñi ñu —catyí ra Jesús chi ra Tomás.

Nu sacoto ra Juan ñáá cuenda chinqo libru ihya

³⁰ Ta cuaha ca milagru sacuví ra Jesús nuu ra cachica noo chihin ra, ta ñahri chicunya nu libru ihya.

³¹ Soco chicunyaá tuhun ihya vatyí tacuhva chino iñi ndo vatyí ra Jesús cuví Cristo, ra cuví Sehe Nyoo, ta vatyí coo ndo ñayiví cha ma naa ca maa tatu chinó iñi ndo chi ra.

21

Nu tuví ra Jesús nuu ucha tahan ra cachica noo chihin ra

¹ Cha yahá cuan ta tuví tucu ra Jesús nuu ra cachica noo chihin ra inga chaha. Tyehe caa tuví ra yuhu miñi Tiberias.

² ñn ri nyicú ra Simón Pedro ta ra Tomás cha catyí ñu: “ra tinihi” chi, ta ra Natanael, ra ñuu Caná nu cuví Galilea. Nyicú tucu sehe ra Zebedeo ta uvi ca ra cachica noo chihin ra Jesús.

³ Ta catyí ra Simón Pedro chi ra:

—Cuahin cuatiin tiyaca —catyí ra.

Ta cacatyí ra chi ra:

—Cuhun tucu nyuhu chuhun —cacatyí ra.

Cuahan coyo ra ta quihví coyo ra chichi noo canoa, soco cha cuaa cuan ni noo tiyaca ña catiñ ra.

⁴ Cha vachi cundichin cuan tuví ra Jesús nu ñiti yuhu miñi cuan. Soco ra cachica noo chihin ra, ña canicohón nuu ra chi ra.

⁵ Tyicuan ta catyí ra chi ra:

—Yoho ra tahan yo, ¿atu ta ñihi ca ndo tiyaca?

Ta canacahan ra ta catyí ra:

—Ta ñihi ca ndi.

⁶ Tyicuan ta nacahan ra Jesús ta catyí ra:

—Tyihi ndo tarraya chiyo vaha canoa chiña, ta ñihi ndo —catyí ra Jesús chi ra.

Tyicuan caa casacuv̄i ra, ta yaha cuan ta nyacua ña cuv̄i tava ra tarraya cuan nu ndutya chaha cha cuaha tiyaca yihí.

⁷ Ta ra cha cuñí xaan ra Jesús chii catyí ra chi ra Pedro:

—¡Sutu Mañi yo cuv̄i! —catyí ra chi ra Pedro.

Cha chiñi ra Simón Pedro vatyí Sutu Mañi yo cuv̄i, ndihv̄i noo ra sahma ra, vatyí tava ra cha cuat̄in ra tiyaca, ta quiñi ra cuahan ra chichi ndutya cuan.

⁸ Ta inga ra cachic̄a noo chihin ra Jesús chāa coyo ra nya yuhu miñi cuan chihin canoa, caxitá ra tarraya cuan tyitú yihí tiyaca, vatyí yatyin ri yuhu miñi cuan cañohó ra ta cha noo cientu metru ri.

⁹ Cuhva cha canoó ra nu ñuhú, cananyehe ra noo nu caá titi ñuh̄u. Ta catuv̄i noo tiyaca siqui titi ñuh̄u cuan, ta pan ñand̄ih̄i.

¹⁰ Ta ra Jesús catyí ra chi ra:

—Nyaca ndo suhva tiyaca cha ni t̄in ndo —catyí ra Jesús chi ra.

¹¹ Ta ra Simón Pedro ndāa ra nu canoa ta quichahā xita quiñoho ra tarraya tyitú yihí tiyaca nahnu. Cientu uvi xico uchi uñi tahan ti ñohó. Ta vasi cuaha ti, ña tahn̄ya tarraya cuan.

¹² Tyicuan ta catyí ra Jesús chi ra:

—Ñaha ndo ta curumusa ndo —catyí ra Jesús chi ra.

Ta ni noo ra cachic̄a noo chihin ra ña cacañā iñi ra candaca tuhun ra yóo ra cuv̄i ra vatyí cachitó ra vatyí Sutu Mañi yo cuv̄i ra.

¹³ Tyicuan ta tuhva ra Jesús ta quehen ra pan, ta chahā ra chi ra. Ta suri tyicuan caa sacuv̄i ra chihin tiyaca.

¹⁴ Ican ihya cuv̄i chaha cu uñi cha tuv̄i ra Jesús nuu ra cachic̄a noo chihin ra cha yah̄a cha nandot̄o ra.

Nu cahán ra Jesús chihin ra Simón Pedro

¹⁵ Cha yah̄a cha curumusa ra Jesús, ndacāa tuhun ra chi ra Simón Pedro:

—Simón, sehe ra Jonás, ¿atu cuñí con chii ican saha ra ihya?

Ta nacahan ra Pedro ta catyí ra:

—Ay, Sutu Mañi yuhu, maun chitón tyi cuñí chuun —catyí ra Pedro.

Ta catyí ra Jesús chi ra:

—Cuhva cha cachi mbee nyihi sane —catyí ra Jesús chi ra Pedro.

¹⁶ Ta ndacāa tuhun ra Jesús chi ra inga chaha:

—Simón sehe ra Jonás, ¿atu cuñún chii? —catyí ra Jesús chi ra.

Ta nacahan ra Pedro ta catyí ra:

—Sutu Mañi yuhu, maun chitón tyi cuñí chuun —catyí ra Pedro chi ra.

Ta catyí ra chi ra:

—Saha cumi mbee sane —catyí ra Jesús chi ra Pedro.

¹⁷ Ta chaha cu uñi ndacāa tuhun ra chi ra:

—Simón Pedro, sehe ra Jonás, ¿atu cuñun chii? —catyí ra Jesús chi ra.

Cuhva cha ndacāa tuhun ra chi ra cha cu uñi chaha tatu cuñí ra chi ra, ra Pedro nducuihya iñi ra, ta catyí ra chi ra:

—Sutu Mañi yuhu, maun chitón yoso caa añime ta maun chitón tyi cuñí chuun —catyí ra Pedro.

Ta ra Jesús catyí ra chi ra:

—Saha nuenda mbee sane.

¹⁸ Cha ndicha catyí chuun vatyí ta tyivaun ndihv̄i noun sahmon ta chahun nu cuñún. Soco na cuchahnun, cusanacaun ndahun ta inga ra cusandihv̄i noo chuun. Ta cunyaca ra chuun nu ña cuñún cuhun —catyí ra Jesús chi ra Pedro.

¹⁹ Cha catyí ra Jesús tuhun ihya cuñí ra catyí ra yoso caa cucúvi ra Pedro ta cusacahnú ra chí Nyoo cha cuenda cuan. Yahá cuan ta catyí ra Jesús chí ra Pedro:

—¡Cunyicon chii! —catyí ra chí ra.

Nu cahán ra Juan tuhun maa ra

²⁰ Tyicuan ta nyocavá ra Pedro ta nanyehé ra vatyi nyicón inga ra cha chica noo chihin ra Jesús, ra cha cuñí xaan ra Jesús chí. Suri maa ra chinyañaá ra chí ra Jesús cha cuxiñi ra quívi cuan. Ta ndacá tuhun ra ta catyí ra: “Sutu Mañi yuhu, ¿yóó ra cunaxico tuhun chuun?” catyí ra, ndacá tuhun ra quívi cha ní cumañi cúvi ra Jesús.

²¹ Cuhva cha nanyehé ra Pedro chí ra, ndacá tuhun ra chí ra Jesús:

—Sutu Mañi yuhu, ta ra ihya, ¿ñáá cha cucuvi chí ra? —catyí ra chí ra.

²² Nacahan ra Jesús ta catyí ra:

—Tatu cuñí mai cha coo ra nyacua nya ndichi inga chaha, ¿ñáá cha cuenda yoho? Yoho cunyicon chii —catyí ra Jesús chí ra Pedro.

²³ Tyicuan ta chityá tuhun ihya nu canyicú yañi yo vatyi ra cuan, ma cúvi ra. Soco ña catyí ra Jesús cha ma cúvi ra. Catyí ra: “Tatu cuñí yuhu cha coo ra nyacua nya quíchi inga chaha, ¿ñáá cha cuenda yoho?”

²⁴ Yuhu cuví ra yucuan, ra cha cahán ra Jesús tuhun. Ta nyehi tandihí cuii maa cha cuví ta tyaj nu libru ihya. Yuhu chite vatyi tandihí cha tyaj, ndicha.

²⁵ Iyó cuaaha ca cha sacuvi ra Jesús. Tyehe ta chicunyaá tahan tahan tuhun cuan nu libru, cahví iñi tyi naniñi ñuhu ñayiví ma cutahan tandihí libru cuan.

Tyiño Cha Casacuví Ra Apóstol: Ra Cha Tyatyíño Ra Jesucristo Chi

Nu catyí ra Jesús tyi cuaquichi Tatyí Ii Nyoo

1 Yoho Teófilo, yuhu ra Lucas sacuhin tutu chuun quivi cuan. Ta nu sacuhin tutu cha xihna ri cuan, tyaj tandihi cha quichahā sacuvi ra Jesús ta tandihi cha sañahā ra nya quivi xihna ri

2 ta nya quivi nandaā xica ra andivi. Ta cha cumañi ca nandaa ra andivi, nacachj ra chi ra apóstol cuenda ra. Ta tyatyíño ra chi ra chihin Tatyí Ii Nyoo tyi cacaca ra tyiño ra.

3 Ta maa ra Jesús nyehe ra tindoho ta chihj ra. Ta cha yahā cuan, nandoto ra ta tuvj ra nu canyicú ra apóstol. Ta chichi cha uvi xico quivi, cuaha xaan chaha tuvj ra nu canyicú ra, vatyí na cacoto ra vatyí ndicha cha nyitó ra. Ta cahān ra tuhun yoso caa nyacá ñaha Nyoo chi yo.

4 Cuhva cha nyaá ca ra chihin ra, ra Jesús catyí ra chi ra:

—Ma quita ndo Jerusalén ihya, nyacua nya naquehen ndo Tatyí Ii cha catyí Suti tyi cuhva ra chi ndo, tari catyí chi ndo quivi cuan.

5 Chihin ndutya sacondutya ra Juan chi ñáyivi. Soco nyoho ña cuaha ca quivi ta cucondutya ndo chihin Tatyí Ii —catyí ra Jesús.

Nu nandaā xica ra Jesús andivi

6 Cuhva cha canyicú ra apóstol ñin ri chihin ra Jesús, ta candacā tuhun ra chi ra:

—Sutu Mañi yuhu, ¿atu vityin ri cusacacun chi ñuu yo Israel ihya ndaha ra ñuu Roma? —catyí ra.

7 Ta nacahān ra Jesús ta catyí ra:

—Ña tahán chi coto nyoho nya quivi. Noo tuhun ri maa Nyoo Sutu yo cuacatyí ra ama.

8 Soco cuhva cha quichi Tatyí Ii siqui ndo cunaquehen ndo tunyee ñni, ta cuquita ndo vatyí cahan ndo tuhin Jerusalén ihya ta tandihi ñuu cha nyicú Judea ta Samaria, ta nicahnu ñuhu ñáyivi.

9 Ta cha yahā cha catyí ra Jesús tuhun ihya, ta cha ni ri ca cha canyehé ra chi ra, nandaā xica ra andivi, ta quihvi ra chichi noo vico. Ta ña canyehé ca ra chi ra.

10 Ta cuhva cha canyehé ndaa ra andivi, ta tuvj uvi tahan ángel yatyin nu canyicú ra. Ñihnó ra sahma cuichin.

11 Ta cacatyí ra cuan chi ra:

—Nyoho ra Galilea, ¿ñáá tuhun cha ndoo ndo nyehé ndaa ndo andivi? Suri maa ra Jesús cha nyehe ndo nandaā xica ihya, tyehe caa cuquichi tucu ra inga chaha.

Nu canacachí ra apóstol chi ra Matías vatyí ndihvi ra tyiño nuu ra Judas

12 Tyicuan ta quitā coyo ra apóstol nu chinyicú ra yucu nu iyó yutun olivo cuan. Ta cuanuhú coyo ra ñuu Jerusalén. Ta yatyin ri nyaá ñuu cuan, tari sava hora ri. Ta sava ri hora cuví caca ñáyivi quivi nyitatu ñu, vatyí tyicuan caa catyí ley cha tyaa ra Moisés.

13 Cuhva cha nachaa coyo ra Jerusalén cuan, candaā ra nu cu uvi piso noo vehe nu ca iyó ra. Ta tandihi ra cuan, ican ra cuví, ra Pedro, ra Jacobo, ra

Juan, ra Andrés, ra Felipe, ra Tomás, ra Bartolomé, ra Mateo, ra Jacobo sehe ra Alfeo, ta ra Simón cuenda ra cacuñi naquiqui siqui gobiernu Roma, ta ra Judas yañi ra Jacobo.

¹⁴ Ta nyita ri ndu ñin ri ra ta ñin ri cuhva cachicá xiñi ra ta cachicán tahvi ra chi Nyoo. Ta nyicú tucu yañi ra Jesús ta cu María sihi ra, ta inga ñusihi ñandihí.

¹⁵ Tari noo ciento oco ñáyivi ndu ñin ri ñu quivi cuan. Ta nicuinanyaꝯ ra Pedro. Ta catyí ra chi ñu:

¹⁶ —Nyoho yañi, cuñi chi cha cuví tari cuhva catyí nu tutu Nyoo. Vatyí cahan Tatyí li chihin yuhu ra David yoso caa cucuhva cuenda ra Judas chi ra Jesús chi ra xaan iñi chi ra.

¹⁷ Ta ra Judas cuví ra noo ra chindihí chihin yo. Ta ñin ri chicá ra tyiño Sutu Mañi yo chihin yo.

¹⁸ Soco chahan ra, ta sata ra noo ñuhú chihin xuhun cha ñihí ra cha chahꝯ cuenda ra chi ra Jesús. Yahaꝯ cuan ta canacavaꝯ ra chihin xiñi ra, ta ndataꝯ chichi ra ta quitꝯ tandihí chiti yihvi ra.

¹⁹ Ta quivi cha cachito ñu ca iyó Jerusalén ihya cha chihí ra, casacunañi ñu chi ñuhu cuan Acéldama. Ta cha chihin sahan maa ñu cuñi chi catyí Nu Catuvi Niñi.

²⁰ Vatyí nu libru Salmo catyí chi tuhun ra Judas tyehe caa:

Na ndoo maa ri maa vehe ra.

Ta yori coo chichi.

Ta catyí tucu chi:

Inga ra cunanduvi tyiño nuu ra.

²¹⁻²² Ta vityin nyicú ra cachicꝯ noo chihin yo quivi chinaꝯ Sutu Mañi yo Jesús chihin yo; nya quivi sacondutyaꝯ ra Juan chi ra, ta nya quivi nandaꝯ xica ra andivi. Ta vityin cuñi chi cha ndu ñin ri noo ra chihin yo, vatyí cuvi ra cha ndaa cha cuenda cha nandotoꝯ ra Cristo —catyí ra Pedro.

²³ Tyicuan ta cacanaꝯ ra chi uvi tahan ra, chi ra José cha nañi Barsabás, ta suri nañi tucu ra Justo; ta cacanaꝯ tucu ra chi ra Matías.

²⁴ Ta cachicán tahvi ra tyehe caa:

—Sutu Mañi yuhu, yoho chitón cha caa añima tandihí ndi. Sañaha chi ndi chichi cha uvi tahan ra ihya, nya ra cha nacachí maun,

²⁵ vatyí sacuvi ra tyiño cha sacunaꝯ ra Judas cha cuenda cuatyí ra, ta cuahan ra nu tahán chi cuhun ra —cacatyí ra, chicán tahvi ra.

²⁶ Tyicuan ta cachahan ra noo sihva, tacuhva nyehe ra nya ra tahán chi nyatu cuan chi. Ta tahaꝯ chi chi ra Matías. Ta yucuan cuví nu ndu ñin ri ra chihin ndi uchi ñin apóstol.

2

Nu chaꝯ Tatyí Ii

¹ Ta ñin ri nyicú ñáyivi yihí cuenda ra Jesús ta chaꝯ quivi vico Pentecostés cha sanducahnú ñáyivi Israel. Ta ñin ri cuhva chicá xiñi ñu.

² Ta sana iñi ñu ta nacuiñi ñu noo cha cayu vachi ityi andivi. Tari cha cayu yahaꝯ noo tatyí ñihí. Ta iyo cuví tandihí chichí vehe nu canyicú ñu.

³ Tyicuan ta tuví tari yaa ñuhú quitꝯ cuatyí siqui noo noo ñu.

⁴ Ta tandihí ñu chitu ñu chihin Tatyí Ii. Ta quichahꝯ cahan ñu inga sahan yoso cuhva saquehen ityi maa Tatyí Ii chi ñu.

⁵ Ta quiví cuan cuaha xaan ra Israel ra vaha chicá chihin Nyoo canyicú ra ñuu Jerusalén cuan. Cuaha xaan ra ca iyó inga ityi nicahnu siqui ñuhú ñáyiví cháa coyo vatyí casanducahnu ra vico Pentecostés.

⁶ Ta cha cachiñi ra cuan cha iyo xaan cuví nu canyicú ñu, ta cuahan coyo ra ta nataca ra yatyin ri nu nyicú ñu. Ta ña cutuñi ñi ra ñáá cha cuví cuan, vatyí noo noo ra cachiñi ra cahán ñu cuhva sahan cha cacahán maa ra.

⁷ Iyo cuñi ra ta catyí ra chi ra tahan ra:

—¿Atu ñima ñu Galilea cuví tandihi ñu cha cahán ihya?

⁸ ¿Ñáá tuhun cha chiñi yo cahán ñu cuhva sahan noo noo yo?

⁹ Ihya nyicú yo cha cuví yo ñu Partia, ta ñu Media, ta ñu Elam, ta ñu Mesopotamia, ta ñu Judea, ta ñu Capadocia, ta ñu Ponto, ta ñu Asia.

¹⁰ Ta ñu Frigia ta ñu Panfilia, ta ñu Egipto, ta ñu iyó ityi nuu ca Cirene ityi Africa. Ta nyicú tucu ñu ñuu Roma cha iyó ñuu ihya. Ta suhva ñu cuví ñu ñu Israel nya quiví cacú ñu. Ta inga ñu cuví ñu ñáyiví nanduví cuenda ñu Israel ta nyicon ñu ley ra Moisés.

¹¹ Iyó tucu ñáyiví ñuhú Creta ta ñu Arabia. Soco tandihi yo ta chiñi yo cahán ñu chihin sahan cha cahán yo. Ta nacatyí ñu cha cahnu cha sacuví Nyoo —cacatyí ra.

¹² Tandihi ra, iyo xaan cacuñi ra, ta yihí ra ndacá tuhun ra chi tahan ra:

—¿Ñáá cha cuñi chi catyí chi tandihi tuhun ihya? —catyí ra.

¹³ Soco inga ra cahán nyaa ra ta cacatyí ra vatyí cachiñi ñu.

Nu cahán noo ra Pedro nuu ñáyiví

¹⁴ Tyicuan ta nicuinanyaá ra Pedro chihin inga uchi ñin tahan apóstol. Ta chihin cha cháa cahán ra ta catyí ra:

—Nyoho yañi, cha cuví ndo ra Israel, ta tandihi nyoho cha iyó ndo Jerusalén ihya. Coño ndo tuhun ihya. Ta cuiñi vaha ndo tuhun cha cuacatyí chi ndo.

¹⁵ Vatyí cuñi maa ndo tyi chiñi ndi. Soco ña chiñi ndi, vatyí ña tuhvá ñáyiví chiñi cha cuhva ihya, vatyí ni ca ñin cha ñaha ri cuví.

¹⁶ Soco ihya cuví tuhun cha cahán ra Joel, ra cuví profeta Nyoo ta cha naha. Vatyí catyí ra:

¹⁷ Nu cuandihí ca quiví, catyí Nyoo, cusaquichi Tatyí Ii siqui tandihi ñáyiví. Ta cucahan sehe ndo cuende. Ta ra tyivaa ta ñu tyivaa cunyehe ñu cha sañaha Nyoo chí ñu. Ta ra chahnu cunyehe ra ñumahna.

¹⁸ Cusaquichi Tatyí Ii siqui ñu sacuví tyiño nui. Ta cucahan ñu cuende, catyí Nyoo.

¹⁹ Ta catyí ra vatyí cusañaha ra cha iyo cucuvi ityi andiví. Ta ityi nu ñuhu ñáyiví cusañaha ra seña, seña niñi, seña ñuhú, ta vico ñuhma.

²⁰ Cunduñaa ñanyii. Ta yoo tari caa tyacu niñi cunanduvi. Tyicuan caa cucuvi cha niri ca cha chá quiví quichi Sutu Mañi yo. Ta cucuvi noo quiví cahnu vatyí cucutuñi chí yo nuu ra.

²¹ Ta tandihi ñu chicán tahvi siví ra cucacu ñu. Tyicuan caa catyí ra Joel.

²² Cuiñi ndo nyoho ra Israel. Cuiñi ndo tuhun cha cuacatyí ihya. Ra Jesús ra Nazaret cuví ra noo ra cha cachí Nyoo chí vatyí quichi ra nu nyicu yo. Ta chitó yo vatyí ndicha vatyí cuaha xaan cha iyo, ta cuaha xaan milagru ta seña sacuví Nyoo nu canyicú yo cha cuenda ra Jesús. Ta nyoho chitó vaha ndo tuhun ihya.

²³ Soco quiví quehen cuenda ndo chi ra, sacuví ndo tari cuhva tyaa maa Nyoo cuhva nyata quiví xihna ri. Vatyí chaha cuenda ndo chi ra chí ra quiñi iyó. Ta chitacaá ra chi ra nu cruzi. Ta tyicuan caa chahñi ndo chi ra.

²⁴ Soco Nyoo sanandoto ra chi ra vatyí sacacú ra chi ra ndaha tuhun chihi. Vatyí tuhun chihi ña cuví cunyaca ñaha chi ra.

²⁵ Vatyí ra David cahan ra tuhun ra Cristo ta cha naha, ta catyí ra: Tyicuan ri nyehí chi Sutu Mañi yo ityi nui.

Maa ra nyaá ñin chiyo vahi ta ñahri maa cha cuví sayuhví chii.

²⁶ Yucuan chaha cusii ñi xaan cuñí añime. Ta chité yaa chihin cha sii cuñí. Ta siin ri coño ñuhi cunyitatu chi vatyí chité tyi cunandote.

²⁷ Vatyí yoho Nyoo Suti, ma sandoun añime nu nyicu ñu chihi, ta ni ma cuhvon cha tyahyu coño ñuhi.

Vatyí sehe iun cuví chii.

²⁸ Sañahún ityi cha cuahan nu coi ñayiví chaa cha ma naa ca maa. Ta sacutún chii chihin tusii ñi vatyí nyaún chihin, catyí ra David ta cha naha.

²⁹ Nyoho yañi, chitó cachi yo vatyí ra David sutu chahnu yo chihí ra ta quihví ra chichi ñuhu. Ta ñaña ra nyaá ca chi ihya nya vityin.

³⁰ Soco ra David cuví ra noo profeta cuenda Nyoo. Ta chitó ra vatyí Nyoo tyaa ra cuhva ta ñin ri tuhun cahan ra chihin ra vatyí suri tata maa ra ícan cuacac ra Cristo. Ta ra Cristo, ícan ra cunyaca ñaha.

³¹ Ta tyicuan caa ra David tari cha vatyí nyehé ra cha cuacuvi nu cuahan ca chí quiví. Ta cahan ra tuhun cha cunandoto ra Cristo. Ta catyí ra vatyí ma ndoo añima ra nu nyicu ñu chihí. Ta ni ma tyahyu coño ñuhu ra, catyí ra.

³² Ta ra Jesús ihya sanandoto Nyoo chí ra. Ta tuhun ihya tandihí maa ndi cuví ndi cha ndaa.

³³ Nyoo sacahnú ra chí ra Jesús, ta cuatyaá ra chí ra chiyo vaha ra andiví. Ta ra Jesús naquehen cuenda ra Tatyí Ii cha catyí Sutu yo Nyoo ta cha naha vatyí cuhva ra chí yo. Ta ícan cuví cha chahá ra chí ndi vityin. Ícan cuví nyehé ndo ta chiñi ndo.

³⁴ Vatyí ñima ra David nandaá ra andiví. Vatyí suri maa ra David cahan ra tuhun ra Jesús, ta catyí ra:

Catyí Suti Nyoo chí Suti ra Cristo: “Cunyaa chiyo vahi

³⁵ cha niri ca cha caquin chí ra xaan ñi chuun chahun”, catyí Nyoo chí ra Cristo chihin yuhu ra David.

³⁶ Nyoho ta tandihí ca ñu Israel, coto vaha ndo vatyí tuhun ra Jesús ícan cahín ihya. Chitacaá ndo chí ra nu cruzi. Soco Nyoo cuatyaá ra chí ra tyi cuví ra Sutu Mañi yo, ra nyaca ñaha chí yo —catyí ra Pedro.

³⁷ Cuhva cha chiñi ñu tuhun cahan ra Pedro ihya, nducuihya ñi ñu. Ta ndaca tuhun ñu chí ra Pedro ta chí tandihí ca ra apóstol, ta catyí ñu:

—Nyoho yañi, ¿yoso caa sacuví ndi vityin? —catyí ñu chí ra.

³⁸ Yucuan ta catyí ra Pedro chí ñu:

—Noo noo ndo ndu uvi ñi ndo catyí ndo ta ñasama ndo cuhva iyó ndo nuu Nyoo. Ta condutya ndo chihin sívi ra Jesucristo. Tacuhva na saha ra ticahnu ñi cuatyí ndo. Tyicuan caa ta cua cuhva Nyoo Tatyí Ii ra chí ndo.

³⁹ Vatyí cha naha catyí Nyoo vatyí cuhva ra Tatyí Ii ra chí maa ndo, ta chí sehe ndo, ta chí ñu cha cañi nyaá ñandihí. Vatyí tandihí ñu cha nacana Sutu Mañi yo Nyoo chii cucuhva ra Tatyí Ii ra chí ñu.

⁴⁰ Chihin tuhun ihya ta chihin inga tuhun, ra Pedro chahá ra tuhun chí ñu ta catyí ra chí ñu:

—Nducu ndo cuhva na sacacu Nyoo chi ndo, tacuhva cuví sandoo ndo cha caa ñáyivi quiñi iyó ihya —catyí ra chi ñu.

⁴¹ Tyicuan ta tandihi ñu cha natiin cuenda tuhun cahān ra Pedro condutyā ñu. Ta quita tari noo uñi mil ñu, ta ndu iin ri ñu chihin ñu yihí cuenda ra Jesucristo.

⁴² Ta tyicuan ri ndu iin ri tandihi ñu, ta chihin cha nñi iñi ñu tyasoho ñu cha sañahá ra apóstol chi ñu. Ta iin ri cuví ñu chihin tahan ñu, ta chicán tahvi ñu ta chachí ñu pan ta chihí ñu vinu vatyí nicohón iñi ñu tyi chihí ra Cristo tyiño nuu ñu.

Cuhva iyó ñu yihí cuenda Sutu Mañi yo Jesucristo quiñi cuan

⁴³ Ta cuaha milagru ta seña sacuví Nyoo chihin ndaha ra apóstol. Ta tandihi maa ñáyivi iyo cuñi ñu.

⁴⁴ Tandihi ñu yihí cuenda ra Cristo iin ri cacuví ñu chihin cha iyó chi ñu.

⁴⁵ Xicó ñu cha tyayii ñu ta cha iyó chi ñu. Ta sachá ñu xuhun ñu chi tahan ñu yoso cuhva cha chiñuhú chi noo noo ñu.

⁴⁶ Ndiquivi ta ndu iin ri ñu nya vehe ñuhu cahnu. Ta ndu iin tucu ri ñu noo noo vehe tahan ñu ta chachí ñu pan ta chihí ñu vinu. Ta iin ri cachachí ñu chihin cha sñi cuñi añima ñu. Ta chahá ñu cha cachi tahan ñu chihin cha nñi iñi ñu.

⁴⁷ Ta sacahnú ñu chi Nyoo. Ta vaha cahán tandihi ñáyivi siqui ñu. Ta tahan tahan quiñi cuahan sanducuahá ca Sutu Mañi yo chi ñu cha cuahán sacacu ra.

3

Nu nduvahā noo ra coxo

¹ Noo quiñi cuahán coyo ra Pedro chihin ra Juan vehe ñuhu cahnu. Cuví chi cuhva caa uñi cha cha iñi, cuhva cha tuhvá ñáyivi Israel cachicán tahvi ñu chi Nyoo.

² Ta ndi quivi maa nyaá noo ra ndahvi, ra coxo nyata cacu, yuvehe ñuhu cahnu cuan. Vatyí chinyacá ñu chi ra na cacan ra limuxtan chi ñáyivi quiñi yuvehe cuan, ta nañi chí: Yuvehe Tyaqui.

³ Tyicuan ta nanyehē ra coxo cuan chí ra Pedro ta chi ra Juan cha cuaquiñvi ra chichi vehe ñuhu cahnu. Ta chicān ra noo limuxtan chí ra.

⁴ Ta cananyehē ra Pedro ta ra Juan chí ra. Ta ra Pedro catyí ra chí ra:

—Nyehe chi ndi —catyí ra.

⁵ Tyicuan ta quichahā nyehe ra coxo cuan chí ra. Cuñi maa ra vatyí iyó cha cuacuhva ra chí ra.

⁶ Soco ra Pedro catyí ra chí ra:

—Ñahri maa xuhun cuichin ta xuhun cuaan iyó chii, ta cuhve chuun. Soco nonga cha iyó chii cua cuhve chuun. Chihin siñi ra Jesucristo ra Nazaret, catyí chuun, ndicuita ta caçon —catyí ra Pedro chí ra.

⁷ Tyicuan ta tiñi ra Pedro ndaha chiyo vaha ra ta nacoñehē ra chí ra. Ta caa cuhva ri cuan nicoq fuerza chaha ra ta tatu chaha ra.

⁸ Tyicuan ta ra coxo cuan ndava ra noo, ta nicuinanyaā ra. Ta quichahā chica ra. Ta quiñvi ra chihin ra chichi vehe ñuhu. Ta chicá ra. Ta cañá ndava ra. Ta sacahnú ra chí Nyoo.

⁹ Tandihi ñáyivi nyehe ñu chicá ra ta sacahnú ra chí Nyoo.

¹⁰ Ta iyo xaan cuñí ñu ta yuhví ñu cha cuenda cha nduvahā ra cuan. Vatyí nichóhón nuu ñu chi ra. Ta chító ñu vatyí suri maa ra cuví cha tuhva chinyaā Yuvehe Tyaquí cuan chican ra limuxtan.

Nu cahán noo ra Pedro tuhun ra Cristo nuu ñáyiví nu cuví corredor ra Salomón

¹¹ Ra coxo cha nduvahā cuan, ña saña maa ra chi ra Pedro ta ra Juan. Ta tandihí ñáyiví iyo cuñí ñu ta chinqo ñu nataca ñu nu nyicú ra, nya nu cuví corredor ra Salomón chichi vehe ñuhu.

¹² Cha nanyehē ra Pedro cha tyicuan caa, catyí ra chi ñáyiví:

—Nyoho ra Israel, ¿ñáá tuhun cha iyo xaan cuñí nyoho? ¿Ñáá tuhun cha nyehé xaan ndo chí nyuhu? Tari cha vatyí chihin tunyee iñi maa ndi, o cha cuenda cha cachi iyó ndi nuu Nyoo, sanduvahā ndi chí rayi ihya, cuñí maa ndo.

¹³ Nyuhu ña cuví sanduvaha ndi chí ñáyiví. Nyoo cuenda sutu chahnu yo, ra Abraham, ra Isaac, ta ra Jacob, ican ra sacahnú xaan ca ra chí Sehe ra, ra Jesús. Ta maa ndo chahā cuenda ndo chí ra chí ra Pilato, ra cuví tyiño. Ta maa ra cuñi ra saña ra chí ra. Soco nyoho ña chahā ndo.

¹⁴ Cha nuu cha cacan ndo cha saña ra chí ra vaha, ra ii cuan, nyoho chican ndo cha saña ra chí noo ra tuhvá chahñi ñáyiví.

¹⁵ Tyicuan caa chahñi ndo chí ra cha chahá ñáyiví chaa coo yo chihin Nyoo. Soco Nyoo sanandoto ra chí ra. Ta ña ndoo ra chihin ñu chihí. Ta nyuhu cuví ndi cha ndaa.

¹⁶ Ta suri maa ra Jesús cuví ra chahā fuerza chaha ra coxo ihya. Vatyí chinó iñi ndi tyi iyó tunyee iñi chí ra Jesús. Yucuan chaha ndunyeē chaha ra ihya, ta ñohó nuu vaha ndo chí ra ihya. Ta nduvahā ra vatyí chinó iñi ndi chí ra Jesús. Ta tandihí nyoho cha nyehē maa ndo vityin.

¹⁷ Chité yañi —catyí ra Pedro— vatyí quiví cha chahñi ndo chí ra Jesús, ña chító ndo tyi ña vaha cha nyacuví ndo. Ta tyicuan caa tucu ra cuví nuu chí ndo, ña chachító ra.

¹⁸ Soco tyehē caa chinqo cava tuhun cahān Nyoo chihin yuhu ra profeta cuenda ra ta cha naha, vatyí catyí ra vatyí ra Cristo cunyehe ra tindofo.

¹⁹ Yucuan chaha ndu uvi iñi ndo cuatyí ndo. Ta nacuhva ndo añaima ndo chí Nyoo, tacuhva na ndachí cuatyí ndo. Tyicuan ta Sutu Mañi yo sandunyeē ra añaima ndo vatyí cohon ra añaima ndo.

²⁰ Tyicuan ta cutachi ra chí ra Jesús ra cuví Cristo na quichi ra inga chaha. Vatyí quiví xihna ri tyaā Nyoo cuhva tyi quichi ra cha cuenda ndo.

²¹ Tahán chí cha ndoo ra Jesucristo andiví cha vityin nyacua nya sanduchaa Nyoo tandihí maa. Tari cuhva catyí maa ra chihin yuhu ra profeta cuenda ra ta cha naha.

²² Vatyí tyicuan caa catyí ra Moisés chí sutu chahnu yo: “Cusaquichi Sutu yo Nyoo chí noo ra cahan cuenda ra. Ta suri ñáyiví chí yo cucuví ra. Ta cuacahan ra tuhun Nyoo chihin ndo tari cahán yuhu. Quichaha ndo tandihí cha catyí ra chí ndo.

²³ Vatyí tandihí ñu cha ma tyasoho tuhun cahan ra, cunaa ñu, vatyí ma cu ñi ri ñu chihin ñáyiví cachi Nyoo chii”, catyí ra Moisés.

²⁴ Ta tyicuan caa tucu tandihí profeta cuenda Nyoo nya quiví ra Samuel ta nyacua nya vityin, casacoto ra tuhun cha cuví vityin.

²⁵ Tandihí promesa cha chahā Nyoo cha cahān ra profeta tuhun ta cha naha, chí maa ndo cuví. Ta tuhun cha natyihí tahan Nyoo chihin sutu chahnu yo, chihin ra Abraham, suri cha cuenda maa ndo cuví. Vatyí catyí

Nyoo chi ra Abraham: “Tandihi ñáyivi cha iyó siqui ñuhu ñayivi cunasoque chi ñu cha cuenda ñáyivi chuun.”

²⁶ Ta quivi sanandoto Nyoo chi Sehe ra, xihna ca nu nyicú ndo tachi ra chi ra, vatyí nasoco ra chi ndo. Tacuhva vatyí tahan tahan ndo sandoo ndo cha quiñi caa —catyí ra Pedro chi ñu.

4

Nu catiñ ra cacuví nuu vehe ñuhu cahnu chi ra Pedro ta chi ra Juan

¹ Ni cahán ca ra Pedro ta ra Juan chihin ñáyivi, ta chaꝯ coyo tata sutu cuenda ñu Israel chihin ra cuví nuu chi ra sahá cumi vehe ñuhu, ta chihin ra cuví saduceo.

² Cacuxaan xaan ra vatyí ra Pedro ta ra Juan sañahá ra chi ñáyivi ta catyí ra vatyí ndicha cha nandoto ñu chihí, vatyí ra Jesús nandoto ra.

³ Tyicuan ta catiñ ra chi ra. Ta catyihí ra chi ra vehe caa. Ta candoꝯ ra nyacua nya inga quivi vatyí cha iñi xaan cuhva cuan.

⁴ Soco cuaha ñu cha chihí tuhun cahán ra Pedro nachinó iñi ñu. Ta candu iñ ri ñu chihin ñu yihí cuenda ra Jesús. Ta cha tandihí ñu vasi quita ohon mil ñu cha maa ri maa rayi ri.

⁵ Tuví inga quivi ta candu iñ ri ra cacuví tyiño chi ñu Israel, ra chahnu, ta ra casacuaha cuenda ley cha tyaꝯ ra Moisés, nya Jerusalén cuan.

⁶ Ta ñohó tucu ra Anás ra cuví nuu chi tata sutu. Ta ra Caifás, ta ra Juan, ta ra Alejandro. Ta nyicú tucu tandihí ñáyivi chi ra cacuví nuu chi tata sutu.

⁷ Tyicuan ta catachí ra tyiño chiquehen chi ra Pedro ta chi ra Juan. Ta chitayucú ra chi ra mahñu. Ta candacá tuhun ra chi ra:

—¿Yóó cha chaha ityi chi ndo vatyí sanduvaha ndo chi ra cuan? ¿Yóó chi cha cuenda nyacuví ndo tyehe caa? —cacatyí ra chi ra.

⁸ Ta ra Pedro tyitu ra yihí Tatyí Ii Nyoo. Ta catyí ra chi ra:

—Nyoho ra nyacá ñaha Israel ñuu yo ihya. Ta nyoho ra chahnu.

⁹ Vityin ndacá tuhun ndo chi ndi tuhun vaha cha cuví chi noo ra coxo ihya, vatyí cuñí ndo coto ndo yoso caa nduvaha ra.

¹⁰ Yucuan chaha cunacatyí ndi chi ndo tacuhva nacoto tandihí ñáyivi Israel. Vatyí ra ihya nanyaá ra nuu tandihí ndo. Vatyí nduvaha ra chihin tunyee iñi ra Jesucristo ra ñuu Nazaret, ra cha chaha cuenda ndo vatyí cúvi ra nu cruzi. Soco Nyoo sanandoto ra chi ra.

¹¹ Ta suri ra Jesús ihya cuví yuu cha chihuhú ca cha ña cuñí ra savahá vehe cotyíño ra, tari cuhva catyí nuu tutu Nyoo. Ta ican ndo cuví tari ra savahá vehe ta ña cuñí ndo yuu cha chihuhu ca cuan.

¹² Vatyí yori inga ra cuví sacacú chi yo. Vatyí noo tuhun ri maa ra chaha Nyoo vatyí sacacu ra chi yo. —catyí ra Pedro chi ñu.

¹³ Tyicuan ta cachiñi ra cacuví tyiño cuan vatyí ni xaan iñi ra Pedro ta ra Juan cacahán ra. Ta ñima ra cañoho vaha sicuela cacuví ra. Ta iyo xaan cuñi ra. Tyicuan ta nichoñ nuu ra chi ra vatyí ican ra cuví ra cha cachicá noo chihin ra Jesús.

¹⁴ Ta siñ ri, ra cha nduvaha cuan, nanyaá ra chihin ra yucuan. Yucuan chaha ña cuví cahan ña vaha ra cacuví tyiño cuan siqui ra Pedro ta ra Juan.

¹⁵ Tyicuan ta catyí ra chi ra naquita coyo ninduñi ra chata vehe. Ta candoꝯ maa ra cacuví tyiño cuan candatuhun tahan ra.

¹⁶ Ta catyí ra:

—¿Yoso caa cunyacuvi yo chihin ra ihya? Vatyí tandihí maa ñu Jerusalén chitó ñu seña cha casacuví ra ihya. Ta ma cuvi catyí yo vatyí ña ndicha.

17 Soco tacuhva cha ma cono tuhun ihya ñicahnu chichí ñuu ihya, cutyanaha yo chi ra, tacuhva vatyí ma cahan ca ra tuhun ra Jesús chihin ñáyivi —cacatyí ra.

18 Tyicuan ta cacana ra chi ra Pedro ta ra Juan. Ta catyí ra chi ra vatyí ni chiiñ ca maa ta ma cahan ca ra tuhun ra Jesús. Ta ma sañaha ca ra chi ñáyivi.

19 Soco ra Pedro ta ra Juan canacahan ra ta catyí ra:

—Ndichí xiñi nyoho ta nyehe ndo tatu vaha ca cha quichaha ndi chi maa ndo o vaha ca cha quichaha ndi chi Nyoo.

20 Vatyí nyuhu ma cuvi cha sandihí ndi cha nacatyí ndi tuhun cha nyehe ndi ta chihí ndi —cacatyí ra.

21 Tyicuan ta nacatyanaha tucu ra chi ra. Soco saña ra chi ra vatyí ña ñihí ra cuhva tachi tuñi ra chi ra. Vatyí tandihí ñáyivi sacahnú ñu chi Nyoo cha cuenda cha cuví cuan.

22 Vatyí rayíi cha nduvaha cuan, yaha ca uvi xico cuiya ra, ta tyicuan cuiya nyehe ra tindocho ta nduvaha ra saha Nyoo.

Nu chican ñu yihí cuenda ra Cristo tunyee ñi Nyoo

23 Ta casaña ra chi ra Pedro ta chi ra Juan. Tyicuan ta cuahan coyo ra nu nyicú ra tahan ra. Ta canacatyí ra tandihí cha cacatyí ra chahnu ta ra cacuví nuu chi tata sutu chi ra.

24 Cuhva cha cachihí ñu tuhun ihya tandihí ñu ta ñin ri quichaha chican tahvi ñu chi Nyoo. Ta catyí ñu:

—Sutu Mañi yuhu, yoho savahun andívi ta ñuhu ñáyivi. Savahun tyañuhu. Ta tandihí ca cha iyó, maun savaha.

25 Ta yoho chihin Tatyí Iun sacahun chi ra David ta cha naha. Ta catyí ra: ¿Ñáá tuhun cha naquiqui ñáyivi ña ñohó nuu Nyoo? ¿Ñáá tuhun chicá xiñi ñu cha ñima ri tuhun?

26 Rey ta inga cha nyacá ñaha siqui ñuhu ñáyivi ihya candu cuita ra sicun Sutu Mañi yuhu, ta siqui ra Cristo, catyí ra David.

27 Sutu Mañi yuhu, ndicha vatyí ra Herodes, ta ra Poncio Pilato candu ñin ri ra ñuu Jerusalén ihya chihin ra ñuu Roma ta chihin ra Israel vatyí cahñi ra chi ra Jesús Sehe iun cha cachí vahun.

28 Ta tyicuan caa ta casacuví ra, tari cuhva cha catyí maun ta cha naha tyi cucuví.

29 Ta vityin, Sutu Mañi yuhu, nyehe cha tyanaha ra chi ndi. Ta cuhva cha cuní ca ñi ndi tyi tyiño nuu maun sacuví ndi, Sutu Mañi yuhu. Ta cuhva cha cahan ndi tuhun chihin cha ña yuhví ndi.

30 Ta chihin fuerza maun ta cunduvaha ñu cuhví, ta cunyehe ndi seña ta milagru cha cuenda tunyee ñi ra Jesús Sehe iun —catyí ñu chicán tahvi ñu.

31 Ta cuhva cha ndihí savaha ñu oración ta taan nu nyicu ñu. Ta tandihí ñu chitu ñu chihin Tatyí Ii ta cahan ñu tuhun Nyoo chihin cha ñi ñi ñu.

Ñahri cha cumañi chi ñu yihí cuenda Nyoo

32 Tandihí ñu cha chinó ñi, ñin ri cuví ñu, ta ñin ri cuhva chicá xiñi ñu. Ni noo ñu ta ña catyí ñu vatyí chi maa ñu cuví cha iyó chi ñu, soco chi tandihí ñu cuví, catyí ñu. Vatyí ñin ri nyicú ñu.

33 Ta chihin tunyee ñi cahnu, cacahán ra apóstol tuhun cha nandoto Sutu Mañi yo Jesús. Ta Nyoo nasocó xaan ra chi tandihí ra.

³⁴ Ta ni noo ñu ta ñahri cumañi chi ñu vaty tandihí ñu cha iyó vehe o ñuhú, xico ñu. Ta quichi nyacá ñu xuhun,

³⁵ ta chahá cuenda ñu chi ra apóstol. Ta maa ra nasachá ra chi noo noo ñu yoso cuhva cha chiñuhú chi ñu.

³⁶ Tyicuan caa sacuvj noo ra cha nañi José. Ra cuan vachi ra tata ra Levi. Ta cacu ra ñuhú Chipre cha nyaá mahñu tyañuhu. Ta ra apóstol sacunañi ra Bernabé chi ra. Ta cuñi chi catyí sivi cuan: Ra Naquehen Ndahvi.

³⁷ Ta ra Bernabé cuan xico ra ñuhú ra. Ta chahá ra xuhun cuan chi ra apóstol.

5

Cuatyi ra Ananías ta cu Safira

¹ Soco noo ra cha nañi Ananías chihin cu Safira ñasihí ra, xico ñu noo ñuhú.

² Soco tixehe ñu suhva xuhun. Tyicuan ta chinyacá ra Ananías suhva xuhun chi ra apóstol. Ta catyí ra vaty tandihí xuhun cha quiyahvi ñuhú cuví cuan.

³ Tyicuan ta catyí ra Pedro chi ra:

—Yoho Ananías, ¿ñáá tuhun cha chahun cha quihvi ra ña vaha añimon, vaty cuñún sandavi ñahun chi Tatyí Ii, ta catyún vaty tandihí xuhun cha quiyahvi ñuhu cuví ihya ta ndoún chihin suhva?

⁴ Chuun cuví ñuhú, ta chuun cuví xuhun cha ñihun cuenda ñuhú cuan. ¿Ñáá tuhun cha cuñún sandavi ñahun chi Nyoo ta catyún tyi tandihí xuhun chahun? Ñima chi nyuhu sandavi ñahun, chi Nyoo sandavi ñahun —catyí ra Pedro chi ra Ananías.

⁵ Cha chiñi ra Ananías tuhun cha cahān ra Pedro, nduvá ra ta chihí ra. Ta quichi noo cha yuhvi cuñi ñáyivi cha chitō ñu tuhun ihya.

⁶ Tyicuan ta quichí coyo suhva ra tyivaa ta tyihí ra coño ñuhu ra chichi noo sahma. Ta chahān ra chityihí ra chi ra chichi ñuhú.

⁷ Yahā noo uñi hora ta chaā ñasihí ra Ananías ta quihvi ña nu nyicú ra apóstol. Soco ña chitō ña cha cuví cuan.

⁸ Ta quichahā ndaca tuhun ra Pedro chi ña ta catyí ra:

—¿Atu tyehe cuví yahvi cha quiyahvi ñuhú ndo? —catyí ra.

Ta nacahān ña ta catyí ña:

—Ay, tyehe cuví yahvi chi —catyí ña chi ra.

⁹ Tyicuan ta catyí ra Pedro chi ña:

—¿Ñáá tuhun cha ñoho naha ndo tuhun ta sandavi ñaha ndo chi Tatyí Ii Sutu Mañi yo Nyoo? Cha cuandichi coyo ra cha chahān chityihí chi yūn chichi ñuhú. Ta vityin cuhun tucu ra cutyihí ra chi yoho —catyí ra Pedro chi ña.

¹⁰ Caa cuhva ri cuan ta nduvá ña chaha ra Pedro, ta chihí ña. Ta caquihvi coyo ra tyivaa cuan, ta nyehe ra vaty chihí ña. Ta canacoñehē ra chí ña ta chityihí ra chí ña xiin yi ña.

¹¹ Ta tandihí ñáyivi yihí cuenda ra Cristo, ta tandihí ca ñu chitō tuhun cuan, canayuhvi xaan ñu.

Cuaha milagru ta seña sacuvi ra apóstol

¹² Cuaha seña ta milagru sacuvj ra apóstol sahá Nyoo nu nyicú ñáyivi. Ta tandihí ñu yihí cuenda ra Cristo ndu ín ri ñu nu cuví corredor ra Salomón.

¹³ Ta ni nonga ñu cha inga cuenda ta ña cañá iñi ñu cutahan ñu chihin ñu yihí cuenda ra Cristo. Soco vaha cahān ñáyivi siqui ñu.

14 Ta cuaha xaan ñáyiví nachinó iñi chi Sutu Mañi yo Jesús, tari rayii ta ñusihi.

15 Ta nyacua tavá ñu chi ñu cuhví ityi cahnu, chacún ñu chi ñu nu chito. Vatyí tatu yaha ra Pedro soco vasí xiñahñu ra yaha siqui ñu, ta nduvaha ñu.

16 Tyicuan tucu ñu iyó yatyin ri Jerusalén cuan, quichí nyaca ñu chi ñu cuhví ta ñu cha yihí tatyí ña vaha chi. Ta nduvahá tandihi ñu.

Nu nyehé ra Pedro ta ra Juan tindocho

17 Tyicuan ta ra cuví nuu chi tata sutu, ta ra cayihí cuenda ra cuví saduceo, quiñi cuñi ra nyehe ra chi ra apóstol cha cuenda cha vaha cha casacuví ra chihin tunyee iñi chahá Nyoo chi ra.

18 Tyicuan ta catiñ ra chi ra apóstol. Ta catyihí ra chi ra vehe caa.

19 Soco cha cuaa cuan quichí noo ángel cha tachi Sutu Mañi yo, ta nuñá ra yuvehe caa cuan. Ta tavá ra chi ra. Ta catyí ra chi ra:

20 —Cuahan ndo ta cunjanyaa ndo chichi vehe ñuhu cahnu. Ta nacatyí ndo chi ñáyiví yoso caa cuví coo ñu ñáyiví chaa cha iyó ndo —catyí ángel cuan chi ra.

21 Cha cachiñi ra tuhun cahan ángel cuan, ta cuahan coyo ra. Ta ñaha cuii ri quihví coyo ra chichi vehe ñuhu cahnu. Ta quichahá sañaha ra chi ñáyiví. Ta cha ní ri ca cha sañahá ra apóstol cuan, ndu iñ ri ra cuví nuu chi tata sutu ta ra ndihi chihin ra. Ta caná ra chi ra cacuvi tyiño cuenda ñáyiví Israel vatyí coo ra junta. Tyicuan ta tachí ra na cuquehen chi ra apóstol nu cañohó ra vehe caa cuan.

22 Soco cuhva cha chaá coyo policia chichi vehe caa cuan, ña nañihí ra chi ra apóstol. Ta cuanuhu coyo ra cuanacatyí ra chi ra cuví nuu chi tata sutu.

23 Ta cacatyí ra chi ra:

—Nyasi yuvehe caa cuan ta chaá ndi. Ta sindaro, tayucú ra yuvehe casahá cumi ra. Soco cuhva cha nuñá ndi, ña nañihí ndi chi ní noo ra chichi vehe caa cuan —catyí ra chi ra.

24 Cuhva cha cachiñi tata sutu chihin ra cuví nuu chi ra, ta ra cuví nuu chi ra casaha cuenda vehe ñuhu tuhun ihya, iyo xaan cuñi ra. Ta candatuhun tahan ra yoso caa sacuvi ra ta cundihi tuhun cuan.

25 Tyicuan ta chaá noo ra ta catyí ra:

—Ra cha tyihí ndo vehe caa cuan, nyicú ra chichi vehe ñuhu sañahá ra chi ñáyiví —catyí ra.

26 Tyicuan ta ra cuví nuu chi ra casahá cuenda vehe ñuhu, chahan ra chihin policia, ta chiquehen ra chi ra chihin cha vii ri ta ña cañi ra chi ra, vatyí yuhví ra chi ñáyiví coto tuchi ñu yuu chi ra.

27 Chinyacá ra chi ra nuu ra cacuvi tyiño vehe ñuhu cahnu. Ta ra cuví nuu chi tata sutu catyí ra chi ra:

28 —Nyuhu catyí cachi ndi chi ndo vatyí ma cahan ca ndo tuhun ra Jesús. Soco nyoho ña tyasohó maa ndo. Cha ndihi maa chichi ñuu Jerusalén sacotó ndo tuhun ra. Ta cuñi ndo natyaa ndo siqui ndi vatyí nyuhu chahñi ndi chi ra cuan —catyí ra cuví nuu chi tata sutu chi ra apóstol.

29 Tyicuan ta nacahan ra Pedro ta inga ra apóstol, ta catyí ra:

—Nyaá siqui ndi cha quichaha xihna ca ndi chi Nyoo ta ñima ca chi rayii.

30 Nyoo cuenda sutu chahnu yo ican sanandotó chi ra Jesús, ra cha chitacaá ndo nu cruzi ta chahñi ndo chi ra.

31 Ta ra Jesús ican ra cuví ra cha sacahnú xaan Nyoo chi, ta cuatyaa ra chi ra chiyo vaha ra, vatyí cunyaca ñaha ra tandihi. Ta noo tuhun ri maa ra cuví

ra sacacú chi yo. Vatyí tyicuan caa chahá ra cuhva chi yo cha cuví yo ñu Israel na ndu uvi iñi yo cuatyí yo tacuhva saha ra ticahnu iñi cuatyí yo.

³² Ta nyuhu cuví ndi cha ndaa cuenda ihya. Ta tyicuan caa tucu Tatyí Ii cha chahá Nyoo cunyaa añima ñu quichahá chi ra —catyí ra Pedro chi ra.

³³ Ta cha cachiñi ra cha catyí ra Pedro, nduxaan xaan ra. Ta cuñi ra cahñi ra chi ra.

³⁴ Soco mahñu ra cacuví tyiño cuan ñohó noo ra cuví fariseo cha nañi Gamaliel. Ta cuví ra ra sacuahá cuenda ley ra Moisés. Ta ñáyivi sahá xaan ñu ñáyivi chi ra. Ta ra Gamaliel cuan, nicuinanyaa ra. Ta tachí ra naquita coyo ra apóstol cuan noo cuhva ri. Tyicuan ta quita coyo ra.

³⁵ Ta quichahá catyí ra Gamaliel cuan chi inga ra cacuví tyiño:

—Nyoho ra nyacá ñaha ñu Israel, saha ndo cuenda chi ndo chihin cha cua cunyacuvi ndo chihin ra chiña.

³⁶ Nícohon iñi ndo vatyí cha iyó suhva quívi ndicuita noo ra cha nañi Teudas. Ta catyí ra vatyí cuví ra noo ra vaha. Ta tari cha cumi cientu rayi chinyicon chi ra. Soco yahá cuan chahñi ñáyivi chi ra. Ta tandihi ra chinyicon chi ra nacutya cuatyí ra. Ta ndihí tuhun.

³⁷ Yahá cuan ta nu cuahan ca chi, quívi nacahvi ra gobiernu chi ñáyivi, ta ndicuita ra Judas ra ityí Galilea cuan. Ta cuaha ñu chinyicon chi ra. Soco suri chahñi ñáyivi chi ra. Ta tandihi ñu cha chinyicon chi ra chitya cuatyí ñu.

³⁸ Yucuan chaha saña ndo chi ra chiña. Ta ma tyihí ndo chi ndo chihin ra vatyí tatu tuhun ñáyivi ri cuví cha chicá noo ra, cundihí tuhun.

³⁹ Soco tatu ndicha tyi tuhun Nyoo cuví, ma cuví chi nyoho satívi ndo. Saha ndo cuenda chi ndo coto vaha chihin Nyoo cañi tahan ndo —catyí ra Gamaliel chi ra.

⁴⁰ Tandihí ra ndoo ra vaha. Tyicuan ta cana ra chi ra apóstol. Cacañi policia chi ra. Ta chasi ra nu cahan ca ra tuhun ra Jesús. Tyicuan ta saña ra chi ra.

⁴¹ Ta quita coyo ra apóstol nuu ra cuví tyiño. Ta si xaan cacuñi ra vatyí chahá Nyoo cuhva vatyí nyehé ra tindocho cha cuenda ra Jesús.

⁴² Ta ña casandihí ra cha cacahán ra. Ta ndiquívi ri sañahá ra tuhun ra Jesucristo vehe ñuhu ta vehe ñáyivi ñandihí.

6

Nu nacachí ñu yihí cuenda ra Jesús ucha tahan ra vatyí saha cuenda ra ñáa cha chiñuhu chi ñu

¹ Ta nu cuahan ca chi quívi cuaha xaan nanduví ñáyivi cha yihí cuenda ra Cristo. Tyicuan ta ñu cha cahán sahan griego quichahá cahan ñu siqui ñu cha cahán sahan hebreo cuan. Vatyí catyí ñu tyi ña tyiñuhú vaha ra cha cahán sahan hebreo chi ñu chihí yí cuenda ñu, cuhva cha sachá ra cha cacachí ñu ndiquívi ri.

² Tyicuan ta ndi uchi uvi tahan apóstol sandu ñin ri ra chi tandihí ñu yihí cuenda ra Cristo. Ta cacatyí ra chi ñu:

—Ña vaha cha sandihí ndi cha cahan ndi tuhun Nyoo ta sachá ndi cha cachi ndo.

³ Yucuan chaha yañi, nanducu ndo ucha tahan ra nu canyicú ndo ihya, ra vaha iyó chihin Nyoo, ra chiñi tuñi, ra tyitú yihí chihin Tatyí Ii. Ta cuhva yo tyiño ihya chi ra.

⁴ Ta nyuhu sañihí ndi cacan tahvi ca ndi. Ta cuasañaha ca ndi tuhun Nyoo —catyí ra apóstol.

⁵ Tandihí ñu ndoó ñu vaha. Ta nacachí ñu chi ra Esteban. Vatyí chinó xaan iñi ra chi Nyoo. Ta tyitu ra chihin Tatyí lí. Ta nacachí tucu ra chí ra Felipe, ta chí ra Prócoro, ta chí ra Nicanor, ta chí ra Timón, ta chí ra Parmenas, ta chí ra Nicolás cha cuví ra noo ra ñuu Antioquía, ta nanduví ra noo ra Israel.

⁶ Tyicuan ta quichí nyaca ra chí ra nu nyicu ra apóstol. Tyicuan ta catyisó ra ndaha ra xiñi noo noo ra ta cachican tahvi ra chí Nyoo cha cuenda ra.

⁷ Ta cuahan chitya ca tuhun Nyoo. Ta nducuahá ca ñu yihí cuenda ra Cristo ñuu Jerusalén. Ta na chingo iñi tucu cuaha tata sutu cuenda ñu Israel ñandihí.

Nu catyihí ra chí ra Esteban vehe caa

⁸ Ra Esteban cuví ra noo ra cha tyitú chihin tunyee iñi Nyoo. Ta vaha xaan ñáyivi cuví ra vatyí tyitu añima ra chihin cha vaha Nyoo. Ta cuaha xaan milagru ta seña sacuví ra nu nyicú ñáyivi.

⁹ Tyicuan ta suhva ra vehe ñuhu ñuu Israel cha nañi Vehe Ñuhu Cuenda Ñáyivi Ndoó Libre, candu ñin ri ra chihin ra ñuu Cirene, ta ra ñuu Alejandría, ta ra ityi Cilicia, ta ra ityi Asia. Ta quichahá cuví yuhu ra chihin ra Esteban.

¹⁰ Soco ña cacuvi chasaha ra chí ra, vatyí ra Esteban cahan ra chihin cha chiñi tuñi cha chaha Tatyí lí chí ra.

¹¹ Tyicuan ta catyiyahví ra cuan chí suhva ra vatyí canducu ra cuendu chaha ra Esteban ta catyí ra cuendu cuan vatyí ra Esteban cahan ña vaha ra síqui ra Moisés, ta síqui Nyoo.

¹² Yucuan chaha tandihí ñáyivi cuan naquiquí ñu. Tyicuan ta ra chahnu ta ra sacuaaha cuenda ley ra Moisés, catiñ ra chí ra Esteban. Ta cuahan ra chinyaca ra chí ra nu ndu ñin ri ra cuví tyiño cuenda vehe ñuhu ñu Israel.

¹³ Ta canducú ra chí ra cahan cuendu chaha ra. Ta maa ra catyí ra tyehe caa:

—Ra Esteban ihya, ña sandihí ra cha cahan cuehe ra síqui vehe ñuhu yo ta síqui ley ra Moisés.

¹⁴ Ta chiñi ndi cahan ra vatyí ra Jesús ra Nazaret cuan cusatani ra vehe ñuhu cahnú ihya. Ta cunasama ra costumbre cha sandoo ra Moisés chí yo na —catyí ra cuendu cuan síqui ra Esteban.

¹⁵ Tyicuan ta ra cacuví tyiño ta ra canyicú yucuan canyehé ra chí ra Esteban vatyí tari maa nuu ángel tyicuan caa nuu ra cuhva cuan.

7

Nu cahan ra Esteban tuhun Nyoo chihin ñáyivi nducú cahñi chí ra

¹ Tyicuan ta ra cuví nuu chí tata sutu ndacá tuhun ra chí ra Esteban, ta catyí ra:

—¿Atu ndicha cha catyí ra ihya?

² Tyicuan ta nacahan ra Esteban ta catyí ra:

—Nyoho yañi, ta nyoho tata, cuiñi ndo tuhun cahn. Sutu yo Nyoo cha cahn ca tuví ra nuu sutu chahnu yo, ra Abraham quivi nyaá ra ityi Mesopotamia cha niri ca cha cumañi cucoo ra nya ñuu Harán.

³ Ta catyí ra chí ra: “Sandoo ñuun, ta chí tandihí ñáyivi chuun. Ta cunuhu inga ñuu cha cusañahi chuun”, catyí Nyoo chí ra Abraham.

⁴ Tyicuan ta ra Abraham quitá ra ñuu Caldea ityi Mesopotamia cuan, ta cuanuhú ra nya ñuu Harán. Ta yucuan cuví nu chihí sutu ra. Yaha cuan saquichí Nyoo chí ra ñuhú nu iyó yo vityin.

⁵ Soco ñahri ñuhú chahá Nyoo chí ra quivi cuan. Ni noo nu cuinanyaa chaha ra ta ña chahá ra. Soco catyí Nyoo chí ra vatyí cucuhva ra. Ta cutahan chí chí

sehe ra chata cha yaha cúvi ra. Tyicuan caa catyĭ Nyoo chi ra Abraham, vasi ta coo ca sehe ra quívi cuan.

⁶ Ta siin ri catyĭ Nyoo chi ra vatyĭ ñáyivi chi ra cucoo ñu inga ñuu. Ta cusacuvi ñu tyiño nuu ñáyivi ñuu cuan, ta ma tyiyahvi ñu chi ñu. Ta cunyehe ñu tindoho cumi cientu cuiya.

⁷ Soco catyĭ tucu Nyoo chi ra tyehe caa: “Ñáyivi ñuu cuan cusanyehē ñu tindoho chi ñáyivi chuun. Yucuan cuenda cuatachi tuñi yuhu chi ñu. Ta yaha cuan ta cuquita ñáyivi chuun ñuu cuan ta cuquichi ñu ihya. Ta cusacuvi ñu tyiño nuu mai ihya”, catyĭ Nyoo chi ra Abraham.

⁸ Tyicuan caa natyihĭ tahan Nyoo tuhun chihin ra. Ta chaha Nyoo noo costumbre cha cuasacuvi ñu coto naa iñi ñu. Chaha ra tyi cutahnya chiin ñi xiñi ndivi cha lee sehe ñu, o cha sahá ñu circuncidar chi sehe ñu cúvi cuan. Ta cha yaha uña quivi cha cacu ra Isaac sehe ra Abraham, tyicuan caa chinyacuvĭ ra chihin ra. Ta suri tyicuan caa sacuvĭ tucu ra Isaac chihin ra Jacob sehe ra. Ta ra Jacob tucu chihin uchi uvi tahan sehe ra, tyaa ra noo seña cuan chi noo noo sehe ra. Ta ican ra cuan cacuvĭ sutu chahnu yo.

⁹ Ta ican uchi iñi tahan ra sehe ra Jacobo ihya catasi cuñi ra nyehe ra chi ra José yañi ra cha cuenda vatyĭ yaha ca ra nuu sutu ra. Yucuan chaha caxico ra chi ra na cuhan ra Egipto. Soco Nyoo ña sandoó ra chi ra José.

¹⁰ Ta sacacu ra chi ra nu nyehé ra tindoho. Ta chaha ra cha chiñi tuñi ra chi ra. Ta chaha ra cha vaha coo ra nuu ra Faraón, ra cúvi rey Egipto. Ta rey cuan chaha ra cha cuvi ra José gobiernu Egipto cuan. Ta chinyaca ñaha tucu ra vehe maa rey ñandihĭ.

¹¹ Tyicuan ta chiyo tama nicahnu ityi Egipto ta ityi Canaán. Ta nyehe xaan ñáyivi tindoho. Ta tandihĭ sutu chahnu yo cha chicoo tyembu cuan ña cañihĭ ra cha cachi ra.

¹² Soco quivi chito ra Jacob vatyĭ iyó trigu nya Egipto, ta tachĭ ra chi sehe ra na cuquehen ra. Ta chahan coyo ra noo chaha.

¹³ Ta cha cu uvi chaha cha chahan coyo ra, ra José sacoto ra chi ra vatyĭ yañi ra cúvi chi ra. Yucuan quivi chito ra Faraón yóó chi tata vachi ra José.

¹⁴ Tyicuan ta tachĭ ra José tyiño na quichi sutu ra, ra Jacob, chihin tandihĭ ñáyivi chi ra, uñi xico chahun tahan ñu.

¹⁵ Ta tyicuan caa cuvi cha cuahan ra Jacob cuacoo ra Egipto cuan. Yaha cuan ta chihĭ ra yucuan. Ta chihĭ tucu sehe ra, ra cacuvĭ sutu chahnu yo.

¹⁶ Tyicuan ta chaa quivi cha chinanyaca ñu yiqui ra Jacob ta yiqui sehe ra nya Siquem. Ta yucuan quihvi ra chichi ñuhú nu satá ra Abraham noo ñaña chí sehe ra Hamor ta cha naha.

¹⁷ Soco cha ni cumañi ca quita ñu Egipto, ñáyivi chi ra Abraham cha iyó Egipto cuan cuaha xaan nanduvi ñu. Ta cha nyaña yatyin quivi cha cuacuhva Nyoo ñuhú chi ñu tari cuhva catyĭ cachi ra chi ra Abraham.

¹⁸ Tyicuan ta quichaha nyaca ñaha noo rey cha ña ñohó nuu chi ra José.

¹⁹ Rey cuan sandavĭ ñaha ra chi ñáyivi chi yo cuan. Ta sanyehē xaan ra tindoho chi ñu, ta saniñi ra chi ñu na sanandoo ñu chi sehe ñu cha ni cacu vatyĭ na cúvi ndotyin.

²⁰ Ta suri quivi cuan cacu ra Moisés. Ta tahan xaan iñi Nyoo chi ra lee cuan. Ta uñi yoo sacuahnu sihi ra chi ra nya vehe ña.

²¹ Yaha cuan ña cúvi ca tixehe sihi ra chi ra. Ta sandoo ña chi ra chichi noo tica yuhu yutya. Tyicuan ta sehe maa rey Egipto cuan nañihĭ ña chi ra. Ta naquehen ña chi ra. Ta sacuahnu ña chi ra, tari cha sehe ña cúvi chi ra.

²² Yucuan chaha cutuhva ra Moisés tandihí cha chitó ñu Egipto. Ta s̄in ri nyee xaan cuhva cahan ra, ta cuhva sacuvi ra ñandihí.

²³ Ta quivi cha chaq̄ uvi xico cuiya ra Moisés quichi cuvi iñi ra cuhun ra cunyehe ra nu nyicú ñu Israel, ñáyivi chi ra.

²⁴ Tyicuan ta noo quivi nyehé ra nu cañí noo ra Egipto cuan chi noo ra Israel cuan. Tyicuan ta chahñi ra Moisés chi ra Egipto cuan vatyí satasi iñi ra chi ra Israel ra ñuu ra.

²⁵ Cuñí maa ra Moisés cuan vatyí ñáyivi Israel cuan cutuñi iñi ñu tyi Nyoo tachí chi ra vatyí cusacacu ra chi ñu. Soco maa ñu ña tuví iñi ñu cha tyicuan caa cucuvi.

²⁶ Tyicuan ta cha inga quivi cuan nyehé ra Moisés chi uvi tahan ra Israel cha cacañi tahan ra. Ta ra Moisés, cuñi ra cha ma cacañi tahan ca ra, ta quichaha catyi ra: “Ña vaha cha cacañi tahan nyoho, vatyí suri yañi ndo cuvi”, catyi ra chi ra.

²⁷ Tyicuan ta ra cha cañi chi tahan cuan tyandaha ra chi ra Moisés, ta catyi ra chi ra: “¿Yóo cha tyatyño chi yoho vatyí cunyaca ñahun ta cuvun juez chi ndi?”

²⁸ ¿Atu cuñun cahñun chii tari chahñun chi ra Egipto cuan icu?” catyi ra chi ra Moisés.

²⁹ Cuhva cha chiñi ra Moisés cha catyi ra, chinq̄ ra. Ta cuahan ra nya ñuu Madián. Yucuan ñihí ra ñasihí ra. Ta yucuan chiyó uvi tahan sehe ra.

³⁰ Yahá uvi xico cuiya. Tyicuan ta noo quivi chicá noo ra Moisés chiqui ndi yatyin noo yucu cha nañi Sinaí. Ta nyehé ra noo taca iñu cha cayú. Tyicuan ta tui noo ángel chichi ñuhú cha cayu cuan.

³¹ Iyo xaan cuñi ra Moisés cha nyehé ra yucuan. Ta cuhva cha tuhva yatyin ca ra vatyí tacuhva nyehe vaha ra, chiñi ra noo ndusu Sutu Mañi yo. Ta catyi ra tyehe caa:

³² “Yuhu cuví Nyoo cuenda sutu chahnun, Nyoo cuenda ra Abraham, ta ra Isaac, ta ra Jacob”, catyi Nyoo chi ra. Tyicuan ta ra Moisés quichaha ñihí ra chihin cha yuhvi ra. Ta ña caña iñi ra nanyehe ra.

³³ Ta quichaha catyi tucu Sutu Mañi yo chi ra: “Tava ndichan chahun vatyí ñuhú nu chañun, ñuhú ii cuví.

³⁴ Yuhu nyehí tandihí tindoho cha nyehé ñáyivi cuende ñuu Egipto chiña. Ta chiñi ndusu ñu cha chacú chaa ñu. Yucuan chaha noó xique vityin vatyí sacaqui chi ñu. Ñaha, vatyí cutachi chuun nya Egipto”, catyi Nyoo chi ra Moisés.

³⁵ Quivi cuan ña cuñi ñáyivi Israel chi ra Moisés cha cunyaca ñaha ra chi ñu, ta catyi ñu chi ra: “¿Yóo cha tyatyño chi yoho vatyí cunyaca ñahun ta cuvun juez chi ndi?”, catyi ñu chi ra. Ta vasi ña cuñi ñu cha cunyaca ñaha ra chi ñu, soco Nyoo tachí chi ra vatyí cuvi ra nuu, ta sacacu ra chi ñu. Vatyí tyicuan caa catyi ángel cha tuví nuu ra nu taca iñu cha cayu cuan.

³⁶ Ta ican ra Moisés cuan tava chi ñáyivi Israel Egipto cuan. Ta cha yaha savaha ra milagru ta seña ñuu cuan, ta sacuvi tucu ra nu yahá ñu Tyañuhu Cuaha. Ta nu chicá noo ñu ñuhú ityi chichi cha uvi xico cuiya sacuvi tucu ra ñandihí.

³⁷ Ta suri maa ra Moisés cuan cuví ra cha catyi chi ñu Israel ta cha naha tyehe caa: “Nyoo cutachi ra noo profeta ra tari tachí ra chi mai. Ta cucuvi ra noo ra Israel tari maa ndo. Quichaha ndo chi ra”, catyi ra.

³⁸ Ta suri maa ra Moisés cuan ndihí ra chihin ñáyivi chahnu yo nu chica noo ñu ñuhú ityi cuan. Ta ican ra cuví ra cha cahān ángel cuan chihin nya

yucu Sinaí. Ta ican ra quehen cuenda ra tuhun yoso caa coo ñáyivi ta sañaha ra chi yo.

³⁹ 'Soco ñáyivi chahnu yo ña quichaha ñu chi ra. Tava xiin ñu chi ra. Ta cacuñi ñu cunuho coyo ñu nya Egipto.

⁴⁰ Yucuan chaha cuhva cha nyaá ca ra Moisés yucu Sinaí ta cahān ñáyivi chihin ra Aarón ta catyi ñu: "Savahun suhva nyoo cha cuhun coyo ityi nuu ndi. Vatyí ña chitó ndi ñáá cha cuvī chi ra Moisés, ra cha tava chi ndi Egipto", catyi ñu.

⁴¹ Tyicuan ta casavaha ñu noo becerru xuhun cuaan. Tyicuan ta cachahñi ñu quiti vatyí cuhva cuenda ñu chi xitohyo cuan. Ta sñi xaan cuñi ñu cachiyō ñu vico cuenda xitohyo cha casavaha ñu chihin ndaha ñu.

⁴² Tyicuan ta Nyoo cuachiyō ra chi ñu. Ta saña ndaha ra chi ñu vatyí cusacahnu ñu chi ñanyii, chi yo, ta ñáá ndihi tiño cha iyó ityi andivi. Vatyí tyehe caa catyaā ra profeta cuenda Nyoo nu libru ta cha naha:

Nyoho ñáyivi Israel, ¿atu chahñi ndo quiti vatyí cuhva cuenda ndo chi yuhu chichi cha uvi xico cuiya cha chica noo ndo ñuhu ityi? Ñima.

⁴³ Soco sacahnu ndo chi nyoo cha nañi Moloc, ta sacahnu tucu ndo chi nyoo cha nañi Renfán cha caá tari caá tiño andivi.

Suri maa ndo savaha xitohyo cuan, vatyí sacahnu ndo.

Yucuan chaha yuhu cuatave chi ndo ñuu ndo, ta cuasacuhin chi ndo noo nu cañi ityi nuu ca Babilonia, catyi Nyoo chi ñu.

⁴⁴ Nu chicá noo sutu chahnu yo ñuhú ityi cuan, chicumi ra noo vehe ñuhu cha chino chihin ñi quiti. Ta chichi vehe cuan chicumi ra tabla yuu cha nyaá ley Nyoo nuu. Ta ra Moisés tachj ra tyiño na savaha ñu vehe ñuhu cuan ta ityi chata ca tari cuhva sañaha maa Nyoo chi ra.

⁴⁵ Yucuan ta ra Josué nanduvj ra nuu chi ñu. Ta quehen ñu vehe ñuhu ta chicoo ñu chihin nu nyaá yo ihya vityin. Vatyí Nyoo tava ñehe ra chi ñáyivi chiyō ñuhu ihya ta nacuhva cuenda ra chi ñu Israel ñáyivi chi yo. Ta chotyño ñu vehe ñuhu cuan nyacua nya quivi chiyō rey David.

⁴⁶ Ta rey David ñihj ra tumañi ñi nuu Nyoo. Ta cuñi ra savaha ra noo vehe vaha nu coo Nyoo. Suri Nyoo ihya sacahnu ra Jacob ta cha naha.

⁴⁷ Soco ra Salomón savaha vehe Nyoo.

⁴⁸ Vasi ña iyó Nyoo chichi vehe ñuhu cha savaha ñáyivi. Tari catyi ra chihin yuhu ra profeta ta cha naha tyehe caa:

⁴⁹ Andivi cuvī tyayu nu nyaí ta nyacá ñahi tandihi. Ta ñuhu ñayivi, yucuan cuvī nu chañi chahi.

¿Atu cuvī savaha ndo vehi ta coi chichi, cuñi maa ndo?

¿Ta nya maa maa cuvī nyitati, cuñi maa ndo?

⁵⁰ ¿Atu ña chitó ndo vatyí mai savahi andivi ta ñuhu ñayivi? catyi Nyoo.

⁵¹ 'Soco nyoho —catyi ra Esteban— tyicuan ri tuhva ndo sandava ndo ñi ndo. Ta ña cuñi ndo naquehen ndo tuhun cahān Nyoo. Tyicuan ri ña quichaha ndo chi Tatyí Ii. Inuu ri caa ndo chihin sutu chahnu ndo.

⁵² Sutu chahnu ndo satañi ñi ra ta cachahñi ra chi tandihi ra profeta cuenda Nyoo ta cha naha. Ta ican ra cuan cacatyí vatyí cuquichi noo ra vaha. Ta cha quichj ra vityin, nyoho ña cuñi nyehe ndo chi ra, ta cachahñi ndo chi ra.

⁵³ Nyoho naquehen cuenda ndo ley Nyoo cha chaha ángel chi ndo, soco ña cuñi ndo sacuvi ndo cuhva catyi ley cuan —catyi ra Esteban.

⁵⁴ Cuhva cha chiñi ra cacuví tyiño vehe ñuhu cahnu tuhun ihya, xaan xaan cuñi ra, nyacua casacahñi noho ra nyehé ra chi ra Esteban.

⁵⁵ Soco ra Esteban tyitú cuii maa ra chihin Tatyí li ta nanyehé ra ityi andivi. Ta nyehé ra cha cahnu cuví Nyoo. Ta suri nyehé ra chi ra Jesús nanyaá ra chiyo vaha Nyoo.

⁵⁶ Tyicuan ta catyí ra Esteban:

—¡Nyehe ndo! Nyehe tanuña andivi. Ta nyehí chi ra Jesús, Rayi cha quichi nya gloria, nanyaá ra chiyo vaha Nyoo —catyí ra Esteban.

⁵⁷ Soco ra cuan cachasi ra soho ra, cha ma cuiñi ra tuhun cahán ra Esteban. Tyicuan ta vaa ri cananduvi ra. Ta tandihi ra cuahan coyo ra siqui ra Esteban.

⁵⁸ Tyicuan ta catava ra chi ra yuhu ñuu. Ta ca chahñi ra chi ra chihin yuu. Ta ra cha cacacuví cha ña vaha cuan, casandoq ra sahma cha nyaa chata ra vatyi sahadumi noo ra tyivaa cha nañi Saulo.

⁵⁹ Cha niri ca cha cacañi ra yuu chi ra Esteban, quichaha chican tahvi ra Esteban chi Nyoo, vatyi tuvi iñi ra cuacuví ra. Ta catyí ra tyehe caa:

—Sutu Mañi yuhu Jesús, ñaquehen añime —catyí ra.

⁶⁰ Yahá cuan, tyicuan ta chicuiñi chiti ra, ta chaa canachaaq ra ta catyí ra:

—Sutu Mañi yuhu, ma tiin cuendon cuatyi cha sacuví ñu —catyí ra.

Ta cha yahá catyí ra tyehe caa, ta chihí ri ra.

8

Nu chicá nyicon ra Saulo chi ñáyivi yihí cuenda ra Cristo

¹ Ta ra Saulo ña chinó iñi ra chi ra Jesús, ta ndoo ra vaha cha chahñi ra chi ra Esteban.

Ta suri quivi cuan quichaha nducu xaan ñáyivi chi ñu yihí cuenda ra Cristo ñuu Jerusalén cuan vatyi cucahñi ñu chi ñu. Soco ra apóstol ña caquita ra. Candoo ra nyicú ra Jerusalén. Ta tandihi ca ñu cachino ñu, cuahan coyo ñu cuacoo ñu ityi Samaria, ta ityi Judea.

² Ta suhva ra cha nyicón vaha chi Nyoo Jerusalén cuan, catyihí ra coño ñuhu ra Esteban chichi ñuhú. Ta cachacu xaan ra cha cuenda ra.

³ Cha niri ca cha tyicuan caa, ra Saulo chicá nyicon vavaha ra chi ñáyivi yihí cuenda Cristo. Ta tahan tahan vehe ñu chahan ra. Ta suri quiñoho ñaa ra chi ñu, ta chahá cuenda ra chi ñu vatyi cohon ñu vehe caa, rayi ta ñusihi.

Nu cacahán ñu tuhun ra Cristo ityi Samaria

⁴ Soco tandihi ñu cha quita ñuu Jerusalén, cahán ñu tuhun yoso caa sacacú ra Cristo añima ñu tandihi ri maa ityi nu chaq coyo ñu.

⁵ Mínoo ra cha nañi Felipe chaq ra noo ñuu ityi Samaria. Ta quichaha cahan ra tuhun ra Cristo chihin ñu.

⁶ Ta tandihi ri ñáyivi ta tyasohó ñu tuhun cha cahán ra. Ta nyehé ñu milagru ta seña cha savahá ra.

⁷ Vatyi cuaha vavaha ñáyivi cha yihí tatyí ña vaha chii nduvaha ñu. Vatyi tatyí ña vaha cha yihí chi ñu, quita chi ta suri canachaaq chi cuahan chi. Ta cuaha vavaha ñáyivi coxo ta ñáyivi cha ña cuví nacanda, nduvaha ñu.

⁸ Yucuan chaha ñáyivi ñuu cuan, sii xaan cacuví chi ñu.

⁹ Soco ñuu Samaria cuan iyó noo ra tasi cha nañi Simón. Ta sandaví ñaha ra chi ñáyivi cuan. Catyí ra vatyi cuví ra noo ra cahnu.

¹⁰ Ndi cuii maa ñáyivi tyasohó ñu tuhun cahan ra, nya ñu tyayii, ta nya ñu ndahvi. Ta cacatyí ñu:

—Ndicha ndicha cuii, vatyi tunyee iñi Nyoo nyaá chihin ra ihya —catyí ñu.

¹¹ Quichahá xaan ñu tuhun cahán ra vatyí cha naha xaan sandaví ñaha ra chí ñu chihin tuhun tasi.

¹² Tyicuan ta quichí ra Felipe. Ta sacoto ra chí ñu yoso caa nyacá ñaha Nyoo añima ñáyivi. Ta yoso cuhva cha cahnu cuví ra Jesucristo. Ta yucuan ta chino iñi ñu chí ra Cristo, rayi ta ñusihi. Ta condutyá ñu.

¹³ Nyacua nya ra Simón cuan, ta naching iñi ra chí ra Cristo, ta condutyá ra. Ta quichahá chica noo ra chihin ra Felipe. Ta iyo xaan cuñi ra nyehe ra milagru, ta seña cha sacuví ra Felipe cuan.

¹⁴ Tyicuan ta ra apóstol cha canyicú ñuu Jerusalén cuan ñihí ra tuhun cha canachinó iñi ñáyivi ityi Samaria cuan tuhun Nyoo. Ta catachí ra chí ra Pedro ta chí ra Juan.

¹⁵ Cuhva cha chaq coyo ra yucuan, ta chicān tahvi ra chaha ñu quihvi cuenda ra Cristo vatyí tacuhva tyi naquehen ñu Tatyí Ii.

¹⁶ Vatyí ñu cuan, ta naquehen ca ñu Tatyí Ii. Tacuhva condutyá ri ñu chihin sívi Sutu Mañi yo Jesús.

¹⁷ Tyicuan ta ra Pedro ta ra Juan catyiso ra ndaha ra síqui ñu, ta naquehen ñu Tatyí Ii.

¹⁸ Ta ra Simón cuan nyehe ra cuhva cha catyiso ra apóstol ndaha ra síqui ñu cuan, ta naquehen ñu Tatyí Ii.

¹⁹ Ta quichahá catyi ra tyehe caa:

—Yoso xuhun cuñi ndo ta cuhva ndo tunyee iñi chiña chii, vatyí tacuhva cuví tyise ndahi síqui ñáyivi, ta naquehen tucu ñu cuan Tatyí Ii —catyi ra Simón cuan chí ra apóstol.

²⁰ Tyicuan ta nacahan ra Pedro ta catyi ra:

—Na cunaun in ri chihin xuhun chiña. Vatyí chicá iñun tyi cuví sata yo chihin xuhun nyatu cha chahá maa Nyoo chí yo.

²¹ Yoho, ña tahán chí tyihun chuun chihin tuhun ihya. Vatyí añimon ña vaha nuu Nyoo.

²² Ndū uvi iñun cuhva chicá xiñun chiña, vatyí cahnu cha quiñi caa cuví cuan nuu Nyoo. Ta cañan tahvi chí ra na nyehe yo tatu saha ra ticahnu iñi chuun cha cuenda cha caa chichi añimon.

²³ Vatyí nyehí tyi chichi añimon tyitú maa yihí cha quiñi caa cha cuví tari cha uva. Ta cha quiñi caa cuan, ña chahá coton cha vaha. —catyi ra Pedro chí ra Simón cuan.

²⁴ Tyicuan ta nacahan ra Simón ta catyi ra:

—Cañan tahvi maa ndo cha cuende nuu Nyoo, ta cuhva cha ma quichi tandihí tuhun cha catyún chiña síqui —catyi ra Simón chí ra Pedro.

²⁵ Cha yahá cuan ta ra apóstol nacatyí ra tandihí cha nyehe ra cha sacuví ra Cristo. Ta cañan ra tuhun Nyoo. Tyicuan ta cuanuhū coyo ra nya Jerusalén. Ta suri sacoto ra tuhun yoso caa sacuví yo ta cacu añima yo tandihí ñuu ityi Samaria nu yahá ra.

Nu cahán ra Felipe tuhun Nyoo chihin noo ra Etiopía

²⁶ Cha yahá tuhun cuan tyicuan ta cañan noo ángel Nyoo chihin ra Felipe, ta catyi ra:

—Ndícuita ta cahun ityi sur, ityi quita nya Jerusalén ta cuahan nya Gaza —catyi ángel cuan chí ra.

Yucuan cuví ityi cha yahá noo ñuhú ityi.

²⁷ Tyicuan ta ra Felipe ndícuita ra ta cuahan ra. Ta ityi cuahan ra ta ñihí tahan ra chihin noo ra ñuu Etiopía. Ta cuví ra eunuco. Cuví ra noo ra cuví tyiño cahnu ñuu Etiopía, vatyí sahá cuenda ra xuhun cu Candace, ñaha cha

cuví reina ñuu Etiopía cuan. Ta chahan ra Etiopía cuan chisacahnu ra chi Nyoo nya Jerusalén.

²⁸ Ta ityi cuanuhú ra nya ñuu ra nyaá ra siqui carru ra. Ta sacuahá ra libru cha tyaá ra Isaías ra profeta cuenda Nyoo ta cha naha.

²⁹ Tyicuan ta Tatyí li catyí chi ra Felipe:

—Satuhva ca nu cuahan carru cuan.

³⁰ Ta cuhva cha tuhva ra Felipe, chiñi ra vatyi sacuahá ra cuan nu libru cha tyaá ra Isaías. Ta ndacá tuhun ra chi ra:

—¿Atu cutuñi iñun cha sacuahún? —catyí ra.

³¹ Tyicuan ta nacahan ra cuan ta catyí ra:

—¿Yoso caa cutuñi iñi ta yori sañahá chii? —catyí ra chi ra.

Ta chican ra chi ra Felipe na ndaa ra ta cunyaa ra chihin ra.

³² Ta nu cuahan sacuahá ra, catyí chi tyehe caa:

Chahñi ra chi ra tari chahñi ra noo mbee.

Vatyi tari ña chacú mbee tatu cuasatya ra ixi ti, ta tari ña chacú ti tatu chahñi ra chi ti, tyicuan caa cuví ra cuan tyi nyehé ra tindocho ta ñahri maa catyí ra.

³³ Sanocueñ ñu chi ra ta yori cuñi sacacu chi ra.

¿Yóo ra cuví nacatyí tuhun sehe ra cha cuacoo?

Yori, vatyi chihí ra.

Catyí chi nu tutu cha sacuahá ra cuan.

³⁴ Tyicuan ta ra cuan quichahá ndaca tuhun ra chi ra Felipe, ta catyí ra:

—Saha tumañi iñi chii, ta çatyun chiin chii yóo chi tuhun cahan ra profeta ihya. ¿Atu tuhun maa ra, o yóo chi tuhun cahan ra? —catyí ra chi ra Felipe.

³⁵ Tyicuan ta ra Felipe quichahá cahan ra siqui tuhun cha cha yahá sacuahá ra cuan, ta nacatyí ra chi ra vatyi tuhun ra Jesús cahan ra cuan. Ta nacatyí ra vatyi ra Jesús cuví ra cha sacacú chi yo.

³⁶ Tyicuan ta cha cuayaha ra noo nu ñohó ndutyá. Ta ra cuan quichahá catyí ra chi ra Felipe:

—Ihya ñohó ndutyá. ¿Atu ma cuví condutyé vityin? —catyí ra.

³⁷ Tyicuan ta nacahan ra Felipe, ta catyí ra:

—Tatu chinó iñun chihin cha tandihí añimon, cuví condutyon —catyí ra chi ra.

Tyicuan ta nacahan ra cuan, ta catyí ra:

—Chinó iñi yuhu vatyi Sehe Nyoo cuví chi ra Jesucristo —catyí ra.

³⁸ Tyicuan ta ra cuan catyí ra chi musu ra na sacucuiñi ra carru cuan. Tyicuan ta canoo nduvi tahan ra. Ta caquihvi ra chi ndutyá. Tyicuan ta sacondutyá ra Felipe chi ra.

³⁹ Ta cuhva cha caquita coyo ra chichi ndutyá cuan, Tatyí li Sutu Mañi yo naquehen chi chi ra Felipe. Ta ra cuan ña nyehé ca ra chí ra. Soco si xaan cuví chi ra, cuanuhu ra.

⁴⁰ Ta ra Felipe chaá ra ñuu Azoto. Ta cuahan ra tahan tahan ñuu, ta cahan ra tuhun ra Cristo chihin ñáyivi nyacua nya cha chaá ra ñuu Cesarea.

9

Nu nachinó iñi ra Saulo chi ra Cristo (Hch. 22.6-16; 26.12-18)

¹ Cha ni ri ca cha chicá noo ra Felipe cahan ra tuhun ra Cristo chihin ñáyivi, ra Saulo ña sandihí ra tuhun cha nducú cahñi ra chi ñu yihí cuenda Sutu Mañi yo. Ta chahan ra nu nyaá ra cuví nuu chi tata sutu,

² chicaoꝥan ra noo tutu chi ra, tacuhva nacuhva ra cuhun ra vehe ñuhu ñuu Damasco, ta tiiin ra chi ñu cuahan ityi ra Cristo, ta quichi nyaca ra chi ñu vehe caa Jerusalén, rayii o ñusihi.

³ Ñihí ra Saulo tutu cuan ta cuahan ra. Ta cuhva cha cuachaa ra ñuu Damasco cuan, sana cuii ri iñi ra, ta quichi noo nduva ñuhu ityi andivi, sacundichin nicachico maa nu cuahan ra.

⁴ Tyicuan ta ra Saulo nduva ra nu ñuhú. Ta chiñi ra noo ndusu cha catyi tyehe caa:

—Saulo, Saulo, ¿ñáá tuhun cha chicá nyicon chi yuhu? —catyi ndusu cuan chi ra.

⁵ Tyicuan ta nacahan ra Saulo ta ndaca tuhun ra chi ra ta catyi ra:

—¿Yóó yoho Tata? —catyi ra.

Tyicuan ta nacahan ndusu cuan chihin ra, ta catyi:

—Yuhu cuví ra Jesús, ra chicá nyicon chi. Suri chi maun sañicuehún, tari sañicuehé sindiqui quiti tahvi ñuhu chi ti cha chañi nyaa ti nu noo cha xaan cha saquehen ityi ra chi ti —catyi ra Jesús chi ra.

⁶ Tyicuan ta ra Saulo suri nihi ra chihin cha yuhvi ra. Ta catyi ra:

—Sutu Mañi yuhu, ¿ñáá cha cuñún tyi sacuvi? —catyi ra.

Tyicuan ta Sutu Mañi yo catyi ra chi ra tyehe caa:

—Ndicuita ta quihvun chichi ñuu Damasco chiña. Ta yucuan cucatyí noo ra chuun ñáá cha cusacuvun —catyi ra Jesús chi ra Saulo.

⁷ Ra cha candihi chihin ra Saulo, yuhvi xaan ra cacuvi. Ta ña cañihí ra tuhun cahan ra vatyí cachiñi ra ndusu cuan soco yori chi nyehe ra.

⁸ Tyicuan ta ra Saulo ndicuita ra. Soco cuhva cha nuña ra chiti nuu ra, ña cuví ca maa nyehe ra vatyí nducuaa ra. Yucuan chaha, ra tahan ra cayindaha ra ndaha ra ta chinyaca ra chi ra ñuu Damasco cuan.

⁹ Yucuan chinyaa ra uñi tahan quivi. Ta ña cuví nyehe ra. Ta niri ña chachi ra, ta ña chihí ra ndutya.

¹⁰ Ñuu Damasco cuan iyó noo ra chinó iñi chi Nyoo. Ta nañi ra Ananías. Ta nyehe ra noo visión nu catyi Sutu Mañi yo chi ra tyehe caa:

—¡Ananías! —catyi ra chi ra.

Tyicuan ta nacahan ra Ananías, ta catyi ra:

—Ma yuhu ihya, Sutu Mañi yuhu —catyi ra chi ra.

¹¹ Tyicuan ta Sutu Mañi yo catyi ra:

—Ndicuita, ta cuhun noo ityi cahnu cha nañi Ndo. Ta nanducun vehe noo ra cha nañi Judas. Ta ndaca tuhun sivi noo ra cha nañi Saulo, ra ñuu Tarso. Vatyí chicán tahvi ra chi Nyoo.

¹² Ta nyehé ra noo visión, ta nyehé ra chi noo ra nañi Ananías. Ta chaá ra nu nyaá ra, ta tyisó ra ndaha ra siqui ra tacuhva cuví nanyehe ra inga chaha —catyi Sutu Mañi yo chi ra Ananías.

¹³ Tyicuan ta nacahan ra Ananías ta catyi ra:

—Sutu Mañi yuhu, cuaha xaan ñáyivi nacatyí chii vatyí cuaha xaan cha ña vaha chinyacuví ra Saulo cuan chihin ñu yihí cuendon nya ñuu Jerusalén.

¹⁴ Ta vityin vachi tucu ra ihya vatyí chaha ra cacuví nuu chi tata sutu ityi chi ra cha tyihí ra chi ñáyivi chicán tahvi chihin sivun vehe caa —catyi ra Ananías chi Sutu Mañi yo.

¹⁵ Soco Sutu Mañi yo catyi ra chi ra:

—Cuahan vatyí yuhu cha nacachi vahi chi ra Saulo cuan, vatyí cahan ra tuhun chihin ñáyivi inga ñuu, ta chihin rey inga ñuu, ta suri cahan tucu ra chihin ñáyivi Israel ñandihí.

16 Yuhu cusañahi chi ra yoso caa cha cuaha tindoho cunyehe ra cha cuende —catyí Sutu Mañi yo chi ra Ananías.

17 Tyicuan ta cuahan ra Ananías vehe nu nyaá ra Saulo. Chaq̄ ra vehe cuan ta quihvi ra chichi vehe. Ta tyiso ra ndaha ra siqui ra Saulo, ta catyí ra chi ra tyeh caa:

—Yañi Saulo, Sutu Mañi yo ra Jesús ra tuv̄i nuun ityi vachun, ican ra tach̄i chii vatyi tacuhva cuvi nanyehun inga chaha. Ta cusacutu ra chuun chihin Tatyí Ii ra —catyí ra Ananías chi ra Saulo.

18 Caa cuhva ri cuan ta cana coyo noo cha tari caa soo tiyaca cha yih̄i chiti nuu ra Saulo. Tyicuan ta cuvi nanyehe ra inga chaha. Yah̄a cuan ta condutȳa ra.

19 Yah̄a cuan ta chach̄i ra. Ta ndunyeq̄ coño ñuhu ra inga chaha. Ta ndoo ra suhva quivi chihin ñu yih̄i cuenda ra Cristo ñuu Damasco cuan.

Nu quichah̄a cahan ra Saulo tuhun ra Cristo chihin ñáyivi ñuu Damasco

20 Tyicuan ta numi ri quichah̄a cahan ra Saulo tuhun ra Cristo chihin ñáyivi tandih̄i vehe ñuhu ñu Israel ñuu Damasco cuan. Ta catyí cachi ra vatyi ra Jesús, Sehe Nyoo cuví chi ra.

21 Nd̄i cui maa ñáyivi cha chiñi tuhun cahán ra, iyo vavaha cuñi ñu. Ta catyí ñu chi tahan ñu:

—¿Atu ñima ra ihya cuví ra cha chica nyicon chi ñu chicán tahvi chihin sivi ra Jesús ityi ñuu Jerusalén cuan? ¿Atu suri ñima ra cuví cha vachi t̄in chi ñu ityi tyeh vatyi cucuhva cuenda ra chi ñu chi ra cacuví nuu chi tata sutu? —catyí ñu.

22 Soco ra Saulo ñihi ca cahán ra tuhun ra Cristo chihin cha ñi ca iñi ra. Ta sañahá ra vatyi ra Jesús cuví ra Cristo, Sehe Nyoo. Nyacua ña cutuñi iñi ra Israel nyicú Damasco cuan nya ityi chino iñi ra.

Nu chinq̄ xehe ra Saulo chi ra Israel

23 Cha yah̄a suhva quivi, ta ra Israel cha ña chinó iñi chi ra Cristo catyih̄i tahan ra tuhun cha cah̄i ra chi ra Saulo.

24 Ta ndiyaca ta ñiyaca canyatú ra chi ra yuvehe cahnu ñuu cuan. Soco ra Saulo cuan numi ri chito ra tuhun cuan.

25 Tyicuan ta ñáyivi cha chinó iñi chi ra Cristo ñuu cuan catyih̄i ñu chi ra chichi noo tica cahnu. Ta noo cha cuaa casanoq̄ ñu chi ra ityi ventana noo vehe cha cacu chihin barda cha nyaá nicachico yuhu ñuu cuan. Ta tyicuan caa chinq̄ ra cuahan ra.

Nu ñohó ra Saulo Jerusalén

26 Quivi cha chaq̄ ra Saulo Jerusalén, cuñi ra ndu ñin ri ra chihin ñu yih̄i cuenda ra Cristo. Soco tandih̄i maa ñu cuan ta yuhvi ñu chi ra. Vatyi ña chinó iñi ñu cha yih̄i ra cuenda ra Jesús.

27 Soco noo ra cha nañi Bernabé, naqueh̄en ra chi ra. Ta chah̄a cuenda ra chi ra chi ra apóstol. Ta nacatyí ra chi ra yoso caa nyehe ra Saulo chi Sutu Mañi yo ra Cristo ityi ñuu Damasco; ta nacatyí ra yoso caa cah̄an Sutu Mañi yo chihin ra. Ta yoso caa cah̄an ra tuhun ra Cristo chihin cha ña yuhvi ra nya ñuu Damasco cuan.

28 Tyicuan ta ndoo ra Saulo Jerusalén chihin ñu yih̄i cuenda ra Cristo.

29 Ta cahan ra tuhun Sutu Mañi yo chihin cha ña yuhvi ra. Ta ndatuhún xaan ra tuhun ra Cristo chihin ra Israel cha cahan sahan griego. Soco ra cuan cananduc̄u ra cuhva yoso caa ta cacah̄ni ra chi ra.

³⁰ Soco cachitó ra hermano cuan vatyí tyicuan caa yihí iñi ra cuan. Yucuan chaha chinyaca ra chi ra Saulo nya ñuu Cesarea. Ta yucuan ta natachí ra chi ra nya Tarso ñuu ra.

³¹ Tyicuan ta ñu yihí cuenda ra Cristo cha nyicú tandihí ityi Judea, ta ityi Galilea, ta ityi Samaria, vii xaan nyicu ñu vatyí ña cuxaan ca ñáyivi chi ñu. Ta ndunyeē ca iñi ñu chihin fuerza Nyoo vatyí quichaha vaha ñu cuhva catyí Nyoo, vatyí yuhví ñu coto ma sacuvi ñu cuhva cuñí ra. Iyó ñu chihin cha tyinyeé Tatyí li chi ñu. Ta cuaha xaan ñu cuahan nanduvi.

Nu nduvaha ra Eneas

³² Tyicuan caa cuví ta ra Pedro tuhvá ra chica noo ra nyehe ra yoso caa canyicu hermano noo noo ñuu. Ta chahan tucu ra chinyehe ra nu nyicu ñu yihí cuenda ra Jesucristo noo ñuu cha nañí Lida.

³³ Yucuan nañihí ra chi noo ra cuhvi. Nañi ra Eneas. Ta cha uña cuiya catuvi ra ña cuvi nacanda ra vatyí ndundava coño ñuhu ra.

³⁴ Soco ra Pedro catyí ra chi ra:

—Yoho Eneas, ra Jesucristo sanduvaha ra chuun. Ndícuita ta natuvi yuvun —catyí ra chi ra.

Tyicuan ta caa cuhva ri cuan ndícuita ra Eneas.

³⁵ Ta nyehe tandihí ñáyivi ñuu Lida cuan tyi nduvaha ra. Ta ñáyivi ñuu Sarón ñandihí. Tyicuan ta ñu cuan nachino iñi ñu chi Sutu Mañi yo. Ta sandoo ñu tuhun chahnu cha chino iñi ñu ta cumañi ca coto ñu tuhun ra Cristo.

Nu nandoto cu Dorcas

³⁶ Quivi cuan chiyo noo ñaha chinó iñi chi ra Cristo ñuu Jope. Ta nañí ña Tabita, soco chihin sahan griego, Dorcas nañí ña. Ta tyicuan ri sacuvi ña cha vaha chihin ñáyivi. Tyinyeé ña chi ñu ndahvi.

³⁷ Ta quivi cuan cu Dorcas quehen noo cuehe chi ña ta chihí ña. Ta cha yaha sacutyí ñu chi ña, chicacun ñu chi ña chichi noo cuarto nu cu uvi piso.

³⁸ Ñuu Jope cuan yatyin ri nyaá chihin ñuu Lida, nu nyaá ra Pedro. Ta ñu cha yihí cuenda ra Cristo ñuu Jope cuan chitó ñu vatyí nyaá ra Pedro ñuu Lida cuan. Tyicuan ta tachí ñu chi uvi tahan ra na cucatyí ra chi ra Pedro vatyí naquichi ra cha numi ri. Cuahan ra cuan ta catyí ra chi ra Pedro:

—Coho nya Jope. Sanumi ta ma cucueun —catyí ra chi ra.

³⁹ Tyicuan ta ra Pedro ndícuita ra ta cuahan ra chihin ra. Ta cuhva cha chaa ra, chinyaca ra chi ra nya cuarto nu caa ndiyi cuan. Ta tandihí maa ñu chihí yí catuhva ñu nicachico chata ra. Suri chacú chaa ñu. Ta sañahá ñu sahma cha quicu cu Dorcas ta chinyito ña.

⁴⁰ Tyicuan ta ra Pedro tava ra chi tandihí ñáyivi cuarto cuan. Tyicuan ta chicuñi chiti ra ta quichaha chican tahvi ra chi Nyoo. Tyicuan ta nanyehe ra chi ñaha chihí cuan catuvi ña. Ta quichaha catyí ra chi ña:

—Hermana Tabita, ndícuita —catyí ra chi ña.

Tyicuan ta nandica ña chiti nuu ña. Ta cuhva cha nanyehe ña chi ra Pedro, nicunyaq ña.

⁴¹ Tyicuan ta ra Pedro tin ra ndaha ña ta sandícuita ra chi ña. Tyicuan ta cana ra chi ra hermano, ta chi ñu chihí yí. Ta nacuhva cuenda ra chi ña chi ñu vatyí nandoto ña.

⁴² Yaha cuan ta ndi cuii maa ñu Jope chitó ñu cha nandoto ña cuan. Ta cuaha vavaha ñu nachino iñi chi Sutu Mañi yo.

⁴³ Ta ra Pedro ndoo ra cuaha ri quivi ñuu cuan. Nyaá ra vehe noo ra satyahyu ñi. Nañí ra Simón.

10

Ra Pedro ta ra Cornelio

¹ Ñuu Cesarea iyó noo ra cha nañi Cornelio. Ta cuvı́ ra capitán cuenda noo ciento sindaro. Ta ityi sindaro cuan, Italia nañi.

² Ta ra Cornelio cuan yuhvi ra chi Nyoo ta vaha sacahnú ra chi ra, maa ra ta ñáyivi chi ra ñandihı́. Ta sın ri cuaha vavaha xuhun chahá ra chi ñu ndahvi ñu Israel. Ta tyicuan ri chicán tahvi ra chi Nyoo.

³ Ta cuvı́ noo quıvi cuan cuhva cha caa uñi cha cha iñi, nyehe ra noo visión. Ta yucuan cuvı́ nu cachi xaan nyehe ra vatyi noo ángel cha tachı́ Nyoo quıhvi nu nyaá ra, ta catyi ra chi ra:

—ıYoho Cornelio! —catyi ángel cuan chi ra.

⁴ Tyicuan ta nanyehę ra Cornelio chi ángel cuan. Ta yuhvi xaan ra cuvı́. Ta quichahá ndaca tuhun ra ta catyi ra:

—¿Ñáa cha cuvı́ ihya, Tata? —catyi ra chi ángel cuan.

Tyicuan ta ángel cuan quichaha catyi ra chi ra:

—Nyoo chiñi ra ndıı cuıı maa cha chicón chi ra. Ta tahán iñi ra vatyi tyinyeé xaun chi ñu ndahvi.

⁵ Ta vityin cuñi chi cha tachun tyiño nya ñuu Jope na cuquehen chi noo ra cha nañi Simón Pedro.

⁶ Ta maa ra cuan cuacatyı ra chuun ñáa cha tahán chi sacuvun. Ta iyó ra vehe noo ra cha nañi tucu Simón, cuvı́ ra noo ra satyahuý ñı. Ta iyó vehe ra yuhu tyañuhu —catyi ángel cuan chi ra Cornelio, ta cuahan ángel cuan.

⁷ Ta cha yahá cuahan ángel cuan, ra Cornelio cana ra chi uvi tahan musu ra, ta chi noo sindaro cha chinó xaan iñi chi Nyoo. Ta cuvı́ tucu ra noo ra sahá cuenda chi ra Cornelio ñandihı́.

⁸ Ndıı cuıı tuhun cahan ángel cuan chihin ra Cornelio ta nacatyı ra chi nduñi tahan ra cuan. Ta tachı́ ra chi ra ñuu Jope.

⁹ Tuvı́ inga quıvi ta cuahan coyo ra cuan. Ta cuhva cha cuachaa coyo ra yuhu ñuu Jope cuan, ra Pedro ndaa ra xiñi vehe vatyi cuacacan tahvi ra chi Nyoo, ta cha cuñi hora cuvı́ cuhva cuan.

¹⁰ Ta chaá noo soco chi ra ta chısocó vavaha ra. Soco cha nıri ca cha sanduvahá ñu cha cachi ra, quichahá nyehe ra noo visión.

¹¹ Ta nyehe ra vatyi nicuitacoho andıvi. Ta nyehe ra cua noo noo sahma cahnu vavaha ityi andıvi. Ta tari quıvi nuñi noo noo tutun sahma cuan ta cuahan noo ityi nu ñuhu.

¹² Ta chıchi sahma cuan ñohó tandihı́ maa nuu quıti cha cumi tahan chaha. Ta tandihı́ nuu coo, ta tandihı́ nuu saa.

¹³ Tyicuan ta chiñi ra noo ndusu cha catyi chi ra:

—Pedro, ndıcuita ta cahñi quıti ihya, ta cachun —catyi ndusu cuan chi ra.

¹⁴ Soco ra Pedro nacahan ra ta catyi ra:

—Ma cachi, Sutu Mañi yuhu. Yuhu ña tuhvé chachi quıti cha catyi ley tyı yıca cha cachi ndı —catyi ra Pedro.

¹⁵ Tyicuan ta quichaha catyi tucu ndusu cuan chi ra inga chaha:

—Ma catyun vatyi yıca cha cachun noo cha cha yahá sanduvıı yuhu —catyi ndusu cuan chi ra Pedro.

¹⁶ Uñi tahan chaha sañahá Nyoo visión ihya chi ra. Tyicuan ta sahma cahnu cuan nandaq cuanuhu tucu ityi andıvi.

¹⁷ Cha nıri ca cha chicá xiñi ra Pedro ñáa cha cuñi chi catyi visión cuan, chaá coyo musu cha tachı́ ra Cornelio. Ta candaca tuhun ra nya nyaá vehe ra Simón.

18 Ta cha chaa coyo ra ityi yuvehe candacā tuhun ra tatu yucuan iyó noo ra cha nañi Simón Pedro.

19 Ta ra Pedro suri cha chicá xiñi ra ñáá cha cuñi chi catyi visión cha nyehe ra. Tyicuan ta Tatyí li quichahā catyi chi ra:

—Yuhe Pedro, uñi tahan ra nanducú chuun.

20 Ndícuita ta cuhun chihin ra, ta ma quihí uvi iñun vatyi mai tachí chi ra ihya —catyi Tatyí li chi ra.

21 Tyicuan ta ra Pedro noo ra nu canyicu ra cha tachí ra Cornelio, ta catyi ra chi ra:

—Yuhu cuví ra nanducú ndo. ¿Ñáá tyiño vachi ndo?

22 Tyicuan ta canacahan musu ra Cornelio ta catyi ra:

—Ra Cornelio, ra cuví capitán chi ndi ican tachí chi ndi. Noo ra vaha xaan ñáyivi cuví. Ta vaha xaan quichahá ra nu cahán Nyoo. Ta tandihí maa ra Israel ityi Judea ihya cacuñi ra chi ra chaha cha cuenda cha vaha ñáyivi cuví ra. Ta noo ángel Nyoo catyi chi ra vatyi na cana ra chuun, vatyi cuhun vehe ra vatyi tacuhva cuiñi ra tuhun cha cuacahun —cacatyí musu ra Cornelio chi ra Pedro.

23 Tyicuan ta chahā ra Pedro quihvi coyo ra chichi vehe. Ta candoo ra chihin ra cha cuaa cuan. Ta cha inga quivi cuan ta cuahan ra Pedro chihin ra. Ta cuahan suhva ra hermano cha iyó Jope cuan ñandihí.

24 Cha inga quivi chā coyo ra nya Cesarea nu nyatú ra Cornelio chi ra chihin ñáyivi chi ra, ta chihin tandihí ra tahan ra.

25 Cuhva cha chā ra Pedro vehe ra, ra Cornelio quitā ra ta cahan ra chihin ra. Ta chicuiñi chiti ra nuu ra ta quichaha sacahnu ra chi ra.

26 Soco ra Pedro nacoñeh̄ ra chi ra, ta catyi ra chi ra:

—Ndícuita vatyi noo rayi ri cuví yuhu tari yoho, ta ñima Nyoo cuví —catyi ra chi ra.

27 Ta cha niri ca cha cahán ra chihin ra, quihvi ra ta nanyehe ra cuaha ñáyivi candu ñin ri.

28 Tyicuan ta catyi ra Pedro chi ñu:

—Nyoho chitó ndo vatyi ley nyuhu cha cuví ndi ñu Israel, ña chahá chi cha cu ñin ri ndi chihin ñáyivi inga ñuu. Ta ni ri chichi vehe ñu ta ma cuví quihvi ndi. Soco Nyoo sañahā ra chii, ta catyi ra: “Yoho, ma catyun chi ni noo ñáyivi tyi ña vaha ñu”, catyi Nyoo chii.

29 Yucuan chaha quivi cha canā ndo chii, numi ri vachi. Ta vityin cuñi cote ñáá cuenda canā ndo chii —catyi ra Pedro chi ra Cornelio.

30 Tyicuan ta nacahan ra Cornelio, ta catyi ra:

—Cha iyó cumi quivi vityin, suri maa cuhva ihya cha nyaí vehi ta ña chachi ta chicán tahvi chi Nyoo cha cha iñi. Ta tuví noo ra nui. Ñihnó ra noo sahna xiño vavaha.

31 Ta catyi ra chii: “Yoho Cornelio, Nyoo chiñi ra cha chicán tahvun. Ta nichón iñi ra cha sacuvún vatyi tyinyeún chi ñu ndahvi.

32 Tachi tyiño nya ñuu Jope na quichi ra Simón Pedro. Nyaá ra vehe inga tucu ra cha nañi Simón, noo ra cha satyahyu ñi. Ta vehe ra nyaá yatyin ri yuhu tyañuhu. Ta na quichi ra Simón Pedro ta cahan ra chuhun”, catyi ángel cuan chii.

33 Tyicuan ta numi ri tachí tyiño vatyi cuquehen chuun. Ta vaha vatyi vachun. Ta vityin tandihí yo nyicú yo nuu Nyoo. Ta cuñi ndi cuiñi ndi tandihí cuii maa cha tachí Sutu Mañi yo chuun vatyi nacatyun chi ndi.

Nu cahán ra Pedro tuhun ra Cristo vehe ra Cornelio

34 Tyicuan ta quichaha cahan ra Pedro ta catyí ra:

—Vityin cutuñi iñi vatyí Nyoo cuñi ra chi tandihí ñáyivi. Cuví ri yo ñu Israel, o cuví ri yo ñu inga ñuu.

35 Soco naquehen ra chi yo tatu quichaha yo chi ra, ta sacuví yo cha vaha.

36 Cahān ra chihin nyuhu ñu vachi tata ra Israel, ta sacoto ra vatyí nduvaha coo yo chihin ra cha cuenda ra Jesucristo. Maa ra nyacá ñaha tandihí maa yo.

37 Nyoho chitó vaha ndo tandihí cha cuví ñuu Israel ñui, yoso caa quichaha chi nu cuví Galilea cha yaha cha cahān noo ra Juan nuu ñáyivi, ta sacondutya ra chi ñu.

38 Chitó ndo yoso caa chaha Nyoo tunyee iñi Tatyí li ra chi ra Jesús, ra Nazaret. Ta chica noo ra sacuví ra cha vaha, sanduvaha ra chi tandihí ñu cha nyehé tindocho sahá ra ña vaha. Tyehe caa sacuví ra Jesús vatyí Nyoo nyaá ra chihin ra.

39 Nyuhu cuví ndi cha ndaa tandihí cha sacuví ra Jesús nicahnu Judea ta ñuu Jerusalén. Yaha cuan ta chahñi ñu chi ra nu cruzi.

40 Soco sanandoto Nyoo chi ra nu cu uñi quivi. Ta tuví ra nuu ndi.

41 Ña tuví ra nuu tandihí ñáyivi. Soco tuví ra nuu nyuhu vatyí nacachi ra chi ndi nyata ityi chata ca vatyí cuví ndi cha ndaa cuenda ra. Nyuhu chachi ndi ta chihí ndi chihin ra cha yaha cha nandoto ra.

42 Ta tachi ra chi ndi vatyí cahan ndi tuhun ra chihin ñáyivi. Ta cuví ndi cha ndaa vatyí Nyoo cuatyaá ra chi ra Jesús tyi cuví ra juez chi ñu cha nyitó ta ñu cha chihí.

43 Ta tyicuan caa tucu nyata ityi chata ca, cacahan tandihí ra profeta Nyoo tuhun ra Jesús. Ta cacatyí ra vatyí tandihí ñu cha chinó iñi chi ra Jesús, cusandachi Nyoo cuatyí ñu cha cuenda maa ra.

Nu naquehén ñu Tatyí li ta ñima ñu Israel cuví ñu

44 Ni cahān ca ra Pedro ta noo xica ri Tatyí li siqui tandihí ñu tyasohó tuhun cahān ra.

45 Ta ra Israel cha cayihí cuenda ra Jesús cha chaa coyo chihin ra Pedro iyo xaan cuñi ra vatyí chaha tucu Nyoo Tatyí li ra chi ñu cha ñima ñu Israel cuví.

46 Chitó ra tyi tyicuan caa cuví vatyí chiñi ra cahān ñu inga sahan, ta sacahnú ñu chi Nyoo.

47 Tyicuan ta quichaha catyí ra Pedro chi ra cha chaa coyo chihin ra:

—Ma cuví casi yo nu condutya ñáyivi ihya. Vatyí cha naquehen tucu maa ñu Tatyí li tari maa yo —catyí ra chi ra.

48 Tyicuan ta tachi ra Pedro chi ñu ni ñihí Tatyí li na condutya ñu chihin sivi ra Jesucristo. Tyicuan ta chacu ndahvi ñu nuu ra Pedro vatyí cuñi ñu cha ndoo ra suhva quivi chihin ñu.

11

Nu nacatyí ra Pedro chi ñu yihí cuenda ra Cristo Jesús nya Jerusalén yoso caa cuahan chitya tuhun ra inga ñuu

1 Ra apóstol ta inga ra hermano cha nyicú Judea, ñihí ra tuhun vatyí nyacua nya ñu cha ñima ñu Israel cuví ta naquehén ñu tuhun Nyoo.

2 Tyicuan ta nachaa ra Pedro Jerusalén. Ta ra cha catyí vatyí cuñi chi cha sacuvi yo costumbre circuncisión ta cuhva cuví cacu yo, xaan xaan cuñi ra nyehe ra chi ra Pedro.

3 Ta cacatyí ra chi ra tyehe caa:

—¿Ñáá tuhun cha chahun vehe ñu cha ñima ñu Israel cuví ta chachun chihin ñu? —catyí ra.

⁴ Tyicuan ta ra Pedro nacatyí ra nya nu quichaha tandihí cha cuví chi ra ta catyí ra:

⁵ —Yuhu nyaí ñuu Jope. Ta cuhva cha chicán tahvi chi Nyoo ta nyehí noo visión. Ta nyehí tari noo sahma cahnú cha noó ityi andívi. Tari cha nuhñi noo noo tutun ta cuahan noo ityi nu ñuhú nu nyaí.

⁶ Ta nanyehe vahi ñáá cha ñohó chichi. Ta nyehí quití cha cumi chaha, quití cuhu, ta cóo, ta saa.

⁷ Ta chiñi noo ndusu cha catyí chii: “Ndícuita Pedro. Cahní quití ihya ta cahun”, catyí ndusu cuan chii.

⁸ Ta nacahn ta catyí tyehe caa: “Sutu Mañi yuhu, ma cuví, vatyi ni noo chaha ta ta cachi que coño quití quiñi caa.”

⁹ Tyicuan ta ndusu andívi nacahan chi chihin inga chaha, ta catyí chi: “Ma catyí yoho vatyi ma cachun noo cha yahá sanduví”, catyí ndusu cuan chí.

¹⁰ Uñi chaha cuví tyehe caa. Yahá cuan ta nandaq tandihí chihin sahma cuan ityi andívi.

¹¹ Ta caa cuhva ri cuan chaq coyo uñi tahan ra vehe nu nyaí, quitá ra ñuu Cesarea ta nanducu ra chíi.

¹² Ta Tatyí li tachí chii na cuhin chihin ra. Ta catyí ra chíi tyi ma caca iñi cha ñima ñu Israel cuví ñu. Ta chahan coyo tucu iñu tahan ra yañi yo ihya chihin. Ta cha chaq ndí nya Cesarea quihví ndi chichi vehe noo ra.

¹³ Ta nacatyí ra cuan chi ndi yoso caa nyehe ra chí noo ángel chichi vehe ra. Nanyaá ángel cuan ta catyí ra chí ra vatyi na tachi ra musu ra ñuu Jope na cana ra chí noo ra cha nañi Simón Pedro.

¹⁴ Vatyi ican ra cucatyí ra chí ra yoso caa cacu añima ra ta añima tandihí ñáyivi chí ra, catyí ángel cuan chí ra cuan na.

¹⁵ Ta sacuví ra cuan tari cuhva catyí ángel cuan chí ra. Ta cuhva cha chai vehe ra quichaha cahín chihin ñu. Ta quichí ri Tatyí li síqui ñu tari quichí síqui yo cha xihna ri.

¹⁶ Tyicuan ta nicohon iñi cha catyí Sutu Mañi yo quívi cuan. Ta catyí ra tyehe caa: “Ndicha vatyi ra Juan sacondutya ra chí ñáyivi chihin ndutya. Soco nyoho cucondutya ndo chihin Tatyí li”, catyí ra.

¹⁷ Nyoo chaha tucu ra Tatyí li ra chí ñu cuan tari chaha ra chí maa yo quívi chino iñi yo chí Sutu Mañi yo Jesucristo. Ta cha tyicuan caa zyóo ra cuví yuhu vatyi casí cha sacuví Nyoo? —catyí ra Pedro chí ra.

¹⁸ Tyicuan ta cuhva cha cachiñi ra yañi yo ra Jerusalén tuhun cuan ña nacahan ca ra. Ta casacahnú ra chí Nyoo. Ta cacatyí ra:

—Tu tyicuan caa cuví, cuñí chí catyí vatyi Nyoo chahá tucu ra chí ñu cha ñima ñu Israel cuví vatyi ndu uvi iñi tucu maa ñu cuatyí ñu, ta coo ñu ñáyivi cha ma naa ca maa —cacatyí ra.

Ñu yihí cuenda ra Cristo ñuu Antioquía

¹⁹ Quívi cha cachahñi ra chí ra Esteban, quichaha chica nyicon ra chí inga ñu yihí cuenda ra Cristo. Ta yihí ñu cachino ñu ta cuahan coyo ñu ityi Fenicia. Ta inga ñu nya noo ñuhú cha nyaá mahñu tyañuhu cha nañi Chipre. Ta yihí ñu chaq coyo ñu ñuu Antioquía. Ta suri cahan ñu tuhun ra Cristo soco ñin ri maa chihin ñu Israel.

²⁰ Ta chihin ñu cha cuahan coyo cuan, ndihí suhva ñáyivi ñuhú Chipre. Ta yihí tucu suhva ñu ñuu Cirene. Ta cha chaq coyo ñu ñuu Antioquía, ta

quichaha cahan tucu ñu cuan chihin ñu cha ñima ñu Israel cuví. Ta sacoto ñu tuhun Sutu Mañi yo Jesús, ra cha sacacu añima yo.

²¹ Ta tunyee iñi Sutu Mañi yo nyaa chihin ñu. Ta yucuan chaha cuaha ñáyivi casando ñu tuhun chahnu cha chingo iñi ñu. Ta nachino iñi ñu chi Sutu Mañi yo.

²² Tyicuan ta chaq tuhun cuan nya Jerusalén. Ta ñu yihí cuenda Cristo tachí ñu chi ra Bernabé na cahun ra nya Antioquía.

²³ Ta cha chaq ra Bernabé Antioquía cuan, nyehe ra yoso caa nasocó Nyoo chi ñu. Ta ndusi xaan cuñí ra. Ta cahán ra nuu ñu na cunyicon ñu chi Sutu Mañi yo chihin cha nñi iñi ñu.

²⁴ Tyicuan caa sacuví ra Bernabé vatyi cuví ra noo ra vaha. Tyitú ra chihin Tatyí Ii. Ta chinó xaan iñi ra chi Nyoo. Ta tyicuan caa ta cuaha ñáyivi quihvi ñu cuenda Sutu Mañi yo.

²⁵ Cha yaha cuan ta cuahan ra Bernabé cuananducu ra chi ra Saulo nya ñuu Tarso. Ta cha nañihí ra chi ra, chinyaca ra chi ra nya ñuu Antioquía.

²⁶ Ta cachinyicu ra chihin ñu yihí cuenda Nyoo ñuu cuan noo cuiya nani ta sañaha ra tuhun Nyoo chi cuaha ñáyivi. Ta suri ñuu Antioquía cuan cuví nu quichaha catyi ñáyivi: Cristiano chi ñu, o ñu yihí cuenda ra Cristo cuví cuan.

²⁷ Ta quivi cuan chaq coyo ra cachahá cuenda tuhun cahán Nyoo, ra cacuví profeta. Quita ra ñuu Jerusalén ta chaq coyo ra Antioquía.

²⁸ Ta noo ra cuan nañi ra Agabo chicuinanyaq ra nu nyicú ra yihí cuenda ra Cristo ta cahan ra tuhun cha chaha Tatyí Ii chi ra. Ta catyi ra vatyi cuquichi noo tama nicacahnú ñáyivi. Ta tyicuan caa cuví quivi chinyaq ra Claudio cuví ra rey cahnu.

²⁹ Tyicuan ta ñu yihí cuenda Cristo nya Antioquía tyihí tahan ñu tuhun vatyi cucuhva ñu yoso cuhva cundaa iñi maa noo noo ñu, vatyi cutyinyee ñu chi ñu yihí cuenda Cristo cha iyó ityi Judea.

³⁰ Tyicuan caa sacuví ñu ta sacuhun ñu xuhun chi ra cuví nuu chi ñu yihí cuenda Cristo nya Jerusalén. Ta ra Bernabé ta ra Saulo chinyaca ra xuhun cuan.

12

Nu chihí ra Jacobo ta nu quihvi ra Pedro vehe caa

¹ Ta quivi cuan quichaha chica nyicon rey Herodes chi suhva ñu yihí cuenda ra Cristo.

² Ta tachí ra tyiño vatyi na cahni ra chi ra Jacobo yañi ra Juan chihin mityi.

³ Ta nyehe ra Herodes vatyi tahan xaan iñi ñu Israel cha sacuví ra tyicuan caa, ta tyihí ra tyiño vatyi tñn ndihí ra chi ra Pedro. Ta cuví chi noo quivi vico pascua nu tuhva ñu chachi ñu pan cha ñahri yuchan iya yihí chihin.

⁴ Cha yaha cha tñn ra chi ra Pedro, tyihí ra chi ra vehe caa. Ta cumi ityi sindaro sahá cumi chi ra. Ta cumi sindaro cha noo ityi ra ta sahá cuenda ra suhva suhva cuhva chi ra. Ta tyaa ra Herodes cuhva vatyi nayahá vico cuan ta cucuhva cuenda ra chi ra chi ñáyivi.

⁵ Ta tyicuan caa ñohó ra Pedro vehe caa. Ta sindaro cuan sahá cumi vaha xaan ra chi ra. Soco cha ni ri ca cha ñohó ra yucuan, ñu yihí cuenda ra Cristo chicán tahvi xaan ñu nyita cuii ri maa cha cuenda ra.

Nu sacacu Nyoo chi ra Pedro vehe caa

⁶ Ta tyaá ra Herodes cuhva vatyí cha ñaha ri inga quivi cuan cutava ra chi ra Pedro nuu ñáyivi. Ta suri cha cuaa cuan ra Pedro quixí vavaha ra mahñu uvi sindaro cuan. Ta nuhñí ra chihin uvi cadena. Ta uvi ca sindaro canyicú ra yuvehe casahá cumi ra.

⁷ Ta tañi ri ta tuví noo ángel cha tachí Sutu Mañi yo. Ta ndundichin ri chichi vehe caa cuan. Ta ángel cuan tiñ ra xiin ra Pedro. Ta sandoyó ra chi ra. Ta catyí ra chi ra:

—Sanumi. Ndícuita —catyí ángel cuan chi ra.

Tyicuan ta ndachí cadena cha nuhñi ndaha ra Pedro.

⁸ Ta ángel cuan catyí ra chi ra:

—Nacuhñi vaha chichun ta natyihí ndichan chahun —catyí ángel cuan.

Tyicuan caa sacuví ra Pedro. Ta catyí ángel chi ra:

—Quehen sahmon ta tyauñ chaton ta quichun chate —catyí ángel cuan chi ra Pedro.

⁹ Ta ra Pedro quitá ra chata ángel cuan. Soco ña chitó ra tatu cha ndicha o cha ña ndicha cuví cuan, ta cuñi maa ra vatyí visión nyehé ra.

¹⁰ Soco cuahan ra chata ángel cuan ta cayahá ra noo nu sahá cumi sindaro. Tyicuan ta cayahá ra inga tucu nu casahá cumi sindaro cuan. Yahá cuan ta chaá coyo ra yuvehe caa cahnu nu quita ñáyivi ta quihvi ñu chichi ñuu. Ta yuvehe cuan nuña ri maa. Ta quitá coyo ra. Ta cha yahá yaha ra noo ityi cahnu, ta sandoyó ángel cuan chi ra.

¹¹ Tyicuan ta nacotó ra Pedro vatyí ndicha ta quichaha catyí ra:

—Ndicha, ñima visión cuvi. Soco maa Sutu Mañi yo tachí ra noo ángel vatyí sacacú ra chii ndaha ra Herodes ta ndaha ra Israel —catyí ra Pedro.

¹² Chicá xiñi ra tuhun ihya ityi cuahan ra. Ta chaá ra vehe cu María sihi ra Juan Marcos. Ta cuaha xaan ñu canyicú cuan chicán tahvi ñu chi Nyoo.

¹³ Ta cuhva cha sacachan ra Pedro yuvehe nuquehe, quitá noo ñaha tyivaa cha nañi Rode chinyehe ña yóo cha sacachan cuan.

¹⁴ Soco cuhva cha nicohon soho ña ndusu ra Pedro, ña nuña ña yuvehe. Vatyí sihi xaan cuñi ña, ta chino ña cua nacatyí ña. Ta catyí ña vatyí ra Pedro nanyaá ra yuvehe.

¹⁵ Tyicuan ta quichaha catyí ñu chi ña:

—Loco yoho —catyí ñu chi ña.

Soco ña cuan catyí ña vatyí ndicha cha cahán ña. Soco ñu cuan catyí ñu tyi ñima ra Pedro cuví ra, soco ángel cuenda ra cuví, catyí ñu.

¹⁶ Ta ra Pedro sañihí ca ra sacachan ra yuvehe. Ta cuhva cha nuña ñu ta nanyehé ñu chi ra, iyo xaan cuñi ñu ta yuhví ñu cuví.

¹⁷ Soco savahá ra seña chihin ndaha ra nacutaxin ñu. Ta nacatyí ra chi ñu yoso caa tava Sutu Mañi yo chi ra vehe caa. Ta catyí ra chi ñu:

—Nacatyí ndo chi ra Jacobo ta chi inga yañi yo —catyí ra.

Ta quitá ra ta cuahan ra inga ityi.

¹⁸ Cuhva cha cundichin, iyo cacuvi sindaro cha sahá cumi chichi vehe caa cuan, vatyí ña cachitó ra yoso caa quitá ra Pedro.

¹⁹ Tyicuan ta tachí ra Herodes cunanducu chi ra. Ta vatyí ña nañihí ra chi ra, tyicuan ta tachí ra na cacahñi ra chi ra sahá cumi vehe caa cuan. Yahá cuan ta quitá ra Herodes ityi Judea cuan ta cuahan ra ñuu Cesarea cuacoo ra.

Nu chihí ra Herodes

²⁰ Ta ra Herodes cuxaan xaan ra chihin ñáyivi ñuu Tiro ta ñáyivi ñuu Sidón. Soco cuñi ñu cuan nduvaha coo ñu chihin ra vatyí ñuu cha nyacá ñaha ra

yucuan quitá cha cachi ñu. Tyicuan ta ndu ñin ri ñu ta cuahan coyo ñu cuacutahan ñu chihin noo ra cha nañí Blasto. Ican ra sahá cuenda chi ra Herodes. Ta chicán ñu cha nduvaha coo ra Herodes chihin ñu.

²¹ Tyicuan ta catyí ra Herodes vatyí cuhun ñu nu nyaá ra noo quívi. Ta chaá quívi cuan ta ndihví noo ra sahna tyiño ra. Ta chicunya ra nu tyayu cahnu ra. Ta cahān noo ra nuu ñu.

²² Tyicuan ta quichaha canachaá ñáyivi, ta catyí ñu:

—Ra cha cahán ihya ñima noo rayí ri cuví ra. Nyoo cuví ra —catyí ñu.

²³ Ta caa cuhva ri cuan noo ángel Sutu Mañi yo chahā ra noo cuehe chi ra Herodes vatyí chahā ra cha catyí ñáyivi tyi Nyoo cuví ra. Ta quihví tindacu chi ra, ta chíji ra.

²⁴ Soco tuhun Nyoo cuahan chitya ca. Ta cahān ñu tuhun Nyoo tandihí ri ityi.

²⁵ Quívi cha ndihí tyiño saha ra Bernabé ta ra Saulo nya Jerusalén, cuanuhu coyo ra ñuu Antioquia. Ta cuahan tucu ra Juan Marcos chihin ra.

13

Nu quichaha cachicá ra Saulo ta ra Bernabé tyiño Nyoo

¹ Vehe ñuhu Antioquia cuan iyó ra cacuví profeta Nyoo. Ta iyó tucu ra cha sañahá tuhun Nyoo chí ñáyivi. Ta sívi ra cuan ican cuví ihya: Ra Bernabé, ra Simón Toon, ra Lucio ra ñuu Cirene, ra Manaén cha chahnú ñin ri chihin ra Herodes cha cuví rey ityi Galilea, ta ra Saulo.

² Ta noo quívi nyicú tandihí ra ta casacahnú ra chí Sutu Mañi yo. Ta casahá ra ayunar: ña cachachi ra ta cananducu ra chí Nyoo cuví cuan. Tyicuan ta catyí Tatyí Ii chí ra:

—Tava sñn ndo chí ra Bernabé ta ra Saulo cha cuenda tyiño cha cané chí ra —catyí Tatyí Ii chí ra.

³ Tyicuan ta cha ndihí saha ra ayunar, ta catyiso ra ndaha ra síqui ra, ta cachican tahvi ra chí Nyoo cha cuenda ra. Ta cacahan ra chihin ra tahan ra ta cuahān coyo ra.

Nu cahán ra apóstol tuhun Nyoo ñuhu Chipre

⁴ Yaha cuan tachí Tatyí Ii chí ra Bernabé ta chí ra Saulo noo ñuu cha nañí Seleucia. Tyicuan ta cuahan coyo ra. Ta yucuan caquihví ra chíchi noo barcu ta cuahān ra nya ñuhú Chipre cha nyaa mahñu tyañuhu.

⁵ Yucuan ta cachaá coyo ra noo ñuu yuhu tyañuhu cha nañí Salamina. Ta quichahā cahan ra tuhun Nyoo vehe ñuhu ra Israel. Cuahān tucu ra Juan chihin ra vatyí tyinyee ra chí ra.

⁶ Tyicuan ta cuahan coyo ra cahán ra tuhun Nyoo noo noo ñuu cha nyaa Chipre cuan nyacua nya chaá coyo ra ñuu cha nañí Pafos. Ta yucuan nañihi ra chí noo ra Israel cha nañí Barjesús. Ta chitó ra tuhun tasí. Cuví ra noo ra cuendu vatyí catyí ra vatyí cuenda Nyoo cahán ra.

⁷ Ta ra tasi cuan nyaá ra chihin gobernador Sergio Paulo. Ta ra Sergio cuví ra noo ra cachi iñi. Ta canā ra chí ra Bernabé ta chí ra Saulo, vatyí cuñí ra cuñi ra tuhun Nyoo.

⁸ Ta ra tasi cuan nañí tucu ra Elimas, ta chasí ra nu chino iñi gobernador cuan chí ra Cristo.

⁹ Tyicuan ta ra Saulo cha nañí tucu Pablo, tyití ra chihin Tatyí Ii. Ta nyehe vavaha ra chí ra Elimas cuan.

¹⁰ Ta catyí ra chí ra:

—Yoho ra sandaví ñaha, cuendu xaun. Sehe cuihna cuví chuun. Ta cuñún sativun tandíhi cha vaha. Ta tyicuan ri chasún ityi vaha Sutu Mañi yo.

¹¹ Ta vityin Sutu Mañi yo cutachi tuñi ra chuun, vatyí cunducuaun. Ta ma cuví nyehun ñuhú ñanyii suhva quiví —catyí ra Pablo chi ra Elimas.

Tyicuan ta caa cuhva ri cuan ta nducuaa ra. Ta ndoo ra nu ñaa iñi. Ta nducú ra noo ra tiin ndaha ra vatyí ña ndichin ca nyehé ra.

¹² Cuhva cha nyehé gobernador cuan cha cuví chi ra Elimas, chinqo iñi ra chi ra Jesucristo. Vatyí iyo cuñi ra nyehé ra cha sañahá Sutu Mañi yo.

Cuahan ra Pablo ta ra Bernabé nya ñuu Antioquía ityi Pisidia

¹³ Ra Pablo ta ra tahan ra quihví ra chichi noo barcu ñuu Pafos. Ta cuahan coyo ra nya ñuu Perge ityi Panfilia. Soco ra Juan Marcos sandoq ra chi ra ta cuanuhu ra nya Jerusalén.

¹⁴ Yahá cuan ta caquita ra Perge cuan, ta cuahan coyo ra ñuu Antioquía cha nyaá ityi Pisidia. Yucuan quihví coyo ra chichi vehe ñuhu ñu Israel ta cuví chi noo quiví nyitatu ñu. Ta chicunyicu ra.

¹⁵ Tyicuan ta quichahá sacua ha ñáyiví nu libru ley cha tyaa ra Moisés. Ta sacua ha tucu ñu libru cha tyaa ra cacuvi profeta Nyoo ta cha naha. Yahá cuan ta ra cacuví nuu vehe ñuhu catyí ra chi ra hermano nyicú cuan, vatyí tatu iyó noo tuhun cuñi ra cahan ra chíhin ñáyiví, cuví cahan ra.

¹⁶ Tyicuan ta ndicuita ra Pablo ta sacuví ra noo seña chíhin ndaha ra vatyí na cutaxin ñu. Ta catyí ra:

—Cuiñi ndo nyoho ra Israel, ta nyoho cha quichahá ndo chi Nyoo.

¹⁷ Nyoo cuenda yo, ñu Israel, nacachi vaha ra chi sutu chahnu yo. Ta quiví cha iyó ca ñu ityi Egipto sacuví ra noo ñuu cahnu chi ñu. Vasi ñima ñáyiví ñuu cuan cuví ñu, soco sanducua ha ra chi ñu. Yahá cuan ta tava ra chi ñu ityi cuan chíhin tunyee iñi chi ra.

¹⁸ Ta cunyeé iñi Nyoo tandíhi cuhva chiyo ñu nu chicá noo ñu ñuhú ityi chichi cha uvi xico cuiya.

¹⁹ Ta sanaa ra ucha tahan ñuu nahnu cha chiyo nicahnu Canaán, vatyí chaha ra ñuhú cuan chi sutu chahnu yo.

²⁰ Yahá cuan ta sacuví Nyoo vatyí cunyaca ñaha maa maa ri juez chi ñáyiví cuan. Tari noo cumi ciento sisava cuiya chinyaca ñaha juez chi ñu nyacua nya quiví chinyaca ñaha ra profeta Samuel chi ñu.

²¹ Tyicuan ta maa ñu chican ñu noo rey cha cunyaca ñaha chi ñu. Ta Nyoo chaha ra chi ra Saúl sehe ra Cis chi ñu, vatyí cunyaca ñaha ra chi ñu. Ta ra Saúl vachi ra tata ra Benjamín. Ta uvi xico cuiya chinyaca ñaha ra chi ñu.

²² Yahá cuan ta Nyoo tava ra chi ra Saúl cha cuví ra rey. Ta chaha ra vatyí cuví ra David rey. Ta catyí ra: “Nyhí vatyí ra David sehe ra Isaí cuví ra noo ray# cha tahn iñi cuhva iyó. Ta cusacuvi ra tandíhi cha cuñi yuhu”, catyí Nyoo tuhun ra David.

²³ Ta minoo ra vachi tata ra David cuan ican cuví ra Jesús. Ta maa Nyoo tachi chi ra vatyí sacacu ra chi yo ñu Israel, tari catyí ra chi sutu chahnu yo.

²⁴ Ta cumañi ca quichi ra Jesús, ra Juan ra sacondutya chi ñáyiví cahan ra nuu tandíhi ñáyiví Israel. Ta catyí ra chi ñu vatyí cuñi chi cha ndu uvi iñi ñu cuatyí ñu, ta condutya ñu.

²⁵ Ta cha cuandíhi tyiño saha ra Juan ta catyí ra: “¿Atu cuñi maa ndo vatyí yuhu cuví noo ra cahnu cha saquichi Nyoo? Soco ñima yuhu cuví ra cahnu cuan. Vatyí chata cha yahá yuhu ta vachi nonga ra. Ta ni ndichan nyaá chaha ra ta ña nañé cha ndachi. Vatyí cahnu xaan ra cuví ra”, catyí ra Juan.

26 'Hermano —catyi ra Pablo— nyoho ñu vachi tata ra Abraham, ta nyoho cha quichahá ndo chi Nyoo. Cha cuenda nyoho cuví tuhun ihya tyi sañahá Nyoo chi yo yoso caa cacu añima yo.

27 Ñáyivi ñuu Jerusalén ta ra cuví nuu chi ñu cuan, ña chitó ñu vatyí ra Jesús cuví ra cha sacacú chi yo. Ta ni ña cutuñí iñi ñu tuhun cha catyaá ra profeta Nyoo ta cha naha, vasi sacuaaha vavaha ñu tuhun cuan tandihí quivi cha nyitatu ñu, soco ña cutuñí iñi ñu. Ta quivi chahñi ñu chi ra Jesús chingo cava tari cuhva catyi ra profeta Nyoo cuan.

28 Vatyí vasi ñahri cuatyí ra nañihí ñu, soco chican ñu chi ra Pilato na tyihí ra tyiño cucahñi chi ra.

29 Ta cha yahá sacuví ñu chi ra tari cuhva catyí maa tuhun ra nu libru Nyoo ta chihí ra. Tyicuan ta sanoo ñu chi ra nu cruzi. Ta tyihí ñu chi ra chichi ñuhú.

30 Soco Nyoo sanandoto ra chi ra.

31 Ta chichi cha cuaha quivi tuví ra nuu ra cha quichi coyo chihin ra quivi quitá ra ityi Galilea, ta quichi ra Jerusalén. Ta ican ra cuan cacahán tuhun ra chihin ñáyivi vityin.

32 Ta yucuan chaha nyuhu cahán ndi tuhun vaha cha catyi Nyoo chi sutu chahnu yo vatyí cuhva ra chi yo.

33 Vatyí cha cuenda cha vaha chi maa yo cha cuví yo ñáyivi vachi tata ñu cuan, sacuví maa Nyoo cha catyi ra. Vatyí sanandoto ra chi ra Jesús tari cuhva nyaá nu cu uvi salmo nu catyi Nyoo tyehe caa: “Sehí cuví chuun, ta yuhu chahí ñáyivi coun vityin”, catyi Nyoo.

34 Nyoo tyaá ra cuhva vatyí sanandoto ra chi ra, tacuhva cha ma tyahyu coño ñuhu ra. Vatyí catyí nu tutu Nyoo: “Cuhve chi nyoho cha vaha cha catyi chi ra David.”

35 Yucuan chaha catyí tucu nu inga salmo tyehe caa. “Ma cuhvon cha tyahyu coño ñuhu Sehe iun”, catyí chi.

36 Ra David sacuví ra tyiño nuu ñu cha chiyó quivi chiyó ra, yoso cuhva cha catyi Nyoo chi ra tyi sacuví ra. Yahá cuan ta chihí ra ta chicuchí ñu chi ra tari chicuchí ñu chi sutu ra. Ta tyahyu coño ñuhu ra.

37 Soco ra cha sanandoto Nyoo chi, ña tyahyu coño ñuhu ra.

38 Yañi, cuñi chi coto ndo vatyí cha cuenda cha chihí ra Jesús tyiño nuu yo, Nyoo sahá ra ticahnu iñi cuatyí yo.

39 Ta cha cuenda ra Jesús sahá Nyoo ticahnu iñi chi tandihí ñu cha chinó iñi chi ra, tyi ley ra Moisés ña cuví sacuvaha chi yo nuu Nyoo.

40 Saha ndo cuenda coto ndoo siqui ndo cha catyaá ra profeta Nyoo nu catyi ra tyehe caa:

41 Nyehe nyoho, ra chacú nyaá, tahán chi cha iyo cuñi ndo ta cunaa ndo. Vatyí yuhu cuví Nyoo, ta sacuví minoo cha cahnu quivi cha iyó ndo vityin.

Soco ma chino iñi ndo tandihí cha sacuví yuhu vasi nacatyí ñáyivi chi ndo, catyí Nyoo.

42 Ndihi cahan ra Pablo ta cuaquita ra chata vehe ñuhu cuan chihin ra tahan ra. Tyicuan ta ñu cha ñima ñu Israel cuví quichaha catyi ñu chi ra, vatyí na cahan tucu ra tuhun ihya chihin ñu inga vitya quivi cha nyitatu ñu.

43 Cuhva cha ndihí ndu in ri ñu, cuaha xaan ñu Israel ta ñu cha yihí cuenda ñu Israel, cachinyicon ñu chi ra Pablo ta chi ra Bernabé. Ta chahá ra tuhun chi ñu vatyí na cuhun ca ñu ityi nuu ca chihin Nyoo. Ta ñaquehen vaha ñu tumañi iñi cha chahá Nyoo chí ñu.

44 Cha inga vitya quiví nyitatu ñu, ndu iin ri ñu. Ta cha yatyin cha tandihi ñáyiví ñuu cuan ndu iin ri ñu vatyi cuiñi ñu tuhun Nyoo.

45 Soco cuhva cha canyehe ra Israel, cuxaan ra vatyi nyehe ra vatyi cuaha ñáyiví nyicón chi ra cuan. Ta quichaha cacuvi yuhu ra chihin ra Pablo, ta cacahan ra chi ra.

46 Soco ña yuhví ra Pablo ta ra Bernabé. Ta quichaha cacatyí ra chi ra: —Cuñi chi cha cahan xihna ndi tuhun Nyoo chihin nyoho cha cuví ndo ñu Israel. Soco ña cuñi ndo naquehen ndo. Ta cuñi maa ndo vatyi ña naña ndo cha ñihi ndo ñáyiví chaa cha ma naa ca maa. Yucuan chaha cuhun ndi cucuhan ndi chihin ñu cha ñima ñu Israel cuví.

47 Vatyi tyicuan caa tachí Sutu Mañi yo chi ndi ta catyí ra tyehe caa: Tyai chuun tari ñuhu chi ñáyiví nicahnú ñuhu ñáyiví.

Tacuhva vatyi cusañahun ityi chi ñu yoso caa cacu añima ñu, catyí Nyoo.

48 Cuhva cha cachiñi ra cha ñima ra Israel cuví, ndusiñi cuñi ra. Ta quichaha catyí ra vatyi tuhun Nyoo vaha xaan. Ta nachino iñi tandihi ñu cha nacachi maa Nyoo chii, vatyi coo ñu ñáyiví chaa cha ma naa ca maa.

49 Ta tyicuan caa chitya tuhun Nyoo tandihi ityi ñuu cuan.

50 Soco ra Israel cacahan ra chihin suhva ñusiñi tyayii cha nyicón ley ra Moisés. Catyí ra chi ñu vatyi ña vaha tuhun cahán ra Pablo. Ta cahán tucu ra chihin ra cuví nuu chi ñuu cuan. Ta yucuan cuví nu quichaha chica nyicon ñu chi ra Pablo ta chi ra Bernabé, nyacua nya cha tava ñehe ñu chi ra ñuu cuan.

51 Tyicuan ta canaquisi ra ñiyaca chaha ra tari noo seña vatyi ndoo cuatyí ñáyiví cuan siqui maa ñu. Ta cuahan coyo ra ñuu Iconio.

52 Soco ñu yihí cuenda Nyoo ñuu Antioquia cuan sii xaan cacuví chi ñu. Ta tyitu ñu chihin Tatyí Ii.

14

Nu ñohó ra Pablo ta ra Bernabé ñuu Iconio

1 Ñohó ra Pablo ta ra Bernabé ñuu Iconio. Ta caquihví ra chichi vehe ñuhu ñu Israel. Ta vaha xaan cacahan ra tuhun Nyoo chihin ñáyiví. Ta cuaha xaan ñu nachino iñi ñu chi ra Cristo, ñu Israel ta ñu cha ñima ñu Israel cuví ñandihí.

2 Soco ra Israel cha ña chinó iñi chi ra Cristo catyiyuhú ra chi ñu cha ñima ñu Israel cuví vatyi caca ña vaha iñi ñu nyehe ñu chi ra yihí cuenda ra Cristo.

3 Yucuan chaha ra Pablo ta ra Bernabé candoo ra yucuan cuaha quiví. Ta chihin cha ñi iñi ra cacahán ra tuhun ra Cristo. Ta chinó xaan iñi ra chi Sutu Mañi yo. Ta Sutu Mañi yo tyinyee ra chi ra cha cacahán ra tuhun ra yoso caa cuñi ra chi yo. Ta chaha Sutu Mañi yo cha casacuvi ra seña ta milagru tacuha coto ñáyiví tyi ndicha cha cahan ra.

4 Soco ñáyiví ñuu, ña iin ri cuví ñu. Yihí ñu cuahan ñu tumañi iñi chi ra Israel. Ta inga tucu ñu cuahan ñu tumañi iñi chi ra apóstol.

5 Tyicuan ta ra Israel ta ra cha ñima ra Israel cuví, catyihí tahan ra tuhun chihin ra cuví tyiño, vatyi cahan ña vaha ra siqui ra, ta catuchí ra yuu chi ra.

6 Soco ra Pablo ta ra Bernabé ñihí ra tuhun vatyi cusacuvi ra tyicuan caa, ta cuahan coyo ra nya ñuu Listra, ta nya ñuu Derbe ityi Licaonia. Ta cachica noo ra ityi cuan.

7 Ta cacahan tucu ra tuhun Nyoo yoso caa sacacu ra añima yo.

Nu cañi ñáyiví yuu chi ra Pablo nya ñuu Listra

8 Nya Listra iyó noo rayii cha pehe chaha. Ta nya ndaha cacu ra ta ña cuví caca ra. Vatyi pehe ninduvi chaha ra.

9 Ta suri maa ra pehe chaha cuan tyasohō vavaha ra nu cahán ra Pablo. Ta ra Pablo, tuvī iñi ra vatyi chinó iñi ra cuan vatyi cuvī nduvaha ra.

10 Tyicuan ta ra Pablo cahan ra chihin cha chaa ndusu ra, ta catyí ra:

—Nĩcuinanyaa ndoo —catyí ra Pablo chi ra.

Ta ra cuan, noo ri caña ndava ra, ta nĩcuinanyaa ra. Ta quichaha chica ra.

11 Cha nyehé ñáyiví cha sacuví ra Pablo, quichaha cana chaa ñu chihin sahan Licaonia, ta catyí ñu:

—Nyoo cha tari caá rayi chaa coyo nu nyicú yo —catyí ñu.

12 Ta catyí ñu tyi ra Bernabé cuví ra noo nyoo cha nañi Júpiter, ta ra Pablo cuví nyoo cha nañi Mercurio, vatyi ican ra cuví ra cahán.

13 Ta iyó noo tata sutu cuenda Júpiter cuan, saha cumí ra vehe ñuhu cha nyaá yuhu ñuu ri cuan. Ta quichi nyaca ra toro ta ita vatyi maa ra ta ñáyiví cuñí ñu sacahnu ñu chi ra Pablo ta chi ra Bernabé. Ta cuacahñi ñu toro tyi cuacuhva cuenda ñu chi ra, vatyi cuñí ñu tyi nyoo sacuví ra.

14 Soco cuhva cha catuví iñi ra apóstol, ra Bernabé ta ra Pablo, cha chicá xiñi ñu, quichaha chahnya ra sahma ra. Ta casacuví ra tyicuan caa tari noo seña vatyi ña ndoo ra vaha. Ta quihví coyo ra mahñu nu tuví ñáyiví, ta cacana chaa ra,

15 ta catyí ra:

—Nyoho tata, ¿ñáá tuhun cha nyacuví ndo tyehe caa? Nyuhu rayi ri cuví ndi tari maa ndo. Ta vachi ndi vatyi catyí ndi chi ndo vatyi na saña ndo cha sacuví ndo tyehe caa. Vatyi ña chiñuhu maa cha tyehe caa. Ta na cunyicon ndo chi Nyoo nyitó. Vatyi ican ra savaha andiví ta ñuhu ñáyiví. Ta savaha ra tyañuhu ta tandihí cha iyó chichi tyañuhu cuan.

16 Ta tyiembu chahnu ta nya vityin, Nyoo saña ndaha ra chi ñáyiví na sacuví maa ñu yoso cuhva cuñí ñu,

17 vasi tyicuan ri sañahá ra chi ñu yóo ra cuví ra, chihin cha vaha cha sacuví ra. Maa ra sacoon ra savi nu canyicú yo. Chahá ra cha vaha coo tyiño saha yo quiví tahan chi. Ta chahá ra cachi yo. Ta chahá ra cha cusí cuñí añima yo —catyí ra Pablo chi ñu.

18 Soco vasi catyí ra tyicuan caa, yíi xaan ta chasi ra cha cahñi ñu toro cuan, vatyi cuñí ñu sacahnu ñu chi ra chihin cuan.

19 Tyicuan ta chaa coyo suhva ra Israel, ra ña chinó iñi chi ra Cristo, ra ñuu Antioquia, ta ra ñuu Iconio. Ta tyiyuhū ra chi ñáyiví, ta catyí ra vatyi na tuchi ñu yuu chi ra Pablo. Ta tyicuan caa sacuví ñu. Ta cuñí maa ñu vatyi cha chihí ra. Ta xitá quiñoho ñu chi ra ityi chata ñuu.

20 Soco candu ñn ri ra cayihí cuenda Nyoo nu catuví ra Pablo. Ta ndicuita ri ra. Ta quihví ra inga chaha chichi ñuu. Ta cha inga quiví cuahan ra ñuu cha nañi Derbe ta cuahan ra Bernabé chihin ra.

21 Ta cahān tucu ra tuhun Nyoo nya ñuu Derbe yoso caa sacacu Nyoo añima yo. Ta cuaha ñáyiví nacuhva ñu chi ñu chi Nyoo. Yaha cuan ta cuanuhu coyo ra ityi quichi ra. Ta yaha ra ñuu Listra ta ñuu Iconio inga chaha, ta nachaa ra nya Antioquia.

22 Ta tandihí ñuu cuan sanduní ca ra iñi ñu yihí cuenda Nyoo. Ta catyí ra chi ñu na cuhun ñu ityi nuu ca chihin cha chino iñi ñu Nyoo. Ta catyí tucu ra chi ñu vatyi tatu cuñí yo cha cunyacá ñaha Nyoo chi yo, cuñí chi cha nyehe yo tindoho.

²³ Ta canatyisq̄ ra chi ra ca quihi ndaha chi ñu yihí cuenda Nyoo noo noo vehe ñuhu. Ta cananducu ra Nyoo chihin cha ña chachí ra xita ta cachican tahvi ra chi Nyoo cha cuenda ra. Yahā cuan ta catyí ra chi ra:

—Chino iñi ndo chi Sutu Mañi yo. Maa ra na cocumi ra chi ndo —catyi ra chi ra.

Nu cuanuhu coyo ra Pablo ta ra Bernabé Antioquía ityi Siria

²⁴ Yahā cuan ta yahā coyo ra Pablo ta ra Bernabé ityi Pisidia, ta chaā coyo ra ityi Panfilia.

²⁵ Cacahan ra tuhun Nyoo ñuu Perge. Yahā cuan ta chahan ra ñuu Atalia.

²⁶ Yucuan quihv̄i coyo ra chichi noo barcu ta cuanuhu coyo ra Antioquía. Yucuan cuví ñuu nu natyaa ñu chi ra ndaha Nyoo tyi cusacuví ra tyiño nuu ra, ta vityin cha nachaa coyo ra.

²⁷ Cuhva cha nachaa coyo ra Antioquía sandu in ri ra chi ñu yihí cuenda Nyoo. Ta nacatyí ra chi ñu tandihi cha sacuví Nyoo chihin ra. Ta yoso caa nuña Sutu Mañi yo ityi vatyi chinó tucu iñi ñu cha ñima ñu Israel cuví.

²⁸ Ta naha xaan ndoq̄ ra Pablo ta ra Bernabé chihin ñu yihí cuenda Nyoo ñuu cuan.

15

Nu casandaa ra apóstol tyiño nya Jerusalén

¹ Nyaá ca ra Pablo ta ra Bernabé Antioquía, ta chaā coyo ra quitā coyo ityi Judea. Ta quichahā sañahá ra chi ra yihí cuenda Nyoo. Ta catyí ra vatyi cuñí chi sacuví ra costumbre circuncisión tari cuhva catyí ra Moisés, tyicuan ta cacu ra.

²⁻³ Ta ñihi xaan cahan ra Pablo ta ra Bernabé chihin ra cuan cha cuenda cuan. Tyicuan ta catyisq̄ ñu hermano Antioquía cuan chi ra Pablo ta ra Bernabé chihin suhva ca ra vatyi cahun coyo ra Jerusalén. Vatyi cusandaa ra tyiño ihya chihin ra apóstol ta ra yihí ndaha ñu nyicu vehe ñuhu ñuu Jerusalén cuan. Tyicuan ta cuahan coyo ra. Ta ityi cuahan ra, yahā ra ityi Fenicia ta Samaria. Ta canacatyí ra chi ñu yihí cuenda Nyoo yoso caa sañá ñu cha ñima ñu Israel cuví tuhun chahnu cha chino iñi ñu. Vatyi nacuhvá cuenda ñu chi ñu chi Nyoo. Ta tandihi ñu hermano cusii xaan cuñí ñu cha chitó ñu tuhun cuan.

⁴ Quivi chaā coyo ra Pablo ta ra Bernabé Jerusalén, cuahan ra nu ndu in ri ñu yihí cuenda Nyoo. Ta tandihi ñu chihin ra apóstol, ta ra yihí ndaha chi ñu, chahā ñu lugar chi ra. Ta canacatyí ra tandihi cha sacuví Nyoo chihin ra.

⁵ Soco suhva ra fariseo cha cachinó iñi chi ra Cristo, nicuinanyaā ra ta catyí ra:

—Tandihí ra cha ñima ra Israel cuví ta chinó iñi ra chi ra Jesús, ñiñi cuñí chi cha sacuví ra costumbre circuncisión. Ta cuñí tucu chi cha sacuví ra cuhva catyí ley cha tyaa ra Moisés —catyí ra.

⁶ Tyicuan ta candu in ri apóstol ta ra yihí ndaha chi ñu vehe ñuhu vatyi candatuhun vaha ra tuhun cuan.

⁷ Cha yahā cha cuviyuhu vavaha ra ta ndicuita ra Pedro, ta catyí ra:

—Yañi, chitó ndo vatyi chichi cha tandihí yo cachí Nyoo chi yuhu ra ndahvi quivi cuan, vatyi cahun tuhun yoso caa cacu añima yo chihin ñu cha ñima ñu Israel cuví, vatyi nachino iñi ñu chi Sutu Mañi yo.

⁸ Ta Nyoo, ra chitó añima tandihí ñáyivi, sañahā ra chi yo vatyi cuñí ra chi ñu cuan. Ican tuhun chahā ra Tatyí Ii ra chi ñu, tari chahā ra chi yo.

⁹ Nyoo ña sahá ra tyi vaha ca yoó cha nuu ñu cuan. Soco sanduvií tucu ra añima maa ñu cha cuenda cha chinó iñi ñu chi ra.

¹⁰ Vityin ñacaca xiñi yo cuhva cuñi Nyoo. Vatyí ña vaha cha tyisó yo ley ra Moisés siqui ñu. Vatyí niri maa sutu chahnu yo ta niri maa yo ta ña cuví naquehen vaha yo ley cuan.

¹¹ Ñima tyicuan caa cacú yo. Yoó chitó yo vatyí cacú yo chihin tumañi iñi cha sacuví Sutu Mañi yo Jesús chihin yo. Ta tyicuan caa tucu ñu cuan —catyí ra Pedro chi ra.

¹² Tyicuan ta taxi ri cacuví tandihí ra. Ta tyasohó ra tuhun cahan ra Bernabé ta ra Pablo. Vatyí canacatyí ra seña ta milagro cha sacuví Nyoo nu cacahan ra tuhun Nyoo nu nyicú ñu cha ñima ñu Israel cuví.

¹³ Cuhva cha ndihí cahan ra, quichaha cahan ra Jacobo, ta catyí ra:
—Nyoho yañi, cuiñi ndo tuhun cahín.

¹⁴ Cha nacatyí ra Simón Pedro chi yo yoso caa quichaha chahá Nyoo tumañi iñi chi ñu cha ñima ñu Israel cuví. Vatyí cachí tucu ra chi suhva ñu vatyí cuví ñu noo ñáyivi cuenda ra.

¹⁵ Ta ñin ri nanduví tuhun ihya chihin tuhun cha cahan ra profeta cuenda Nyoo ta cha naha, tari cuhva nyaa nu tutu Nyoo tyehe caa:

¹⁶ Yaha tandihí tuhun ihya cuquichi tiqui nu nyaá ndo.

Quiví chiyo ra David, vaha sacahnu ñáyivi chii.

Soco yahá cuan sandihí ñu tuhun cha sacahnu ñu chii.

Soco cuquichi tiqui ta tari cha cunacoñehi vehe ñuhu ra David inga chaha.

Vatyí cusacahnu tucu ñáyivi chii.

¹⁷ Tacuhva cuví nanducu tandihí ca ñáyivi chii, tandihí ñu cha ñima ñu Israel cuví cha chicán tahvi chihin sívi.

¹⁸ Tyicuan caa catyí Sutu Mañi yo ta sañaha ra tuhun ihya chi ñáyivi chiyo ta cha naha ta chi ñáyivi cha iyó vityin.

¹⁹ Yucuan chaha catyí yuhu vatyí ña vaha sayanga yo chi ñáyivi cha ñima ñu Israel cuví cha sandoo ñu tuhun cha chiyo ñu ta quihvi ñu cuenda ra Cristo. Ña vaha catyí yo tyi cuñi chi cha quichaha ñu ley chahnu.

²⁰ Vaha ri maa chihin cha sacuhun yo tutu chi ñu. Ta catyí yo chi ñu vatyí ma cachí ñu coño cha chahá cuenda ñáyivi chi xitohyo. Ta ni noo ñu ta ma coo ri maa ñusihí o rayii chi ñu, tatu ñima ñasihí o yii ñu cuví. Ta ma cachí ñu coño quití chihí cha cava ñu sucun ta ña chati niñi. Ta ma cachí ñu niñi.

²¹ Vatyí nyata tyembu ta chiyo ra cha sañahá ley ra Moisés vehe ñuhu ñu Israel ta sañaha ra tuhun cuan tahan tahan ñuu. Ta tahan uña quívi quívi nyitátú ñu, sacuahá ra tuhun cha tyaa ra Moisés —catyí ra Jacobo chi ra.

²² Tyicuan ta ra apóstol ta ra cayihí ndaha chi ñu nyicú vehe ñuhu chihin tandihí ñu yihí cuenda Nyoo nacachí ñu chi suhva ra. Ta yaha cuan ta tachi ñu chi ra vatyí cuhun ra Antioquía chihin ra Pablo ta ra Bernabé. Ta ra cha canatyiso ñu ican cuví ra Judas cha nañí Barsabás, ta ra Silas. Ican ra cacuví ra ra cananyisó tyiño vehe ñuhu ñuu Jerusalén cuan.

²³ Ta chihin ra tachi ñu noo carta. Ta catyí carta cuan tyehe caa:

“Nyuhu ra apóstol, ta ra yihí ndaha chi ñu nyicú vehe ñuhu ta yañi ndo cuenda Nyoo, tandihí ri ndi chahá ndi nocumi chi nyoho cha ñima ra Israel cuví ndo vatyí yañi ndi cuví chi ndo vasi ñima ñu Israel cuví ndo. Tandihí ri ndo cha iyó ndo Antioquía ta nyoho ñu Siria, ta ñu Cilicia ñandihí, sacuhún ndi carta ihya chi tandihí ri ndo.

²⁴ Chitó ndi vatyí quita suhva ra ityi nu nyicú ndi ihya. Ta cuahan ra nu nyicu ndo. Soco ña catyí nyuhu chi ra tyi cuhun ra cusayanga ra chi ndo

chihin tuhun cahan ra. Satondo ra cuan xiñi ndo vatyí catyí ra chi ndo tyi cuñí chi cha sacuví ndo costumbre circuncisión ta naquehen vaha ndo ley ra Moisés. Soco ñima nyuhu catyí tyi cahun ra cucatyí ra chi ndo tyicuan caa.

²⁵ Yucuan chaha ndu ñin ri ndi ta nacachj tahan tuhun cahan ndi ta vaha cuñí ndi cha tachi ndi chí ra hermano ihya chihin ra Pablo ta ra Bernabé nu nyicu ndo.

²⁶ Nduvi tahan ra ihya nyehé xaan ra tindoho cha cuenda Sutu Mañi yo. Ta vasi cuñí ñáyivi cahñi ñu chi ra soco ña sandihí ra tuhun cha sacoto ra tuhun Sutu Mañi yo Jesucristo.

²⁷ Ta yucuan chaha tachí ndi chi ra Judas ta chi ra Silas. Ta maa ra cucahan ra chihin yuhu ra chihin ndo, vatyí nacatyí ra tandihí cha tyaa ndi nu tutu ihya.

²⁸ Vatyí ñiri Tatyí Ii ta ñiri nyuhu ta ña cuñí ndi tyiso ca ndi carga siqui ndo, soco ihya ri cha ñiñi ca tahán chi cha naquehen vaha ndo.

²⁹ Ma cachi ndo coño cha chaha cuenda ñu chi xitohyo. Ta suri ma cachi ndo ñiñi, ni coño quiti cha chihí ta ña chatí ñiñi ti. Ta ma coo ñusihi o rayñi chi ndo tatu ñima ñasihi ndo o yñi ndo cuví. Tatu ma sacuví ndo tyicuan caa, vaha xaan cuacoo ndo. Ta Nyoo na cocumi ra chi ndo”, catyí ra nu carta cuan.

³⁰ Ta cuahan coyo ra cha catachi ra chi cuan. Ta chaa coyo ra Antioquía. Ta sandu ñin ri ra chí tandihí ñu, ta nacuhva cuenda ra carta cuan.

³¹ Cuhva cha sacuahá ñu carta cuan ndusñi xaan cuñí ñu vatyí vaha xaan cahan chi.

³² Ta ra Judas ta ra Silas cuví tucu ra cuan profeta cuenda Nyoo. Ta sandunij ra iñi ra hermano chihin tuhun cahan ra.

³³ Ta cha yahá chinyicu ra cuan suhva quivi ta cuanuhu coyo ra nya nu nyicu ñu catachi chi ra. Ta tandihí ñu yihí cuenda ra Cristo catyí ñu vatyí na cahun vaha ra.

³⁴ Soco ra Silas natyaa ra cuhva vatyí cundoo ra.

³⁵ Ta ra Pablo ta ra Bernabé candoq tucu ra Antioquía yucuan. Ta maa ra chihin cuaha ca ra casañaha ca ra chí ñáyivi. Ta cacahan ca ra tuhun Sutu Mañi yo chihin ñu.

Nu cu uvi chaha cuahan ra Pablo tuhun Nyoo ta nu cusñn ra chihin ra Bernabé

³⁶ Ta cha yahá suhva quivi ta catyí ra Pablo chi ra Bernabé:

—Coho inga chaha cunyehe yo nu nyicu ñu yihí cuenda ra Cristo tandihí ri ñuu nu cahan yo tuhun Sutu Mañi yo. Vatyí nyehe yo yoso caa canyicu ñu —catyí ra chi ra.

³⁷ Ta ra Bernabé cuñí ra cha cahun tucu ra Juan Marcos chihin ra.

³⁸ Soco ra Pablo ña tahán iñi ra cha cahun ra Juan chihin ra, vatyí sandoq ra chi ra nya Panfilia quivi cuan. Ta ña chahan ca ra chisaha tyiño ra chihin ra.

³⁹ Ta ña chitahan iñi ni noo ra, ta cacusñn ra. Ra Bernabé cuahan ra chihin ra Juan Marcos. Ta quihvi ra chichi noo barcu ta cuahan coyo ra Chipre.

⁴⁰ Ta ra Pablo cachí ra chi ra Silas. Ta cha yahá chican tahvi ra hermano chí Nyoo na tyinyee ra chi ra, ta cuahan coyo ra.

⁴¹ Ta yahá ra ityi Siria, ta ityi Cilicia, ta sanduní ca ra iñi ñu yihí cuenda Nyoo noo noo ñuu.

¹ Ra Pablo ta ra Silas chaꝥ coyo ra ñuu Derbe, ta ñuu Listra. Ta yucuan nañihí ra chi noo ra yihí cuenda Cristo. Nañí ra Timoteo. Ta sihi ra cuví ña noo ñaha Israel. Ta suri yihí tucu ña cuenda ra Cristo. Soco sutu ra ra Grecia cuví ra.

² Vaha xaan chicá ra Timoteo chihin Nyoo catyí ñu yihí cuenda Cristo ñuu Listra ta ñuu Iconio.

³ Ta ra Pablo cuñí ra cha cuhun ra Timoteo chihin ra. Ta saha ra circuncidar chi ra Timoteo. Vatyí coto ma cuñí ñu Israel cha iyó ityí cuan tuhun ra Cristo cha cahán ra. Vatyí tandihí ñu chitó ñu vatyí sutu ra cuví ra ra ñuu Grecia.

⁴ Tyicuan ta cuahan coyo ra noo noo ñuu. Ta nacatyí ra chi ñu yihí cuenda ra Cristo tuhun cha chahꝥ ra apóstol ta ra yihí ndaha chi ñu nyicu vehe ñuhu Jerusalén chi ra.

⁵ Ta tyicuan caa ta nduní ca iñi ñu yihí cuenda ra Cristo ta chino ca iñi ñu chi Nyoo. Ta tahan quívi ta cuahan nducuaha ca ñu.

Nu nyehé ra Pablo noo visión chi noo ra Macedonia

⁶ Ña chahꝥ Tatyí Ii cha cahan ra tuhun Nyoo ityí Asia. Yucuan chaha yahꝥ sava ra ityí Frigia nu iyó xahñi ñuhu chihin ityí Galacia.

⁷ Ta chaꝥ coyo tucu ra ityí Misia. Ta cuñí tucu ra cuhun coyo ra ityí Bitinia, soco Tatyí Ii ra Jesucristo ña chahꝥ cuhun coyo ra.

⁸ Tyicuan ta nya sava ri yahꝥ ra ñuu Misia ta canoꝥ coyo ra ñuu Troas cha nyaá yuhu tyañuhu.

⁹ Cañohó ra ñuu Troas cuan, ta noo cha cuaa nyehe ra Pablo noo visión. Nyehe ra chi noo rayi ityí Macedonia. Nanyaá ra ta chacú ndahvi ra nuu ra, ta catyí ra chi ra: “Ñaha, vatyí tyinyeun chi ndí”, catyí ra.

¹⁰ Ta cha nyehe ra Pablo visión cuan, yuhu ra Lucas chihin ra Pablo ta inga ra sanduvahꝥ ndi chi ndi ta cuahan ndi nya Macedonia cuan. Vatyí chitó vaha ndi vatyí Nyoo canꝥ chi ndi, vatyí cahan ndi tuhun ra yoso caa sacacú ra añima yo chihin ñáyivi ityí cuan.

Nu ñohó ra Pablo ta ra Silas ñuu Filipos

¹¹ Quihví ndi noo barcu ñuu Troas. Ta chahan ndoo ityí ri ndi nya Samotracia noo ñuhú luhlu iyó mahñu tyañuhu. Ta cha inga quívi chaꝥ ndi ñuu Neápolis.

¹² Ta yucuan quitꝥ ri ndi ta cuahan ndi ñuu Filipos cha cuví noo ñuu cuenda ñu Roma. Ta cuví chi noo ñuu cahnu ca cha nuu tandihí ñuu ityí Macedonia cuan. Ta yucuan chinyicu ndi suhva quívi.

¹³ Noo quívi cha nyítatu ñáyivi ta quitꝥ ndi ityí chata ñuu, yatyin noo yutya nu tuhvá ñu chican tahvi ñu chi Nyoo. Chicunyaꝥ ndi yucuan ta chahan ndi tuhun Nyoo chihin ñusihi cha candu in ri yucuan.

¹⁴ Noo ñaha nañí ña Lidia. Ta ñuu ña cuví Tiatira. Ta tuhvá ña xico ña sahma finu, tyacu nyaa. Yucuan cuví tyiño sahá ña. Ta sacahnú ña chi Nyoo tari ñu Israel. Ta chiñí ña cha cahán ra Pablo. Ta Nyoo nuña ra añima ña na quichaha ña cha cahan ra.

¹⁵ Ta condutya ña chihin ñáyivi chi ña. Ta yahꝥ cuan ta chacu ndahvi ña nuu ndi, ta catyí ña:

—Tatu nyehé ndo vatyí ndicha cha chinó iñi chi Sutu Mañi yo, ñaha ndo, coo ndo vehi —catyí ña chi ndi.

Ta saniñí ña chi ndi cha ndoo ndi vehe ña.

16 Ta cuvı̄ noo chaha cha cuahan ndi nu chicán tahvi ndi. Ta cha niri ca cha cuahan ndi, tahan ndi chi noo ñaha tyivaa. Yihı̄ noo tatyı̄ ña vaha chi ña. Yucuan chaha cuvı̄ nacoto ña ñáá ndihi cha cucuvi ityi nuu. Ta cuvı̄ ña noo ñaha iyó chitoho. Ta cuaha xaan xuhun sahá ganaa ña cuenda chitoho ña, vatyı̄ cuvı̄ nacotó ña.

17 Ta ñaha tyivaa cuan quichaha nyicon ña chi ndi, ta chi ra Pablo ñandihı̄. Ta cana chaa ña ta catyı̄ ña:

—Rayı̄ ihya ra casacuvı̄ tyiño nuu Nyoo cahnu cuvı̄ ra. Ta cahán ra tuhun yoso caa cuvı̄ cacu añima yo —catyı̄ ña.

18 Cuaha quı̄vi sacuvı̄ ñaha tyivaa cuan tyicuan caa. Tyicuan ta ra Pablo ña cunyeę ca iñi ra, ta nanyocava ra ta catyı̄ ra chi tatyı̄ ña vaha cha yihı̄ chi ña:

—Chihin sı̄vi ra Jesucristo catyı̄ chuun vatyı̄ quı̄ton chi ñaha tyivaa ihya —catyı̄ ra.

Ta tatyı̄ ña vaha cuan quitã chi chi ña caa cuhva ri cuan.

19 Soco cuhva cha canyehe chitoho ña vatyı̄ ma cuvı̄ ca saha ganaa ra xuhun chihin ña, catı̄n ra chi ra Pablo ta ra Silas chinyaca ra chi ra nya vehe tyiño.

20 Ta cachı̄can ra cuatyı̄ chaha ra nuu ra cacuvı̄ tyiño. Ta catyı̄ ra:

—Ra Israel ihya sanaquiquı̄ ra chi ñáyı̄vi ñuu yo.

21 Ta sañahá ra costumbre cha ña cuvı̄ naquehen yo, niri ña cuvı̄ sacuvi yo vatyı̄ ñu cuenda ñuu Roma cuvı̄ yo —catyı̄ ra.

22 Tyicuan ta nduxaan ñáyı̄vi chi ra Pablo ta ra Silas. Ta ra cacuvı̄ tyiño cuan chahnya ra sahna ra Pablo ta ra Silas ta tachı̄ ra tyiño nacañi ra chi ra chihin yutun.

23 Cha yaha cha cañı̄ vavaha ra chi ra, ta tatyı̄hi ra chi ra vehe caa. Ta tachı̄ ra chi ra sahá cumi chi ra na saha vaha ra cuenda chi ra.

24 Cuhva cha quehen ra sahá cumi cuan tuhun, tyı̄hi ra chi ra nya chichi cuii vehe caa. Ta tyı̄hi vaha ra chaha ra ticu vitu.

25 Soco ñáá cuhva hora ñuu cuan cachıtá vavaha ra Pablo ta ra Silas. Ta cachı̄cán tahvi ra chi Nyoo. Ta ra cañohó vehe caa cuan catyasohó ra.

26 Ta saná iñi ra ta quı̄chı̄ noo cha taan ñihi vavaha. Ta naquisı̄ chi cimientu vehe caa cuan, ta caa cuhva ri cuan nuña tandihı̄ yuvehe, ta ndachi cadena tandihı̄ ra ñohó vehe caa cuan.

27 Ta cha ndoyo ra sahá cumi cuan, nyehe ra vatyı̄ tacoho yuvehe. Tyicuan ta tava ra mityı̄ ra vatyı̄ cahñi maa ra chi ra. Vatyı̄ chicá xiñi ra vatyı̄ ndihı̄ ra ñohó vehe caa cuan cachı̄no.

28 Soco ra Pablo cana chaa ra chi ra, ta catyı̄ ra:

—Ma cahñun chuun, vatyı̄ tandihı̄ ndi nyicı̄ ndi ihya —catyı̄ ra chi ra.

29 Tyicuan ta ra sahá cumi cuan chicın ra noo ñuhı̄. Ta quı̄cono ra quı̄hvı̄ ra nu cañohó ra. Ta niñı̄ ra chihin cha yuhvi ra. Ta chicuiñı̄ chı̄ti ra nuu ra Pablo ta ra Silas.

30 Numi ri tava ra chi ra nu ñoho ra yucuan. Ta ndacá tuhun ra chi ra ta catyı̄ ra:

—¿Nyoho Tata, yoso caa sacuvi ta cacu añime? —catyı̄ ra chi ra.

31 Ta ra cuan canacahan ra ta cacatyı̄ ra:

—Chı̄no iñi chi Sutu Mañi yo Jesucristo ta cacun, maun ta ñáyı̄vi chuun ñandihı̄ —catyı̄ ra.

32 Ta cacahan ra tuhun Sutu Mañi yo chihin ra ta chihin tandihı̄ ñu nyicu vehe ra.

³³ Ta suri maa cha cuaa cuan ra sahá cumi vehe caa cuan nacatya ra nu cahvi chí nduvi tahan ra nu cañi ra chi ra. Yahá cuan ta maa ra ta tandihi ñáyivi chi ra condutya ñu suri cha cuaa cuan.

³⁴ Tyicuan ta chinyaca ra chi ra nya vehe ra. Ta chaha ra cha cachi ra. Ta maa ra chihin ñáyivi chi ra sii xaan cuñi ñu vatyi chinó iñi ñu chi Nyoo. [Tyicuan ta cuanuhu coyo ra nya vehe caa cuan coto cuxaan ra cuví tyiño chihin ra saha cumi chi ra.]

³⁵ Tuvj inga quivi ta catachi ra cacuví tyiño chi policia nu nyaá ra sahá cumi cuan, ta catyí ra vatyi na saña ra chi ra Pablo.

³⁶ Tyicuan ta ra sahá cumi vehe caa cuan catyí ra chi ra Pablo:

—Chaa tyiño chii saha ra cuví tyiño, vatyi sañe chi ndo. Ican tuhun cha cuví quita ndo vityin —catyí ra chi ra.

³⁷ Soco ra Pablo catyí ra:

—Chi nyuhu cha cuví ndi ra cuenda ñuu Roma ican cañi ra nu tuvi. Ta ni ña cutuñi chí ndi tari cuhva tahan chi. Ta tyihí ra chi ndi vehe caa. Ta vityin cuñi ra saña xehe ra chi ndi. Soco ma cuví. Naquichi tava maa ra chi ndi —catyí ra Pablo chi ra sahá cumi cuan.

³⁸ Ta ra policia nacatyi ra chi ra cacuví tyiño. Ta ra cuan cayuhvi ra cuví cha cachitó ra vatyi ra cuenda ñuu Roma cuví ra Pablo.

³⁹ Ta chahan coyo ra chinadaçan ra ticahnu iñi chi ra Pablo ta chi ra Silas. Tyicuan ta catava ra chi ra ta cachacu ndahvi ra nuu ra na quita ra ñuu cuan.

⁴⁰ Ta cha quita coyo ra vehe caa, chahan coyo ra vehe cu Lidia. Ta yahá cuan ta chinyehé ra chi ra hermano ta sanduni ra iñi ra ta cuahan coyo ra.

17

Nu naquiqui ñáyivi ñuu Tesalónica

¹ Nu cuahan coyo ra Pablo ta ra Silas, cayaha coyo ra ñuu Anfípolis, ta ñuu Apolonia. Yahá cuan ta chaç coyo ra ñuu Tesalónica nu nyaá noo vehe ñuhu ñu Israel.

² Ta chahan ra Pablo vehe ñuhu cuan tari cuhva tuhva maa ra chahan noo noo ñuu. Ta cahan ra tuhun Nyoo chihin ñáyivi chíchi vehe ñuhu cuan uñi tahan quivi nyitatu ñu.

³ Quehen ra libro tuhun Nyoo ta sañaha ra tuhun ra Cristo chí ñu yoso caa catyí chí vatyi cunyehe ra tindoho ta cucuvi ra. Yahá cuan cunandoto ra. Ta catyí ra chí ñu vatyi suri maa ra Jesús cha cahan ra tuhun chihin ñu cuví ra Cristo.

⁴ Ta suhva ñáyivi Israel cuan nachino iñi ñu. Ta candu in ri ñu chihin ra Pablo ta ra Silas. Ta cachino tucu iñi cuaha ñu Grecia cha sacahnú chí Nyoo. Ta cuaha ñusihí tyayí ñuu cuan ñandihí.

⁵ Soco ra Israel cha ña chinó iñi, quiñi cacuñi ra cha nyehé ra vatyi nyicón ñáyivi chí ra Pablo. Ta sandu in ri ra chí noo ityi ra quiñi iyó cha cachicá noo yanga ri maa. Ta sanaquiqui ra ñuu cuan. Ta quihvi ra vehe ra Jasón, nanducú ra chí ra Pablo ta chí ra Silas, vatyi tava ra chí ra, ta nacuhva cuenda ra chí ra chí ñáyivi.

⁶ Soco cha cuenda cha ña nañihí ra chí ra Pablo ta ra Silas yucuan, ta quehen ra chí ra Jasón. Ta xita quiño ho ra chí ra ta chí suhva ca ra hermano ta cuahan coyo ra nuu ra cuví tyiño ñuu cuan. Ta cana chaa ra ta catyí ra:

—Ra ihya cuví ra cachicá noo satondó chí tandihí ñáyivi nichahnu ñuhu ñayivi. Ta vityin chaç coyo tucu ra ihya.

⁷ Ta ra Jasón chiña chaha ra vehe ra cunyicu ra. Ta tandihi maa ra ña sahá ra ñáyivi chi ra cuví rey cahnu nya Roma. Vatyí catyí ra vatyí iyó nonga rey ta nañí ra Jesús.

⁸ Cha cachiñi ñu tuhun cuan, ñáyivi ta ra cacuví tyiño canaquiqui ñu.

⁹ Soco ra Jasón ta inga ra cachaha ra xuhun ta caquita yica ra.

Nu cuahan coyo ra Pablo ta ra Silas ñuu Berea

¹⁰ Ta suri cha cuaa cuan quiyí cuii ri casacuhun ra hermano chi ra Pablo ta ra Silas ityí ñuu Berea. Ta cha chaa coyo ra yucuan ta chahan coyo ra vehe ñuhu ñu Israel.

¹¹ Ta ra Israel cha iyó ñuu Berea cuan vaha ca ñáyivi cacuví ra ta ñima ca ra Tesalónica. Vatyí chihin cha ñi ñi ra naquehen ra tuhun Nyoo. Ta ndiquivi nanducú ra nuu tutu Nyoo, nyehé ra tatu ndicha cha cacatyí ra Pablo ta ra Silas ta ra Timoteo chi ra.

¹² Yucuan chaha cuaha vavaha ñu nachino ñi ñu chi ra Cristo. Ta ñu Grecia nachino tucu ñi ñu cuan, tari ñusihi tyayii ta rayii ñandihí.

¹³ Soco cha cachito ra Israel cha ca iyó ñuu Tesalónica vatyí ra Pablo ñohó ra Berea cahán ra tuhun Nyoo, ta chahan coyo ra ta sanaquiqui ra chi ñáyivi yucuan.

¹⁴ Soco ra hermano numi cuii ri tachí ra chi ra Pablo nya ityí yuhu tyañuhu. Soco ra Silas ta ra Timoteo candoo ra Berea.

¹⁵ Ta ra cha cuahan coyo chihin ra Pablo chinyaca ra chi ra nya ñuu Atenas. Tyicuan ta cuanuhu coyo ra nya Berea cuanacuhva ra tyiño cha tachí ra Pablo chi ra Silas ta chi ra Timoteo, na sanumi ra ta cuhun ra nu nyaá ra.

Nu ñohó ra Pablo ñuu Atenas

¹⁶ Cha niri ca cha nyatú ra Pablo chi ra Silas ta ra Timoteo ñuu Atenas cuan quíni cuñí añima ra cha nyehé ra vatyí cuaha xaan xitohyo iyó ñuu cuan.

¹⁷ Yucuan chaha chahan ra chihin ra Israel, ta chihin inga ra cha tuhvá sacahnú chi Nyoo chichi vehe ñuhu cuan. Ta ndi quivi cahán ra chihin ñu cha nyicu nuyahvi ñandihí.

¹⁸ Ta ñihí tahan ra chihin ñu cha sacuaha tuhun sañahá noo ityí ñáyivi cha nañí ñu epicúreo. Ta ñihí tahan tucu ra chihin ñu cha sacuaha tuhun sañahá ñáyivi estoico. Ta cacahan ñu chihin ra. Ta yihí ra catyí ra:

—¿Ñáá tuhun cahan xaan ra ihya? —catyí ra.

Ta inga ra catyí ra:

—Tuhun inga nyoo cahán ra ihya —catyí ra.

Tyehe caa catyí ra vatyí ra Pablo cahán ra tuhun ra Jesús, ta cahán tucu ra tuhun cha nandoto ñáyivi chihí.

¹⁹ Tyicuan ta chinyaca ra chi ra Pablo noo nu nañí Areópago, nu tuhva ra cacuví tyiño ndu ñn ri ra. Ta cacatyí ra chi ra:

—Cuñí ndi coto ndi tuhun chaa cha vachi sañahún.

²⁰ Vatyí sacotón tuhun cha ña chitó ndi. Ta cuñí ndi coto ndi ñáá cha cuñí chi catyí tandihí tuhun ihya —cacatyí ra chi ra.

²¹ Vatyí tandihí ñu Atenas ta ñu inga ñuu cha iyó yucuan tahán xaan ñi ñu tyasoho ñu ta nacatyí ñu ñáá ndihí tuhun chaa.

²² Tyicuan ta ra Pablo nicuinanyaá ra mahñu nu nyicu ñu yucu Areópago, ta catyí ra:

—Nyoho Tata ñuu Atenas, yuhu nyehí vatyí chinó xaan ñi ndo chi cuaha nyoo.

²³ Vatyí chahín chinyehi nu tuhvá ndo savaha ndo culto. Ta nañihí noo arta nu nyaá letra cha catyí: “Cuenda Nyoo cha ña ñohó nuu yo”, catyí letra cuan. Nyoho sacahnú ndo chi Nyoo cuan vasi ña ñohó nuu ndo chi ra. Ican Nyoo cuan cuví cha cahín tuhun chihin ndo.

²⁴ Nyoo cha savahá ñuhu ñayiví ta tandihí cha iyó síqui ñuhu ñayiví. Chi maa ra cuví andiví ta ñuhu ñayiví. Ta ña iyó ra chichi vehe ñuhu cha savahá ñayiví.

²⁵ Ta ña itá iñi ra cha tyinyeé ñayiví chi ra. Vatyí suri maa ra chahá ra ñayiví coo tandihí yo. Ta chahá ra tatyí cha xitá yo. Maa ra chahá tandihí chi yo.

²⁶ Cha xihna ri savahá Nyoo chi noo tuhun ri rayii. Ta maa ra cuví sutu tandihí yo. Yucuan chaha noo ri niñi nyisó tandihí yo. Ta chahá Nyoo cha coo yo nicahnu ñuhu ñayiví. Cha ni cumañi ca savahá ra chi yo ta catyí ra ñáá cuiya coo noo noo yo síqui ñuhu ñayiví ihya. Ta catyí tucu ra nya cucoo noo noo yo.

²⁷ Tyicuan caa sacuví ra vatyí tacuhva quichaha nanducu yo chi ra. Tari nanducú minoo ra cuaa noo cha nanducú ra chihin ndaha ra, vasi tyicuan caa ta cuví nañihi yo chi ra. Soco cha ndicha, Nyoo ña cañi nyaá ra chihin noo noo yo.

²⁸ Vatyí cha cuenda Nyoo iyó yo ta candá yo. Tari catyí tucu noo ra ñuu ndo, vatyí catyí ra: “Ñáyiví chi Nyoo cuví chi yo”, catyí ra.

²⁹ Tatu ñáyiví chi Nyoo cuví yo, ña tahán chi caca xiñi yo vatyí Nyoo cuví ra noo xitohyo cha chingó chihin xuhun cuaan, o xuhun cuichin, o chihin yuu vaha cha savahá ñayiví cuhva chicá xiñi maa ñu.

³⁰ Nyoo sahá ra ticahnu iñi chi ñu chiyo ta cha naha, vatyí ña chitó ñu. Soco vityin catyí ra chi tandihí ñáyiví tandihí ri ityi vatyí na ndu uvi iñi ñu cuatyí ñu.

³¹ Vatyí Nyoo tyaá ra cuhva vatyí coo noo quiví cha cucutuñi chi ñáyiví iyó síqui ñuhu ñayiví nuu noo ra cha nacachí vaha maa ra chí. Ta sañahá ra chí tandihí yo vatyí tyicuan caa cuví vatyí sanandotó ra chi ra cuan cha yahá chihí ra —catyí ra Pablo.

³² Cuhva cha chiñí ñu tuhun cha nandotó ñu chihí, yihí ñu chacu nyaá ñu, ta inga ñu catyí:

—Quichun inga quiví ta cahun tuhun ihya chihin ndi —catyí ñu.

³³ Tyicuan ta cuahan ra Pablo.

³⁴ Soco yihí ñu chinyicon ñu chi ra, ta nachino iñi ñu chi Nyoo. Ta noo ra nañi ra Dionisio, ta cuví ra noo ra cuví tyiño ñuu cha tuhvá ndu ñn nya Areópago cuan. Ta noo ñaha sihi cha nañi Dámaris chino tucu iñi ña, ta inga tucu ñu ñándihí.

18

Nu ñohó ra Pablo ñuu Corinto

¹ Yahá cuan ta quita ra Pablo ñuu Atenas ta cuahan ra ñuu Corinto.

² Ta yucuan nañihí ra chi noo ra Israel tari maa ra. Nañi ra Aquila. Ta ñuu Ponto cacú ra. Ta maa ra chihin ñasihi ra, cu Priscila quita ñu Italia. vatyí ra Claudio, ra cuví rey cahnu yucuan, tava ra tandihí ra Israel. Catyí ra na quita ra ñuu Roma. Ta ra Pablo cuahan ra nu nyaá ñu ñuu Corinto cuan.

³ Ta ñn ri tyiño sacuví ra chihin ñu. Savahá ñu vehe sahma. Ta ndoo ra chihin ñu vatyí sahá tyiño ñu ñn ri.

⁴ Ta quiví nyitatu ñu Israel tahan vitya, ra Pablo chahan ra vehe ñuhu ñu. Ta ndatuhun tahan ra chihin ñu Israel ta chihin ñu cha ñima ñu Israel cuví. Vatyí nducú ra cuhva cha chino iñi ñu chi ra Jesucristo.

⁵ Ta quiví chaq coyo ra Silas ta ra Timoteo cha quitá ra Macedonia, ra Pablo sandoq ra tyiño sahá ra ta ñin ri ca tyiño cha cahán ra tuhun Nyoo nicunyaa ra. Ta catyí cachi ra chi ñu Israel vatyí ra Jesús cuví Cristo ra cha nyatú xaan ñu.

⁶ Soco ñu cuan xaan cuñi ñu. Ta quichaha cahan ña vaha ñu siqui Sutu Mañi yo. Tyicuan ta ra Pablo naquisi ra sahma ra tari noo seña vatyí cuandoo cuatyí ñu siqui ñu. Ta catyí ra chi ñu:

—Cuatyí maa ndo cuví tatu cuhun ndo anyaya. Ñahri ca nyaá siqui. Vityin ta ityi nuu ca cuhin cucahin chihin ñu cha ñima ñu Israel cuví —catyí ra chi ñu.

⁷ Ta quitá ra vehe ñuhu cuan. Ta cuahan ra vehe noo ra cha nañi Justo. Noo ra cha sacahnú chi Nyoo. Ta nyaá vehe ra ityi xiin vehe ñuhu cuan.

⁸ Ta noo ra cha nañi Crispo, ra cuví nuu vehe ñuhu cuan nachino iñi ra chi Sutu Mañi yo, ta ñáyivi chi ra ñandihi. Ta cuaha ca ñáyivi iyó Corinto cuan, cha yaha cha chiñi ñu tuhun cahán ra Pablo, nachino tucu iñi ñu chi ra Jesús, ta condutyá ñu.

⁹ Tyicuan ta noo cha cuaa nyehe ra Pablo noo visión. Ta cahan Sutu Mañi yo chihin ra, ta catyí ra:

—Ma yuhvun. Cahán ca tuhun ta ma sandihun cha cahun.

¹⁰ Vatyí yuhu nyaí chuhun. Ta yori cuví satasi iñi chuun. Vatyí cuaha xaan ñáyivi nyaá sacaqui ñuu ihya —catyí Sutu Mañi yo chi ra Pablo.

¹¹ Yucuan chaha ra Pablo ndoq ra noo cuiya sisava ñuu Corinto cuan. Sañahá ra tuhun Nyoo chi ñáyivi.

¹² Soco quiví cha cuví ra Galión gobernador nicahnu ityi Acaya cuan, candu ñin ri ra Israel siqui ra Pablo. Ta cachican ra cuatyí chaha ra nuu ra gobernador.

¹³ Ta cacatyí ra chi gobernador cuan:

—Ra ihya tyiyuhú ra chi ñáyivi na sacahnu ñu chi Nyoo noo cuhva cha ñahri nyaá nu ley ndi —cacatyí ra.

¹⁴ Tyicuan ta cuhva cha cuanacahan ra Pablo, nacahan ri ra Galión, ta catyí ra chi ra Israel cuan:

—Nyoho ra Israel, tatu cuenda noo cuatyí cahun o cuatyí ndiyi cuví sandai yoso cuhva tahán chi.

¹⁵ Soco maa maa ri tuhun cahán ri cuví ihya. Ta yuhu ña cuñi sandai tyiño ihya, ta ñin ri cuenda ley maa ndo cuví. Nyehe maa ndo. Sandaa ndo tyiño vatyí yuhu ña cuñi cuví juez cuenda ihya —catyí gobernador cuan.

¹⁶ Ta tavá ra chi ra nu cuví vehe tyiño ra.

¹⁷ Tyicuan ta tandihí ra Grecia catiñ ra chi ra Sóstenes, ra cuví nuu vehe ñuhu ñu Israel. Ta cacañi ra chi ra suri maa nuu ra Galión, ra cuví gobernador cuan. Soco ra Galión cuan ña cahan ri ra.

Nu cuanuhu ra Pablo ñuu Antioquía. Yaha cuan ta cuahan tucu ra tuhun Nyoo, cha cu uñi chaha

¹⁸ Ta ra Pablo ndoq ca ra ñuu Corinto cuaha quiví. Yaha cuan ta catyí ra chi ra hermano vatyí cuhan ra. Ta cuahan ra Aquila chihin cu Priscila chihin ra Pablo. Tyicuan ta chaq coyo ñu Cencrea. Ta ra Pablo satya ndi ra xiñi ra vatyí sacuví ra noo cha tyaá ra cuhva tyi sacuvi ra nuu Nyoo. Tyicuan ta caquiñvi ñu chichi noo barcu cha cuahan ityi Siria.

¹⁹ Ta cha chaq̄ barcu cuan nya ñuu Éfeso, ta caquitā ñu. Ta ra Aquila chihin cu Priscila ndoq̄ ñu yucuan. Ta ra Pablo cuahan ra vehe ñuhu ñu Israel. Ta cahan ra chihin ñu Israel cha ndu iin ri yucuan.

²⁰ Ta chacū ndahvī ñu nuu ra na ndoq̄ ra cuaha ca quivī. Soco ña cuñī ra.

²¹ Ta catyī ra chi ñu vatyí cha cuahan ra, ta catyī tucu ra tyehē caa:

—Cuñī chi cha cuhin ñuu Jerusalén vatyí sanducahnī vico cha vachi cutahan. Soco cuquichi inga chaha nu nyicu ndo tatu Nyoo ta cuñī ra —catyī ra chi ñu.

Tyicuan ta cuahan ra quihvī ra chichi noo barcu cha cuahan ityi Siria.

²² Quivī nachaā ra ñuu Cesarea ityi Siria cuan, chahan ra chicuhva ra nocumi chi ñu yihí cuenda Nyoo Jerusalén. Yahā cuan ta cuahan ra Antioquía.

²³ Ta cha yahā chinyaā ra suhva quivī yucuan, quitā ra ta cuahan ra tahan tahan ñuu ityi Galacia ta Frigia. Ta sandun̄ī ra iñi tandih̄i ñu yihí cuenda Nyoo.

Nu cahán ra Apolos tuhun Nyoo ñuu Éfeso

²⁴ Quivī cuan chaq̄ noo ra Israel ñuu Éfeso. Nañī ra Apolos. Ta ñuu ra cuvi Alejandría. Ta cuvi ra minoo ra vaha cahán tuhun Nyoo. Ta chitó xaan ra tuhun Nyoo tuhun chahnu cha nyaá nu libru.

²⁵ Ta vaha xaan cutuhvā ra tuhun Sutu Mañī yo. Ta cahán ra chihin cha n̄ī iñi ra. Ta vaha xaan nyicón ra chi Nyoo. Ta cachi xaan sañahá ra tuhun ra Jesús. Vasī cuhva cha sacondutyā ra Juan ri chitó ra.

²⁶ Ta quichahā cahan ra chichi vehe ñuhu chihin cha n̄ī iñi ra. Ta cuhva cha chiñī ra Aquila ta cu Priscila, tavā siñ ñu chi ra ta nacatyí cachi ca ñu tuhun ityi Nyoo chi ra.

²⁷ Tyicuan ta quichaha cuñī ra Apolos cuhun ra ityi Acaya. Ta ra hermano catyinyeē ra chi ra. Ta catyaā ra noo carta chi ñu yihí cuenda Nyoo ityi cuan, ta catyī ra chi ñu vatyí na vaha cahan ñu chihin ra tatu chaa ra. Tyicuan ta cuahan ra. Ta cuhva cha chaq̄ ra Acaya cuan tyinyeē xaan ra chi ñu chinó iñi chi Nyoo cha cuenda tumañī iñi cha chahā ra chi ñu.

²⁸ Vatyí nu tuvi sañahā cachi xaan ra yoso caa cuhva ña vaha cha sacuví ñu Israel. Ta sañahā ra cha catyī nu tutu Nyoo vatyí ra Jesús cuvi Cristo, ra cha nyatú xaan ñu chi.

19

Nu cuahan tucu ra Pablo ñuu Éfeso

¹ Cha nī ri ca cha ñohó ra Apolos ñuu Corinto, ra Pablo yahā ra ityi yucu ta chaq̄ ra nya ñuu Éfeso. Ta yucuan nañih̄i ra chi cuaha ri ra yihí cuenda Nyoo.

² Ta ndacā tuhun ra chi ra:

—¿Atu naquehen ndo Tatyí Ii quivī nachinq̄ iñi ndo? —catyī ra Pablo chi ra.

Ta canacahan ra cuan ta catyī ra:

—Ni chiin ña chitó ndi cha iyó Tatyí Ii.

³ Tyicuan ta ra Pablo ndacā tuhun ra chi ra:

—¿Ñáá chihin condutyā nyoho? —catyī ra.

Ta nacahan ra ta catyī ra:

—Chihin cuhva sacondutyā ra Juan yucuan cuhva condutyā ndi —catyī ra.

⁴ Tyicuan ta catyī ra Pablo chi ra:

—Ra Juan sacondutya ra chi ñáyivi cha ndu uvi iñi cuatyi. Soco catyí tucu ra chi ñu vatyi cuñi chi cha chino iñi ñu chi ra cha cuaquichi ta ican ra cuan cuví ra Cristo Jesús —catyí ra Pablo chi ra.

⁵ Cuhva cha cachiñi ra cha catyí ra Pablo tuhun ihya, tyicuan ta nacondutya ra inga chaha chihin sivi Sutu Mañi yo Jesús.

⁶ Ta cuhva cha tyiso ra Pablo ndaha ra siqui ra, quichi Tatyí li siqui ra. Ta quichaha cahān ra inga sahan. Ta saha ra profetizar, o chaha cuenda ra tuhun chaha Tatyí li Nyoo chi ra cuví cuan.

⁷ Ta uchi uvi tahan ra cha tandihí ra.

⁸ Tyicuan ri chica ra Pablo vehe ñuhu ñuu cuan chichi cha uñi yoo. Ta cahān ra tuhun Nyoo chihin cha ñi iñi ra. Ta ñihi cahān ra chihin ñu yoso caa nyacá ñaha Nyoo añima yo.

⁹ Soco yihí ñu sandava ñu añima ñu. Ta ña cuñi ñu chino iñi ñu. Ta cahān ña vaha ñu siqui tuhun ra Cristo nuu ñáyivi, ta catyí ñu vatyi ña vaha ityi Sutu Mañi yo. Tyicuan ta ra Pablo canyaha ra nu nyicú ñu. Ta chinyaca ra chi ñu chinó iñi chi ra Cristo noo sicuela ra cha nañi Tiranno. Ta yucuan cahān ra tuhun ra Cristo chihin ñáyivi ndiquivi ri.

¹⁰ Ta tyicuan caa chinyacuví ra chichi cha uvi cuiya. Ta tandihí ñáyivi nicahnu ityi Asia cuan chiñi ñu tuhun Sutu Mañi yo Jesús, tari ñu Israel ta ñu cha ñima ñu Israel cuví ñandihí.

¹¹ Ta nahnu milagru sacuví Nyoo chihin ndaha ra Pablo.

¹² Vatyi nyacua nya pañitu ta sahama cha tñin ra Pablo, ta chinyaca ñu chi ñu cuhví ta nduvaha ñu. Ta ñu yihí tatyí ña vaha chi, quita chi chi ñu.

¹³ Ta iyó suhva ra Israel cha cachica noo tahan tahan ñuu. Catava ra tatyí ña vaha chi ñáyivi. Ta cacuñi ra cotyiño ra sivi Sutu Mañi yo Jesús vatyi tava ra chi tatyí ña vaha. Ta catyí ra chi tatyí ña vaha cuan:

—Chihin sivi ra Jesús cha cahān ra Pablo tuhun catyí chi ndo vatyi quita ndo —catyí ra.

¹⁴ Tyehe caa chinyacuví ndi ucha tahan sehe noo ra Israel cha nañi Esceva. Ta ra Esceva cuan cuví ra noo ra cuví nuu chi tata sutu.

¹⁵ Ta cha cacahan ra cuan chihin tatyí ña vaha cuan, nacañan tatyí ña vaha cuan chihin ra ta catyí chi tyehe caa:

—Ñohó nui chi ra Jesús. Ta chité yóo ra cuví ra Pablo. Soco nyoho ¿yóo ra cuví nyoho? —catyí tatyí ña vaha cuan chi ra.

¹⁶ Tyicuan ta ra cha yihí tatyí ña vaha cuan chii, ndava ra siqui ra cuan. Ta chihin cha cuaha fuerza ra cuví chasaha ra chi tandihí ra. Ta chahnya cuatyi ra sahama ra. Ta sanduvityaa ra chi ra. Ta sañicuehe ra chi ra. Yucuan ta chihin cha cayuhvi ra ta cachino ra ta cuahan coyo ra.

¹⁷ Tyicuan ta tandihí ñu Éfeso, ñu Israel, ta ñu cha ñima ñu Israel cuví ñandihí, chito ñu tuhun cuan. Ta yuhvi xaan ñu cuví. Ta sacahnú ñu sivi Sutu Mañi yo Jesús.

¹⁸ Ta cuaha xaan ñu chinó iñi ñu chi ra. Ta cha coyo ñu ta nahma ñu cuatyi ñu, tandihí cha ña vaha cha chinyacuví ñu ta ityi chata ca.

¹⁹ Ta cuaha ñu cha sacuañi tuhun tasi, quichi nyaca ñu libro ñu. Ta chahmi ñu libro cuan nuu tandihí ñáyivi. Ta natava ñu cuenda yoso yahvi libro cuan. Cha tandihí quita ta cha uvi xico uchi mil xuhun cuichin.

²⁰ Ta tyicuan ri ta cuahan chitya ca tuhun Sutu Mañi yo. Ta nducuañi ca ñu yihí cuenda ra. Ta tyicuan caa nyehé ñáyivi yoso cha cahnu tunyee iñi iyó chi ra.

21 Ta cha yahā tuhun ihya, ra Pablo natyaā ra cuhva cha cuhun ra ityi Macedonia, ta ityi Acaya. Yahā cuan ta cunuḥu ra nya Jerusalén tyaā ra cuhva. Ta catyí ra vatyí yahā cuan ta cuñi chi cha cuhun ra nya ñuu Roma.

22 Tyicuan ta tachí ra chi uvi tahan ra tyinyeé chi ra nya Macedonia, ra Timoteo ta ra Erastó. Soco ndoo maa ra suhva ca quivi ityi Asia cuan.

Nu naquiqui ñáyivi Éfeso siqui tuhun Nyoo

23 Ta suri quivi cuan naquiqui ñáyivi ñuu Éfeso siqui tuhun Nyoo,

24 vatyí noo ra cha nañi Demetrio sanaquiquí. Vatyí maa ra tuhvá ra saha tyiño chihin xuhun cuichin. Savahá ra vehe ñuhu nyihi nyoo Diana chihin xuhun cuichin cuan. Ta cuaha sahá ganaa ra chihin ra casahá tyiño chihin ra.

25 Ta canā ra Demetrio cuan chi ra cha sahá tyiño chihin ra. Ta canā tucu ra chi ra cha casahá tyiño ñin ri tyiño cuan. Ta catyí ra chi ra:

—Nyoho ra tahan yo, chitó ndo vatyí chihin tyiño ihya iyó cha tyayí yo.

26 Soco nyoho nyehé ndo ta chiñi ndo yoso caa sacuví ra Pablo ñuu yo Éfeso ihya, ta ñicahnu ityi Asia. Vatyí catyí ra tyi nyoo cha savahá ñáyivi ñima Nyoo cuvi. Ta cuaha xaan ñáyivi nachino ñi sahá ra.

27 Ta ña vaha cha sacuví ra vatyí ma quiyahví ca xitohyo cha savahá yo. Ta ñin ri ma sacahnu ca ñáyivi chi nyoo Diana ta ma saha ca ñu ñáyivi vehe ñuhu ña, ta ña vaha tyicuan caa, vatyí ñaha cuan cahnu xaan cuví ña. Ta tandihí ñáyivi ityi Asia chihin ñu ñicahnu ñáyivi sacahnú ñu chi ña. Ta nu cuahan ca chi quivi ma sacahnu ca ñáyivi chi ña tatu chino ñi ñu cha cahán ra Pablo —catyí ra Demetrio.

28 Ta cuhva cha cachiñi ra cha catyí ra, Xaan xaan cacuñí ra. Ta quichaha cacanaḥ chaa ra ta cacatyí ra:

—Cahnu xaan cuví cu Diana, nyoo cuenda ñáyivi Éfeso ihya —catyí ra.

29 Ta cutondó xiñi tandihí ñu ñuu cuan. Ta catiñ ñu chi ra Gayo, ta chi ra Aristarco, uvi ra Macedonia cha chicá noo chihin ra Pablo. Ta caxita quiiñoho ra chi ra nyacua nya nu tuhva ñu candu ñin ri ñu.

30 Ta ra Pablo cuñi ra quihví ra nu nataca ñáyivi vatyí cahan ra chihin ñu. Soco ra hermano, ña chaha ra.

31 Ta tyicuan caa tucu suhva ra cuví tyiño ityi Asia, ra cuví amigo ra Pablo, tachí ra tyiño vatyí ña tahán chi tyihí ra chi ra yucuan.

32 Ta nu ndu ñin ri ñu yucuan, suhva ñu caná chaa noo tuhun. Ta inga ñu caná chaa ñu inga tuhun. Vatyí naquiquí ñu. Ta cuaha xaan ñu cha ni ña chitó ñu ñáá tuhun cha natacá ñu.

33 Tyicuan ta ñu Israel, tyatyitño ñu chi noo ra cha nañi Alejandro na quita ra ityi nuu. Ta suhva ñu tayucú yucuan nacatyí ñu chi ra yoso caa cucahan ra. Tyicuan ta sacuví ra seña chihin ndaha ra vatyí na taxi ri cuví ñu vatyí cuñi ra catyí ra vatyí ñahri cuatyí ñu Israel.

34 Soco cuhva cha chitó ñu vatyí ra Israel cuví ra, tandihí maa ñu canā chaa ñu. Ta chichi cha uvi hora caná chaa ñu, ta catyí ñu:

—Cahnu xaan cuví cu Diana nyoo cuenda ñu Éfeso —catyí ñu, caná chaa ñu.

35 Tyicuan ta secretario ñuu cuan cuhva cha cuví sacutaxin ra ñáyivi, ta catyí ra:

—Nyoho tata ñuu Éfeso ihya. Tandihí ñáyivi chitó ñu vatyí nyaá siqui yo ñu Éfeso cha saha cumi yo vehe ñuhu cu Diana tyi cahnu xaan cuví ña. Ta cumí yo xitohyo ña cha canā cava ityi andivi.

³⁶ Ta yori cuvi catyí tyi ña ndicha. Taxi ri ndo, ta ma cunyacuvi ri maa ndo tatu ña chitó ndo ñáá cha cuacunyacuvi ndo.

³⁷ Vatyí ra cha quichí nyaca ndo ihya ñahri cha suhú ra vehe ñuhu ndo. Ta ni ña cahán ña vaha ra siqui nyoo cuenda ndo.

³⁸ Tatu ra Demetrio ta ra cha sahá tyiño chihin ra chicán ra cuatyí chaha noo ra, na cuhun ra nu nyaá juez. Cuví cacan ra cuatyí nuu ra cuan, ta maa ra cusandaa ra cuatyí cuan.

³⁹ Ta tatu inga tuhun chicán ndo, cuñí chi sacuví ndo nu nyicu ra cuví tyiño, tari cuhva catyí ley.

⁴⁰ Vatyí tatu coto gobiernu ta cana ra chi yo cha cuenda cha cuví ihya, ta ma ñihi yo tuhun cahan yo tatu ndacá tuhun ra chi yo ñáá cuenda naquiquí —catyí ra cuví secretario cuan.

⁴¹ Ta cha yahá catyí ra tuhun cuan catyí ra vatyí na cunuhu ñu nya vehe ñu.

20

Nu yahá ra Pablo ityi Macedonia ta cuahān ra Grecia

¹ Cha yahā tuhun cha naquiquí ñáyivi ñuu Éfeso cuan, canā ra Pablo chi tandihí ñu yihí cuenda Nyoo, vatyí cahan ra suhva nuu ñu ta cuhva ca ra tunyee iñi chi ñu. Vatyí maa ra chaā chí quivi cha cuhun ra inga ityi. Ta cahān ra chihin ñu. Tyicuan ta cuahān ra Macedonia.

² Ta chahān ra tandihí ityi cuan ta sanduní ca ra iñi tandihí ñu yihí cuenda ra Cristo cha iyó ityi cuan chihin tuhun cahán ra. Tyicuan ta chaā ra ityi Grecia.

³ Ta yucuan ndoō ra uñi yoo. Ta cha nyaá ra cha cuaquehen ra barcu ta cuhun ra Siria, ta chito ra vatyí nducú ñáyivi Israel chí ra vatyí cahñi ñu chí ra. Yucuan chaha natyaa ra iñi ra cha cuhun ra chihin chaha ra ityi nu ñuhu ri. Ta nayahā ra inga chaha ityi Macedonia.

⁴ Ta cuahān ra Sópater, ra ñuu Berea chihin ra. Ta cuahān ra Aristarco ta ra Segundo, ta uvi tahan ra ihya, Tesalónica cuví ñuu ra. Ta cuahān ra Gayo, noo ra ñuu Derbe, ta ra Timoteo, ta uvi tahan ra ityi Asia, ra Tíquico ta ra Trófilo.

⁵ Ra hermano ihya cayahā ra ityi nuu ta canyatú ra chí ndi ñuu Troas.

⁶ Ta nyuhu nyatú ndi na yaha vico pascua nu tuhvá ñu Israel chachí ñu pan cha ñahri yuchan iya yihí. Tyicuan ta quita ndi ñuu Filipo chihin barcu. Ta nu cu ohon quivi ta natahān ndi chí ra cha cuahān ityi nuu nya ñuu Troas. Ta yucuan ndoō ndi ucha quivi.

Nu cahán ra Pablo tuhun Nyoo ñuu Troas

⁷ Ta cha timingu cuan ndu iñi ri ndi chihin ñu yihí cuenda Nyoo ñuu Troas cuan. Ta quivi cuan cuacachi ndi pan ta coho ndi vinu vatyí nicohon iñi ndi tyi chihí ra Cristo cha cuenda cuatyí yo. Ta ra Pablo cahán ra nuu ñu ta cuví ora ñuu, vatyí cha nyaá cha cuhun ndi inga quivi cuan.

⁸ Canyicú ndi noo cuarto nu cu uñi piso. Ta ndichin xaan nu canyicú ndi chichi vehe cuan vatyí cuaha xaan ñuhú candil cayú.

⁹ Ta noo ra tyivaa cha nañí Eutico nyaá ra ventana tyasohó ra, soco ña cunyeē ra ñumahna vatyí ra Pablo, cha vehe xaan cahan ra. Quixí ra Eutico, ta ña chito ra canacava ra nya nu ñuhu. Ta nacoñehé ra chí ra soco cha chihí ra.

¹⁰ Tyicuan ta ra Pablo noo ra ta chaā ra nu catuví ra tyivaa cuan. Ta natyihí nundaha ra chí ra tyivaa cuan, ta catyí ra chí ndi hermano:

—Ma yuhvi ndo. Nyitó ra —catyí ra.

¹¹ Tyicuan ta nandaꝯ tucu ra Pablo ta chachi ndi pan ta chihí ndi vinu cha cuenda Sutu Mañi yo. Tyicuan ta cahan ca ra Pablo tuhun Nyoo nyacua nya cundichin. Tyicuan ta cuahan ra.

¹² Ta ra tyivaa cuan nandotꝯ ra ta cuanuhu ra nya vehe ra. Ta sꝯi xaan nanduvꝯ cuñi ñu.

Nu quitꝯ ra Pablo ñuu Troas ta cuahan ra nya ñuu Mileto

¹³ Nyuhu yaha ndi ityi nuu ta cuahan ndi chihin barcu nya ñuu Asón. Vatyí yucuan cuñihi tahan ndi chihin ra Pablo, vatyí tyicuan caa sandaꝯ maa ndi tyiño chihin ra. Vatyí maa ra cuñi ra cahun ra ityi nu ñuhú ri chihin chaha ra.

¹⁴ Ta cuhva cha nañihi tahan ndi chihin ra nya ñuu Asón cuan, quihvi ra chichi barcu chihin ndi ta cuahan ndi nya ñuu Mitilene.

¹⁵ Quitꝯ ndi yucuan ta yaha ndi ityi nuu noo ñuhú luhlu cha nañi Quoío nyaá mahñu tyañuhu. Ta cha inga quivi cuan chaꝯ ndi inga ñuhú luhlu cha nañi Samos. Yaha ndi yucuan ta nyitatꝯ ndi ñuu Trogilio. Ta cha inga quivi chaꝯ ndi nya ñuu Mileto.

¹⁶ Tyicuan caa cuvꝯ vatyí ra Pablo ña cuñi ra cunyaꝯ ca ra cuaha quivi ityi Asia. Ña cuñi ra cahun ra Éfeso vatyí numi ri cuñi ra chaꝯ ra ñuu Jerusalén, vatyí tatu cuhva chi cuhva cunyaꝯ ra quivi vico Pentecostés cha sanducahnú ñu Israel.

Nu cahán ra Pablo chihin ra ñuu Éfeso vatyí cuhun ra ta ma quichi ca ra

¹⁷ Ta cuhva cha nyicu ndi ñuu Mileto, canꝯ ra Pablo chi ra yihí ndaha chi ñu yihí cuenda Nyoo Éfeso.

¹⁸ Ta cuhva cha chaꝯ coyo ra, catyí ra tyehe caa chi ra:

—Maa ndo chitó ndo yoso caa cuhva chicaꝯ noi nyata quivi xihna ri cha chaj Asia ihya.

¹⁹ Tandihꝯ quivi cha chinyaꝯ chihin ndo ta sacuvꝯ tyiño nuu Sutu Mañi yo chihin cha nduquꝯ cuhva cha ma cahnu sahi chii, vasi cuaha tĩndoho chihin cha cuaha tucuihya iñi. Ta cuaha tĩndoho quichi siꝯqui sacuvꝯ ñáyivi Israel.

²⁰ Soco ña sandihí cha cahán noi tuhun Nyoo nuu ndo. Vatyí ihya cuvꝯ tandihꝯ cha chiñuhú chi ndo tacuhva coo vaha ndo. Ta sañahꝯ tuhun Nyoo chi ndo nu ndu iin ri ndo ta nya vehe ndo ñandihꝯ.

²¹ Ta sañahꝯ tuhun ihya chi ñu Israel ta chi ñu cha ñima ñu Israel cuvꝯ. Sañahꝯ chi ñu na nasama ñu cuhva iyꝯ ñu nuu Nyoo ta nachino iñi ñu chi Sutu Mañi yo Jesucristo.

²² Ta vityin cuhin nya ñuu Jerusalén vatyí maa Tatyí Ii catyí. Ta ña chité ñáá cha cucuvi chii yucuan.

²³ Soco noo ri cha chité vatyí tandihꝯ ri nu cuahín Tatyí Ii catyí chii vatyí nyatú vehe caa chii, ta cuaha tĩndoho ñandihꝯ.

²⁴ Soco ni noo ihya ta ña chicá xiñi. Ta ni ñayivi ta ña vale cha cuenda mai, tacuhva vatyí chihin tusꝯi iñi ta cuvꝯ sañihi sahatyiñe tyiño cha chaha Sutu Mañi yo Jesús chii, cha sañahi tuhun vaha yoso cuhva cuñi Nyoo chi yo.

²⁵ Ta vityin chitó vahi vatyí tandihꝯ nyoho cha cahin tuhun Nyoo chihin ndo, ma nyehe ca maa ndo chii.

²⁶ Yucuan chaha cuñi catyí chi ndo vityin vatyí ñahri ca cuatyí yuhu cha cuenda ni noo nyoho.

²⁷ Vatyí chihin cha niñi cuñi ta cahin tuhun Nyoo chihin ndo ta ñahri cha tixehꝯ.

²⁸ Yucuan chaha saha ndo cuenda chi ndo. Ta saha tucu ndo cuenda chi tandihí ñu yihí cuenda Nyoo. Vatyí maa Tatyí li tyatyíño chi ndo vatyí saha cuenda ndo chi ñáyiví iyó vehe ñuhu Sutu Mañi yo. Maa ra satá ra chí ñu chihin ñiñi ra.

²⁹ Vatyí chité vatyí quiví cuhin, cuquichi inga ra. Ta cuñi ra sativí ra chí ñu yihí cuenda Sutu Mañi yo. Tari lobo xaan cha chahñi chí mbee, tyicuan caa cuquichi ra cuan sativí ra añima ndo.

³⁰ Ta suri nu nyicu ndo, cundicuita suhva ra. Ta cusañaha ra cha ña ndicha tacuhva cunyicon ndo chí ra.

³¹ Yucuan chaha saha vaha ndo cuenda. Nícohon iñi ndo vatyí chichi cha uñi cuiya ña sandihí cha cahín tuhun Nyoo nuu ndo. Cha ñicahñu ta cha cuaa cahín chihin noo noo nyoho, ta chihin cha cuihya iñi coto sandihí ndo tuhun Nyoo.

³² Ta vityin nyoho yañi, natyaí chí ndo ndaha Nyoo. Saha ndo cuenda ndii tuhun cahan ra chihin yo. Sacotó ra chí yo tyi cuñi xaan ra chí yo. Ta yucuan sandunyeé xaan chí iñi yo tacuhva cuví yo ñáyiví yihí vaha cuenda ra chihin tandihí inga ñu cha nacuhva cuenda ñu chí ñu chí ra.

³³ Yuhu ña nyiyó iñi ni minoo cha iyó chí ndo. Ni ri xuhun ndo, ni ri sahman do.

³⁴ Nyoho chitó vaha ndo vatyí sahá tyiño xain chihin ndahi tacuhva ñihí cha chiñuhú chí chihin ra chicá noo chihin.

³⁵ Tyicuan ri sañahí chí ndo vatyí cuñi chí cha saha tyiño ndo ta tyinyee ndo chí ñu iyó cha chiñuhu chí. Ta nícohon iñi ndo tuhun cahán Sutu Mañi yo Jesús nu catyí ra tyehe caa: “Si ca cuñi noo ñáyiví ñu chahá, ta ñima ca ñu ita iñi”, catyí Sutu Mañi yo.

³⁶ Cha yaha cha catyí ra Pablo tuhun ihya, chicuiñi chíti ra. Ta chicán tahvi ra chihin tandihí ñu.

³⁷ Ta tandihí ñu cuihya xaan nduvi iñi ñu ta chacu xaan ñu. Ta nanumi ñu chí ra.

³⁸ Vatyí ra Pablo catyí ra tyi cuhun ra inga ñuu ta ma cuhun ca ra nu nyicu ñu. Tyicuan ta chinyaca ñu chí ra nyacua nya nu quihvi ra chíchi barcu.

21

Nu cuahan ra Pablo ñuu Jerusalén

¹ Tyicuan ta sandoq ndi chí ra hermano ta quihvi ndi chíchi barcu. Ta cuahan ndi ñin ndoo ityi ri nya Cos noo ñuhú luhlu mahñu tyañuhu. Ta cha inga quivi chaq ndi nya Rodas inga ñuhú luhlu ri. Yucuan ta cuahan ndi nya Pátara.

² Ta ñuu Pátara cuan nañihí ndi nonga barcu cha cuahan nya Fenicia. Ta quihvi ndi chíchi inga barcu cuan ta cuahan ndi.

³ Ta cha cuahan ndi nyehe ndi ñuhú Chipre chiyo satyin ndi. Ta yaha ri ndi cuahan ndi ityi nu ca, ityi Siria. Ta chaq ndi nya ñuu Tiro vatyí yucuan cuatava ra carga cha nyisó barcu cuan.

⁴ Ta cha nañihí ndi chí ñu yihí cuenda Nyoo ñuu cuan, ndoo ndi chihin ñu ucha quivi. Ta catyí ñu chí ra Pablo vatyí ña tahán chí cha cuhun ra Jerusalén vatyí tyicuan caa sañaha Tatyí li chí ñu.

⁵ Soco cha ndihí ucha quivi cuan quita ndi ñuu cuan. Ta nu cuaquita ndi tandihí ra hermano chihin ñasihí ra ta sehe ra chinyaca ñu chí ndi nyacua nya ityi chata ñuu. Ta nu ñiti yuhu tyañuhu cuan nicuiñi chíti ndi, ta chicán tahvi ndi chí Nyoo.

⁶ Tyicuan ta nanumi ndi chi tahan ndi. Tyicuan ta quihv_i ndi chichi barcu. Ta maa ñu cuanuh_u coyo ñu vehe ñu.

⁷ Ta quit_a ndi ñuu Tiro cuan ta cuahan ndi nya ñuu Tolemaida. Ta yucuan chah_a ndi nocumi chi ñu hermano. Ta ndoo ndi chihin ñu noo quiv_i.

⁸ Ta cha inga quiv_i quit_a ndi ta cuahan ndi ñuu Cesarea. Ta yucuan chah_a ndi vehe ra Felipe ra cha sacotó xaan chi ñáyiv_i yoso caa sacacu Nyoo aña_ima ñu. Cuv_i ra noo ra chichi cha ucha tahan ra nyisó tyiño vehe ñuhu. Ta yucuan ndoo ndi chihin ra.

⁹ Ra Felipe, iyó cumi tahan ñu tyivaa sehe ra cha ta tandaha ca. Ta tuhv_a ñu chah_a cuenda ñu tuhun cahán Nyoo. O cuv_i chi cuan sah_a ñu profetizar.

¹⁰ Ta cha cuaha ri quiv_i cha chah_a ndi yucuan, tyicuan ta chah_a noo profeta Nyoo cha nañi Agabo. Quich_i ra ityi Judea.

¹¹ Quich_i nyehe ra nu nyicu ndi. Ta quehen ra sincho ra Pablo, ta cháhñ_i ra chaha ra ta ndaha ra, ta caty_i ra:

—Taty_i li Nyoo caty_i chii vaty_i tyehe caa cunuhñ_i chitoho sincho ihya nya Jerusalén. Ta cucuhva cuenda ñáyiv_i Israel chi ra chi ra inga ñuu —caty_i ra Agabo.

¹² Cha chiñ_i ndi tuhun ihya, nyuhu ta ra ñuu Cesarea chacú ndahvi ndi nuu ra Pablo vaty_i ma cuhun ra Jerusalén.

¹³ Soco ra Pablo caty_i ra:

—¿Ñáá tuhun chacú ndo ta sanducuihyá ndo iñi? Yuhu ñahri cuende. Ñima cha cunuhñ_i ri, vasi cahñ_i ra chii soco cha cuenda Sutu Mañi yo Jesús —caty_i ra chi ndi.

¹⁴ Ta cha nyehe ndi tyi ña cuv_i chasaha ndi chi ra, saña ndi. Ta caty_i ndi:

—Na cuv_i maa cuhva cuñ_i maa Sutu Mañi yo.

¹⁵ Cha yah_a tuhun ihya sanduvah_a ndi chi ndi ta cuahan ndi nya Jerusalén.

¹⁶ Ta cuahan suhva ra Cesarea ra yih_i cuenda ra Cristo chihin ndi. Ta cuahan tucu noo ra ñuhú Chipre. Mnasón nañi ra. Cuaha xaan cuiya chinó iñi ra chi ra Cristo. Maa ra chinyaca_a ra chi ndi nya vehe ra cha nyaá Jerusalén vaty_i yucuan cunyaa ndi.

Nu cuanyehe ra Pablo nu nyaá ra Jacobo

¹⁷ Cuhva cha chah_a ndi Jerusalén, ñu yih_i cuenda ra Cristo chihin cha s_i cuñ_i ñu cahán ñu chihin ndi.

¹⁸ Ta inga quiv_i cuan cuahan ndi chihin ra Pablo cuanyehe ndi nu nyaá ra Jacobo. Ta yucuan nyicú tucu tandih_i ra yih_i ndaha vehe ñuhu.

¹⁹ Chah_a ra Pablo nocumi chi ra. Yah_a cuan ta nacaty_i ra tahan tahan ri tuhun yoso caa chotyíño Nyoo chi ra nu cahan ra tuhun Nyoo chihin ñu cha ñima ñu Israel cuv_i.

²⁰ Cuhva cha cachiñ_i ñu tuhun ihya, casacahnu ñu chi Nyoo, ta caty_i ñu chi ra Pablo:

—Vaha yañi yo, soco cha nyehun vaty_i cuaha xaan mil ñu Israel chinó iñi ñu chi ra Cristo. Ta tandih_i ñu caty_i ñu vaty_i ñiñi cha cunyicon yo ley ra Moisés.

²¹ Ta ñih_i ñu tuhun vaty_i yoho sañahún chi tandih_i ñu Israel cha iyó inga ñuu vaty_i ma quichaha ca ñu ley cha sañah_a ra Moisés, ta catyún chi ñu vaty_i ña tahán chi sacuv_i ñu costumbre circuncisión chihin cha lee sehe ñu, ta ni ma sacuvi ca ñu costumbre chahnu yo.

²² ¿Yoso caa sacuvi yo vityin? Vaty_i ñáyiv_i cuañihi ñu tuhun tyi chaun ihya.

²³ Vaha taxin ca cha sacuvun tyehe caa. Ihya iyó cumi tahan rayñ_i cha nyaá sacuvi ra noo cha tyaa_a ra cuhva tyi sacuvi ra nuu Nyoo.

24 Cughan chihin ra na ndundun nuu Nyoo chihin ra. Ta yoho tyiyahvun cha tahán chi tyiyahvi ra. Tyicuan ta maa ra cuvi satya ndi xiñi ra cuhva catyí ley. Ta cha sacuvun tyicuan caa ta coto tandihí ñáyivi vatyi ña ndicha cha cahán ñu sicun, soco cunyehe ñu vatyi quichahá tucu yoho ley ra Moisés.

25 Ta cha cuenda ñu cha ñima ñu Israel cuví, ta nachinó iñi ñu tuhun Nyoo, cha sacuhun ndi tutu chi ñu, ta catyí ndi chi ñu vatyi ña tahán chi caca xiñi ñu tuhun ihya. Soco noo cha ma cachi ñu coño cha chahá ñáyivi chi xitohyo. Ni ma cachi ñu niñi ni coño quiti cha cava ñu sucun ta ña chati niñi. Ta ni noo ñu ta ma coo ñusihi o rayi chi ñu tatu ñima ñasihi o yi ñu cuví —catyí ra chahnu vehe ñuhu chi ra Pablo.

Nu nacandá ñu Israel siquí ra Pablo

26 Tyicuan ta tuví inga quívi ta cuahan ra Pablo chihin ndi cumi tahan ra cuan. Ta sandundií ra chi ra nuu Nyoo in ri chihin ra cuan. Tyicuan ta quihvi ra chichi vehe ñuhu chahnu vatyi sacoto ra chi tata sutu ama cundihi cha ucha quívi cha ndundií ndi cumi tahan ra cuan, ta cuacuhva ra ofrenda cha cuenda noo noo ra.

27 Soco cha cuñi cuí ri ndihí ucha quívi cuan, ta suhva ra Israel cha quichi nya Asia canyehe ra chi ra Pablo chichi vehe ñuhu. Ta casanaquiquí ra chi tandihí ñáyivi, ta catiñ ra chi ra Pablo.

28 Ta cacanachaá ra ta cacatyí ra:

—Nyoho ñáyivi Israel, tyinyee ndo chi ndi. Ican ra ihya cuví ra cha chicá noo tandihí ri ityi. Ta sañahá ra chi tandihí ñáyivi. Catyí ra vatyi cha ñima ri tuhun cuví yo ñu Israel. Ta catyí ra tyi ña vaha ley cha tyaá ra Moisés, ta ña vaha vehe ñuhu ihya. Ta siñ ri vityin tyihí ra chi suhva ra Grecia chichi vehe ñuhu sativí ra nu ii ihya —catyí ra canachaá ra.

29 Tyehé caa cacatyí ra vatyi ta ityi chata ca canyehe ra chi ra Pablo chichi ñuu, chicá noo ra chihin ra Trófimo, noo ra ñuu Éfeso. Ta cacuñi maa ra vatyi ra Pablo chinyaca chi ra chichi vehe ñuhu.

30 Ta tandihí ri ñáyivi ñuu naquiquí ñu. Ta ñáyivi chinó vavaha ñu vachi coyo ñu. Tyicuan ta catiñ ñu chi ra Pablo. Ta caxita quiñoño ñu chi ra nya ityi chata vehe ñuhu, ta numi ri nacasi ñu yuvehe.

31 Cha cuñi ñu cahñi ñu chi ra, ta chaá tyiño chi comandante cuenda sindaro vatyi tandihí ñu Jerusalén iyó xaan naquiquí.

32 Tyicuan ta comandante cuan sandu in ri ra capitán ta sindaro. Ta cachinó ra cuahan coyo ra nu nyicú ñáyivi. Cuhva cha nanyehe ñu chi comandante chihin sindaro, sandihí ñu cha cañi ñu chi ra Pablo.

33 Tyicuan ta tuhva comandante nu nyaá ra Pablo. Ta tachí ra tyiño natin sindaro chi ra, ta cháhñi ra chi ra chihin uvi tahan cadena. Yaha cuan ta ndaca tuhun ra chi ra yóo ra cuví ra, ta ñáa cha sacuví ra.

34 Soco ñáyivi siñ siñ tuhun canachaá ñu. Ta comandante cuan ña cutuñi maa iñi ra cha cuenda cha quiñi cuvaa ñu. Ta tachí ra cha cunyaca sindaro chi ra Pablo nya cuartel.

35 Cuhva cha cachaá ra nu cuayi yuvehe cuartel cuan, quiñi xaan nanduví ñáyivi ta ña chahá ca ñu caca ra Pablo. Yucuan chaha catyaá soco sindaro cuan chi ra.

36 Vatyi tandihí ñu nyicón ñu chi ra, ta canachaá ñu ta catyí ñu:

—¡Cahñi ndo chi ra! —cacatyí ñu.

Nu sacacú ra Pablo chi ra nuu ñáyivi

37 Cuhva cha cuatyihí ra chi ra Pablo chichi cuartel, ta quichaha catyí ra chi comandante:

—¿Atu cuhvon cha catyí noo tuhun chuun? —catyí ra chi ra.

Ta comandante cuan catyí ra:

—¿Atu cuví cahún griego?

38 Tu tyicuan caa, ñíma yoho cuví ra ñuu Egipto cha quichí quiví cuan ta sacañi tahan ra chi ñáyiví siqui gobiernu ta chinyacá ra chi cumi mil tahan ñáyiví ityí ñuhu ityí —catyí comandante cuan chi ra Pablo.

39 Tyicuan ta ra Pablo catyí ra chi ra:

—Yuhu noo ra Israel cuví ta caquí noo ñuu cha nañí Tarso cha cuví minoo ñuu cahnú ityí Cilicia. Soco saha noo tumañi iñi chii vatyi cuhvon nacahin chiin chihin ñáyiví —catyí ra Pablo chi comandante cuan.

40 Tyicuan ta chahá comandante cuan permiso chi ra. Tyicuan ta nicuinanyaa ra nu cuayí ta chahá ra noo seña chi ñu na cutaxin ñu. Ta cahán ra chihin sahan hebreo, ta catyí ra:

22

1 —Nyoho tata, ta nyoho yañi, cuiñi ndo cha catyí chi ndo tyi coto ndo vatyi yuhu ñahri cuatyí —catyí ra Pablo chi ñáyiví cuan.

2 Cha cachiñi ñu vatyi cahán ra chihin ñu chihin sahan hebreo, taxi ri cacuví ñu. Ta ra Pablo catyí ra:

3 —Yuhu ra Israel cuví tari maa ndo. Ta caquí ñuu Tarso ityí Cilicia. Soco Jerusalén ihya chahní. Ta ra Gamaliel sañaha chii tandihí maa cuhva yoso caa quichahi ley sutu chahnú yo. Ta tyicuan ri nduquí cuhva sacuví tyiño nuu Nyoo chihin cha tandihí añime, tari maa cuhva nyacuví nyoho quiví vityin.

4 Yuhu, nu quichi chi chicá nyiquen ta satasi iñi chi ñu yihí cuenda ra Cristo. Ta nacuhvá cuende chi ñu na cacahñi ra chi ñu. Ta tyihí chi ñu chichi vehe caa, rayi ta ñusihí.

5 Ra cuví nuu chi tata sutu chihin ra cacuví mandoñi, cacuví ra cha ndaa vatyi ican ra chahá tutu vatyi cuví tin chi yañi yo, ra yihí cuenda ra Cristo ñuu Damasco. Chahin nyicuan chinanduquí chi ñu chinó iñi chi ra Cristo, vatyi tacuhva cunuhñi ñu chihin cadena, ta quichi nyaque chi ñu nya Jerusalén ihya vatyi cutachi tuñi ra chahnú chi ñu.

Nu nacatyí ra Pablo yoso caa nanduví ra cuenda ra Cristo

(Hch. 9.1-19; 26.12-18)

6 Soco cuhva cha cuahin ityí cha cuachaa ndi Damasco, ñáá cuhva ora cuví cuan. Ta sana iñi ta ndundichin nicachico nu cuahin chihin noo nduva ñuhu cha quichi ityí andiví.

7 Tyicuan ta nduve nu ñuhú. Yahá cuan ta chiñi noo ndusu cha catyí chii: “Saulo, Saulo, ¿ñáá tuhun cha chicá nyicon chii tyehe caa?” catyí ndusu cuan chii.

8 Tyicuan ta ndacá tuhin chi ra ta catyí: “¿Yóó yoho tata?” Ta catyí ra chii: “Yuhu cuví ra Jesús, ra ñuu Nazaret, ra chicá nyicon chi”, catyí ra.

9 Ndí ra cha cuahan coyo chihin canyehe ra ñuhú cuan, ta nayuhví ra. Soco ña cachiñi ra ndusu ra cha cahán chihin.

10 Tyicuan ta quichahá catyí yuhu chi ra: “Sutu Mañi yuhu, ¿ñáá cha tahán chi sacuví?” Ta catyí ra chii: “Ndícuíta ta cuahan nya Damasco. Ta yucuan cucatyí noo ra chuun tandihí cha tahán chi sacuvun”, catyí Sutu Mañi yo chii.

11 Ta vatyi nducaj saha ñuhú cuan, ra tahin cayindahá ndahi ta cachinyacá ra chii nya Damasco.

12 "Ta yucuan iyó noo ra cha nañi Ananías. Ta sacahnú xaan ra chi Nyoo cuhva catyí ley cha tyaa ra Moisés. Ta tandihi ñu Israel cha iyó Damasco catyí ñu vatyi vaha xaan ñáyivi cuví ra Ananías.

13 Quichí nyehe ra cuan chii. Ta cuhva cha chaq ra, catyí ra chii: "Yañi Saulo, nanyehinga inga chaha", catyí ra chii. Ta caa cuhva ri cuan nanyehi. Ta cuví nyehi chi ra Ananías cuan.

14 Ta catyí ra chii: "Nyoo cuenda sutu yo nacachi ra chuun nyata ityi chata ca, vatyi coton cuhva cuñi ra, ta nyehun chi ra Jesucristo vatyi vaha ra, ta cuiñun ndusu ra.

15 Vatyi yoho cuacahun tuhun ra nuu tandihi ñáyivi. Cuanacatyun cha nyehun ta cha chiñun.

16 Ta vityin, ma cuatu con. Ndicuita ta condutyon. Ta caçan tahvun chi Sutu Mañi yo tyi cuasandachi ra cuatyun", catyí ra Ananías chii.

Nu nacatyí ra Pablo yoso caa chaha Nyoo tyiño chi ra vatyi cuhun ra inga ñuu cucahan ra tuhun ra Cristo

17 Yahá cuan ta cuanuhin Jerusalén ta cuhva cha nachaj, chahin vehe ñuhu cahnu chicaçan tahvi. Ta nyehi noo visión.

18 Nyehi chi Sutu Mañi yo. Ta catyí ra chii: "Sanumi. Qujta cha numi ri Jerusalén vatyi ma chino iñi ñu tuhun cha cucahun", catyí ra chii.

19 Tyicuan ta quichaha catyí yuhu chi ra: "Sutu Mañi yuhu, maa ñu chitó ñu vatyi yuhu chahin tandihi vehe ñuhu. Ta tijin chi ñu chinó iñi chuun, ta tyihí chi ñu vehe caa ta cañi chi ñu.

20 Ta quivi chati niñi ra Esteban ra cha cahan cuendon, yuhu ñandihí nyaí yucuan. Ta ndoj vaha cha chahñi ñu chi ra. Ta sahadumj sahma ra cha cachahñi chi ra", catyí yuhu chi Sutu Mañi yo.

21 Tyicuan ta catyí ra chii: "Cuahan, vatyi tachí chuun nu cañi, nu nyicu ñu cha ñima ñu Israel cuví", catyí Sutu Mañi yo chii.

Nu nyaá ra Pablo ndaha ra comandante cuenda ñuu Roma

22 Ihya ri tyasohó ñu tuhun cahan ra Pablo. Tyicuan ta quichahá canachaá ñu ta catyí ñu:

— ¡Cañi ndo chi ra chiña! Ña tahan chi coo ra ñáyivi — catyí ñu.

23 Ta canachaá ca ñu. Ta sacaa ñu sahma ñu. Ta sacaa ñu ñiyaca nu tatyí cha cuenda cha xaan xaan cuñi ñu.

24 Yucuan chaha comandante cuan catyí ra na cutyihí sindaro chi ra chichi cuartel. Ta tachí ra tyiño na cañi ra chi ra, vatyi cuñi ra cha quita cha ndaa ñaa tuhun cha canachaá ñáyivi sigui ra cha tyicuan caa.

25 Soco cha yahá cachahñi ra chi ra ta cuacañi ra chi ra, tyicuan ta ra Pablo nacatyí ra chi capitán cha nanyaá yucuan:

— ¿Atu iyó ityi chi nyoho cha cañi ndo chii? Vatyi yuhu ra cuenda ñuu Roma cuví ta sin ri ta cutuñi ca chii nu juez — catyí ra Pablo chi ra.

26 Cuhva cha chiñi capitán cha cahan ra Pablo, chahan ra chisacotj ra chi comandante. Ta catyí ra chi ra:

— Saha cuenda chuun chihin cha nyacuvún. Vatyi ra cuan, ra cuenda ñuu Roma cuví ra — catyí ra chi ra.

27 Tyicuan ta comandante cuan cuahan ra nu nyaá ra Pablo. Ta ndacá tuhun ra chi ra tatu ndicha vatyi ra cuenda ñuu Roma cuví ra. Ta ra Pablo catyí ra vatyi ican.

28 Tyicuan ta catyí comandante cuan chi ra:

— Yuhu cuaha xaan xuhun tyiyahvi ta nanduvi noo ra cuenda Roma.

Ta ra Pablo catyí ra:

—Soco yuhu ra cuenda Roma cuví nyata caquj —catyí ra.

²⁹ Ta tyicuan caa ta sindaro cha cuacañi chi ra canyahá ra ta cuahan coyo ra. Ta nyacua nya comandante ta nayuhvj ra cha cuenda cha cháhñi ra chi ra chihin cadena. [Vatyí cuatyí cuví cha sacuví ra cha tyicuan caa chihin noo ra cuenda ñuu Roma.]

Nu nanyaá ra Pablo nu candu ñn ri ra Israel

³⁰ Tuvj inga quivi ta comandante cuan cuñi ra coto ra ñáá cuatyí tyaá ñu Israel chaha ra Pablo. Ta ndachí ra cadena cha nuhñi ra. Ta tachj ra tyiño na ndu ñn ri ra cuví nuu chi tata sutu, ta tandihí ra cuenda junta. Tyicuan ta tava ra chi ra Pablo vehe caa ta chinyaca ra chi ra nu iyó junta cuan.

23

¹ Ta ra Pablo nyehe ra chi tandihí ra chihin cha ña cahan nuu ra, ta catyí ra chi ra:

—Nyoho ra yañi yo, nyacua nya quivi ihya iyó vahi nuu Nyoo ta ñahri cha ña vaha sacuví nuu ra —catyí ra Pablo.

² Tyicuan ta ra Ananías ra cuví nuu chi tata sutu tachj ra chi ra nyicú yatyin ri nu nyaá ra Pablo, na nacañi ra ndaha yuhu ra.

³ Soco ra Pablo nacahan ra nu cahán ra ta catyí ra:

—jXihna ca chi maun cucañi Nyoo, vatyí sahá xaun tyi ra vaha cuvún nyaún chiña! ¿atu cutuñi chii nuun tari cuhva catyí ley? ¿Ñáá tuhun cha tachun nacañi ra chii? ta ñima tyicuan caa catyí ley —catyí ra Pablo.

⁴ Tyicuan ta ra canyicu yucuan catyí ra chi ra:

—Ña vaha cha cahún chi ra cuví nuu chi tata sutu cuenda Nyoo —catyí ra chi ra Pablo.

⁵ Tyicuan ta ra Pablo catyí ra:

—Yañi yuhu, ña chite tatu ra cuví nuu chi tata sutu cuví ra. Vatyí catyí tuhun Nyoo tyi ma cahan ña vaha yo siqui ra cuví tyiño ñuu yo —catyí ra.

⁶ Tyicuan ta tuvj iñi ra Pablo vatyí suhva ra cuenda junta cuan, yihí ra cuenda ityi ra cuví saduceo. Ta inga ra yihí ra cuenda ra cuví fariseo. Tyicuan ta cahán ra chihin cha ñihi ndusu ra ta catyí ra:

—Nyoho yañi, yuhu ra fariseo cuví tari suti. Ta cutuñi chi nuu ndo vatyí chinó iñi tyi nandotó ñu chihí —catyí ra Pablo.

⁷ Cuhva cha catyí ra tuhun ihya, ra fariseo ta ra saduceo, quichaha candatuhun tahan ra suri chihin tahan maa ra, ta cacusiñn ra.

⁸ Vatyí ra saduceo catyí ra vatyí ña nandotó ndiyi. Ta ni yori ángel ta ni yori tatyí ña vaha iyó catyí ra. Soco ra fariseo chinó iñi ra tandihí ihya.

⁹ Tandihí ra vaa ri ca cananduvj ra. Ta ndicuita ra fariseo, ra sacuahá cuenda ley ra Moisés, ta catyí ra:

—Nyehé xihna ndo, ñahri cha ña vaha sacuví ra ihya. Soco tatu noo ángel cahán chihin ra, saha yo cuenda coto vaha siqui Nyoo cahán ña vaha yo —catyí ra.

¹⁰ Cha chiñi ra tuhun ihya, vaa ri ca cananduvj ra. Nyacua nayuhvi comandante cuan coto cahnya cuatyí ra chi ra Pablo. Yucuan chaha tachj ra tyiño na tava sindaro chi ra Pablo nu nyicú ra, ta cunanyaca ra chi ra nya cuartel.

¹¹ Ta cha cuaa cuan tuvj Sutu Mañi yo nuu ra Pablo ta catyí ra chi ra:

—Sandun# iñun, Pablo. Vatyí tari cahún tuhin Jerusalén ihya, tyicuan caa tucu cucahan tucun nya ñuu Roma —catyí Sutu Mañi yo chi ra Pablo.

Nu tyaá ra Israel cuhva cahñi ra chi ra Pablo

¹² Cha inga quivi, suhva ra Israel catyihj tahan ra tuhun. Catyí ra vatyí ni ma cacachi ra, ni ma coho ra nyacua nya cahñi ra chi ra Pablo. Ta nya noo ra ma sacuvi tyicuan caa na sanaa Nyoo chi ra siqui ñuhu ñáyivi, cacatyí ra.

¹³ Yaha ca uvi xico ra catyihj tahan tuhun ihya nuu Nyoo.

¹⁴ Chahan coyo ra nu nyicu ra cuví nuu chi tata sutu ta ra cacuví mandoñi cuenda ñu Israel. Ta catyí ra chi ra:

—Nyuhu iñ ri tuhun cahan ndi nuu Nyoo vatyí ma cachi ndi ta ni ma coho ndi cha ni ri ca cha ma cahñi ndi chi ra Pablo. Ta na sanaa Nyoo chi ndi tatu ma sacuvi ndi tari cuhva catyí ndi.

¹⁵ Ta vityin nyoho sacuhun ndo tuhun chi comandante. Catyí ndo chi ra na quichi nyaca ra chi ra Pablo nuu ndo ityaan. Saha ndo tuhun vatyí cuasandaa vaha ndo tyiño, ta nyuhu cuatu tuhva ri ndi nu yahá ra ta cucahñi ndi chi ra —catyí ra chi ra.

¹⁶ Soco sehe cuhva ra Pablo chiñi cue cha cahán ra. Ta chahan cue chisacoto cue chi ra Pablo nya cuartel.

¹⁷ Tyicuan ta ra Pablo cana ra chi minoo capitán. Ta catyí ra chi ra:

—Cuanyaca chi ra cuehe luhlu ihya nuu comandante vatyí iyó noo tuhun cuñi cue sacoto cue chi ra —catyí ra Pablo chi ra.

¹⁸ Tyicuan ta chinyaca capitán cuan chi cue nuu comandante. Ta catyí ra chi ra:

—Ra Pablo cha ñohó vehe caa cana ra chii ta catyí ra chii vatyí quichi nyaque chi ra cuehe luhlu ihya vatyí cuñi cue cahan cue chuhun —catyí ra chi ra.

¹⁹ Tyicuan ta tñn comandante ndaha ra cuehe luhlu cuan ta tavá sñn ra chi cue ta catyí ra chi cue:

—¿Ñáá túhun cuñún catyun chii?

²⁰ Ta ra cuehe luhlu cuan catyí cue chi ra:

—Ra Israel catyihj tahan vaha ra tuhun vatyí catyí ra chuun na sacuhun chi ra Pablo nu iyó junta tyaan. Vatyí casaha ri maa ra cha cuñi ra cha cutuñi vaha ca chi ra.

²¹ Soco ma chino iñun chi ra vatyí yaha ca uvi xico tahan ra nyatú xehe chi ra ityi. Ta tyanaha ra chihin nuu Nyoo vatyí ma cachi ra ta ma coho ra nyacua nya cahñi ra chi ra Pablo. Ta tatu ña cuví cahñi ra chi ra, vaha taxín ca nacúvi noo noo maa ra na. Ta vityin nyatú tuhva ra coto ra ñáá cucatyí maun —catyí cue.

²² Tyicuan ta catyí comandante chi ra cuehe luhlu cuan vatyí yori chihin cahán cue tuhun cha catyí cue chi ra. Yaha cuan ta natachj ra chi cue.

Nu cacu ra Pablo ndaha ra Israel ta cuahan ra nuu ra gobernador cha nañi Félix

²³ Tyicuan ta comandante cana ra chi uvi capitán, ta catyí ra chi ra:

—Sanduvaha ndo chi ndo vatyí cuhun ndo Cesarea cuhva caa iñn cha cha cuaa. Cuacuhun uvi ciento sındaro chihin chaha ra, ta uñi xico uchj ra chihin caballo, ta uvi ciento ra cuiiso ra lanza.

²⁴ Sanduvaha ndo caballo coso ra Pablo. Ta saha cuenda vaha ndo chi ra ityi cuahan ndo na chaa vaha ra nu nyaa ra Félix gobernador —catyí comandante chi capitán cuan.

25 Tyicuan ta tyaꝯ ra noo tutu quindaha ra cuhun ra. Ta tuhun cha tyaꝯ ra nu carta, ican cuví ihya:

26 “Yuhu ra Claudio Lisias sacuhin noo carta ihya chi yoho, tata gobernador Félix, vatyí vaha ñáyiví cuvun. Ihya vachi nocumi chuun.

27 Ra Pablo ihya, catiꝯn ra Israel chi ra. Ta cacuñí ra cacahñi ra chi ra. Soco cuhva cha chiteꝯ vatyí ra cuenda ñuu Roma cuví ra, chahin chihin sindaro ta sacaquí chi ra.

28 Ta vatyí cuñí cote ñáá cuatyí tyaá ñu siqui ra, chinyaqueꝯ chi ra nu iyó junta ra cacuví mandoñi ñu Israel.

29 Soco cuenda ley ri maa ñu cuví. Ta cha cuenda ley yoó, ñahri cuatyí ra ta cahñi yo chi ra. Ta ni ri ña tahán chi cohon ra vehe caa.

30 Soco vatyí ñihí tuhun vatyí ra Israel canducu cahñi ra chi ra, yucuan chaha tachiꝯ chi ra nu yoho. Ta catyí tiqui chi ra cha tyaá cuatyí siqui ra, na cuhun ra nu nyaun na cacan ra cuatyí ra nuu maun”, catyí ra Claudio chi ra Félix nu tutu cha tyaꝯ ra.

31 Tyicuan ta quehen sindaro chi ra Pablo tari cuhva catyí ra Claudio chi ra, ta chinyacaꝯ ra chi ra nya Antípatris suri maa cha cuaa cuan.

32 Cha inga quiví sindaro cha cuahan chihin chaha, canandichiꝯ coyo ra nya cuartel. Ta ra cha cayosó caballo cuahan coyo ca ra chihin ra Pablo.

33 Ta cuhva cha chaꝯ coyo ra ñuu Cesarea, cachahaꝯ ra carta cuan chi ra Félix, gobernador, ta cachahaꝯ cuenda ra chi ra Pablo chi ra ñandihí.

34 Cha yahaꝯ cha sacuaꝯ ra Félix carta cuan, quichaha ndacá tuhun ra chi ra Pablo nya ñuu ra. Ta cha chitoꝯ ra vatyí ra Cilicia cuví ra

35 ta catyí ra chi ra:

—Na quichi xihna ra tyaá cuatyí chahun. Tyicuan ta cusandai tyiñon —catyí ra chi ra.

Tyicuan ta tachiꝯ ra tyiño na casaha cumi sindaro chi ra nya vehe tyiño cha savahaꝯ ra Herodes ta cha naha.

24

Nu cutuñí chi ra Pablo nuu ra Félix

1 Yahꝯ ohon quiví ta ra Ananías, ra cuví nuu chi tata sutu, chaꝯ ra ñuu Cesarea cuan chihin suhva ra cacuví mandoñi, ta chihin noo ra cahan chaha ñáyiví cha nañí Tértulo. Chaá coyo ra nuu ra gobernador Félix vatyí cacan ra cuatyí chaha ra Pablo.

2 Tyicuan ta tachiꝯ ra Félix na quichi nyaca sindaro chi ra Pablo. Tyicuan ta quichahaꝯ chican ra Tértulo cuatyí chaha ra Pablo. Ta catyí ra chi ra Félix:

—Tyahví nyoo chuun, tata gobernador. Vatyí taxi ri iyó ñuu ndi, ta vaha iyó ndi vatyí yindaha vahun ñuu ndi.

3 Nachuvá xaan ndi tyahví nyoo chi yoho tata Félix, vatyí yoho, vaha ñáyiví cuvún.

4 Soco ña cuñí sayangue chuun chihin cha cuaha tuhun cahin, yucuan chaha chiquén noo tumañi iñi chuun na cuiñun suhva tuhun cuacahan ndi.

5 Vatyí chitó ndi tyi rayiꝯ ihya ñima ra vaha cuví ra, noo cuehe cuví ra. Ta tandihí ri ityi sanaquiquí ra chi ñu Israel. Ta ican ra cuví xiñi noo ityi ñáyiví nyicón chi ra Jesús ra ñuu Nazaret.

6 Nyacua cuñí ra sacuví ra noo cha ña tahán chi vatyí ña sahá ra ñáyiví vehe ñuhu cahnu. Ta nyuhu tñin ndi chi ra, tacuhva tachi tuñi ndi chi ra tari cuhva ley maa ndi.

⁷ Soco comandante Licias chasi ri ra ta chihin cuaha fuerza ta tinyaa ra chi ra chi ndi.

⁸ Ta catyí ra vatyí tatu cuñí ndi cacan ndi cuatyí chaha ra, cuñí chi cha cacan ndi nuu maun. Nyehe maun. Şanahmon chi ra ta coton tyi ndicha cha catyí ndi —catyí ra Tértulo.

⁹ Tyicuan caa tucu ra Israel cha canyicu yucuan, catyí ra vatyí ndicha tandihi tuhun cahan ra Tértulo.

¹⁰ Tyicuan ta ra Félix savaha ra seña chi ra Pablo vatyí nacahan ra. Ta ra Pablo quichaha catyí ra:

—Chité tyi cha cuaha xaan cuiya nyacá ñahun ñuu ihya. Ta yucuan chaha sii vavaha cuñí vatyí nuu maun cuacutuñi chi yuhu vityin.

¹¹ Tatu ndaca tuhun cuacoton tyi cha iyó ri noo uchi uvi quivi cha chahin Jerusalén. Chahin yucuan vatyí sacahni chi Nyoo.

¹² Ta yori chihin cuví yuhi. Ni ña sanaquiqui chi ñáyivi chichi vehe ñuhu cahnu. Ñahri maa sacuví, ni ri chichi vehe ñuhu, ni ri chichi ñuu.

¹³ Ta cuatyí cha tyaá ra ihya siqui, ña ndicha maa.

¹⁴ Soco noo cha catyí chi ndo vityin vatyí yuhu sacahni chi Nyoo cha sacahnú sutu chahni. Sacahni chi ra cuhva sañahá ra Jesucristo. Ta catyí maa ra ihya tyi ña vaha. Soco yuhu chinó iñi ndi maa tuhun cha nyaá nu libru ley cha tyaá ra Moisés. Ta chinó iñi tandihi tuhun catyaa ra profeta cuenda Nyoo ñandihi.

¹⁵ Ta suri chinó iñi vatyí Nyoo cusanandoto ra ñáyivi chihí, ñu vaha ta ñu quiñi iyó, tari chinó iñi tucu maa ra ihya.

¹⁶ Ta yucuan chaha tyicuan ri nduquí cuhva cha cachi coí nuu Nyoo, ta nuu ñáyivi ñandihi.

¹⁷ Cuaha cuiya chica noj inga ityi. Yaha cuan ta cuanuhí nya Jerusalén ñui vatyí nacuhva cuende xuhun chi ñu ndahvi ñu yihí cuenda Nyoo, ta vatyí cuhve noo cha cuhve chi Nyoo.

¹⁸ Yuhu tyicuan caa sacuví chichi vehe ñuhu cahnu, ta suhva ra Israel ityi Asia, nyehe ra chii yucuan cha yaha cha sandundi chii nuu Nyoo cuhva catyí maa nu ley ndi. Soco ña cuaha ñáyivi nyicu, ta ni ña naquiqui ñu.

¹⁹ Ican ra cha nyehe chii cuan, cuñí chi cha quichi ra ta cuhva ra cuenda tatu iyó cha sacuví.

²⁰ O ñacatyí maa ra cha canyicu ihya tatu nañihí ra cuatyí yuhu quivi cutuñi chii nuu ra nu chiyo junta ra cacuví nuu chi ñu Israel.

²¹ O vasi cuví chi cha cuenda noo ri tuhun cahin chihin nuu ra nyicú junta cuan tyehe caa: “Nyoho nducú ndo cuatyí chahi cha cuenda tyi chinó iñi cha nandotó ñáyivi chihí” —catyí ra Pablo.

²² Ta ra Félix chitó vaha ra yoso caa cuahan tuhun ñu nyicón chi ra Cristo. Ta catyí ra chi ra canyicu cuan:

—Vaha ri vityin. Na quichi xihna comandante Lisias. Tyicuan ta cusandai tuhun ndo —catyí ra.

²³ Tyicuan ta tachí ra Félix chi capitán na cunatyihí ra chi ra Pablo vehe caa. Soco ma ñihi xaan saha cumi ra chí ra. Ta na cuhva ra cuhun ra tahan ra nu ñohó ra, ta cahan ra chihin ra.

²⁴ Yaha suhva quivi ta nachaa ra Félix inga chaha chihin cu Drusila ñasihi ra. Ta cuví ña ñaha Israel. Ta tachí ra na quichi ra Pablo vatyí cuñí ñu tyasoho ñu yoso caa tuhun cha chinó iñi ra chí ra Jesucristo.

²⁵ Ta ra Pablo cahán ra tuhun yoso caa tahán chi sacuvi yo cha vaha, yoso caa cunyaca ñaha maa yo chí yo ta ma sacuvi yo cha quiñi caa. Ta cahán tucu

ra yoso caa cucutuñi chi yo nuu Nyoo quivi tahan chi. Ta ra Félix yuhvi xaan ra cuvi, ta catyí ra chi ra:

—Cuahan vityin. Ta na nanuña xihne, ta cana mai chuun inga chaha —catyí ra chi ra.

²⁶ Ta ra Félix cuñi maa ra tyi ra Pablo cucuhva ra xuhun chi ra, tacuhva vatyí numi ri saña ra chi ra. Yucuan chaha vatyí tyito tyito ri cana ra chi ra, vatyí ndatuhun ra chihin ra.

²⁷ Uvi cuiya yaha, tyicuan ta nicunyaa ra Porcio Festo cuví ra gobernador tyiño nuu ra Felix. Ta ra Felix cuñi ra cuvaha ra nuu ra Israel ta sandoo ra chi ra Pablo vehe caa.

25

Nu cutuñi chi ra Pablo nuu ra Festo

¹ Tyicuan ta cha cu uñi quivi cha cuví ra Festo tyiño, quitá ra ñuu Cesarea cuan ta cuahan ra nya ñuu Jerusalén.

² Chaa ra Jerusalén, tyicuan ta chaa coyo ra cuví nuu chi tata sutu ta ra cuví tyiño ñu Israel ta cachican ra cuatyí chaha ra Pablo.

³ Ta chican ra noo tumañi iñi cahnu chi ra Festo. Cuñi ra vatyí tachi ra Festo tyiño na quichi nyaca sindaro chi ra Pablo nya Jerusalén. Vatyí maa ra cuñi ra cahñi ra chi ra ityí vachi ri ra.

⁴ Soco ra Festo nacahan ra, ta catyí ra:

—Ra Pablo ñohó ra vehe caa nya Cesarea. Ta yuhu tyai cuvha cha cunuhi yucuan cha numi ri.

⁵ Yucuan chaha, nyoho cha cuví ndo tyiño ñuu ihya, cahun maa ndo chihin. Tyicuan ta cuvi cacan ndo cuatyí chaha ra tatu iyó cha sacuví ra —catyí ra Festo chi ra.

⁶ Uña o uchi ri quivi chi nyaa ra Festo Jerusalén, ta cuanuhu ra Cesarea. Ta cha inga quivi chaa ra chichi vehe tyiño ra vatyí cutuñi chi ra ca iyó cuatyí nuu ra. Tyicuan ta cana ra chi ra Pablo.

⁷ Cuhva cha quihvi ra Pablo, catuhva ra Israel cha quichi coyo nya Jerusalén, ta quichaha catyaa ra cuatyí cahnu siqui ra. Soco ñahri maa cha ndaa catava ra.

⁸ Tyicuan ta cahan ra Pablo ta catyí ra:

—Yuhu ni noo cuatyí ta sacuví que, ni siqui ley ñu Israel, ni siqui vehe ñuhu cahnu Jerusalén, ni siqui rey cahnu Roma —catyí ra.

⁹ Soco vatyí cuñi ra Festo ndoo vaha ra chihin ra Israel, ndacá tuhun ra chi ra Pablo:

—¿Atu cuñún cahun Jerusalén vatyí sandai tyiñon nyicuan? —catyí ra chi ra.

¹⁰ Ta ra Pablo catyí ra:

—Cha nyaí nu maun. Ta maun cuví ra cuví tyiño cuenda rey cahnu Roma. Ihya cuví nu tahan chi cutuñi chií, vatyí ra cuenda ñuu Roma cuví. Ta chitó vahun tyi ñahri maa sacuví chi ñu Israel.

¹¹ Tatu sacuví noo cuatyí cahnu cha tahan chi cahñi ndo chií, ma nduqui cuvha caqui. Soco tatu ña ndicha tuhun cha cahan ra Israel ihya, yori cha iyó ityí chií cha cuvha cuenda chií chi ra cuñi cahñi chií. Chiquén vatyí cuhin nuu rey cahnu vatyí cutuñi chií nuu maa ra —catyí ra Pablo chi ra Festo.

¹² Tyicuan ta ra Festo cha yaha cha cahan tahan ra chihin ra tyinyeé chi ra chihin tyiño, ta catyí ra chi ra Pablo:

—Chicón cha cutuñi chuun nuu rey cahnu. Vaha. Cua cahun nuu maa ra —catyí ra chi ra.

Nu nacatyí ra Festo tuhun ra Pablo chi ra Agripa

¹³ Yahā suhva quiví, tyicuan ta chaā rey Agripa chihin cu Berenice nya Cesarea, vatyí cuacuhva ñu nocumi chí ra Festo.

¹⁴ Quita suhva quiví chinyicu ñu yucuan, ta nacatyí ra Festo tuhun ra Pablo chi rey. Ta catyí ra:

—Iyó noo rayíi ihya cha sandoo ra Félix vehe caa.

¹⁵ Ta cha chahin Jerusalén, ra cuví nuu chi tata sutu, ta ra cacuví mandoñi ñu Israel chahā cuenda ra noo tutu cuatyí ra, ta chicán ñu na cúvi ra.

¹⁶ Ta catyí yuhu chí tandihí ra vatyí ña tuhvá ra cuví tyiño cuenda Roma chahñi chí noo ñáyivi tatu ta cahan tahan ca ñu ta nducu ñu cuhva sacacu ñu chí ñu.

¹⁷ Yucuan chaha, quiví quichi coyo ra cacuví nuu chí ñu Israel cuan, ña sacunaj cuhva. Ta cha inga quiví chahin vehe tyiño vatyí cutuñi chí ra cha cacahán ra tuhun. Ta tachí tyiño na quichi ra cuan.

¹⁸ Soco ra catyaá cuatyí siqui ra, ña cuaha maa tuhun cacahan ra. Ta cuñí maa yuhu vatyí cahnu cuatyí cuatyaa ra siqui ra.

¹⁹ Cuñí ra cuan cuatyí chihin ra cha cuenda tuhun costumbre, cuhva chinó ñi ñu Israel. Cahán ra tuhun noo ra cha nañi Jesús cha chihí. Ta ra Pablo catyí ra vatyí iyó ra.

²⁰ Ta ña chité yoso caa sacuvi chihin tuhun cha tyicuan caa, ta ndaca tuhun chí ra Pablo tatu cuñí ra cuhun ra Jerusalén, vatyí cutuñí chí ra cuenda tuhun ihya.

²¹ Soco maa ra chicán ra cha cutuñi chí ra nuu rey cahnu Augusto nya Roma. Yucuan chaha ñohó ca ra vehe caa nyacua nya cuví tachi chí ra nuu ra Augusto —catyí ra Festo chí rey Agripa.

²² Tyicuan ta ra Agripa catyí ra chí ra Festo:

—Cuñí tucu yuhu cuiñi cha cahán ra cuan —catyí ra.

Ta ra Festo catyí ra chí ra:

—Tyaan cuiñun cha cahán ra —catyí ra chí ra.

²³ Tuví inga quiví ta chaā ra Agripa chihin cu Berenice. Iyo xaan caa ñu quihví coyo ñu chichi vehe vatyí rey cuví ñu. Quihví tucu comandante ta ra cacuví tyiño ñuu cuan. Tyicuan ta ra Festo catyí ra na quichi ra Pablo.

²⁴ Tyicuan ta quichaha catyí ra Festo:

—Yoho Rey Agripa, ta nyoho tata, cha nyicu ndo ihya. Nyēhe ndo chí ra ihya. Tandihí ñu Israel ñuu Jerusalén ta ñu Cesarea cahan ñu siqui ra. Ta ña sandihí ñu cha catyí ñu chii vatyí tahán chí cúvi ra.

²⁵ Soco cha cuenda yuhu ñahri cuatyí ra cha tahán chí cúvi ra. Ta suri maa ra chicán cha cutuñi chí ra nuu ra Augusto. Yucuan chaha cutachi chí ra.

²⁶ Soco vatyí ñahri cuatyí ra ñihí, yucuan chaha ña ñihí tuhun tyai nu tutu cha cusacuhin chí ra nyacá ñaha chí yo. Yucuan chaha canē chí ra Pablo nuu ndo, ta nuu yoho Rey Agripa, tacuhva tyi ndaca tuhun chí ra ta cote ñáá cha tahán chí sacote chí rey cahnu.

²⁷ Vatyí ña vaha cha sacuhin chí ra tatu ñahri tuhun cahín ñáá cuatyí ra.

26

Nu quichaha cahán ra Pablo nuu rey Agripa

¹ Tyicuan ta ra Agripa catyí ra chí ra Pablo:

—Cuví cahun vityin —catyí ra chí ra.

Ta ra Pablo sandaā ra ndaha ra ta catyí ra tyēhe caa:

2 —Sii xaan cuñi vatyí cuví cahin nuu yoho, rey Agripa, ta cuví catyí mai chuun yoso caa tandihí cuatyí cha tyaá ra Israel siqui.

3 Vatyí, yoho chitón tandihí costumbre cha iyó chi yo ñu Israel. Ta chitón tuhun tuhva yo cuvi yuhu. Yucuan chaha chiquén chuun nacuíñi vahun cha cahín.

Nu catyí ra Pablo chi ra Agripa yoso caa ñáyiví ra cha ni cumañi ca quihví ra cuenda ra Cristo

4 "Tandihí ñu Israel chitó ñu yoso caa chiye nyata ni luhli nya ñui. Ta chitó ñu cuhva chiye nya Jerusalén.

5 Ta suri chitó ñu vatyí nyata luhli cuví noo fariseo. Ta ra fariseo vaha xaan caquichahá ra costumbre yo. Ta na catyí maa ñu tatu ña ndicha cha cahín.

6 Ta vityin nanyaí ihya ta cutuñi chii cha cuenda vatyí chinó iñi cha sanandotó Nyoo chi ñáyiví chihí, tari cuhva catyí ra chi sutu chahnu yo ta cha naha.

7 Ndi uchi uvi tahan ityi ñáyiví Israel ñu vachi tata sutu chahnu yo nyatú tucu ñu nyehe ñu tyi ndicha cusanandoto Nyoo chi ñáyiví chihí. Ta yucuan chaha nyita ri sacuví ñu tyiño nuu Nyoo sacahnu ñu chi ra ñicahñu ta cha cuaa. Vatyí suri cha cuenda tuhun ihya tyaá ra Israel cuatyí siqui vityin, yoho rey Agripa.

8 ¿O ña chinó iñi nyoho vatyí Nyoo sanandotó ra chi ñu chihí?

9 "Ta quiví cuan suri mai chicá xiñi vatyí vaha cha tachi tuñi chi ñáyiví chinó iñi chi ra Jesús ra ñuu Nazaret.

10 Ta tyicuan caa chinyacuví nya Jerusalén chihin ndusu yuhu ra cacuví nuu chi tata sutu. Ta cuaha ñu cha chinó iñi chi ra Cristo tyihí vehe caa. Ta tatu cachahñi ra chi ñu, vaha xaan cuñi.

11 Cuaha chaha sanyehí tindoho chi ñu ta sahí fuerza chi ñu nacahan ña vaha ñu siqui ra Jesús. Tyehe caa chinyacuví tandihí ri vehe ñuhu ñu Israel. Ta xaan xaan cuñi nyehi chi ñu. Ta chicá nyiquen chi ñu nyacua nya inga ñuu.

Nu nacatyí tucu ra Pablo yoso caa nanduví ra, ra cuenda ra Cristo
(Hch. 9.1-19; 22.6-16)

12 "Ta yucuan chaha cuahin quiví cuan nya ñuu Damasco chihin ndusu yuhu ra cuví nuu chi tata sutu.

13 Soco yoho Rey, ityi cuahin ñáá cuhva ora, nyehí noo nduva ñuhu quichí andiví, ñihí ca ican saha ñuhu ñanyii. Sandundichin chi nicachico nu cuahin ta ra cuahan coyo chihin.

14 Tyicuan ta tandihí ndi nduva ndi nu ñuhú. Ta chiñi noo ndusu cha cahán chihin, chihin sahan yo hebreo, ta catyí chi chii: "Saulo, Saulo, ¿ñáá tuhun cha chicá nyicon chii? Tari noo quiti chañi nyaa ti chata cha xaan cha saquehén ityi ra chi ti, tyicuan caa cuñún sañicuehun suri chi maun", catyí ndusu cuan chii.

15 Tyicuan ta catyí yuhu: "¿Yóo yoho tata?" Ta Sutu Mañi yo catyí ra chii: "Yuhu cuví ra Jesús, ra cha chicá nyicon chi.

16 Ndicuita ta cunjanyaun, vatyí yuhu tuví nuun tacuhva vatyí cuasacuvun tyiño nui, vatyí cuacuvun cha ndaa cha nyehun vityin. Ta cucuvun cha ndaa cha nyehun chii nu cuahan ca chi.

17 Cusacaqui chuun ndaha ra Israel, ta ndaha ra cha ñima ra Israel cuví. Nu nyicú ñu tachi chuun vityin.

18 Vatyí na nuñon nuu ñu, ta sañahun chi ñu cha ndicha, ta ma sacuví ca ñu cha ña vaha. Soco sacuví ñu cha vaha nu ndichin Nyoo vatyí quitá ñu chichi ndaha ra ña vaha ta ndihví ñu ndaha Nyoo tacuhva vatyí tyicuan caa cusahi

tícahnu iñi cuatyí ñu ta cunaquehen ñu cha vaha cha chahá Nyoo chi ñáyivi yihí cuenda ra”, catyí Sutu Mañi yo chii.

¹⁹ Yucuan chaha rey Agripa, sacuví cha catyí Sutu Mañi yo ra Jesucristo chii nu sañaha ra chi ra chii.

²⁰ Ta cahín tuhun ra xihna ca chihin ñu nyicu ñuu Damasco. Yaha cuan ta cahín chihin ñu ñuu Jerusalén ta tandihí ityi Judea. Ta cahín chihin ñu cha ñima ñu Israel cuví ñandihí. Sacote chi ñu nandu uvi iñi ñu cuatyí ñu, ta nandihvi ñu chichi ndaha Nyoo cha ndicha cuii. Na nasama ñu cuhva iyó ñu chihin cha sacuví ñu cha vaha.

²¹ Cha cuenda ihya catiñ ra Israel chii chichi vehe ñuhu cahnu. Ta cacuñi ra cahñi ra chii.

²² Soco maa Nyoo tyinyeé chii. Ta iyó que nya vityin. Ta cahín tuhun Nyoo chihin tandihí ñáyivi, ñu ndahvi ta ñu tyayii. Ta ña cahín inga tuhun cha ña catyí ra Moisés ta ra profeta, vatyí cucuvi nu cuahan ca chi.

²³ Vatyí catyí ra vatyí tahán chi cha cunyehe ra Cristo tindoho. Ta cha yaha cha cúvi ra, cunandoto ra. Ta ican ra cuví ra cunandoto xihna ca. Ta cusacata ra tari noo ñuhu ityi cuahan ñáyivi vatyí sacotó ra yoso caa cacu añima ñu, ñu Israel ta ñu cha ñima ñu Israel cuví —catyí ra Pablo.

Ra Pablo cuñi ra cha nachino iñi rey Agripa ta cunyicon ra chi ra Cristo

²⁴ Cuhva cha catyí ra Pablo tuhun ihya, ra Festo canachaa ra, ta catyí ra: —¡Loco yoho Pablo! cha cuenda cha cuaha xaan sacuahún ta ndulocon —catyí ra Festo chi ra.

²⁵ Soco ra Pablo catyí ra chi ra:

—Ña loco yuhu, yoho tata Festo. Soco cha cahín, maa maa ri tuhun ndicha cuví.

²⁶ Ihya nyaá rey Agripa. Ta chitó vaha ra tuhun ihya. Yucuan chaha cahín chihin cha ña cahán nui. Vatyí chité tyi chitó tucu maa ra tuhun ihya, vatyí ñima tuhun xehe cuví.

²⁷ Yoho rey Agripa, ¿atu chinó iñun tuhun cha catyaa ra profeta cuenda Nyoo ta cha naha? Yuhu chité vatyí chinó iñun —catyí ra Pablo chi ra Agripa.

²⁸ Tyicuan ta ra Agripa catyí ra chi ra:

—Suhva cuii ri ca ta nachino iñi tuhun cahun ta quihvi cuenda ra Jesús —catyí rey Agripa chi ra Pablo.

²⁹ Tyicuan ta ra Pablo catyí ra:

—Cuví ri suhva, o cuví ri cuaha soco chi Nyoo chiquén vatyí na nduvi ndihun ñáyivi cuenda ra Jesús tari mai. Ta ñima yoho ri, soco tandihí ri ñáyivi, ñu chiñi tuhun cahín. Noo ri cha ña cuñi, cha quihí cadena ndaha ndo tari mai vityin —catyí ra Pablo.

³⁰ Cha yaha cha catyí ra Pablo tuhun ihya, ndicuita rey ta gobernador ta cu Berenice, ta tandihí ra canyicú yucuan.

³¹ Ta cha yaha quita coyo ñu, ta cacatyí ñu chi tahan ñu:

—Ñahri cuatyí ra ihya cha ñihi xaan. Ña tahán chi cúvi ra. Ta ni ña tahán chi cohon ra vehe caa —catyí ñu.

³² Ta ra Agripa catyí ra chi ra Festo:

—Cuví saña yo chi ra, tyehe ta ñima maa ra chicán cha cutuñi chi ra nuu ra cuví rey cahnu —catyí ra.

¹ Quiví cha catyaá ra Festo ta ra Agripa cuhva tyi tachí ra chi ndi nya ñuu Roma ityi Italia, nacuhva cuenda ra chi ra Pablo ta suhva ca ra chi noo capitán cha nañi Julio. Yihí ra noo batallón sindaro, cha nañi Cuenda Ra Augusto.

² Ta cuahan tucu ra Aristarco chihin ndi ñandihi. Ra ñuu Tesalónica cha nyaá ityi Macedonia cuví ra. Tyicuan ta quihví ndi chichi noo barcu cha quichi ityi ñuu Adramitio ta cuhun chí ñuu cha nyicú yuhu tyañuhu ityi Asia.

³ Cha inga quiví chaá ndi puerto Sidón. Ta ra Julio vaha ñáyiví cuví ra chihin ra Pablo. Ta chahá ra cha cunyehe ra chi ra tahan ra ñuu cuan.

⁴ Yahaá cuan ta quitá ndi Sidón ta casandaá ra sahma barcu cuan ta chihin fuerza tatyí ri cuahan ndi. Ta vatyi caa tatyí siqui ndi yahaá ndi chiyo xehe ca ñuhú Chipre. Vatyi ña ñihi xaan caa tatyí chiyo cuan.

⁵ Yahaá sava ndi tyañuhu ityi nuu Cilicia ta Panfilia, ta chaá ndi noo ñuu cha nañi Míra ityi Licia. Ta noo ndi barcu cuan.

⁶ Yucuan nañihí capitán cuenda sindaro nonga barcu cha quichi nya ñuu Alejandría ta cuahan chí Italia. Ta catyí capitán na quihví ndi barcu cuan vatyi cuhun ca ndi nu cuahan ndi.

⁷ Cuaha quiví chicaá ndi cuee ri. Ta chihin cha cuaha tindocho ta chaá ndi yatyin ri ñuu Gnido. Ta cha cuenda cha ñihi xaan caá tatyí, ña chahá chí cha cuhun ndi ityi nuu, ta yahaá ndi yatyin ri ñuu Salmón. Ta nacuico ndi ityi yuhu ñuhú Creta.

⁸ Nducú ndi cuhva cha cuhun ndi yuhu tyañuhu cuan ta chaá ndi nu nañi Buenos Puertos yatyin ri ñuu Lasea.

⁹ Cha cuaha xaan quiví yahaá ta cha yíca xaan nanduví cha caca noo ndi ityi nu tyañuhu. Vatyi cha yahaá quiví vico ayuno nu ña chachi ñu Israel. Ta cha cuyatyin yoo vichin. Yucuan chaha ra Pablo chahá ra tuhun chí ra sacaca barcu cuan,

¹⁰ ta catyí ra:

—Nyoho ra canyicú ihya, cuiñi ndo tuhun cahín. Nyeihí vatyi yíca xaan cuhva cuahan yo. Ta tuví iñi vatyi cuaha xaan cusacunaa yo. Cunaa barcu ta cha nyisó chí ta nyacua nya maa yo ñandihi. Vaha taxin ca nandoo yo ihya —catyí ra chi ra.

¹¹ Soco capitán cuenda sindaro cuan quichahá ca ra chí ra sacacá barcu chihin chitoho barcu ta ñima ca chí ra Pablo.

¹² Ña cuví yaha ndi yoo vichin yucuan tyi ñihi xaan tuhvá caa tatyí, ta yíca xaan cuenda barcu. Yucuan chaha tandihí ra ta catyí ra:

—Vaha ca cha quita yo ihya ta nducu yo cuhva chaá yo nya ñuu Fenice suri ñuhú Creta ihya. Yucuan cuví noo nu vaha cunyaa barcu vatyi nyaa ñuu cuan chiyo caña ñanyii —catyí ra.

Nu ñihi xaan caá tatyí nu tyañuhu

¹³ Tyicuan ta quichahá caa chiin tatyí cha quichi ityi sur. Ta cuñí maa ra vatyi vaha xaan vatyi ñima tatyí ñihi cuví, ta cuví cuhun ra chihin barcu ra nicañi ri yuhu tyañuhu ñuhú Creta cuan.

¹⁴ Ña cuaha ri chicá ra ta quichahá caa noo tatyí xaan cha quichí ityi norte. Ta tyandahá chí barcu inga ityi.

¹⁵ Ta ña cuví ca cuhun ndi ityi nuu ca cha cuenda tatyí cuan. Ta saña ndaha ndi nacuhun maa barcu chihin tatyí nya ityi cuñí maa chí.

¹⁶ Ta tyandahá tatyí chí ndi ityi chiyo satyin noo ñuhú luhlu cha nañi Clauda. Ta chihin cha y# xaan naquehen ndi lancha luhlu cha xitá quiñoho barcu, ta natyihí ndi ityi chichi barcu coto nyee chí.

17 Ta cha yahā natyihī ra lancha cuan, yucuan ta chahñī vaha ra yoho nicachico barcu vatyī coo fuerza chi. Ta yuhví ra coto tahan ra nu yaxin ndutya ta quihví barcu cuan chichi ñiti vita iyó yuhu tyañuhu nu nañi chi Sirte, yucuan chaha sanoō ra sahma barcu ta chahā ra cha cuhun barcu yoso cuhva tyandahá tatyī.

18 Ta cha inga quivi suri ñihi xaan caá tatyī. Yucuan chaha quichaha catuchi ra carga nu tyañuhu.

19 Ta cha cu uñi quivi quehen ndi ndaha tyiño barcu ta tyihī ndi nu tyañuhu.

20 Ta cuaha quivi ña nyehe ndi ni ñanyii ta ni tiño. Ta ñihi tatyī nañi chi ndi. Yucuan chaha ña tyaq ca ndi cuhva cha cacu ndi.

21 Cuaha quivi yahā ta ña chachí ndi. Tyicuan ta catyí ra Pablo chi tandihī ra:

—Nyehe ndo, vaha ca tyehe ta quichaha ndo chii quivi cuan, ta ndoo taxin yo Creta cuan. Ta vityin nyehé xaan yo tindoho ihya ta cuaha ndaha tyiño sacunaá yo.

22 Soco vityin ma caca xaan iñi ndo vatyī ni noo yo ta ma cúvi yo. Barcu ihya cuvī cha cunaa.

23 Vatyī Nyoo nyacá ñaha ra chii, ta sacuvī tyiño nuu ra, sanyehe ra noo visión chii cuñi. Ta tuvī noo ángel nui.

24 Ta catyí ángel cuan chii: “Ma yuhvun, Pablo. Vatyī cuñi chi cha cahun tuhun Nyoo nuu rey cahnú Augusto nya Roma. Ta cha cuendon cusacacu Nyoo tandihī ra canyicu chuhun chichi barcu”, catyí ángel cuan chii.

25 Yucuan chaha nyoho cha ñohó ndo chichi barcu, sanñi ndo iñi ndo. Vatyī yuhu chinó iñi chi Nyoo. Ta chitó vahi vatyī cuvī tari cuhva catyí ángel cuan chii.

26 Vasi cuanyee barcu soco cuachaa yo noo ñuhú luhlu —catyí ra Pablo chi tandihī ndi.

27 Noo cha cuaa quivi ndihī chahun quivi chica ityi ndi nu tyañuhu, ñohó ndi nu tyañuhu Adria. Ta chata cuan chata ihya tyandahá tatyī chi barcu ndi nu tyañuhu. Ta vasi ora ñuu cuvī cuhva cuan ta tuvī iñi ra sacacá barcu cuan tyi cuachaa ndi noo ñuhú.

28 Tyicuan ta tyicuhvā ra cha cono ndutya. Ta nyehe ra tyi oco chahun iñi tahan metro iyó. Cuahan ndi chiin ca ityi nuu ca. Ta tyicuhvā tucu ra inga chaha. Ta iyó oco ucha metro.

29 Ta cayuhví ra coto nañi barcu cuan chata yuu. Yucuan chaha casanoō ra cumi tahan caa vee cha nyaa gancho nuu, ityi chata barcu. Ta ña iñi ca ra cha cundichin.

30 Ta ra sacacá barcu cuan catyaq ra cuhva cacono xehe ra. Ta yucuan chaha quichaha casanoó ra lancha cuan nu ndutya ityi nuu barcu cuan. Ta sahá ri maa ra tyi inga caa casanoó ra.

31 Soco ra Pablo sacoto ra chi capitán ta chi sindaro ta catyí ra:

—Tatu ma ndoo ra cuan chichi barcu. Nyoho ma cuvī cacu ndo —catyí ra chi ra.

32 Tyicuan ta sindaro cachahnyā ra yoho lancha. Ta casanacavā ra nu ndutya.

33 Ta cha ñaa ca cuan ra Pablo catyí ra chi tandihī ra:

—Cha iyó uchi cumi quivi cha ta cachi ca yo.

34 Catyí chi ndo, na cachi yo vityin. Niñi xaan cuñi chi cha cachi yo ta ndunye coño ñuhu yo. Vatyī cucacu yo ta ni noo ixi xiñi yo ta ma cunaa.

³⁵ Ta cha catyí ra tuhun ihya, ra Pablo quehen ra noo pan ta nacuhva ra tyahví nyoo chí Nyoo nuu tandihí ra. Tyicuan ta tahví ra ta quichaha chachi ra.

³⁶ Tyicuan ta tandihí ca ra canduní ca iñi ra ta cachachí ra ñandihí.

³⁷ Ta cha tandihí ndí cha ñohó ndí chichí barcu cuan, quita uvi ciento uñi xico chahun ín tahan ñáyivi.

³⁸ Cuhva cha ndihí ca chachí ra ta tuchí ra yitín cha yihí trigu nu tyañuhu na nduñahma ca barcu.

Nu nyeé barcu

³⁹ Yahá cuan ta cundichin. Ta canyehe ra cha sacacá barcu noo ñuhú, soco ña canicohon nuu ra nya cuví cuan. Nyehe ra noo nu iyó ñiti. Ta catyaa ra cuhva nyehe ra tatu cuví sacuhun ra barcu yucuan.

⁴⁰ Cachahnya ra yoho cha nuhñí caa vee cuan. Ta sandoo ra chichí tyañuhu. Ta casandutaya ra vitu cha sanacuico barcu. Tyicuan ta casandaq ra sahma cha tuhvá chitacaá ityi nuu barcu. Ta quichaha quehen tatyí sahma cuan, ta sacuhún chí barcu nya nu iyó ñiti cuan.

⁴¹ Ta chaá barcu cuan noo nu nañi tahan ndutya. Ta nyee xiñi chí chichí ñiti. Ta ña cuví ca natava ra. Ta suhva ca cha ña quihví chichí ñiti, ñihi xaan cañi tyañuhu chí chí, nyacua tahví cuatyí chí.

⁴² Tyicuan ta sindaro cacuñí ra cahñi ra chí ndí cuii maa ra cuahan cuacutuñi chí nuu ra cuví rey cahnu, coto cacono ra.

⁴³ Soco capitán sindaro cuñí ra sacacu ra chí ra Pablo. Yucuan chaha ña chahá ra cahñi ra chí ra, soco catyí ra vatyi nya ra cachitó sutya, na cuhun cuee ra nu ndutya ta quita ra nya ñuhú ityi.

⁴⁴ Ta tandihí ca ra cha ña cacuví sutya, na quehen ra vitu cha nyisó barcu, ta suhva ra chihin yiquín vitu barcu cha tahví tyañuhu. Ta tyicuan caa cacacu tandihí ndí ta quita ndí ñuhú ityi.

28

Nu ñohó ra Pablo ñuhú Malta

¹ Cuhva cha cha yahá cacu ndí ta catyí ñáyivi iyó ñuhú cuan vatyi nu nyaá ndí nañi chí Malta, o Melita.

² Ta vaha xaan tyiñuhú ñu chí ndí. Ta sanatahan ñu ñuhú vatyi coón savi ta vichin xaan. Ta catyí ñu chí tandihí ndí, natuhva ndí yuhu ñuhú cuan natava ndí cha vichin ndí.

³ Tyicuan ta ra Pablo naquehen ra suhva nducu tyihí ra nu ñuhú. Ta noo coo quita chichí nducu cuan, cha cuenda cha ihñi. Ta chachí yihí ti ndaha ra Pablo ta ndoo ti tacaá ti ndaha ra.

⁴ Cuhva cha canyehe ñáyivi ñuhú cuan tyi tacaá coo cuan ndaha ra, quichaha catyí ñu chí tahan ñu:

—Ra ihya vasi noo ra chahñi ñáyivi cuví ra, vatyi vasi cacu ra nu tyañuhu soco ña chahá Nyoo cha coo ca ra cha cuenda cuatyí ra —catyí ñu.

⁵ Soco ra Pablo naquisí ra chí coo cuan, ta canacava ti nu ñuhú, ta ñahri cuví chí ra.

⁶ Tandihí ñu nyatú ñu ñáá cuhva ndaa nu tyaá ti, o ñáá cuhva cúvi ra. Soco cha yahá nyatu xaan ñu, ta nyehe ñu vatyi ñahri maa cuví chí ra. Tyicuan ta nasama ñu cuhva chicá xiñi ñu, ta quichaha catyí ñu:

—Mínoo nyoo cuví ra —catyí ñu.

⁷ Yatyin ri cuan nyaá ñuhú ra cha cuví nuu ñuhú cuan. Publio nañí ra. Ta vaha xaan cahān ra chihin ndi. Ta tyiñuhū xaan ra chi ndi, ndoo ndi vehe ra uñi quiví.

⁸ Ta cuhví xaan sutu ra chihin cahñi ta cha chiyó ra. Ta ra Pablo chahan ra chinyehē ra nu catuví ra. Ta chicān tahvi ra chaha ra. Ta tyiso ra ndaha ra siqui ra ta nduvaha ra.

⁹ Yahā cuan ta quichaha caquichí tucu inga ñu cuhví cha iyó ñuu cuan. Ta nduvahā tucu ñu.

¹⁰ Ta tandihí ñu tyiñuhū xaan ñu chi ndi. Ta quiví quihví ndi chichi barcu cha cuacuhun ndi, chahā ñu tandihí cha cuchíñuhu chí ndi ityi cahun ndi.

Nu chaq ra Pablo ñuu Roma

¹¹ Uñi yoo ñohō ndi Malta cuan. Tyicuan ta ñihí ndi noo barcu cha quichi nya ñuu Alejandría ityi Egipto. Ta ndoo chi Malta nya yahā yoo vichin. Ta nyaā noo cha natava ñu, noo xiñahñu nyoo Cástor ta nyoo Pólux, xiñi chí. Quihví ndi barcu cuan ta cuahan ndi.

¹² Ta chaq ndi ñuu Siracusa. Ta yucuan ndoo ndi uñi quiví.

¹³ Ta yucuan ta quitā ndi ta cuahan ndi ityi yuhu tyañuhu nyacua nya chaq ndi ñuu Regio. Ta cha inga quiví cuan caa xaan tatyí cha quichi ityi sur ta chicā ndi uvi quiví ta chaq ndi ñuu Puteoli.

¹⁴ Yucuan ñihí tahan ndi chihin suhva ra hermano. Ta catyí ra chí ndi cha ndoo ndi noo vitya chihin ra. Yahā cuan ta quitā ndi ta cuahan ndi nya ñuu Roma.

¹⁵ Ta ñu yihí cuenda Nyoo ñuu Roma cuan ñihí ñu tuhun tyi cua cha ndi. Ta chahan coyo ñu chisatahan ñu chí ndi ityi. Suhva ñu nyatú ñu chí ndi Nuyahví Apio. Ta inga ñu ñihí tahan ñu chihin ndi nya nu nañi Tres Tabernas. Ta cha nanyehē ra Pablo chí ñu, nacuhvā ra tyahví nyoo chí Nyoo. Ta ndunii ca iñi ra.

¹⁶ Cuhva cha chaq ndi Roma cuan, capitán cuan nacuhvā cuenda ra chí ra ca iyó cuatyí cuan chí noo ra cuví nuu chí ra sahá cumi vehe caa. Ta chahā ra cuan cha coo siin ra Pablo. Ta noo ri sindaro sahá cumi chí ra.

Nu cahán ra Pablo tuhun Nyoo ñuu Roma

¹⁷ Uñi quiví cha yahā chaq ndi yucuan. Tyicuan ta tachí ra Pablo tyiño naquichí coyo ra cacuví nuu cuenda ñayiví Israel cha iyó ñuu Roma cuan. Ta cuhva cha ndu in ri ra, quichaha catyí ra chí ra:

—Nyoho yañi, vasi ñahri sacuví chí ñu Israel tahan yo, ta ni ñahri sacuví siqui costumbre sutu chahnu yo, soco chahā cuenda ra Israel chí chí ra ñuu Roma. Ta ñohí vehe caa Jerusalén ndaha ra ñuu Roma.

¹⁸ Ta cha cutuñí chí, ta cuñí ra nyacá ñaha casaña ra chí. Vatyí ñahri cuatyí cha cahnu cha tahán chí cuví.

¹⁹ Soco cha cuenda cha nduxaán xaan ra Israel siqui, chicān taxin cha cutuñí chí nuu maa rey cahnu. Vasi ñahri cuatyí cuacaquen siqui ñu ñui nuu ra.

²⁰ Yucuan chaha canē chí nyoho vatyí cohon nui chí ndo, ta sacoté chí ndo vatyí nuhñí yuhu chihin cadena vityin cha cuenda cha yihí iñi yo, ñu Israel, chí Nyoo —catyí ra Pablo.

²¹ Tyicuan ta catyí ra Israel chí ra Pablo:

—Ña chitó maa ndi tuhun yoho. Ta yori casacoto chí ndi, ni chihin carta, ta ni ta yori ca quichí ityi Judea sacoto cha caun, o cahān ña vaha ñu sicun.

²² Soco cuñí ndi cuiñi ndi tuhun chicá xiñi yoho. Vatyí chitó ndi vatyí tandihí ri ityi cahán ña vaha ñáyivi siqui tuhun chaa ihya —catyí ra Israel chí ra Pablo.

²³ Tyicuan ta catyihí tahan ra tuhun nya quivi quichi coyo ra inga chaha. Ta cha chaá quivi cuan, chaá coyo cuaha ñáyivi nu iyó ra Pablo. Ta nya ñaha ri ta nya cha cuaa cahán ra Pablo tuhun yoso caa nyacá ñaha Nyoo añima yo. Ta chihin ley ra Moisés ta tuhun cha catyaa ra profeta Nyoo ta cha naha, sañahá ra chí ñu vatyí ra Jesús cuví ra cha sacacú chi yo, vatyí cuñi ra tyi nachino iñi ñu chí ra.

²⁴ Yihí ñu chinó iñi ñu cha catyí ra Pablo. Ta inga ñu ña chinó iñi ñu.

²⁵ Ta vatyí ña ñin ri chino iñi ñu ta ñin ñin tuhun cahán ñu, ta quichaha cuahan coyo ñu. Ta ra Pablo catyí ra chí ñu:

—Ndicha xaan cha catyí Tatyí li chí sutu chahnu yo chihin yuhu ra profeta Isaías ta cha naha. Vatyí catyí ra tyehe caa:

²⁶ Cuahan ta catyí chí ñáyivi ihya tyehe caa:

Nyoho cucuñi ndo tuhun Nyoo.

Soco ma cutuñi iñi ndo.

Ta cunyehe ndo chihin chíti nuu ndo cha sacuví Nyoo.

Ta ma tuvi iñi ndo.

Tyicuan caa catyí chí ñu.

²⁷ Vatyí añima ñu cha ndundava xaan.

Ta chíñi ri maa ñu tuhun Nyoo.

Ta natahán chíti nuu ñu,

tacuhva cha ma cuví nyehe ñu.

Ta nicunyasí soho ñu.

Yucuan chaha ña chíñi ñu, ta ndundava añima ñu.

Yucuan chaha ña cuñi ñu quihvi ñu chíchi ndahi na sanduvahi chí ñu, catyí

Tatyí li chihin yuhu ra Isaías ta cha naha.

²⁸ 'Coto vaha nyoho vatyí vityin ta ityi nuu ca cuhin cusacote chí ñu cha ñima ñu Israel cuví vatyí sacacú Nyoo chí ñu. Ta maa ñu cuatyasoho ñu, —catyí ra Pablo chí ñu.

²⁹ Cuhva cha catyí ra Pablo tyehe caa, ra Israel cuahan coyo ra suri cuví yuhu ra chihin ra tahan ra tuhun cha cahan ra Pablo chihin ra.

³⁰ Uvi cuiya nani ndoo ra Pablo vehe nu nyaá ra cuenda yoo ñuu Roma cuan. Ta vaha cahán ra chihin tandihí ñu chahan vehe ra.

³¹ Ta chihin cha ñi iñi ra ta cahan ra tuhun yoso caa nyacá ñaha Nyoo añima yo. Ta sañahá ra tuhun Sutu Mañi yo ra Jesucristo. Ta yori chasí cha cahán ra.

Carta Cha Sacuhun Ra Apóstol Pablo Chi Ñáyivi Ñuu Roma Cha Yihí Cuenda Nyoo

Nu sacuhun ra Pablo tutu chi ñu cuenda Nyoo ñu Roma

¹ Yuhu ra Pablo cuví noo ra sacuví tyiño nuu ra Jesucristo. Nacana ra chii, ta nacachi ra chii vatyi cuví apóstol chi ra, tacuhva vatyi sacote chi ñáyivi yoso caa sacacu Nyoo añima yo.

² Ihya cuví tuhun cha catyi Nyoo chi yo tyi cusacuvi ra, ta chicunyaá nu tutu tuhun ra tandihi cha tyaa ra profeta ta cha naha.

³ Ican ihya cuví tuhun Sutu Mañi yo Jesucristo Sehe Nyoo cha cahán chi tuhun, vatyi quichi ra siqui ñuhu ñáyivi chihin coño ñuhu ra tari coño ñuhu maa yo. Tata rey David cuví chi ra.

⁴ Ta Nyoo chihin Tatyí li ra sacoto cachi ra chi yo vatyi Sehe ra cuví chi ra, vatyi sanandoto ra chi ra chihin cha ndicha ñuhu ra.

⁵ Ta cha cuenda maa ra Jesucristo chaha Nyoo tumañi iñi chi nyuhu cha cuhun ndi cucaca ndi tyiño ra, tacuhva nachino iñi ñáyivi chi ra nicahnu ñuhu ñáyivi, ta quichaha ñu chi ra.

⁶ Ta mahñu ñu cuan, ñohó tucu nyoho vatyi suri nacana tucu ra Jesucristo chi nyoho.

⁷ Sacuhin tutu ihya chi tandihi nyoho cha iyó ndo ñuu Roma. Cuñí Nyoo chi ndo ta nacana ra chi ndo vatyi coo ndo noo ñáyivi cachi cha sacahnu ndo chi ra. Na quehen ndo cha vaha ta cha taxi ri cuñí añima ndo cha chahá Sutu yo Nyoo ta Sutu Mañi yo Jesucristo chi yo.

Nu catyi ra Pablo vatyi cuñi ra cuhun ra ñuu Roma

⁸ Cha xihna ri chahí tyahvi nyoo chi Nyoi chihin sivi ra Jesucristo, cha cuenda tandihi nyoho. Vatyi tandihi ri ityi cahán ñu tuhun vatyi chinó xaan iñi ndo chi ra Jesucristo.

⁹ Ta tyiño nuu Nyoo sacuví yuhu chihin cha tandihi añime. Ta cahín tuhun yoso caa sacacu ra chi yo cha cuenda Sehe ra. Ta Nyoo cuví ra testigu vatyi chitó ra tyi tyicuan ri nichón iñi chi ndo cuhva cha chicán tahvi chi ra. Ta chicán tahvi cha cuenda ndo.

¹⁰ Chiquén chi Nyoo na cuví cuhva cuñi ra, ta cuhin nu nyicú ndo, vatyi cha naha xaan cuñi cuhin.

¹¹ Vatyi cuñi tyinyei chi ndo, ta na quehen ndo cha vaha cha chahá Nyoo ta cuní ca iñi ndo.

¹² O cuñi chi catyi vatyi saní yo iñi tahan yo chihin cha chinó iñi yo, tari chinó iñi nyoho ta yuhu ñandihí.

¹³ Yañi, cuñi tyi coto ndo vatyi cuaha xaan chaha cuñi cunyehe nu nyicú ndo, soco nya vityin ta ña chaha chi cuhva chii. Cuñi vatyi cuní ca iñi ndo tari nduní ca iñi ñu vehe ñuhu inga ñuu nu chahin. Vatyi tatu nduní iñi ndo, nduní tucu iñi yuhu.

¹⁴ Vatyi nyaá siqui cha cahin tuhun Nyoo chihin tandihi ñáyivi, an cuví ri ñu ñuu Grecia, an cuví ri ñu inga ñuu, an cuví ri ñu chiñi tuñi, an cuví ri ñu ña cutuñi iñi. Tahán chi cha cahin chihin tandihi ri ñu.

¹⁵ Yucuan chaha, cha cuenda yuhu, cuñi xain cahan tiqui tuhun Nyoo chihin nyoho cha iyó ndo ñuu Roma chiña.

Tuhun Nyoo iyó xaan cha ndicha ñuhu chi

16 Yuhu ña cahán nui cahín tuhun Nyoo, vatyi ihya cuví fuerza Nyoo cha sacacú chi tandihí ñáyiví cha chinó iñi chi ra. Ta cha xihna ri chi ñu Israel. Ta cha cu uvi, ñu inga ñuu.

17 Vatyi tuhun Nyoo ihya, sañahá chi chi yo yoso caa sacuvahá Nyoo chi yo nuu ra chihin cha chinó iñi yo chi ra. Ta suri cha cuenda cha chinó iñi yo, coo yo ñayiví chaa chihin ra. Tyehe caa nyaá nu tutu tuhun Nyoo: “Ñu cha nduvahá añima saha Nyoo, coo ñu noo ñayiví chaa chihin cha chinó iñi ñu chi ra.”

Tandihí ñáyiví ta iyó cuatyí ñu

18 Ta nyehé yo vatyi nya nu nyaá Nyoo nya andiví ta tachí tuñi ra chi ñáyiví quiñi iyó, ñáyiví ña vaha. Ta cha quiñi iyó ñu, ña chahá chi coto ñu cha ndicha.

19 Chitó vaha ñu tyi tuhun vaha cuví tuhun Nyoo vatyi suri maa Nyoo sañahá ra chi ñu.

20 Vatyi vasi ña nyehé yo chi ra, cuví coto yo vatyi iyó ra vatyi nyehé yo tandihí cha savahá ra. Nyata chingo ñuhu ñayiví ta tandihí cha savahá ra ta sañahá chi chi yo vatyi maa ra cuví Nyoo, ta tunyee iñi cha iyó chi ra ma ndihí maa. Yucuan chaha ma cuví catyí ñáyiví tyi yori Nyoo iyó.

21 Ta vasi cha chitó ñu tyi iyó noo Nyoo cahnu, soco ña sacahnú ñu chi ra tari cuhva tahán chi cha sacahnu yo chi ra. Ni ña nacuhva ñu tyahvi nyoo chi ra. Soco maa maa ri tuhun cha ñima ri tuhun chicá xiñi ñu. Ta cha cuenda cha ndava añima ñu, cutondo cha chiñi tuñi xiñi ñu ta ndoo ñu nu ñaa iñi.

22 Vasi catyí ñu tyi chitó xaan ñu soco ñu tondo cuví ñu.

23 Vatyi cha nuu cha sacahnú ñu chi Nyoo ra cahnu ca cuví, ra ña tuhva chihí; sacahnú ñu chi xitohyo cha caá tari caá ñáyiví tuhva chihí. Ta nyacua nya xitohyo cha tari caá saa, ta coo, ta quiñi cha cumi tahan chaha, ta sacahnú ñu.

24 Yucuan chaha saña ndaha ndihí Nyoo chi ñu na sacuvi ñu tandihí cha quiñi caa cha quichí cuví iñi ñu. Yucuan chaha maa maa ri tuhun cha cahán nuu yo nyacuví ñu chihin tahan ñu.

25 Vatyi ña chinó iñi ñu cha ndicha vaha Nyoo. Vatyi noo cha ña ndicha, yucuan chinó iñi ñu. Ta sacuvahá ca ñu, ta casacahnú ca ñu cha savahá Nyoo ta ña cuñi ñu sacahnú ñu chi maa maa ra. Vatyi chi maa ra tahán chi sacahnú yo tyicuan ri maa. Ta na cuví chi tyicuan caa.

26 Yucuan chaha saña ndaha Nyoo chi ñu na sacuvi ca ñu cha chahá ticahan nuu chi ñu. Vatyi nyacua nya ñusihí nasama ñu cuhva nyacuví ñu, vatyi ca iyó ñu chihin tahan sihi ñu, ta ña tahán chi tyicuan caa.

27 Ta tyicuan caa tucu rayi, casandihí ra cha ca iyó ra chihin ñasihí ra, ta quichí cuví iñi ra cacoo ra chihin tahan yí ra. Ta canyacuví ra chihin ra tahan ra, tuhun cha chahá ticahan nuu chi ra. Ta cha cuenda cuan tachí tuñi Nyoo chi ra ta tiví ra cha cuenda cha quiñi caa cha canyacuví ra.

28 Ta chaha cha ña cuñi ca ñáyiví nacoto nuu ñu chi Nyoo, yucuan chaha saña ndaha ra chi ñu na caca maa xiñi ñu cha quiñi caa, ta sacuvi ñu cha ña tahán chi sacuvi ñu.

29 Vatyi tandihí nuu cha ña vaha sacuvi ñu. Iyó ñu chihin inga rayi ta ñima yí ñu cuví. Ta iyó ra chihin inga ñusihí ta ñima ñasihí ra cuví. Quiñi xaan iyó ñu. Quichí cuví xaan iñi ñu coo ca chi ñu. Nyacuví ñu cha quiñi caa. Nyiyó xaan iñi ñu cha chi inga ñáyiví. Chahñí ñu. Iyó ñu tisihi chihin tahan ñu. Sandaví ñaha ñu chi tahan ñu. Ta quiñi xaan ca iyó ñu. Ta ñi ñu cuendu.

³⁰ Cahán ña vaha ñu siqui inga ñáyivi. Ta tasi cuñí ñu nyehe ñu chi Nyoo. Tyityi iñi ñu. Ta cahnu sahá ñu chi ñu. Casanducuahá ca ñu cha quiñi caa. Ta ña quichahá ñu chi sutu ñu, ta chi sihi ñu.

³¹ Ña cuñí ñu tyasoho ñu tuhun vaha. Ña sacuví ñu tuhun cahán ñu. Yori maa chi cuñí ñu. Ta ña casahá ñu ticahnu iñi chi tahan ñu. Ña ndahvi cuñí ñu nyehe ñu chi tahan ñu.

³² Maa ñu chitó vaha ñu ñáá cha catyí Nyoo tyi sacuví ñu, chitó ñu vatyí ñu casacuví cha ña vaha, tahán chi tuhun chihí chi ñu ta cuhun ñu anyaya. Soco maa ñu sañihí ca ñu sacuví ñu. Ta nyacua sii cuñí ñu tatu sacuví inga ñáyivi cha quiñi caa.

2

Tachí tuñi Nyoo chi ñáyivi soco chihin cha ndicha

¹ Yucuan chaha ñahri siqui tyaá ndo, nyoho ñu cha nyehé cha caá inga ñu ta cahán ndo. Ñahri saha, savahri ñu, yóo ri ñu cuví ndo. Vatyí tatu nyehún cha caá inga ñu ta cahún, suri maun sacouñ cuatyun. Vatyí suri ñn ri cha sacuvún chihin ñu nyehún ta cahún.

² Vatyí chitó yo vatyí Nyoo tachí tuñi ra chi ñu nyacuví tyehe caa, soco chihin cha ndicha ta chihin cha ndaa, tachí tuñi ra.

³ Ta yoho cha cahán nyaun chi inga ñu, suri ñn ri cha sacuvún chihin ñu. Cutachí tuñi Nyoo chuun cha cahún tyehe caa.

⁴ ¿Ñáá tuhun ña quichahún cha cundahvi cuñí Nyoo nyehé ra chi yo ta cunyeé xaan ra cha sacuví yo? Vaha xaan ñáyivi cuví ra chihin yo. ¿Atu ña tuví iñun vatyí cha cuenda cha cundahvi cuñi ra nyehé ra chuun, ta nyatú ra cha nasamon cuhva iyón?

⁵ Soco yoho ndava xaan añimon. Ta ña cuñun nasamon cuhva iyón. Ican cuan cuví cuatyun cha sacayá xaun, ta cuxaan ca cuñí Nyoo nyehé ra chuun ta ñihi ca cutachí tuñi ra chuun quívi cutachí tuñi ra chi ñáyivi. Ta cunyehe yo tyi chihin cha ndaa ta chihin cha ndicha tachí tuñi ra chi yo.

⁶ Tatu sacuví yo cha ña vaha, cutahan chi cha ña vaha chi yo. Tatu sacuví yo cha vaha cutahan chi cha vaha chi yo quívi cutachí tuñi ra chi yo.

⁷ Ta cuhva ra ñáyivi cha ma naa ca maa coo ñu cha nanducú cha vaha ta cha cahnu cuví Nyoo, ñu nanducú cuvaha nuu ra, ñu cha cuñí coo tyicuan ri maa. Cuhva ra tandihí cuan chi ñu cha cuenda vatyí sacuví ñu maa maa ri cha vaha chihin cha cama iñi ñu.

⁸ Soco ñihi xaan cutachí tuñi ra chi ñáyivi sacuví cuhva cuñi maa, ta ña cuñí ñu quichaha ñu tuhun ndicha Nyoo, ta sacuví ñu cha ña vaha.

⁹ Cuaha xaan tindoho ta tucuihya iñi cunyehe tandihí ñu casacuví cha ña vaha. Ta cha xihna ri cutachí tuñi ra chi ñu ñuu Israel, ñáyivi cuenda ra. Ta tyicuan caa tucu cutachí tuñi ra chi ñu cha ñima ñu Israel cuví.

¹⁰ Soco chi tandihí ñu cha sacuví cha vaha, Nyoo cucuhva ra cha cucahnu ñu chihin ra, cha xihna ri chi ñu Israel, tyicuan ta chi ñu cha ñima ñu Israel cuví. Ta cucatyí ra tyi sii cuñi ra chihin ñu. Ta cucuhva ra cha taxi ri coo añima ñu.

¹¹ Vatyí Nyoo ña cachí ra chi yo. Cuví ri yo ñu chitó, o cuví ri yo ñu ña chitó, ñn ri cuhva cuñi maa ra chi yo.

¹² Vatyí tandihí ñu casacuví cuatyí ta ña chitó ñu ley cha chahá Nyoo chi ra Moisés, cunaa ñu nuu Nyoo soco ñima cha cuenda tuhun cha catyí ley cuan.

Ta ñu casacuví cuatyi ta chitó vaha ñu ley cha chaha Nyoo chi ra Moisés, cutachi tuñi Nyoo chi ñu yoso cuhva catyí suri maa nuu ley cuan.

13 Vatyí ñu cha chiñi ley, ta ña nyacuví ñu cuhva catyí Nyoo, ñima ñáyivi vaha cuví ñu nuu ra. Soco tyehe ta iyó noo ñu sacuví cuhva catyí ley, ican ñu cuan, vaha ñu nuu Nyoo.

14 Tatu ñima ñu Israel cuví ñu ta ña chitó ñu ley cuan, soco tuví iñi ñu yoso caa coo ñu; cha tuví iñi ñu chichi añima ñu, ican cuví ley ñu.

15 Vatyí chihin cuhva iyó ñu, sañahá ñu vatyí añima ñu ñohó ley Nyoo. Cha chiñi tuñi ñu cuví cha ndaa cuenda ñu, vatyí suri maa ñu tuví iñi ñu tatu vaha o ña vaha cha nyacuví ñu.

16 Cha tyaa Nyoo tyiño chi ra Jesucristo vatyí coo quiví cusandaa ra cuatyi tandihí ñáyivi iyó siqui ñuhu ñáyivi cha cuenda tandihí tuhun xehe cha sacuví ñu. Tari cuhva catyí tuhun Nyoo cha cahín chihin ndo, tyicuan caa cusandaa ra cuatyi yo.

Ñu Israel nyicón ñu ley cha chaha Nyoo chi ra Moisés

17 Soco yoho catyún tyi ra Israel cuvún. Ta catyún tyi sacuvún cuhva catyí ley cha chaha Nyoo chi ra Moisés, ra cuví nuu chi ñu Israel quiví cuan. Ta cahnu sahún chuun tyi catyún tyi caá tuhun Nyoo añimon.

18 Ta chitón cuhva cuñi Nyoo ta ley cuan sañahá chi chuun cha nacachún cha vaha, catyún.

19 Ta vaha xaan sañahún ityi chi ñu cuaa, cuñi maun. Vaha xaan sacatón ñuhú chi ñu cuahan nu ñaa iñi, cuñi maun.

20 Ta cuñi maun vatyí chitón saquehen ityun chi ñu cha ña chitó. Ta vatyí chitón tandihí cuii ley ta cha ndicha, chitón yoso caa sañahun chi ñu ña chitó, cuñi maun.

21 Tatu tyicuan caa yoho sañahún chi inga ñáyivi, ¿ñáá tuhun ña sañahún chi maun? Tatu suri maun catyún vatyí ña tahán chi suhu yo, ¿ñáá tuhun cha tyi maun suhún?

22 Tatu suri maun catyún vatyí ña tahán chi coo inga ñusihí chi noo rayii, o inga rayii chi noo ñaha sihi, ¿ñáá tuhun cha vatyí maun tyicuan caa sacuvún? Tatu tasi cuñún chi xitohyo, ¿ñáá tuhun cha suhún cha tyayii cha iyó nu nyicú chi chichi vehe ñuhu?

23 Cahnu sahún chuun vatyí chitón ley Nyoo, soco ticahan nuu chahún chi Nyoo cha cuenda cha ña sacuvún ley cuan.

24 Yucuan chaha vatyí nu tutu tuhun Nyoo catyí chi tyehe caa: “Ñu cha ñima ñu Israel cuví, cahán ña vaha ñu siqui Nyoo cha catyí nyoho”, catyí chi.

25 Ndicha vatyí cha sacuví ñu tuhun cha tahnya chiin ñii xiñi ndivun ta leun, cha saha ñu circuncidar chuun cuví cuan, tari noo seña cha sañahá vatyí ñáyivi chi Nyoo cuvún. Tuhun cuan tyinyeé chi chuun soco tatu quichahún tandihí ley cha chaha Nyoo chi ra Moisés ñandihí. Soco tatu ña sacuvún cha catyí ley cuan, tari quiví cha ña sacuvún costumbre circuncisión cuví cuan.

26 Soco tatu ñu cha ña sacuví tuhun cuan, ta sacuví ñu cuhva catyí ley Nyoo, cusaha Nyoo tari cha sacuví ñu costumbre circuncisión cuan, vasi ña sacuví ñu.

27 Ra cha ña sacuví costumbre cuan, soco quichahá ra cuhva catyí ley, cusanatuví ra chi yoho cha ña quichahún, ta yoho, ra chitó ley ta ra sacuví costumbre circuncisión cuvún.

²⁸ Vatyí ñima cha cuenda vatyí ñu Israel cuví ndo ta chihin cuan ta cuví ndo ñáyiví chi Nyoo. Ta ni ñima cha cuenda cha sacuví ndo tuhun circuncisión.

²⁹ Vatyí ñáyiví nyaá ley Nyoo añima, ican ñu cuví ñu ñu Israel cha ndicha vaha. Tari quívi tyaa Tatyí lí seña cuan añima ñu, ta ñima ñi ri ñu. Tatyí lí Nyoo sacuví cuan, ñima ley cha nyaá nuu tutu. Ta ñáyiví ihya cucuvi ñu ñu vaha nuu Nyoo, ta ñima nuu ñáyiví ri.

3

¹ Tatu tyicuan caa, ¿ñáá cha tyinyeé chi yo cha cuví yo ñu Israel? ¿O atu tyinyeé chi chi yo cha sacuví yo tuhun circuncisión?

² Cuaha cuhva tyinyeé chí. Cha xihna ri, Nyoo chahá ra ley maa ra chi yo ñu Israel.

³ Soco yoso caa tatu yihí ñu Israel ta ña chinó iñi ñu cuhva catyí Nyoo, ¿atu cha catyí ñu cuan ta ma sacuví ca Nyoo cuhva catyí ra?

⁴ ¡Ñima! Soco na saha yo cuenda vatyí Nyoo ndicha ra. Sacuví ra tandihí cuhva cha catyí ra. Vasí tandihí ñáyiví cahán ñu cuendu. Vatyí nu tutu Nyoo catyí chí tuhun ra tyehe caa:

Sutu Mañi yuhu, cunyehe ñáyiví vatyí ñahri cuendu cahún. Ta cunyehe vaha ñu chuun vatyí ndicha cha cahún.

⁵ Chitó yo vatyí vaha ca quetuví noo cha ndií tatu nyaá noo cha mecu xiin. Ndií xaan ca nyehe cuan. Cha ndicha cuví cuan. Soco catyí ñáyiví vatyí tyicuan caa tucu maa Nyoo chihin yo, ndií xaan ca natuví ra tatu yoó ta cunyacuví ca yo cha quiñi caa. Sacahnú yo chi ra cuví cuan, catyí ñu. Tyicuan ta ña tahán chí tachi tuñi ra chí yo, catyí ñu. Soco tatu tachi tuñi ra chí yo, ña vaha ra vatyí yoó sacahnú yo chí ra, catyí ñu.

⁶ Ña vaha cuhva cahán ñu, vatyí tyehe ta ña vaha Nyoo ma cuvi tachi tuñi ra chí yo. Soco chitó yo tyi tahán chí tachi tuñi ra chí yo cha cuenda cuatyí yo.

⁷ Tatu nyehé yo tyi vaha Nyoo chihin cuatyí sacuví ñáyiví, ¿atu tahán chí tachi tuñi ra chí ñu? Catyí ñu tyi ña tahán chí, soco ña ndicha.

⁸ Tyehe ta ndicha cha cahán ñu cuan, vaha taxin ca sacuví yo maa maa ri cha quiñi caa tacuhva nyehe ñáyiví tyi Nyoo vaha ra. Yihí ñu catyí ñu tyi tyicuan caa sañahá ndi. Ta cutachi tuñi Nyoo chí ñu chaha cha catyí tyi cahán ñu cuendu siqui ndi.

Tandihí yo ta iyó cuatyí yo

⁹ Ta yoso caa ¿atu vaha ca yoó ñu Israel ta ñima ca inga ñáyiví? ¡Ñima! Vatyí cha yahá sañahi chí ndo vatyí iyó cuatyí tandihí yo. An cuví ri yo ñu Israel, an cuví ri yo ñu cha ñima ñu Israel cuví, soco iyó maa cuatyí yo.

¹⁰ Tyicuan caa catyí nu tutu Nyoo, nu catyí chí tyehe caa: Yori maa ñáyiví vaha iyó, cha ni ña noo maa.

¹¹ Yori ñu cutuñi iñi tuhun Nyoo.

Yori maa nanducú chí Nyoo.

¹² Tandihí ñu sandoo ñu chí Nyoo, ta tandihí ñu ta sacunaq ñu chí ñu.

Yori maa ñu sacuví cha vaha.

Cha ni ña noo maa.

¹³ Tari noo ñaña ndiyí cha tacohó yuhu cuví sucun ñu.

Vatyí quiñi xaan cahán ñu.

Ta cahán ñu cuendu. Tari cha venenu coo yihí yuhu ñu vatyí cahán uhvi ñu chí tahan ñu.

- 14 Maa maa ri ca maa cha quiñi caa cahán ñu.
 15 Yatyí xaan ñu cha cacahñi ñu chi tahan ñu.
 16 Chahá xaan ñu tundoho ta tucuihya iñi chi ñáyivi chihin cuhva iyó ñu.
 17 Ta ña chitó ñu yoso caa cuhva coo taxi ri ñu chihin Nyoo, ni chihin tahan ñu.
 18 Ni ña chicá iñi ñu tatu tachi tuñi Nyoo chi ñu noo quivi, catyí chi nu tutu Nyoo.

19 Chitó yo vatyí tandihi cha catyí ley chahnu cha quehen cuenda ra Moisés, catyí chi cha cuenda ñu nyicón ley cuan, tacuhva vatyí ma cuvi catyí ñu tyi ñahri cuatyí ñu. Soco coto ñu vatyí cutahan chi cutachí tuñi Nyoo chi ñu vatyí iyó cuatyí ñu. Ta tyicuan caa tucu tandihi ñáyivi iyó siqui ñuhu ñáyivi.

20 Ni minoo ñáyivi ma cuvi cuvaha ñu nuu Nyoo cha cuenda tyi sacuví ñu cuhva catyí ley. Soco ley cuan nyaá chi cha cuenda vatyí sacotó chi chi yo tyi iyó cuatyí yo.

Cha cuenda cha chinó iñi yo chi Nyoo ta cuvaha yo nuu ra

21 Soco vityin sandoó yo inchiyo xiin ley cuan ta cua nyehe yo vatyí iyó noo cuhva cuvaha yo nuu Nyoo. Suri maa Nyoo sañahá ra chi yo nu tutu tuhun ra cha tyaá profeta ta cha naha. Tatu sacuahá yo yucuan, coto yo noo cha ndicha.

22 Vatyí cha cuenda cha chinó iñi yo chi ra Jesucristo ta cuvaha yo nuu ra, ta sahá ra tuhun tyi ñahri cuatyí yo. Ta ña cachí ra chi yo tatu ñu Israel cuví yo o ñima.

23 Tandihí ri ñáyivi sacuví ñu cuatyí, ta cañi xaan nyaá ñu chihin cuhva cuñi Nyoo, ta cha tyaqui Nyoo ma cuvi cunyaa chihin ñu.

24 Soco cha cuenda cha vaha ñáyivi cuví Nyoo chihin yo, chahá maa ra cha cuvaha yo nuu ra, ta ña tñn cuenda ca ra cuatyí yo. Vatyí chahnyá ra Cristo Jesús cuatyí yo.

25 Nyoo saquichí ra chi ra Cristo vatyí cati niñi ra ta cúvi ra nu cruzi cha catyí cuatyí yo. Ta vityin cuví saha Nyoo tucahnu iñi chi yo tatu chinó iñi yo chi ra Cristo. Ta cuví chi tyehe caa, tacuhva nyehe ñáyivi tyi Nyoo vaha ra. Ta tyembu chahnu, Nyoo ña tñn cuenda ra cuatyí ñáyivi cha cuenda vatyí cuchaa chi noo quivi cha cuquichi ra Cristo ta sanaa ra cuatyí ñu.

26 Ta tyicuan caa cuví tacuhva vatyí nyehé ñáyivi vatyí Nyoo tyicuan ri vaha ra, ta sahá ra tuhun tyi vaha tandihí ñu chinó iñi chi ra Jesús.

27 ¿Atu cuví sacahnu yo chi yo vityin? Ma cuvi. ¿Ñáá tuhun? Cha cuenda vatyí ma cuvi catyí yo vatyí sacuví yo cha catyí ley, ta yucuan chaha vaha yo nuu Nyoo. Vatyí cha cuenda cha chinó ri iñi yo chi ra ta cuvaha yo nuu ra.

28 Cha chitó vaha yo vityin vatyí Nyoo sacuvahá ra chi yo nuu ra chihin cha chinó iñi yo chi ra, ta ñima chihin cha sacuví yo cha catyí ley ta cuvaha yo nuu ra.

29 ¿Atu Nyoo cuenda ñu Israel ri cuví ra? ¿Atu ñima suri ra cuví Nyoo ñu cha ñima ñu Israel cuví? Suri Nyoo tucu ñu cuan cuví chi ra.

30 Vatyí noo tuhun ri maa ra iyó. Ta ican ra sacuvahá ra chi yo nuu ra cha cuenda cha chinó iñi yo chi ra. Cuví ri yo ñu sacuví tuhun circuncisión cuan, o cuví ri yo ñu ña sacuví.

31 Tatu tyicuan caa, ¿atu ña vaha ca ley chahnu cuan? ¡Ñima cha ña vaha ca! Vaha. Soco vityin chihin fuerza maa ra Cristo sañahá yo vatyí ndi maa cha catyí ley cuan ta ndicha.

4

Cuhva chiyo ra Abraham sañahá chi chi yo yoso caa cuvaha yo nuu Nyoo

1 ¿Ñáá cha catyi yo cha cuenda ra Abraham sutu chahnu yo? ¿Ñáá cuenda catyi Nyoo vatyi vaha ra?

2 Tyehe ta cuvaha ra nuu Nyoo cha cuenda cha sacuvj ra cha vaha, yucuan ndicha, cuví sacahnu ra chi ra, soco ñima nuu Nyoo.

3 Vatyi ¿ñáá catyi nu tutu tuhun Nyoo? Catyi chi vatyi ra Abraham chinó iñi ra chi Nyoo, ta cha cuenda cha chinó iñi ra chi Nyoo, Nyoo saha ra tuhun tyi vaha ra.

4 Vaha, vityin cuacuhve noo cuhva chi ndo: Tatu minoo ra sacuví ra noo tyiño, yahvi cha quehén ra ñima cha ñihi caha ra cuví, soco yahvi tyiño saha ra, ican cuví.

5 Soco tatu noo ra cha ña saha tyiño ta ñihi ra cha ñihi ra, noo cha ñihi caha ra cuví. Ta tyicuan caa cuví chihin noo ra cha ña nducu cuhva cacu cha cuenda cha sacuví ra ley, soco chinó iñi ra vatyi Nyoo sahá ra tucahnu iñi chi ñu iyó cuatyí, Nyoo cusaha ra tuhun tyi vaha ra cha cuenda cha chinó iñi ra chi ra.

6 Ra David cahan ra tuhun tusi iñi cha iyó chi ñáyivi cha saha Nyoo tuhun vatyi vaha ta ña tñin cuenda ra cuatyí cha sacuvj ñu.

7 Tyehe caa catyi ra David:

Ñáyivi cha saha Nyoo tucahnu iñi cuatyí, si xaan cuñí ñu, vatyi Nyoo ña tñin cuenda ra cuatyí ñu.

8 Si xaan cuñí ñu ña tñin cuenda Nyoo cuatyí.

9 ¿Atu cha cuenda ri ñu sacuvj tuhun cha tahnya ñi cuví tusi iñi ihya, o cuví tucu chi cha cuenda ñu ña sacuvj cuan? Cha yaha sañahi chi ndo vatyi Nyoo saha ra tuhun tyi vaha ra Abraham cha cuenda cha chinó iñi ra chi ra.

10 Soco ¿ama saha ra tuhun tyi vaha ra? ¿Atu cha ni cumañi ca sacuví ra Abraham tuhun circuncisión cuan, o cha yaha? Ñima nya cha yaha, soco cha ni cumañi ca.

11 Yaha cuan ta sacuvj ra Abraham tuhun cuan, tari noo seña ri o sellu vatyi Nyoo cha yaha saha ra tuhun tyi vaha ra cha cuenda cha chinó iñi ra chi ra. Ta cha cuenda ihya cuví ra Abraham tari noo sutu tandihi yo ñu chinó iñi Nyoo vasi ña sacuvj yo tuhun circuncisión. Ta tyicuan caa, Nyoo sahá ra tuhun vatyi vaha yo.

12 Ndicha vatyi ra Abraham cuví tucu ra sutu ñu casacuví tuhun cuan, soco tatu chinó tucu iñi ñu chi Nyoo tari chinó iñi tucu maa ra Abraham sutu chahnu yo, quivi cha ta sacuví ca ra tuhun cuan.

Chihin cha chinó iñi yo ta ñihi yo cha chahá Nyoo chi yo

13 Vatyi Nyoo catyi ra chi ra Abraham ta chi sehe ra vatyi cuhva ra cha cunyaca ñaha ñu ñuhu ñáyivi chihin ra. Soco savaha Nyoo promesa cuan, ñima cha cuenda vatyi ra Abraham sacuvj ra cha catyi ley, soco cha cuenda vatyi chinó iñi ra chi Nyoo, ta Nyoo saha ra tuhun vatyi vaha ra.

14 Tyehe ta maa maa ri ñu cha sacuví cuhva catyi ley, cuñihi ñu noo cha cucuhva Nyoo, ñahri yahvi nyaá cha chinó iñi yo chi Nyoo, ta ni ñahri yahvi nyaá cha catyi ra tyi cuhva ra chiyo.

15 Vatyi ley cuan sañahá chi vatyi tahán chi tachi tuñi Nyoo chi yo tatu ña sacuví yo cuhva catyi chi. Soco tyehe ta ñahri ley iyó, ñahri cuatyí yo coo.

16 Yucuan chaha cuñihi yo promesa Nyoo cha cuenda cha chinó iñi yo chi ra, tacuhva vatyi cuví chi noo tumañi iñi cha chahá ra chi tandihi yo cha cuví

yo ñáyiví chi ra Abraham. Ñima ñu chinó ri iñi chi Nyoo ta quichahá ley cuan cuñihi, soco cuñihi tucu ñu cha ña ita iñi ley, soco chi Nyoo ri chinó iñi ñu tari chinó iñi ra Abraham. Ican ra cuví sutu tandihi ñáyiví cha chinó iñi chi Nyoo.

¹⁷ Vatyí tari catyí Nyoo nu tutu ra tyehe caa: “¿Yoho cucuvun tari noo sutu cuaha xaan ñáyiví?” coo siqui ñuhu ñáyiví, catyí ra chi ra Abraham. Ta cha catyí ra tycuan caa, cuñí chi catyí vatyí cuví yo sehe ra Abraham nuu Nyoo. Chinó iñi ra Abraham chi Nyoo, vatyí Nyoo sanandotó ra ndáyi, ta chihin tuhun cahán ra sacoo ra cha cumañi ca coo.

¹⁸ Ra Abraham chinó iñi ra chi Nyoo vasi ma cuví ñihi ra promesa cuan tyaá maa ra cuhva, vatyí cha chahnu xaan ra. Soco yihí iñi ra cha cuñihi ra. Ta tycuan caa, ñihí ra promesa Nyoo ta cuví ra sutu cuaha ñáyiví, tari cuhva catyí Nyoo chi ra: “Tyehe caa cucucuaha ñáyiví chuun”, catyí ra chi ra.

¹⁹ Ra Abraham ña sandihí ra cha chinó iñi ra, vasi cha noo cientu cuiya ra ta tuví iñi ra vatyí cha cuñí cuví ra. Tari maa ra ta tari cu Sara ñasihí ra, ma cuví ca coo sehe ñu, tyi cha chahnu xaan ñu.

²⁰ Soco ña ndu uvi iñi ra cha cuñihi ra cha catyí Nyoo tyi cuhva ra chi ra. Soco chinó iñi ra chihin cha ñi iñi ra. Ta yihí ca iñi ra chi Nyoo. Ta sacahnú ra chi ra,

²¹ cha cuenda vatyí chitó vaha ra vatyí Nyoo iyó tunyee iñi chi ra cha cusacuví ra cha catyí ra chi ra.

²² Yucuan chaha Nyoo saha ra tuhun tyi vaha ra cha cuenda cha chinó iñi ra chi ra.

²³ Saha Nyoo tuhun vatyí vaha ra Abraham chaha cha chinó iñi ra chi ra. Ña chicunyaá nuu tutu vatyí noo ri ra Abraham cuvaha ra,

²⁴ soco chicunyaá tucu nuu tutu cha cuenda yoó. Vatyí sahá Nyoo tuhun tyi vaha tucu yo vatyí chinó iñi yo chi ra, vatyí ican ra sanandotó chi ra Jesús, Sutu Mañi yo.

²⁵ Ta maa ra chaha cuenda chi ra Jesús tyi cuví ra cha cuenda cuatyí yo, ta nandotó ra tacuhva vatyí cuví cuvaha yo nuu ra.

5

Vityin cha nicoo vaha yo chihin Nyoo, cuaha cha vaha cucuhva ra chi yo

¹ Ta cha yaha nduvaha añima yo nuu Nyoo cha cuenda cha chinó iñi yo chi ra, nicoo vaha yo chihin ra cha cuenda Sutu Mañi yo Jesucristo.

² Vatyí cha cuenda ra Cristo ñihí yo cha vaha Nyoo cha cuenda cha chinó iñi yo chi ra. Yucuan chaha ñi iñi yo ta sii cuñí yo, ta yihí vaha iñi yo vatyí cucuhva ra cha cucahnu cuví yo chihin ra.

³ Ta ñima yucuan ri cusii cuñí yo, tahán tucu chi cusii cuñí yo quivi nyehé yo tindoho. Vatyí chitó yo vatyí cha nyehé yo tindoho cuan cutuhva ca yo coo cha cama iñi yo.

⁴ Ta tatu chihin cha cama iñi yo, yaha yo tindoho, quita vaha yo nuu Nyoo. Ta yucuan ta chitó vaha yo tyi cuñihi yo ndii maa cha cucuhva ra chi yo.

⁵ Tatu yihí iñi yo chi maa ra, ma cucahan nuu yo nyehé yo chi ra, vatyí cuñí xaan ra chi yo cha cuenda Tatyí Ii ra cha chaha ra cunyaá añima yo.

⁶ Vatyí quivi cha ña ñihí ca yo yoso caa sacuvi yo chihin cha cuaha cuatyí yo, quivi cuan quichí ra Cristo, quichí cuví ra cha cuenda yo ñu iyó cuatyí.

⁷ Chitó yo vatyí yori caña iñi cuví tyiño nuu noo ñáyiví. Vasi xityi ri caña iñi ñu cuhva ñu ñáyiví ñu cha cuenda noo ñu vaha xaan.

⁸ Soco yucuan cuví nu sañahá Nyoo vatyi cuñí ra chi yo, vatyi quichi cúvi ra Cristo cha cuenda yo vasi iyó xaan cuatyí yo.

⁹ Ta vityin cha cha yahá cuvaha yo nuu Nyoo cuenda cha chihí ra Cristo, yucuan chaha chító vaha yo tyi ma cahun ca yo anyaya nu cutachí tuñi Nyoo chí ñáyiví ña chinó iñi chi ra.

¹⁰ Quiví cuan xaan cuví iñi yo chí Nyoo, soco sanicoo vaha ra chí yo chihin ra cha cuenda cha chihí Sehe ra. Yucuan chaha chító vaha yo tyi cusacacu ndihí ra chí yo vatyi iyó ñáyiví ra Cristo añima yo vityin cha iyó vaha yo chihin ra.

¹¹ Ta ñima ihya ri, soco cusí tucu cuñí yo chihin Nyoo cha cuenda Sutu Mañi yo Jesucristo, vatyi cha cuenda ra nicoo vaha yo chihin Nyoo.

Ra Adán ta ra Cristo

¹² Cha cuenda noo rayí quihví cuatyí siquí ñuhu ñáyiví ta chicoo tuhun chihí. Ta tuhun chihí cuan chicoo chí siquí tandihí ñáyiví vatyi tandihí ñu sacuví ñu cuatyí cha cuenda ra Adán.

¹³ Nyata ni cumañi ca cuhva Nyoo ley chí ra Moisés ta cha iyó cuatyí siquí ñuhu ñáyiví, soco ña tññ Nyoo cuenda cuatyí ñáyiví ta ni cumañi ca cuhva ra ley cuan.

¹⁴ Soco nyacua nya quiví ra Adán ta nyacua nya quiví ra Moisés, chinyaca ñaha tuhun chihí chí ñu cha sacuví cuatyí, vasi ñima tahan cuatyí ra Adán cuví, cha ña quichahá ra chí Nyoo. Ta ra Adán cuví ra tari noo xiñahñu noo ra cha cua quichi.

¹⁵ Soco cuatyí ra Adán ña ndiquí tahan chí chihin tumañi iñi cha chahá Nyoo chí yo. Vatyi cha cuenda cuatyí noo rayí cuan, cuaha xaan ñáyiví chihí. Soco sacacú Nyoo chí yo cha caha ri, cha cuenda noo ri rayí ta ican ra ihya cuví ra Jesucristo. Ta cahnu xaan ca cuví cuan. Ta cha cuenda cha vaha chí cuaha ñáyiví cuví.

¹⁶ Cuatyí noo ri rayí ra Adán cuan, ma cuví ndiquí tahan chí chihin cha sacacú Nyoo chí yo. Vatyi cha cuenda cuatyí noo ri ra cuan, Nyoo tachí tuñi ra chí ñáyiví. Soco vityin chihin cha ñahri tyiyahví yo, Nyoo sacacú ra chí yo ta sahá ra tuhun tyi vaha yo nuu ra, vasi cuaha xaan cuatyí sacuví yo.

¹⁷ Ndicha vatyi quichahá nyaca ñaha tuhun chihí siquí ñuhu ñáyiví cha cuenda cuatyí noo ri rayí. Ta cha tyicuan caa chító yo vatyi cahnu ca cuví cha vaha cha sacuví nonga ra, ra Jesucristo. Vatyi tandihí ñu cha ñihí cha vaha cha chahá Nyoo, cha cuvahá ñu nuu ra, ta iyó ñu ñáyiví chaa chihin tunyee iñi ra Jesucristo.

¹⁸ Tari cha catyi cuatyí ra Adán ta tachí tuñi Nyoo chí tandihí ñáyiví iyó siquí ñuhu ñáyiví, tyicuan caa tucu cha cuenda cha vaha cha sacuví ra Jesucristo, Nyoo sahá ra tuhun tyi vaha ñáyiví nuu ra ta chahá ra noo ñáyiví vaha coo tandihí ñu.

¹⁹ O cuñí chí catyí tyehe caa: Cha cuenda cha ña quichahá ra Adán cuan nu cahán Nyoo, cuaha xaan ñu chicoo cuatyí ñu. Ta suri tyicuan caa tucu cha catyi cha quichahá ra Cristo nu cahán Nyoo, cuaha xaan ñu cucuvaha ñu nuu Nyoo.

²⁰ Vatyi Nyoo chahá cuenda ra ley cuan chí ra Moisés tacuhva nacoto ñáyiví tyi iyó cuatyí ñu. Ta vasi quetuví xaan cuatyí yo cha cuenda ley cuan, soco Nyoo cahnu ca tucahnu iñi iyó chí ra chihin yo vatyi cuñí xaan ca ra chí yo.

²¹ Tari chinyaca ñaha cuatyí chí yo ta chahá chí tuhun chihí chí yo, tyicuan caa tucu nyacá ñaha tumañi iñi Nyoo chí yo vityin ta sacuvaha ra chí yo

nuu ra vatyi coo yo noo ñayivi cha ma naa ca maa cha cuenda Sutu Mañi yo Jesucristo.

6

Ma sacuvi ca yo cuatyí soco sacuvi yo cuhva catyí ra Cristo

¹ ¿Yoso caa catyí yo vityin? ¿Atu cusacuvi ca yo cuatyí tacuhva vatyi sañaha Nyoo vatyi cuaha xaan tucahnu iñi iyó chi ra?

² Ma sacuvi ca yo. Yoó cha yahá ndu uvi iñi yo cuatyí yo. Tari quivi chihí cuatyí yo cuví cuan. Ta ¿yoso caa cuví sacuvi ca yo vityin? Ma cuví ca.

³ ¿Atu ña chitó nyoho vatyi cha ndu ñin ri yo chihin ra Cristo Jesús cha cuenda cha condutyá yo? Tari quivi chihí yo chihin ra cuví cuan.

⁴ Vatyi cha cuenda cha condutyá yo, tari quivi cha quihvi yo chichi ñuhú ñin ri chihin ra Cristo quivi chihí ra cuví cuan. Ta tari nandoto ra Cristo chihin cha ndicha ñuhu Sutu yo Nyoo, tyicuan caa tucu maa yo, tacuhva vatyi coo yo noo ñayivi chaa chihin ra.

⁵ Ta ñin ri coño ñuhu nanduvi yo chihin ra, tari quivi chihí yo ñin ri chihin ra cuví cuan, ta cha tyicuan caa, cunandoto tucu yo tari nandoto ra.

⁶ Ta chitó yo vatyi tandihí cuhva chiyo yo ta ityi chata ca, cha yaha chihí chi nu cruzi chihin ra Cristo, tacuhva vatyi coño ñuhu cuatyí yo ma cuví ca cunyaca ñaha chí chi yo.

⁷ Vatyi ñu cha yahá chihí, ma cuví ca sacuvi ñu cuatyí.

⁸ Ta tatu cha yahá chihí yo chihin ra Cristo, chinó iñi yo vatyi cucoo tucu yo chihin ra.

⁹ Ta chitó yo vatyi cha yahá chihí ra Cristo, noo ri chaha nandoto ra, ta ma cuví ca ra. Ñahri ca tunyee iñi iyó chí tuhun chihí cha cunyaca ñaha ca chí chí ra.

¹⁰ Yahá cha chihí ra Cristo cha catyí cuatyí ñayivi, nandoto ra cha ma cuví ca maa ra. Ta vityin iyó ra cha cuenda maa Nyoo.

¹¹ Ta tyicuan caa tucu maa yo, ma sacuvi ca yo cuatyí. Saha yo tuhun tyi cha yahá chihí yo cha cuenda cuatyí cuan. Soco coo yo cuhva cuñi Nyoo cha cuenda cha ñin ri cuví yo chihin ra Cristo Jesús Sutu Mañi yo.

¹² Yucuan chaha yoó ma cuhva yo ityi cha cunyaca ñaha ca cuatyí chí coño ñuhu yo. Ma cuhva yo ityi chí coño ñuhu yo cha saniñi chí chí yo cha sacuví yo noo cha ña vaha cha cuñi chí.

¹³ Ma cuhva yo ityi chí coño ñuhu yo cha sacuví chí chí quini caa. Soco cuhva cuenda yo chí yo chí Nyoo, tari noo ñayivi cha chihí ta nandoto. Cuhva cuenda yo coño ñuhu yo chí Nyoo tacuhva vatyi sacuvi yo cha vaha.

¹⁴ Vatyi cuatyí yo ma cuví ca chasaha chí chí yo. Vatyi ley cha tyaá ra Moisés, ña nyacá ñaha ca chí chí yo, soco cha cacu ña ñima yo ta iyó yo cha cuenda tumañi iñi cha chahá Nyoo chí yo.

Cuví yo tari noo musu cha sacuví cha vaha

¹⁵ Iyó yo cha cuenda tumañi iñi cuan, ta vityin ña nyacá ñaha ca ley chí yo. ¿Ta tatu ña nyaca ñaha ca ley chí yo, atu tahán chí sacuvi ca yo cuatyí? Ña tahán chí.

¹⁶ Nyoho chitó vaha ndo vatyi tatu cuví ndo musu noo ra, tahán chí sacuvi ndo cha catyí ra cuan. Ta tyicuan caa cuví yo musu ra cha tuhvá yo quichahá chí. Yucuan chaha tatu quichahá yo cha cuñi cuatyí cha sacuvi yo, tari noo chitoho yo cuví cuatyí cuan, vatyi quichahá yo chí cuan. Ta cunaa yo chihin cuan. Soco tatu quichahá yo chí Nyoo, cusaha ra tuhun tyi vaha yo.

17 Soco tyahvi nyoo chi Nyoo, tyi nyoho nu quichi chi cuvĭ ndo noo musu chi cuatyĭ vatyĭ quichahā ndo chi cuan. Soco vityin chihin cha nĭ ĩni ndo quichahā ndo tuhun Nyoo cha sañahā ñu chi ndo.

18 Cha yahā cundaa cuatyĭ ndo, ta vityin ña nyacá ñaha ca chi chi ndo. Ta vityin cuvĭ ndo noo musu cha cua sacuvi cha vaha.

19 Cahĭn noo cuhva cha ña yĭ ri chihin ndo vatyĭ ta cutuñi vaha ca ĩni ndo tuhun Nyoo. Quiĭvi cuan chahā cuenda ndo coño ñuhu ndo chi cha quiñi caa ta cha ña vaha vatyĭ sacuvi ndo cha ña vaha. Vityin naçuhva cuenda ndo coño ñuhu ndo chi Nyoo tacuhva vatyĭ coo ndo noo ñayĭvi cachi, ta maa maa ri cha vaha sacuvi ndo nuu ra.

20 Quiĭvi cuvĭ ndo musu cha quiñi caa, ña cuvĭ sacuvi ndo cha vaha.

21 Soco ¿ñáa cha ñihĭ ndo chihin cuan? Maa ri ticahan nuu chahā cuan chi ndo. Ta ña tuvĭ ĩni ndo. Maa ri tuhun chihi ta anyaya nyisó cuan.

22 Soco vityin ña nyacá ñaha ca cuatyĭ chi ndo. Ta vityin cha sacuvi ndo tyiño nuu Nyoo. Ta ihya ndicha tyinyeé chi chi ndo vatyĭ chihin ihya cuvĭ coo ndo noo ñayĭvi cachi. Ta nu ndihĭ tuhun tyicuan ri maa cucoo ndo chihin Nyoo.

23 Cha sacuvi yo cuatyĭ, ican cuan chahā tuhun chihi chi yo. Soco tumañi ĩni cha chahā Nyoo chi yo, ican cuan cuvĭ ñayĭvi cha ma naa ca maa. Ta ican cuan chahā ra ta ñahri tyiyahvi yo, cha cuenda cha ĩn ri cuvĭ yo chihin ra Cristo Jesús, Sutu Mañi yo.

7

Ña nyacá ñaha ca ley chahnu chi ñu yihĭ cuenda ra Cristo

1 Yañi, nyoho ñu chitó ley cuvĭ ndo, chitó ndo vatyĭ ley nyacá ñaha chi chi noo ñayĭvi cha ni ri ca cha iyó ñu.

2-3 Ta cuñun, noo ñaha tandaha, catyĭ ley vatyĭ coo ña chihin yĭ ña nyacua nya cuvĭ ra. Ta tatu iyó ña chihin inga rayĭ cha ni ri cha iyó yĭ ña, chicoo cuatyĭ ña nuu Nyoo. Soco tatu cha yahā chihi yĭ ña, ña nyacá ñaha ca ley cuenda ñu tandaha chi ña, ta cuvĭ tandaha ña chihin inga ra, ta ma coo cuatyĭ ña nuu Nyoo.

4 Ta tyicuan caa tucu nyoho yañi. Cha chihĭ ndo cha cuenda ley chahnu ta cuvĭ ndo ñu cuenda ra Cristo vatyĭ ican ra cuvĭ yĭ ndo vityin. Ta ican ra cuvĭ ra cha nandoto, tacuhva vatyĭ cuvĭ cotyĭño Nyoo chi yo ta sacuvi yo cha vaha.

5 Quiĭvi chiyo yo cuhva cuñi coño ñuhu yo, ley chahnu cha tyaq ra Moisés, tacuhva sanaquiquĭ ri chi chi yo cha sacuvi yo cha quiñi caa, vatyĭ catyĭ chi tyi ma sacuvi yo. Soco sacuvi yo, ta yucuan cuvĭ cha chahā tuhun chihi chi añima yo.

6 Soco vityin ña nyacá ñaha ca ley chahnu cuan chi yo, vatyĭ cha yahā chihi cha quiñi caa yo chihin ra Cristo. Ta vityin cuvĭ sacuvi yo tyiño nuu Nyoo vatyĭ iyó yo ñayĭvi chaa cha chahā Tatyĭ Iĭ Nyoo chi yo, ta ña sacuvi ca yo tari sacuvi yo quiĭvi nyicoñ xaan yo ley chahnu cuan.

Ley Nyoo, ican sañahā vatyĭ iyó cuatyĭ yo

7 Ta vityin yoso caa, ¿atu ña vaha ley cuan? Ñima cha ña vaha. Vaha. Soco tyehe ta ña tuvĭ ley cuan, ma cote ñáa cha cuvĭ cuatyĭ. Ni ma cote tyi ña vaha cha quichi cuvĭ ĩni cha chii inga ñayĭvi, tyehe ta ña catyĭ ley cuan vatyĭ ña vaha.

8 Tyehe ta ñahri ley cuan, ma cote ñáa cha cuvĭ cuatyĭ, ta ma cuñi xain sacuvi, soco quiĭvi cha chité ñáa cha cuvĭ cuatyĭ, yucuan quiĭvi quichĭ cuvĭ

xaan iñi sacuvi, vaty naquiꞑuꞑi cha quiñi caa cha iyó chi. Soco tyehe ta ñahri ley, ma coto yo tyi iyó cuatyí.

⁹ Ta quiꞑi cha ña chite ñáá tuhun cahán ley cha chaha Nyoo chi ra Moisés, chica iñi vatyí ñahri cuatyí iyó nuu Nyoo. Soco quiꞑi chite ley cuan, ta chite vatyí tahán chi cunai nuu Nyoo vatyí iyó cuatyí.

¹⁰ Catyí ley cuan tyi tatu quichahí chi chí, cucoi tyicuan ri maa. Soco cha nuu cha ñihi tahvi añime chíhin ley cuan, cunaa ndihi nuu Nyoo.

¹¹ Ta cuatyí cha iyó chíi, sandavi ñaha chí chíi vatyí chotyíño chí ley chahnu cuan tacuhva vatyí tahán chí cunai nuu Nyoo, vatyí ña quichahí nu cahán ley cuan.

¹² Ley cha chaha Nyoo chí ra Moisés, vaha xaan, vatyí tuhun cha chaha maa Nyoo cuví, ta tandihi cha catyí ra vatyí sacuvi yo, vaha xaan ta cuiti xaan.

¹³ Ta ley vaha cuan, ¿atu ícan cuan sativí chíi? Ñima. Cuatyí cha sacuví, ícan sativí chíi, yucuan chaha tahán chí cunai nuu Nyoo. Vatyí ley vaha cuan, ícan cuví cha sañahá chíi vatyí cuatyí cuví cha sacuví. Ta cha tyicuan caa, sañahá ley vatyí quiñi xaan caa cha sacuví yo cuatyí.

¹⁴ Ta chitó yo vatyí ley cuan, Nyoo chaha. Ta ñahri cuatyí ley cuan. Soco mai iyó cuatyí vatyí sacuví cha quiñi caa ta nyacá ñaha cuatyí cuan chíi.

¹⁵ Ña cutuñí iñi ñáá cha tahin. Vatyí cuñí sacuvi cha vaha, ta ña cuví sacuvi. Ta cha ña vaha cha ña cuñí sacuvi, ícan cuan sacuví.

¹⁶ Cuñí xain sacuví cha vaha, soco ña cuví sacuví, ta cha tyicuan caa tiin cuenda vatyí ley chahnu Nyoo, vaha chí.

¹⁷ Ñima ca mai sacuví cha ña vaha, soco cuatyí cha iyó chíi, ícan cuan sacuví cha ña vaha.

¹⁸ Vatyí chité vatyí iyó cuatyí cha cuenda coño ñuhi. Yucuan chaha ñahri cha vaha sacuví, vatyí quichí cuví iñi sacuvi cha vaha, soco ña cuví.

¹⁹ Cuñí sacuví cha vaha, soco ña sacuví ta sañihí que sacuví cha ña vaha.

²⁰ Ta tatu sacuví cha ña cuñí sacuvi, ñima ca mai sacuví, soco cuatyí cha iyó chíi, ícan cuan sacuví.

²¹ Ta tyehe caa iyó noo cha tahin, tatu cuñí sacuvi cha vaha, maa ri cha ña vaha sacuví.

²² Vatyí chichi añime tahán xaan iñi ley Nyoo.

²³ Soco iyó inga ley chichi coño ñuhi, ta ña tahán iñi chí cuhva cha tahán iñi añime. Ta chahá chí cha cunyaca ñaha cuatyí cha iyó chichi coño ñuhi chíi.

²⁴ ¡Ndahvi yuhu ra ndahvi! ¿Yóo ra cusacacu chíi tacuhva ma cunai nuu Nyoo chíhin cuhva ña vaha cha nyacuví coño ñuhi?

²⁵ Noo tuhun ri maa Nyoo sacacú ra chíi cha cuenda ra Jesucristo. ¡Tyahvi nyoo chí Nyoo cha cuenda cuan! Ta vityin nyehí vatyí chíhin añime cuñí sacuví ley Nyoo, soco coño ñuhi cuñí chí sacuví chí ley cuatyí.

8

Tatyí Ii Nyoo tyinyeé chí chí yo ta cuví coo yo noo ñayiví chaa

¹ Soco vityin, Nyoo ma tachi tuñi ca ra chí ñu ndú ñin ri chíhin ra Cristo Jesús, ta ña iyó ca ñu cuhva cuñí coño ñuhu ñu, soco iyó ñu cuhva cuñí Tatyí Ii ra.

² Ta tyicuan caa tucu yuhu, Tatyí Ii Nyoo nyacá ñaha chíi vityin vatyí ndachí chí chíi, ta chahá chí noo ñayiví chaa coi cha cuenda cha ñin ri cuví chíhin ra Cristo Jesús. Ta vityin ña nyacá ñaha ca ley cuatyí ta tuhun chíhi chíi.

³ Nyoo sacuvĭ ra noo cha ña cuvĭ sacuvi ley cha quehĕn cuenda ra Moisés, vatyi ña cuvĭ chasaha chi coño ñuhu cuatyĭ yo cha nyacá ñaha chi yo. Yucuan chaha Nyoo saquichĭ ra chi Sehe ra. Quichĭ ra chihin noo coño ñuhu tari maa yo, ta chihĭ ra cha cuenda cuatyĭ yo, ta sandihĭ ra tuhun cha nyacá ñaha cuatyĭ chi yo.

⁴ Sacuvĭ Nyoo tyehe caa tacuhva cuvĭ sacuvi yo kuhva catyĭ ley ra, vatyi ñima ca kuhva cuñĭ coño ñuhu yo iyó yo, soco iyó yo kuhva cuñĭ Tatyĭ Ii Nyoo.

⁵ Vatyi ñu iyó kuhva cuñĭ coño ñuhu, kuhva cuñĭ chi chicá xiñi ñu, soco ñu iyó kuhva cuñĭ Tatyĭ Ii Nyoo, kuhva cuñĭ Tatyĭ Ii Nyoo chicá xiñi ñu.

⁶ Ta ñu chicá xaan xiñi maa maa ri tuhun cha cuñĭ coño ñuhu ñu, cunaa ñu nuu Nyoo. Soco ñu chicá xiñi kuhva cuñĭ Tatyĭ Ii. Iyó cha taxi ri añaima ñu ta cucoo ñu ñayivĭ tyicuan ri maa chihin Nyoo.

⁷ Ñu cha maa maa ri kuhva cuñĭ coño ñuhu chicá xiñi, ñu xaan iñi chi Nyoo cuvĭ ñu, vatyi ni ña cuñĭ ñu ta ni ña cuvĭ sacuvi ñu cha catyĭ ley ra.

⁸ Yucuan chaha ñu iyó kuhva cuñĭ coño ñuhu, ña cuvĭ sacuvi ñu kuhva tahán iñi Nyoo.

⁹ Soco nyoho ña iyó ca ndo kuhva cuñĭ coño ñuhu, vatyi tatu ndicha cha iyó Tatyĭ Ii Nyoo añaima ndo, iyó ndo chihin cha ñn ri cuvĭ ndo chihin Tatyĭ Ii Nyoo. Ñu cha yori Tatyĭ Ii ra Cristo ñohó añaima, ñima ñu cuenda ra Cristo cuvĭ chi ñu.

¹⁰ Soco ñu iyó ra Cristo añaima, nyitó añaima ñu vatyi sanduvahá Nyoo. Soco coño ñuhu ñu chihĭ chi cha catyĭ cuatyĭ.

¹¹ Nyoo sanandotó ra chi ra Jesús cha yahá cha chihĭ ra. Ta tyicuan caa tucu nyoho, tatu iyó Tatyĭ Ii Nyoo añaima ndo, cusanandoto tucu Nyoo chi coño ñuhu ndo chihin Tatyĭ Ii ra.

¹² Ta tyicuan caa yañi, nyaá noo cha nyaá siqui yo cha sacuvi yo, soco ñima cha sacuvi yo kuhva cuñĭ coño ñuhu yo.

¹³ Vatyi tatu iyó ndo maa maa ri kuhva cuñĭ coño ñuhu ndo, cunaa ndo nuu Nyoo. Soco tatu iyó ndo kuhva cuñĭ Tatyĭ Ii Nyoo chihin tunyee iñi ra, cuvĭ chasaha ndo chi cha quiñi caa cha cuñĭ coño ñuhu ndo ta cuconyito ndo cha ndicha cuii.

¹⁴ Vatyi tandihĭ ñu sacuvĭ kuhva saquehĕn ityi Tatyĭ Ii Nyoo, sehe Nyoo cuvĭ chi ñu.

¹⁵ Nya quivi cha tĭin cuenda yo Tatyĭ Ii Nyoo ta ña yuhvĭ ca yo chi ra, vatyi ñima tari noo ra nyacá ñaha chihin cha xaan cuvĭ ra, ta vityin nanduvĭ yo sehe ra. Tatyĭ Ii sacahán chi yo na cahan yo chihin Nyoo tyehe caa: “Sutu Mañi yuhu”, catyĭ yo chi ra.

¹⁶ Ta suri maa Tatyĭ Ii cuan ndu ñn ri chi chihin cha chiñi tuñi yo ta sacoto chi chi yo vatyi cha cuvĭ yo sehe Nyoo.

¹⁷ Ta cha cuenda cha cuvĭ yo sehe ra, iyó ityi chi yo cha ñihi yo cha vaha cha catyĭ Nyoo tyi kuhva ra chi yo, ñn ri chihin ra Cristo. Vatyi tatu ñn ri nyehé yo tĭndoho chihin ra Cristo, suri ñn ri cucahnu yo chihin ra.

¹⁸ Chité vatyi tĭndoho cha nyehé yo vityin, noo cha luhlu ri cuvĭ cha nuu cha tyaqui cha cunyehe yo nachaa yo nuu nyaá Nyoo.

¹⁹ Tandihĭ cha savahá Nyoo cuñĭ xaan chi nyehé chi, ta nyatú chi quivĭ cha cusañaha ra yóo cha cuvĭ tandihĭ sehe ra.

²⁰ Vatyi tandihĭ cha savahá Nyoo tivĭ chi. Vasi ña cuñĭ chi tivĭ chi soco Nyoo chahá ra cha tivĭ chi cha cuenda cuatyĭ cha sacuvĭ ñayivĭ. Soco catyĭ Nyoo tyi coo quivĭ ta cunduchaa tucu chi inga chaha.

21 Tandihí cha savahá Nyoo ta cunduchaa tucu chi inga chaha, ta ma cutivi ca, quivi cha cunasama Nyoo cuhva iyó chi vityin. Ta cucusi# cuñí chi #n ri chihin tandihí sehe Nyoo vatyí ma tiví ca chí.

22 Chitó yo vatyí tandihí cha savahá Nyoo ta nyehé xaan chí tindocho. Cahnu xaan tindocho nyehé chí tari cha uhví cha nyehé noo ñaha síhi cha cacú sehe ña.

23 Ta ñima maa ri maa chí nyehé tindocho, soco nyehé tucu yoó. Vasi cha natin cuenda yo Tatyí lí cha chahá quiyí Nyoo chí yo, soco cahnu xaan tindocho nyehé yo, vatyí cuñí xaan yo cha tahán ri chí quivi cha cunanduvi yo sehe ra. Vatyí cunasama ra cuhva iyó coño ñuhu yo.

24 Vasi ta ñihi ca yo tandihí cuan soco chító yo tyí cuñihi yo vatyí chino ñi yo ta chihin cuan cacu yo. Tatu nyatú yo cha cutahan chí chí yo, cuñí chí catyí vatyí ta ñihi ca yo. Tatu cha yahá ñihi yo chí chí, ma cuatu ca yo.

25 Soco tatu yihí ñi yo cha ñihi yo noo cha ta nyehe ca yo, cuñí chí cha cuatu yo chihin cha cama ñi yo.

26 Ta suri tyicuan caa tyinyeé tucu Tatyí lí chí yo chihin cha vita cuñí yo vatyí ña chító yo yoso caa cacan tahvi yo chí Nyoo cuhva tahán chí. Ta Tatyí lí cuan chicán tahvi chí chí Nyoo cha cuenda yo chihin noo tuhun cha ña cuví nacatyí yo.

27 Chító maa Nyoo ñáá cha caá ñima yo, ta chító ra ñáá cha cuñí Tatyí lí ra cacan chí, vatyí chicán chí cuhva cuñí maa ra cha cuenda ñáyivi cuenda ra.

28 Chító yo vatyí ñáyivi, ñu cuñí vavaha chí Nyoo, tandihí cha cuví chí ñu ta tyinyeé chí chí ñu, vatyí maa ñu cuví ñu nacachí ra, tari cuhva tyaa ra cuhva chí ñu.

29 Vatyí nya quivi xihna ri, ta cha ñohó nuu Nyoo yóó cuví ñu cucunyicon chí ra. Ta tyaa ra cuhva chí ñu vatyí cucuvi ñu tari Sehe ra, ra Jesucristo, tacuhva vatyí cucuvi ra ra cha ñihi ca cha nuu tandihí ca yañi ra, ñu yihí tuhun Nyoo.

30 Ta ñu cha tyaa Nyoo cuhva tyí cuví ñu sehe ra, nacana tucu ra chí ñu. Ta ñu cha nacana ra, suri sacuvahá ra chí ñu nuu ra. Ta ñu cha sacuvaha ra chí, chahá ra cha cucahnu cuví ñu chihin ra.

31 ¿Ñáá cha catyí yo cha tyicuan caa? Tatu Nyoo ta nyaá ra tumañi ñi chí yo, ¿yóó cha cuví tyaa cuatyí siqui yo? Yori.

32 Nyoo ña catyí ra cha ma cuhva cuenda ra sehe ra, soco chahá cuenda ra chí ra vatyí cuví ra cha cuenda tandihí yo. Ta tatu tyicuan caa, ¿atu ma cuhva tucu ra tandihí ca cha chiñuhú chí yo #n ri chihin Sehe ra? Cuhva ra.

33 ¿Yóó cha cuví tyaa cuatyí siqui ñu cha nacachí Nyoo? Yori. Vatyí Nyoo ican ra cuví ra sahá ra tuhun tyí vaha ñu nuu ra.

34 ¿Yóó cha cuví catyí tyí cuhun yo anyaya? Yori. Vatyí ra Cristo cuví ra chihí cha cuenda cuatyí yo, ta nandoto ra ta vityin nyaá ra chiyo vaha ndaha Nyoo, ta chicán tahvi ra nuu Nyoo cha cuenda yo.

35 Ñahri cha cuví sacuachiyo chí yo chihin cuhva cuñí xaan ra Cristo chí yo. Vatyí vasi nyehé xaan yo tindocho, vasi iyó tisihi, vasi cahán ñáyivi chí yo cuenda tuhun Nyoo, vasi iyó tama, o ñahri sahna yo, vasi yuhví yo, vasi chihí yo, soco ma cuví sacuachiyo tandihí tindocho cuan chí yo chihin cuhva cuñí ra chí yo.

36 Vatyí tyehe caa cahán chí nu tutu Nyoo tuhun tindocho cha cunyehe yo: Cha cuendon, Sutu Mañi yuhu, ta cuñí cahñi ñáyivi chí ndi tandihí quivi. Ta tari noo mbee cha cua cahñi ñu, tyicuan caa sacuví ñu chí ndi, catyí chí.

37 Soco vasi yahá yo tandihí tindocho cuan, soco cucuvi vaha ca chasaha yo cha cuenda ra cha cuñí xaan chí yo.

38 Yucuan chaha chitó vahi vatyí ñahri maa cha cuví sacuachiyo chí yo chihin cuhva cuñí xaan Nyoo chí yo. Ni tuhun chíhi, ni ñáyiví iyó yo, ni ángel, ni tatyí ña vaha, ni cha cuví vityin, ni cha cucuvi ityi nuu ca, ni noo cuan, ta ma cuví sacusin chí chí yo chihin Nyoo.

39 Ni cha iyó nu sucun, ni cha iyó nu cono xaan, ni nonga cha savahá Nyoo, ma cuví sacusin chí chí yo chihin Nyoo, ra cuñí xaan chí yo cha cuenda ra Cristo Jesús Sutu Mañi yo.

9

Nyoo nacachí ra chí ñu ñuu Israel

1 Cahín cha ndicha, tari tuhvá cahán noo ra chinó iñi chí ra Cristo. Ña sandaví ñahi, vatyí Tatyí Ii Nyoo ican saquehén ityi cha chíñi tuñi xiñi. Yucuan chaha chitó vahi vatyí cha ndicha cahín nu catyí tyi

2 cuihya xaan cuñí ta tyicuan ri uhvi cuñí añime

3 cha cuenda ñu ñui ñu Israel. Cuñí xain chí ñu. Ta nyacua cuhve añime na cuhun maa nu uhvi, tyehe ta cuví cacu añima ñu cha tyicuan caa.

4 Ta maa ñu, tata ra Israel vachi ñu. Ta Nyoo naquehén cuenda ra chí ñu tari cha sehe ra. Ta sañahá ra cuhva caá ra chí ñu, tyi cahnu xaan ra cuví ra, vatyí chinyaá ra chihin ñu. Ta natyihí tahan ra tuhun chihin ñu, ta chahá ra ley ra chí ra Moisés vatyí cuhva ra chí ñu. Ta sañahá ra cuhva cuñí ra cha sacahnú ñu chí ra. Ta catyí ra chí ñu yoso caa cusacuví ca ra cha vaha chihin ñu nu cuahan ca chí.

5 Tata ñu sutu chahnu yo cuví chí ñu, ta tata ñu, ican cuví chí ra Cristo cuenda coño ñuhu ra. Ican ra cuví Nyoo. Ta ican ra cuví ra nyacá ñaha tandihí cha iyó. ¡Na sacahnu yo chí ra tyicuan ri maa! ¡Ta na cuví chí tyicuan caa!

6 ¿Atu catyí vatyí ña sacuví Nyoo tari cuhva catyí ra chí ñu Israel ta cha naha? Ñima. Soco cuñí chí coto yo tyi ña tandihí ñáyiví Israel cuví ñu ñu Israel cha ndicha.

7 Ña tandihí ñu tata ra Abraham ta cuví ñu sehe ra cha ndicha. Vatyí tuhun cha cahán maa Nyoo chihin ra, cahán chí cha cuenda noo ri sehe ra. Vatyí catyí Nyoo chí ra tyehe caa: “Cha cuenda ra Isaac sehun cucoo ñáyiví chuun.”

8 Ihya sañahá chí yo vatyí ñima cha cuenda tata cha vachi ñáyiví ta cuví ñu ñáyiví cuenda Nyoo. Soco tandihí ñáyiví chinó iñi tuhun catyí Nyoo tyi cusacuví ra, ican ñu cuví ñu sehe ra cha ndicha.

9 Vatyí cha catyí Nyoo tyi cuhva ra chí ra Abraham, ican cuví ihya: “Quiví cha tahán chí, cuquichi nu nyicú ndo ta cu Sara cucoo noo sehe ña”, catyí Nyoo chí ra.

10 Ta ñima yucuan ri. Vatyí ni nduvi sehe cu Rebeca, ñin ri sutu ra, sutu chahnu yo, ra Isaac.

11-12 Soco cha ni cumañi ca cacu ndotyin, ta sacuví ca ndotyin ni cha vaha, ni cha ña vaha, ta catyí Nyoo chí cu Rebeca: “Sehun cha ñihi ca cucuvi ra musu ra cha luhlu ca.” Sacuví Nyoo tyicuan caa vatyí cachí ra chí ñáyiví cha cuñí maa ra, ta ñima cha cuenda cha sacuví ñu.

13 Tari catyí ra nu tutu ra tyehe caa: “Cuñí que chí ra Jacob, ta chí ra Esaú ña cuñí.”

14 ¿Tu tyicuan caa ñáá cha cucatyí yo? ¿Atu cuví catyí yo tyi ña vaha cha sacuví Nyoo? ¡Ma cuví!

15 Vatyí catyí ra chí ra Moisés tyehe caa: “Cu cundahvi cuñi yóo ñáyivi cuñi mai cundahvi cuñi.”

16 Ta tyicuan caa chitó yo vatyí ma cundahvi cuñi Nyoo nyehe ra chí ñáyivi cha cuenda cuhva cuñi maa ñu, o cha cuenda cha sacuvi ñu. Soco cuhva cuñi maa Nyoo cucuvi. Vatyí maa ra cuví ra cundahvi iñi yóo chí cuñi maa ra.

17 Vatyí nu tutu ra, catyí ra chí rey Egipto tyehe caa: “Sacuvi rey chuun tacuhva sañahí tunyee iñi cha iyó chii chí ndo, ta tandihí ñáyivi cucoto ñu yóo ra cuví yuhu”, catyí Nyoo.

18 Ta tyicuan caa Nyoo cundahvi cuñi ra yóo ñáyivi cuñi maa ra. Ta suri sandundavá tucu ra añima ñu cuñi maa ra sandundava ra.

19 Ta cu catyun chii: “Tatu tyicuan caa, ¿ñáá tuhun cha tyaá Nyoo cuatyí siqui ñáyivi? Vatyí ¿yóo cha cuví nacahnu cuhva cuñi ra? ¡Yori!”

20 Soco ña vaha cuhva chicá iñun cha tyicuan caa. Vatyí yori cuví catyí tyi ña vaha cha sacuvi Nyoo. ¿Yóo ra cuví yoho vatyí nacahun nu cahán Nyoo? ¿Atu cuví catyí quisi ñuhú cuan chí ñu cha savahá chí chí vatyí ña tahán iñi chí cuhva cha savahá ñu chí chí? Ma cuví.

21 Vatyí ñu cha savahá ndaha tyiño iyó ityi chí ñu savahá maa ñu ñáá cha cuñi ñu chihin nyahyu cuan. Chihin nyahyu cuan cuví savaha ñu noo quisi finu xaan. Ta cuví savaha tucu ñu noo cha ndahvi ri.

22 Tyicuan caa tucu Nyoo, iyó ityi chí ra cha tachí tuñi ra chí ñáyivi quiñi iyó cha cuenda cha sacuvi ñu cha ña vaha. Ta cuví sañaha ra chí ñu tyi iyó xaan tunyee iñi chí ra. Soco sanyee xaan ra iñi ra chihin ñáyivi cuan. Ta chí maa ñu tahán chí tachí tuñi ra. Ta tahán chí sanaa ra chí ñu.

23 Ta iyó tucu ityi chí ra cha sahá ra tucahnu iñi chí ñu savahá maa ra vatyí sañahá ra tyi cahnú ra cuví ra. Maa ñu cuví ñu ñu cachí ra vatyí cuñihi ñu tandihí cha vaha, ta cucoo ñu gloria chihin ra.

24 Ta suri maa yo cuví ñu cuan. Vatyí Nyoo caná ra chí yo. Yihí yo cuví yo ñu Israel, ta yihí yo cha ñima ñu Israel cuví yo.

25 Tari catyí Nyoo nu tutu cha tyaá ra Oseas tyehe caa: Ñu cha ñima ñu ñui cucatyí yuhu tyi ñáyivi chii cuví chí ñu. Ñu cha ña cuñi, cunacuñi chí ñu, catyí Nyoo.

26 Ta suri nu catyí Nyoo chí ñu tyehe caa: “Nyoho ñima ñáyivi chii cuví ndo.” Ta suri yucuan cunacatyí tucu ra chí ñu: “Sehe yuhu, ra cuví Nyoo nyito, cuacuvi ndo.”

27 Soco cha cuenda ñu Israel catyí ra Isaías tyehe caa: “Vasi cuaha xaan ñáyivi ñu Israel tari cha cuaha niyiti iyó yuhu tyañuhu, soco suhva ri ñu cucacu.

28 Vatyí Sutu Mañi yo numi ri cusacuvi ra tandihí cha catyí ra tyi cusacuvi ra siqui ñuhu ñáyivi chihin cha cachí.”

29 Tari catyí tucu ra Isaías ta ityi chata ca tyehe caa:

Tyehe ta Sutu Mañi yo ra nyacá ñaha tandihí cha iyó andivi, ta ma sacacu ra chí suhva yo, cunaa tandihí yo,

Tari naá ñáyivi Sodoma ta ñu Gomorra ta cha naha.

Ñu Israel nducú ñu cuhva cuvaha ñu nuu Nyoo soco ña ñihí ñu cuhva

30 ¿Tatu tyicuan caa, ñáá cha catyí yo? Ñáyivi cha ñima ñu Israel cuví, ña nanducú ñu cuhva cuvaha ñu nuu Nyoo, ta ican ñu cuví ñu cuvahá nuu ra cha cuenda cha chinó iñi ñu chí ra.

31 Ta ñu Israel nyicón xaan ñu ley, tyi cuñi maa ñu tyi cuvaha ñu nuu Nyoo chihin cuan, soco ña cuví.

³² ¿Ñáá tuhun? Vatyí cuñí ñu cuvaha ñu nuu Nyoo chihin cha sacuví ñu ley cuan, ta ña cuñí ñu cuvaha ñu nuu ra chihin cha chinó iñi ñu chi ra. Yucuan chaha vatyí tari cha catyihí chaha ñu chihin noo yuu cuví chi cuan.

³³ Yuu cuan cahán Nyoo tuhun nu tutu ra tyehe caa:

Ñuu Sión, yucuan tyai chi noo rayi cha cuví tari noo yuu.

Noo yuu cha sanduvá chi ñáyivi cuví ra.

Soco ñu chinó iñi chi ra ma cucahan nuu ñu, catyí Nyoo nu tutu ra.

10

¹ Yañi, cuñí xain chihin cha tandihi añime cha cacu ñu Israel. Ta cha chicán tahvi xain cha cuenda ñu.

² Cha ndicha cuví vatyí cuñí xaan ñu sacahnú ñu chi Nyoo, soco ña ñihí ñu cuhva yoso caa tahán chi sacuví ñu.

³ Vatyí ña chitó ñu yoso caa sacuvahá Nyoo chi ñáyivi nuu ra. Ta nducú ñu cuhva sacuvaha maa ñu chi ñu, ta ña nacuhvá cuenda ñu chi ñu chi ra tacuhva sacuvaha maa ra chi ñu.

⁴ Vatyí ra Cristo cha quichi ra ta sacuví ra tandihi cha catyí ley, ta sacuví ra vatyí tandihi ñu chinó iñi chi ra, cuvaha ñu nuu Nyoo.

⁵ Catyí ra Moisés vatyí cuví cuvaha ñáyivi, soco tatu quichahá ñu cha catyí ley, vatyí catyí ra tyehe caa: “Ñu cha quichahá tandihi cha catyí ley, coo ñu noo ñáyivi cha ma naa ca maa.”

⁶ Soco cha cuvaha yo nuu Nyoo cha cuenda cha chinó iñi yo chi ra Cristo, catyí nuu tutu Nyoo tyehe caa: “Ma caca xiñun vatyí cuñí chi cha cundaa noo ra andivi ta cusanoo ra chi ra Cristo tacuhva sacacu ra chi yo.” Ma caca xiñun tyicuan caa vatyí cha yahá quichi ra Cristo.

⁷ Ni ma caca xiñun vatyí cuñí chi cha cunoo noo ra chichi ñuhú vatyí sanandoto ra chi ra Cristo, vatyí cha yahá nandoto ra.

⁸ Ma caca xiñun tyicuan caa vatyí tyehe caa catyí nu tutu Nyoo: “Tuhun Nyoo yatyin nyaá chi chihin ndo, yuhu ndo ta añima ndo nyaá chi.” Ta suri tuhun cuan sacoto ndi chi ndo, tuhun cha quichi ra Cristo ta nandoto ra. Ican cuví tuhun cha tahán chi chinó iñi yo.

⁹ Tatu chihin yuhun catyún vatyí ra Jesús cuví Sutu Mañi yo, ta chihin añimon chinó iñun tyi Nyoo sanandoto ra chi ra cha yahá chihí ra, cucacu añimon.

¹⁰ Vatyí chihin añima yo cuñí chi chino iñi yo chi ra Cristo tacuhva cuví cuvaha yo nuu Nyoo, ta chihin yuhu yo tahán chi catyí yo tyi chinó iñi yo, tyicuan ta cacu añima yo.

¹¹ Tuhun Nyoo catyí chi: “Ni noo ñu cha chinó iñi chi ra ta ma tahan ñu ticahan nuu.”

¹² Vatyí Nyoo in ri cuhva nyehé ra chi ñu Israel ta chi ñu inga ñuu. Vatyí suri maa ra cuví ra ra nyacá ñaha chi tandihi yo. Ta nasocó xaan ra chi tandihi yo cha chicán tahvi yo chi ra.

¹³ Vatyí tyehe caa catyí tuhun Nyoo: “Tandihi ñu cha chicán tahvi chi ra Jesús cucacu añima ñu.”

¹⁴ Soco ¿yoso caa cucacan tahvi ñu chi ra tatu ta chino ca iñi ñu chi ra? Ta ¿yoso caa cuchino iñi ñu chi ra tatu ta cuiñi ca ñu tuhun ra? Ta ¿yoso caa cuiñi ñu tuhun ra tatu ta yori ca cahán tuhun ra chihin ñu?

¹⁵ Ta ¿yoso caa cucahan ñu yihí tuhun Nyoo chihin ñu, tatu yori tachi chi ñu? Tari catyí nu tutu Nyoo: “Ñana cha tyaqui nu chaa ñu cahán tuhun vaha nuu ñáyivi.”

¹⁶ Soco ña tandihí ñu ta quichahá ñu tuhun cha sacacú Nyoo añima yo. Vatyí tyehe caa catyí ra Isaías: “Sutu Mañi yuhu, yori cuñí chino iñi tuhun cahán ndi”, catyí ra.

¹⁷ Yucuan chaha cha chiñí xihna yo tuhun ra Cristo, tyicuan ta chino iñi yo chi ra.

¹⁸ Soco ndacá tuhin ihya: ¿Atu ña chiñí ñu Israel tuhun Nyoo? ¡Chiñí ñu! Vatyí nu tutu Nyoo catyí chi tyehe caa:

Sutu Mañi yuhu, cha sacoto ñáyivi tuhun maun nicahnu siqui ñuhu ñáyivi, catyí chi nu tutu Nyoo.

¹⁹ Soco ndacá tuhin inga chaha tyehe caa: ¿Atu ña chinó iñi ñu Israel cha cuenda tyi ta nacoto ca ñu tuhun Nyoo? ¡Chitó ñu! Vatyí cha xihna ri ra Moisés tyaá ra tuhun cahán Nyoo chihin ñu Israel tyehe caa:

Nyoho, cucuquiñi cuñi ndo vatyí cucuhve cha vaha chi noo ityi ñáyivi cha ñima ri tuhun, ñáyivi cha ña cutuñí iñi.

Ta cunaquiñi tisihi ndo nyehé ndo chi ñu, catyí Nyoo.

²⁰ Ta ra Isaías caña iñi ra catyí ra tyi ñu cha ña nanducú chi Nyoo, nañihí ñu chi ra. Ta sañahá ra chi ra chi ñu cha ña ndaca tuhun tuhun ra.

²¹ Ta tyaá tucu ra Isaías tuhun cahán Nyoo chihin ñu Israel tyehe caa: “Ndiyaca cané chi ñáyivi chii, nacuhva cuenda ñu chi ñu chii, soco ña quichahá ñu. Ndava xaan iñi ñu”, catyí Nyoo.

11

Yihí ñu Israel cha ñihí ñu cuhva cacu añima ñu

¹ ¿Atu ña cuñí ca Nyoo chi ñu Israel? Ñima cha ña cuñí ca ra chi ñu, vatyí suri ra Israel cuví tucu yuhu. Vatyí tata ra Abraham ta tata ra Benjamín cuví.

² Nyata cha naha cachí Nyoo chi ñu Israel tacuhva cuví ñu ñáyivi chi ra. Ta vityin ñima cha sacuachiyó ndihí ra chi ñu, vatyí chitó ndo cha catyí nu tutu Nyoo nu chicán tahvi ra Elías, profeta Nyoo, ta catyí ra tyi ña vaha sacuví ñu Israel, ta catyí ra tyehe caa:

³ “Sutu Mañi yuhu, chahñí ñu chi ra cuví profeta maun, ta sataní ñu arta vehe ñuhu maun. Noo tuhun ri ca mai ndoo, ta cuñí ñu cahñi ndihí ñu chii”, catyí ra.

⁴ Soco nacahán Nyoo ta catyí ra chi ra Elías: “Ñima maa ri maun ndoo. Ucha ca mil ñáyivi naquehen vahi cha ña chicuiñí chiti ñu nuu xitohyo nyoo Baal”, catyí Nyoo chi ra.

⁵ Ta suri tyicuan caa vityin, ndoo suhva ñu sacahnú chi Nyoo. Ican ñu nacachí Nyoo chii tyi cusaha ra tucahnu iñi chi ñu.

⁶ Vatyí cha cuenda cha vaha ñáyivi cuví Nyoo ta sahá ra ticahnu iñi chi yo. Tyehe ta chihin cha vaha ñáyivi cuví maa yo ta sahá Nyoo tucahnu iñi chi yo, cuñí chi catyí tyi ñima ca chihin cha vaha maa ra ta sacacú ra chi yo.

⁷ Ta ¿yoso caa? Ñu Israel nanducú xaan ñu cuhva cuvaha ñu nuu Nyoo soco ña ñihí ñu cuhva. Soco ñu cha nacachí maa Nyoo chii, ñihí ñu cuan cuhva. Ta inga ñu Israel cuan ndundava xaan añima ñu.

⁸ Tari catyí nu tutu Nyoo tyehe caa: “Nyoo chahá ra noo cuhva chi ñu cha ma cutuñi iñi ñu. Ta chahá ra chiti nuu cha ña cutuñi iñi ñu cha nyehe ñu. Ta chahá ra soho ñu soco ña cutuñi iñi ñu cha chiñí ñu, ta nyacua nya vityin ta tyicuan caa ñu.”

⁹ Ta suri catyí tucu ra David tyehe caa:

Sii xaan cuñi ñu chihin vico cha iyó ñu, soco yucuan cuví trampa cha sanacava chi ñu. Ta cha cuenda cuan ta cutachi tuñi Nyoo chi ñu.

¹⁰ Ta tari cha cunducuaa ñu vatyí ma ndichin ca nyehe ñu cha ndicha.

Ta tyicuan ri cucoso cha vee chata ñu, catyí ra David tuhun ñu Israel cha ña chinó iñi chi Nyoo.

Yoso caa cuvaha ñu cha ñima ñu Israel cuví nuu Nyoo

¹¹ Ta vityin ndaca tuhin ihya: ¿Atu cha cuenda cha ña quichaha ñu Israel cuan nu cahán Nyoo, ta ndoó ri maa ñu cha ma cacu ca añaima ñu? Ñima. Vatyí cha cuenda cha ña quichaha ñu chi ra cha saquichi Nyoo, yucuan chaha sacacu Nyoo chi inga ñu cha ñima ñu Israel cuví. Ta tyicuan caa ta cuquiñi cuñi ñu Israel vatyí nachino iñi inga ñáyivi. Ta cha tyicuan caa ta cuquichi cuví tucu iñi ñu cha cacu añaima ñu.

¹² Tatu cha cuenda cha ña quichaha ñáyivi Israel cuhva cha chaha Nyoo chi ñu, cuví chi cha vaha cha cuenda tandihi ca ñáyivi, vatyí chahá chi cuhva, ta cuaaha xaan ñu nachino iñi ñu chi ra Cristo, nyaca cuví quivi cundihvi tucu ñu Israel cuenda Nyoo inga chaha. Yucuan quivi, vaha xaan ta tyaqui xaan cucuvi.

¹³ Ta iyó suhva cha cuñi catyí chi nyoho cha ñima ñu Israel cuví ndo, vatyí ra Jesús tyatyíño ra chii cha cuhin nu iyó ñáyivi cha ñima ñu Israel cuví. Ta chité vatyí niñi xaan cuví tyiño cha chaha maa Nyoo chii.

¹⁴ Ta cuñi tiqui vatyí cunyehe ñáyivi Israel ñu ñui cuhva chinó iñi ndo chi Nyoo, ta cuquichi cuví iñi tucu suhva maa ñu sacuvi ñu tyicuan caa. Ta tyicuan caa ta cacu añaima ñu.

¹⁵ Vatyí cha cuenda cha ña natin cuenda Nyoo chi ñu Israel cuví cuvaha inga ñáyivi nuu ra. Vaha xaan cha tyicuan caa ta nyaca cuví quivi cunatin cuenda tucu ra inga chaha chi ñu Israel, cucuvi tari cha cunandoto ñu nu chihí ñu.

¹⁶ Tatu vaha noo pan cha savaha yo cha xihna ri chihin yuchan pan cuan, vaha tandihi ca yuchan cuan. Ta tatu vaha yoho noo yutun, tandihi ca soco tun, ta vaha. Ta tyicuan caa tucu ñu Israel, cuñi Nyoo chi ñu cha cuenda cha vaha ra cha vachi ñu tata.

¹⁷ Ta ñu Israel cuví ñu tari noo soco noo tu olivo vaha cha cumí Nyoo. Ta chahnya Nyoo chi suhva ñu vatyí ña chingo iñi ñu chi ra. Ta chaha tu olivo cuan natyaa tahan ra soco noo tu olivo cuhu. Ta maa ndo cuví tari tu olivo cuhu cuan. Ta tari cha natyaa tahan ra chi ndo chaha tu olivo cha xihna ri cuan. Ta tyicuan caa ndu in ri ndo chihin tu olivo Nyoo ta naquehén ndo tandihi cha vaha cha iyó chi ra.

¹⁸ Soco ma saha ndo tyi vaha ca ndo ican saha inga ñu cha cuví soco tu olivo cha chahnya Nyoo. Vatyí tatu cuñi maa ndo tyi vaha ca ndo, cuñi chi nichon iñi ndo vatyí ñima maa ndo nyisó ndo chi yoho yutun cuan, soco maa yoho yutun cuan nyisó chi ndo.

¹⁹ O catyí ndo: “Ican, soco chahnya Nyoo soco yutun cuan tacuhva nicunyaa maa ndi chaha tun.”

²⁰ Vaha. Soco chahnya Nyoo soco cuan cha cuenda tyi ña chingo iñi ñu chi ra. Ta nyoho nicunyaa ndo yucuan, soco cha cuenda cha chinó ri iñi ndo chi ra. Yucuan chaha ma sacahnu ndo chi ndo, soco saha ndo cuenda chi ndo.

²¹ Vatyí tatu ña saha Nyoo ticahnu iñi chi ñu cha cuví soco vaha cuan, ni chi nyoho ta ma saha ra ticahnu iñi tatu ña chinó vaha iñi ndo chi ra.

²² Nyehe yoso cha vaha Nyoo, soco tyicuan tucu xaan ra chihin ñu cha ña natin cuenda tumañi iñi chahá ra. Soco chihin nyoho, vaha xaan ñáyivi cuví

ra. Soco cuñí chi cha naquehén vaha ndo tumañi iñi cha chahá ra vatyi tatu ña naquehén vaha ndo, cucahnya tucu ra chi nyoho.

²³ Soco tatu nachino tucu iñi ñu Israel inga chaha, cu nicunyaa tucu ñu nu coyo ñu. Vatyi Nyoo iyó tunyee iñi chi ra cha natyatahan tucu ra chi ñu cuan inga chaha.

²⁴ Vatyi tatu nyoho cha ñima ñu Israel cuví ndo, ta quehen Nyoo chi ndo cha cuví ndo tari soco noo yutun olivo cuhu, ta natyaq̄ tahan ra chi ndo chihin tu olivo vaha cha cumí ra, ¡ta nyaca cuví ñu Israel cha cuví ñu soco tu olivo vaha! ¡Cunatyaa tahan chaa ra chi ñu inga chaha chaha tu olivo nu coyo ñu!

Nu ndihi ta cucacu tucu ñu Israel

²⁵ Vatyi yañi, cuñí cha coto ndo noo tuhun xehe cha sacuví Nyoo, tacuhva vatyi ma caca xiñi ndo vatyi chitó xaan ndo. Vatyi ñu Israel ndundavañ añima ñu suhva quivi, nyacua nya cha cuví nachino iñi inga ñáyivi chi Nyoo.

²⁶ Ta cha yaha quihvi inga ñu cuenda Nyoo, tyicuan ta tandihi ñu Israel cucacu añima ñu, vatyi nu tutu Nyoo catyí chi tyehe caa:

Ra cha cusacacu chi ñáyivi, ityi Sión cuquichi ra.

Ta cusacanyaha ra cuatyí cha iyó chi ñáyivi chi ra Jacob.

²⁷ Ta ihya cuví tuhun cha cunatyihí tahin chihin ñu, quivi na sacuachiye cuatyí ñu, catyí Nyoo nu tutu ra.

²⁸ Cuxaán xaan ñu Israel chihin Nyoo cha cuenda tuhun vaha ra Cristo cha cacu añima yo. Ta tyicuan ta cuví chino iñi maa ndo. Soco Nyoo tacuhva cuñí ri maa ra chi ñu Israel tata ra Abraham, ta ra Isaac, ta ra Jacob vatyi cachingo iñi ra chi ra quivi cachiyo ra, ta yucuan chaha cachí ra chi ra.

²⁹ Vatyi noo cha cha yaha chaha Nyoo ña natinyaá ra. Ni ña ndu uvi iñi ra cha yaha nacana ra chi yo.

³⁰ Nyoho, ta ityi chata ca, nacahnú ndo nu cahán Nyoo. Soco vityin, Nyoo cundahvi cuñi ra nyehé ra chi ndo cha cuenda vatyi ñu Israel nacahnú ñu nu cahán ra.

³¹ Nacahnú ñu nu cahán Nyoo vityin tari nacahnú maa ndo quivi cuan. Ta tari cundahvi cuñi Nyoo nyehé ra chi ndo vityin, tyicuan caa tucu cucundahvi cuñi ra nyehé ra chi ñu Israel ñandihí.

³² Vatyi Nyoo chahá ra ityi chi tandihi ñáyivi cha nacahnú ñu nu cahán ra, tacuhva vatyi cundahvi cuñi ra nyehé ra inuu ri chi tandihi yo.

³³ ¡Ñana cha cahnu cuví cha tyayí Nyoo! ¡Ñana cha vaha cha chitó xaan ra, ta cha chiñi tuñi ra! Ma cuví nacatyí yo cuhva chicá iñi ra, ni ma chaa yo cutuñi iñi yo cuhva sacuví ra.

³⁴ Vatyi zyóo cha cutuñi iñi cuhva chicá xiñi Sutu Mañi yo? ¿O yóo cha sañahá chi ra? Yori.

³⁵ Vatyi yori cha cuví cuhva xihna ca noo cha vaha chi Nyoo ta cha cuenda cuan ta quihí iñi ñu vatyi na cuhva tucu Nyoo chi ñu.

³⁶ Vatyi tandihí maa cha iyó, maa Nyoo savaha, ta chingo chi ta iyó chi cha cuenda ra. ¡Cahnu xaan ca cuví Nyoo tyicuan ri maa! Ta na cuví chi tyicuan caa.

12

Na coo yo noo ñáyivi cha sacuvi yo cuhva cuñi Nyoo

¹ Yucuan chaha yañi, chacú ndahvi nuu ndo cha cuenda cha ndahvi cuñi Nyoo nyehé ra chi yo, na nacuhva cuenda yo coño ñuhu yo chi ra, tari noo

ofrenda cha nyitó, ta cachi coo yo nuu ra, vatyi yucuan cuví cuhva t̄in cuenda ra cha sacahnú yo chi ra.

² Ta ma coo ca yo cuhva iyó ñáyivi iyó siqui ñuhu ñayivi ihya. Soco na nasama yo cuhva iyó yo chihin cha nduchaa cuhva chicá xiñi yo. Ta tyicuan caa ta coto yo yoso cuhva cuñi Nyoo chihin yo vatyi coto yo nya cha vaha, ta nya cha tahán iñi ra. Ta coto yo ñáá ndihi cha tahán chi sacuvi yo.

³ Nyoo, cha vatyi cha vaha ñáyivi cuví ra, ta tyatyíño ra chii vatyi cuví apóstol chi ra, yucuan chaha catyí chi tandihi nyoho vatyi ni noo ndo ta ma caca xiñi ndo tyi vaha ca ndo. Soco caca vaha xiñi ndo yoso cuhva iyó ndo chihin yoso cuhva cha vaha chahá Nyoo chi ndo ñin ri chihin cha chinó iñi ndo chi ra.

⁴ Vatyi cha noo coño ñuhu, cuaha xaan cuhva iyó chi, ta ña ñin ri maa tyiño saha chi. Chiti nuu yo, noo tyiño sahá chi, ta soho yo inga tyiño sahá chi.

⁵ Ta tyicuan caa tucu yoó vasi cuaha yo, soco noo ri coño ñuhu ra Cristo cuví yo, cha cuenda cha ñin ri cuví yo chihin ra, ta ñin ri cuví yo chihin tahan yo. Tari cha noo ri coño ñuhu cuví tandihi ri yo.

⁶ S̄in s̄in tyiño chahá Nyoo chi yo, yoso cuhva cha cuñi maa ra cuhva ra chi noo noo yo. Ta cuñi chi cotyiño vaha yo cha vaha cuan. Tatu chahá Nyoo cha vaha cha sahá yo profetizar, na chino iñi yo tyi ican cuan chahá ra chi yo, ta na naquehen yo tuhun sacoto ra chi yo ta nacatyi yo chi ñáyivi.

⁷ Tatu chahá ra cha vaha cha sacuvi yo tyiño nuu inga ñu, cuñi chi sacuvi vaha yo. Tatu chahá ra cha cuví sañaha yo chi inga ñu, cuñi chi cunyaa yo tyiño cuan.

⁸ Tatu chahá ra cha cuví cuhva yo tuhun chi ñáyivi na ndu ñi iñi ñu, cuñi chi cunyaa yo tyiño cuan. Ta ñu cha chahá Nyoo xuhun chi, cuñi chi cuhva ñu chihin cha ñi iñi ñu. Tatu chahá Nyoo cha saquehen ityun chi ñu yihí cuenda ra, chihin cha ñi iñun sacuvun. Tatu chahá Nyoo cha tyinyee yo chi ñu chiñuhú cha chiñuhú chii, cuñi chi sacuvi yo chihin cha s̄i cuñi yo.

Nu catyí ra Pablo yoso caa sacuvi yo cha yihí yo cuenda ra Cristo

⁹ Cuñi ndo chihin cha ndicha chi tahan ndo. Ta c̄utasi cuñi ndo chi cha ña vaha. Ta c̄unyicon ndo cha vaha.

¹⁰ Cuñi chi cha cuñi ndo chi tahan ndo cuenda Nyoo tari cha tahan ndo cha ñin ri sihi ñin ri sutu ndo. Ta quichaha ndo chi ñu ta saha ndo ñáyivi chi ñu.

¹¹ Sañihi ndo iñi ndo. Ma cusuchan ndo. Ta sacuvi ndo tyiño nuu Sutu Mañi yo chihin cha ñi añima ndo.

¹² S̄i cuñi ndo coo ndo ñayivi, vatyi chitó ndo vatyi cucoo ndo chihin Nyoo nu cuahan ca chi. Sanyee ndo iñi ndo tatu nyehé ndo t̄indoho. Ta ma sandihi maa ndo cha cacan tahvi ndo chi Nyoo nyita ri.

¹³ Tyinyee ndo chi ñu yihí cuenda Nyoo chihin ñáá cha chiñuhú chi ñu. Vaha tyiñuhu ndo chi ñu chaa vehe ndo.

¹⁴ Vaha cahan ndo siqui ñu cha cahán chi ndo. Ta ma soco ndo chi ñu. Cacan tahvi ndo cha cuenda ñu nuu Nyoo tacuha na nasoco ra chi ñu.

¹⁵ C̄us̄i cuñi ndo chihin ñu s̄i cuñi, ta cuacu ndo chihin ñu chacú chaa cha cuihya cuñi ñu.

¹⁶ ñin ri cuví ndo chihin tahan ndo. Ta ma cahnu saha ndo chi ndo. Inuu ri saha ndo chi ndo chihin ñu ndahvi. Ma saha ndo cha chitó xaan ndo.

¹⁷ Ma sacuvi ndo cha ña vaha chihin ñu sacuvi cha ña vaha chihin ndo. Soco sañiñi ndo sacuvi ndo cha vaha nuu tandihi ñáyivi.

¹⁸ Sañiñi ndo cha coo taxi ri ndo chihin tandihi ñáyivi.

¹⁹ Yañi luhli, tatu yóo cha sataşj iñi chi ndo, ma tachi tuñi ri maa ndo chi ñu, soco saña ndo ta naţyaa ndo ndaha Nyoo na tachi tuñi maa ra chi ñu. Vatyí nu tutu Nyoo catyí chi tyehe caa: “Yuhu tahán chi tachi tuñi, yuhu cutiyiahvi chi ñu”, catyí Sutu Mañi yo.

²⁰ Ta suri catyí tucu ra: “Tatu ra xaan iñi chuun ta chisocó ra, cuhva cha cachi ra, ta tatu ityi ra ndutya, cuhva coho ra. Vatyí cha sacuvún tyehe caa, sacuvún cha nyacua nducuaaha soho ra chihin tıcahan nuu.”

²¹ Ma cuhvon cha cunyaca ñaha cha ña vaha chuun, soco sanıñun ta cuvi chasahun chi cha ña vaha chihin cha sacuvún cha vaha.

13

¹ Tandihı ñáyivı cuñı chi cha quıchaha ñu chi ra cacuvı tyiño cuenda gobiernu. Vatyí yori ra cuvı tyiño cha ñima Nyoo tyaa tyiño chi ra. Ta ra cuvı tyiño cha iyó, maa Nyoo tyısq chi ra.

² Yucuan chaha, ñu cha ña quıchahá chi ra cacuvı tyiño, cuñı chi catyi vatyı ña quıchahá ñu cuhva catyi Nyoo. Ta ñu cha sacuvı tyıcuan caa, chicoo cuatyı ñu cha cuenda cuan, ta cucutuñi chi ñu.

³ Vatyı ra cacuvı gobiernu, ña nyaá ra cha cuenda cha sayuhví ra chi ñu cha sacuvı cha vaha, soco nyaá ra vatyı tachi tuñi ra chi ñu sacuvı cha ña vaha. ¿Atu cuñún coun chihin cha ña yuhvun chi ra cacuvı tyiño? Cachi coun, ta cunyehe ra tyı vaha ñáyivı cuvún.

⁴ Vatyı nyaá ra tyiño vatyı sacuvı ra tyiño nuu Nyoo cha cuenda cha vaha chuun. Soco tatu ña cachi iyón, yucuan ndıcha cuñı chi cuyuhvun chi ra. Vatyı ña nyaá ri maa ra, soco nyaá ra vatyı tachı tuñi ra chi ñáyivı cha sacuvı cha ña vaha, vatyı tyiño cuan tyaa Nyoo chi ra.

⁵ Yucuan chaha niñi cuñı chi cha quıchaha ndo chi ra cacuvı tyiño, ñima cha cuenda cha yuhvi ndo coto tachi tuñi ra chi ndo, soco cha cuenda vatyı chıtó ndo tyı tyıcuan caa tahán chi sacuvı ndo.

⁶ Ta sını ri cha cuenda cuan tyıyahví ndo xuhun cha tava ra cuvı tyiño cha cuenda cha sanduvahá ra ñuu ndo. Vatyı yucuan cuvı tyiño tahán chi cunyyaa ra, ta cha tyıcuan caa tyiño nuu Nyoo sacuvı ra.

⁷ Cuhva ndo cha tahán chi chi minoo minoo ñáyivı. Tyıyahvi ndo cha cuenda ñáa cha tahán chi tyıyahvi ndo cha cuenda cha vaha chi ñuu ndo. Ta quıchaha ndo chi ñu cha tahán chi quıchaha ndo. Ta saha ndo ñáyivı chi ñu cha tahán chi saha ndo ñáyivı.

⁸ Ma coso yıca ndo chi ni noo ñáyivı. Soco cuñı ndo chi tahan ndo, vatyı tatu cuñı ndo chi tahan ndo sacuvı ndo tandihı cha catyı ley Nyoo cha tyaa ra Moısés vatyı sacuvı yo.

⁹ Catyı ley Nyoo tyehe caa: “Ma coo inga ñusihı o rayıı chuun tatu ñima ñasıhun o yıun cuvı. Ma cahñun chi ñáyivı. Ma suhun. Ma cahun cuendu sıquı ni noo ñáyivı. Ma quıchi cuvı iñun cha chıı ñáyivı.” Tatu ndıcha cha cuñún chi tahan, tari cha cuñún chi maun, sacuvı tucun tandihı ihya ta tandihı ca inga ca ley.

¹⁰ Tatu cuñún chi tahan, ñahri cha ña vaha cua sacuvun chi ñu. Chihin cha cuñı yo chi tahan yo, sacuvı yo tandihı cha catyı ley Nyoo cha tyaa ra Moısés.

¹¹ Chihin tuhun ihya saha yo cuenda quıvı iyó yo. Vatyı cha chaş chi cuhva cha ndoyo yo ta ma cundıhñı yo. Vatyı quıvı nachino iñi yo chi ra Cristo, naha xaan ca nyaá quıchi quıvı cucacu ndihı añıma yo, soco vıtyın cha cuyatyın.

¹² Cha cua yaha cha cha cuaa. Ta cha cua cundichin. Yucuan chaha cuñi chi sandihi yo cha sacuvi yo cha sacuvi ñu iyó nu ñaa iñi. Ta tahán chi sacuvi yo cuhva sacuvi ñáyivi iyó nu ndichin.

¹³ Cachi cuñi chi coo yo. Vatyí nu ndichin Nyoo iyó yo. Ta ma coho yo ndixi, ta ma coo yo vico nu chihí xaan ñu ndixi. Ta ni ma coo yo chihin savaha ri ñusihi o rayi. Ni ma coo viciu chi yo. Ta ma cutasi cuñi yo nyehe yo chi tahan yo. Ta ma nyiyo iñi yo nyehe yo chi ñu.

¹⁴ Soco cōo yo chihin tunyee iñi Sutu Mañi yo Jesucristo, tari noo sahma cuví tunyee iñi ra tyi ndihvi noo yo. Ta ma quihí iñi ndo cha sacuvi ndo cuhva cuñi coño ñuhu ndo.

14

Ma cahan nyaun chi tahan

¹ Tatu noo ñáyivi yihí cuenda Nyoo ta chiin ri chinó iñi ñu chi ra, ña vaha cha ma tiin cuenda ndo chi ñu. Vaha ñatiin cuenda ndo chi ñu soco ma cuví yuhu ndo chihin ñu siqui tuhun cha chicá uvi iñi ñu.

² Vatyí yihí ñáyivi cuñi maa ñu vatyí cuví cachi ñu tandihi. Ta yihí tucu ñu cha ña chinó vaha iñi ñu, ta maa maa ri yucu chachí ñu.

³ Soco ñu chachí tandihi cuan, tahán chi cha tiin cuenda ñu chi ñu cha chachí yucu ri. Ta ñu chachí yucu ri, ma cahan nyaa ñu chi inga ñu cuan. Vatyí Nyoo tiin cuenda ra chi ñu cuan.

⁴ Vatyí zyóó ñu cuví yoho vatyí cahan nyaun chi ñu cha sacuvi tyiño nuu inga ra? Vatyí tatu vaha o ña vaha sacuvi ñu soco nyehe maa ra cuví nuu chi ñu chihin ñu. Ta vaha cuquita ñu vatyí Sutu Mañi yo iyó tunyee iñi chi ra ta cutyinyee ra chi ñu tacuhva quita vaha ñu.

⁵ Inga tucu cuhva: Yihí ñu cha sacahnú ca ñu chi noo quivi ta ñima ca inga quivi. Ta yihí tucu ñu cha cuñi maa ñu vatyí inuu ri tandihi quivi. Tahan tahan yo cuñi chi coto vaha yo yoso cuhva chicá xiñi yo.

⁶ Ñu cha naquehén vaha noo quivi, naquehén vaha ñu cha cuenda cha sacahnú ñu chi Sutu Mañi yo. Ta ñu cha ña naquehén vaha cuan, suri cha cuenda cha sacahnú ñu chi Nyoo cuví. Ta ñu cha chachí tandihi cuan, suri chachí tucu ñu cha cuenda cha sacahnú ñu chi Sutu Mañi yo, ta nacuhva ñu tyahvi nyoo chi Nyoo tyi chahá ra cha cachi ñu. Ta ñu cha ña chachí tandihi, ña chachí ñu cha cuenda cha sacahnú ñu chi Sutu Mañi yo ta suri nacuhva tucu ñu cuan tyahvi nyoo chi ra.

⁷ Vatyí ni noo yo ña iyó yo chihin fuerza maa yo. Ni ñima maa yo catyí ama cúvi yo.

⁸ Vatyí tatu iyó yo, iyó yo tacuhva sacuvi yo tyiño nuu Nyoo, ta tatu chihí yo, chihí yo tyi Sutu Mañi yo naquehén cuenda ra añima yo. Yucuan chaha tatu iyó yo, o chihí yo soco chi Sutu Mañi yo cuví chi yo.

⁹ Vatyí ra Cristo chihí ra ta nandotó tucu ra vatyí tacuhva cunyaca ñaha ra chi ñu nyitó ta chi ñu chihí.

¹⁰ Soco yoho, ¿ñáá tuhun cha nyehé nyaun chi yañun? ¿O ñáá tuhun cha ña natíin cuendon chi ra? Vatyí tandihi yo cutahan chi cucuhva cuenda yo chi yo nuu Nyoo vatyí cutuñi chi yo nuu ra.

¹¹ Vatyí nu tutu Nyoo catyí chi tyehe caa: Cha ndicha ndicha cuii vatyí yuhu nyité, catyí Sutu Mañi yo. Ta tandihi cuii ñáyivi cunacuñi chiti ñu nui. Ta tandihi ñu cunacoto nuu ñu chii cha cuví Nyoo.

Ta cusacahnu ñu chii chihin nuu tandihi ñáyivi, catyí Nyoo.

¹² Yucuan chaha noo noo maa yo ta cunacuhva yo cuenda cha sacuvi yo chi Nyoo.

Ma sanacavon nu cuatyí chi yañun

¹³ Yucuan chaha, ña tahán ca chi cahan nyaa yo chi tahan yo. Soco nducu yo cuhva cha ma sanacava yo chi ñu nu cuatyí coto sandihi ñu tuhun cha chino iñi ñu.

¹⁴ Yuhu chité vatyí ñahri cha ma cuvi cachi, vatyí chinó vaha iñi chi Sutu Mañi yo Jesucristo, ta maa ra sañahá chii. Soco tatu yihí ñu chicá xiñi ñu tyi yihí cha ña vaha cachi ñu, cha cuenda maa ñu, ña vaha.

¹⁵ Soco tatu cha cuenda cha chachún ta quiñi cuñi yañun, ña ndicha cha cuñún chi ra, ñima ca cuhva cuñi Nyoo sacuvún. Ma cuhvon cha tiví noo ñu chihin cha chachún vatyí ra Cristo chihí ra cha cuenda ñu.

¹⁶ Ma cuhva ndo cha cahan ña vaha ñu siqui noo cha chaha Nyoo ityi chuun tyi cachun.

¹⁷ Vatyí cha nyacá ñaha Nyoo chi yo cuví chi noo cha cachi coo yo nuu ra. Cusí cuñi yo ta taxi ri cuñi añima yo cha cuenda Tatyí Ii Nyoo cha nyaá añima yo. Ta ña ñiñi tuhun cha chachi yo o cha chihí yo.

¹⁸ Ñu sacuví tyiño nuu ra Cristo tyehe caa, sñ cuñi Nyoo nyehé ra chi ñu, ta catyi tucu ñáyivi tyi vaha ñáyivi cuví ñu.

¹⁹ Yucuan chaha cuñi chi cha sañihi ca yo cha coo taxi ri yo chihin ñáyivi. Ta tyicuan caa ta cuví tyinyee yo chi noo noo tahan yo na cuahnu yo chihin tuhun Nyoo.

²⁰ Ma sativun tyiño sahá Nyoo añima inga ñáyivi cha cuenda noo cha chachí run. Ndicha vatyí tandihi cha chachí yo ta vaha. Soco ña vaha cha cachi yo tatu chihin cuan sanacavá yo nuu cuatyí chi inga ñu.

²¹ Yucuan chaha, vaha ca cha ma cachi yo coño, ni cha ma coho yo vinu, tatu quiñi cuñi yañi yo chihin cuan. Ma sanacava yo chi ñu nu cuatyí. Ma casi yo chihin noo cha sacuvi yo nu chinó iñi ñu chi Nyoo.

²² Tatu chinó iñun vatyí cuví cachun tandihi, vaha. Soco ma cahun tuhun cuan chihin inga ñu. Noo tuhun ri maun chihin Nyoo coto tuhun cuan. Sñ xaan cuñi yo tatu ña chicá uvi iñi yo noo cha chaha Nyoo ityi chi yo cha sacuví yo.

²³ Soco ñu cha chachí ñáá cha chachí ñu, ta chicá uvi iñi ñu, chicoo cuatyí ñu, vatyí ña chinó vaha iñi ñu tyi cuví cachi ñu. Ta tandihi cha sacuví yo chihin cha ña chiño iñi yo tyi chaha Nyoo ityi chi yo tyi sacuvi yo, cuatyí cuví.

15

Na sacuvi yo cha tahán iñi tahan yo, ta ñima cha tahán iñi ri maa yo

¹ Yoó cha ñihi nyaá yo chihin Nyoo, cuñi chi cha tyinyee yo chi ñu cha ña ñihi nyaá chihin Nyoo. Ta ma nducu yo cha tahán iñi ri maa yo.

² Tahan tahan yo cuñi chi cha sacuvi yo cuhva tahán iñi inga ñu cha cuenda cha vaha chi ñu, tacuhva cuví cuahnu ca ñu chihin tuhun Nyoo.

³ Vatyí ni ri ra Cristo ña sacuvi ra cuhva tahán iñi maa ra, soco cuví chi ra tari catyi nu tutu Nyoo tyehe caa: “Tandihí cha cahán ñáyivi chi Nyoo, chi ra Cristo cahán ñu”, catyí chi.

⁴ Vatyí tandihí cha chicunyaq nu tutu Nyoo ta ityi chata ca, chicunyaq chi cha cuenda cha cutuhva yo, tacuhva cuví cuatu yo cha cuñihi yo chihin cha cama iñi yo. Ta vaha cuñi añima yo cha cuenda cha sacuahá yo nu tutu Nyoo.

⁵ Ta Nyoo ican ra chahá cha cama iñi yo, ta chahá ra cha vaha cuñi añima yo. Na tyinyee ca ra chi yo cha coo yo chihin cha ñin ri cuví yo chihin tahan yo tari cuhva iyó ra Cristo Jesús.

⁶ Vatyí tacuhva tandihí yo ñin ri noo cuhva sacahnu yo chi Nyoo Sutu ra Jesucristo ra nyacá ñaha chi yo.

Ñáyivi ñima ñu Israel cuví, cucuíñi ñu tuhun Nyoo

⁷ Yucuan chaha tñin cuenda vaha yo chi tahan yo tacuhva vatyí sacahnu yo chi Nyoo tari tñin cuenda vaha ra Cristo chi maa yo cha cuenda vatyí sacahnú ra chi Nyoo.

⁸ Vatyí catyí yuhu chi ndo vatyí ra Cristo quichí tyinyee ra chi yo cha cuví yo ñu Israel, tacuhva sacuví ra cha catyí Nyoo chí sutu chahnu yo tyi cusacuví ra. Ta tyicuan caa ta sañaha ra Cristo vatyí Nyoo sacuví ra cha catyí ra tyi sacuví ra.

⁹ Ta quichí tucu ra Cristo tacuhva vatyí ñu cha ñima ñu Israel cuví sacahnu tucu ñu cuan chi Nyoo, vatyí Nyoo ndahví cuñi ra nyehe ra chi ñu, tari catyí nu tutu Nyoo tyehe caa:

Yucuan chaha cusacahni chuun chihin nuu ñu cha ñima ñu Israel cuví, tandihí ityí ñu iyó síqui ñuhu ñáyivi.

Ta cucate yaa cha cuenda cha sacahní chuun nuu ñu, catyí chí.

¹⁰ Ta inga tucu nu catyí chí nu tutu Nyoo tyehe caa:

Cusii cuñi nyoho ñu cha ñima ñu Israel cuví.

Cusii cuñi ndo chihin ñu Israel cha cuví ñu ñáyivi cuenda Nyoo.

¹¹ Ta inga tucu nu catyí chí nu tutu Nyoo tyehe caa:

Sacahnu ndo chí Sutu Mañi yo, nyoho ñu cha ñima ñu Israel cuví.

Tandihí ñáyivi sacahnú ñu chí ra cha cuenda cha cahnu xaan cuví maa ra.

¹² Tyaq tucu ra Isaías nu tutu Nyoo tyehe caa:

Cucacu minoo ra vachí tata ra Isaí.

Cuquichi ra vatyí cunyaca ñaha ra chí ñu cha ñima ñu Israel cuví.

Ta maa ñu cuquihí iñi ñu chí ra vatyí cusacacu ra chí ñu.

¹³ Nyoo ican ra chahá tunyee iñi chí yo ta chító yo tyi cuhva ra cha cuhva ra chí yo. ¡Na sacutu ra chí ndo chihin tusii iñi! Ta coo cha taxi ri cuñi añima ndo cha cuenda cha chinó iñi ndo chí ra, tacuhva vatyí chihin tunyee iñi Tatyí Ii ra ta quihí vaha iñi ndo cha cucuhva ra chí ndo.

¹⁴ Yañi luhli, chító vahi vatyí nyoho vaha xaan ñáyivi cuví ndo ta chító ndo tandihí, ta chító vaha ndo cuhva ndo tuhun chí tahan ndo.

¹⁵ Soco nu carta ihya ñihí xaan cahín síqui tandihí tuhun cha tyaj, tacuhva cha ma naa iñi ndo. Tyehe caa sacuví cha cuenda tyi Nyoo chahá ra tumañi iñi chíi

¹⁶ cha sacuví tyiño nuu ra Jesucristo nu nyicu ñu cha ñima ñu Israel cuví. Ta tyiño cha sacuví, ican cuví cha cahín tuhun Nyoo yoso caa sacacu ra añima ñáyivi. Tyehe caa sacuví tacuhva vatyí ñu cha ñima ñu Israel cuví, cuví nacuhva cuende chí ñu chí Nyoo tari noo ofrenda cha tahan iñi ra, vatyí cha ndundí ñu nuu ra cha cuenda Tatyí Ii ra.

¹⁷ Cha cuenda cha nacuhva cuende chíi chí ra Cristo Jesús, yucuan cuenda cuví cusii cuñi ta chité tyi vaha quitá tyiño sacuví nuu Nyoo.

¹⁸ Vatyí ña cañá iñi cahin cha ña nyehí. Soco nacatyí cha sacuví ra Cristo nu chicá noi cahín tuhun Nyoo tacuhva vatyí ñu cha ñima ñu Israel cuví quichaha ñu chí Nyoo. Ta ihya ndicha cha cahín.

¹⁹ Vatyi chihin seña ta milagru ta chihin tunyee iñi Tatyí Ii ra sacuvi ra. Ta tyicuan caa cahín tuhun cha cacu añima ñu sahá ra. Quichahí nya Jerusalén ta tandihí ityi ta nyacua nya Ilírico.

²⁰ Ta tyicuan caa saniñi cahin tuhun cha cacu añima yo maa maa ri nu ta cuiñi ca maa ñáyivi tuhun ra Cristo, tacuhva vatyi ma saha tyiñe nu quichaha saha tyiño inga ra.

²¹ Tari catyí nu tutu Nyoo tyehe caa: Cucoto ñáyivi cha ta coto ca maa tuhun ra. Ta cucutuñi iñi ñu cha ta ñaha ca maa cuiñi tuhun ra, catyí chí.

Nu tyaá ra Pablo cuhva cha cuhun ra ñuu Roma

²² Yucuan chaha ña cuvi maa tuhun cha cuhin cunyehi nu nyicú ndo, vasi cuaha xaan chaha cuñi cuhin.

²³ Soco vityin cha ndihí tyiño sahí ityi ñuu ihya. Ta cha cuaha xaan cuiya cuñi cuhin cunyehi nu nyicú ndo ta cunyai suhva quivi chihin ndo.

²⁴ Nyehí tatu cuhin cunyehi nu nyicú ndo quivi cuhin España. Ta cha yaha cha cunyehi chí ndo, nyehí tatu cuvi tyinyee ndo chíi ta cuhaa ndihí nu cuahin.

²⁵ Soco vityin cuahin ñuu Jerusalén ta nyisé suhva cha cutyinyee chí ñu cuenda Nyoo yucuan.

²⁶ Vatyi ñu vehe ñuhu ityi Macedonia ta ityi Acaya nacuaan iñi ñu cha tava ñu suhva xuhun vatyi sacuhun ñu chí ñu ndahvi ñu cuenda Nyoo cha iyó Jerusalén.

²⁷ Tyehe caa quichí cuvi iñi ñu sacuvi ñu. Ta ndicha vatyi tahán chí sacuvi ñu. Vatyi tari maa ñu Israel, ñu chinó iñi chí ra Cristo, chahá ñu tuhun Nyoo chí ñu cha ñima ñu Israel cuvi, tyicuan caa tahán chí chí ñu cuan tyinyee tucu ñu chí ñu Israel chihin cha iyó chí ñu.

²⁸ Yucuan chaha, tatu cha yaha sandai tyiño ihya, ta cha yaha nacuhva cuende xuhun ihya chí ñu Jerusalén, tyicuan ta cuhin nya España ta yahi nu nyicú ndo.

²⁹ Chitó vahi vatyi na cuhin nu nyicú ndo, cuchai chihin cha tyitu añime chihin cha vaha Nyoo cha chahá ra Cristo chíi.

³⁰ Yañi, chacú ndahvi nuu ndo na cu ñn ri ndo chihin, chihin tñdoho cha nyehí, ta çacan tahvi ndo chí Nyoo cha cuende vatyi cuñi ndo chí Sutu Mañi yo Jesucristo, ta vatyi chahá Tatyí Ii Nyoo cha cuñi ndo chíi.

³¹ Çacan ndo cha cuende, na sacacu Nyoo chíi ndaha ñu ña chinó iñi chí ra Cristo ityi Judea cuan. Ta çacan ndo cha cuenda cha nyisé ihya cha cuenda ñu cuenda Nyoo ñu Jerusalén cuan, na natñn cuenda vaha ñu.

³² Vatyi tatu Nyoo ta cuñi ra, chihin cha si cuñi quichi nyehi chí ndo ta cuvi nyitatu ñn ri chihin ndo.

³³ Ta Nyoo ra chahá cha taxi ri coo añima yo, na cunyaa ra chihin tandihí ndo. Ta ñacuvi tyicuan caa.

16

Nu sacuhún ra Pablo nocumi chí ñu amigo ra

¹ Sacoté chí ndo cha cuenda hermana Febe vatyi tyinyée xaan ña chí ñu yihí cuenda Nyoo ñuu Cencrea.

² Tñn cuenda vaha ndo chí ña tari tñn cuenda Sutu Mañi yo, tari tahán chí sacuvi ñu yihí cuenda Nyoo. Ta tyinyee ndo chí ña chihin tandihí cha chíñuhu chí ña, vatyi cuaha xaan ñu tyinyee ña chí, ta chí yuhu ñandihí.

³ Cuhva ndo nocumi chi cu Priscila ta chi ra Aquila ñu cha cutahan chihin ndi nu tyiño cha sacuví ndi cuenda ra Cristo Jesús.

⁴ Chahnya iñi ñu ñáyiví ñu quiví cuan cha cuenda cha sacacú ñu chii, yucuan chaha vatyi nacuhvé tyahví nyoo chi ñu. Ta ñima yuhu ri, soco tandihí tucu ñu cha ñima ñu Israel cuvi, ta yihí tucu ñu cuenda Nyoo.

⁵ Cuhva tucu ndo nocumi chi ñu yihí cuenda Nyoo cha candú ñn ri vehe cu Priscila ta ra Aquila. Vachi tucu nocumi chi ra tahin, ra Epeneto. Ican ra cuví ra cha xihna ca chino iñi chi ra Cristo ityi Acaya.

⁶ Cuhva ndo nocumi chi cu María. Sahá tyiño xaan ña nu nyicú ndo.

⁷ Cuhva ndo nocumi chi ñu ñui, ra Andrónico ta ra Junias, ra tahin cha ñoho chihin vehe caa. Cahnu tyiño casahá ra cuenda Sutu Mañi yo chihin tandihí ca ra sahá tyiño cuenda Nyoo. Ta xihna ca ra cachino iñi chi ra Cristo ican saha yuhu.

⁸ Cuhva ndo nocumi chi ra Amplias ra tahin cuenda Sutu Mañi yo.

⁹ Cuhva ndo nocumi chi ra Urbano, ra tahan yo cuenda tyiño ra Cristo Jesús, ta chí ra Estaquis ra tahin ñandihí.

¹⁰ Cuhva ndo nocumi chi ra Apeles. Nyehé yo tyi ndicha cha chinó iñi ra chi ra Cristo. Ta nocumi chi ñáyiví chi ra Aristóbulo ñandihí.

¹¹ Cuhva ndo nocumi chi ra ñui, ra Herodión, ta chí ñáyiví chi ra Narciso ñu cha chinó iñi chi Sutu Mañi yo.

¹² Vachi nocumi chi cu Trifena ta chi cu Trifosa, ñu casahá tyiño chihin Sutu Mañi yo. Ta chí hermana yo cu Pérsida, ñaha cha sahá tyiño xaan nu tyiño Sutu Mañi yo.

¹³ Cuhva ndo nocumi chi ra Rufo, noo ra cahnu cuví ra nuu Nyoo vatyi chinó vaha iñi ra chí Sutu Mañi yo. Ta vachi tucu noo cumi chi sihi ra Rufo. Cuví ña tari sihi.

¹⁴ Cuhva ndo nocumi chi ra Asíncrito, chí ra Flegonte ta chí ra Hermas, ta chí ra Patrobas, chí ra Hermes ta chí ra hermano cha canyicú chihin ra.

¹⁵ Cuhva tucu ndo nocumi chi ra Filólogo ta chí cu Julia ta chí ra Nereo chihin cuhva ra, ta chí ra Olimpás ta chí tandihí ñu cuenda Nyoo cha nyicú chihin ñu.

¹⁶ Nacuhva ndo noo cumi chi noo noo tahan ndo cuenda Nyoo. Tandihí ñu yihí cuenda ra Cristo saquichí ñu nocumi chi ndo.

¹⁷ Yañi, chacú ndahví nuu ndo, na saha ndo cuenda chí ñu cuñí sasiiñ chi ndo, ta nducú ñu cuhva cha nduva ndo chihin tuhun Nyoo, vatyi ñima tyicuan caa cutuhvá ndo tuhun ra Cristo. Ma cutahan ndo chihin ñu cuan.

¹⁸ Vatyi ñu cuan ñima tyiño nuu Sutu Mañi yo Jesucristo sacuví ñu, soco cuhva cuñí maa ñu sacuví ñu. Ta sandahví ñaha ñu añima ñáyiví ndahvi chihin tuhun vita cahán ñu.

¹⁹ Tandihí ñáyiví chitó yoso caa quichahá vaha ndo chí Nyoo. Yucuan chaha cusii xaan cuñí chihin ndo, ta cuñí vatyi natyihí tuñi vaha iñi ndo sacuví ndo cha vaha. Ta ñaha cutuhva ndo sacuví ndo cha ña vaha.

²⁰ Nyoo ra iyó tandihí cha taxi ri añima, numi ri cuhva ra cha saha ganaa ndo chí ra ña vaha, ta cuhva ra cha cuañi ndo siqui ra. Na nasoco Sutu Mañi yo Jesucristo chí ndo.

²¹ Ra Timoteo ra cuví ra tahin nuu tyiño sacuví ndi nuu Nyoo, saquichí ra nocumi chí ndo. Ta tyicuan caa tucu ra Lucio, ta ra Jasón, ta ra Sosipater, tandihí ra ñui cuan casaquichí ra nocumi chí ndo.

²² Yuhu ra Tercio savahi tutu ihya cha cuenda ra Pablo, suri saquichí tiqui nocumi chí ndo tyi ñn ri yihí yo cuenda Sutu Mañi yo.

²³ Saquichí ra Gayo nocumi chi ndo ñandihí. Vehe ra nyaí suri ihya ndú ñin ri ndi tandihí ñu yihí cuenda Nyoo. Ra Erasto ra cuví tesoreru ñuu ihya, saquichí ra nocumi chi ndo, ta yañi yo ra Cuarto ñandihí.

²⁴ Na cocumi Sutu Mañi yo Jesucristo chi tandihí ndo. Ta na cuví chi tyicuan caa.

Nu ndihí cahán ra Pablo ta sacahnú ra chi Nyoo

²⁵ Ta vityin na sacahnu yo chi Nyoo, vatyí maa ra cuví ra cucuhva cha cuní ñi ndo, ta ma sandihí ndo cha chinó ñi ndo tuhun ra cha sacacú ra añima yo. Ican cuví tuhun cahán ta tuhun cha sañahí cha cuenda ra Jesucristo. ñin ri cuví chi chihin tuhun cha ñohó xehe ta cha naha nyata ni cumañi chino ñuhu ñayiví.

²⁶ Soco vityin sañahá Nyoo chi yo cha cuenda tutu cha casandoꝝ ra profeta, ra cachahá cuenda tuhun ra ta cha naha. Catyí Nyoo, ra iyó tyicuan ri maa, tyí vityin tahán chi coto tandihí ñáyiví tacuhva chino ñi ñu chi ra ta quichaha ñu tuhun cahán ra.

²⁷ Nyoo noo tuhun maa ra, ta chiñi tuñi xaan ra. Na sacahnu yo chi ra cha cuenda ra Jesucristo tyicuan ri maa. Ta na cuví chi tyicuan caa.

Carta Cha Xihna Ri Sacuhun Ra Apóstol Pablo Chi ñáyivi Ñuu Corinto Cha Yihí Cuenda Nyoo

Nu tyaá ra Pablo noo tutu chi ñáyivi ñuu Corinto cha yihí cuenda Nyoo

¹ Yuhu ra Pablo, nacana Nyoo chii vatyí cuñí ra cha cuví noo apóstol ra Jesucristo, o cuñí chi catyí vatyí tachi ra chii nacaque tyiño ra. Yuhu chihin ra Sóstenes yañi yo

² saquichí ndi noo carta ihya chi ndo cha nyicú ndo vehe ñuhu cuenda Nyoo cha nyaá ñuu Corinto. Ñáyivi chi Nyoo cuví ndo vityin, cha cuenda cha ndu ñin ri ndo chihin ra Cristo Jesús. Nyoo nacana ra chi ndo vatyí nanduvi ndo noo ñáyivi vaha cuenda ra, chihin tandihi ñáyivi cha sacahnú chi Sutu Mañi yo Jesucristo tandihi ri ityi. Vatyí cuví ra Nyoo cuenda ñu ta cuenda maa yo ñandihí.

³ Nyoo Sutu yo ta Sutu Mañi yo Jesucristo na nasoco ra chi ndo, ta nacuhva ra cha taxi ri coo ñanima ndo.

Yoso caa nasocó Nyoo chi ñu yihí cuenda ra

⁴ Tyicuan ri nacuhvé tyahvi nyoo chi Nyoo cha catyí maa ndo, vatyí chaha ra cha vaha chi ndo cuenda ra Cristo Jesús.

⁵ Ta cha ñin ri cuví ndo chihin ra Cristo, Nyoo chahá ra tunyee iñi ra chi ndo tacuhva cuví cahán ndo tuhun ra. Ta chahá ra cha chiñi tuñi vaha chi ndo.

⁶ Ta tandihí cha catyí chi ndo, tuhun ra Cristo, cuahán chino cava ñayivi ndo vityin.

⁷ Yucuan chaha ñahri cha cumañi chi ndo. Chahá Nyoo tandihí cha vaha chi ndo cha ni ri ca cha nyatú ndo quivi quichi Sutu Mañi yo Jesucristo.

⁸ Nyoo cusaha cuenda ra chi ndo nyacua nya naa ñayivi tacuhva yori cuví catyí ñáa cha catyí chi ndo quivi quichi Sutu Mañi yo Jesucristo.

⁹ Nyoo tyicuan ri sacuví ra tari cuhva catyí ra. Ta maa ra cuví ra nacana chi ndo tyí cu ñin ri ndo chihin Sehe ra, ra Jesucristo, Sutu Mañi yo.

Tatu yihí yo cuenda Sutu Mañi yo, ña vaha cha cusin yo

¹⁰ Yañi, chiquén chi ndo chihin sivi Sutu Mañi yo Jesucristo, na ñin ri cuví ndo ta ma cusin ndo. Ta ñin ri cuhva çaca xiñi ndo. Ta ñin ri tuhun quñi iñi ndo.

¹¹ Catyí chi ndo tyehe caa, yañi, tyí catyí ñáyivi chi ra Cloé chii, vatyí iyó tisihi nu nyicú ndo.

¹² Vatyí nyoho sin sin cuhva cahán ndo. Noo ndo catyí ndo: “Yuhu, cuenda ra Pablo yihí.” Inga ndo catyí ndo: “Yuhu, cuenda ra Apolos yihí.” Inga ndo catyí ndo: “Yuhu, cuenda ra Pedro yihí.” Inga ndo catyí ndo: “Yuhu cuenda ra Cristo yihí.”

¹³ ¿Atu tahvi sava ra Cristo? ¿Atu chihí yuhu ra Pablo nu cruzi cha catyí ndo? ¿Atu condutyá ndo chihin sivi yuhu? Ñima.

¹⁴ Tyahvi nyoo chi Nyoo vatyí yuhu ña sacondutyé chi ni noo nyoho. Soco noo ri sacondutyé chi ra Crispo ri chihin ra Gayo ri.

¹⁵ Tyicuan caa ta ni noo ndo ta ma cuví catyí ndo vatyí condutyá ndo chihin sivi.

¹⁶ Aan, ta suri sacondutyá tiqui chi ñáyivi chi ra Estéfanos. Soco ña nichón iñi cha sacondutyé chi inga ndo.

17 Vatyí ra Cristo ña tachí ra chii tyi sacondutye. Soco tachí ra tyiño chii vatyí cahin tuhun ra yoso caa sacacú ra chi yo. Soco ña cahin chihin cha chiñi tuñi ñáyivi ihya, coto catyi ñáyivi chii tyi ñahri yahvi nyaá cha chihí ra Cristo cuenda cuatyí yo.

Vaha ca cha chiñi tuñi Nyoo ta ñima ca cha chiñi tuñi ñáyivi ihya

18 Tuhun cha chihí ra Cristo nu cruzi cha catyi cuatyí yo, ñima ri tuhun cuví cuan cha cuenda chí ñáyivi cha cunaa nu cuví anyaya. Soco cha cuenda chí maa yo cha cuví yo ñáyivi cacú añima, tunyee iñi cha चाहá Nyoo chi yo cuví cuan.

19 Vatyí tyicuan caa tucu catyi maa tuhun Nyoo:

Cusanai cha chiñi tuñi ra cuñi maa tyi chitó xaan.

Ta cha chitó xaan ra chiñi tuñi cutave ñn chiyo xiin, catyi Nyoo.

20 Ñahri tuhun cha chitó xaan ra chiñi tuñi, ta ra sacuaha, ta ra chitó xaan nacahan ñáá ndihi tuhun iyó siqui ñuhu ñáyivi ihya. Vatyí cha chiñi tuñi cha iyó siqui ñuhu ñáyivi ihya, cha ñima ri tuhun nasahá Nyoo chi cuan.

21 Nyoo chihin cha chiñi tuñi ra tyaá ra cuhva vatyí ma cuví cohon nuu ñáyivi chí ra chihin cha chiñi tuñi cha iyó siqui ñuhu ñáyivi ihya, soco tyaá ra cuhva vatyí sacacú ra chí ñu chinó iñi tuhun cha cahan noo ñáyivi nuu ñu. Vasi ñima ri tuhun cuví tuhun cuan cha cuenda ñu cha ña ñohó nuu chí Nyoo.

22 Vatyí ñáyivi Israel cuñi ñu nyehe ñu milagru. Ta ñu Grecia maa maa ri maa cha chiñi tuñi ñáyivi ihya nanducú ñu.

23 Soco yoó sacotó yo tuhun ra Cristo, ra chihí nu cruzi. Ta ñáyivi Israel cahán nuu ñu chiñi ñu tuhun ihya. Ta ñu cha ñima ñu Israel cuví, cuñi maa ñu tyi tuhun cha ñima ri tuhun cuví ihya.

24 Soco cha cuenda chí ñu nacana Nyoo, an cuví ri ñu ñu Israel, o ñu Grecia, ra Cristo cuví tunyee iñi ta cha chiñi tuñi Nyoo.

25 Vatyí cuñi maa ñáyivi vatyí noo cha ñima ri tuhun cuví cha sacuví Nyoo. Soco chiñi tuñi xaan ca Nyoo ta ñima ca ñáyivi iyó siqui ñuhu ñáyivi ihya. Ta cuñi maa ñáyivi tyi ña ñihí fuerza Nyoo. Soco ican cuan cuví fuerza cha ñihi ca cha nuu fuerza tandihi ñáyivi.

26 Yañi, cuñi chí coto ndo vatyí Nyoo nacana ra chí ndo vasi maa ri ñáyivi soho cuví ndo, ta mañi ndo cuví ndo ñáyivi tyayí o ñáyivi chitó xaan cha chiñi tuñi ñáyivi ihya.

27 Soco Nyoo nacachí vaha ra chí ñáyivi soho. Vatyí cuhvá ñu ticahan nuu chí ñu cuñi maa tyi chiñi tuñi xaan. Ta nacachí vaha ra chí ñáyivi ñahri fuerza vatyí cuhva ñu ticahan nuu chí ñu cuñi maa tyi iyó xaan fuerza.

28 Nyoo nacachí vaha ra chí ñáyivi ndahví cha cuñi maa ñáyivi tyi ña chiñuhú ñu. Nacachí ra chí ñáyivi cha ña cuñi nyehe ñáyivi chí, vatyí sanocuee ra chí ra cuví tyiño nahnu.

29 Tyicuan caa sacuví Nyoo tacuhva tyi yori sacahnú chii nuu ra.

30 Soco maa maa Nyoo sacu ñn ri ra chí yo chihin ra Cristo Jesús. Ta sacuví ra tyi ra Cristo cuhva ra cha chiñi tuñi chí yo, ta sacuvahá ra chí yo ta sandundií ra chí yo nuu Nyoo vatyí tyiyahví ra chihin ñiñi ra cha catyi cuatyí yo, tacuhva cuví cacu yo.

31 Yucuan chaha sacuví yo tari cuhva catyi nu tutu Nyoo tyehe caa: “Tatu yooó cha cuñi cuyaa, vaha na cuyaa maa soco chihin Nyoo.”

2

Tuhun ra Cristo, ra chihí nu cruzi

1 Soco yañi, quivi chahin chicahin tuhun Nyoo chihin ndo, ña cahin tuhun cha chiñi tuñi ñuhu ñayivi ihya.

2 Soco maa ri maa tuhun ra Jesucristo, yoso caa chihj ra nu cruzi cha catyi cuatyí yo tyaj xiñi ta nacatyí chi ndo.

3 Ta chaj nu nyicu ndo tari cha ñahri fuerze. Ta nihj chihin cha yuhvi.

4 Ta cuhva cha cahin nuu ndo, ña cahin chihin tuhun tyaqui tuhun cha chiñi tuñi tari cahán noo ra chitó xaan. Ñima. Soco chihin fuerza maa Tatyí li Nyoo cahin chihin ndo.

5 Tacuhva vatyí nachino iñi ndo chi Nyoo soco cha cuenda fuerza maa Nyoo. Ta ñima cha cuenda cha chiñi tuñi ñayivi ihya.

Nyoo chahá ra cha cohon nuu yo chi ra chihin Tatyí li ra

6 Soco suvita ri tyi cahán ndi tuhun cha chiñi tuñi chihin ñu cha ñihi ca nyaá chihin tuhun Nyoo. Soco cha chiñi tuñi Nyoo, ta ñima cha chiñi tuñi ñuhu ñayivi ihya, ni ri cha chiñi tuñi ra nyacá ñaha siqui ñuhu ñayivi. Vatyí maa ra cucunaa ra.

7 Soco tuhun xehe cha chiñi tuñi maa Nyoo cahán ndi. Vatyí Nyoo chicumj xehe ra minoo tuhun vaha nya ta ni cumañi chino ñuhu ñayivi ihya. Vatyí tyaa ra cuhva tyi cucacu añima yo ta cunyaa yo noo nu vaha chihin ra tyicuan ri maa.

8 Ta tuhun ihya ta cutuñi ca iñi ni noo ra nyacá ñaha ñuhu ñayivi ihya. Vatyí tyehe ta cutuñi iñi ra, ma catyaa ra chí Sutu Mañi yo, ra nyacá ñaha gloria, nu cruzi.

9 Soco tari cuhva catyí maa tuhun Nyoo:

Nyoo sanduvahá ra noo cha vaha xaan tyi cuhva ra chí ñáyivi cha cuñi chi ra.

Ta ni noo ñáyivi ta nyehe ca ñu, ta ta cuiñi ca ñu, ta ta ndichi ca xiñi ñu yoso cuhva cha vaha cha chahá Nyoo chí yo, catyí tuhun Nyoo.

10 Soco Nyoo chahá ra Tatyí li ra vatyí cutuñi iñi yo tuhun ihya. Vatyí Tatyí li ra sañahá chí tandihí chí yo nyacua nya tuhun cha xehe ca cha cumj maa Nyoo.

11 Ma cuvi coto noo ra cha chicá xiñi inga ra. Soco suri maa ra chitó ra cha chicá xiñi maa ra. Ta tyicuan caa tucu noo ri Tatyí li Nyoo chitó cha yihí iñi maa Nyoo.

12 Yoó ñima cha chiñi tuñi ñuhu ñayivi naquehen yo, soco maa Nyoo chahá ra Tatyí li ra chí yo vatyí sacoto chí chí yo yoso caa cha tyaqui cha chahá Nyoo chí yo.

13 Tuhun cha cahán ndi chihin ndo ihya, tuhun cha sañahá maa Tatyí li Nyoo chí ndi cuví. Ñima tuhun cha cutuhva ri maa ndi chihin cha chiñi tuñi xiñi ndi. Nacatyí ndi tuhun cha sañahá Tatyí li Nyoo chí ndi chí ñu cha yihí Tatyí li Nyoo chí.

14 Soco ñu cha ña yihí Tatyí li Nyoo chí, ña cutuñi iñi ñu ta ña cuñi ñu cuiñi ñu cha sañaha Tatyí li Nyoo chí ñu, vatyí cuñi maa ñu tyi tuhun cha ñima ri tuhun cuví cuan. Vatyí in ri maa ñu cha yihí Tatyí li Nyoo cuví cutuñi iñi ñu tuhun cuan.

15 Soco ñu yihí Tatyí li Nyoo cuví cutuñi iñi ñu. Ta chitó ñu tatu vaha o ña vaha ñáá noo tuhun. Soco ma cuví catyí inga ñáyivi tatu vaha o ña vaha cha caá añima maa ñu.

16 Vatyí tuhun Nyoo catyí chí: “Yori chitó tuhun cha chicá xiñi Sutu Mañi yo. Yori cuví sañahá chí Nyoo”, catyí tuhun Nyoo. Soco yoó cha yihí yo Tatyí li Nyoo, chitó yo cha chicá xiñi ra Cristo.

3

Ña tahan chi cunyicon yo chi noo ra yañi yo, chi Nyoo na cunyicon yo

¹ Soco yañi, quivi cuan ña cuvi cahin chihin ndo tari cahin chihin ñu saquehen ityi Tatyí Ii Nyoo chi, soco cahin chihin ndo tari cahin chihin ñu ni nachino iñi chi Nyoo, tari cha vatyi ni nyihi ndo chihin tuhun ra Cristo cuvi cuan.

² Cahin chihin ndo chihin tuhun cha ña yí ri cutuñi iñi ndo. Tari chahá yo sicui coho cha lee cha ta cuvi ca cachi nyayu, tyicuan caa sacuvi chihin ndo. Vatyi nyoho, quivi cuan ta cuvi ca chi ndo. ¡Ta ni vityin ta ta cuvi ca chi ndo!

³ Vatyi ni chicá ca xiñi ndo cuhva chicá xiñi ñáyivi iyó siqui ñuhu ñayivi ihya. Nyiyó iñi ndo. Iyó tisihi nu nyicú ndo. Cacusin ndo. Ni chicá ca xiñi ndo tuhun ñuhu ñayivi ihya. Ta nyacuví ndo tari nyacuví ñáyivi cha ña ñohó nuu Nyoo.

⁴ Vatyi yihí ndo catyi ndo: “Yuhu cuenda ra Pablo yihí.” Ta inga ndo catyi ndo: “Yuhu cuenda ra Apolos yihí.” Cuñi chi catyi tyi nyacuví ndo tari nyacuví ñáyivi ña ñohó nuu chi Nyoo.

⁵ Vatyi ¿yóó ra cuvi yuhu, ra Pablo? Ta ¿yóó ra cuvi ra Apolos? vatyi cañi tahan ndo cha catyi ndi. Vatyi noo ra casacotó tuhun Nyoo chi ndo cuvi ndi. Ta yucuan chaha nachino iñi ndo chi Sutu Mañi yo. Ta noo noo ndi sacuví ndi tyiño cha catyi maa Nyoo tyi sacuvi ndi.

⁶ Yuhu tachí chiti tuhun Nyoo añima ndo. Ta ra Apolos chosó ra. Soco Nyoo sacuahnu ra tuhun ra añima ndo.

⁷ Ta yucuan chaha ni ri ra cha tachí ta ni ri ra cha chosó, ñahri ra cuvi ra. Soco Nyoo cuvi ra tandihí. Vatyi maa ra sacuahnú ra tuhun ra añima ndo.

⁸ Ra cha tachí ta ra cha chosó, in ri ra cuvi ra. Ta cuñihi ra nu vaha sahá Nyoo yoso cuhva tyiño sahá noo noo ra.

⁹ Ta tyicuan caa nyuhu, sahatyiño ndi soco tyiño nuu Nyoo. Ta nyoho cuvi ndo tari noo ñuhú nu sahá tyiño Nyoo.

Cuvi tucu ndo tari noo vehe cha cuahan savaha Nyoo.

¹⁰ Catyi Nyoo tyi yuhu cuvi tari noo ra cuvi nuu cha sama vehe. Vatyi chaquin cuhva vehe cuan ta tyihí chaha chi ñuhú. Ta inga ra samá ityi siqui. Soco cuñi chi sahá ra cuenda yoso cuhva samá ra siqui cuan.

¹¹ Ta yori cuvi cacun inga cuhva vatyi cha caá cuhva cuan. Vatyi suri maa ra Jesucristo cuvi cuhva cuan.

¹² Ta siqui cuhva cuan cuvi sama yo chihin xuhun cuaan, chihin xuhun cuichin, chihin yuu tyaqui, o chihin vitu, o chihin tuñama o chihin ndaha numa.

¹³ Soco quivi cutuñi chi ñáyivi, cunyehe ra Cristo tyiño sahá noo noo yo. Vatyi cuquichi ra chihin ñuhu. Ta ñuhu cuan cucahmi chi nya cha ña vaha.

¹⁴ Ta tatu yihí ñu sacuvi ñu tyiño vaha, ma cayu chi. Cuñihi ñu cha cuhva Nyoo chi ñu.

¹⁵ Soco tatu tyiño sahá ñu ta ndi cayu, cunaa tandihí tyiño sahá ñu. Cacua maa ñu soco tari noo ra cha cuyatyi ca quita nu ñuhu. Vatyi chiin cui ri ca ta cayu ra.

¹⁶ ¿Atu ña chitó ndo vatyi vehe ñuhu Nyoo cuvi chi ndo, ta Tatyí Ii Nyoo iyó ra añima ndo?

¹⁷ Tatu nya noo ñu sativi vehe ñuhu Nyoo, Nyoo cusanaa ra chi ñu, vatyi vehe ñuhu Nyoo, cha ii cuvi. Ta vehe ñuhu cuan ican cuvi maa yo.

¹⁸ Ni noo ndo ta ma sandavi ñaha ndo chi ndo. Tatu nya nyoho cuñi maa ndo tyi chitó xaan ndo cha chiñi tuñi ñayivi ihya, ndahvi sáha ndo chi ndo tari

noo ra cha ña chitó maa. Tyicuan ta Nyoo cuhva ca ra cha chiñi tuñi vaha chi ndo.

¹⁹ Vatyí cha chiñi tuñi ñáyiví ihya cuví chi noo cha ñima ri tuhun nuu Nyoo. Vatyí tuhun Nyoo catyí chi: “Nyoo sanacavá ra chi ra chitó, suri maa nu trampa cha savahá ra.”

²⁰ Ta catyí tucu chi: “Sutu Mañi yo chitó ra vatyí cha chicá xiñi noo ra chitó, cha ñima ri tuhun cuví.”

²¹ Yucuan chaha ni noo ndo ña tahán chi sacahnú ndo chi ndo tatu nyicón ndo chi noo rayii. Vatyí tandihí cha iyó ta chi maa ndo cuví, tyi maa Nyoo chahá ra chi ndo.

²² Yuhu ra Pablo, ra Apolos, ra Pedro, maa Nyoo chahá ra chi ndi chi ndo tyi nacatyí ndi tuhun ra chi ndo. Ta ñuhu ñáyiví ihya, ñáyiví iyó yo, tuhun chihi, cha cuví vityin, cha cuví nu cuahan ca chi, tandihí ta chi maa ndo cuví.

²³ Ta siin ri, maa ndo, chi ra Cristo cuví chi ndo, ta ra Cristo, chi Nyoo cuví chi ra.

4

Ma sacahnu yo chi yo ta ni chi noo yañi yo

¹ Cuñí chi vatyí nyehé ndo chi ndi tari noo ra sahá tyiño chihin ra Cristo. Vatyí tyaá Nyoo tyiño chi ndi vatyí sañaha ndi tuhun xehe ra cha ña chitó ñáyiví nu quichí chi.

² Ta cuñí chi vatyí nyuhu cha cuví ndi musu Nyoo nyita ri quichahá ndi tandihí cha catyí ra chi ndi.

³ Soco cha cuenda yuhu, ña quichahí tatu cahán ndo chii. O tatu cutuñí chii nuu noo ra cuví tyiño, ñahri cuende. Ta ni ri mai ta ña catyí tyi vahi.

⁴ Vasí tuví iñi mai tyi ñahri ca cuatyí, soco ña cuñí chi catyí vatyí ñahri cuatyí nuu Nyoo. Vatyí nuu maa Sutu Mañi yo cucutuñí chi yo.

⁵ Ican tuhun, nyoho ma cahan ndo chi ndi. Cuqtu ndo quiví quichi ra Cristo. Ta maa ra cutava nu ndichin cha ñohó xehe nu ñaa iñi. Vatyí cusanatuvi ra cha caá añima noo noo yo. Tyicuan ta Nyoo cutyiyahví ra yoso cuhva sacuví noo noo yo.

⁶ Yañi, cahín tuhun ihya chihin ndo cuenda cha vaha chi maa ndo. Vatyí nyehé ndo cuhva iyé, ta cuhva iyó ra Apolos. Vatyí ña cahnu sahá ndi chi ndi. Ta tyicuan caa tucu maa ndo, cutuhva ndo sacuví ndo tari catyí nu tutu Nyoo: Ma cahnu saha ndo chi ndo. Ta ñima chi noo ri ra cuñi ndo. Soco inuu ri cuhva cuñi ndo chi tandihí ñáyiví.

⁷ Ni noo ndo ta ña cahnu ca ra cuví ndo ican saha inga ndo. Vatyí cha iyó chi ndo maa ri maa cha chahá Nyoo cuví. Yucuan chaha ña tahán chi cha sacahnú ndo chi ndo, vatyí ñima maa ndo ñihi.

⁸ Cha cuhva cha cuñí maa ndo vatyí tandihí tuhun Nyoo chitó ndo, ta ñahri ca cha cumañí chi ndo. Ta cuñí maa ndo tyi Rey cuví ndo. Ta ña chiñuhú ca nyuhu chi ndo, cuñí maa ndo. Vaha tyehe ta tyicuan caa, tacuhva vatyí cuví tucu nyuhu rey chihin ndo.

⁹ Nyuhu cha cuví ndi apóstol, tari maa cha sandoq Nyoo chi ndi nya chata ca, cahvi iñi. Vatyí nyehé xaan ndi tindoho. Cuví ndi tari noo ra iyó cuatyí, ta tari quiví cha yahá policia chihin ndi ityi cahnu vatyí tacuhva tyi nyehe ñáyiví ta ángel chi ndi.

¹⁰ Sahá ñáyiví tyi ra tondo cuví ndi cha cuenda ra Cristo. Ta nyoho cuñí maa ndo tyi chitó xaan ndo tuhun ra Cristo. Nyuhu cuví ndi tari noo ra cha

ñahri fuerza, cha ni ri ca cha nyoho cuñí maa ndo tyi cuaha xaan fuerza ndo iyó. Tasi cuñí nyehe ñáyivi chi ndi, ta chi nyoho sahá ñu ñáyivi.

¹¹ Nya vityin, nyehé ndi tindoho. Chisocó ndi. Ityi ndi ndutya. Cumañí sahma ndi. Ñahri vehe ndi iyó. Ta ñáyivi, tasi iñi ñu chi ndi.

¹² Ta chitatú ndi cha sahá tyiño ndi chihin ndaha ndi. Cahán ñáyivi chi ndi. Soco nacahán ndi chihin cha vaha nu cahan ñu. Chicá nyicon ñu chi ndi soco cunyeé ndi.

¹³ Cahán ña vaha ñu siqui ndi. Soco ña yatyín iñi ndi, vita ri chaha ndi tuhun chi ñu. Sahá ñu tari noo mihin chi ndi. Sahá ñu tari noo cha ña chiñuhú ca chi ñáyivi chi ndi. Tyicuan caa sacuví ñu nyacua nya vityin.

¹⁴ Sacuhín tuhun ihya chi ndo, soco ñima ticahan nuu चाहí chi ndo. Soco चाहí tuhun chi ndo tari चाहí tuhun chi sehi tyi cuñí chi ndo.

¹⁵ Soco vasi uchi mil ra sacuahá sañahá tuhun ra Cristo chi ndo, soco ña cuaha sutu ndo iyó. Yuhu cuví sutu ndo cha cuenda tuhun ra Cristo Jesús. Vatyí sañahí chi ndo yoso caa cacú añima ndo.

¹⁶ Ta tyicuan caa catyí chi ndo na cunyicon ndo cuhva iyé.

¹⁷ Yucuan chaha tachi chi ra Timoteo, sehi cuenda Sutu Mañi yo, nu nyicu ndo. Nii xaan iñi ra nyicón ra chi Nyoo. Ta cuñí xain chi ra. Maa ra cuasanicohon ra iñi ndo yoso cuhva iyé, vatyí chinó iñi chi ra Cristo. Cusañaha ra chi ndo yoso cuhva sañahí tandihí ri vehe ñuhu.

¹⁸ Yihí nyoho cahnu sahá ndo chi ndo. Cuñí maa ndo vatyí ma cuhun que nu nyicú ndo.

¹⁹ Soco tyaí cuhva tyi cunyehe nu nyicu ndo cha numi ri, tatu Sutu Mañi yo ta cuñí ra. Tyicuan ta cunyehe tatu ndicha cha iyó fuerza Nyoo chi ra cahnu sahá chii chiña, o tatu cacahán ri maa ra.

²⁰ Vatyí tatu ndicha cha चाहá ra cha cunyacá ñaha Nyoo chi ra, ma cahan ri ra. Soco cuatuvi iñi yo vatyí nyaá fuerza Nyoo chihin ra.

²¹ ¿Ñáa cha cuñí nyoho vii? ¿Atu cha quichi tachi tuñi chi ndo, o cha quichi nyehi chi ndo chihin cha vita iñi?

5

Nu cutuñi chi noo ra chiyo chihin sihi queen

¹ Catyí ñu chii vatyí iyó noo nyoho cha iyó ndo chihin sihi queen ndo. Ihya cuví noo cuatyí cha cahnu xaan, vatyí ni ñu ña ñohó nuu chi Nyoo ta ña nyacuví ñu tari nyoho.

² ¡Ta tyicuan caa ta cahnu sahá ndo chi ndo cha nuu cha cucuihyá iñi ndo! Cuñí chi vatyí catyí ndo chi ra cha nyacuví cha quiñi caa cuan vatyí ma cutahan ca ra chihin ndo.

³⁻⁴ Vasi ña nyaí chihin ndo chihin coño ñuhi, soco cohon iñi ndo vatyí ñohó iñi tuhun ndo, tari cha nyaá mai chihin ndo cuví cuan. Ta cha sandaj tyiño ra cha sacuví cuatyí cuan chihin sivi maa Sutu Mañi yo Jesucristo. Cuñí chi tyi ndu in ri ndo. Ta saha ndo tuhun tyi nyaí chihin ndo. Ta cunyaa fuerza maa Sutu Mañi yo Jesús chihin ndo ñandihí.

⁵ Tyicuan ta cuñí chi vatyí nacuhva cuenda ndo chi ra cuan chi cuihna, tacuhva nativí ndihí coño ñuhu ra. Ta cuhva cuví cacu añima ra quivi quichi Sutu Mañi yo Jesucristo.

⁶ Ña tahán chi sacahnu ndo chi ndo chihin cha sacuví ndo. Vatyí nyehé ndii ndo nyacuví ra cuan cha quiñi caa. ¿Atu ña chitó ndo noo tuhun cha catyí chi vatyí chihin chiin ri yuchan iya ta nandaa nanii yuchan pan?

⁷Tava ñehe ndo yuchan iya chahnu cha cuví cha ña vaha cha sativí chi ndo. Tyucuan ta cuví ndo tari pan cha ñahri yuchan iya yihí chihin, cha tuhva yo chachí cha vico pascua. Ta pan cuan, ican cuví ndo vatyi ra Cristo cuví mbee cha chihí cha catyi cuatyí yo.

⁸Yucuan chaha tahán chí cachi coo yo cuenda cha chihí maa ra Cristo cha catyi yo. Ta sandoó yo cha quiñi caa cha sacuví yo ityi chata cha cuví tari yuchan iya chahnu. Ta cahán yo maa maa ri cha ndicha chihin cha ñi ñi yo. Vatyi cuví chí tari pan cha ñahri yuchan iya yihí.

⁹Nuu inga carta cha yaha saquichi chí ndo, catyi chí ndo vatyi nyoho ma cohon naha ndo tuhun chihin ñu cha sacuví cha iyó ri maa chihin ñusihí o rayii.

¹⁰Ta cha catyi chí ndo tyehe caa, ñima cha cuachiyo ndo ingaña ri nu nyicú ñu cha iyó chihin rayii o ñusihí, ta ñima yii ñu o ñasihí ra cuví, o ñu nyiyó ñi, o ñu suhú, o ñu sacahnú xitohyo. Vatyi tatu tyucuan caa, cuñi chí cha quita ndo ingaña ri ñuhu ñayiví.

¹¹Soco cha cuñi catyi chí ndo vatyi ma cohon naha ndo tuhun chihin noo ñu cha catyi vatyi hermano cuví ñu, ta iyó ri maa ñu chihin rayii o chihin ñusihí ta ñima yii ñu o ñasihí ra cuví, o nyiyó ñi ñu, o sacahnú ñu xitohyo, o cuendu ñu, o chihí ñu ndixi, o suhú ñu. Ñu cha caá tyehe caa, ni cha ma cunyaa ndo cachi ndo chihin ñu.

¹²⁻¹³Vatyi yoó ña tahán chí sahá yo cuenda chí ra ña ñohó nuu chí Nyoo. Nyoo cuví ra sahá cuenda chí ñu cuan. Soco nyoho cuñi chí sahá ndo cuenda chí ñu yihí cuenda Nyoo. Yucuan chaha tava ñehe ndo chí ra iyó cuatyí chiña nu nyicú ndo.

6

Ma cacan yo cuatyí chaha noo yañi yo cuenda Nyoo nuu ra cuví tyiño

¹¿Yoso caa quichi cuví ñi nyoho chicán ndo cuatyí chaha tahan ndo nuu ra cuví tyiño cha ña yihí cuenda Nyoo chihin ndo, cha nuu cha sacotó ndo chí ra yihí cuenda Nyoo, tacuhva canyehé ra nya ra iyó cuatyí?

²¿Atu ña chitó ndo vatyi suri maa ndo cusandaa ndo cuatyí ñayiví iyó siqui ñuhu ñayiví ihya nu cuahan ca chí? Ta tatu maa ndo cusandaa ndo cuatyí cuan, ¿atu ma cuví sandaa ndo noo tyiño cha ñima ri tuhun ihya?

³¿Atu ña chitó ndo vatyi nyacua nya ángel ta cutuñi chí ra nuu yo? ¿Ta nyaca cuví noo tuhun luhlu ñayiví ihya!

⁴Yucuan chaha tatu iyó tisihi nu nyicú ndo, ¿ñáá tuhun cuahan ndo nuu ra cuví tyiño cha ña chitó tuhun Nyoo?, ta ñahri tyiño cuví ra cuan vehe ñuhu nu nyicú ndo.

⁵Ihya ndicha tuhun catyi chí ndo, na coo chiin ticahan nuu nuu ndo. ¿Atu yori ndicha cui noo ra cuví sandaa noo tyiño yañi yo nu canyicú nyoho chiña?

⁶Vatyi cuahan ndo cua cacan ndo cuatyí chaha yañi yo cuenda Nyoo nuu noo ra cuví tyiño cha ña chiño ñi chí Nyoo.

⁷Cha iyó tisihi nu nyicú ndo, ña vaha. Vaha taxin ca cunyee ri ndo tatu sacuví ñu cha ña vaha chihin ndo. Saña ndo, na suhu maa ñu cha chii ndo.

⁸¿Soco nyoho suri maa ndo satasí ndihí ca ñi ndo chí ñayiví, ta nyacua nya cha chii yañi ndo ta suhú ndo!

9-10 ¿Atu ña chitó ndo vatyi ñu quiñi iyó ma quihvi ñu nu nyacá ñaha Nyoo? Ma sandavi ñaha ndo chi ndo. Ma quihvi tandihí ñu iyó ri maa chihin ñusihí o chihin rayii cha tyicuan ri caa. Ta ni ri ñu cha sacahnú xitohyo, ni ri ñáyivi cha iyó ñasihí o yii, ta cavá noo ñu chihin inga ñaha o chihin inga rayii, ni ra iyó chihin tahan yii, ni ra suhú, ni ra nyiyó iñi cha tyayii, ni ra chiñi, ni ri ñu cuendu, ni ri ñu chitó yoso caa sacuví cha quiñi caa, ma ñihí ñu cha vaha nu nyacá ñaha Nyoo.

11 Vatyi tyicuan caa cuví suhva nyoho. Soco Nyoo cha sandundi ra añima ndo chihin Tatyí li ra. Cha sacuvahá Sutu Mañi yo Jesucristo chí ndo nuu Nyoo.

Coño ñuhu yo cuví vehe ñuhu Nyoo

12 Catyí chi tuhun vatyi libre iyó yo cha sacuví yo tandihí cha cuñi yo. Cha ndicha cuví. Soco ña tandihí ta cuví chi cha vaha chi yo. Ndicha libre iyó yo cha sacuví yo tandihí, soco saha yo cuenda tatu cha vaha cuví o cha ña vaha. Ta ma cuhva yo cha cunyaca ñaha chí chi yo.

13 Catyí ñáyivi vatyi chahá Nyoo nyayu cha cuenda chichi yo. Ta chahá ra chichi yo cha cuenda cha cachí yo nyayu. Cha ndicha cuví. Soco ninduvi cuan cusanaa Nyoo quivi naa ñayivi. Ta ña ndicha cha coño ñuhu yo cuví cha cuenda cha sacuví yo cha ña vaha chihin ñusihí o chihin rayii. Vatyi coño ñuhu yo cuenda Sutu Mañi yo cuví. Ta maa Sutu Mañi yo cuví ra cuenda coño ñuhu yo.

14 Tari sanandoto Nyoo chi ra Cristo Jesús, tyicuan caa cusandoto ra chí yo chihin tunyee iñi ra.

15 ¿Atu ña chitó ndo vatyi tandihí yo cha yihí yo cuenda ra Cristo nanduvi yo noo coño ñuhu chihin ra? Ta noo noo yo cuví tari suhva ri coño ñuhu ra. ¿Atu quehen yuhu chiin coño ñuhu ra Cristo ta sativí chihin noo ñaha cata iñi? Ña tahán chi cunyacuví yuhu tyicuan caa.

16 ¿Atu ña chitó ndo vatyi tatu noo rayii ndu ñn ri ra chihin noo ñaha cata iñi, noo ri coño ñuhu nanduví ra chihin ña? Vatyi nu tutu Nyoo catyí chí tyehe caa: “Cha ninduvi ñu, noo ri nanduvi ñu.” Ta ña tahán chi cu ñn ri ra yihí cuenda Nyoo chihin ñaha cata iñi.

17 Soco tatu noo ñáyivi nacuhvá cuenda ñu añima ñu chi ra Cristo, yucuan cuví nu quihví Tatyí li ra añima ñu ta noo ri nanduví ñu chihin ra.

18 Sanaa ndo iñi ndo tatu quichi cuví iñi ndo chí ñusihí o rayii tatu ñima ñasihí ndo o ñima yii ndo cuví. Vatyi tandihí inga nu cuatyí cha nyacuví ñáyivi ña sativí chí coño ñuhu ñu. Soco ñu nyacuví cuatyí chihin cha iyó ñu chihin ñusihí o rayii cha tyicuan ri caa, sativí ñu coño ñuhu ñu.

19 ¿Atu ña chitó ndo vatyi coño ñuhu yo cuví vehe Tatyí li cha chahá Nyoo chí yo, vatyi cunyaa ra chihin yo? Yoó ñima maa yo nyacá ñaha yo chí yo, Nyoo cuví ra nyacá ñaha chí yo.

20 Vatyi Nyoo satá ra chí yo ta yahvi xaan chahá ra chí yo. Yucuan chaha cuñi chí vatyi sacahnú yo chí Nyoo chihin coño ñuhu yo, ta chihin cha chiñi tuñi yo vatyi ninduvi cuan, chí maa Nyoo cuví.

7

Chahá ra Pablo tuhun yoso caa coo ñu tandahá noo ñayivi vaha

1 Ta vityin cuacatyí tuhun cha ndaca tuhun ndo chí nu tutu cha sacuhun ndo chí. Ndicha vatyi vaha cha ma tandaha yo.

² Soco vatyi iyó xaan tuhun cha quichí cuvi iñi ñáyivi cha coo ñu chihin ñáyivi cha tyicuan ri caa. Yucuan chaha cuñi chi vatyi tahan tahan rayii coo noo ñasihí ra, ta tahan tahan ñusihí coo noo yii ñu.

³ Na sacuvi rayii cuhva tahán chi chihin ñasihí ra. Ta tyicuan caa tucu maa ñusihí, na sacuvi ñu cuhva tahán chi chihin yii ñu.

⁴ Ñaha síhi cuan ma cuvi cunyaca ñaha ri maa ña coño ñuhu ña. Vatyi chi yii ña cuví coño ñuhu ña. Tyicuan caa tucu maa yii ña, ma cuvi cunyaca ñaha ri maa ra coño ñuhu ra vatyi chi ñasihí ra cuví coño ñuhu ra.

⁵ Coto ñaha ma cuhva ndo chi ndo chi tahan ndo. Tatu cuñi ndo nanducu ndo chi Nyoo chihin oración, ñn ri cuhva caca xiñi nanduvi ndo. Ta ma cuhva ndo chi ndo chi tahan ndo suhva quivi. Yaha cuan tyicuan ta cuhva tucu ndo chi ndo chi tahan ndo coto ma cunye ndo. Ta coto nducu tyehe ra ña vaha chi ndo ta cuhun ndo cunducu ndo inga ñusihí o inga rayii. Ta ña vaha cha tyicuan caa.

⁶ Cha catyí chi ndo tyehe caa ñima cha catyí tyi tandaha ndo. Ña saniñi chi ndo cha tandaha ndo. Soco cuví tandaha ndo tatu cuñi ndo.

⁷ Cha cuenda chi yuhu, vaha ca coo maa ri maa ndo tari mai. Soco Nyoo siin siin fuerza chahá ra chi noo noo yo. Yihí yo chahá ra fuerza chi yo vatyi cuví coo maa ri maa yo. Ta yihí yo ña chaha ra fuerza cha coo maa ri maa yo.

⁸ Chi ñu tyivaa ta chi ñu chihí yii, chahí tuhun chi ñu. Vaha ca cha ma coo yii ñu tari mai.

⁹ Soco tatu ma cunye ñu cha ma coo yii ñu, vaha ca cha tandaha ñu ta ñima ca cha quichí ri cuví iñi ñu tandaha ñu, ta ña tandaha ñu.

¹⁰ Soco ñu cha yaha tandahá, catyí chi ñu vatyi ma sanandoo ñu chi yii ñu. Cha ndicha cuví vatyi mandamiento ihya ñima cha ndichí xiñi ri cuví soco maa Sutu Mañi yo catyí.

¹¹ Soco tatu noo ñaha síhi ta sanandoo ña yii ña, cuñi chi vatyi ndoo ña cunyaa ña cha ma tandaha ca ña. O naquehen ña chi yii ña. Ta suri tyicuan caa, ña tahán chi sanandoo rayii chi ñasihí ra.

¹² Ta cha cuenda chi yuhu catyí chi inga ndo tuhun ihya. Vatyi tatu ñasihí noo hermano ta ña chinó iñi ña chi Nyoo, soco ndoó ña vaha cha cunyaa ña chihin ra, ñahri ityi iyó chi ra cha sanandoo ra chi ña.

¹³ O tatu yii noo hermana, ta ña chinó iñi ra chi Nyoo, soco ndoó ra vaha cha cunyaa ra chihin ña, ñahri ityi iyó chi ña cha sanandoo ña chi ra.

¹⁴ Vatyi cha yahá nasoco Nyoo chi rayii cha ña chinó iñi cuan cha cuenda cha ñn ri cuví ra chihin ñaha cha chinó iñi cuan. Ta cha yaha nasoco tucu Nyoo chi ñaha cha ña chinó iñi chi Nyoo cha cuenda cha ñn ri cuví ña chihin ra chinó iñi. Tatu ña nyacuví ndo tyicuan caa, sehe ndo cucuvi ndotyin tari sehe ñu cha ña chinó iñi chi Nyoo. Soco cha cuenda cha sacuví ndo tyicuan caa, nasocó Nyoo chi sehe ndo.

¹⁵ O tatu rayii o ñusihí cha ña chinó iñi chi Nyoo, ta cuñi ñu sanandoo ñu chi tahan ñu cha chinó iñi chi Nyoo, na sanandoo maa ñu. Tyicuan ta ra hermano o ñaha hermana ndoó ñu libre. Vatyi maa Nyoo cuñi ra vatyi coo vaha yo chihin cha ñahri tsihi.

¹⁶ Vatyi ña chitó minoo ñaha síhi tatu cacu añima yii ña saha ña. Ta ni ri noo rayii ña chitó ra tatu cacu añima ñasihí ra saha ra.

¹⁷ Ta tyicuan caa catyí chi ndo vatyi coo ndo yoso cuhva catyí Sutu Mañi yo chi ndo. Ta yoso cuhva iyó ndo quivi nacana Nyoo chi ndo. Ta tyicuan caa catyí chi tandihí ñu yihí cuenda Nyoo noo noo vehe ñuhu.

18 Tatu Nyoo ta nacana ra chi noo nyoho ta cha yahā sacuvī ñu costumbre circuncisión chi ndo, ma caca iñi ndo. Soco tatu nacana ra chi noo ndo cha ña sacuvī ñu costumbre cuan chihin ndo, ña tahan ca chi sacuvi ndo vityin.

19 Ña niñi xaan cha sacuvī yo, o cha ma sacuvi yo costumbre circuncisión cuan. Soco cha niñi ca cha quichaha yo tuhun cahān Nyoo.

20 Tahan tahan ndo cuñi chi ndoó ndo yoso cuhva cha iyó ndo quivi cha nacana Nyoo chi ndo.

21 Vatyí tatu iyó chitoho ndo cha nyacá ñaha chi ndo quivi cha nacana Nyoo chi ndo, ma caca iñi ndo, soco tatu chahá chi cuhva cha ndoó ndo libre, cuñi chi nducu ndo cuhva ta ndoó ndo libre.

22 Vatyí quivi nacana Nyoo chi noo ra cha iyó chitoho, nduvi ra tari noo ra cha libre iyó, vatyí sacuví ra tyiño nuu Sutu Mañi yo. Ta suri tyicuan caa tucu ra cha iyó libre quivi cha nacana Nyoo chi ra. Vityin ra Cristo nyacá ñaha chi ra.

23 Satā Nyoo chi nyoho. Ta yahvi xaan chaha ra chi ndo. Yucuan chaha ma cuhva ndo cha cunyaca ñaha rayi chi ndo. Ta ma sacuvi ndo tyiño nuu ra.

24 Ta tyicuan caa catyí chi ndo yañi, coo ndo tari cuhva chiyo ndo quivi nacana Nyoo chi ndo.

25 Ta tyicuan tucu ñu cha ta tandaha ca. Ñahri tuhun chaha Sutu Mañi yo chii cha cuenda ndo. Soco catyí chi ndo yoso cuhva ndichí xiñi. Ta cuví naquehen ndo tuhun cahān tyi cha chitó ndo vatyí cha ndahvi cuñi Nyoo nyehē ra chii ta chaha ra tyiño ihya chii.

26 Cha cuenda chi yuhu, vaha taxin ca ma tandaha ndo. Vatyí cuaha xaan tindoho ñayivi cha iyó yo vityin.

27 Soco tatu cha iyó ñasihi noo hermano, ma nducu ra cuhva cha sanandoo ra chi ña. O tatu ta coo ca ñasihi ra, ma nducu ra chi ña.

28 Soco tatu tandaha ra, ñima cuatyí cuví. O tatu noo ñaha tyivaa tandaha ña, suri ñima cuatyí cuví. Soco ñu tandaha cuaha xaan tindoho cunyehe ñu ñayivi ihya. Ta yucuan chaha catyí chi ndo vatyí vaha ca cha ma tandaha ndo. Vatyí ña cuñi cha nyehé ndo tindoho ta tisihi cuan.

29 Yañi, cha vityin ta ityi nuu ña cuaha ca quivi nyaá. Cuñi chi vatyí ra cha iyó ñasihi cuví ra tari noo ra cha yori ñasihi. Vatyí nyita ri tahan chi caca xiñi ra tuhun Nyoo.

30 Ta tatu nyaá ndo tucuihya iñi, ma quichaha ndo tucuihya iñi cuan, o tatu nyaá ndo tusi iñi, soco ma quichaha xaan ndo tusi iñi cuan. Ta tyicuan caa tucu tatu iyó xuhun ndo, ma quichaha xaan ndo xuhun cuan. Nacuhva ndo tandihi cuan chi Nyoo.

31 Ta ra iyó xaan cha chii ñayivi ihya, ma quichaha xaan ra chi cuan, soco cotyiño ra tyiño Nyoo. Vatyí ñayivi cha nyehé yo ihya cha cuahān sandihi xaan chi.

32 Cuñi vatyí nyoho ma caca xaan xiñi ndo tuhun cha iyó ñayivi ihya. In ri maa tuhun Nyoo caca xiñi ndo. Noo ra tyivaa cha ta tandaha ca chicá xiñi ra yoso caa sacuví ra cuhva cuñi maa Sutu Mañi yo.

33 Soco tatu cha tandaha ra, chicá xiñi ra yoso caa coo vaha ra ñayivi cuhva tahan iñi ñasihi ra.

34 Ta sin cuhva iyó noo ñusihi cha cha yaha tandaha, ta sin cuhva iyó tucu noo ñusihi cha cumañi ca tandaha. Ñaha cha cumañi ca tandaha chicá xiñi ña in ri maa tuhun Sutu Mañi yo. Ta chicá xiñi ña yoso caa sacahnú ña chi Nyoo chihin coño ñuhu ña ta chihin cha niñi añima ña. Soco ñaha cha cha yahā tandaha chicá xiñi ña yoso caa coo vaha ña ñayivi ihya cuhva tahan iñi yñi ña.

³⁵ Catyí tuhun ihya chi ndo cuenda cha vaha chi maa ndo. Ñima cha saniñi chi ndo. Soco vatyí coo vaha ndo noo ñayiví chihin cha ñahri sayangá chi ndo. Ta ñin ri tyiño Nyoo sacuvi ndo.

³⁶ Soco nya nyoho chicá xiñi ndo vatyí vaha cha tandaha ndo vatyí cha cuayaha quiví ndo; vaha, tandaha ndo tatu cuñí ndo. Ñima cuatyí cuví cuan.

³⁷ Soco tatu inga ndo cha nacuaan vaha iñi ndo vatyí cuandoo ndo cha ma tandaha ndo, vaha tucu.

³⁸ Tu tandaha ndo, vaha. Tu ma tandaha ndo, vaha ca.

³⁹ Soco catyí nu ley Nyoo chi yo vatyí tahán chi cunyacá ñaha rayi chi ñasihi ra cha ni ri ca cha iyó ra. Soco tatu chihí ra, iyó ityí chi ña cha tandaha ña yóo chihin cuñí maa ña. Soco tatu ra yihí cuenda Nyoo cuví ra.

⁴⁰ Soco vaha ca coo ña ñayiví tatu ma tandaha ña inga chaha. Ihya cuví cha chicá xiñi yuhu. Ta chahí tuhun ihya chi ndo chihin Tatyí Ii maa Nyoo, cahvi iñi.

8

Nu sañahá ra Pablo vatyí ma sacoo yo cuatyí inga ñáyiví

¹ Ta vityin cuanacatyí chi ndo cuenda nyayu cha chahá ñu chi xitohyo. Tandihí yo cha ñohó nuu ca yo chi Nyoo, chitó yo tatu vaha o ña vaha cachi yo nyayu cuan. Ta cha cuenda cha chitó yo, yucuan chaha cahnu xaan sahá yo chi yo ta sativí cuan chi yo. Soco cha cuñí yo chi tahan yo sandunyeé cuan chi yo.

² Tatu yihí ndo cha cuñí maa ndo tyi chitó ndo, cha cuenda vatyí ta coto ca ndo yoso cuhva cuñí chi cuví cuan.

³ Soco Nyoo ñohó nuu ra chi ñu ñi vaha iñi cuñí chi ra.

⁴ Ta vityin cha cuenda cha cachi yo nyayu cha iyó vico xitohyo: cha chitó vaha yo vatyí noo xitohyo ñahri maa vale chi, vatyí noo ri maa Nyoo iyó.

⁵ Vasi cuñí maa ñáyiví vatyí cuaha xaan Nyoo iyó nu ñuhu ñayiví ihya ta andiví,

⁶ soco cha cuenda chi maa yo noo ri Nyoo Sutu yo iyó. Ta maa ra savahá ra tandihí cuii maa cha iyó. Ta yóo iyó yo cha cuenda maa ra. Ta iyó tucu noo ri Sutu Mañi yo Jesucristo. Ta maa ra savahá tandihí maa cha iyó, nyacua nya chi maa yo.

⁷ Soco ña tandihí yo chitó yo tuhun ihya. Vatyí suhva ñu tahan yo cuenda Nyoo, ta ni cumañi ca quihvi ñu cuenda Nyoo, sacahnú ñu xitohyo. Ta cha caan ñu sacahnú ñu chi cuan ta cuñí maa ñu tyi nyitó xitohyo cuan. Vatyí ña ñi vaha iñi ñu nyicón ñu chi Nyoo. Ta tatu chachí ñu nyayu cha chahá ñáyiví chi xitohyo cuan, cuñí maa ñu vatyí chicoó cuatyí ñu cuenda xitohyo cuan nuu Nyoo.

⁸ Soco Nyoo ñahri cuenda ra tatu chachí yo, o ña chachí yo. Ñima vatyí chachí yo ta ña vaha ca yo nuu Nyoo, ta ñima cha cuenda cha ña chachí yo ta vaha ca yo.

⁹ Soco saha ndo cuenda nya ndo chachi nyayu cuan ta chitó ndo vatyí ñahri cuatyí ndo chicoo. Cuví sanacava ndo nuu cuatyí chi ñu ni quihvi ri cuenda Nyoo, vatyí ñu cuan cuñí maa ñu tyi chicoo cuatyí ñu tatu chachí ñu nyayu cuan.

¹⁰ Vatyí tatu yoho cha chiton tuhun ihya, ta cunyaun ta cachun noo cha iyó vehe xitohyo, ta noo ra yañi yo cha ña ñihi vaha cuahán ra chihin Nyoo nyehé ra chuun yucuan, ra yañi yo cuan cucachi ndihí ra chuhun.

¹¹ Ta ra yañi yo cutivi añima ra vatyi cuñí maa ra tyi chicoo cuatyi ra. Ta ra cuan chihí ra Cristo cha cuenda ra. Ta vityin chicoo cuatyi ra cuñí maa ra. Ta yoho cha chitón, sicun cuhun cuatyi cuan.

¹² Yucuan chaha tatu sanacavá yo chi noo yañi yo cha ña ñihí vaha cuahán chihin Nyoo, chicoó cuatyi yo nuu ra Cristo.

¹³ Yucuan chaha tatu sanacavé chi noo yañi yo nuu cuatyi cha cuenda cha chachí, vaha taxin ca ma cachi ca mai coño, tacuhva cha ma sanacave chi ra nuu cuatyi.

9

Cha tahán chi sacuví ra apóstol Nyoo

¹ Yuhu cuví noo ra apóstol Nyoo. Ta yori ñáyivi nyaca ñaha chii. Vatyi nyehí chi ra Jesús Sutu Mañi yo. Ta suri maa ndo cuví cha ndaa tyi ndicha cuví yuhu noo apóstol Nyoo, vatyi chinó iñi ndo tuhun Nyoo cha sacoté chi ndo.

² Vasi ña cuñí ñáyivi chinó iñi ñu cha apóstol Nyoo cuví, soco cha cuenda nyoho ican cuví. Vatyi cha cuenda cha chinó iñi ndo chi Sutu Mañi yo, cuví ndo cha ndaa vatyi ndicha cha apóstol cuví.

³ Ihya cuví tuhun cuacahin cuenda ñu cha cahán nyaa chii.

⁴ Iyó chi ityi chii cha quehín tandihí cha chahá ñu cachi ta cha chahá ñu cohi.

⁵ Ta siin ri cha coo noo ñasihi cha chinó iñi chi Nyoo, tari yañi ra Jesús, ta ra Pedro ta tandihí ca ra apóstol.

⁶ O chicá xiñi ndo vatyi yuhu ri ta ra Bernabé tahán chi saha tyiño ndi chihin ndaha ndi ta sata ndi cha chiñuhú chi ndi. ¿Atu ña tahán chi chi nyuhu sandoo ndi tyiño cuan ta cahan ndi tuhun Nyoo?

⁷ Ra cha cuví sindaro tyiyahví gobiernu chi ra ta chotyíño ra xuhun cuan. Ta ra cha tachí yoho tichaha ndivi, chachí ra tichaha ndivi cha quita nu iyó tyiño saha ra. Ta ra cha sahá cumi mbee chihí ra sicu ti.

⁸ Ta ma cuñi ndo vatyi tuhun ihya cha ndichí xiñi ri mai cuví. Vatyi nu ley cha tyaa ra Moisés catyí chi tyehe caa:

⁹ “Ma tyihi ndo yoho yuhu quiti cha sandundií trigo, vatyi tahán maa chi cachi ti suhva trigu nu sahá tyiño ti.” Ndicha vatyi Nyoo catyí ra tyehe caa soco ñima vatyi cuniña xaan cuñi ra chihin quiti.

¹⁰ Soco na cutuñi ca iñi yo vatyi tari ra tahví ñuhu ta ra cha tachí, tahán chi vatyi cuita iñi ra vatyi cunaquehen ra cha quita nu saha tyiño ra.

¹¹ Ta tyicuan caa, tatu nyuhu quichi cahan ndi tuhun Nyoo chihin ndo, tari quivi cha quichi tachí ndi chiti cuvi cuan. Ta tahán chi tyi tyinyeé ndo chi ndi cha cuenda cha sacotó ndi tuhun Nyoo chi ndo.

¹² Tatu tyinyeé ndo chi inga ra cha ña quichí tyihi tuhun Nyoo nu nyicú ndo, tahán ca chi cha tyinyee ndo chi nyuhu, vatyi nyuhu tyihí ndi tuhun Nyoo nu canyicú ndo.

Soco ña cahán ri ndi, ta cunyeé ndi tandihí. Ta ña sayangá ndi chi ndo chihin cha chiñuhú chi ndi. Tacuhva cha ma sandihí ndo tuhun ra Cristo.

¹³ Chitó ndo tyi ra sahá tyiño vehe ñuhu ñáyivi Israel, iyó ra chihin cha iyó vehe ñuhu cuan. Vatyi tahán chi tavá siin ra suhva coño quiti vatyi cachi ra. Ta tandihí ca coño cuan cucahmi ra tari cuhva catyí maa Nyoo chi ra.

¹⁴ Ta suri tyicuan caa catyí Sutu Mañi yo, vatyi tahán chi tyinyeé ñu yihí cuenda Nyoo chi ra cahán tuhun Nyoo chihin ñu.

¹⁵ Soco yuhu ni noo chaha ña chiquen cha tahán chi chii. Ta ni ña tyai tuhun ihya vatyí cuñí cha cuhva ndo cha cuhva ndo chii. Vatyí tatu chiquén cha tahán chi chii, ña sii cuñí cahín tuhun Nyoo. Vaha taxin ca cuñí cha cúvi ta ñima ca cha caquen xuhun chi ndo.

¹⁶ Cha cuenda chi yuhu ñima cha cahnu sahí chii cha cahín tuhun Nyoo. Soco vatyí nyaá síqui cha sacuví. Soco ndahví cuví yuhu ra ndahví tatu ma cahin tuhun Nyoo ihya.

¹⁷ Yucuan chaha tatu sacuví chihin cha iyó ñni, cuñihi yahvi. Soco tatu sacuví chihin fuerza, suri cuví chí, vatyí noo tyiño cha tachí maa Nyoo chíi tyi sacuví, tahán chi cha sacuví.

¹⁸ Ta tyicuan caa, yahvi cha ñihi, ican cuví cha sii cuñí cahín tuhun ra Cristo. Ta ña chiquén cha tahán chi chíi cha cuenda cha cahín tuhun ra.

¹⁹ Vasi ñima musu cuví yuhu. Soco nanduví musu tandihi ñáyivi. Vatyí tyicuan caa saha ganai cuaha ca ñáyivi cuenda ra Cristo.

²⁰ Tatu ñohí nu nyicú ra Israel, nanduví tari maa ra tacuhva vatyí tyasoho ra tuhun cahín. Vatyí cuñí saha ganai chí ra cuenda ra Cristo. Vatyí ra cuan iyó ra cuhva catyí ley ra Moisés. Ta yuhu sacuví tari cuhva catyí ley cuan. Soco ñima ley cuan nyacá ñaha chíi.

²¹ Soco tatu cuñí saha ganai chí ñu ña quichahá ley ra Moisés, sacuví tari cuhva sacuví ñu. Vatyí tacuhva saha ganai chí ñu. Soco ley maa Nyoo nyacá ñaha chíi vatyí chihin ley ra Cristo chicá noi ta ña cuví cunyacuví cha quiñi caa tari nyacuví maa ñu.

²² Tatu nyaí chihin noo ra cha ta coo vaha ca fuerza Nyoo chíi, nanduví tari maa ra, vatyí tacuhva cahan que tuhun Nyoo chihin ra. Ta ndunyeé ca ñni ra chihin tunyee ñni Nyoo. Nanduví yuhu tari cuhva caa noo noo ñáyivi, vatyí tacuhva tyasoho ñu tuhun Nyoo cha cahín ta cacú ñima ñu.

²³ Tyicuan caa sacuví tacuhva cuví sacoté tuhun Nyoo chí ñáyivi. Vatyí tacuhva ñihi tumañi ñni cha chahá maa Nyoo chí yo.

²⁴ Chitó ndo vatyí noo sihva cha chinó ñu, tandihi ñu chinó, soco noo ri ñu sahá ganaa. Tyicuan caa tucu maa yo, cuñí chí cha ñihi cunyicon yo chí Nyoo tacuhva sahá ganaa yo nu vaha cha chahá ra chí yo.

²⁵ Tandihi ñu cuahan sihva, sandoo ñu tandihi cha satyoño chí ñu vatyí cuñí ñu sahá ganaa ñu. Ta ñu cuan, cusaha ganaa ñu, soco noo corona numa cha tañi tyehe ri na ityi. Ta yoó nducú yo cuhva soco cha sahá ganaa yo noo cha ma tivi ca maa.

²⁶ Cha cuenda yuhu ña chinó tondo ri mai, ni ña cañi tahan tondo ri mai.

²⁷ Soco ñihi nyacá ñahi chí coño ñuhi. Ta saniñi quichahá chí Nyoo. Coto suri mai cha yaha sañahí chí inga ra ta ndoi.

10

Nu sañahá ra Pablo vatyí ma tyaa xiin yo Nyoo

¹⁻² Yañi, ña cuñí cha naa ñni ndo cha cuví chí sutu chahnu yo ta cha nahá. Nyoo tyinyee ra chí ñu, ta tachí ra noo vico vatyí cahun ityi nuu ñu coto cunaa ñu. ñn ri nanduví ñu chihin ra Moisés, ra cuví nuu chí ñu, ta yahá sava ñu tyañuhu. Ta cha tyicuan caa, tari cha condutya ñu chihin vico cuan ta chihin tyañuhu cuví cuan.

³ Ta tandihi ñu chachí ñu ñn ri nyayu cha chahá maa Nyoo.

⁴ Ta tandihi ñu chihí ñu ñn ri ndutya cha chahá maa Nyoo. Vatyí ndutya cuan tavá ra chata noo yuu cha cuahan chihin ñu. Ta yuu cuan ra Cristo cuví.

⁵ Soco vasi nyehe ñu cuaha milagru cha sacuvj Nyoo, cuaha ñu ña quichaha ñu tuhun cahān ra chihin ñu. Ta chihj ñu chiqui ndi# cuan, ta yucuan ndo ñu.

⁶ Tandihj tuhun ihya chahá chi noo cuhva chi yo. Vatyí tacuhva ma cuñi yo sacuvi yo cha ña vaha tari sacuvj ñu cuan.

⁷ Yucuan chaha ma sacahnu nyoho chi xitohyo, tari chinyacuvj suhva ñu cuan ta cha naha, tari catyí nu tutu Nyoo tyehe caa: “Ta cachiyo ñu vico, ta cachachj ñu, ta cachiñj ñu.”

⁸ Ta ma coo ri maa yo chihin inga ñusihi o chihin inga rayi# tatu ñima ñasihi yo cuví, o yii ñu cuví, tari chinyacuvj suhva ñu cuan. Ta noo ri quivi chihj oco uñi mil ñu cha cuenda cha chinyacuvj ñu cha quiñi caa cuan.

⁹ Ta Sutu Mañi yo cama iñi ra, soco ña tahán chi nducú nyehe yo chi ra. Tari chinyacuvj suhva ñu cuan. Ta cachiñj ñu cha tyaa coo chi ñu, cha cuenda cha cuñi ñu nducú nyehe ñu chi ra.

¹⁰ Ta ni ma cahan ña vaha ndo siqui Nyoo, tari cahān ña vaha suhva ñu cuan siqui ra. Ta saquichj ra ángel cuenda ra ta chahñj ra chi ñu.

¹¹ Tandihj ihya cuví chi sutu chahnu yo cha chiyo ta cha naha. Ta chicunyaa chi nu libru Nyoo tari noo cuhva vatyí sacotó ra chi yo cha iyó yo ñayivj ihya vityin, nu cuahán sandihj chi.

¹² Ta tyicuan caa tatu tuví iñi maa ndo tyi vaha cuahán ndo chihin Nyoo, ñasaha ndo cuenda coto canacava ndo saha ra ña vaha.

¹³ Tindoho cha nyehé ndo, cuñi maa ndo tyi noo ri maa ndo nyehé tindoho cuan. Soco inuu ri nyehé tandihj ca ñu. Soco cuví cunyeé iñi ndo chi Nyoo, ta maa ra ma cuhva ra nyehé ndo tindoho cha ma cunyeé ca ndo. Soco tatu chaa tindoho chi ndo, tyicuan ta Nyoo cunducu ra cuhva cha quita ndo chichi tindoho cuan ta cuví cunyeé ndo.

¹⁴ Yucuan chaha yañi, ma sacahnu ndo chi xitohyo.

¹⁵ Cahín chihin ndo tari cahín chihin noo ra tyihí tuñi iñi. Yucuan chaha saha ndo cuenda cha catyí chi ndo. Ta nyehe ndo tatu ndicha o ña ndicha tuhun cahín chihin ndo.

¹⁶ Quivi cha nicohón iñi yo tyi chihj ra Cristo nu cruzi, chihj yo vinu ta chachí yo pan. Ta vinu cuan cuñi chi catyí vatyí ñn ri cuví yo chihin ra Cristo cuenda ñiñi ra. Ta chachí yo pan ta cuñi chi catyí vatyí ñn ri cuví yo chihin ra cuenda coño ñuhu ra.

¹⁷ Vatyí vasi cuaha yo, soco tandihj yo chachí yo noo ri pan. Ta yucuan chaha tandihj yo nduví yo noo ri coño ñuhu ra.

¹⁸ ¿Atu nicohón iñi ndo yoso caa iyó ñu Israel? Chachí tucu maa ñu quiti cha chahá ñu chi Nyoo, ta cha cuenda cha nyacuví ñu cha tyicuan caa, ñn ri cuví ñu chihin cuan.

¹⁹ Ñima cha catyí chi ndo tyi vale xitohyo cha sacahnú ñu ña ñohó nuu chi Nyoo. Ña vale, ni ri coño cha chahá ñu chi xitohyo cuan ta ña vale.

²⁰ Soco catyí chi ndo vatyí ñu ña ñohó nuu chi Nyoo chahá ñu cha chahá ñu, soco chi ra ña vaha. Ta ñima chi Nyoo. Ta ña tahán chi cha ndu ñn ri ndo chihin ra ña vaha.

²¹ Vatyí ma cuví coho yo copa Nyoo ta suri cuhva cuan ta coho tucu yo copa ra ña vaha. Ta ma cuví cachí yo nu mesa Nyoo. Ta suri cuhva cuan cachí yo nu mesa ra ña vaha.

²² Ma cuhva yo tisihi chi Nyoo vatyí maa ra iyó ca fuerza chi ra ta ñima ca maa yo.

Sacuvi yo ñáá cha sacuvi yo, soco cha cuenda cha vaha chi tahan yo

²³ Catyí chi tuhun: “Cuví sacuvi yo ñáá cha cuñí yo. Soco ña tandihí ta cuví chi cha vaha chi yo.” Ta ndicha cuví sacuví yo cha cuñí yo. Soco ña tandihí ta tyinyeé chi chi yo cha cuahnu yo chihin tuhun Nyoo.

²⁴ Ma nanducu yo cha vaha chi maa ri maa yo, soco na nducu tucu yo cha vaha chi inga ñu.

²⁵ Çachi ndo ñáá çoño cha xicó ñu nuyahvi. Ta ma ndaca tuhun ndo ta ma ndichí xiñi ndo yóó chi cuenda cuví.

²⁶ Vatyí ñuhu ñayiví ta tandihí cha iyó nuu chi, chi maa Nyoo cuví.

²⁷ O tatu noo ñu ña chinó iñi chi Nyoo, catyí ñu chi ndo cha cucachi ndo vehe ñu, ta tatu cuñí ndo cuhun ndo, cuhun ndo ta çachi ndo tandihí cha चाहá ñu cachi ndo. Ta ma ndaca tuhun ndo ñáá cuenda cuví.

²⁸ Soco tatu nya noo ñu catyí ñu chi ndo: “Nyayu ihya nyayu cha चाहá cuenda ñu chi xitohyo cuví”, catyí ñu. Ma cachi ca ndo tacuhva cha ma nducuihya cuñi añima ñu cha catyí chi ndo tyicuan caa.

²⁹ Cahín tuhun ihya cuenda inga ñu ta ñima cuenda maa ndo.

Soco yihí ndo catyí ndo: “¿Ñáá tuhun cha sahá xaan ra ihya cuenda chi yuhu cha catyí inga ñáyiví?”

³⁰ Tatu nacuhvé tyahvi nyoo chi Nyoo cuhva cha cuacachi, ñáá tuhun catyí inga ra cuan tyi ña vaha cachí”, catyí ndo.

³¹ Cuacatyí chi ndo tyehe caa, tatu chachí ndo, o chihí ndo, o sacuví ndo ñáá ca cha sacuví ndo, sacuví ndo soco chi maa Nyoo sacahnu ndo chihin cha sacuví ndo.

³² Ta ma cuhva ndo cuhva cha canacavá noo tahan ndo, ni ra Israel, ni ñáyiví cha ñima ñu Israel cuví, ni ñu yihí cuenda Nyoo.

³³ Tari yuhu, nanduquí cha vaha cuví chi ñáyiví. Ña nanduquí cha vaha chi mai, soco cha vaha chi inga ñáyiví nanduquí. Vatyí tacuhva cacu añima ñu.

11

¹ Cuñí vatyí cunyicon ndo cuhva nyacuví. Tari mai nyiquén cuhva nyacuví ra Cristo.

Yoso caa coo ñusihí nu ndu ín ri yo

² Yañi, siñ xaan cuñí vatyí tyicuan ri nicohón iñi ndo chii. Ta quichahá ndo cha sañahí chi ndo.

³ Soco cuñí tyi coto ndo vatyí ra Cristo cuví xiñi noo noo rayii, ta rayii cuví xiñi ñasihí ra, tari Nyoo cuví ra xiñi ra Cristo.

⁴ Tatu noo rayii, nyasí xiñi ra ta chicán tahvi ra o cahán ra tuhun cha चाहá Nyoo chi ra, ticahan nuu चाहá ra chi ra cuví xiñi ra.

⁵ Soco tatu noo ñaha sihi ña chasí ña xiñi ña cuhva cha chicán tahvi ña, o cuhva cha cahán ña tuhun cha चाहá Nyoo chi ña, tari cha satyá ndii xiñi ña cuví cuan. Ta ticahan nuu चाहá ña chi ra cuví xiñi ña.

⁶ Tatu noo ñaha sihi ña chasí ña xiñi ña, vaha taxin ca nacahnya ña tandihí ixi xiñi ña. O tatu cahán nuu ña cha satyá ndii ixi xiñi ña, nacasi ña xiñi ña.

⁷ Ña tahán chi casi rayii xiñi ra. Vatyí cuhva caá Nyoo caa ra, vatyí nyacá ñaha ra chi ñasihí ra, tari nyacá ñaha Nyoo chi ra. Soco noo ñaha sihi चाहá ña cha cunyaca ñaha yii ña chi ña.

⁸ Vatyí quivi savaha Nyoo chi rayii, ña savaha ra chi ra chihin yiqui naha ñaha sihi. Soco chihin yiqui naha rayii savaha Nyoo chi ñaha sihi.

⁹ Ta cha catyí rayii, ta chinqo ñaha sihi.

¹⁰ Yucuan chaha ñusihí cuñí chi cunyasi xiñi ñu. Vatyí ican cuan cuví noo seña vatyí nyacá ñaha yí ñu chi ñu. Ta cha cuenda cha vaha chi ángel cuví.

¹¹ Soco tyaa maa Nyoo cuhva vatyí chiñuhú rayí chi ñusihí. Ta chiñuhú ñusihí chi rayí.

¹² Vatyí ndicha ñaha sihi chingo ña chihin yiqui naha rayí, tari quivi cha sacacu ra chi ña cuví cuan. Soco nya cua nya quivi cuan ta maa ña quichaha sacacu ña chi rayí. Ta nya cua nya vityin ñusihí ta rayí maa Nyoo chaha cha coo ni nduvi tahan ñu.

¹³ Nyehe maa ndo. ¿Atu vaha quetuví cha ña nyasi xiñi ñusihí ta chicán tahvi ñu chichi vehe ñuhu?

¹⁴ Vatyí cha chitó ndo vatyí ticahan nuu cuví chi rayí tatu nañi xiñi ra.

¹⁵ Soco ñusihí, vaha cha cunañi xiñi ñu vatyí Nyoo chahá ra ixí nañi chi ñu vatyí casi chi xiñi ñu.

¹⁶ Soco tatu yóo cha cuñí cuví yuhu cha catyí tuhun ihya, cuñí chi coto ndo vatyí ni nyuhu ta ni vehe ñuhu Nyoo, ñahri inga costumbre iyó chi ndi.

Nu sañahá ra Pablo chi ñu vatyí ña vaha cuhva chachí ñu Santa Cena

¹⁷ Yañi, nonga tuhun cuacatyí chi ndo. Vatyí ña si cuñí chihin ndo, vatyí ndu ñin ri ndo, soco ña chahá chi cha vaha chi ndo. Ta sativí chi chi ndo.

¹⁸ Ta cuaha xaan ñáyivi nacatyí chii vatyí cuhva cha ndu ñin ri ndo cha cuacoo culto, iyó ndo cha tavá sin ndo chi ndo. Ta suhva ri chinó iñi, ta suhva ña chinó tucu iñi. Soco vasi ndicha.

¹⁹ Vasi cuñí chi coo tisihi nu nyicú ndo tacuhva coto yo nya ndo ndicha cha yihí cuenda Nyoo.

²⁰ Soco tatu tyicuan caa iyó tisihi nu nyicú ndo, ñima Santa Cena chachí ndo cuví cuan.

²¹ Vatyí cuhva cha cuacachi ndo, chachí ri ndo cha nyisó ndo. Ta ña nyatú ndo nya ndu ñin ri tahan ndo. Ta yihí ndo cuaha chachí ndo. Ta chiñi ndo chihin vinu. Ta yihí ndo ña ñihí ndihí ndo cha cachi ndo.

²² ¿Atu ñahri vehe ndo cachi ndo ta coho ndo? Vatyí cha nyacuví ndo tyehe caa, ña cuñi nyehé ndo vehe ñuhu Nyoo cuví cuan. Ta chahá ndo ticahán nuu chi ñu ñahri maa iyó chi. ¿Atu tahán chi catyí chi ndo vatyí vaha cuhva nyacuví ndo, cuñi maa ndo? Ña tahán chi tyi ñahri noo cha cachi caa nyacuví ndo.

Ra Pablo chahá ra tuhun chi ñu, ñáá tuhun quehén ñu Santa Cena

(Mt. 26.26-29; Mr. 14.22-25; Lc. 22.14-20)

²³ Vatyí yuhu suri maa Sutu Mañi yo sañaha tuhun ihya chii. Ta suri maa tuhun ihya sañahi chi ndo. Cha cuaa cha ni cumañi ca cuhva cuenda ra Judas chi Sutu Mañi yo chi ra xaan iñi chi ra, ra Jesús quehen ra noo pan.

²⁴ Ta cha yaha nacuhva ra tyahvi nyoo chi Nyoo ta tahvi sava ra. Ta catyí ra: “Chachi ndo. Vatyí tari coño ñuhi cuví pan ihya. Ta cha catyí ndo ta cucuvi yuhu. Sacuvi ndo tyehe caa vatyí nichon iñi ndo chii”, catyí ra Jesús.

²⁵ Ta cha yaha cha cacuxiñi ra ta quehen ra Jesús copa ta catyí ra: “Chihin copa vinu ihya natyihí tahan Nyoo tuhun chaa chihin ndo vityin. Vatyí vinu cha yihí chichi copa ihya, niñi cuví. Tahan ri cuacoho ndo, coho ndo cha cuenda cha nichon iñi ndo chii”, catyí ra Jesús cha cuaa cuan.

²⁶ Ta tahan ri cha ndu ñin ri yo ta chachí yo pan ta chihí yo vinu sacotó yo chi ñáyivi vatyí cha catyí cuatyí yo chihí Sutu Mañi yo. Ta tyicuan caa sacotó yo chi ñáyivi nyacua nya quivi quichi tucu ra.

Ra Pablo chahá ra tuhun chi yo yoso caa saccoó yo Santa Cena

²⁷ Tatu chachí yo pan ta chihí yo vinu noo cuhvá cha ña chitahán iñi Nyoo, chicoó cuatyí yo. Vatyí ña sahá yo ñáyivi coño ñuhu ta ñiñi ra Cristo.

²⁸ Yucuan chaha cuñí chi sahá yo cuenda tatu vaha cuahán yo chihin Nyoo cha ni ri ca cha cumañi cachi yo pan ta coho yo vinu.

²⁹ Vatyí tatu chachí yo ta chihí yo chihin cha ña sahá yo cuenda ñáá tuhun chihí ra Cristo, Nyoo cutachi tuñi ra chi yo.

³⁰ Yucuan chaha cuaha xaan nyoho cuhví ndo, ta ñahri vaha fuerza ndo. Ta yihí ndo cha chihí ndo.

³¹ Soco tatu sahá vaha yo cuenda chi yo, Sutu Mañi yo ma tachi tuñi ra chi yo.

³² Soco tatu Sutu Mañi yo ta tachi tuñi ra chi yo tyicuan caa, vatyí tacuhva ma cunaa yo chihin ñáyivi iyó siqui ñuhu ñáyivi ihya.

³³ Ta tyicuan caa nyoho yañi, tatu cuandu ñin ri ndo cha cuacoo Santa Cena, cuatu ndo chi noo noo tahan ndo ta cachi ndo ta coho ndo ñin ri.

³⁴ Soco tatu nya noo nyoho chisocó ndo, cachi ndo nya vehe ndo tacuhva cha ma tachi tuñi Nyoo chi ndo.

Ta inga tuhun cusandaa mai quivi cha quichi nyehi nu nyicu ndo.

12

Cha vaha cha chahá Tatyí Ii Nyoo chi yo

¹ Yañi, cuñí vatyí coto ndo ñáá ndihi cha vaha cha chahá Tatyí Ii Nyoo chi noo noo yo.

² Chitó ndo vatyí quivi cha ña ñoho nuu ndo chi Nyoo, chahá ndo chi ndo cha cunyaca ñaha xitohyo cha ña cuví cahan.

³ Yucuan chaha cuñí tyi coto ndo vatyí tatu noo ra catyí tyi ña vaha ra Jesús, ñima Tatyí Ii Nyoo yihí chi ra. Soco tatu noo ra cha catyí tyi ra Cristo cuví Sutu Mañi yo, Tatyí Ii Nyoo yihí chi ra.

⁴ Siin siin cha vaha naquehén noo noo yo, soco maa Tatyí Ii Nyoo ican chahá.

⁵ Siin siin cuhva sahá tyiño yo soco tyiño nuu noo ri maa Sutu Mañi yo sacuví yo.

⁶ Siin siin tunyee iñi chahá ra chi noo noo yo. Soco noo ri maa Nyoo cuví ra chotyíño chi tandihí yo.

⁷ Chi noo noo yo chahá ra tunyee iñi Tatyí Ii ra, tacuhva tyi tyinyeé yo chi tandihí ñu yihí cuenda ra.

⁸ Chi suhva ñu chahá Tatyí Ii Nyoo vatyí cahán ñu chihin cha chiñi tuñi maa ra. Ta chi inga ñu chahá ra cha nacoto ñu ta cahan ñu tuhun cha sacotó Nyoo chi ñu.

⁹ Ta chi inga ñu chahá ra cha chinó vavaha iñi ñu chi ra. Ta suri maa Tatyí Ii ra chahá ra tunyee iñi chi inga ñu vatyí cuví sanduvaha ñu chi ñu cuhví.

¹⁰ Ta chi inga ñu chahá ra tunyee iñi vatyí cuví sacuví ñu milagru. Ta inga ñu chahá cuenda ñu tuhun cahán Nyoo. Ta chi inga ñu chahá ra vatyí cuví cohon nuu ñu Tatyí Ii Nyoo ta tatyí ña vaha. Ta chi inga ñu chahá ra tunyee iñi ra vatyí cuví cahan ñu inga sahan cha ña chitó ñu. Ta chi inga ñu chahá ra tunyee iñi vatyí cuví nacoto ñu ta nacatyí ñu inga sahan cha cahán tahan ñu.

¹¹ Soco tandihí tuhun ihya, noo ri maa Tatyí Ii Nyoo chahá. Soco siin siin cuhva chahá ra chi noo noo yo, yoso cuhva cuñí maa ra.

Chichi cha tandihí yo ta nduví yo noo ri coño ñuhu ra Cristo

12 Ra Cristo cuví ra tari noo coño ñuhu. Vatyí cuaha cha nyaá chi coño ñuhu. Nyaá xiñi. Nyaá ndaha. Nyaá chaha. Ta chichi cha tandihí cuan nanduví chi noo ri coño ñuhu.

13 Ta tyicuan caa tucu tandihí yo, an cuví yo ñu Israel, o ñu Grecia, o ñu iyó chitoho, o ñu yori chitoho, condutya yo vatyí cuví yo noo ri coño ñuhu cuenda ra Cristo. Vatyí noo ri maa Tatyí Ii ra chahá ra tyi quihí chi tandihí yo.

14 Noo coño ñuhu cuaha xaan cuenda yihí tahan. Ñima minoo ri cuenda.

15 Tyehe ta cuví cahan chaha yo ta catyí chi: “Yuhu ñima coño ñuhu cuví vatyí ñima ndaha cuví.” Ñima vatyí catyí chi tyicuan caa ta ñima coño ñuhu cuví chi.

16 O tyehe ta cuví cahan soho yo ta catyí chi: “Yuhu ñima coño ñuhu cuví vatyí ñima chiti nuu cuví.” Ñima tyi catyí chi tyicuan caa ta cusandihí chi cha cuví chi coño ñuhu.

17 Tyehe ta tandihí coño ñuhu yo cuví chiti nuu yo, yoso caa cuví cuiñi yo. O tyehe ta tandihí coño ñuhu yo cuví soho yo, yoso caa cuví tahñi yo.

18 Soco Nyoo tyaq ra noo noo cuan nu cuñi maa ra.

19 Tatu ñin cahnu ri caa coño ñuhu yo, ñima coño ñuhu cuví. Ta ña vaha quetuví.

20 Soco vasi cuaha cha nyaá chi yo, vaha quetuví vatyí nyaá tandihí cha cuví coño ñuhu chi yo.

21 Tyehe ta cuví cahan chiti nuu yo, ñahri ityi iyó chi chi cha catyí chi chi ndaha yo: “Ña chiñuhú yoho chii.” Ta ni xiñi yo ta ñahri ityi iyó chi chi cha catyí chi chi chaha yo: “Ña chiñuhú yoho chii.”

22 Ña vaha cha catyí chi tyicuan caa. Vatyí vasi luhlu ri noo coño ñuhu yo cha cuñi maa yo tyi ña chiñuhú chi yo, ican cuan cuví cha chiñuhú ca chi yo.

23 Ta nu cuñi vaha yo, ican cuan sacuihnó vaha ca yo. Ta nu cuñi maa yo tyi ña tyaqui, ican cuan sacuví ca yo.

24 Ta nu tyaqui ca, ña cuñi chi sacuvii yo. Soco maa Nyoo sandu ñin ri ra coño ñuhu yo, tacuhva vatyí nu cuñi maa yo tyi ña tyaqui, sacahnú ca yo.

25 Tacuhva cha ma cusñ coño ñuhu, tahan tahan chi cuñi chi quihí ñni chi cha catyí inga tahan chi.

26 Tatu suhva coño ñuhu yo nyehé chi tindoho, tandihí ri chi nyehé, ñima noo ri chi. Ta tatu suhva chí cusñ cuñi chi, tandihí ri chi ta cusñ cuñi chi, ñima noo ri chi.

27 Ta maa yo cuví yo coño ñuhu ra Cristo. Ta suhva suhva coño ñuhu ra cuví noo noo yo.

28 Ta Nyoo cuatyaa ra chi noo noo yo vehe ñuhu tacuhva tyinyeé yo chi tahan yo. Cha xihna ca cuatyaa ra chi ra apóstol. Cha cu uvi, chi ra profeta, o ra cachahá cuenda tuhun cahán Nyoo cuví cuan. Ta cha cu ñni, chi ra casañahá. Ta yaha cuan, ra cha casacuví milagru, ta ra cha casanduvahá chi ñu cuhvi, ta ra cha catyinyeé chi ñáyivi, ta ra casahacuendá vehe ñuhu, ta ra cha cacahán inga sahan cha ña chitó ra.

29 Ña tandihí yo cuví yo apóstol. Ña tandihí yo cuví yo noo profeta. Ña tandihí yo cuví yo ra sañaha. Ña tandihí yo sacuví yo milagru.

30 Ña tandihí yo chahá Nyoo vatyí sanduvahá yo ñu cuhvi. Ña tandihí yo cahán yo inga sahan cha ña chitó yo. Ña tandihí yo cuví nacoto yo ta nacatyí yo ñáa cha cuñi chi catyí noo cha cahán yo chihin inga sahan.

31 Ta nducu ndo cuhva ñaquehen ndo cha vaha ca cha chahá Nyoo. Soco cuasañahi noo ityi cha vaha ca chi ndo.

13

Chahá ra Pablo tuhun chi yo yoso caa tahán chi cha cuñí yo chi ñáyivi

¹ Tatu yuhu ta cuví cahin cuaha ri nuu sahan iyó siqui ñuhu ñáyivi ihya, ta cuví cahan tiqui sahan ángel ñandihí, soco tatu ñahri cha cuñí chi Nyoo ta chi ñáyivi, cuví tari noo tambu cha nañí ri maa o noo caa cha chacú ndaxin ri maa.

² Tatu cuví cuhva cuende tuhun cahan Nyoo, o tatu cutuñí iñi tandihí tuhun xehe ca, ta chité tandihí, ta ña cuñí chi Nyoo ta chi ñáyivi, ñahri maa tuhun. Tatu chinó vavaha iñi chi Nyoo nyacua cuví catyi chi ra na tohon ra noo yucu cuan ta natyaa ra inga ityi, ta sacuví ra cha chiquén, soco tatu ña cuñí chi Nyoo ta chi ñáyivi, ñahri ra cuví.

³ O tatu cuhve tandihí cha iyó chii chi ñu ndahvi, ta nyacua cuhva cuende ñáyivi tyi cayu coño ñuhi, soco tatu ña cuñí chi Nyoo ta chi ñáyivi, ñahri maa tuhun.

⁴ Tatu cuñí yo chi Nyoo ta chi ñáyivi, ña ihñi tisihi yo. Vaha ñáyivi cuví yo. Ña nyiyó iñi yo cha chahá Nyoo chi inga ñu, ña cahnu sahá yo chi yo, ta ña yaá yo.

⁵ Tatu cuñí yo chi Nyoo ta chi ñáyivi, ña quiñi iyó yo. Ña nanducú yo maa ri cha vaha chi maa yo. Ña cuxaán yo. Ña ndoó tisihi añima yo.

⁶ Tatu cuñí yo chi Nyoo ta chi ñáyivi, ña cusii cuñí yo ñáá ndihí cha ña vaha sacuví ñáyivi. Soco cusii cuñí yo cuenda cha vaha ta cha ndicha.

⁷ Tatu cuñí yo chi Nyoo ta chi ñáyivi, cunyeé yo nyehe yo tndoho sahá ñáyivi. Chinó iñi yo tyi cusacuví ñu cha vaha. Nyatú yo cha nasama ñu cuhva iyó ñu. Chihin cha cama iñi yo ta cunyeé yo tandihí.

⁸ Cha cuñí yo chi Nyoo ta chi ñáyivi ma ndihí maa, soco coo quivi cha ma coo ca tuhun cha sahá yo profetizar. Ta ma cahan ca yo inga sahan cha ña chitó yo, ta tandihí tuhun cha chitó xaan yo cundihi.

⁹ Vityin chiin ri chitó yo ta chiin ri sahá yo profetizar.

¹⁰ Soco quivi quichi ra Cristo, cunduvaha tandihí ta cucoto yo tandihí, ta cundihi tuhun cha chitó yo chiin ri.

¹¹ Quivi cu luhlí cahin ta chica xiñi tari ra cuatyaa. Soco quivi chahní sandoj cha nyacuví tari ra cuatyaa.

¹² Ta tyicuan caa tucu, cuví yo tari ra cuatyaa vityin. Tari cha nyehé yo nu ino cha ña ndichin vaha. Soco quivi quichi ra Cristo ta cunyehe vaha yo chihin nuu yo chi ra. Chiin ri chitó yo cha vityin. Soco quivi cuan tandihí cuii ta cucoto yo, tari ñohó nuu Nyoo chi yo.

¹³ Iyó uñi tahan cha ma ndihí maa: cha chinó iñi yo chi Nyoo, cha cuatu yo cha ñihí yo cha cuenda ra Cristo, ta cha cuñí yo chi Nyoo ta chi ñáyivi. Soco chichi cha ninduñi tahan cuan, cha chiñuhú ca chi yo, cha cuñí yo chi Nyoo ta chi ñáyivi.

14

Nu sañahá ra Pablo yoso caa cahán yo inga sahan cha ña chitó yo

¹ Na sañihi yo cuñí yo chi Nyoo ta chi ñáyivi. Ta na nducu yo cuhva naquehen yo tunyee iñi cha chahá Tatyí li Nyoo chi yo. Na nducu xihna yo cha cuhva cuenda yo tuhun cahán Nyoo, o sahá yo profetizar cuví cuan.

² Vatyí tatu cahán yo inga sahan cha ña chitó yo, cahán yo soco chihin Nyoo. Ñima chihin ñáyivi. Vatyí ni noo ñu ta ña cutuñí iñi ñu. Vatyí tuhun xehe cuví tuhun cha cahán yo cha cuenda Tatyí Ii Nyoo.

³ Soco tatu sahá yo profetizar, cutuñí iñi ñu. Ta chahnu ca ñu chihin tuhun Nyoo. Ta tyicuan caa sanduní yo ta sandunyeé ca yo iñi ñáyivi.

⁴ Tatu cahán yo inga sahan cha ña chitó yo, maa ri maa yo ndunyeé yo. Soco tatu sahá yo profetizar, ndunyeé cuñi tandihí ñu yihí cuenda Nyoo.

⁵ Yuhu cuñi vatyí tandihí ndo cahán ndo inga sahan cha ña chitó ndo. Soco vaha ca cha saha ndo profetizar. Vatyí tyinyeé ca chi chi ñu nyicú vehe ñuhu ta ñima ca cha cahán yo inga sahan. Soco tatu noo ndo cuví nacoto ndo ñáá tuhun cahán noo tahan ndo chihin inga sahan, nacatyí ndo. Tyicuan ta cuví tyinyeé chi chi tandihí ndo.

⁶ Yucuan chaha yañi, tatu yuhu ta chai nu nyicu ndo, ta cahín inga sahan, ña tyinyeé chi chi ndo. Soco tatu cahín noo cha sanyehé Nyoo chii, o noo cha sacoto ra chii, o noo profesia, o noo cha sañahi chi ndo, tyinyeé chi chi tandihí cuí maa ndo.

⁷ Tatu tiví yo noo cutu, o sacuacu yo noo guitarra ta ña quita vaha ndusu cuan sahá yo, ma coto yo ñáá yaa cuví.

⁸ Ta tatu nu iyó cuatyí ta ña tyacú vaha trompeta, yori coto ñáá cuhva tahán chi cañi tahan ra.

⁹ Ta tyicuan caa yoó, tatu cahán yo inga sahan cha ña cutuñí iñi ñáyivi, ma coto ñu ñáá tuhun cahán yo. Tari cha cuví yuhu ri maa yo cuví cuan.

¹⁰ Cuaha xaan nuu sahan iyó ñáyivi ihya. Ta noo noo nuu sahan ta iyó iyó ri cha cuñí chi catyí.

¹¹ Soco tatu ña cutuñí iñi sahan cha cahán inga ñáyivi chihin, ma cuví ndatuhin chihin ñu. Ta ni ri maa ñu ma cuví ndatuhin ñu chihin yuhu. Cuví ñu tari ñu inga ñuu cha cuende.

¹² Yucuan chaha nyoho cha cuñi xaan ndo naquehén ndo tunyee iñi cha chahá Tatyí Ii Nyoo, nducu ndo noo tunyee iñi cha vaha ca cutyinyeé chi ñáyivi vehe ñuhu.

¹³ Yucuan chaha nyoho cha cahán ndo inga sahan, çacan ndo chi Nyoo vatyí cuví nacoto ndo ta nacatyí ndo chi tahan ndo.

¹⁴ Vatyí tatu nacuatí chi Nyoo chihin noo sahan cha ña cutuñí iñi, espíritu mai cha yihí chichi coño ñuhi ican nacuatú soco cha chiñi tuñi xiñi ña cutuñí iñi chi.

¹⁵ Yucuan chaha cuñi chi çacan tahvi chi Nyoo chihin inga sahan. Soco cuñi tucu chi cha çacan tahvi chi ra chihin sahan cha cutuñí iñi. Ta cuñi tucu chi cha cate chihin sahan cha ña cutuñí iñi, Soco cuñi tucu chi cha cate chihin sahan cha cutuñí iñi yo ñandihí.

¹⁶ Vatyí tatu maa maa ri chihin sahan cha chahá Tatyí Ii Nyoo chuun, sacahnún chi ra, ma cutuñí iñi ñáyivi cha ña chitó ñáá cha cuví cuan. Ta ma cuví sacahnú ñu Nyoo chuun.

¹⁷ Vasi vaha tuhun cahún, cuhva cha nacuhvón tyahvi nyoo chi Nyoo tyicuan caa, soco ña tyinyeé chi chi inga ñáyivi vatyí ña cutuñí iñi ñu tuhun cahún.

¹⁸ Soco yuhu nacuhvé tyahvi nyoo chi Nyoo vatyí cuaha ca chaha cahin inga sahan ta ñima ca tandihí nyoho.

¹⁹ Soco chichi vehe ñuhu tahan ca iñi cahín vasi ohon tahan tuhun cha cutuñí iñi ndo vatyí sañahi chi inga ndo, ta ñima ca cha cahín uchi mil tuhun cha ña cutuñí iñi ndo.

²⁰ Chahnu cuhva caca xiñi ndo, yañi. Ta ma lee xaan cuhva caca xiñi ndo. Soco lee cuhva cunyacuvi ndo. Vatyí cha lee ña nyacuví chí cha quiñi caa.

²¹ Catyí Nyoo nu libru ley ra tyehe caa: “Cucahin chihin ñáyivi ihya chihin yuhu ñáyivi inga ñuu ta chihin inga sahan. Cha ña cutuñí iñi ñu. Soco ni ri tyicuan caa ta ma quichaha ñu chí”, catyí Sutu Mañi yo.

²² Yucuan chaha tuhun cha cahán yo inga sahan cuví chí tari noo seña chí ñu cha ña chino iñi tuhun ra Cristo. Soco tuhun cha sahá yo profetizar, cuví chí cuenda ñu cha chinó iñi chí ra.

²³ Vatyí tatu ndu ñin ri ndo, ta tandihí ndo cahán ndo inga sahan ta quihví noo ñu cha ña yihí cuenda Nyoo, cucatyí ñu tyi ña vaha cuñi xiñi ndo.

²⁴ Soco tatu tandihí ndo sahá ndo profetizar, ta quihví noo ñu cha ña yihí cuenda Nyoo, o noo ñu ña cutuñí vaha iñi tuhun Nyoo, coto ñu tyi iyó cuatyí ñu cha cuenda tyi cutuñí iñi ñu cha cahán ndo.

²⁵ Ta tandihí cha caa chichi añima ñu cunacoto ñu. Ta nicuñi chíti ñu ta sacahnu ñu chí Nyoo. Ta catyí ñu vatyí ndicha ndicha cuii cha nyaá Nyoo chihin ndo.

Yoso caa sacóo yo culto minoo cha cachi minoo cha ndaa

²⁶ Yucuan chaha yañi, tatu cuandu ñin ri yo, cuiso noo noo yo yaa cha cata yo, o cha sañaha yo, o ñáá cha sanyehe o sacoto Nyoo chí yo, o cahan yo inga sahan, o cha nacoto yo ta nacatyí yo yoso caa cuahán tuhun inga sahan cuan. Soco tandihí ihya nacuvi chí noo cha chahá tunyee iñi maa Nyoo chí tandihí yo cha yihí yo cuenda ra.

²⁷ Tatu cuacahan yo inga sahan nu ndu ñin ri yo, cuñi chí cahan uvi yo o uñi ri yo, soco noo noo ri yo cahan. Ma cahan yo ñin ri. Ta sñin ri cuñi chí cha nacatyí noo yo tuhun cahán tahan yo.

²⁸ Soco tatu yori cuví nacatyí ñáá tuhun cahán yo, vaha taxin ca ma cahan ca yo chihin inga sahan nu ndu ñin ri yo. Cahan yo inga sahan soco xehe ri chíhin Nyoo tacuhva cuiñi ri maa yo.

²⁹ Tyicuan caa tucu tatu sahá yo profetizar, cahan uvi yo, o uñi ri yo. Ta tandihí ca yo saha yo cuenda tatu vaha cha cahán tahan yo.

³⁰ Soco tatu sacoto Nyoo ñáá noo ca tuhun chí inga ñu cha canyicú chíni tuhun cuan. Tyicuan ta ñu cha xihna ri, cuñi chí sandihí ñu cha cahán ñu tacuhva cuví cahan inga ñu cuan.

³¹ Ta tyicuan caa tandihí ndo cha naquehén ndo tuhun cha chahá Nyoo chí ndo cuví nacatyí noo noo ndo. Vatyí tacuhva cutuhva tandihí ca ndo ta cunñi ca iñi ndo.

³² Ñu cha sahá profetizar cuví cuatu noo ñu nya ndihí cahán inga ñu. Vatyí noo ri Nyoo cuví ra cha nyacá ñaha chí noo noo yo.

³³ Vatyí Nyoo cachi iyó ra ta ña iñi ndaa iñi noo nyacuví ra.

Quehen ndo cuhva vaha nyacuví inga hermano nu ca ndu ñin ri ra.

³⁴ Ñusihí taxi ri na coo ñu. Cuñi chí quichaha ñu chí yñi ñu tari catyí ley Nyoo.

³⁵ Tatu ñáá cha cuñi ñu coto ñu, na ndaca tuhun ñu chí yñi ñu nya vehe ñu. Vatyí ña vaha quetuví cha cahán ñusihí nu ndu ñin ri yo.

³⁶ Tatu sñin cuhva chicá xiñi ndo, cuñi chí nicohón iñi ndo vatyí ñima chihin ndo quichaha tuhun Nyoo. Ta ñima nyoho ri naquehén tuhun Nyoo.

³⁷ Tatu nya noo ndo cuñi maa ndo vatyí profeta cuví ndo, o tatu cuñi maa ndo tyi Tatyí li saquehén ityi ra chí ndo, cunacoto ndo vatyí cha catyí chí ndo ihya, mandamiento Sutu Mañi yo cuví.

³⁸ Soco tatu ña cuñí ndo naquehén ndo tuhun ihya, ni nyuhu ta ma naquehen ndi tuhun cahán ndo.

³⁹ Ta tyicuan caa yañi, na nducu ndo cuhva saha ndo profetizar. Ta ma casi ndo cha cahán ñu inga sahan.

⁴⁰ Soco sacuvi ndo tandihí chihin cha ndaa ta chihin cha cachi.

15

Yoso caa nandoto ra Cristo

¹ Vityin yañi, cuñí vatyí ñichon iñi ndo tuhun ra Cristo, cha sacacú chi yo, cha cahán nuu ndo quiví cuan. Ta ican naquehen ndo ta ñi iñi ndo chinó iñi ndo.

² Ta suri cha cuenda tuhun ra Cristo cacú añima ndo tatu cuahán ndo tari cuhva sañahí chi ndo. Soco tatu nattyihí caxiin ndo cuahan ndo, ñahri maa tuhun cha chingó iñi ndo chi Nyoo.

³ Cha xihna ri sacote tuhun cha cutuhve chi ndo. Ta sañahí chi ndo vatyí ra Cristo chihí ra cha catyí cuatyí yo, tari catyí nu libru Nyoo vatyí cucuvi.

⁴ Tyicuan ta chicuchí ñu chí ra. Soco nu ndu uñi quiví nandoto ra tari catyí tucu nu libru Nyoo.

⁵ Tyicuan ta tuví ra Cristo nuu ra Pedro ta yahá cuan ta nuu ndi uchi uvi tahan ra chicá tyiño ra.

⁶ Yahá cuan ta noo chaha tuví ra nuu yaha ca ohon cientu yañi yo. Ta cuaha ca ñu cuan iyó ca ñu vityin. Soco suhva ñu cha yahá chihí ñu.

⁷ Yahá cuan ta tuví ra nuu ra Jacobo. Yahá cuan ta nuu tandihí ra apóstol.

⁸ Ta nu ndihí tuví tucu ra nuu yuhu, cha cuví tari noo ra cuatyaa cha cacu ta ta chaa ca yoo cacu. (Vatyí ta cutuñi ca iñi tuhun Nyoo cuví cuan.)

⁹ Vatyí cha nuu tandihí ca ra apóstol cuví yuhu noo cha ñima ri tuhun. Ta ni ña nañe cha cuví apóstol vatyí chica nyicon xain chi ñu ñohó cuenda Nyoo.

¹⁰ Soco Nyoo vaha xaan ñáyiví cuví ra chihin. Ta ñima cha caha ri saha ri tumañi iñi chii cha cuví noo ra chicá tyiño ra. Ta ñihi ca sahá tyiñe ican saha inga ra. Soco ñima mai sahá tyiñe vatyí maa Nyoo nyaá chihin. Ta ican ra sacuví tandihí cuan.

¹¹ Soco ñahri saha, an yuhu, an inga ra cuan. Soco tuhun cahán ndi chihin ndo, ican ihya cuví tuhun cha chinó iñi ndo.

Nu sañahá ra Pablo vatyí cha ndicha cuví vatyí cunandoto ñu ndiyí

¹² Tatu cahán ndi tuhun cha nandoto ra Cristo mahñu ñu ndiyí chihin ndo, ¿ñáá tuhun cha yihí ndo catyí ndo vatyí ma nandoto ñu ndiyí?

¹³ Vatyí tatu ma nandoto ñu ndiyí, ni ri ra Cristo ta ña nandoto ra cuví cuan.

¹⁴ Tyehe ta ña nandoto ra Cristo, tuhun cha cahán ndi chihin ndo ñahri maa vale. Ta ni ri cha chinó iñi ndo, ñahri maa tuhun.

¹⁵ Tatu tyehe ta ña ndicha cha sanandoto Nyoo chi ra Cristo, cuví ndi noo ra cuendu tyi catyí ndi vatyí sanandoto Nyoo chi ra. Ta tatu ña ndicha cha nandoto ñu ndiyí, ña ndicha cha sanandoto Nyoo chí ra Cristo.

¹⁶ Vatyí tyehe ta ma nandoto ñu ndiyí, ni ri ra Cristo ta ña nandoto ra.

¹⁷ Ta tatu ña nandoto ra Cristo, ñahri maa tuhun cha chinó iñi ndo cha sandachí ra cuatyí ndo. Ta tacuhva iyó ri maa cuatyí ndo.

¹⁸ Ta ñu yihí cuenda ra ta cachihí ñu, cuanaa ri maa ñu cuví cuan.

¹⁹ O tyehe ta ihya ri ñáyiví tyinyeé ra Cristo chí yo, ta ma nandoto yo quiví quichi ra, cuví yo noo ñu tondo cha nuu tandihí ca ñáyiví.

20 Soco chitó vaha yo vatyi cha ndicha cuví cha nandoto_o ra Cristo. Ta ican ra cuví cha nandoto_o xihna ca mahñu ñu ndiyi.

21 Vatyi cha catyi cuatyí ra Adán ta chicoó tuhun chihí. Yucuan chaha tahán chi cúvi yo. Soco cha catyi cha nandoto_o ra Cristo tahán chi nandoto tucu ñu yihí cuenda ra.

22 Ta tari tandihí ñáyivi chihí cha cuenda ra Adán, tyicuan caa tucu cunandoto tandihí ñu cuenda ra Cristo.

23 Soco noo noo yo cunandoto yo quívi tahan chi chi yo. Xihna ca ra Cristo nandoto_o. Yaha cuan ta quívi quichí tucu ra inga chaha cunandoto tucu ñu yihí cuenda ra.

24 Yaha cuan ta cundihí tuhun ñuhu ñayivi ihya ta ma cunyaca ñaha ca ra cuví tyiño nahnu, ta tatyí ña vaha. Vatyi ra Cristo cuatinyaa ra fuerza chi ra cuan. Ta cunacuhva cuenda ra chi Nyoo Sutu ra.

25 Vatyi ra Cristo cunyaca ñaha ra nyacua nya quívi cuhva Nyoo cha cuví chasaha ra chí tandihí ra xaan iñi chi ra.

26 Ta nya nu ndihí, cusanaa ra tuhun chihí.

27 Vatyi cha yahá nacuhva cuenda Nyoo tandihí chi ra Cristo vatyi cunyaca ñaha ra. Soco nu catyí chi vatyi tandihí natyaa Nyoo ndaha ra, cuñí chi catyí vatyi ma cunyaca ñaha ra chi maa Nyoo vatyi ican maa Nyoo natyaa tandihí cuan ndaha ra.

28 Soco quívi saha ganaa ra Cristo tandihí, tyicuan ta maa ra cha cuví ra Sehe Nyoo, cunacuhva cuenda ra tandihí chi Nyoo Sutu ra. Vatyi Nyoo cucuvi ra Nyoo cuenda tandihí maa cha iyó.

29 Tatu tyehe ta ña nandoto_o ñu chihí, ¿ñáá tuhun yihí ñu condutyá ñu tyiño nuu ñu chihí?

30 Ta tyicuan caa tucu mai, tatu ma nandote, ¿ñáá tuhun ndoí vaha cha ndi quívi nyatí tuhun chihí?

31 Tandihí quívi nyatí tuhun chihí. Soco ñahri caa vatyi síí cuñi chihin ndo. Vatyi chinó iñi ndo chi Sutu Mañi yo Jesucristo.

32 Ñáá ri tuhun nyehí tindoho ñuu Éfeso tatu tyehe ta ma nandoto ca yo. Vaha taxin ca sacuvi yo tari catyí ñáyivi: “Na cachi yo, na coho yo vatyi tyaan isa cúvi yo”, catyí maa ñáyivi cha ña chitó.

33 Ma cuhva ndo cha sandavi ñaha ñu chi ndo. Vatyi iyó tucu tuhun cha catyí: “Tatu ñu tahan yo quiñi iyó ñu, cuví sativi ñu cuhva vaha cuahan yo.”

34 Saha ndo cuenda cuhva iyó ndo. Ta ma sacuvi ca ndo cha quiñi caa. Vatyi chihin cuhva iyó suhva ndo chité tyi ña ñohó nuu ndo chi Nyoo. Catyí chi ndo tyehe caa vatyi nacoo ticahan nuu nuu ndo.

Nu sañahá ra Pablo yoso caa cusanandoto Nyoo chi yo quívi quichí ra Cristo

35 Soco yihí ndo ndacá tuhun ndo: “¿Yoso caa cunandoto ñu chihí? ¿Ñáá coño ñuhu cucuiso ñu?”

36 ¡Tondo xaan xiñi ndo! ¿Atu ña chitó ndo vatyi tatu tachí yo noo chiti yutun, cuñí chi cha tyahyu soo chiti cuan? Tyicuan ta cañá noo yutun. (Chihí chiti cuan tacuhva na coo yutun cuan ñayivi.)

37 Vatyi cha tachí yo ñima maa tun tachí yo. Soco chiti tun, an cuví ri nuñi, o trigo, o ñáá ndihí ca chiti.

38 Ta cha cañá cuan Nyoo sacuvi ra yoso cuhva cuñí maa ra chi noo noo cha cañá cuan. Vatyi siin siin cuhva caa noo noo nuu chiti.

39 Ta tyicuan caa tucu tandihí coño ñuhu, ña ñin ri caá chi. Siin caa coño ñuhu ñáyiví. Siin caa coño ñuhu cuiñi. Siin caa coño ñuhu saa. Siin caa coño ñuhu tiyaca.

40 Ta tyicuan caa tucu cha iyó andiví. Siin caa cha iyó yucuan. Ta siin caa tucu cha iyó ñuhu ñáyiví ihya. Ta cha iyó nya andiví tyaqui xaan, ta cha iyó siqui ñuhu ñáyiví tyaqui tucu cuan soco siin caa.

41 Cha ndichin ñanyii, ña inuu ri chihin cha ndichin yoo. Ta ña inuu ri chihin cha ndichin tiño. Ta tiño ña inuu ri chihin inga tucu tiño.

42 Ta tyicuan caa tucu tuhun cha nandoto yo. Vatyí chicuchi yo noo coño ñuhu yo cha tuhva tyahyu. Ta cunandoto yo soco chihin noo cha ma cúvi ca maa.

43 Chicuchi yo noo cha numi ri tyahyu. Soco cunandoto noo cha tyaqui. Tyihi yo noo coño ñuhu pehe chichi ñuhú. Ta cunandoto noo cha nyee.

44 Vatyí chicuchí yo coño ñuhu yo cuenda ñáyiví ihya chichi ñuhu. Ta cunandoto noo cha ñima ca cuenda ñáyiví ihya cuví, soco cuenda Nyoo andiví. Tatu iyó coño ñuhu yo ñáyiví ihya. Suri coo tucu noo cha ñima ca cuenda ñuhu ñáyiví, soco cuenda andiví.

45 Catyí tuhun Nyoo vatyí ra Adán ra cha chiyó cha xihna ri, chaha Nyoo ñáyiví coo ra. Soco ra Adán cu uvi, ra cuví Cristo, cuví ra Tatyí Ii ta chahá ra noo ñáyiví cha ma naa ca maa chi yo.

46 Yucuan chaha, cha xihna ri tahán chi coo yo chihin coño ñuhu cuatyí yo. Ta yaha cuan ta coo yo cuenda Tatyí Ii Nyoo.

47 Rayíi cha chingó cha xihna ri, chihin ñuhú chingó ra. Ra cuenda ñuhu ñáyiví cuví ra. Ta rayíi cu uvi cha cuví Sutu Mañi yo, ra cuenda andiví cuví ra.

48 Tandihí yo nyisó yo coño ñuhu cha chingó chihin ñuhú, tari coño ñuhu ra Adán. Ta cha cucuiso yo andiví cuví chi tari nyisó ra Cristo ra quichí nya andiví.

49 Tari ndacú yo chi rayíi, ra cha chingó chihin ñuhú, tyicuan caa tucu cundacu yo chi ra Cristo ra quichi nya andiví.

50 Ta cuñí catyí chi ndo yañi, vatyí coño ñuhu yo ma cuví quihví chi andiví nu nyacá ñaha Nyoo. Noo cha tañi tyehe ri tiví ma cuví quihví noo nu ña tiví.

51 Soco cuñí tyi coto ndo noo tuhun xehe cha yori maa chitó. Vatyí ña tandihí yo cucúvi yo. Soco tandihí yo ta cunasama cuhva caa yo.

52 Ta ñin yaha cuií ri, tari noo cha ndahvá nuu ri yo, nu ndihí tiví ángel trompeta. Vatyí cutiví ángel trompeta ta ñu ndiyi cunandoto ñu cha ma cúvi ca maa ñu. Ta Nyoo cunasama cuhva caá ñu.

53 Vatyí cuñí chi tyi nasama Nyoo coño ñuhu yo chihin noo cha ma naa ca maa.

54 Ta quiví cuan nasama coño ñuhu yo ta quehen yo cha ma tiví maa. Cua cuví tari catyí nu libru Nyoo tyehe caa: “Nyoo cuví chasaha ra chi tuhun chihí.”

55 Yoho, Tuhun Chihí, ¿nya nyaa tunyee íñi chuun vityin vatyí cahñun chi ndi? ¿Nya nyaa cha cua saha ganaun vityin, yoho Tuhun Chihí?

56 Vatyí cuatyí yo ican chahá cha cahñi tuhun chihí chi yo. Ta ley chahnu, ican cuví cha chahá fuerza chi chi.

57 Soco tyahví nyoo chi Nyoo, yañi. Vatyí sahá ganaa yo siqui cuan cha catyí Sutu Mañi yo Jesucristo.

58 Yucuan chaha yañi, na cuinanyaa yo chihin Nyoo chihin cha ñi íñi yo. Tyicuan ri na saha tyiño yo nu tyiño Sutu Mañi yo. Vatyí tyiño sahá yo chihin Sutu Mañi yo, ñima cha sahá tyiño caha ri maa yo cuví.

16

Chahá ra Pablo tuhun chi ñu Corinto yoso caa tyinyee ñu chi tahan ñu cuenda Nyoo

¹ Ta tuhun cha tyinyee ndo xuhun chi ñu ndahvi, ñu yihí cuenda Nyoo. Cunyacuví ndo tari catyí chi ñu nyicú tandihí vehe ñuhu ityi Galacia.

² Ma cuatu ndo nya quichi ta cuhva ndo xuhun. Soco tahan tahan nu ndihí vitya ri ta tyihi sñn ndo cha tahán chi cuhva ndo chi ñu, yoso cuhva cha chahá Nyoo chi ndo.

³ Ta quiví cha quichi, cutachi nya ra cha cuñí maa ndo vatyi cunyaca ra xuhun cuan chihin carta chi tahan yo cha canyicú nya Jerusalén.

⁴ Ta tatu tahan tucu chi cuhin, cuhun coyo ra chihin.

Yihí iñi ra Pablo nya ndihí nu cucahan ra tuhun ra Cristo

⁵ Cuhin nu nyicu ndo Corinto chiña, soco cuhun xihne ityi Macedonia. Vatyi ityi cuan cuyahi.

⁶ Ta tatu chahá chí cuhva cundoí chihin ndo nyacua nya yahá yoo vichin. Tyicuan ta cuví tyinyee ndo chiin chíi ta cuhin inga ñuu.

⁷ Ña cuñí cha ñn yaha ri yahi nu nyicu ndo. Vatyi cuñí ndoi suhva quiví chihin ndo tatu Sutu Mañi yo ta cuñí ra.

⁸ Soco cunyai ñuu Éfeso ihya, nyacua nya yaha quiví cha sanducahnú ñu Israel vico Pentecostés. Tyicuan ta quichi nu nyicu ndo.

⁹ Cundoí suhva ihya vatyi vasi cuaha xaan ñáyiví ña cuñí nyehe ñu tuhun Nyoo, soco chahá xaan chí cuhva cahín tuhun Nyoo chihin ñáyiví ñuu ihya.

¹⁰ Tatu chaa ra Timoteo, na cunyaa ra chihin ndo. Ta vaha tyiñuhu ndo chí ra. Vatyi sahá tyiño tucu maa ra cuenda Sutu Mañi yo tari maí.

¹¹ Ta vaha ço iñi ndo nyehé ndo chí ra. Ta tyinyee ndo chiin chí ra tyi quichi ra nu nyaí. Vatyi nyatí chí ra chihin inga yañi yo.

¹² Ta yañi yo, ra Apolos, chacu ndahvi xain nuu ra nacuhun ra chihin inga yañi yo nu nyicu ndo. Soco ña cuñí ra. Soco cuhun maa ra nacuhva chí cuhva chí ra, na.

Chahá ra Pablo nocumi chí tandihí ñu yihí cuenda Nyoo ñuu Corinto

¹³ Sañihi ndo chinó ca iñi ndo chí Nyoo. Ta cuní iñi ndo ta nacoo vaha fuerza Nyoo chí ndo.

¹⁴ Tandihí cha sacuví ndo, sacuví ndo cha cuenda cha cuñí ndo chí Nyoo ta chí tahan ndo.

¹⁵ Chitó ndo yañi vatyi ñáyiví chí ra Estéfnas xihna ca ñu chinó iñi tuhun ra Cristo ityi Acaya chiña. Ta vityin sacuví ñu tyiño nuu ra hermano.

¹⁶ Ta catyí chí ndo vatyi saha ndo ñáyiví chí ñu cha iyó tari iyó ñu chiña, ta chí tandihí ñu cha tyinyee ta sahá tyiño cuenda Nyoo.

¹⁷ Ta cusí xaan cuñí cha quichí coyo ra Estéfnas ta ra Fortunato ta ra Acaico. Vatyi maa ra catyinyee ra chí ndi. Vatyi tandihí ndo ña cuví quichi ndo vatyi cañi xaan ñuu ndo.

¹⁸ Soco maa ra quichí coyo ra. Ta sandunyeé ca ra iñi chihin tuhun Nyoo. Tari sanduní ra iñi nyoho ñandihí. Ta vaha ço iñi ndo nyehé ndo tyiño casacuví ra. Vatyi maa ra ñn ri chí Nyoo canyicón ra.

¹⁹ Ta vachí nocumi chí ndo sahá tandihí yañi yo ta tahan yo cha ndu ñn ri ityi Asia ihya. Ta vachi tucu nocumi chí ndo sahá ra Aquila ta cu Priscila, ta ñu yihí cuenda Nyoo cha ndu ñn ri vehe ñuhu nu cuví vehe ñu.

²⁰ Vachi nocumi chi ndo sahá tandihí yañi yo, ta nācuhva maa ndo nocumi chi noo noo ndo nu nyicú ndo chiña.

²¹ Nocumi cha vachí chi ndo ihya, yuhu ra Pablo tyaj chihin ndahi.

²² Tatu nya ñáyivi ña cuñí chi Sutu Mañi yo Jesucristo, nacuhun ñu anyaya. Soco yuhu catyí: ¡Sutu Mañi yuhu, ñaha!

²³ Ta nasoco Sutu Mañi yo Jesucristo chi tandihí ndo.

²⁴ Ta catyí chi ndo vatyí yuhu cuñí chi tandihí ndo cha cuenda ra Cristo Jesús. Ta nacuví chi tyicuan caa.

Carta Cha Cu Uvi Sacuhun Ra Apóstol Pablo Chi Ñáyivi Ñuu Corinto Cha Yihí Cuenda Nyoo

Nu sacuhún ra Pablo noo tutu chi ñu ñuu Corinto cha yihí cuenda Nyoo

¹ Yuhu ra Pablo, cuví noo ra apóstol ra Jesucristo vatyi Nyoo nacachi vaha ra chii. Ta yuhu ta ra Timoteo yañi yo tyaá ndi noo tutu ihya chi ndo cha cuví ndo ñáyivi ñuu Corinto cha yihí cuenda Nyoo, ta chi tandihí ñu yihí cuenda Nyoo nicacahnu ityi Acaya chiña.

² Nyoo Sutu yo ta Sutu Mañi yo Jesucristo na nasoco ra chi ndo ta nacuhva ra cha taxi ri coo aña ndo.

Nu chicá noo ra Pablo sacotó ra tuhun ra Cristo nyehé xaan ra tindhó

³ Na sacahnu yo chi Nyoo Sutu Sutu Mañi yo Jesucristo. Vatyi ican ra cuví Nyoo Sutu yo. Ta cundahvi xaan cuñi ra nyehé ra chi yo. Ta maa ra tyicuan ri naquehén ndahvi ra chi yo.

⁴ Ta cuhva cha nyehé yo tindhó maa ra naquehén ndahvi ra chi yo. Vatyi tyicuan caa ta cuví naquehen ndahvi tucu maa yo chi ñu nyehé tindhó tari naquehén ndahvi tucu maa ra chi yo.

⁵ Vatyi cha cuenda ra Cristo, nyehé xaan ndi tindhó ta suri cha cuenda ra Cristo naquehén ndahvi xaan Nyoo chi ndi.

⁶ Tatu nyehé ndi tindhó cha cuenda cha sacotó ndi tuhun ra Cristo chi ndo, soco cha cuenda cha vaha chi ndo cuví vatyi tyicuan ta Nyoo naquehen ndahvi tucu ra chi ndo, ta sacacu ra chi ndo. Ta tatu Nyoo ta sandunyeé ra iñi ndi, cuví tucu chi cha cuenda cha sandunyeé tucu ra iñi maa ndo ta cacu ndo, ta siin ri tacuhva cha cunyeé ndo tindhó cha nyehé ndo. Vatyi iin ri tindhó nyehé yo.

⁷ Vatyi chitó vaha ndi tatu nyehé ndo tindhó cha cuenda ra Cristo tari cha nyehé nyuhu, maa ra cunaquehen ndahvi ra chi ndo, tari naquehén ndahvi tucu ra chi nyuhu.

⁸ Yañi, cuñí ndi tyi coto ndo vatyi cuaha xaan tindhó nyehé ndi ta chinyaa ndi ityi Asia. Ñihi xaan chiyo tindhó nyacua cha ñahri ca fuerza ndi cahvi iñi ndi. Ta tyaá ndi cuhva vatyi cha yahá chihí ndi ta quita ndi yucuan.

⁹ Cuñi maa ndi vatyi cha cha cuacúvi ndi. Ta ña cuví sacacu ndi chi ndi. Soco yucuan sañahá chi chi ndi na nachinó ca iñi ndi chi Nyoo ra sanandotó ndiyi.

¹⁰ Nyoo sacacu ra chi ndi ndaha tuhun chihi quivi cuan, ta sacacú ca ra chi ndi nya vityin. Ta chitó ndi vatyi tyicuan ri cusacacu maa ra chi ndi.

¹¹ Tatu tyinyeé ndo chi ndi chihin cha chicán tahvi ndo chaha ndi, ta tatu cuaha ñáyivi chicán tahvi chaha ndi, cunacuhva ñu tyahvi nyoo chi Nyoo cha cuenda tyi ñihí ñu tuhun tyi Nyoo chahá ra cha vaha chi ndi, vatyi chicán tahvi ñu chaha ndi.

Nu nacatyí ra Pablo ñáá tuhun ña chaq ñaha ra ñuu Corinto

¹² Iyó noo tuhun cha cusii xaan cuñí ndi, vatyi yoso ri sandaví ñaha ndi. Vatyi cachi cuhva iyó ndi. Ta ndaa cuhva iyó ndi xihna ca chihin tandihí ri ndo, ta chihin inga ñáyivi ñandihí. Ta ñima chihin cha chiñi tuñi maa ndi iyó ndi tyehe caa, soco cha cuenda tyi tyinyeé xaan maa Nyoo chi ndi.

13-14 Ta nu tutu cha sacuhún ndi chi ndo, maa maa ri tuhun cha cuví sacuahá ndo, ta cha cuví cutuñi iñi ndo, tyaá ndi. Vityin cuahán cutuñi iñi ndo suhva. Ta nyatú ndi na cutuñi vaha ca iñi ndo tandihí tuhun cuan. Tacuhva cusíi cuñi ndo chihin ndi quiví quichi Sutu Mañi yo. Ta cusíi cuñi tutu maa ndi chihin ndo.

15-16 Ta cha cuenda cha cusíi iñi yo tyehe caa, tyaí cuhva quiví cuan cha cuhun xihne nu nyicú ndo. Yihí iñi cha cuhin nu nyicú ndo, quiví cha yahí cha cuahín nya Macedonia ihya. Ta quiví cha nayahá tiquí cha chahín Macedonia, cuhin inga chaha nu nyicú ndo. Tyicuan caa ta cuvi cusíi iñi ndo chihin yuhu uvi chaha, tyaí cuhva. Ta tyicuan caa ta cuvi tyinyee ca ndo chíi ta cuhin ityi Judea.

17 O cuñi maa ndo vatyi ña tyaí cuhva cha cuhin nu nyicu ndo. Ta vasi cuñi maa ndo vatyi sacuví tari ñayiví iyó siquí ñuhu ñayiví ihya. Vatyi catyí ñu tyi cuhun ñu, ta ña sacuví ñu.

18 Maa Nyoo chitó ra vatyi ndicha cha cahín. Ta ña tuhvé sandavi ñahi.

19 Vatyi yuhu ta ra Silvano ta ra Timoteo cahán ndi chihin ndo. Vatyi tuhun maa ra Cristo maa maa ri tuhun ndicha cuví.

20 Tyi cha cuenda maa ra ñihí yo tandihí cha vaha cha catyí Nyoo tyi cucuhva ra chi yo. Yucuan chaha cuhva cha sacahnú yo chi Nyoo, o chicán tahvi yo chi ra, catyí yo: “Amén”. Vatyi chitó yo tyi cuacuhva ra cha vaha chí yo cha cuenda ra Cristo.

21 Ta Nyoo sanduní ca ra iñi yo nu sandu ñn ri ra chi yo chihin ra Cristo. Ta nacachí ra chi yo.

22 Ta tari cha tyaá ra tuñi ra chí yo cuví cuan. Vatyi chahá ra Tatyí Ii ra quihí añima yo cha cuenda cha cuñihí ca yo ñáá ca cha cucuhva ra chí yo.

23 Na naquehen Nyoo chíi vityin ri tatu ña ndicha tuhun cua catyí chí ndo. Ta cuhun que nu nyicú ndo Corinto chiña vatyi tatu cuhin tyaí cuhva cha cahin chíi chí ndo. Yucuan chaha ña cuñi ñahi cuhin vatyi nacuaan iñi nyehí chí ndo. Ta Nyoo chíiñí ra vatyi ndicha cha cahín.

24 Ñima cha cuñi ndi cunyaca ñaha ndi chí ndo yoso cuhva chinó iñi ndo chí Nyoo. Vatyi chinó vaha iñi ndo. Soco cha cuñi ndi tyinyee ca ndi chí ndo na coo ca tusíi iñi maa Nyoo añima ndo.

2

1 Yucuan chaha ña cuñi quichi tiquí nu nyicu ndo coto cuhva que tucuihya iñi chí ndo.

2 Vatyi tatu yuhu ta sanducuihyé iñi ndo, yori ca cuví sandusíi iñi mai. Vatyi ma cuví ca sandusíi ndo iñi tatu cha yahá sanducuihyé iñi ndo.

3 Yucuan chaha sacuhín tuhun cuan chí ndo. Vatyi tatu cuhin soco ma sanducuihya ndo iñi chihin cuhva iyó ndo. Vatyi tahán chí sandusíi ndo iñi. Ta tatu síi cuñi yuhu, chité tyi tandihí yo ta cusíi iñi yo.

4 Quiví cha tyaí carta cuan chí ndo, chica xaan xiñi. Ta nducuihya xaan iñi nyacua chaquí. Soco ñima cha sacuhín carta cuan chí ndo vatyi cuñi cha nducuihya iñi ndo. Soco vatyi coto ndo vatyi yaha xaan cuñi chí ndo.

Nu chahá ra Pablo tuhun chí ñu yoso caa saha ñu ticahnu iñi

5 Tucuihya iñi cha chahá ra chiña, ñima ñn ri chí yuhu chahá ra. Chahá tucu ra chíi chí tandihí nyoho ñandihí. Catyí tyehe caa tacuhva cha ma yaha xaan cahín.

6 Vaha ri, cha iyó vaha. Ma cahan ca ndo chí ra. Ma tachi tuñi ca ndo chí ra.

⁷ Ta vityin tahán chi vatyi saha ndo ticahnu iñi chi ra. Ta naquehén ndahvi ndo chi ra, coto yaha xaan nducuihyá iñi ra.

⁸ Yucuan chaha catyí chi ndo sañaha ndo cha cuñí ndo chi ra.

⁹ Sacuhin carta cuan chi ndo quivi cuan vatyi cuñí cote tatu sacuví ndo cuhva chahí chi ndo.

¹⁰ Ta vityin tatu sahá ndo ticahnu iñi, sahá tucu yuhu ticahnu iñi yóo cha chahá tisihi chi yo. Tatu ndicha cha chahá ra tisihi chii. Soco sahi ticahnu iñi chi ra cha cuenda cha vaha chi nyoho. Vatyi yucuan cuhva cuñí maa ra Cristo.

¹¹ Vatyi chitó yo vatyi tatu ma saha yo ticahnu iñi chi tahan yo, cuihna cutyihí ra cha quiñi caa añima yo. Vatyi maña xaan ra. Ta cuví sacañi tahan ra chi yo.

Ña ndoo ra Pablo ñuu Troas vatyi ña nañihí ra chi ra Tito

¹² Quivi chaj ñuu Troas cha cuacahin tuhun ra Cristo, chahá chi cuhva cha sahá tyiñe tyiño nuu Sutu Mañi yo yucuan.

¹³ Soco ña sii maa cuñí añime. Vatyi ña nañihí chi yañi yo, ra Tito. Yucuan chaha ña ndoo que ñuu cuan cahin chihin ñu. Ta vachi ityi Macedonia ihya.

Cahán ra Pablo tuhun ra Cristo chihin cha ñi iñi ra

¹⁴ Soco tyahvi nyoo chi Nyoo vatyi tyicuan ri sahá ganaa yo chihin fuerza ra Cristo Jesús. Vatyi sacotó yo tuhun ra chi ñáyivi. Ta tuhun ra cha cahán yo, cuví chi tari noo xico vixi chahan cha caña tandihí ri ityi nu cuahán yo.

¹⁵ Ta yóo cuví yo tari noo xico vixi cha chahá cuenda ra Cristo chi Nyoo. Ta caña xico cuan mahñu ñu cha cucacu añima, ta mahñu ñu cha ma cacu añima ñandihí.

¹⁶ Soco cha cuenda ñu cha ma cacu añima cuan, quiñi chahán, tari noo xico ndiyi cuví tuhun cha sacotó yo chi ñu, cuñí maa ñu. Vatyi sacotó yo yoso caa cucuvi ñu vatyi ña chinó iñi ñu chi ra Cristo. Soco cha cuenda ñu cha cacu añima, vixi xaan chahán, Vatyi sacotó yo yoso caa coo ñu ñáyivi cha ma naa ca maa. Soco zyóo cha cuví sacuvi tyiño ihya?

¹⁷ Nyuhu ña sacuví ndi tari sacuví cuaha ra cachicá noo. Ra cuan cuñí ra xuhun. Tuhun ra Cristo ñima noo cha xicó yo cuví. Soco cahán ndi chihin cha ñi iñi ndi tuhun ra vatyi ñin ri cuví ndi chihin ra, ta Nyoo ta ra Cristo tachí ra chi ndi.

3

Tuhun chaa cha quichi cacun ra Cristo

¹ Ta cha cahán ndi tuhun ihya, ¿atu cha cuñí ndi sayaa ndi chi ndi, cuñí maa ndo? Ñima tyicuan caa. Ta yoó ¿atu chiñuhú cha cuiso yo tutu cha catyí chi vatyi vaha ñáyivi cuví yo, tari tuhva inga ra canyiso? Ñima.

² Vatyi nyoho cuví ndo carta ndi cha tyaa Nyoo añima ndi. Vatyi cuví nyehe ñáyivi yoso caa nasama Nyoo cuhva iyó ndo. Ta coto ñu tyi maa maa ri cha vaña sañahá ndi chi ndo.

³ Ta cachi nyehé ñu tyi cuví ndo carta cha tyaa ra Cristo vatyi nyehe ñu, ta nyuhu nacuhvā cuenda ndi carta cuan chi ñu. Ta ñima chihin tinta tyaa Tatyí lí Nyoo nyitó añima ndo. Ta ni ñima nu yuu chicunyaa.

⁴ Cahán ndi tyehe caa vatyi chitó ndi vatyi Nyoo cuacuhva ra cha quita vaha tyiño sahá ndi. Vatyi tyinyee ra Cristo chi ndi.

⁵ Ma caña iñi ndi caca xiñi ndi tyi iyó tunyee iñi maa ndi cha sacuví ndi ñáa cha sacuví ndi. Soco tandihí cha sacuví ndi maa Nyoo sacuví.

⁶ Maa Nyoo chahá ra tunyee iñi ra chi ndi, ta sacotó ndi tuhun chaa cha natyihí tahan ra tuhun chihin yo. Vatyí Tatyí Ii ra chahá ñáyiví chaa coo yo. Ta ley chahnu cuan cha chahá Nyoo chí ra Moisés, sacuhún chi chi yo anyaya vatyí ña cuví quichaha yo tandihí ley cuan.

⁷ Ley chahnu cuan, chicunyaa chihin letra chata yuu ta cha naha. Ta cuhva cha chaá ra Moisés chihin cuan, tyaquí xaan xiño nuu ra nyacua nayuhví ñu Israel nanyehé ñu nuu ra. Soco suvita ri tyi cha tyaquí cuan numi ri ndihí. Soco tatu tyaquí cuví cuan,

⁸ tyaquí ca cuví tuhun chaa cha quichí nyaca Tatyí Ii Nyoo chi yo. Tyaquí xaan ca cuan.

⁹ Tatu ley chahnu cha sacuhún chi yo anyaya, tyaquí xaan cuví, nyaca cuví tuhun cha saváha chi yo nuu Nyoo. Tyaquí xaan ca cuví cuan.

¹⁰ Vatyí ley chahnu tyaquí xaan cuví quiví cuan, cuñí maa ñáyiví. Soco vityin chító yo tyi ña tyaquí xaan cuví. Vatyí tyaquí xaan ca maa tuhun ra Cristo cha sacacú chi yo nuu Nyoo.

¹¹ Vatyí tatu tyaquí xaan cuví cha ñin yaha ri chiyó, nyaca cuví noo cha ma ndihí ca maa.

¹² Chító ndi tyi ma naa cuan. Yucuan chaha cahán ndi chihin cha ñi iñi ndi. Ña cahán nuu ndi ta ña yuhví ndi.

¹³ Ña sacuví ndi tari sacuví ra Moisés. Vatyí chasí ra nuu ra chihin noo sahna, tacuhva cha ma nyehe ñu Israel nu cunaa cha xiño cuan.

¹⁴ Soco quiví cuan ña cutuñí iñi ñu. Ta nyacua nya vityin ta ña cutuñí iñi ñu. Vatyí tatu sacuahá ñu ley cuan tari quiví cha nyasí nuu ñu. Vatyí ña cutuñí iñi ñu. Soco noo tuhun ri maa ra Cristo nuñá ra nuu yo.

¹⁵ Ta nyacua nya vityin tatu sacuahá ñu Israel ley ra Moisés, ña cuví cutuñí iñi ñu. Vatyí tari noo cha nyasí nuu ñu.

¹⁶ Soco tatu nacuhvá ñu añima ñu chi Sutu Mañi yo, maa ra cunuña ra nuu ñu.

¹⁷ Vatyí Sutu Mañi yo, Tatyí Ii cuví ra. Ta tatu nyaá Tatyí Ii Sutu Mañi yo añima yo, sacotó ra chi yo tyi ña nyacá ñaha ca ley chahnu chi yo.

¹⁸ Yucuan chaha tandihí yo ña nyasí ca nuu yo. Ta vityin cuví yo tari noo ino, tacuhva cuví nyehe ñáyiví cha vaha Sutu Mañi yo. Ta cuahán nduvaha ca yo yoso cuhva sacuví Tatyí Ii Sutu Mañi yo chi yo.

4

¹ Yucuan chaha ma ndu uvi maa iñi ndi, vatyí Nyoo nyehé ndahvi ra chi ndi. Ta tyaá tyiño ra chi ndi tyi cahan ndi tuhun ra chihin ñáyiví.

² Ña sacuví ndi cha xehe vatyí ticahan nuu cuví cuan. Ña chicá noo ndi sandaví ñaha ndi chi ñáyiví. Maa maa ri tuhun Nyoo sañahá ndi. Ña nasacá noo ndi tuhun Nyoo chihin inga tuhun. Soco chihin nuu Nyoo chacú ndahvi ndi nuu tandihí ñáyiví, na saha vaha ñu cuenda vatyí maa maa ri cha ndicha sañahá ndi.

³ Nyuhu ña tyihí xehe ndi tuhun Nyoo. Soco cha cuenda chi ñu cha cua cunaa ñohó xehe.

⁴ Cuihna, ra nyacá ñaha cha quiñi caa ñuhu ñáyiví ihya, ican ra chasí cha chiñi tuñi xiño ñu cha ña chinó iñi chi Nyoo. Vatyí coto nyehe ñu cha ndichin Nyoo. Ta coto cutuñí iñi ñu yoso caa sacacú ra Cristo chi yo. Vatyí ra Cristo nyitó ra ta cuví ra xiñahñu Nyoo.

⁵ Cuhva cha cahán ndi chihin ñáyiví, ña cahán ndi tuhun maa ndi. Soco sacotó ndi tyi ra Jesucristo cuví ra Sutu Mañi yo. Ta nyuhu cuví ndi noo musu ndo cha catyi cha cuñí ndi chí ra.

⁶ Vatyí suri maa Nyoo catyí vatyí na ndundichin nu ñaa iñi quiví chinqo ñuhu ñayiví. Ican ra chahá ra cha ndichin coo añima yo, tacuhva vatyí chihin cha ndichin cha chahá ra Cristo chí yo, cuví cutuñi ca iñi yo tyi cahnu xaan ca cuví maa Nyoo.

Chihin cha chinó ri iñi yo chi Nyoo coo yo noo ñayiví chaa

⁷ Coño ñuhu yo cuví tari noo quisi ñuhú, vatyí noo cha ñima ri tuhun cuví. Vatyí tyicuan caa ta cuví nyehe ñáyiví tunyee iñi cha cahnu xaan cha iyó chí yo, maa Nyoo chahá, ta ñima tunyee iñi maa yo cuví.

⁸ Yucuan chaha vasi iyó tisihi tandihi ri ityi nu cuahán ndi, soco ña ndu uví iñi ndi. Vasi ña cutuñi iñi ndi tandihi cha cuví chí ndi, soco chitó ndi tyi quitá vaha ndi.

⁹ Vasi chicá nyicon ñu chí ndi soco ñima maa ri maa ndi nyicu. Vatyí Nyoo nyaá ra chihin ndi. Vasi cha chacun taxin ñu chí ndi soco ña chihí ndi.

¹⁰ Tandihi ri ityi nu cuahán ndi ta nyatú ndi tuhun chihi cha catyi tuhun ra Jesús. Vatyí yucuan cuhva nyehé ñu tyi iyó ndi ñayiví chaa cha chahá ra chí yo.

¹¹ Vatyí nyuhu tandihi quiví, cha yatyin cúvi ndi cha cuenda ra Cristo tacuhva cuví nyehe ñáyiví vatyí yihí ñayiví ra Cristo añima ndi.

¹² Nyatú ndi tuhun chihi cha cuenda cha cahán ndi tuhun Nyoo. Soco cha tyehe caa, nañihí ndo ñayiví chaa.

¹³ Chinó iñi ndi chí Nyoo tari chinqo iñi ra David. Ta tyaq ra nu libru Salmos: “Chinó iñi chí Nyoo, yucuan chaha cahán tuhun ra”, catyi ra David. Ta tyicuan caa tucu nyuhu. Chinó iñi ndi chí Nyoo. Ta yucuan chaha cahán ndi tuhun ra.

¹⁴ Vatyí chitó ndi vatyí Nyoo ra sanandoto chí Sutu Mañi yo Jesucristo, cusanandoto tucu ra chí yo. Ta ñin ri chihin nyoho, cunyaca ra chí yo nya gloria nu nyaá ra.

¹⁵ Tandihi ihya cuví cha vaha chí maa ndo ta chí inga ñáyiví. Vatyí cuaha cha vaha Nyoo cuñihi ndo. Ta cuaha ndo nacuhvá ndo tyahvi nyoo chí ra, ta sacahnú ndo chí ra.

¹⁶ Yucuan chaha ña ndu uví maa iñi ndi. Vasi coño ñuhu ndi cha cuahán sandihi xaan chí. Soco ñayiví chaa cha iyó ndi cuahán nduchaa chí tahan tahan quiví.

¹⁷ Tindoho cha nyehé ndi ñayiví ihya, tindoho ñin yaha ri cuví. Vatyí chahá chí cha cunañihi ndi noo nu vaha ca cha ma ndihi maa nu nyaá Nyoo.

¹⁸ Vatyí ñima cha cuví nyehe yo sahá ndi cuenda. Sahá ndi cuenda soco cha ña nyehé yo. Vatyí cha cuví nyehé yo ñayiví ihya, ña naha maa chiyo. Soco cha ña cuví nyehé yo, yucuan cuví cha ma ndihi ca maa.

5

¹ Ta chitó ndi vatyí quiví cúvi yo, coño ñuhu yo cunaa chí. Vatyí cuví chí tari noo vehe cha ña naha maa chiyo. Soco Nyoo cumí ra noo nu cunyaa añima yo, noo cha ma naa ca maa nya andiví. Ta ñima cha cacu chihin ndaha rayii ñayiví ihya cuví.

² Ndicha, cha ni ri ca cha iyó yo chichi coño ñuhu yo, nducuihyá xaan cuñi yo, vatyí nyatú tuhva yo nicoo yo chichi cha chahá Nyoo chí yo nya andiví.

³ Vatyí cohon añima yo chichi cha chahá Nyoo tacuhva cha ma cuvityiyaá yo.

⁴ Cha ni ri ca cha iyó yo chichi coño ñuhu yo cha cuví tari noo vehe ri, nducuihyá iñi yo vatyí ña cuñí yo quita ri maa añima yo chichi coño ñuhu cuan ta cuvityiyaá chi. Soco cuñí yo cha coo añima yo chichi cha ma naa ca maa nya andiví ta tyicuan ri maa cuacoo yo.

⁵ Ta Nyoo tyaa ra cuhva vatyí tyehe caa cucuvi chi yo. Ta chahá quiyí ri ra Tatyí Ii ra chí yo. Vatyí tacuhva coto yo tyí cuví naquehen ca yo tandihí ca cha cuacuhva ra chí yo.

⁶ Ta yucuan chaha ma yuhvi yo cha cúvi yo. Vatyí chitó yo tyí cha ni ri ca cha iyó yo chichi coño ñuhu ihya ñayiví, ña yatyin nyaá yo chihin Sutu Mañi yo andiví.

⁷ Vityin ña cuví nyehe yo chi ra, soco chihin cha chiñó ri iñi yo chi ra, iyó yo ñayiví ihya.

⁸ Soco yihí vaha iñi yo chi ra ta cha cuñí yo quita yo chichi coño ñuhu ihya vatyí cahun yo cucunyya yo chihin Sutu Mañi yo.

⁹ Yucuan chaha sañihi ca ndi nducú ndi cuhva yoso caa cha tahan iñi Sutu Mañi yo sacuví ndi. Cuví ri cha iyó ca ndi chihin coño ñuhu ñayiví ihya. O cuví ri cha yori ca ndi, vatyí cha nyaá ndi chihin Sutu Mañi yo nya andiví.

¹⁰ Vatyí tahan tahan yo ta cahun yo nuu ra Cristo cucuhva yo cuenda nu nyaá cutuñi chí yo nuu ra. Ta cuñihi yo cha tahan chí chí yo, yoso cuhva cha vaha o cha ña vaha cha sacuví noo noo yo quiví chiyó yo chihin coño ñuhu yo ñayiví ihya.

Nu sacotó ra Pablo yoso caa nicoo vaha yo chihin Nyoo

¹¹ Vatyí chitó ndi vatyí Sutu Mañi yo cutachi tuñi ra chí ndi tatu ma sacuvi ndi tuhun cahán ra. Yucuan chaha nducú ndi cuhva cahán ndi chihin ñáyiví na nacuhva cuenda ñu chí ñu chí Nyoo. Ta Nyoo chitó ra vatyí tyicuan ri sacuví ndi. Ta chitó tucu maa ndo ñandihí.

¹² Ñima cha cuñí ndi cuyaa ndi chihin cha cahán ndi tyehe caa, soco cha cuñí ndi vatyí nicohón iñi ndo vatyí tuhun ndicha sacotó ndi, ta cuví cusii iñi ndo chihin ndi. Ta cuñihí ndo cuhva cahán ndo chihin inga ra cha sacahnú chii. Catyí ra tyí vaha iyó ra, soco ñima cha ndicha caa añima ra.

¹³ Tatu ña vaha cuñí xiñi ndi, cuñí maa ñáyiví tyí cahín tuhín tyehe caa, soco cha cuenda maa Nyoo. Soco tatu vaha cuñí xiñi ndi, ta cachi tuhun cahán ndi, soco cha cuenda tyí cuñí ndi tyinyeé ndi chí ndo.

¹⁴ Soco saniñí ndi chí ndi cha sacotó ndi tuhun ra Cristo chí ñáyiví. Vatyí chitó ndi tyí cuñí xaan ra chí ñu. Ta chitó ndi tyí chihí ra cha catyí cuatyí tandihí cuii maa ñáyiví. Ta yucuan chaha chihi tucu yo cha ma sacuvi ca yo cha ña vaha cha chinyacuví yo nu quichí chí.

¹⁵ Ra Cristo chihí ra cha catyí tandihí yo vatyí tacuhva cha ma coo ca yo cuhva cuñí maa yo. Coo yo soco cuhva cuñí maa ra. Vatyí chihí ra ta nandotó ra cha cuenda yo.

¹⁶ Cha cuhva cha vityin, tatu nyehé yo chí noo ñáyiví, ma caca xiñi yo nyehe yo chí ñu tari chicá xiñi ñáyiví cha ña ñohó nuu chí Nyoo. Noo quiví tyicuan caa chicá xiñi vatyí ra Cristo cuví ra noo ra ñuhu ñayiví ri. Vityin ña chicá ca xiñi tyicuan caa.

¹⁷ Vatyí quiví nacuhva cuenda yo chí yo chí ra Cristo, maa ra sanduchaa ra añima yo. Ta tandihí tuhun cha chicá xiñi yo nu quichí chí, ña chicá ca xiñi yo vityin. Vatyí maa ra nacuhva ra nonga cha chiñi tuñi chaa chí yo.

18 Ta tandihí ihya maa Nyoo sacuví, vatyi sanícoo vaha ra chí yo chihin ra cha cuenda maa ra Cristo Jesús. Ta catyí ra chí yo vatyi na sacoto yo chí ñáyiví vatyi Nyoo cuñí ra cha nícoo vaha ñu chihin ra.

19 Vatyi chihin cha chíhí ra Cristo cha catyí cuatyí yo, ñáyiví nícoo vaha ñu chihin Nyoo. Ta Nyoo sahá ra tuhun tyí ñahri ca cuatyí ñu. Ta chí nyuhu, catyí ra vatyi sacotó ndí tuhun ihya chí ñu.

20 Ta vityin cuví ndi ra chicá tyiño ra Cristo. Ta tari cha maa Nyoo chacú ndahvi nuu ndo, vatyi tyiño maa ra chicá ndi. Ta yucuan chaha chacú ndahvi ndí nuu ndo chihin síví ra Cristo, na nícoo vaha ndo chihin ra.

21 Ra Cristo ña sacuví ra ní mínoo cuatyí. Soco Nyoo tachí ra chí ra síqui ñuhu ñáyiví ihya, quichí cúvi ra tari noo ra iyó cuatyí cahnú. Tacuhva vatyi cuví sacacu ra chí yo. Ta cha cuenda maa ra Cristo sahá Nyoo tuhun tyí vaha yo nuu ra.

6

1 Yañi, ñn ri tyiño Nyoo sacuví yo. Yucuan chaha chacú ndahvi xaan ndi nuu ndo vatyi ma coo ndo tari cha ña ñohó nuu ndo Nyoo. Cotyiño ndo tandihí cha vaha cha chahá ra chí noo noo ndo.

2 Vatyi catyí Nyoo nu tutu tyehe caa: Quiví tahán chí tyi sacaqui chuun, yuhu chíñi nu cahun ta tyinyej chuun, catyí Nyoo.

Saha ndo cuenda tyi vityin cuví quiví tahán chí. Vityin cuví quiví sacacú Nyoo chí yo.

3 Nducú xaan ndi cuhva cha ma nyehe nyaa ñáyiví tyiño Nyoo cha sacuví ndi, coto ma chino iñi ñu chí Nyoo.

4 Soco cuñí ndi vatyi nyehé ñu vatyi ndicha cha cuví ndi musu Nyoo vatyi cunyeé ndi ñáá ndihí cha cuví chí ndi, tandihí tindoho, tandihí tisihi.

5 Vasí cañí ñáyiví chí ndi, vasí tyihí ñu chí ndi vehe caa, vasí canachaá ityi ñu síqui ndi, soco cunyeé xaan ndi. Ta ñihi xaan sahá tyiño ndi nyacua ña quixí ndi. Ta yahá ndi soco.

6 Ta tandihí maa ihya cunyeé ndi vatyi ndicha ndicha cuii cha cuví ndi musu Nyoo. Yucuan chaha cachi iyó ndi. Ta chitó ndi cha ndicha. Ta cunyeé ndi chihin cha ña chíhí ndi tisihi tandihí cha cuví chí ndi. Ta vaha ñáyiví cuví ndi. Ta cuñí ndi chí ñáyiví. Ta nyaá maa Tatyí Ii Nyoo chihin ndi.

7 Cahán ndi maa ri tuhun ndicha maa Nyoo. Ta nyaá fuerza ra chihin ndi. Ta chotyíño ndi tandihí cha vaha cha chahá maa ra chí ndi, tacuhva cuví chasaha ndi chí ra ña vaha.

8 Iyó quiví cuñí nyehe ñáyiví chí ndi. Ta iyó quiví ña cuñí nyehe ñu chí ndi. Iyó quiví vaha cahán ñu síqui ndi. Ta iyó quiví quíñi cahán ñu síqui ndi. Iyó chaha catyí ñu vatyi ra cuendu cuví ndi. Soco maa maa ri cha ndicha cahán ndi.

9 Sahá ñu chí ndi tari noo ra ña ñohó nuu ñu. Soco ñu yihí vaha cuenda Nyoo ñohó nuu vaha ñu chí ndi. Iyó quiví cha yatyin ri cúvi ndi, soco iyó ca ndi. Ta iyó quiví tachí tuñi ñu chí ndi, soco ña chíhí ndi.

10 Vasí iyó quiví cha nducuihyá iñi ndi, soco tyicuan ri sñ cuñí ndi. Vatyi tyiño Nyoo sacuví ndi. Vasí ndahvi ndi, soco cuaha ñáyiví ñihi ñu cha vaha chihin tuhun cha chahá Nyoo chí ndi. Vasí ñahri maa iyó chí ndi, soco iyó tandihí cha vaha Nyoo chí ndi.

11 Cahán ndi chihin ndo yañi, cha cuví ndo ñáyiví ñuu Corinto chíña. Catyí cachi ndi chí ndo chihin cha ñi añima ndi vatyi ndicha cha cuñí ndi chí ndo.

¹² Nyuhu, ña quiñi cuñi ndi nyehe ndi chi ndo. Maa ndo cuví ñu ña vaha cuñi nyehe chi ndi.

¹³ Chacú ndahvi ndi nuu ndo tari chacú ndahvi noo rayi nuu sehe ra, nuña ndo añima ndo, ta ma quiñi cuñi ndo nyehe ndo chi ndi, vatyi maa ndi ña quiñi cuñi ndi nyehé ndi chi ndo.

Cuví yo vehe Nyoo vatyi ñohó ra añima yo

¹⁴ Ma ndu ñn ri ndo chihin ñu ña chinó iñi chi Nyoo. Vatyi ña nacachí tahan añima ndo chihin ñu cuan. Vatyi cha vaha ma cuví ndu ñn ri chihin cha ña vaha. Ta cha ndichin ma cuví ndu ñn ri chihin cha ñaa iñi.

¹⁵ Vatyi ra Cristo ña ndu ñn ri ra chihin ra cuví cuihna. Ta tyicuan caa tucu ñu chinó iñi chi ra Cristo, ña nacachí tahan chi tatu ndu ñn ri ñu chihin ñu ña chinó iñi chi ra.

¹⁶ Ña chahá chi cha sacahnú yo Nyoo ta sacahnú tucu yo chi cha cuví xitohyo. Vatyi maa yo cuví yo vehe Nyoo nyitó. Tari catyi maa ra tuhun ihya ta cha naha:

Coi ta caca noi chihin ñu.

Ta yuhu cucuvi Nyoo ñu,

ta maa ñu cucuvi ñu ñáyivi chii, catyi Nyoo.

¹⁷ Yucuan chaha catyi tucu ra quiñi cuan:

Quiñi ndo mahñu ñu ña chinó iñi chii.

Ta ma cutahan ndo chihin ñu.

Ta ma sacuvi ndo cha ña vaha.

Tyicuan ta cunaquehin chi ndo.

¹⁸ Ta sutu ndo cucuvi chii.

Ta maa ndo cucuvi ndo sehi, catyi Sutu Mañi yo, ra iyó tandihí tunyee iñi chii.

7

¹ Ican ihya cuví cha chahá Nyoo chi yo. Yucuan chaha yañi, cuñi chi nducu yo cuhva cuvaha yo nuu Nyoo. Ma sacuvi yo cha quiñi caa ni ri ma caca xiñi yo cha ña vaha. Na ndu cuiñi coo yo vatyi sahá yo ñáyivi chi Nyoo.

Nu nacatyi ra Pablo yoso caa nasamq ñu cuhva iyó ñu

² Yañi, chacú ndahvi ndi nuu ndo, na cuvaha coo iñi ndo nyehé ndo chi ndi vatyi ñahri cha sacuvi ndi chi ni noo ndo. Ta ni ña sativi ndi chi ndo. Ni noo ndo ta ña sandavi ñaha ndi chi ndo.

³ Cha catyi chi ndo tyehé caa ñima cha cahín chi ndo. Vatyi cha yaha catyi tiquí chi ndo ta ityi chata ca, vatyi ndicha cha cuñi chi ndo. Vatyi ñn ri ñu cuví yo chihin Nyoo. Tatu iyó yo soco ñn ri cuví yo. O tatu cúvi yo soco ñn ri cuví tucu yo.

⁴ Ñahri maa cha chica iñi chihin nyoho. Si xaan cuñi nyehi chi ndo. Ta yucuan chaha vasi nyehé ndi tindoho ihya, cuní ca iñi ndi. Ta cusí xaan ca cuñi ndi.

⁵ Nya quiñi chaq ndi Macedonia ihya, ta ta nyitatu ca maa ndi. Vatyi cuaha xaan tisihi ta tindoho nyehe ndi tandihí ri ityi chahan ndi. Ta cañi tahan ñu chihin ndi. Ta yuhví ndi.

⁶ Soco Nyoo, tyicuan ri sanduní ca ra iñi yo tatu cuihyá cuñi yo. Ta sanduní ra iñi ndi cuhva cha chaq ra Tito.

⁷ Ta ñima cha cuenda cha chaq ri ra. Soco cha cuenda cha nduní iñi ra sahá nyoho. Nacatyí ra chi ndi vatyi cuñi xaan ndo nyehe ndo chi ndi. Ta chacu xaan ndo cha cuihya iñi ndo. Ta cuñi ca ndo chii, na. Ta cha cuenda cuan ndusi xaan ca cuñi vityin.

⁸ Soco quivi cuan chica xaan xiñi vaty chahj tucuihya iñi chi ndo chihin tutu cha sacuhjn chi ndo. Ta ndu uvi iñi cha sacuhjn tutu cuan chi ndo. Soco suhva ri quivi, nducuihya iñi ndo. Ta vityin ña chicá ca xiñi cha cuenda tucuihya iñi cha chahj chi ndo.

⁹ Ta vityin cusii xaan cuñi, ñima cha cuenda tucuihya iñi cha chiyo ndo, soco cha cuenda vaty tucuihya iñi cuan sanandichj chi ndo ndaha Nyoo. Nyoho cunyeē ndo tucuihya iñi cuan yoso cuhva tahán iñi Nyoo, yucuan chaha cha vaha sacuvj ndi chihin ndo chihin tucuihya iñi cuan.

¹⁰ Iyó tucuihya iñi cha maa Nyoo chahá, tacuhva ndu uvi iñi yo cuaty yo ta nañihi yo ityi vaha cuhun yo nu nya ra. Ta ña tahán chi cha cuxaán yo chi Nyoo cha cuenda cuan. Soco tucuihya iñi cha iyó chi ñu cha ña ñohó nuu chi Nyoo, ñima tucuihya iñi chi Nyoo cuví cuan. Vaty ña tyinyeē chi chi ñu tacuhva cha ma cuhun ñu anyaya.

¹¹ Nyoho cunyeē ndo tucuihya iñi yoso cuhva tahán iñi Nyoo. Soco vityin nyehé ndo vaty cuaha xaan cha vaha nañihí ndo cuenda cha cucuihya iñi ndo. Ta sandaḡ vaha ndo tyiño ra cuan. Cuxaan ndo chi ra. Ta nyacua cuñj ndo tachj tuñi ndo chi ra. Tandihí cuan, ta nayuhvi ndo chi Nyoo. Ta nacatyj vaha ndo yoso caa cuahan. Yaha cuan ta nyacua quichj cuví iñi ndo nyehe ndo chii. Ta cha cuenda cha sacuvj ndo tari cuhva cuñi Nyoo, cuñi chi catyj vaty ñahri cuaty ndo cha cuenda cuan.

¹² Yucuan chaha quivi sacuhjn carta cuan chi ndo ñima cha cuenda cha chicá xaan xiñi cuenda ra cha sacuvj cuaty cuan. Ta ni ñima cuenda ra cha nyehe tisihi cuan. Soco cha cuenda maa ndo, vaty cuñi tyi coto ndo yoso cuhva chicá xiñi ndo tuhun ndi nuu Nyoo vaty cuñi ndo tyinyeē ndo chi ndi.

¹³ Yucuan chaha nduvaha cuñi añima ndi. Ta sii xaan cuñi ndi vaty chitó ndi tyi cuñi ndo chi ndi.

Ta sii ca cuñi ndi cha nyehé ndi vaty chahḡ xaan ndo tunyee iñi añima ra Tito. Vaty vaha xaan tyiñuhj ndo chi ra.

¹⁴ Catyj chi ra Tito cha cumañi ca cuhun ra nu nyicú ndo vaty vaha cutyasoho ndo tuhun cha sacuhjn chihin ra. Ta vityin sii cuñi vaty chinó cava tuhun cahín chihin ra. Maa maa ri cha ndicha cahín chihin ndo. Ta tyicuan caa ndicha tucu tuhun cha catyj chi ra Tito.

¹⁵ Ta cuñi xaan ra chi ndo vaty nichón iñi ra vaty nyoho sacuví ndo tandihí cuii cha catyj ra chi ndo. Ta cuhva cha chaḡ ra, ndahvi sahḡ ndo chi ndo nuu ra. Ta vaha xaan cahan ndo chihin ra. Ta vaha xaan quichahḡ ndo chi ra.

¹⁶ Ta sii xaan cuñi vaty chité tyi tyicuan ri sacuví ndo cha vaha.

8

Tahán chi tyinyeē yo chi ñu yihí cuenda Nyoo chihin cha iyó vaha iñi yo

¹ Ta vityin yañi, cuñi ndi nacaty ndi chi ndo vaty cuaha xaan tyinyee Nyoo chi ñu yihí cuenda ra, ityi Macedonia ihya.

² Vasi cuaha xaan tindoho nyehé ñu, soco sii xaan ca cuñi ñu chihin Nyoo. Ta vasi ndahvi ñu soco cuaha cha iyó chi ñu chahá ñu, tari maa cha tyayii ñu.

³ Ta yuhu cuví noo cha ndaa vaty nyehj tyi chihin cha iyó vaha iñi ñu chahḡ ñu yoso cuhva cha iyó chi ñu. Ta nyacua yaha ca chahá ñu.

⁴ Chacú ndahvi xaan ñu nuu ndi tyi nacuhvá ndi cha tyinyeē tucu maa ñu chi ñu tahan yo nya Jerusalén.

⁵ Cuaha ca sacuvj ñu cha nuu cha yihj iñi ndi. Vaty cha xihna ca cha sacuvj ñu, nacuhvḡ cuenda ñu chi ñu chi Nyoo chihin cha ñi vaha iñi ñu. Ta

quichahá vaha ñu tuhun Nyoo cha sacote chi ñu, vatyi yucuan cuhva cuñi maa Nyoo.

⁶ Ta cha nyehi tyi tyehe caa chinyacuvi ñu Macedonia ihya, yucuan chaha catyi chi ra Tito vatyi na sandihi ndihi ra tyiño vaha cha quichahá ra cha nacaya ra xuhun nu nyicú ndo.

⁷ Nyoho vaha xaan sacuvi ndo tandihi ri. Chinó xaan iñi ndo chi Nyoo. Vaha xaan sañahá ndo tuhun ra. Ta vaha cutuñi iñi ndo. Ta ñi xaan iñi ndo sacuvi ndo tyiño nuu ra. Ta vaha xaan ñáyivi cuvi ndo chihin ndi. Ta tyicuan caa tucu tahán chi cha tyinyeé ndo chi ñu ndahvi ñu yihí cuenda Nyoo noo cuhva vaha xaan.

⁸ Ñima tyi catyi chi ndo tyehe caa ta cuñi ndo tyi cha saniñi chi ndo. Soco cha cuñi vatyi nyehé ndo cha vaha cha nyacuvi ñu yihí cuenda Nyoo inga ityi. Ta tyicuan caa tucu maa ndo sañahá ndo chi inga ñáyivi tyi ndicha vaha ñáyivi cuvi ndo chihin tahan ndo.

⁹ Vatyi cha chitó maa ndo yoso cha cuñi Sutu Mañi yo Jesucristo chi yo. Vatyi maa ra tyayii xaan ra. Soco sandundahvi ra chi ra cha catyi yo tacuhva vatyi cuvi sandutyayii ra chi yo.

¹⁰ Chahí tuhun ihya chi ndo cha cuenda cha vaha chi maa ndo. Na sañihi ndo chihin tuhun cha quichahá ndo quiyava. Ñima tacuhva sacuvi ri ndo, soco sacuvi ndo chihin cha iyó vaha iñi ndo.

¹¹ Ta tari chahá ndo chihin cha iyó vaha iñi ndo, tyicuan caa sacuvi tucu ndo vityin. Ta cuhva ndo yoso ri cuhva cha iyó chi ndo.

¹² Vatyi tatu noo ñáyivi ñi vaha iñi ñu, cuñi ñu cuhva ñu yoso ri cuhva cha iyó chi ñu, Nyoo naquehén ra cha chahá ñu. Vatyi Nyoo ña chicán ra cha ñahri iyó chi yo.

¹³ Ñima cha cuñi vatyi nyehe ndo tindoho cha cuenda cha tyinyeé ndo chi inga ñu tacuhva ma nyehe ca ñu cuan tindoho.

¹⁴ Soco vityin cha iyó chiin chi ndo, tahan chi cha tyinyeé ndo chi ñu ndahvi cuan. Ta inga chaha maa ñu cucuhva cha chiñuhú chi maa ndo. Tyehe caa tahán chi tyinyeé chi tahan ri yo tacuhva tyi ninoo yo ta ni inga yo ma nyehe yo tindoho.

¹⁵ Vatyi tyehe caa catyi chi tuhun Nyoo: “Ra cha cuaha xaan cumí, ña ndoó ca chi ra. Ta ra cha chiin ri cumi, ña cumañi chi ra”, catyi tuhun Nyoo.

Ra Tito chihin ra tahan ra tyaá ra cuhva cuhun ra ñuu Corinto

¹⁶ Soco tyahvi nyoo chi Nyoo vatyi chahá ra cha vaha coo añaima ra Tito tyi chicá xiñi ra tuhun ndo tari chicá xiñi yuhu.

¹⁷ Ta quehén ra tuhun cha catyi chi ra cha cuhun ra nu nyicú ndo. Tyi cha yihí xaan iñi tucu maa ra tuhun ndo. Ta yucuan chaha vityin vachí ra nu nyicú ndo chihin cha iyó vaha iñi maa ra.

¹⁸ Ñin ri chihin ra Tito tachí ndi chi noo ra yañi yo. Ta vaha xaan hermano cuvi ra, ta tyicuan caa catyi tandihi ñáyivi yihí cuenda Nyoo.

¹⁹ Ta sñin ri nacachi vaha maa ñu yihí cuenda Nyoo chi ra yañi yo ihya vatyi cuhun ra chihin ndi cunyaca ndi xuhun chi ñu ndahvi nya Jerusalén. Ta cuñi ndi sacahnú ndi chi Sutu Mañi yo cha sacuvi ndi tyiño ihya. Ta suri sañahá ndi vatyi cuñi xaan ndi tyinyeé ndi chi tandihi ñu yihí cuenda Nyoo.

²⁰ Ta cuñi ndi sacuvi ndi tyehe caa tacuhva cha ma quihí yuhu ñáyivi tuhun ndi cha cuenda cha nacayá ndi xuhun cha cuacuhva ndi chi ñu ndahvi.

²¹ Ta nducú xaan ndi cuhva sacuví ndi noo cuhva cachi. Tatu ñáá noo cha cuasacuvi ndi soco chihin cha cachi iyó ndi chihin nuu Sutu Mañi yo ta chihin nuu ñáyivi ñandihí.

²² Ta chihin ra Tito ta inga yañi yo cuan, vachí inga tucu ra yañi yo, vatyí nyehé ndi vatyí ñi xaan iñi ra. Ta vityin yaha ca cuhva, vatyí vaha cuñí ra nyehé ra chi ndo cha cuenda cha chinó xaan iñi ra tyi cuñí ndo sacuví ndo cha vaha nuu Nyoo.

²³ Tatu yóo cha ndaca tuhun tuhun ra Tito, catyi ndo chi ñu tyi ra tahin cuví chi ra. Ta sahá tyiño ra chihin, ta tyinyeé ra chi ndo chihin tuhun Nyoo. Ta tatu ndaca tuhun ñu tuhun inga uvi ca ra yañi yo ihya, catyi ndo chi ñu vatyí maa ñu yihí cuenda Nyoo saquichí chi ra. Ta vaha xaan sacuvi ra tyiño nuu ra Cristo.

²⁴ Yucuan chaha sañaha ndo chi ra ihya vatyí ndicha ndo cha cuñí ndo chi ra. Tyicuan ta coto tandihí ñu yihí cuenda Nyoo vatyí tahán chi cha cahín tuhun ndo tyicuan caa.

9

Nu chahá ra Pablo tuhun yoso caa cuatyinyee ñu chi ñu ndahvi ñu yihí cuenda Nyoo nya Jerusalén

¹ Ta cuenda xuhun cha nacayá ndo cuenda ñu ndahvi ñu yihí cuenda Nyoo, ña cuñí chi cha sacuhin tuhun chi ndo.

² Vatyí cha chité cha vaha caá añima ndo. Yucuan chaha chihin cha si cuñí nacatyí chi ñu ityi Macedonia ihya, vatyí nyoho ñu ityi Acaya, nya ta quiyava quichaha cuñí ndo tyinyeé ndo. Ta cuaha xaan ñu Macedonia cuní ca iñi ñu cha tyinyeé tucu maa ñu.

³ Soco suvita ri yuhu cutachi chi yañi yo ihya nu nyicú ndo. Vatyí sanumi ndo ta sacaya ndo xuhun, tari cuhva catyí vatyí yihí iñi ndo sacuví ndo. Vatyí tacuhva cha ma catyi ñu Macedonia ihya vatyí ña ndicha cha cahín siqui ndo cha cuenda cuan.

⁴ Vatyí coto cuhun nya noo ra Macedonia chihin, ta nyehe ra vatyí ñahri maa nacayá ndo. Ta cuquehin tìcahan nuu cha cuenda cha ñahri cumi ndo. Ta vihi ca maa ndo. Vatyí cha yaha catyi vatyí cuatyinyee ndo.

⁵ Yucuan chaha cuñí mai vatyí vaha cha cuhun xihna ca ra yañi yo ihya nu nyicú ndo tacuhva tyinyeé ra chi ndo cha sacañá tahan ndo xuhun cha yihí iñi ndo tyi cuhva ndo. Tacuhva tyi quivi quichi soco tandihí ta cha iyó vaha. Vatyí cha iyó vaha iñi maa ndo cuví, ta ñima noo cha saniñi ndi chi ndo.

⁶ Ta ñicohon iñi ndo tuhun ihya: Ra cha chiin ri tachí, chiin ri tyiño sahá ra chicoó. Ta ra cuaha tachí, cuaha tyiño sahá ra chicoó.

⁷ Ta tahan tahan yo cuñí chi cuhva yo yoso cuhva quichi cuví añima yo. Ñima chihin cha ña ñi iñi yo o chihin fuerza. Vatyí Nyoo cuñí ra chi ñu cha chahá chihin cha si cuñí.

⁸ Nyoo cuví cuhva ra cuaha, ndihí ndoo ndihí cuiti nuu cha vaha chi ndo. Vatyí tyicuan ta coo tandihí ri cha chiñuhú chi ndo. Ta ndoo ca ta cuví tyinyee ndo chi ñáyivi chihin tandihí ri nuu chiñuhú chi ñu.

⁹ Tuhun Nyoo catyi chi tyehe caa:

Minoo ra vaha, chahá ra cha iyó chi ra chi ñu ndahvi.

Ta tumañi iñi cha sacuví ra cuan, yucuan cuví cha ña chinaá nuu Nyoo, catyi chi.

¹⁰ Nyoo chahá ra chiti tachi yo. Ta chahá tucu ra cha cachi yo. Cuhva tucu ra cuaha ca chiti tachi ndo ta cuhva ra cuvaha chi. Ta chihin cha chahá ndo, cusacuvi ra tyi cuaha cha vaha cucunyaa añima ñáyivi.

¹¹ Tyicuan caa ta coo tandihi ri nuu cha tyayii chi ndo, tacuhva cuvi tyinyee ndo chi tahan ndo. Ta maa ñu cuan, cuanacuhva ñu tyahvi nyoo chi Nyoo cha cuenda cha tyinyee yo chi ñu.

¹² Vatyí cha tyinyee yo tyehe caa chi ñu yihí cuenda Nyoo, uvi tahan cha vaha sacuvi yo. Noo cha chahá yo cha chiñuhú chi ñu. Ta inga cha nacuhvá xaan ñu tyahvi nyoo chi Nyoo.

¹³ Maa ñu cusacahnu ñu chi Nyoo. Vatyí chihin cha tyinyee ndo chi ñu, nyehé ñu vatyí ndicha cha quichahá ndo tuhun ra Cristo. Ta cuhva ñu gloria chi Nyoo cha tyinyee xaan ndo chi ñu ta chi tandihi ñáyivi.

¹⁴ Ta cucacan tahvi ñu chaha ndo. Ta cucuñi ca ñu chi ndo cha cuenda cha vaha cha chahá Nyoo chi ñu cha cuenda ndo.

¹⁵ Tyahvi nyoo chi Nyoo vatyí chahá ra noo cha vaha xaan chi yo. Nyacua ña ñihí yo cuhva nacatyí yo.

10

Iyó ityi chi ra Pablo tyi saha ra cuenda chi ñu cha sacotó ra tuhun Nyoo chii

¹ Yuhu ra Pablo chiquén noo tumañi iñi chi ndo chihin cha vita iñi. Tari cha vita iñi ra Cristo. Vatyí yihí ndo catyí ndo vatyí tatu ñáá tuhun sacoté chi ndo chihin tutu, ñihi xaan cahín chihin ndo. Soco tatu nyaí chihin ndo, vita xaan cahín, catyí ndo.

² Vaha. Soco quivi cuhin nu nyicú ndo, ma saniñi ndo chii cha cahin chi ndo. Soco chité tyi cuñi chi cha sañahí chi suhva ndo yoso cuhva cha ñihi cahín. Vatyí yihí ndo catyí ndo vatyí sacuvi tari sacuvi noo ra ña yihí cuenda Nyoo.

³ Ndicha vatyí ñáyivi cuví ndi. Soco ña cañi tahan ndi tari cañi tahan ra ñayivi ihya.

⁴ Vatyí cha xaan cha cañi tahan ndi chihin, ñima cha xaan ñayivi ihya cuví. Soco maa tunyee iñi Nyoo cuví, vatyí cuví chasaha ndi tandihi maa fuerza nyacua nya fuerza tatyí ña vaha.

⁵ Ta tyicuan caa cuví chasaha ndi chi tandihi tuhun cha cahán ñáyivi siqui tuhun Nyoo, ta tandihi cha cahnu sahá chii cha chasi nu quichahá yo tuhun Nyoo. Tandihi cuhva chicá xiñi yo siqui ñuhu ñayivi ihya, chahá yo na cunyaca ñaha ra Cristo vatyí quichahá yo chi maa ra.

⁶ Ta quivi cuquichaha vaha tandihi ndo chi ra Cristo, tatu nya nonga ndo ña cuñi ndo quichahá ndo, tyaá ndi cuhva cha tachi tuñi ndi chi ndo.

⁷ Soco nyoho sahá ndo cuenda cuhva caá ri noo ñáyivi. Ta ña sahá ndo cuenda cuhva caá añima ñu. Ta tatu nya noo nyoho chitó vaha ndo vatyí cuenda ra Cristo yihí ndo, coo tucu ndo vatyí yihí tucu nyuhu cuenda ra.

⁸ Vatyí vasi yaha cuhva cahín, ña tahán chi cha cucahan nui. Vatyí maa Sutu Mañi yo chahá ra ityi chii cha cunyaca ñahi cha cuenda cha vaha chi maa ndo, tacuhva ñihi ca ndo tunyee iñi Nyoo. Ta ñima cha sativi chi ndo.

⁹ Ña cuñi vatyí catyí ndo vatyí sayuhvi chi ndo chihin cha cahín nu tutu cha sacuhín chi ndo.

¹⁰ Vatyí yihí ndo catyí ndo vatyí nu tutu cha saquichí chi ndo ñihi xaan cahín chihin ndo. Soco tatu mai chaa nu nyicú ndo cuví noo ra ña ñihí tuhun

cahan, catyí ndo. Ta tuhun cha cahín, maa maa ri tuhun cha ña chiñuhú cuví, catyí ndo.

¹¹ Soco ñu cha catyí tyehe caa cuñí chi cha coto ñu vatyi tari cuhva cahín nu tutu, tyicuan caa cusacuvi tiqúi nachai nu nyicú ndo.

¹² Ndicha ña cañá iñi ndi sandu inuu ri ndi chi ndi chihin ra casayaá chi tyi cahán ra tuhun maa ra. Vatyi casacuví ra cha ña tahán chi. Vatyi nyehé ra cuhva chicá xiñi maa ra ta cuhva cuahan inga ra, ta cuñi maa ra tyi vaha cuahan ra. Ta ña cutuñi iñi ra tyi tahán chi nanducú ra cuhva cuñi Nyoo.

¹³ Nyuhu ma sacahnu ndi chi ndi chihin cha ña tahán chi chi ndi. Nyoo cuví ra sañahá ñáá cuví tyiño cha tahán chi cha sacuví ndi. Ta maa ra chaha cha quichi ndi nya nu nyicú ndo Corinto chiña.

¹⁴ Tyehe ta ñima xihna ca ndi sacoté tuhun Nyoo chi ndo, ña tahán chi sahá ndi cuenda chi ndo. Soco tahán maa chi vatyi xihna ca maa ndi chaq ndi nu nyicú ndo chihin tuhun ra Cristo.

¹⁵ Soco nyuhu ña sayaá ndi chi ndi chihin tyiño sahá inga ra. Ña catyí ndi tyi tyiño maa ndi cuví. Soco yihí iñi ndi vatyi cunachino vaha ca iñi ndo chi Nyoo. Tyicuan ta cuví sañaha ca ndi tuhun ra Cristo chi ndo, soco yoso cuhva tahán chi chi ndi.

¹⁶ Ta yihí iñi ndi cha cahan ndi tuhun ra Cristo chihin ñáyivi nya ndihí ñuu nu cañi ca cha nuu nu nyicú ndo chiña, nu ta coto ca ñu tuhun ra. Tacuhva cha ma catyí ñáyivi vatyi cuyaa ndi chihin tyiño sahá inga ra.

¹⁷ Soco tatu nya noo yoó cuñi yo cuyaa yo, na cuyaa yo soco chihin Sutu Mañi yo.

¹⁸ Vatyi nuu Nyoo ña quitá vaha ra catyí tyi vaha maa. Soco tatu cahán Nyoo tuhun noo ra ta catyí ra tyi vaha sacuví ra, ican ra cuan cuví ra quitá vaha nuu Nyoo.

11

Nu chahá ra Pablo tuhun chi ñu Corinto na saha ñu cuenda coto sandaví ñaha ra cuendu chi ñu

¹ Vaha tyehe ta cunyeé ndo chiin cha ñima ri tuhun cha cuacatyí chi ndo. (Vasi ña tahán chi cha sacoté tuhun mai, soco cuñi chi cha nacotó ndo yoso caa cuñi ra cuan sandaví ñaha ra chi ndo.) Ta yucuan chaha vasi yoso ca caa soco cunyeé ndo cha cuacatyí chi ndo.

² Vatyi cuiño xain chi ndo. Ta maa Nyoo chahá cha cuiñe chi ndo, vatyi mai ican tyihí chi ndo ityi ra Cristo. Ta cuñi tyi cuñi ndo chi ra tari noo ñaha tyivaa cha cuñi xaan ña chi noo ri maa ra cha cuatandaha ña chihin.

³ Soco chicá xiñi cha cuenda ndo, coto cuví chi ndo tari cuví chi cu Eva. Vatyi sandaví ñaha coo chihin maña ti chi ña. Ta coto casandaví ñaha ra cuan chi ndo. Ta coto ndusiin caa cuhva nacacá xiñi ndo tuhun ra Cristo. Ta sandihí ndo tuhun cha sacahnú ndo chi noo tuhun ri maa ra.

⁴ Ta nyoho tañi tyehe xaan ri tyasohó ndo nu cacahán ra tuhun ra Jesús soco ña ndicha ra. Vatyi ñima tuhun ra Jesús cha sacoté ndi chi ndo cuví. Ta vaha xaan cuñi ndo nacacá xiñi ndo siin ca tuhun cha ña chachí tahan chihin tuhun Tatyí lí Nyoo cha naquehen ndo quivi xihna ri. Ñima tuhun ra Cristo cha sacacú chi yo cacahán ra cuan. Ta nyoho tañi tyehe xaan ri tyasohó ndo chi ra.

⁵ Soco tuví iñi tyi ra cha cacatyí tyi apóstol Nyoo cacuví ra, ñima ra vaha xaan cuví ra cuan cha nuu yuhu. Soco nyoho, nyicón ndo chi ra.

⁶ Vasi ña ñihí vahi cuhva cahín, cuñí maa ndo. Soco cutuñí vaha iñi tuhun Nyoo. Ta yucuan sañahá ndi chi ndo chihin tandihí cuhva sacuví ndi.

⁷ O cuñí maa ndo vatyí ña vaha cuhva sacuví quiví cha cahín tuhun ra Cristo chihin ndo. Vatyí ña quehín yahví chi ndo. Ta sandundahví chii cha cuenda cha cuñí cha cacu ndo.

⁸ Ñáyivi inga vehe ñuhu tyinyee ñu chii. Vatyí maa ñu chaha xuhun chii. Ta yuhu quehín xuhun cuan ta sacuví tyiño nuu ndo.

⁹ Ta quiví cha chinyají chihin ndo ña chahí tindocho chí ni noo ndo vasi iyó cha chiñuhú chii. Vatyí ra hermano cha quíchi coyo nya ityi Macedonia, ícan ra chahá tandihí cha chiñuhú chii. Ta saha vavahi cuenda chii vatyí ña cuñí cuhve tindocho chí ndo. Ta tyicuan ri sacuví que.

¹⁰ Vatyí chitó vahi tyi maa maa ri tuhun ndicha ra Cristo cahín, ta chité tyi ma cuhve cha tinyaa ni noo ndo, cha cuví ndo ñu ityi Acaya chiña, cha vaha cuñí cha ña chiquén cha coo yahví chi ndo.

¹¹ ¿Ñáa tuhun cha cahín tyehe caa? ¿Atu cha cuenda cha ña cuñí chi ndo? Ñima. Nyoo chitó ra yoso cha cuñí chi ndo.

¹² Ta cuasacuví que tari cuhva sacuví mai. Vatyí ña cuñí cuhve ityi chí ra cachicá noo yanga vatyí cacatyí ra tyi sacuví ra tari cuhva sacuví ndi soco ña ndicha.

¹³ Vatyí cacatyí ra cuan vatyí apóstol cuví ra. Soco ña ndicha ra. Vatyí cuví ra noo ra sandaví ñaha ta nasahá ra chí ra tari noo ra apóstol ra Cristo.

¹⁴ Ta ihya ñima cha iyo cuñí yo cuví. Vatyí cuihna cuví nasaha ra chí ra tari noo ángel cha xiño tuví chihin cha ndichin Nyoo.

¹⁵ Yucuan chaha ra cha nyicón chí ra ña vaha, nasahá tucu maa ra chí ra tari noo ra cha sacuví cha vaha. Soco coo quiví cutachí tuñi Nyoo chí ra cha cuenda cha ña vaha cha sacuví ra.

Tindocho cha nyehé ra Pablo nu chicá noo ra tyiño Nyoo

¹⁶ Inga chaha catyí tiqui chí ndo vatyí ni noo ndo ta ma caca xiñi ndo vatyí loque cha cahín tyehe caa. Soco tatu tyicuan caa chicá xiñi ndo, saña ndo chii na cahín chihin ndo tari noo ra loco. Vatyí tyicuan caa ta cuví sacahnu tucu yuhu chii chii.

¹⁷ Ñima Sutu Mañi yo catyí chii vatyí sacahni chii tyehe caa. Soco cahín tari cahán noo ra loco.

¹⁸ Vatyí cuaha ra cha cacatyí vatyí tyiño Nyoo cachicá ra, ta ñima, vatyí cahnu xaan casahá ra chí ra. Yucuan chaha cusacahnu tucu yuhu chii ñandihí.

¹⁹ Nyoho, chitó xaan ndo, cuñí maa ndo. Ta quiyi ri tyasohó ndo nu cahán ra cuan. Ta tondo xaan cacuví ra.

²⁰ Soco nyoho ñahri cuenda ndo cha saniñí ra chí ndo cha sacuví ndo tyiño nuu ra. Suhú ra chí ndo ta ña tuví iñi ndo. Sandaví ñaha ra chí ndo. Ta ña cuñí nyehé ra chí ndo. Ta nyacua cañí chihin ndaha ra chí ndo. Ta maa ndo cunyeé xaan ndo cha sacuví ra chí ndo.

²¹ Vasi cahán nuu ndi soco cua catyí ndi, nyuhu vita xaan cuñí ndi yucuan chaha ña cañá iñi ndi sacuví ndi chí ndo tyicuan caa.

Soco inga ra cuan cañá ndicha cuii iñi ra sacotó ra tuhun maa ra. Ta yuhu tucu cañá iñi vasi cahín tari noo ra loco.

²² Tatu ñáyivi hebreo cuví ra, suri cuví tucu yuhu. Ta tatu ñáyivi Israel cuví ra, ícan cuví tucu yuhu. Ta tatu vachí ra tata ra Abraham, suri vachí tucu yuhu.

²³ Ta tatu ra sacuví tyiño nuu ra Cristo cuví ra, vihi ca yuhu. Vatyí yaha ca cuhva sacuví tyiño nuu ra Cristo. Vasi cahín tari noo ra loco vatyí catyí tyicuan caa. Soco ndicha. Vatyí ñihi ca sahá tyiñe ican saha ra cuan. Ta cha cuaha ca chaha ndohj chihin ñi ican saha ra cuan. Ta cuaha ca chaha ñohj vehe caa ican saha ra cuan. Ta cuaha chaha cha cha yatyin cúvi, soco ña chihj.

²⁴ Ta ohon tahan chaha cacañj ra Israel chii chihin ñi. Cha noo chaha cañj ra chii, oco chahun cumi tahan chaha sahvj ra ñi chate.

²⁵ Ta uñi chaha cañj ra chii chihin yutun. Ta noo chaha cacañj ra chii chihin yuu. Ta uñi tahan chaha nyee barcu cha yihí. Ta chichi cha uñi tahan chaha cuan, noo chaha ndoj nu tyañuhu noo ñuu ta noo quivi.

²⁶ Cha cuaha xaan cha cuvj chii nu chica noi. Ta cha cuaha chaha cuñj tyañi chihin yuvi ndutya. Ta cuaha cha cuvj chii. Quita ra suhu nu cuahin. Nyacua nya ra ñui, ra Israel, ta satasí iñi ra chii. Ta ra inga ñuu ñandihí. Ta cuaha cha cuvj chii ityi chichi ñuu, ityi nu chiquí, ityi nu tyañuhu. Ta cuaha cha cuvj chii mahñu ra cha catyí vatyí hermano cuví ta ñima hermano cuví ra.

²⁷ Ta ñihi sahá tyiñe ta chitati. Ta cuaha xaan chaha ña quixj. Yahj soco: soco xita ta soco ndutya. Cuaha chaha sahj ayunar, o ña chachí ta nanduqui chí Nyoo cuví cuan. Cuaha chaha yahí cha vichin. Ta ni sahme ta ñahri.

²⁸ Ta sin ri nyaá siqui vatyí saní que iñi tandihí ndo: nyoho ta ñu inga ñuu cha yihí cuenda Nyoo.

²⁹ Vatyí tatu noo ndo vita cuñí ndo, yuhu tari cha vita cuñí cha cuenda ndo. O tatu sacco ñu cuatyí nya noo ndo, yuhu quehín tisihi ta ticahan nuu.

³⁰ Tatu cuñí chí cha sacote tuhin tacuhva nacoto ndo tyi ndicha cuví yuhu noo musu Nyoo, cusacote soco cha cuví chii. Vatyí sañahá chí tyi ñahri maa fuerza mai iyó chii.

³¹ Nyoo sutu Sutu Mañi yo Jesucristo, tahán chí cha sacahnú yo chí ra tyicuan ri maa. Ta chitó maa ra vatyí ndicha cha cahín, ñima cuendu cahín.

³² Quivi chinyaj Damasco (ñuu nu nicachico yihí barda) ra cha cuví gobernador cha sacuví tyiño nuu rey Aretas ñuu Damasco cuan, cuatyaa ra chí sindaro yuvehe cahnu ñuu cuan, tyi casahá cuenda ra. Vatyí tatu quite yuvehe ñuu cuan catiin ra chii ta cunyaca ra chii vehe caa.

³³ Soco ñáyivi iyó chaha barda cuan iyó ventana ñu. Ta ityi ventana sanoo ñu chii. Yihj chichi noo tica cahnu. Ta tyicuan caa sacacj Nyoo chii ndaha gobernador cuan.

12

Noo cha chahj Nyoo vatyí nyehe ra Pablo

¹ Ñahri maa ñihí chihin cha cahín tuhun mai, soco cuanacatyí cha sañahj Sutu Mañi yo chii.

² Ñohó nui chí noo ra cha yihí cuenda ra Cristo. Ta cha iyó uchi cumi cuiya quehen Nyoo chí ra ta chahan ra nya nu cu uñi toto andivi. Soco ña chité tatu chahan ra chihin coño ñuhu ra o chihin cha chiñi tuñi xiñi ra. Ña chité. Nya ri ca maa Nyoo chitó ra.

³⁻⁴ Soco chité vatyí ra cuan chinyaca Nyoo chí ra nya nu iyó ñáyivi vaha, ñu cha chihj. Ña chité tatu chahan ra cuan chihin coño ñuhu ra o chihin cha chiñi tuñi xiñi ra. Noo tuhun ri ca maa Nyoo chitó. Ta nu chahan ra cuan chiñj ra tuhun xehe. Ta ñahri ityi iyó chí ñáyivi cha nacatyí ñu tuhun xehe cuan.

⁵ Tahán chi sacahní chii chihin cha sañahá Nyoo chii quivi cuan. Soco ña sacahní chii cha cuenda cuan. Sacahní chii, soco chihin cha ñahri fuerza mai iyó chii.

⁶ Tatu cuñi tiqui cahín tuhun mai, ñima noo tuhun tondo ri cuví. Vatyí maa maa ri cha ndicha cuacatyí. Soco ma catyí vatyí coto cahnu xaan sahá ñáyivi chii. Vaha ca nyehe ñu cuhva vaha iyé ta cuhva vaha sañahí, tyicuan ta coto ñu tatu ra vaha o ra ña vaha cuví.

⁷ Ña cuñi Nyoo cha sacahnú xain chii chihin cha sañahá ra chii. Yucuan chaha chahá ra cha sanyehé xaan cuhna tindoho chii. Tari uhvi nu quiñi noo iñu cahnu, tyicuan caa uhvi chii. Vatyí tyicuan caa ta ma cuví cuyai chihin cha sañahá Nyoo chii.

⁸ Ta cha uñi chaha chiquen chi Sutu Mañi yo na tinyaa ra tindoho cuan siqui.

⁹ Soco maa Sutu Mañi yo catyí ra chii tyehe caa: “Chahí tandihí cha vaha cha iyó chii chuun. Vatyí yucuan cuví cha chiñuhú chuun. Vatyí tatu ñáyivi ta ñahri maa tunyee iñi maa ñu iyó chi ñu, yucuan ta cuví cunyaa maa maa ri tunyee iñi mai chihin ñu”, catyí ra. Yucuan chaha sñi xaan cuñi cha ñahri fuerza mai iyó chii. Vatyí tyicuan caa ta cuví cunyaa tunyee iñi ra Cristo chihin.

¹⁰ Yucuan chaha sñi xaan cuñi cha ñahri tunyee iñi mai iyó chii. Vasi cahán ñáyivi chii, vasi chicá nyicon ñu chii, vasi ñahri cha iyó chii, vasi cuaha cha cuví chii, soco sñi xaan cuñi cha nyehí tindoho cha cuenda maa ra Cristo. Vatyí tatu ñahri fuerza mai iyo chii, soco ñihi ca cuñi chihin fuerza maa Nyoo.

Chicá xiñi ra Pablo tuhun ñu yihí cuenda Nyoo ñuu Corinto cuan

¹¹ Cahín tari noo ra loco. Soco maa ndo cuñi ta cahín tyicuan caa vatyí ña sahá ca ndo ñáyivi chii. Vatyí maa ndo tahán chi cuyaa ndo chihin. Vasi noo ra cha ñima ri tuhun cuví yuhu, soco nyaca cuví ra cha catyí tyi apóstol cuví ra, ta ña ndicha ra. Cuñi maa ra tyi vaha xaan ca ra cha nuu inga ra chicá tyiño Nyoo.

¹² Nyehe ndo yoso caa tyiño Nyoo cha sacuvi mahñu ndo. Ta chihin cha cama iñi ta cunyej tandihí tindoho cha nyehi. Ta cuaha xaan milagru sañahá Nyoo chi ndo tacuhva coto ndo vatyí ndicha cha cuví yuhu noo ra chicá tyiño maa ra.

¹³ ¿Atu vaha ca cuhva tyiñuhí chi yañi yo inga ñuu cha nuu nyoho? Ñima. Inuu ri cuhva tyiñuhí chi tandihí ndo. Noo ri cha ña sacuví chihin nyoho cha ña cuñi cuhve tindoho chi ndo. Saha ndo ticahnu iñi chii tatu ña vaha cuhva sacuví.

¹⁴ Ta vityin cha iyó vahi cha quichi nyehi nu nyicu ndo. Cha cu uñi chaha vityin. Ta ñahri tindoho tyaí siqui ndo. Vatyí ñima cha iyó chi ndo vachí nanduquí. Chi maa ndo cuví cha cuñi yuhu. Vatyí sutu, ican tahan chi cuhva cha chiñuhú chi sehe. Ta ñima sehe nducú cha chiñuhú chi sutu.

¹⁵ Yucuan chaha yuhu nyacua sñi cuñi cusanaí cha iyó chii cha cuenda cha vaha chi ndo. Ta nyacua sñi cuñi cuhve ñáyivi cha cuenda ndo. Soco ta caa ri vatyí tatu cuñi que chi ndo, maa ndo ña cuñi vaha ndo chii.

¹⁶ Ta vasi chitó cachi ndo vatyí ña chahí tindoho chi ndo, soco yihí ndo catyí ndo vatyí sandaví ñahi chi ndo ta ña tuví iñi ndo.

¹⁷ ¿Atu sandaví ñahi chi ndo chihin nya noo ra cha tachí nu nyicu ndo quivi cuan?

¹⁸ ¿Atu sandaví ñaha ra Tito chi ndo quivi tachí chi ra chihin inga yañi yo cuan nu nyicu ndo? Ña sandaví ñaha ra chi ndo. Vatyí nyuhu ña tuhvá ndi sandaví ñaha. Vatyí ñin ri cuhva iyó ndi. Ta ñin ri cuhva sacuví ndi.

¹⁹ Vasi chicá xiñi ndo vatyí cuahan ndi tumañi ñiñi chi ndi cha cuenda tuhun cha cahán ndi ihya, soco ñima tyicuan caa. Vatyí tandihí tuhun ihya cahán ndi cha cuenda cha vaha chi maa ndo tacuhva cohon nuu ca ndo chi Nyoo. Vatyí ndicha cha cuñi ndi chi ndo. Ta cahán ndi soco chihin nuu Nyoo ta cha cuenda maa ra Cristo.

²⁰ Chicá xiñi coto ñiñi ndaa ñiñi noo nyicú ndo ta chaí. Ta ma cutahan ñiñi cuhva nyicú ndo. Ta maa ndo ma cutahan ñiñi ndo cuhva cucahin chi ndo. Yuhví coto coo tisihi, coto nya ndo quichí cuvi ñiñi ndo cha chii noo tahan ndo, coto nya ndo cuxaán ndo chi tahan ndo, coto nducú ndo maa maa ri cha vaha chi maa ndo, coto nya ndo ñiñi ca ndo cuendu, coto cahán cuehe ndo chi tahan ndo, coto nya ndo cahnu sahá ndo chi ndo. Yuhví coto nyehi tyi ña cachi ña ndaa nyicú ndo.

²¹ Ta yuhví coto cha cuhin inga chaha nu nyicú ndo, Nyoi cuhva ra cha cucahan nui cha cuenda nyoho. Ta chicá xiñi coto quita ndutyá nui cha cuenda cha nyacuví ndo. Vatyí yihí ndo sacuví ndo cuatyí nu quichí quivi. Ta nya vityin ta ña ndu uvi ñiñi ndo cha ca iyó ndo chihin ñusihi ta ñima ñasihi ndo cuví, ta iyó ndo chihin rayi ta ñima yí ndo cuví. Ta ña sandihí ndo tuhun cha sacuví ndo ñáá ndihi cha ña vaha.

13

Chahá ra Pablo tuhun chi ñu Corinto, na saha vaha ñu cuenda chi ñu tatu vaha cuahán ñu chihin Nyoo

¹ Quivi cha ququichi inga chaha nu nyicu ndo cuví chi chaha cu uñi. Yucuan ta cuví cundaa tyiño ñu cha sacuví cuatyí. Soco cuñi chi uvi o uñi cha ndaa.

² Vatyí quivi chahin nu nyicú ndo cha cu uvi chaha, catyí chi ra sacuví cuatyí cuan, na sandihí ra tuhun. Ta vityin catyí tiqui inga chaha chi ra, ta chi tandihí ndo. Vatyí tatu cha quichi inga chaha, ta sacuví ca ndo cuatyí cuan, ma cundahvi cuñi nyehi chi ndo.

³ Tyicuan ta coto ndo cha cuñi xaan ndo coto ndo. Vatyí ndicha ndicha cha chihin fuerza maa ra Cristo cahán. Vatyí ra Cristo ñima noo ra ñima ri tuhun cuví ra. Yucuan chaha sañahá ra tunyee ñiñi ra chi ndo.

⁴ Ndicha vatyí chihí ra nu cruzi tari noo ra cha ñahri tunyee ñiñi iyó chii. Soco nandotó ra ta iyó ra chihin tunyee ñiñi Nyoo. Ta tyicuan caa tucu maa ndi vasi ñahri fuerza maa ndi iyó chi ndi. Soco ñin ri cuví ndi chihin ra Cristo. Ta iyó ndi chihin tunyee ñiñi maa Nyoo vatyí tyicuan caa ta cuví tyinyee tucu nyuhu chi nyoho.

⁵ Saha ndo cuenda chi ndo tatu nñi vaha ñiñi ndo cuahán ndo chihin Nyoo. Saha ndo cuenda vatyí ra Cristo ñohó ra añima ndo tatu chinó vaha ñiñi ndo chi ra. Soco tatu ñima chihin cha nñi ñiñi ndo cuahán ndo chata Nyoo, ra Cristo ña nyaá ra chihin ndo.

⁶ Soco chitó vahí tyi coo quivi cunacoto ndo tyi vaha cuhva tyinyeé ndi chi ndo tacuhva cuví cuhun vaha ndo chihin ra Cristo.

⁷ Ta chicán tahvi xaan ndi chi Nyoo chaha ndo, tacuhva vatyí ma sacuví ndo cha ña vaha. Ñima cha cuñi ndi tyi catyí ñayivi tyi vaha ndi. Soco cha

cuñí ndi vatyi nyoho sacuví ndo maa maa ri cha vaha. Ñahri saha vasi catyí ñáyivi, an vaha, an ña vaha cuhva cha sacuví ndi.

⁸ Vatyi nyaá siqui ndi cha sacuví ndi cha vaha. Ma cuvi tixehe ndi tuhun ndicha. Noo ri cha cuví sacuvi ndi, cha sañahá ndi tuhun ndicha.

⁹ Yucuan chaha cusii xaan cuñí ndi cha ñahri fuerza maa ndi iyó chi ndi, ta cuhva tyi nyee cuñí ndo chihin fuerza maa Nyoo. Ta tyicuan ri chicán tahvi ndi chaha ndo na vaha ca cahun ndo chihin Nyoo nyacua nya cha ñahri ca cumañi chi ndo.

¹⁰ Sacuhín carta ihya chi ndo cha ni ri ca cha cumañi quichi nu nyicú ndo. Vatyi sanduvaha ndo chi ndo. Tyicuan ta ma cuñi ca chi cha cahín chi ndo quivi chai nu nyicu ndo. Vatyi ndicha cha chahá Nyoo ityi chii cha sahí cuenda chi ndo. Soco chahá ra tyiño ihya chii vatyi sandunyeé que iñi ndo. Ta ñima cha sanducuihyá ndihi que iñi ndo.

¹¹ Ta nu ndihi cahín, yañi, catyí chi ndo, na nducu ndo cuhva nicoo vaha ndo ta sii cuñi ndo. Nanducu ndo cuhva coo cuiñi ndo nuu Nyoo cha ñahri cumañi chi ndo. Na cuiñi iñi ndo, na coo vaha ndo chihin tahan ndo. Ta Nyoo ra cuñi xaan chi ndo, ta ra chahá cha taxi coo añaima ndo na cunyaa ra chihin ndo.

¹² Ta nacuhva maa ndo nocumi chi noo noo tahan ndo chihin cha sii cuñi ndo nyehé ndo chi ñu.

¹³ Ta vachí nocumi chi ndo sahá tandihi ñu yihí cuenda Nyoo ñuu ihya.

¹⁴ Nacuhva Sutu Mañi yo Jesucristo cha vaha coo añaima ndo. Ta nacoto ndo tyi Nyoo cuñi xaan ra chi ndo. Ta na cunyaa Tatyí li ra chihin ndo. Ta nacuvi chi tyicuan caa.

Carta Cha Sacuhun Ra Apóstol Pablo Chi Ñáyivi Ityi Galacia Cha Yihí Cuenda Nyoo

Ra Pablo tyaá ra noo carta chi ñu ityi Galacia cha yihí cuenda Nyoo

¹ Yuhu ra Pablo cuví noo apóstol. Soco ñima ñáyivi tachí chii. Ta ñima rayii catyi vatyí ñihí yuhu tyiño ihya. Soco maa ra Jesucristo ta maa Nyoo Sutu yo chaha ra tyiño ihya chii. Vatyí ican Nyoo sanandotoq chi ra Cristo mahñu ñu chihí.

² Yuhu ta tandihí yañi yo cha nyicú chihin, tyaá ndi carta ihya chi nyoho ñu yihí cuenda Nyoo tandihí vehe ñuhu Galacia.

³ Nyoo Sutu yo ta Sutu Mañi yo Jesucristo nasoco ra chi ndo ta nacuhva ra cha taxi ri coo añaíma ndo.

⁴ Vatyí maa ra Jesucristo chaha ra ñáyivi ra tyiño nuu yo cha catyi cuatyí yo. Vatyí tacuhva sacacú ra chi yo mahñu ñu quiñi iyo cha iyó síqui ñuhu ñáyivi ihya vityin. Vatyí tyicuan caa tyaá maa Nyoo Sutu yo cuhva tyí sacuvi ra Cristo.

⁵ Yucuan chaha na sacahnu yo chi maa Nyoo tyicuan ri maa. Ta na cuví chi tyicuan caa.

Ñahri ca inga cuhva cuví cacu añaíma yo

⁶ Iyo xaan cuñí vatyí nyoho numi xaan cuahan sandoó ndo chi Nyoo, ra nacana chi ndo tyí nicoo vaha ndo chihin ra cha cuenda tumañi iñi cha sahá ra Cristo chi yo. Ta vityin siin caa ityi natyihi ndo cuahan ndo. Ta cuñi maa ndo tyí cucacu ndo chihin cuan.

⁷ Soco ñahri ca inga cuhva cuví cacu añaíma yo. Soco iyó ra cuñí satondo xiñi ndo. Ta cuñí ra sativi ra tuhun cha sacacu ra Cristo chi yo.

⁸ Ñahri saha, an cuví ri nyuhu, an cuví ri noo ángel cha quichi nya andivi, soco tatu tyehe ta cahán noo ndi tuhun ra Cristo nuu ndo, ta siin caa, ta ñima tari cuhva sañaha ndi chi ndo quiñi cuan, Nyoo cutachi tuñi ra chi ndi.

⁹ Cha catyi tuhun ihya chi ndo quiñi cuan soco cuacatyí tiqui inga chaha chi ndo vityin. Tatu yóo cha cahán tuhun cha cacú añaíma yo chihin ndo ta siin caa, ta ñima cuhva cha chiñi ndo quiñi xihna ri, Nyoo cutachi tuñi ra chi ra cahán tyicuan caa.

¹⁰ Cha catyi tuhun ihya chi ndo, ñima cha nduquí cuhva savahi chii nuu ñáyivi. Soco nduquí cuhva savahi chii nuu Nyoo. Tyehe ta nduquí cuhva savahi chii nuu ñáyivi, ñima noo ra sacuvi tyiño nuu ra Cristo cuví.

Yoso caa cha nanduvi ra Pablo noo ra chicá tyiño Nyoo

¹¹ Soco çoto ndo tuhun ihya yañi, vatyí tuhun ra Cristo cha cahán yuhu, ñima tuhun cha ndichí xiñi ñáyivi cuví.

¹² Ñima ñáyivi sañaha chii. Yori sañaha chii. Soco suri maa ra Cristo sacotó chii.

¹³ Vatyí nyoho chiñi ndo yoso caa chinyacuvi quiñi cuan, quiñi ñohí cuenda ñu Israel. Ta chitó ndo yoso caa cha xaan chicá nyiquen chi ñu yihí cuenda Nyoo. Ta nduquí cuhva sativi cuhva chinó iñi ñu.

¹⁴ Ta ñohí cuenda ñu Israel, yuhu cuví ra cuahan ityi nuu ca ta ñima ca suhva ra ra tahin cha ñn ri cuiya ndi. Vatyí cuñi xaan que sacuvi yoso cuhva chinyacuvi maa sutu chahni ta ityi chata ca.

¹⁵ Soco nya ta ni cumañi caqui ta tyaa Nyoo cuhva tyi cusaha ra tumañi iñi chii. Ta nya cha chaa maa chi quivi cha tyaa ra cuhva, yucuan ta nacana ra chii. Vatyí cuñi xaan ra chii.

¹⁶ Ta tyicuan caa sacuvi ra vatyí cohon nui chi Sehe ra. Tacuhva vatyí cahin tuhun Sehe ra, ra Cristo, chihin ñáyivi cha ñima ñu Israel cuví, tacuhva cacu añima ñu. Ta quivi cha cuví tyehe caa, ña nduquí cuhva cha catyí ñáyivi chii ñáá cha tahán chi sacuvi.

¹⁷ Ta ni ña chahin nya Jerusalén nu canyicu ra apóstol, vasi cha chicha ca ra chihin tuhun Nyoo, vatyí maa ra cha naha cana Nyoo chi ra ta ñima ca yuhu. Soco chahin nya Arabia. Tyicuan ta cuanuhu tiquí inga chaha nya Damasco.

¹⁸ Cha yaha uñi cuiya tyicuan ta chahin nya Jerusalén, ta chicohon nui chi ra Pedro. Ta ndoj chihin ra chahun quivi.

¹⁹ Soco ña nyehi chi inga apóstol. Noo ri ra Jacobo yañi Sutu Mañi yo nyehi.

²⁰ Ta chihin nuu Nyoo ta catyí chi ndo vatyí tuhun cha catyí chi ndo nu tutu ihya, cha ndicha cuví.

²¹ Cha yaha cha chahin Jerusalén ta chahin ityi Siria ta ityi Cilicia.

²² Soco ra yañi yo cha canyicu vehe ñuhu ra Cristo cha nyaa nicacahnu Judea, ña ñohq nuu maa ra chí.

²³ Tacuhva cha cachiñi ri ra cahán ñu tuhun, vatyí catyí ñu: “Ra cha chica nyicon chi yo quivi cuan, vityin cahán noo ra nuu ñáyivi na nachino iñi ñu chi ra Cristo. Ta quivi cuan cuñi ra sativi ra tuhun ra Cristo”, catyí ñu.

²⁴ Ta ra canyicu vehe ñuhu ra Cristo casacahnu ra chi Nyoo cha cuenda cha sacuvi Nyoo chihin tyicuan caa.

2

Ra nyisó tyiño vehe ñuhu Jerusalén, ndoó ra vaha cuhva sahá tyiño ra Pablo

¹ Cha yaha cha uchi cumi cuiya, chahin Jerusalén inga chaha chihin ra Bernabé. Ta chahan ra Tito chihin ndi.

² Chahin nyicuan vatyí maa Nyoo sañaha chii vatyí tahán chi cuhin Jerusalén. Ta nacatyí chi ñu yoso caa sañahí tuhun ra Cristo chi ñu cha ñima ñu Israel cuví. Quita siin chihin ra cha canyiso tyiño vehe ñuhu, ta chahi cuenda chi ra yoso caa tuhvé cahin chihin ñu. Coto ma candoo ra vaha ta cacatyí ra vatyí yuhu sahá tyiño caha ri mai.

³ Soco candoq ra vaha. Vatyí ni ri chi ra Tito ta ña saniñi ra cha sacuvi ra costumbre circuncisión. Ta ra Tito ñima ra Israel cuví ra.

⁴ Ndicha vatyí quihvi xehe suhva ra cha catyí vatyí yañi yo cuví chi ra, soco ñima. Vatyí cuñi ra nyehe nyaa ra cuhva iyó yo. Vatyí libre iyó yo cha cuenda ra Cristo Jesús. Soco cuñi ra cuan tyi cunyaca ñaha tucu ley chahnu chi yo.

⁵ Soco ni noo cuhva ta ña chaha ndi cha cunyaca ñaha ra cuan chi ndi. Vatyí cuñi ndi vatyí nyoho ma saña ndo cha ndicha tuhun ra Cristo cha cacu añima yo.

⁶ Soco maa ra canyisó tyiño vehe ñuhu, ñahri tuhun chaa chaha ra chii. Ta vasi cahnu tyiño canyisó ra cuan, soco cha cuenda chi yuhu, ñahri saha. Vatyí Nyoo ña sahá ra cuenda cuhva tyiño nyisó yo. Soco añima yo sahá ra cuenda.

⁷ Cha nuu cha catyí ra canyiso tyiño vehe ñuhu cuan chii ñáá ndihi tuhun, maa ra canacoto ra vatyí maa Nyoo tachí chii vatyí cahin tuhun ra Cristo chihin ñu cha ñima ñu Israel cuví. Tari tachí ra chí ra Pedro vatyí cucahan ra suri tuhun ra Cristo cuan chihin ñu Israel.

⁸ Vatyí suri maa Nyoo tachí chi ra Pedro tyi cuví ra apóstol cuenda ñu Israel. Ta tachí tucu ra chí yuhu tyi cuví apóstol ra Cristo cuenda ñu cha ñima ñu Israel cuví.

⁹ Yucuan chaha ra Jacobo, ra Pedro ta ra Juan ra cacuví nuu yucuan, nicohón nuu ra vatyí Nyoo chahá ra tunyee iñi chii cha cahín tuhun ra Cristo chihin ñáyivi. Ta chahá ra ndaha ra chii, ta chí ra Bernabé vatyí candoq ra vaha cha sahatyíño ndi mahñu ñu cha ñima ñu Israel cuví. Ta maa ra casahatyíño ra mahñu ñu Israel.

¹⁰ Noo ri vatyí catyí ra chi ndi vatyí na nicohon iñi ndi ta natyinyee ndi chí ñu ndahví. Ta ican cuví cha nanducú xain cuhva sacuví tandihí quivi.

Ra Pablo cahán ra chí ra Pedro vatyí ña vaha cha nyacuví ra

¹¹ Soco quivi chahan ra Pedro ñuu Antioquía, cahán vavahi chí ra chihin nuu ra vatyí ña vaha cha nyacuví ra.

¹² Vatyí cha xihna ri vaha sacuví ra vatyí chachí ra chihin ñu cha ñima ñu Israel cuví, nyacua nya cha chaq suhva ñáyivi Israel cha tachí ra Jacobo. Tyicuan ta quichaha ña chachí ca ra chihin ñu. Tyicuan caa sacuví ra vatyí yuhví ra coto cahan ra itá iñi costumbre circuncisión cha chaq coyo cuan chí ra.

¹³ Tyicuan ta inga ra Israel cha yihí cuenda ra Cristo ndu ñn ri ra chihin ra Pedro. Ta sacuví ra cha ña vaha cuan. Vatyí ndu uví yuhu ra tari ndu uví yuhu ra Pedro. Ta nyacua nya ra Bernabé ta ndutahan ra chihin ra.

¹⁴ Soco nyehí vatyí ña vaha cuahán nyacuví ra. Ñima tari cuhva catyí tuhun ra Cristo. Yucuan chaha catyí chí ra Pedro chihin nuu tandihí ñu canyicu cuan: “Yoho cuvún noo ra Israel. Ta iyón tari iyó ñáyivi cha ñima ñu Israel cuví. ¿Yoso caa cha cuñún saniñun chí ñu tyi sacuví ñu costumbre cha sacuví ñu Israel? Ta ni maun ta ña sacuví con”, catyí yuhu chí ra.

¹⁵ Maa yo cha cuví yo ra Israel nya ta cacu yo, ña sacuví yo cuatyí tari sacuví ñu cha ñima ñu Israel cuví.

¹⁶ Soco chitó yo vatyí ma cuví saváha yo chí yo nuu Nyoo chihin cha nanducú yo cuhva sacuví yo ley chahnu cha tyaq ra Moisés. Soco nduvahá yo nuu Nyoo cha cuenda cha chinó ri iñi yo chí ra Jesucristo. Yucuan chaha chinó tucu iñi maa yo chí ra. Vatyí tyicuan caa ta nicoo vaha yo chihin Nyoo. Ta ñima cha cuenda cha nducú yo cuhva sacuví yo cha catyí ley. Vatyí ni noo yo ta ña nduvahá yo nuu Nyoo chihin cha nanducú yo cuhva sacuví yo cuhva catyí ley chahnu.

¹⁷ Soco vityin tatu nducú yo cuhva nduvaha yo nuu Nyoo cha cuenda ra Cristo, cuñí chí catyí vatyí nacoto yo tyi iyó tucu cuatyí yo tari iyó cuatyí ñu cha ñima ñu Israel cuví. Tatu tyicuan caa, ¿atu cuñí chí catyí vatyí ra Cristo sacuví ra tyi iyó cuatyí yo vatyí sandoq yo ley ta nachino iñi yo chí ra? Ñima.

¹⁸ Soco tyehe ta naquehen tucu yo ley cha cha yahá sandoq yo, yucuan ndicha coo cuatyí yo.

¹⁹ Vatyí ley cuan sañahá chí chii vatyí tahán chí cúvi, ta yucuan chaha sandihí tuhun cha nduquí cuhva caquí chihin ley cuan, ta chihí cha cuenda chí cuví cuan, tacuhva cuví coi cha cuenda Nyoo.

²⁰ Yuhu, tari cha chihí nuu cruzi ñn ri chihin ra Cristo. Ta ñima ca ñáyivi mai iyé soco ra Cristo iyó ra añime. Ta ñáyivi ra cha iyé vityin, iyé soco chihin cha chinó iñi chí ra cha cuví ra Sehe Nyoo. Ican ra cuñí ra chii, ta chihí ra cha catyí cuatyí yuhu.

21 Ña cuñi yuhu sacuachiye cha vaha Nyoo. Vatyí tatu tyehe ta cuví cacu añima yo cha cuenda ley, ñahri tuhun chihí ra Cristo cuví chi cuan.

3

Naquehén yo Tatyí Ii Nyoo cha cuenda cha chinó ñi yo chi ra Cristo

1 ¡Ñana cha tondo iyó nyoho ñu canyicu Galacia chiña! ¿Yóo cha satívi chi ndo vatyí ña cuñi ca ndo quichaha ndo tuhun cha ndicha? Cachi xaan chaha ndi cuenda tuhun ra Jesucristo chi ndo. Ta cutuñi vaha ñi ndo ñáa cuenda chihí ra nu cruzi.

2 Noo ri cuñi ndaca tuhun chi ndo. ¿Atu naquehen ndo Tatyí Ii Nyoo cha cuenda cha sacuví ndo cha catyí ley ra Moisés, o cha cuenda cha chinó ñi ndo tuhun ra Cristo cha chiñi ndo?

3 ¿Yoso caa cha tondo xaan iyó ndo vityin? Ta quívi xihna ri vaha xaan quichaha ndo chi Nyoo chihin tunyee ñi Tatyí Ii ra. Soco vityin, ¿yoso caa cuñi ndo coo ndo ñayívi chaa chihin fuerza maa ndo?

4 ¿Atu cha caha ri nyehé ndo cha sacuví Tatyí Ii Nyoo chihin ndo? Ñima cha caha ri cuví, cahví ñi.

5 ¿Ñáa tuhun chahá Nyoo Tatyí Ii ra chi ndo, ta sacuví ra milagru mahñu ndo? Ñima cha cuenda vatyí nducú ndo cuhva sacuví ndo cha catyí ley, soco cha cuenda vatyí chinó ñi ndo tuhun ra Cristo cha chiñi ndo.

6 Ra Abraham, chinó ñi ra tuhun cahán Nyoo chihin ra, yucuan chaha cuví ra noo ra vaha nuu Nyoo.

7 Yucuan chaha tahán chi coto ndo vatyí ñu cha ndicha cuví ñáyívi chi ra Abraham, ican ñu cuan chinó ñi ñu chi Nyoo.

8 Ta cha naha ndoo tuhun Nyoo nu tutu. Ta catyí chi vatyí nu cuahán ca chi quívi, cusacuví Nyoo tyi nduvaha ñáyívi cha ñima ñu Israel cuví nuu ra cha cuenda cha chinó ñi ñu chi ra. Yucuan chaha catyí Nyoo chi ra Abraham ta cha naha: “Tandihí ri maa ñu cunasoque cha cuenda maun”, catyí Nyoo chi ra.

9 Yucuan chaha ñu cha chinó ñi chi ra Cristo, Nyoo nasocó ra chi ñu ñn ri chihin ra Abraham, vatyí chinó ñi tucu maa ra.

10 Ñu cha itá ñi ley cha tyaa ra Moisés, cutachi tuñi Nyoo chi ñu. Vatyí tuhun Nyoo catyí. “Tandihí ñu cha ña sacuví tandihí cuii maa tuhun cha nyaá nu libru ley cuan, cutachi tuñi Nyoo chi ñu.”

11 Ta ndicha vatyí yori yo nduvaha yo nuu Nyoo cha cuenda cha itá ñi yo ley cuan. Vatyí tuhun Nyoo catyí chi: “Ra nduvahá nuu Nyoo cha cuenda cha chinó ñi ra, coo ra ñayívi”, catyí tuhun Nyoo.

12 Ta ley ra Moisés ña cu ñn ri chi chihin cha chinó ñi yo chi ra Cristo. Vatyí catyí ley cuan: “Yóo ñu cha sacuví tandihí cuii ley ihya, coo ñu ñayívi cha cuenda cuan”, catyí chi.

13 Ra Cristo natavá ra chi yo ndaha ley cha catyí tyi tahán chi cutuñi chi yo cha cuenda cuatyí yo. Vatyí maa ra nanduví ra noo ra iyó cuatyí tyiño nuu yo. Vatyí catyí tuhun Nyoo: “Ñima ra vaha cuví ra cha chihí ta tacaá nu yutun.”

14 Tyicuan caa cuví tacuhva vatyí cha cuenda ra Cristo Jesús ta nasocó Nyoo chi ñáyívi cha ñima ñu Israel cuví, tari catyí ra chi ra Abraham tyi cunasoco ra chi ra. Ta chihin cha chinó ñi yo chi Nyoo, naquehén tandihí yo Tatyí Ii cha catyí Nyoo tyi cuhva ra chi yo.

Ley chahnu sañahá chi chi yo vatyí iyó cuatyí yo, soco ña sacacú chi chi yo

15 Yañi, cuacuhve noo cuhva chi ndo, cuhva iyó yo siqui ñuhu ñayivi ihya. Tatu noo ra catyí ra vatyí cucuhva ra cha cucuhva ra chi inga ra. Ta tatu cha yaha tyihí ra firma, yori cuví satani. Ta yori cuví natyiso suhva ca siqui.

16 Ta vityin, Nyoo catyí ra tyi cucuhva ra cha cucuhva ra chi ra Abraham ta chi nonga ra cha vachi tata ra. Ña catyí nu tutu Nyoo vatyí cuhva ra chi cuaha ra vachi tata ra, soco chi nonga ri ra. Ta ican ra cuan cuví ra Cristo.

17 Cha catyí yahu, ican cuví ihya: Nyoo natyihí tahan ra tuhun chihin ra Abraham. Ta ñin ri tuhun cahán ra. Tyicuan ta yaha cumi ciento oco uchi cuiya ta cha ley cha tyaa ra Moisés. Soco ma cuví casi ley cuan nu natyihí tahan Nyoo tuhun chihin ra Abraham. Ta ma cuví casi chi nu naquehen yo cha catyí Nyoo tyi cuhva ra chi yo.

18 Tyehe ta naquehen yo cha tahán chi chi yo cha cuenda ley ra Moisés, cha caha ri cuví tuhun natyihí tahan Nyoo chihin yo. Soco vatyí Nyoo catyí ra chi maa ra Abraham vatyí cuhva maa ra chi ra.

19 Tatu tyicuan caa, ¿ñáa cuenda vaha ley ra Moisés? Chaha Nyoo ley cuan soco cha yaha catyí ra tyi cuhva ra cha cucuhva ra chi yo. Vatyí ley cuan sanatuví chi cuatyí yo. Ta ndoo chi nyacua nya quivi quichí ra Cristo ra cuví tata ra Abraham. Ta chi maa ra Cristo catyí Nyoo tyi cuhva ra cha cucuhva ra. Ta ángel Nyoo chaha cuenda ley cuan chi ra Moisés. Ta ra Moisés chaha ra chi ñayivi.

20 Soco Nyoo noo tuhun ri maa ra cahan ra chihin ra Abraham quivi cuan. Ta ña chiñuhú cha nducu ra noo ra nacatyí tuhun cuan chi ra Abraham.

21 ¿Atu cuñí chi catyí vatyí ley cha tyaa ra Moisés ña chachí tahan chihin cha catyí Nyoo tyi cuhva ra chi yo? Ñima. Soco tyehe ta cuví coo yo ñayivi chaa cha cuenda ley cuan, yucuan ndicha nduvaha yo nuu Nyoo cha cuenda chi. Soco ma cuví.

22 Vatyí catyí nu tutu Nyoo tyi iyó cuatyí tandihí cuii ñayivi. Vatyí tyicuan caa ta ñu chinó iñi chi ra Jesucristo cuví ñihi ñu ñayivi chaa cha catyí Nyoo tyi cuhva ra chi yo.

23 Ta ni cumañi ca quichi tuhun cha chinó iñi yo chi ra Cristo, ley cuan chicumi chi chi yo tari cha ñoho yo vehe caa. Vatyí nyatu yo nyacua nya sañaha Nyoo chi yo yoso caa chino iñi yo chi ra.

24 Ta ley cuan cuví tari noo ñu cha sahá cumi chi ra cuatyaa. Vatyí ley saha cumi chi yo tari ra cuatyaa nyacua nya quivi quichí ra Cristo. Ta cuví chinó iñi yo chi ra ta nduvaha yo nuu Nyoo.

25 Ta vityin cha cha quivi cha chinó iñi yo chi ra Cristo, ña sahá cumi ca ley cuan chi yo tari noo ra cuatyaa.

26 Vatyí tandihí yo cuví yo sehe Nyoo vatyí chinó iñi yo chi ra Cristo Jesús.

27 Ta tandihí yo condutya yo ta ndu ñin yo chihin ra Cristo. Vatyí nyaá ra aña yo.

28 Ña ñiñi xaan ca cha cuví yo, an ñu Israel, an ñu Grecia, an cuví ri yo ñu libre iyó, an cuví yo ñu iyó chitoho. An cuví yo rayi, an cuví yo ñusihi, soco ña chiñuhu ca cuan. Vatyí cha ñin ri cuví yo chihin ra Cristo, noo ri cuví yo chihin ra.

29 Ta tatu cuenda ra Cristo yihí ndo, ndicha cha ñayivi vachi tata ra Abraham cuví ndo. Ta ñihí ndo cha catyí Nyoo chi ra Abraham tyi cuhva ra chi ra.

4

1 Cuacuhve minoo cuhva chi ndo. Noo ra cuehe tatu chihí sutu cue, ta sandoo sutu cue tandihí cha tyayí ra chi cue, ra cuehe ihya ma cuví cotyíño

ñaha cue cha tyayii sutu cue. Nyacua nya quiví cuahnu cue ta cuví cotyíño cue. Ta cha ni ri ca cha ta cuahnu ca cue, cuví cue tari noo musu ri. Vasí chí maa cue cuví tandihi cha tyayii sutu cue.

² Iyó ra cumí chí cue nyacua nya chaa cuiya cue cha catyí sutu cue, tyi naquehen cue cha tyayii cuan.

³ Ta tyicuan caa cuví maa yo. Cha ni ri ca cha ta quichí ca ra Cristo, cuví yo tari noo musu ri chí cha nyacá ñaha síqui ñuhu ñayiví.

⁴ Soco quiví tahan chí, Nyoo tachí ra chí Sehe ra, sacacú noo ñaha síhi chí ra. Ta chinyacá ñaha ley chahnu chí ra.

⁵ Tachí Nyoo chí ra tacuhva sacacú ra chí yo ndaha ley cuan. Vatyí tyicuan caa ta Nyoo naquehén cuenda ra chí yo tari sehe ra.

⁶ Ba vatyí sehe ra nanduví yo, Nyoo tachí ra Tatyí Ii ra Cristo cunyaa añima yo. Ta cha cuenda Tatyí Ii ra caná chaa yo chí Nyoo ta catyí yo: “Sutu Mañi yuhu.”

⁷ Yucuan chaha sehe Nyoo cuvun ta ñima ca noo musu ri. Ta cha cuenda cha cuvún sehe Nyoo, chahá ra cha vaha cha tahán chí chuun cha cuenda ra Cristo.

Chicá xiñi ra Pablo cha cuenda ñu yihí cuenda Nyoo

⁸ Quiví ta cohon nuu ca ndo chí Nyoo, cuví ndo musu noo cha ñima Nyoo cuví.

⁹ Soco vityin ñohó nuu ndo Nyoo, o maa Nyoo ñohó nuu ra chí ndo. ¿Yoso caa cha cuñí ndo natiin tucu ndo noo tuhun ndahvi cha ñima ri tuhun, ta nanduví tucu ndo musu inga chaha?

¹⁰ Nyoho sanducahnú ndo quiví vico, quiví natyacú yoo, ta vico cuiya.

¹¹ Yuhví xain coto vaha ñahri maa tuhun sahá tyiñe chihin ndo.

¹² Yañi, chacú ndahvi nuu ndo na nanduví ndo tari mai (cha ña nyacá ñaha ca ley chí). Vatyí yuhu cha nanduví tari maa ndo, soco ñima cha sativí ndo chíi.

¹³ Vatyí cha chitó ndo quiví chahan nui ñuu ndo yihí noo cuehe chíi. Ta chaha chí cuhva chahin tuhun ra Cristo chihin ndo.

¹⁴ Ta cuehe cuan cuví tari noo prueba cha cuenda vatyí ña tyaa xiin ndo chíi. Soco vaha naquehen cuenda ndo chíi, tari noo ángel Nyoo, ta tari cha vatyí suri maa ra Cristo cuví.

¹⁵ ¿Nya nyaa cha síi xaan cuví chí ndo chihin vityin? Vatyí yuhu cuví cha ndaa vatyí quiví cuan, nyacua caña iñi ndo catava ndo chíi nuu ndo ta cuhva ndo chíi, tyehe ta cuví nduvahi chihin cuan.

¹⁶ Ta vityin, ¿atu cuñí maa ndo tyi nanduví yuhu noo ra cha xaan cahnu iñi ndo cha cuenda vatyí catyí cha ndicha chí ndo?

¹⁷ Ñáyiví cuan, cuñí xaan ñu chí ndo, catyí ñu. Soco ñima chihin cha vaha. Vatyí cha cuñí ñu cuan, cha sacanyaha ñu chí ndo chí ndi. Ta cunyicon ndo chí maa ñu.

¹⁸ Soco vaha cha cuñí yo chí ñáyiví, soco chihin cha vaha, ta tyicuan ri maa. Ta ñima in yaha ri cuhva cha nyaa ri yuhu chihin ndo.

¹⁹ Sehe luhli, inga chaha nyehí tindoho ta cha uhvi cha catyí ndo. Tari noo síhi cha yihí cha uhvi chí ña tatu cuacacu sehe ña. Ta cunyehe que tindoho nyacua nya ndunye vaha ndo chihin fuerza maa ra Cristo.

²⁰ Vaha tyehe ta nyaí chihin ndo vityin vityin. Tacuhva cuví cahan vii chihin ndo inga cuhva. Vatyí ña chité yoso caa caca xiñi cha cuenda ndo.

Nacoo yo cha cuenda Nyoo ta ñima ca cha cuenda ley chahnu

21 Nyoho cha cuñí ndo cha cunyaca ñaha ley ra Moisés chi ndo, catyi ndo chii. ¿Atu ta cuiñi ca ndo cha catyi ley cuan?

22 Catyi chi vatyí ra Abraham chiyo uvi tahan sehe ra. Noo sehe ra chiyo chihin ñaha cha cuví musu ñasihi ra. (Chinañi ña Agar.) Ta nonga sehe ra chiyo chihin cu Sara cha cuví ñasihi vaha ra.

23 Cacú sehe ñaha cha cuví musu cuan tari cacú tandihi ra cuatyaa. Soco sehe ñasihi vaha ra Abraham cacú cue tacuhva chino cava cha catyi Nyoo chi ra Abraham vatyí cuhva ra noo sehe chi ñasihi ra.

24 Ta chihin ihya iyó noo cha cuñi chi catyi chi chi yo. Nínduvi ñusihi cuan cuví ñu tari uvi tahan tuhun cha natyihí tahan Nyoo chihin yo. Noo tuhun cuan cuenda yucu Sinaí. Ta ñáyivi yihí cuenda ley cuan cuví ñu tari cu Agar, vatyí noo musu ri cuví tucu maa ña chihin sehe ña.

25 Tari cu Agar, ta tari yucu Sinaí cha nyaá Arabia, tyicuan caa tucu ñuu Jerusalén quívi vityin. Vatyí ñáyivi ñuu cuan nyaá ñu ndaha ley chahnu. Tari noo musu ley cuan cuví ñu.

26 Soco nya andívi iyó inga Jerusalén, cha cuví ñuu yo. Ta yori nyacá naha chi chi. Ta cuví chi tari sihi yo.

27 Ta catyi tuhun Nyoo: Cusiñi iñi yoho, ñaha sihi cha ña cuví coo sehe. Yoho yori sehung.

Çaṇa chaa chihin cha siñi cuñun, yoho cha ña ñohó nuu cha uhvi cha cacú sehe. Vatyí ñaha sihi cha sanandoo yí chi, coo ca sehe ña ta ñima ca ñusihi cha iyó yí, catyi tuhun Nyoo.

28 Yañi, yoó cuví yo tari ra Isaac, ra cuví sehe cu Sara. Cuví yo sehe ra Abraham cuenda tuhun cha natyihí tahan Nyoo chihin ra.

29 Ta ra cha cuví sehe ñaha cha cuví musu cuan xaan iñi ra chi ra Isaac cha cuví sehe ñasihi vaha ra Abraham. Tyicuan caa cuví tucu vityin. Ra cha cuñí vatyí sacuví yo cha catyi ley, xaan iñi ra ta chicán nyicon ra chi yo cha cuví yo ñáyivi nacacú chaa chihin Tatyí Ii Nyoo.

30 Soco ¿ñáá cha catyi tuhun Nyoo? Catyi chi: “Tava ñehe chi ñaha cha cuví musu cuan chihin sehe ña. Vatyí sehe ña ma cuví naquehen cue cha tahán chi chi sehe ñasihi vaha ra Abraham”, catyi tuhun Nyoo.

31 Yucuan chaha, yañi, ñima tari sehe ñaha cha cuví musu cuan cuví yo. Soco cuví yo tari sehe ñasihi vaha ra Abraham.

5

Ñihi cuinanyaa yo chihin cha ña nyacá ñaha ca ley chi yo

1 Ra Cristo sacacú ra chi yo ndaha ley chahnu cuan. Yucuan chaha saha ndo cuenda coto nanduvi ndo musu inga chaha cuenda ley.

2 Tyasoho ndo, yuhu ra Pablo catyi chi ndo. Tatu cuhva ndo cha saha ñu circuncidar chi ndo, ta cuñí maa ndo tyi cucacu ndo chihin cuan, ma cuví tyinyee ra Cristo chi ndo.

3 Cuñí catyi inga chaha chi ndo vatyí tandihi ra cha cuñí cacú chihin cha saha ñu circuncidar chi ra, cuñí chi vatyí sacuvi ra tandihi cuii cha catyi ley ra Moisés ñandihi.

4 Tandihi nyoho cha nducú ndo nduvahá ndo nuu Nyoo cha cuenda ley cuan, cha saña tahan ndo chihin ra Cristo cuví cuan. Ta saña ndaha ndo tumañi iñi cha chahá Nyoo chi ndo.

5 Soco yoó chihin cha tyinyee Tatyí Ii Nyoo chi yo ta chinó iñi yo chi ra Cristo. Ta itá iñi yo nduvahá yo nuu Nyoo.

⁶ Vatyi tatu #n ri cuví yo chihin ra Cristo Jesús, ñahri tuhun cha sacuví yo costumbre circuncisión, o cha ña sacuví yo. Cha vale ca tatu chinó iñi yo chi ra Cristo. Ta chihin cha chinó iñi yo coo yo, chihin cha cuñí yo chi noo noo tahan yo.

⁷ Nyoho vaha cuahán ndo quiví cuan. ¿Yóo cha sativí chi ndo? Ta ña tyasohó ca ndo cha ndicha.

⁸ Tuhun cha sañahá ñu cuan, ñima tuhun Nyoo ra nacana chi yo cuví.

⁹ Vatyi tari nandaá yuchan pan chihin chiin ri yuchan iya, tyicuan caa tucu noo ri ñáyivi quiñi caa cuví sativí ñu chi cuaha ñáyivi.

¹⁰ Nyoo cutachi tuñi ra chi ñáyivi cha sativí chi ndo. Ñahri cuenda ra yóo ñu cuví ñu. Soco yuhu chitó vahi tyi Sutu Mañi yo cutyinyee ra chi ndo tacuhva vatyi nyoho ma caca xiñi ndo inga cuhva cha ña sañahí chi ndo.

¹¹ Ta cha cuenda chi yuhu, yañi, tyehe ta catyí vatyi ñu chinó ini chi ra Cristo cuñí chi cha sacuví ñu costumbre circuncisión, ra Israel ma caca nyicon ra chii. Ta ma cuquiñi ca cuñi ra chihin tuhun ra Cristo cha chihí nu cruzi cha catyí cuatyi yo.

¹² Soco ra sayangá chi ndo chiña, vaha cha quita ra nu nyicu ndo, tacuhva cha ma sayanga ca ra chi ndo.

¹³ Vatyi nyoho, yañi, nacana Nyoo chi ndo vatyi coo ndo libre. Soco ñima cha cuenda cha iyó ndo libre ta cuví sacuví ndo ñáá ndihi cha cuñí coño ñuhu ndo. Soco sacuví ndo tyiño nuu tahan ndo chihin cha cuñí ndo chi ñu.

¹⁴ Vatyi iyó noo tuhun Nyoo cha catyí chi: “Cuñi ndo chi tahan ndo tari cuñí ndo chi maa ndo”, catyí chi. Ta tatu ndicha ndicha cha cuñí yo chi tahan yo, ña yí sacuví yo tandihi cha catyí ley chahnu.

¹⁵ Saha ndo cuenda vatyi tatu cahán ndo ta satasí iñi ndo chi tahan ndo, cutivi nu nyicu ndo.

Cuhva cuñí coño ñuhu yo ta cuhva iyó yo chihin Tatyí Ii Nyoo

¹⁶ Cha cuñí catyí chi ndo ican cuví ihya: Cqo ndo chihin tunyee iñi Tatyí Ii Nyoo. Tyicuan caa ta ma cuví ca sacuví ndo cuhva ña vaha cuñí ndo.

¹⁷ Vatyi cha sacuví yo cha ña vaha cha cuñí yo, ñima cuhva cuñí Tatyí Ii Nyoo cuví. Vatyi Tatyí Ii Nyoo ña cuñí chi cha sacuví yo cha ña vaha. Ta coño ñuhu yo ña cuñí chi sacuví chi cuhva cuñí Tatyí Ii Nyoo. Ña nacachí tahan cha cuñí Tatyí Ii Nyoo chihin cha cuñí coño ñuhu yo. Ta yucuan chaha ma cuví sacuví yo cha cuñí yo.

¹⁸ Soco tatu sacuví yo cha catyí Tatyí Ii Nyoo chi yo, ma cuví ca cunyaca ñaha ley chi yo.

¹⁹ Ña xehe caa ñu sacuví cuhva ña vaha cha cuñí coño ñuhu. Yihí ra, iyó ñasihí ra ta iyó inga ñu chi ra. Ta yihí ñu iyó yí ñu ta iyó inga ra chi ñu. Ta yihí ñu sacuví ñu cha ña vaha chihin coño ñuhu ñu ta iyó viciu chi ñu.

²⁰ Yihí ñu sacahnú ñu xitohyo. Yihí ñu satasí ñu. Yihí ñu tasi cuñí nyehe ñu chi tahan ñu. Yihí ñu cañi tahan ñu. Yihí ñu cuiñó ñu. Ta yihí ñu yatyin iñi ñu. Yihí ñu chicá xiñi ñu maa maa ri cha vaha chi maa ñu. Ta yihí ñu iyó división nu nyicu ñu. Vatyi cacañi tahan ñu. Ta tyicuan caa ta cusin ñu.

²¹ Ta yihí ñu nyiyó iñi ñu cha tyayii. Ta yihí ñu cachahñi chi tahan ñu. Ta yihí ñu tuhva ñu chiñi. Ta yihí ñu chachí cuahyi ñu. Ta sacuví ñu cuaha ca cha sacuví ñu. Ta catyí chi ndo tari catyí chi ndo quiví cuan. Vatyi tandihi ñu cha sacuví tyehe caa ma cuví naquehen cuenda ñu nu nyacá ñaha Nyoo.

²² Soco cha chahá Tatyí Ii Nyoo, ican cuví ihya: cha cuñí yo chí Nyoo ta chí tahan yo, cha sîi cuñí yo, cha taxi cuñí añima yo, cha cama iyó yo chíhin ñáyivi, cha masu iñi yo, cha vaha ñáyivi cuví yo, cha ña cundihñi yo sacuví yo cha vaha chíhin ñáyivi, cha chinó iñi yo chí ra Cristo.

²³ Ta inga cha chahá Tatyí Ii Nyoo chí yo, ican cuví ihya: cha ndahvi sahá yo chí yo, cha ña sacuví yo cuhva cuñí coño ñuhu yo. Tatu sacuví yo tandihí cha vaha ihya, ni noo ley ta ma cuví catyi chí tyi iyó cuatyí yo.

²⁴ Ta yoó cha yihí yo cuenda ra Cristo Jesús, cha sandihí yo tuhun cha sacuví yo cuhva ña vaha cha cuñí coño ñuhu yo.

²⁵ Ta tari cha iyó yo ñáyivi chaa cha cuenda Tatyí Ii Nyoo, tyicuan caa cuñí tucu chí cha quichahá yo cha saquehen ityi ra chí yo.

²⁶ Ma cahnu saha yo chí yo. Ta ma sacañi tahan yo chí tahan yo. Ma quichi cuví iñi yo cha chíi inga tahan yo.

6

Tahán chí tyinyee yo chí tahan yo

¹ Yañi, tatu nanyehé yo sacuví noo tahan yo cuatyí. Nya yo cha ñihi nyaá yo chíhin Tatyí Ii Nyoo tyinyee yo chí ñu na ndunyeé ñu inga chaha. Soco cuñí chí cahán vii yo chíhin ñu chíhin cha vita iñi yo. Ta cuñí chí sahá yo cuenda chí yo coto nducu nyehe tucu cuihna chí maa yo.

² Na tyinyee yo chí tahan yo ñáá cha cuví chí ñu. Tatu tyicuan caa sacuví yo, quichahá vaha yo chí ra Cristo cuví cuan.

³ Tatu nya noo yo cuñí maa yo vatyi cahnu ñu cuví yo, ta ñahri ñu cuví yo, suri chí maa yo sandaví ñaha yo.

⁴ Ma saha yo tuhun tyi vaha yo tari vaha noo hermano cha vaha chicá chíhin Nyoo. Nasaha xihna yo cuenda tatu vaha cha nyacuví yo. Tyicuan ta coto yo tatu vaha sacuví yo ta cusîi cuñi yo.

⁵ Vatyi tahán chí cunyeé noo noo yo ñáá ndihí cha tyisó Nyoo siqui yo.

⁶ Ta cuñí chí tyinyeeé ndo chíhin cha chíñuhú chí ra cha sañahá tuhun Nyoo chí ndo.

⁷ Ta ma sandaví ñaha ndo chí ndo. Nyoo yori cuví cuacu nyaa chí ra. Vatyi tandihí cha tachí ñáyivi, ican cuan cunaquehén ñu. Vatyi tatu sacuví ñu cha vaha, cha vaha naquehén ñu. Soco tatu sacuví ñu cha ña vaha, cha ña vaha cuñihí ñu.

⁸ Tatu noo ñáyivi nyacuví ñu cuhva ña vaha cha cuñí coño ñuhu ñu, suri maa cha sacuví ñu cusativí chí chí ñu. Soco tatu nyacuví ñu cuhva cuñí Tatyí Ii Nyoo, Tatyí Ii Nyoo cucuhva noo ñáyivi chaa cha ma naa ca maa tyi coo ñu.

⁹ Yucuan chaha ma cutatu yo cha sacuví yo cha vaha. Vatyi tatu ma ndu uvi iñi yo, coo quivi ta naquehen yo cha vaha.

¹⁰ Yucuan chaha tahan ri chaha cha chahá chí cuhva, na sacuví yo cha vaha chíhin tandihí ri ñáyivi. Ta cha xihna cuíi ri sacuví yo cha vaha chíhin ñu yihí cuenda Nyoo.

Cusîi xaan cuñí ra Pablo vatyi nyehé ra tîndoho cha cuenda ra Cristo

¹¹ Nyehe ndo ñana cha nahnu letra tyai chíhin ndahi nu tutu ihya vityin.

¹² Ñu cha cuñí saniñí chí ndo vatyi sacuví ndo costumbre circuncisión, saniñí ra chí ndo vatyi cuñí ra cuvaha ra nuu ñáyivi. Ña cuñí ra nyehe ra tîndoho cha cuenda ra Cristo, ra chíhí nu cruzi.

¹³ Vatyí ni maa ra cha sacuví ra costumbre circuncisión cuan ta ña quichahá ra tandihí cha catyí ley. Soco cuñí ra cha sacuvi nyoho costumbre cuan. Vatyí tyicuan caa ta cuví sacahnu ra chí ra vatyí sacuví ndo cuhva catyí ra.

¹⁴ Soco yuhu ña cuñí sacahni chii cha cuenda ñáá ndihí tuhun. Soco síi xaan cuñí cha chihí Sutu Mañi yo Jesucristo nu cruzi cha cuenda yuhu. Vatyí cha cuenda cha chihí ra nu cruzi, tari quiví cha yahá chihí cha quiñi caa cha iyó ñáyivi ihya. Ta cha yahá chihí tucu mai cha cuenda cuan.

¹⁵ Vatyí tatu nyicón yo chí ra Cristo Jesús, ña ñiñi xaan cha sacuví yo costumbre circuncisión o cha ña sacuví yo. Noo cha ñiñi ca, cha nanduví yo noo ñáyivi chaa.

¹⁶ Tandihí ndo cha iyó ndo tyehe caa, ñaquehen ndo cha taxi ri coo ñiñi ndo. Ta na cundahvi cuñi ra nyehe ra chí tandihí ndo, ñu cha ndicha cuví ndo ñáyivi cuenda ra.

¹⁷ Cha vityin ta nu cuahán chí ityi nuu ca, ni nonga ndo ta ma cuhva ca ndo tisihi chii. Vatyí tandihí pehla cha nyaá coño ñuhi, cuñí chí catyí vatyí ndicha cha cuví yuhu noo ra chicá tyiño Sutu Mañi yo Jesús.

¹⁸ Yañi, Sutu Mañi yo Jesucristo na nasoco chí tandihí ndo. Ta tyicuan caa na cuví chí.

Carta Cha Sacuhun Ra Apóstol Pablo Chi Ñáyivi Ñuu Éfeso Cha Yihí Cuenda Nyoo

Nu sacuhún ra Pablo noo tutu chi ñu ñuu Éfeso cha yihí cuenda Nyoo

¹ Yuhu ra Pablo cuví noo apóstol ra Jesucristo. Vatyí yucuan cuhva cuñí maa Nyoo. Tyaí noo carta ihya chi tandihí ndo cha yihí ndo cuenda Nyoo ñuu Éfeso chiña, ta ñí iñi ndo chinó iñi ndo chi ra Cristo Jesús. Ta ñn ri cuví ndo chihin ra.

² Na nasoco Nyoo ta Sutu Mañi yo Jesucristo chi ndo. Ta nacuhva ra cha taxi ri coo añima ndo.

Cha ñn ri cuví yo chihin ra Cristo, Nyoo nasocó xaan ra chi yo

³ Na sacahnu yo chi Nyoo, ra cuví Sutu Sutu Mañi yo Jesucristo. Vatyí nasocó xaan ra chi yo chihin tandihí nuu cha vaha cha iyó andiví cha cuenda cha ñn ri cuví yo chihin ra Cristo.

⁴ Vatyí nyata ni cumañi ca savaha ra ñuhu ñáyivi ta nacachí vaha ra chi yo tyi cu ñn ri yo chihin ra Cristo. Vatyí tyicuan caa cundundi yo nuu ra chihin cha ñahri ca cuatyí yo. Cha cuenda cha cuñí ra chi yo,

⁵ ta nyata cha naha ta tyaá ra cuhva chi yo vatyí nanduvi sehe ra chi yo cha cuenda ra Jesucristo. Tyicuan caa sacuví ra vatyí yucuan cuhva cuñí maa ra.

⁶ Yucuan chaha tyicuan ri sacahnú yo chi ra. Vatyí vaha xaan ñáyivi cuví ra. Ta cahnu xaan tumañi iñi chahá ra chi yo. Vatyí sacu ñn ri ra chi yo chihin Sehe ra, ra cha cuñí xaan ra chi.

⁷ Ta cha cuenda cha cuñí xaan Nyoo chi yo, natava ra chi yo ndaha ra ña vaha, tacuhva cha ma cutuñi chi yo. Vatyí chihin cha chatí ñiñi Sehe ra, sandachí ra cuatyí yo. Ta tyicuan caa sahá Nyoo ticahnu iñi chi yo.

⁸ Ta vatyí cahnu xaan tumañi iñi sahá ra chi yo, chahá xaan ra cha chiñi tuñi ra chi yo.

⁹ Ta chahá ra cha cutuñi iñi yo tuhun ra cha ña chito ñáyivi. Vatyí sacotó ra chi yo yoso cuhva tyaá ra cuhva tyi sacuvi ra chihin tandihí cha iyó cha cuenda ra Cristo.

¹⁰ Vatyí coo quiví cuchino cava cha tyaá ra cuhva tyi sacuvi ra. Vatyí cusandu ñn ri ra tandihí cha iyó ihya ñáyivi ta cha iyó andiví, ta tandihí cucunyaa ndaha ra Cristo. Vatyí maa ra cucunyaca ñaha ra tandihí.

¹¹ Cha cuenda ra Cristo ñihí tucu maa yo cha tahán chi chi yo. Vatyí Nyoo nyata cha naha nacachí ra chi yo tyi cu ñn ri yo chihin ra Cristo. Tyicuan caa tyaá Nyoo cuhva tyi sacuvi ra. Ta maa ra sacuví tandihí yoso cuhva nyehé maa ra tyi vaha.

¹² Ta tyehe caa sacuví ra tacuhva vatyí nyuhu cha nachino iñi ndi chi ra Cristo cha xihna ri, coo ndi soco cha sacahnu ndi chi Nyoo cha cuenda cha cahnu cuví maa ra.

¹³ Ta tyicuan caa tucu nyoho. Vatyí quiví chiñi ndo tuhun Nyoo cha ndicha vaha, catyí ñu chi ndo tuhun ra Cristo yoso caa sacacú ra chi yo. Ta chiqo iñi ndo chi ra. Ta ndu ñn ri ndo chihin ra. Ta tari cha tyaá Nyoo tuñi ra chi ndo cuví cuan, vatyí chahá ra Tatyí Ii ra cohon añima ndo, tari cuhva catyí ra tyi sacuvi ra.

¹⁴ Ta ican maa Tatyí Ii cuví cha chahá quiví ri Nyoo chi yo tacuhva cuví naquehen ca yo cha cucuhva ra chi yo. Vatyí tyinyeé Tatyí Ii ra chi yo nyacua

nya quiví ndihí sacacu ra chí yo, cha cuví yo ñáyiví chí ra. Ta tandihí ihya sacuví ra chihin yo tacuhva sacahnu yo chí ra. Vatyí maa ra cahnu ca ra cuví ra.

¹⁵⁻¹⁶ Yucuan chaha, cuhva cha chicán tahví chí Nyoo, ña sandihí tuhun cha nacuhvé tyahví nyoo chí ra cha cuenda ndo. Vatyí ñihí tuhun tyí chinó vaha íñi ndo chí Sutu Mañi yo Jesucristo. Ta cuñí xaan ndo chí tandihí ñu tahan yo ñu yihí cuenda Nyoo.

¹⁷ Chiquén chí Nyoo Sutu Sutu Mañi yo Jesucristo. Vatyí ican ra cuví ra cahnu ca. Ta chiquén chí ra nacuhva ra cha chiñi tuñi Tatyí Ii ra chí ndo, tacuhva cutuñi íñi ndo cha sañahá ra chí ndo. Vatyí cohon nuu vaha ca ndo chí ra.

¹⁸ Ta chiquén chí ra, na nuña ra cha chiñi tuñi xiñi ndo, na coto ndo ñáa cha cuñí ra cha naquehen ndo cha cuenda cha caná ra chí ndo. Ta na coto ndo ñana cha tyaqui ta tyayii cha chahá Nyoo chí yo ñu yihí cuenda ra.

¹⁹ Ta chiquén chí Nyoo tyí cuhva ra cha coto ndo ñana cha cahnu tunyee íñi iyó chí ra, nyacua ña cuví tyicuhva yo. Ta ican cuan tyinyeé chí yo cha chino íñi yo chí ra. Ta suri maa chihin tunyee íñi ihya

²⁰ Nyoo sanandoto ra chí ra Cristo. Ta cuatyaa ra chí ra chiyo vaha ra nya andiví.

²¹ Ta yucuan cuví nu sacahnu xaan ca Nyoo chí ra Cristo cha nuu tandihí ca cha nyacá ñaha siqui ñuhu ñayiví ihya ta andiví ñandihí. Cuví ri tandihí rey, o cuví ri ra cuví tyiño nahnu, o cuví ri ángel andiví. Soco yori yóo ca ra cahnu ñayiví ihya ta ñiri ñayiví cha cua coo. Vatyí noo tuhun ri maa ra Cristo cuví ra cahnu cuví.

²² Ta tandihí cuii maa chahá Nyoo tyí cunyaca ñaha ra Cristo. Ta suri chí maa ra chahá Nyoo vatyí cuví ra xiñi o nuu chí ñu yihí cuenda ra.

²³ Vatyí yoó, cha yihí yo cuenda ra, cuví yo coño ñuhu ra. Ta maa yo ta maa ra cuví chí noo coño ñuhu nanii ra. Ta maa ra cuví ra sandunanii tandihí.

2

Sacacú Nyoo chí yo cha cuenda cha cuñi ra chí yo

¹ Nyoo chahá ra noo ñayiví chaa chí ndo tyí coo ndo quiví ndu ñin ri ndo chihin ra Cristo, vasi nicaa ni íñi ndo cuatyí quiví cuan. Ta tari maa cha chihí aña ndo tyí ñahri maa ñayiví Nyoo chinyaá aña ndo.

² Ta chinyacuví ndo cuhva nyacuví ñáyiví ña ñohó nuu Nyoo. Ta chinyicon ndo chí cuñna ra cuví nuu. Ta ican ra cuví tatyí ña vaha cha tyiyuhú chí ñu ña quichahá nu cahán Nyoo.

³ Ta suri tyicuan caa chiyo tucu yoó quiví cuan. Vatyí chinyacuví yo cha ña vaha cha quichí cuví íñi yo cha cuñi coño ñuhu yo. Ta sacuví yo yoso cuhva chicá xiñi yo. Ta cha cuenda tuhun cha chinyacuví yo tahán chí tachi tuñi Nyoo chí yo inuu ri chihin tandihí ca ñu sacuví cha ña vaha.

⁴ Soco Nyoo cundahví xaan cuñi ra nyehe ra chí yo. Vatyí cuñi xaan ra chí yo.

⁵ Ta vasi cuaha xaan cuatyí yo quiví cuan, tari quiví cha chihí aña yo chihin cuatyí cuan, socio Nyoo chahá ra cha conyito aña yo noo ñayiví chaa, vatyí sacú ñin ri ra chí yo chihin ra Cristo. Ta cha cuenda tumañi íñi cha saha Nyoo chí ndo ta cacú ndo.

⁶ Ta tari quiví cha sanandotō Nyoo añima yo quiví nandotō ra Cristo Jesús. Vatyí iyó yo noo ñayiví chaa cha chahá maa Nyoo tyí coo yo. Ta tari quiví cha cuatyaá ra chí yo andiví.

⁷ Ta sacuví Nyoo tyehe caa tacuhva vatyí nu cuahán ca chí quiví cusañaha ra chí tandihí ñáyiví yoso cuhva cha cahnu tumañi iñi chahá ra chí yo cha cuenda ra Cristo Jesús. Vatyí vaha xaan ñáyiví cuví ra chihin yo tyí sacú ñn ri ra chí yo chihin ra Cristo.

⁸ Vatyí cha sacacú Nyoo chí yo cuví chí noo cha chahá ra chí yo. Ta naquehén yo tumañi iñi cuan chihin cha chinó iñi yo chí ra. Ta cha sacacú Nyoo chí yo ñima noo cha cuví sacuví maa yo cuví. Vatyí yucuan cuví noo tumañi iñi cha sacuví ra chihin yo.

⁹ Ñima cha cuenda cha sacuví yo cha vaha ta cuita iñi yo cha sacacú cuan chí yo. Tyehe ta cuví chí tyicuan caa, cahnu cusaha yo chí yo.

¹⁰ Nyoo sacuví ra vatyí nduvahá añima yo chihin cha ndu ñn ri yo chihin ra Cristo Jesús. Ta sacuví ra tyehe caa tacuhva vatyí cuví sacuví yo cha vaha. Vatyí maa ra tyaa ra cuhva nu quichí quiví vatyí tyicuan ri sacuví yo cha vaha.

Cuví ri yo ñu Israel, o cuví ri yo ñu inga ñuu, soco cha cuenda ra Cristo ñn ri ñáyiví chí Nyoo cuví tandihí yo

¹¹ Yucuan chaha ñicohon iñi ndo cuhva chiyo ndo nu quichí quiví, tyí cuví ndo ñáyiví cha ñima ñu Israel cuví. Ta catyí ñáyiví Israel tyí ñu cha ñima ri tuhun cuví ndo cha ña sacuví ndo costumbre circuncisión tari sacuví maa ra. Ta cha cuenda cuan cuñi maa ra Israel tyí vaha ra nuu Nyoo ta nyoho ña vaha ndo.

¹² Ñicohon iñi ndo vatyí nu quichí chí, yori ra Cristo chinyaa añima ndo. Ta ña ñn ri cuví ndo chihin ñu Israel. Ta ña chitō ndo tuhun cha tyihí tahan Nyoo chihin ra Abraham: tuhun cha catyí Nyoo tyí cuhva ra cha nicoo vaha yo chihin ra. Chiyo maa ndo ñuhu ñayiví ihya chihin cha yori Nyoo nyaá chihin ndo, ta ña yihí iñi ndo cha cuñihí ndo.

¹³ Ta quiví cuan cañi xaan chinyaa ndo chihin Nyoo. Soco vityin ñn ri cuví ndo chihin ra Cristo Jesús. Maa ra Cristo chihí ra. Ta chati ñiñi ra cha catyí ndo. Ta yucuan chaha cuví cuyatyin ndo nuu Nyoo.

¹⁴ Vatyí ra Cristo sanicoo vaha ra chí yo chihin Nyoo. Ta sandu ñn ri ra chí ninduví yo. Sandu ñn ri ra chí nyuhu cha cuví ndi ñu Israel chihin nyoho cha cuví ndo ñu inga ñuu. Ta sanduvahá ra cuhva iyó yo. Vatyí tari noo cha sanduvá ra noo nama vehe cha nanyaa mahñu, cha chasí nu cu ñn ri yo.

¹⁵ Maa ra Cristo sandihí ra tuhun ley chahnú chihin cha chahá cuenda ra coño ñuhu ra tyí cuví ra nu cruzi. Vatyí tandihí ley cuan sasñn chí chí yo. Tyí nyuhu sacuví ndi costumbre cha catyí ley cuan. Ta nyoho ña sacuví ndo. Soco ra Cristo sandu ñn ri ra chí yo quiví chahá ra noo cuhva chaa tyí coo yo. Ta tyicuan caa sanicoo vaha ra chí yo.

¹⁶ Vatyí chihí ra nu cruzi cha catyí cuatyí yo. Ta sacuví ra vatyí nanduvaha coo yo chihin Nyoo. Ta tyicuan caa sanaá ra cha ña cuñi nyehe yo chí tahan yo.

¹⁷ Ra Cristo quichí ra ta cahan ra tuhun vaha Nyoo chihin yo: chihin nyoho cha cañi ca chinyicú ndo chihin Nyoo ta chihin nyuhu ñu Israel, ñu chitō tuhun Nyoo. Catyí ra chí yo vatyí na nicoo vaha yo chihin Nyoo.

¹⁸ Vatyí chaha cha catyí cha chihí ra Cristo cha cuenda yo cuví natuhva ninduví yo chí Nyoo Sutu yo. Vatyí noo ri Tatyí Ii ra nyaá añima yo: an cuví ri yo ñu Israel, an cuví ri yo ñu cha ñima ñu Israel cuví.

¹⁹ Yucuan chaha nyoho ña cuví ca ndo ñu inga ñuu. Soco nanduví ndo ñáyivi ñuu Nyoo ñn ri chihin tandihí ñu yihí cuenda ra. Nanduví ndo ñáyivi chí ra.

²⁰ Ta cuví tucu ndo tari noo vehe. Ta ra apóstol, ta ra profeta, ra cachahá cuenda tuhun Nyoo cacuví ra tari ra catyihí yuu chaha vehe. Vatyí suri maa ra Cristo cuví yuu cha ññi ca cha yihí chaha vehe cuan.

²¹ Ta cha cuenda maa ra Cristo cuahan ndaa vehe cuan ta vehe cuan ican cuví maa yo ñn ri chihin ra. Ta cuahán sandu ñn ri ra chí tandihí yo ta nanduví yo tari noo vehe ii nu nyaá maa Sutu Mañi yo.

²² Ta tyicuan caa tucu nyoho chihin tandihí ñu yihí cuenda Nyoo, nanduví ndo tari noo nu iyó Nyoo. Vatyí nyaá Tatyí Ii ra añima tandihí yo.

3

Nyoo tachí ra tyiño chí ra Pablo vatyí cahan ra tuhun ra chihin ñu cha ñima ñu Israel cuví

¹ Yucuan chaha yuhu ra Pablo ñohí vehe caa ihya vatyí sacoté tuhun ra Cristo Jesús chí nyoho cha ñima ñu Israel cuví ndo.

² Tahán chí natyihí tuñi iñi ndo tyi cahnu xaan tumañi iñi chahá ra chíi cha cuenda cha vaha chí ndo, tyi sacoté chí ndo.

³ Vatyí cha yaha catyí suhva chí ndo yoso caa sañahá Nyoo chíi noo tuhun xehe.

⁴ Ta cuhva cha sacuaha ndo tuhun cha yahá catyí chí ndo, cuví coto ndo yoso caa chahá Nyoo tyi cutuñi iñi tuhun ra Cristo cha ña chitó ñáyivi.

⁵ Vatyí nu quichí chí, ña sañahá Nyoo chí ñáyivi, tari sañahá ra chí apóstol ta ra cacuví profeta cha vityin. Vatyí Nyoo chihin Tatyí Ii ra sañahá ra chí yo cha vityin.

⁶ Ta tuhun xehe cuan, ican cuví ihya: vatyí nyoho cha ña cuví ndo ñu Israel, ñn ri cha cutahan chí chí ndo chihin nyuhu cha cuví ndi ñu Israel. Vatyí noo ri coño ñuhu ra Cristo cuví yo. Ta cuñihi yo cha catyí Nyoo tyi cuhva ra chí yo cha cuenda maa ra Cristo Jesús.

⁷ Sahá Nyoo tumañi iñi chí yuhu vatyí chahá ra tunyee iñi ra chíi tyi sacoté tuhun vaha ihya chí ñáyivi.

⁸ Soco cha cuenda chí yuhu cuví noo ra luhlu, noo ra ndahvi ca cha nuu tandihí ca ñu yihí cuenda Nyoo. Soco sahá Nyoo tumañi iñi ihya chíi. Vatyí tacuhva cahin tuhun ra Cristo chihin ñu cha ñima ñu Israel cuví. Ta sacoté chí ñu ñana cha tyayíi cha cuñihi ñu cha cuenda ra Cristo.

⁹ Tyatyíño Nyoo chíi tyi sacote chí tandihí ñáyivi yoso caa tyaá ra cuhva nyata ni cumañi ca savaha ra tandihí cha iyó. Ta cha naha ña chahá Nyoo cha coto ñáyivi tuhun ihya.

¹⁰ Tyicuan caa cuví tacuhva vatyí vityin tandihí ra nyacá ñaha andivi cunyehe yoso caa cha vaha cha sacuví Nyoo chihin yo cha cuví yo ñu yihí cuenda ra. Ta cucoto ra tyi chíi tuñi xaan Nyoo.

¹¹ Tandihí ihya chachí tahan chihin cha tyaá Nyoo cuhva tyi sacuvi ra chihin Sutu Mañi yo Jesucristo cha cuenda cha vaha chí yo.

¹² Ta cha cuenda maa ra Cristo iyó chí ityi chí yo cha chaá yo nuu Nyoo chihin cha ña yuhví yo. Vatyí chinó iñi yo chí ra Cristo.

¹³ Yucuan chaha chacú ndahvi nuu ndo tyi ma ndu uvi iñi ndo chí Nyoo cha nyehi tindocho cha cuenda ndo. Vatyí cuví chí cha cuenda cha vaha chí maa ndo. Ta çuñi cuñi ndo cha cuenda ihya.

Chicán tahvi ra Pablo chaha ñu, na cohon nuu ca ñu chi ra Cristo

¹⁴ Yihí iñi yoso cuhva cha vaha cha tyaꝯ Nyoo Sutu yo cuhva tyi cuhva ra chí yo. Ta yucuan chaha chicuñi chiti nuu ra.

¹⁵ Maa ra cuví ra Sutu tandihi ñáyivi cuenda ra: ñu cha cuahan coyo andivi, ta ñu cha iyó ca siqui ñuhu ñáyivi. Tandihi yo cuví yo ñáyivi chí ra.

¹⁶ Ta chiquén chí ra na sandunyeer ra iñi ndo chihin Tatyí Ii ra cha nyaá añima ndo. Vatyí maa ra cahnu xaan ca cha tyayíi ra chahá ra chí yo.

¹⁷ Ta na coo ra Cristo añima ndo vatyí chinó iñi ndo chí ra. Ta coo ndo chihin cha cuñí Nyoo chí ndo. Vatyí tari yihí vaha yoho noo yutun chichi ñuhú, tyicuan caa cunyaa vaha añima ndo chihin Nyoo.

¹⁸ Tyicuan ta cuacoo tunyee iñi ra chí ndo tacuhva cuví cutuñi vaha iñi ndo chihin tandihi ñu yihí cuenda ra vatyí cuñí xaan ra Cristo chí yo. Nyacua ña ñihí ca yo cuhva catyí yo yoso cuhva cha cuñí ra chí yo.

¹⁹ Vatyí yaha xaan cahnu cuan. Nyacua ma cuví cohon nuu yo yoso cha cuñí ra chí yo. Soco cuñí cha nacoto ndo yoso cha cuñí ra chí yo. Tyicuan ta ñahri ca cumañi chí ndo. Vatyí Nyoo nyaá maa ra chihin ndo.

²⁰ Ta vityin na sacahnu yo chí Nyoo, ra cha iyó xaan ca tunyee iñi chii. Vatyí cuaha vavaha ca cha cuví sacuví ra cha nuu cuhva cha chicán maa yo chí ra o cha nuu cuhva cha chicá xiñi yo. Vatyí suri chihin tunyee iñi ra cha iyó chí yo, sacuví ra tandihi.

²¹ Yoó ñu chino iñi chí Nyoo, na sacahnu yo chí ra tyicuan ri maa, ta tandihi tyemba cha cuenda cha sacuví ra Cristo Jesús. Ta na cuví chí tyicuan caa.

4

Cha cuenda Tatyí Ii Nyoo ñn ri cuví tandihi yo cha yihí yo cuenda ra Cristo

¹ Yucuan chaha yuhu cha ñohí vehe caa cha cuenda Sutu Mañi yo chacú ndahvi nuu ndo na cachí coo ndo tari cuhva tahán chí coo ñu cha nacana Nyoo chii. Vatyí chí nyoho nacana Nyoo tyi cuví ndo ñáyivi chí ra.

² Ndahvi saha ndo chí ndo. Ta vaha cahan ndo chihin ñáyivi. Cama cuví iñi ndo. Ta cunyee ndo ñáá cha sahá noo noo tahan ndo chí ndo chihin cha cuñí ndo chí ñu.

³ Ndūcu ndo cuhva cha tyicuan ri cu ñn ri ndo chihin tahan yo. Vatyí maa Tatyí Ii Nyoo tyinyee chí yo, na coo vaha yo chihin tahan yo.

⁴ Vatyí iyó noo ri coño ñuhu ra Cristo. Ta ican cuan cuví tandihi yo. Ta tari cha noo ri Tatyí Ii Nyoo iyó, tyicuan caa tucu iyó noo cha chitó cachi yo tyi cunaquehen yo tyi nacaná ra chí yo.

⁵ Ta iyó noo ri Sutu Mañi yo nyacá ñaha chí yo. Ta noo ri chí maa ra chinó iñi tandihi yo. Ta noo ri cha cuenda maa ra condutya yo.

⁶ Ta noo ri Nyoo iyó ta maa ra cuví ra Sutu tandihi yo. Ta maa ra nyacá ñaha chí tandihi yo. Ta chotyíñó ra chí tandihi yo yoso cuhva cuñí maa ra. Ta nyaá ra añima tandihi yo.

⁷ Chahá ra Cristo noo cuhva chí noo noo yo, vatyí sacuví yo tyiño nuu ra yoso cuhva cuñí maa ra cuhva ra.

⁸ Yucuan chaha cahan Nyoo tuhun ra Cristo nu catyí chí: Cuví chasaha ra chí ra xaan iñi chí ra, ta nandaꝯ xica ra andivi chihin ñu tava ra ndaha ra ña vaha.

Ta chahá ra cuhva yoso cuhva cusaha tyiño ñu tyiño nuu ra, catyí chí.

⁹ ¿Ta ñáá cha cuñí chí catyí cha nandaꝯ xica ra cuan? Cuñí chí catyí vatyí noo xihna ra nya yuvi ca nu ñuhu ñáyivi.

¹⁰ Ra cha noo cuan, nandaa tucu ra nya nu sucun ca andivi. Vaty tyicuan caa ta cuvi sacutu ra tandihi maa ta cunyaa ra chihin yo tandihi ityi.

¹¹ Ta suri maa ra Cristo chaha ra cha vaha chi yo. Chi suhva yo chaha ra tyi cuvi yo apóstol ra. Ta chi inga yo chaha ra cha cuhva cuenda yo tuhun cha chaha ra chi yo, o saha yo profetizar cuvi cuan. Ta chi inga yo chaha ra tyi sacoto yo chi ñáyivi yoso caa sacacú ra aña yo. Ta chi inga yo chaha ra cha quihí ndaha yo chi ñu yihí cuenda ra, ta chi inga yo chaha ra cha cuvi sañaha yo tuhun ra chi ñu.

¹² Tyicuan caa chaha Nyoo tyiño chi yo vaty cunyaa yo tyiño cha sandunyeé yo iñi tahan yo vaty cuvi yo coño ñuhu ra.

¹³ Nyacua nya cu ñin vaha tandihi yo cha cuenda cha chinó vaha iñi yo chi Sehe Nyoo. Ta cohon nuu vaha yo chi ra. Tyicuan caa ta cutu yo chihin tandihi cha vaha cha chaha ra Cristo chi yo.

¹⁴ Yucuan ta ma cuvi ca yo tari ra cuatyaa. Vaty totyehe ri chino iñi ndotyin ñáá noo tuhun cha ñima ri tuhun sandavi ñaha ñu chi ndotyin. Ta coto cutondo xiñi yo tyicuan caa chihin tuhun cha ña ndicha cha sañahá ñu sandavi ñaha.

¹⁵ Soco cha nuu cha cuvi yo tari ra cuatyaa, cuñí chi cha cahán yo cha ndicha chihin cha cuñí yo chi Nyoo ta chi ñáyivi. Ta ndunyeé ca aña yo chihin ndi cha vaha cha iyó chi Nyoo. Ta cuahnu yo chihin ra Cristo, cha cuvi ra nuu chi yo.

¹⁶ Ta cha cuenda ra Cristo tandihi yo cha cuvi yo coño ñuhu ra, ñin ri cuvi yo. Tari yihí tahan noo coño ñuhu, ta sahá tyiño tahan tahan nu yihí tahan chi, yoso cuhva tyiño cha tahán chi chi, ta tyicuan caa tyinyeé chi chi coño ñuhu, na coo vaha chi ta cuahnu chi, ta tyicuan caa yoó, cuñí yo chi tahan yo ta tyinyeé yo chi ñu.

Ñáyivi chaa cha tahán chi coo yo cha cuenda ra Cristo

¹⁷ Ican ihya cuvi cha chahí cuenda chi ndo, catyí Sutu Mañi yo. Ta cuñí chi cha quicha ndo. Ma coo ca yo tari iyó ñu ña ñohó nuu chi Nyoo. Vaty maa ri maa cha chiñi tuñi tondo chicá xiñi ñu.

¹⁸ Ta ña cutuñí iñi ñu, tyi ñima ñáyivi Nyoo iyó ñu. Vaty ña chitó ñu, cha cuenda cha ndava aña ñu.

¹⁹ Ña cahán ca nuu ñu cha sacuvi ñu cha ña vaha. Ta nacuhva cuenda ñu chi ñu chi cha quiñi caa. Cuaha xaan cha ña vaha quichi cuvi iñi ñu.

²⁰ Soco ñima tyicuan caa cutuhva yo. Vaty ñima tyicuan caa cuhva iyó ra Cristo.

²¹ Tatu ndicha tyi chiñi yo cha cañan ra chihin yo, ta cutuhva yo cha ndicha cha sañaha ra chi yo,

²² ma coo ca yo cuhva chiyo yo quivi cuan. Vaty chiyo yo ñáyivi chahnu quiñi caa. Vaty cha quichi cuvi iñi yo sandavi ñaha chi chi yo.

²³ Nacuhva cuenda yo chi yo chi Nyoo na nasama ra cuhva chicá xiñi yo.

²⁴ Ta nacoó yo noo ñáyivi chaa chihin noo aña chaa cha savahá Nyoo. Ta cuvi yo noo ñu vaha cha ndicha ndicha, noo ñu cachi iyó nuu Nyoo tari maa ra.

²⁵ Yucuan chaha ma cahan ca yo cuendu. Cañan yo maa maa ri cha ndicha chihin tahan yo. Vaty ñin ri ñáyivi cuvi yo.

²⁶ Tatu cuxaan yo, saha yo cuenda coto sacuvi yo cha ña vaha. Ta suhva ri cuhva cuxaan yo. Ma cuxaan yo ndiyaca.

²⁷ Ta ma cuhva yo cuhva chi ra ña vaha.

²⁸ Ra cha tuhva suhu quivi cuan, ma suhu ca ra vityin. Soco saha tyiño vaha ra chihin ndaha ra. Tyicuan caa ta coo cha chii ra, tacuhva cuvi tyinyee ra chi ñu cha chiñuhú chii.

²⁹ Ma cahan yo cha quiñi caa. Cahan yo, soco maa ri cha vaha cha tyinyee ta sacuahnu chi ñu chiñi tuhun cahán yo.

³⁰ Ta ma cuhva yo tucuihya iñi chi Tatyí li Nyoo. Vatyí chaha Nyoo Tatyí li ra chi yo tari noo tuñi ra tyaá ra añima yo nyacua nya quivi ndihi sacacú ra chi yo.

³¹ Ta ma xaan cuñi yo. Ta ma cuxaan yo. Ta ma quihi tisihi iñi yo. Ma cana chaa yo siqui tahan yo. Ma cahan uhvi yo chi tahan yo. Ta ninoo cha ña vaha ma caca xiñi yo.

³² Soco vaha ñáyivi cuvi yo chihin tahan yo. Ta cundahvi cuñi yo nyehe yo chi ñu. Ta saha yo ticahnu iñi chi ñu, tari Nyoo sahá ra ticahnu iñi chi maa yo cha cuenda ra Cristo.

5

Yoso caa tahán chi coo ñáyivi yihí cuenda Nyoo

¹ Yucuan chaha nanducu yo cuhva coo yo tari cuhva iyó maa Nyoo. Vatyí sehe ra cuvi chi yo. Ta cuñi xaan ra chi yo.

² Vita cuvi iñi yo. Cuñi yo chi tahan yo, tari ra Cristo cuñi ra chi yo. Ta tari noo mbee luhlu cha tuhva tata sutu cachaha ra chi Nyoo ta cha naha, tyicuan caa chaha cuenda ra Cristo chi ra cha cuenda yo. Ta si xaan cuñi Nyoo cha cuenda cha chaha cuenda ra chi ra.

³ Soco vityin cha cuvi yo ñáyivi yihí cuenda Nyoo, ña tahán chi sacuvi yo cha quiñi caa chihin coño ñuhu yo. Ni ña tahán chi cha cahán yo cha quiñi caa. Ta ni ma nyiyo iñi yo.

⁴ Ma cahan yo tuhun cha chahá ticahan nuu. Ni ri ma cahan yo noo tuhun cha ñima ri tuhun. Vatyí ña tahán chi cahan yo cha tyicuan caa. Soco cha nuu cha cahán yo cha ña tahán chi, na nacuhva yo tyahvi nyoo chi Nyoo.

⁵ Vatyí cha chitó yo vatyí tandihí ñu cha sacuvi cha quiñi caa, ma quihvi ñu nu nyacá ñaha ra Cristo chihin Nyoo. Ra iyó chihin ñusihi ta ñima ñasihi ra cuvi, o ñu iyó chihin rayi ta ñima yi ñu cuvi, ñu nyiyó iñi, ma quihvi ñu nu nyacá ñaha Nyoo. Vatyí cha nyiyó iñi yo tari cha sacahnú yo xitohyo cuvi cuan. Vatyí tavá xiin yo chi Nyoo.

⁶ Ma cuhva yo cha sandavi ñaha ñáyivi chi yo chihin tuhun cha ña ndicha, tuhun cha ñima ri tuhun. Vatyí tachí tuñi Nyoo chi ñu cha ña quichahá chi ra.

⁷ Ta ni ma cutahan yo chihin ñu cuan.

⁸ Vatyí chiyo yo nu ñaa iñi quivi cuan. Soco vityin iyó yo nu ndichin chihin Nyoo. Cachi coo yo tari tahán chi coo ñu chitó tuhun Nyoo.

⁹ Vatyí Nyoo sacundichín ra añima yo tacuhva cuvaha añima yo ta sacuvi yo cha vaha ta cha ndicha.

¹⁰ Saniñi yo cutuhva yo cuhva tahán iñi Sutu Mañi yo.

¹¹ Ma sacuvi yo cha nyacuvi ñu nyicú nu ñaa iñi. Vatyí ñahri cha vaha ñihí ñu chihin cuan. Soco sacoto yo chi ñáyivi tyi ña vaha cuan.

¹² Vatyí cahán nuu yo cha cahán yo tuhun cha nyacuvi ñu cuan cha xehe ri.

¹³ Soco quivi quita cha ñohó xehe nu ndichin, tyicuan ta cucoto yo cha ndicha. Vatyí cha ndichin Nyoo sanatuví tandihí cha ñohó xehe.

¹⁴ Yucuan chaha iyó nu catyí chi:

Yoho cha quixun, ndicuita mahñu nu nyicú ñu chihí chiña.
Ta ra Cristo cusacata ra ñuhu nu cuahún, catyí chi.

15 Yucuan chaha s̄aha yo cuenda cuhva iyó yo. Ta ma coo yo tari noo ra soho. Coo yo tari noo ra chitó.

16 Ma sacunaa yo quiví yo. Na cahan yo tuhun Nyoo chihin ñáyivi. Vatyí vityin quíñi xaan caa ñáyivi iyó yo, ta ña naha ca iyó yo.

17 Yucuan chaha ma tondo xaan cohon iñi yo. Soco n̄andichi xiñi yo cuhva cuñí maa Sutu Mañi yo tyi sacuvi yo.

18 Ma coho yo ndixi. Vatyí ican cuan sativí chi yo. Soco cuhva yo na cunyaca ñaha vaha Tatyí li Nyoo añima yo.

19 Cahan yo chihin tahan yo soco chihin cha sacahnú yo chi Nyoo. C̄ata yo salmo cuenda ra. C̄ata yo yaa cha chahá Tatyí li chi yo. Sacahnu yo chí Sutu Mañi yo chihin cha tandihí añima yo.

20 Tyicuan ri n̄acuhva yo tyahvi nyoo chi Nyoo Sutu yo cha cuenda tandihí maa, vasi s̄i cuñí yo, vasi nyehé yo tindoho. N̄acuhva yo tyahvi nyoo chi ra chihin sivi Sutu Mañi yo Jesucristo.

Na coo vaha yo chihin tahan yo cuenda ra Cristo, catyí ra Pablo

21 Quichaha yo nu cahán inga tahan yo cuenda ra Cristo. Vatyí sahá yo ñáyivi chi ra Cristo.

22 Nyoho ñu iyó ȳi quichaha ndo cha cahán Sutu Mañi yo. Ta tyicuan caa tucu quichaha ndo nu cahán ȳi ndo.

23 Vatyí raȳi ican ra cuví nuu chi ñasihí ra, tari cuhva cuví ra Cristo nuu chi ñu yihí cuenda ra. Ta suri maa ra sacacú ra chí yo cha cuví yo coño ñuhu ra.

24 Soco tari tahán chí cha quichahá ñu yihí cuenda ra Cristo chí ra, tyicuan caa cuñí tucu chí cha quichahá ñusihí tandihí cha catyí ȳi ñu.

25 Ta raȳi cuñí chí cha cuñí ra chí ñasihí ra, tari cuñí ra Cristo chí yo cha yihí yo cuenda ra. Ta chah̄a ra ñáyivi ra cha catyí yo.

26 Tacuhva vatyí sandund̄i ra añima yo. Nd̄i añima yo vatyí nacatȳa ra quiví cha nachino iñi yo tuhun cahán ra ta condutȳa yo.

27 Ndoq̄ añima yo tari ndoq̄ noo sahma, ña yacua ca chí, ña t̄iyi ca chí. Vatyí ra Cristo sandund̄i ra chí yo cha cuví yo ñu yihí cuenda ra. Tacuhva cuví nacuhva cuenda ra chí yo chí Nyoo, soco vaha yo, ñahri ca cuatyí yo.

28 Ta tyicuan caa tucu cuñí chí cha cuñí raȳi chí ñasihí ra, tari cha cuñí ra chí coño ñuhu ra. Vatyí tatu cuñí ra chí ñasihí ra, tari cha cuñí ra chí maa ra cuví cuan.

29 Vatyí yori noo yo cha ña cuñi nyehe yo chí coño ñuhu yo. Soco sacachí yo ta sacuihnó yo chí coño ñuhu yo. Ta ra Cristo suri tyicuan caa sacuví ra chihin ñu yihí cuenda ra.

30 Vatyí coño ñuhu ra cuví yo. Ta noo noo yo cuví yo suhva coño ñuhu ra ta yiquí ra.

31 Catyí tuhun Nyoo: “Raȳi sandoó ra chí sutu ra ta chí sihi ra. Ta ndu ñ̄n ri ra chihin ñasihí ra. Ta noo ri nanduví ñu.”

32 Ta yuhu catyí vatyí ihya cuví noo tuhun xehe cha cahnu xaan. Ta cuñí chí catyí tyi ra Cristo ndu ñ̄n ri ra chihin ñu yihí cuenda ra.

33 Ta s̄iin ri cuñí tucu chí catyí vatyí tahan tahan ndo cuñí ndo chí ñasihí ndo, tari cuñí ndo chí maa ndo. Ta nyoho cha cuví ndo ñusihí, s̄aha ndo ñáyivi chí ȳi ndo.

6

¹ Nyoho cha cuví ndo sehe, tahán chi cha tyasoho ndo nu cahán sutu ndo ta sihi ndo. Vatyí cuñí ndo chi Nyoo.

²⁻³ Nu tutu Nyoo nyaá cha xihna ri sacuvi yo ta nañihi yo cha cucuhva Nyoo chi yo. Cattyí chí: “Saha ndo ñáyivi chi sutu ndo, chi sihi ndo. Tyicuan caa ta sii xaan cuacoo ndo. Ta naha xaan cuacoo ndo ñáyivi ihya”, cattyí Nyoo.

⁴ Ta nyoho cha iyó sehe ndo, ma nanducu ndo cha cuxaan sehe ndo. Soco sañaha ndo tuhun Nyoo chi ñu, ta yoso caa quichaha ñu chi ndo ta chi Nyoo.

⁵ Ta nyoho cha cuví ndo musu, quichaha ndo chi chitoho ndo siqui ñuhu ñáyivi ihya. Saha ndo ñáyivi chi ñu. Quichaha ndo chi chitoho ndo chihin cha ñi ñi ndo. Tatu sacuví ndo tyicuan caa, chi ra Cristo quichahá ndo cuví cuan.

⁶ Ma saha tyiño ndo cuhva cha nyehe ri chitoho ndo tacuhva vatyí cattyí ñu tyi vaha ndo. Soco saha tyiño vaha ndo tari cha vatyí sacuví ndo tyiño nuu ra Cristo. Ta tyicuan caa sacuví ndo cuhva cuñí Nyoo chihin cha ñi ñi ndo.

⁷ Chihin cha iyó vaha ñi ndo sacuvi ndo. Tari cha sahá tyiño ndo nuu Sutu Mañi yo ta ñi ñi nuu ñáyivi.

⁸ Vatyí cha chitó yo tyi tahan tahan yo, an cuví ri yo musu, an ñi ñi, soco cutiyiyahvi Sutu Mañi yo chi yo yoso cuhva cha vaha cha chinyacuví yo.

⁹ Ta nyoho cha iyó musu ndo, suri vaha coo ndo chihin musu ndo. Ta ma sayuhvi ndo chi ñu. Vatyí chitó ndo tyi ña cahnu ca maa ndo cha nuu musu ndo. Inuu ri cuví ndo nuu Nyoo ra cuví chitoho yo nya andivi. Vatyí maa ra ña cachi ra chi yo.

Tunyeeyi ñi cha chahá Nyoo chi yo cha yihí yo cuenda ra

¹⁰ Ta vityin sandunyeeyi yo ñi yo chihin cha ñi ri cuví yo chihin Sutu Mañi yo. Vatyí iyó xaan tunyeeyi ñi chi ra.

¹¹ Ta tari noo sindaro sahá cuenda ra chi ra, tyicuan caa tucu yoó, ñasaha cuenda vaha yo chi yo chihin tandihí cha cuví tyinyeyi Nyoo chi yo. Tyicuan caa ta cuví chasaha yo chi cuihna. Vatyí nducú xaan ra cuhva sandavi ñaha ra chi yo.

¹² Tyicuan caa coo yo chihin tunyeeyi ñi Nyoo. Vatyí ñi ñi chihin ñáyivi cañi tahan yo. Soco cañi tahan yo chihin tatyí ña vaha cha ña nyehé yo. Vatyí ican cuan cuví cha nyacá ñaha chi ñáyivi cha nyacuví cha quíni caa.

¹³ Yucuan chaha saha cuenda vaha yo chi yo chihin tandihí cha cuví tyinyeyi Nyoo chi yo, tacuhva cuví chasaha yo chi ra ña vaha ñáá quivi nducu tiin ra chi yo. Coto cana cava yo saha ra.

¹⁴ Tari noo sindaro ñihi nanyaá ra chihin noo sincho yihí chichi ra, tyicuan caa ñihi cuñanyaa yo chihin tuhun cha ndicha vaha. Tari cacú noo sindaro vatyí tyaá ra noo caa pecho ra, tyicuan caa Nyoo cusacacu ra chi yo ndaha ra ña vaha, tatu maa ri cha vaha sacuvi yo.

¹⁵ Ta tari natyihí sindaro bota chaha ra ta nyatú tuhva ra cha cahun ra cuatyí, tyicuan caa cuatu tuhva yo chihin tuhun Nyoo. Na sacoto yo chi ñáyivi yoso caa nicoo vaha ñu chihin ra.

¹⁶ Ta tari sindaro chasí ra chi ra chihin noo caa tacuhva ma nañi nduva chi ra, tyicuan caa cuñí chi nachino vaha ñi yo chi Nyoo tacuhva cha cuví chasaha yo tandihí cha sacuvi ra ña vaha chi yo.

¹⁷ Ta tari sahá cuenda sindaro xiñi ra chihin noo caa, tyicuan caa nacuhva cuenda yo chi yo chi Nyoo, na sacacu ra chi yo. Ta naquehen yo tuhun cha

chahá ra chi yo. Vatyí tari noo mityí Tatyí Ii ra cuví tuhun cuan. Vatyí chihin tuhun ra sahá ganaa yo chi cuihna.

¹⁸ Ta nyita ri cahan yo chihin Nyoo. Ta Tatyí Ii ra cuatyinyee chi yo tacuhva cacan tahví yo chi ra. Ta cuacu ndahví yo nuu ra. Ta tyicuan caa cuatu tuhva ri yo. Ta ma ndu uvi iñi yo. Tyicuan ri cacan tahví yo cha cuenda tandihí ñu yihí cuenda Nyoo.

¹⁹ Ta nacuatu tucu ndo chahi, tacuhva vatyí ñihi que tuhun cahin. Ta ma yuhví sacote tuhun ra Cristo chi ñáyivi. Vatyí ta cha naha ña chito ñáyivi tuhun ra.

²⁰ Ta cha cuenda cha sacoté tuhun ra Cristo ñohí vehe caa ihya vityin. Soco Nyoo tachí chii vatyí cahin tuhun ra chihin ra nyicú vehe caa ihya. Cacan tahví ndo cha cuende, tacuhva cuví cahin chihin cha ña yuhví, tari cuhva tahán chi cahin.

Tachí ra Pablo chi ra Tíquico tyi cuhun ra nu nyicu ñu

²¹ Ta ra Tíquico yañi yo, cunacatyí ra tandihí tuhun chi ndo. Maa ra ñi iñi ra sahá tyiño ra cuenda Sutu Mañi yo. Ta cuñi xaan yo chi ra.

²² Tachí chi ra nu nyicú ndo tacuhva sacoto ra chi ndo yoso caa iyó ndi ihya, tacuhva nduní ca iñi ndo chino iñi ndo chi Nyoo.

²³ Ta Nyoo Sutu yo ta Sutu Mañi yo Jesucristo nacuhva ra cha taxi ri coo añima tandihí ra yañi yo. Ta na cuhva Nyoo cha chinó vaha iñi ra chi ra. Ta vityin suri Nyoo nacuhva ra cha cuñi ca ra chi ra ta chi ñáyivi.

²⁴ Ta na nasoco ra chi tandihí yo cha nyita ri cuñi yo chi Sutu Mañi yo Jesucristo chihin cha ñi iñi yo. Ta nacuvi chi tyicuan caa.

Carta Cha Sacuhun Ra Apóstol Pablo Chi Ñáyivi Ñuu Filipos Cha Yihí Cuenda Nyoo

Ñohó ra Pablo vehe caa, ta tyaá ra noo carta chi ñu yihí cuenda Nyoo ñuu Filipos

¹ Yuhu ra Pablo ta ra Timoteo sacuví ndi tyiño nuu ra Jesucristo. Ta tyaá ndi carta ihya chi tandihí ndo cha cuví ndo ñu ñuu Filipos cha yihí cuenda Nyoo. Ta chi ra cayihí ndaha vehe ñuhu, ta chi ra canyehe tyiño vehe ñuhu, ta chi tandihí ndo.

² Na nasoco Nyoo Sutu yo ta Sutu Mañi yo Jesucristo chi ndo. Ta nacuhva ra cha taxi ri coo añima ndo.

Nu chicán tahvi ra Pablo chaha ñu yihí cuenda Nyoo ñuu Filipos

³ Tahan ri cha nichón iñi chi ndo, nacuhvá xain tyahvi nyoo chi Nyoo cha cuenda ndo.

⁴ Ta chicán tahvi chi Nyoo cha cuenda ndo chihin cha sñi cuñí añime.

⁵ Vatyí nyata quiví xihna ri cha chiñi ndo tuhun ra Cristo ta nya vityin ta ña sandihí ndo tuhun cha tyinyeé ndo chii. Vatyí ñin ri tuhun ra Jesucristo sacotó yo chi ñáyivi.

⁶ Quiví naquehen cuenda Nyoo añima ndo, maa ra chaha tunyee iñi chi ndo, na sacuví ndo tyiño nuu ra. Ta chité tyi tyicuan ri cuacuhva ra chi ndo nyacua nya quiví quichi ra Cristo inga chaha.

⁷ Tahan chi cha caca xiñi tyehe caa cha cuenda ndo, vatyí cuñí xain chi ndo. Vatyí ñin ri nasocó Nyoo chi yo. Vasi ñohí vehe caa, o vasi nanyaí nuu ra cuví tyiño, soco sacoté tuhun Nyoo chi ra canyicú vehe caa ihya, ta chi ra cuví tyiño, na cacoto ra tyi ndicha tuhun ra Cristo.

⁸ Nyoo chitó ra vatyí cuñí xain chi tandihí nyoho tari cuñí ra Jesucristo chi ndo.

⁹ Ta chicán tahvi xain chi Nyoo na cuvita ca iñi ndo, ta cuñi ca ndo chi ñáyivi. Ta suri coo ca cha chiñi tuñi Nyoo chi ndo,

¹⁰ Tacuhva vatyí tyicuan ri coto ndo nacachi ndo cha vaha ca. Ta tyicuan caa ta cachi coo ndo ta ma coo ca cuatyí ndo quiví quichi ra Cristo.

¹¹ Maa ra cutyinyee ra chi ndo. Ta tyicuan ri cusacuví ndo maa maa ri cha vaha, ta cha ndaa. Tyicuan caa ta cusacahnu ñáyivi chi Nyoo tyi cahnu xaan ca cuví maa ra ta sacuví ra tyicuan caa chihin ndo.

Maa maa ri tyiño Nyoo sacuví ra Pablo vatyí ñohó ra Cristo añima ra

¹² Ta cuñí tyi coto ndo yañi vatyí tandihí cha cuví chii tyinyeé xaan chi chii nu cahín tuhun Nyoo chihin ñáyivi.

¹³ Vatyí chitó tandihí sindaro vehe rey ta tandihí inga ñáyivi ihya vatyí ñohí vehe caa cha cuenda cha nyiquén chi ra Cristo.

¹⁴ Ta cuaha xaan ra yañi yo cuenda Sutu Mañi yo cuní ca iñi ra cha cuenda cha ñohí vehe caa. Ta naá cha yuhvi ra vatyí cachitó ra vatyí tyinyeé Nyoo chi yo. Ta ñihi ca cacahán ra tuhun Nyoo chihin ñáyivi.

¹⁵ Ta ndicha vatyí yihí ra, cahán ra tuhun ra Cristo soco cha cuenda cha tasi cuñí ra nyehé ra chii, o cuñí ra na cunyicon ñáyivi chi ra. Soco yihí ra cahán ra tuhun ra Cristo chihin ñáyivi, soco chihin cha vaha chicá xiñi ra.

¹⁶ Yihí ra cacahán ra tuhun ra Cristo cha cuenda cha cuñí ra chi ra. Vatyí chitó ra vatyí maa Sutu Mañi yo quichi nyaca ra chíi ihya. Vatyí cotyiño ra chíi, ta sacoté chí ñáyivi tyi ndicha cha sacacú ra añima yo.

¹⁷ Soco inga ra cuan ñima cha ñii ñii ra cahán ra tuhun ra Cristo, soco cuñí ra cuhva ra tisihi chíi nu ñohí vehe caa ihya.

¹⁸ Soco cha cuenda chí yuhu ñahri saha, vasi sacuvi ra chihin cha vaha chicá xiñi ra o chihin cha ña vaha. Soco tuhun ra Cristo ican casacotó ra. Ta sii xaan cuñí cha cuenda cuan.

¹⁹ Ta cusii ca ñii vatyí chité vatyí chichi cha tandihi cha cuví chíi, Nyoo cuasacacu ra chíi. Tyahvi nyoo chí Nyoo vatyí chicán tahvi xaan nyoho cha cuende nuu Nyoo. Ta tyinyeé xaan Tatyí Ii ra Cristo chíi.

²⁰ Chitó vahi vatyí Nyoo cutyinyee ra chíi cha ma cucahan nui, ta ma yuhvi cahín chihin cha ñii ñii tuhun ra Cristo. Ñahri cuende, an coo que ñáyivi, an cúvi, soco cuñí vatyí vityin ta ityi nuu ca saha ñáyivi cuenda cuhva iyé ta coto ñu tyi ra Cristo cahnu ca cuví ra.

²¹ Vatyí cha cuenda yuhu tatu iyé, sacuvi tyiño nuu ra Cristo ihya siqui ñuhu ñáyivi. Soco tatu cúvi, cuñihi cha tyaqui cha iyó andivi.

²² Soco tatu iyó que, vaha xaan. Vatyí sahá tyiño que cha cuenda cha vaha maa Sutu Mañi yo. Yucuan chaha ña chité nya ityi cuhin, an cuhin ityi andivi, an cuhin cucahan que tuhun Nyoo chihin ñáyivi, ña chité.

²³ Yii xaan cote nya cha cuñí, vatyí iyó quivi cuñí cha coo que. Soco iyó quivi ña cuñí. Vatyí cha cuñí cunuhi cucunyai chihin ra Cristo. Vatyí vaha ca cuan.

²⁴ Soco cha cuenda cha vaha chí nyoho, vaha ca cha ndoi chihin ndo.

²⁵ Yucuan chaha chité vatyí cundoí suhva ca ñáyivi ihya. Vatyí cuñí chí cha tyinyeé que chí ndo tacuhva cuvi cuhun ca ndo ityi nuu ca ta cu sii cuñí ndo chihin cha chinó ñii ndo chí Nyoo.

²⁶ Ta quivi cunyehe nu nyicu ndo, tyicuan caa ta cuvi cusii ca ñii yo cha ñin ri cuví yo chihin ra Cristo.

²⁷ Cuñí chí cha coo yo yoso cuhva tahán chí coo noo ñu yihí cuenda Nyoo. Vasi nyaí chihin ndo, o cañi nyaí, soco cuñí cote tuhun ndo vatyí nyoho vaha cuahan ndo chihin Nyoo. Ta ñin ri sahá tyiño ndo tacuhva nachino ñii ñáyivi tuhun ra Cristo.

²⁸ Ta ma yuhvi ndo ñáá cha sacuvi ñu xaan ñii chí ndo cuenda tuhun Nyoo. Vatyí cha tyicuan caa, cachi xaan sañahá chí chí yo vatyí cunaa ñu. Ta sañahá tucu chí chí yo vatyí cha cacú añima yo sahá maa Nyoo.

²⁹ Vatyí tari chahá ra Cristo ityi chí yo cha chinó ñii yo chí ra, tyicuan caa tucu chahá ra cha nyehé yo tindoho cha cuenda ra.

³⁰ ñin ri cuhva nyehé yo tindoho ta sacotó yo tuhun ra Cristo, ta cha chitó ndo yo caa nyehi tindoho, ta vityin suri chitó ndo vatyí ña sañé cha sahá tyiño tuhun Nyoo.

2

Tyayii xaan ra Cristo, soco quichi cúvi ra tari noo ra ndahvi

¹ Ndicha vatyí ra Cristo sanii xaan ra ñii yo cha ñin ri cuví yo chihin ra. Ta vaha cuñí yo cha cuenda cha cuñí ra chí yo. Ta ndicha tucu vatyí nyaá Tatyí Ii Nyoo chihin yo. Ta ndicha tucu cha ndahvi cuñí yo nyehé yo chí tahan yo.

² Tatu ndicha tandihi ihya, cuhva ndo cha cusii cuñí chihin cha ñin ri cuví ndo. Ta cuñí ndo chí tahan ndo tari cuñí ra Cristo chí ndo. Ta ñin ri cuhva caca xiñi ndo. Ta ñin ri cuhva sacuvi ndo.

³ Ma sacuvi ndo cha vaha chi maa ri maa ndo, soco sacuvi ndo cha vaha chi ñáyivi ñandihí. Ta ma cahnu saha ndo chi ndo. Ndahví saha yo chi yo. Ta tahan tahan yo saha yo tuhun vatyi vaha ca inga ñáyivi ta ñima ca maa yo.

⁴ Ta tahan tahan yo caca xiñi yo cha cuenda cha vaha chi inga ñáyivi, ta ñima cha vaha chi maa ri maa yo.

⁵ Caca xiñi ndo tari chicá xiñi ra Jesucristo.

⁶ Vasi cuví ra Nyoo,

soco ña cahnu saha ra chi ra ta ña quichí cuvi iñi ra cha sacahnú ñáyivi chi ra, tari sacahnú ñu chi Nyoo Sutu ra.

⁷ Soco sandoq ra tandihí tunyee iñi ra ta tandihí cha tyayii ra iin chiyo xiin.

Ta quichí nanduví ra noo ñáyivi ndahvi quívi cacú ra siqui ñuhu ñáyivi.

⁸ Ta ndahvi saha ra chi ra, vatyi nanduví ra noo rayii ri.

Ta chihin cha iyó vaha iñi ra ta quichaha vaha ra chi Nyoo nyacua chaha ra cha cahñi ñáyivi chi ra.

Tari noo ra quiñi iyó saha ñu chi ra, vatyi nu cruzi chihí ra.

⁹ Yucuan chaha Nyoo sacahnú xaan ra chi ra.

Ta chahá Nyoo noo sívi chi ra, noo sívi cha cahnu xaan ca cuví nuu tandihí maa sívi.

¹⁰ Vatyi tacuhva tatu cuiñi yo sívi ra Jesucristo, tandihí yo ta cuiñi chiti yo. tandihí cha iyó andivi.

Ta tandihí cha iyó siqui ñuhu ñáyivi, ta chichi ñuhú, cucuiñi chiti ta sacahnú chi ra.

¹¹ Vatyi tandihí cha iyó ta nacoto nuu vatyi ra Jesucristo cuví ra nyacá ñaha chi tandihí maa cha iyó.

Tyicuan caa cunyehe chi tyi cahnu xaan ca cuví maa Nyoo Sutu yo.

Ñu yihí cuenda Nyoo cuví ñu tari noo cha ndichin siqui ñuhu ñáyivi ihya

¹² Yañi, cuñi xain chi ndo. Ta tari cha quichaha ndo chii quívi chinyai chihin ndo, quichaha tucu ndo chii vityin cha cañi nyaí. Nducu xaan ndo cuhva na nyehe ñáyivi tyi ndicha cha sacacú Nyoo chi ndo. Ta saha ndo cuenda cuhva coo ndo chihin ra.

¹³ Vatyi maa Nyoo sacacú cha vaha ñima ndo. Ta tyinyeé ra chi ndo tacuhva vatyi quichi cuvi iñi ndo quichaha ndo nu cahán ra, ta sacuvi ndo cuhva cuñi ra.

¹⁴ Tatu cuasacuvi ndo ñáa cha cuasacuvi ndo, nducu ndo cuhva cha ma coo tisihi, ta ma cañi tahan ndo.

¹⁵ Tyicuan ta ma coo ni noo cuatyí ndo. Cuví ndo noo ñáyivi cachi iyó, cuví ndo ñáyivi ñahri cuatyí, tari tahán chi coo ñáyivi cuenda Nyoo mahñu ñáyivi quiñi iyó ihya. Cuñi chi cha cuví ndo tari noo ñuhu cha sandichín nu ñaa iñi siqui ñuhu ñáyivi ihya.

¹⁶ Cahán yo tuhun Nyoo chihin ñáyivi vatyi ican cuan chahá ñáyivi chaa cha iyó yo. Sacuvi ndo tyicuan caa, tyicuan ta quívi cuquichi ra Cristo, yuhu vaha coo iñi cha cuenda nyoho, vatyi ña sacotó cahi tuhun Nyoo chi ndo.

¹⁷ Ta vasi cahñi ñáyivi chi yuhu, cha catyi tuhun Nyoo, soco sii xaan cuñi ta cuñi cusii cuñi ndo chihin vatyi tyicuan caa sacañá tahn cha cucuhva cuenda yo chi Nyoo, cha cuenda cha chinó iñi ndo chi ra.

¹⁸ Ta tahán chí cha cusii iñi tucu nyoho chihin yuhu ñandihí.

Nu tachí ra Pablo chi ra Timoteo ta ra Epafrodito nu nyicu ñu yihí cuenda Nyoo ñuu Filipos cuan

19 Tatu Sutu Mañi yo ta cuñi ra cutachi chi ra Timoteo quichi nyehe ra nu nyicú ndo. Ta quivi ndichi ra nu nyaí cucusi# xaan cuñi. Vatyí cunacatyí ra chii yoso caa nyicú ndo.

20 Vatyí noo tuhun ri maa ra chicá xiñi ra cha cuenda cha vaha chi maa ndo tari chicá xiñi yuhu. Ta yori yóo ca ra chicá xiñi tyicuan caa.

21 Vatyí tandihí ca ra, maa maa ri cha cuenda chi maa ra nanducú ra. Ta ña nanducú ra yoso caa cuhva cuñi ra Jesucristo.

22 Chitó ndo vatyí ra Timoteo, vaha cuahan ra chihin Nyoo, ta cha cuenda chi yuhu cuví ra tari noo sehi. Ta tyinyeé xaan ra chii cha cahán ndi tuhun ra Cristo chihin ñáyivi.

23 Ta nyaá sacuhin chi ra nu nyicú ndo. Soco nya coto xihne ñáa catyí ra cuví tyiño, tatu ña naha ca ñohí.

24 Vatyí chitó vahi tyi Sutu Mañi yo numi ri cuhva ra cha cuhin cunyehe nu nyicú ndo.

25 Ta vaha cha cunuho ra Epafrodito yañi yo nu nyicu ndo. Tachí ndo chi ra vatyí quichi tyinyee ra chii nu tyiño sahí. Ta tñn tahan xaan ndi chihin ra ña vaha cha cuví ndi sindaro ra Cristo.

26 Ta cuñi xaan ra Epafrodito cunuho ra nu nyicú ndo, vatyí chicá xaan xiñi ra cha chitó ndo tyi cuhví ra.

27 Vatyí ndicha cuhví xaan ra ta cha yatyin maa cha cuví ra. Soco Nyoo cundahví cuñi ra nyehe chí ra, ta chí yuhu ñandihí. Ta ña chahá ra cha cuví ra. Ña cuñi ra cha coo ca tucuihya iñi chii.

28 Yucuan chaha yuhu cuñi xain cha ndichi ra nu nyicú ndo. Vatyí chité tyi nyoho cundusi# xaan cuñi ndo cha nanyehe ndo chí ra. Tyicuan ta ma caca ca xiñi tuhun ndo. Vatyí cha nanyehé ndo chí ra tyi iyó vaha ra.

29 Yucuan chaha vaha ñaquehen ndo chí ra chihin cha si# cuñi ndo, vatyí yañi yo cha cuenda maa Sutu Mañi yo cuví chí ra. Ta tyicuan ri saha ndo ñáyivi chí yañi yo cha iyó tari caa cuhva iyó ra.

30 Vatyí cha yatyin maa cha cuví ra cha cuenda cha sacuví ra tyiño ra Cristo. Soco ña yuhví ra vasi cuví ra cha cuenda cha tyinyeé ra chii. Vatyí maa ndo ña cuví quichi tyinyee ndo chii vatyí cañi xaan nyicu ndo.

3

Nu sañahá ra Pablo yoso caa ndu ndi# yo nuu Nyoo

1 Ta vityin yañi, cusí iñi ndo chihin Sutu Mañi yo. Cha cuenda chí yuhu ñahri sahá cha cha yaha tyai# tuhun ihya chí ndo, cutyaa tiqui inga chaha. Vatyí cha vaha chí maa ndo cuví.

2 Saha ndo cuenda chí ndo chihin ra cha quiñi iyó chiña. Nyacuví ra cuhva cuñi ra ña vaha. Vatyí catyí ra tyi cuñi chí sacuví yo costumbre circuncisión ta cacu yo.

3 Soco yóo noo circuncisión cha ndicha savahá Nyoo chí yo. Vatyí maa yo sacahnú yo chí ra chihin Tatyí Ii ra cha ñohó añima yo. Ta cusí cuñi yo vatyí cuenda maa ra Cristo Jesús yihí yo. Ta ña itá iñi yo tyi cacu yo chihin cha sacuví yo costumbre.

4 Tyehe ta cuví cacu yo chihin cha sacuví yo, yuhu vihi ca caquí cha nuu tandihí ñu sacuví tyicuan caa.

5 Vatyí uña quivi ta saha ñu circuncidar chii. Vatyí tata ra Israel vachi. Ta tata ra Benjamín sehe ra Israel cuví. Ta tata ñu cahán sahan hebreo cuví.

Yucuan chaha yuhu hebreo cuví. Ta siin ri quichahá xain ley chahnu quiví cuan, vatyi fariseo cuví.

⁶ Ta cha cuenda cha cuñi quichahí ley, ta chican nyicon xain chi ñu yihí cuenda ra Cristo. Ta ña cuñi nyehí chi ñu. Ta quichahí tandihí maa ley chahnu, vatyi nducú xain cuhva quichahí nu cahán ley cuan.

⁷ Soco tandihí cha cuñi mai vatyi vale xaan quiví cuan, vityin ña vale ca cuan. Vatyi maa ra Cristo cuví ra itá ñi.

⁸ Ta siin ri tandihí cha sacuví, chitó mai vatyi ña vale cha cuenda cha chicohón nui chi ra Cristo Jesús, Sutu Mañi yuhu. Vatyi yucuan cuví cha tyayii xaan ca. Ta cha cuenda ra Cristo tandihí cha sacuví ta ityi chata ca cuví chi noo cha ñima ri tuhun vityin. Yucuan chaha sandoj ñn chiyo xiin tandihí cuan. Vatyi cuñi cohon nuu que chi ra Cristo.

⁹ Ta cha cuñi yuhu nacu ñn ri que chihin ra. Vaha iyé cha cuenda tyi chinó ñi tyi sacacú ra chi yo. Ñima cha cuenda cha quichahí ley Nyoo ta vaha iyé, soco cha cuenda vatyi chinó ñi tuhun cahán ra, vatyi sacacú ra chi yo. Ta cha cuenda cha chinó ri ñi yo, ra Cristo naquehén cuenda ra chi yo.

¹⁰ Cha cohon nuu que chi ra Cristo yucuan cuví cha cuñi. Nyoo sanandoto ra chi ra Cristo chihin tunyee ñi ra. Ta cuñi tyi coo ca tunyee ñi cuan chí. Ta cuñi cunyeí tándoho cha tahán chi nyehí. Ta cuñi cha cúvi tandihí cha ña vaha cha cuñi coño ñuhi, tari chihí ra Cristo cha catyi cuatyí yo.

¹¹ Vatyi nanducú xain cuhva cha cunandote noo ñayiví chaa chihin Nyoo nya andiví.

Cuhun ca yo ityi nuu ca chihin Nyoo

¹² Ñima tyi catyí chi ndo tyi ñahri ca cha cumañi chii, ta vaha xain. Soco cuahin ityi nuu ca. Vatyi cuñi naquehin cha chahá ra Cristo chii. Vatyi xihna ca maa ra naxita ra chí ityi ra.

¹³ Yañi, ña catyí chi ndo tyi cha ñihí tandihí cha vaha cuan. Soco sanaí ñi cha quichi ityi chata. Ta sañihí cuhin ityi nuu ca.

¹⁴ Tacuhva tyi chaí nu nyaá cha tahán chi chii. Vatyi caná Nyoo chi yo nya andiví. Vatyi cunaquehen yo cha catyí ra chi yo vatyi cuhva ra cha cuenda cha ñn ri cuví yo chihin ra Cristo Jesús.

¹⁵ Tyehe caa tahán chi caca xiñi tandihí yo cha ñihí nyaá yo chihin Nyoo. Soco tatu ñima tyehe caa chicá xiñi nya noo nyoho, Nyoo cucuhva ra cha cutuñi ñi ndo.

¹⁶ Soco noo ri tyi cuñi chi cha quichahá vaha yo tuhun cha cha yaha sacoto Nyoo chi yo.

¹⁷ Yañi, quehen ndo cuhva iyé ta cuhva cahín. Ta saha ndo cuenda chi ñu iyó tari cuhva sañahá ndi chi ndo.

¹⁸ Vatyi ticuñi chaha catyí chi ndo, saha ndo cuenda chi ra cuendu. Ta vityin catyí tiqui chi ndo inga chaha chihin cha chaquí cha cuihya ñi, vatyi cuaha xaan ra xaan ñi chi ra Cristo. Vatyi catyí ra tyi noo cha ña ñiñi xaan cuví cha chihí ra Cristo nu cruzi.

¹⁹ Soco quiví quichi tucu ra Cristo, cuhun coyo ra cuan anyaya. Vatyi sacuví ra cuhva cuñi coño ñuhu ra. Ta cahnú sahá ra chi ra chihin cha tahán chi coo ticahan nuu nuu ra. Ta itá ñi ra maa maa ri cha iyó ihya ñayiví ri.

²⁰ Soco yoó nya andiví nyaá ñuu yo. Ta suri ityi cuan nyatú yo chi Sutu Mañi yo Jesucristo, ra sacacú chi yo.

21 Ta cuquehen ra coño ñuhu pehe yo. Ta cusananduvi ra chi yo tari coño ñuhu maa ra. Ta chihin tunyee iñi cha iyó chi ra cha nyacá ñaha ra tandihi, cusacuvi ra tyicuan caa.

4

Tyicuan ri na cusii cuñi yo chihin Sutu Mañi yo

1 Yañi, cuñi chi ndo. Ta cuñi xain nyehi chi ndo. Ta sii xaan cuñi chihin ndo. Ta chité tyi ña cahán cahi tuhun Nyoo chihin ndo. Vatyí níi xaan iñi ndo nyicón ndo chi ra. Na cuinyaña ca ndo chi Nyoo chihin cha níi iñi ndo.

2 Ta vityin chiquén chi cu Evodia, ta chi cu Síntique, nanduvaha coo ñu chihin tahan ñu. Ta na coo ñu tari cha cuhu ñu cuenda Sutu Mañi yo.

3 Yoho, yañi, níi iñun sahá tyiñon chihin, ta chiquén chuun na tyinyeun chi ñu tahan yo ihya. Vatyí tyinyee xaan ñu chii chihin cha sacoto ñu tuhun Nyoo cha cacu añima yo chihin ra Clemente ta suhva ca ñu ñandihí. Ta nyaá sivi ñu nuu tutu Nyoo nya andivi.

4 Ta tyicuan ri maa cusii iñi ndo chihin Sutu Mañi yo. Ta catyí tiqui chi ndo inga chaha, na cusii iñi ndo chihin ra.

5 Ta tandihí ñáyivi na nyehé ñu chi nyoho vatyí ndicha noo ñáyivi vaha cuví ndo. Ta ñicohon iñi ndo vatyí cha nyaña yatyin quivi quichi Sutu Mañi yo.

6 Ta ma ndahvi xaan cuñi ndo ñáá ndihí cha cuví chi ndo. Nyita ri ñacatyí ndo chi Nyoo ñáá ndihí cha cuví chi ndo. Ta çacan tahvi ndo chi ra ñáá ndihí cha chiñuhú chi ndo. Ta yaha cuan ta nacuhva ndo tyahvi nyoo chi ra.

7 Ta cha sacuvi ndo tyehe caa, Nyoo cuhva ra cha taxi ri coo añima ndo. Ta cahnu xaan ca cha vaha cuví cuan. Ta ni noo ñáyivi ta ña cuví cutuñi iñi ñu yoso cuhva cha cahnu cuan. Ta cha taxi maa Nyoo cusaha cumi añima ndo ta cha chiñi tuñi xiñi ndo. Vatyí in ri cuñi ndo chihin ra Cristo Jesús.

Na caca xiñi yo maa maa ri cha vaha

8 Yañi, nu ndihí tuhun çaca xiñi ndo maa ri cha ndicha vaha, cha cachi iyó, cha ndoo iyó, cha ndii, cha ñahri cha quiñi caa, cha tyaqui, cha vaha. Çaca xiñi ndo maa maa ri maa cha vaha tacuhva cuví sacahnu yo chi Nyoo.

9 Sacuvi ndo cha sañahí chi ndo. Tuhun cha chiñi ndo cahin, cha nyehé ndo chinyacuví, sacuvi ndo. Ta Nyoo ra chahá cha taxi coo añima yo, cucunyaa ra chihin ndo.

Tyinyeé ñu Filipos chi ra Pablo chihin cha iyó chi ñu

10 Sii xaan cuñi. Ta sacahni chi Sutu Mañi yo cha cuenda cha tyinyeé ndo chii inga chaha. Ta chité vatyí tyicuan ri cuñi ndo tyinyeé ndo chii. Soco ña chaha chi cuhva chi ndo.

11 Ñima tyi catyí chi ndo tyehe caa ta cuñi ndo tyi iyó cha chiñuhú chii, vatyí yuhu cha cutuhve cha cusii cuñi chihin ñáá ri cha iyó chi.

12 Vatyí yuhu chité yoso caa coo ndahvi ta chité yoso caa coo tyayi. Vatyí cha cutuhve coi chihin cha iyó o chihin cha ñahri cha cachi, o tatu nyacua ndoo ca, o tatu ñahri tucu, ndoi vaha.

13 Tandihí ta cuví chasahí vatyí maa ra Cristo cuví ra tyineé chii.

14 Soco nyoho yañi vaha xaan cha tyinyeé ndo chii chihin tindoho cha nyehé xain.

15 Cha chitó nyoho ñu Filipos yoso caa cuví quivi quichaha cahin tuhun Nyoo chihin ndo. Ta quite Macedonia chiña tyi cuasacote tuhun Nyoo inga ñuu. Ta noo tuhun ri nyoho tyinyeé ndo chii chihin xuhun, vatyí vaha xaan cuñi ndo cha cahin tuhun Nyoo chihin ndo.

¹⁶ Ta siin ri cha ni ri ca cha chinyai Tesalónica, cuaha ri chaha tyinyee ndo chii.

¹⁷ Nima cha chicá xiñi cha cuenda cha cuhva ca ndo chii, soco cha cuñí vatyí nyoho coo ca cha vaha chi ndo nuu Nyoo.

¹⁸ Ta vityin cuhva, ñahri cha cumañi chii. Nyacua ndoó ca cha sacuhun ndo chii chihin ra Epafrodito. Ta cha chaha ndo cuan cuacuví chi tari noo xico vixi, xico vaha cha chaá nuu Nyoo. Yucuan cuví cha tahán iñi ra.

¹⁹ Ta Nyoo cuhva ra tandihí cha chiñuhú chi ndo. Cha cuenda ra Cristo cucuhva ra tandihí cha vaha cha tyay# cha cumí ra nya andivi.

²⁰ Chi Nyoo Sutu yo na sacahnu yo tyicuan ri maa. Ta na cuvi chi tyicuan caa.

Sacuhún ra Pablo nocumi chi ñu Filipos

²¹ Chahí nocumi chi tandihí ndo cha yihí ndo cuenda ra Cristo chiña. Ta vachi tucu nocumi chi ndo sahá yañi yo cuenda Nyoo cha nyicú chihin ihya.

²² Ta ñáyivi cha nyicú vehe ra nyacá ñaha ñuu Roma ihya, ta tandihí ca ñu yihí cuenda Nyoo ñuu ihya chahá ñu nocumi chi ndo.

²³ Ta na nasoco maa Sutu Mañi yo Jesucristo chi tandihí ndo. Ta na cuvi chi tyicuan caa.

Carta Cha Sacuhun Ra Apóstol Pablo Chi Ñáyivi Ñuu Colosas Cha Yihí Cuenda Nyoo

Nu sacuhún ra Pablo noo tutu chi ñáyivi ñuu Colosas cha yihí cuenda Nyoo

¹⁻² Yuhu ra Pablo cuví noo apóstol ra Jesucristo. Vatyí tyicuan caa cuhva cuñí maa Nyoo. Yuhu chihin ra Timoteo yañi yo, tyaá ndi noo carta ihya chi ndo ñu ñuu Colosas cha yihí vaha cuenda Nyoo ta cuenda ra Cristo. Nyoo Sutu yo nasoco ra chi ndo ta nacuhva ra cha taxi ri coo añaíma ndo.

Nu chicán tahvi ra Pablo chaha ñu yihí cuenda Nyoo ñuu Colosas

³ Tyicuan ri cha chicán tahvi ndi chaha ndo. Ta nacuhvá ndi tyahvi nyoo chi Nyoo Sutu Sutu Mañi yo Jesucristo cha cuenda ndo.

⁴ Vatyí ñihí ndi tuhun vatyí chinó xaan iñi ndo chi ra Cristo Jesús. Ta cuñí xaan ndo chi tandihí ñu cha yihí cuenda ra.

⁵ Tyicuan caa sacuví ndo vatyí chitó vaha ndo vatyí cucoo ndo chihin Nyoo nya andivi. Nya quivi chiñi ndo tuhun Nyoo cha ndicha vaha, quihí iñi ndo vatyí sacacú ra Cristo añaíma ndo.

⁶ Ta suri maa tuhun ra Cristo cha cahān ra Epafras chihin ndo, ican cuan chityá tandihí ri ityi tari chityá tucu nu canyicú ndo. Ta cuaha ñáyivi nacuhvá cuenda ñu chí ñu chí Nyoo, tari nacuhvā cuenda nyoho chí ndo ñandihí. Ta cuhva cha chiñi ndo tuhun ra Cristo, ta chitó ndo vatyí ndicha vaha cha cuñí Nyoo chí yo.

⁷ Ican ihya sañaha yañi yo ra Epafras chi ndo. Vatyí ñin ri tuhun Nyoo sahá tyiño ndi chihin ra. Ta ican ra cuví ra sacuví tyiño nuu ra Cristo cha cuenda ndo.

⁸ Maa ra sacoto tuhun ndo chí ndi, vatyí cuñí xaan ndo chí tahan ndo. Vatyí maa Tatyí Ii Nyoo chahá cha vaha coo añaíma ndo.

⁹ Yucuan chaha nyacua nya quivi chitó ndi tuhun ndo ta ña sandihí ndi tuhun cha nacuatú ndi chaha ndo. Ta chicán ndi chí Nyoo nacuhva ra cha chiñi tuñi ra chí ndo cha cuenda Tatyí Ii ra. Ta cuacutuñi iñi ndo tacuhva coto vaha ndo ñáá ndihí cha cuñí Nyoo tyi sacuví ndo.

¹⁰ Tyicuan caa ta cuví coo ndo tari cuhva tahán chí coo ñu yihí cuenda Nyoo. Ta na sacuví ndo tari cuhva cuñí maa ra. Tacuhva sacuví ndo tandihí nuu cha vaha ta cohon nuu vaha ca ndo chí ra.

¹¹ Ta chicán tucu ndi vatyí na sandunye ca ra chí ndo chihin tunyee iñi cahnu ra vatyí cuví cunye ndo tandihí cuii chihin cha cama iñi ndo.

¹² Ta chihin cha sii cuñí ndo, ta nacuhvá ndo tyahvi nyoo chí Nyoo Sutu yo, vatyí chahá ra cha coo ndo noo ñáyivi chaa. Vatyí natavā ra chí ndo nu quiñi caa, ta nanyitā ndo nu ndichin nu nyacá ñaha ra chí tandihí ñu yihí cuenda ra. Ta cuhva ra tandihí cha vaha cha tahán chí chí ñu yihí cuenda ra.

¹³ Nyoo tavā ra chí yo nu ñaa iñi ta nacuhvā cuenda ra chí yo chí ra Cristo vatyí cunyaca ñaha ra chí yo. Vatyí ican ra Cristo cuví Sehe Nyoo. Ta cuñí xaan Nyoo chí ra.

¹⁴ Nasatā Nyoo chí yo chihin ñiñi ra Cristo ta saha ra tucahnu iñi cuatyí yo.

Nduvaha iyó yo chihin Nyoo cha cuenda cha chihí ra Cristo cha catyi cuatyí yo

15 Nyoo, ña nyehé yo chi ra. Soco nanduvj ra ñáyivi tacuhva cuví cohon nuu yo chi ra. Ta ican ra cuví Cristo Sehe Nyoo. Nya ta ni cumañi ca chingo ñáyivi ta cha iyó maa ra Cristo.

16 Ta Nyoo chahá ra tyi savahá maa ra Cristo tandihi cha iyo andivi ta siqui ñuhu ñáyivi. Ta savahá ra cha cuví nyehe yo ta cha ña cuví nyehe yo. Savahá ra ángel. Ta savahá ra chi ra ña vaha ta chi tatyí ña vaha ñandihí. Ta tandihí cha nyacá ñaha siqui ñuhu ñáyivi ihya, maa ra savahá. Ta tandihí ihya chingo chi tacuhva cotyiño ra yoso kuhva cuñi maa ra.

17 Ra Cristo cha iyó maa ra nya ta ni cumañi coo tandihí maa cha iyó. Ta tyicuan ri chahá ra cha conyito tandihí maa cha savahá ra.

18 Ta maa yo cha yihí yo cuenda ra Cristo, in ri cuví yo chihin ra. Cuví yo coño ñuhu ra. Ta maa ra Cristo, cuví xiñi yo, vatyí maa ra cuví nuu chi yo. Ta ican ra cuví cha nandotó cha xihna ca. Yucuan chaha cuví ra nuu chi tandihí cha iyó.

19 Vatyí maa Nyoo cuñi ra tyi coo tandihí tunyee iñi ra chi ra Cristo.

20 Ta cuñi tucu ra vatyí cha cuenda ra Cristo ta nicoó vaha tandihí cha iyó chihin ra. Yucuan chaha chahá Nyoo cha chihí ra Cristo. Ta chatí niñi ra nu cruzi. Vatyí cuñi ra cha nicoó vaha tandihí cha iyó siqui ñuhu ñáyivi ta andivi chihin ra.

21 Ta nu quichí chi, xaan cuví iñi ndo chi Nyoo kuhva cha chica xiñi ndo cha cuenda cha ña vaha cha chinyacuví ndo.

22 Soco Nyoo sanicoó vaha ra chi ndo chihin ra vatyí tachi ra chi Sehe ra, ra Cristo vatyí quichí cuví ra nu cruzi. Ta nyehe ra tindoho chihin coño ñuhu ra ta chihí ra, tacuhva vatyí kuhva cuenda ra chi ndo chi Nyoo, soco ñahri ca cuatyí ndo.

23 Yucuan chaha cuñi chi vatyí sañihí ca ndo chinó iñi ndo. Ta ma sandihí ndo cha yihí iñi ndo tuhun ra Cristo cha chihí ndo tyi cusacacu ra añima ndo. Ican tuhun ihya, cuví cha cacahán ra nicacahnu ñáyivi. Ta sacuvi Nyoo vatyí yuhu ra Pablo tyinyeí cahín tuhun ihya chihin ñáyivi.

Nu catyí ra Pablo vatyí nyaá siqui ra cha sañahá ra tuhun ra Cristo tandihí ri vehe ñuhu

24 Vityin cusí cuñi cha cuenda cha nyehí tindoho chihin coño ñuhi cha catyí ndo. Vatyí cha tyicuan caa sacañá tahin tindoho cha nyehe ca ra Cristo cha cuenda yo cha cuví yo coño ñuhu ra.

25 Yuhu cuví noo ra cahán tuhun ra Cristo vatyí tyicuan caa tyinyeí chi tandihí ñu yihí cuenda ra. Vatyí maa Nyoo catyí ra vatyí cahin tandihí tuhun ra cha cuenda cha vaha chi ndo.

26 Sañahí tuhun cha ñoho xehe nya ta tyembu chahnu, nya ta ni cumañi ca chino ñáyivi. Nyoo chicumi xehe ra. Soco vityin cuñi ra cha coto tandihí cuii maa ñu yihí cuenda ra.

27 Ta chi ñu cha ñima ñu Israel cuví tari nyoho, cuñi Nyoo sacotó ra noo tuhun vaha xaan, noo tuhun xehe chi ndo. Ta tuhun xehe cuan ican cuví ihya, vatyí ra Cristo ñohó ra añima ndo cha yihí ndo cuenda ra. Ta cha cuenda maa ra cuñihí ndo gloria nu cunyaa yo chihin Nyoo.

28 Tuhun maa ra Cristo cahán ndi. Ta chahá ndi tuhun chi tandihí ñáyivi. Ta sañahá ndi chi ñu tandihí cha chihí tuñi, tacuhva cuahnu ñu ta nyacua nya cha ñahri ca cumañi chi ñu cha in ri cuví ñu chihin ra Cristo.

29 Yucuan chaha tyi ní iñi sahá tyiñe chihin tunyee iñi ra Cristo ta ñihí xaan chotyíño tunyee iñi cuan chii.

2

1 Vatyí cuñí cha coto ndo vatyí chicá xiñi cha cuenda ndo. Ta chicán tahvi xain cha cuenda tandíhi ndo ta cha cuenda ñu Laodicea, ta tandíhi inga ñu cha ta nyehe ca chii.

2 Chiquén chi Nyoo na cuní ca iñi ndo, ta cu ñn ri ndo chihin cha cuñí ndo chi tahan ndo. Ta cutuñi vaha ca iñi ndo yoso caa cohon nuu ca ndo chi ra Cristo. Vatyí ican ra cuví tuhun cumí xehe Nyoo ta cha naha. Soco vityin sacotó ra chí yo tuhun ihya.

3 Maa ra Cristo chahá ra tandíhi cha vaha ta cha chiñi tuñi chi yo. Tatu ñohó nuu yo chí ra Cristo, ñohó nuu yo chí Nyoo.

4 Catyí chi ndo tyehe caa tacuhva cha ma sandavi ñaha ñáyivi chi ndo chihin tuhun tyaqui.

5 Vasí ña nyaí chihin ndo, soco cohon iñi ndo vatyí ñohó iñi tuhun ndo. Ta sii cuñí nyehi chí ndo. Vatyí vaha xaan cuhva cuahán iyó ndo. Ta ñi xaan iñi ndo cuahan ndo chata ra Cristo.

6 Yucuan chaha tari chinó iñi ndo chí noo tuhun ri maa ra Cristo quívi nañihí ndo chí ra, tyicuan caa cuñí tucu chí coo ndo ta ñn ri cuví ndo chihin ra.

7 Ta cuinyaña ca ndo chí ra. Ta quíhi vaha yoho ndo chihin ra. Ta saní ca ndo iñi ndo chihin cha chino iñi ndo, tari cuhva sañaha ñu chí ndo. Ta nyita ri nacuhvá ndo tyahvi nyoo chí Nyoo.

Ñáyivi chaa cha chahá ra Cristo chí yo

8 Saha ndo cuenda vatyí iyó ñáyivi cuñí ñu sandavi ñaha ñu chí ndo chihin tuhun cha ndichí ri maa xiñi ñáyivi, tuhun cha ña ndicha. Vatyí ñima chí ra Cristo chinó iñi ñu cuan. Noo costumbre ri nyicón ñu cuan. Ta nyicón ñu chí cha nyacá ñaha siqui ñuhu ñáyivi ihya.

9 Soco cha sañahá ñu cuan, ñima cha ndicha cuví. Vatyí Nyoo ta tandíhi cha cahnu cuví ra, tandíhi cuan ta nyaá chihin ra Cristo. Vatyí maa ra Cristo cuví Nyoo.

10 Ta cha nyaá ra Cristo chihin ndo, tyitú aña ndo chihin Nyoo. Ta ra Cristo ican ra cuví ra nuu chí tandíhi ángel ta tatyí cuihna cha nyacá ñaha.

11 Quívi nañihí ndo chí ra Cristo, quíhvi ra aña ndo. Ña nduvahá ndo nuu Nyoo chihin costumbre circuncisión cha itá xaan iñi ra Israel. Maa ra Cristo sacuachiyó tandíhi cha ña vaha cha tuhva ndo sacuvi. Saha ra circuncidar aña ndo cuví cuan soco ñima chihin ndaha ra.

12 Quívi condutya ndo chichi ndutya, tari quívi chíhi ndo chihin ra Cristo cuví cuan. Tyicuan ta quita ndo chichi ndutya, tari quívi nandoto ndo chihin ra Cristo, vatyí chinó iñi ndo tyi Nyoo chihin tunyee iñi ra sanandoto ra chí ra Jesús.

13 Nu quichí chí ña ñoho nuu ndo chí Nyoo. Vatyí sacuvi xaan ndo cuatyí. Ta cuví ndo tari noo ñáyivi chíhi chihin cuatyí cuan. Ta ña saha ñu circuncidar chí ndo. Soco vityin Nyoo saha ra tcahnu iñi tandíhi cuatyí ndo. Ta chahá ra cha coo ndo noo ñáyivi chaa chihin cha ñn ri cuví ndo chihin ra Cristo.

14 Sanatuví ley chahnu cuan cuatyí yo. Ta catyí chí tyi tahán chí chun yo anyaya vatyí ña quichahá yo chí chí. Soco ley cuan Nyoo sacuachiyó ra quívi chíhi ra Cristo nu cruzi.

15 Quívi cha chíhi ra nu cruzi cuví chasaha ra chí cuihna ta chí tandíhi tatyí ña vaha cha nyacá ñaha. Chihin nuu tandíhi maa ángel Nyoo sacotó ra vatyí cahnu ca cuví maa ra ta ñima ca cuihna.

Nu chahá ra Pablo tuhun tyi nanducú yo cha vaha cha chahá Nyoo

16 Yucuan chaha ña tahán chi quihí yuhu ñáyiví chi yo cha cuenda cha chachí yo o cha chihí yo, o cha cuenda cha ña naquehén vaha yo noo quiví vico. Cuví ri quiví cha natyacu yoo, o cuví ri quiví nyitatu yo.

17 Tandihí cuan cuví chi tari noo xiñahñu ri cha cuquichi ityi nuu. Ta vityin cha quichí ra Cristo ta ican ra cuví ra cha ndicha vaha sacacu chi yo.

18 Ma cuhva ndo cha casi ñáyiví nu naquehen ndo noo cha cuacuhva Nyoo chi ndo. Maa ñu ndahvi sahá ñu chi ñu soco ña ndicha ñu, ta sacahnú ñu chi ángel. Ta sahá ñu tyi ñyehe ñu cha sañaha Nyoo chi ñu. Ta cahnu sahá ñu chi ñu chihin cha chicá xiñi ñu tuhun ñáyiví ihya.

19 Ñu cuan ñima chi ra Cristo ra cuví xiñi nyicón ñu. Yucuan chaha nyacuví ñu tandihí cuan. Soco yoó cha nyicón yo chí ra, maa ra cuví nuu chi yo. Ta sandu ín ri ra chi yo chihin ra. Ta sacuhnú ca ra chi yo chihin tunyee ñi ri ra tari cuhva cuñí maa Nyoo.

20 Tari quiví chihí coño ñuhu cuatyí ndo chihin ra Cristo cuví cuan. Ta ña nyacá ñaha ca tuhun ñuhu ñáyiví ihya chi ndo. ¿Ñáá tuhun cha iyó ca ndo tari caa iyó ñáyiví cha ña ñohó nuu Nyoo? Ta quichahá ca ndo cha cahán ñu cha sacuví costumbre cuan.

21 Vatyí catyí ñu chi ndo tyehe caa: “Ma tñun ihya chihin ndahun, ma cachun ihya. Coto ma cacun”, catyí ñu.

22 ¿Ñáá tuhun cha quichahá ca ndo tuhun cahán ñu cuan? Vatyí maa maa ri cha ndichí xiñi ñáyiví cuví. Vatyí nyayu noo cha ñin yaha ri cuví. Ma tiví ndo nuu Nyoo cha cuenda cha cachi ndo.

23 Ndicha vatyí costumbre ihya tari maa cha vaha cuví, cuñí maa ñáyiví. Vatyí sanyehé ñu tindoho coño ñuhu ñu. Ta cuñí ñu tyi vaha sacahnú ñu chí Nyoo tatu sacuví ñu tyicuan caa. Soco ña chaá cuan nuu Nyoo. Vatyí ma cuví tinyaa cuan cha quíñi caa cha cuñí coño ñuhu ñu.

3

1 Chahá Nyoo noo ñáyiví chaa chi yo vatyí nandoto ra Cristo. Ta vityin nyaá ra chiyo vaha Nyoo andiví. Yucuan chaha na nducu yo cha vaha cha chahá Nyoo chi yo nya andiví.

2 Caca xiñi ndo cha vaha cha chahá Nyoo chi yo nya andiví. Ta ma caca xaan xiñi ndo tuhun cha iyó siqui ñuhu ñáyiví ihya.

3 Vatyí nyoho cha yaha chihí ndo in caa ri chihin ra Cristo. Ta vityin iyó ndo in ri chihin ra chihin Nyoo.

4 Ta quiví quichi tucu ra Cristo, ra chahá ñáyiví chaa cha iyó ndo, tyicuan ta cunyehe ñáyiví tyi cahnu xaan ca ra cuví maa ra. Ta cunanyehe tucu ñu chí nyoho in caa ri chihin ra. Ta cutahan tucu maa ndo quichi ndo nu tyaqui cuan chihin ra.

Yoso caa chiyo yo costumbre nu quichi chi ta yoso caa cuñí chi coo yo chihin Nyoo vityin

5 Yucuan chaha cuñí chi cha nanducú yo cuhva na cúvi tandihí cha quíñi caa cha quichí cuví ñi coño ñuhu yo. Ta ni noo yo ta ma coo ri maa yo chihin ñusihi o chihin rayi. Ta ma sacuví yo cha ña vaha cha cuñí coño ñuhu yo, o inga cha ña vaha. Ta ma nyiyo ñi yo cha tyayi. Vatyí tari cha sacahnú yo xitohyo, o tavá xiin yo chí Nyoo cuví cuan.

⁶ Cha cuenda tandihí cha ña vaha cuan cuxaán xaan Nyoo chihin ñu cha ña quichahá nu cahán ra. Ta cutachi tuñi ra chi ñu vatyi sacuví ñu cha ña vaha cuan.

⁷ Ta suri tyehe caa chinyacuví tucu maa ndo quiví ña ñohó nuu ndo chi Nyoo.

⁸ Soco vityin ma sacuví ca yo tandihí cha ña vaha cuan. Ma cuxaan ca yo. Ma cahan uhví ca yo chí tahan yo. Ta ma cahan cuehe yo chí tahan yo. Ta ma cahan ca yo cha quiñi caa. Ma quita tuhun quiñi caa yuhu yo.

⁹ Ma ñii ca yo cuendu. Vatyi quiví ta ityi chata ca, quiví ña ñohó nuu yo chí Nyoo, tyicuan caa chinyacuví yo. Soco vityin ña nyacá ñaha ca tandihí cuan chí yo.

¹⁰ Vatyi ñayiví cha iyó yo vityin, ñayiví chaa cuví. Noo ñáyiví chaa nanduví yo. Ta nduchaá ca yo tari cuhva caá Nyoo, ra savaha chí yo, nyacua nya cohon nuu vaha yo chí ra.

¹¹ Ña niñi cha cuví yo ñu Israel, an ñu Grecia, an ñu inga ñuu. Ta ña niñi cha sacuví yo costumbre circuncisión, an cha ma sacuví yo. Cuví ri yo noo ra chiñi tuñi o cuví ri yo noo ra soho. Cuví ri yo ra iyó chitoho, o cuví ri yo ra yori nyacá ñaha chí yo, ña niñi xaan ca tuhun cuan. Niñi ca cha ñin ri cuví tandihí yo chihin ra Cristo, vatyi maa ra cuví tandihí.

¹² Nyoo cuñi ra chí yo ta nacachí vaha ra chí yo vatyi cuví yo ñáyiví chí ra. Yucuan chaha na coo yo ñayiví chaa tari tahán chí coo ñu yihí cuenda ra. Na cundahví cuñi yo nyehé yo chí tahan yo. Na cuví yo ñáyiví vaha. Ndahví saha yo chí yo. Na cumasu iñi yo. Cunyee yo tandihí tisihi tindoho chihin cha sii cuñi yo.

¹³ Na cucama iñi yo chihin noo noo tahan yo. Ta saha yo ticahnu iñi chí tahan yo tatu ñáa cha sacuví ñu chí yo. Tari sahá ra Cristo ticahnu iñi chí yo, tyicuan caa cuñi chí cha sacuví tucu maa yo.

¹⁴ Ta siin ri cuñi yo chí tahan yo. Ta nducu yo cuhva coo vaha yo chihin ñu. Vatyi ican cuan cuví cha sacu ñin ri chí yo. Ta ican cuan cuví cha niñi ca.

¹⁵ Ta cha taxi maa Nyoo na coo añima yo. Vatyi ra Cristo nyacá ñaha chí yo. Nyoo nacana ra chí yo vatyi tacuhva ñin ri cuví yo cuenda ra Cristo. Ta tyicuan ri ñacuhva yo tyahví nyoo chí ra cha cuenda ihya.

¹⁶ Ta tuhun ra Cristo na sacutu añima yo. Sañaha ca yo tuhun ra chí tahan yo. Ta sanii ca yo iñi tahan yo chihin cha chiñi tuñi Nyoo. Saçahnu yo chí Nyoo chihin cha cata yo yaa, o salmo. Ta cata yo yaa cha chahá maa Tatyi Ii Nyoo chí yo chihin cha nii añima yo. Ta tyicuan ri ñacuhva yo tyahví nyoo chí Nyoo.

¹⁷ Tatu ñáa tyiño sahá yo, o ñáa tuhun cahán yo, sacuví yo soco tari cha tyi tyiño maa Sutu Mañi yo Jesús sacuví yo. Ta ñacuhva yo tyahví nyoo chí Nyoo cha cuenda maa ra Cristo.

Chahá ra Pablo tuhun yoso caa nducú yo cuhva coo vaha yo chihin ñáyiví

¹⁸ Nyoho cha iyó yii ndo, cuhva ndo cha cunyaca ñaha yii ndo chí ndo. Vatyi yucuan cuhva tahán chí coo ndo, vatyi yihí ndo cuenda Sutu Mañi yo.

¹⁹ Ta nyoho rayii, cuñi ndo sehe quichaha ndo chí ña.

²⁰ Nyoho cha cuví ndo sehe quichaha ndo chí sutu ndo ta chí sihi ndo. Vatyi yucuan cuhva cuñi maa Sutu Mañi yo.

²¹ Nyoho cha cuví ndo sutu ta sihi, ma cahan xaan ndo chí sehe ndo, vatyi coto nducuihya iñi chí.

²² Ta nyoho cha cuví ndo musu, quichaha ndo chi chitoho ndo. Ñima cuhva cha nyehé ri ra chi ndo quichaha ndo chi ra, tacuhva vatyi vaha cuñí ra nyehé ra chi ndo. Soco sacuvi ndo chihin cha tandihi añima ndo. Vasi ña nyehé ra. Vatyi Nyoo nyehé ra chi ndo.

²³ Tandihí ri tyiño sacuví yo, sacuvi yo chihin cha ní iñi yo. Saha yo tuhun tyi tyiño nuu maa Sutu Mañi yo sacuví yo. Ta ñima maa ri maa tyiño nuu ñáyivi.

²⁴ Vatyi chitó yo vatyi maa Sutu Mañi yo cucuhva ra noo cha tahán chi chi yo vatyi sacuví yo tyiño nuu ra Cristo. Vatyi ican maa ra cuví chitoho yo cha ndicha vaha.

²⁵ Soco tatu sacuví yo cha ña vaha, Nyoo cutachi tuñi ra chi yo cha cuenda cha ña vaha cha sacuví yo. Ta tandihí yo iin ri ñáyivi cuví yo nuu ra. Vatyi Nyoo ña cachi ra ñáyivi cuñí ra.

4

¹ Nyoho cha iyó musu ndo, cuñí chi tyi vaha ñáyivi cuví ndo chihin musu ndo. Nícohon iñi ndo vatyi iyó tucu noo chitoho maa ndo nya andivi. Ta maa ra nyehé ra chi ndo.

² Ta tyicuan ri çacan tahvi ndo chihin cha ní iñi ndo. Ta nacuhva yo tyahvi nyoo chi Nyoo cha cuenda tandihí maa.

³ Çacan tahvi ndo chaha ndi, vatyi nanuña ca Sutu Mañi yo xiñi ñáyivi ta tyasoho ñu tuhun ra Cristo cha cahán ndi nuu ñu. Vatyi tari noo tuhun xehe cuví tuhun ra Cristo chi ñu, vatyi ña chitó ñu tyi ican ra cuví ra sacacú chi yo. Ta cha catyi tuhun ihya ñohí vehe caa.

⁴ Çacan tahvi ndo chahi tacuhva cuví sañahí chi ñu yoso cuhva cuví cutuñi vaha iñi ñu tuhun ra Cristo, tari cuhva tahán chi tyi sacuví.

⁵ Cachi çoo ndo chihin ñu ña ñohó nuu chi Nyoo. Vatyi tyicuan caa ta cuví cahan ndo tuhun Nyoo chihin ñu.

⁶ Cuñí chi vatyi ndatuhún yo maa maa ri cha vaha, ta cha cachi, (ta cha tahán iñi ñáyivi) tari tahán chi cunyacuvi yo cha yihí yo cuenda ra Cristo. Tyicuan ta cuví coto yo yoso caa cunacahan yo tatu ñáá noo tuhun ndacá tuhun ñu chi yo.

Nu sacuhún ra Pablo nocumi chi ñu ñuu Colosas cha yihí cuenda Nyoo

⁷ Ra Tíquico, yañi yo, ra sahá tyiño tyiño Sutu Mañi yo chihin, maa ra cunacatyí ra chi ndo yoso caa cuahán nyaí.

⁸ Yucuan chaha tachí chi ra nu nyicu ndo vatyi nacatyí ra chi ndo yoso caa nyicú ndi. Ta sanduní ca ra iñi ndo.

⁹ Ta chihin ra Tíquico vachi tucu ra Onésimo, yañi yo. Ta nñi iñi ra. Ta cuñí yo chi ra. Cuví ra noo ra ñuu ndo. Maa ra cucanacatyí ra chi ndo tandihí cha cuví nu nyai.

¹⁰ Ra Aristarco, ra tahin cha ñohó ndi vehe caa, saquichí ra nocumi chi ndo. Ta saquichí tucu ra Marcos, yañi cunducuatyi ra Bernabé, nocumi chi ndo. Ta cha sacote chi ndo tuhun ra Marcos. Tatu chaa ra nu nyicu ndo, vaha çahan ndo chihin ra.

¹¹ Vachi tucu nocumi chi ndo sahá ra Jesús, ra cha nañi tucu Justo. Ta chichi cha tandihí ñu Israel cha yihí cuenda Nyoo, uñi tahan ri ra ihya sahá tyiño ra tuhun Nyoo chihin. Ta nduní xaan ca iñi sahá ra.

¹² Vachi tucu nocumi chi ndo sahá ra Epafras, ra ñuu ndo. Ta maa ra sacuví ra tyiño nuu ra Cristo. Tyicuan ri chicán tahvi ra chaha ndo chi Nyoo tyi

nacaca vaha ndo chihin Nyoo. Nacuhva cuenda vaha ndo chi ndo chi Nyoo tacuhva cuvi sacuvi ndo cuhva cuñi ra.

¹³ Ta yuhu cuvi cha ndaa vatyí ra Epafraſ chicán tahvi xaan ra cuenda ndo, ta cuenda ñu cha nyicu nya ñuu Laodicea ta ñuu Hierápolis.

¹⁴ Vachi tucu nocumi chi ndo sahá ra Lucas, ra cha cuvi doctor cha cuñi xaan yo chi. Ta vachi tucu nocumi chi ndo sahá ra Demas ñandihí.

¹⁵ Cuhva ndo nocumi chi yañi yo ta tahan yo cha nyicu ñuu Laodicea. Ta cuhva ndo nocumi chi cu Ninfas ta chi tandihí ñu yihí cuenda Nyoo cha ndu ñin ri vehe ña.

¹⁶ Tatu yaha sacuahá ndo carta ihya, ta sacuhun ndo nu canyicu ñu yihí cuenda Nyoo nya Laodicea na sacuahá tucu maa ñu. Ta sacuahá tucu maa ndo carta cha sacuhin chi ñu Laodicea.

¹⁷ Catyi ndo chi ra Arquipo vatyí na sacuvi vaha ra tyiño cha chahá Sutu Mañi yo chi ra tyi sacuvi ra.

¹⁸ Yuhu ra Pablo saquichí nocumi ihya chi ndo. Ta ma naa iñi ndo cha ñohí vehe caa. Ta Nyoo na nasoco ra chi ndo. Ta na cuvi chi tyicuan caa.

Carta Cha Xihna Ri Sacuhun Ra Apóstol Pablo Chi Náyivi Nuu Tesalónica Cha Yihí Cuenda Nyoo

Nu tyaq ra Pablo ta ra tahan ra noo tutu chi ñu yihí cuenda Nyoo

¹ Yuhu ra Pablo chihin ra Silvano ta ra Timoteo, tyaá ndi tutu ihya chi ndo cha cuví ndo ñu yihí cuenda Nyoo ñuu Tesalónica chiña. Vatyí ñn ri cuví ndo chihin Nyoo Sutu yo ta chihin Sutu Mañi yo Jesucristo. Ta Nyoo Sutu yo ta Sutu Mañi yo Jesucristo na nasoco ra chi ndo. Ta na cuhva ra cha coo cha taxi ri añima ndo.

Vaha xaan chinó iñi ñu Tesalónica cuan chi Nyoo

² Tyicuan ri nacuhvá ndi tyahvi nyoo chi Nyoo cha cuenda tandihí ndo. Ta nyita ri chicán tahvi ndi cha cuenda ndo.

³ Tyicuan ri yihí iñi ndi tuhun ndo nuu Nyoo Sutu yo ta nicohón iñi ndi vatyí nñi iñi ndo chinó iñi ndo chi Nyoo ta sacuví ndo tyiño nuu ra. Ta ñihi sahá tyiño ndo cha cuenda cha cuñí ndo chi ra. Ta chihin cha nñi iñi ndo yihí iñi ndo cha cuañihi ndo cha cuenda ra Jesucristo.

⁴ Vatyí chitó ndi tyi Nyoo nacachí vaha ra chi nyoho yañi. Ta cuñí xaan ra chí ndo.

⁵ Vatyí quivi cahán ndi tuhun Nyoo yoso caa sacacú ra añima yo chihin ndo, ñima chihin tuhun yuhu ri cahan ndi, soco tyinyee xaan Tatyí Ii chi ndi, ta cuaha xaan sacuvi ra chihin tunyee iñi ra. Ta cahan ndi chihin cha chító vaha ndi tyi tuhun ndicha Nyoo cuví. Ta nyehe vaha ndo yoso caa chiyo ndi quivi chinyaá ndi chihin ndo. Tyicuan caa chiyo ndi cha cuenda cha vaha chí maa ndo.

⁶ Ta quichaha iyó ndo cuhva iyó ndi, ta cuhva iyó Sutu Mañi yo. Vatyí natñin cuenda ndo tuhun Nyoo, vasi cuaha tindoho nyehe ndo cha cuenda cuan. Soco sñi xaan cuñí ndo vatyí maa Tatyí Ii chahá tusñi iñi cuan chí ndo.

⁷ Ta cha tyicuan caa, tyinyee xaan ndo chí tandihí ñu yihí cuenda Nyoo nicahnu ityi Macedonia chiña ta nicahnu ityi Acaya ihya ñandihí, vatyí nyehé ñu cuhva iyó ndo chihin Nyoo.

⁸ Nñima ityi Macedonia ta Acaya ri, soco tandihí ri ityi nu chiñí ñu tuhun ndo chító ñu tuhun Sutu Mañi yo ta chító ñu vatyí chinó xaan iñi ndo chí Nyoo. Ta yucuan chaha nyacua ña niñi ca cha cahan ndi tuhun Nyoo chihin ñu.

⁹ Vatyí suri maa ñu nacatyí ñu chí ndi yoso caa cha vaha xaan tñin cuenda ndo chí ndi quivi cuan. Nacatyí ñu yoso caa sandihí ndo tuhun cha sacahnu ndo xitohyo ta quichaha sacuvi ndo tyiño nuu Nyoo nyitó, Nyoo cha ndicha.

¹⁰ Ta nacatyí tucu ñu yoso caa nyatú ndo naquichi tucu ra Jesús Sehe Nyoo inga chaha ityi andívi. Ican ra cuví ra cha sanandotó Nyoo chii. Ta maa ra cuví ra ra sacacú chí yo tacuhva cha ma tachi tuñi Nyoo chí yo quivi sacutuñi ra chí ñáyivi.

2

Tyiño sahá ra Pablo ñuu Tesalónica

¹ Nyoho yañi, chító ndo vatyí ñima cha caha ri chahán ndi chicahan ndi tuhun Nyoo ñuu ndo.

² Vatyí chító ndo yoso caa nyehe ndi tindoho saha ñáyívi ñuu Filipino cha ni cumañi ca chaá ndi ñuu ndo. Ta vasi nyehe xaan ndi tindoho ñuu cuan soco quívi chaá ndi ñuu ndo cahan tucu ndi tuhun Nyoo chihin ndo chihin cha ña yuhví ndi. Ta vasi xaan xaan nanduví ñáyívi ñuu ndo, soco tyinyee xaan Nyoo chi ndi ta sacotó ndi chi ndo yoso caa sacacú ra añima yo.

³ Vatyí tuhun cha chaha ndi chí ndo maa maa ri cha ndicha cuví. Ta ñahri cha quiñi caa chicá xiñi ndi. Ta ni ñima cha cuñí ndi sandavi ñaha ndi chí ndo.

⁴ Ñahri cha ña vaha cahan ndi, vatyí Nyoo nyehé ra chí ndi, ta maa ra tyatyíño ra chí ndi vatyí sacoto ndi chí ndo yoso caa sacacú ra añima yo. Ta yucuan cuví cha cahán ndi tari cuhva tyatyíño ra chí ndi. Vatyí ña cuñí ndi cuvaha ndi nuu ñáyívi, soco nuu Nyoo cuñí ndi cuvaha ndi, vatyí maa ra nyehé ra ñáá cha caa añima yo.

⁵ Ta nyoho chító ndo vatyí ni noo chaha ña cahan ndi chihin tuhun tyaqui cha cuñí ndi sandavi ñaha ndi chí ndo. Ta ni ñima cha cuñí ndi saha ganaa ndi xuhun ta cahan ndi tuhun ihya chihin ndo. Nyoo cuví ra cha ndaa tyi ndicha cha cahín ihya.

⁶ Ta ni noo chaha ña nanducú ndi cuhva cha sacahnu ñáyívi chí ndi, ni nyoho, ni inga ñu. Ndicha, iyó ityi chí ndi cha cunyacá ñaha ndi chí ndo tyi maa ra Cristo tachí ra chí ndi, soco ña cuñí ndi coso ndi síqui ndo cha tyicuan caa.

⁷ Soco cuñí ndi tyinyee ndi chí ndo. Tari noo síhi sacuahnú ña chí sehe ña, sahá cuenda ña chí cue, tyicuan caa cuñí ndi tyinyee ndi chí ndo.

⁸ Cuñí xaan ndi chí nyoho, ta cahvi iñi ndi vatyí ñima tuhun Nyoo ri cuhva ndi chí ndo, soco nyacua nya ñáyívi ndi ñandihí, cha cuenda cha cuñí ndi chí ndo.

⁹ Nyoho yañi, nicohón iñi ndo yoso caa saha tyiño ndi quívi chinyicú ndi chihin ndo. Sahá tyiño ndi ñicahñu ta cha cuaa vatyí ña cuñí ndi coso ndi síqui ni noo ndo cha ni ri ca cha cahán ndi tuhun Nyoo chihin ndo.

¹⁰ Ta nyoho cuví ndo cha ndaa, ta Nyoo ñandihí, vatyí maa ri cha vaha ta cha ndaa chinyacuví ndi quívi chinyaa ndi chihin ndo cha cuví ndo ñu chinó iñi chí ra Cristo. Maa maa ri cuhva cuñí Nyoo chinyacuví ndi, ta ña chaha ndi cuhva vatyí cahan ña vaha ndo síqui ndi.

¹¹ Ta chító tucu ndo yoso caa sanduní ndi iñi noo noo ndo chihin tuhun chaha ndi chí ndo. Sandunyeé ndi iñi ndo tari noo ra chihin sehe ra.

¹² Ta catyí ndi chí ndo nacachi coo ndo tari tahán chí coo ñu yihí cuenda Nyoo. Vatyí maa ra nacana chí ndo vatyí coo ndo nu nyacá ñaha ra, ta nyehe ndo cha tyaqui gloria ra.

¹³ Yucuan chaha tyicuan ri nacuhvá ndi tyahvi nyoo chí Nyoo, vatyí quívi chíñi ndo tuhun ra cha cahan ndi chihin ndo, natíin cuenda ndo vatyí nacotó ndo tyi tuhun Nyoo cuví ta ñima tuhun ñáyívi ri. Ta ndicha cha tuhun Nyoo cuví, vatyí sacuví chí vatyí chino iñi ndo chí Nyoo ta nasama ndo cuhva iyó ndo.

¹⁴ Yaha cuan ta nyehe tucu maa ndo tindoho saha ñáyívi ñuu ndo, tari nyehe tucu ñu yihí cuenda ra Cristo Jesús nicahnu ityi Judea. Tyicuan caa sanyehé tucu ñu Israel ityi Judea cuan tindoho chí ñáyívi tahan yo cuenda ra Cristo cuan.

¹⁵ Ta ican ñu Israel cuan cachahñi chí Sutu Mañi yo Jesús tari cachahñi tucu ñu chí ra profeta, ra cachaha cuenda tuhun cahán Nyoo ta ityi chata ca. Ñu

Israel cuan tava ñehe ñu chi ndi. Ñima cuhva cuñí Nyoo iyó ñu. Ta tasi cuñí ñu nyehe ñu chí tandihí ñáyivi.

¹⁶ Tatu cuñí ndi cahan ndi tuhun Nyoo chihin ñu cha ñima ñu Israel cuví tacuhva cacu ñu, ña chahá ñu Israel cuan cahan ndi. Ta cha cuenda cha chasí ñu nu cahán ndi, cucuaha ca cuatyí ñu. Ta vityin nu ndihí tuhun cutachi tuñi xaan Nyoo chí ñu.

Nu catyí ra Pablo vatyi cuñí ra cunyehe ra nu nyicú ñu Tesalónica inga chaha

¹⁷ Yañi, cha yaha cha quitá ndi ñuu ndo vasi ña naha nyehe ndi chi ndo soco ñohó xaan iñi ndi chi ndo. Ta chihin cha nñi iñi ndi cuñí ndi cunyehe ndi nu nyicú ndo inga chaha.

¹⁸ Ta nducu ndi cuhva cuhun ndi soco ña cuví. Ta yuhu ra Pablo ñandihí, cuaha xaan chaha nduquí cuhva cuhun ndi, soco tahan ri chaha cha cuñí ndi cuhun ndi ta ña chahá ra ña vaha.

¹⁹ Soco ¿yóó chi ita iñi ndi? Ta ¿yóó chi cuenda cusí cuñí ndi, ta vaha cuñí ndi? ¿Atu ñima cha cuenda maa ndo cusí xaan cuñí ndi nuu Sutu Mañi yo Jesucristo quivi quichi ra inga chaha?

²⁰ Vatyi cha cuenda cha vaha cuahan ndo chihin Nyoo ta nyehé yo tyi ña caha ri sahá tyiño ndi. Ta sí xaan cuñí ndi cha cuenda cuan.

3

¹ Ta yucuan chaha ña cunyeé que cha ma cote yoso caa cuahan ndo chihin Nyoo. Ta natyái iñi tyi ndojí nuu Atenas.

² Ta tachí chi yañi yo ra Timoteo na cuhun ra cunyehe ra chí ndo. Maa ra sacuví ra tyiño nuu Nyoo vatyi ñin ri chihin ndi cahán ra tuhun yoso caa cacú añima yo sahá ra Cristo. Tachí ndi chí ra nu nyicú ndo na sanduní ca ra iñi ndo ta sandunyeé ca ra iñi ndo tacuhva vatyi chinó ca iñi ndo chi Nyoo.

³ Tyicuan caa ta ni noo ndo ta ma ndu uvi iñi ndo cha cuenda cha nyehé ndo tindoho. Vatyi nyoho chitó ndo vatyi nyaá yo cha nyehe yo tindoho tyehe caa.

⁴ Vatyi ta ninyaá ca ndi chihin ndo, catyí ndi chí ndo vatyi cha cuñí quichi quivi cha nyehé yo tindoho. Ta chitó vaha maa ndo tyi tyicuan caa cuví.

⁵ Yucuan chaha ña cunyeé que cha cuñí cote tuhun ndo. Ta tachí tyiño chihin ra Timoteo na nyehe ra yoso caa cuhva cuahan chinó iñi ndo chí Nyoo. Vatyi yuhví coto sandavi ñaha cuihna chí ndo ta nandihví tucu ndo nu quiñi caa inga chaha. Vatyi tu tyicuan caa, cucunaa tandihí tyiño sahá ndi nu nyicú ndo.

⁶ Soco vityin cha nachaa ra Timoteo cha chahan ra nu nyicú ndo ñuu Tesalónica chiña. Ta nacatyí ra chí ndi vatyi nñi iñi ndo chinó iñi ndo chí Nyoo. Ta cuñí xaan ndo chí tahan ndo. Ta catyí ra tyi tyicuan ri nicohón iñi ndo chí ndi ta cuñí xaan ndo nyehe ndo chí ndi, tari nyuhu, cuñí tucu maa ndi nyehe ndi chí ndo.

⁷ Yucuan chaha, yañi, vasi cuaha cha cuví chí ndi ta nyehé ndi tindoho, soco vaha xaan cuñí ndi cha chitó ndi vatyi nyoho vaha chinó iñi ndo chí Nyoo ta ña sañá ndo chí ra.

⁸ Tari quivi cha nduchaa ñayivi ndi, cuñí maa ndi cuhva cha nacoto ndi vatyi nyoho ñihi cuahan ndo chihin Nyoo.

⁹ Nyacua ña ñihí ndi cuhva nacuhva ndi tyahvi nyoo chí Nyoo cha cuenda ndo. Vatyi sí xaan cuñí ndi nuu Nyoo cha cuenda vatyi vaha cuahan ndo chihin ra.

¹⁰ Chicán tahvi xaan ndi chi Nyoo ñicahñu ta cha cuaa, vatyi cuñí ndi cuhun ndi cunyehe maa ndi chi ndo. Tyicuan ta cuvi sandunanñi ndi cha chinó iñi ndo.

¹¹ Ta vityin nyatú ndi na tyinyee maa Nyoo Sutu yo ta Sutu Mañi yo Jesucristo tacuhva cuvi cuhun ndi nu nyicú ndo.

¹² Ta na tyinyee ca Sutu Mañi yo Jesucristo chi ndo tacuhva cuñí ca ndo chi noo noo tahan ndo ta chi tandihí ñáyivi tari cuñí nyuhu chi nyoho.

¹³ Tacuhva vatyi cuni ca iñi ndo ta cunduvii ndihí añima ndo. Ta ma coo ca cuatyí ndo nuu Nyoo Sutu yo quívi quichi tucu Sutu Mañi yo Jesucristo chihin tandihí ca ñu yihí cuenda ra.

4

Cuhva cha tahán iñi Nyoo cha coo yo

¹ Vityin yañi, chacú ndahvi ndi nuu ndo ta chahá ndi tuhun chi ndo chihin ndusu yuhu Sutu Mañi yo Jesucristo, na coo ca ndo tari cuhva sañahá ndi chi ndo, cuhva tahán iñi Nyoo. Ta sañihí ca ndo coo ndo tyicuan caa noo noo quívi.

² Nyoho cha chitó ndo yoso caa chahá ndi cuhva chi ndo tari chahá tucu maa Sutu Mañi yo Jesús cuhva chi ndi.

³ Cha cuñí Nyoo, ican cuví ihya: Cha ñacuhva ndihí ndo chi ndo chi ra tacuhva sanduvii ndihí ra añima ndo. Ta ni noo ndo ta ma coo ndo chihin noo ñaha sihi o rayi tatu ñima ñasihí o yíi ndo cuví.

⁴ Ta tahan tahan ndo cuñí chi coto ndo yoso caa coo ndo chihin ñasihí ndo. Coo vii ndo chihin ña chihin cha cuñí ndo chi ña.

⁵ Ñima chihin cha quichi cuvi iñi ndo cha quiñi caa tari nyacuví ñáyivi cha ña ñohó nuu chi Nyoo.

⁶ Ta ni noo ndo ta ma sandavi ñaha ndo chi yañi ndo ta coo ndo chihin ñasihí ra. Vatyi Sutu Mañi yo, ñihí xaan tachí tuñi ra chi ñu sacuví tyicuan caa, tari cuhva catyjí ndi chi ndo.

⁷ Vatyi Nyoo nacana ra chi yo vatyi tacuhva sacuvi yo cuhva cuñí maa ra, ta ñima noo cuhva quiñi caa.

⁸ Ta yucuan chaha yóo ñu cha ña cuñí tyasoho tuhun ihya, ñima tuhun ñáyivi ri ña tyasohó ñu, soco tuhun Nyoo ña tyasohó ñu. Vatyi suri maa Nyoo chahá ra Tatyí li ra chi ndo.

⁹ Soco tuhun cha cuñí yo chi tahan yo, ña chiñuhú cha tyai nu tutu ihya tuhun cuan. Vatyi suri maa Nyoo cha sañahá ra chi ndo vatyi cuñi yo chi tahan yo cuenda Nyoo.

¹⁰ Ta tyicuan caa cuñí ndo chi tandihí tahan yo ñicahnu Macedonia chiña. Soco chacú ndahvi nuu ndo yañi, vatyi na cuñi ca ndo chi ñu noo noo quívi.

¹¹ Nducu ndo cuhva coo vii ndo. Ta ma tyihí ndo chi ndo nu ña tahán chí, soco ñin ri tyiño maa ndo çaça xiñi ndo. Ta saha tyiño ndo chihin ndaha ndo tari cuhva catyjí ndi chi ndo quívi cuan.

¹² Tyicuan caa sacuvi ndo tacuhva vatyi ñáyivi ña ñohó nuu Nyoo cuasaha ñu ñáyivi chí ndo. Ta ñahri cuacumañi chí ndo.

Yoso caa cucuvi quívi quichi Sutu Mañi yo Jesús inga chaha

¹³ Yañi, ña cuñí ndi cha ma coto ndo ñáá cha cuví chí ñáyivi chí, vatyi coto nducuihya iñi ndo tari nducuihyá iñi ñáyivi chí ma tahan chí nyehe chí Nyoo.

14 Ta tari cha chinó iñi yo vatyí chihí ra Jesús ta nandoto ra, tyicuan caa chinó tucu iñi yo vatyí Nyoo cusanandoto ra chi ñu ndiyi cha chinó iñi chi ra.

15 Yucuan chaha catyí ndi chi ndo tari sañaha Sutu Mañi yo chi ndi. Vatyí yoó cha nyitó yo nyacua nya quivi quichi ra, ñima xihna ca yo cuhun ican saha ñu cha yaha chihí.

16 Vatyí suri maa Sutu Mañi yo cunoo xica ra andivi, ta cucana chaa ra vatyí maa ra cuví ra nyacá ñaha. Ta cucana chaa noo ra cuví nuu chí ángel. Ta cunativi trompeta Nyoo. Tyicuan ta ñáyivi cha yihí cuenda ra Cristo ta chihí ñu, xihna ca ñu cunandoto.

17 Yaha cuan ta yoó cha nyitó ca yo cundaa xica yo ñin ri chihin ñu nu vico, nu cunañihi tahan yo chihin Sutu Mañi yo ityi andivi. Ta yucuan ta cucunyaa yo chihin ra tyicuan ri maa.

18 Yucuan chaha sanduní ndo iñi tahan ndo chihin tuhun ihya.

5

1 Soco ama o ñáá quivi cucuvi tuhun ihya, ña ñiñi cha cahin tuhun cuan chihin ndo yañi.

2 Vatyí cha chitó vaha maa ndo vatyí ma tuvi ri iñi yo ta cuchaa quivi quichi tucu Sutu Mañi yo. Vatyí tari cuhva quihvi noo ra suhu vehe ñáyivi cha cha cuaa, tyicuan caa cucuvi.

3 Vatyí quivi cha catyí ñáyivi vatyí vaha xaan iyó ñu, ta ñahri maa cha yuhvi ñu, tyicuan ta sana iñi ñu ta quichi tindoho cuan sigui ñu. Tari noo ñaha sihi cha cuacacu sehe, sana iñi ña ta quihvi cha uhvi chí ña. Ta tyicuan caa cucuvi chí ñáyivi quivi quichi Sutu Mañi yo, vatyí ma cuví cono ñu.

4 Soco nyoho yañi, ñima ca nu ñaa iñi nyicú ndo ta catyí ndo vatyí sana iñi ndo ta cuchaa chí quivi Sutu Mañi yo, tari sana iñi ñáyivi tatu quihvi ra suhu vehe ñu.

5 Vatyí tandihí yo chitó yo yoso caa tahán chí coo yo vatyí Nyoo sandundichin ra añima yo, ta ña iyó ca yo nu ñaa iñi tari ñu ña ñohó nuu Nyoo.

6 Yucuan chaha ma cuví yo tari inga ñu cuan. Tari quivi cha quixí ñu vatyí ña quichahá ñu cha ndichí Sutu Mañi yo. Soco yoó cuatu tuhva yo ta cachi cõo yo.

7 Vatyí ñu quixí, quixí ñu cha cha cuaa, ta ñu chihí xaan ndixi, chiñí ñu cha cha cuaa.

8 Soco yoó cha cuví yo ñu cuenda cha ñicahñu, nacachi cõo yo. Ta tari noo sindaro sahá ra cuenda chí ra chihin noo cha tyaá ra pechu ra, tyicuan caa saha yo cuenda chí yo chihin cha ñi iñi yo chinó iñi yo chí Nyoo, ta chihin cha cuñí yo chí tandihí ñáyivi. Ta tari sindaro sahá cuenda ra xiñi ra chihin noo caa, tyicuan caa cuñí chí cha sahá yo cuenda chí yo chihin cha yihí iñi yo tyi cacu yo.

9 Vatyí Nyoo ña tyaá ra cuhva chí yo vatyí tachi tuñi ra chí yo, soco nacachi ra chí yo vatyí cacu yo cha cuenda Sutu Mañi yo Jesucristo.

10 Vatyí ra Jesucristo chihí ra cha cuenda yo vatyí tacuhva coo yo ñin ri chihin ra. Ñahri saha vasi cha chihí yo o iyó ca yo, soco tandihí yo coo yo ñin ri chihin ra.

11 Yucuan chaha sanduní ca ndo iñi tahan ndo ta sandunye ca ndo iñi ñu, tari cuhva cuahan nyacuví ndo vityin.

Nu chahá ra Pablo tuhun chí ñu

¹² Soco yañi, chacú ndahvi ndi nuu ndo, na saha ndo ñáyiví chi ra sahá tyiño nu nyicú ndo. Vatyí nyisó ra tyiño cuenda Sutu Mañi yo ta chahá ra tuhun chi ndo.

¹³ Cuñí chi cha saha xaan ndo ñáyiví chi ra chihin cha cuñí ndo chi ra. Vatyí sacuví ra tyiño Sutu Mañi yo. Ta vaha ço ndo chihin tahan ndo cuenda Nyoo.

¹⁴ Ta tyatyíño ndi chi ndo yañi, vatyí cuhva ndo tuhun chi ñu cha ña cuñí saha tyiño. Ta sanduní ndo íñi ñu cha ña ñi ca íñi. Ta tyinyee ndo chí ñu vita cuñí vatyí ta chino vaha ca íñi ñu. Ta cucama íñi ndo chihin tandihí ñáyiví.

¹⁵ Saha ndo cuenda coto sacuví ndo cha ña vaha chihin ñu nyacuví cha ña vaha chihin ndo. Nducu ndo cuhva sacuví ndo cha vaha chihin tahan ndo cuenda Nyoo ta chihin tandihí ñáyiví.

¹⁶ Tyicuan ri cusií cuñi ndo.

¹⁷ Ta çacan tahvi ndo tyicuan ri maa.

¹⁸ Naçuhva ndo tyahví nyoo chí Nyoo cha cuenda tandihí cha cuví. Vatyí ícan ihya cuví cha cuñí Nyoo cha sacuví yo cha cuví yo ñu chinó íñi chí ra Cristo Jesús.

¹⁹ Ma ndahva ndo ñuhú Tatyí Ii cha nyaá añima ndo.

²⁰ Ma cuacu nyaa ndo tuhun Nyoo cha cahán noo ra cahán tuhun chahá Nyoo.

²¹ Tíin cuenda ndo tandihí cha cahán ra. Ta naquehen ndo cha vaha.

²² Cuachiyo ndo nuu tandihí cha quiñi caa.

²³ Ta maa Nyoo ra iyó cha taxi ri chí, na sanduvii ca ra añima ndo tacuhva vatyí in ri chí maa ra nacuhva cuenda ndo chí ndo. Ta na cocumi ra añima ndo ta cha chíñi tuñi ndo ta çoño ñuhu ndo tacuhva vatyí ma coo ca cuatyí ndo quiví quichi tucu Sutu Mañi yo Jesucristo.

²⁴ Ra cha nacachí chí ndo, cuví cunyee íñi yo chí ra, vatyí maa ra cusacuví ra tandihí maa ihya.

Nu ndihí cahan ra Pablo ta chahq ra nocumi chí ñu

²⁵ Yañi, çacan tahvi ndo cha cuenda ndi.

²⁶ Ta načuhva ndo nocumi chí tandihí yañi yo cuenda Nyoo.

²⁷ Tyatyíñé chí ndo chihin ndusu yuhu Sutu Mañi yo vatyí saçuaha ndo carta ihya nuu tandihí tahan yo cuenda Nyoo.

²⁸ Ta na nasoco Sutu Mañi yo Jesucristo chí ndo. Ta na cuví chí tyicuan caa.

Carta Cha Cu Uvi Cha Sacuhun Ra Apóstol Pablo Chi Ñáyivi Ñuu Tesalónica Cha Yihí Cuenda Nyoo

Nu tyaq ra Pablo ta ra tahan ra noo tutu chi ñu ñuu Tesalónica cha yihí cuenda Nyoo

¹Yuhu ra Pablo chihin ra Silvano ta ra Timoteo, tyaá ndi noo tutu ihya tyi sacuhun ndi chi ndo cha cuví ndo ñu yihí cuenda Nyoo ñuu Tesalónica chiña. Vatyí ñn ri cuví ndo chihin Nyoo Sutu yo ta chihin Sutu Mañi yo Jesucristo.

²Ta na nasoco Nyoo Sutu yo ta Sutu Mañi yo Jesucristo chi ndo. Ta na cuhva ra cha taxi ri coo añima ndo.

Nu catyi ra Pablo yoso caa cusacutuñi Nyoo chi ñu iyó cuatyí quivi quichi ra Cristo

³Nyoho yañi, tyicuan ri cuñí chi cha nacuhva ndi tyahvi nyoo chi Nyoo cha cuenda ndo, vatyí tyicuan caa tahán chi cha sacuví ndi cha cuenda cha ñihi ca cuahan chinó iñi ndo chi Nyoo noo noo quivi, ta sñn ri cuñí xaan ca ndo chi tahan ndo.

⁴Yucuan chaha sii cuñí ndi cahán ndi tuhun ndo chihin nuu ñu yihí cuenda Nyoo inga ca vehe ñuhu. Vatyí nyoho cama xaan iñi ndo ta vaha xaan chinó iñi ndo chi Nyoo cha ni ri ca yahá ndo tandihí tindoho sanyehé ñáyivi chi ndo.

⁵Ihya sañahá chi yo vatyí vaha cuhva sacutuñi Nyoo chi yo, vatyí nu ndihí tuhun cusaha Nyoo tuhun vatyí naña tucu nyoho quihvi ndo nu nyacá ñaha ra. Vatyí cha cuenda tuhun ra, nyehe xaan ndo tindoho vityin.

⁶Ta cha cuenda chi Nyoo, vaha cha cutiyahvi ra chihin tindoho chi ñu sanyehé tindoho chi ndo.

⁷⁻⁸Ta chi nyoho cha nyehé ndo tindoho sahá ñu, cuhva ra cha nyitatu ndo tari cuhva tucu ra chi nyuhu, quivi cuquichi tucu Sutu Mañi yo Jesucristo nya andivi chihin ángel cha iyó xaan tunyee iñi ra chi, quichi ra chihin ñuhu cha cayú. Vatyí cutachi tuñi ra chi ñáyivi ña ñohó nuu Nyoo, ñu ña quichahá tuhun ra, tyi cuví ra Sutu Mañi yo Jesucristo, ra quichí sacacu chi yo.

⁹Ñu cuan, cundoho ñu ta ma ndihí maa cha ndoho ñu, ta cunaa ñu nuu Sutu Mañi yo Jesucristo vatyí ma nyehe ñu chi ra. Ni ma nyehe ñu ñana cha cahnu cuví ra chihin tunyee iñi ra

¹⁰quivi cuquichi ra. Vatyí quivi cuan ñu yihí cuenda ra cusacahnu ñu chi ra, tandihí ri ñu chinó iñi chi ra. Ta mahñu ñu, ñohó tucu nyoho vatyí chinó iñi ndo cha ndaa cha chahá ndi chi ndo.

¹¹Yucuan chaha tyicuan ri chicán tahvi ndi chaha ndo, na tyinyee Nyoo yo chi ndo tacuhva na saha ra tuhun vatyí naña ndo cha cuví ndo ñáyivi nacachí ra. Ta chicán tahvi tucu ndi chaha ndo na tyinyee ra chi ndo tacuhva cuví sacuvi ndo cha vaha chihin tunyee iñi ra. Ta tandihí tyiño sahá ndo nuu ra cuacacu vaha, suri cha cuenda tunyee iñi chahá ra chi ndo vatyí chinó iñi ndo chi ra.

¹²Tacuhva sacahnu ñáyivi sivi Sutu Mañi yo Jesucristo, vatyí nyehé ñu cuhva iyó ndo. Ta maa ra cusacahnu ra chi ndo nuu ñáyivi cha cuenda tumañi iñi cha chahá Nyoo chi ndo cha cuenda ra.

2

Ra cha ñahri maa ley Nyoo iyó chi

¹ Ta cha cuenda quiví cuquichi Sutu Mañi yo Jesucristo nu cusandu ñi ri ra chi yo, cuñi cahin vityin, nyoho yañi. Vatyí chacú ndahví nuu ndo,

² ma yatyí xaan cutondo xiñi ndo. Ni ma nayuhví ndo vatyí nyacua nya tatyí ñavaha ta cucatyí chí chí ndo vatyí cha chaá quiví Sutu Mañi yo, ta nyacua nya ra cahán tuhun Nyoo ta cucatyí ra vatyí cha chaá quiví cuan, ta cutyaa ra nu carta ta cucatyí ra tyi yuhu sacuhin carta cuan chí ndo.

³ Ni noo cuhva ma cuhva ndo cha sandavi ñaha ñu chí ndo. Vatyí cha ni cumañi ca chaá quiví cuan cuaha xaan ñu cusandihí ñu cha chino iñi ñu chí Nyoo ta cundicuita rayíi cha ñahri ley Nyoo iyó chi, ra cacu vatyí cunaa cuví ra cuan.

⁴ Ican ra cuví ra xaan iñi chí Nyoo. Cundicuita ra siqui tandihí cha nyisó sivi Nyoo. Tandihí cuhva sacahnú ñáyiví chí Nyoo cunducuita ra siqui. Ta nyacua nya chichi vehe ñuhu cahnu Nyoo ta cucunyaa ra ta cunyaca ñaha ra, cusaha ra tyi Nyoo cuví ra.

⁵ ¿Atu ña nichón iñi ndo vatyí ta ni nyaa que chihin ndo cahin tuhun ihya chihin ndo?

⁶ Soco vityin nyoho chitó ndo ñáá tuhun cha ña ndicuita ñaha ra tacuhva vatyí ndicuita ra soco nya quiví tahán maa chí.

⁷ Cha iyó tuhun cha ña quichahá ñáyiví chí Nyoo siqui ñuhu ñayiví, soco iyó xehe chí, vatyí iyó noo cha chasí, ta ña chahá cuan cha nducuaaha chí. Soco quiví canyaha cuan, cunduñihi cha quiñi caa cuan.

⁸ Tyicuan ta cundicuita ra quiñi caa cuan ta Sutu Mañi yo cucahñi ra chí ra chihin tatyí yuhu ra ta cusanaa ra chí ra chihin cha xiño ra quiví cuquichi ra.

⁹ Ra quiñi caa cuan, cuenda cuihna cuquichi ra. Ta tandihí tunyee iñi cuihna cucoo chí ra, ta cusandavi ñaha ra chí ñáyiví chihin seña ta milagru ta cha iyo.

¹⁰ Tandihí ri nuu cha ña vaha cucotyíño ra tacuhva cuví sandavi ñaha ra chí ñáyiví cha cucunaa. Vatyí ñu cuan ña cuñi ñu quichaha ñu cha ndicha tacuhva cuví cacu ñu.

¹¹ Ta yucuan chaha cucuhva Nyoo vatyí cusandavi ñaha cha ña vaha cuan chí ñu. Ta cuchino iñi ñu cha ña ndicha.

¹² Tacuhva vatyí cutachi tuñi ra chí tandihí ñu vatyí ña cuñi ñu chino iñi ñu cha ndicha. Ta tahán ca iñi ñu sacuví ñu cha ña vaha.

Nu cahán ra Pablo tuhun ñu cha nacachí Nyoo vatyí cacu ñu

¹³ Soco tyicuan ri cuñi chí cha nacuhva ndi tyahví nyoo chí Nyoo cha cuenda nyoho yañi. Vatyí cuñi xaan Sutu Mañi yo chí ndo. Vatyí Nyoo nacachí ra chí ndo nyata quiví xihna ri vatyí cuacacu ndo cha cuenda cha sanduvaha Tatyí lí ra añima ndo ta cha cuenda cha chinó iñi ndo cha ndicha.

¹⁴ Yucuan cuenda nacana Nyoo chí ndo quiví cahán ndi tuhun ra chihin ndo tacuhva vatyí cuñihi ndo chiin cha cahnu cuví Sutu Mañi yo Jesucristo.

¹⁵ Yucuan chaha sanñi ndo iñi ndo, nyoho yañi. Ta ma naa iñi ndo tuhun cha sañaha ndi chí ndo ta ni nyaa ca ndi chihin ndo. Ni ma naa iñi ndo tuhun cha tyaá ndi nu tutu cha sacuhun ndi chí ndo.

¹⁶⁻¹⁷ Sutu Mañi yo Jesucristo ta Nyoo Sutu yo cuví ra cha cuñi chí yo. Ta cha cuenda tumañi iñi cha chahá ra chí yo sanduní ra iñi yo tyicuan ri maa. Ta chahá ra cha cuita iñi yo coo yo chihin ra. Ta na nacuhva maa ra cha sií cuñi añima ndo. Ta na sandunaní ra iñi ndo, tacuhva cuví cahán ndo ta sacuví ndo tandihí nuu cha vaha.

3

Nu chican ra Pablo na cacan tahvi ñu chaha ra

¹ Nu ndihi tuhun, nyoho yañi, cacan tahvi ndo chaha ndi tacuhva vatyi numi ri chaa tuhun Sutu Mañi yo tandihi ri ityi. Ta na quichaha ñáyivi ta natin cuenda ñu tari natin cuenda nyoho.

² Cacan tahvi tucu ndo tacuhva vatyi na cacu ndi ndaha ñáyivi ña vaha, ñu quiñi iyó. Vatyi ña tandihi ñáyivi chinó iñi ñu chi Sutu Mañi yo.

³ Soco Sutu Mañi yo ndicha ra. Ta maa ra cuasaquehen ityi ra chi ndo, ta cuasaha cuenda ra chi ndo coto tin ra ña vaha chi ndo.

⁴ Ta cunyeé xaan iñi ndi chi Sutu Mañi yo vatyi nyoho sacuvi ndo tari cuhva catyi ndi chi ndo, ta cusacuvi ca ndo.

⁵ Ta vityin na tyinyee ca Sutu Mañi yo chi ndo tacuhva cuñi ca ndo chi ñáyivi tari maa ra cuñi ra chi ñu. Na tyinyee ra chi ndo na cucama iñi ndo cuhva nyehe ndo tindoho, tari ra Cristo cunyeé xaan iñi ra nu nyehe ra tindoho.

Tahán chi cha saha tyiño yo

⁶ Ta vityin chihin ndusu yuhu Sutu Mañi yo Jesucristo, catyi ndi chi ndo, nyoho yañi, ma cutahan ndo chihin yañi yo ra ña cuñi saha tyiño, ta ña iyó ra cuhva sañaha ndi chi ndo.

⁷ Vatyi nyoho chitó ndo yoso caa tahán chi coo ndo tari cuhva sañaha ndi chi ndo. Vatyi nyuhu ña chinyicu ndi chihin ndo cha ña sahá tyiño ndi.

⁸ Ta ni ña chachi ndi cha chii ndo cha ña tyiyahvi ndi. Soco saha tyiño ndi ñicahñu ta cha cuaa vatyi ña cuñi ndi coso ndi siqui ni noo ndo.

⁹ Vasi iyó chi ityi chi ndi cha cacan ndi cha tyinyee ndo chi ndi, soco nyuhu saha tyiño ndi vatyi cuñi ndi sañaha ndi noo cuhva vaha cunyicon ndo.

¹⁰ Vatyi quiñi chinyaa ndi chihin ndo, catyi ndi chi ndo vatyi ñu cha ña cuñi saha tyiño, ma cachi ñu.

¹¹ Cahán ndi siqui ihya vatyi ñihí ndi tuhun vatyi yihí ndo chicá noo yanga ri ndo ta ñahri maa tyiño sahá ndo.

¹² Chi nyoho cha iyó ndo tyicuan caa, catyi ndi chi ndo chihin ndusu yuhu maa Sutu Mañi yo Jesucristo, na casaha tyiño vaha ndo, ta yaha ndo noo noo quiñi.

¹³ Yañi, ma cutatu ndo sacuvi ndo cha vaha.

¹⁴ Tatu iyó noo ra ña cuñi quichaha tuhun cahán ndi nu tutu ihya, saha ndo cuenda chi ra ta ma cutahan ndo chihin ra tacuhva na cucahan nuu ra.

¹⁵ Soco ma cuxaan iñi ndo chi ra, soco cuhva ndo tuhun chi ra vatyi yañi yo cuvi ra.

Nu ndihi cahan ra Pablo

¹⁶ Sutu Mañi yo taxi ri iyó añima ra, ta suri maa ra na cuhva ra cha taxi ri coo añima ndo tandihi ri cuhva tandihi ri quiñi. Ta nacuhva ndo cha cunyaa vaha ra chihin tandihi ndo.

¹⁷ Yuhu ra Pablo tyai nocumi ihya chi ndo chihin ndahi, ta chihin letre. Ta tyehe caa tyihí firme nu tandihi carte. Ta tyehe caa tuhvé tyai.

¹⁸ Ta Sutu Mañi yo Jesucristo na nasoco ra chi tandihi ri ndo. Ta na cuvi chi tyicuan caa.

Carta Cha Xihna Ri Sacuhun Ra Apóstol Pablo Chi Ra Timoteo

Nu tyaq ra Pablo noo tutu chi ra Timoteo

¹ Yuhu ra Pablo cuví noo apóstol chi ra Jesucristo vatyí tachí ra chii na caque tyiño ra. Maa Nyoo cuví ra sacacú chi yo. Ta ican ra catyí tyi sacuvi tyiño ihya, ta Sutu Mañi yo Jesucristo ñandihí. Vatyí maa ra cuví ra cha yihí ñi yo.

² Tyai tutu ihya chi yoho Timoteo vatyí sehe vahi cuví chuun cha cuenda cha chinó ñun tuhun ra Cristo cha sacote chuun. Ta cuñi vatyí nasoco Nyoo Sutu yo ta Sutu Mañi yo Jesucristo chuun. Ta na nyehe ndahvi ra chuun. Ta na coo ca cha taxi ri añimon saha ra.

Nu sañahā ra Pablo chi yo yoso caa saha yo cuenda tuhun cha ña ndicha

³ Quiví quite ñuu Éfeso chiña cha cuaquichi ityi Macedonia ihya, catyí chuun na ndoun Éfeso chiña ta catyun chi suhva ñu vatyí ma sañaha ñu tuhun cha ña ndicha. Ta vityin catyí tiqui chuun na sacuvi con tari cuhva catyí chuun quiví cuan.

⁴ Catyun chi ñu cuan vatyí ma tyaa ñu xiñi ñu tuhun tyisu, ni tuhun cha cuví chi noo noo sutu chahnu ñu. Vatyí cha nuu cha tyinyeé chi chí yo, satondó chi xiñi yo. Maa maa ri cha ñima ri tuhun cuví yuhu yo. Ña tyinyeé chi chí yo cha chinó ñi yo cha sacuví ca yo cha catyí Nyoo.

⁵ Soco tuhun cha catyí maa yo chi ñáyivi, cha cuñi yo chi tahan yo chihin cha cacú añima yo cha sanduvahā Nyoo. Cuñi yo chi ñu chihin cha vaha chicá xiñi yo ta chihin cha ndicha chinó ñi yo chi Nyoo.

⁶ Soco yihí ñu sañā ñu tuhun ihya ta quita caxiin ñu chihin tuhun cha ñima ri tuhun.

⁷ Cuñi ñu cuví ñu ñu sacuahá cuenda ley chahnu Nyoo soco ni maa ñu ta ña cutuñi ñi ñu tuhun cahán ñu.

⁸ Chitó yo tyi ley cuan, vaha chí, soco cotyíño yo tari cuhva tahán chí.

⁹ Cuñi chí coto yo vatyí ni noo ley ña chicunyaā chí cha cuenda ñu vaha. Soco nyaá chí cha cuenda ñu nacahnú nu cahán Nyoo, ñu iyó cuatyí, ñu quiñi iyó, ñu ña saha ñáyivi chí Nyoo. Nyaá tucu chí cha cuenda ñu chahñi chí sutu, chí sihi, ta cha cuenda tandihí ñu chahñi.

¹⁰ Nyaá ley cuan cha cuenda ñu iyó chihin rayii o ñusihí ta ñima yii ña o ñasihí ra cuví. Nyaá chí cha cuenda ra ca iyó chihin tahan yii, ta cha cuenda ñu suhu cha chii ñáyivi, ta ñu cuendu, ta ñu cha catyí: “Chito vaha Nyoo”, ta ña ndicha cha cahán ñu. Ta suri nyaá tucu ley cuan cha cuenda yóo ñu cha ña nyicon cuhva cahan tuhún Nyoo.

¹¹ Ta tuhun tyaqi xaan cha sacoto Nyoo chí yo cha cuenda ra Cristo, ican cuví tuhun cha nacuhvā cuenda Nyoo chii vatyí sacote chí ñáyivi. Maa ra cuví ra cha sacahnú yo.

Chahā ra Pablo tyahvi nyoo chí Nyoo vatyí nyehé ndahvi ra chí ra

¹² Nacuhvé tyahvi nyoo chí Sutu Mañi yo Jesucristo cha cuenda tunyee ñi cha chaha ra chii ta nyehe ra chí tari noo ra chinó vaha ñi, ta natyaa tyiño ra chí vatyí sacuví tyiño nuu ra.

¹³ Tyehe caa sacuvi ra chihin vasi ta ityi chata ca yuhu cahan ña vahi siqui ra. Chica nyiquen chi ra ta cahan cuehi chi ra. Soco Nyoo cundahvi cuñi ra nyehe ra chii, vaty yuhu ta chino ca iñi chi ra, ta ña chite cha chinyacuvi.

¹⁴ Ta tyinyee xaan Sutu Mañi yo chii. Ta chaha ra cha chino xaan iñi yo chi ra, ta cha cuñi xaan yo chi ñayivi vaty in ri cuvi yo chihin ra.

¹⁵ Ta ndicha, cha ndicha vaha cuvi tuhun ihya. Ta tahán chi cha chino iñi yo, vaty ra Cristo Jesús quichi ra siqui ñuhu ñayivi ihya vaty sacacú ra chi ñu iyó cuatyí. Ta yuhu cuvi noo ra quiñi caa ca cha nuu tandihí ñu cuan.

¹⁶ Yucuan chaha xihna que tava Nyoo chii nu quiñi caa vaty tacuhva sañaha ra Jesucristo chi ñayivi tyi cuñi xaan ra chi ñu. Tacuhva vaty nachino iñi ñu ta cucoo ñu noo ñayivi chaa cha ma naa ca maa.

¹⁷ Yucuan chaha na sacahnu yo chi ra cha tyicuan ri nyacá ñaha, ra cha ñahri tuhun chihi iyó chi, ra cha ña cuvi nyehe yo chi, ra cha noo ri maa ra cuvi Nyoo ta chitó ra tandihí cha chiñi tuñi. Na sacahnu yo chi ra ta na cunyaca ñaha ra tyicuan ri maa. Ta na cuvi chi tyicuan caa.

¹⁸ Ihya tuhun chahí chuun, yoho Timoteo sehi, vaty cañi tahan vahun chihin tatyí ña vaha chihin cha chinó iñun, ta chihin cha vaha cuñi añimon tyi chitón tyi vaha sacuvun noo cha sacuvún vaty suri tuhun ihya cachaha ra hermano chuun chihin ndusu Nyoo.

¹⁹ Ta ma sandihun cha chinó iñun chi Nyoo ta sacuvun cha vaha na vaha cuñi añimon. Vatyí sava ra sandihí ra tuhun ihya, yucuan chaha caquitá xiin ra.

²⁰ Tyicuan caa sacuvj tucu ra Himeneo ta ra Alejandro. Ta yucuan chaha nacuhva cuende chi ra chi cuihna, na cacutuhva ra yoso caa tahán chi sacuvi ra ta ma cahan ña vaha ca ra chi Nyoo.

2

Nu sañaha ra Pablo yoso caa cacan tahvi yo

¹ Catyí chi ndo vatyí cha nuu tandihí ca, tahán chi cha cacan tahvi ndo chi Nyoo cha cuenda tandihí ñayivi. Ta nacuhva ndo tyahvi nyoo chi Nyoo cha cuenda ñu.

² Cacan tahvi ndo cha cuenda ra cacuvi rey ta cha cuenda tandihí ra cacuvi tyiño. Cacan tahvi ndo cha cuenda ra tacuhva cuvi coo vaha yo, coo taxi yo, coo yo noo ñayivi cachi nuu Nyoo ta nuu ñayivi. Ta cusaha ñu ñayivi chi yo.

³ Vatyí ihya cuvi cuhva tahán iñi Nyoo ra cha sacacú chi yo.

⁴ Ta maa ra cuñi ra vatyí cacu tandihí ñayivi. Ta cuñi ra cha nacoto ñu cha ndicha.

⁵ Vatyí iyó noo ri Nyoo. Ta iyó noo ri ra cuvi chaa nuu Nyoo tyiño nuu yo. Ican ra cuvi ra Cristo Jesús. Ta cuvi ra ñayivi tari maa yo.

⁶ Ta maa ra Jesucristo chaha ra ñayivi ra tyiño nuu tandihí ñayivi. Tyiyahvi ra cuatyí yo tacuhva cuvi cacu tandihí yo. Ta chino cava cuan quivi tyaá maa Nyoo cuhva.

⁷ Cha cuenda ihya, tyatyíño Nyoo chii, vatyí cahin tuhun ra, ta cuvi apóstol ra, tachí ra chii vatyí sañahi chi ñu cha ñima ñu Israel cuvi, yoso caa nachino iñi ñu cha ndicha. Ta nyoho chitó ndo tyi ña tuhvé cahin cuendu vatyí cuenda ra Cristo yihí.

⁸ Yucuan chaha cuñi vatyí cacan tahvi rayi tandihí ri ityi. Ta na coo ra noo ñayivi ndii. Ta na sacahnu ra chi Nyoo chihin cha nacoñehe ra ndaha ra nuu Nyoo. Ta vaha caca xiñi ra. Ta ma coo ra tisihí chihin ñayivi. Ta ni ma xaan ra.

⁹ Tyicuan caa tucu ñusihí. Cachi cuhva cuihno ñu, tari cuhva tahán chi cuihno ñu yihí cuenda Nyoo. Ta ma iyo xaan cuihno ñu. Ma iyo xaan sanduvii ñu xiñi ñu. Ñima chihin xuhun cuaan o yuu tyaqui, o chihin sahma yahvi xaan sanduvii ñu chi ñu.

¹⁰ Soco chihin cha cachi coo ñu ta chihin cha sacuvi ñu cha vaha na sanduvii ñu chi ñu, tari tahán chi sacuvi ñu nacuhva cuenda chi chi Nyoo.

¹¹ Ta taxi ri cunyaa ñusihí ta tyasoho ñu tuhun Nyoo. Ta saha ñu ñáyivi chi ra chahá tuhun chi ñu.

¹² Vatyí ña chahí cha sañaha ñusihí. Ni ña chahí cha cunyaca ñaha ñu chi rayi. Soco taxi ri na cunyaa ñu.

¹³ Vatyí xihna ca chi ra Adán savaha Nyoo ta yaha cuan ta chi cu Eva.

¹⁴ Ta ñima chi maa ra Adán sandaví ñaha ra ña vaha, soco chi ñasihí ra cuví sandaví ñaha ra ta chicoo cuatyí ña.

¹⁵ Soco ñusihí cucacu añima ñu cha cuenda cha sacacú ñu sehe ñu, ta sacuahnú vaha ñu chi chi. Soco tatu chinó vaha iñi ñu chi Nyoo ta cuñí ñu chi ra ta chi ñáyivi, ta cachi coo ñu nuu Nyoo ta nuu ñáyivi ñandihí.

3

Yoso caa tahán chi coo ra yihí ndaha chi ñu yihí cuenda ra Cristo

¹ Ndicha tuhun ihya: Tatu minoo ndo cuñí ndo quindaha ndo chi ñáyivi yihí cuenda ra Cristo, vaha xaan tyiño quichí cuvi iñi ndo sacuvi ndo.

² Soco niñi cuñí chi vatyí ra yihí ndaha vehe ñuhu cuvi ra noo ra ñahri cuatyí iyó. Ta cuñí chi cha coo noo ri ñasihí ra. Ta cuñí chi cha cuvi ra noo ra tyihí tuñi vaha iñi yoso caa cunyacuvi, noo ra vaha nuu ñáyivi. Ta cuñí chi vatyí vaha cuví ra chihin ñáyivi chaa vehe ra. Ta coto ra yoso caa sañahá ra.

³ Ma cuví ra noo ra tuhvá chihí ndixi, ni ma cuví ra noo ra nanducú tisihi. Ta ma cuví ra noo ra nducu xuhun noo cuhva ña vaha. Soco cuñí chi cha vaha ñáyivi cuví ra, ta cuví ra noo ra ña tuhvá cañi tahan. Ta ma cuví ra noo ra cuñí xaan xuhun.

⁴ Ta cuví ra noo ra yihí ndaha vaha ñasihí ta sehe: Noo ra nyacá ñaha chi sehe tacuhva vatyí quichaha ñu chi ra, ta saha ñu ñáyivi chi ra.

⁵ Vatyí tatu ña chitó ra cunyaca ñaha ra vehe ra, ¿yoso caa cusaha cumi ra vehe ñuhu Nyoo?

⁶ Ta noo ra nichaa chihin tuhun Nyoo ña tahán chi quindaha ra vehe ñuhu vatyí coto sacahu ra chi ra ta tachi tuñi Nyoo chi ra, tari tachí tuñi ra chi cuihna vatyí cahnu sahá ra chi ra.

⁷ Ta siin ri cuñí chi vatyí cuví ra noo ñáyivi vaha nuu ñu ityi chata, coto tahan ra ticahan nuu ta cana cava ra chichí ndaha cuihna.

Yoso caa tahán chi coo noo ra tyinyee chihin tyiño vehe ñuhu

⁸ Ta tyicuan caa tucu ra tyinyee chihin tyiño vehe ñuhu. Na cachi coo ra. Ma cuví ra noo ra cuendu, ta ma cuví ra noo ra tuhva chihí ndixi ñandihí. Ta ni ma nyiyo iñi ra saha canaa ra xuhun chihin noo cuhva ña vaha.

⁹ Cuñí chi vatyí cutuñí vaha iñi ra yoso caa tahán chi chino iñi yo chi Nyoo ta coto vaha ra tyi vaha cuahan ra chihin Nyoo.

¹⁰ Ta cuñí tucu chi cha nyehe xihna yo tatu vaha iyó ra chihin Nyoo tyicuan ta cuví sacuvi ra tyiño vehe ñuhu.

¹¹ Ta tyicuan caa tucu ñusihí, cuñí chi vatyí cuví ñu ñáyivi vaha. Ma ñi ñu cuendu. Ta cachi coo ñu. Ta niñi cuñí ñu chihin tandihí ri tyiño.

¹² Noo ra tyinyeé chihin tyiño vehe ñuhu na coo noo ri ñasihi ra. Ta cuñí chi vatyi coto vaha ra cunyaca ñaha ra chi sehe ra ta ñáyivi nyicú vehe ra.

¹³ Vatyi ra tyinyeé, tatu vaha sacuvj ra tyiño cha tahán chi sacuvi ra, cuahan ca ra ityi nuu chihin Nyoo. Ta cunñi ca iñi ra cahan ra tuhun cha chinó iñi ra chi ra Cristo.

Noo tuhun xehe cuenda cuhva chino iñi yo

¹⁴⁻¹⁵ Yihí iñi cha cuhin cha numi ri cunyehe nu nyaún. Soco tatu cucuei, yucuan chaha tyaí ihya chuun tacuhva coton yoso caa tahán chi coo ñáyivi cuenda Nyoo. Vatyi maa yo cuví yo vehe ñuhu Nyoo nyitó. Ta cuñí chi vatyi sañihi ca yo sañaha yo cha ndicha cha cumí yo chi inga ñáyivi.

¹⁶ Cha ndicha cuví vatyi yaha xaan cuhva cahnu tuhun xehe cha sanatuvj Nyoo, vatyi coo yo tari iyó maa ra:

Nyoo nanduvj ra rayii ta chicoo ra chichi noo coño ñuhu tari maa yo.

Ta catyí Tatyí lí vatyi vaha ra.

Ta nyehe ángel chi ra.

Nicahnu ñuhu ñáyivi cahán ñu tuhun ra.

Ta chinó iñi ñáyivi chi ra nicacahnu ñuhu ñáyivi.

Ta cuanuhj ra nya gloria.

4

Nu catyí ra Pablo vatyi yihí ñu ma chino ca iñi ñu nu cuahan chi tyembu

¹ Soco cahán cachi Tatyí lí ta catyí chi vatyi nu cuandihí tyembu yihí ñu ma chino ca iñi ñu chi ra Cristo vatyi cutyasoho ñu tuhun cahán tatyí ña vaha cha sandavi ñaha chi ñu. Ta cunyicon ñu ndusu ñuhu cuihna.

² Cutyasoho ñu tuhun cahán ñu cuendu. Ta ñu cuendu cuan ña tuví ca iñi ñu cuhva nyacuví ñu vatyi cha ndundava xaan añima ñu. Tari cha cayu añima ñu chihin noo caa ihñi ta ndundava chi cuví cuan.

³ Cucasi ñu cuan nu tandaha ñáyivi. Ta cucatyí ñu vatyi ña vaha cha cachi yo suhva nuu nyayu. Vasi chitó yo tyi tandihí nuu cha cachi yo, Nyoo savaha. Ta tandihí yo cha chinó iñi yo chi Nyoo ta chitó yo cha ndicha, cuví cachi yo ta nacuhva yo tyahvi nyoo chi ra.

⁴ Vatyi tandihí cha savaha Nyoo ta vaha. Ta ña tahán chi catyí yo tyi ña vaha. Cuví cachi yo tatu nacuhva yo tyahvi nyoo chi Nyoo.

⁵ Vatyi ndundij chi cha cuenda tuhun Nyoo ta cha cuenda cha chicán tahvi yo chi Nyoo.

Yoso caa noo ra vaha sacuví tyiño nuu ra Jesucristo

⁶ Tatu sañahún tuhun ihya chi tandihí yañi yo, cua cuvun noo ra vaha cahán tuhun ra Cristo Jesús. Ta tuhun cha chinó iñi yo ta tandihí tuhun ra Cristo cha nyicón, cua tyinyee chi chuun.

⁷ Soco ma quichahun tuhun cuendu, tuhun tondo cha iyó ñáyivi ihya. Vaha ca saniñun chuun sacuvun maa maa ri cuhva cuñí Nyoo.

⁸ Cha saniñi yo ndunye coño ñuhu yo tyinyeé chi suhva chi yo. Soco cha saniñi yo sacuví yo cuhva cuñí Nyoo, tyinyeé chi chi yo tandihí ri cuhva, vatyi tyinyeé chi chi yo ñáyivi ihya. Ta tyinyeé tucu chi chi yo cha coo vaha yo nu cuchaa yo andivi.

⁹ Ta ndicha, cha ndicha vaha cuví tuhun ihya ta tandihí yo tahán chi cha chinó iñi yo.

¹⁰ Ta suri cha cuenda ihya sahá tyiño yo ta nyehé yo tindoho vatyi nyatú yo naquehen yo cha vaha cha chaha Nyoo nyito chi yo. Vatyi maa ra cuvi ra sacacú chi tandihi ñáyivi, ta xihna ca chi yoó cha chinó iñi yo chi ra.

¹¹ Ihya tuhun cua sañahun chi ñáyivi, ta cusaniñun chi ñu na cutuhva ñu.

¹² Cachi sañahun chuun coto ma saha ñu ñáyivi chuun cha cuenda cha cuvún noo ra tyivaa. Soco sañahun noo cuhva vaha chi ñu chihin cuhva iyón, chihin cuhva cahun. Sañahun chi ñu, chihin cuhva cha cuñun chi Nyoo ta chi ñáyivi, chihin cuhva chicá xiñun, chihin cuhva chinó iñun, ta chihin cuhva sacuvún maa maa ri cha vaha.

¹³ Cha ni ri ca cha cumañi chai nu nyicú ndo, sacuahā con tuhun Nyoo nuu ñu yihí cuenda Nyoo. Cuhva tuhun chi ñu ta sañahun chi ñu yoso caa caca vaha ñu ityi Nyoo.

¹⁴ Sañahun cuenda nyatu cha chahā Nyoo chuun quivi cha tyiso ra yindaha vehe ñuhu ndaha ra sicun ta cahan ra yoso cuhva chahá Tatyí li Nyoo chi ra.

¹⁵ Tyaa vaha xiñun tuhun ihya ta sacuvun. Tacuhva vatyi nyehe ñáyivi yoso caa cuahun ityi nuu ca chihin Nyoo.

¹⁶ Saha cuenda chuun chihin cuhva iyón. Ta saha cuenda cuhva sañahun chi ñáyivi ta ñaha saña ndahun cha vaha. Tatu tyicuan caa sacuvún cuacacun, ta cucacu ñu chiñi tuhun sañahun ñandihí.

5

Nu chahá ra Pablo tuhun chi ra Timoteo yoso caa cuhva ra tuhun chi ñu yihí cuenda ra Cristo

¹ Ma cahun chi noo ra chahnu, soco cuhva tuhun chi ra tari cha sutun cuví chi ra. Ta chi ra tyivaa cuhva tuhun chi ra tari cha yañun cuví chi ra.

² Ta chi ñu chahnu tari cha siñun cuví chi ñu. Ta chi ñu tyivaa, tari cha cuhvon cuví chi ñu. Ta sacuvun chihin cha vaha chicá xiñun.

³ Tyinyee chi ñu ndahvi ñu chihj yí tatu yori ñáyivi chi ñu cha tyinyee chi ñu.

⁴ Soco tatu iyó noo ñaha chihj yí ta iyó sehe ña, o sehe ñañi ña, cuñi chi cha cutuhva xihna maa ñu cha tyinyee ñu chi ña. Na nichon iñi ñu yoso caa saha cuenda sihi ñu chi ñu ta luhlu ñu. Ta tyicuan caa tahán chi cha saha cuenda tucu ñu chi ña vityin. Vatyi cha tyehe caa vaha xaan, ta cha tahán iñi Nyoo cuví.

⁵ Soco ñu chihj yí cha ndoo noo tuhun ri maa, chi Nyoo tyihí ñu iñi ñu ta tyicuan ri chicán tahvi ñu chi ra ñicahñu ta cha cuaa.

⁶ Soco noo ñaha chihj yí cha nducú tusi iñi cha iyó ñayivi ihya, tari quivi cha chihj ña cha cuenda tuhun Nyoo cuví cuan, vasi iyó ña.

⁷ Sacoto tuhun ihya chi tahan yo tacuhva cha ma ñihi ñáyivi cuhva cahan ñu chi ñu.

⁸ Soco tatu yihí yo cha iyó ñáyivi chi yo cha chihj yí ta ña chicá xiñi yo cha cuenda ñu, ta cha xihna ri cha cuenda ñu vehe yo, tari quivi cha ña chinó iñi yo chi Nyoo cuví cuan. Ta cahnu ca cuatyí yo ta ñima ca ñu cha ña chinó iñi chi Nyoo.

⁹ Nu tutu cha nyaá sivi ñu chihj yí, na cunyaa sivi ñu, soco ñu cha yahā ca uñi xico cuiya. Ta cuví cunyaa sivi ñu tatu noo ri yí ñu chiyó.

¹⁰ Ta cuñi chi tatu ñohó nuu vaha ñáyivi chi ñu cha cuenda cha vaha cha sacuví ñu: tatu sacuahnu vaha ñu sehe ñu, tatu chahā ñu cha cachi ñu chaā vehe ñu, tatu sacuvi ñu tyiño nuu yañi yo chihin cha tandihí añima ñu chihin

cha ndahvi sahá ñu chi ñu, tatu tyinyee ñu chi ñu nyehé tindoho, tatu tyehe caa sacuví ñu tandihí nuu cha vaha, cuví cunyaa sivi ñu.

11 Soco ma tyihí ndo sivi ñu cha ta chaa ca uñi xico cuiya coto coo quivi ta quichi cuví iñi ñu tandaha ñu inga chaha ta sandihí ñu tuhun sacuví ñu tyiño nuu ra Cristo.

12 Ta tyicuan caa cucoo cuatyí ñu vatyí ña sacuví ca ñu cuhva catyí ñu.

13 Ta siin ri tatu chicá noo suchan ri maa ñu tahan tahan vehe ñáyivi. Ta ñima yucuan ri soco chicá noo ndihí ñu chihin cuendu ñu. Ta tyihí ñu chi ñu noo nu ñahri cuenda ñu. Ta cahán ñu cha ña tahán chí.

14 Yucuan chaha vaha taxin ca na tandaha ñu inga chaha. Na coo sehe ñu. Na saha cuenda ñu vehe ñu. Ta ma cuhva ñu ityi chí ñu xaan iñi chí yo vatyí cahan nyaa ñu chí yo.

15 Tyehe caa catyí chuun vatyí yihí ñu cha saña ñu chí Nyoo ta na nyicon ñu chí ra ña vaha.

16 Tatu noo ñu yihí cuenda Nyoo ta iyó noo ñáyivi chí ñu cha chihí yí, cuñí chí cha tyinyee ñu chí ñu, tacuhva cha ma cuví ñu noo carga chí vehe ñuhu. Ta tyicuan caa ta cuví tyinyee ñu vehe ñuhu chí ñu chihí yí cha ndicha ndicha chihuhú chí.

17 Ra chahnu ra nyisó tyiño vehe ñuhu, cuñí chí vatyí saha xaan ñu ñáyivi chí ra. Ta cha xihna ca chí ra cahán tuhun Nyoo ta ra sañahá chí ñu.

18 Vatyí tuhun Nyoo catyí chí: “Ma tyihun yoho yuhu sindiqui nu saha tyiño ti tacuhva vatyí cuví cachi ti chiin.” Ta catyí tucu chí: “Iyó ityi chí ra cha sahá tyiño cha ñihí ra yahvi ra.”

19 Tatu tyaá ñu cuatyí siqui noo ra chahnu ra nyisó tyiño vehe ñuhu, ta tatu ña quita uvi o uñi tahan cha ndaa, ma quichahun chí ñu tyaá cuatyí cuan.

20 Soco ñu sañihí ca sacuví cuatyí cuñí chí cha catyí ndo chí ñu chihin nuu tandihí ñu nyicú vehe ñuhu tacuhva vatyí tandihí ca ñu na cuyuhvi ñu sacuví ñu cha ña vaha.

21 Tyatyíne chuun chihin nuu Nyoo ta chihin nuu Sutu Mañi yo Jesucristo, ta chihin nuu ángel cha nacachí ra. Ta catyí chuun vatyí quichahun cha catyí ihya ta ma cahun tumañi iñi chí noo ra ta ni chí inga ra.

22 Ma numi xaan ri tyaa tyiño chí noo ra cha cuví ra tyiño vehe ñuhu. Coto ndoo cuatyí sacuví ra sicun. Saha vahun cuenda chuun chihin tandihí cha sacuvín ta ma cuhvon ityi chí cha ña vaha.

23 Ta vatyí iyó noo cuehe chichun, ma cohun maa ri maa ndutya, soco cohun chiin vinu ñandihí.

24 Yihí ñáyivi quetuví ri cuatyí ñu cha cumañi ca cutuñi chí ñu. Ta yihí ñu nya cha yaha cutuñi chí ñu ta cuquetuvi cuatyí ñu.

25 Ta tyicuan caa tucu cha vaha cha sacuví yo, ña xehe caá. Soco vasi ña tuví cha numi ri, ñima tyicuan ri cucohon xehe chí.

6

1 Ñu cha cuví musu cuñí chí cha saha vaha ñu ñáyivi chí chitoho ñu. Tyicuan ta ma ñihí ñáyivi cuhva cahan ña vaha ñu siqui Nyoo ni siqui tuhun ra, cha sañahá yo.

2 Ta tatu noo musu iyó chitoho ra cha yihí cuenda Nyoo, ña tahán chí cha ma saha ra ñáyivi chí ra vatyí yañi ra cuenda Nyoo cuví chí ra. Soco ñihí ca cuñí chí cha sacuví ra tyiño nuu ra, vatyí chinó tucu iñi maa ra chí ra Cristo, ta Nyoo cuñí ra chí ra. Sañaha tuhun ihya chí ñu hermano ta cuhva tuhun chí ñu na sacuví ñu.

Cuhva iyó yo ta cusii cuñi yo

³ Tatu iyó noo ra cha sañahá inga tuhun cha ña chachí tahan chi chihin tuhun vaha cha sañahá Sutu Mañi yo Jesucristo, ta ni ri chihin tuhun vaha cha cuahan sacuaaha yo,

⁴ cuví ra noo ra cahnu sahá chi. Ta tahán xaan iñi ra cuvi yuhu ra siqui noo cha ñima ri tuhun. Tari noo cuehe cuví cuan. Ta cha cuenda tuhun ihya cacú tisihi ta tuhun nyiyo iñi, tuhun cha cahán ña vaha chi tahan, ta tuhun cha ña vaha cuñi nyehe chi tahan.

⁵ Ta tyicuan ri cañi tahan ñu vatyi quiñi chica xiñi ñu, vatyi ña chitó ñu cha ndicha. Nyacua cuñi maa ñu tyi cusaha ganaa ñu xuhun chihin tuhun Nyoo. Ma cutahan ndo chihin ñu cuan.

⁶ Ndicha vatyi cha sacuví yo cuhva catyí Nyoo ta ndoó yo vaha chihin cha cha chahá ra chi yo cuví chi tari noo cha tyayii iyó chi yo.

⁷ Vatyi ñahri nyiso yo vachi yo ihya ñayivi. Ta ñahri cuiso yo cunuhu yo quivi cúvi yo.

⁸ Soco tatu iyó cha cachi yo ta sahma ñihnó yo, na cusii iñi yo, ta na ndoo yo vaha chihin yucuan ri.

⁹ Soco ñu cuñi cutyayii, nducú nyehe ra ña vaha chi ñu. Caná cava ñu chichi xayu ra. Cutondó xiñi ñu chihin cha cuaha xaan cha quichi cuví iñi ñu. Ta sativí chi chi ñu ta nu ndihi tuhun cutivi ndihi ñu ta cunaa ñu.

¹⁰ Vatyi cha cuñi xaan yo xuhun, yucuan cuví nu caña tandihi ca nuu cha ña vaha. Ta yihí ñu cha tyehe caa cuñi xaan ñu xuhun, ta cha cuenda cuan sandihí ñu tuhun cha chinó iñi ñu tuhun Nyoo. Ta yucuan cuví nu suri chi maa ñu sanyehé ñu tindoho.

Lucha cha iyó chi yo cha chino iñi yo chi Nyoo

¹¹ Soco yoho cuvún noo rayii cuenda Nyoo. Caca cono chi tandihi cha quiñi caa cuan. Ta cahun chata cha cuiti. Vaha cõun nuu Nyoo. Cõunii iñun chihin ra. Cõñun chi ñayivi. Cõo cha cama iñun chihin tandihi cha cuví chuun. Ta masu cõvi iñun.

¹² Ñihi sacuvun tyiño nuu Nyoo vatyi tyicuan caa tahán chi tyi chinó iñi yo chi ra. Ta ma saña ndahun ñayivi chaa cha ma naa ca maa cha chahá Nyoo chi yo. Vatyi ican cuenda cuan nacana Nyoo chuun, quivi catyi cachun tyi chinó iñun nuu cuaha xaan ra cuví cha ndaa.

¹³ Ta chihin nuu Nyoo, ra cha chahá ñayivi coo tandihi cha iyó, ta chihin nuu ra Cristo Jesús ra cha chahá vaha cuenda nuu ra Poncio Pilato, catyi chuun vityin,

¹⁴ na sacuvun tandihi cha catyi chuun tacuhva ma cuhvon cuhva cha cahan ñayivi chuun nyacua nya quivi quichi Sutu Mañi yo Jesucristo.

¹⁵ Na chaa maa quivi, Nyoo cusaquichi ra chi ra Cristo inga chaha. Ican ra cuví ra cha sacahnu yo, ta noo tuhun ri maa ra cuví Nyoo ra iyó xaan tunyee iñi chii. Rey cuví ra cuenda tandihi ca ra cuví rey. Ta nyacá ñaha ra chi tandihi ca ra cha nyacá ñaha.

¹⁶ Noo ri maa ra cuví ra ra ñahri tuhun chihi iyó chii. Ta iyó ra nu ndichin nu yori maa tuhva. Ta ni noo ñayivi ta nyehe ca ñu chi ra. Ta ni ña cuví nyehe ñu chi ra. Chi maa ra na sacahnu yo. Ta na cunyaca ñaha ra tyicuan ri maa. Ta na cuví chi tyicuan caa.

¹⁷ Ta ñu cha iyó cha tyayii chi ñayivi ihya, catyí chi ñu vatyi ma cahnu xaan saha ñu chi ñu. Ta ma cuíta iñi ñu chi cha tyayii cha iyó chi ñu. Vatyi coto coo

quivi ta ndihi cha tyayii cuan. Soco na cuita iñi ñu chi Nyoo nyitó, vatyi maa ra cuví ra chahá tandihi. Ta cuaha chaha ra chi yo tacuhva cusii cuñi yo.

¹⁸ Catyun chi ñu tyayii na sacuvi ñu cha vaha ta nñi iñi ñu cuhva ñu cha iyó chi ñu chihin cha ma uhvi cuñi ñu.

¹⁹ Tyicuan ta coo cha tyayii ñu andivi ta cutyinyee chi chi ñu nu cuahan ca chi quivi. Ta tyehe caa cuví coo ñu ñayivi cha ma naa ca maa.

Nu ndihi chahá ra Pablo tuhun chi ra Timoteo

²⁰ Yoho Timoteo saha cumi vahun tyiño cha chaha Nyoo chuun. Ma tyasohun tuhun cha siin caa, tuhun cha ñima ri tuhun. Ma quichahun tuhun cha catyí ñu vatyi cha chiñi tuñi cuví, vatyi ña ndicha.

²¹ Vatyi cha cuenda cuan yihí ñu cha quitá caxiin ñu ityi Nyoo. Ta ña chinó vaha ca iñi ñu cha ndicha.

Ta Nyoo na nasoco ra chi ndo.

Ta na cuvi chi tyicuan caa.

Carta Cha Cu Uvi Cha Sacuhun Ra Apóstol Pablo Chi Ra Timoteo

Nu tyaq ra Pablo noo tutu chi ra Timoteo

¹ Yuhu ra Pablo cuví noo apóstol ra Jesucristo vatyí tachí ra chíi na caque tyiño ra. Vatyí tyicuan caa cuñí maa Nyoo, tyí cuñí ra cha sacote chí ñáyiví vatyí chahá ra noo ñáyiví chaa chí tandíhi ñu cha ndu ñin ri chíihin ra Cristo Jesús vatyí nacuhva cuenda ñu chí ñu chí ra.

² Tyaí tutu ihya chí yoho Timoteo. Ta cuñí xain chuun tyí tari cha sehi cuví chuun. Ta cuñí vatyí Nyoo Sutu yo ta Sutu Mañi yo Jesucristo na nasoco ra chuun. Ta na nyehé ndahví ra chuun. Ta na coo ca cha taxi ri cuñí añimon saha ra.

Nu catyí ra Pablo chí ra Timoteo tyí nacatyí ra chí ñáyiví tyí cuenda ra Cristo yíhi ra

³ Tyicuan ri nicohón iñi tuhun yoho cuhva cha chicán tahví chí Nyoo ñicahñu ta cha cuaa. Ta nacuhvé tyahví nyoo chí ra cha cuendon. Nuu maa ra sacuví yuhu tyiño chíihin cha vaha chicá xiñi, tari sacuví tucu ñáyiví chíi ta cha naha.

⁴ Tyicuan ri nicohón xaan iñi chuun ta nicohón xaan iñi tuhun yoso caa chacun quiví cuachiye chiña. Ta cuñí xain nyehi chuun inga chaha ta cusii iñi chuhun.

⁵ Vatyí nicohón iñi yoso caa chinq xaan iñi cu Loida chiton chí Nyoo, ta cu Eunice síhun ñandíhi. Tyicuan caa tucu yoho chinó xaan iñun vityin.

⁶ Yucuan chaha chahí tuhun chuun vatyí na saniun iñun ta cotyíño nyatu cha cahun tuhun Nyoo cha chahá ra chuun quiví tyisé ndahi sícun.

⁷ Nyoo ña chahá ra cha yuhví yo. Soco chahá ra noo tunyee iñi cahnu chí yo. Ta chahá ra vatyí cuñí yo chí tahan yo. Ta chahá ra cha cunyaca ñaha vaha yo chí yo.

⁸ Yucuan chaha ma cahan nuun cahun tuhun Sutu Mañi yo. Ta ni ri cha ma cahan nuu cha cuenda cha ñohí vehe caa cha cuenda ra. Soco chíihin tunyee iñi chahá Nyoo chuun ta chíihin cha iyó vaha iñun cunyeun tindoho cha vachi síqui yo cha cuenda tuhun Nyoo.

⁹ Vatyí ican ra sacacú chí yo. Ta nacana ra chí yo vatyí coo yo noo ñáyiví ii. Ñima cha cuenda cha vaha cha sacuví yo ta nacana ra chí yo, soco vatyí tyicuan caa tyaq ra cuhva nyata ni cumañi ca chinq ñuhu ñáyiví. Vatyí nya quiví cuan cuñí ra chí yo cha ñin ri cuví yo chíihin, ra Cristo Jesús.

¹⁰ Ta vityin cha quichí ra Jesucristo sacacú ra chí yo, nacoto yo vatyí tyicuan caa cuñí ra chí yo. Ta nu quichí ra, sataní ra tandíhi tunyee iñi cha iyó chí tuhun chíhi. Ta chíihin tuhun vaha cahan ra, tavá ra nu ndíchín tuhun cha coo yo noo ñáyiví chaa cha yori cuví sativí.

¹¹ Nyoo tyaq ra tyiño chíi vatyí cahin tuhun ihya chíihin ñáyiví. Tachí ra chíi vatyí cuví noo apóstol chí ra, ta sañahí chí ñu cha ñima ñu Israel cuví.

¹² Yucuan chaha nyehí tandíhi tindoho ihya. Soco ña cucahán nui vatyí chitó mai yóo chí chinó iñi. Vatyí nacuhvá cuende chíi chí ra, ta chitó vahí vatyí cuví saha cuenda ra chíi nyacua nya quiví quichi tucu ra.

¹³ Cunyicon tuhun vaha cha चाहिं चुुन. Ta cōun chihin cha chinó vaha iñun chi Nyoo. Tyicuan ri cuñun chi ñáyivi tahan yo. Vatyí yucuan cuví cha चाहá Nyoo chi yo tyi iin ri cuví yo chihin ra Cristo Jesús.

¹⁴ Ta maa Tatyí Ii cha iyó añima yo na tyinyee chuun ta saha cumun tuhun vaha cha चाहá Nyoo chuun.

¹⁵ Cha chitón vatyí tandihí ra ityi Asia chiña casandoq ra chii, tari ra Fígelo ta ra Hermógenes.

¹⁶ Soco ra Onesíforo na nyehe ndahvi Sutu Mañi yo chi ñáyivi chi ra vatyí cuaha xaan chaha quichí sandunyeer ra iñi. Ta ña cucahan nuu ra cha cuenda cha ñohí vehe caa.

¹⁷ Soco quívi chinyaa ra ñuu Roma ihya, ña sandihí ra tuhun cha nanducu ra chii nyacua nya cha nañihí ra chii.

¹⁸ Sutu Mañi yo nacuhva ra cha ñihi ra tumañi iñi quívi cha cutuñi chi yo nuu ra. Chitó vahun yoso cuhva tyinyee ra Onesíforo chi yo nya ñuu Éfeso chiña.

2

Noo sindaro vaha ra Jesucristo

¹ Ta yoho sehe luhli, sandunyeer iñun chihin tunyee iñi cha चाहá ra Cristo Jesús chuun cha cuenda cha iin ri cuví yo chihin ra.

² Tuhun cha chiñun cha cahñ nuu cuaha ñáyivi, naçatyí chi ra cha ñi iñi chinó iñi chi Nyoo, ra cha cacuví sañaha chi inga ñu.

³ Ta cunyeun tindhohi tari noo sindaro vaha ra Jesucristo.

⁴ Ni noo ra cuví sindaro ta ma cuví tyihi ra chí ra chihin inga tyiño. Vatyí cuñí chi sacuví ra maa maa ri cha catyí ra cuví nuu chi ra.

⁵ Ta tyicuan caa tucu ra canyasiquí, ma saha canaa ra cha tahán chi saha canaa ra tatu ma cunyasiquí ra tari cuhva tahán chi.

⁶ Noo ra sahá tyiño chichi cuhu, tahán chi cha saha tyiño xihna ra, yucuan ta cachi ra cha quitá nu iyó tyiño sahá ra.

⁷ Çaca xiñun tuhun cha catyí chuun ihya, ta maa Sutu Mañi yo cucuhva ra cha cutuñi iñun tandihí.

⁸ Niçohon iñi tuhun ra Jesucristo, ra cha nandoto cha yaha nyehe ra tindhohi ta chihí ra. Cuví ra tata rey David. Ta ican ihya cuví tuhun Nyoo cha cacu añima yo cha चाहá ra vatyí cahin tuhun.

⁹ Ta cha cuenda tuhun ihya cunyei tandihí tindhohi nyacua nuhñí chihin cadena tari noo ra quiñi iyó. Soco tuhun Nyoo ña nuhñí chi.

¹⁰ Yucuan chaha cunyei tandihí tindhohi cha cuenda cha vaha chi tandihí ca ñu nacachí Nyoo chí, tacuhva vatyí cuví cacu tucu tandihí ñu. Chihin cha ndu iin ri yo chihin ra Cristo cuacacu yo ta cuñihi yo noo nu tyaquí xaan cha ma ndihí ca maa.

¹¹ Ihya cuví cha ndicha xaan:

Tatu cuví yo cha cuenda ra, coo tucu yo chihin ra.

¹² Tatu cunyeé yo tindhohi, cucunyaca ñaha yo chihin ra.

Tatu catyí yo tyi ña yihí yo cuenda ra, maa ra cucatyí ra tyi ñima ñáyivi cuenda ra cuví chi yo.

¹³ Tatu sandoq yo chí ra, soco maa ra tyicuan ri sacuví ra cuhva catyí ra.

Vatyí maa ra ña tuhvá ra nasama ra tuhun cahán ra.

Tatu sahá tyiño vaha yo, cuaquita vaha yo

¹⁴ Sanicohun iñi ñu tuhun ihya, ta catyun chi ñu chihin nuu Sutu Mañi yo na sandihí ñu cha cuví yuhu ñu cha ñima ri tuhun. Vatyí cha cuví yuhu ñu tyehé caa, ñahri maa tuhun. Tyí sativí ñu chi ñu tyasohó tuhun cahán ñu.

¹⁵ Sanñun ta cuhva cuendon chuun nuu Nyoo tari noo ra sahá tyiño vaha. Vatyí ñahri cha cucahan nuun tatu chotyíño vahun tuhun ndicha yoso cuhva tahán chi.

¹⁶ Naha tyasohun tuhun cha ñima ri tuhun ñayiví ihya. Vatyí ñahri maa tyinyeé chi chi yo. Soco sativí ca chi chi yo nuu Nyoo

¹⁷ vatyí tari quihví xico ndiyí noo nu cahví, tyicuan caa cuví tuhun cuan vatyí sativí chi chi yo. Ta cuaha ñu cuativí cha cuenda cuan. Ican cuví cha cuví chi ra Himeneo ta ra Fileto.

¹⁸ Vatyí caquita caxiñ ra ityi vaha ta catyí ra vatyí tari quiví cha yahá nandoto yo ta ma nandoto ca coño ñuhu yo. Ta tyicuan caa satondó ra cuhva chinó iñi suhvá ñu.

¹⁹ Ta vasi yihí ñu nducaxiñ ñu, soco Nyoo chacun ra cha ndicha, ta yucuan cuví cha ma nasama maa. Ta nyisó chi noo seña cha catyí: “Sutu Mañi yo ñohó nuu ra chi ñu cuenda ra.” Ta catyí tucu chi: “Tandihí ñu nyisó sivi ra Cristo na quita ñu nu quiñi caa.”

²⁰ Chichí noo vehe cahnu, ñima maa maa ri ndaha tyiño chino chihin xuhun cuaan ta xuhun cuichin iyó. Iyó tucu cha chino chihin vitu ta chihin nyahyu. Yihí cuan chotyíño ñu chi nu vaha, ta yihí cuan cha chotyíño ñu nu ñima ri tuhun.

²¹ Tyicuan caa tucu maa yo tatu ña tñ cuenda yo tuhun cha ñima ri tuhun ñayiví ihya, cuví yo noo ñáyiví cha chotyíño Nyoo chi, tari noo vaso xuhun cuaan. Ta cuñí chi vatyí cundá vasu cuan, tyicuan ta cuví cotyíño ra chi yo cha cuenda tandihí nuu vaha.

²² Ma caca xiñun tari chicá xiñi ra tyivaa ñayiví ihya. Vatyí maa maa ri cha quiñi caa chicá xiñi ra. Coo noo ñayiví cuiti. Chino vaha iñun chi Nyoo. Cuñun chi Nyoo ta chi ñáyiví. Coo taxi run chihin tandihí ñu yihí cuenda Nyoo, ñu cha chihin cha vaha añima chicán tahvi chi Sutu Mañi yo.

²³ Ta ma quichahun tuhun cha ñima ri tuhun cha cuví yuhu ñáyiví. Vatyí chitón tyi chihin cuan cacú tisihi.

²⁴ Ta noo ra sacuví tyiño nuu Sutu Mañi yo, ña tahán chi cañi tahan ra. Soco tahán chi cha vaha ñáyiví cuví ra chihin tandihí ñáyiví. Ta cuñí chi cha ñihi vaha ra cuhva sañaha ra tuhun Nyoo. Ta cuñí tucu chi cha cama cuví iñi ra chihin ñáyiví.

²⁵ Ta chihin cha masu iñi ra cuñí chi cha sandundoo ra chi ñáyiví ndava iñi. Ta cuatu ra nasama Nyoo cuhva iyó ñu ta nacoto ñu cha ndicha.

²⁶ Ta tyicuan caa ta cunducachi iñi ñu ta cuaquita ñu chichi ndaha ra cuví cuihna vatyí cha vityin nyacuví maa ra yoso cuhva cuñí ra chihin ñu.

3

Yoso caa cucoo ñáyiví nu cuandihí ca quiví

¹ Ta cuñí tucu chi coton vatyí nu cuandihí tyembu cuquichi quiví cha yii xaan coo yo.

² Vatyí cucoo ñáyiví ñu cuñí xaan suri chi maa. Ta cucuñi xaan ñu xuhun. Ta yaa xaan cucuví ñu. Ta cahnu cusaha ñu chi ñu. Cucahan ña vaha ñu siqui Nyoo. Ta ma quichaha ñu nu cahán sutu ñu ta sihi ñu. Ma nacuhva ñu tyahvi nyoo chi Nyoo, ni chi tahan ñu. Ma quichaha ñu chi Nyoo.

³ Ma cuñi ñu chi tahan ñu. Ma coo tìcahnu iñi chi ñu chihin ñáyivi. Cuñi ñu cuendu. Ma cuvi cunyaca ñaha ñu coño ñuhu ñu. Xaan xaan cucuvi ñu. Ta ma cuñi nyehe maa ñu cha vaha.

⁴ Cunaxico tuhun ñu chi tahan ñu. Ta ndava xaan cucuvi iñi ñu. Ta cucaña iñi ñu sacuvi ñu ñáá ndihi cha cuñi ñu. Ta maa maa ri cha quichi cuvi iñi ñu cunanducu ñu, ta ma nanducu ñu chi Nyoo.

⁵ Cunyicon ñu noo cuhva tari cha chinó iñi ñu chi Nyoo, soco ña ndicha ñu. Vatyí chasí ñu cha sañahá Nyoo tunyee iñi ra. Ma cutahun chihin ñu caa tyicuan caa.

⁶ Vatyí mahñu ñu ihya iyó ra cha quihvi ra chichi vehe ta sandavi ñaha ra chi ñusihí cha ñahri cha chiñi tuñi xiñi. Ta nyisó ñusihí cuan cuatyí, vatyí nyicón ñu tandihí cha quichi cuvi iñi ñu.

⁷ Tyicuan ri cuñi ñu coto ñu tandihí tuhun chaa soco ña cuví cutuñi iñi ñu ñáá cha cuvi cha ndicha.

⁸ Ta ñu cucoo cha cahin tuhun ihya, cucuvi ñu tari maa ra Janes ta ra Jambres, ra tasí cha cachiyó ta cha naha. Ta cuñi ra saha canaa ra chi ra Moisés. Ta tyicuan caa tucu ñu cucoo nu cuahan ca chi. Ma tahan iñi ñu sacuvi ñu cha vaha. Quiñi cucaca xiñi ñu. Ta ma chino iñi ñu cha vaha.

⁹ Soco cuhva cunyacuvi ñu ma cuvi cutya chi vatyí ña xehe caa tyi cha ñima ri tuhun cuví cha cusacuvi ñu, tari cha chinyacuví ra Janes ta ra Jambres.

Nu ndihi tyatyíñq ra Pablo chi ra Timoteo

¹⁰ Soco yoho chitó vahun tyi yuhu ñima tyicuan caa iyé. Vatyí chitón tuhun cha sañahí, ta cuhva iyé. Ta chitón ñáá cha nanduquí ta yoso cuhva chinó iñi chi Nyoo. Ta chitó tucun yoso caa cunyeé iñi cha cahán ñáyivi chii. Ta chitón yoso cha cuñi chi ñu.

¹¹ Ta chitón yoso caa cunyeí tìndoho nu chicán nyicon ñáyivi chii. Chitón cha cuví chii, tandihí tìndoho cha nyehí cha catyí tuhun Nyoo ñuu Antioquía, ta ñuu Iconio, ta ñuu Listra. Soco Sutu Mañi yo sacacú ra chii chichi tandihí cuan.

¹² Cha ndicha cuví vatyí tandihí yo cha cuñi yo coo yo cuhva cuñi ra Cristo Jesús cunyehe yo tìndoho saha ñáyivi.

¹³ Soco ñu quiñi iyó ta ñu sandaví ñaha, quiñi xaan ca cunanduvi ñu. Vatyí cusandaví ñaha ñu chi ñáyivi ta cusandaví ñaha ñáyivi chi ñu.

¹⁴ Soco yoho sañihun coun chihin cha cutuhvon. Vatyí chitón yóo cha sañahá chuun ta chitó vahun tyi cha ndicha cuví.

¹⁵ Nya ta ni luhlun ta chitón cha nyaá nu tutu tuhun Nyoo. Ta yucuan cuví cha chahá cha cutuñi ca iñun tacuhva cacun cha cuenda cha chinó iñun chi ra Cristo Jesús.

¹⁶ Tandihí tuhun cha nyaá nuu tutu Nyoo, ta maa Nyoo chaha. Ta tyinyeé xaan chi chi yo nacoto yo yoso caa tahán chi chinó iñi yo. Sañahá chi chi yo cuhva caa yo. Sandundoó chi chi yo. Ta sañahá chi chi yo yoso caa coo yo noo ñáyivi vaha nuu Nyoo.

¹⁷ Tyehe caa tyinyeé tuhun Nyoo chi yo tacuhva vatyí cuví yo noo ra cuiti cuenda Nyoo. Ta cuatu tuhva yo sacuvi yo tandihí cha vaha.

4

¹ Tyatyíñe chuun nuu Nyoo ta nuu Sutu Mañi yo Jesucristo, vatyí maa ra cusandaa ra cuatyí ñu nyitó ta ñu chihí quivi quichi ra cunyaca ñaha ra chihin tunyee iñi ra.

² Çahan tuhun Nyoo chihin ñáyiví. Tyicuan ri saníñun sacuvun. Çahan tuhun Nyoo nuu ñu tatu chahá chi cuhva o vasi ña chahá chi cuhva. Cuhva tuhun chi ñu, çatyí cuhva caa ñu tacuhva cunyicon vaha ñu chi ra Cristo. Ta cauatun nasama ñu cuhva iyó ñu chihin cha cama iñun. Ta sañahun chi ñu yoso caa tahan chi coo ñu.

³ Vatyí coo quiví ma cunye ca iñi ñáyiví tyasoho ñu tuhun vaha. Soco cunducu ñu cuaha xaan ra sacuaha cha sañahá maa maa ri cha tahan iñi maa ñu cuiñi ñu.

⁴ Ta cusacuachiyo xiin ñu cha ndicha. Ta cucuñi ñu cuiñi ñu noo tuhun cha ña ndicha.

⁵ Soco yoho saha cuenda chuun chihin cha vaha chica xiñun. Cunyeun tindoho. Çahan tuhun Nyoo chihin ñáyiví. Saçuvi vahun tyiño chaha Nyoo chuun.

⁶ Yuhu cha cuñí cuii ri nacuhva cuende ñayiví cha cuenda tuhun Nyoo, vatyí cha nyaña yatyin tuhun chihí chii.

⁷ Cha cañi tahir tari cuhva tahan maa chi ta cha sandihí tyiño cha chaha Nyoo chii. Ta ña sandihí tuhun cha chinó iñi chi ra.

⁸ Ta vityin nu cuahan ca chi quiví, nyatú tuhva noo cha tahan chi chii cha cuacuhva Sutu Mañi yo chii. Ta ñima chi maa ri mai cuhva ra, soco cuhva tucu ra chi tandihí ca ñu cha nyatú chi ra. Vatyí noo ri maa ra cuví ra vaha sacutuñí.

Nonga tyiño tyaq ra Pablo chi ra Timoteo

⁹ Saníñi ta quichun cha numi ri, quichi nyehun nu nyai.

¹⁰ Vatyí ra Demas sandoq ra chii vatyí cuñí ca ra cha iyó ñayiví ihya. Ta cuahan ra nya ñuu Tesalónica. Ta ra Crescente cuahan ra nya ityi Galacia. Ta ra Tito cuahan ra ityi Dalmacia.

¹¹ Noo ri maa ra Lucas nyaá chihin. Nanducu chi ra Marcos ta na quichi ra chuhun quiví quichun. Vatyí chiñuhú xaan ra chii nu tyiño Nyoo.

¹² Tachí chi ra Tíquico ñuu Éfeso.

¹³ Quiví quichun cuison sahna cocon cha sandoj ñuu Troas vehe ra Carpo. Tyicuan caa tucu librí, quihí ndahun quichi. Ta cha ñiñi ca tuti.

¹⁴ Ra Alejandro ra cañi mityi cuan, cuaha xaan cha ña vaha chinyacuví ra chihin. Ta maa Sutu Mañi yo cutyiyahví chi ra cha cuenda cha chinyacuví ra chihin.

¹⁵ Saha cuenda chuun chihin ra. Vatyí xaan xaan cuñí ra siqui tuhun Nyoo cha cahán yo.

¹⁶ Cha xihna ri quiví sacaquí chii nuu ra cuví tyiño, yori maa tyinyee chii. Casandoq noo tuhun maa ra chii. Na saha Nyoo ticahnu iñi chi ra cha cuenda cuan.

¹⁷ Soco Sutu Mañi yo tyinyee xaan ra chii. Ta chaha ra tunyee iñi chii tacuhva cuví cahan cachi tuhun ra nuu ñu, ta chiñi tandihí ñu cha ñima ñu Israel cuví. Ta sacacu Nyoo chii cha cachi ndicaha chii.

¹⁸ Ta cuasacacu ca ra chii ndaha tandihí cha ña vaha. Ta cuasaha cuenda ra chii nyacua nya nachaa quiví cunyai chihin ra nu nyaca ñaha ra. Chi maa ra na sacahnu yo tyicuan ri maa. Ta na cuví chi tyicuan caa.

Nu ndihi cahan ra Pablo ta chahq ra nocumi chi ñu

¹⁹ Ihya vachi nocumi chi cu Prisca ta chi ra Aquila ta chi ñáyiví chi ra Onesíforo.

²⁰ Ndoq ra Erasto ñuu Corinto. Ta ndoq ra Trófimo ñuu Mileto vatyí cuhví ra.

²¹ Saniñun ta quichun cha ni cumañi ca chaa yoo vichin.

Vachi nocumi chuun sahá ra Eubulo ta ra Pudente ta ra Lino ta cu Claudia ta tandihi ca ñáyivi tahan yo cuenda Nyoo ihya.

²² Na cunyaa Sutú Mañi yo chuhun. Ta Nyoo na nasoco ra chi tandihi ndo.

Carta Cha Sacuhun Ra Apóstol Pablo Chi Ra Tito

Nu tyaa ra Pablo noo tutu chi ra Tito

¹ Yuhu ra Pablo sacuví tyiño nuu Nyoo. Ta cuví noo apóstol ra Jesucristo, o cuñí chi catyí vatyí tyatyíño maa ra chíi vatyí tyinyei chí ñu nacachi maa Nyoo, na nachino ñiñi ñu chí ra, ta cohon nuu ñu cha ndicha, ta coo ñu cuhva cuñí Nyoo.

² Ta cuātu tuhva ñu coo ñu ñáyivi chaa cha ma naa ca maa andivi. Vatyí ta ni cumañi ca chino ñuhu ñáyivi ta catyí Nyoo vatyí cucuhva ra noo ñáyivi chaa chí yo. Ta maa ra ña cuendu ra.

³ Ta vityin chaq quívi cha tyaa Nyoo cuhva tyi nacoto yo tuhun ra. Maa ra cuví ra sacacú chí yo, ta chaha ra tyiño chí yuhu cha cahin tuhun ra chihin ñáyivi.

⁴ Sacuhín tutu ihya chuun, Tito, vatyí tari noo sehe vahi cuví chuun cha cuenda tuhun Nyoo, vatyí in ri chinó ñiñi yo chí ra Jesucristo. Cuñí vatyí Nyoo Sutu yo ta Sutu Mañi yo Jesucristo, ra sacacú chí yo, na nasoco ra chuun, ta na nyehe ndahvi ra chuun, ta na coo ca cha taxi ri añimon sahá ra.

Tyiño chaha ra Pablo chi ra Tito tyi sacuvi ra ñuhu Creta

⁵ Sandoj chuun ñuhu Creta vatyí sandaun tyiño Nyoo cha nyaá cundaa. Ta tyison ra chahnu ra quindaha vehe ñuhu tahan tahan ñuu tari cuhva catyí chuun.

⁶ Vatyí ra nyisó tyiño ihya cuñí chí coo ra noo cuhva cha ma cahan ñáyivi chí ra. Noo ri ñasihí ra coo. Ta tandihí sehe ra cuñí chí cha chinó ñiñi ñu chí Nyoo, ta cachi coo ñu ta ma ndava ñiñi ñu tacuhva cha ma tyaa ñáyivi cuatyí siqui ñu.

⁷ Vatyí ra yindahá chí ñu yihí cuenda Nyoo, Nyoo tyatyíño cuan chí ra. Yucuan chaha ñiñi cuñí chí vatyí cuví ra noo ra vaha. Ñima noo ra cahnu sahá chíi, ni ñima noo ra tyityi ñiñi, ni ñima noo ra tuhvá chíñi. Ñima noo ra quixin cuatyí, ni ñima noo ra cuñí xuhun cha ña saha ganaa vaha ra.

⁸ Soco tyicuan ri sñi cuví chí ra tatu chaa ñáyivi vehe ra. Ta tahan chí cuhva ra nu coo ñu. Cuñí chí cuví ra noo ra cha sacuví cha vaha. Noo ra chitó yoso caa nyaca ñaha ra chí maa ra. Na cuví ra noo ra ndaa iyó, noo ra sacahnú vaha chí Nyoo. Ta chitó vaha ra cuhva tahán chí sacuvi ra ta saníñi ra sacuvi ra.

⁹ Ta cunyicon vaha ra tuhun ndicha cha sañahá yo chí ra. Tyicuan ta coto ra sandunñi ra ñiñi inga ñu chihin tuhun vaha ihya. Ta chí ñu catyí tyi ña ndicha tuhun cahan yo, coto ra yoso caa sañaha ra chí ñu tyi ña vaha cahán ñu siqui tuhun Nyoo.

¹⁰ Vatyí cuaha xaan ra ndava ñiñi iyó. Cuaha ra cahán cha ñima ri tuhun, cuaha ra sandaví ñaha. Ta cuaha xaan ca ñáyivi Israel sacuví tyicuan caa.

¹¹ Cuñí chí cha casi yo yuhu ra cuan, vatyí cuaha xaan ñáyivi satondó ra xiñi. Vatyí cha cuenda cha cacuñí ra xuhun ta sañahá ra noo tuhun cha ña tahán chí.

¹² Ta suri maa noo ra Creta, noo ra chíñi tuñi, ra cahán nuu ñu catyí ra tyehe caa: “Ñu Creta, cuendu xaan ñu. Tari quiti cuví ñu. Cuahyi ñu ta suchan ñu”, catyí ra cuan.

¹³ Ta cha ndicha catyi ra cuan. Yucuan chaha cuñi chi cha cahan ñihun chihin ñu na saña ñu tuhun cuan, tacuhva vatyí vaha na chino iñi ñu chi ra Cristo.

¹⁴ Tacuhva cha ma tyasoho ca ñu tyísu cha ñima ri tuhun cha canasavaha ri maa ñu Israel. Ta ni ma tyasoho ca ñu tuhun cahan ñáyivi cha ña cuñi coto cha ndicha.

¹⁵ Cha cuenda ñáyivi cha vaha chicá xiñi, tandihi ta vaha chi ñu. Soco cha cuenda ñu cha ña chinó iñi ta ña vaha chica xiñi, ñahri maa cha vaha chi ñu vatyí nyacua nya cuhva chicá xiñi ñu ta cuhva tuví iñi ñu ta ña vaha ta quiñi caa.

¹⁶ Catyi ñu vatyí ñohó nuu ñu chi Nyoo, soco chihin cha ña vaha nyacuví ñu nyehé yo tyi ña ndicha ñu. Vatyí quiñi yihí iñi ñu ta ndava iñi ñu. Ta ma cuvi sacuvi ñu noo cha vaha.

2

Tuhun vaha cha chaha Nyoo tyi sañaha yo

¹ Soco yoho, sañaha tuhun vaha tari cuhva sañahá tuhun Nyoo chi yo.

² Sañahun vatyí ra chahnu, cachi coo ra, tacuhva vatyí na saha ñáyivi ñáyivi chi ra. Ta tyicuan ri cachi caca xiñi ra. Vii cahun ra chihin cha chino iñi ra. Cuñi chi cha cuñi ra chi Nyoo ta chi ñáyivi. Ta cunyeé iñi ra tandihi.

³ Ta tyicuan caa tucu ñu chahnu. Catyi chi ñu na coo ñu noo cuhva cha tahán iñi Nyoo. Ta ma ñi ñu cuendu. Ma coho ñu ndixi. Ta na sañaha ñu cha vaha iyó ñu,

⁴ na nyehe ñu nicaa tandaha. Tacuhva vatyí cuñi ñu chi yí ñu ta chi sehe ñu.

⁵ Na caca vaha xiñi ñu. Ta saha vaha ñu cuenda cuhva iyó ñu. Na saha cuenda vaha ñu vehe ñu. Ta vaha ñáyivi cuvi ñu. Na cuhva ñu cha cunyaca ñaha yí ñu chi ñu tacuhva vatyí yori cuvi cahan ña vaha siqui tuhun Nyoo.

⁶ Ta tyicuan caa tucu ra tyivaa. Cuhva tuhun chi ra na cacachi coo ra.

⁷ Ta maun cuñi chi cha sañahun maa ri cha vaha chihin cuhva iyón chi ra. Sañahun chi ra chihin cha cachi ta cha ndaa.

⁸ Maa ri tuhun vaha cahun tacuhva vatyí yori cuvi tyaa cuatyí sicun. Tyicuan ta ra xaan iñi chi ndo cucahan nuu ra vatyí ma ñihi ra cuhva cahan ña vaha ra siqui ndo.

⁹ Cuhva tuhun chi ra yañi yo ra iyó chitoho, na caquichaha ra chi chitoho ra. Na sacuvi vaha ra tandihi cha catyi ra. Ta ma na cahan ra nu cahan ra.

¹⁰ Ta ma tin ri maa ra cha chii chitoho ra. Soco na saha vaha ra ñáyivi chi ra, tacuhva vatyí cunyehe ñáyivi vatyí vaha xaan tuhun Nyoo ra sacacú chi yo.

¹¹ Vatyí Nyoo sañahá ra vatyí vaha xaan ñáyivi cuvi ra. Ta cuñi ra sacacu ra chi tandihi ñáyivi.

¹² Chihin cuan sañahá Nyoo chi yo vatyí na saña yo cha quiñi caa cha nyacuví ñáyivi ña ñohó nuu chi ra ta cha quichi cuvi iñi ñu. Ta cachi coo yo siqui ñuhu ñáyivi ihya, tari cuhva cuñi Nyoo.

¹³ Ta sañahá tucu ra chi yo yoso caa cuatu tuhva yo cha vaha cha cuñihi yo quivi quichi tucu ra Jesucristo. Vatyí cucusi xaan cuñi yo cuhva cha cunyehe yo cha tyaqi quivi quichi ra cuvi Nyoo yo ra cahnú ca, ra cha sacacú chi yo.

¹⁴ Chaha ra ñáyivi ra tyiño nuu yo tacuhva sacacu ra chi yo ndaha tandihi cha quiñi caa. Ta sandundi ra chi yo tacuhva na cuvi yo ñáyivi cuenda ra, ta cha vaha tuhun cuan cuñi ra vatyí sacuvi yo maa maa ri cha vaha.

¹⁵ Ican ihya cuñi chi sañahun chi ñáyivi. Sanduniun iñi ñu. Ta cahun nuu ñu chihin ndusu yuhu Nyoo tatu ña vaha sacuvi ñu. Ta ma sacuvun ni noo cha ña vaha. Tyicuan ta ma cuvi ñihi ñu cuhva cahan nyaa ñu chuun.

3

Cuhva cha tahán chi sacuvi ñu yihí cuenda Nyoo

¹ Sanicohun iñi ñu tahan yo cuenda Nyoo na quichaha ñu chi gobiernu ta chi ra cacuvi tyiño. Ta chihin cha ñi iñi ñu na sacuvi ñu ñáá tyiño vaha cha catyi ra cuvi tyiño tyi sacuvi ñu.

² Ta ma cahan ña vaha ñu siqui ni noo ñáyivi. Na taxi ri coo ñu. Vaha ñáyivi na cuvi ñu. Na masu cuvi añima ñu chihin tandihi ñáyivi.

³ Vatyí nyacua nya maa yo ta tyicuan caa cuvi yo ta ityi chata ca. Tondo xaan chiyo yo. Ta ndava xaan cuvi iñi yo. Ñahri noo ityi vaha chica noo yo vatyí ra cuvi cuhna sandahvi ñaha ra chi yo. Chinyaca ñaha cuhva ña vaha cha cuñi coño ñuhu yo chi yo. Ta chinyacuví yo tandihi maa cuhva cuñi chi. Tandihí cha iyó chi inga ñáyivi ta cuñi yo coo chi yo. Tasi cuñi yo nyehe yo chi tahan yo. Ta ñáyivi ña cuñi nyehe ñu chi yo.

⁴ Soco Nyoo vaha ñáyivi cuvi ra ta sacacu ra chi yo. Yucuan cuvi nu sañaha ra vatyí cuñi ra chi tandihi ñáyivi.

⁵ Ñima cha cuenda cha cachi iyó yo ta sacacu ra chi yo, soco cha cuenda cha ndahvi cuñi ra nyehe ra chi yo. Ta chihin ñihi ra Jesús nacatyá yo cuatyí yo ta nacacu chaa yo, ta chahá Vatyí Ii ra noo ñáyivi chaa coo yo.

⁶ Ta chahá xaan Nyoo cha coo Vatyí Ii ra añima yo cha cuenda maa ra Jesucristo ra sacacú chi yo.

⁷ Chihin tumañi iñi cha chahá ra chi yo ta sacuvaha ra chi yo nuu ra. Ta vityin nyatú yo cunanyehe yo noo cha cha yaha chahá ra chi yo, noo ñáyivi cha ma naa ca maa.

⁸ Tandihí tuhun ihya ndicha xaan. Ta cuñi vatyí cahun tuhun ihya nuu ñu chinó iñi chi Nyoo chihin cha ñi iñun, tacuhva na saha cuenda ñu chi ñu, ta sacuvi ñu cha vaha. Vaha xaan tuhun ihya, ta cuatyinyee chi chi tandihí ñáyivi tatu quichahá ñu.

⁹ Soco ma tyasohun nu cuvi yuhu ñu tuhun cha ñima ri tuhun. Ma tyasohun tuhun cahán ñu vatyí ñu cuan ñañi xaan cuñi ñu coto ñu yoso caa vachi tata yo. Ma quichahun chi ñu cañi tahan cha cuenda ley cha tyaa ra Moisés ta cha naha. Ñahri maa tyinyeé cuan. Cha ñima ri tuhun cuvi.

¹⁰ Tatu iyó ñu cuñi ñu sacusiñ ñu chi ñu nyicú vehe ñuhu, çana chi ñu noo chaha o uvi chaha ta çatyí chi ñu tyi ña vaha sacuvi ñu. Ta tatu ña quichahá ñu, çasi nu quichi ñu.

¹¹ Vatyí ma chihin yucuan ri chitón vatyí ña vaha añima ñu tatu tyicuan caa nyacuví ñu. Chicoo cuatyí ñu. Ta suri maa ñu sacunaá ñu chi ñu.

Tyiño tyaa ra Pablo chi ra Tito

¹² Cutachi chi ra Artemas, o chi ra Tíquico nu nyaún. Quivi chaa ra, nducu cuhva ta cūhun ñuu Nicópolis vatyí cuñihi tahan yo yucuan. Vatyí tyai cuhva cuyahi yoo vichin yucuan.

¹³ Nducu cuhva tyinyeun chi ra Zenas ra chitó xaan ley, ta chi ra Apolos ta cūhva cha chiñuhú chi ra nu cachicá noo ra tuhun Nyoo.

¹⁴ Na cutuhva ñu yihí cuenda Nyoo sacuvi ñu cha vaha ta tyinyee ñu tatu iyó cha cumañi chi inga ñu. Tyicuan ta ña caha ri nyicón ñu chi Nyoo.

Nu ndihí cahán ra Pablo

¹⁵ Tandihí ra nyicu chihin, chahá ra nocumi chuun, Tito. Ta na cuhva nocumi chi tandihí ñu cuñí chi ndi cha cuenda cha in ri cuví yo cuenda Nyoo. Na nasoco Nyoo chi tandihí ndo.

Carta Cha Sacuhún Ra Apóstol Pablo Chi Ra Filemón

Nu tyaq ra Pablo noo tutu chi ra Filemón

¹⁻² Yuhu ra Pablo ta ra Timoteo yañi yo, tyaá ndi tutu ihya chi yoho, Filemón, tyi ra tahan ndi nu tyiño Sutu Mañi yo cuvún. Ñohí vehe caa ihya cha cuenda ra Jesucristo ta sacuhún ndi tutu ihya chuun ta chi ra Arquipo, ra cuví sindaro ra Jesucristo chihin yo, ta chi cu Apia, ta chi tandihí ñu ndu iín ri vehun.

³ Na nasoco Nyoo Sutu yo ta Sutu Mañi yo Jesucristo chi ndo. Ta na coo cha taxi ri cuñi añima ndo sahá ra.

Nu catyi ra Pablo vatyí ra Filemón vita xaan iñi ra ta chino vaha iñi ra chi Nyoo

⁴ Tyicuan ri nacuhvé tyahvi nyoo chi Nyoi cha cuendon nu nichohón iñi tuhun, nu chicán tahvi chi ra.

⁵ Vatyí ñihí tuhun tyi chinó vaha iñun chi Sutu Mañi yo Jesucristo, ta cuñi xaun chi ra ta chi ñu yihí cuenda ra.

⁶ Ñáyivi cha sacotón yoso caa cuhva chinó iñun chi Nyoo, nachino iñi tucu maa ñu chi ra ta vityin chicán tahvi cha cuenda ñu, na coto vaha ñu tandihí cha vaha cha chahá Nyoo chi yo cha cuenda ra Cristo Jesús.

⁷ Sií xaan cuñi, ta vaha xaan cuñi añime vatyí cuñi xaun chi ñu tahan yo, ta sandunyeún iñi ñu.

Nu chicán ra Pablo noo tumañi iñi chi ra Filemón cha cuenda ra Onésimo

⁸ Vasi iyó chi ityi chii cha catyi chuun ñáá cha tahán chi sacuvun vatyí apóstol cuví, soco ña cuñi saniñi chuun.

⁹ Vaha ca cha caquen noo tumañi iñi chuun cha cuenda cha cuñi yo chi Nyoo vatyí yuhu ra chahun cuví ta ñohí vehe caa cha cuenda ra Cristo Jesús.

¹⁰ Chiquén noo tumañi iñi chuun cha cuenda ra Onésimo vatyí nanduví ra sehi cha cuenda Sutu Mañi yo nu ñohí vehe caa ihya.

¹¹ Quivi cuan musu cuví ra chuun, ta chaha xaan ra tisihi, soco vityin musu vaha cuví ra, tyi vaha sacuví ra tyiño nui ta tyicuan caa tucu cusacuvi vaha ra tyiño nuu maun.

¹² Ta vityin sacunuhí chi ra chuun. Ta cuñi vatyí naquehen cuenda vahun chi ra tari cha mai cuví.

¹³ Vasi cuñi cha ndoo ra ihya chihin, ta tyinyee ra chii tyiño nuu maun cha niri ca cha ñohí vehe caa cha cuenda tuhun Nyoo,

¹⁴ soco ña cuñi cha ndoo ra tyiño nuun tatu ña ndoun vaha, vatyí tacuhva sacuvun tumañi iñi chii soco chihin cha iyó vaha iñun ta ñima ca chihin cha saniñi chuun.

¹⁵ Ra Onésimo chaha xaan ra tisihi chuun quivi cuan, soco vaha xaan nanduví ra vityin, vasi yucuan cuenda canyahá ra chuun ta vityin nachaa ra nu nyaún vatyí cuacunyaa ra chuhun tyicuan ri maa

¹⁶ Soco ñima tari noo musu ri, soco tari noo ra vaha ca. Vatyí yañi yo cuví chi ra. Ta cuñi xain chi ra, ta vihi ca yoho, tahán chi cha cuñi con chi ra. Vatyí ñima noo yañun cuenda coño ñuhu ri cuví chi ra. Soco yañun cha cuenda Sutu Mañi yo cuví chi ra ñandihí.

¹⁷ Tatu ndicha cha ra tahun cuví chii, cuñí vatyí naquehun chi ra Onésimo tari cha chi yuhu naquehún.

¹⁸ Tatu iyó cha sacuví ra chuun, o tatu yosoyicá ra chuun, tyiyahvi mai.

¹⁹ Yuhu ra Pablo tyái tuhun ihya vatyí cutiyahvi cha yosoyicá ra chuun, cha nuu cha tahán chi catyí chuun vatyí yosoyicón nyacua nya ñayivun chii.

²⁰ Chiquén chuun, yañi, na sandusiun iñi ta naquehun chi ra Onésimo chihin cha vaha. Sanduchaa añime chihin cha iin ri cuví yo cha cuenda ra Cristo.

²¹ Tyái tutu ihya chuun vatyí chité tyi cuaquichahun tuhun cahín. Ta chité vatyí ñima yucuan ri, soco cuaha ca cuasacuvun.

²² Ta nonga cha chiquén chuun tatu ma sanduvahun chiin noo nu cuví cunyai chihin ndo. Ta cuñí vatyí caçan tahvun cha cuende, na cuhva Nyoo cha cuhin nu nyaá ndo.

Nu ndihi caçan ra Pablo ta chahá ra nocumi chi ñu

²³ Vachi nocumi chuun sahá ra Epafras, ra ñoho chihin vehe caa cha cuenda ra Cristo Jesús.

²⁴ Ta vachi tucu nocumi chuun sahá ra Marcos, ta ra Aristarco ta ra Demas, ta ra Lucas, ra catyinyeé chii chihin tyiño Nyoo.

²⁵ Na nasoco Sutu Mañi yo Jesucristo chuun. Ta na cuví chi tyicuan caa.

Carta Cha Chino Cha Cuenda Ñáyivi Israel, Ñu Cahán Sahan Hebreo

Nyoo cahán ra chihin yo chihin yuhu Sehe ra

¹ Ta tyembu chahnu cahán Nyoo cuaha xaan chaha, ta cuaha xaan cuhva, chihin sutu chahnu yo, ñu chiyo ta cha naha. Cahán ra chihin yuhu ra cacuvi profeta, ra cha cachaha cuenda tuhun cahán ra.

² Ta vityin nu cua ndihi tyembu ihya, cahán ra chihin yo chihin yuhu Sehe ra. Ta tandihi maa ta natyaa ra ndaha Sehe ra. ñin ri cuví ra chihin Sehe ra ta savaha ra ñuhu ñayivi.

³ Cha cahnu ta cha tyaqui cuví Nyoo iyó chi Sehe ra, vatyí suri ican ra cuví maa maa xiñahñu Nyoo. Ta chihin tunyee ñiñi tuhun cahán ra, nyisó cuenda ra tandihi cha iyó. Ta cha yaha sandachí ra cuatyí yo, ta chicunyaá ra chiyo vaha Nyoo, ra cha cahnu ca cuví. Ta vityin nyacá ñaha ra chihin ra nya andivi.

Cahnu ca cuví Sehe Nyoo ta ñima ca ángel

⁴ Ta tyicuan caa cahnu xaan ca nanduví Sehe Nyoo ta ñima ca tandihi ángel. Ta cahnu ca sivi chaha Nyoo chi ra ta ñima ca ángel cuenda ra.

⁵ Vatyí Nyoo ña catyí ra ni noo chaha chi ni noo ángel tyehe caa:

Yoho cuvún Sehi.

Ta yuhu chahí ñayivi coun vityín.

Ta ni ña cahán ra tuhun ni noo ángel tyehe caa:

Yuhu cucuví Sutu ra.

Ta maa ra cucuví Sehi.

⁶ Soco quivi saquichí Nyoo chi Sehe nuu ra siqui ñuhu ñayivi, catyí ra:

Na sacahnu tandihi ángel cuende chí ra.

⁷ Ta cahán tucu ra tuhun ángel cuenda ra ta catyí ra:

Sacuví vatyí tatyí cuví ángel cuende,

ta tari yaa ñuhú cuví ra sacuví tyiño nui, catyí Nyoo.

⁸ Soco tuhun Sehe ra catyí ra tyehe caa:

Nyoo cuvún, ta cua cunyaca ñahan tyicuan ri maa chihin cha ndaa ta chihin cha ndicha.

⁹ Vatyí cuñún cha vaha ta cutasi cuñún cha ña vaha.

Yucuan chaha vatyí yuhu, ra cha cuví Nyoo cuendon, cuaha ca tusii ñiñi chahí chuun, ta ñima ca chí ra tahun.

¹⁰ Ta catyí tucu Nyoo chí Sehe ra tyehe caa:

Yoho, ra nyacá ñaha cuvún. Ta quivi xihna ri savahun ñuhu ñayivi ta chihin ndahun savahun andivi.

¹¹ Maa ñuhu ñayivi ta andivi cundihí chi, soco yoho, cundoun tyicuan ri maa. Tandihí maa cuan cu cuchahnu tari sahma.

¹² Ta cunicava tahun chi tari noo vestido.

Ta cunasama chí tari nasamá ñayivi sahma ñu.

Soco yoho suri maa ra cuvún tyicuan ri maa.

Ta ma ndihí maa ñayivun, catyí Nyoo chí Sehe ra.

¹³ Nyoo ni noo chaha ña catyí ra chí ni noo ángel tari catyí ra chí Sehe ra tyehe caa:

Cunyaun chiyo vahi nyacua nya cha caquin chí ra xaan ñiñi chuun chahun.

14 Soco tandihí ángel, tatyí cacuví ra ta tyaa Nyoo tyiño chi ra cha caca ra ta tyinyee ra chí ñu cucacu añaíma.

2

Cahnu xaan cuví tuhun cha sacacú Nyoo añaíma chí yo

1 Yucuan chaha vatyí cuñí chí cha quichahá xaan ca yo tuhun ndicha cha chíñi yo, coto cunuhu yo ityi quiñi caa.

2 Ta cha naha catyí Nyoo chí ángel, na cuhva ra ley ra chí ra Moisés. Nyoo catyí ra tyi tahán chí quichaha ñáyivi. Ta ñu casacuví cuatyí ta ña quichaha ñu ley ra, tachí tuñi ra chí ñu tari cuhva catyí maa ley cuan.

3 Cahnu xaan cuhva sacacú Nyoo añaíma yo. ¿Yoso caa cucacu añaíma yo tatu sacunaa yo cuhva cuan? Cha xihna ri suri maa Sutu Mañi yo Jesucristo cahan ra tuhun yoso caa cuví cacu añaíma yo. Ta yaha cuan ta ñu cha cachiñi tuhun cahan ra, chitó ñu tyi ndicha ta canacatyí tucu ñu chí maa yo.

4 Ta sñn ri, Nyoo sañaha cachi ra chí yo chihin cuaha milagru ta cha iyo, vatyí ndicha cha sacacú ra chí yo. Ta chaha ra Tatyí Ii ra chí yo sñn sñn cuhva, yoso cuhva cha cuñi maa ra. Ta chihin tandihí cuan sañaha ra chí yo vatyí ndicha cha sacacu ra añaíma yo.

Ra Jesucristo cuví ra cha cua sacacu añaíma yo

5 Nyoo, ña chaha ra cha cunyaca ñaha ángel chí ñuhu ñáyivi chaa cha cahán yo tuhun vityin.

6 Vatyí iyó noo nuu cahán chí nu tutu Nyoo tyehe caa: Nyoo Suti ¿yóó ra cuví rayi vatyí nichon iñun tuhun ra? ¿Yóó ra cuví Sehe ra vatyí tñn cuendon chí ra?

7 Vatyí suhva quivi, ndahvi ca sacuvun chí ra, ican saha ángel. Soco yaha cuan sacahnú xaun chí ra. Ta sahá xaun ñáyivi chí ra. Ta chahun cha cunyaca ñaha ra siqui tandihí cha savahun.

8 Tandihí cuan natyaun ndaha ra.

Tandihí maa, Nyoo chaha cha cunyaca ñaha ra, cuví chí cuan. Soco nyehé yo vatyí cumañi ca quichaha tandihí cuan chí ra.

9 Soco nyehé yo chí ra Jesús vatyí suhva ri quivi, sanocuee Nyoo chí ra ican saha chí ángel. Soco cha cuenda cha cuñi xaan Nyoo chí yo, chaha cuenda ra chí ra Jesús cha cúvi ra cha cuenda tandihí yo. Ta vityin sahá xaan Nyoo ñáyivi chí ra ta sacahnú xaan ra chí ra cha cuenda tindoho cha nyehé ra quivi chí ra.

10 Tandihí maa cha iyó, cha cuenda maa Nyoo cuví. Ta maa ra savaha. Ta cuñi ra vatyí tandihí sehe ra ta chí maa ñu cucuvi tandihí cha tyaqui cha iyó gloria. Ta chihin tindoho cha sanyehe ra chí ra Jesucristo Sehe ra, sacuvaha ra chí ra. Vaha xaan quita ra.

11 Sehe Nyoo cuví chí ra Cristo, ra sacacú añaíma ñáyivi. Ta suri sehe Nyoo nanduví chí ñáyivi ñu chinó iñi chí ra. Yucuan chaha vatyí ña cucahan nuu ra Cristo catyí ra yañi ra chí ñu, vatyí ñn ri sutu ra chihin ñu.

12 Vatyí catyí ra Cristo nu tutu Nyoo tyehe caa: Cucahin tuhun maun chihin yañi.

Ta cucate yaa cuendon nu ndú ñn ri ñu.

13 Catyí tucu ra tyehe caa: Yuhu cuita iñi chí Nyoo.

Ta catyí tucu ra:

Ihya nyaí chihin sehi, cha chaha Nyoo chí, catyí ra.

¹⁴ Ta tandihi yo cha cuví yo sehe ra, coño ñuhu cuví yo ta yihí ñiñi yo, yucuan chaha ra Jesús ñandihí, suri coño ñuhu ta ñiñi ñáyivi nyiso ra suhva quívi, tacuhva cuví chaa tuhun chihí chí ra, ta tyicuan caa ta satani ra chí cuihna, ra cha chiyo tunyee iñi chí cha cahñi chí ñáyivi.

¹⁵ Ta tyicuan caa sacacú ra chí ñu cha yuhvi chí tuhun chihí. Chiyo ñu tari noo musu ra ña vaha vatyi yuhvi ñu cha cúvi ñu.

¹⁶ Cha ndicha vatyi ña quichí tyinyee ra chí ángel, soco chí ñáyivi tata ra Abraham quichí tyinyee ra.

¹⁷ Yucuan chaha cuñi chí cha nduvi ra tari ñáyivi, tacuhva cuví ra noo ra ndicha cundahvi cuñi chí yo. Ta tyicuan caa cuví ra tata sutu cahnu cha cuenda yo nuu Nyoo. Ta tyicuan caa ta sacuachiyó ra cuatyí ñáyivi cha cuenda tindocho cha nyehe ra.

¹⁸ Vatyi maa maa ra nyehe tindocho quívi nducú nyehe ra ña vaha chí ra, yucuan chaha, vityin cuví tyinyee tucu ra chí maa yo tatu nducú nyehe ra ña vaha chí yo.

3

Cahnu ca cuví ra Jesús ta ñima ca ra Moisés

¹ Yañi, nyoho chaha cuenda ndo chí ndo chí Nyoo. Ta cuví tucu ndo ñu cha nacanã Nyoo chí vatyi coo ndo chíhin ra andívi. Ta cha cuenda cha nyehe ra Cristo Jesús tindocho tyiño nuu ndo, yucuan chaha, nyehe vaha ndo cuhva vaha iyó ra. Vatyi ican ra cuví ra cha saquichí Nyoo chí vatyi cuví ra tata sutu cahnu cuenda yo cha chinó iñi yo tuhun Nyoo.

² Ta maa ra quichaha ra tandihí cha catyí Nyoo cha sacuvi ra, tari quichaha tucu ra Moisés ta cha naha, ta sacuvi ra tyiño cha tahañ chí sacuvi ra nuu ñáyivi sehe Nyoo.

³ Ta ra Jesucristo cahnu ca ra cuví ra, ta ñima ca ra Moisés. Vatyi noo ra cha savahá vehe, cahnu ca cuví ra ta ñima ca maa vehe cuan.

⁴ Tahan tahan vehe, iyó ra savaha chí chí, soco Nyoo cuví ra cha savaha tandihí maa cha iyó.

⁵ Ra Moisés, quichaha vaha ra chí Nyoo ta sacuvi ra tyiño nuu ra cha cuenda ñáyivi Israel ta cahan ra tuhun cha cusacoto Nyoo nu cuahan ca chí ityi nuu.

⁶ Soco ra Cristo ra cuví Sehe Nyoo, suri quichaha vaha ra chí Nyoo ta ican ra nyacá ñaha vehe Nyoo. Ta vehe cuan ican cuví maa yo, tatu saní ca yo iñi yo cuhun yo ityi nuu chíhin Nyoo ta itá iñi yo chí ra nyacua nya nu ndihí, ta tyicuan ri cusii cuñi yo nyatú yo cha cuñihí yo.

Ñu chinó iñi chí Nyoo, nyitatú ñu chíhin Nyoo

⁷ Yucuan chaha cuñi chí saha cuenda yo chí yo, tari catyí Tatyí Ii Nyoo nuu tutu Nyoo tyehe caa:

Tatu chíni ndo tuhun cahán Nyoo chíhin ndo vityin,

⁸ ma sandava ndo añima ndo, tari sacuvi ñu ña quichaha chí Nyoo quívi canducú nyehe ñu chí ra nu chicã noo ñu chíqui ndí cuan.

⁹ Tyehe caa catyí Nyoo: Ñáyivi cuan nducú nyehe ñu chí, vasi chíhí cha uvi xico cuiya nyehe ñu cha sacuvi.

¹⁰ Yucuan chaha cuxajín chí ñu, ta catyí tyehe caa: “Tyicuan ri chicá uvi iñi ñu, ta ña cuñi ñu coto ñu ityi mai.”

11 Yucuan chaha cuxajin chi ñu, ta catyi cachi chi ñu, vaty ma quihvi ñu nyitatu ñu chihin, catyi Nyoo.

12 Yañi, saha ndo cuenda chi ndo coto cu ña vaha añima ndo ta coto yoso ri caa ta sandoo ndo chi ra cuví Nyoo nyitó cha cuenda cha ña chinó ca iñi ndo chi ra.

13 Soco sanñi ndo iñi tahan ndo tahan tahan quivi, cha ni ri ca cha chahá ca chi cuhva vityin, tacuhva vaty ni noo ndo ta ma sandavi ñaha cha quiñi caa chi ndo, ta ndundava añima ndo.

14 Vaty tatu sanñi yo iñi yo chihin Nyoo nyacua nya nu ndihi ñayivi, yucuan ta in ri cuñihi yo cha vaha chihin ra Cristo.

15 Catyi chi nu tutu Nyoo vaty saha yo cuenda chi yo tyehe caa: Vityin tatu nyoho ta chiñi ndo cha catyi Nyoo.

Ma sandava xaan ndo añima ndo, tari sacuvi ñu ña quichaha chii, catyi Nyoo.

16 ¿Yóo ñu cha cachiñi tuhun cahan Nyoo ta ña tyasoho ñu? Tandihí ñu Israel cha tava ra Moisés Egipto ta cha naha, ican ñu cuan.

17 Ta ¿yóo chi cuxaan Nyoo chichi cha uvi xico cuiya? Suri chi ñu cuan, ñu cha chicoo cuaty. Ta cachiñi ñu nu chiqui ndi nu chica noo ñu.

18 ¿Ta yóo chi catyi cachi Nyoo tyi ma quihvi ñu, cunyatatu ñu chihin ra? Chi ñu cha ña tyasoho nu cahán ra.

19 Nyehé yo vaty ña cuví quihvi ñu cuan vaty ña chingo iñi ñu chi ra.

4

1 Yucuan chaha, cha ni ri ca cha iyó ca quivi cuví quihvi yo cunyatatu yo chihin Nyoo, cuñi chi saha yo cuenda coto ma cuví quihvi nya noo nyoho nu cunyatatu yo chihin Nyoo.

2 Vaty chiñi tucu yóo tuhun Nyoo cha sacacú ra añima yo, tari chiñi maa ñu Israel cuan. Soco ñahri maa tuhun cha chiñi ñu, vaty chiñi ndi ri maa ñu, ta ña chingo iñi ñu.

3 Soco yóo cha chinó iñi yo, ican yo cuví ñu quihvi nyitatu chihin Nyoo. Ta cha cuenda ñu ña chinó iñi cuví chi tari catyi Nyoo tyehe caa: Yucuan chaha cuxajin chi ñu ta catyi cachi chi ñu vaty ma quihvi ñu nyitatu ñu chihin, catyi Nyoo.

Soco cha nyaá nu nyitatu yo chihin Nyoo vaty nyitatu Nyoo cha sandihí ra tyiño sahá ra nyata savaha ra ñuhu ñayivi.

4 Vaty yihí nu catyi chi nu tutu Nyoo cha cuenda quivi cu ucha nu ndihi vitya. Tyehe caa catyi chi:

Nyoo nyitatu ra nu cu ucha quivi, vaty ndihí tyiño saha ra.

5 Ta inga tucu chaha catyi chi nu tutu Nyoo tyehe caa:

Ni noo quivi ma quihvi ñu nu cunyatatu ñu chihin, catyi Nyoo.

6 Ñu cuan, ñu cha xihna ri cachiñi tuhun cha sacacú Nyoo añima yo, ña quihvi ñu cha cuenda vaty nacahnú ñu nu cahán Nyoo. Soco nyaá cha quihvi inga ñu.

7 Vaty cha yaha nacahnú ñu Israel cuan nu cahan Nyoo, natyaa tucu ra cuhva vaty nya inga quivi cuví quihvi yo cunyatatu yo chihin ra, ta ican cuví quivi vityin. Ta cahán Nyoo tuhun quivi vityin chihin cha catyi ra David. Nyaá chi nu tutu Nyoo tyehe caa:

Vityin tatu nyoho ta chiñi ndo cha catyi,

Ma sandava xaan ndo añima ndo, catyi Nyoo.

8 Tyehe ta chinyaca ra Josué chi ñu Israel cuan nu cunyatatu ñu chihin Nyoo, ma cahan ca Nyoo inga chaha tuhun cha cuenda inga quivi.

9 Soco nyaá ca nu cuví nyitatu ñu yihí cuenda Nyoo chihin ra.

10 Vatyí ñu quihví nyitatu chihin Nyoo, ña chicá ca iñi ñu soco nyitatu ñima ñu tari nyitatu Nyoo quivi ndihí tyiño saha ra.

11 Cuñí chi saniñi yo chinó iñi yo chi Nyoo tacuhva cuví nyitatu yo chihin ra, coto yoso ri caa nya noo nyoho sacuvi ndo tari sacuví ñu Israel cuan vatyí ña cuñí ñu chino iñi ñu chi ra.

12 Vatyí tuhun Nyoo, nyitó chi, ta iyó tunyee iñi chi chi. Ta xaan ca chi ta ñima ca mityi cha xaan ninduvi chiyo yuhu, ta nyee chi nyacua nya chichi ñima yo ta nyacua nya chichi cha chíñi tuñi xiñi yo, nyacua nya chichi tuhun xehe cha caá ñima yo. Ta sañahá cachi Nyoo ñáá cha chicá iñi yo ta ñáá cha caá ñima yo tatu vaha o ña vaha.

13 Ñahri maa cha savahá Nyoo ta cuví tixehe nuu chi chi ra. Tandihí maa ta nyehé ra. Ta chi ra nyaá nacuhva cuenda yo cha sacuví yo.

Ra Jesús cuví ra tata sutu cahnu cha cahán chaha yo nuu Nyoo

14 Ra Jesús Sehe Nyoo, cuví ra tata sutu cahnu cha cuenda yo, vatyí quihví ra nuu Nyoo ta cahán ra chaha yo. Yucuan chaha cuñí chi cha ma sandihí yo cha chinó iñi yo chi ra.

15 Vatyí ra cuví tata sutu cha cuenda yo cuví naquehen ndahvi ra chi yo tatu cuihya cuñí yo chihin Nyoo, vatyí chitó tucu maa ra cha cuví tindoho cha nyehé yo vatyí nyehé tucu maa ra tandihí nuu tindoho, sahá ra ña vaha cha nducú nyehé ra chi ra, soco maa ra Jesús, ñahri cuatyí ra chicoo.

16 Yucuan chaha cuví tuhva yo nuu nyaá Nyoo ta cahan yo chihin ra chihin cha ña yuhví yo vatyí cuñí xaan ra chi yo, ta ndahvi cuñí ra nyehé ra chi yo. Ta cha cuenda cha vaha ñáyivi cuví ra, tyinyeé ra chi yo nu nyehé yo tindoho.

5

1 Tandihí ra cuví tata sutu cahnu ca cuenda ñu Israel, ñáyivi cuví ra. Ta na cachí Nyoo chi ra vatyí cahan ra chaha tandihí ñu nuu Nyoo, ta cuhva cuenda ra cha chahá ñu chi Nyoo, ta cahñi ra quití cha cuenda cuatyí ñu.

2 Ta suri vachi quivi ndahvi cuñí ra cacuví sutu cha nducú nyehé ra ña vaha chi ra, yucuan chaha cuví cundahvi cuñi ra nyehé ra chi ñáyivi ña chitó maa, ta tyinyeé ra chi ñu quitá caxiin ityi vaha Nyoo, na ndu uví iñi ñu cuatyí ñu.

3 Ta cha cuenda cuatyí maa ra ta cha cuenda cuatyí ñáyivi, cachahñi ra quití ta chahá cuenda ra chi Nyoo na cahnya ra cuatyí ñu.

4 Yori sacuvi ri maa sutu chi. Maa Nyoo cuví ra caná chi ra, ta chahá ra cha cuví ra tata sutu, tari sacuví ra chihin ra Aarón ta cha naha.

5 Ta tyicuan caa tucu ra Cristo, ñima maa ra sacuví ra sutu chi ra, soco maa Nyoo chahá cha cuví ra, tari catyí maa ra tyehe caa:

Yoho cuví Sehi.

Yuhu chahí ñáyivi coun vityin, catyí Nyoo chi ra Cristo.

6 Tari catyí tucu ra chi ra nu inga nu cahán chi tyehe caa:

Yoho cuvún tata sutu tyicuan ri maa.

Cuvún tari ra Melquisedec.

7 Ta quivi chiyo ra Cristo ihya siqui ñuhu ñáyivi, chicán tahvi ra chi Nyoo, ta chacú chaa ra ta cahan ra chihin Nyoo vatyí ican ra cuví ra iyó tunyee iñi chíi cha sacacú chi ra ndaha tuhun chíi. Ta Nyoo chíñi ra tuhun cahan ra vatyí sacuví ra tandihí cha catyí Nyoo.

8 Yucuan chaha vasi Sehe Nyoo cuví chi ra Cristo, soco cutuhvá ra cha quichaha ra chi Nyoo chihin cha nyehé ra tindoho.

⁹ Ta cha yahā cha sacuvahā Nyoo chi ra, tyicuan ta cuvī ra ra sacacú añima ñáyivī tacuhva coo ñu chihin Nyoo tyicuan ri maa, tandihī ñu cha quichahá tuhun cahán ra.

¹⁰ Vatyī Nyoo tyaa tyiño chi ra cha cuvī ra tata sutu cahnu, tari ra Melquisedec.

Yīca xaan cha sandihī yo cha chinó iñi yo tuhun Nyoo

¹¹ Cuaha xaan nyaá cahan yo siqui tuhun ihya, soco yīi xaan nacatyī yoso caa cuahan, vatyī nyoho ña cuñi ndo cutuñi iñi ndo.

¹² Cha naha xaan chinó iñi ndo chi Nyoo, cuñi chi cha cuvī ndo ra sacuahá ta sañaha ndo chi inga ñu. Soco nyoho ni cuñi chi cha nacatyī tucu ndi inga chaha chi ndo tuhun cha xihna ri chiñi ndo tuhun Nyoo. Tari cha lee cuvī ndo chihin tuhun Nyoo, vatyī tari cha chaxin ca ndo cha nuu cha cachi ndo nyayu.

¹³ Ta ñu cuvī tari cha lee cha chaxín, ta chaa ¹³ ñu cutuñi iñi ñu yoso caa coo vaha ñu nuu Nyoo.

¹⁴ Soco nyayu vaha cuvī chi cha cuenda ñu chahnu chihin tuhun Nyoo: ñu cha cutuñi vaha iñi tuhun ra, nacotó ñu nya cha vaha ta nya cha ña vaha.

6

¹ Yucuan chaha ma ndoo ri yo chihin cha xihna ri cutuhva yo tuhun ra Cristo, cuhun yo ityi nuu ca tacuhva cuvī yo ñáyivī chahnu chihin tuhun Nyoo. Ma ndoo ri yo chihin tuhun cha yahā cutuhva yo, ta cuñun tuhun cha ma nducu yo cuhva cha cuvaha yo nuu Nyoo chihin cha sacuvī yo cha vaha, ta tuhun nachino iñi yo vatyī sacacú Nyoo chi yo.

² Ma ndoo yo chihin tuhun cha yahā sacuvi yo, tari cha condutya yo, tari cha tyisó yo ndaha yo siqui ñu chiño iñi chi Nyoo na nasoco ra chi ñu, tari tuhun cha cunandoto tandihī ñáyivī cha yahā chihī, ta tari tuhun cha cucutuñi chi tandihī ñáyivī nuu Nyoo ta yihī ñu cuhun ñu anyaya tyicuan ri maa. Ma ndoo ri yo chihin tandihī cuan.

³ Soco tatu Nyoo ta chaha ra, sacuvi yo ihya: cuhun yo ityi nuu ca.

⁴⁻⁶ Vatyī ñu cha yahā naquehen cuenda cha ndichin Nyoo noo chaha, chitó ñu cha chahá Nyoo, ta nyaá Tatyī Ii Nyoo chihin ñu. Ta cha chitó ñu yoso caa cha vaha tuhun Nyoo, ta cha ñihī ñu tunyee iñi Nyoo. Ta chihin tunyee iñi cuan cunyaca ñaha Nyoo ñuhū ñayivī chaa. Tatu cha yahā naquehen cuenda ñu tandihī cha vaha cuan noo chaha, ta yahā cuan ta sandihī ñu cha chinó iñi ñu chi Nyoo, ma cuvī ca cha ndu uvi iñi ñu inga chaha. Vatyī suri maa ñu tari cha tyaa ñu chi ra Cristo nu cruzi inga chaha, vatyī chahá ñu cha cuacu nyaá ñáyivī chi ra.

⁷ Añima ñáyivī cuvī tari noo ñuhú nu sahá tyiño ñu, vatyī noo ñuhú tahan ri chaha cha coon savī, chihī ñuhú cuan ndutya savī cuan. Tatu vaha ñuhú cuan ta vaha cuvaha cha tachī ñu nuu chi, cunasoco Nyoo chi ñuhú cuan.

⁸ Soco tatu cañá iñu ta cañá nyava nuu chi, ñahri maa tuhun. Ta cusoco Nyoo chi ñuhú ña vaha cuan ta cucaya chi. Ta tyicuan caa tucu cucuvi chi ñu cha sandihī cha chinó iñi chi Nyoo.

⁹ Yañi, vasi cahán ndi tyicuan caa, soco chitó vaha ndi vatyī nyoho sacuvī ndo cha vaha, maa maa ri cha sacuvī ñu cha cacú añima sacuvī ndo, ta ña sacuvī ndo tari ñu cuvī tari ñuhú ña vaha cuan.

¹⁰ Vatyí Nyoo, ra vaha cuví ra, ta ma naa ifíi ra cha sacuví ndo. Ta nyehé ra vatyí cuñí xaan ndo chi ñu yihí cuenda Nyoo, vatyí tyinyee ndo chi ñu, ta tyinyee ca ndo chi ñu nya vityín.

¹¹ Cuñí ndi vatyí na cunií ca ifíi ndo nyacua nya quichi Sutu Mañi yo, tyicuan caa ta cuñihi ndo tandihi cha nyatú ndo.

¹² Ña cuñí ndi cha cusuchan ndo, soco saha ndo cuenda chi ñu cha chinó vaha ifíi chí Nyoo ta saçuví ndo tari sacuví ñu. Vatyí ñu chinó vaha ifíi chí Nyoo chihin cha cama ifíi ñu, ican ñu ñihí cha catyí Nyoo tyi cuhva ra chi yo.

¹³ Vatyí ta cha naha catyí Nyoo chi ra Abraham, vatyí cuhva ra noo cha cuhva ra chi ra. Ta Nyoo tyaa ra cuhva cha cuhva ra, ta noo ri tuhun cahan ra vatyí maa ra, Nyoo cuví ra.

¹⁴ Ta tyehe caa catyí ra: “Cha ndicha vatyí cunasoco xain chuun ta cuaha xaan sehun cucuhve”, catyí ra chi ra Abraham.

¹⁵ Ta ra Abraham chihin cha cama ifíi ra, nyatu ra tuhun cahan Nyoo chihin ra, ta tyicuan caa naquehen cuenda ra cha catyí Nyoo tyi cuhva ra chi ra.

¹⁶ Tatu noo ñáyivi cuacuhva ñu noo cha cuacuhva ñu chi tahan ñu ta tyanaha ñu sivi noo ra cahnu ca. Ma chihin yucuan ri.

¹⁷ Ta yucuan chaha vatyí Nyoo minoo ri tuhun cahan ra, vatyí cuñí ra cha coto ñáyivi vatyí ndicha tuhun cahán ra, ta ña nasamá ra tuhun cahán ra.

¹⁸ Yucuan chaha iyó uvi tahan cha ma cuví nasama chí. Noo cuví cha catyí Nyoo tyi cuhva ra nyatu chí ra Abraham, ta cha cu uvi, noo ri tuhun cahan ra vatyí maa ra, Nyoo cuví ra. Ta Nyoo ña cahán ra cuendu. Yucuan chaha tandihi yo cha nyañaá yo chi ra, ni ifíi yo cunyeé ifíi yo chi ra, ta nyatú yo cha tyaa ra cuhva cha cuhva ra chi yo.

¹⁹ Tari noo barcu cha nuhñi noo caa vee, coto cuhun chí chihin tatyí, ta tyicuan caa quihí ifíi yo cha sacacú ra Cristo añima yo. Ta cha quihí ifíi yo chí ra, nuhñi yo chihin Nyoo ra nyaá inga chiyo cortina, o nya gloria cuví Cuan.

²⁰ Vatyí ra Jesús cha quihvi ra yucuan ta nuña ra ityi nu cuhun yo nu nyaá Nyoo. Ta ican ra Jesús cuví ra minoo tata sutu tyicuan ri maa, tari ra Melquisedec.

7

Ra Jesús cuví tata sutu tari ra Melquisedec

¹ Ra Melquisedec cha cahín tuhun, cuví ra rey ñuu Salém, ta cuví ra tata sutu cuenda Nyoo, ra cuví ra cahnu ca. Quivi cha cuandichi ra Abraham cha chahan ra chicañi tahan ra chihin suhva ra cacuvi rey, ta cuví chasaha ra chí ra, tyicuan ta quitá ra Melquisedec ityi nuu ra ta nasocó ra chí ra.

² Ta ra Abraham uchi uchi tinyaa ra siquí cha saha ganaa ra nu chicañi tahan ra, ta chaha ra chí ra Melquisedec. Ta sivi ra Melquisedec cuan cuñí chí catyí: “Rey, ra cuví ra vaha.” Ta rey ñuu Salem cuan cuví ra, yucuan chaha cuví ra: “Rey vaha cha chahá cha taxi coo añima ñáyivi.”

³ Ña catyí tuhun Nyoo yóo cha cuví sutu ra ta sihi ra, ni ña cahán chí tuhun yóo ñáyivi chí ra. Ni ri ña cahán chí tuhun ama cacú ra, ni ama chihí ra. Yucuan chaha cuví ra tari caá Sehe Nyoo, noo tata sutu tyicuan ri maa.

⁴ Soco, vityin nyehé ndo yoso cha cahnu cuví ra Melquisedec, vatyí ra Abraham tinyaa ra uchi uchi siquí cha saha ganaa ra chí ra cacuvi rey cuan nu chicañi tahan ra, ta chaha ra chí ra Melquisedec.

⁵ Tyehe ta tata ra Abraham cuví ra Melquisedec, ta cuví ra sutu, ma catyí yo tyi ra cahnu ca cuví ra. Vatyí nu cuahan ca chí ityi nuu ta suri maa ley Nyoo

saniñi chi ñáyivi tata ra Abraham nacuhva ñu uchi uchi cha saha ganaa ñu chi ra cacuví sutu tata ra Leví, vasi tata ra Abraham cacuví chi ra tari maa ñu.

⁶ Ta ra Melquisedec, ñima tata ra Leví cuví chi ra, ta ni ñima tata ra Abraham, soco vita ri tyi quehen ra uchi uchi siqui tandihí cha ñihí ra Abraham. Ta nasoco ra Melquisedec chi ra Abraham, ra cha chaha Nyoo promesa chii.

⁷ Ta chitó cachi yo vatyi cahnu ca cuví ra cha nasocó cuan, ta ñima ca ra cha nasoco ra chi.

⁸ Nyehé yo vatyi cahnu ca ra cuví ra Melquisedec cha nuu inga ra caquehén cuenda uchi uchi siqui cha iyó chi ñáyivi, vatyi rayi ri cacuví ra cuan, ta tuhva chaa tuhun chihi chi ra. Soco tuhun ra Melquisedec cahán chi nu tutu Nyoo ta catyí chi tyi ñahri tuhun chihi iyó chi ra.

⁹ Ta ra Leví, chihin sehe ra, ra cacuví tata ra Abraham, ican ra cacuví tata sutu cha tahán chi caquehén cha uchi uchi siqui cha iyó chi ñáyivi. Soco tari quivi tyiyahví tucu ra Leví cuan uchi uchi cha saha ganaa ra chi ra Melquisedec cuví cuan, vatyi ra Abraham tyiyahví ra.

¹⁰ Vatyi ra Leví, tata ra Abraham cucuvi chi ra, vasi ta cacu ca ra quivi chisatahan ra Melquisedec chi ra Abraham.

¹¹ Ta ra cacuví tata ra Leví suri tata ra Aarón cacuví chi ra, ican ra cacuví sutu cuenda yo ñu Israel, ta cha cuenda ra cuan quichí ley chahnu Nyoo. Ta vityin tyehé ta cuví nduvaha coo yo chihin Nyoo cha cuenda cha sacuví yo cha catyí ley cuan, yucuan ndicha ña ñiñi ca cha quichí ra Cristo ra cuví tata sutu tari ra Melquisedec, ta ñima tari ra Aarón.

¹² Vatyi tatu Nyoo ta nasama ra chi ra cuví sutu, cuñi tucu chi cha nasama ley ñandihí.

¹³ Ta Sutú Mañi yo cha cahán tutu Nyoo tuhun, ñima tata ra Leví ta ra Aarón cuví ra, soco tata inga sehe ra Israel cuví chi ra. Ta ni noo ra vachi tata cuan ta ña tuhvá ra cuví sutu.

¹⁴ Vatyi chitó vaha yo vatyi Sutú Mañi yo tata ra Judá, sehe ra Israel vachi ra, ta ra Moisés ñahri maa tuhun tata ra Judá cahan ra quivi cahan ra tuhun ra cacuví sutu.

¹⁵ Ta yucuan nyehé vaha yo, vatyi Nyoo natyaa ra inga sutu tari ra Melquisedec.

¹⁶ Ñima tari catyí ley quichí ra, vatyi ley catyí chi yóo chi tata cua quichi noo ra cuví sutu, ta ña quichí ra tata cuan, soco quichí ra vatyi iyó cha ndicha ñuhu Nyoo chihin ra ta ñahri tuhun chihí nyisó ra.

¹⁷ Vatyi ican ihya cuví cha cahán Nyoo tuhun ra:

Yoho cuvún tata sutu tyicuan ri maa,

Tari ra Melquisedec.

¹⁸ Yucuan chaha sacuachiyó Nyoo ley chahnu cuan vatyi ña cuví maa tyinyee chi chi ñáyivi, ta ña chihuhú.

¹⁹ Vatyi ley cha chaha Nyoo chi ra Moisés, ña sanduvaha maa chi añima yo. Ta vityin, tyiño nuu ley chahnu cuan, iyó inga tuhun vaha ca cha yihí iñi yo. Ta chihin ihya tuhvá yo chi Nyoo vatyi sanduvaha ra Cristo cuhva coo yo chihin Nyoo.

²⁰⁻²¹ Nyoo tyaa ra cuhva ta tyanaha ra vatyi cuhva ra noo sutu cha cahnu ca chi yo. Soco sutu cha iyó vityin ña tyanaha Nyoo quivi tyiso ra chi ra. Vatyi nu tutu Nyoo catyí chi tyehé caa:

Sutu Mañi yo, ñin ri tuhun cahan ra, ta ma nasama ra cuhva catyí ra tyehe caa:

“Yoho cuvún Sutu tyicuan ri maa, tari cuví ra Melquisedec”, catyí Nyoo.

²² Yucuan chaha ra Jesús chaha ra noo tuhun vaha ca chi yo, ta ñima ca tuhun cha xihna ri cuan.

²³ Vatyí cha cuaha xaan ra cacuví sutu, soco chaa chaa ri tuhun chihí chi ra.

²⁴ Soco ra Jesús ñahri tuhun chihí iyó chi ra, ta ña ndihí tuhun cha cuví ra sutu.

²⁵ Yucuan chaha tyicuan ri maa cuví sacacu ra añima ñu natuhvá chi Nyoo cha cuenda ra, vatyí iyó maa ra tyicuan ri maa, vatyí cacan tahvi ra chi Nyoo cha cuenda ñu.

²⁶ Yucuan chaha ra Jesús cuví sutu cha chiñuhú chi yo. Ta maa ra, ii ra, ñahri cha quiñi caa sacuví ra, ta ni ñahri cuatyí ra. Ta ña cutahán ra chihin ñu iyó cuatyí. Ta sucun ca nyaá ra, ican saha andiví.

²⁷ Ñima tari inga ra cacuví tata sutu cuan, vatyí cuñi chi cha cacahñi ra chi quití ta cuhva cuenda ra chi Nyoo ndi quiví. Ta cha xihna ri, na naa cuatyí maa ra, ta yaha cuan ta naa cuatyí ñáyiví. Soco ra Jesús noo ri chaha, chaha cuenda ra chi ra chi Nyoo na naa cuatyí tandihí yo.

²⁸ Ley Nyoo cha quehen cuenda ra Moisés, tyisó chi chi ra cacuví nuu chi tata sutu, soco ra iyó cuatyí cacuví ra. Soco yaha cuan ta chaha Nyoo noo tuhun chaa, ta ñin ri tuhun cahan ra. Ta tyisó ra chi Sehe ra cha cuví ra Sutu cahnu ca, ta maa ra cuví ra noo ra vaha tyicuan ri maa.

8

Natyihí tahan Nyoo tuhun chaa chihin yo quiví chihí ra Jesús cha cuenda yo

¹ Ta chichi cha tandihí cha cahín nu tutu ihya, ican ihya cuví cha ñiñi ca tuhun: Ra cuví tata sutu cahnu chi yo cuví ra noo ra vaha tyicuan ri maa, ta chicunyaá ra nu tyayu chichi gloria chiyó vaha Nyoo.

² Ta cuví ra Sutu noo nu cuví vehe ñuhu cha ndicha vaha nu nyaá Nyoo. Maa Sutu yo Nyoo savaha vehe cuan, ta ñima rayíi.

³ Tandihí ra cacuví tata sutu tyisó Nyoo chí ra, vatyí cuhva cuenda ra ofrenda chi Nyoo ta cahñi ra quití na naa cuatyí ñáyiví chihin ñiñi ti. Ta yucuan chaha ñiñi cuñi chi cuhva cuenda tucu ra Jesucristo ñiñi ra chi Nyoo.

⁴ Tyehe ta siqui ñuhu ñáyiví nyaá ra cuví ra sutu, ni ñima sutu cuví ra tatu tyicuan caa. Vatyí siqui ñuhu ñáyiví, iyó ca ra cacuví sutu cha cachahá cuenda ofrenda chi Nyoo tari cuhva catyí ley cha tyaá ra Moisés.

⁵ Soco ra cacuví sutu siqui ñuhu ñáyiví, sacuví ra tyiño nuu Nyoo soco tari cuhva cuví andiví. Cuví chi noo xiñahñu tyiño sahá ra Cristo. Ta chitó yo vatyí tyicuan caa, vatyí quiví cha cua savaha ra Moisés vehe ñuhu cuan ta cha naha, Nyoo catyí ra chi ra tyehe caa: “Saha vaha cuenda, ta savahun tari cuhva caá cha sañahí chuun quiví chinyaun nu yucu cuan”, catyí Nyoo chí ra.

⁶ Soco ra Cristo ra cuví sutu cahnu chi yo, vaha ca cuhva sacuví ra, vatyí cha cuenda maa ra, natyihí tahan Nyoo noo tuhun vaha xaan ca chihin yo, vatyí vaha ca cha cucuhva ra chi yo.

⁷ Vatyí tyehe ta cuví cacu añima yo chihin tuhun xihna ri cha natyihí tahan Nyoo chihin yo, ña chiñuhú ca cha natyihí tahan chaa ra tuhun chihin yo cha cu uvi chaha.

⁸ Soco Nyoo nyehe ra vatyí ña vaha maa sacuví ñáyiví cuan, ta cahán ra tuhun ñu nu tutu ra tyehe caa:

Cuchaa chi quiví vatyí cunatyihí tahin tuhun chaa chihin ñáyiví Israel ta ñu Judá, catyí Sutu Mañi yo.

⁹ Ñima tari natyihí tahin tuhun chihin ñáyiví chahnu ñu, quiví tijn ndaha ñu ta tave chi ñu ñuu Egipto.

Vatyí ña sacuví ñu tuhun cha natyihí tahin chihin ñu, ta yucuan chaha sañe chi ñu, catyí Sutu yo Nyoo.

¹⁰ Tuhun cha cunatyihí tahin chihin ñu ñuu Israel nu cuahan ca chi, tyehe caa cucuví, catyí Sutu Mañi yo:

Chichi cha chiñi tuñi xiñi ñu, cutyai ley mai, ta chichi añaíma ñu cutyai.

Tyicuan ta mai cucuví Nyoo ñu,

ta maa ñu cucuví ñu ñáyiví chii.

¹¹ Tyicuan ta ña niñi ca cha sañahá ñu chi tahan ñu, ni chi yañi ñu, tacuhva vatyí cohon nuu ñu chi yuhu cha cuví Nyoo ñu.

Vatyí tandihí ñu, cucohon nuu ñu chii,

nyacua nya ñu luhlu ca ta nyacua nya ñu chahnu ca.

¹² Ta cusahi ticahnu iñi cha quiñi caa cha sacuví ñu.

Ta ma nicohon ca maa iñi cuatyí ñu, catyí Sutu Mañi yo.

¹³ Quiví cha cahán Nyoo tuhun cha natyihí chaa ra tuhun chihin yo, cuñí chi catyí vatyí cha sacuchahnú ra cha xihna ri cuan. Ta numi ri cundihi tuhun cha cuví cha chahnu cuan.

9

Nu sañahá chi yoso caa vehe ñuhu cha iyó siqui ñuhu ñayiví ta vehe ñuhu nu cuví andiví

¹ Quiví natyihí tahan Nyoo tuhun cha xihna ri chihin ñáyiví, chaha ra cuhva chi ñu yoso caa sacahnu ñu chi ra, soco chichi noo vehe ñuhu cha nyaá siqui ñuhu ñayiví ihya.

² Tyehe caa chingo vehe ñuhu cuan: Chata noo cortina nyaá cuarto cha xihna ri nu tayucú cañileru, ta nanyaá mesa nu catuví pan íi. Ta chicunañi cuarto cuan Nu Ii.

³ Chata cortina cu uvi, yucuan cuví nu chicunañi Nu Ii Xaan Ca.

⁴ Ta yucuan nanyaá noo arta xuhun cuaan nu chahmí ra cutu. Ta nanyaá caja, cha natyihí tahan Nyoo tuhun chihin yo, ta iñi xuhun cuaan nicacahnu. Ta chichi cuan ñoho casitu xuhun cuaan cha ñoho maná. Ta ñoho yutun cha natyacú cha chindahá ra Aarón. Ta ñoho tucu yuu cha nyaá ndi uchi mandamientu.

⁵ Ta siqui caja cuan nyicú cha tari caa ángel, ta cuñí chi catyí vatyí nyaá Nyoo yucuan. Ta chihin ndichin ángel cuan cachasí ra nu cuví nu tuhva Nyoo sahá ra ticahnu iñi cuatyí ñáyiví. Cha vityin ña cuví nacatyí ca ndi siqui tuhun ihya.

⁶ Ta tyicuan caa cuví vehe ñuhu cuan. Ta ndiquiví ri caquihví ra cacuví sutu chichi cuarto cha xihna ri nu nañí Nu Ii, tacuhva sacahnu ra chi Nyoo.

⁷ Soco cuarto cu uvi Nu Ii Xaan Ca cuan iyó maa minoo ra cuví nuu chi sutu, ta yucuan ra cuví quihví yucuan, noo chaha cha noo cuiya. Ta cuhva cha quihví ra, cuñí chi cuiso ra niñi quiti vatyí cuhva cuenda ra chi Nyoo cha cuenda cuatyí maa ra ta cuatyí ñáyiví.

⁸ Ta cha tyicuan caa sañahá Tatyí Ii Nyoo chi yo vatyí, ta cuví ca chaa yo nuu Nyoo vatyí ni nyaá ca cuarto cha xihna ri cuan.

⁹ Tandihí maa ihya cuví chi tari noo xiñahñu ri cha cuenda tuhun chaa cha chacun Nyoo vityin: vatyi noo cha chaha cuenda ñu chi Nyoo ña tyiñyee chi chi ñu na caca vaha iñi ñu.

¹⁰ Vatyi tandihí cuhva sacuví ra cacuví sutu cuan cahán chi maa ri cuenda ñáá cha cuví cachi ñáyivi, ta ñáá cha cuví coho ñu, ta yoso caa cundundi coño ñuhu ri ñu. Ta catuví cuhva cuan, nyatu chi nya quívi cacun Nyoo inga cuhva vaha ca.

¹¹ Soco vityin cha yaha quichí ra Cristo ta maa ra cuví tata sutu cahnu cha cuenda tuhun vaha ca cha chacun Nyoo. Quihví ra chichi vehe ñuhu vaha ca, ta ndíi ca, vatyi maa ra cuví sutu. Ta ñima rayíi savaha vehe ñuhu cuan o cuñi chi catyí, ñima vehe ñuhu ñuhu ñáyivi ihya cuví.

¹² Ra Cristo quihví ra vehe ñuhu nu cuví gloria Nu Ii Xaan Ca. Soco ñima ca cha cuhva cuenda ra ñíi mbee luhlu, o becerro, soco ñíi maa ra chaha cuenda ra. Ta tyicuan caa quihví ra noo ri chaha nu ndíi tuhun, ta tyicuan caa ta cuví sacacu ra chi yo tyicuan ri maa.

¹³ Niñi toro, ta ñíi ndixihyu, ta ñiyaa becerro cha cachahmj ra nu arta, tuhva ra catyicu ra chata ñu ca iyó cuatyí, ta coño ñuhu ri ñu sandundi chi cuan nuu Nyoo.

¹⁴ Ta tatu tyicuan caa, ¡Ñana cha cahnu ca tunyee iñi iyó chi ñíi ra Cristo! Vatyi tyinyee Tatyí Ii chi ra ta chaha cuenda ra chi ra chi Nyoo chihin cha ñahri cuatyí ra. Ta ñíi ra sandachí chi cha ña vaha cha caá aña yo tacuhva ma cuita ca iñi yo ley cha chaha tuhun chihí chi yo, ta tyicuan caa ta cuví sacuvi yo tyiño nuu ra cuví Nyoo nyitó.

¹⁵ Yucuan chaha ra Jesucristo cuví ra cha cahán chaha yo cha cuenda tuhun chaa cha natyihí tahanan Nyoo chihin yo. Ta cha cuenda cha chihí ra, iyó ticahnu iñi cuatyí cha sacuví yo quívi chinyaca ñaha tuhun cha xihna ri cuan chi yo. Ta yoó, ñu nacana Nyoo chi cuví yo, cuví naquehen cuenda yo noo cha ma ndíi ca maa, cha catyí maa ra tyi cuhva ra chi yo.

¹⁶ Vatyi tatu iyó noo tutu cha sandoo noo ra chihí, ta catyí tutu cuan ñáá ndíi cha cuñihi ñáyivi chi ra tatu chihí ra; cuñi chi cha coto vaha ra cuví tyiño tatu ndícha cha chihí ra cha sandoo tutu cuan; tyicuan ta cuví sacaca ra tyiño cuan ta nasacha ra cha tahanan chi chi ñu cuan.

¹⁷ Vatyi cha niri ca cha iyó ra cha sandoo tutu cuan, ma cuví cundaa tyiño cha quehen cuenda ñu cha tahanan chi chi ñu, soco nya cúvi ra, tyicuan ta cuví quehen cuenda ñu.

¹⁸ Yucuan chaha chihí quiti ta chatí ñíi ti quívi natyihí tahanan Nyoo tuhun cha xihna ri cuan chihin yo.

¹⁹ Quívi cuan, ra Moisés sacoto ra tandihí ley Nyoo chi tandihí ñáyivi. Yaha cuan ta quehen ra noo sahna cuaha cha chingo chihin ixi mbee ta chihin noo soco yutun cha nañí hisopo, satyí ra nu ñíi becerro ta nu ñíi ndixihyu luhlu, nasaca ra chihin ndutya, ta tyicu ra chata libru ley Nyoo ta chata tandihí ñáyivi ñandihí.

²⁰ Tyicuan ta quichaha catyí ra chi ñu: “Ican ihya cuví ñíi cha cuví cha ndaa vatyi natyihí tahanan Nyoo tuhun chihin ndo”, catyí ra.

²¹ Ta suri tyicu tucu ra Moisés ñíi nu cuví vehe ñuhu cuan, ta siqui tandihí cha cachotyíño ra yucuan nu casacahnú ra chi Nyoo.

²² Tyicuan caa sacuví ra vatyi catyí ley Nyoo tyi tandihí ta chihin ñíi, cuñi chi ndundi nuu Nyoo. Ta catyí tucu chi vatyi ma saha Nyoo ticahnu iñi cuatyí tatu ma cati ñíi.

Niñi ra Cristo, ican cuan tinyaa cuatyí yo

²³ Ta yucuan chaha cuñi chi cha sacuvi tata sutu tyicuan caa, vatyí ndundi tandihí cuan, vatyí cuví chi noo xiñahñu cha iyó ityi andivi. Soco tandihí cha cuenda ityi andivi, cuñí chi noo niñi vaha ca cha cuhva cuenda yo, ta ñima ca tari niñi quití cuan. Cuñí chi niñi ra Cristo.

²⁴ Vatyí ra Cristo ña quihvi ra chichi noo vehe ñuhu cha savaha ñáyivi cha cuví xiñahñu ri. Soco quihvi ra chichi vehe ñuhu cha ndicha vaha cha cuví gloria. Ta vityin cahán ra chaha yo nuu Nyoo.

²⁵ Ra cuví nuu chi sutu cuenda ñu Israel quihvi ra Nu Ii Xaan Ca cuan tahan cuiya vatyí cuhva cuenda ra niñi cha ñima niñi ra cuví. Soco ra Cristo, ña cuaha chaha cuñí chi cuhva cuenda ra chi ra.

²⁶ Vatyí tyehe ta tyicuan caa, cuaha chaha cuñí chi cha nyehe ra tindoho ta cuví ra nyata chinq ñuhu ñáyivi ta nya vityin. Soco vityin cha cua cuyatyin cundihi tuhun ñáyivi, noo ri chaha quichi ra Cristo, ta chaha cuenda ra chi maa ra tacuhva vatyí cuví tinyaa ra cuatyí yo.

²⁷ Noo ri chaha, cuví yo ta yaha cuan ta cucutuñi chi yo.

²⁸ Ta tyicuan caa tucu ra Cristo, noo ri chaha, chaha cuenda ra chi ra tacuhva tinyaa ra cuatyí cuaha xaan ñáyivi. Yaha cuan ta cuquichi ra cha cu uvi chaha, ñima ca cha quichi tinyaa ra cuatyí, soco cha quichi sacacu ra chi ñu cha nyatú chi ra.

10

¹ Vatyí ley Nyoo cha tyaa ra Moisés, cuví chi tari noo xiñahñu ri, cha cuenda cha vaha ca cha cuquichi. Soco ñima maa cha ndicha vaha cuví. Vatyí ley cuan, ma cuví maa sanduvaha chi chi ñu nanducú chi Nyoo. Vatyí tahan cuiya ri chahá cuenda ra cuví nuu chi tata sutu cuenda ley chahnu niñi quití. Soco ma cuví cacu añaima yo chihin cuan.

² Vatyí tyehe ta cuví sanduvaha ley cuan chi ñu, cundihi tuhun cha chahá cuenda ra niñi ndicuiya ri. Vatyí tatu cha ndundi ñu noo chaha cha cuenda tandihí maa, ma caca ca xiñi ñu vatyí iyó cuatyí ñu ta ña chiñuhú ca cha cuhva cuenda ra inga chaha.

³ Soco tahan cuiya ri chahá cuenda ra niñi, ta ican cuan sanicohón chi iñi ñu vatyí iyó cuatyí ñu.

⁴ Vatyí niñi toro ta niñi ndixihyu, ma cuví maa tinyaa chi cuatyí yo.

⁵ Yucuan chaha ra Cristo, quivi cuaquichi ra siqui ñuhu ñáyivi ihya, catyí ra chi Nyoo tyehe caa:

Ña cuñún cha cahñi ñáyivi quití ta cuhva cuenda ñu chuun,
yucuan chaha savahun noo coño ñuhu chii.

(Vatyí tyicuan caa ta cuví cuhva cuende chii chuun.)

⁶ Ta vatyí ña tahán iñun cha cahmi ñu quití ta cuhva cuenda ñu chuun cha cuenda cha tinyaa cuatyí ñu.

⁷ Catyí yuhu: “Ma yuhu, vachi ihya vatyí sacuvi cuhva cuñún, Nyoo Suti, tari cuhva cahán chi tuhin nu libru ley maun”, catyí ra Jesucristo.

⁸ Cha xihna ri, catyí ra Jesucristo vatyí Nyoo, ña cuñí ra cha cuhva cuenda ñu chi quití chi ra. Ni cha cahmi ñu quití cha cuenda cha tinyaa cuatyí ñu, ña cuñí Nyoo, catyí ra. Vasi maa ri tuhun cha catyí ley chahnu vatyí sacuvi yo cuví, soco ña tahán iñi Nyoo, catyí ra.

⁹ Ta yaha cuan ta catyí tucu ra: “Ma yuhu vachi ihya, vatyí sacuvi cuhva cuñún, Nyoo Suti.” O cuñí chi catyí, sacuachiyo Nyoo cuhva chahnu cuan, ta nacuvi chi inga cuhva chaa ihya.

¹⁰ Nyoo sandundiꝯ ra chi yo vatyí ra Jesucristo sacuví ra cuhva cuñí Sutu ra, ta chahaꝯ cuenda ra coño ñuhu ra. Noo ri chaha chihí ra ta ndihí tyiño sahaꝯ ra.

¹¹ Tandihí ra cacuví tata sutu ñuu Israel, ndi quiví sacuví ra tyiño nuu Nyoo, ta tyicuan ri chahaꝯ cuenda ra suri maa cha tuhvá maa ra chahá cuenda chi Nyoo, vasi ña cuví tinyaa chi cuatyí yo.

¹² Soco ra Jesucristo, noo ri chaha chahaꝯ cuenda ra chi ra chi Nyoo cha cuenda cuatyí yo. Tyicuan ta chicunyaꝯ ra tyayu gloria chiyo ndaha vaha Nyoo.

¹³ Ta yucuan nyatú ra nyacua nya cacun Nyoo chi ra xaan iñi chi ra chaha ra.

¹⁴ Vatyí chihin noo ri chaha cha chihí ra Cristo ta cuví sanduvaha ra añima ñáyivi cuenda Nyoo, tyicuan ri maa.

¹⁵ Ta suri tyicuan caa catyí tucu Tatyí Ii Nyoo chi yo. Vatyí cha xihna ri catyí ra chi yo nu tutu tuhun Nyoo tyehe caa:

¹⁶ Tuhun cha cunatyihí tahin chihin ñu quiví cuan, tyehe caa cucuví, catyí Sutu Mañi yo:
Cutyai ley mai chichi añima ñu, ta cutyai chichi cha chiñi tuñi xiñi ñu, catyí Nyoo.

¹⁷ Ta yahaꝯ cuan ta catyí tucu ra:

Ma nicohon ca maa iñi cuatyí ñu, ñiri cha quiñi caa cha chinyacuví ñu, catyí Sutu Mañi yo.

¹⁸ Ta cha yahaꝯ sahaꝯ Nyoo ticahnu iñi cuatyí, ña cuñí ca chi cha cahñi ñáyivi chi quiti, ta cuhva cuenda ñu chi Nyoo cha cuenda cuatyí ñu.

Cuñí chi nanducu yo chi Nyoo

¹⁹ Yucuan chaha yañi, cuví quihví maa yo Nu Ii Xaan Ca cuan nu nyaá Nyoo, cha cuenda vatyí cha chati ñiñi ra Jesucristo ta tinyaaꝯ ra cuatyí yo.

²⁰ Cha nuñaꝯ ra Cristo noo ityi chaa, ityi cuhun yo nu conyito añima yo. Vatyí maa maa cuhva cha chihí ra ta ndatá cortina cha chasiꝯ nu chinyaꝯ Nyoo. Cha tahnyaꝯ cortina, ican cuví cha chihí ra, tacuhva nuña ityi quihví yo ta chaa yo nu nyaá Nyoo.

²¹ Ra Jesús cuví sutu cha nyacá ñaha nu cuví vehe Nyoo andívi.

²² Yucuan chaha cuñí chi nanducu yo chi Nyoo chihin noo cha ndicha ta chihin cha ñi iñi yo chinó iñi yo chi ra, vatyí maa ra sandundiꝯ ra añima yo, tacuhva ma quihí ca iñi yo vatyí iyó cuatyí yo, vatyí tari cha nacatyá ra coño ñuhu yo chihin ndutya cuii, na ndu ndiꝯ yo nu Nyoo.

²³ Na cuní ca iñi yo chino iñi yo chi Nyoo ta ma ndu uvi iñi yo vatyí Nyoo cuhva ra cha catyí ra vatyí cuhva ra chi yo.

²⁴ Ta cuñí chi nanducu yo cuhva tyinyee yo chi tahan yo, na cuñi ca ñu chi tahan ñu ta sacuví ca ñu cha vaha.

²⁵ Ña tahaní chi quehen yo cuhva caá ñu cha sandihí cha quichi nu ndu ñn ri yo, soco cuñí chi cha sanduní yo iñi noo noo tahan yo. Ta yaha ca cuhva cuñí chi tyinyee yo chi tahan yo vityin cha nyehé yo vatyí Sutu Mañi yo cha cuñí chaa quiví quichi ra ta cucutuñi chi tandihí ñáyivi.

²⁶ Vatyí tatu cha yahaꝯ chicohon nuu yo cha ndicha, ta ña quichahá yo ta tyicuan ri sacuví ca yo cuatyí, ñahri ca cuhva coo ticahnu iñi cuatyí yo.

²⁷ Ta cutachi tuñi Nyoo chi yo. Ta cutyihí ra chi yo nu cucayu ñáyivi cha xaan iñi chi ra, ta cundiñi tuhun ñu.

²⁸ Tatu noo ñáyivi Israel ña quichahaꝯ ñu cuhva catyí ley ra Moisés, ta chiyo uvi o uñi testigu, cuví ñu cuan cha cuenda cuatyí ñu, ta yori cundahvi cuñí tyehe chi ñu.

²⁹ Ta nyaca cuví ñu cha ña quichaha ca chi Sehe Nyoo ta sahá ñu tyi niñi ra cha sanduvahá añima ñu cha ñima ri tuhun cuví. Ta chihin niñi cuan natyihí tahan Nyoo tuhun chihin yo. Soco cahán ña vaha ñu siqui Tatyi Ii Nyoo cha chahá tumañi iñi chi yo. Yaha ca cuhva cutachi tuñi Nyoo chi ñu cuan.

³⁰ Vatyí chitó yo ñáyivi Sutu Mañi yo, ican ra catyí ra tyehe caa: “Yuhu tahán chi tachi tuñi chi ñáyivi, yuhu catyí cha cuví chi ñu.” Ta catyí tucu ra vatyí cutuñi chi ñu nuu ra.

³¹ Ndicha cha iyó Nyoo, ta yucuan chaha tahán chi cuyuhvi yo chi ra, coto tachi tuñi ra chi yo cha cuenda cuatyí yo.

³² Soco ma naa iñi ndo quivi natiin cuenda ndo cha ndichin Nyoo chichi añima ndo, vatyí quivi cuan cunyeē xaan iñi ndo cha nyehe ndo tindoho cha cuenda ra.

³³ Yihí nyoho cahan ñáyivi chi ndo, ta sanyehe ñu tindoho chi ndo nu tuvi. Ta yihí nyoho uhvi xaan cuví chi ndo cha nyehe ndo cha cuví chi tahan ndo cha tyicuan caa, ta cunyeē xaan ndo.

³⁴ Ta cundahvi iñi ndo chi ñu ñoho vehe caa, ta chihin cha sñi cuñí ndo cunyeē ndo quivi tinyaa ñu cha iyó chi ndo, vatyí chitó ndo vatyí andivi iyó ca cha vaha ca cha cuenda ndo, ta ña ndihí maa cuan.

³⁵ Yucuan chaha ma sandihí ndo cha quihí iñi ndo chi ra Cristo, vatyí nu cuahan ca chi ta cuñihi ndo cha vaha ca vatyí chinó iñi ndo.

³⁶ Cuñí chi cha coo cha cama iñi ndo tacuhva cuví sacuvi ndo cuhva cuñí Nyoo, ta tyicuan caa ta naquehen ndo cha catyí ra tyi cuhva ra.

³⁷ Vatyí nu tutu Nyoo catyí chi tyehe caa:

Ña naha ca ta cuquichi ra cha tahán chi quichi, ta ma cucuee ca ra.

³⁸ Ta catyí Sutu Mañi yo tyehe caa: “Ñu cha sanduvahá añima, chihin cha chinó ri iñi ñu chi yuhu, ta conyito añima ñu.

Soco tatu cunuhu chata ñu, ma cusñi cuñi yuhu chihin ñu”, catyí Nyoo.

³⁹ Soco maa yo ña sacuví yo tari sacuví ñu cuanaá añima, vatyí ñu chinó iñi chi Nyoo cuví yo, ta tyicuan caa cucacu añima yo.

11

Cuhva cuñí chi cha chinó iñi yo chi Nyoo

¹ Cha chinó iñi yo chi Nyoo ican cuví cha chitó vaha yo tyi cuñihi yo cha nyatú yo, ta chitó vaha yo vatyí noo cha ndicha vaha cha ña nyehé yo vityin, cuñihi yo vatyí chinó iñi yo chi Nyoo.

² Ñáyivi chiyó ta cha naha, chinqó iñi ñu chi Nyoo, ta yucuan chaha quita vaha ñu nuu ra.

³ Cha cuenda cha chinó iñi yo chi Nyoo, ta chitó yo vatyí savaha ra ñuhu ñáyivi chihin tuhun cahán ra. Ta chitó yo vatyí tandihí cha nyehé yo vityin, chinqó chi ta cha naha chihin cha ña tuhva yo nyehé.

⁴ Cha cuenda cha chinqó iñi ra Abel chi Nyoo, ta chahá cuenda ra noo cha chahá ra chi Nyoo. Ta vaha ca cha chahá ra ta ñima ca cha chahá ra Caín, yañi ra. Ta yucuan chaha natiin cuenda Nyoo chi ra tari noo ra vaha, ta natiin cuenda ra cha chahá ra. Yucuan chaha vasi cha chihí ra Abel, soco tari quivi cahán ca ra tuhun chihin yo vityin, yoso caa tahán chi chino iñi yo chi Nyoo.

⁵ Cha cuenda cha chinqó xaan iñi ra Enoc chi Nyoo, ta cuanuhu ra chihin Nyoo chihin cha ña chihí ra. Ta ña nañihí ca ñu chi ra, vatyí naquehen Nyoo chi ra. Ta nu tutu Nyoo, catyí chi vatyí cha ni cumañi ca naquehen Nyoo chi

ra Enoc, sacuví ra maa ri maa cuhva tahán iñi Nyoo, yucuan chaha naquehen ra chi ra.

⁶ Soco ma cuvi sacuvi yo cha tahán iñi Nyoo tatu ña chinó iñi yo chi ra. Vatyí tatu cuñi yo nanducu yo chi ra, cuñi chi cha chinó iñi yo tyi iyó ra. Ta cuñi tucu chi chinó iñi yo vatyí cucuhva ra cha vaha chi ñu nanducú chi ra.

⁷ Cha cuenda cha chinqo iñi ra Noé chi Nyoo, ta quichaha ra tuhun cahan Nyoo, cha catyí Nyoo chí ra noo cha cucuvi ityi nuu ca. Ta vasi tañaha ca nyehe ra soco cha cuenda cha chinó iñi ra chi Nyoo, ta savaha ra barcu cuan ta sacacu ra chi ñáyivi chí ra. Ta cha cuenda cha chinqo iñi ra chi Nyoo, sandoo ra cuatyí ñu siqui ñu cha ña quichahá chi Nyoo, na tachi tuñi ra chi ñu. Ta cha cuenda cha chinqo iñi ra Noé chi Nyoo cuvaha ra nuu ra.

⁸ Ta cha cuenda cha chinqo iñi ra Abraham chi Nyoo, ta quichaha ra chi ra quívi cana ra chi ra. Yucuan chaha quitá ra ñuu ra ta cuahan ra nu cucuhva Nyoo ñuhú cha cundoo chi ra. Quitá ra ñuu ra chihin cha ña chitó ra nya cuahan ra.

⁹ Cha cuenda cha chinó iñi ra Abraham, yucuan chaha chiyo ra nu ñuhú cha ta cuhva ca Nyoo chí ra. Chiyo ra noo vehe sahna ri, ta surí tyicuan ca tucu ra Isaac, sehe ra, ta ra Jacob, sehe ñañi ra. Vatyí surí catyí tucu Nyoo chí nanduvi ra cuan tyi cucuhva ra ñuhú cuan chí ra.

¹⁰ Vatyí ra Abraham nyatú maa ra noo ñuu vaha ca cha cucuhva Nyoo chi ra, ta maa Nyoo chacun cuhva ñuu cuan ta maa ra savaha ra, ta chicha cimiento tyihi ra chaha.

¹¹ Ta suri chinqo iñi tucu cu Sara cha catyí Nyoo chí ña cha cucoo sehe ña. Ta vasi cha chahnu xaan ña, soco chaha Nyoo fuerza ra chí ña, ta chicoo sehe ña. Tyicuan caa cuví vatyí chinqo iñi cu Sara cha catyí Nyoo chí ña.

¹² Yucuan chaha vasi cha nyaña quívi cha cúvi ra Abraham, soco chicoo sehe ra. Ta yaha cuan cuaha xaan ñáyivi cacu cha cuví ñu tata ra. Tari cha cuaha tiñoo andívi, ta tari cha cuaha niyiti yuhu tyañuhu, vatyí ña cuví nacahvi yo.

¹³ Tandihí ñu cuan cachihí ñu cha ni cumañi ca naquehen cuenda ñu cha catyí Nyoo tyi cuhva ra chí ñu. Soco vasi ta naquehen cuenda ca ñu ta chihí ñu soco nyehe cachi vaha ñu chihin cha chinó iñi ñu. Ta sí xaan cuñi ñu. Ta chihin cuan cutuñi iñi ñu ta cahan ñu tuhun vatyí noo ñu yahá ri siqui ñuhu ñáyivi ihya cuví ñu.

¹⁴ Vatyí ñu cacahan tyehe caa, cuñi chí catyí vatyí ni nanducú ñu noo nu coo ñu.

¹⁵ Tyehe ta chicá ca xiñi ñu ñuu nu quitá ñu, totyehe cuví cunuhu ñu nyicuan.

¹⁶ Soco vatyí cuñi ñu noo ñuu vaha ca, o cuñi chí catyí nya gloria, yucuan chaha Nyoo ña cucahan nuu ra cha cuví ra Nyoo ñu. Vatyí cumí ra noo ñuu nu cuví coo ñu.

¹⁷ Ta cha cuenda cha chinqo iñi ra Abraham chí Nyoo, yucuan cuenda quichaha ra nu cahan Nyoo ta tyaá ra cuhva cha cahñi ra chí sehe mañi ra ra Isaac, quívi nducu nyehe Nyoo chí ra tu ndicha cha chinó iñi ra, vasi suri maa Nyoo catyí ra

¹⁸ vatyí cuaha xaan ñáyivi cucuvi tata ra chihin ra Isaac cuan.

¹⁹ Soco ña yuhvi ra Abraham cuacuhva cuenda ra sehe ra chí Nyoo, vatyí chitó ra vatyí Nyoo, iyó tunyee iñi chí ra nyacua nya cha sanandotó ra ndiyi. Ta tari quívi sanandotó Nyoo chí sehe ra, vatyí cha nyaá cha cua cahñi ra chí ra, ta nacuhva Nyoo chí sehe ra chí ra inga chaha.

20 Ta ra Isaac chinq̄ tucu iñi ra chi Nyoo. Ta yucuan chaha catyí ra vatyí sehe ra, ra Jacob ta ra Esaú, cuñihi ra cha vaha nu cuahan ca chi.

21 Ta ra Jacob chinq̄ iñi ra chi Nyoo, cuhva cha cua cúvi ra. Ta catyí ra vatyí tahan tahan sehe ñañi ra, sehe ra José, cuñihi ra cha vaha. Ta sacahn̄u ra chi Nyoo nu nanyaá ra chihin yutun cha tuví ra.

22 Ta ra José ñandihí, chinq̄ iñi ra chi Nyoo, ta catyí ra, cuhva cha cua cúvi ra, vatyí ñu Israel, ñáyiví chi ra, cu quita coyo ñu ñuu Egipto cuan nu cuahan ca chi. Ta sandoq̄ ra tyiño chi ñu, vatyí na naquehen ñu yiquí ra quiví quita ñu ñuu cuan.

23 Cha cuenda cha chinq̄ iñi sutu ra Moisés ta sihi ra chi Nyoo, yucuan chaha quiví cacú ra, nyehe ñu tyí noo cha lee tyaqui xaan cuví ra. Ta yihí iñi ñu cha cusacacu Nyoo chi ra ta ma cúvi ra, vasi catyí rey cuan vatyí cúvi ndii ra cuatyaa. Ta ña yuhví ñu ta tixehé ñu chi cue uñi yoo.

24 Ta ra Moisés tucu, chinq̄ iñi ra chi Nyoo. Ta quiví cha chahn̄u ra, ña cuñi ca ra cha cuví sihi ra chi ñaha sehe rey ñuu Egipto cuan.

25 Ta ni ña cuñi ra ndoo ra ñuu Egipto cuan vatyí cusii iñi ra o cunyacuví ra cha quiñi caa. Vatyí chitó ra tyi tuhun ñn yaha ri cuví cuan. Soco vaha taxin ca cuñi ra nyehe ra ñndoho chihin ñáyiví cuenda Nyoo.

26 Ra Moisés, vaha ca cuñi ra cha nyehe ra ticahan nuu cuenda ra Cristo vatyí cahn̄u ca cha tyayii cuví cuan chi maa ra ta ñima ca tandihí cha tyayii cha iyó ñuu Egipto. Vatyí chitó ra tyi cua cuhva Nyoo cha vaha chi ra.

27 Ta cha cuenda cha chinq̄ iñi ra Moisés chi Nyoo, ta quita ra ñuu Egipto, ta ña yuhví ra cha cuxaán rey cuan. Ta sanyee xaan ra iñi ra. Tari cha vatyí nyehe ra chi Nyoo cha ña nyehé yo.

28 Cha cuenda cha chinq̄ iñi ra Moisés chi Nyoo ta sanducahn̄u ra vico cha cahñi ñu noo mbee luhlu, ta tachí ra nacahyu ñu niñi ti yuvehe ñu, tacuhva vatyí ma cahñi ángel Nyoo chi ni noo sehe nuu ñu Israel.

29 Ta cha cuenda cha chinq̄ iñi ñu Israel chi Nyoo ta yaha sava ñu Tyañuhu Cuaha, tari cha yaha ñu noo ñuhú ityi. Ta cuhva cha cacuñi tucu ra Egipto cayaha ra, ña cuví yaha ra vatyí nacasi Nyoo tyañuhu cuan siqui ra ta cachihí ra chichi ndutya cuan.

30 Ta cha cuenda cha chinq̄ iñi ñu Israel chi Nyoo, ta chico ñu ucha tahan chaha chata ñuu Jericó, ta tandihí cuii maa nu sama chata ñuu cuan canacojo.

31 Ta cha cuenda cha chinq̄ iñi cu Rahab, ñaha cata iñi cuan, chi Nyoo, ta ña chihí ña ñn ri chihin ñu ñuu ña, ñu ña quichaha chi Nyoo, vatyí maa ña, tyinyee vaha ña chi ra Israel, ra chahan coyo chinyehé tatu cuví chasaha ra tinyaa ra ñuu ña chi ra nyacá ñaha ñuu cuan.

32 ¿Ñáá ca cha cuví catyí vityin? Cuaha xaan cuhva cucuñi chi chii tatu cahín tuhun ra Gedeón, ra Barac, tuhun ra Sansón, ra Jefe, ta tuhun ra David, ta ra Samuel ta tuhun ra cacuví profeta Nyoo ta cha naha.

33 Cha cuenda cha cachinq̄ iñi ra chi Nyoo, ta yihí ra saha ganaa ra chi inga ñuu nahnu. Ta yihí ra vaha xaan chinyaca ñaha ra ñáyiví cuenda Nyoo. Yihí ra ñihí ra cha catyí Nyoo tyi cuhva ra chi ra. Yihí ra chasi ra yuhu ndicaha.

34 Yihí ra ña cayu ra chihin ñuhú chichi horno nu catyihí ra chi ra. Yihí ra cacú ra cha cahñi ñáyiví chi ra chihin mitiyi. Yihí ra cha ñahri fuerza chi ra, soco candunyeé ra, ta chiyo xaan fuerza chi ra chichi cuatyí cuan, ta cuví chasaha ra chí sindaro cuenda ñu xaan iñi chi ra.

35 Ta chicoq̄ suhva ñusihi, nandotoq̄ ñáyiví chi ñu.

Ta inga ñáyivi chihí ñu chihin cha cuaha xaan tindocho sanyehe ñáyivi chi ñu, soco ña sandoo ñu chi Nyoo vasi chihí ñu cha catyi ra, vatyí chitó ñu, vatyí tatu ma sandihí ñu cha chinó iñi ñu chi Nyoo, cunandoto ñu ta cucoo ñu noo ñayivi vaha xaan ca.

³⁶ Ta inga ñu nyehe ñu tindocho cha cahán nyaa ñáyivi chi ñu ta cañi ñu chi ñu. Ta inga ñu chinuhñi ñu chihin cadena ta cuahan ñu vehe caa.

³⁷ Yihí ñu chihin yuu chahñi ñáyivi chi ñu. Yihí ñu chahnya ra chihin cierra chi ñu. Yihí ñu nducu nyehe ñáyivi chi ñu. Yihí ñu chihí ñu cha chahñi ñáyivi chi ñu chihin mityi. Yihí ñu chica noo ñu ta ñahri sahma ñu. Chihin ñi mbee ri ta ñi ndixihyu ñihno ñu. Ndahvi xaan ñu. Ta cuihya xaan cuñi ñu. Ta sanyehe ñáyivi cha ña ñohó nuu Nyoo tindocho chi ñu.

³⁸ Ta ñáyivi ña ñohó nuu Nyoo ña nañá ñu cha cu ñi ri ñu chihin ñáyivi ndahvi cuan vatyí vaha ñu nuu Nyoo. Chica noo ndahvi ñu ityi chiqui ndi, ityi yucu. Chiyó ñu chichi yavi yuu ta yavi ñuhú.

³⁹ Tandihí maa ñu vasi cahan vaha Nyoo siqui ñu cha cuenda cha chinó iñi ñu chi ra, soco ña ñihí ñu cha catyi Nyoo cha cuhva ra chi ñu.

⁴⁰ Vatyí natyaa ra cuhva, cha cuhva ra nonga cha vaha ca chi ñu vatyí natyihí ra cuenda chi yo ta ñi ri cutahan chi chí yo chihin ñu cuan.

12

ñi ri chi ra Jesús tahán chi cuita iñi yo

¹ Tandihí ñáyivi cuan quita vaha ñu vatyí chino iñi ñu chi Nyoo. Ta vityin chihin cuan sanduní ñu iñi yo ta nyatú ñu nyehe ñu tatu quita vaha yo. Yucuan chaha cuñi chi cha sacuachiyó xiin yo tandihí cha sayangá chi yo, tandihí cuatyí cha nyicón chi yo. Ta chihin cha cama iñi yo ta cuhun yo ityi nuu ca chihin Nyoo.

² ñi ri chi ra Jesús quihí nuu yo, vatyí maa ra chaha ra cha chinó xaan iñi yo chi Nyoo, ta chaha ra tandihí cuhva tahán chi chino iñi yo. Ta cha ni cumañi ca cúvi ra, chitó ra vatyí si xaan cucuvi chi ra cha yaha cúvi ra. Yucuan chaha, chaha ra cha cahñi ñáyivi chi ra. Ña quichaha ra ticahan nuu cha cúvi ra tari chihí noo ra iyó cuatyí, ta vityin nyaa ra chiyo vaha Nyoo gloria.

³ Saha ndo cuenda cuhva chiyo ra Jesús, vatyí nyehe xaan ra tindocho saha ñu iyó cuatyí. Yucuan chaha ma cutatu ndo, ta ma ndu uvi iñi ndo cha nyicón ndo chi ra.

⁴ Vatyí nyoho ta chaa ca ndo nyehe ndo tindocho cha cuenda cha cañi tahan ndo chihin cha quiñi caa, tari nyehe ra Cristo tindocho ta chihí ra.

⁵ ¿Atu cha naq iñi ndo tuhun chaha Nyoo chi ndo tari cha sehe ra chi ndo? Catyi ra tyehe caa nu tutu ra:

Sehe luhli, ma cuxaun tatu saquehen ityi chuun.

Ma nducuihya iñun tatu cahín chuun.

⁶ Vatyí ra saquehén ityi yuhu chí, chaha cha cuñi chí ra, vatyí sehi cuví chí ra, catyi Nyoo.

⁷ Cunyee ndo ta cutuhva ndo tatu saquehen ityi ra chí ndo, vatyí Nyoo, sehe vaha ra saha ra chí ndo. Vatyí tandihí ra iyó sehe, saquehén ityi ra chí sehe ra.

⁸ Vatyí tatu ña saquehén ityi Nyoo chí ndo, ñima sehe vaha ra cuví chí ndo, soco tatu saquehén ityi ra chí ndo, sehe vaha ra cuví chí ndo.

9 Ta s̄in ri, ta nyih̄i yo, sutu yo ihya ñáyiv̄i saqueh̄en ityi ra chi yo, ta saha yo ñáyiv̄i chi ra. Ta nyaca cuv̄i Nyoo, tahán tucu chi saha yo ñáyiv̄i chi Sutu yo Nyoo, tyicuan ta coo añima yo tyicuan ri maa.

10 Sutu yo cuenda coño ñuhu yo, saqueh̄en ityi ra chi yo suhva ri quiv̄i, yoso cuhva cha cuñi chí. Soco Nyoo saqueh̄en ityi ra chi yo cha cuenda noo cha vaha ca chi yo, vatyi sa ii ra chi yo tari maa ra, cha ii ra.

11 Ndicha vatyi ña tahán iñi yo cha ndohó yo vatyi uhvi chi yo. Soco chihin cha ndoho yo, cutuhva yo coo yo noo ñáyiv̄i vaha.

Yica xaan tatu ma quichaha yo cha catyí Nyoo chi yo

12 Yucuan chaha sandunyeē ndo iñi ndo, ta ma quih̄i iñi ndo cha ma cuv̄i cunyicon ndo chi ra Cristo.

13 Ta n̄anducu ndo cuhva coo vaha ndo chihin Nyoo, n̄anducu ndo cuhva caca ndoo ndo chihin ra. Tyicuan ta maa ra cuhva ra fuerza chi ndo ta nduvaha ndo nuu Nyoo ta ma cucuihya ca cuñi ndo.

14 Saniñi ndo coo vaha ndo chihin tandih̄i ñáyiv̄i. Ta coo ndo noo ñáyiv̄i cachi. Vatyi tatu ña cachi iyó yo, chihin Sutu Mañi yo Nyoo, ma nyehe yo chí ra.

15 Saha ndo cuenda chi ndo coto yih̄i ndo, ma ñih̄i ndo tumañi iñi cha iyó chí ra. Ta saha ndo cuenda chi ndo, coto cuv̄i ndo tari noo yutun cha chahá chiti uva, ta coto quehen ñáyiv̄i cha caá ndo ta tiv̄i ñu nuu Nyoo.

16 Ta ni noo ndo ta maa coo ndo chihin ñáyiv̄i tatu ñima ñasih̄i ndo o yii ndo cuv̄i. Ni ma cuñi ndo vatyi tuhun Nyoo noo cha ñima ri tuhun cuv̄i, vatyi tyicuan caa sacuv̄i ra Esaú, vatyi chihin noo nyayu ri, xico ra tandih̄i cha tahán chí chi ra cha cuv̄i ra sehe nuu sutu ra.

17 Ta chitó ndo vatyi cha yaha cuan ta cuñi ra Esaú cha nasoco sutu ra chi ra, soco ña cuv̄i ca. Ta vasi chacu vavaha ra, soco ña ñih̄i ca ra cuhva nasama ra cuhva cha chinyacuv̄i ra.

18 Ta maa ndo chaá ndo nuu nyaá Nyoo soco ñima tari chaá ñu Israel cuan quiv̄i chahan ñu noo yucu nu cuv̄i yucu Sinaí. Ta yucuan nyehe ñu cayu ñuhu, ta nduñaa iñi, ta ñih̄i xaan tatyi.

19 Ta chiñi ñu nativ̄i cutu cuihya ta cah̄an Nyoo chihin ñu. Ta ñu cha chiñi tuhun cah̄an ra, chacu ndahvi ñu tacuhva ma cahan ca ra chihin ñu, vatyi yuhvi xaan ñu

20 cha cuenda vatyi ña cunyeē iñi ñu tuhun cha chah̄a ra chi ñu. Vatyi catyí ra tyehe caa: “Tatu quih̄vi noo ñáyiv̄i, cah̄ñi ndo chí ñu chihin yuu o chihin lanza, cuv̄i ri ñu ñáyiv̄i o quit̄i”, catyí Nyoo chí ñu.

21 Yuhvi xaan ñu cha nyehé ñu yucuan, vatyi nyacua nya ra Moisés ta catyí ra: “Ñih̄i xain chihin cha yuhvi”, catyí ra.

22 Soco yoó ña nyehe yo cha yuhvi cuan vatyi noo yucu cha nañi Sión nu cuv̄i ñuu Nyoo nyitó chaá yo. O cuñi chí catyí ñuu Jerusalén cha nyaá andiv̄i, nu nyicú cuaha mil ángel.

23 Candú ñin ri yo vatyi sacahnu yo chí Nyoo vatyi ndú ñin ri tandih̄i ñu cha cuv̄i sehe Nyoo cha nyicú sivi nu tutu nya andiv̄i. Ta chaá yo nuu Nyoo cha cuv̄i jee chí tandih̄i ñáyiv̄i. ñin ri nyicú yo chihin añima ñu vaha cha sanduvah̄a maa Nyoo.

24 Ta natuhva ndo chí ra Jesús ra cuv̄i ra cahán chaha yo vityin cha natyih̄i tahan Nyoo tuhun chaa chihin yo. Ta chat̄i niñi ra. Ta ican chí chahá noo cha vaha ca ta ñima ca cha chahá niñi ra Abel. (Vatyi ra Abel chih̄i ra ta tach̄i tuñi Nyoo chí yañi ra. Soco chih̄i ra Jesús, ta iyó tucahnu iñi cuatyi yo.)

²⁵ Yucuan chaha saha yo cuenda coto ma quichaha yo chi ra cha cahán chihin yo. Vatyí ñu Israel cuan, ña cacu ñu cha ña cuñí quichaha nu cahan Nyoo quivi cahan ra nu cuví yucu Sinaí ihya siqui ñuhu ñayivi. Ta nyaca cuví yoó, ma cuví maa cacu yo tatu nacuhva yo chata yo chi ra cha cahán chihin yo nya andivi vityin.

²⁶ Quivi cuan ndusu Nyoo sacanda chi ñuhu ñayivi. Soco vityin catyí chi tyehé caa: “Noo ri ca chaha cusacande ta ñima ñuhu ñayivi ri, soco andivi ñandihí.”

²⁷ Ta cha catyí ra vatyí cusacanda ra nonga chaha, cutuñi iñi yo vatyí cucuachiyo tandihí cha nyaá ii ri cha savaha Nyoo. Ta cundoo cha ma cuví nacanda.

²⁸ Nu chahá Nyoo cunyaa yo chihin ra nu nyacá ñaha ra, ma nacanda cuan. Yucuan chaha na nacuhva yo tyahvi nyoo chi ra, ta sacahnu yo chi ra chihin cha ñi iñi yo, ta chihin cha saha yo ñáyivi chi ra, vatyí tyicuan caa tahán iñi ra.

²⁹ Vatyí Nyoo cuenda yo, cuví ra tari noo ñuhú cha chahmí tandihí, ta tyicuan caa cusanaa ra tandihí cha ña vaha.

13

Na coo yo cuhva tahán iñi Nyoo

¹ Ma sandihí ndo cha cuñí ndo chi tandihí ñu yihí cuenda Nyoo tari cha tahan ndo chi ñu.

² Ta ma naa iñi ndo cha cuvaha ñáyivi cuví ndo chihin ñáyivi cha chaá vehe ndo. Vatyí iyó chaha cha cuenda cha vaha ñáyivi cuví ndo, ta chaha ndo nu coo ñáyivi; chí ángel, chaha ndo nu coo, ta ña tuví iñi ndo.

³ Ma naa iñi ndo chi ra ñohó vehe caa tari cha ñohó tucu maa ndo vehe caa chihin ra. Ta tyicuan caa tucu ñu nyehé tindoho sahá ñáyivi. Saha ndo tyi nyehé tucu maa ndo tindoho tari nyehé ñu, tyicuan ta cundahvi cuñi ndo chi ñu ta tyinyee ndo chi ñu. Vatyí chitó ndo yoso caa uhvi chi ñu cuan tyi ñáyivi cuví ñu tari maa ndo.

⁴ Cha tandaha ndo, noo cha vaha cuví. Ta nyoho cha tandaha ndo tahán chí saha ndo ñáyivi chí yí ndo o chí ñasihí ndo. Vii coo ndo chihin tahan ndo, vatyí Nyoo cutachi tuñi ra chí ñu iyó yí ta iyó inga ra chí ñu, o ra iyó ñasihí ta iyó inga ñusihí chí ra.

⁵ Ma cuñi xaan ndo xuhun. Ndoqo ndo vaha chihin cha iyó chí ndo, vatyí Nyoo catyí ra: “Ma sañe chuun ta ñi ma sandoo ñihne chuun”, catyí ra.

⁶ Yucuan chaha cuví catyí yo chihin cha ñi iñi yo:

Sutu Mañi yo cuví ra tyinyeé chí,
Ma yuhvi ñáá cha sacuví ñáyivi chíi.

⁷ Njicohon iñi ndo chí ra cayihí ndaha vehe ñuhu, ra cacahán tuhun Nyoo chihin ndo. Naçaca xiñi ndo vatyí maa ra cachi iyó ra nuu Nyoo, ta cunyicon ndo cuhva cha vaha xaan chinó iñi maa ra chí Nyoo.

⁸ Ra Jesucristo ña nasamá ra. Ican ra cuví ra ta tyembu chahnu, ta ican ra cuví ra vityin. Ta ican ra cuví ra nuu cuahan ca chí tyicuan ri maa.

⁹ Ma cuhva ndo cha sandavi ñaha ñáyivi chí ndo chihin tuhun sñn caa cha sañahá ñu. Vaha ca cha cu ñi iñi ndo chihin cha cuñí Nyoo chí yo, ta ñima ca tuhun cha sañahá ñu cuan: cha yica cha cachi yo. Ña tyinyeé maa cuan chí ñu nyacuví tyicuan caa.

¹⁰ Iyó noo arta cha cuenda yo. Nu chati niñi ra Cristo nu cruzi, ican cuan cuví. Ta ñu cuñí cacu chihin cha quichahá ñu ley chahnu cha quichahá ra cacuví sutu ta cha naha, ma cuví tyinyee ra Cristo chi ñu.

¹¹ Ra cuví sutu cahnu cuenda ñu Israel chinyaca ra niñi quiti Nu Ii Xaan Ca cuan cha cuenda cuatyí ñáyiví, soco coño ti chinyaca ra ityi chata ñuu vatyi cayu chi.

¹² Ta tyicuan caa tucu ra Jesús, tyaa Nyoo tyiño chi ra cha nyehe ra tindoho ta cúvi ra ityi chata ñuu Jerusalén, tacuhva vatyi sandundii ra chi yo chihin niñi ra.

¹³ Ma cahan nuu yo nyehe yo tindoho ticahan nuu cha cuenda ra Cristo, tari nyehe tucu maa ra cha cuenda yo quivi chahan ra chicúvi ra ityi chata ñuu Jerusalén. Tari quivi cha cuahan tucu yoó ityi chata ñuu cuví chi cuan tatu ña cahan nuu yo nyehe yo tindoho cha cuenda tuhun ra.

¹⁴ Vatyi ihya siqui ñuhu ñayiví, ñahri noo ñuu cha tyicuan ri maa cucoo iyó. Soco nanducú yo noo ñuu cha cuquichi, cha yaha ndihi tuhun ñuhu ñayiví ihya.

¹⁵ Yucuan chaha vityin cha ñohó ra Cristo añima yo, tahán chi cha saniñi yo ta sacahnu yo chi Nyoo chihin yaa, ta chihin cha cahan yo tuhun cha cahnu cuví ra.

¹⁶ Ta ma naa iñi ndo cha sacuví ndo cha vaha. Ta tyinyee ndo chi tahan ndo chihin cha iyó chi ndo, vatyi ican ihya cuví cha tahán iñi Nyoo.

¹⁷ Quichaha ndo tuhun cahan ra casaquehén ityi chi ndo, ta cuhva ndo chi ndo cunyaca ñaha ra vatyi nyicú ra tyiño casahá cumi ra añima ndo. Ta coo quivi cutahan chi cunacuhva ra cuenda tyiño casahá ra chi Nyoo. Nducú ndo cuhva sacuví ndo cha vaha, tacuhva vatyi chihin cha sii cuñi ra cuhva ra cuenda ndo nuu Nyoo, vatyi tatu ña sacuví ndo cha vaha, chihin cha cuihya iñi ra cuhva ra cuenda ndo, ta nyoho, ma quita vaha ndo nuu Nyoo.

¹⁸ Vaha cuñí añima ndi chihin Nyoo, ta cuñí ndi cha cacan tahvi ndo chaha ndi vatyi cuñí ndi sacuví ca ndi cha vaha.

¹⁹ Ta chiquén noo tumañi iñi chi ndo cha cacan tahvi ndo chiin chahi tacuhva vatyi nachuva Nyoo cuhin cucunyai cha numi ri chihin ndo inga chaha.

Nu ndihí cahan ra ta nacuhva ra nocumi chi ñu

²⁰ Nyoo ican ra iyó cha taxi chi ra, ican ra sanandoto ra chi Sutu Mañi yo Jesucristo, ra cuví ra sahá vaha cuenda chi yo tari cha cuví yo mbee sana ra. Ra Cristo chati niñi ra, ta chihin cuan natyihí tahan Nyoo tuhun chaa cha ma ndihí ca maa chihin yo.

²¹ Na cuhva Nyoo cha vaha chi ndo tacuhva cuvi sacuvi ndo cuhva cuñí ra. Ta na sacuvi maa ra cha cuñí maa ra cha cuenda ra Jesucristo chihin tandihí maa yo. ¡Na sacahnu yo chi ra Cristo tyicuan ri maa! ¡Na cuvi chi tyicuan caa!

²² Yañi, chacú ndahvi nuu ndo, na cunyeer xaan iñi ndo chihin tuhun cha chahí ihya chi ndo, vatyi ña cuaha xaan tyají nu tutu ihya chi ndo.

²³ Coto ndo vatyi ra yañi yo, ra Timoteo, cha quitá ra vehe caa. Ta tatu nachaa ra cha numi ri, cuhun ra chihin, na cuhin cunyehe nu nyicú ndo.

²⁴ Cuhva ndo nocumi chi tandihí ra sañahá chi ndo, ta chi tandihí ra yañi yo cuenda ra Cristo. Ñu Italia ihya, tachí ñu nocumi chi ndo.

²⁵ Ta Nyoo na nasoco ra chi tandihí maa ndo. Ta na cuvi chi tyicuan caa.

Carta Cha Sacuhun Ra Santiago Chi Ñu Yihí Cuenda Ra Cristo

Nu chahá ra Santiago nocumi chi ñu

¹ Yuhu ra Santiago cuví noo ra sacuví tyiño nuu Nyoo ta nuu Sutu Mañi yo Jesucristo. Sacuhin nocumi chi ndo cha cuví ndo cha uchi uvi ityi ñáyivi Israel ñu yihí cuenda ra Cristo. Ta quití cuatyí ndo siin siin ñuu.

Cha chiñi tuñi cha chahá maa Nyoo

² Yañi, cuñí chi vatyí sii cuví chi ndo tatu cuaha nuu tindoho nyehé ndo.

³ Vatyí chitó ndo tatu nyehé ndo tindoho tari cha vatyí Nyoo nducu nyehé ra tatu ndicha cha chinó iñi ndo chi ra cuví cuan. Ta tyicuan caa ta cua cutuhva ca ndo cha cucama iñi ndo.

⁴ Saña ndo na quichi maa tindoho siqui ndo, vatyí ican cuví cha sacoo cha cama iñi ndo. Ta tatu cha chicoo cha cama iñi ndo ta cucuvi ndo noo ñáyivi chicha chihin tuhun Nyoo, ta cuacunyeé ndo tandihí cuii maa tindoho cha vachí ca siqui ndo.

⁵ Tatu nya noo nyoho cumañí cha chiñi tuñi chi ndo, çacan ndo chi Nyoo. Ta Nyoo cuhva ra. Ta ñima chiin ri chahá ra chi ñu chicán chi ra. Ta ña tyicuhvá ra cuhva chahá ra. Ta ña natyihí ra nuu yo cha cuenda cha chahá ra chi yo.

⁶ Soco cuñí chi çacan yo chí ra chihin cha chinó vaha iñi yo. Ta ma quihí iñi yo vatyí ma cuhva ra chí yo. Vatyí ñu cha ña chinó vaha iñi, cuví ñu tari ndutya yuhu tyañuhu cha tyandahá tatyí chii siin siin ityi.

⁷⁻⁸ Ta tyicuan caa maa ñu cuan, siin siin cuhva chicá xiñi ñu, vatyí siin cha chicán ñu vityin ta siin cha chicán ñu tyaan, ta ña nii iñi ñu sacuví ñu noo cha sacuví ñu. Ña tahán chi quihí iñi ñu vatyí cuñihí ñu cha cuacuhva Sutu Mañi yo chí ñu.

⁹ Tatu iyó noo ra yañi yo, ndahvi ra, cuñí chi cusii cuñí ra vatyí Nyoo nacoñehé ra chí ra.

¹⁰ Soco tatu noo ra yañi yo, tyayii ra, cuñí tucu chí cha cusii cuñí ra tatu ndundahvi ra, vatyí ra tyayii cuví ra tari noo ita cha nyaá nu cuhu, vatyí ña naha maa chiyó chí.

¹¹ Vatyí tatu cañá ñanyii ta ihñi vavaha cuhu cuan, na ityi chí. Ta ita cuan canacavá ri ta ndihí cha tyaqui chí. Ta tyicuan caa tucu ra tyayii, cuquichi tuhun chihi chí ra ta ndoo maa tyiño sahá ra.

Yoso caa cunyeé yo tindoho

¹² Ñana cha sii cuví chi ndo cha cunyeé ndo chihin cha cama iñi ndo ñáá tindoho cha vachí chí ndo. Vatyí tatu cunyeé ndo, cuñihí ndo tari noo corona. Vatyí Nyoo cucuhva ra chí ñu cuñí chí ra, cha coo ñu ñáyivi chaa chihin ra.

¹³ Tatu nya noo nyoho quichí cuví iñi ndo cha sacuvi ndo cha ña vaha, ma cuñi ndo vatyí Nyoo sacuví cha caca xiñi ndo tyicuan caa. Vatyí Nyoo ña quichí cuví iñi ra sacuví ra cha ña vaha. Ta ni ña tyiyuhú ra chí yo cha sacuví yo cha ña vaha.

¹⁴ Soco tatu nya noo ndo quichí cuví iñi ndo sacuví ndo cha ña vaha, suri cha cuenda cha chicá xiñi maa ndo cha ña vaha, yucuan chaha canacava ndo nu cuatyí.

¹⁵ Tatu cuhva xaan yo cuhva cha quihi tuhun ña vaha iñi yo, cuacoo noo quiivi ta cuasacuvi yo cuhva ña vaha cuan, ta tyicuan caa cacu cuatyí yo nuu Nyoo. Ta Nyoo tachi tuñi ra cuatyí cuan ta cuchaa tuhun chihí chi yo.

¹⁶ Yañi yuhu, cuñi xain chi ndo. Ma sandavi ñaha ndo chi ndo.

¹⁷ Tandihí cha vaha ta cha vii cha ñihí yo, quichi chi nya ityi siqui vatyi maa Nyoo chahá ra. Ta maa ra savahá ra ñuhu cha iyó andívi: tiño, ta yoo, ta ñanyii. Ta Nyoo tyicuan ri cuví ra Nyoo, ta ni chiin ña tuhvá ra nasama ra cuhva cuví ra.

¹⁸ Ta chahá ra ñayívi chaa cha iyó yo cha cuenda tuhun ndicha cha cahán ra. Vatyi xihna ca yo cuví cha nduchaá cha nuu tandihí ca cha savahá ra. Vatyi tyicuan caa cuñi maa ra.

Noo ityi cha ndicha cha tahán chi cuhun yo

¹⁹ Yucuan chaha yañi, noo noo yo ta cuñi chi cha yatyi cohon iñi yo cha tyasoho yo, soco cuñi chi cha ma yatyi xaan nacahán yo ta ma yatyi xaan cuxaan yo.

²⁰ Vatyi ñáyivi cha cuxaán, ña nyacuví ñu cha tahán iñi Nyoo.

²¹ Yucuan chaha saña ndo cha ña vaha ta cha quiñi caa cha cuaha xaan iyó siqui ñuhu ñayívi. Ta ñatíin cuenda vaha ndo chihin cha masu iñi ndo tuhun Nyoo cha tachi ra ñima ndo. Vatyi tuhun Nyoo cuan iyó tunyee iñi chi chi vatyi sacacú chi ñima yo.

²² Soco sacuvi yo yoso cuhva sañahá tuhun Nyoo. Ta ma cuiñi ri maa yo vatyi tatu tacuhva chiñi ri maa yo, suri chi maa yo sandavi ñahá yo.

²³ Vatyi ñu cha chiñi ri maa tuhun Nyoo ta ña sacuvi ñu, cuví ñu tari noo ñu cha nyehé chi nu ino.

²⁴ Ta nyehé ñu yoso caa nuu ñu, ta yaha cuan ta cuahan ñu ta naá ri iñi ñu yoso cuhva caá nuu ñu.

²⁵ Soco inga ñu cha nyita ri tyasohó tuhun Nyoo, vatyi sacuví vaha ñu cha chiñi ñu. Ta tyicuan ri sahá vaha ñu cuenda cha catyí ley Nyoo, cha cuví ley vaha ca, ley cha chahá libertad chi yo tyi tava chi chi yo ndaha ra ña vaha. Ta ñu nyacuví tyicuan caa si xaan cucuvi chi ñu.

²⁶ Tatu nya noo ñáyivi cuñi maa ñu vatyi ityi Nyoo cuahan ñu, soco ña nyatú yuhu ñu cahan ñu, suri chi maa ñu sandahvi ñahá ñu. Ta cha catyí ñu tyi ityi Nyoo cuahan ñu, cha ñima ri tuhun cuví.

²⁷ Vatyi ityi ndicha, ityi vaha nuu Nyoo Sutu yo ican cuví ihya: Cha tyinyee yo chi ñu nyehé tindoho, ñu yori sutu ta sihi, ta ñu chilí yí. Ta inga, cha sahá vaha yo cuenda chi yo coto sacuvi yo cha quiñi caa cha sacuví ñu ña ñohó nuu Nyoo.

2

Ña tahán chi cuñi yo chi noo ñáyivi ta chi inga ñu ma cuñi yo. Inuu ri tahan chi cuñi yo chi ñu

¹ Yañi yuhu, nyoho chinó iñi ndo chi Sutu Mañi yo Jesucristo ra cha cahnu ca cuví, ta ña tahán chi cha vaha ca cahán ndo chihin noo ri ñáyivi, ta chihin inga ñu ma cahan ndo.

² Vatyi tatu quihvi noo ra tyayii nu nyicu ndo, yihí xehe xuhun cuaan ndaha ra, ta finu sahna ra, ta quihvi tucu nonga ra cha ñihno sahna chahnu ri.

³ Ta nyoho tatu vaha ca tyiñuhu ndo chi ra cha vaha ñihno cuan, ta catyí ndo chi ra: “Cunya ihya noo nu vaha.” Ta chi ra ndahvi cuan catyí ndo chi ra: “Yoho cunanyaa yucuan o cunya ihya nu ñuhú”, catyí ndo chi ra.

4 Ña vaha tatu sacuví ndo tyicuan caa, vatyi ña inuu ri sahá ndo ñáyivi chi ñu, ta cha tyicuan caa, ña vaha cha chicá xiñi ndo.

5 Yañi, tyasoho ndo tuhun ihya. Nyoo nacachi vaha ra chi ñu ndahvi ihya ñayivi, vatyi ta cuhva cuví ñu ñu tyayi chihin cha chinó xaan iñi ñu chi Nyoo, ta cuñihi ñu nu vaha nu nyacá ñaha ra. Vatyi ican ihya cuví cha catyi ra tyi cuhva ra chi ñu cuñi chi ra.

6 Soco nyoho chahá ndo ticahan nuu chi ñu ndahvi. Ta ¿atu ña chitó ndo vatyi ñu tyayi, ican ñu cuví ñu cha chahñi ndahvi chi ndo? Ta chinyacá ñu chi ndo nuu ra cuví tyiño.

7 Ta ¿atu ña chitó ndo vatyi ican ñu cuví ñu cahán ña vaha siqui ra Cristo? Ta cuenda ra Cristo yihí ndo.

8 Tatu ndicha cha sacuví ndo tandihi cha catyi ley Nyoo ra cuví rey cuenda yo, vaha nyacuví ndo. Tari catyi tuhun Nyoo: “Cuñi ndo chi tahan ndo tari cuñi ndo chi maa ndo.”

9 Soco tatu chi noo ri ñu cuñi ndo. Ta chi inga ñu ña cuñi ndo, chicoó cuatyí ndo. Ta iyó cuatyí ndo nu ley Nyoo.

10 Vatyi tatu noo ñáyivi sacuví ñu tandihi cha catyi ley, ta cumañi ñu noo ri cha catyi chi, cuví chi tari cha tandihi ley ña sacuví ñu.

11 Vatyi Nyoo catyi ra vatyi ma coo inga ñusihi o inga rayi chi ñu, tatu iyó yi ñu o iyó ñasihi ra. Ta suri maa ra catyi vatyi ma cahñi yo. Yucuan chaha tatu noo ñu ña sacuví ñu cuatyí cha ña iyó inga rayi o inga ñusihi chi ñu soco chahñi ñu, suri ña quichahá ñu cha catyi ley.

12 Soco yoó cucutuñi chi yo nu ley ra Cristo cha sacacú chi yo. Yucuan cuenda tahan chi nducu yo cuhva cahan yo ta nducu yo cuhva coo yo.

13 Vatyi ñu cha ña cundahvi cuñi nyehe chi inga ñu, Nyoo cusacutuñi ra chi ñu, soco ma cundahvi cuñi ra nyehé ra chi ñu. Soco ñu cha ndahvi cuñi nyehé chi inga ñu, cuquita vaha ñu cuhva cha cutuñi chi ñu.

¿Ñáa cha sacacú chi yo, cha chinó iñi yo o cha sacuví yo cha vaha?

14 Yañi, ñáa ri tuhun tatu catyi ndo vatyi chinó iñi ndo, soco ñahri cha vaha nyacuví ndo. ¿Atu cuví cacu ndo chihin cha chino iñi ri ndo chi Nyoo?

15 Vatyi tatu noo ñu tahan yo cumañi sahma ñu, cumañi cha cachi ñu,

16 ta minoo nyoho catyi ndo chi ñu: “Cuñhan ta Nyoo na cocumi ra chuun. Na coo ca sahmon ta cha cachun”, catyi ndo. Soco ña chahá ndo cha chiñuhú chi ñu. ¿Ñáa ri tuhun cuan?

17 Ñahri yahvi nyaa cha catyi yo vatyi chinó iñi yo chi Nyoo, ta ña tyinyeé yo chi tahan yo.

18 Vasi yihí ndo cua catyi ndo: “Yoho chihin cha chinó iñun chi Nyoo ta cuñun cacun, ta yuhu caqui soco chihin cha vaha ñáyivi cuví ta chihin cha tyinyeí chi tahan yo.” Vaha. Soco yuhu catyi chuun, ¿atu cuví sañahun chii tyi ndicha chinó iñun chi Nyoo tatu ña vaha ñáyivi cuvún ta ña tyinyeún chi tahan? Ma cuví. Soco yuhu chihin cha tyinyeí chi tahan yo sañahí chuun vatyi chinó vaha iñi chi Nyoo.

19 Ta yoho chinó vavaha iñun tyi iyó noo ri Nyoo. Vaha cha chinó iñun. Soco cuihna chinó tucu iñi ra cuan tyi iyó noo ri Nyoo. Ta nihi ra chihin cha yuhví ra vatyi ma cacu ra.

20 Ma tondo xaan caca xiñun. Na cutuñi iñun vatyi tatu chinó iñi yo ta ña sacuví yo cha vaha, ñahri yahvi nyaa cha chinó iñi yo.

²¹ Ra Abraham sutu chahnu yo, cuvı ra noo ra vaha nuu Nyoo cha cuenda cha sacuvı ra cha catyı Nyoo. Vatyı chahã ra chi sehe ra, ra Isaac chi Nyoo tari cuhva catyı Nyoo chi ra.

²² Nyehún vatyı chinó iñi ra Abraham chi Nyoo ta chaha cha chinó iñi ra ta sacuvı ra tuhun cha catyı Nyoo chi ra tyı sacuvı ra. Ta nu sacuvı ra cuhva catyı Nyoo chi ra, yucuan cuvı nu natuvi vaha cha chinó iñi ra chi Nyoo.

²³ Ta tyicuan caa chinq cava tari cuhva catyı nu tutu Nyoo tyehe caa: “Ra Abraham chinó iñi ra chi Nyoo ta yucuan chaha Nyoo sahã ra tuhun tyı vaha ra nuu ra.” Ta iyó inga nu catyı chi: “Ra Abraham, nanduvı ra amigo Nyoo.”

²⁴ Ta tyicuan caa nyehe yo vatyı vaha yo nuu Nyoo cha cuenda cha nyacuvı yo cha vaha, ta ñima cha cuenda cha chinó ri iñi yo chi ra.

²⁵ Ta tyicuan caa tucu cu Rahab ñaha cata iñi cha chiyó ta cha naha. Yaha cha sacuvı ña cuatyı, sacuvı ña cha vaha quıvı chahã ña nu cacohon xehe ra cha tachı ra Josué. Ta tyinyee ña chi ra cha cuhun ra inga ityi. Ta cha cuenda cuan Nyoo sahã ra tuhun tyı vaha ña.

²⁶ Ta tyicuan caa tucu cuvı noo coño ñuhu ñáyıvı. Tatu ñahri ca cha nyitó ñu yihı chichi coño ñuhu cuan, ñahri ca vale chi. Ta tyicuan caa yoó, tatu ña sacuvı yo cha vaha, ña vale cha chinó iñi yo.

3

Yoso caa saha cuenda yo cuhva cahan yo

¹ Nyoho yañi, ma vatyı xaan quichi cuvı iñi ndo cuvı ndo noo ra sañahá tuhun Nyoo. Vatyı nyuhu cha sañahá ndi tuhun Nyoo, tatu ña vaha sañahá ndi, cahnu ca cuatyı cuvı, ta cuaha ca cutachi tuñi Nyoo chi ndi.

² Vatyı ni noo yo ta ña sacuvı yo maa maa ri maa cha vaha. Soco tandihı yo cuaha ri cuhva sacuvı yo cuatyı. Soco tatu noo yo cuvı cunyaca ñaha vaha yo cuhva cahan yo tacuhva ma coo cuatyı yo cha cuenda cha cahán yo, cuñı chi catyı vatyı ñahri cuatyı yo vatyı cuvı tucu cunyaca ñaha yo tandihı coño ñuhu yo.

³ Vatyı tatu tyihı yo yoho yuhu caballo cuvı cunyaca ñaha yo chi ti, vasi cahnu ti.

⁴ Ta tyicuan caa tucu noo barcu cahnu, vasi cahnu chi soco chihin noo vitu luhlu ri cha nyaá chata chi, cuvı sacuhun ra chi chi nya ityi nu cuñı maa ra, vasi ñihı tatyı.

⁵ Ta tyicuan caa tucu yaa yo. Cuvı chi noo cha luhlu ri. Soco cahnu xaan cahnu xaan nanduvı noo tuhun luhlu ri cahan yaa yo. Tari nahnu cuvı cayu chihin ñuhı lee cha tyaa yo chichi cuhu ta ndi maa yutun cayu.

⁶ Vatyı tyicuan caa yaa yo tari noo ñuhı luhlu cuvı chi. Ta cuvı chi tari noo cha quıñi caa cahnu cha ñohó chichi coño ñuhu yo, ta satıvı chi chi coño ñuhu yo ta tandihı cuhva iyó yo ñáyıvı, vatyı suri maa cuihna, ican tyiyuhú chi chi.

⁷ Ñáyıvı cuvı samasu ñu tandihı ri nuu quıti: saa, coo, ta quıti cha iyó chichi tyañuhu, ta samasú ñu chi ti.

⁸ Soco yori cuvı samasu yaa yo. Vatyı cuvı chi noo cha ña vaha cha ña chahá chi cha cunyaca ñaha yo chi chi. Tari noo coo, tyaá ti chi ñáyıvı, tyihı ti venenu ti ta chihı ñáyıvı. Ta tyicuan caa yaa yo.

⁹ Vatyı suri chihin yaa yo sacahnú yo chi Nyoo Sutu yo. Ta suri chihin cuan cahán ña vaha yo chi ñáyıvı cha savahã Nyoo tari cuhva caá maa ra.

¹⁰ Suri maa chihin yuhu yo sacahnú yo chi Nyoo. Ta suri chihin cuan cahán yo cha quıñi caa. Soco yañi, ña tahán chi cha sacuvı yo tyicuan caa.

11 Vatyí, ¿atu cuví quita ndutya vixi ta ndutya uva noo ndohyo? Ma cuví.

12 Yañi, ¿atu cuví quita papaya nuu noo tumangu, o cuví cuhva tupapaya noo mangu? Ma cuví. Ta tyicuan caa ma cuví quita ndutya uhva ta ndutya vixi noo ndohyo.

Cha chiñi tuñi cha vaha ca

13 Tatu yihí ndo cha chitó ndo ta iyó cha chiñi tuñi chi ndo, sañaha ndo chihin cha cachi iyó ndo. Ta sacuví ndo cha vaha chihin cha ma cahnu saha ndo chi ndo, vatyí iyó cha chiñi tuñi Nyoo chi ndo.

14 Soco tatu iyó tuhun nyiyo iñi ña vaha chichi añima ndo, sacuví ndo cha sacuví ndo soco cha cuenda cha cuñí ndo cuvaha ndo nuu ñáyivi, ta cha tyicuan caa nyacuví ndo, ña tahán chi cuyaa ndo tyi iyó cha chiñi tuñi chi ndo, vatyí cha cuyaa ndo, sandaví ñaha ndo cuví cuan, ta tixehe ndo cha ndicha.

15 Vatyí tatu chicá xiñi ndo tyicuan caa ñima cha chiñi tuñi Nyoo cuví cuan, soco cuhva chicá xiñi ñu ña ñohó nuu Nyoo cuví. Cuenda cuihna cuví.

16 Vatyí tatu nyiyo iñi ndo ta cuñí ndo cuvaha ndo nuu ñáyivi, yucuan cuví nu ican ñima nyicú ndo. Ta iyó tucu tandihí inga nuu cha ña vaha nu nyicú ndo.

17 Soco tatu iyó cha chiñi tuñi Nyoo chi ndo, ndaa iyó ndo, cachi iyó ndo. Ta nanducú ndo cuhva coo vaha ndo chihin ñáyivi chihin cha vita iñi ndo. Ta vaha ñáyivi cuví ndo. Ta cachi vaha chicá xiñi ndo. Ta cundahví cuñi ndo chi ñáyivi. Ta nducú ndo cha vaha chi tandihí ñáyivi chihin cha ñi iñi ndo.

18 Tatu nanducú yo cha coo vaha yo chihin ñáyivi, ta sañihi yo coo taxi ri yo chihin ñu, cuacoo yo noo ñáyivi cha cuiti.

4

Ma sacuví yo cuhva cuñí coño ñuhu yo

1 ¿Ñáá tuhun iyó tisihí nu nyicu ndo? ¿Ñáá tuhun iyó cuatyí? Cha cuenda cha ña vaha cha cuñí coño ñuhu ndo. Vatyí tyicuan ri iyó cha cuñi ndo ta yucuan sacañi tahan chi ndo.

2 Nyoho cuñí ndo coo ñáá ndihí cha coo chi ndo. Ta ñahri iyó chi ndo. Tyicuan ta sataśi iñi ndo ta chahñí ndo tacuhva ñihi ndo. Iyo tahan ndo chihin cha nyiyo iñi ndo ñáá cha nyehé ndo soco ña cuví ñihi ndo. Tyicuan ta cañi tahan ndo. Iyó cuatyí nu nyicú ndo soco ña ñihí ndo cha cuñí ndo. Vatyí ña chicán tahvi ndo chi Nyoo.

3 Ta tatu chicán tahvi ndo chi Nyoo, ñi ri ña ñihí ndo cha cuenda vatyí ña vaha chicán ndo. Vatyí cuñí ndo soco cha sanaa ndo cha caca noo ri maa ndo cuhva cuñí ñáyivi.

4 Ña ndicha cha chinó iñi ndo chi Nyoo. ¿Atu ña chitó ndo vatyí tatu nyacuví ndo cuhva cuñí ñáyivi, ñu xaan iñi chi Nyoo cuví ndo vatyí ña nyacuví ndo cuhva cuñí Nyoo? Yucuan chaha tatu yihí ndo nyacuví ndo cuhva cuñí ñáyivi, ñu xaan iñi chi Nyoo cuví ndo.

5 ¿Atu cha caha ri catyí nu tutu Nyoo vatyí Tatyí Ii cha chahá Nyoo coo añima yo, cuñí xaan chi chi yo, ta cuiño xaan chi chi yo? Cuñí Nyoo cha ñin ri chi maa ra cua cuñi xaan yo.

6 Soco tyinyeé ca ra chi yo tacuhva vatyí cuví nacuhva ndihí yo chi yo chi ra. Yucuan chaha catyí tucu tuhun Nyoo vatyí Nyoo ña tahán iñi ra chi ñu cahnu saha chii. Soco tyinyeé ca ra chi ñu nacotó tyi chiñuhu ra chi ñu.

⁷ Ican tuhun ñacuhva vaha ndo chi ndo chi Nyoo. Ma quichaha ndo nu cahán cuihna chihin ndo. Ta maa ra cucacacono ra nyehe ra chi ndo.

⁸ Tuhva yatyin ndo chi Nyoo ta maa ra tuhva yatyin ra chi ndo. Nyoho ñu iyó cuatyí, sandundí# ndo chi ndo. Ta nyoho cha uvi nyaa xiñi ndo sanduní# ndo ñi ndo ta cuhva ndo na sacutu Nyoo añima ndo chíhin cha vaha, tyicuan ta cundundí# ndo nuu ra.

⁹ Cucuihya cuñi ndo. Cuacu ndo. Na ndichi xiñi ndo vatyí ña vaha cuhva iyó ndo. Cha nuu cha cuacu ndo chíhin cha sii cuñi ndo cuacu ndo chíhin cha cuihya ñi ndo. Ta cha sii cuñi ndo na nanduvi chi tucuihya ñi.

¹⁰ Ndahvi saha ndo chi ndo nuu Sutu Mañi yo, ta maa ra cusanducahnu ca ra chi ndo.

Ma nyehe nyaa yo chi tahan yo

¹¹ Yañi, ma cahan ña vaha ndo siqui noo tahan ndo. Vatyí ñu cha cahán ña vaha siqui noo tahan, o nyehé nyaa ñu chi ñu, siqui ley Nyoo cahán ña vaha ñu ta nyehé nyaa ñu. Vatyí tatu nyehe nyaun, juez nasahún chuun cha nuu cha quichahún nu cahán ley cuan.

¹² Vatyí noo ri ra cuví ra cha chahá ley cuan. Ta suri ra cuví ra juez. Ta suri maa ra cuví ra ra sacacu chi yo, o sacunaa ra chi yo. Soco ¿yóó ñu cuví yoho vatyí nyehe nyaun chi inga ñu, ta sacutuñun chi ñu tari cha juez cuvún?

Ña chitó yo ñáa cha cucuvi chi yo tyaan, ta yucuan chaha ña tahán chi cahnu saha yo chi yo

¹³ Vityin cuiñi ndo tuhun ihya, nyoho cha catyí ndo: “Vityin o tyaan cuhun yo ñuu cuan, o inga ñuu cuan. Ta yucuan cunyaa yo noo cuiya vatyí sahatyiño yo ta saha ganaa yo xuhun”, catyí ndo.

¹⁴ Ta ni ña chitó ndo cha cucuvi tyaan. Vatyí ñayivi cha iyó yo cuví chi tari noo vico nuhu vatyí noo ri cuhva yihí chi, ta tañi ri ta cha naa tucu chi.

¹⁵ Soco tahán chi catyí ndo tyehé caa: “Tatu Sutu Mañi yo ta cuñi ra, coo yo ta sacuvi yo ihya o yucuan.”

¹⁶ Soco nyoho nyee xaan ndo cuñi maa ndo ta cahnu sahá ndo chi ndo. Ta ña vaha tyicuan caa.

¹⁷ Vatyí tandihí yo cha chitó yo sacuví yo cha vaha ta ña sacuví yo, chicoó cuatyí yo cha tyicuan caa.

5

Nu catyí ra Santiago ñáa cha cucuvi chi ñu tyayí

¹ Cuiñi ndo tuhun ihya, nyoho ñu tyayí! Cuacu ndo chíhin cha cuihya cuñi ndo, canachaa ndo cha cuenda tindoño cha cunyehe ndo.

² Vatyí cha tyayí# cha sacayá ndo, cha cuñi tivi. Ta sahna finu ndo, ndí# maa cha cuñi cachi tiquixín.

³ Xuhun cuaan ndo ta xuhun cuichin ndo cuxi vavaha chi. Ta yucuan chahá chi noo seña cha chinyacuví ndo. Ta tari quivi cha cucahmi chí chí ndo tari cayu ñuhú vatyí cucunaa ndo. Tyi sacayá xaan ndo cha tyayí# ndo tyi cotyiño ndo tyaan.

⁴ Ta ña tiyahví ndo yahvi cha tahán chí chí ñu ndahvi cha sahatyiño nu tyiño sahá ndo. Ta vityin chicán ñu cuatyí chaha ndo nuu Sutu Mañi yo ra nyacá ñaha ángel cha cuví sindaro cuenda ra. Ta maa Sutu Mañi yo chíñi ra tuhun cahán ñu ndahvi cuan.

⁵ Ihya siqui ñuhu ñayivi tyaqui iyó ndo, tyayí iyó ndo. Ta sacuví ndo yoso cuhva cuñi maa ndo. Tari nduxahan quini cha cucuvi, tyicuan caa nyoho, vatyí cucunaa ndo.

⁶ Ta nyoho tyaq ndo cuatyí chaha ñáyivi vaha. Ta chahñi ndo chi ñu. Ta ñu ndahvi cuan ña cuví sacacu ñu chi ñu.

Cuatu yo chi ra Cristo chihin cha cama iñi yo

⁷ Yucuan chaha, yañi, nyatú yo chihin cha cama iñi yo nyacua nya quivi quichi Sutu Mañi yo. Tari noo ra cha sahá tyiño chi cuhu nyatú ra nyacua nya cha coon savi cha xihna ri ta cha yaha savi nu ndihi, tyicuan ta naquehen ra ñáá cha tachí ra.

⁸ Ican tuhun cuatu ndo chi Nyoo chihin cha cama iñi ndo. Ta cunñi ca iñi ndo vatyí cha cuyatyin cha quichi Sutu Mañi yo.

⁹ Yañi, ma tyaa ndo cuatyí chaha tahan ndo, coto tachi tuñi Nyoo chi ndo. Vatyí Nyoo, juez cuví ra. Ta cha cuñi quichi ra.

¹⁰ Yañi, saha ndo cuenda cuhva chiyo ra profeta cha chaha cuenda tuhun Sutu Mañi yo ta cha naha, vatyí cuhva cha canyehé ra tindoho, cacunyeexaan ra.

¹¹ Chitó yo vatyí sñi xaan cuñi ra cha cunyeex tandihi nuu tindoho. Tari ra Job. Chiñi ndo tuhun yoso caa cunyeex ra tindoho cha nyehe ra. Ta chitó ndo vatyí nu ndihi tuhun, cuaha xaan cha vaha chahá Sutu Mañi yo chi ra. Vatyí Sutu Mañi yo iyó xaan ticahnu iñi chi ra. Ta cundahvi cuñi ra nyehe ra chi yo.

¹² Soco yañi, ma tyanaha ndo tacuhva chino iñi ñáyivi vatyí ndicha cha sacuví ndo. Ma tyanaha ndo ni tuhun andivi, ni tuhun ñuhu ñayivi, ni ma catyi ndo: “Chitó vaha maa Nyoo.” Tatu ndicha tuhun cahán ndo, ndicha catyi ndo. Soco tatu chitó ndo tyi ña ndicha, catyi ndo tyi ña ndicha, vatyí coto tachi tuñi Nyoo chi ndo.

¹³ Tatu nya noo nyoho nyehé ndo tindoho, çacan tahvi ndo chi Nyoo. Ta tatu nya noo ndo sñi cuñi ndo, çata ndo yaa Nyoo.

¹⁴ Tatu nya noo ndo cuhvi ndo, cuñi chi cana ndo chi ra nyisó tyiño vehe ñuhu vatyí cacan tahvi ra chaha ñu cuhvi cuan ta tyihi ra acetye chi ñu chihin sivi ra Cristo.

¹⁵ Ta tatu chinó vavaha iñi ra chi Nyoo cuhva cha chicán tahvi ra, ñu cuhvi cuan cucacu ñu. Ta Sutu Mañi yo cusanducuita ra chi ñu. Ta tatu sacuví ñu cuatyí, Nyoo cusaha ra ticahnu iñi cuatyí ñu.

¹⁶ Yucuan chaha ñahma ndo cuatyí ndo nuu tahan ndo. Ta çacan tahvi ndo chaha tahan ndo vatyí na nduvaha ndo. Vatyí nu chicán tahvi noo ra vaha chicá chihin Nyoo iyó xaan tunyee iñi Nyoo.

¹⁷ Tari ra Elías ra profeta Nyoo ta cha naha. Cuví ra noo rayñi tari maa yo. Ta chicán tahvi ra chi Nyoo vatyí ma coon savi. Ta ña coon savi uñi cuiya sisava.

¹⁸ Yahá cuan ta nacacáñ tahvi tucu ra chi Nyoo inga chaha. Ta nacoon savi inga chaha. Ta cuvahá chiti cha tachí ñáyivi nu ñuhú.

¹⁹ Yañi, tatu noo tahan ndo sandoo ñu tuhun ndicha Sutu Mañi yo, ta cuanuhu ñu ñayivi inga chaha, ta tatu tyinyeé ndo chi ñu na ndichi ñu ityi Nyoo inga chaha,

²⁰ coto ndo vatyí cha tyinyeé ndo chi ñu sacuví cuatyí cuan na ndihvi ñu ityi Nyoo inga chaha, sacacú ndo añima ñu ndahvi cuan coto cuhun ñu anyaya. Ta sacuví ndo vatyí sahá Nyoo ticahnu iñi tandihi cuatyí ñu.

Carta Cha Xihna Ri Cha Sacuhun Ra Apóstol Pedro Chi Ñáyivi Yihí Cuenda Nyoo

Nu tyaq ra Pedro noo carta chi ñáyivi yihí cuenda Nyoo

¹ Yuhu ra Pedro cuví noo apóstol cuenda ra Jesucristo, ta cuñí chi catyí, vatyí maa ra tachí chii vatyí caque tyiño ra. Tyaí noo tutu ihya chi nyoho cha ña iyó ndo ñuu ndo, vatyí iyó ndo noo noo ñuu ityí Ponto, ta Galacia, ta Capadocia, ta Asia ta Bitinia.

² Chi nyoho nacachí vaha maa Nyoo Sutu yo vatyí nyata cha naha chito ra vatyí tyicuan caa cuquichaha ndo chi ra. Maa Tatyí li tyinyee chí ndo vatyí cuví nacuhva ndo chí ndo chí Nyoo, ta tyicuan caa cuví quichaha ndo chí ra Jesucristo, ta ndundií ndo chihin niñi ra. Na naquehen ndo cuaha ca cha vaha ta cha taxi ri coo añima ndo sahá maa Nyoo.

Noo cha yihí vaha iñi yo vatyí cuñihi yo

³ Sacahnu yo chí Nyoo Sutu Sutu Mañi yo Jesucristo vatyí ndahvi cuñí ra nyehé ra chí yo ta chahá ra cha nacacu chaa yo inga chaha tacuhva coo yo ñáyivi chaa cha ma naa ca maa. Ta yucuan cuví cha chahá cha cuita iñi yo cha cuñihi yo vatyí cha nandoto ra Jesucristo.

⁴ Ta Nyoo cuacuhva ra tandihí cha tahán chí chí yo cha cumí vaha ra nya andivi. Ta cuví chí noo cha ma naa ta ni ma tiví, ta ni ma ndahva chí tari ndahva ita.

⁵ Ta vatyí chinó iñi yo chí Nyoo maa ra sahá cumi chí yo chihin tunyee iñi ra nyacua nya cacu ndihí añima yo. Ta cusañaha ra chí yo ñáá cha cuñi chí catyí cha cacú yo nu cuandihí tyembu. Vatyí cha nyatú tuhva cuan chí yo.

⁶ Ta yucuan chaha sñi xaan cuñí ndo, vasi tahán chí cha nyehé ndo ndihí nuu tindocho suhva quívi.

⁷ Vatyí cha chinó iñi yo chí Nyoo, vaha ca ican saha xuhun cuaan. Vatyí xuhun cuaan cuví chí noo cha cundihí. Soco cuví nyehe yo chihin ñuhú tatu vaha chí, vatyí chihin cha ihñi cundutya chí ta cucayu cha ña vaha yihí chihin chí. Soco ndoó xuhun cuaan vaha cuan. Tyicuan caa tucu nyehé Nyoo chí ndo tatu vaha chinó iñi ndo chí ra. Yucuan chaha nyehé ndo tindocho vityin. Soco tatu ña ndu uví iñi ndo cha chinó iñi ndo chí ra, cutuvi ndo nuu ra ta cusacahnu ñáyivi chí maa ra ta chí maa ndo quívi quichi Sutu Mañi yo Jesucristo inga chaha.

⁸ Nyoho cuñí ndo chí ra Jesucristo vasi ta nyehe ca ndo chí ra. Ta vasi ña nyehé ndo chí ra vityin, soco chinó iñi ndo chí ra, ta sñi xaan sñi xaan cuñí ndo nyacua ña ñihí ca ndo cuhva catyí ndo yoso cuhva cha sñi cuñí ndo.

⁹ Vatyí cucacu ndihí añima ndo ta yucuan cuví cha cuñihi ndo vatyí chinó iñi ndo chí Nyoo.

¹⁰ Siquí cuan canducú tuhun ra profeta Nyoo ta cha naha. Ta canducú xaan ra cuhva coto ra ñáá cha cuví cuan. Ta catyaq ra nu tutu cuenda tumañi iñi cha cucuhva Nyoo chí yo.

¹¹ Ta Tatyí li ra Cristo sacoto chí chí ra ñáá ndihí tindocho cunyehe ra Cristo, ta yaha cuan yoso caa cusanducahnu Nyoo chí ra. Ta profeta cuan canducú xaan ra cuhva cacoto ra yóo ra cucuvi ra Cristo cha cucuvi chí tyicuan caa, ta ama cucuvi tuhun cha catyí Tatyí li chí ra.

¹² Soco sacotō Nyoo chi ra vatyí tyiño cha casacuví ra, ñima cha vaha chi maa ra cuví, soco cha vaha chi maa yo cuví. Ta ican cuví cha sacotó ndi chí ndo vityin. Vatyí chihin tunyee iñi maa Tatyí li cha saquichí Nyoo, cahān ndi tuhun ra Cristo nuu ndo yoso caa sacacú ra chi yo. Ta ángel cacuñí xaan ra cacoto ra tuhun ihya.

Nacana Nyoo chi yo vatyí coo yo noo ñayiví cachi

¹³ Yucuan chaha saha vaha ndo cuenda cha cua sacuvi ndo, ta cachi coo ndo. Quihi vaha iñi ndo cha cuacuhva Nyoo chi yo cha cuenda cha cuñí ra chí yo. Cuaha cuacuhva ra chí yo quivi quichi ra Jesucristo inga chaha.

¹⁴ Ta coo ndo tari noo sehe cha quichahá chi nu cahān sutu chí. Ma coo ndo tari chiyo ndo quivi ta ni cumañi ca cohon nuu ndo chi Nyoo. Vatyí cha ña vaha cha cuñí coño ñuhu ndo chinyaca ñaha chí chí ndo.

¹⁵ Soco coo ndo noo ñayiví ndi, vatyí maa Nyoo, ra cha nacana chí ndo, ndi ra.

¹⁶ Vatyí tyicuan caa catyí Nyoo nu tutu ra. “Cundii ndo vatyí mai ndii”, catyí Nyoo.

¹⁷ Tatu tuhvá ndo chicán tahvi ndo chí Nyoo ta catyí ndo “Sutu Mañi yuhu” chí ra, saha ndo cuenda chí ndo ta saha ndo ñayiví chí ra cha ni ri ca cha iyó ndo siqui ñuhu ñayiví. Vatyí Nyoo ña sahá ra cuenda cuhva cahān yo. Soco sahá ra cuenda cuhva iyó noo noo yo, an cuví ri yo ñu tyayii, an cuví ri yo ñu ndahvi.

¹⁸ Nyoo nasama ra cuhva chiyo ndo, vatyí cuhva cuan ña vaha, Cuhva cha sanandoo Sutu chahnu ndo chí ndo cuví. Ta chitó ndo tyi Nyoo tyiyahvi ra tacuhva cuví cacu añima yo. Soco ñima chihin xuhun cuaan o xuhun cuichin. Noo cha cundihi noo quivi cuví cuan.

¹⁹ Soco cha tyiyahvi maa Nyoo chihin niñi ra Cristo. Ta yucuan cuví noo cha vaha xaan ca. Ta ra Cristo cuví ra tari noo mbee luhlu quití vaha, ñahri nu pehe ti, tyicuan caa ra Cristo, ñahri cuatyí ra soco chihí ra.

²⁰ Ta nyata ni cumañi ca chino ñuhu ñayiví chícunya cuhva cha cucuvi chí ra Cristo tyehe caa. Soco ña cuví cha numi ri. Nyacua nya vityin nu cuandihi quivi, chinq cava tandihi cuan cha cuenda cha vaha chí maa yo.

²¹ Cha cuenda ra Cristo ta chinó iñi ndo chí Nyoo. Vatyí ican ra sanandoto chí ra Cristo cha yahá chihí ra. Ta sacahnu Nyoo chí ra. Ta yucuan chaha chinó vaha iñi ndo chí Nyoo tyi cunaquehen ra chí ndo.

²² Maa Tatyí li Nyoo tyinyeé chí ndo ta cuví quichahá ndo tuhun cha ndicha. Yucuan ta cuví cuñi ndo chí tahan ndo cuenda Nyoo chihin cha niñi iñi ndo. Tyicuan caa cuñí chí cha cuñi ndo chí tahan ndo chihin cha vaha yihí añima ndo ta chihin tandihi fuerza ndo.

²³ Vatyí tari quivi cha nacacu chaa ndo, ñima tari cacu ndo chihin sutu ndo ihya ñuhu ñayiví, vatyí ra cuan numi ri chihi ra, soco nacacu chaa ndo chihin tuhun Nyoo cha ña tuhvá chihí vatyí tuhun Nyoo tyicuan ri maa iyó.

²⁴ Vatyí tyehe caa catyí tuhun Nyoo:

Tandihi ñayiví iyó siqui ñuhu ñayiví ihya cuví ñu tari cuhu.

Ta cha cahnua cha sacuvi ñu cuví chí tari ita.

Vatyí cuhu cuan na ityi, ta coyo ita cuan. (Ta tyicuan caa ñayiví, chihí ri ñu.)

²⁵ Soco tuhun Sutu Mañi yo tyicuan ri maa iyó.

Ican cuví tuhun cha cahān ndi chihin ndo: tuhun vaha cha sacacú Nyoo añima yo.

2

¹ Yucuan chaha na sandoo yo tandihí nuu cha quiñi caa. Ma sandavi ñaha yo chi ñáyivi. Ma saha ri maa yo tyi vaha yo ta ña ndicha. Ma nyiyo iñi yo nyehe yo cha iyó chi inga ñáyivi. Ñahri cuendu cahan yo.

² Soco tari cha lee cha ni cacu, nanducú vavaha chi cha caxin chi, tyicuan caa nducu ndo tuhun Nyoo tacuhva vatyi chihin cuan cuahnu ndo ta cohon nuu ca ndo chi Nyoo, nyacua nya cacu ndihí añima ndo,

³ tatu ndicha cha nacotó ndo vatyi Sutu Mañi yo, vaha xaan ñáyivi cuví ra chihin yo.

Tari yuu nyitó, tyicuan caa cuví ra Cristo

⁴ Sayatyin ca ndo chi ndo chi Sutu Mañi yo. Vatyi cuví ra tari noo yuu nyitó. Ñáyivi ña cuñi ñu cotyiño ñu yuu cuan. Soco Sutu Mañi yo cuví ra tari noo yuu tyaqui cha nacachí Nyoo.

⁵ Ta nyoho tucu cuví ndo tari yuu nyitó. Ta maa Nyoo tari noo ra savahá vehe cuví ra. Ta yucuan chaha cuhva ndo na sandu ñin ri ra chi ndo tacuhva cuví ndo tari noo vehe nu coo ra. Na cu ñin ri ndo ta cuhva ndo cha sandu ii Nyoo chi ndo tacuhva cuví sacuví ndo tyiño nuu ra. Ta maa maa ri tyiño cha sacahnú ndo chi Nyoo cucunyah ndo. Vatyi yucuan cuví cha tahán iñi Nyoo sacuví yo chihin tunyee iñi maa ra Jesucristo.

⁶ Vatyi catyí tucu nuu tutu Nyoo tyehe caa: Nyehe xihna, yuhu nacachí noo yuu cha chiñuhú ca ta tyaqui xaan ca, ta chaquin yuu cuan nu cuasavahi vehi nya Sión.

Ta ñu chinó iñi chi ra cha cuví yuu cuan, ma quehen ñu ticahan nuu. Tyicuan caa catyí Nyoo tuhun ra Cristo nuu tutu ra.

⁷ Yucuan chaha, cha cuenda yoó cha chinó iñi yo chi ra Cristo ra cuví yuu cuan, chiñuhú xaan ra chi yo. Soco cha cuenda ñu cha ña chinó iñi chi ra, cuví ra tari noo yuu cha cahán Nyoo tuhun nu tutu ra ta catyí chi tyehe caa: Yuu cha ña cacuñi ra casavahá vehe cotyiño ra, ican cuví yuu cha chiñuhú ca, catyí chi.

⁸ Ta catyí tucu chi:

Ican ra cuví yuu cha cuaha xaan ñu cunañi chaha ta nduva ñu.

Cuví ra noo cava cha sanduvá chi ñu, catyí chi nuu tutu Nyoo.

Tari cha nduvá ñu cuví cuan vatyi chiñi ñu tuhun Nyoo, ta ña quichahá ñu. Vatyi tyicuan caa nyaá vatyi cusacuví ñu cuan.

Ñáyivi cha yihí cuenda Nyoo

⁹ Soco nyoho cuví ndo ñáyivi nacachí vaha Nyoo. Ta tari tata sutu cuví ndo tyi sacuví ndo tyiño nuu Nyoo, ra nyacá ñaha. Ta cuví tucu ndo noo ñáyivi ii nuu Nyoo. Vatyi cuví ndo ñáyivi chi maa ra, tacuhva vatyi cahan ndo tuhun cha vaha cha sacuví ra. Vatyi maa ra natavá ra chi ndo nu ñaa iñi ta vityin cuahan ndo nu ndichin nu tyaqui.

¹⁰ Ta quivi ca cuan, cuví ndo ñáyivi cha ñima ri tuhun. Soco vityin ñáyivi chi Nyoo cuví ndo. Ta quivi cuan yori cundahvi cuñi nyehe chi ndo, soco vityin Nyoo cundahvi cuñi ra nyehé ra chi ndo.

Nu catyí ra Pedro vatyi coo yo, soco sacuví yo tyiño nuu Nyoo

¹¹ Yañi, cuñi xain chi ndo. Chicá noo ndo siqui ñuhu ñáyivi ihya, soco ñima ca ra ñuhu ñáyivi ihya cuví ndo. Soco andivi cuví ñuu ndo. Yucuan chaha catyí chi ndo ma cuhva ndo ityi chi coño ñuhu ndo vatyi sacuví ndo cha ña vaha cha cuñi chi. Vatyi tari quivi cañi tahan cuan chihin añima yo cuví cuan.

12 Saha ndo cuenda cuhva iyó ndo mahñu ñu cha ña ñohó nuu Nyoo. Vatyí vasi cahán ña vaha ñu siqui ndo, ta catyí ñu vatyí ña vaha ndo, soco nyehé ñu cha vaha cha sacuví ndo ta cusacahnu ñu chi Nyoo nachaa chi quivi cha cuquichi nyehé ra cha sacuví yo.

13 Ta cha cuenda cha cuñi ndo chi Nyoo, quichaha ndo chi ra cuví tyiño ñuu nu iyó ndo. Quichaha ndo chi ra cuví tyiño, cuví ri ra rey cahnu ca,

14 o cuví ri noo ra tachi rey chi vatyí tachi tuñi ra chi ra iyó cuatyí o tatu ñahri cuatyí yo ma tachi tuñi ra chi yo, soco cucatyí ra tyi vaha yo.

15 Vatyí Nyoo cuñi ra vatyí chihin cha vaha nyacuví ndo ta sandihi ñu tondo cha cuví yuhu ñu, ñu cahán cha ña ndicha vatyí ña chitó ñu tuhun cahán ñu.

16 Coo ndo tari cha yori nyacá ñaha chi ndo, soco ñima cha cuenda cuan ta cusacuvi tucu ndo cha ña vaha. Soco sacuvi ndo tyiño nuu Nyoo.

17 Saha ndo ñáyivi chi tandihi ñáyivi. Cuñi ndo chi ñu yihi cuenda Nyoo. Saha ndo cuenda vatyí Nyoo nyehé ra tandihi cha sacuví ndo. Saha ndo ñáyivi chi ra nyacá ñaha.

Uvi tahan cuhva nyehé yo tindoho

18 Nyoho cha cuví ndo musu, cuhva ndo cha cunyaca ñaha chitoho ndo chi ndo, ta quichaha ndo chi ra, vasi xaan ra o vasi vaha ra.

19 Vatyí tatu cunyeé yo tindoho cha sanyehé ñáyivi chi yo cha cuenda cha sacuví yo cha vaha nuu Nyoo, yucuan cuví cha chaá nuu Nyoo.

20 Soco tatu sacuví ndo noo cha ña vaha ta tachi tuñi ñu chi ndo, ñahri maa tuhun cha cunyeé ndo tindoho cha nyehé ndo cha cuenda cuan. Soco tatu nyehé ndo tindoho cha cuenda cha sacuví ndo cha vaha, ta cunyeé ndo chihin cha cama iñi ndo, ican ihya cuví cha vaha nuu Nyoo.

21 Vatyí nacana Nyoo chi yo vatyí coo yo tyehe caa. Vatyí tyicuan caa tucu nyehé ra Cristo tindoho cha cuenda maa yo, na cutuhva yo ta quehen yo cha caá ra.

22 Maa ra ni noo cuatyí ña sacuvi ra. Ni noo chaha ña sandavi ñaha ra chi ninoo ñáyivi.

23 Cuhva cha cahán ñu chi ra, ña nacahán xaan ra. Cuhva cha nyehé ra tindoho, ña tyanahá ra chi ñu. Soco natyaa ra chi ra ndaha Nyoo, vatyí Nyoo tuhvá ra sacutuñi ra chi ñáyivi chihin cha ndaa ta chihin cha ndicha.

24 Vatyí chata maa ra Cristo nicoso ndi maa cuatyí tandihi yo cuhva cha tacaá ra nu cruzi cuan. Tyicuan caa cuví tacuhva vatyí ma sacuvi ca yo cuatyí, ta coo yo noo ñáyivi vaha. Vatyí cha cuenda cha ñicuehe maa ra, yoó nduvaha yo.

25 Vatyí quivi cuan chica noo ndo tari mbee cha cuanaá. Soco vityin nacuhva cuenda ndo chi ndo chi ra Cristo, ra cuví pastor cha sahá cuenda añima yo.

3

Yoso caa tahan chi coo ñu tandaha

1 Tyicuan caa tucu nyoho, ñu iyó yí. Quichaha ndo chi yí ndo. Vatyí tatu ña quichahá ra tuhun Nyoo soco cunachino iñi ra cha cuenda cha nyehé ra cuhva iyó ndo. Ta ña chiñuhú ri cha cuví yuhu xaan ndo chihin ra.

2 Vatyí nyehé ra tyi cachi iyó ndo ta sahá ndo ñáyivi chi ra.

3 Ta ma caca iñi ndo tuhun cha sandutyaqui ndo chi ndo cuhva nyehé ndo, cuví ri chihin cha iyo xaan sanduvií ndo xiñi ndo, o cuví ri cha sandutyaqui

ndo chi ndo chihin cha tyaa ndo xuhun cuaan chi ndo, o cuvi ri cha cuihno ndo sahna vaha xaan. Ma nducu ndo tandihí cuan.

⁴ Soco nducu ndo cuhva ndutyacuí ndo chihin cuhva vaha iyó ndo. Vatyí cha vita iñi yo ta cha taxi ri iyó yo, yucuan cuví cha quitá chichi añima yo. Ta vatacuñi ña tuhvá cuan tiví. Vatyí ñahri nonga cha tyacuí ca nuu Nyoo tari cuan.

⁵ Vatyí tyicuan caa cuhva chiyo ñusihí cha yihí iñi chi Nyoo ta cha naha. Tyicuan caa sandutyacuí ñu chi ñu, ta quichahá ñu chi yí ñu.

⁶ Tari cu Sara, quichahá ña chi ra Abraham yí ña. Ta catyí ña: “Tata”, chi ra. Ta nyoho tari sehe ña cuví chi ndo tatu sacuví ndo cha vaha tari maa ña. Ta ñahri cha yuhví ndo.

⁷ Ta tyicuan caa tucu nyoho ra iyó ñasihí. Cuytuñi iñi ndo cuhva coo ndo chihin ñasihí ndo. Ta saha ndo ñáyiví chi ña, ñima vatyí yica ca ña cha nuu nyoho. Soco vatyí ñin ri naquehen ndo tumañi iñi cha chahá Nyoo chi ndo. Ta yucuan cuví ñáyiví iyó ndo. Vaha cgo ndo tyehe caa, tacuhva vatyí ñin cuenda Nyoo tuhun chicán tahvi ndo chi ra.

Nu catyí ra Pedro yoso caa tahán chi coo yo

⁸ Nu ndihí tuhun, cuñí chi cha ñin ri cuhva caca xiñi tandihí ndo. Ta cundahvi cuñi ndo nyehe ndo chi tahan ndo. Cuytuñi ndo chi tahan ndo cuenda Nyoo tari cha yañi ndo cuví. Vita cahan ndo chihin ñu. Ta ma cahnu saha ndo chi ndo. Vaha ñáyiví cuví ndo.

⁹ Ma sacuví ndo cha ña vaha chihin ñu sacuví cha ña vaha chihin ndo. Ni ma cahan ndo chi ñu tatu cahán ñu chi ndo. Soco cha vaha sacuví ndo chihin ñu. Vatyí Nyoo nacana ra chi ndo vatyí cunaquehen ndo cha vaha cha iyó chi ra.

¹⁰ Vatyí catyí tuhun Nyoo tyehe caa:

Ñu cha cuñí coo noo ñáyiví chihin tusí iñi, cuñí chi saha ñu cuenda cuhva cahán ñu. Ta ma cahan ñu cha ña vaha, ta ni ma cahan ñu cuendu.

¹¹ Ta cuñí chi cha sandoo ñu cha ña vaha ta sacuví ñu cha vaha.

Ñanducu ñu cuhva coo taxi ri ñu.

Ta ma saña ñu.

¹² Vatyí Sutu Mañi yo sahá cuenda ra chi ñu vaha.

Ta tyasohó ra nu chicán tahvi ñu chi ra.

Soco ñu sacuví cha ña vaha, xaan cuñí ra chiehi chi ñu.

¹³ ¿Yóo cha cuví sacuví cha ña vaha chihin ndo tatu nyoho tyicuan ri nducuí ndo cuhva sacuví ndo cha vaha?

¹⁴ Soco vasi nyehé ndo tindoho cha cuenda cha sacuví ndo cha vaha, soco cucusí cuñi ndo. Ta ni ma nayuhvi ndo tatu tyanaha ñáyiví chi ndo.

¹⁵ Soco chichi añima ndo sacahnu ndo chi ra Cristo ta cuhva ndo na cunyaca ñaha ra chi ndo. Tyicuan ri caca iñi ndo tuhun Nyoo tacuhva vatyí tatu ndaca tuhun noo ñu chi ndo ñáa tuhun chinó iñi ndo chi ra, soco cuví nacuhva ndo cuenda chi ñu chihin cha ña cahnu saha ndo chi ndo ta chihin cha ndicha sahá ndo ñáyiví chi ra.

¹⁶ Cachi cgo ndo tacuhva cha ma yuhvi añima ndo nuu Nyoo, vatyí tatu cahán ña vaha ñáyiví siqui ndo cha cuenda cuhva vaha iyó ndo chihin tuhun ra Cristo, soco suri maa ñu cucahan nuu ñu cha cuenda tuhun cahán ñu siqui ndo.

17 Tatu maa Nyoo cuñi ra cha nyehe yo tindoho, vaha ca cha nyehé yo cha cuenda cha sacuvi yo cha vaha ta ñima ca cha cuenda cha sacuvi yo cha ña vaha.

18 Vatyí suri ra Cristo nyehe ra tindoho ta chihí ra ñn chaha cuiri cha cuenda cuatyí yo. Ra vaha cuví ra ta chihí ra cha cuenda yo ñu iyó cuatyí. Vatyí tyicuan caa nuña ra ityí nachaa yo ityí nuu Nyoo. Chihí coño ñuhu ra, soco nandoto tucu ra chihin Tatyí Ii ra.

19 Tyicuan ta chihin Tatyí Ii ra chahan ra chicahan ra chihin añaima cha ñohó vehe caa.

20 Ta ican ñu cuan cuví ñu ña quichaha chi Nyoo quivi chiyo ra Noé ta tyembu chahnu. Ta nyatú Nyoo chi ñu nandu uvi iñi ñu cuatyí ñu cha ni ri ca cha cuahan chino barcu cha savaha ra Noé. Soco ña cuaha ñu cacu quivi sahvi ndutya ñuhu ñayivi. Uña tahan ri ñu cacu chihin ndutya vatyí nandaa barcu nu ñohó ñu nu ndutya cuan.

21 Ta tyicuan caa tucu maa yo tari quivi cacu yo chihin ndutya nu condutya yo. Cacú yo soco ñima cha cuenda cha nacatya yo coño ñuhu mecu yo. Soco cha cuenda cha chicán tahvi yo chi Nyoo na sanduvii ra añaima yo ta sacacu ra chi yo cha cuenda cha nandoto ra Cristo.

22 Ta nandaa xica ra andivi, ta nyaá ra chiyo vaha Nyoo. Nyacá ñaha ra chi ángel ta tandihí cha nyacá ñaha chi ñayivi.

4

Na sacuvi yo tyiño nuu tahan yo yoso cuhva chaha Nyoo chi yo

1 Yucuan chaha tari nyehe ra Cristo tindoho chihin coño ñuhu ra, sandunyeé ndo iñi ndo tacuhva cuví cunyeé ndo nyehé tucu nyoho tindoho. Vatyí ñu nyehé tindoho chihin coño ñuhu, ña sacuvi ca ñu cha quiñi caa cha cuñi coño ñuhu ñu.

2 Tacuhva vatyí cuvi coo ñu cuhva cuñi Nyoo. Ta ma sacuvi ca ñu cuhva cuñi coño ñuhu ñu.

3 Vityin cha yaha chinyacuví xaan ndo cha quiñi caa nu quichi chi. Sacuvi ndo cuhva tahán iñi ñu ña ñohó nuu Nyoo. Ta chiyo ndo yoso cuhva cuñi ndo, cuaha viciu sacuvi ndo, cuaha cha quichi cuvi iñi coño ñuhu ndo cha quiñi caa chinyacuví ndo. Chiñi ndo chihin ndixi. Maa maa ri vico chiyo ndo. Ta quiñi xaan sacahnu ndo xitohyo cha ña tahán chi sacahnú ndo.

4 Ta vityin iyo cuñi ñu ña ñohó nuu Nyoo vatyí ña cutahán ca ndo chihin ñu ta ña sacuvi ca ndo cha quiñi caa cuan. Ta yucuan chaha cahán ña vaha ñu siqui ndo.

5 Soco nyaá nacuhva ñu cuenda chi ra cha nyatú tuhva quivi sacutuñi ra chi ñu nyitó ta chi ñu chihí.

6 Yucuan chaha sacoto ra Cristo tuhun vaha chi ñu ndiyi ñandihí. Vatyí tacuhva cuvi coo añaima ñu tari iyó Nyoo, vasi cha cutuñi chi ñu tari cutuñi chi tandihí ñayivi iyó siqui ñuhu ñayivi quivi chihí coño ñuhu ñu.

7 Soco cha cuyatyin cha cundihí tandihí maa. Yucuan chaha cachi coo ndo ta cunyaa vaha ndo tyiño cha chicán tahvi ndo.

8 Ta cha xihna ri tahán chi cha cuñi xaan ndo chi tahan ndo. Vatyí tatu cuñi yo chi tahan yo, cuaha xaan chaha cusaha yo ticahnu iñi chi ñu, tyi maa Nyoo cuñi ra chi yo ta cuaha xaan chaha sahá ra ticahnu iñi chi yo.

9 Tatu chaá noo ñayivi vehe ndo, vaha tyiñuhu ndo chi ñu ta ma cuñi ndo tyi sayangá ñu chi ndo.

¹⁰ Ta tahan tahan yo na sacuvi yo tyiño nuu inga yo, yoso cuhva cha chahá Nyoo chi yo. Vatyí cuñí chi cha cotyiño yo siin siin cha vaha cha chahá ra chi noo noo yo cha cuenda cha vaha chí inga tahan yo.

¹¹ Tatu chahá Nyoo vatyí ñihi vahun tuhun cahun chihin ñáyivi, cahan soco maa maa ri tuhun cha chahá Nyoo. Tatu chahá ra tyi sacuvun tyiño nuu ñáyivi, na sacuvun chihin fuerza cha chahá ra. Tandihí cha sacuví ndo, sacuvi ndo tacuhva vatyí chihin tandihí cha nyacuví ndo sacahnú ndo chí Nyoo cha cuenda ra Jesucristo. Chi maa Nyoo tahán chí sacahnu yo. Ta na cunyaca ñaha ra chihin tunyee ñi ra tyicuan ri maa. Ta na cuví chí tyicuan caa.

Cuví cusí cuñi yo tatu nyehé yo tindocho cha cuenda ra Cristo

¹² Yañi, cuñí xain chí ndo. Ma iyo xaan cuñi ndo tatu vachi tindocho ñihi siqui ndo. Ma cuñi ndo vatyí ña tahán chí nyehe ndo tindocho.

¹³ Soco cusí cuñi ndo vatyí cuví nyehe ndo tindocho tari nyehe ra Cristo tindocho. Vatyí tyicuan caa ta cuví cusí tucu cuñi ndo na nyehe ndo cha cahnu cuví ra quivi cuquichi ra.

¹⁴ Tatu cahán ña vaha ñu siqui ndo vatyí nyicón ndo chí ra Cristo, cusí cuñi ndo, vatyí tyaqui xaan nyaá Tatyí li chihin ndo. Maa ñu cuan cahán ña vaha ñu siqui ra Cristo, soco nyoho sacahnú ndo chí ra.

¹⁵ Soco tatu nyehé ndo tindocho cha tyicuan caa, vaha, ta ñima ca cha nyehé ndo tindocho cha cuenda cha chahñi ndo, o cha suhu ndo, o cha sacuví ndo cha ña vaha, o cha tyihí ndo chí ndo nu ña tahán chí.

¹⁶ Soco tatu nyehé ndo tindocho cha cuenda cha yihí ndo cuenda ra Cristo, ma cahuan nuu ndo. Soco sacahnu ndo chí Nyoo, vatyí chahá chí cuhva nyehe ndo chiin tindocho cha cuenda maa ra Cristo.

¹⁷ Vatyí cha cha quivi cha quichahá sacutuñi Nyoo chí tandihí ñáyivi. Ta xihna ca chí yoó cha cuví yo ñu yihí cuenda ra. Soco tatu tyehe caa tachí tuñi Nyoo chiin ri chí maa yo, ¿yoso caa cucuvi chí ñu cha ña quichahá tuhun Nyoo?

¹⁸ Tatu yí cacú añima ñu vaha, ¿yoso caa cucuvi chí ñu quiñi iyó, ñu iyó cuatyí?

¹⁹ Yucuan chaha tatu nyehé ndo tindocho cuhva cuñi Nyoo, cuñi chí cha sañihi ca ndo sacuvi ndo cha vaha. Ta tyaa ndo añima ndo ndaha Nyoo. Maa ra savahá chí yo, ta maa ra ndicha tuhun cahán ra ta cusacuví ra tari cuhva catyí ra.

5

Nu chahá ra Pedro tuhun chí yo

¹ Yucuan chaha chahí tuhun chí ra chahnu nu nyicú ndo. Vatyí ra chahnu cuví tucu yuhu. Ta cuví cha ndaa vatyí nyehí tandihí tindocho cha cuví chí ra Cristo. Ta cucutahin chihin tandihí ca ra quivi cunyicu yo chihin ra Cristo na quichi ra inga chaha chihin cha cahnu cuví ra.

² Tari noo ra sahá cumi mbee, tyicuan caa saha cumi ndo chí ñu yihí cuenda Nyoo ñu yihí ndaha ndo. Ta sacuvi ndo chihin cha iyo vaha ñi ndo tari cuhva cuñi Nyoo, ta ñima chihin fuerza. Ta ni ñima cha cuenda cha cuñi ndo xuhun. Soco sacuvi ndo tyiño chihin cha ñi ñi ndo.

³ Ta ñima tari cha maa ndo nyacá ñaha ndo chí ñu sahá cumi ndo. Soco chihin cuhva vaha iyó ndo chihin Nyoo, sañaha ndo chí ñu cuví mbee sana Nyoo yoso caa tahán chí coo ñu.

⁴ Ta quivi quichi ra cuví nuu chi ra sahá cumi mbee, cunaquehen ndo noo cha vaha, noo cha tyaqui cha cucuhva Nyoo chi ndo. Noo cha ma tivi ca maa.

⁵ Tyicuan caa tucu nyoho ñu tyivaa, quichaha ndo chi ñu chahnu. Ta ñima ñin ri maa ñu tyivaa soco tandihí ri ndo quichaha ndo chi tahan ndo. Ta ndahvi saha ndo añima ndo. Vatyí:

Nyoo ña cuñi nyehe ra chi ñu cahnu sahá chi.

Soco tyinyeé ra chi ñu ndahvi sahá chii.

⁶ Ndahvi saha ndo añima ndo nuu Nyoo. Ta cuhva ndo chi ndo na cunyaca ñaha ra chi ndo tacuhva cuvi sacahnu ra chi ndo quivi cha tahan chi. Tyi maa ra iyó xaan fuerza chi ra.

⁷ Cuhva ndo tandihí tindoho cha chicá xiñi ndo chi Nyoo. Vatyí maa ra niñi cuñi ra chihin ndo.

⁸ Cachi cohon iñi ndo ta saha vaha ndo cuenda nya cha vaha ta nya cha ña vaha, vatyí cuihna, ra xaan iñi chi ndo, chicá noo ra tari noo ndicaha xaan nanducú ti yóo chi cachi ti, tyicuan caa chicá noo ra ña vaha, nducú xaan ra cuhva saha ganaa ra chi ndo.

⁹ Soco ñihi cujnanyaa ndo chihin cha ñi iñi ndo chinó iñi ndo chi Nyoo tacuhva cuvi chasaha ndo chi ra ña vaha. Ta nacoto ndo vatyí tandihí ñu ñohó cuenda ra Cristo nacahnu ñuhu ñayivi, nyehé tucu ñu cuan tindoho tari maa ndo.

¹⁰ Soco Nyoo tyinyeé ra chi yo, ta cha yaha nyehe ndo tindoho suhva ri quivi, Nyoo cusanducuiti ca ra chi ndo, ñihi ca cunicunyyaa ndo chihin ra ta cunacuhva ca ra fuerza chi ndo. Ta ican Nyoo cuví ra chahá tandihí cha vaha chi yo ta maa ra cana chi yo tyi cu ñin ri yo chihin ra Cristo tacuhva coo yo nu tyaqui chihin ra tyicuan ri maa.

¹¹ Na sacahnu yo chi ra ta na cunyaca ñaha maa ra tyicuan ri maa. Ta na cuvi chi tyicuan caa.

Nu ndihí chahá ra Pedro nocumi chi ñu

¹² Sacuhin carta ihya chi ndo chihin ra Silvano, yañi yo. Ta cha cuenda chi yuhu, maa ra cuví noo ra ñi xaan iñi nyicón chi ra Cristo. Tyaj suhva nu tutu ihya chi ndo vatyí chahí tuhun chi ndo ta catyí chi ndo vatyí cha vaha cha ñihí ndo cuví cha ndicha vaha cha chahá Nyoo chi yo cha cuenda cha cuñi ra chi yo. Ma saña ndo ihya.

¹³ Vachi nocumi chi ndo sahá ñu yihí cuenda Nyoo nya nu cuví ityi Babilonia. Tari nacachi Nyoo chi maa ndo, tyicuan caa nacachi tucu ra chi ñu cuan. Ta vachi nonga nocumi sahá ra Marcos sehi cha cuenda Sutu Mañi yo.

¹⁴ Cuhva ndo nocumi chi noo noo tahan yo chihin cha cuñi ndo chi ñu.

Na coo cha taxi ri cuñi añima tandihí ri ndo cha ñin ri cuví ndo chihin ra Jesucristo.

Ta na cuvi chi tyicuan caa.

Carta Cha Cu Uvi Cha Sacuhun Ra Apóstol Pedro Chi Ñáyivi Yihí Cuenda Nyoo

Nu tyaá ra Pedro noo tutu chi ñu yihí cuenda Nyoo

¹ Yuhu ra Simón Pedro sacuví tyiño nuu ra Jesucristo. Ta cuví noo apóstol chi ra. Cuñí chi catyí tyi tachí ra chíi vatyi caque tyiño ra. Tyaí tutu ihya chi nyoho cha chinó iñi ndo chi Nyoo tari cuhva cha tyaqui chinó iñi nyuhu. Vatyi yucuan cuví cha chino iñi yo vatyi vaha ra Jesucristo, ra cuví Nyoo, ra sacacú chi yo.

² Na naquehen ca ndo cha vaha cha chahá Nyoo chi yo. Ta na coo ca cha taxi ri añima ndo cha cuenda cha ñohó nuu ndo chi Nyoo ta chi Sutu Mañi yo Jesús.

Yoso caa coo ñu yihí cuenda Nyoo

³ Nyoo chihin tunyee iñi ra, chahá ra tandihí cha chiñuhú chi yo tacuhva cuví coo cachi yo nuu ra ta saha yo ñáyivi chi ra. Tandihí ihya ñihí yo cha cuenda cha chicohon nuu yo chi ra cha caná chi yo. Vatyi chicohon nuu yo tyi cahnu cuví ra ta tyaqui xaan cha sacuví ra.

⁴ Ta chihin tandihí ihya, chahá ra cha catyí ra tyi cucuhva ra chí yo. Ta cahnu xaan ta yahvi xaan nyaá cuan. Vatyi cha cuenda ihya nanduvi yo tari maa ra. Vatyi sacanyaha ra cha quiñi caa cha quichí cuví iñi yo, ta ma tiví yo tari tiví ñáyivi iyó siqui ñuhu ñáyivi ihya.

⁵ Ta yucuan chaha cuñí chi cha chinó ca iñi yo chi Nyoo ta nducu yo cuhva cha coo cachi yo. Yaha cuan cuñí chi cha nducu yo cuhva ta cutuñi vaha iñi yo cuhva cuñi Nyoo chihin yo.

⁶ Ta yaha cuan cuñí chi cha saniñi yo cha cunyaca ñaha yo coño ñuhu yo ta cuhva chicá xiñi yo. Yaha cuan ta nducu yo cuhva cha cucama iñi yo. Yaha cuan ta nducu yo cuhva cha cuñi ca coo yo nuu Nyoo.

⁷ Yaha cuan ta nducu yo cuhva cha cuñi yo chi tahan yo. Yaha cuan nducu yo cuhva cha cuvita xaan añima yo chihin tandihí ñáyivi.

⁸ Tatu tyehe caa iyó ndo ta tyicuan ri nducú ndo cuhva cha coo tandihí ihya chi ndo, Nyoo cucotyño xaan ra chí ndo. Ta tatu sacuví ndo tyehe caa, ña chaha xaan ri chicohon nuu ndo chi Sutu Mañi yo Jesucristo.

⁹ Soco ñu cha ñahri ihya iyó chi, cuví ñu tari noo ra cuaa. Ña cutuñi iñi ñu cha tahan chi coto ñu. Ta naá iñi ñu tyi sandachí Nyoo cuatyi ñu ta ityi chata ca.

¹⁰ Yucuan chaha yañi, saniñi ndo coo ndo tyehe caa. Tyicuan ta cundicha vaha tyi caná Nyoo chi ndo ta nacachí ra chí ndo. Vatyi tatu sacuví ndo tyehe caa, ma canacava maa ndo.

¹¹ Tyicuan caa ta totyehe ri cuhva Nyoo cha quihvi ndo nu nyacá ñaha Sutu Mañi yo Jesucristo tyicuan ri maa. Maa ra cuví ra sacacú chi yo.

¹² Yucuan chaha cuasanicohon que iñi ndo tuhun ihya, vasi cha chitó ndo, ta ñi iñi ndo sacuví ndo tuhun ndicha cha cutuhva ndo.

¹³ Ta cuhva cha cuñi mai, vatyi cha ñi ri ca cha iyé, vaha sanicohin iñi ndo coto naa iñi ndo tuhun ihya.

¹⁴ Vatyi chité tyi ña naha ca ta cusandoi ñáyivi ihya. Vatyi tyicuan caa sacoto Sutu Mañi yo Jesucristo chíi.

¹⁵ Soco cuasaniñi tacuhva vatyi tatu yahá chihj soco nichón iñi ndo tuhun ihya.

Nu nacityí ra Pedro yoso caa nyehe ra cha cahnu cuvi ra Cristo

¹⁶ Ñima tyisu ri canatava ndi quivi sacoto ndi tuhun ra Jesucristo chi ndo. Vatyi cha nyehe vaha ndi chihin chiti nuu ndi cuvi. Vatyi nyehe ndi cha cahnu xaan cuvi Sutu Mañi yo Jesucristo. Ta sacoto ndi chi ndo tyi iyó xaan tunyee iñi chi ra ta cuquichi ra inga chaha.

¹⁷ Vatyi nyehe ndi nu sacahnu xaan Nyoo Sutu yo chi ra. Ta tyaqui xaan tyaqui xaan cuvi nu cahan Nyoo ta catyi ra: "Ican ihya Sehi. Ta cuñi xain chi ra. Ta sii cuñi chihin ra", catyi Nyoo tuhun ra Jesús quivi cuan.

¹⁸ Ta nyuhu chiñi ndi ndusu Nyoo cha quichi ityi andivi quivi cha nyicu ndi chihin Sutu Mañi yo nu yucu ii cuan.

¹⁹ Ta siin ri cumi yo nonga tuhun cha ndicha vaha cha catyaa ra profeta. Nyaá vaha nu tutu nu cahan chi tuhun ra Cristo. Ta vaha sacuvi ndo tatu quichahá vaha ndo tuhun ihya. Vatyi cuvi chi tari noo ñuhu ndichin cha cayú nu ñaa iñi nyacua nya cundichin ta caña ra Cristo tari caña tiño cahnu cha ñaa ca, vatyi sandichin ra aña ma yo.

²⁰ Soco cofo vaha ndo vatyi cha minoo tuhun ri yo, ma cuvi catyi yo ñaa cha cuñi chi catyi noo tuhun cha nyaá nu tutu Nyoo.

²¹ Vatyi ra cacuvi profeta ta cha naha, ña cahan ra cuhva cuñi ri maa ra. Soco cuhva cuñi Nyoo cahan ra. Ta Tatyí li saquehen ityi chi ra.

2

*Ra casañahá cha ña ndicha
(Judas 4-13)*

¹ Soco cachiyo tucu ra profeta cuendu nu nyicu ñu Israel ta cha naha, cacatyí ra tyi cuvi ra profeta Nyoo. Ta tyicuan caa cuacoo tucu ra sacuahá ra sañahá cuendu nu nyicu ndo. Xehe ri cuasañaha ra tuhun cha ña ndicha cha cuvi sativi chi ndo. Ta cuacatyí ra tyi ña ndicha Sutu Mañi yo ra sacacu chi ra. Yucuan chaha numi ri cucunaa ra cuan.

² Ta cuaha xaan ñu cucunicon ñu chi ra chihin cha quiñi caa cha sacuvi ra. Ta cuaha xaan ñu cucahan ña vaha ñu siqui tuhun cha ndicha vaha ra Cristo.

³ Ta chaha cha iyo cuñi ra xuhun, ta cusandavi ñaha ra chi ndo chihin cha casañahá ra maa ri cha ña ndicha. Soco nyatú Sutu Mañi yo tachi tuñi ra chi ra vatyi cha naha iyó maa tuhun cha cunaa ra.

⁴ Vatyi ni ri chi ángel cha chicoo cuatyí quivi cuan ta ña saha Nyoo ticahnu iñi. Soco tuchi ra chi ra anyaya. Ta sandoo ra chi ra nu ñaa iñi, nuñi ra chihin cadena nyacua nya quivi cutuñi chi ra nuu Nyoo.

⁵ Ta ni ña saha Nyoo ticahnu iñi chi ñu chiyo ta cha naha. Yucuan chaha tachi ra savi xaan siqui ñayivi quiñi iyó cuan. Ta sacacu ra chi noo tuhun ri maa ra Noé, ra cha cahan tuhun vatyi coo yo noo ñayivi cachi. Ta cacu tucu ucha ca ñayivi ñandihí.

⁶ Ta tyicuan caa tucu sacunaa Nyoo ñuu Sodoma ta ñuu Gomorra. Vatyi chahmí ra nyacua nya cha ndihi maa nduvi ñiyaa. Tacuhva vatyi cunyehe ñayivi quiñi iyó cha cucoo nu cuahan ca chi.

⁷ Soco sacacu ra chi ra Lot vatyi cuvi ra noo ra vaha nuu ra. Ta cuihya cuñi ra Lot nyehé ra cuhva iyó ñu quiñi iyó cuan.

⁸ Ta ndi quivi cuihya cuñi ñima ra Lot quivi chiyo ra ñuu cuan, cha cuenda cha nyehe ra ta chiñi ra cha quiñi caa nyacuví ñu cuan. Vatyí maa ra, ra vaha cuví ra. Ta maa ñu maa maa ri cha ña vaha nyacuví ñu.

⁹ Ta tyicuan caa cuví sacacu Nyoo chi yo tatu iyó yo cuhva cuñi ra. Ta ñu quiñi iyó naquehén vaha Nyoo chi ñu vatyí cutachi tuñi ra chi ñu quivi cutuñi chi ñu nuu ra.

¹⁰ Ta yaha ca cutachi tuñi Nyoo chi ñu nyicón cha ña vaha cha cuñi coño ñuhu, ñu ña cuñi cha cunyaca ñaha Sutu Mañi yo chi. Ta cahnu sahá ñu chi ñu ta sacuví ñu maa ri cuhva cuñi maa ñu. Ta ñu cuan ña yuhví ñu cahan ña vaha ñu siqui ra nahnu ca ican saha maa ñu cuví ri siqui ángel, cuví ri siqui tatyí ña vaha, cuví ri siqui Nyoo.

¹¹ Soco ángel, cahnu ca cuví ra cha nuu ñáyivi, soco ña cacañá iñi ra cahan ña vaha ra siqui ra nahnu ca cuan chihin nuu Sutu Mañi yo.

¹² Soco ra cahán cuendu nu nyicú ndo cuví ra tari quiti cha ña cutuñi iñi ta sacuví ti cuhva cuñi maa ti. Vatyí quiti, ¿ñáá cuenda iyó ti? Iyó ti vatyí tñin rayi chi ti, ta cahñi ra chi ti. Tyicuan caa maa ra cuan. Cacahán ña vaha ra siqui cha ña cutuñi iñi ra. Ta cucúvi ra tari chihí quiti.

¹³ Cunyehe ra tindoho tari sanyehé maa ra tindoho chi inga ñáyivi. Ta sii xaan cacuñi ra chihin cha quiñi caá nyacuví ra nu tuvi. Ticahan nuu चाहá ra, tatu cha cutahan ra chihin ndo nu iyó ndo vico. Nyaá vavaha ra tusi iñi. Soco ña ndicha cuhva sañahá ra.

¹⁴ Ta tandihí ri ñusihi cha nyehe ra ta quichi cuví iñi ra. Ña chitatú ra cha casacuví ra cha quiñi caa. Casandaví ñaha ra chi ñu ña ñihi nyaá chihin Nyoo. Yatyí xaan ra cha nducu ra cuhva maa maa ri cha cuenda maa ra. Nyaá cha cunaa ndihí ra minoo quivi.

¹⁵ Casandoq ra cuan ityi vaha ta naquehén ra ityi nu cucunaa ra. Casacuví ra tari sacuví ra Balaam sehe ra Beor. Vatyí cuñi ra Balaam saha ganaa ra xuhun chihin cha ña vaha cha nyacuví ra.

¹⁶ Tyicuan ta noo burra nacahan ti chihin ra, tari cahán ñáyivi, ta ña chaha ti cha cahun ca ra Balaam chihin cuhva loco chicá xiñi ra.

¹⁷ Ta tyicuan caa tucu maa ra cha nyicú chihin ndo. Cacuví ra tari noo yavi ityi cha ñahri ndutya ñohó. Ta cuví ra tari noo vico cha tyandaha tatyí ñihi chi. Soco cha nyaá cha cohon ra nu ñaa iñi cahnu tyicuan ri maa cha cuenda cha nyacuví ra tyicuan caa.

¹⁸ Yaa vavaha cahán ra soco tandihí tuhun cahán ra cha ñima ri tuhun cuví. Ta chihin vicio ta chihin cha quichi cuví iñi coño ñuhu yo casandaví ñaha ra chi ñu cha yaha quitá mahñu cha quiñi caa.

¹⁹ Ta tyiyuhú ndihí ra chi ñu na cunyacuví ca ñu cha quiñi caa vatyí yori nyacá ñaha chi ñu, catyí ra. Soco suri maa ra चाहá ra cha cunyaca ñaha cha quiñi caa chi ra. Vatyí tatu चाहá yo cha cunyaca ñaha noo cha cunyaca ñaha chi yo, musu cuan cuví chi yo.

²⁰ Vatyí ñu cha chicohon nuu chi Sutu Mañi yo Jesucristo, ra sacacú chi yo, cha yaha sandoq ñu cha quiñi caa ñayivi ihya. Soco tatu natiñ tucu ñu tuhun ñayivi ihya inga chaha, quiñi ca nanduvi ñu ta ñima ca ta cuví maa.

²¹ Vaha taxin ca tyehe ta ña chicohon nuu ñu ityi vaha cuan, ta ñima ca cha yaha chicohon nuu ñu ta nacuhva ñu chata ñu tuhun cha chaha Nyoo chi ñu.

²² Soco cuví chi ñu tari cuhva catyí noo tuhun cha iyó ñayivi: “Ina nduchan ti, ta nacachi tucu ti cha nduchan ti. Ta quiñi chityí ti, ta ndihvi tucu ti nu nyahyu inga chaha.”

3

Quivi cuquichi tucu Sutu Mañi yo

¹ Yañi, cuñí xain chi ndo. Ta ihya cuví carta cha cu uvi sacuhín chi ndo. Ta nu nanduvi tahan carta chahí tuhun chi ndo tacuhva vatyi caca vaha xiñi ndo.

² Ta ñicohon iñi ndo tuhun cha caħan ra cacuví profeta Nyoo, ta cha naha. Ta ñicohon tucu iñi ndo tuhun cha sañahá nyuhu chi ndo. Vatyi cuví ndi apóstol cuenda Sutu Mañi yo Jesucristo ra sacacú chi yo.

³ Coto xihna ndo vatyi nu cundihi ca chí quivi cuquichi ñáyivi cucuacu nyaa ñu tuhun Sutu Mañi yo. Cucoo ñu yoso cuhva cha quiñi caa cha cuñí coño ñuhu ñu.

⁴ Ta cucatyi ñu: “Ra Jesucristo catyi ra vatyi cuquichi ra inga chaha. ¿Ta nya nyaá ra vityin? Vatyi nyata cachihí sutu chahnu yo ta nyata chinó ñuhu ñayivi ta nya vityin ta cuhva caa ri maa”, cucatyi ñu chí ndo.

⁵ Vatyi maa ñu ña cuñí ñu coto ñu vatyi ta tyembu chahnu caħan Nyoo ta savahá ra andivi ta ñuhu ñayivi. Quitá ñuhu ñayivi chichi ndutya ta chihin ndutya chinó chi.

⁶ Soco cha yahá savahá Nyoo ñuhu ñayivi ta suri chihin ndutya cuanaa ñayivi cuan quivi coon savi xaan.

⁷ Soco andivi ta ñuhu ñayivi cha iyó vityin sahá cumi vaha Nyoo vatyi suri chihin ñuhu cucayu chí quivi cutuñi chí ñáyivi nuu ra. Tyicuan ta ñuhu cha cayu cuan cusanaa chí chí ñu ña quichahá chí Nyoo.

⁸ Soco yañi, cuñí xain chí ndo. Ta cuñí vatyi ma naa iñi ndo vatyi cha cuenda Sutu Mañi yo noo quivi tari cha noo mil cuiya cuví cuan, ta cha noo mil cuiya tari cha noo quivi cuví cuan chí ra.

⁹ Ñima cha ña cuñí ñaha Sutu Mañi yo quichi ra. Vasi yihí ñu chicá xiñi ñu cha tyicuan caa. Soco Sutu Mañi yo nyatú ra chí yo vatyi ña cuñí ra cha cunaa ni noo yo. Cuñí ra vatyi tandihi yo ndu uvi iñi yo cuatyi yo ta nasama yo cuhva iyó yo.

¹⁰ Soco quivi cuquichi Sutu Mañi yo, tari cuaquichi noo ra suhu cha cha cuaa, tyicuan caa cucuvi. Vatyi sana iñi yo ta cuquichi ra. Tyicuan ta cucunaa andivi. Iyo xaan cucachan cuhva cuan. Ta cucayu tandihi cha iyó andivi. Cundutya ndi cuii chihin cha ihñi xaan. Ta tyicuan caa cucayu tucu ñuhu ñayivi ta tandihi cha iyó nuu chí.

¹¹ Ta tyicuan caa cutani tandihi. Yucuan chaha cuñí chí vatyi çachi coo yo tari cuhva cuñí Nyoo.

¹² Cuatu tuhva yo na chaa quivi quichi Nyoo. Nducu yo cuhva cha sanumi ra quichi ra. Quivi cuan cunaa andivi chihin ñuhu. Tandihi cha iyó cundutya chihin cha ihñi.

¹³ Soco yoó nyatú yo noo andivi chaa ta noo ñuhu ñayivi chaa cha catyi Nyoo tyi cucuhva ra. Ta maa maa ri cha vaha chí Nyoo cucoo yucuan.

¹⁴ Yucuan chaha yañi, cha ni ri ca cha nyatú ndo na quichi Sutu Mañi yo, sanñi ndo tacuhva vatyi quivi quichi ra, vii iyó ndo chihin ra ta ñahri cha iñi ndo ta ñahri cuatyi ndo.

¹⁵ Ta tjin vaha ndo cuenda, vatyi Sutu Mañi yo nyatú ra chí yo vatyi cuñí ra vatyi cuaha ca ñáyivi cacu. Ta tyicuan caa tucu catyi ra Pablo yañi yo nu tutu cha sacuhun ra chí ndo. Vatyi chihin cha chiñi tuñi cha chaha Nyoo chí ra tyaa ra.

¹⁶ Ta tandihí ri nu carta ra ta cahán ra tuhun ihya chihin ndo. Vasi yihí tuhun cha yí vavaha cutuñi iñi yo. Ta ñu cha ña cutuñi iñi, ñu cha ña ñihi nyaá chihin Nyoo, sñn caa cuhva natyihí tuñi iñi ñu tuhun cuan. Ta suri tyicuan caa sacuví tucu ñu chihin tuhun cha tyaa inga ra nu tutu tuhun Nyoo. Sñn caa cuhva natyihí tuñi iñi ñu. Ta cha tyicuan caa, sacunaá ñu suri chi maa ñu.

¹⁷ Yucuan chaha yañi, vityin cha chitó ndo tuhun ihya cha ni cumañi ca cuvi, saha ndo cuenda chi ndo, coto cunyicon ndo cuhva sandaví ñaha ra quiñi caa cuan, ta coto sandoo ndo cuhva vaha cha cuahan ndo.

¹⁸ Soco cõhon nuu vaha ca ndo chi Sutu Mañi yo ra Jesucristo ra sacacú chi yo. Ta cuahnu ca ndo chihin tumañi iñi cha chahá ra chi ndo. Na sacahnu yo chi ra vityin ta tyicuan ri maa. Ta na cuvi chi tyicuan caa.

Carta Cha Xihna Ri Cha Tyaa Ra Apóstol Juan

Ñayivi chaa coo yo

¹ Ihya tyaa ndi tuhun cha cha iyó maa quivi cha quichaha tandihi. Ta cuvi chi tuhun cha chiñi ndi ta cha nyehe ndi chihin nuu ndi; vatyi nyehe ndi ta tiñi ndi chihin ndaha ndi. Ta ican tuhun ihya cuvi tuhun cha chahá ñayivi chaa coo yo.

² Ñayivi chaa ihya quetuvj quivi quichi ra Cristo. Maa ndi nyehe ndi ta chahá ndi cuenda tuhun chi; ta sacotó ndi tuhun ñayivi chaa cha ma naa ca maa ihya chi ndo. Vatyí ñayivi ihya, nyaá chi chihin Sutu yo Nyoo, ta vityin tuví chi nu nyicú yo.

³ Nacatyí ndi chi ndo cha nyehe ndi ta cha chiñi ndi tacuhva na cu ñin ri ndo chihin ndi, tari maa ndi, ndicha cuii vatyí ñin ri cuví ndi chihin Sutu yo Nyoo ta chihin Sehe ra, ra Jesucristo.

⁴ Ta tyaa ndi tuhun ihya chi ndo tacuhva na coo tandihi tusi ñiñi cha chahá Nyoo chi ndo.

Nyoo, ñuhj ndichin cuví ra

⁵ Ican ihya cuví tuhun cahán ra Cristo chihin ndi. Ta chiñi ndi ta sacotó ndi chi ndo: Nyoo maa ri ñuhj ndichin iyó nu nyaá ra. Ta ñahri cha ñaa ñiñi, (ñahri cha ña vaha yihí ñiñi ra cuví cuan).

⁶ Tatu catyí yo vatyí ñin ri cuví yo chihin ra, soco sacuví yo cha ña vaha, nu ñaa ñiñi chicá noo yo cuví cuan. Sandaví ñaha yo. Ta ñahri tuhun ndicha cahán yo.

⁷ Soco tatu nu ndichin iyó yo, tari maa Nyoo iyó ra nu ndichin, tyicuan ta ñin ri cuví yo chihin tahan yo, ta ñiñi ra Jesucristo Sehe Nyoo, nacatyá chi ndi cuii maa cuatyí yo.

⁸ Tatu catyí yo vatyí ñahri cuatyí yo, suri chi maa yo sandaví ñaha yo, ta ñahri cha ndicha nyaá aña yo.

⁹ Soco tatu nahmá yo cuatyí yo nuu Nyoo, yihí ñiñi yo chi ra vatyí vaha ra ta ña sandaví ñaha ra, soco sacuví ra cuhva catyí ra, ta cusaha ra ticahnu ñiñi cuatyí yo ta cusandachi ra ndi cuii maa cha quiñi caa yo.

¹⁰ (Nyoo catyí ra tyi iyó cuatyí yo), ta tatu catyí yo vatyí ñahri cuatyí yo, sahá yo tuhun tyi Nyoo, cuendu ra. Ta tuhun cahán ra, ñahri maa nyaá aña yo.

2

Ra Cristo cuví ra cahán chaha yo

¹ Sehe nyihí, sacoté tuhun ihya chi ndo, tacuhva ma sacuvi ndo cuatyí. Soco tatu chicoo cuatyí minoo ndo, ma yuhvi ndo, vatyí iyó ra cahán chaha yo nuu Nyoo. Ta ican ra cuví ra Jesucristo, ra vaha.

² Ta maa ra cuví ra chahnyá cuatyí yo, vatyí chihí ra tyiño nuu yo cha cuenda cuatyí yo. Ta ñiñi cha cuenda maa ri maa yo, soco cha cuenda tandihi ñayivi.

³ Tatu quichahá yo tuhun cahán Nyoo, ñohó nuu yo chi ra.

⁴ Soco tatu noo ra catyí ra: “Yuhu, ñohó nui chi Nyoo”, soco tatu ña quichahá ra tuhun cahán ra, cuví ra noo ra cuendu. Ta ñahri tuhun ndicha caá aña ra.

⁵ Soco ñu naquehén vaha tuhun cahán Nyoo, ican ñu cuan cuví ñu cuñí chi ra chihin cha ñiñi añima ñu. Ta cha tyicuan caa chitó yo tyi ñin ri cuví yo chihin ra.

⁶ Yóo cha catyí vatyí ñin ri cuví chihin Nyoo, tahán chi coo ra tari cuhva chiyo maa ra Jesucristo quivi chica noo ra siqui ñuhu ñayivi.

Tuhun chaa cha cuñí yo chi tahan yo

⁷ Yañi yo, ñima noo tuhun chaa sacoté chi ndo, soco cuví chi noo tuhun chahnu cha chitó ndo nyata quivi xihna ri. Ta ican tuhun chahnu ihya cuví tuhun chiñi ndo.

⁸ Soco tari noo tuhun chaa cuví chi. Ta sacuví ra Cristo, ta chaha ra cha sacuví tucu maa ndo ñandihí. Ta cha tyicuan caa, cha ñaa iñi cuahan nocuee chi. Ta cha ndichin Nyoo cha sandundichín chi.

⁹ Ñu cha catyí vatyí nyaá ñu nu ndichin, ta ña cuñí nyehe ñu chi tahan ñu, ni nyaá ca ñu nu ñaa iñi.

¹⁰ Ta ñu cuñí chi tahan, nu ndichin nyaá ñu. Ta ñahri maa cha cuví sanacava chi ñu nu cuatyí.

¹¹ Soco ñu cha ña cuñí nyehe chi tahan, nu ñaa iñi nyaá ñu. Ta ña chitó ñu nya ityí cuahan ñu vatyí ña cuví nyehe ñu vatyí tari cha cuaa ñu.

¹² Sacuhín tuhun ihya chi nyoho, ra cuatyaa sehi. Vatyí cha yaha saha Nyoo ticahnu iñi cuatyí ndo cha cuenda cha chihí ra Jesucristo tyiño nuu ndo.

¹³ Ta chi nyoho, cha cuví ndo sutu, sacuhín tuhun ihya chi ndo, vatyí ñohó nuu ndo chi ra iyó nyata cumañi cacu ñuhu ñayivi. Ta chi nyoho, ra tyivaa, sacuhín tuhun ihya vatyí cuví chasaha ndo chi ra ña vaha.

Ta chi nyoho, cha cuví ndo ra cuatyaa sehi, sacuhín tuhun ihya vatyí ñohó nuu ndo chi Sutu yo Nyoo.

¹⁴ Sacuhín tuhun ihya chi nyoho cha cuví ndo sutu, vatyí ñohó nuu ndo chi ra cha iyó nyata cacu ñuhu ñayivi. Ta sacuhín tuhun ihya chi nyoho ra tyivaa vatyí nyaá xaan fuerza chi ndo. Ta tuhun Nyoo caá añima ndo. Ta cuví chasaha ndo chi ra ña vaha.

¹⁵ Ma cuñi ndo cha quiñi caa cha iyó ñayivi ihya. Ni ma cuñi ndo cha iyó siqui ñuhu ñayivi. Vatyí ñu cuñí tandihí ihya, ña cuñí ñu chi Nyoo.

¹⁶ Vatyí tandihí cha iyó ñayivi ihya, cha ña vaha cha quichi cuví iñi coño ñuhu yo, ta cha nyehe yo ta quichi cuví iñi yo coo chi yo, ta cha cuñi yo cuyaa yo chihin cha iyó chi yo, tandihí ihya ñima cuhva chahá Sutu yo Nyoo chi yo cuví, soco maa maa ri cha chahá ñayivi ihya cuví.

¹⁷ Ta ñayivi ihya cuahan sandihí chi, chihin tandihí cha quiñi caa cha quichi cuví iñi ñayivi. Soco ñu cha sacuví cuhva cuñí Nyoo, tyicuan ri maa cuaco ñu chihin ra.

Ra xaan iñi chi ra Cristo

¹⁸ Sehe nyihi, cha nyaá yo nu cuandihí quivi. Ta nyoho chiñi soho ndo vatyí vachi noo ra cha ña cuñí nyehe chi ra Cristo, ta vityin cha cuaha xaan ra ña cuñí nyehe chi ra Cristo iyó vityin. Yucuan chaha nacoto yo vatyí cha nyaá yo nu cuandihí quivi.

¹⁹ Maa ra nu nyicú yo quita coyo ra, vatyí ñima ra cuenda yo cuví chi ra. Vatyí tyehe ta ra cuenda yo cacuví chi ra, candoó ra chihin yo. Soco cuahan coyo ra tacuhva quetuvi vatyí ña tandihí ñayivi ta cuenda yo cuví ñu.

²⁰ Soco chi nyoho chaha ra Cristo Tatyí Ii Nyoo cunyaa añima ndo. Ta chitó ndo tandihí.

21 Sacuhín tuhun ihya chi ndo ñima cha cuenda vatyí ña chitó ndo cha ndicha, soco vatyí chitó ndo. Ta ni noo cuendu ma quita cahan ñu sacuví cha ndicha.

22 ¿Yóo cha cuví ñu cuendu? Ñu catyí vatyí ra Jesus ñima ra Cristo cuví ra. Ta ñu cha catyí tyehe caa, ñu xaan iñi chi ra Cristo cuví ñu. Vatyí ña chinó iñi ñu chi Sutu yo Nyoo, ta ni ri chi ra Jesucristo Sehe Nyoo.

23 Tandihí cuii ñu ña chinó iñi chi Sehe Nyoo, yori Sutu yo Nyoo nyaá chihin ñu. Soco ñu catyí vaha chi ñáyivi vatyí ra Jesucristo cuví Sehe Nyoo, ñin ri cuví ñu chihin Nyoo ñandihí.

24 Yucuan chaha nyoho, tuhun cha chiñi ndo nya quivi xihna ri, naquehen vaha ndo chichi añima ndo. Tatu ndoó chi chichi añima ndo, ñin ri cuví ndo chihin Sehe Nyoo ta chihin Sutu yo Nyoo ñandihí.

25 Ta ra Jesucristo catyí ra vatyí cuhva ra noo ñáyivi chaa cha ma naa ca maa coo yo.

26 Sacuhín tuhun ihya chi ndo cha cuenda vatyí cuaha xaan ra sandavi ñaha chi ndo iyó.

27 Soco ra Jesucristo chaha ra Tatyí Ii Nyoo cha cunyaa añima ndo, ta ña chiñuhú ca cha sañaha ni noo ñáyivi chi ndo. Vatyí suri maa Tatyí Ii Nyoo sañahá chi ndo ndi cuii maa tuhun. Ta cha ndicha cuví, ñima cuendu cuví. Yucuan chaha sañihi ca ndo cu ñin ri ndo chihin ra Cristo tari cuhva sañahá Tatyí Ii Nyoo chi ndo.

28 Ta vityin nyoho, ra cuatyaa sehi, cuinyañaa yo chi ra Cristo tacuhva vatyí nachaa chi quivi quichi ra, ma cutucu cuñi yo chihin ra. Ta tyicuan caa tucu maa ra chihin yo. Ta ñin ri tacuhva cha ma tahan yo ticahan nuu nuu ra quivi quichi ra.

29 Cha chitó ndo vatyí ra Cristo vaha ra. Chitó tucu ndo vatyí tandihí ñu cha nyacuví cha vaha, sehe Nyoo cuví chi ñu.

3

Ñu cha cuví sehe Nyoo

1 Nyehe ndo, yoso cha cuñi Sutu yo Nyoo chi yo, vatyí nasaha ra sehe ra chi yo. Ta catyí ra: “Nyoho, sehi cuví chi ndo.” Yucuan chaha ñáyivi, ña cuñi nyehe ñu chi yo vatyí tyicuan caa tucu, ña cuñi nyehe ñu chi maa ra.

2 Yañi, vityin cha cuví yo sehe ra. Soco ta coto ca yo yoso caa cucuvi yo. Soco chitó yo vatyí nachaa chi quivi quichi ra Jesucristo, cucuvi yo tari maa ra, vatyí cunyehe vaha yo chi ra tari cuhva caá ra.

3 Ta tandihí yo cha nyatú yo cha cucuvi tyehe caa, nducú yo cuhva ta sandundí ca yo añima yo, tari ndi maa Sutu Mañi yo Jesucristo.

4 Tandihí ñu sacuví cuatyí, ña quichahá ñu ley Nyoo. Vatyí cha sacuví yo cuatyí, ña quichahá yo ley Nyoo cuví chi cuan.

5 Cha chitó ndo vatyí ra Cristo quichí ra ñáyivi tacuhva tinyaa ra cuatyí yo, ta maa ra ñahri cuatyí ra.

6 Tandihí yo cha ñin ri cuví yo chihin ra, ña sacuví yo cuatyí. Soco ñáyivi cha sacuví cuatyí, ta quehen cuenda ca ñu chi ra, ni ta cohon ca ra añima ñu.

7 Sehe luhli, ñaha sandavi ñaha ñáyivi chi ndo, vatyí ñu cha sacuví cha vaha, vaha ñu, tari maa ra Cristo vaha ra.

8 Soco ñu cha sacuví cuatyí, cuenda ra ña vaha yihí ñu. Vatyí ra ña vaha sacuví ra cuatyí nyata quivi xihna ri. Soco yucuan chaha quichí ra Jesucristo, ra cha cuví Sehe Nyoo, tacuhva vatyí satani ra ndi cuii cha sacuví ra ña vaha.

⁹ Tandihí yo cha cha yaha nacacu chaa yo, nanduví yo sehe Nyoo, ta ña sacuví ca yo cuatyí, vatyí ñáyiví Nyoo iyó yo. Yucuan chaha ña sacuví ca yo cuatyí, vatyí cha yaha nacacu chaa yo ta sehe Nyoo cuví chi yo.

¹⁰ Ta tyehe caa cuví nichon nuu yo chí ñu cha cacuví sehe Nyoo, ta ñu cuví sehe cuihna. Vatyí yóo ñu sacuví cha ña vaha o ña cuñí nyehe ñu chí tahan ñu, ñima ñáyiví cuenda Nyoo cuví ñu.

Na cuñi yo chi noo noo tahan yo

¹¹ Vatyí ican ihya cuví tuhun cha chíñi ndo quiví xihna ri: Cha cuñi yo chí noo noo tahan yo.

¹² Ña tahan chí sacuvi yo tari cuhva sacuví ra Caín. Cuví ra noo ra cuenda ra ña vaha. Ta chahñí ra chí yañi ra. ¿Ñáa tuhun chahñí ra chí ra? Cha cuenda vatyí vaha cuhva sacuví yañi ra, ta maa ra Caín chinyacuví ra cha ña vaha.

¹³ Yañi yo, ma iyo cuñi ndo tatu ña cuñí nyehe ñáyiví chí ndo.

¹⁴ Yoó chitó yo vatyí tari minoo ra chíñi ta nandoto cuví yo vatyí iyó yo noo ñáyiví chaa vatyí cuñí yo chí tahan yo. Ñu cha ña cuñí chí tahan, tari quiví ni cuví ca ñu tari noo ra chíñi, ta ta nandoto ca ñu.

¹⁵ Yóo ñu cha xaan iñi chí tahan, tari noo ñu chahñí ñáyiví cuví ñu. Ta chitó ndo vatyí ni noo ñu chahñí, ma cuhva Nyoo ñáyiví chaa cha ma naa ca maa coo añima ñu.

¹⁶ Nichón nuu yo ñáa cha cuví cha cuñí yo chí tahan yo vatyí ra Jesucristo sañaha ra chí yo. Vatyí maa ra cuñí ra chí yo, ta chaha ra ñáyiví ra cha catyí yo. Ta tyicuan caa tucu maa yo, cuñi yo chí tahan yo ta cuhva yo ñáyiví yo cha cuenda ñu.

¹⁷ Ta tatu yihí yo iyó chíin chí yo siqui ñuhu ñáyiví ihya, ta nyehé yo cumañi cha cumañi chí tahan yo, ta sahá ri yo cha ña nyehé yo, ¿atu cuñí yo chí Nyoo cha sacuví yo cha tyicuan caa? Ña cuñí yo chí ra cuví chí cuan.

¹⁸ Ra cuatyaa sehi, ñima chíhin tuhun yuhu ri yo, cuñi yo chí tahan yo, soco na cuñi yo chí ñu chíhin cha sacuví yo tumañi iñi, ta chíhin cha ni iñi yo.

Yoso caa sacuvi yo ta coo vaha yo chíhin Nyoo

¹⁹ Tatu sacuví yo tyicuan caa, chitó yo tyi yihí yo tuhun ndicha. Ta vaha iyó yo chíhin Nyoo.

²⁰ Tatu chíchi añima yo ta tuví iñi yo tyi iyó cuatyí yo, vihi ca cuví Nyoo, chitó ra cha caá añima yo.

²¹ Yañi, tatu tuví iñi yo tyi ñahri cuatyí yo, ma yuhví cuñi yo nyehe yo chí Nyoo.

²² Ta ñáa ri cha cacan tahvi yo cuacuhva ra chí yo, vatyí quichahá yo tuhun cahán ra, ta sacuví yo cuhva tahan iñi ra.

²³ Ta ican ihya cuví tuhun chaha ra chí yo: Cha chíno iñi yo vatyí ra Jesucristo cuví Sehe ra. Ta cha cuñi yo chí noo noo tahan yo vatyí tyicuan caa tuhun cha chaha ra chí yo.

²⁴ Ta ñu cha quichahá tuhun chaha ra chí yo, iyó ñu cha in ri cuví ñu chíhin ra, ta maa ra iyó ra chíchi añima ñu. Ta cha cuenda Tatyí Ii ra cha chaha ra chí yo, chitó yo vatyí nyaá ra chíhin yo.

4

Tatyí Ii Nyoo ta tatyí ña vaha

¹ Cuñí xain chí ndo, yañi. Ma chino iñi ndo tandihí ñáyiví cha catyí tyi cuenda Nyoo cahán ñu. Nyehe xihna ndo tatu nacachí tahan cha cahán ñu

chihin tuhun Nyoo. Vatyí cuaha xaan ra cha catyí vatyí Nyoo sañahá chi ra. Soco ña ndicha.

² Soco tyehe caa cuví nicohon nuu ndo tatu Tatyí Ii Nyoo sacahán chi ra o ñima. Tandihí ra cha catyí vatyí quichí ra Jesucristo nya gloria ta cacú ra chihin coño ñuhu ñayiví ihya, ican ra cuan, sacahán Tatyí Ii Nyoo chi ra.

³ Soco ndi cuii maa ñáyiví cha catyí vatyí ra Cristo ña chicá noo ra chihin coño ñuhu ñayiví ihya, ñima Nyoo sacahán chi ñu cuan, soco tatyí ña vaha, cha xaan iñi chi ra Cristo, ican sacahán chi ñu. Cha chiñi ndo vatyí nyaá quichi cuan. Ta vityin cha chicá noo chi siqui ñuhu ñayiví.

⁴ Ra cuatyaa sehi, ñáyiví chi Nyoo cuví ndo. Ta cuví chasaha ndo chi ra xaan iñi chi ra Cristo. Vatyí cahnu ca ra Cristo, ra nyaá añima ndo ta ñima ca ra ña vaha, ra cha chicá noo siqui ñuhu ñayiví ihya.

⁵ Maa ñu cuan, ñu cuenda ñayiví ri ihya cuví ñu. Yucuan chaha cahán ñu tuhun ñayiví ihya. Ta ñu cuenda ñayiví ihya tyasohó ñu tuhun cahán ñu.

⁶ Soco yoó cuví yo ñu cuenda Nyoo. Ta ñu cuenda Nyoo tyasohó ñu tuhun cahán yo, soco ñu yihí tatyí ña vaha añima, ña cuñí ñu tyasoho ñu. Ta tyicuan caa cuví nicohon nuu yo chi ñu yihí Tatyí Ii Nyoo ta ñu yihí tatyí ña vaha.

Nyoo cuñí xaan ra chi tandihí ñáyiví

⁷ Yañi yo, na cuñi yo chi tahan yo, vatyí Nyoo sañahá ra chi yo yoso caa cha tahán chi cuñi yo chi ñu. Tandihí yo cha cuñi yo chi tahan yo sehe Nyoo cuví chi yo, ta ñohó nuu yo chi Nyoo.

⁸ Soco ñu cha ña cuñí chi tahan, ta cohon nuu ca ñu chi Nyoo, vatyí Nyoo cuñí xaan ra chi yo ta chi tandihí ñáyiví.

⁹ Ta sañahá Nyoo vatyí cuñí ra chi yo chihin cha chahá ra noo Sehe mañi ra tyi quichí ra siqui ñuhu ñayiví ihya, vatyí cuhva ra noo ñayiví chaa coo yo.

¹⁰ Nyehe xihna, yoso cha cuñí Nyoo chi yo. Ñima vatyí xihna ca yo cuñí yo chi ra, soco xihna ca maa ra cuñí ra chi yo. Ta tachí ra chi Sehe ra vatyí tacuhva cuví ra tyiño nuu yo ta cahnya ra cuatyí yo.

¹¹ Nyoho yañi, tatu cuñí Nyoo chi yo cha tyicuan caa, tahán tucu chi cuñí maa yo chi tahan yo.

¹² Vasi ni nonga ñáyiví, ta nyehe ca ñu chi Nyoo, soco tatu cuñí yo chi noo noo tahan yo, Nyoo nyaá ra añima yo. Ta tyicuan caa ni vaha iñi yo cuñí yo chi ra.

¹³ Ta chitó yo vatyí nyaá yo chichi ndaha ra, ta maa ra nyaá añima yo vatyí chahá ra Tatyí Ii ra cunyaa añima yo.

¹⁴ Ta nyuhu nyehe vaha ndi ta cuví ndi cha ndaa vatyí Sutu yo Nyoo saquichí ra chi Sehe ra tacuhva vatyí sacacu ra chi yo cha cuví yo ñáyiví iyó siqui ñuhu ñayiví.

¹⁵ Tandihí ñu nachinó iñi chihin cha ni iñi ñu ta catyí ñu vatyí ra Jesús cuví ra Sehe Nyoo, Nyoo nyaá ra chichi añima ñu. Ta maa ñu nyaá ñu chichi ndaha ra.

¹⁶ Ta yoó cha nacoto yo ta nachino iñi yo tyi Nyoo cuñí ra chi yo, ta chi tandihí ñáyiví. Ta ñu cha cuñí chi tahan, chichi ndaha Nyoo nyaá ñu. Ta Nyoo nyaá ra chichi añima ñu.

¹⁷ Vatyí tatu cuñí yo chi Nyoo chihin cha ni iñi yo ma yuhví cuñi yo nyehe yo chi ra, nachaa chi quivi cutuñi chi tandihí ñáyiví nuu ra. Vatyí tari cuhva iyó maa ra Jesucristo, tyicuan caa iyó yo siqui ñuhu ñayiví ihya.

¹⁸ Nyoo cuñí ra chi yo, ta tatu cuñí yo chi ra, ñahri maa cha yuhví yo. Tatu ni iñi yo cuñí yo chi Nyoo ña nuña ca nu quihí tuhun yuhví añima yo, vatyí

Nyoo tava ñehe ra tandihí maa cuan. Vatyí tatu yihí cha yuhví cuñi yo, yihí cha cuenda vatyí iyó cuatyí yo. Ta yuhví yo cha cutachi tuñi Nyoo chí yo. Vatyí tatu yuhví cuñi yo, yuhví yo vatyí ña cuñi vaha yo chí Nyoo.

¹⁹ Yoó cuñi yo chí Nyoo vatyí xihna ca maa ra cuñi ra chí yo.

²⁰ Tatu yóo cha catyí: “Yuhu cuñi chí Nyoo”, catyí ñu, soco ña cuñi nyehe ñu chí tahan ñu, noo ñu cuendu cuví ñu. Vatyí tatu ña cuñi nyehe ñu chí tahan ñu cha nyehé ñu, ¿atu cuví cuñi ñu chí Nyoo cha ña nyehé ñu? Ma cuví.

²¹ Ta Nyoo chahá ra tuhun ihya chí yo: Ñu cha cuñi chí Nyoo, tahan chí cha cuñi tucu ñu chí noo noo tahan ñu ñandihí.

5

Cha ñi ñi yo chinó ñi yo chí Nyoo sahá ganaa yo chí cha ña vaha

¹ Tandihí ñu chinó ñi tyi ra Jesús cuví Cristo cha saquichí Nyoo, sehe Nyoo cuví chí ñu; ta tatu cuñi yo chí noo sutu, cuñi tucu yo chí tandihí sehe ra.

² Tatu cuñi yo chí Nyoo ta sacuví yo cha catyí ra, chitó yo vatyí cuñi tucu yo chí ñu sehe Nyoo.

³ Vatyí cha cuñi yo chí Nyoo ican cuví cha quichahá yo tuhun chahá ra chí yo. Ta tandihí tuhun cha chahá ra chí yo ña yí sacuví yo.

⁴ Vatyí tandihí yo cha cuví yo sehe Nyoo, cuví chasaha yo chí cha ña vaha cha iyó ñayiví ihya chihin cha chinó ñi yo chí Nyoo.

⁵ Ñu cha chinó ñi vatyí ra Jesús cuví Sehe Nyoo, ican ñu cuan cuví chasaha chí cha ña vaha cha iyó ñayiví ihya.

Tatyí Ii Nyoo cuví cha ndaa cuenda ra Jesús ra cuví Sehe Nyoo

⁶ Ra Jesucristo quichí ra siqui ñuhu ñayiví ihya. Ta chitó yo tyi ndicha cha Sehe Nyoo cuví chí ra nu condutyá ra, ta nu chatí ñiñi ra ñandihí. Ñima noo ri nu condutyá ra. Soco nu chatí ñiñi ra ñandihí. Ta Tatyí Ii Nyoo cuví cha ndaa tyi tyicuan caa cuví. Ta maa ri cha ndicha cahán Tatyí Ii Nyoo.

⁷ Iyó uñi tahan testigu cha nyaá andiví: Sutu yo Nyoo ta ra Cristo ra cuví Tuhun Cahán Nyoo, ta Tatyí Ii Nyoo. Ta nduñi tahan ihya cuví noo ri, ta ñin ri cuhva cahán nduñi tahan.

⁸ Ta iyó uñi tahan testigu siqui ñuhu ñayiví ihya: Tatyí Ii Nyoo cha nyaá añima yo catyí vatyí ican ra Jesús cuví Sehe Nyoo. Yucuan cuví noo. Ta nu condutyá ra Jesús, Nyoo catyí ra vatyí ican ra cuví Sehe ra. Yucuan cuví cha cu uvi. Ta nu chatí ñiñi ra Jesús, yucuan cuví cha cu uñi cha sañahá chí vatyí ra Jesucristo cuví ra Sehe Nyoo. Ta tyicuan caa nduñi tahan cuan ñin ri cuhva cahán.

⁹ Yoó tuhvá yo naquehen yo tuhun cahán ra cuví testigu siqui ñuhu ñayiví ihya. Soco Nyoo cahnu ca cuví ra ta ñima ca ra ñuhu ñayiví ihya. Ta ican ra catyí ra vatyí ra Jesús cuví Sehe ra.

¹⁰ Ñu cha chinó ñi tyi Sehe Nyoo cuví chí ra Jesús, chitó ñu chichi añima ñu tyi ndicha. Ñu cha ña chinó ñi chí ra, tari quiví cha sahá ñu tuhun tyi Nyoo ra cuendu cuví ra, vatyí ña cuñi ñu chino ñi ñu cha cahán Nyoo tumañi ñi cuenda Sehe ra, ra Jesús.

¹¹ Ta ican ihya cuví tuhun cahán Nyoo chihin yo: Catyí ra tyi chahá ra noo ñayiví chaa coo yo tatu chinó ñi yo vatyí ra Jesucristo cuví Sehe ra.

¹² Ñu cha nyaá Sehe Nyoo añima, iyó ñu ñayiví chaa ihya. Ta ñu cha yori Sehe Nyoo nyaá añima, ñahri ñayiví chaa cuan iyó ñu.

Nu ndihí cahan ra Juan ta chahá ra tuhun chí ñu

¹³ Sacuhín tuhun ihya chi nyoho cha chinó iñi chi ra Jesús Sehe Nyoo, tacuhva coto ndo tyi cha iyó ndo ñáyiví chaa cha ma naa ca maa.

¹⁴ Cunyeé xaan iñi yo chí Nyoo vatyí chitó yo vatyí tatu chicán yo cha chicán yo chi ra ta cuhva cuñí ra cuví, maa ra chiñí ra tuhun cahán yo.

¹⁵ Ta tatu chitó yo tyi chiñí ra tuhun cahán yo, chitó tucu yo tyi cha ñihí yo cha chicán yo chi ra.

¹⁶ Tatu nyehé yo noo ñu tahan yo sacuví ñu noo cuatyí, soco noo cuatyí cha ña sacunaá chi chí ñu nuu Nyoo, cuví cacan tahvi yo chí ra cha cuenda ñu. Ta cusaha ra ticahnu iñi cuatyí ñu tacuhva coo ca ñu nuu ra. Soco iyó noo cuatyí cha sativí chi ñáyiví nuu Nyoo. Ña tahán chi cacan tahvi yo cha cuenda ñu cha sacuvi cuatyí cuan.

¹⁷ Tandihí cha ña vaha cha sacuví ñáyiví, cuatyí cuví. Soco iyó cuatyí cha ña sativí ndihí chí chí yo nuu Nyoo.

¹⁸ Chitó yo vatyí ñu cha nacacú chaa saha Nyoo, ña sañihí ñu sacuvi ñu cuatyí. Vatyí Sehe Nyoo sahá cuenda chí ñu ta ña chahá ra cha tñin ra ña vaha chí ñu.

¹⁹ Ta yoó chitó yo tyi cuenda Nyoo yihí yo. Tandihí ca ñáyiví, cuenda ra ña vaha yihí ñu, vatyí nyacá ñaha ra chí ñu.

²⁰ Chitó tucu yo vatyí cha quichí Sehe Nyoo. Ta chaha ra cha chiñi tuñi vatyí cohon nuu yo chí Nyoo, ra ndicha vaha. Ta nyaá yo chí chí ndaha ra cuví cha ndicha, ra cuví Sehe Nyoo, ra Jesucristo. Ican ra cuví Nyoo cha ndicha, ican ra cuví ñáyiví chaa cha ma naa ca maa.

²¹ Nyoho ra cuatyaa sehi, saha ndo cuenda chí ndo chihin cha sacahnú ñáyiví, ta ni ñima Nyoo cuví.

Ta na cuví chí tyicuan caa.

Carta Cha Cu Uvi Cha Tyaa Ra Apóstol Juan

Nu catyí ra Juan vatyí cuñí xaan ra chi ñu yihí cuenda Nyoo

¹ Nyoo nacachí ra chuun, yoho Hermana. Ta yuhu cha cuví ra chahnu vehe ñuhu, sacuhín tutu ihya chuun ta chi tandihí sehun. Ta cuñí xain chi ndo chihin cha ñí ñí. Ta ñima yuhu ri cuñí chi ndo soco tandihí ca ñu cha nacotó cha ndicha ñandihí.

² Cuñí chi ndo cha cuenda cha ndicha cha ñohó chichi aña yo. Ta tyicuan ri maa cunyaa cha ndicha cuan chihin yo.

³ Sutu yo Nyoo ta Sutu Mañi yo Jesucristo Sehe Nyoo na nasoco ra chi ndo ta na nyehe ndahvi ra chi ndo. Ta na coo cha taxi ri aña ndo, chihin cha ndicha, vatyí cuñí xaan ra chi ndo.

⁴ Sií xaan cuñí cha chité tuhun suhva sehun ta nyehí vatyí iyó ñu tari cuhva catyí cha ndicha, tari cuhva catyí Sutu yo Nyoo tyí sacuví yo.

⁵ Ta vityin, Hermana, chacú ndahvi nuun, na cuñí yo chí noo noo tahan yo. Ican ihya cuví cha tyai nu tutu ihya. Ta ñima noo tuhun chaa cha chaha Nyoo chí yo cha vityin ri cuví cha cuñí yo chí noo noo tahan yo. Soco ican ihya cuví tuhun cha catyí Nyoo chí yo nyata quivi xihna ri.

⁶ Ta cha cuñí yo chí ra, ican cuví cha sacuví yo tandihí cha catyí ra chí yo. Ican ihya cuví cha catyí Nyoo tyí sacuví yo. Ta nyoho, chihí ndo tuhun ihya nya quivi xihna ri. Na coo ndo chihin cha cuñí ndo chí Nyoo ta chí ñáyivi.

Nu catyí ra Juan vatyí saha cuenda yo chí yo chihin ñu chicá noo sandavi ñaha

⁷ Catyí chuun tyehe caa vatyí cuaha xaan ra casandaví ñaha cachicá noo ra nicahnu siqui ñuhu ñayivi. Cacatyí ra vatyí ña ndicha cha quichi cacu ra Jesucristo chihin coño ñuhu ñayivi ihya. Ra cacatyí tyicuan caa, sandaví ñaha ra chí ñáyivi. Ta cuví ra noo ra xaan ñí chí ra Cristo.

⁸ Yucuan chaha, saha ndo cuenda chí ndo chihin tuhun cha sañahá ra coto sacunaa ndo cha vaha cha sacuví ndo, ta coto ma ñihi ca ndo tandihí cha cuacuhva Nyoo chí ndo.

⁹ Yóo ñu cha ña ndoó vaha chihin cha sañahá ra Cristo chí yo ta sañahá ñu inga tuhun, yori Nyoo nyaá chihin ñu cuan. Soco ñu ndoó vaha ta quichahá tuhun cha sañahá ra Cristo, nyaá Sutu yo Nyoo ta ra Jesucristo Sehe ra chihin ñu cuan.

¹⁰ Tatu chaa noo ra vehe ndo, cua nyehe ra nu nyicú ndo ta cuñí ra sañaha ra tuhun cha ña sañaha ra Jesucristo, ma cuhva ndo vehe ndo cunyaa ra, ni ma tyinyee ndo chí ra.

¹¹ Vatyí tari quivi cha ñin ri cha ña vaha sacuví yo chihin ra tatu naquehén cuenda vaha yo chí ra cuan.

Nu ndihí cahan ra Juan

¹² Cuaha xaan ca tuhun tyai cuhva sacote chí ndo, soco ña cuñí sacote chí ndo chihin tutu. Soco nyati cuhin nu nyicú ndo. Tyicuan ta ndatuhun vaha maa yo, tacuhva cusí ca cuñí yo.

¹³ Ihya vachi nocumi chuun sahá sehe cuhun. Nacachí tucu Nyoo chí maa ña ñandihí.

Carta Cha Cu Uñi Tyaa Ra Apóstol Juan

Nu catyí ra Juan vatyí ra Gayo vaha cuahan ra chihin Nyoo

¹ Yuhu cha cuví ra chahnu vehe ñuhu, sacuhín carta ihya chi yoho, Gayo, vatyí yoho cuvún noo ra tahin cha cuñí xain chihin cha nñi ñi.

² Yañi, chicán tahvi chi Nyoo cha cuendon vatyí na coo vahun. Ta tari cuhva cuahan vahun chihin Nyoo, ta tyicuan caa tucu, na nasoco Nyoo chuun tacuhva cha ma tiin cuehe chuun.

³ Vatyí cusii xaan cuñi quivi quichi coyo suhva ra yañi yo. Ta canacatyí ra vatyí cha ndicha vaha iyón cuhva cha sañaha ra Cristo. Ta ican cuví cha ndicha vaha.

⁴ Nahri ca cha sii cuñi tari cha chité vatyí sehi sacuví vaha ñu cuhva catyí tuhun ndicha.

⁵ Cuñi xain chuun, yañi. Vaha xaan sacuvún, vatyí tyiñuhún chi ra yañi yo, ta cha vaha xaan ca cha sacuvún vatyí tyiñuhún chi ra yañi yo inga ñuu cha chaa vehun.

⁶ Chihin nuu tandihi ñu vehe ñuhu canacatyí ra vatyí cuñi xaan chi ra. Ta saha tumañi ñi, yoho Gayo, tyinyee con chihin cha chiñuhú chi ra yañi yo vatyí sañihi ca ra cuhun coyo ra nu cuahan ra. Vatyí tyicuan caa tahan ñi Nyoo cha sacuvi yo.

⁷ Vatyí tyiño nuu Jesucristo cachicá noo ra. Ta ña cacuñi ra cha tyinyee ñáyivi cha ña ñohó nuu Nyoo chi ra.

⁸ Yucuan chaha vatyí maa yo tahan chi nyehe yo ñáá ndihi cha chiñuhú chi ra. Ta tyicuan caa ta cutahan yo chihin ra nu cahan ra tuhun ndicha.

Nu catyí ra Juan vatyí ra Diótfrefes, ña vaha sacuví ra

⁹ Yuhu sacuhín noo carta chi ñu nyicú vehe ñuhu, soco ra Diótfrefes sacuví ri maa ra nuu chi ra, ta ña tyasohó ra tuhun cahín.

¹⁰ Yucuan chaha tatu cuhin chiña, cusandai tyiño chihin ra cha cuenda tuhun cahan ra, vatyí cahan ña vaha ra siqui yo. Ta siin ri tatu yóo hermano chaa, ña naquehén cuenda ra chi ra. Ta tatu ñu nyicú vehe ñuhu naquehén cuenda ñu chi ra, chasí ri ra, ta tavá ñehe ra chi ñu vehe ñuhu.

¹¹ Cuñi xain chuun, yoho yañi. Ma sacuvun cuhva ña vaha tari cha sacuví ra, soco sacuvun cha vaha. Vatyí ra sacuví cha vaha, ra cuenda Nyoo cuví ra, soco ra sacuví cha ña vaha, ña ñohó nuu ra chi Nyoo.

Nu catyí ra Juan vatyí vaha xaan cuhva chinó ñi ra Demetrio

¹² Tandihí ñu ta vaha cahan ñu siqui ra Demetrio. Ta vaha xaan quichahá ra tuhun Nyoo, ta suri ican cuan sañahá chi tyi ra vaha cuví ra. Ta siin ri nyuhu tucu cuví ndi cha ndaa cha cuenda ra, ta nyoho chitó ndo vatyí tuhun ndicha cahan ndi.

Nu ndihí cahan ra Juan

¹³ Cuaha xaan tuhun tyai cuhva sacote chuun, soco ña cuñi sacote chuun chihin tutu.

¹⁴ Soco nyatí cuhin nu nyaún cha numi ri, tyicuan ta ndatuhun vaha ca maa yo.

¹⁵ Na coo cha taxi ri añimon. Ra tahan yo cha iyó ityi tyehe saquichí xaan ra nocumi chuun. Ta sañun tumañi ñi cuhvon nocumi chí noo noo ra tahan yo cha iyó ityi chiña.

Carta Cha Sacuhun Ra Apóstol Judas Chi Ñáyivi Yihí Cuenda Nyoo

Nu tyaq ra Judas noo tutu chi ñu nacana Nyoo chi

¹ Yuhu ra Judas cuví noo ra sacuví tyiño nuu ra Jesucristo. Ta yañi ra Jacobo cuví chii. Tyaí noo carta ihya chi ndo cha cuví ndo ñáyivi cha nacana Nyoo Sutu yo. Ta naquehén vaha ra chi ndo vatyí cuví ndo ñáyivi cuenda ra. Ta vityin cumí vaha ra chi ndo cha cuenda cha ñn ri cuví ndo chihin ra Jesucristo.

² Nyoo na nyehe ndahvi ra chi ndo. Ta na cutuñi ca iñi ndo yoso caa cha cuñi ra chi yo. Ta na coo cuaha ca cha taxi ri cuñi añima ndo, saha ra.

*Nu cahan ra Judas siqui ñáyivi cha sañahá cha ña ndicha
(2 Pedro 2.1-17)*

³ Cha naha xaan yihí iñi tyai noo carta chi nyoho yañi, vatyí cuñi cahin chiin siqui yoso caa sacacu Nyoo añima yo. Soco vityin cuñi chí cha tyaí tutu ihya chí ndo vatyí saniñi chí ndo cunii iñi ndo chihin tandihí fuerza ndo ta cuhun ndo ityi nuu ca chihin cha chinó iñi ndo tuhun vaha cha chaha Nyoo chí yo. Vatyí noo ri chaha chaha ra ta ñn caña ri chaha ra tandihí cha tahán chí chí yo vatyí chinó iñi yo cha cuví yo ñu yihí cuenda ra.

⁴ Vatyí yihí ra quihví xehe ra nu nyicu ndo. Ta cuñi ra sandavi ñaha ra chí ndo. Catyí ra vatyí cha yaha saha Nyoo ticahnu iñi chí yo ta yucuan chaha cuví sacuví yo yoso cuhva quichi cuví iñi coño ñuhu yo. Soco ra canyacuví tyicuan caa, cuví ra noo ra cucunaa. Vatyí tyicuan caa catyí Nyoo nya tyembu chahnu, vatyí canyacuví ra cha quiñi caa cha ña tahán chí sacuví ra. Vatyí ña caquichahá ra chí Nyoo ta ña chinó iñi ra cha Nyoo cuví noo ra cahnu ca, ra nyacá ñaha chí yo. Ta ni ri ra Jesucristo Sutu Mañi yo, ña cahnu xaan cuví ra, cacatyí ra.

⁵ Vasi cha chitó ndo cha sacuví Nyoo ta cha naha, soco cuñi sanicohín iñi ndo vatyí Sutu yo Nyoo tavá ra chí sutu chahnu yo ñu Israel ñuu Egipto, sacacu ra chí ñu ndaha ñáyivi ñuu Egipto cuan. Soco yaha cuan sanaq ra tandihí maa ñu cha ña chinó iñi chí ra.

⁶ Ta tyicuan caa tucu ángel. Ii ra. Ñahri cuatyí ra. Soco suhva ra caquita ra nu cuatyaq Nyoo chí ra cha cuenda cha ña quichahá ra chí ra. Yucuan chaha Nyoo cumí ra chí ángel cuan, nuhñi ra chihin cadena nu ñaa iñi. Nyatú ra cha sacutuñi Nyoo chí ra na chaa chí quivi cahnu.

⁷ Tyicuan caa tucu ñáyivi ñuu Sodoma ta ñuu Gomorra, ta ñu ñuu cuatyaa cha chiyó nicachico ñuu cuan. Sanaq Nyoo chí ñu cha cuenda cha quiñi caa cha chinyacuví ñu. Ca chiyó ri maa ra chihin ñusihí. Ta ñusihí ca chiyó ri maa ñu chihin noo ra ta chihin inga ra. Ta cuaha ca cha quiñi caa chinyacuví ñu vatyí rayi ca chiyó ra chihin tahan yi ra ñandihí. Soco cha cuenda cuan, nyehe ñu tindoho nu cayu ñu, quivi chahmí Nyoo ñuu ñu. Ta yucuan sañahá chí chí yo vatyí ñu sacuví cha quiñi caa, cucayu ñu chihin ñuhu cha ma ndahva ca maa.

⁸ Ta tyicuan caa tucu ra cacuñi sativi chí ndo. Vasi cha chitó vaha ra cha sacuví Nyoo ta ityi chata ca, soco maa ra chicá iñi ra vatyí tyaqui xaan cuacoo ra nu cuahan ca chí chihin cha nyacuví ra tyicuan caa. Soco ndahvi ra vatyí

tari quivi cha tahán ra noo ñumahna tyaqui cuví cuan. Sativí ra coño ñuhu ra ta ña cuñi ra cha cunyaca ñaha Sutu Mañi yo chi ra. Ta cahán ña vaha ra siqui ra nahnu ca cha nuu maa ra, cuví ri siqui ángel, cuví ri siqui tatyí ña vaha, cuví ri siqui Nyoo.

⁹ Soco ángel Miguel cha cuví ra noo ra cahnu nuu Nyoo, ta ña caña iñi ra sacuvi ra tyicuan caa. Vatyí quivi cañi tahan ra chihin ra ña vaha cha cuenda coño ñuhu ra Moisés, ña caña iñi ra cahán ña vaha ra siqui ra ña vaha. Noo ri cha catyí ra chi ra: “Maa Sutu Mañi yo ña tachi tuñi ra chuun cuenda cha ña vaha cha nyacuvún”, catyí ángel Miguel cuan chi ra.

¹⁰ Soco ra cha sayangá chi ndo cuan, cahán cuehe ra vatyí ña chitó ra. Ta sacuví ra tari sacuví quití. Vatyí quití ña cutuñi iñi ti. Nyacuví ri maa ti cha cuñi coño ñuhu ti. Ta tyicuan caa tucu ra cuan. Chihin cha quiñi caa nyacuví ra, sativí ra chi ra.

¹¹ ¡Ndahvi ra ndahvi cuan! Vatyí quehen ra cha caa ra Caín. Ta cha cuenda cha cuñi ra saha ganaa ra xuhun, quitá caxiin ra tari quitá caxiin ra Balaam. Ta cucunaa ra tari cuanaa ra Coré, vatyí chihí ra cuan cha cuenda cha nacahnü ra nu cahán ra cuví nuu chi ra.

¹² Ra cha sayangá chi ndo chahá ra ticahan nuu chi ndo nu ndu ñin ri ndo. Vatyí chachí ra ta chihí ra, chihin cha si cuñi ra. Ta ña cahán nuu ra cha ña sahá ra ñáyivi chi Nyoo. Ta noo ri maa ra sacuvahá ra chi ra. Cuví ra tari noo vico cha tyandahá tatyí chi, ta cuñi maa yo tyi cua coon savi, ta ña coón ra. Cuví ra tari noo yutun cha ña chaha chiti. Vatyí noo yutun cha ña chahá chiti cuví tun tari noo yutun chihí vasi nyitó tun. Ta sin maa cha cucúvi vaha tun vatyí cucahnya ñáyivi chi tun. Tari cha uvi chaha chihí tun cuví cuan. Ta tyicuan caa maa ra, tari cha uvi chaha chihí ra vatyí chitó ra tuhun vaha ta ña cuñi ra sacuvi.

¹³ Tari ndutya yuhu tyañuhu tatu cha nduxaan chi, iyo xaan nicuinanyaa chi. Soco ñin yaha ri tyicuan ta ndoo maa ri maa tiñi ta mihin nu niyiti cuan. Tyicuan caa maa ra, sandoó ra cha quiñi caa añima ñáyivi. Ta cuví ra tari tiñoo andivi cha cuanaa. Soco cha nyaá maa cha cundoo ra nu ñaa iñi cahnu tyicuan ri maa.

¹⁴ Tuhun maa ra cuan cahán ra Enoc ta cha naha. Ra Enoc tata cu ucha ra Adán cuví ra. Ta cahán ra tuhun cha chaha maa Nyoo chi ra, ta catyí ra: “Nyahí chi Sutu Mañi yo cha vachí ra chihin cuaha mil ángel cuenda ra

¹⁵ vatyí nyehe ra cha sacuvi tandihí ñáyivi. Ta tachi tuñi ra chi tandihí ñu quiñi iyó cha cuenda tandihí cha ña vaha cha chinyacuví ñu, ta cha cuenda tuhun quiñi caa cha cacahán ñu siqui ra”, catyí ra Enoc ta cha naha.

¹⁶ Ra cha sayangá chi ndo, ña ndoó ra vaha chihin cha chahá Nyoo chi ra. Cahán ra chi Nyoo ta chi ñáyivi ta iyó ra tari cuhva quichi cuví iñi coño ñuhu ra. Cahán ra chihin cha cahnu sahá ra chi ra. Tatu cahan vaha ra chihin noo ñáyivi soco cha cuenda cha cuñi ra cuvaha ra nuu ñu.

Nu chahá ra Judas tuhun chi ñu yihí cuenda Nyoo

¹⁷ Soco nyoho yañi, ma quichaha ndo chi ra cuan. Soco nicohon iñi ndo tuhun cha cahán ra apóstol cuenda Sutu Mañi yo Jesucristo.

¹⁸ Cacatyí ra chi ndo vatyí nu cuasandihí ca chi quivi ta cuacoo ra cucuacu nyaa tuhun Nyoo. Ta coo ra yoso cuhva quichi cuví iñi maa ra chihin cha quiñi caa ra.

¹⁹ Ta ican ra ihya cacuví ra cuñi sacusin chi yo. Vatyí quichahá ra cuhva cuñi coño ñuhu ra ta ñahri Tatyí Ii Nyoo nyaá chihin ra.

²⁰ Soco nyoho yañi, cun# ca iñi ndo chihin cha chinó iñi ndo chi ra Cristo. Ta caçan tahvi ndo chi ra chihin tunyee iñi Tatyí lí maa ra.

²¹ Ta tyicuan ri ñihi cunjyaañaa ndo chi Nyoo, ta coto ndo vatyí cuñí xaan ra chi ndo. Ta cuatu tuhva ndo quivi chaa yo nu coo yo ñayivi chaa cha ma naa ca maa. Vatyí ican cuví cha cuacuhva Sutu Mañi yo Jesucristo chi yo cha cuenda cha ndahvi cuñí ra nyehé ra chi yo.

²² Ta ndahvi cuñi nyehe ndo chi ñu cha ña n# vaha iñi.

²³ Ta inga ñu, tyinyee ndo chi ñu tacuhva cacu ñu. Tari quivi cha tava ndo chi ñu nu cayú ñuhú. Ta chi inga ñu cundahvi cuñi ndo nyehe ndo chi ñu, socala ndo cuenda chi ndo chihin cha quiñi caa cha sacuví ñu, coto sacuvi ndo tari sacuví ñu. Nyacua nya sahma ñihnó ñu ta ña vaha cha cuenda cha sacuví ñu cha quiñi caa.

Nu ndihi cahan ra Judas ta sacahnu ra chi Nyoo

²⁴⁻²⁵ Noo ri Nyoo iyó, ta chiñi tuñi xaan ra. Ta ican ra cuví ra cha sacacú chi yo. Ta iyó xaan tunyee iñi chi ra cha sahá cuenda ra chi yo ta sanduvii ra chi yo cha ñahri cuatyí yo coo quivi cunyaca ra chi yo nu nyaá ra chihin cha cahnu cuví ra. Ta sii xaan cucuvi chi yo.

Na coto yo ñana cha cahnu xaan ca cuví ra. Chi maa ra na sacahnu yo vatyí cahnu xaan ca maa ra. Ta iyó xaan ca tunyee iñi chi ra. Noo tuhun ri maa ra nyacá ñaha tandihi. Nyacá ñaha ra ta ityi chata ca, vityin. Ta tyicuan ri maa cunyaca ñaha ra. Ta na cuví chi tyicuan caa.

Cha Sañaha Ra Jesucristo Chi Ra Apóstol Juan

Cha nyehe ra Juan

¹ Ican ihya cuví noo cha catyí Nyoo chi ra Jesucristo vatyí na sacoto ra chi ra casacuví tyiño nuu ra. Sañaha ra ñáá ndihi cha cucuvi cha numi ri. Noo ángel tachí ra Jesucristo vatyí sañaha ra chi yuhu ra Juan.

² Ta cahín cha ndaa ta cha ndicha cuenda tandihi cha nyehi. Ta cuví cha ndaa cuenda tuhun Nyoo ta cuenda tandihi cha sacoto ra Jesucristo.

³ Sii xaan cuñi ñu sacuaaha tuhun cha nyaá nu tutu tuhun Nyoo ihya. Ta sii xaan cuñi ñu chiñi tuhun cha cahán chi ta quichahá ñu, vatyí tandihi tuhun cha nyaá nuu tutu Nyoo, cha nyaña yatyin quivi cha cunyehe yo.

Nu sacuhun ra Juan tutu chi ndi ucha tahan vehe ñuhu

⁴ Yuhu ra Juan sacuhín tutu ihya chi ndi ucha vehe ñuhu ñuu cha nyicú ityi Asia. Nyoo ta ndi ucha tahan Tatyí Ii ra cha nyicú nuu ra nu nyaá ra nyacá ñaha ra nu tyayu chichi gloria, na nasoco ra chi ndo. Ta na coo cha taxi ri añima ndo sahá ra. Nyoo ican ra cuví ra iyó vityin, ta iyó maa ra quivi quichahá tandihi, ta ican ra cuquichi.

⁵ Ta naquehen tucu ndo cha vaha cuan sahá ra Jesucristo ñandihí. Vatyí ican ra cuví ra cha ndaa vaha ta ra ndicha. Ta cuví tucu ra noo ra cha nandoto cha xihna ri ta tyicuan ri maa cucoo ra. Ta iyó ityi chi ra ta nyacá ñaha ra chí ra cacuví rey cha iyó sigui ñuhu ñayivi ihya. Ican ra cuví ra cha cuñi xaan chí yo. Ta sandachí ra cuatyí yo chihin niñi ra.

⁶ Ta sacuvi ra rey chí yo. Ta sacuvi ra tata sutu chí yo tacuhva vatyí sacuvi yo tyiño nuu Nyoo Sutu ra. ¡Na sacahnu yo chí ra. Ta na cunyaca ñaha ra tyicuan ri maa! Ta tyicuan caa na cuví.

⁷ ¡Nyehe ndo! ¡Cha vachi ra Cristo nu vico andivi! Tandihí ñáyivi cunyehe ñu chí ra. Nyacua nya ñu cha sañicuehe chí ra ta cunyehe ñu chí ra. Ta tandihí ñu cucuacu chaa ñu chihin cha yuhví ñu na nanyehe ñu chí ra inga chaha vatyí suri maa ra cuví. Cha ndicha, tyicuan caa cucuvi.

⁸ Catyí Nyoo:

—Yuhu cuví ra xihna cuiri, ta yuhu cuví ra cundoo nu ndihí tuhun —catyí Sutu yo Nyoo, ra iyó tandihí tunyee iñi chí. Ican ra cuví ra iyó vityin. Ta iyó maa ra nu quichahá tandihí, ta ican ra cuquichi.

Noo cuhva tyaqui cha sañaha Nyoo chi ra Juan cuenda ra Cristo

⁹ Yuhu ra Juan cuví yañi nyoho. Ta ñin ri nyehé yo tindoho. Ta ñin ri nyacá ñaha Nyoo chí yo. Ta ñin ri cunyee xaan yo ñáá ndihí cha cuví chí yo vatyí tyinyee ra Jesucristo chí yo. Noho yuhu vehe caa noo ñuhú cha nañi Patmos cha nyaá mahñu tyañuhu. Ñohi vehe caa cha cuenda vatyí cahín tuhun Nyoo cha quichí sañaha ra Jesucristo.

¹⁰ Ta cuví chí noo quivi cha sacahnú yo chí Sutu mañi yo. Ta ñihi xaan chinyaa Tatyí Ii Nyoo chihin. Ta chiñi noo ndusu ñihi xaan ityi chate, tari noo ndusu cha ñihi xaan tari ndusu trompeta.

¹¹ Ta catyí chí chí tyehe caa:

—Yuhu cuví ra xihna cuiri, ta yuhu cundoi nu ndihí tuhun. Tyaá nuu noo libru tuhun cha nyehun, yoho Juan. Ta sacuhun chí ndi ucha vehe ñuhu cha nyicú ityi Asia. Sacuhun chí ñu nyicú vehe ñuhu ñuu Éfeso, chí ñu vehe ñuhu

ñuu Esmirna, chi ñu vehe ñuhu ñuu Pérgamo, ta chi ñu vehe ñuhu ñuu Tiatira, ta chi ñu vehe ñuhu ñuu Sardis, ta chi ñu vehe ñuhu ñuu Filadelfia, ta chi ñu vehe ñuhu ñuu Laodicea —catyi ndusu cuan.

¹² Tyicuan ta nanyocave vatyí cuñí nyehí yóó chi ndusu cha cahán chihin cuan. Ta nanyehí ucha tahan cañileru xuhun cuan.

¹³ Ta mahñu ucha tahan cañileru cuan, nyehí chi noo ra cha caá tari caá noo rayíi ñuhu ñayiví ihya. Ñihnoó ra noo sahma cañi nya nu chaha ra. Ta yihí ra noo sinchu xuhun cuan, ta nya nu nyaá pechu ra chitahan sinchu cuan.

¹⁴ Ta cuichin ixi xiñi ra, tari ixi mbee cuichin, tari cha cuichin catyi. Ta tari cha cayú ñuhu chiti nuu ra.

¹⁵ Ta xiño chaha ra tari xiño noo caa cha nañí bronce cha tuhva nducuaaha nu cayú ñuhu chichi noo horno. Ta ñihi xaan ndusu ra tari ndusu cha cuaha vavaha yuvi nahnu.

¹⁶ Ta yihí ndaha ra ucha tahan tiñoo andivi chiyo vaha ra. Ta tari caa noo mityi cha xaan ninduvi chiyo yuhu, (tyicuan caa tuhun cahán ra cha quitá yuhu ra). Ta tari caá cha ñihi xaan nyehé ñanyii cha xiño vavaha, tyicuan caá nuu ra.

¹⁷ Cuhva cha nanyehí chi ra, nduve chaha ra tari maa cha chihí. Soco maa ra tyiso ra ndaha chiyo vaha ra siqui, ta catyi ra chii:

—Ma yuhvun. Yuhu cuví ra xihna cui, ta yuhu cundoí nu ndihi tuhun.

¹⁸ Iquen cuví ra cha nyitó. Ta vasi chihí soco vityin cuacoí tyicuan ri maa. Ta iyó ityi chii cha catyi ama tahan chi tuhun chihí chi noo noo ñáyiví, ta iyó ityi chii cha catyi tatu cuhun ñu anyaya.

¹⁹ Tyaa nu libru tandihi cha nyehún, cha iyó vityin, ta cha cucoo nu cuahan ca chi.

²⁰ Ican ihya cuví tuhun xehe cuenda ndi ucha tiñoo andivi cha nyehún yihí ndaha chiyo vahi, ta cha cuenda ndi ucha cañileru xuhun cuan cuan: Ndi ucha tiñoo andivi cuan cuñí chi catyi: ra cha cahán tuhun ucha tahan vehe ñuhu cuan. Ta ndi ucha cañileru cuan cuñí chi catyi ndi ucha vehe ñuhu cuan.

2

Tuhun cha sacuhun ra chi ñu nyicú vehe ñuhu ñuu Éfeso

¹ Sacuhun tutu chi ra cahán tuhun chihin ñu nyicú vehe ñuhu cha nyaá ñuu Éfeso. Ta catyun chi ra tyehe caa: “Tyehe caa catyi ra cha yihí ndaha ucha tiñoo chihin ndaha chiyo vaha ra. Ta chicá noo ra mahñu ndi ucha cañileru xuhun cuan:

² Yuhu chité tandihi cha sacuví ndo. Chité vatyí ñihi xaan tyiño sacuví ndo. Ta cunyeé xaan iñi ndo. Ta chité vatyí ña cunyeé iñi ndo nyehé ndo chi ñu quiñi iyó. Ta chité vatyí tuhva ndo nducu nyehe ndo chi ra cha catyi vatyí tyiño Nyoo chica noo ra soco ña ndicha ra.

³ Cunyeé xaan iñi ndo. Ta nyehé xaan ndo tindoho ta cha sahá tyiño xaan ndo cha cuende chihin cha ña ndu uvi iñi ndo.

⁴ Soco iyó noo cha caá ndo nui. Vatyí ña cuñí vaha ca ndo chii tari quivi xihna ri.

⁵ Yucuan chaha nichohon iñi ndo nya maa maa cuví nu ña vaha sacuví ndo. Ta nasama ndo cuhva iyó ndo. Ta sacuví ndo tari cuhva chiyo ndo quivi natiin cuenda ndo notuhun Nyoo. Tatu ma nasama ndo cuhva iyó ndo, numi ri cuhin nu nyaá ndo, ta tinyai cañileru ndo nu nyaá chi. Soco tatu ndu uvi iñi ndo cuatyí ndo, ma tinyai.

6 Soco iyó tucu cha vaha nyacuví ndo. Vatyí ña cuñí nyehe ndo cha quiñi caa cha sacuví ñu yihí cuenda ra Nicolás. Tyicuan tucu yuhu ña cuñí nyehí yucuan.

7 Ta nyoho cha cutuñi ñi ndo, tyasoho ndo ñáa cha catyí Tatyí Ii Nyoo chi nyoho ñu nyicú vehe ñuhu. Catyí ra tyehe caa: Tatu cuví chasaha ndo chi ra ña vaha, cuhve cha cachi ndo chiti yutun cha chahá cha conyito añima ndo. Ta yutun cuan nanyaá tun nya nu iyó Nyoo andivi, ta cuñihi ndo tandihi cha vaha cha iyó yucuan.”

Tuhun cha sacuhun ra Jesucristo chi ñáyivi nyicú vehe ñuhu ñuu Esmirna

8 Saçuhun tucu tutu chi ra cahán tuhin chihin ñu nyicú vehe ñuhu cha nyaá ñuu Esmirna, ta çatyun chi ra tyehe caa: “Tyehe caa catyí ra cuví cha xihna cuiri, ra cundoo nu ndihi tuhun, ra cha chihí ta nandotó:

9 Yuhu chité tandihi cha sacuví ndo. Ta chité tindoho cha nyehé xaan ndo. Ta chité cha ndahvi ndo. Soco chihin tuhun Nyoo, tyayii ndo. Ta chité yoso caa ñu cha catyí vatyí ñu Israel cuví ñu, ta cahán ña vaha ñu siqui ndo. Ta ni ñima ñu Israel cuví ñu vatyí noo ityi ñu yihí cuenda ra ña vaha, ra nañi Satanás, cuví ñu.

10 Soco ma yuhvi ndo cha cunyehe ndo tindoho. Vatyí ra ña vaha cutyihí ra vehe caa chi suhva nyoho, vatyí cunducu nyehe ra chi ndo tatu cusaña ndo chi Nyoo. Ta uchi quiñi cunyehe ndo tindoho. Soco çunyicon vaha ndo chi Nyoo nyacua nya quiñi cúvi ndo. Ta yuhu cuhve ñayivi coo ndo chihin Nyoo.

11 Ta nyoho cha cutuñi ñi ndo tyasoho ndo ñáa cha catyí Tatyí Ii Nyoo chi nyoho ñu nyicú vehe ñuhu. Catyí ra tyehe caa: tatu cuví chasaha ndo chi ra ña vaha, ña tahán chi cuhun ndo anyaya, nu cutachi tuñi Nyoo chi añima ña vaha.”

Tuhun cha sacuhun ra Jesucristo chi ñu nyicú vehe ñuhu ñuu Pérgamo

12 Saçuhun tucu tutu chi ra cahán tuhin chihin ñu nyicú vehe ñuhu ñuu Pérgamo. Ta çatyun chi ra tyehe caa: “Tyehe caa catyí ra cha nyisó mityi cha xaan ndinduvi chiyo yuhu:

13 Yuhu chité tandihi cha sacuví ndo. Ta chité vatyí iyó ndo nu nyacá ñaha cuhna, ra nañi Satanás. Soco tyicuan ri chinó ñi ndo chii. Ta vasi nu canyicú ndo chiña चाह्णि ñu chi ra Antipas, ra cha cuví noo cha ndoo cuende, vatyí chiña chicá noo ra cha nañi Satanás cuan. Soco ni ri maa चाह्णि ñu chi ra, nyoho ña sandihi maa noo tuhun cha chinó ñi ndo chii.

14 Soco catuví suhva cha caá ndo nui: Vatyí nu nyicú ndo nya Pérgamo chiña, yihí ra cha ña cacuñi ra saña ra cuhva cha sacuví ra Balaam. Ta maa ra Balaam tyiyuhü ra chi ra Balac, na sacachi ra chi ñu Israel nyayu cha chiyo nu sacahnú ñu chi xitohyo. Tyiyuhü ra chi ra nacatyí ra chi ñu vatyí ñahri caa cha coo ñu chihin tahan ñu vasi ñima yii ñu cuví, o vasi ñima ñasihi ra cuví.

15 Ta suri iyó suhva ñáyivi mahñu ndo cha ña cacuñi ñu saña ñu cuhva sañahá ra cuenda ra Nicolás. Ta yuhu ña cuñí nyehi cuhva sañahá ra cuan.

16 Yucuan chaha numi ri ñasama ndo cuhva iyó ndo. Vatyí tatu ma nasama ndo cuhva iyó ndo, cuquichi siqui ndo cha numi ri ta cucañi tahin chihin ñu cuan chihin cha tari mityi cha quitá yuhi.

17 Ta nyoho cha cutuñi ñi ndo, tyasoho ndo ñáa cha catyí Tatyí Ii Nyoo chi nyoho ñu nyicú vehe ñuhu: tatu cuví chasaha ndo chi ra ña vaha, cucuhve cha cachi ndo noo pan maná cha ñohó xehe. Ta cucuhve noo yuu cuichin chi ndo. Ta nu yuu cuan cuncunaa noo sivi chaa cha yori chitó. Ta noo tuhun ri ñu cuquehen cuenda cuan cucoto.”

Tuhun cha sacuhun ra Jesucristo chi ñu nyicú vehe ñuhu ñuu Tiatira

18 'Sacuhun tucu tutu chi ra cahán tuhin chihin ñu nyicú vehe ñuhu cha nyaá Tiatira. Ta catyun chi ra tyehe caa: "Tyehe caa catyí Sehe Nyoo, ra cha caá chiti nuu tari noo cha cayú ñuhu. Ta tari caá noo caa finu cha nañí bronce cha xiño xaan, tyicuan caa chaha ra:

19 Yuhu chité tandihí cha sacuví ndo. Ta chité yoso cuhva cha cuñí ndo chi ñáyivi. Ta chité cuhva cha chinó xaan iñi ndo chii. Ta tyinyeé ndo chi tahan ndo. Ta cunyeé xaan iñi ndo. Ta chité vatyi cuaha ca cha vaha sacuví ndo vityin ta ñima ca ta nu quichaha.

20 Soco iyó noo cha caá ndo: Vatyi chahá ndo ityi chi ñaha cha nañí Jezabel na sañaha ña chi ndo. Catyí ña vatyi cuenda Nyoo cahán ña. Soco chihin tuhun cha sañahá ña, sandaví ñaha ña chi ñu sacuví tyiño nui. Vatyi sañahá ña cha coo ñu chihin inga rayi o ñusihí ta ñima yí ñu o ñasihí ra cuví. Ta sañahá ña cha cachi ñu nyayu cha chiyo nu sacahñu ñu chi xitohyo.

21 Yuhu cha nyatu xain cha nasama ña cuhva iyó ña, soco ña cuñí ña nasama ña. Vatyi ta sandoo ca ña cha iyó ña chihin rayi ta ñima yí ña cuví.

22 Ta vityin cua quehen noo cuehe chi ña. Ta cua cuhvi ña. Ta ma cuví nducuita ña. Ta ñu sacuví cha quiñi caa chihin ña, tatu ma ndu uvi iñi ñu, cucuhve noo tindocho nyehe ñu.

23 Ta cucahñi chi sehe ña. Ta tyicuan caa, coto tandihí ñu nyicú vehe ñuhu, vatyi yuhu chité tandihí cha chicá xiñi ñu, ta tandihí cha caá añima ñu. Ta chi tahan tahan nyoho cucuhve cha tahán chi chi ndo yoso cuhva cha sacuví ndo.

24 Soco chi tandihí ca nyoho ñuu Tiatira, cha ña quehen ndo cuhva cha sañahá ña, ni ña sacuví ndo cha catyí maa ñu tuhun nahnu cuenda ra ña vaha, ña tyaí inga tuhun cha yí siqui ndo.

25 Soco ma saña ndo cuhva cha vaha nyacuví ndo nyacua nya quichi.

26 Ta nyoho tatu cuví chasaha ndo chi ra ña vaha, ta sacuví ndo cuhva cuñí nyacua nya nu ndihí tuhun, cucuhve ityi chi ndo cha cunyaca ñaha ndo chi ñu ñuhu ñáyivi.

27 Tari chaha Suti ityi chii cha cunyaca ñahi, tyicuan caa cucunyaca ñaha ndo. Tari cha chihin noo yutun caa cutachi tuñi ndo chi ñu. Tari tahvi cuatyí minoo quisi ñuhú, tyicuan caa cusacuví ndo chihin ñu.

28 Ta cuhve tiño cahnú andivi cunyaa chihin ndo. Ta ican yuhu cuví cuan.

29 Ta nyoho cha cutuñi iñi ndo tyasoho ndo ñáá cha catyí Tatyí Ii Nyoo chi nyoho, ñu nyicú vehe ñuhu."

3

Tuhun cha sacuhun ra Jesucristo chi ñu nyicú vehe ñuhu ñuu Sardis

1 'Sacuhun tucu tutu chi ra cahán tuhin chihin ñu nyicú vehe ñuhu ñuu Sardis. Ta catyun chi ra tyehe caa: "Tyehe caa catyí ra cha yihí ndaha ndi ucha Tatyí Ii Nyoo ta ndi ucha tiño andivi: Yuhu chité tandihí cha sacuví ndo. Ta vasi catyí ñáyivi tyi nyitó ndo soco cha cuenda chi yuhu, chihí ndo.

2 Saha cumi vaha ndo chiin ri ca cha vaha cha iyó chi ndo. Vatyi cha cuñí ndihí tuhin nu nyicú ndo. Vatyi nyehí vatyi cha sacuví ndo, ña vaha maa nuu Nyoo.

3 Niçohon iñi ndo tuhun vaha cha cutuhva ndo. Cunyicon ndo cuhva cuan, ta nasama ndo cuhva iyó ndo. Vatyi tatu ma naquehen vaha ndo cha vaha, sana iñi ndo ta cuquichi siqui ndo, tari tuhva ra suhu quichi.

⁴ Soco iyó suhva nyoho ñu Sardis chiña cha ña sacuví ndo cha quiñi caá. Ña sacanyahyu ndo sahma ndo cuví cuan. Ta maa ndo cucuihno ndo sahma cuichin chihin. Ta cucaca noo ndo chihin, vatyi tyicuan caa tahán chi chi ndo.

⁵ Ta nyoho tatu cuví chasaha ndo chi ra ña vaha, cucuihno ndo sahma cuichin chihin. Ta ma sanai sivi ndo nu libru ñu cuaconyito chihin Nyoo. Ta cunacoto nui chi ndo, chihin nuu Suti, ta chihin nuu ángel.

⁶ Ta nyoho cha cutuñí iñi ndo, tyasoho ndo ñáá cha catyí Tatyí Ii Nyoo chi nyoho ñu nyicú vehe ñuhu.”

Tuhun cha sacuhun ra Jesucristo chi ñu nyicú vehe ñuhu Filadelfia

⁷ Sacuhun tucu tutu chi ra cahán tuhin chihin ñu nyicú vehe ñuhu ñuu Filadelfia. Ta catyun chi ra tyehe caa: “Tyehe caa catyí ra ii, ra ñahri cuatyí, ra cha ndicha vaha, ra cha ndaha ndaha ticu rey David, ra cha nuña yuvehe ta ni noo ñu ta ma cuví nacasi ñu. Ta tatu nacasi ra, ni noo ñu ta ma cuví nuña ñu. Tyehe caa catyí ra:

⁸ Yuhu chité tandihi cha sacuví ndo. Ta nuu ndo nuñe noo yuvehe. Ta yori cuví nacasi, (vatyi चाहि cha cahan ndo tuhun Nyoo chihin ñayivi, ta yori cuví casi). Ta vasi chiin ri fuerza ndo, soco quichahá ndo tuhun cahín, ta ña catyí ndo vatyi ña ñohó nuu ndo chii.

⁹ Ta ñu cuenda ra ña vaha, ñu cuendu, ñu catyí vatyi ñu Israel cuví ñu, ta ñima, cusacuiñi chiti chi ñu nuu ndo, tacuhva coto ñu tyi yuhu cuñi chi ndo.

¹⁰ Ta sacuví ndo cha catyí, vatyi cunyeer iñi ndo. Ta yucuan cuenda cusaha cuende chi ndo chihin tindoho cahnu cha cusaquichi siqui tandihi ñayivi, vatyi cunducu cote chihin tandihi ñu iyó siqui ñuhu ñayivi tatu cuñi ñu chii.

¹¹ Numi ri cuguichi. Saha vaha ndo cuenda cuhva iyó ndo, coto yóo cha tynaa premio cha cuñi ndo.

¹² Nyoho tatu cuví chasaha ndo chi ra ña vaha, cahnu ca tyiño cucuvi ndo nuu Nyoi. Ta ma canyaha ca ndo nu nyaá Nyoo. Ta cutyai sivi Nyoi chi ndo, ta sivi ñuu Nyoi, ñuu Jerusalén chaa cha cusaquichi Nyoi nya andivi, ta suri cutyaa tiqui sivi chai chi ndo ñandihí.

¹³ Ta nyoho cha cutuñí iñi ndo, tyasoho ndo ñáá cha catyí Tatyí Ii Nyoo chi nyoho ñu nyicú vehe ñuhu.”

Tuhun cha sacuhun ra Jesucristo chi ñu nyicú vehe ñuhu ñuu Laodicea

¹⁴ Sacuhun tucu tutu chi ra cahán tuhin chihin ñu nyicú vehe ñuhu ñuu Laodicea. Ta catyun chi ra tyehe caa: “Tyehe caa catyí ra cha ndicha vaha, ra cuví cha ndaa vaha cha cahán cha ndicha, ra cha savaha tandihi cha iyó chihin Nyoo.

¹⁵ Yuhu chité tandihi cha sacuví ndo. Ta chité vatyi ni ña cuñi vaha ndo chii. Ta ni ña cuñi tucu ndo saña ndihí ndo chii. Vaha tyehe ta saña ndihí ndo chii, o sañihí ndo quichaha ndo tuhun cahin, vaha.

¹⁶ Soco vatyi chiin ri cuñi ndo chii, ta ni ña saña ndihí ndo chii, ta ni ña cuñi ndo sacuvi ndo tuhun cahin, yucuan chaha cusanaa ndihí iñi tuhun ndo.

¹⁷ Vatyi nyoho catyí ndo tyehe caa: Yuhu tyayii, vaha iyé, ta ñahri ca maa cha chiñuhú chii, catyí ndo. Ta ña chitó ndo vatyi cuví ndo noo ra ña si cuñi, noo ra ñahri iyó chi, noo ra ndahvi, noo ra cuaa, noo ra vityiyaa cuví ndo.

¹⁸ Yucuan chaha चाहि tuhun chi ndo vatyi chi mai sata ndo xuhun cuaan vaha cha yahá nu ñuhu ta ña cayú, tacuhva na cutyayii ndo. Ta chi mai sata ndo sahma cuichin vatyi cuihno ndo, tacuhva cha ma cucahan nuu ndo vatyi vityiyaa ndo. Ta tyihí ndo colirio chiti nuu ndo tacuhva na nanyehe ndo.

¹⁹ Yuhu चाहिं तुहनु चिं नू चा कुंनू खानु चिं. ता तकिं तुंनू चिं नू न्हानुहिं. युवानु चाहा कतिं चिं नु, नसामा नु कुवा इयु नु ता सकुवि नु चा वाहा.

²⁰ Yuhu नानुइ युवेहे अनुमा न्हानुवि ता सकिहन. तातु नु नु नू चिंनू नू नुनुसि, ता नूना नू युवेहे, युहु कुइवि ता कुखिंनू चिंनू नू. ता माा नू कुखिंनू नू चिंनू मा.

²¹ Cucuhve चा कुनुयाा नु चिंनू नु नुयाा न्हानु तातु कुवि चसाहा नु चिं रा न्हा वाहा. तारि युहु कुवि चसाहि चिं रा, ता वितुन नुइ चिंनू सुति नु नुयाा न्हानु रा.

²² Ta nyoho चा कुवि कुतुंनू इंनू नु, तुयासुहु नु चा कतिं ततिं लि नुयु चिं नुयुहु नू नुयु कुवेहे नूहु” —कतिं रा कुसुकुरिस्तु.

4

Noo kuhva cha sacahnú ñu chi Nyoo nya gloria

¹ Cha yahā तुहनु कुान, ता नुयेहिं नु युवेहे ताकुहु नु अनुवि. ता नुनुनुसु चा तारि का नुनुनुसु तुमुपेता चिंनू चा कानु चिंनू चा खिंनू रि ता कतिं चिं चिं:

—नुदा इया ता कुसानुहिं कुनु चा कुकुवि नु कुवानु का चिं —कतिं नुनुनुसु कुान चिं.

² Ta caa कुवा रि कुान ता तुवि इंनू वतिं न्हानु ववाहा नुइ ततिं लि नुयु चिंनू. ता नानुयेहिं नु तुयातु नानुइ नु अनुवि. ता नुइ नु रा नु तुयातु कुान.

³ Ta ra नुइ कुान, खिंनु नु ता तारि खिंनु नु यु वाहा चा नानु कुसुपे ता कुनुनुनुसु. ता नुनुनुनुसु युहु तुयातु कुान नुइ नु कु कु यानुनु, ता खिंनु ति तारि यु वाहा नानु कुसुमरालु.

⁴ Ta nūcachico तुयातु कुान नुयेहिं कु कुनु का तानु तुयातु. ता नुयु कु कुनु तानु रा चा वाहा चानु. कानुनुनुनुसु रा सानु कुचिंनू. ता यिं कुनुनुसु कुनुनुनुसु वानु खिंनु रा.

⁵ Ta nu नानुइ तुयातु चा नुइ नुइ नुनु कुान, युवानु कुनुनुनुसु तानु. ता वा रि का मा कुवि. ता न्हानु खानु कानु सवि. इति नु तुयातु कुान कुयु उचा तानु नूहु. ता उचा तानु ततिं लि नुयु कुवि कुान.

⁶ Ta ityi नुनु तुयातु कुान इयु तुकु नु चा तारि का तुयानुहु, खिंनु खानु तारि इनु.

Nūcachico युहु तुयातु कुान ता नुइ नु तुयातु कुान, तुयु कुनुनुसु तानु चा नुयु कु चा तारि का कुनुनुसु ता तारि का न्हानुनुसु का. ता कुवा खानु चिंनु नुनु कुान नुयु कु, तारि इति नुनु ता तारि इति चता.

⁷ Cha खिंनू रि चा नुयु कु इया, तारि का नुनुनुनुसु का. ता चा कु उवि तारि का नुनुनुनुसु कुनुनुनुसु का. ता चा कु उंनू, तारि का नुनुनुनुसु कुनुनुनुसु का. ता चा कु कुनुनुनुसु तारि का नुनुनुसु चा कुवानु नुनुनुसु, तुयुनुनुनुसु का.

⁸ Ta ndi कुनुनुनुसु तानु चा नुयु कु इया, तानु तानु चिं ता नुइ इनु तानु नुनुनुनुसु चिं. ता नुनुनुनुसु मा चिं नुइ नुनुनुनुसु चिं, तारि इति चता चिं ता तारि इति चिंनु नुनुनुनुसु चिं. ता नुनुनुनुसु ता न्हानु कुनुनुनुसु चिं कतिं चिं तुयेहे का:

Ra ii खानु कुनुनुनुसु, रा नुनुनुनुसु खानु कुनुनुनुसु, रा न्हानु कुनुनुनुसु कुनुनुनुसु,

Sutu नुनुनुनुसु युहु, नुयु, इयु तानुनुनुसु तुनुये इनु कुनुनुनुसु.

Ra चा इयु नु कुनुनुनुसु तानुनुनुसु कुनुनुनुसु, ता रा इयु वितुन. ता रा चा नुइ चा कुकुचिं.

⁹ Ta cachahā नुनु कुनुनुनुसु तानु चा नुयु कुनुनुनुसु कुनुनुनुसु चिं चिं रा, ता कानुनुनुनुसु चिं तुयुनुनुसु नुनुनुनुसु चिं रा नुइ नु तुयातु कानुनुनुसु कुनुनुनुसु, रा चा इयु तानुनुनुसु तुनुनुनुसु. ता तानु रि चाहा चा कानुनुनुसु चिं तुयुनुनुसु का,

¹⁰ ta ndi oco cumi ra cha vaha chahnu cuan chicuñi chiti ra ta casacahnu ra chi ra iyó tandihi tyembu. Ta catyihí ra corona ra nu tyayu cahnu cuan. Ta cacatyí ra tyehe caa:

¹¹ Sutu Mañi nyuhu, Nyoo cuvún chi ndi.

Chi yoho tahán chi cha cuhva ndi gloria, ta sacahnú ndi chuun.

Ta tahán chi cha cunyaca ñahun.

Vatyi maun savaha tandihi cha iyó.

Ta cha cuenda cha iyó ñi maun ta chicoo tandihi, cacatyí ra.

5

Nu nyehé ra Juan noo libru ta noo Mbee Luhlu cha cuví ra Jesucristo

¹ Tyucuan ta chiyo vaha ra cha nyaá nu tyayu cahnu cuan, nyehí yihí ndaha ra noo libru tari caá noo tutu cha natuví yo. Ta nyaá letra ityi nuu ta ityi chata. Ta nyasí chi chihin ucha tahan sellu.

² Ta nyehí noo ángel cha nyee xaan. Ta chaa xaan cahán ra ta ndacá tuhun ra:

—¿Yóo ra tahán chi nuña libru ihya ta sacanyaha ra sellu ihya? —catyí ra.

³ Soco ni ityi andivi ta ni ityi nu ñuhu ñayivi, ta ni ityi chichi ñuhú, ta yori maa cha cuví nuña libru cuan. Ta ni cha nyehé ñu nuu, ta ma cuví.

⁴ Ta yuhu chacu chaa xain, vatyi yori maa quita cha cuví nuña libru cuan. Yori maa cuví sacuaaha, ta yori cuví nyehé nuu chi.

⁵ Tyucuan ta noo ra cha vaha chahnu cuan catyí ra chii:

—Ma cuacu con. Vatyi ra cuví ndicaha o cuñi chi catyi, ra nyacá ñaha, ra vachi tata ra Judá, ra vachi tata rey David, ican ra cuví chasaha ra tacuhva cuví nuña ra nu libru cuan ta cahnya ra ndi ucha sellu cuan —catyí ra.

⁶ Tyucuan ta mahñu tyayu cuan ta mahñu ndi cumi cha nyitó cuan, ta mahñu ra cha vaha chahnu cuan, nyehí chi noo Mbee Luhlu. Nanyaá ti ta caa ti cha chahñi ñáyivi chi ti. Ucha tahan ndiqui ti ta ucha tahan chiti nuu ti nyaá. Ta chiti nuu cuan ican cuví ndi ucha tahan Tatyí Ii Nyoo cha tachí ra nicacahnu siqui ñuhu ñayivi.

⁷ Ta ra cuví Mbee Luhlu cuan chahán ra ta quehen ra libru cuan cha yihí ndaha chiyo vaha ra nyaá nu tyayu cuan.

⁸ Cuhva cha quehen ra libru cuan, ndi cumi cha nyitó cuan ta ndi oco cumi ra cha vaha chahnu cuan cachicuñi chiti ra nuu ra cuví Mbee Luhlu cuan. Ta tahan tahan ra cha vaha chahnu cuan nyisó ra arpa, noo cha tari caá guitarra caá. Ta canyisó tucu ra copa xuhun cuan tyitu yihí cutu. Ta cutu cuan cuví chi tandihi cha chican tahvi ñu cuenda Nyoo.

⁹ Ta cachita ra noo yaa chaa, ta catyí ra tyehe caa:

Yoho cuví ra tahán chi cha quehun libru ihya, ta cahnyon ndi ucha sellu cha nyaá nu chi.

Vatyi chihun saha ñáyivi. Ta chihin niñun saton chi ndi vatyi coo vaha ndi chihin Nyoo.

Ta cuví ndi ñáyivi ñuu nyihí ta ñuu nahnu nicacahnu ñuhu ñayivi, ñáyivi siin siin sahan cahán, ñáyivi siin siin tata.

¹⁰ Chahun ityi chi ndi vatyi cuví ndi rey ta cuví ndi sutu cha cuenda Sutu yo Nyoo.

Ta cucunyaca ñaha ndi chi ñáyivi iyó siqui ñuhu ñayivi, cacatyí ra, chita ra.

¹¹ Yaha cuan ta nanyehí, ta chihí ndusu cha cahán cuaha xaan ángel, tayucú ra nicachico yuhu tyayu cahnu cuan, ta nu nyicú cumi tahan cha nyitó cuan,

ta nu nyicú ra cha vaha chahnu cuan. Ta cuenda millón ángel nyicú cuan, nyehi.

¹² Ta chihin cha ñihi cahan ángel cuan, ta cacatyí ra:

Ra cuví Mbee Luhlu cha chahñi ñáyivi,
tahán chi cha cunyaca ñaha ra, ta naquehen cuenda ra cha tyayii.

Tahán chi naquehen cuenda ra cha chiñi tuñi.

Tahán chi cha naquehen cuenda ra tandihí tunyee iñi.

Tahán tucu chi cha cuhva yo gloria chi ra, ta sacahnu yo chi ra.

Ta cahnu xaan ca ra cuví maa ra, cacatyí ángel cuan.

¹³ Ta chiñi tiqui cha cahan tandihí cha savaha Nyoo, tandihí cha iyó andivi,
ta siqui ñuhu ñayivi, tandihí cha iyó chichi ñuhú, ta chichi tyañuhu, tandihí cha
savaha Nyoo catyí chi tyehe caa:

Cahnu xaan ca cuví ra cha nyaá nu tyayu.

Cahnu xaan ca cuví ra cuví Mbee Luhlu.

Ta nacuhva yo gloria chi ra.

Ta na cunyaca ñaha ra tandihí maa tyembu, catyí tandihí cha savaha Nyoo.

¹⁴ Ta ndi cumi cha nyitó cuan catyí chi:

—¡Tyicuan caa na cuvi! —catyí chi.

Ta ndi oco cumi ra cha vaha chahnu cuan, cachicuiñi chiti ra ta casacahnu
ra chi ra iyó tandihí tyembu.

6

Nu chahnyá ra Jesucristo ndi ucha tahan sellu

¹ Tyicuan ta nyehi nu chahnyá ra cuví Mbee Luhlu cuan sellu cha xihna ri
chichi cha ndi ucha tahan cuan. Ta chiñi cahan noo cha nyitó cha cumi tahan
cuan, chihin noo ndusu cha tari caá cha cahan savi ta catyí chi:

—¡Ñaha, ta nyehun! —catyí chi chii.

² Tyicuan ta nanyehi ta nyehi noo caballu cuichin, ta ra yosó chi ti cuan
ndaha ra noo arco. Ta ñihí ra noo corona quihí xiñi ra vatyi saha ganaa ra, ta
cuasaha ganaa ca ra.

³ Ta cuhva cha chahnyá ra cuví Mbee Luhlu cuan sellu cu uvi, chiñi cha
catyí cha nyitó cu uvi cuan tyehe caa:

—¡Ñaha ta nyehun! —catyí cuan chii.

⁴ Ta quitá inga caballu, tyacu cuaha. Ta ra cha yosó chi ti chicoo ityi chi ra
vatyi tinyaa ra cha taxi ri iyó ñayivi, tacuhva cahñi ñu chi tahan ñu. Ta ñihí ra
noo mityi cahnu quindaha ra.

⁵ Ta cuhva cha chahnyá ra cuví Mbee Luhlu cuan sellu cu uñi, ta chiñi cha
catyí cha nyitó cu uñi cuan tyehe caa:

—¡Ñaha ta nyehun! —catyí cuan chii.

Ta nanyehi, ta nyehi noo caballu toon. Ta ra yosó chi ti, yihí ndaha ra noo
ticatya.

⁶ Ta chiñi noo ndusu mahñu cumi tahan cha nyitó cuan, ta catyí cuan:

—Tari cuhva xuhun yahvi ñu cha noo quivi, yucuan cuhva yahvi noo litru
nuñi. Tyicuan caa tucu uñi litru cebada. Ta ma sativun acetye ta vinu —catyí
ndusu cuan.

⁷ Ta cuhva cha chahnyá ra cuví Mbee Luhlu cuan sellu cu cumi, chiñi cha
cahan cha nyitó cucumi cuan, ta catyí chi, tyehe caa:

—¡Ñaha ta nyehun! —catyí chi.

8 Ta nanyehi ta nyehi noo caballu cuaan. Ta ra yosó chi ti nañi ra Tuhun Chihi. Ta chata ra vachi inga ra cha nañi Ra Nyacá Ñaha Nu Nyicú Ndiyí. Ta cañihí ra tunyee iñi cha cahñi ra chi cuaha xaan ñáyivi iyó siqui ñuhu ñayivi. Vatyí chichi cha sava ñáyivi iyó siqui ñuhu ñayivi, cucahñi ra sava ñu. Ta cucahñi ra chi ñu chihin cha sanacanda ra cuatyí, ta chihin tama, ta chihin cuehe, ta chihin quiti xaan iyó siqui ñuhu ñayivi.

9 Cuhva cha chahnya ra cuví Mbee Luhlu cuan sellu cu ohon, nyehi xiu arta. Yucuan ñohó añima ñu cha chihí cha cuenda tuhun Nyoo tyi sacotó ñu tuhun ra chi ñáyivi.

10 Ta tyehe caa catyí ñu chihin noo ndusu chaa xaan:

—Sutu Mañi yuhu, ra ii cuvún. Ta sacuvún cha catyún. ¿Ama cutachi tuñun chi ñáyivi cha chahñi chi ndi cha catyí tuhun maun? —catyí ñu.

11 Tyicuan ta cañihí noo noo ñu cuan sahma cuichin cuihno ñu. Ta catyí ra chi ñu na canyatatu ñu suhva ca quivi, nyacua nya cha caña tahan tandihí ca tahan ñu, ñu sacuvi tyiño nuu ra Cristo, ñu cha tahan chi cucúvi tari cuhva chihí maa ñu.

12 Cuhva cha chahnya ra cuví Mbee Luhlu cuan sellu cu iñu, nanyehi ta quichi noo cha taán cahnú. Ta nduña ñayivi, tari sahma ñu nyaá tucuihya iñi, toon xaan nduví. Ta yoo andivi cuan nanduví tari niñi.

13 Ta tiño andivi canacoyo ti nya nu ñuhu ñayivi. Tari sanacoyo tu higo chiti yutya tun tatu yahá noo tatyí ñihi.

14 Tari natuvi yo noo tutu tyicuan caa cuanaa ri andivi. Ta tandihí yucu ta tandihí ñuhú cha nyicú mahñu tyañuhu nacanda chi ta nasama chi nu nyaá chi.

15 Ta tandihí rey cha iyó siqui ñuhu ñayivi in ri chihin ra nahnu, ta ra tyayii, ta ra cacuvi nuu chi sindaro, ta ra iyó xaan fuerza chi, ta tandihí ñu cacuvi musu, ta ñu cha ña cuví musu, tandihí ri ñu cuan caquihvi xehe ñu chichi yavi yuu cha iyó yucu nahnu, ta chichi yavi ñuhú.

16 Ta catyí ñu chi yucu cuan ta chi yuu cuan tyehe caa:

—Canacoyo ndo siqui ndi, ta tixehe ndo chi ndi nuu ra nyaá nu tyayu andivi, coto tachi tuñi ra cuví Mbee Luhlu cuan chi ndi.

17 Vatyí cha cha quivi cahnú cha cutachi tuñi ra chi ndi. ¿Ta yóo cuví cha cuví cunyee cuan? —catyí ñu.

7

Nu ñihí ñu Israel sellu cunyaq tyaan ñu

1 Cha yahá tuhun ihya ta nyehi cumi tahan ángel catayucú ra ndi cumi chiyo nu quichi tatyí siqui ñuhu ñayivi. Ta ña chaha ra yaha tatyí cuan vatyí cava chi siqui ñuhu ñayivi. Ni ña chaha ra cha cava chi nuu tyañuhu, ni siqui yutun catayucú nuu ñuhú.

2 Ta nyehé tiqui inga ángel, vachi ra ityi nu caña ñanyii, ta nyisó ra sellu Nyoo nyitó. Ta ángel cuan canachaa ra chihin cha ñihi ndusu ra chi inga cumi ca ángel cuan, ra cha ca iyó ityi chi vatyí casativi ra nuu ñuhu ñayivi ta nuu tyañuhu. Ta catyí ra chi ra:

3 —Ma sativi ñaha ndo nuu ñuhu ñayivi, ni nuu tyañuhu, ta ni nuu yutun cha niri ca cha ta sañaha ca ndi yóo ñu cuví musu Nyoo, vatyí cutyaa ndi noo sellu tyaan ñu —catyí ángel cuan.

4 Ta chiñi nacatyí ra yoso tahan ñáyivi tyaq ra sellu cuan: cientu uvi xico cumi mil tahan ñu Israel.

⁵ Uchi uvi mil ñu tata ra Judá chicunyaꝯ sellu, ta uchi uvi mil ñu tata ra Rubén, inga uchi uvi mil ca ñu cuenda tata ra Gad,

⁶ uchi uvi ca mil cuenda tata ra Aser, uchi uvi mil ca cuenda tata ra Neftalí, uchi uvi mil ñu tata cuenda ra Manasés,

⁷ ta uchi uvi mil cuenda tata ra Simeón, uchi uvi mil cuenda tata ra Leví, ta uchi uvi mil cuenda tata ra Isacar,

⁸ uchi uvi mil ñu cuenda tata ra Zabulón, ta uchi uvi ca mil ñu cuenda tata ra José, ta uchi uvi mil ca ñu cuenda tata ra Benjamín. Tandihí ñu cuan ta chicunyaꝯ sellu Nyoo chi ñu.

Nu nyehe ra Juan chi ñu ñihno sahma cuichin

⁹ Cha yaha tuhun cuan ta nanyehí ta nyehí cuaha xaan ñáyivi nyicú. Ta yori cuví nacahví chi ñu, vatyí nyicú ñáyivi tandihí ri ñuu nyihi ta ñuu nahnu iyó siqui ñuhu ñayivi. Ta nyicú ñáyivi siin siin sahan cahan. Ta nyicú ñáyivi tandihí ri tata. Ta catayucú ñu nuu ra nyaá nu tyayu, ta nuu ra cuví Mbee Luhlu. Ta cañihno ñu sahma cuichin. Ta cayihí ndaha ñu ndaha ñoo.

¹⁰ Ta tandihí ñu chihin cha ñihi ndusu ñu, ta canachaa ñu ta catyí ñu:

—Sutu yo Nyoo, ra nyaá nu tyayu gloria, ta ra cuví Mbee Luhlu, ican ra sacacú chi yo —catyí ñu canachaa ñu.

¹¹ Ta tandihí ángel catayucú ra nicachico yuhu tyayu cuan, ta nicachico chata ra cha vaha chahnu cuan, ta nicachico chata ndí cumi tahan cha nyitó cuan. Ta cachicuiñí chiti ra chihin nuu ra nya nu ñuhú nuu ra nyaá tyayu cuan. Ta casacahnú ra chi ra. Vatyí Nyoo cuví ra.

¹² Ta cacatyí ra:

Tahán chi tyehe caa chuun:

Sacahnú ndi chuun ta chahá ndi gloria chuun vatyí chiñi tuñi xaun.

Nacuhvá xaan ndi tyahvi nyoo chuun.

Ta sacuvahá ndi chuun vatyí iyó xaan tunyee iñi chuun, ta cuaha xaan fuerza iyó chuun, Nyoo Sutu ndi cuví chuun. Ta tyicuan ri na cuví chi tandihí tyembu, catyí ra.

¹³ Tyicuan ta noo ra cuví ra cha vaha chahnu cuan ndaca tuhun ra chii ta catyí ra:

—¿Yóo ñu cañihno sahma cuichin ihya? ¿Ta nya ityi quichí coyo ñu? —catyí ra.

¹⁴ Ta yuhu catyí chi ra:

—Tata, yoho chitón.

Ta catyí ra chii:

—Ican ñu ihya cuví ñu cayaha nu tindoho cahnú. Ta canacatyá ñu cuatyí ñu, ta nducuichin sahma ñu chihin niñi ra cuví Mbee Luhlu.

¹⁵ Yucuan chaha nyicú ñu ityi nuu tyayu nu nyaá Nyoo. Ta sacuví ñu tyiño nuu ra ndiyaca ta ñiyaca chichi vehe ñuhu ra. Ta ican ra cuví ra nyaá nu tyayu gloria ta cusaha cumi ra chi ñu vatyí cua cunya ra chihin ñu.

¹⁶ Ta ma nyehe ca ñu tindoho chihin soco, ni chihin cha ityi ñu ndutya. Ta ni ma cahmí ca ñanyii chi ñu. Ni ma sayanga ca cha ihñi chi ñu.

¹⁷ Vatyí ra cuví Mbee Luhlu cha nyaá mahñu tyayu cuan cusaha cumi ra chi ñu, tari sahá cumi yo mbee. Ta cunyaca ra chi ñu nu coho ñu ndutya cha chahá cha cuconyito ñu tandihí tyembu. Ta Nyoo cunacuhva ra tandihí ndutya nuu ñu —catyí ra chii.

8

Nu chahnyá ra Jesucristo sellu cu ucha ta quitá noo ángel chihin noo cuu xuhun cuaan

¹ Cuhva cha chahnyá ra cuví Mbee Luhlu sellu cu ucha nu libru cuan, ndutaxín ri nya andívi tari noo cha sava hora.

² Yahá cuan ta nyehí chi ndí ucha ángel catayucú ra nuu Nyoo. Ta caquehen cuenda ra ucha tahan trompeta.

³ Yahá cuan ta quichí inga ángel chihin noo cuu xuhun cuaan cha tuhvá yihí cutu. Ta chicutinanyaa ra ityi nuu arta cuan. Ta quehen cuenda ra cuaha xaan cutu, vatyí cuhva cuenda ra ñin ri chihin cha chicán tahvi ñáyivi chi Nyoo. Nu arta xuhun cuaan cha nyaá ityi nuu tyayu Nyoo, yucuan chaha cuenda ra.

⁴ Ta quitá ñuhma cutu cuan, nandaá chi nu nyaá Nyoo ñin ri chihin cha chican tahvi ñu cuenda ra.

⁵ Tyicuan ta ángel cuan quehen ra cuu cuan. Tyicuan ta sacutú ra chihin titi ñuhú cha quitá arta cuan. Ta tuchí ra siqui ñuhu ñáyivi. Ta quichaha cahan savi, ta iyo cuví. Ta quihvi tacha, ta quichaha taan.

Nu tiví ángel trompeta

⁶ Tyicuan ta ndí ucha ángel cha canyisó ndí ucha trompeta cuan, cha nyatú tuhva ri ra vatyí catívi ra.

⁷ Ángel cha xihna ri cuan quichaha tiví ra trompeta ra. Ta quichaha coon savi yuu ta saca niñi chihin chi, ta saca ñuhú cha cayú chihin. Ta cayú cha yatín cha sava ñuhu ñáyivi. Ta cha yatín cha sava yutun cayú chihin tandíhi cuhu cuii.

⁸ Ta ángel cu uvi cuan tiví tucu ra trompeta ra. Ta canacava tari noo yucu cha cayú ñuhú mahñu tyañuhu. Ta cha yatín sava tyañuhu cuan nduví chi niñi.

⁹ Ta cha yatín sava quití cha iyó chichi tyañuhu cuan chihí ti. Ta cha yatín sava barcu cha iyó cuan, catahvi cuatyí.

¹⁰ Ta ángel cu uñi tiví ra trompeta ra. Ta canacava noo tiño cahnú andívi, suri cayú ñuhú chi ti tari ñuhú ñiti. Canacava ti siqui cha yatín ri sava yuvi nahnu ta siqui cha yatín ri sava ndohyo.

¹¹ Ta tiño cahnú cuan nañi ti Ajenjo. Ta cha yatín ri sava ndutya cha iyó, nanduví chi Ajenjo cha cuví noo veneno cha uva xaan. Ta cuaha xaan ñáyivi chihí cha cuenda ndutya cuan, vatyí ndu uva chi.

¹² Ta ángel cu cumi cuan natívi ra trompeta ra ta cha yatín sava ñanyii nduñaa, ta cha yatín sava yoo, ta cha yatín cha sava tiño andívi cuanaa ti. Ta cha cuenda cha nduñaa suhva ñanyii cuhva cuan, nduñaa cumi tahan hora cha noo noo quívi. Ta cha cuenda cha tiví yoo ta tiño, yucuan chaha ña cacuví sandichin chi cumi tahan hora cha noo noo ñuu.

¹³ Yahá cuan ta nanyehí ta chiñi vatyí noo ángel ndavá ra mahñu andívi. Ta chihin cha ñihi ndusu ra ta catyí ra tyehe caa:

—Ndahvi cuví ñu iyó siqui ñuhu ñáyivi vatyí nyaá tiví uñi ca tahan ángel trompeta ra! —catyí ángel cuan.

9

¹ Ta ángel cu ohon cuan natívi ra trompeta ra. Ta nyehí chi noo ra cuan, tari tiño andívi caá ra. Ta canacava ra siqui ñuhu ñáyivi. Ta quehen cuenda ra cuan ndaha ticu cha cuenda yavi cono cha ñahri maa nu chitahan chi.

² Tyicuan ta nuñā ra yavi cuan. Ta cuaaha ñuhma nandaq̄ tari maa ñuhma cha quitá chichi noo horno cahnu. Ta ñuhma cuan chasī chi nuu ñanyii ta nasacā noo chihin tatyí. Ta nduñāq̄ ñayiví.

³ Ta mahñu ñuhma cuan caquitā coyo pinchi. Ta candava coyo ti siquī ñuhu ñayiví. Ta chicoq̄ ityi chi ti vatyí tyaa ti chi ñáyiví tari tisuhma cha iyó siquī ñuhu ñayiví.

⁴ Quehen ti tuhun vatyí ma satasī iñi ti, ni chi cuhu cha iyó nu ñuhu ñayiví, ta ni noo cuhu cuii, ta ni noo yutun, soco chi ñáyiví cha ñahri sellu Nyoo nyaá tyaan ñu. Chi ñu cuan cutyaa ti.

⁵ Soco ñahri ityi iyó chi ti cha cahñi ti chi ñáyiví, soco tacuhva tyaa ri ti chi ñu. Ta coo xico uhvi chi ñu chichi cha ohon yoo. Ta cha uhvi cuan, tari caá xico tisuhma cha tyaa chi ñáyiví tyicuan caá.

⁶ Ta quiví cuan ñáyiví cunanducu ñu tuhun chihi. Soco ma nañihi ca ñu. Ta vasī cuñí ñu cúvi ñu, soco tuhun chihi cucono ri chi chi ñu vatyí ma cúvi ñu.

⁷ Tari caá caballu nahnu cha cachicá cuatyí, tyicuan caá pinchi cuan. Ta xiñi ti yihí tari caá noo corona xuhun cuaan. Ta tari caá nuu rayii, caá nuu ti.

⁸ Ta ixi xiñi ti tari caá ixi xiñi ñusihí caá. Ta tari caá noho ndicaha caá noho ti.

⁹ Ta soo ti tari caa, tyicuan caa. Ta ñihi xaan cachan ndichin ti. Tari cachan cha cuaaha xaan carreta caballu cuhva cha cachinó ti nu iyó cuatyí.

¹⁰ Ta tari caá suhma tisuhma caá suhma ti, vatyí yihí iñu. Ta chihin cuan cuví tyaa ti chi ñáyiví chichi cha ohon yoo.

¹¹ Ta pinchi cuan iyó noo ra cuví nuu chi ti. Ta ican cuví noo ángel cha nyacá ñaha yavi cahnu ta cono cha ñahri nu chitahan. Ta cha chihin sahan hebreo nañi ra Abadón. Ta chihin sahan griego nañi ra Apolión, ta cuñí chi catyi: Ra Sanaa.

¹² Yahā noo tindoho cuan, soco cumañi uvi ca.

¹³ Ta ángel cu iñu cuan nativí ra trompeta ra. Ta chiñi noo ndusu cha quitá chichi ndi cumi ndiquī tutun arta xuhun cuaan cha nyaá nuu Nyoo.

¹⁴ Ta ndusu cuan catyí chi ángel cu iñu cha nyisó trompeta cuan, tyehe caa: —Ndāchi chi ndi cumi ángel cha canuhñī yatyin yuhu yuvi cahnu Eufrales —catyí ndusu cuan.

¹⁵ Tyicuan ta ndachí ndi cumi ángel cuan, vatyí cha nyatū tuhva xaan ra maa maa cuhva cuan maa maa quiví cuan, maa maa yoo cuan, maa maa cuiya cuan, vatyí cahñi ra chi cha yatyin cha sava ñáyiví iyó siquī ñuhu ñayiví.

¹⁶ Ta chiñī yoso tahan sindaro chihin caballu ra, ta quitā uvi cientu millón tahan ra.

¹⁷ Ta tyicuan caa nyehí caballu cuan chihin visión, cha sanyehē Nyoo chii. Ta pechu ra cayosó chi ti cuan, yihí noo caa tyacu cuaaha, tyacu azu ta tyacu cuan. Ta tari caá xiñi ndicaha caá xiñi caballu ra. Ta chichi yuhu ti quitá ñuhu ta ñuhma ta azufre.

¹⁸ Ta cha yatyin sava ñáyiví iyó siquī ñuhu ñayiví cachihí chihin uñi tahan cha caquitá yuhu caballu cuan; ñuhū ta ñuhma ta azufre.

¹⁹ Vatyí tunyee iñi cha iyó chi ti, chichi yuhu ti ta suhma ti nyaá. Vatyí tari caá coo, caá suhma ti. Tari noo xiñi coo tyicuan caa nuu suhma ti. Ta chihin cuan sañicuehé ti chi ñáyiví.

²⁰ Soco tandihí ca ñu cha candoq̄, cha ña cachihí chihin cuehe cuan, ña sacucuitā ñu cha sacuví ñu cha ña vaha. Ta ni ña sacucuitā ñu cha sacahnú ñu chi tatyí ña vaha ta chi xitohyo. Vatyí cuví cuan noo xuhun cuaan, xuhun

cuichin, bronce, yuu, yutun. Cha ña cuví nyehe, ni ña chiñí ta ni ña cuví caca cuví cuan.

²¹ Ni ña casandihí ñu cha chahñí ñu, ta cha sataśí ñu. Ta ña sandihí ñu cha iyó ñu chihin rayí ta chihin ñusihí ta ñima yí ñu cuví, ta ñima ñasihí ra cuví. Ta ña sandihí ñu cha suhú ñu.

10

Ángel cha nyisó libru luhlu

¹ Tyicuan ta nyehí inga ángel cha iyó xaan tunyee iñi chii, cha vachi noó ityi andiví mahñu noo vico. Ta noo coo yahnyí nyaá xiñi ra. Ta xiño xaan nuu ra tari ñanyí. Ta tari cha cayú ñuhu chaha ra, tyicuan caá.

² Ta yihí ndaha ra noo libru luhlu cha tanuña nuu. Ta chinanyaá ra chaha chiyo vaha ra nu tyañuhu. Ta chaha chiyo satyin ra chinanyaá ra síqui ñuhu ñayiví.

³ Tyicuan ta ñihi xaan cana chaa ra, tari ndusu ndicaha cha nduxaan ti. Ta cuhva cha canachaá ra, chiñí ucha tahan ndusu cha sñn sñn caa tari cha cahán savi, tyicuan caa ndusu ra.

⁴ Ta cha yahá cha chiñi cha cahán ndi ucha ndusu cuan, tyicuan ta cuatyai nuu tutu. Soco chiñí noo ndusu ityi andiví, ta catyí chi chii tyehe caa:

—Çocumi xehun tuhun cha chiñun cahan ndi ucha ndusu cuan. Ta ma tyaun nuu tutu —catyí ndusu cuan chii.

⁵ Tyicuan ta ángel cha nyehí cha chañí nu tyañuhu ta síqui ñuhu ñayiví, nacoñehé ra ndaha chiyo vaha ra ityi andiví.

⁶ Ta ángel cuan tyanahá ra vatyi cahan ra noo cha ndicha cuenda Nyoo, ra nyitó tyicuan ri maa, ra cha savahá andiví ta ñuhu ñayiví ta tyañuhu ta tandihí cha iyó nuu chí. Ta catyí ra:

—Ñahri ca cha cucuee.

⁷ Vatyí cuhva cha cuquichaha tiví ángel cu ucha cuan trompeta ra, yucuan cuhva cuchino cava tuhun xehe cha yihí iñi Nyoo tyi sacuvi ra, tari cuhva sacotó ra chí ra casacuví tyiño nuu ra, ra cacuví profeta cuenda ra —catyí ángel cuan.

⁸ Ta ndusu cha chiñi yuhu, cha quitá ityi andiví, cahán tucu chí chihin inga chaha, ta catyí chí chii tyehe caa:

—Cuahan, ta quehun libru luhlu cha tanuña nuu, cha yihí ndaha ángel cha chañí nu tyañuhu ta nu ñuhu ñayiví —catyí chí.

⁹ Tyicuan ta chahñn nu nyaá ángel cuan ta chiquen libru luhlu cuan nacuhva ra chii, ta catyí ra chii:

—Quehen, ta çachun, vixi xaan tari tyañuñu. Soco chichun cundu uva chí —catyí ra chii.

¹⁰ Tyicuan ta quehñn libru luhlu cha yihí ndaha ángel cuan, ta chachí. Vixi xaan tari tyañuñu. Soco cha yahá cha chachí, uva xaan nduvi chí chichi.

¹¹ Tyicuan ta catyí ra chii:

—Cuñí chí cha cacacatyun inga chaha tuhun cha cahán Nyoo síqui ñayiví cuaha xaan ñuu nyihi ta ñuu nahnu, ta síqui ñayiví sñn sñn sahan cahan, ta síqui ra cacuví rey —catyí ra chii.

11

Uvi tahan ra cacuví cha ndaa

¹ Tyicuan ta cachahā ra noo ndoo cha tari caá noo yutun cha tyicuhvá chi. Ta cacatyí ra chii tyehe caa:

—Nducuíta ta tyicuhvon vehe ñuhu Nyoo ta arta ra, ta načahvun yoso tahan ñu tuhvá sacahnú chi Nyoo yucuan.

² Soco ma tyicuhvon nuquehe cha nyaá ityi chata vehe ñuhu cuan. Vatyí cha cuenda ñu inga ñuu cuví. Ta ican ñu cuan cucuaca chaha ñu ñuu ii cuan chichi cha uñi cuiya sisava.

³ Ta yuhu cutachi uvi testigu cucahan ra cha cuende cha ni ri ca cha chichi noo mil uvi cientu uñi xico quívi. Ta cacuihno ra sahma tucuihya iñi.

⁴ Ta ican nanduvi testigu cuan cuví uvi tahan yutun olivo ta uvi tahan cañileru cha tayucú nuu Sutu Mañi yo, ra nyaca ñaha siqui ñuhu ñayivi.

⁵ Tatu yóo ñu cuñí satasi iñi chi nanduvi testigu cuan, cuquita ñuhu yuhu nanduvi ra, ta cahmi chi tandihi ñu xaan iñi chi ra. Ta tyicuan caa cucúvi ñu cuñí satasi iñi chi ra.

⁶ Testigu cuan iyó ityi chi ra cha cacasi ra nu ma coon savi cha niri ca cha cachahá cuenda ra tuhun cahán Nyoo chi ñáyivi. Ta iyó tucu ityi chi ra cha casananduvi ra niñi chi ndutyá. Ta iyó tucu ityi chí ra cha casanyehe ra tindocho chi ñu iyó siqui ñuhu ñayivi chíhin tandihi ri nuu cuehe, yoso tahan chaha cha cacuñí maa ra.

⁷ Soco cuhva cha cua ndihi cuhva cuenda ra tuhun Nyoo chi ñáyivi, cuquita noo quiti xaan yavi cono cuan, ta cucañi tahan ti chíhin nanduvi testigu cuan. Ta cucuvi chasaha ti chí ra. Ta cucahñi ti chí ra.

⁸ Ta coño ñuhu ra cundocho maa cava calle ñuu nu chihí Sutu Mañi yo nu cruzi. Ta tari Sodoma ta Egipto nanduvi ñuu cuan, (cha cuenda cha ña vaha cha sacuvi ñáyivi ñuu cuan).

⁹ Ta chichi cha uñi quívi sisava, cunyehe tandihi ñáyivi coño ñuhu ra, ñáyivi tandihi ñuu nyihi, ñáyivi tandihi ri tata, ta ñáyivi siin siin sahan cahán, ta ñáyivi ndihi ri ñuu nahnu, cunyehe ñu coño ñuhu ra. Ta ma cuhva ñu cha quívi coño ñuhu ra chichi ñuhú.

¹⁰ Ta ñu cha iyó siqui ñuhu ñayivi cu cusii xaan cuñí ñu cha cuenda cha cachihí ra cuan. Ta nyacua cutachi ñu regalo chí tahan ñu cha sii cuñí ñu, vatyí cachihí nanduvi rayii cha cachahā cuenda tuhun cahán Nyoo chí ñu. Vatyí chahā xaan ra tindocho chí ñu cha cuhva cha cuñí maa ñu.

¹¹ Soco cha yaha cha uñi quívi sisava, Nyoo sanandoto ra chi ra, ta candicuita tucu ra inga chaha. Ta tandihi ñu nyehe canandoto ra, canayuhvi xaan ñu.

¹² Tyicuan ta nanduvi testigu cuan cachiñi ra noo ndusu ñihi xaan ityi andivi. Ta cacatyí chí ra ra tyehe caa:

—Ndaq ndo ityi siqui ihya —catyí ndusu cuan chí ra.

Ta candaq ra ityi andivi chichi noo vico. Ta canyehe ñu xaan iñi chí ra nu canandaá ra.

¹³ Ta cuhva cuan quichi noo cha taqan cahnu. Ta chichi ñuu cuan canacoyo cuaha xaan vehe. Ta chichi cha uchi uchi tahan vehe, canacoyo noo noo. Ta cha tandihi chichi ñuu cuan chihí ucha mil ñáyivi cha cuenda cha taqan cuan. Ta ñáyivi ña chihí, casacahnú ñu chí Nyoo, ra nyaá andivi, cha cuenda cha yuhvi ñu.

¹⁴ Yaha tindocho cu uvi cuan, soco numi ri cuquichi tindocho cu uñi.

Nu tiví ángel trompeta cu ucha

¹⁵ Ta ángel cu ucha nativi ra trompeta ra. Ta canatyacu ndusu ñihi xaan ityi andivi, ta cacatyí chí tyehe caa:

Tandihí nu nyacá ñaha rey siqui ñuhu ñayiví ihya, cha yahá nanduvi chi Sutu yo Nyoo ta chi ra Cristo.

Ta maa ra cucunyaca ñaha tyicuan ri maa, catyí ndusu cuan.

¹⁶ Tyicuan ta ndi oco cumi ra cha vaha chahnu, ra canyicú nuu tyayu nu nyaá Nyoo, cachicuiñí chiti ra chihin nuu ra nya nu ñuhu. Ta casacahnú ra chi Nyoo.

¹⁷ Ta cacatyí ra:

Nacuhvá ndi tyahvi nyoo chuun, Sutu Mañi nyuhu.

Nyoo ra iyó tandihí tunyee iñi chii cuvún.

Yoho iyón vityin, ta iyón nu quichaha tandihí ta nyaa cha cuquichun.

Vatyí cha naquehen cuendon tunyee iñun.

Ta cha quichahun nyaca ñahun vityin.

¹⁸ Ta ñáyivi tandihí ñuu nahnu cuxaan ñu.

Soco cha chaá quiví cha tachi tuñun chi ñu.

Ta cha chaá quiví cha cucutuñí chi ñu ndiyi.

Ta cucuhvon cha vaha cha tahán chi chi ñu sacuví tyiño nuun, ñu chahá cuenda tuhun cahún,

ñu cha nacuhvá cuenda añima chi maun, ta sacahnú ñu sivun.

Vasi cahnu ñu cuví ñu ta vasi ndahvi ñu.

Ta chaá cuhva cha sanaun chi ñu sativí chi ñáyivi siqui ñuhu ñayiví, cacatyí ra.

¹⁹ Tyicuan ta nuña yuvehe ñuhu Nyoo cha nyaá andivi, ta chichi vehe ñuhu natuví caja cuenda cha natyihí tahan ra tuhun chihin yo. Ta quihví tacha. Ta vaa ri maa cuví, ta cahán savi. Ta chiyó noo cha taan. Ta ñihi xaan coón savi yuu.

12

Nu chican nyicon noo coo cahnu chi noo ñaha sihi

¹ Tyicuan ta tuví noo seña cahnu andivi. Vatyí quitá noo ñaha sihi ta siquí noo ña ñanyii tari cha ñihnó ña vestido. Ta chañi ña siqui yoo. Ta yihí noo corona cha uchi uvi tiño andivi xiñi ña.

² Ta ñaha sihi ihya ñohó sehe ña. Ta chacú chaa vavaha ña chihin cha uhvi cha cacú sehe ña, vatyí nyehé xaan ña tindoho cha cua cacu sehe ña.

³ Tyicuan ta quitá nonga seña ityi andivi. Ta nyehí noo coo cuaha cahnu. Ta nyaá ucha xiñi ti, ta uchi ndiqui ti. Ta tahan tahan xiñi ti yihí noo corona.

⁴ Ta chihin suhma ti sanacoyo ti cha vatyin cha sava tiño andivi siqui ñuhu ñayivi. Ican coo ihya chicuiñi ti nuu ñaha cha cua cacu sehe cuan, vatyí ta cha cacu ri cue ta cachi ti chi cue.

⁵ Ta ñaha cuan sacacú ña noo rayi. Ta ican ra cuacunyaca ñaha tandihí ñáyivi iyó siqui ñuhu ñayivi. Ñihi xaan cua cunyaca ñaha ra tari cha chihin noo yutun caa vee. Ta cha yahá cacú ra, naxitá Nyoo chi ra nu nyaá ra nu tyayu ra.

⁶ Ta ñaha cuan chinó ña cuahan ña noo ñuhú ityi, nu sanduvahá Nyoo noo nu coo ña, vatyí yucuan cucuhva ra cha cachi ña cha ni ri ca cha noo mil uvi cientu uñi xico quivi.

⁷ Yahá cuan ta chiyó noo cuatyí nya andivi, nu cañi tahan ángel cahnu Miguel ta tandihí ángel cuenda ra chihin coo cahnu cuan. Ta coo cuan ta tandihí tatyí ña vaha cuenda ti, cacañi tahan chihin ra Miguel.

⁸ Soco ña saha ganaá ti cha cañi tahan ti. Ta ña ñihí ca ti nu ndoo ti nya andivi chihin tatyí ña vaha cha candihí chihin ti.

⁹ Tyicuan ta tava ñehe Nyoo chi ti, cuví ti Coo Chahnu, cha nañi cuihna ra cuví nuu, ra cha sandaví ñaha chi tandihi ñáyivi iyó siqui ñuhu ñayivi. Maa ra ta tatyí ña vaha cuenda ra cacnacoyó ra nya nu ñuhu ñayivi.

¹⁰ Tyicuan ta chiñi noo ndusu ñihi nya andivi. Catyí chi tyehe caa:

—Cha chaq nu cacu añima yo vityin. Cha saha ganaa tunyee iñi Nyoo. Cha nyacá ñaha Nyoo yo vityin chihin ra Cristo Sehe ra. Vatyí cha tava ñehe ra chi ra cha tyaq xaan cuatyí siqui ra yañi yo ndiyaca ta ñiyaca nuu Nyoo.

¹¹ Ta ra yañi yo cacuvi chasaha ra chi ra chihin niñi ra cuví Mbee Luhlu, ta chihin tuhun Nyoo cha cacahan ra tuhun chihin ñáyivi. Vatyí ña yuhvi ca ra cha cucúvi ra.

¹² Yucuan chaha cusii cuñi nyoho cha iyó ndo andivi. Soco jndahvi nyoho ñu iyó siqui ñuhu ñayivi ta nu tyañuhu! Vatyí cuihna canacava ra nya andivi ta nyacua nya siqui ñuhu ñayivi nu nyicú ndo. Ta xaan xaan ra vatyí chitó ra vatyí suhva ri ca quivi ra nyaá.

¹³ Ta cha nyehe coo cahnu cuan vatyí nacava ti nu ñuhu ñayivi, chica nyicon ti chi ñaha cha sacacu sehe cuan.

¹⁴ Soco ñaha cuan ñihí ña uvi tahan ndichin nahnu tasu, tacuhva cuví ndava ña ta cono ña chi coo cuan nyacua nya ñuhu ityi cuan. Ta yucuan cuví nu cuñihi ña cha cachi ña chichi cha uñi cuiya sisava.

¹⁵ Ta coo cuan tuchí ti ndutya chihin yuhu ti, vatyí cono noo yuvi cahnu, vatyí satyañi chi ñaha cuan.

¹⁶ Soco ñuhu ñayivi tyinyee chi ña, vatyí ndata chi ta quihvi yuvi cahnu cha tuchí coo cahnu cuan chihin yuhu ti.

¹⁷ Ta cha cuenda cha ñi cuví chasaha ti chi ña, cuahan ti cua cañi tahan ti chihin ñáyivi vachi tata ña, ñu cha quichahá tuhun cahán Nyoo, ñu nyicón cha ndicha cha cahán ra Jesucristo chihin cha nñi iñi ñu.

13

Nu nyehe ra Juan uvi quití quiñi caa

¹ Chicuinanyají nu ñiti yuhu tyañuhu cuan. Ta nyehe quitá noo quití quiñi xaan caa nuu tyañuhu. Ta nyaá ucha xiñi ti, ta uchi ndiqui ti. Ta tahan tahan ndiqui ti yihí noo corona. Ta xiñi ti nyaá noo tuhun cha cahán ña vaha siqui Nyoo.

² Quití quiñi caa ihya caá ti tari caá noo cuiñi. Ta tari caá chaha yihí caá chaha ti. Ta yuhu ti tari caá yuhu ndicaha caá. Ta coo cahnu cuan chaha ti ityi chi quití quiñi caa cha cunyaa ti nu tyayu ti. Ta chaha ti ityi chi ti cha cunyaca ñaha ti chi ñáyivi.

³ Ta noo xiñi quití quiñi caa cuan tari maa cha nyaá noo nu cahvi cahnu. Soco nu cahvi cuan nduvaha. Ta iyo xaan cuñi tandihi ñáyivi iyó siqui ñuhu ñayivi. Ta nanyicón ñu chi quití quiñi caa cuan.

⁴ Ta sacahnú tucu ñu chi coo cahnu cuan, vatyí chaha ti ityi chi quití quiñi caa cuan. Ta sacahnú tucu ñu chi quití quiñi caa cuan, ta catyí ñu:

—¿Yóo cha cuví chi tari cuví chi quití quiñi caa ihya? ¿Ta yóo cha cuví cañi tahan chihin ti? —catyí ñu.

⁵ Ta ñihí tucu quití quiñi caa cuan ityi vatyí cahan ña vaha ti ta cahan quiñi caa ti siqui Nyoo. Ta cua cunyaca ñaha ti chichi cha uvi xico uvi yoo.

⁶ Ta tyicuan caa sacuvi ti. Cahán ti siqui Nyoo. Ta cahán ña vaha ti siqui nu nyaá Nyoo. Ta cahán ti chi ñu nyicú andivi.

7 Ta chicoq tucu ityi chi ti cha sacoo ti cuatyí siqui ñu cuenda Nyoo nyacua nya cuví chasaha ti chi ñu. Ta chicoq ityi chi ti siqui ñáyivi ndihi ri tata, ñáyivi siin siin sahan cahan, ñáyivi tandihi ri ñuu nyihi, tandihi ri ñuu nahnu,

8 tandihi ñu cha ma ñihi ñáyivi chaa coo chihin ra cuví Mbee Luhlu, ra cha chihí. Ma ñihi ñu vatyí nyata ni cumañi chinq ñuhu ñáyivi ta ñahri sivi ñu nyaá nu libru ra. Tandihí ñu cuan cusacahnu ñu chí quiti quiñi caa cuan.

9 Ta ñu cutuñi iñi, na quichaha ñu tuhun ihya:

10 Ñu cunyaca vehe caa chi inga ñu, suri cuhun tucu maa ñu. Ta ñu cha cachahñi chihin cha xaan, suri chihin cuan cucúvi tucu maa ñu. Yucuan chaha cuñi xaan chí cha cunyea xaan iñi ñu cuenda Nyoo. Ta cuñi chí cha chino iñi ñu chí ra.

11 Yahá cuan ta nyehí inga quiti quiñi caa. Quitá ti chichi ñuhú. Quiti ihya nyaá uvi ndiqui ti cha tari caá ndiqui mbee luhlu. Soco tari cahán noo coo xaan vavaha cahán ti.

12 Ta nyacá ñaha ti tari nyacá ñaha quiti quiñi caa cha xihna ri cuan. Suri chihin nuu quiti cha xihna ri cuan nyacá ñaha ti. Ta tyiyuhu ti chí ñuhu ñáyivi ta ñu iyó siqui na sacahnu ñu chí quiti quiñi caa cha xihna ri cuan, quiti cha nduvahá nu cahvi cahnu cha chinyaa chí ti.

13 Ta cuaha xaan milagru sacuví ti. Nyacua cuví sanacoyo ti ñuhú cayú ityi andivi chihin nuu ñáyivi.

14 Ta sandaví ñaha ti chí ñáyivi iyó siqui ñuhu ñáyivi chihin seña cha cuví sacuvi ti chihin nuu quiti quiñi caa cha xihna ri cuan. Ta tachí ti nachino noo xiñahñu quiti quiñi caa cha tahnya cahvi chihin mityi, soco ña chihí ti.

15 Ta quiti quiñi caa cu uvi cuan chicoq ityi chi ti cha cuhva ti cha conyito xiñahñu quiti quiñi caa cha xihna ri cuan, vatyí xiñahñu cuan cuví cahan. Ta tachí xiñahñu cuan nacúvi tandihí ñáyivi ña cuñi sacahnu chí chí.

16 Ta siin ri catyí ti vatyí na cunyaa noo tuñi chí tandihí ñáyivi, tandihí ñu nyihi, ñu chahnu, ñu tyayii, ñu ndahvi, ñu yori chitoho, ta ñu iyó chitoho. Ta cucunyaa tuñi cuan ndaha chiyo vaha ñu o tyaan ñu.

17 Ta yori maa cuví sata ta xico tatu ñahri tuñi cuan nyaá chí ñu. O tatu ñahri sivi ti, o número sivi ti nyaá chí ñu.

18 Tuhun ihya cuñi xaan chí cha chiñi tuñi. Ñu cutuñi iñi, na saha ñu cuenda número quiti quiñi caa cuan. Vatyí número noo rayii cuví. Ta número ra cuan ican cuví iñu cientu uñi xico iñu.

14

Nu sacahnú cientu uvi xico cumi mil ñáyivi chí Nyoo chihin cha chitá ñu

1 Yahá cuan ta nyehí chí ra cuví Mbee Luhlu, nanyaá ra nu yucu Sión. Ta chihin ra tayucú cientu uvi xico cumi mil ñáyivi cha nyaá sivi ra tyaan ta sivi Sutu ra.

2 Tyicuan ta chiñi noo cha cayu cha quichi ityi andivi, tari cayu cuaha yuvi nahnu. Ta tari cahán savi cha ñihi xaan, o tari noo ndusu cha cuaha xaan ra casacuacú arpa.

3 Ta cachitá ñu noo yaa chaa nuu tyayu Nyoo, ta nuu ndi cumi cha nyitó cuan, ta nuu tandihí ra cha vaha chahnu cuan. Ta yori cuví cutuhva yaa cuan, in ri maa cientu uvi xico cumi mil ñu cha cacú añima siqui ñuhu ñáyivi.

4 Ican ñu ihya cuví ñu cha ña chicoq cuatyí chihin inga rayii ta ni ri rayii chihin inga ñusihí, vatyí ii ndoo ñu, ta nyicón ñu chí ra cuví Mbee Luhlu tandihí ri ityi nu cuahan ra. Cacú añima ñu ta cuví ñu ñu xihna ca chahá cuenda ñu chí ñu chí Nyoo ta chí ra cuví Mbee Luhlu.

⁵ Yori cuví catyi vatyi cuendu ñu, vatyi ni noo cuendu ña tuhvá ñu cahan. Yucuan chaha ñahri cuatyí ñu nuu Nyoo.

Tuhun cha sacoto uñi tahan ángel

⁶ Tyicuan ta nyehi inga ángel cuahan ndava ra andivi. Ta nyisó ra tuhun Nyoo cha ma ndihi ca maa, ta ican tuhun ihya cuví cha sacacú ra Cristo añima yo, Vatyi cusacoto ra tuhun ihya chi ñáyivi iyó siqui ñuhu ñayivi, ñáyivi ndihi ri ñuu nahnu, ta ndihi ri ñuu nyihi, ta ñáyivi ndihi ri tata, ta ñáyivi siin siin sahan cahan.

⁷ Ta ñihi xaan cahan ra ta catyí ra:

—Na yuhvi ndo chi Nyoo, ta sacahnu ndo chi ra. Vatyi cha chaq cuhva cha cua cutuñi chi ñáyivi. Sacahnu ndo chi ra savaha andivi ta ñuhu ñayivi, ta tyañuhu ta ndohyo ndutya.

⁸ Tyicuan ta cuahan inga ángel cuan chata ra, ta catyí ra:

—Cha canacava ñuu Babilonia cahnú vityin, cha tani chi. Vatyi ñu iyó ñuu cuan sañaha ñu chi inga ñáyivi iyó siqui ñuhu ñayivi cha quiñi caa tari sacuvi maa ñu. Tari quiñi cha sacuiñi ñu chi ñu chihin vinu ña vaha cuví cuan.

⁹ Ta nacahan ángel cu uñi chihin cha ñihi ndusu ra ta catyí ra:

—Tatu nya noo ñu sacahnú ñu chi quiñi quiñi caa cuan ta chi xiñahñu ti, o chahá ñu chi ñu cha cunyaa tuñi ti tyaan ñu, o ndaha ñu,

¹⁰ cunyehe xaan ñu tindoho vatyi cutyihí Nyoo chi ñu nu ñuhu, ta nu azufre tari cha cusacoho Nyoo noo vinu xaan chi ñu. Ta chihin nuu ángel ta chihin nuu ra cuví Mbee Luhlu cucuvi cuan.

¹¹ Ta ñuhma cha quitá nu nyehé ñu tindoho cuan tyicuan ri maa cuquita chi. Ta ma nyitatu maa ñu ndiyaca ta ñiyaca nu cohon ñu yucuan, vatyi sacahnú ñu chi quiñi quiñi caa cuan ta chi xiñahñu ti, o chahá ñu cha cunyaa tuñi siñi ti chi ñu.

¹² Yucuan chaha ñu yihí cuenda Nyoo, ñu quichahá tuhun cahan ra, ñi iñi ñu chinó iñi ñu chi ra Jesús ta cuñi chi cha cunyehe xaan iñi ñu cha nyehe ñu tindoho sacuvi inga ñáyivi.

¹³ Tyicuan ta chiñi noo ndusu cha quichí ityi andivi, ta catyí chi chii tyehe caa:

—Tya tuhun ihya: “Vityin ta ityi nuu ca, si xaan cucuvi chi ñu chihí ta chinó iñi ñu chi Sutu Mañi yo.” Ndicha, catyí Tatyí li Nyoo vatyi cunyitatu ñu chihin tyiño sahá ñu. Ta ñi ri cahun cha vaha cha sacuvi ñu chihin ñu.

Nu cutachi tuñi Nyoo chi ñáyivi

¹⁴ Tyicuan ta nanyehi ta nyehi noo vico cuichin. Ta siqui vico cuan nyaá noo rayi cha ndicha cuii maa cha quichí nya gloria. Ta yihí noo corona xuhun cuan xiñi ra. Ta yihí ndaha ra noo mityi cutya ta xaan.

¹⁵ Ta quitá nonga ángel chichi vehe ñuhu ta chaa canachaa ra chi ra nyaá siqui vico cuan. Ta catyí ra:

—Vityin saha tyiñon chihin mityun, ta na satacon cosecha cha iyó siqui ñuhu ñayivi. Vatyi cha chaq cuhva, ta cha iyó siqui ñuhu ñayivi cha chityí chi —catyí ra.

¹⁶ Tyicuan ta ra cha nyaá siqui vico cuan sayaha ra mityi ra siqui ñuhu ñayivi, ta nasataca ra cha iyó nuu chi.

¹⁷ Tyicuan ta inga tucu ángel quitá chichi vehe ñuhu cha nyaá andivi. Ta nyisó tucu maa ra noo mityi cutya cha xaan vavaha.

¹⁸ Ta nu nyaá arta quitá tucu nonga ángel cha iyó ityi chi cha cunyaca ñaha chi ñuhu cha cayú. Ta canachaa ra ta cana ra chi ra cha nyisó mityi cutya cha xaan cuan. Ta catyí ra chi ra:

—Saha tyiñon chihin mityi xaan cha nyisón chiña, ta na satacon vatu tichaha ndivi cha iyó siqui ñuhu ñayivi, vatyí cha chityí —catyí ra.

¹⁹ Ta ángel cuan sayaha ra mityi ra siqui ñuhu ñayivi ta chahnya ra tichaha ndivi cha iyó siqui ñuhu ñayivi. Ta tyihí ra noo nu tyihi ra vatyí cucuhñi ra ta quita ndutya chí. Ta cha tyehe caa cuñí chi catyí cha cutachi tuñi Nyoo chí ñayivi.

²⁰ Ityi chata ñuu cachahñi ra tichaha ndivi cuan, ta cuñí chi catyi vatyí cachihí cuaha xaan ñayivi, ta nu cuví cuan, cama xaan cama xaan niñi ñu chati. Ta chaa chí nya nu sucun nu nyaá frenu yuhu caballu ta tari cuhva noo uñi cientu kilómetro chinó niñi cuan.

15

Nu quitá ángel chihin ucha ca tahan tindoho cha cunyehe ñayivi nu ndihi tuhun

¹ Nyehí nonga seña cahnu andivi, ta yuhvi xain cuví, vatyí nyehí ucha tahan ángel chihin ndi ucha tindoho. Chihin ihya cuví nu ndihi tindoho vatyí cundihi cha cuxaan Nyoo chihin ñayivi cha ña quichahá ñu tuhun cahán ra.

² Ta nyehe tiqi noo cha tari caa tyañuhu, xiño tari caá ino, nasacá chi chihin ñuhu cha cayú. Ta ñu cha yaha cuví chasaha chí quití quiñi caa cuan ta chí xiñahñu ti, ñu cuví chasaha cha ma cunyaa número sivi ti cuan chí ñu, tandihí ñu tayucú ñu yuhu tyañuhu cha xiño cuan. Ta ndahá ñu arpa, cha chahá Nyoo chí ñu.

³ Ta chitá ñu yaa ra Moisés, ra sacuví tyiño nuu Nyoo, ta yaa ra cuví Mbee Luhlu. Ta tyehe caa catyí ñu:

Cahnu ta iyo xaan caá tandihí maa cha sacuvún.

Nyoo, Sutu ndi, iyó tandihí tunyee iñi chuun.

Ndoo xaan ta ndicha xaan ityun.

Yoho Rey cuvún cuenda tandihí ñayivi iyó siqui ñuhu ñayivi.

⁴ ¿Yóo cha ma yuhvi chuun, yoho Sutu Mañi nyuhu?

¿Yóo cha ma sacahnu chuun?

Vatyí noo tuhun ri maun cuví ra ii.

Ta cuquichi coyo ñayivi tandihí ñuu, ta cusacahnu ñu chuun.

Vatyí cha nyehe ñu cha vaha cha sacuvún, catyí ñu chitá cuan.

⁵ Cha yaha tuhun ihya ta nanyehí nuña yuvehe ñuhu nya andivi nu cumi vaha ñu tabla cha nyaá ley.

⁶ Ta chichi vehe ñuhu cuan quitá coyo ndi ucha ángel cha canyisó ndi ucha tindoho cuan. Ta cañihnoó ra sahma finu, cuichin ta xiño. Ta cayihí ra sincho xuhun cuaan ta nya pechu ra chitahan.

⁷ Tyicuan ta noo cha nyitó cuan, chahá cuan noo noo copa xuhun cuaan chí ndi ucha tahan ángel cuan. Ta chichi copa cuan tyitu maa yihí cha xaan Nyoo cha cutachi tuñi ra chí ñayivi. Ta ican ra iyó ra tyicuan ri maa.

⁸ Ta chichi vehe ñuhu cuan chitú maa chihin ñuhma cha cuenda cha cahnu xaan cuví Nyoo ta cha cuenda tunyee iñi iyó chí ra. Ta yori maa cuví quihvi chichi vehe ñuhu cuan cha niri ca cha cumañi ndihi ndi ucha tindoho cha nyisó ndi ucha tahan ángel cuan.

16

Copa cha yihí tindoho cha cua saquichi ndi ucha tahan ángel cuan

¹ Tyicuan ta chiñi noo ndusu ñihi cha quitá vehe ñuhu nu nyaá Nyoo. Ta catyí chi chi ndi ucha ángel cuan:

—Cuahan ndo cua coyo ndo cha ñohó chichi copa chiña siqui ñáyivi iyó siqui ñuhu ñáyivi, vatyí Nyoo cutachi tuñi ra chi ñu —catyí ndusu cuan.

² Ángel cha xihna ri cuan chahan ra ta coyo ra cha ñohó chichi copa cuan siqui ñáyivi cha nyaá tuñi quitá quiñi caa cuan chi, ñu cha sacahnú xiñahñu ti. Ta quitá noo nu cahvi xaan chi ñu, ta uhvi xaan.

³ Ta ángel cu uvi cuan coyo ra cha yihí chichi copa ra nu tyañuhu. Ta ndutya tyañuhu cuan nanduví ñiñi tari ñiñi noo ndiyi, ta tandihí cha nyitó chichi tyañuhu cuan cachihí.

⁴ Ta ángel cu uñi cuan coyo ra cha yihí chichi copa ra siqui yuvi nahnu ta siqui ndohyo ndutya ta cananduví chi ñiñi.

⁵ Tyicuan ta chiñi cha cahán ángel cuenda ndutya tyehe caa:

—Sutu Mañi yuhu, yoho cuvún noo ra vaha vatyí tachi tuñun chi ñáyivi tyehe caa, Sutu Mañi yuhu, Nyoo ii cuvún ta iyón vityin ta nu quichaha tandihí.

⁶ Vatyí maa ñu cachati ñu ñiñi ñáyivi cuendon ta ñiñi ra cacuví profeta cuendon. Ta vityin yoho tari cha cunasacohun ñiñi chi ñu vatyí tyicuan caa tahan chi chi ñu —catyí ángel cuan.

⁷ Ta chiñi tiqui vatyí cahan noo cha cahán ityi nu nyaá arta Nyoo tyehe caa:

—Ndicha, Sutu Mañi yuhu Nyoo, iyó tandihí tunyee iñi chuun. Vityin cha yaha tachi tuñun chi ñáyivi chihin cha ndicha ta chihin cha ndaa —catyí cuan.

⁸ Ta ángel cu cumi cuan coyo ra cha yihí chichi copa ra nu ñanyii. Ta chicoo ityi chi ñanyii cuan vatyí cahmi chi chi ñáyivi chihin ñuhu chi.

⁹ Ta tandihí ñu, quiñi xaan chahmí ñanyii chi ñu. Soco ña canasama ñu cuhva iyó ñu, ni ña casacahnú ñu chi Nyoo. Ta cahan ña vaha ñu siqui Nyoo ra cuví sanyehe tindoho chi ñu tyehe caa.

¹⁰ Ta ángel cu ohon cuan coyo ra cha yihí chichi copa ra siqui tyayu quitá quiñi caa cuan. Ta nduñaa ri nu nyacá ñaha ti. Ta ñáyivi cuenda ti, nyacaa nacachi yihí ñu yaa ñu cha cuenda cha nyehé xaan ñu cha uhvi.

¹¹ Soco ni tyicuan caa ta ña sandihí ñu cha sacuví ñu cha ña vaha. Ta cahan ña vaha ñu siqui Nyoo ra nyaá andivi cha cuenda cha uhvi chi ñu ta cha cuenda nu cahvi chi ñu.

¹² Ta ángel cu iñu cuan coyo ra cha yihí chichi copa ra siqui yuvi cahnu Eufrates. Ta yuvi cuan na ityi chi tacuhva vatyí nuña noo ityi cha yaha ra cacuví rey cha vachi coyo ityi nu caña ñanyii.

¹³ Tyicuan ta nyehí cha quitá yuhu quitá quiñi caa cuan ta yuhu coo cahnu cuan ta yuhu ra cuví profeta cuendu. Vatyí caquitá coyo uñi tahan tatyí ña vaha yuhu ra cuan. Tari caá sahva caá tatyí ña vaha cuan.

¹⁴ Ican ihya cuví tatyí cuihna cha casacuví milagru nahnu. Ta quitá coyo chi vatyí sandu ñn ri chi tandihí rey cha iyó siqui ñuhu ñáyivi, vatyí cacañi tahan ra quivi cusañaha Nyoo tyi iyó tandihí tunyee iñi chi ra.

¹⁵ Ta catyí Nyoo:

—Nyehe ndo vatyí yuhu cha vachi tari noo ra suhu. Vatyí sana ri iñi ndo ta quihvi ra suhu vehe ndo. Si xaan cucuví chi ñáyivi nyatú tuhva ri quivi

quichi. Ta vii cumí ñu sahma ñu (o cuñí chi catyí añima ñu) tacuhva cha ma cuvityiyaa ñu nu cua quichi, ta ma cucahan nuu ñu, catyí Nyoo.

¹⁶ Ta cundu ñin ri ra cacuví rey nu nañí chi chihin sahan hebreo Ar-magedón.

¹⁷ Tyicuan ta ángel cu ucha cuan coyo ra cha yihí chichi copa ra nu tatyí, ta nya vehe ñuhu andívi nu nyaá Nyoo nu tyayu ra, quita noo ndusu cha xaan ta catyí chi:

—Cha cuví vityin —catyí ra.

¹⁸ Tyicuan ta vaa ri maa cuví ta cahán savi ta quihví tacha. Ta ñihi xaan taan siqui ñuhu ñayiví. Ta ndaha chicoo ñáyiví siqui ñuhu ñayiví, ta ña tuhva taan cha ñihi xaan tyicuan caa.

¹⁹ Ta nu taan cuan ndata ñuu cahnu cuan, uñi nu ndata. Ta tandihi ca ñuu siqui ñuhu ñayiví canacoyo. Ta Nyoo nichoñ iñi ra chi ñuu cahnu Babilonia cuan vatyí quiñi xaan sacuví ñu. Ta sanyehé xaan ra tindoho chi ñu vatyí cuxaan xaan ra chi ñu.

²⁰ Tandihí ñuhú cha iyó chichi tyañuhu ta tandihí yucu, ndihí cuanaa.

²¹ Ta nahnu xaan tucu savi yuu coon ityi andívi siqui ñáyiví. Ta vee xaan. Tari noo cha uvi xico kilu vee noo noo savi yuu cuan. Ta ñáyiví cañan ña vaha ñu siqui Nyoo cha cuenda tindoho savi yuu cuan, vatyí cuví chi noo tindoho cahnu xaan cha cuenda ñu.

17

Nu cua tachi tuñi Nyoo chi noo ñaha cata iñi

¹ Tyicuan ta chichi cha ucha tahan ángel cha cayihí ndaha ucha copa cuan, quichí noo ra nu nyaí, ta catyí ra chii:

—Ñaha tyi cusañahi chuun yoso caa cucutuñi chi ñaha cata iñi cahnu cha nyaá siqui tyañuhu.

² Vatyí ra cacuví rey siqui ñuhu ñayiví casacuví ra cha quiñi caa chihin ña, ta ñáyiví cha iyó siqui ñuhu ñáyiví, tiví xaan ñu chihin cha quiñi caa cha sacuví ña —catyí ra chii.

³ Tyicuan ta nyehí noo cha sañaha Tatyí Ii Nyoo chii, ta chinyaca ángel cuan chii chiqui ndi nu yori maa ñáyiví iyó, ta yucuan nyehí chi noo ñaha, yosó ña siqui noo quití cuaaha quiñi caa. Ta nyicú siví cha cahán ña vaha siqui Nyoo chí ti. Ta ucha tahan xiñi ti nyaá ta uchi ndiqui ti.

⁴ Ta ñaha cuan ñihno ña noo sahma tyacu nyaa ta tyacu cuaaha. Ta cuaaha xaan xuhun cuaan iñi chi ña, yuu tyaqui ta perla ñandihí. Ta yihí ndaha ña noo copa xuhun cuaan tyitú yihí chihin cha ña vaha ta cha quiñi caa cha sacuví ña.

⁵ Ta tyaan ña nyaá noo siví cha cuví noo tuhun xehe cha ña cutuñi iñi ñáyiví. Vatyí catyí chi: “Ícan ñaha sihi ihya cuví ñuu Babilonia cahnu, sihi tandihí ñu cha cata iñi ta tandihí cha ña vaha cha iyó siqui ñuhu ñayiví.”

⁶ Tyicuan ta tuví iñi vatyí ñaha cuan chiñí ña chihin cha chihí ña niñi ñu cuenda Nyoo, ta ñu cha cachihí cha cuenda cha cañan ñu tuhun ra Jesús. Ta cha nyehí cuan, iyo xaan cuñí.

⁷ Tyicuan ta catyí ángel cuan chii:

—¿Ñáá tuhun cha iyo xaan cuñín? Cua sacote chuun ñáá cha cuñí chi catyí tuhun xehe ñaha sihi ihya ta quití quiñi caa cha yosó ña, quití cha nyicú ucha xiñi ta uchi ndiqui.

⁸ Quiti quiñi caa cha nyehun cuan, cuví ti noo quiti cha chiyo ta vityin yori ca ti iyó. Soco cuquita ti chichi yavi cono xaan cha ñahri nu chitahan. Yucuan ñohó ti cha ni cumañi ca ndihi tuhun ti. Ta ñáyivi iyó siqui ñuhu ñáyivi iyo xaan cucuñi ñu na nanyehe ñu chi quiti quiñi caa cha chiyo tyicuan, soco vityin yori ca ti iyó, soco cuquichi ti inga chaha. Ñu cua nyehhe chi ti cuan, cuví ñu ñu cha ñahri sívi nyaá nu libru Nyoo nyata quívi chingo ñuhu ñáyivi. Ican libru cuan cucuyi yóo ñáyivi cuconyito tyicuan ri maa.

⁹ Ihya cuví noo cha cuñi chi nacoto ndo: Ndi ucha xiñi ti cuan cuñi chi catyí ucha tahan yucu cha nyaá ñaha cuan siqui.

¹⁰ Ta xiñi ti cuñi tucu chi catyí ucha tahan rey. Ta ohon tahan rey cuan cha yaha chinyaca ñaha ra. Ta rey cu iñu nyaca ñaha ra vityin. Ta ra cu ucha, cumañi ca cucunyaca ñaha ra. Ta quívi quichi ra nu ndihi, ña naha cucunyaca ñaha ra.

¹¹ Ta chichi cha ucha tahan rey cuan, cunanyita noo ra inga chaha, ta ican ra cucuvi ra rey cu uña. Ta ican tucu ra cuví quiti quiñi caa cha chiyo quívi cuan, ta vityin yori ca ti soco cunanyita ti inga chaha. Ta cha yaha cunyaca ñaha tucu ti, yucuan cuví nu cua ndihi tuhun ti.

¹² Ta ndi uchi tahan ndiqui cha nyehun cuan, cuñi chi catyí ndi uchi tahan rey cha cumañi ca cacunyaca ñaha. Soco cucoo ityi chi ra cha cunyaca ñaha ra noo ora, ñin ri chihin quiti quiñi caa cuan.

¹³ Ndi uchi tahan rey cuan ñin xaan ri cuhva cucaca xiñi ra. Ta cunacuhva ra tunyee iñi ra chi quiti quiñi caa cuan. Ta tandihi ityi cha iyó chi ra cunacuhva ra chi ti.

¹⁴ Ta cucacañi tahan ra chihin ra cuví Mbee Luhlu. Soco ra cuví Mbee Luhlu cuan, cucuvi chasaha ra chi ra. Vatyí ican ra cuví nuu chi tandihi ra nyaca ñaha. Ta cuví tucu ra nuu chi tandihi ra cacuví rey. Ta ñu nyicú chihin ra, Nyoo nacana chi ñu ta nacachi ra chi ñu. Ta ñi xaan iñi ñu nyicón ñu chi ra.

¹⁵ Ta catyí tucu ángel cuan chii ñandihí:

—Tandihí tyañuhu cha nyehun cuan, cha nyaá ñaha cata iñi cuan siqui, ican cuví ñáyivi tandihí ñuu nyíhi ta tandihí ñuu nahnu, ñu siin siin sahan cahan.

¹⁶ Ta ndi uchi ndiqui cha nyehun xiñi quiti quiñi caa cuan cha cuví uchi tahan rey cuan, ican ra cuan cuasatasi iñi chi ñaha cata iñi cuan. Ta cusandoo ra chi ña cha notuhun ri maa ña. Ta cusanduvityiyaa ra chi ña. Ta cucachi ra coño ñuhu ña. Ta cutyíhi ra chi ña nu cayú ñuhu.

¹⁷ Vatyí Nyoo sana ndaha ra añima rey cuan vatyí casacuví ra cuhva cuñi maa ra. Vatyí ñin ri cuhva cucaca xiñi ra, ta cucuhva ra ityi chi quiti quiñi caa cuan cha cunyaca ñaha ti tari rey nyacua nya chino cava tuhun cahán maa Nyoo.

¹⁸ Ñaha síhi cha nyehun cuan, ican cuví ñuu cahnu cha nyaca ñaha chi tandihí ra cuví rey siqui ñuhu ñáyivi.

18

Nu cua tiví ñuu Babilonia

¹ Cha yaha tuhun ihya ta nyehi inga ángel cha vachi noo ityi andivi ta iyó xaan ityi chi ra. Ta ñuhu ñáyivi ndichin xaan nduvi chihin cha ndichin ra.

² Ta ñihi xaan ndusu ra ta canachaa ra, ta catyí ra:

—Cha yaha tuhun ñuu Babilonia cahnu cuan. Ta cha nanduví chi nu iyó ra ña vaha. Vehe tandihí nuu tatyí ña vaha cha nanduví. Ta taca saa ña vaha nanduví ñandihí.

³ Vatyí tandihí ñáyiví tiví ñu cha cuenda cuatyí sacuví ñuu Babilonia cuan. Ta ra cacuví rey, ra nyacá ñaha síqui ñuhu ñayiví tari cha cachiyó ra chihin ñaha cuan cha cuví ñuu Babilonia. Casacuví ra cuatyí chihin ña. Ta ra cha cuahan cuanaxico ñuu Babilonia cuan candutyayí ra chihin cha xico ra chí ñu ñuu cuan vatyí tandihí cuhva ta sanaa ñu xuhun ñu chihin cha cata íñi ñu.

⁴ Tyicuan ta chiñí nonga ndusu ityí andiví. Ta catyí chí:

—Quíta ndo ñuu chiña, nyoho cha cuví ndo ñáyiví chíi, tacuhva cha ma cutahan ndo sacuví ndo cuatyí chihin ñu chiña, tacuhva ma cutahan ndo ndoho ndo tari maa ñu.

⁵ Vatyí cha caá ticuítí cuatyí ñu ñuu cuan, nyacua cha chaá chi nu nyaá Nyoo. Ta Nyoo cha nichohon íñi ra cha ña vaha sacuví ñu.

⁶ Cuhva ndo chí ñu suri maa cha chahá ñu chí inga ñáyiví. Ta uvi ca chaha sananyehe ndo tindoho síqui cha sacuví ñu. Cuhva ndo noo tindoho cunyehe ñu cha ñihí uvi ca chaha ícan saha cha chahá maa ñu chí inga ñáyiví.

⁷ Yucuan chaha cuhva ndo cha iyo xaan tahan ñu chihin ta sanyehe xaan ndo tindoho chí ñu tari cuhva cha sacahnú xaan ñu chí ñu ta cusí xaan íñi ñu. Vatyí catyí ñuu cuan chichí añima chí: “Ihya nyai tari noo reina. Ñima ñaha chíhí yí cuví, ta ni ma cunyehe tindoho”, chicá íñi chí.

⁸ Yucuan chaha chichí cha noo ri quiví cuquichí tindoho síqui ñuu cuan, cuquichí tuhun chíhí, cuquichí tucuihya íñi ta coo tama ñuu cuan, ta cucayu chí chihin ñuhú. Vatyí iyó xaan tunyee íñi chí Nyoo Sutu yo ta cutachi tuñi ra chí ñu ñuu cuan.

⁹ Ra cacuví rey síqui ñuhu ñayiví ihya tari cha cachiyó ra chihin ñaha cha cuví ñuu cuan, cuacu chaa ra, cunducuihya xaan íñi ra na cananyehe ra ñuhma cha cayú ñuu cuan.

¹⁰ Ta nya sava ri cucuitayucu ra cha cuenda cha cayuhví ra tindoho cuan. Ta cucatyí ra:

—ñDahví yoho, ñuu cahnu Babilonia, ñuu cha chíyó xaan tunyee íñi chíi! Vatyí noo tuhun cuhva ta chaá tindoho nyehún —cucacatyí ra.

¹¹ Ta ra cha canaxicó ñáá ndihí cha canaxicó, suri cucuacu chaa ra ta cucanducuihya íñi ra cha cuenda ñuu cuan. Vatyí yorí ca sata cha canaxicó ra.

¹² Vatyí xicó ra xuhun cuan, xuhun cuichin, yuu tyaquí, perla, sahma lino finu, sahma seda, ta sahma tyacu nyaa, ta tyacu cuaha. Ta nyisó tucu ra tandihí nuu vitu cha vixi chahán ta ñáá ndihí cha chíño chihin noho landa, vitu tyaquí, ta caa cha cuví bronce, ta caa cha cuví hierro, ta yuu cha cuví mármol.

¹³ Ta nyisó tucu ra canela, ñáá ndihí ca cha vixi chahán, tari cutu, mirra, perfume, vinu, acetye, yutyí paan finu, ta trigo. Ta suri nyisó tucu ra quítí cuenda carga, ta mbee, caballu, carru. Ta nyacua nya añima ndahví cha cuví musu ra ta caxico ra.

¹⁴ Ta catyí ra chí ñáyiví ñuu cuan tyehe caa:

—Ñahri ca cha tyaquí cha chíyó chuun, cha tahán xaan íñun. Ta cha cuachiyó tandihí cha tyayíun. Ta ma cunañihí ca maun tandihí cuan —catyí ra.

¹⁵ Ra cha caxicó tandihí ihya, candutyayí ra cha cuenda cha satá ñu ñuu cuan cha xicó ra. Cañi cucuitayucu ra chihin cha cayuhví ra cha cunyehe ñu cuan tindoho. Ta cucuacu chaa ra ta cunducuihya íñi ra.

¹⁶ Ta cucatyí ra:

—¡Ndahvi ñuu cahnu cuan! Cuví chi tari noo ñaha sihi cha ñihnó sahma lino finu, sahma tyacu nyaa ta tyacu cuaha. Ta iyo yihí ña xuhun cuaan, ta yuu tyaquí ta perla.

¹⁷ ¡Vatyi noo tuhun ri cuhva ta ndihí cha tyayíi xaan cuan! —cucatyí ra caxico cuan.

Ta tandihí ra cuví capitán cuenda barcu, chihin ñu cañoho chichi, tandihí ñu casahá tyiño nu tyañuhu, nya sava candoó ñu.

¹⁸ Ta cha cananyehé ñu ñuhma cha cayú ñuu cuan, canachaa ñu, ta catyí ñu:

—¿Ñáa nonga ñuu chiyó tari ñuu cahnu ihya? Ñahri ca —cucatyí ñu.

¹⁹ Ta tyicu ñu niyaca xiñi ñu, ta chacu chaa ñu. Ta cuihya iñi ñu, ta canachaa ñu ta catyí ñu:

—¡Ndahvi nduví yo cha cuanaa ñuu cuan! Vatyi chihin cha tyayíi ñuu cahnu cuan ndutyayíi tandihí yo, ñu chicá noo nu tyañuhu chihin barcu. ¡Ta vityin noo tuhun cuhva luhlu ri ta cuanaa chi! —catyí ñu.

²⁰ Soco cusíi cuñi nyoho cha cuenda ñuu cuan, nyoho cha iyó andiví, nyoho ñu yihí cuenda Nyoo ta nyoho ra cachicá tyiño ra Cristo ta nyoho ra cacuví profeta Nyoo. Cusíi cuñi ndo vatyi cha cuenda ndo ta tachí tuñi Nyoo chi ñu cuan, ta cha cuenda cha ña vaha cha sacuví ñu chihin ndo.

²¹ Tyicuan ta noo ángel cha iyó xaan tunyee iñi chi, nacoñehé ra noo yuu molino cahnu xaan ta tuchi ra cuahan nu tyañuhu, ta catyí ra:

—Suri tyehe caa cundihí tuhun ñuu Babilonia cahnu, Ta ni inga ca chaha ta ma nyehe ca ndo chi ñu.

²² Ta ma cuiñi con yaa ityi chichi ñuu cuan, vatyi yori ca cusacuacu arpa, ta ni flauta, ta ni trompeta, ta ma tiví ca ñu. Ta ni ma coo ca ra casahá tyiño ñáa ndihí tyiño. Ta ni ma tyacu ca cha cayu molino.

²³ Ta ni nonga ñuhu tima, ta ma cayu ca chichi ñuu cuan. Ta ni nonga chaha ta ma cuiñi yo ndusu ñu cha iyó ñu vico tandaha. Vasi ra canaxico cha chiyó ñuu cuan, ican ra cuví ra cahnu ca cuvi nuu ñáyiví iyó siqui ñuhu ñáyiví. Nyoho ñu Babilonia, sandaví ñaha xaan ndo chi tandihí ñáyiví iyó siqui ñuhu ñáyiví chihin cha sataíi ndo.

²⁴ Vatyi cuaha xaan niñi ra cacuví profeta Nyoo iñi chichi ñuu cuan vatyi chahñi ñu chi ra. Ta iñi tucu niñi ñu cuenda Nyoo, ta niñi tandihí ñu cha cachahñi ñáyiví nicahnu ñuhu ñáyiví.

19

¹ Cha yahá cuan, ta chiñi noo ndusu cha cuaha vavaha ñáyiví nya andiví. Ta catyí ñu:

¡Cahnu xaan cuví Nyoo! Sutu Mañi yo, Nyoo cuví ra ra sacacu chi yo. Ta chi maa ra tahán chi cha sacahnu yo, tyi iyó xaan tunyee iñi chi ra.

² Vatyi vaha sacutuñi ra chihin cha ndaa ta chihin cha ndicha.

Tachí tuñi ra chi ñaha cata iñi cuan.

Vatyi sativí xaan ña chi ñáyiví iyó siqui ñuhu ñáyiví chihin cha quiñi caa cha sacuví ña chihin ñu.

Ta yucuan chaha tachí tuñi ra chi ña, ta cha cuenda cha chahñi ña chi ñu sacuví tyiño nuu ra.

³ Ta quichaha catyí ñu inga chaha:

—¡Cahnu xaan cuví Nyoo! Ñuhma cha cayú ña, ma cucuita ca maa cha ndaa chi ityi siqui —catyí ñu.

⁴ Ta ndi oco cumi ra cha vaha chahnu ta ndi cumi tahan cha nyitó cha nyicú nu nyaá tyayu Nyoo, cachicuiñi chiti ra nya nu ñuhú. Ta casacahnú ra chi Nyoo nu nyaá ra nu tyayu ra. Ta catyí ra:

—¡Na cuví chi tyicuan caa! ¡Cahnu xaan cuví Nyoo! —cacatyí ra.

⁵ Ta nu nyaá tyayu Nyoo, tyacu noo ndusu, ta catyí chi:

Sacahnú ndo chi Sutu yo Nyoo

Tandihí nyoho cha sacuví ndo tyiño nuu ra,

ta quichahá ndo chi ra, vasi nyihi ndo, o chahnu ndo.

Nu cua tandaha ra cuví Mbee Luhlu chihin ñáyivi chinó iñi chi ra

⁶ Ta chiñi tiqui noo ndusu tari cha cuaha vavaha ñáyivi cahán, tari ndusu nu cuaha xaan yuvi ndutya, ta tari cha ñihi xaan cahán savi. Ta catyí chi: ¡Cahnu xaan cuví Sutu yo Nyoo! Vatyí cha quichahá nyaca ñaha ra ta iyó tandihí tunyee iñi chi ra.

⁷ Na cusii cuñi yo ta na cutu yo chihin tusii iñi. Na sacahnú yo chi ra.

Vatyí cha chaq cuhva cha cua coo yo vico tandaha ra cuví Mbee Luhlu.

Ta yoó cuacuví yo tari noo ñasihí ra, cha nyatú tuhva ri yo quívi tandaha yo chihin ra.

⁸ Ta maa yo cucuihno yo sahma linu finu, ndii ta cuichin.

Vatyí sahma linu finu cuan cuñi chi catyí cha vaha cha sacuví ñáyivi cuenda ra.

⁹ Tyicuan ta quichaha catyí ángel cuan chi:

—Tyaa tuhun ihya nu tutu: “¡Sii xaan cuví chi ñu cha nyaá cuhun vico tandaha ra cuví Mbee Luhlu!”

Ta catyí tucu ra chii tyehe caa:

—Ican ihya cuví tuhun ndicha Nyoo —catyí ra chii.

¹⁰ Tyicuan ta chicuiñi chiti chaha ángel Nyoo cuan vatyí sacahni chi ra, soco catyí ra chii:

—Ma sacahnun chii, vatyí musu Nyoo cuví tucu yuhu tari yoho, ta tari tandihí ra yañi yo cha nyicón tuhun ndicha ra Jesucristo. Chi Nyoo tahan chi sacahnú yo —catyí ra chii.

Vatyí tuhun ndicha ra Jesús, ican cuví cha chahá cuhva chi ra cacuví profeta, ra cha cachahá cuenda tuhun cahán Nyoo chihin yo.

Nu sañahá chi cuenda ra cha yosó caballu cuichin

¹¹ Tyicuan ta nyehi tanuña andívi. Tyicuan ta tuví noo caballu cuichin. Ta ra yosó chi ti nañi ra Ra Ndicha Cha Nii Iñi Sacuví Tyiño Nuú Nyoo. Vatyí chihin cha ndaa sacutuñi ra chi ñáyivi, ta cañi tahan ra chihin cha ña vaha chihin cha ndaa.

¹² Xiño xaan chiti nuu ra tari cha cayú ñuhu. Ta cuaha xaan corona yihí xiñi ra. Ta nyaá noo sivi chi ra cha noo tuhun ri maa ra chitó ra ñáá sivi nyaá chi ra.

¹³ Ta ñihno ra noo sahma iñi niñi. Ta maa ra nañi ra Tuhun Cahán Nyoo.

¹⁴ Ta canyicón sindaro andívi chi ra, cañihno ra sahma linu finu, sahma cuichin ta ndii. Ta cayosó ra caballu cuichin.

¹⁵ Ta chichi yuhu ra nañi Tuhun Cahán Nyoo cuan, quitá noo mityi cha xaan ni nduvi chiyo yuhu, vatyí chihin tuhun cahán ra cusañicuehe ra ñáyivi iyó siqui ñuhu ñáyivi. Ta ñihi cunyaca ñaha ra chi ñu tari chihin noo yutun caa. Maa ra cutachi tuñi ra chi ñu tari noo ra cha sacunyihí tichaha ndívi chihin chaha ra. Ta cusacoho ra vinu uva chí ñu, ta ihya cuñi chi catyí tyi cuxaan

Nyoo chihin ñu ta cutachi tuñi ra chi ñu vatyí chaha xaan ñu tisihi chi Nyoo ra iyó tandihi tunyee iñi chii.

¹⁶ Ta nu sahna ra ta nu sihin ra cuan nyaá letra cha catyí tyehe caa: “Thya cuví Ra cuví nuu chi tandihi rey. Ta ican ra cuví nuu chi tandihi ra nyacá ñaha.”

¹⁷ Tyicuan ta nyehi chi nonga ángel nanyaá ra nu ñanyii. Ta chihin tandihi fuerza ra canachaa ra chi tandihi saa cha candavá ityi andivi, ta catyí ra chi ti:

—Ñaha ndo ta candu ñin ri ndo vatyí cuxiñi ndo cha chaha Nyoo cachi ndo.

¹⁸ Vatyí cachi ndo coño ra cacuví rey ta ra cuví nuu chi sindaro ta chi ra ndachan xaan saha chii. Ta cachi ndo coño caballu ta coño ñuhu ra cha cayosó chi ti. Cachi ndo coño tandihi ra, vasi ra yori chitoho o ra iyó chitoho, vasi ra nyihi o ra chahnu —catyí ra chi saa.

¹⁹ Tyicuan ta nyehi chi quití quiñi caa cuan ta chi ra cacuví rey cha iyó siqui ñuhu ñayivi chihin sindaro cuenda ra, vatyí candu ñin ri ra vatyí cacañi tahan ra chihin ra yosó caballu cuichin cuan ta chihin sindaro cuenda ra.

²⁰ Ta tñin ra chi quití quiñi caa cuan ñin ri chihin ra cuví profeta cuendu cuan, vatyí chihin nuu quití quiñi caa cuan ta sacuví ra cuendu cuan milagru, ta sandavi ñaha ra chi ñayivi cha chaha chi cunyaa tuñi quití quiñi caa cuan, ta chi ñu sacahnú chi xiñahñu ti. Ta nyitó nyitó ra ta tuchi ra yosó caballu cuichin chi ñanduvi ra nu ñuhu cha cayú chihin azufre.

²¹ Ta tandihi ca ñu cachihí ñu chihin mityi xaan cha quitá yuhu ra cha yosó caballu cuichin cuan. Ta tandihi maa saa, cachachí xaan ti coño ñu.

20

Nu sañahá chi cuenda noo mil cuiya

¹ Cha yaha tuhun cuan ta nyehi chi noo ángel vachi noó ityi andivi ta yihí ndaha ra ndaha ticu yuvehe yavi cono cuan. Ta yihí tucu ndaha ra noo cadena cahnu.

² Ángel ihya tñin ra chi coo cahnu cuan, quití cha cuví Coo Chahnu cuan, cha cuví cuihna. Ta chahñi ra chi ti chihin cadena noo mil cuiya.

³ Ta tuchi ra chi ti yavi cono cuan. Ta yucuan nacasi ra chi ti. Ta tyaa ra noo sellu yuvehe cuan tacuhva cha ma sandavi ñaha ca ti chi ñayivi iyó siqui ñuhu ñayivi, nyacua nya cha yaha noo mil cuiya. Ta cha yaha noo mil cuiya cuan ta cundachi tucu ti suhva ca quivi.

⁴ Yaha cuan ta nanyehi cuaha xaan tyayu tayucú. Ta nuu chi nyicú ñu cha chicoq ityi chi vatyí tachi tuñi ñu chi ñayivi. Ta nyehé tiqui añima ñu chahnya ñayivi xiñi cha cuenda cha cahñ ñu tuhun Nyoo cha chaha cuenda ra Jesús chi ñu. Ta maa ñu, ña sacahnú ñu chi quití quiñi caa cuan, ni chi xiñahñu ti, ni ña chaha ñu chi ñu cha cunyaa tuñi ti tyaan ñu, ni ndaha ñu. Nyehi vatyí ican ñu ihya, canandoto ñu ta chicunyaca ñaha ñu chihin ra Cristo noo mil cuiya.

⁵ Ican ñu ihya cuví cha nandoto cha xihna ca. Soco inga ityi ndiyí ña nandoto ñu nyacua nya cha yaha mil cuiya cuan.

⁶ jSi xaan cuñi ñu ii cuenda Nyoo, ñu cha tahán chi nandoto cha xihna ri! Ta ma cahun ñu tuhun chihí cu uvi nu cuví anyaya nu tachi tuñi Nyoo chi añima ña vaha. Vatyí cucuvi ñu sutu cha cuenda Nyoo ta cuenda ra Cristo. Ta cucunyaca ñaha ñu mil cuiya chihin ra.

⁷ Ta cha yaha mil cuiya cuan, tyicuan ta cundachi cuihna nu ñohó ra vehe caa.

⁸ Ta cuquita ra, ta cusandavi ñaha ra chi ñáyivi nicahnu siqui ñuhu ñayivi. Cuquita ra vatyí cusandavi ñaha ra chi ñáyivi Gog ta Magog, ñu xaan iñi chi Nyoo. Ta cusandu iin ri ra chi sindaro ñuu cuan vatyí cuhun ra cuatyí. Cuaha xaan ra, tari maa ñiti yuhu tyañuhu.

⁹ Tyicuan ta cuahan coyo ra nicacahnu siqui ñuhu ñayivi. Ta cachasi cutya ra nu iyó ñu cuenda Nyoo ñuu Jerusalén nu cuñi xaan Nyoo. Soco Nyoo cusaquichi ra ñuhu ityi andivi ta cucahmi chi chi tandihí sindaro cuan.

¹⁰ Ta cuihna cha sandaví ñaha chi ñu, cutuchi Nyoo chi ra chichi anyaya cahnu nu cayú ñuhu chihin azufre, nu tuchí tucu ra chi quití quiñi caa cuan ta chi ra cha cuví profeta cuendu. Ta yucuan cunyehe ra tindocho tyicuan ri maa ndiyaca ta ñiyaca.

Nu cua cutuñi chi ñáyivi nu tyayu cuichin nu nyaá Nyoo

¹¹ Tyicuan ta nyehí noo tyayu cuichin cahnu. Ta nyehí chi ra nyaá nuu tyayu cuan. Ta chihin nuu ra ta cuanaa ñuhu ñayivi ta andivi. Ta ñahri ca maa nu cucunyata chi.

¹² Ta nyehí chi tandihí ñu ndiyí, ñu chahnu ta ñu nyihi, tayucú ñu nuu Nyoo. Tyicuan ta canuñá libru cha nyaá tandihí cha sacuví ñu quivi chiyo ñu ñayivi. Ta nuña tucu inga libru cha nyaá sivi ñu cha cuconyito tyicuan ri maa chihin Nyoo. Ñu ndiyí cuan cuacutuñi chi ñu ñáa ndihí cha chinyacuvi ñu cha nyaá nu tandihí libru cuan.

¹³ Ta tyañuhu nacuhva cuenda chi chi ndiyí cha cumí chi. Ta tandihí nu nyicú ñu chihí nu nyacá ñaha Tuhun Chihi, nacuhva cuenda chi ndiyí cha cumí chi. Ta tandihí ñu cuatahan chi chi ñu yoso cuhva cha casacuví ñu.

¹⁴ Tyicuan ta cundihi Tuhun Chihi cuan ta ñahri ca nu cuacunyicu ñu chihi, vatyí cutuchi Nyoo chi nduvi tahan cuan chichi anyaya cahnu nu cayú ñuhu. Ta ican ihya cuví Tuhun Chihi Cu Uvi.

¹⁵ Ta yucuan tuchí ra chi ñu cha ñahri sivi nyaá nu libru cha cuenda ñáyivi cha cua conyito chihin Nyoo tyicuan ri maa.

21

Nu nyehe ra Juan andivi chaa ta ñuhu ñayivi chaa

¹ Yahá cuan ta nyehí noo andivi chaa ta noo ñuhu ñayivi chaa, vatyí andivi ta ñuhu ñayivi cha xihna ri cuanaa chi. Ta tyicuan caa tucu tyañuhu, cuanaa tucu cuan.

² Yuhu ra Juan nyehí ñuu ii Jerusalén chaa cha vachi noó ityi andivi nu nyaá Nyoo. Ta tyaqui xaan nduvijí chi tari noo ñaha cha cua tandaha chihin noo ra, tyicuan caa nduvijí chi.

³ Ta chiñí noo ndusu ñihi cha quitá ityi andivi, ta catyí chi:

—Nyehe ihya! Nyoo, iyó ra mahñu ñáyivi. Ta cua coo ra chihin ñu. Ta maa ñu cua cuví ñu ñuu ra. Ta cua cunyata ra chihin ñu. Ta cua cuví ra Nyoo cuenda ñu.

⁴ Ta Nyoo cunacuhva ra ndutya nuu ñu. Ta ma cúvi ca ñu. Ta ma cucuihya ca iñi ñu. Ma cuacu ca ñu vatyí ma nyehe ca ñu tindocho. Ta ma nyehe ca ñu cha uhvi. Vatyí tandihí cha chiyo, cha yahá tuhun —catyí chi.

⁵ Tyicuan ta Nyoo, ra cha nyaá nu tyayu cahnu, catyí ra:

—Nyehe. Sanduchají tandihí maa cha iyó.

Ta catyí tucu ra:

—Tyaa tuhun ihya, vatyí tuhun cahín ihya, ndicha. Ta cuví cunñi iñun vatyí tuhun cahín cuchino cava —catyí Nyoo chíi.

⁶Yahā cuan ta catyí tucu ra chii:

—Cha tandihí chinq cava vityin. Yuhu cuví ra xihna cui, ta yuhu cundoi nu ndihí tuhun. Náyiví cha ityi ndutya cha cuñí ñu tuhun yuhu, cucuhve ndutya cha chahá ñáyiví cha ma naa ca maa coho ñu, ta ñahri cutiyiahvi ñu.

⁷Ñu cha cuví chasaha chí ra ña vaha, cuñihí ñu tandihí ihya, tari noo cha cundoo chí ñu. Ta yuhu cucuví Nyoo cuenda ñu ta maa ñu cucuví ñu sehi.

⁸Soco ñáyiví cha yuhví xaan, ñu cha ña chinó iñi, ñu cha quiñi iyó, ñu cha chahñí ñáyiví, ñu iyó chihin rayii, ta ñima yii ñu cuví, o ra iyó chihin ñusihí ta ñima ñasihí ra cuví, ñu tasi, ñu casacahnú xitohyo, ta tandihí ñu cuendu, tandihí ñu cuan, tahán chí cahun ñu chichi anyaya cahnu nu cayú ñuhu chihin azufre, nu cuví Tuhun Chihí Cu Uvi, nu tachi tuñi Nyoo chí aña ña vaha.

Nu nyehe ra Juan yoso caa cucuví ñuu Jerusalén chaa

⁹Tycuan ta chiqhí noo ángel cha ucha tahan cuan, ra cha canyisó ndi ucha copa tytítú chihin ndi ucha tahan tñdoho cuan. Ta cahán ra chihin ta catyí ra:

—Ñaha, ta cusañahi chuun yóo ñu cuví ñu yihí cuenda ra Cristo, ñu cha cuví tari ñasihí ra, tyi ra cuví Mbee Luhlu cuví ra —catyí ra chii.

¹⁰Ta Tatyí Ii Nyoo chinyaca chii noo yucu cahnu ta sucun. Ta sañahā ra ñuu ii, ñuu Jerusalén cahnu cuan chii. Maa maa cuhva cha vachi noó ñuu cuan ityi andiví nu nyaá Nyoo, sañahā ra chii.

¹¹Xiño xaan ñuu cuan chihin cha tyaqui Nyoo. Xiño xaan tari caá noo yuu tyaqui, tari caá yuu jaspe, ta xiño tari ino.

¹²Nicachico ñuu cuan sucun xaan sama. Ta iyó uchi uvi tahan yuvehe. Ta noo ángel nanyaá tahan tahan yuvehe. Ta ndi uchi uvi tahan sívi tata ñáyiví Israel nyaá yuvehe cuan.

¹³Uñi tahan yuvehe cuan nyaá ityi nu caña ñanyii. Ta uñi tahan ityi norte. Ta uñi tahan ityi tyañuhu. Ta uñi tahan ityi nu quee ñanyii.

¹⁴Uchi uvi tahan yuu yihí nu sama ra nu cacú chaha chí. Ta nuu yuu cuan nyaá sívi ndi uchi uvi apóstol cuenda ra cuví Mbee Luhlu.

¹⁵Ta ángel cha cahán chihin cuan, yihí ndaha ra noo yutun xuhun cuan, vatyi chihin cuan cutyicuhva ra ñuhú ñuu cuan, ta yuvehe ta nu sama nicachico ñuu cuan.

¹⁶Cumí tahan tutun ñuu cuan nyaá. Ta inuu ri cuhva cha quehen ta cha cañi. Ta ángel cuan tyicuhvá ra ñuu cuan chihin yutun xuhun cuan cuan. Ta tyicuhvá ra, ta quitá uvi mil uvi cientu kilómetro. Ta inuu ri cha cañi ta cha sucun ta cha quehen.

¹⁷Tycuan ta tyicuhvá ra nu sama nicachico ñuu cuan. Ta quitá uñi xico cumí metru cha cocon, tari tyicuhvá ñáyiví, tycuan caa tyicuhvá ángel cuan.

¹⁸Chihin yuu jaspe samā yuhu ñuu cuan. Ta maa maa ri xuhun cuan cuví ñuu cuan. Tari caá noo ino cha ndi vavaha, tycuan caa.

¹⁹Ta yuu cha cuví cimientu cuan tandihí ri maa nuu yuu tyaqui cuví: yuu cha xihna ri cuví jaspe; yuu cha cu uvi cuví yuu zafiro; yuu cha cu uñi cuví yuu ágata; yuu cha cu cumí cuví yuu esmeralda;

²⁰ta yuu cu ohon cuví yuu ónice; ta cha cu iñu cornalina; ta cha cu ucha crisólito; ta cha cu uña berilo; ta cha cu ñn topacio; ta cha cu uchi crisoprasa; ta cha cu uchi ñn jacinto; ta yuu cu uchi uvi cuví amatista.

21 Ndi uchi uvi yuvehe cuan cuví chi uchi uvi tahan perla. Tahan tahan yuvehe cuan, ta chinq chi chihin noo ri perla. Ta nu cuví ityi cahnu ñuu cuan, maa ri maa xuhun cuaan cuví, tari ino cha xiño.

22 Ni noo vehe ñuhu ña nyehí chichi ñuu cuan, vatyí Sutu yo Nyoo, ra iyó tandihí tunyee ñni chii, ican cuví vehe ñuhu ñu cuan, ta tyicuan caa tucu ra cuví Mbee Luhlu.

23 Ñuu cuan ña chiñuhú cha sacundichín ñanyii. Ta ni cha ndichin yoo ta ña chiñuhú. Vatyí suri maa cha ndichin Nyoo chihin ra cuví Mbee Luhlu cuví cha sacundichin chichi ñuu cuan.

24 Tandihí ñu cha cacú añima, cucaca noo ñu nu ndichin ñuu cuan. Ta ra cacuví rey síqui ñuhu ñayiví cunyaca ra cha tyayí ra ta cuhva cuenda ra tandihí cha cahnu cacuví ra chi ñuu cuan.

25 Ta ma nacunyasi yuvehe cha ñicahñu, ta yucuan ma coo cha cha cuaa.

26 Ta tandihí cha tyayí, ta cha cahnu, cha iyó síqui ñuhu ñayiví cuchaa chi nya ñuu cuan.

27 Soco ma cuví quihví cha quiñi caa. Ni noo ñu sacuví cha quiñi caa, ni ñu cuendu ma cuví quihví ñu. Noo ri maa ñu nyaá sívi nu libru ra cuví Mbee Luhlu cuquihví ñu, vatyí cuconyito ñu chihin ra tyicuan ri maa.

22

1 Tyicuan ta sañaha ángel cuan noo yuvi cuii vavaha chii. Ndutya cha chahá cha conyito yo cuví. Cuii vavaha tari noo yutyí finu. Ta quitá yuvi cuan nuu nyaá tyayu Nyoo ta nu nyaá ra cuví Mbee Luhlu.

2 Mahñu ityi cahnu ñuu cuan ta ninduví chiyo yuvi cuan, nanyaá yutun cha chahá cha conyito yo. Ta uchi uvi chaha cha noo cuiya chahá tun chiti. Tahan tahan ri yoo chahá tun chiti. Ta ndaha tun, vaha cha cuví tatan chi ñayiví iyó síqui ñuhu ñayiví.

3 Ñuu cuan, ñahri maa cha ña vaha cucoo vatyí yucuan nyaá Nyoo nu tyayu ra ta cucunyaca ñaha ra chihin ra cuví Mbee Luhlu. Ta cusacahnu ñu cuenda ra chi ra.

4 Ta cunyehe ñu chi ra chihin nuu ñu. Ta cua cunyaa sívi ra tyaan ñu.

5 Ta ma coo ca cha cha cuaa yucuan. Ta ñu coo yucuan ma cuchihuhu ñuhu lámpara chi ñu, ni ñuhu ñanyii. Vatyí Nyoo Sutu yo cusacundichin ra nu nyicú ñu. Ta maa ñu cucunyaca ñaha ñu chihin ra tyicuan ri maa.

Nu sañahá chi vatyí cha cuyatyin quichi ra Cristo

6 Tyicuan ta catyí ángel cuan chii:

—Ihya tuhun ndicha cuví, ta cuví cuní iñun vatyí cuchino cava tuhun ihya. Ta suri maa Sutu yo Nyoo ra cahán chihin yuhu ra cacuví profeta cuenda ra ta cha naha, ican ra tachí ra chi ángel ra, vatyí sañaha ra chi ñu sacuví tyiño nuu ra yoso caa cucuvi cha numi ri —catyí ra.

Ta catyí Sutu Mañi yo:

7 —¡Cha cuñí quichi! —catyí ra.

¡Sii xaan cuñí ñu cha sacuví cuhva cahán tuhun Nyoo cha nyaá nu libru ihya!

8 Yuhu ra Juan, chiñí tuhun ihya. Ta nyehí tandihí ihya. Ta cha yahá nyehí ta chiñí, chicuiñí chiti chaha ángel cha sañaha cuan chii, vatyí sacahni chi ra.

9 Soco maa ra catyí ra chii:

—Ma sacahnun chii, vatyí yuhu, musu Nyoo cuví, tari yoho. Ta yañun cuví, tari ra yañi yo cha cacuví profeta cuenda Nyoo, ta tari tandihí ñu quichahá tuhun cha nyaá nu libru ihya. Chi Nyoo tahán chi sacahnu yo —catyí ra chii.

10 Ta catyí tucu ra chii:

—Ma tixehun tuhun Nyoo cha nyaá nu libru ihya, vatyi cha cuyatyin quivi cha cuchino cava chi.

11 Soco saña chi ñu quiñi iyó, na sacuvi ca maa ñu cuhva cuñi maa ñu. Ta ñu sacuvi cuatyí na sacuvi ca maa ñu. Soco ñu sacuvi cha vaha, na sacuvi ca ñu cha vaha. Ta ñu ii, ñu nacuhva cuenda añaima chi Nyoo, na cu ñi ca iñi ñu chihin ra —catyí ra chii.

12 Ta Sutu Mañi yo catyí ra:

—Nyehe ndo. Cha cuyatyin quivi quichi. Ta cutyiyahvi chi tahan tahan ñáyivi yoso cuhva cha sacuvi ñu, tatu cha vaha o cha ña vaha.

13 Yuhu cuví ra xihna cuiri ta yuhu cundoi nu ndihi tuhun, yuhu iyé nu quichaha tandihi ta cucoo que nu cundihí tuhun —catyí Sutu Mañi yo.

14 Sii xaan cucuvi chi ñu sanduvii sahna o añaima cuví cuan, vatyi coo ityi chi ñu cachi ñu chiti yutun cha chahá cha conyito añaima yo tyicuan ri maa. Ta cuví quihvi ñu yuvehe ñuu cuan.

15 Soco ñu cha sacuvi cha quiñi caa, ñu tasi, ñu cha iyó chihin tahan, ta ñima ñasihí ra o yii ñu cuví, ñu chahñi ñáyivi, ñu sacahnú xitohyo, ta tandihi ñu ñii cuendu ta sandavi ñaha ñu, tandihi ñu cuan, cundoo ñu ityi chata ñuu cuan.

16 Ta catyí tucu Sutu Mañi yo:

—Yuhu ra Jesús, sacuhin chí ángel cuende vatyi sacoto ra tandihi tuhun ihya chí ñu nyicú vehe ñuhu. Yuhu cuví ñáyivi chahnu chí rey David. Ta vachi tiqui tata ra ñandihí. Ta cuví tiqui tiño cahnu cha xiño, cha caña cha ñaa ca —catyí ra.

17 Tatyí Ii Nyoo ta ñasihí ra cuví Mbee Luhlu cha cuví ñu cuenda ra, catyí ñu tyehe caa:

—Ñaha, Sutu Mañi yuhu —catyí ñu.

Ta ñu chiñi tuhun ihya, ta catyí ñu chí ra:

—Ñaha —catyí ñu.

Ta ñu ityi ndutya cha conyito yo chihin, ta tandihi ñu cuñi quichi, na quichi ñu ta coho ñu ndutya cha chahá cha conyito añaima yo, ta ñahri cutyiyahvi ñu.

18 Ta yuhu catyí chí tandihi ndo cha chiñi ndo tuhun Nyoo cha nyaá nu libru ihya, yuhu sacoté chí ndo noo tuhun ihya: Tatu nya noo ñáyivi sanducuaha ca ñu tuhun ihya, Nyoo cunatyiso ca ra tindoho cha nyaá nu libru ihya siqui ñu.

19 Ta tatu nya noo ñáyivi tinyaa ñu suhva tuhun Nyoo cha nyaá nu libru ihya, Nyoo cu tinyaa ra cha tahán chí chí ñu cha nyaá nu libru cha cahán chí tuhun cha conyito ñu tyicuan ri maa ta cucoo ñu ñuu ii cuan. Ta ma tahan ca chí chí ñu cha vaha cha cahán nu libru ihya.

20 Ta Sutu Mañi yo ra cha chahá cuenda ihya catyí ra tyehe caa:

—Cha ndicha vatyi cha cuñi quichi —catyí ra.

Ta yuhu catyí:

—Na cuví chí tyicuan caa. Ñaha, Sutu Mañi yuhu, Jesús —catyí yuhu.

21 Na naquehen tandihi ndo cha vaha chahá Sutu Mañi yo Jesucristo chí yo. Ta na cuví chí tyicuan caa.